

కొండ బాసదు నెగ్గి కబ్బు 2006

The New Testament in Konda-Dora

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

మత్తయి	4
మార్కు.....	35
లూక రాస్తి సువార్త	55
యోహాను రాస్తి సువార్త	86
అపొస్తురు కిత్తి పణిజ్.....	109
అపొస్తుడు ఆతి పవులు రోమ పట్నమ్దు మన్ని దేవుణు సజమ్దివరిజ్ రాస్తి ఉత్తం.	140
అపొస్తుడు ఆతి పవులు కొరింతి పట్నమ్దు మని నమ్మిత్తి వరి సజమ్దిజ్ రాస్తి మొదోహి ఉత్తం.	156
అపొస్తుడు ఆతి పవులు కొరింతి పట్నమ్దు మని దేవుణు సజమ్ది వరిజ్ రాస్తి రుండి ఉత్తం....	170
అపొస్తుడు ఆతి పవులు గలాతియ ముటాదు మని దేవుణు సజమ్కాజ్ రాస్తి ఉత్తం	179
అపొస్తుడు ఆతి పవులు ఎపెసుదు మని దేవుణుదిజ్ నమ్మిత్తి వరిజ్ రాస్తి ఉత్తం	185
అపొస్తుడు ఆతి పవులు పిలిపియ పట్నమ్దు మని దేవుణు సజమ్దిజ్ రాస్తి ఉత్తం.....	190
అపొస్తుడు ఆతి పవులు కొలోసు పట్నమ్దు మని దేవుణు సజమ్దిజ్ రాస్తి ఉత్తం	194
అపొస్తుడు ఆతి పవులు తెస్సలోణిక పట్నమ్ది దేవుణు సజమ్జ్ రాస్తి మొదోహి ఉత్తం	198
అపొస్తుడు ఆతి పవులు తెస్సలోనిక పట్నమ్ది నమ్మిత్తి వరిజ్ రాస్తి రుండి ఉత్తం	202
అపొస్తుడు ఆతి పవులు తిమోతిజ్ రాస్తి ఉండి ఉత్తం	204
అపొస్తుడు ఆతి పవులు తిమోతిజ్ రాస్తి రుండి ఉత్తం	208
అపొస్తుడు ఆతి పవులు తీతుజ్ రాస్తి ఉత్తం.....	211
అపొస్తుడు ఆతి పవులు పిలెమునుజ్ రాస్తి ఉత్తం.....	213
ఎబ్రి లోకురిజ్ రాస్తి ఉత్తమ్దిజ్ నెల్వ కిబిసినిక	215
యాకోబు రాస్తి ఉత్తం.....	226
పేతురు రాస్తి మొదోహి ఉత్తం.....	230
పేతురు రాస్తి రుండి ఉత్తం	234
యోహాను రాస్తి మొదోహి ఉత్తం	237
యోహాను రాస్తి రుండి ఉత్తం	241
యోహాను రాస్తి మూండి ఉత్తం.....	242
యూద రాస్తి ఉత్తం	243
ప్రకటన పుస్తకం.....	245

మత్తయి

నెల్వ కిబిసినిక

దేవుణు మాటెజ్ రాస్తిమన్ని పుస్తకమాతి బయ్బలుదు వడాయ్ ఒవుమానం, కొత్త ఒవుమానం ఇజి రుండి ముక్కెజ్ మన్నె. వడాయ్ ఒవుమానమ్దు యేసుప్రబు వందిజ్ వెహ్మిమన్ని సజతిజ్, ఎలాగ పూర్తి ఆతె ఇజి కొత్త ఒవుమానం జాగర్త నద్విజి సుడఃతిజ నెస్తిజానాద్. కొత్త ఒవుమానమ్దు మన్ని మొదోహి పుస్తకమ్నె మత్తయి రాస్తి సువార్త. యేసు ప్రబు సీసుర్ లోఇ మన్ని వన్ను పెర్నికానాతి మహి మత్తయి ఇనికాండ్రె ఇక్క రాస్తమనాన్. (మత్తయి 9:9-13) యేసు ప్రబుజ్ సిలువ పాక్తి వెనుక, ఇంజాముంజా 25-35 వంటెజ్ వెనుక ఇక రాసె ఆత మనాద్. ఇజి యా సజతిజ్ వందిజ్ నెస్తికార్ వెహ్మినాన్. దేవుణు వన్ని ప్రవక్తరు వెట వర్గితిమహి క్రీస్తు ఇనికాన్ యేసుప్రబునె ఇజి యూదుర్ ఆతికార్ నెస్తిజ్ ఇజినె ఇక్క రాస్త మనాద్. యేసుప్రబు పుట్టి వందిజ్, మరి దని వెనుక జర్గితి సజతిజ్ వందిజ్ దేవుణు ముజాల వన్ని ప్రవక్తరు వెట వర్గితిక ఎలాగ అయాలెకెండెనె పూర్తి ఆతె ఇజి వడాయ్ ఒవుమానమ్దాన్ దన్ని వందిజ్ మన్ని మాటెజ్ లాగ్లి రుజుప్ కిజి తోరిసినాన్. దేవుణు ప్రవక్తరు వెట వర్గితి సజతిజ్ యేసుప్రబు బత్కరు అయాలెకెండె పూర్తి ఆతె (మత్తయి 1:23, 2:6, 14, 18, 23) ఇస్రావీలు లోకుర్ రాజా ఆతిమహి దావీదు తెగాదు పుట్టికాన్ ఇజి రుజుప్ కిదెజ్, వన్ని తెగాదు పుట్టివరి పేరుకుబా మజి తోరిసినాన్. మరి దేవుణు ఏలుబడిః కిని వందిజ్ యా పుస్తకమ్దు నండో నుట్టు రాస్త మనాద్. దేవుణు ఏలుబడిః కిని వందిజ్ యేసుప్రబు లోకురిజ్ నెస్తి కతెజ్ యా పుస్తకమ్దు 13-14 అధ్యయమ్కాజ్ రాస్త మనాద్. యేసు, దేవుణు మరిసి ఆతికాండ్రె ఇజి యా సువార్తదాన్ డటం వెహ్మినాన్.

యాక యేసు తెగ

1 అబ్రహాం తెగాదికాతి దావీదు రాజా † తెగదు పుట్టి యేసు క్రీస్తు తెగ యాక. 2 అబ్రాహాము మరిసి ఇస్సాకు, ఇస్సాకు మరిసి యాకోబు, యాకోబు మరిసిర్ యూదాని వన్ని దాద్నిర్, తంబేర్నీర్. 3 యూదా మరిసిర్ పెరెసుని జెరహు, వరి యాయ పేరు తామారు. పెరెసు మరిసి ఎస్రాము, ఎస్రాము మరిసి అరాము, 4 అరాము మరిసి అమ్మినాదాబు, అమ్మినాదాబు మరిసి నయస్సాను, నయస్సాను మరిసి సాల్మాను. 5 సాల్మాను మరిసి బోయజా, బోయజా యాయ పేరు రాహబు, బోయజా మరిసి ఓబేదు, ఓబేదు యాయ పేరు రూతు. ఓబేదు మరిసి యెసయ. 6 యెసయ మరిసి రాజా ఆతి దావీదు. దావీదు రాజా మరిసి సాలోమోను, సాలోమోను అయ్సి, ముజాల ఊరియెజ్ †† ఆల్ని ఆతి మహికాద్. 7 సాలోమోను మరిసి రెహబాము. రెహబాము మరిసి అబీయా, అబీయా మరిసి ఆసా. 8 ఆసా మరిసి యెహోసపాతు. యెహోసపాతు మరిసి యెహోరాము, యెహోరాము మరిసి ఉజ్జియా. 9 ఉజ్జియా మరిసి యోతాము, యోతాము మరిసి ఆహజా, ఆహజా మరిసి హిజ్కియా. 10 హిజ్కియా మరిసి మనసి, మనసి మరిసి ఆమోను, ఆమోను మరిసి యోసీయా. 11 యోసీయా మరిసిర్ యెకొనియని వన్ని దాద్నిర్, తంబేర్నీర్. వరి కాలమ్దు బబులోను దేసమ్దు రాజా యూదురిజ్ వెట్టిపణి కినివరిలెకెండె అసి త్హొబ్ ఒత్తాన్. 12 బబులోను దేసమ్దు సాహి వెనుక అబె యెకొనియెజ్ మరిన్ పుత్తాన్. వన్ని పేరు నయల్తీయెలు, నయల్తీయెలు మరిసి జెరుబాబెలు. 13 జెరుబాబెలు మరిసి అబీహూదు, అబీహూదు మరిసి ఎలియాకీము, ఎలియాకీము మరిసి అజోరు. 14 అజోరు మరిసి సాదోకు, సాదోకు మరిసి ఆకీము, ఆకీము మరిసి ఎలీహూదు. 15 ఎలీహూదు మరిసి ఎలియాజరు, ఎలియాజరు మరిసి మత్తాను, మత్తాను మరిసి యాకోబు. 16 యాకోబు మరిసి యోసీపు, వన్ని ఆల్ని ఆతి మరియ పాటాదు క్రీస్తు ఇజి కూకె ఆతి యేసు పుత్తాన్. 17 యా లెకెండె అబ్రాహాము బాణిజ్ అసి దావీదు రాజా దాక మొతం పద్నాల్గి తరమ్కు, దావీదు రాజా బాణిజ్ అసి యూదురిజ్ బబులోను దేసమ్దు వెట్టి పణి కిని వరిలెకెండె తోహ్నిజితి కాలమ్దాక పద్నాల్గి తరమ్కు. యూదురు బబులోను దేసమ్దు సాహి బాణిజ్ అసి యేసు క్రీస్తు దాక పద్నాల్గి తరమ్కు.

యా లెకెండె యేసు క్రీస్తు పుత్తాన్. కసిలిజాణిజ్

18 యేసు క్రీస్తు యా లెకెండె పుత్తాన్. వన్ని అయ్సి ఆతి మరియెజ్ యోసీపు వందిజ్ వెన్బాత తుహాద్. గాని వారు రివర్ ఉండ్రె బానె గూర్వండ ముందాలై అది దేవుణు ఆత్మ సత్తుదాన్ పాత డిఃస్లాద్. 19 గాని దనిజ్ పేరు కితికాన్ ఆతి యోసీపు దేవుణు రూలుజ్ లోజిజి మనికాన్ కక, విజేరిజ్ ఎద్దు సిగు కిబిస్వండ, ఎయెర్బా నెన్వండ, దన్నిజ్ డిఃసి సీదెజ్ ఇజి ఒడఃబితాన్. 20 యోసీపు యా సజతిజ్ వందిజ్ ఆలోసనం కిజి మహివలె దేవుణు దూత కలాదు వన్నిజ్ తోరె ఆజి ఈహు వెహ్మిన, "దావీదు రాజా తెగ్గతికాన్ ఆతి యోసీపు, నిజి పేరుకితి మని మరియెజ్ డగ్గుకిదెజ్ అనుమానం ఆమ. ఎందనిజ్ ఇహిజ దేవుణు ఆత్మ సత్తుదాన్ అది పాత డిఃస్ మనాద్. 21 అది ఒరెన్ కొడః ఇడనాద్లె. వన్ని లోకాజ్ వరి పావమ్కాణిజ్ వాండ్రు రక్సిస్సాన్లె. అందెజి వన్నిజ్ యేసు † ఇజి పేరు ఇడదెజ్వలె", 22-23 "ఉండ్రె విడిః బోదెలి పాత డిఃసి ఒరెన్ మరిన్ ఇడ్నాద్లె. వాండ్రు ఇమ్మానుయెలు ఇజి కూకె ఆనాన్లె ††", ఇమ్మానుయెలు ఇహిజ దేవుణు మా వెట తోడుః మనాన్ ఇజి అర్లం. ముందాల దేవుణు ప్రవక్త వెట వర్గితి యా మాటెజ్ నిజం పూర్తి ఆదెజ్ యాకెజ్ విజా యా లెకెండె జర్గితె. 24 యోసీపు

† దావీదు ఇస్రాయేలు లోకుర్ వందిజ్ దేవుణు ఏర్పాటు కితి రాజా. వాండ్రు ఇస్రాయేలుది రుండి రాజా వన్ని ముజాల సవులు ఇనికాన్ ఏలుబడిః కిజి మహాన్. †† 1:6 2నము 11:1-27.
‡ యేసు ఇని మాటెజ్ అర్లం, యెహోసప దేవుణు రక్సిస్సాన్ సీల్లిజ సాయం కిజినాన్. †† 1:22-23 యెసయ 7:14.

నిద్రదాన్ తెలివితీజ్ దేవుణు దూత వన్నిజ్ వెహ్తి వజనె మరియెజ్ ఆల్ని లెకెండ్ వన్ని ఇండ్రొ కూక్త ఒతాన్. 25 గాని మరియ మరిన్ ఇడ్డిదాక వాండ్రు దని డగ్రు సాన్ ఏతాన్. మరిన్ పుట్టిజ్ వాండ్రు వన్నిజ్ యేసు ఇజి పేరు ఇట్టాన్.

తూర్పుదాన్ గ్నానురు వాజినార్

2 హేరోదు రాజు ఏలుబడిః కిజి మహివలె యూదయ దేసమ్దుమని బెత్తెహెము ఇని నాటొ యేసు పుట్టాన్. వాండ్రు పుట్టి వెనా, తూర్పు దరోటాన్ గ్నానురు † యెరూసలేం ఇని పట్టుమ్దు వాతార్ 2 పట్టుమ్దు వాతార్, “యూదురిజ్ రాజు ఆదెజ్ ఇజి పట్టి కొడొః ఎంబె మనాన్? వాండ్రు పుట్టిదన్నిజ్ గుర్తు తొరిసిని సుక్క, మాపు తూర్పుదరోటు సుడ్తాప్. వన్నిజ్ పొగడిఃజి మాడిఃసైజ్ ఇజి వాత మనాప్”, ఇజి వెహ్తార్. 3 యా మాటెజ్ విహారె హేరోదు రాజుని వన్నివెల యెరూసలేమ్దికార్ విజెరె నండో గాబ్ర ఆతార్. 4 హేరోదు రాజు, పెరి పుజెరిజ్ విజెరిజ్ని యూదురి రూలుజ్ నెస్సిన్ని వరిజ్ విజెరిజ్ కూక్సిస్తాండ్రె, “క్రీస్తు ఆతికాన్ ఎంబె పుట్టాన్?”, ఇజి వెన్బాతాన్. 5 “యూదయ దేసమ్దుమని బేత్తెహెముదు”, ఇజి వారు వెహ్తార్, “ఎందనిజ్ ఇహిజ, యా లెకెండ్ దేవుణు ముజాల ఒరెన్ ప్రవక్త వెల వర్గిత మహాన్.”

6 “యూదయ దేసమ్దు మని బేత్తెహెమా, నీను యూదయ నాహ్కజ్ లొఇ ఇజిరికి ఆఇ. ఎందనిజ్ ఇహిజ, నీ లొఇహాన్ ఒరెన్ రాజు లెకెండ్ † ఏలుబడిః కినికాన్ పుట్టాన్లె. వాండ్రు నా లోకుర్ ఆతి ఇస్తాయేలు లోకురిజ్ గపుడుఎన్ లెకెండ్ మంజినాన్లె.” 7 నస్తివలె హేరోదు రాజు, మరి ఎయెర్బా నెన్ ఏండ గ్నానురుజ్ కూక్సిస్తాండ్రె సుక్క తోరె ఆత్తి సరియాతి టయం వరిజ్ వెన్బాజి నెస్తాన్. 8 వరిజ్ బేత్తెహెమ్దు షాక్తాండ్రె, “మీరు సాన్ని నెగ్రెండ అయా కొడొఃదిజ్ రెబాజి సుడ్ఃజి వాండ్రు ఎంబె మనాన్ ఇజి నజీబా కట్టురు తగ్గల. అయావలె నానుబా సాన్ని వన్నిజ్ పొగడిఃజి మాడిఃస్స”, ఇజి వరిజ్ వెహ్తాన్. 9 వారు రాజు వెహ్తి మాట విహారె సాతార్. సాన్ని మహివలె, వారు తూర్పు దరోటు సుడ్ఃతిమహి సుక్క, వరి ముందాల నడిఃజి మహాద్. కొడొః మహి బాడ్డి ముస్సు అందితిజ్ అయా సుక్క అబ్బె నిహాద్. 10 సుక్క సుడ్ఃతిజ్ వారు గొప్ప సర్ద ఆతార్. 11 ఇండ్రొ సాహారె అయేసి ఆత్తి మరియ వెల మన్ని కొడొఃదిజ్ సుడ్ఃతారె ముణుకుజ్ ఊర్జి వన్నిజ్ పొగడిఃజి మాడిఃస్తార్. నస్తివలె వారు ఒత్తిమహి పెటెజ్ రేతారె బజారం, సాంబ్రాణి, బోలాం † ఇనికెజ్ వన్నిజ్ నొండిత సితార్. 12 “హేరోదు రాజు డగ్రు మర్జి సాన్మాట్”, ఇజి దేవుణు దూత కలారు వరిజ్ వెహ్తి వజ, వారు మరి ఉండ్రె సరిదాన్ వరి దేసిం సాహార్.

అయ్గుప్తు దేసమ్దు సాన్నినార్

13 గ్నానురు మర్జి సాహి వెనుక ఒరెన్ దేవుణు దూత యోసేపుజ్ కలారు తోరె ఆజి, “నీను నిజ్ల, హేరోదు రాజు కొడొఃదిజ్ సప్తజ్ సుడ్ఃజినాన్. అందెజె వెలనె కొడొఃదిజ్ని అయేసిజ్ అసి అయ్గుప్తు దేసమ్దు సాన్లె. మరి ఇనిక కిదెజ్ ఇజి నాను నిజి వెహ్తిదాక అబెనె మన్లె”, ఇజి వెహ్తాన్. 14 నస్తివలె వాండ్రు నిజితండ్రె, కొడొఃదిజ్ని అయేసిజ్ అస్తాండ్రె అయా షాదొయేనె అయ్గుప్తు దేసమ్దు సాండ్రెజ్ సాతాన్. 15 హేరోదు సానిదాక అబెనె మహాన్. “అయ్గుప్తు దేసమ్దాన్ నా మరిసిజ్ నాను కూక్త”, ఇజి దేవుణు ముందాల ప్రవక్త వెల † వర్గితి మాట యా లెకెండ్ పూర్తి ఆతాద్. 16 గ్నానురు వన్నిజ్మోసం కితార్ ఇజి నెస్తాండ్రె హేరోదు రాజు నండొ కోపం ఆతాన్. వారు వెహ్తి టయమ్దిజ్లెక కితాండ్రె బేత్తెహెమ్దుని, మరి డగ్రు మని ప్రాంతమ్కాజ్ మన్నినాహ్కాజ్ మన్ని రుండి పంటెజ్ని దన్ని అడిఃగి వయేసు మని కొడొఃరిజ్ విజెరిజ్ సప్తజ్ ఆడ్ర సితాన్.

17-18 “రామా నారుదాన్ ఉండ్రె పెరి జాటు వెహాద్. గుండె కొత్తె ఆజి అడఃబాజిని జాటునె. రాహేలు † దన్ని కొడొఃర్ వందిజ్ అడఃబజినాద్. కొడొఃర్ సాతిజ్ అది ఓరిస్సెజ్ అట్ ఏతాద్.” యిరిమ్మ ప్రవక్తవెల దేవుణు ముజాల వర్గితిమహి యా మాట యాలెకెండ్ పూర్తి ఆతాద్.

నజరేతుడు మర్జి వాజినార్

19 హేరోదు సాతి వెనుక అయ్గుప్తు దేసమ్దు మహి యోసేపుజ్ ఒరెన్ దేవుణు దూత కలారు తోరె ఆతాండ్రె, 20 “నీను నిజ్ల, కొడొఃదిజ్ని అయేసిజ్ అసి ఇస్తాయేలు దేసమ్దు సాన్లె. ఎందనిజ్ ఇహిజ, కొడొఃదిజ్ సప్తజ్ సుడ్ఃజి మహికార్ సాత సాహార్”, ఇజి వెహ్తాన్. 21 అందెజె యోసేపు నిజితాండ్రె కొడొఃదిజ్ని అయేసిజ్ అస్తాండ్రె ఇస్తాయేలు దేసమ్దు మర్జి సాండ్రెజ్ సాతాన్. 22 గాని హేరోదు సాతి వెనుక వన్ని మరిసి ఆతి అర్కెలాయు యూదయ దేసమ్దు ఏలుబడిః కిజినాన్ ఇజి నెస్తాండ్రె అబ్బె సాండ్రెజ్ తియెలాతాన్. కలారు వెహ్తి లెకెండ్ యూదయ దేసిం సాన్ ఏండ గలీలయ ముటూదు సాహాన్. 23 అబ్బె నజరేతు ఇని పట్టుమ్దు సాహాండ్రె బత్తితాన్. “నజరేతుదికాన్ ఇజి వాండ్రు కూకె ఆనాన్లె”, ఇజి దేవుణు ప్రవక్తరు వెల క్రీస్తు వందిజ్ వర్గితిమహి మాటెజ్ యా లెకెండ్ పూర్తి ఆతె.

బాప్తీసం సీని యోహాను యేసువందిజ్ సరి తయార్ కిజినాన్.

3 1-2 అయ దినమ్కాజ్ బాప్తీసం సీని యోహాను వాతండ్రె, “దేవుణు ఏలుబడిః కిని కాలం డగ్రు ఆత మనాద్. అందెజె మీరు పాపమ్కు ఒప్పుకొడిఃజి డిఃసి సీదు”, ఇజి యూదయ బిడిఃజ్ బూమి ప్రాంతమ్కాజ్ సాటిసి మహాన్. 3 “ప్రబు లోకుడగ్రు వాదెజ్ సరి తయార్ కిదు, వన్ని వందిజ్ సరి తినాజ్ కిదు”, ఇజి బిడిఃజ్ బూమిదాన్ ఒరెన్ డేల్లి వెహ్సిని కంటం వాజినాద్ †† ఇజి యెసయ ప్రవక్త వెల దేవుణు ముందాల వర్గితిక విని వందిజె. 4 యోహాను ఒంటె బులుస్కాణిజ్ తయార్ కితి సాకెజ్ తొడిఃగితాండ్రె, నడుముదు తోలు బెట్టు తొహె ఆజి మహాన్. వాండ్రు మేవెలెకెన్ అడిఃవి తేనె, తింజి బత్తిజి మహాన్. 5 యెరుసలేమ్దికార్ని, యూదయ దేసమ్దికార్ విజెరె, మరి యెర్దాను గడ్డ డగ్రు మని నాహ్కాణికార్ విజెరె సాతారె యోహాను వెహ్తికెజ్ వెండ్రెజ్ వన్నిడగ్రు వాతార్. 6 వారు, కితి పాపమ్కు ఒప్పుకొడిఃజి యెర్దాను గడ్డదు వన్ని కియూదాన్ బాప్తీసం లాగె ఆజి మహార్. 7 వరిసయరు, మరి సదుకయరు నండొండార్

† సుక్కిజ వందిజ్ సదుపు నెస్తికార్. †† మికా 5:2. ‡ సాంబ్రాణిసాంబ్రాణి ఇని మరాన్దాన్ దోహ్కీ నెగ్గె వాసనం మన్ని గొప్ప విలువాతి ఒస్తు బోలంబోలం ఇని మరాన్దాన్ నెగ్గె వాసనం మన్ని ఒస్తు మాయమ్కు లెకెండ్బా పజీ కినాద్. †† 2:15 హోసెయ 11:1. ††† ఇస్తాయేలు (యూదురి) లోకురిజ్ అనిగోగొ ఆతి ఇస్సాకు మరిసియాతి యాకోబు ఆల్సినె రాహేలు. నెబక్కెద్నెసర్ నెబులొనుదు ఏలుబడిః కిజి మహివలె ఎప్తయేసిది యూదురిజ్ అప్త ఒత్తాన్. వరి లొఇ నండొండార్ బానె నప్ప ఆతార్. ††† 3:3 యెసయ 40:3.

యోహాను బాప్తిసం సీజి మహిబాన్ వాతాన్. వరిజ్ నుడఃజి వాండ్రు ఈహు వెహ్సాన్, "మీరు విసం మన్ని సరాన్ లెకెండ మన్నికిదెర్. దేవుణుబాణిజ్ కోపం వాజినాద్ ఇజి నమ్మిజి మీరు వాతిదెరా? సిల్లెద్. వన్ని కోపమ్దాన్ తప్ప అదెజ్ ఇజి మీరు వాతిదెరా? నిజమె అయలెకెండ ఇజి నాను ఒడిదెజ్ సిల్లెద్. 8 మీ పాపమ్కు ఒప్పుకొడిజి డిఃసి సీజి దనిజ్ తగితి పణిజ్కిజి తోరిస్తు. 9 'మాపు అబ్రాహము తెగ్గాతికాప్, అందెజి మాపు సిక్సదాన్ తప్ప ఆనాప్' ఇజి మీ మనుషుదు మీరు ఒడిబిమాట్. ఎందనిజ్ ఇహిజ, యా పణకాణిజ్ అబహమ్ముజ్ కొడెఃర్ పుటిస్తెజ్ దేవుణు అట్టికాన్ ఇజి నాను మిజి వెహ్సిన. 10 దేవుణు మరెక మొదోల్ కత్తి విసీర్దెజ్ కియుదు గొడలి అస్తి వన్నిజ్ పాలిత మనాన్. నెగ్గి పట్టు అన్ఇ మరెకాజ్ విజా కత్తి సిసుద్ విసీర్దాన్లె. 11 మీరు పాపమ్కు ఒప్పుకొడిజి డిఃస్తి సీతి వందిజ్. నాను మిజి ఏరుదాన్ బాప్తిసం సీజిన. నా వెనుక వానికాన్ నజీ మిస్తి అతికారం మనికాన్. వన్ని జోడ్కు పిండెదెజ్బా నాను తగ్గిక ఆఎ. వాండ్రు దేవుణు ఆత్మదాన్ని, సిసుదాన్ మిజి బాప్తిసం సీనాన్లె. 12 వాండ్రు గాలి ఇడ్డి సీహి కీదు అస్తి వన్నిజ్ పాలిత మనాన్. వాండ్రు వన్ని కలమ్దిజ్ సుబారం కిజి గాలి ఇట్టి కూలిజ్ కొటు ఇండ్రొ ఒసి వాక్సాన్లె. పాటుదిజ్ నంబిఇ సిసుదు సురీనాన్లె."

యేసు బాప్తిసం లాగె ఆజినాన్.

13 నస్తివలె యోహాను కీదాన్ బాప్తిసం లాగె అదెజ్, గలిలయదాన్ యేసు యొద్దాను గడ్డదు వాతాన్. 14 "నీ కియుదాన్ బాప్తిసం లాగె అదెజ్, నజీ అవ్సరం గాని నీను బాప్తిసం లాగె అదెజ్ నా డగ్గు వాతిదా?", ఇజి యోహాను వన్నిజ్ అడ్డు కిదెజ్ సుడ్తాన్. 15 "ఏలు యా లెకెండ జరిగిపిద్. విజా యా లెకెండ దేవుణుదిజ్ ఇష్టమాతివజి పూర్తి కినిక మజి తగ్గు", ఇజి యేసు వెహ్సాన్. నస్తివలె యోహాను ఒప్పుకొటాన్.

16 బాప్తిసం లాగె అతి వెలనె యేసు ఏరుదాన్ వెల్లి వాతాన్. అయావలెనె ఆగాసం రే ఆతాద్. దేవుణు ఆత్మ పాపురపాటి లెకెండ యేసు ముస్సు డిగ్జి వానిక యోహాను సుడఃతాన్. 17 "పిండ్రు నా ఇష్టమాతి మరిన్, విని ముస్సు నాను నండొ సర్ద ఆజిన", ఇజి దేవుణు మంజిని బాడిఃదాన్ వెహ్సిన ఉండ్రొ జాటు వాతాద్.

యేసుజ్ సయ్యాన్ పరిస కిత్తిక.

4 వెనుక దేవుణు ఆత్మ యేసుజ్ బిడిజ్ బూమి ప్రాంతమ్దు నడఃపిస్తాన్. అబె సయ్యాన్ యేసుజ్ తప్ప కిబిస్తెజ్ పరిస కిజి సుడఃతాన్. 2 నలవయి రోస్సు, రెయు పాకల్ఠపాస్మహి వెనుక వన్నిజ్బజి కట్టాద్. 3 సయ్యాన్ వన్ని డగ్గు వాతండ్రె, "నీను దేవుణు మరిసి ఇహిజ, యా పణకుజి తిండి ఆల ఇజి వెహ్సా", ఇజి వెహ్సాన్. 4 నస్తివలె యేసు "లోకు బత్రిజినిక తిండిదాన్ అఎద్, గాని దేవుణు వెయుదాన్వాని విజా మాటెజాణిజ్బా బత్రిజినాన్ ఇజి దేవుణు మాటదు రాస్త మనాద్" †, ఇజి వన్నిజ్ వెహ్సాన్.

5 వెనుక సయ్తాను యేసుజ్ దేవుణు పట్టు అతి యెరుసలేముదు కూక ఒతండ్రె, అబె మని దేవుణు గుడిః కొసాదు నిల్వ్రాన్. 6 అబె నిల్వ్రాండ్రె "నీను దేవుణు మరిసి ఇహిజ, ఇబ్బెణిజ్ అడిఃగి డాట్అ. 'నీ వందిజ్ వన్ని దూతరిజ్ దేవుణు ఆడ్ర సీనాన్. నీ కాల్కు పణకుజి తగ్గిలీండ వారు నిజి పరి కికాణిజ్ పెర్న అస్సార్" †† ఇజి దేవుణు మాటదు రాస్త మనాద్", ఇజి వెహ్సాన్. 7 యేసు వన్నిజ్, "నీ ప్రబు ఆతి దేవుణుదిజ్ పరిస కిదెజ్ అఎద్" † † ఇజిబా రాస్త మనాద్", ఇజి వెహ్సాన్.

8 మరి ఉండ్రొ సుటు, సయ్తాను యేసుజ్ నండొ ఎత్తు మని ఉండ్రొ గొరోన్ ముస్సు ఎకిస్తాండ్రె యా లోకమ్దు మని విజా దేసెమ్కాజ్, మరి వన్కాజ్ ముస్సు ఏలుబడిః కినివరి అతికారమ్ని పరిజ్ కలిగితి మనికెజ్ విజా తోరిస్తాన్. 9 అక్కెజ్ తోరిస్తాండ్రె, "నీను నా ఎద్దు ముణుకుజ్ ఊర్జి నజీ పాగిడిఃజి మాడిఃస్తిజి యాకెజ్ విజా నాను నిజి సీన", ఇజి వెహ్సాన్. 10 యేసు వన్ని వెట, సయ్తానా, నా బాణిజ్ సాన్ల, "నీ ప్రబు ఆతి దేవుణుదిజ్ పాగిడిఃజి మాడిఃసి, వన్నిజె సేవ కిదెజ్ ఇజి దేవుణు మాటదు రాస్త మనాద్", ఇజి వెహ్సాన్.

11 అయావలె సయ్తాను వన్నిజ్ డిఃసి సాహాన్. దేవుణు దూతార్ వాజి వన్నిజ్ నెగెన్ సుడఃతాన్.

యేసు సువార్త సాటిస్తెజ్ మొదోల్సినాన్

12 యోహాను కయ్ది మహాన్ ఇజి విహండ్రె యేసు గలిలయదు మని నజరేతు ఇని పట్నమ్దు మరీజి వాతాన్. 13 వెనుక యేసు నజరేతు పట్ను డిఃసి జెబులూను, నస్తాలి ప్రాంతమ్కాజ్ డగ్గు, గలిలయ సందారం పడఃకాదు మని కపెర్నహమ ఇని పట్నమ్దు వాతండ్రె బత్రితాన్. 14-16 "జెబులూను ప్రాంతమా, నస్తాలి ప్రాంతమా, యోర్దాన్ అతాహ పడక సమ్దరం డగ్గు మని యూదురు ఆఇకార్ బత్రిజిని గలిలయ ప్రాంతమా, సీకటిదు బత్కిజి మహికార్ గొప్ప జాయ్ సుడఃతాన్. సాపు ఉండ్రొ నీడ లెకెండ మని దేసమ్దు బత్కిజి మహి లోకుర్ ముస్సు జాయ్పుట్టాద్" ††. ఇజి దేవుణు ముజాల యెసయ ప్రవక్త వెట వగ్గితి మాట యా లెకెండ యేసు వాతిజ్ పూర్తి ఆతాద్. 17 అయా వలెహాన్ అని యేసు, "దేవుణు ఏలుబడిః కిని కాలం డగ్గు ఆత మనాద్. అందెజి మీ పాపమ్కు ఒప్పుకొడిజి డిఃసి సీదు", ఇజి సాటిస్తెజ్ మొదోల్సినాన్.

యేసు సిసూరిజ్ కూక్సినాన్

18 యేసు గలిలయ సమ్దరం ఒడుదాన్నడిసి మహివలె, పేతురు ఇజి కూకె ఆతీసీమోనుజ్ని, మరి వన్ని తంబెరీసి ఆతి అంద్రెయెజ్ సుడఃతాన్. వారు జాలెరిజు. వీరు రివీర్ సమ్దరమ్దు వలె పాక్సి మొయెజ్అసి మహాన్. 19 "నా వెట రదు. నా వెట వాదెజ్ లోకురిజ్ నెస్సిస్సివరి లెకెండ నాను మిజి తయార్ కినాల", ఇజి యేసు పరిజ్ వెహ్సాన్. 20 వారు వెటనె పరి వలెజ్డిఃస్తారె వన్ని వెనుక సాహాన్. 21 అబెణిజ్ సాస్సి మహిజ్యేసు జెబెదాయి మరిసి ఆతి యాకోబుజ్ని,

† 4:4 ద్వితీ 8:3. †† 4:6 కీర్తన 91:11,12. ‡ 4:7 ద్వితీ 6:16. †† 4:14-16 యెసయ 9:1-2.

వన్ని తంబెర్సి ఆతి యోహానుజ్ సుడేతాన్. వారు రిఎర్వరి బుబ్బు ఆతి జెబెదాయి వెట డోణిదు వలెజ్ నెగెణ్కిజి మహివలె యేసు వరిజ్ కూక్తాన్. 22 వెటనె వారు వరి డోణిని వరి బుబ్బెజ్డిఃస్తారె వన్ని వెనుక సాహర్.

యేసు జబ్బుది వరిజ్ నెగెండ్ కిజినాన్.

23 యేసు గలీలయ దేసిం విజా బూలాజి యూదురు మీటిజ్ కిజిని ఇల్కాజ్ వరిజ్ నేస్సిసి, దేవుణు ఏలుబడిః కిని కాలం వందిజ్ సువార్త సాటిసి మహాన్. విజా రకమ్ది జబుది వరిజ్నె బాదదాన్ఇజ్ మహివరిజ్ నెగెండ్ కితాన్. 24 యేసు పేరు సిరియ దేసమ్దు విజా సారితాద్. రకరకమ్ది జబుదివరిజ్లోకుర్వన్ని డగ్రు తతార్. నండో నోసిదాన్బాద ఆజి మహి వరిజ్, దెయం అస్తి వరిజ్, మూర్న జబు మహి వరిజ్, కిక్కుకాల్కు సాతివరిజ్వన్ని డగ్రు తతిజ్వాంధ్రు వరిజ్ నెగెండ్ కితాన్. 25 గలీలయ, దెకపాలి †, యెరూసలేము, యూదయ, యెర్దాను అతాహి పడెకదాన్ మంద లోకుర్ వాజి వన్ని వెట సాహర్.

గొరొన్ ముస్సు కిత్తి బోద.

5 యేసు మంద లోకురిజ్ సుడేతాంధ్రె ఉండ్రి గొరొత్ ఎక్తాన్. అబె బనిమహిజ్, వన్ని సిసూర్ వన్ని డగ్రు వాతార్. 2 అయావలె వాంధ్రు వరిజ్ యా లెకెండ్ వెస్సి బోదిస్సెజ్ మొదోల్స్నాన్. 3 “దేవుణుదిజ్ సెందితిలెకెండ్ బత్తిజి దన్నిలోఇ మాపు తకుదికాప్” ఇజి నెసి మజి మరి మండ్రెజ్ ఎయెర్బా ఇజి కోరిజినరో, దేవుణు సీజిని దీవనమ్కు మంజినె. ఎందనిజ్ ఇహిజ, వారు దేవుణు కిని ఏలుబడిఃదు మంజినార్. 4 ఏలు దుకమ్దాన్ అడెబాజి మన్నికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ దేవుణు వరిజ్ ఓదరిస్నాన్. 5 ఏపాలి గుణం మనికార్ దేవుణు సీని దీవనంకు మంజినికార్ ఆనార్లె ఎందనిజ్ ఇహిజ యా లోకం విజా వరి సాంతం ఆనాద్.

6 దేవుణు వెస్తి వజ సీతినిజాయిదాన్ మండ్రెజ్ ఇజి నండో ఆస మనికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ వరి మస్సు నింధ్రు ఆనిలెకెండ్ వరి ఆసిజ్ దేవుణు తీరిస్నాన్లె. 7 కనికారం తోరిస్సికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ దేవుణు వరి ముస్సు కనికారం తోరిస్నాన్లె. 8 నెగ్గి మస్సు మనికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ వారు దేవుణుదిజ్ సూణార్లె.

9 లోకుర్ సమాదనమ్దాన్ మండ్రెజ్ ఇజి వణి కినికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ వారు దేవుణు కొడోర్ ఇజి కూకె ఆనార్లె. 10 దేవుణు వెస్తి వజ నాయం వందిజ్ మల్లెజ్ ఓరిస్సికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ వారు దేవుణు కిని ఏలుబడిఃదు మంజినార్లె.

11 నా ముస్సు నమకం ఇట్టి వందిజ్ లోకుర్ మీ ముస్సు నిందెజ్ మోస్సి మిజి మల్లెజ్ కిజి, మరి మీ ముస్సు అబద్ధమాతి సెఇ మాటెజ్ విజా వెస్సి వెలె మీరు దేవుణు సీని దీవనమ్కు మంజినికార్. 12 అయావలె నండో సర్ద ఆజి మంధ్రు. ఎందనిజ్ ఇహిజ వరిలోకామ్దు †† మిజి నండో వలం దోహొక్కాద్లె. మీ ముందాల బత్తిజి మహి దేవుణు ప్రవక్తరుజ వెటబా వారు యాలెకెండ్ మల్లెజ్ కితార్.

సారు - జాయ్

13 మీరు యా లోకమ్దు సారు ననికెదెర్. గాని, సారుదిజ్ † రుసి సాహిజ, ఎలాగ దనిజ్ రుసి మర్జి తప్పిస్సెజ్ ఆనాద్? అక వెల్లి విసీర్జి లోకుర్ మట్టెజ్నె ఆఎండ మరి ఇని పణిదిజ్బా రఇక. 14 మీరు యా లోకమ్దు మనివరిజ్ జాయ్ననికెదెర్. గొరొన్ ముస్సు మని పట్టుం డాజ్జి మండ్రెజ్ అబ్విద్. 15 ఎయెర్బా ఉండ్రి దీవ కసిసి తూముదాన్ ముసి ఇడ్ఎర్. గాని ఇండ్రొణివరిజ్ విజెరిజ్ జాయ్సినివజ దీవ కంతూదునె ఇడ్నార్.

16 అయాలెకెండ్నె, మీ బత్తు విజెరిజ్ జాయి సీనివజ మండ్రెజ్. నస్తివలె మీరు కిని నెగ్గి పణిజ సుడేజి లోకుర్ విజెరి దేవుణు మంజిని బాడిఃదు మని మీ బుబాతి దేవుణుదిజ్ పాగిడిఃనార్.

దేవుణు సీతి రూలుజ వందిజ్

17 దేవుణు సీతి రూలుజ్ గాని, దేవుణు ప్రవక్తరు వెస్తి మాటెజ్ గాని డెయ్జి పాక్తెజ్నాను వాత మన్న ఇజి మీరు ఒడ్బిమాట్. వనకాజ్ డెయ్జిపాక్తెజ్ ఇజి సిల్లెద్, గాని అయాలెకెండ్నె పూర్తి కిదెజ్నె నాను వాత మన్న. 18 ఏలుహాన్ అసి బూవి ఆగాసం సిల్లెండ్ ఆతిజ్బా దేవుణు మాటదు మని ఉండ్రి ఇజిరి అక్సరం గాని, సున్న గాని, రాస్తి మని లెకెండ్ పూర్తి ఆవండ సాన్ఉ ఇజి నాను మిజి నిజం వెస్సిస.

19 ఎయెర్బా దేవుణు మాటదు మని ఇజిరి ఆగ్నేజ్ లోఇ ఉండ్రి దనిజ్ లోజిజి మన్ఏండ, అయాలెకెండ్ లోజిఏండ మండ్రెజ్ ఇజి లోకురిజ్ నెస్సిస్తిజ వన్నిజ్, దేవుణు ఏలుబడిః కినివరి లోఇ లావ్ ఇజిరికాన్ లెకెండ్ వాంధ్రు ఇడ్నాన్లె. గాని ఎయెర్బా దేవుణు మాటదు రాస్తిమని లెకెండ్ లోకురిజ్ నెస్సిసి అయాలెకెండ్నె కిజి మహిజ దేవుణు ఏలుబడిః కినివరి లోఇ వారు గొప్ప పెరికార్ ఆనాన్లె.

20 మీరు కిని పణిజ్, పరిసయ్రుజుని యూదురి రూలుజ్ నెస్సిస్సికార్ కిని పణిజ ముస్సు, దేవుణు ముందాల ఒదె సరి ఆతికెజ్ ఇహిజనె, మీరు దేవుణు కిని ఏలుబడిఃదు మంజినెదెర్లె ఇజి నాను మిజి వెస్సిస.

† దెక్కుపాలి ఇహిజ వది పట్టుమ్కు ఇక్సెజ్ గలీలయ సమ్దరం అతాహ పడక మహి. †† దేవుణు మంజినిమబాడ్డి † యేసుప్రబు కాలమ్దు ఏలు దోహొక్తి లెకెండ్ మన్ని సారు నీల్లెతాద్. అయావలె సారువెట త్తెల్లని ఇస్కూబా కూడిత మహి తడి కిత్తిజ సారు విజా కరిగిజి సానాద్, ఇస్కూ మిగిలినాద్. అయావలె లోకుర్ సారు రుసి నీల్లిక ఇజి వెస్సి మహర్.

సన్నిక ఆపద్

21 “లోకాజ్ నప్పజ్ ఆపద్” † ఎయెన్బా ఒరెన్ వన్నిజ్ నప్పజ, వన్నిజ్ తవ్విండ తీర్పు వానాద్లె ఇజి ముందాహాన్ అసి వెహ్తి మని మాట మీరు వెహిమనిదెర్ గదె? 22 గాని ఏలు నాను మిజి వెహ్తిక ఇనిక ఇహిజ ఎయెన్బా, మరి ఒరెన్ వన్ని ముస్సు, కోపం అతిజ వన్నిజ్ తీర్పు వానాద్. ఎయెన్బా మరి ఒరెన్ వన్నిజ్ “పణిదిజ్ రెఇకి”, ఇజి వెహ్తిజ వాండ్రు నన్హద్రి నజం ఎద్రు దన్ని వందిజ్ నమాదనం వెహ్తిజవలె. ఎయెన్బా మరి ఒరెన్ వన్నిజ్ “బుద్ది సిలికి”, ఇజి వెహ్తిజ, వాండ్రు ఎలాకాలం సిను కసి మంజిని బాడిడు అర్న మంజినాన్.

23-24 నీను దేవుణుదిజ్ నంద సుర్ని మాళి పీటాదు నంద సిదెజ్ సానివెలె, మరి ఒరెన్ వన్నిజ్ నీ ముస్సు, ఇనికాద్ కోపం మనాద్ ఇజి అబె నిజి ఎతు వాతిజ, నంద సిదెజ్తతి వన్నిజ్ అబె ఇడెజి వెటనె నంద సుర్ని మాళిపీట డిసి సాన్ని, ముందాల నీను వనివెట రాజినం ఆల. వెనుక మర్జి వాజి దేవుణుదిజ్ నంద సుర్ని సిల. 25 నిజి కోర్టు కిదెజ్ అకు మని వన్ని వెట బేగి రాజినం ఆల. టయం మనివెలెనె ఆక కిల. సిలిజ వాండ్రు నిజి తీర్పు కిని వరిజ్ ఒవజెహ్నాన్. తీర్పు కినికార్ నిజి జెలిదు ఇడ్దెజ్ అతికారిజ్ ఒవజెహ్నార్. వాండ్రు నిజి జెలిదు ఇడ్నాన్. 26 ఉండ్రె వయ్యబా సిల్లెండ అపు మనిక విజా సీనిదాక నీను వెల్లి వాదెజ్ అల్ఇ, ఇజి నాను నిజి నిజం వెహ్తిన.

27 “రంకు బూలాదెజ్ ఆపద్” ఇజి వెహ్తి మనిక మీరు వెహి మనిదెర్ గదె. 28 గాని నాను మిజి వెహ్తిక ఇనిక ఇహిజ ఎయెన్బా మన్సుదు సెఇ ఆనదాన్ ఉండ్రె అయిలి కొడెడిజ్ బేస్తెజ వాండ్రు అయావలెనె దనివెట వన్ని మన్సుదు పావం కితికాన్ ఆజినాన్. 29 నీ ఉణెర్ కణక నిజి తపు కిబిస్తెజ దనిజ్ లాగ్గి వసీర్ల. నీనె ఎల్ల కాలం సిను మంజిని బాడిడు సాన్ని అర్ఎండ, మీ ఒడెల్దాన్ ఉండ్రె ముక సాహిజ అక్కాదె నెగెద్. 30 మరి నీ ఉణెర్ కియు నిజి తపు కిబిస్తెజ, దనిజ్ కత్తి విసీర్ల. నీనె ఎలాకాలం సిను మంజిని బాడిడు సాన్ని అర్ఎండ, నీ ఒడెల్దాన్ ఉండ్రె ముక సానికదె నెగెద్. 31 ఎయెన్బా వన్ని అల్నిజ్ డిసి సిదెజ్ ఇహిజ ఇబ్బెణిజ్ అసి నీను నా అల్ని ఆపద్ ఇజి దనిజ్ ఉండ్రె విడిఱకు రాసి సిదెజ్ ఇజి వెహ్తిక మీరు వెహి మనిదెర్ గదె? 32 గాని నాను మీ వెట వెహ్తిక ఇనిక ఇహిజ, రంకు బూలాఇదనిజ్ మాసి డిసి సీతిజ, వాండ్రు దనిజ్ రంకు బూలాదెజి కిబిస్తెకాన్ ఆజినాన్. మరి ఎయెన్బా దనిజ్ పెండెలి కితిజ వాండ్రు దనివెట రంకు బూలానికాన్ ఆజినాన్.

ప్రమాణమ్కాజ్ వందిజ్

33 మరి ఇనిక ఇహిజ, “నీను కితి ఒట్టు పాక్తిక అయాలెకెండ కివిండ తప్పజ్ ఆపద్, దేవుణు ముందాల కితి ఒట్టుదిజ్ అయావజనె కిదెజ్” ఇజి వెహ్తిక ముందాహాన్ అసి మీరు వెహిమనిదెర్ గదె. 34 నాను మీ వెట వెహ్తిక ఇనిక ఇహిజ ఇనిదనిజ్ బా ప్రమాణం కిమాట్. ఆకాసం తోడుః ఇజి వెహ్మాట్, అక దేవుణు బసిని సింహానం. 35 సిలిజ బూమి తోడుః ఇజి వెహ్మాట్, అక దేవుణు వన్ని కాల్యు ఇడ్డి పీట. మరి యెరూసలేం తోడుః ఇజి వెహ్మాట్, రాజా ఆతి దేవుణుదిజ్ సెందితి వట్టుం. 36 నీ బుర్త తోడుః ఇజి బా వెహ్మా, ఎందనిజ్ ఇహిజ నీ బుర్తది కొప్పవెంటి ఉండ్రె బా తెలాజ్ గాని కరిజ్ గాని కిదెజ్ నీను అల్ఇ. 37 మీ మాటెజ్ ‘ఒఒ ఇహిజ ఒఒ’, ఇజి మండ్రెజ్. ‘అపద్ ఇహిజ ఆపద్’, ఇజిని మండ్రెజ్. వనకాజ్ మిస్తికెజ్ సెఇ వన్నిబాణిజ్ వానికెజ్’.

కణకాదిజ్ బదులు కణక.

38 “కణకాదిజ్ బదులు కణక, వలుదిజ్ బదులు వలు” ఇజి దేవుణు మోసేజ్ సీత్తి మన్ని రూలుదు వెహ్తి మహిక మీరు వెహిమనిదెర్ గదె? 39 నాను మిజి వెహ్తిన, సెఇ పణిజ్ కిని వరిజ్ అడ్డు కిమ. మరి నీను వన్ని ముస్సు, కోపమాజి వాండ్రు నిజి కిత్తిదన్నజ్ మర్జి కిదెజ్ ఆపద్. ఎయెన్బా ఉణెర్ లెపాదు డెఱ్ఱుజ, డేబ్రి లెపా వన్నిజ్ తోరెనెల. 40 ఎయెన్బా నిజి కోర్టు కిజి నీ సాక లాగ్దెజ్ నుడెఱ్ఱిజ, నీ కండువాబా వన్నిజ్ సీజి మన్ల. 41 మరి, ఒరెన్ రోమ సయన్మదికాన్ వన్ని ఒప్పుజ్ పిండిజి వన్ని వెట ‘ఉండ్రె మయిలు దూరం రల’ ఇజి నిజి బలవంతం కితిజ వన్నివెట రుండి మయిలుజ్ దూరం ఇడ్డి సాన్ల. 42 నిజి లొస్సివన్నిజ్ సిల, మరి నిజి అపు లొస్సివరిబాణిజ్ మొకొం మహ్మా”.

నీ వగ్గతి వరిజ్ ప్రేమిన్ల.

43 “నీ పడకాతి వన్నిజ్ ప్రేమిన్ల, పగాతి వరిజ్ ఇన్టం ఆపిండ మన్ల. ముస్సు, కోపమాదాన్ మన్ల’, ఇజి వెహ్తిమహిక మీరు వెహిమనిదెర్ గదె? 44 గాని నాను మిజి వెహ్తిక ఇనిక ఇహిజ, మీ వగ్గతి వరిజ్ ప్రేమిన్లు, మిజి హిమ్న కిజిని వరి వందిజ్ పార్దనం కిదు. 45 అహిజ మీరు పరలోకామ్దు మన్ని మీ బుబ్బాతి దేవుణుది నిజమాతి కొడెఱ్ఱి ఇజి తోరె ఆనిదెర్లె. దేవుణు సెఇవరి ముస్సుబా నెగ్గివరి ముస్సుబా వన్ని పాదు జాయ్ సిబిసినాన్. నాయం మని వరి ముస్సుబా నాయం సిలివరి ముస్సుబా పిరు పాక్సినాన్. 46 మిజి ప్రేమిన్లవరిజె మీరు ప్రేమిస్తెజ దేవుణు మిజి వలం సీనాన్ ఇజి మీరు ఒడిఱిజినిదెరా? పను పెర్నికార్ బా ఆహా కిజినార్ గదె? 47 మీరు మీ కూల వరిజె మీరు మాడిఱినిదెర్ ఇహిజ మీరు ఆఇకార్ కినిదనిజ్ ఇంక మిస్తిక ఇనిక కిజినిదెర్? యూదురు ఆఇకార్ బా అయాలెకెండ కిజినార్ గదె? 48 పరలోకామ్దు మన్ని మీ బుబ్బాతి దేవుణు ఇని కల్లి సిలికాన్. అందెజె మీరుబా అయాలెకెండెనె మండ్రు.”

జాగర్త మండ్రు

6 మీరు కిని నెగ్గి పణిజ్ లోకుర్ నుడెఱ్ఱెజ్ ఇజి వరి ముందాల కివిండ జాగర్త మండ్రు. ఎందనిజ్ ఇహిజ ఆహా కితిజ పరలోకామ్దు మని బుబ్బాతి దేవుణు బాణిజ్ మిజి ఇని వలంబా దొహ్పాపద్. 2 అందెజె అవ్సరం మని వరిజ్ ఇనికబా సీతిజ, వేసం కినికార్ కిని లెకెండె అక విజెరిజ్ తెలిని లెకెండె జోడుఱాంక ఊకెసిసి డేల్ని వెహ్మాట్. విజెరి ముందాల మిజి గొప్ప పేరు వాదెజ్ ఇని ఆనదాన్ వారు యూదురు మీటిజ్ కిని ఇల్కాజ్, మరి సర్దు ఆహా కిబిస్తెర్. వరిజ్

† 5:21 నిర్గమ 20:13.

అయావలెనె పూర్తి పలం దొహ్క మనాద్ ఇజి నాను మిజి నిజం వెప్పిన. ³ గాని నీను అవ్సరమ్దు మనివరిజ్ సాయం కినివెలె, నీ ఉణెర్ కియు కినిక నీ డేబ్ర కియు నెస్తెజ్ ఆవద్. ⁴ అహిజ నీను సితిక ఎయెర్బా నెస్ఎండ మంజినాద్. అయావలె ఎయెర్బా నెస్ఎండ నీను కితిక సుడెజిని నీ బుబ్బాతి దేవుణు నిజి పలం సీనాన్లె. ⁵ మీరు పార్దనం కినివెలె వేసం కిని వరి లెకండ మన్మాట్. లోకుర్ విజెరె నూణి లెకండ యూదురు మీటిజ్ కిని ఇల్కాజ్, మరి సర్దు నిల్సి పార్దనం కిదెజ్ వరిజ్ ఇష్టం. వరిజ్ పూర్తి పలం దొహ్క మనాద్ ఇజి నాను మిజి నిజం వెప్పిన. ⁶ గాని నీను పార్దనం కినివెలె. నీను గదిదు సాన్సి సేహ్లా కెప్పి, ఎయెర్బా తొఇ నీ బుబ్బాతి దేవుణు వెట పార్దనం కిల. అహిజ ఎయెర్బా నెస్ఎండ నీను కితిక సుడెజిని ఎయెర్బా తొరె ఆఇ నీ బుబ్బాతి దేవుణు నిజి పలం సీనాన్.

⁷ మరి మీరు పార్దనం కినివెలె యూదురు ఆఇ వరి లెకండ పణిదిజ్ రెఇ మాటెజ్ వెహ్మాట్. అయాలెకండ లావ్ వర్గితిజానె దేవుణు వినాన్ ఇజి వారు ఒడెబిజినార్. ⁸ మీరు వరిలెకండ మండ్రెజ్ ఆవద్. ఎండనిజ్ ఇహిజ మిజి అవ్సరం ఆతిక ఇనిక ఇజి మీరు లొన్సి ముండాల్తె మీ బుబ్బాతి దేవుణు నెసినాన్.

⁹ "అందెజె మీరు యా లెకండ పార్దనం కిదెజ్. 'వరలోకామ్దు మని మా బుబ్బాతి దేవుణు, లోకుర్ విజెరె నీ పేరు గొప్ప నెగ్గి ఇజి గవరం సిపిర్. ¹⁰ నీ ఏలుబడి: లోకుర్ విజెరి ముస్సు, మసీద్. వరలోకామ్దు నిజి ఇష్టమాతికెజ్ జర్గిని లెకండనె బూమి ముస్సుబా జర్గిపిద్. ¹¹ రోజురోజుదిజ్ మజి కావాలిస్తి తిండి అయ రోజు మజి నీజి మన్. ¹² వేరెదికార్ మా వెట కితి తవుజ్ మాపు వరిజ్ సెమిస్తి లెకండనె, మాపు కితి తవుజ్ మజిబా సెమిస్. ¹³ పాపం కినిస్తి సెఇ ఆసెజ్ మా లొఇ రెపండ, సయ్యాను బాణిజ్ మజి తప్పినల్'.

¹⁴ లోకుర్ మిజి కిని తవుజ్ మీరు వరిజ్ సెమిస్తి, వరలోకామ్దు మన్ని మీ బుబ్బాతి దేవుణుబా మీరు కిని తవుజ్ మిజి సెమిస్సాన్. ¹⁵ గాని, మీరు లోకుర్ మీ వెట కిని తవుజ్ మీరు వరిజ్ సెమిస్ఎండ మహిజ, వరలోకామ్దు మన్ని మీ బుబ్బాతి దేవుణుబా మీరు కిని తవుజ్ మిజి సెమిస్వన్."

ఉపాస్

¹⁶ "మీరు ఉపాస్ కినివలె, వేసం కిని వరిలెకండ మండ్రెజ్ ఆవద్. 'మాప్ ఉపాస్ మంజినాప్' ఇజి విజెరె నెస్తెజ్ ఇజి వారు మొకొం నీర్సం కిజి మంజినార్. అయావలెనె వరిజ్ పూర్తి పలం దొహ్క మనాద్ ఇజి నాను మిజి నిజం వెప్పిన. ¹⁷⁻¹⁸ గాని మీరు ఉపాస్ కినివెలె బురాదు నూనె రాసె ఆజి మొకొం ఉజిర్పాజి మండ్రు. అహిజ మీరు ఉపాస్ కినిక లోకుర్ ఎయెర్బా నెస్ఎర్. గాని ఎయెర్బా తొఇ మీ బుబ్బాతి దేవుణు ఒరెండ్రె నెస్సాన్. ఎయెర్బా నెస్ఎండ మీరు కినిక సుడెజిని మీ బుబ్బాతి దేవుణు మిజి పలం సీనాన్."

సమ్సారం

¹⁹ డొజారి డుగ్గిజి ఒతెజ్ అక్కు, మని, మరి సెదని కరి తిండ్రెజ్ అకుమని యా బూమి ముస్సు, మీ వందిజ్ సమ్సారం గణస్మాట్. ²⁰ గాని డొజారిజు డుగ్గిజి ఒతెజ్ అల్ఇ, మరి సెద గాని కరి గాని పాడె: కిదెజ్ అల్ఇ దేవుణు మంజిని బాడిదు మీ వందిజ్ సమ్సారం గణస్సు. ²¹ ఎండనిజ్ ఇహిజ నీ సమ్సారం ఎంబె మనాద్ అబెనె నీ మన్సుబా మంజినాద్. ²² కణక ఒడొల్దిజ్ దివ లెకండనె మనాద్. నీ కణక నెగ్గి ఇహిజ నీ ఒడొల్దిజ్ విజా నెగ్గికెజ్ తసి మంజినాద్. ²³ నీ సెఇ ఉదెసమ్దాన్ నీ కణకెజిణిజ్ సుడిజి మహిజ, నీ మన్సు విజా సీకటి మంజినాద్. నీ ఒడొల్ విజాబా సీకటి ఆజి మంజినాద్. నిజి మనాద్ ఇజినిను ఒడెబిజిని జాయ్ సీకటి ఆతిజ, అయ సీకటి ఎసానో సీకటి. ²⁴ ఎయెర్బా రిఎర్ విజామానిరు వందిజ్ ఉండ్రె లెకండ పణి కిదెజ్ అట్ఎన్. ఒరెన్ వన్నిజ్ ప్రేమిసి మరి ఒరెన్ ముస్సు ఇష్టం సిల్లెండ మంజినాన్. సిల్లిజ ఒరెన్ వన్నిజ్ లొజిజి నమ్మకమాతి వనిలెకండ మంజినాన్. మహివన్ని ముస్సు సెఇ మాటెజ్ వర్గిజి మంజినాన్. అయలెకండనె దేవుణుదిజ్ని డబ్బుదిజ్ ఉండ్రె లెకండ ప్రేమిస్తిజ్ మీరు అట్ఇదెర్.

విసారిస్మాట్

²⁵ అందెజె నాను మిజి వెప్పిక ఇనిక ఇహిజ, ఇనిక తినాల్లె, ఇనిక ఉణాల్లె ఇజి మీ బత్కు వందిజ్ విసారం ఆమాట్. మరి మా ఒడొల్ వందిజ్ ఇనిక పార్పానాస్సె ఇజి ఒడిబిమాట్. మీ పాణం తిండిదిజ్ మిస్తిక ఆవదా? మీ ఒడొల్ సాక్క పాతెజ మిస్తిక ఆవదా? ²⁶ ఆగాసమ్దు ఎగ్రిజిని పాటిజ సుడెదు. అవి విత్ఉ, కొయ్ఉ, ఒసి కొటుదు వాక్ఉ గాని వరలోకామ్దు మని మీ బుబ్బాతి దేవుణు వనకాజ్ పాస్ కిజినాన్. మీరు వన్కా మిస్తి విలువ మనికిదెర్ ఆఇదెరా? ²⁷ మీ లొఇ ఎయెర్బా విసారిస్ వన్ని బత్కుదిజ్ ఉండ్రె గంట కుడుఃవ్తెజ్ అట్నాండ్రా?

²⁸ మరి ఎండనిజ్ సాకెజ వందిజ్ మీరు విసారిస్ నిదెర్? మడిజు మని పూబు సుడెదు, అవి కస్టబాడ్ఉ, సాక కిదెజ్ నూలుజ్ తయార్ కిఉ. ²⁹ అహిజ్ బా విజా ఆస్తి కలిగితి మన్ని సాలోమోను రాజా యా ఉండ్రె పూబు లకెండ సోకు మన్ని ఉండ్రె సాక్క తొడిగివ్తాన్, ఇజి నాను మిజి వెప్పిన. ³⁰ నేద్రు మంజి విగ్హిజ్ సినుద్ సురె ఆని మడిజు మని యా గడిదిజ్ దేవుణు యా లెకండ సోకు సిత్తాన్. అహిజ, ఇజిరి నమకం మనికిదెరా మరి ఒదె నగెండ్రె మిజి సాకెజ్ తొడిగివ్తాండ్రా? ³¹ అందెజె మీరు, "ఇనిక తినావ్లె, మరి ఇనిక ఉణావ్లె, సిల్లిజ ఇనిక పార్పానావ్లె", ఇజి ఒడిబిజి బాద ఆమాట్. ³² ఎండనిజ్ ఇహిజ దేవుణుదిజ్ నెస్ ఇకార్నె వినక్ వందిజ్ రెబాజినార్. యాకెజ్ విజా మిజి అవ్సరం ఇజి వరలోకామ్దు మని మీ బుబ్బాతి దేవుణు నెసినాన్. ³³ గాని విజా దనిజ్ ఇంక దేవుణు ఏలుబడి: కిని వందిజ్ మని వన్ని ఎద్రు మీరు నీ తినిజయ్ దాన్ మండ్రెజ్ ఇజి ఆస ఆజి మండ్రు. నస్తివలె మిజి కావాలిస్తికెజ్ విజా మిజి దొహ్కె. ³⁴ విగ్హిజ్ వందిజ్ విసారిస్మాట్. విగ్హిజ్ జర్గిని వన్కా వందిజ్ విగ్హిజ్ విసారిస్సు. ఎమేణి రోజుదిజ్ తగితి కస్టం అయ రోజుదు మంజినె.

తీర్పు కిమాట్

7 "మహి వరి ముస్సు తీర్పు కిమాట్. అహిజ దేవుణు మిజిబా తీర్పు కిమాట్. ² మీరు మహివరిజ్ ఎలాగ తీర్పు కినిదెర్ అయలెకండనె దేవుణు మిజిబా తీర్పు వానాద్లె. మీరు ఇని కొల్దానె దేవుణు మిజిబా తీర్పు సీనాన్లె. ³ నీ కణకాదు ఉండ్రె తూలం ననిక మహివలె, దనిజ్ సుడెండ, నీను, నీ తంబెరి కణకాదు మని ఇజిరి కనరాదిజ్ ఎండనిజ్ బేసెని? ⁴ నీ కణకాదు తూలం ననిక మనివెలె అక లాగెండ్రె, నీ తంబెరి కణకాదు మని ఇజిరి కనరాదిజ్ నాను లాగ్గి

విసిర్చు' ఇజి సీను ఎలాగ వెప్పిని? 5 వేసం కినికిదెరా, ముందాల నీ కణకాదు మని తూలం ననిక లాగ్ల. అయావలె నీ తంబెరి కణకాదు మని ఇజిరి కసరాదిజ్ నెగెండ్ సుడేజి లాగ్లదెజ్ అట్టి. 6 దేవుణుదిజ్ సెందితి సజతిజ్ అక్కెజ్ ఇష్టం కిజి వరిజ్ నెప్పిస్తెజ్ ఇజి సుడేమట్. అయలెకెండ్ కితిజ, వారు తిండి సీని వరిజ్ కట్టి సెజ నుకుడిజ్ లెకెండ్ వారు కొపం ఆజి మర్జి మీ ముస్సు వాజి అర్నార్. గొప్ప విలవ మనికెజ్ వండ్రెజ్ ముందాల ఇట్టిజ అక్కెజ్ వన్యాజ్ కాల్యాణిజ్ మట్టి లెకెండ్ వారుబా కిసారె. 7 మీరు ఇనిక లొస్సిదెరో అక మిజి దేవును సీనాన్. ఇనిక మీరు రెబాజినిదెరో అక దేవుణు మిజి సీనాన్. కొతు మీ వందిజ్ దేవుణు సెప్లా రే ఆనాన్. 8 లొస్సివరిజ్ విజెరిజ్ దోహ్తె, రెబానివన్నిజ్ తోర ఆజినాన్. కొత్తిని వన్నివందిజ్ సేప్లా రే ఆనాన్. 9 మీ మరిన్ మిజి తిండి లొస్సిజ, మీరు ఎయిదెరెబా వన్నిజ్ వణుకు సీనిదెరా? 10 మరి వాండ్లు మెయ లొస్సిజ, సరాన్సీనిదెరా? 11 మీరు సెఇకిదెర్ అతిజ్బా మీ కొడోరిజ్ నెగ్గి ఇనామ్కునె సీదెజ్ ఇజి నెస్సిదెర్. అపిజి వరలోకామ్దు మని మీ బుబ్బాతి దేవుణు, వన్నిజ్ లొస్సివరిజ్ దినిజ్ ఇంక మరి ఒదె నెగ్గి ఇనామ్కు సివండ్రా? 12 అందెజె విజి సజతిజ లోఇ, మహికార్ మిజి ఇనిక కిదెజ్ ఇజి మీరు కోరిజినిదెరో అయలెకెండ్నె మీరు వరిజ్ కిదు. దేవుణు మోసెజ్ సీతి రూలుజ్నె దేవుణు ప్రవక్తరు వర్గితి మాటెజ అర్దం యాకాదె."

ఒసార్ సరిని ఇహ్లు సరి

13 ఇహ్లు సరి గవ్నిదాన్ సాండ్లు. ఎందనిజ్ ఇపిజి నాననమ్దు సాని సరి ఒసార్దిక. అయ గవునిబా ఒసార్దిక. అయ సర్దు సానికార్ నండొండార్ మనార్. 14 ఎలాకాలం మంజిని బత్సు సీని సరి ఇహ్లుదికాదె, దని గవునిబా ఇహ్లుదిక. అయ సరిదాన్ నడినికార్ కొండారె.

మరాన్ని దని పట్టు

15 నెగ్గివాప్ ఇజి నాటిసినికార్ గాని తపు నెప్పిస్సి ప్రవక్తరు వందిజ్ జాగర్త మండ్లు. వారు ప్రమాదమాతి మూర్కతం మని కార్నుకుడిజ్ లెకెండ్ మనికార్. గాని వెల్లిహన్ గొరె లెకెండ్ ప్రమాదం సిలికార్ ఇజి తోరె ఆజినార్. 16 వరి పణిజాణిజ్ మీరు వరిజ్ నెస్సిదెరెలె. ఎయెరెబా సాప్పుతుపెజాణిజ్ ద్రాసపట్టు కొయ్విర్. సాప్పు మరెకాజ్ బొడె పట్టు కొయ్విర్. 17 అయలెకెండ్నె విజి నెగ్గి మరెకాజ్, నెగ్గి పట్టునె అస్సి, మరి సెఇ మరాతు సెఇ పట్టునె అస్సి. 18 ఉండ్రె నెగ్గి మరాతు సెఇ పట్టు అన్ఉ, మరి సెఇ మరాతు నెగ్గి పట్టు అన్ఉ. 19 నెగ్గి పట్టు అన్ఇ మరెకె విజి కత్తి సినుద్ విసీరె ఆనెలె. 20 అయలెకెండ్నె వరి పణిజాణిజ్ మీరు వరిజ్ నెస్సిదెర్. 21 ప్రబువా, ప్రబువా ఇజి నజి కూక్కికార్ విజెరె దేవుణు ఏలుబడిదు మన్విర్, గాని వరలోకామ్దు మని నా బుబెజ్ ఇష్టమాతి వజ కినికాండ్రె దేవుణు ఏలుబడిదు మంజినాన్. 22 తీర్పు తీరిసిన దినమ్దు నండొండార్ నా డర్గు వాజి, "ప్రబువా, ప్రబువా మాపు నీ పీరుదాన్ దేవుణు ప్రవక్తరు వజ వర్గితివా? నీ పీరుదాన్ దెయమ్కాజ్ పెరెవతావా? నీ పీరుదాన్ నండొ బమ్మాతి పణిజ్ కితివా?", ఇజి వెప్పార్. 23 అయావలె, "నాను మిజి ఎసెజ్బా నెన్వెత. సెఇ పణిజ్ కినికిదెరా, నా డర్గుహన్ సాండ్లు ఇజి వరిజ్ తినాజ్ వెప్పా.

బుద్ది మనికాన్ని బుద్ది సిలికాన్

24 అందెజె, యా నా మాటెజ్ వెంజి అయా వజ కినికాన్ ఎయెన్బా, సటు ముస్సు వన్ని ఇలు తొప్పి బుది మనివన్నిజ్ పోలిత మనాన్. 25 పిరు వాతాద్. గడ్డెజ్ నిండ్రెజి సాహె. గాలి వాజి అయ ఇలు ముస్సు డెతూద్ గాని అయ ఇలు పునాది సటు ముస్సు మనిజ్ అర్వెతాద్. 26 గాని యా నా మాటెజ్ వెంజి వన్యా లెకెండ్ కిఇకార్ ఎయెన్బా ఇస్సు ముస్సు వన్ని ఇలు తొప్పి బుద్ది సిలి వన్నిజ్ పోలిత మనాన్. 27 పిరు వాతాద్. గడ్డెజ్ నిండ్రెజి సాహె. గాలి వాజి అయ ఇలు ముస్సు డెయ్తాద్. అయావలె అయ ఇలు నండొ జాబుదాన్ అడిగి అర్తాద్." 28 యేసు యా మాటెజ్ వెప్పి వీజితిజ్ లోకుర్ విజెరె వన్ని బోదదిజ్ బమ్మ అతార్. 29 ఎందనిజ్ ఇపిజి వాండ్లు, యూదురి రూలుజ్ నెప్పిస్సి వరి లెకెండ్ ఆవండ, అతికారం మనివన్ని లెకెండ్నె వాండ్లు బోదిస్తాన్.

8 యేసు అయ గొరొన్డిగిజి వాతివలె మంద లోకుర్ వన్ని వెనుక వాతార్. 2 కుష్టు రోగం † మనికాన్ ఒరెన్ వాతండ్రె వన్ని ముందాల ముణుకుజ్ ఊర్జి, "ప్రబువా, నాను నెగెణ్ ఆదెజ్ ఇజి నిజి మన్ను మహిజ, నజి నెగెణ్ కిదెజ్ అట్టి", ఇజి వెప్టాన్. 3 అందెజె వాండ్లు కియు సాప్పి వన్నిజ్ముట్టాండ్రె, "నజి మన్ను మనాద్, సీను నెగెణ్ ఆల", ఇజి వెప్టాన్. వెటనె వన్నిజ్మహి పెరి జబు డిస్త సాహాద్. 4 నస్తవలె యేసు వన్నివెట, "యాక ఎయెరిజ్బా ఇనికబా వెహామ. సీను తినాజ్ సాన్ని నీ ఒడోల్ పుజెరిజ తోరిసెల. సీను నెగెణ్ ఆతి దనిజ్ వరిజ్ రుజాప్ లెకెండ్ మోసె ముజలె ఆడ్ర సీతి వజ దేవుణుదిజ్ సంత సీల", ఇజి వెప్టాన్.

ఒరెన్ సదాతివతి ఆతి వన్ని నమకం

56 యేసు కపెర్నహము ఇని పట్టుమ్దు వాతివలె సదాతివతి †† ఒరెన్ వన్ని డర్గు వాతండ్రె, "ప్రబువా, నా పణిమన్ని ఒరెన్ కికు కాల్యు సాని జబుదాన్ నండొ బాద ఆజి నా ఇండ్రొ గూర్త మనాన్", ఇజి వెప్పి బతిమాలితాన్.

7 "నాను సాన్ని వన్నిజ్ నెగెణ్ కిని", ఇజి యేసు వెప్టాన్. 8 నస్తవలె అయ సయనమ్ది అతికారి ఈహు వెప్టాన్, "ప్రబువా, సీను నా ఇండ్రొ వాదెజ్ నాను తగ్గిక ఆవ. గాని సీను ఉండ్రె మాట వెప్టెజ ఆనాద్, నా పణిమన్ని నెగెణ్ ఆనాన్. 9 సీను అయాలెకెండ్ కిదెజ్ అట్టిఇజి నాను నెసినె. ఎందనిజ్ ఇపిజి నా ముస్సు అతికారం మన్నికార్ మనార్. నా అడిగి సయనమ్దికార్ మనార్. నాను ఒరెన్ వన్నిజ్ 'సాన్ల' ఇపిజి సానాన్. మరి ఒరెన్ వన్నిజ్ 'రల' ఇపిజి వానాన్. నాను నా పణి మనిసిదిజ్ 'అయ పణి కిల' ఇపిజి వాండ్లు ఆక కిసాన్."

10 యేసు యా మాట వెంజి బమ్మ అతాండ్రె వన్ని వెనుక వానివరిజ్ సుడేజి, "వన్నిజ్ మన్ని లెకెండ్ దేవుణు ముస్సు నిసా పెరి నమకం మని ఎయెరిజ్బా ఇస్సాయేలు లోకుర్ నడిమి, నాను సుడేదెజ్ సిల్లె ఇజి నాను మిజి నిజం వెప్పిన్. 11 నాను మిజి వెప్పిన్ ఇనిక ఇపిజి, దేవుణు కిని ఏలుబడి వానివలె,

† కుష్టు రోగం ఇపిజి పెరిజబ్బు అయ జబ్బు వాతిజ కికు, కాల్యు మన్ని డెస్సెజ్ తెవేజి సానాదెలె జబ్బు మన్నిబాన్ ముట్టిజ నెన్విద్ †† సదాతివతి ఇపిజి రోమనయ్యమ్దు మన్ని వందమణిసీర్ సయనమ్ది వరిజ్ అతికారి.

తూర్పుదాన్ పడమరదాన్ నండ్ లోకుర్ వాజి అనిగొగొర్ ఆతి అబ్రాహము, ఇస్సాకు, యాకోబు ఇని వరివెట పరలోకామ్దు విందుదు బన్నార్. 12 గాని దేవుణు కిని ఏలుబడిడు తప్ఎండ మంజినావ్లె ఇజి ఒడేబిజిని వరిజ్ వెల్లి సీకటిదు విసీరనాన్. అబె లోకుర్ అడేబాజి పల్కు కొహ్కొక్కి మంజినార్.”

13 యేసు అయా సదాతివతిజ్, “సాన్ల, నీను నమ్మితి వజనె జగ్గినాద్”, ఇజి వెహ్లాన్. అయ గడియోదునె వన్ని పణిమనిసి నెగెండ ఆతాన్.

యేసు నండ్ లోకురిజ్ నెగెండ కిజినాన్.

14 వెనుక యేసు పేతురు ఇండ్రో వాతాన్. వన్ని మీమ్సి నోబుదాన్ గూర్తిమనిక సుడేతాన్. 15 వాండ్రు దని కియుదు ముట్టిజ్ సరి దనిజ్మహి నోబు డింస సాహద్. అది నిజితాదె వన్నిజ్ నెగెండ సుడేదెజ్ మొదోల్స్తాద్. 16 పాదు ఆతివలె, దెయమ్కు అస్తి వరిజ్ నండ్ండారిజ్, లోకుర్ వన్ని డగ్రు తతార్. వాండ్రు ఉండ్రీ మాటదానె దెయమ్కాజ్ పెర్తాన్, మరి జబుది వరిజ్ విజేరిజ్ నెగెన్ కితాన్. 17 “వాండ్రు మా సీరనమ్కు లాగితాన్, మరి మా జబుజ్ వాండ్రు పిండితాన్” † ఇజి యెనయ ప్రవక్త వెట దేవుణు ముజాల వగ్గితి మాటెజ్ పూర్తి ఆదెజ్ యాక జగ్గితాద్.

యేసు వెట సాండ్రెజ్ ఇహిజ ఇనిక కిదెజ్

18 యేసు వన్ని డగ్రు మని మంద లోకురిజ్ సుడేజి సమ్దరం అతాహ పడక సాండ్రెజ్ ఇజి వన్ని సిసూరిజ్ వెహ్లాన్. 19 నస్తివలె, యూదురి రూలుజ్ నెస్సిస్సికాన్ ఒరెన్ వన్ని డగ్రు వాతండ్రె, “బోద కనికి, నీను ఎంబె సాహిజ్బా నీ వెట నానుబా వాన”, ఇజి వన్నిజ్ వెహ్లాన్. 20 నస్తివలె యేసు, “నకెజ బొరోజ్ మనె, ఆగానమ్దు ఎగ్గిజిని పాటిజ గూడుకు మనె, గాని లోకు మరిసి ఆతి నజి బుర్రి డుట్టి మండ్రెజ్బా బాడి: సిల్లెద్”, ఇజి వెహ్లాన్. 21 సిసూర్ లోఇ ఒరెన్ వాతండ్రె, “ప్రబువా నాను ముందాల సాన్ని నా బుబ్బు సాతి పిన్గు పెరేజి పాక్కి వాన”, ఇజి వెహ్లాన్. 22 నస్తివలె యేసు, “సాతికార †† వరి సాతి వరిజ్ పెరేజి పాక్కిర్, నీను నావెట రల”, ఇజి వన్నిజ్ వెహ్లాన్.

యేసు తుపాన్దిజ్ ఆలెప్పిసినాన్

23 యేసుని వన్ని సిసూర్ డోణి ఎక్తారె అబ్బెణిజ్ సాత సాహోర్. 24 వారు సాన్ని మహిజ్ యేసు డోణిదు నిద్ర కిజి మహాన్. వెటనె అయ సమ్దరమ్దు గాలితూపాన్ రేజితాద్. ఉల్కెజ్వాజి అయ డోణి ముస్సు అర్తె. 25 సిసూరు సాన్ని వన్నిజ్ నిక్తారె, “ప్రబువా, సాన సానాప్లె, మజి రక్కిస్ల”, ఇజి వన్నిజ్ నిక్తారె. 26 అయావలె యేసు వరిజ్, “ఎందనిజ్ మీరు నిసా తకు నమకం మనికిదెర్ ఆజినిదెర్?”, ఇజి వెహ్లాండ్రె నిజ్జి గాలిదిజ్ ఉల్కెజ్ అలెజి మన్ల ఇహాన్. ఆకెజ్ పూర్తి పలక్ ఆతె. 27 వారు బమ్మ ఆతారె, “పిండ్రు ఎలాగ మర్తికాండ్రో? గాలిని ఉల్కెజ్బా వన్నిజ్ లోజిజిన”, ఇజి వగ్గితార్.

దెయం అస్తి రిఎరిజ్ నెగెండ కిజినాన్

28 యేసు సమ్దరం అతహి పడక మని గదరెసు ఇని నారు అందితిజ్, దెయం అస్తికారె రిఎర్, యూదురు వరి సాతివరిజ్ సమాది కిని సాలమ్కాణిజ్ † సాతారె వన్ని ఎద్దు వాతార్. వారు జంతు నని మూర్కతం మనికారకక ఎయెర్బా అయ సరి సాన్వర్. 29 “ఓ దేవుణు మరిసి, మా వెట మిజి ఇని పణి? కాలం వాని ముజాల మజి బాద కిదెజ్ ఇబ్బె వాతిదా?”, ఇజి డేడి:స్తారె. 30 వరి ఎద్దు కండెక్ దూరమ్దు పండ్రెజ్ మంద మెయ్జి మహా. 31 అయ దెయమ్కు వన్నిజ్ “నీను మజి ఉల్పిని లెకెండ ఇహిజ, అయ పండ్రెజ్ లోఇ మజి పాక్ల”, ఇజి బతిమాల్తె.

32 వాండ్రు వన్కాజ్ “సాండ్రు” ఇజి వెహ్లాజ్ అయ దయమ్కు వరిజ్ డి:స్సెనె పండ్రెజ్ లోఇ సాహా. అయ మంద పండ్రెజ్ విజా గొరొన్ ముస్సుహాన్ ఉహ్కొక్కి సాహెనె సమ్దరమ్దు అర్తె సాతె. 33 పండ్రెజ్ మేస్సికార్ ఉహ్కొక్కి సాన్ని పట్టుమ్దివరిజ్ జగ్గితికెజ్ విజా వెహ్లాన్. దెయం అస్తి మహివరిజ్ జగ్గితికబా వెహ్లాన్. 34 నస్తివలె అయ పట్టుమ్దికార్ విజేరె సాని యేసుజ్ సుడేదెజ్ వన్ని ఎద్దు వాతార్. వన్నిజ్ సుడేతిజ్, వరి నారు డి:సి సాన్ల ఇజి వన్నిజ్ బతిమాల్తార్.

యేసు కిక్కుకాల్కు అర్తి వన్నిజ్ నెగెండ కిజినాన్

9 యేసు డోణి ఎక్తాండ్రె సెరు డాట్టి కపిర్పహము ఇని వన్ని సాంత పట్టుమ్దు వాతాన్. 2 అయావలె సెగొండార్ కికు కాల్కు అర్తి మంసమ్దు గూర్జిమహి ఒరెన్ వన్నిజ్ యేసు డగ్రు తతార్. దేవుణు ముస్సు వరి నమకం యేసు సుడేతాండ్రె, “మరిన్, దయ్ రమ్దాన్ మన్ల, నీ పాపమ్కు సెమిస్త మన”, ఇజి కికు కాల్కు అర్తి వన్నిజ్ వెహ్లాన్. 3 యూదురి రూలుజ్ నెస్సిస్సికార్ సెగొండార్ “పిండ్రు దేవుణుదిజ్ దూసిస్నాన్”, ఇజి వరి లోఇ వారె వగ్గితార్. 4 యేసు వరి మన్నుదు మనికెజ్ నెస్తాండ్రె ఈహు వెహ్లాన్ “మీరు ఎందనిజ్ మీ మన్నుదు సెఇకెజ్ ఒడేజినిదెర్?”. 5 “నీ పాపమ్కు సెమిస్తమన ఇజి వెహ్లానిక సులునా? నీను నిజ్జి నడిల ఇజి వెహ్లానిక సులునా?”. 6 “లోకు మరిసి ఆతి నజి బూమి ముస్సు పాపమ్కు సెమిస్తెజ్ అతికారం మనాద్ ఇజి మీరు నెస్తిజ్ వెలె.” వెనుక కికు కాల్కు అర్తివన్ని వెట, “నిజ్ల నీ మన్సం అసి ఇండ్రో సాన్ల”, ఇజి యేసు వెహ్లాన్. 7 వాండ్రు నిజితండ్రె ఇండ్రో సాహాన్. 8 లోకుర్ విజేరె అక సుడేజి బమ్మ ఆతార్. లోకురిజ్ యా లెకెండ అతికారం సీతి దేవుణుదిజ్ పాగిడి:తార్.

యేసు మత్తాయిజ్ కూక్కినాన్

9 యేసు అబెణిజ్ సాన్ని మహిజ్, పన్ను పెరేనికాన్ మత్తయి ఇనికాన్ వన్ని బాడి:దు బస్త మహాన్. యేసు వన్నిజ్ సుడేజి, “నా వెట రల”, ఇజి వెహ్లాజ్, వాండ్రు నిజితాండ్రె యేసు వెట సాహాన్. 10 వెనుక యేసు మత్తాయి ఇండ్రో బోజనం కిదెజ్ బస్తి మహిజ్, నండ్ండార్ వన్ను పెర్తికార్ని †† పాపం కినికార్ ఇజి వరిసయెరు

† 8:17 యెనయ 53:4. †† అయాలెకెండ వెహ్లావలె దేవుణువెట ఇని పాత్తు సీల్లి ఆత్మదిజ్ నెందితి నజతిజ వందిజ్ యేసు వెహ్లానాన్. నిజం సాతివరి వందిజ్ ఆపిద్. యా మాటెజ్ దేవుణు ఏలుబడి: అడిగి మన్ల వరి వందిజ్ వెహ్లానాన్. యా మాటెజ్ యాలెకెండెనె లూక 15:24,32, మరి ఎపెసు 2:1 బాన్బా రాస్త మనాద్. † యేసుప్రబు కాలమ్దు సుట్టు బొరోకిజి సాలమ్లెకెండ తయారె కిజి సాతి వరిజ్ సమాది కిజి మహోర్. వీనుగు సాలమ్లొఇ ఇజ్జి పలుకుదాన్ సాలమ్దిజ్ మూసి మహోర్. †† పన్ను పెర్తివరిజ్ యూదురు ఇష్టం కీమిత్. యూదురు పన్ను పెర్తివరిజ్

వచ్చినా వాతారె వన్ని వెటని వన్ని సిసూర్ వెట బోజనమ్దిజ్ బస్తార్. 11 పరిసయరు అక సుడజి, “ఎందనిజ్ మిజి నేకపిన్నికాన్ పన్ను పెర్నివరి వెట, పాపం కినివరి వెట బోజనం కిజినాన్”, ఇజి వన్ని సిసూర్జ వెన్బాతార్. 12 యేసు అయ మాట విహండ్రె, “జబు మనివరిజె డాక్టర్ అవ్నరం, నెగెణ్ మని వరిజ్ డాక్టర్ అవ్నరం సిల్లెద్”, ఇజి వెప్టాన్. 13 “మీరు మహి వరి ముస్సు కనికారం తోరిస్తెజ్ ఇజిని నాను కోరిజిన గాని కత్తి వూజెజ నాను కోరివ †, ఇజి దేవుణు వెప్టా మాటది అర్థం ఇనికాదో ఇజి మీరు సాన్ని నెస్తు. పాపం కిని వరిజ్ కూక్తెజె నాను వాత మన, నెగెణ్ మనికాప్ ఇజి ఒడజిని వరిజ్ ఆవద్”, ఇజి వెప్టాన్.

యేసుజ్ ఉపాస్వందిజ్ వెన్బాజినార్.

14 నస్తవలె యోహాను సిసూరు వన్ని డగ్రు వాజి, “మాపుని పరిసయరు డిన్వండ ఉపాస్ మంజినాప్, గాని నీ సిసూర్ ఎందనిజ్ ఉపాస్ మన్వర్?”, ఇజి వెన్బాతార్. 15 దనిజ్యేసు ఈహు వెప్టాన్, “పెండ్లి దజడా:యెన్, పెండ్లి కూలెజ వెట మని వెలె వారు దుకమ్దాన్ మంజినారా? పెండ్లి దజడా:యెన్ పరిబాణిజ్ కూకె ఆతి వెనుక వారు ఉపాస్ మంజినార్.” 16 “ఎయెర్బా పడాయ్పాతదు కొత పాత ముక కుడుప్పి గుత్వర్. ఆహె కితిజ కొత పాత ముక కేట ఆజి కిజినక మరి లావ్ఆనాద్. 17 ఎయెర్బా పడాయి తోలు సన్నిదు కొత ద్రాక్కు కల్లు వావ్. ఆహె కితిజ కొత ద్రాక్కు కల్లు పులాజ్ ఆనివెలె తోలు సంసి పెడెల్నాద్, ద్రాక్కు కల్లు వెల్లి సానాద్. మరి సంసి పాడానాద్. కొత ద్రాక్కు కల్లు కొత తోలు సన్నిదునె వాక్తెజ్. అయావలె రుండిబా పాడె: ఆఉ.”

సాతి అయ్లీని జబు మని బోదిలి

18 యేసు యా మాటెజ్ పరి వెట వెప్పి మహివలె, యూదురి మిటిజ్ కిని ఇండ్రోణి ఒరెన్ అతికారి వాతండ్రె వన్ని ఎర్దు ముణుకుజ్ ఊర్జి, “నా గాలు యెలె సాతాద్. నీను వాజి నీ కియు దని ముస్సు ఇడె:అ. అది బత్సినాద్”, ఇజి వెప్టాన్. 19 యేసు నిజితండ్రె వన్ని వెట సాహాన్. వన్ని సిసూర్బా సాహార్. 20-21 నస్తవలె పనెండు పంటెజాణిజ్ వెల్లి ఆని జబుదాన్ బాద ఆజిమహి ఉండ్రె బోదెలి, “యేసు తొడిగితిమని నీరి సాక్కుదు ముట్టిజ సరి నాను నెగెండ్ ఆన”, ఇజి దని మన్నుదు ఒడజిబాతాదె వన్ని వెనుక వాతాదె వన్ని పాత సెంగుదు ముట్టాద్. 22 యేసు వెనుక మర్జి దనిజ్ సుడజి, “ఓ బయి దయ్చమ్దాన్ మన్అ. నీను నా ముస్సు ఇట్టి మని నమకమ్నె నిజి నెగెణ్ కిత మనాద్”, ఇజి వెప్టాన్. అయావలెనె అయ బోదెలి నెగెండ్ ఆతాద్. 23-24 నస్తవలె యేసు అతికారి ఇండ్రో వాతిజ్, పిరుడి: ఊక్కివరిజ్ గగోల్ ఆని వరిజ్ సుడజి, “ఇబ్బెణిజ్ సాంధ్రు, యా ఇజిరి బయి నిద్ర కిజినాద్ గాని సావద్”, ఇజి వెప్టాన్. వారు వన్నిజ్ వెక్కిసి సిక్టార్. 25 అబె నిండ్రెతి మహి లోకురిజ్ విజెరిజ్ వెల్లి పోక్తి వెనుక, యేసు ఇండ్రో డు:గితాండ్రె అయ్లీ కీదు అస్తెజ్అది నిజితాద్. 26 యా కబురు అయ ప్రాంతం విజా సారితాద్.

యేసు గుడ్డిదివరిజ్ని గుల్లవన్నిజ్ నెగెండ్ కిజినాన్.

27 యేసు అబెణిజ్ సాన్ని మహివలె రివెర్గుడ్డిజివారు వన్ని వెనుక వాతారె, “ఓ దావీదు మరిసి, మా ముస్సు కనికారం తోరిన్అ”, ఇజి డేల్లి వెప్టాన్. 28 యేసు ఇండ్రో డు:గితి వెనుక వారు వన్ని డగ్రు వాతార్. వాండ్రు వరిజ్ ఈహు వెన్బాతాన్. “యాక కిడెజ్ నాను అట్టు, ఇజి మీరు నమిజినెదెరా?”, “ప్రబుమా మాప్ నమ్మిజినాప్”, ఇజి వారు వెప్టాన్. 29-30 నస్తవలె యేసు పరి కణకెజ ముట్టి ఈహు వెప్టాన్. “మీరు నమ్మితివజనె యాక మిజి జర్గిపిద్”, ఇజి వెప్టా వెటనె పరి కణకు బేస్తార్. “ఎయెర్బా యాక నెస్టెజ్ఆవద్”, ఇజి యేసు వరిజ్ గట్టిజ వెప్టాన్. 31 గాని వారు సాహారె అయ ప్రాంతం విజా వన్ని వందిజ్ సాత్తార్. 32 యేసుని వన్ని సిసూర్అబెణిజ్సాన్ని మహిజ్ దెయం అస్తి ఒరెన్ గులవన్నిజ్ వన్ని డగ్రుతతార్. 33 యేసు దెయమ్దిజ్ఉల్పి వెటనె అయ గుల్ల వాండ్రు వర్గిదెజ్ మెదోల్స్తాన్. అక సుడజి లోకుర్ విజెరి బమ్మ ఆతారె, “ఎనెజ్బా ఇనాయ్లె దేసమ్దు యా లెకెండ్ ఇనికబా జర్గిపితాద్”, ఇజి వర్గితార్. 34 గాని పరిసయరు ఈహు వెప్టాన్, “దెయమ్కాజ్ నెయ్యు సాయమ్దానె వీండ్రు దెయమ్కాజ్ పేర్జినాన్”.

వణిమన్నిర్ తక్కు

35 యేసు విజా పట్టుమ్కాజ్, విజా నాహ్కాజ్ బూలాజి యూదురు మిటిజ్ కిని ఇల్కాజ్ వరిజ్ నేర్పిసి, దేవుణు ఏలుబడి: కిని వందిజ్ సువార్త వెప్పి విజా రకమ్ది జబుది వరిజ్, బాదదాన్ మని వరిజ్ నెగెండ్ కితాన్. 36 యేసు మంద లోకాజ్ సుడజి, వన్ని పాణం నొతాద్. ఎందనిజ్ ఇహిజ వారు గపుడుఎన్ సిల్లెండ సద్రితి గొరెజ్ లెకెండ్, ఇనిక కిడెజ్ ఇజి నెస్ఇ పరి లెకెండ్ మహార్. 37-38 నస్తవలె యేసు వన్నిసిసురిజ్, “కొయ్దెజ్ మన్ని పంటలెకెండ్ లోకుర్ నండొండార్ మన్నె. గాని కొయ్నికార్ తక్కునె. అందెజె వన్ని పంట కొయ్ని వందిజ్ వణికిని వరిజ్ పోక్త ఇజి కొత యజుమానిజ్ బతిమాల్దు”, ఇజి వెప్టాన్.

యేసు వన్నెండు మణిసి సిసురిజ్ కూక్కినాన్

10 యేసు వన్ని పనెండు మన్ని సిసూర్జ డగ్రు కూక్తాండ్రె దెయమ్కాజ్ పేర్దెజ్, మరి విజా రకమ్ది జబుది వరిజ్ని బాదదాన్ మని వరిజ్ నెగెండ్ కిడెజ్ వరిజ్ అతికారం సితాన్. 2 అయ పనెండు మన్ని అపాస్తుడురి పేరుకు ఇకెజ్. మెదోహికాన్సీమోను, (పేతురు ఇజి వాండ్రు కూకె ఆతాన్) వన్ని తంబెర్సి ఆతి అండ్రెయ, జెబదయ పాటాదికార్యాకోబుని యోహాను, 3 పీలిపుని బర్తోలోమాయి, తోమని వన్ను పెర్లి మహికాన్ మతాయి, అలపయి పాటాదికార్ యాకోబు, తదాయి 4 యూదయ దేసం వందిజ్ ఉసారాఆజిని సీమోను ††, యేసుజ్ మోసిం కిజి ఒవజిప్పికాన్ ఆతి ఇస్కరియోతు యూద.

తక్కుదికార్ మరి గొప్ప పాపం కినికార్ ఇజి ఒడజిబిజి మహార్. వారు రోమ ప్రబుత్వం వందిజ్ వన్ను ప్రితి మహార్. అక్క, యూదురి రులుదిజ్ వడివండ మహాద్. వారు కిని వణిదాన్ వారు ఆఇవరివెట కూడజి మహిజ్ వారు సుబ్బరం సిల్లికార్ ఇజి వరివందిజ్ ఒడజిబిజి మహార్. † 9:13 హోసెయ 6:6. †† కనానియదికాన్ సీమోను - తెలుగు రోమది ఏలుబడి:దాన్ యూదురు దేసమ్దిజ్ విడుదల కిడెజ్ ఉసార్దాన్ సుడి:జిని యూదురు నజం మనాద్ అయా నజమ్దికాన్ ఒరెన్ సీమోను.

5 యేసు అయ వనెండు మన్ని సిసూరిజ్ పాక్షివలె ఈహు వెహ్తాన్. "యూదురు ఆఇవరి నడిఃమి మీరు సాన్మాట్. సమరియదివరి పట్టుమ్కాజ్ బా సాన్మాట్. 6 గాని మీరు ఇసాయేలుది మురుతి గొర్రెజ్జెకెండ్ మనివరి నడిఃమి సాండ్లు. 7 మీరు సాన్ని, 'దేవుణు ఏలుబడిః కినిక డగ్రు ఆత మనాద్' ఇజి పాట్టు. 8 జబుదివరిజ్ నెగండ్ కిదు, సాతి వరిజ్ నిక్కు, పెరి కన్ఘమ్ది వరిజ్ నెగణ్ కిదు, దెయమ్కాజ్ పేర్దు. యా వణిజ్ కిదెజ్ అతికారం సెడ్డిఃనె మిజి దోహ్కత్త మనాద్. అందెజె మీరు ఎయెర్ బాణిజ్ బా ఇనికబా లోస్ ఎండ ఇకెన్ డిఃనె కిదు. 9 మీరు సానివెలె బజారం, రుసాయ్ గాని వెండి, రుసాయ్ గాని రాగి రుసాయ్ గాని మీ నన్నిదు ఒమాట్. 10 వయనం కినివెలె నన్ని ఒమాట్. రుండి సాక్రెజ్, జోడ్కు, డుడు ఇనికబా ఒమాట్. ఎందనిజ్ ఇహిజి వణికినికాన్ వన్నిజ్ కాసాన్తికెజ్ దోహ్కెజ్ తగ్గికాన్.

11 మీరు ఎమేణి పట్టుమ్దు సాహిజ్ బా అబె ఒరెన్ నెగ్గివన్నిజ్ రెబాజి వన్ని ఇండ్రొనె అబెణిజ్ సాని దాక మండ్రు. 12 మీరు అయ ఇండ్రొ డుఃగితిజ సరి, 'మిజి సమాదనం మనిద్' ఇజి వెహ్తా. 13 అయ ఇండ్రొణికార్ మిజి డగ్రు కిఇతిజ, నస్తివెలె మీరు వెహ్సిలెకెండ్ వరిజ్ దీవనమ్కు మంజినె. వారు తగిఇకార్ ఇహిజ అయాలెకెండ్ వరిజ్ జగ్గివద్. 14 మీరు ఉండ్రీ పట్టుమ్దు గాని, ఉండ్రీ ఇండ్రొ గాని అందితిజ, వారు మిజి డగ్రు కివీండ మరి మీ మాటెజ్ డగ్రు కివీండ మహిజ, వరి ముస్సు వారి దేవుణు బాణిజ్ సిక్కు అప్పె ఆజినార్ ఇనిదన్నిజ్ గుర్తు లెకెండ్, మీరు అయ పట్టుమ్నో ఇల్లునో డిఃసి సానివెలె మీ పాదమ్కాణి దుల్లి దూలోప్పి సాండ్లు. 15 దేవుణు తీర్పు తీరిన్ని రోజాదు అయ పట్టుమ్దు మని వరిజ్ ఒద్దె లాస్ సిక్కు సీనాన్ ఇజి నాను మిజి నిజం వెహ్సిన్. సాదోమ గొమోర పట్టుమ్కాజ్ మహివరిజ్ సాన్ని సిక్కు మన్వద్. 16 కార్నుకుడిఃజ నడిఃమి గొర్రెజ్జెకెండ్ నాను మిజి లోకుర్ నడిఃమి పాక్షిన్. అందెజె మీరు సరాస్సు లెకెండ్ బుది మనికిదెర్, పావుర పాటిజ లెకెండ్ సెఇకెజ్ ఇనికెజ్ సిలికిదెర్ ఆజి మండ్రు.

17 లోకుర్ వందిజ్ జాగ్ర మండ్రు. వారు మిజి కోర్డుదు ఒపజెప్పి, మరి యూదురు మీటిజ్ కిని ఇల్యూజ్ మిజి కొర్డెజిణిజ్ డెఃయ్యునార్లె. 18 రాజారిజ ముందాల, అదికారిజ ముందాల నా ముస్సు నమకం ఇట్టి వందిజ్ మిజి అసి తోహ్సి ఒనార్లె. వరి ముందాలని యూదురు ఆఇ వరి ముందాల నా వందిజ్ మీరు వరిజ్ సువార్త వెహ్సిదెర్లె. 19 గాని వారు మిజి తోహ్సి ఒనివెలె ఇనిక వెహ్సెజ్, అక ఎలాగ వెహ్సెజ్ ఇజి మీరు బెజ ఆమాట్. అయాలెనె వగ్గిదెజ్ సరి ఆతి మాటెజ్ మిజి దోహ్కెలె. 20 ఎందనిజ్ ఇహిజి అయాలె వర్గినిక మీరు ఆఇదెర్. మీ బుబ్బు ఆతి దేవుణు ఆత్మ మీ లోఇహాన్ వర్గినాన్లె.

21 దాద్ది తంబేరిజ్, తంబెరి దాద్దిజ్, అహాని మరిసిజ్ సప్తెజ్ ఒపజెహ్సెర్లె. కొడోర్ అయేసి అహ్సానిర్ ముస్సు గొడబ ఆజి వరిజ్ సపిసార్లె. 22 నా ముస్సు నమకం ఇట్టి వందిజ్ విజేరి మీ ముస్సు పగదాన్ మంజినార్లె. గాని ఆకార్ దాక ఓరిన్ని వన్నిజ్ దేవుణు రక్తిసార్లె. 23 ఉండ్రీ నాటో మిజి హిమ్న కితిజ, మరి ఉండ్రీ పట్టుమ్దు ఊహ్సి సాండ్లు. లోకు మరిసి వాని ముందాల సువార్త సాటనిసి వణి పూర్తి వీజ్ ఎండ ఆనాద్, ఇజి నాను మిజి నిజం వెహ్సిన్.

24 నద్వినికాన్ నెస్సిస్సివన్ని ముస్సు పెరికాన్ అవన్. వణిమన్ని యెజామాని ముస్సు పెరికాన్ అవన్. 25 నద్వినికాన్ నెస్సిస్సివన్ని లెకెండ్ ఆతిజ ఆనాద్. వణిమన్ని యెజామాని లెకెండ్ ఆతిజ ఆనాద్. ఇండ్రొణి యెజామానిజ్ వారు బయల్ జెబులు † ఇజి కూక్కి మోసిం వెహ్సెర్ ఇహిజి ఇండ్రొణికార్ ఆతి మీ వందిజ్ మరి ఎసానో సెఇ మాటెజ్ వెహ్సెర్లె. 26 అందెజె వరిజ్ మీరు తియెల్ ఆమాట్. డాప్తి మనికెజ్ విజా తోర్ ఆనెలె. నెన్ ఏండ మూస్తి మనికెజ్ విజా నెసె ఆనెలె. 27 మీ వెట నాను సీకటిదు వెహ్సి మాటెజ్, మీరు జాయ్దు వెహ్తా. మీ గిబిజ వెహ్సి మాటెజ్ విజేరి వినిలెకెండ్ మిద్దెజ ముస్సుహాన్ మీరు డలు వెహ్తా. 28 ఆత్మదిజ్ సప్తెజ్ అట్ ఏండ ఒడోఃల్ దిజ్ నె సప్తెజ్ అట్టి వరిజ్ మీరు తియెల్ ఆమాట్. గాని ఆత్మని ఒడోఃల్ దిజ్ సిసు మంజిని బాడిఃదు పాక్షి నాసనం కిదెజ్ అతికారం మని దేవుణుదిజ్ తియెల్ ఆజి మండ్రు. 29 ఉండ్రీ కానుదిజ్ రుండి ఇజి పంబ పాటిజ్ పార ఆజినగెదె. అహిజ్ బా నీ బుబ్బాతి దేవుణు నెన్ ఏండ దన్ని లోఇ ఉండ్రీబా అగ్గి బూమిదు సాదెజ్ ఇజి డిఃసి సీవన్. 30 నీ బుర్ది కొప్పు విజాబా లెక కిబె ఆత మనాన్. 31 అందెజె మీరు తియెల్ ఆమాట్. మీరు యా ఇజిరి పంబ పాటిజ మిస్తి విలువ మనికిదెర్.

32 లోకుర్ ముందాల నజి ఒప్పకొణి, విజెరిజ్ నానుబా వరివందిజ్ పరలోకామ్దు మని నా బుబ్బాతి దేవుణు ఎర్దు ఒప్ప కొణా. 33 గాని ఎయెన్ బా లోకుర్ ముందాల నజి నెన్ ఏ ఇజి వెహ్సిజ, పరలోకామ్దు మని నా బుబ్బాతి దేవుణు ముందాల నానుబా వన్నిజ్ నెన్ ఏ ఇజి వెహ్సెలె.

34 బూమి ముస్సు సమాదనం తప్పిసెజ్ నాను వాత మన ఇజి మీరు ఒడోఃబిమాట్. పగ తప్పిసెజ్ వాత, సమాదనం అవద్. 35 ఎందనిజ్ ఇహిజి, మరిసిజ్ వన్ని అహ్సాని ముస్సు, గాడ్డిజ్ దని అయేసి ముస్సు, కొడిఃయెసిజ్ దని మీమ్సి ముస్సు పగ కిబిసెజ్ నాను వాత మన. 36 నా ముస్సు నమకం ఇట్టి వందిజ్ ఒరెన్ వన్ని ముస్సు వన్ని సాంత ఇండ్రొణికార్ పగాతికార్ ఆనార్. ††

37 బుబెజ్ బా యాయెజ్ బా నజి మిస్తి ప్రిమిస్సికాన్ నజి తగ్గికాన్ అవన్. మరిసిజ్ బా గాల్నిజ్ బా నజి మిస్తి ప్రిమిస్సికాన్ నజి తగ్గికాన్ అవన్. 38 కన్ఘమ్కు ఓరిస్సెజ్ ముస్సు సిల్లికాన్, మరి నా వెట సాదెజ్ ఇజిబా ముస్సు సిల్లికాన్, ఎయెన్ బా నజి తగ్గికాన్ అవన్. 39 వన్ని పాణమ్దిజ్ కాపాడిఃదెజ్ ఇజి సుడిఃతిజి వాండ్రు దన్నిజ్ సాన్పిసార్లె. నా వందిజ్ వన్ని పాణం సాన్పిసార్లె దనిజ్ కాపాడ్సాన్.

40 నిజి డగ్రు కినికాన్ నజినె డగ్రు కినికాన్. నజి డగ్రు కినికాన్ నజి పాక్షివన్నిజ్ బా డగ్రు కినికాన్. 41 ఒరెన్ దేవుణు ప్రవక్తెజ్, వాండ్రు దేవుణు ప్రవక్త ఇజి నెసి ఎయెన్ బా వన్నిజ్ డగ్రు కితిజ, దేవుణు ప్రవక్తెజ్ దోహ్కె లెకెండ్ వన్నిజ్ బా పలం దోహ్కెర్లె. ఒరెన్ నీతి నిజాయితి మని వన్నిజ్ వాండ్రు నీతి నిజాయితిదికాన్ ఇజి నెసి ఎయెన్ బా వన్నిజ్ డగ్రు కితిజ, నీతి నిజాయితి మని వన్నిజ్ దోహ్కె లెకెండ్ వన్నిజ్ బా పలం దోహ్కెర్లె. 42 యా నా సిసూర్ లోఇ ఇజిరి ఒరెన్ వన్నిజ్ వాండ్రు నా సిసూర్ ఇజి నెసి ఎయెన్ బా ఉండ్రీ గలన్ ఏరు నీతిజ, దనిజ్ తగితి పలం తప్ప ఏండ వన్నిజ్ దోహ్కెర్లె ఇజి నాను మిజి నిజం వెహ్సిన్."

యేసుని బాప్తీసం సీని యోహాను

11 యేసు వన్ని పనెండు మన్ని సిసూర్ జ బోదిసి వీజితి వెనుక, అబెణిజ్ సాని గలిలయ దేవమ్దు మని పట్టుమ్కాజ్, నాహ్కె సువార్త సాట్టెజ్, బోద్నిజ్ సాహాన్. 2-3 జెలిదు మని యోహాను క్రీస్తు కిని వణిజి వందిజ్ వెంజి, "వానికి నీనెనా? నీలిజ మరి ఒరెన్ వన్నిజ్ మాపు ఎర్దు సుడిఃజి మండ్రెజ్నా?", ఇజి వెన్ బాదెజ్ వన్ని సిసూర్ జ యేసు డగ్రు పాక్షాన్. 45 యేసు వరిజ్ ఈహు వెహ్తాన్, "గుడ్డిదికార్ సుడిఃజినార్, సాటాదికార్ నడిఃజినార్, పెరి జబు మనికార్ నెగణ్

† దేవుణుదిజ్ పాగడిఃజి మాడిఃనె ఇ యూదురు ఆఇకార్ మాడిఃనె మహి, ఉండ్రీ బొమ్మదిజ్ బెయల్ జెబుల్లు. యూదురు అయ బొమ్మదిజ్ "పార్లెజ్ మాడిఃనె బొమ్మ", ఇజి వెక్కిని వహ్సి మహర్. అందెజె వారు యేసుప్రబుజ్ బెయల్ జెబుల్లు ఇజి కూక్కివెలె వన్నిజ్ నండో మోసిం వెహ్సి మహర్. †† 10:36 మికా 7:6.

అజినార్, బోయ్ రాదికార్ వెంజినార్, సాతికర్ నిజె అజినార్, బీదాతి వరిజ్ సువార్త వెహె అజినార్, ఇజి యా లెకెండ్, మీరు సుడేజినికెజ్, వెంజినికెజ్ మర్జి సాన్ని, యోహానుజ్ వెచ్చు. ⁶ గాని నా ముస్సు మన్ని నమకం డిసి సెఇకాన్ దేవుణు సీని దీవెనమ్ కు మంజినికాన్ ఆనాన్ లె." ⁷ యోహాను సిసూర్ మర్జి సాన్ని మహిజ్ యేసు యోహాను వందిజ్ ఈహు వర్గిదెజ్ మెదల్ స్తాన్. "ఇనిక సుడేదెజ్ మీరు బిడిమ్ బూమి ప్రాతమ్ దు సాహిమహిదెర్? గాలిదిజ్ దూజ్ జిని గడిదిజ్ ఫాలితి ఒరెన్ వన్నిజ్ సుడేదెజ్ నా? ⁸ సిల్లిజ మరి ఇనిక సుడేదెజ్ మీరు సాహి మహిదెర్? నెగ్గి సాక్కెజ్ తొడేగితి మని ఒరెన్ వన్నిజ్ సుడేదెజ్ నా? నూనాజ్ మని నెగ్గి సాక్కెజ్ తొడేగితి మంజినికార్ రాజారి ఇల్కాజ్ మంజినికార్ గదె? ⁹ సిల్లిజ మరి ఇనిక సుడేదెజ్ మీరు సాహిమహిదెర్? ఒరెన్ దేవుణు ప్రవక్తెజ్ సుడేదెజ్ నా? నిజమె, దేవుణు ప్రవక్తెజ్ ఇంక పెరివన్నిజ్ నె ఇజి నాను మిజి వెహెన్. ¹⁰ 'నాను నా కాబ్బు తనివన్నిజ్ నిజి ఇంక ముజాల ఫాక్కు. వాండ్లు నీ ముజాల నీ సరి నెగెండ్ కినాన్' † ఇజి వన్ని వందిజె దేవుణు మాటదు రాస్త మనాద్. ¹¹ బోదెక ఫాటాదు పుట్టివరి లోఇ యోహాను ఇంక మిస్తికాన్ ఎయెన్ బా సిలెన్. గాని దేవుణు ఏలుబడి కినిదని లోఇ ఇజిరికాన్ ఆతికాన్, యోహానుజ్ ఇంక పెరికాన్ ఇజి నాను మిజి నిజం వెహెన్. ¹² బాస్టిసం సీని యోహాను కాలమ్ దాన్ ఏలుదాక దేవుణు ఏలుబడి కినిక బలవందమ్ దాన్ ముజాల వాజినాద్. మరి గొప్ప సత్తు మనికార్ దనిజ్ అడ్డు కిదెజ్ సుడేజినార్. ¹³ మోసె సితి రూలుజ్ ని దేవుణు ప్రవక్తరు విజెరిబా దేవుణు ఏలుబడి కినివందిజె యోహాను కాలమ్ దాక వర్గిజి మహార్. ¹⁴ నమిదెజ్ మిజి ఇస్టం మహిజ, ఏలియ వానాన్లె ఇజి ముజాల వెహెన్ వని వందిజెన్. ¹⁵ మి గిబ్బుజ్ జాణిజ్ నెగెండ్ వెంజి అయా వజ నడిజి మండ్లు. ¹⁶⁻¹⁷ 'యా తరమ్ ది వరిజ్ ఇనిదనిజ్ సమానం వెహెజ్? వారు సతాదు బసి, మహివరిజ్ డేల్లిని కొడోర్ లెకెండ్ మనార్.' 'మాపు మీ వందిజ్ పెరుడిః ఉహక్తమ్ గాని డాట్ ఇతిదెర్, సాతి ఇండ్రో పాటెజ్ పార్తాప్ గాని మీరు గుండె కొత్తె ఆజి మీరు అడేబ ఇతిదెర్'. ¹⁸ యోహాను వాతివెలె వాండ్లు తిండి వందిజ్ లాన్ ఒడేబింద రోజా ఉపాన్ కిజి మహాన్. వాండ్లు అయాలెకెండ్ తిన్ ఎండ, ఉణె ఎండ మన్నిజ్ వన్నిజ్ దెయం అస్తాద్ ఇజి వారు వెహెన్. ¹⁹ లోకు మరిసి ఆతి నాను తింజి, ఉణెజి వాతాన్ కాక 'పిండ్లు తిండి కకూర్తికాన్' మరి ఉణెజి సాస్సికాన్, పన్ను పెర్గివరిజ్ ని పాపం కిజిని వరిజ్ కూలాయెన్ ఇజి వారు వెహెన్. గాని దేవుణు బాణిజ్ వాని గెణం మన్నికార్ వారు కిజిని నెగ్గి పణిజాణిజ్ అయ గెణం సరియాతిక ఇజి రుజాప్ కిజినాద్."

నమకం సిల్లికార్ మన్ని పట్నమ్ కు

²⁰ మరి యేసు ఎమేణి పట్నమ్ కాజ్ నండో బమ్మి ఆతి పణిజ్ కితిజ్ బా వారు వరి మన్ను మారిన్ ఎతారో, అయ పట్నమ్ కాజ్ ముస్సు కోపం అజి వర్గితాన్. ²¹ అబయా! కోరజిన్ పట్నమ్ దు మనికిదెరా మిజి అస్సా గొప్ప కష్టమ్ కు, వానెన్, అబయా! బెత్ సెయ్యె పట్నమ్ దు మన్నికిదెరా మిజిబా ఎస్సా గొప్ప కష్టమ్ కు వానెన్. ఎందనిజ్ ఇహిజ నాను మీ నడిః మి కితి మహి బమ్మాతి పణిజ్ తూరుని సీదోను పట్నమ్ కాజ్ కిని మంజినిక ఇహిజ వారు ఎస్సా ముజాలె బస్త సాక్కెజ్ తొడిగిజి ఒడేదు నీరు రాని ఆజి ఉపాన్ కిజి వరి పావమ్ కు ఒప్పకొడేజి డిసి సీజి మన్ను మారిని అయాలెకెండ్ మినికార్ ఇజి తొరోస్తార్ మరి. ²² అందెజె నాను నిజి వెహెన్ ఇనిక ఇహిజ తీర్పు తీరిస్సి రోజాదు తూరుని సీదోను పట్నమ్ దివరిజ్ మిస్తి సిక్కు మిజి వానాద్ లె. ²³ ఒ కర్పూహమా, "అగానమ్ దు మనికిదెరా, మీరు అగానమ్ దాక అందిజిని గొప్ప వారు ఇజి మీరు ఒడేబిజినిదెరా? గాని దేవుణు అయా లోకమ్ దు విసిర్ నె. మీ నడిః మి కితి మహి బమ్మాతి పణిజ్ నాణు సాదోము పట్నమ్ దు కిని మంజినిక ఇహిజ అయ సాదోము పట్నమ్ దికార్ వరి అలవాటుజ్ డిసి సీజి అయ పట్నమ్ దిజ్ దేవుణు సిక్కు సివిండ ఏలుదాక మహాద్ మరి. ²⁴ అందెజె నాను నిజి వెహెన్ తీర్పు తీరిస్సి రోజాదు సాదోము పట్నమ్ దు మహివరిజ్ వాని దన్నిజ్ మిస్తి సిక్కు మీ లోకురి ముస్సు వానాద్ లె."

వందితివరిజ్ కూక్కినిక.

²⁵ వెనుక యేసు ఈహు వెహెన్, "పరలోకామ్ దిజెని బూమిదిజ్ ప్రబువాతి నా బుబ్బా, నాను నిజి పాగ్ డిః జిన. ఎందనిజ్ ఇహిజ గెణం మన్ని వరిజ్ ని సదువు మన్ని వరిజ్ యా సజతిజ్ తెలియ కిప్పండ యా సదువు సిల్లి వరిజ్ తెలియ కిత్తి. ²⁶ నిజమె బుబ్బు, ఈహు కినికాదె నిజి ఇస్టం ఆతాద్. ²⁷ బుబ్బు విజా సజతిజ్ నా కీదు ఒవజెత్త మనాన్. బుబ్బు ఆవిండ మరి ఎయెర్ బా మరిసిజ్ నెన్ పర్. మరిసిని, మరిసి వన్నిజ్ తెలివి కిదెజ్ ఎర్గితికార్ బుబ్బెజ్ నెస్సార్. మరి ఎయెర్ బా నెన్ పర్. ²⁸ కష్టబాడేజి బరు పిండ్ జి వందితి విజిదెరె, మీరు నా డగ్గు రదు. నాను మిజి రొంబిస్సు. ²⁹ నాను సార్గిదికాన్. నాను మెతని మన్ను మనికాన్. నా వెట కూడేజి ఉండ్రె వ్రాండు మీ మెడః ముస్సు ఫాకె అజి మాటు కూడేజి పణికినాట్, మీరు నా అడ్రెజ్ లోజిజి నా బాణిజ్ నెస్తు. నస్తివలె మీ పాణమ్ కాజ్ నివాలం కలగినాద్. ³⁰ ఎందనిజ్ ఇహిజ నా కూడేజి నా వ్రాండు అడిగి వణి కిత్తిజె పణి సూలు మంజినాద్, బరుబా సుల్కానిక మంజినాద్."

యేసు విస్తాంతిదినమ్ దు ప్రబు.

12 అయావలె యూదురి విస్తాంతిదినమ్ దు యేసు పంట గుడ్డెదాన్ సాన్ని మహివలె, వన్ని సిసూరిజ్ బజ కట్టిజ్, వారు సెరెక్ తెప్పి నూల్చి తింజి మహార్. ² అయాక వరినయ్యరు సుడేతారె, "ఇదిలో, మోసె సిత్తి రులువజ విస్తాంతిదినమ్ దు కిదెజ్ అఇ పణి, నీ సిసూర్ కిజినార్", ఇజి యేనుజ్ వెహెన్. ³ వాండ్లు వరివెట ఈహు వెహెన్, "దావీదు రాజాని వన్నివెట మహివరిజ్ బజ కట్టిజ్, వాండ్లు ఇనిక కిత్తాండ్రో ఇజి మీరు దేవుణు మాటదు ఎనెజ్ బా సద్విఇతిదెరా? ^{††} వాండ్లు ఇనిక కిత్తాన్ ఇహిజ, గుడారమ్ దు † సాన్ని, దేవుణు ముజాల ఇడ్డిమహి రొట్టెజ్ లాగితాన్. వాండ్లుని వన్నివెట మహికార్ విజెరె తిహార్. అయాక వుజెరెబునె తప్ప మరి ఎయెర్ బా తిండ్రెజ్ అపిద్ ఇజి మోసె సిత్తి రూలుదు వెహె మనాద్. ⁵ దేవుణు గుడిః దు మన్ని పుజెరిబు విస్తాంతిదినమ్ దు పణి కిజినార్ గాని అక తప్ప అపిద్ ఇజి దేవుణు మాటదు రాస్తి మన్నిక మీరు ఎనెజ్ బా సద్విఇతిదెరా? ⁶ దేవుణు గుడిః దిజ్ ఇంక మిస్తికాన్ ఇబ్బె మనాన్ ఇజి నాను మిజి వెహెన్. ⁷ 'మీరు మహివరి ముస్సు కనికారం తొరిస్తిజ్ ఇజిని నాను కోరిజిన్ గాని కత్తి సీజిని వ్రాజెజు నాను కోర్ ప' † ఇని మాటదిజ్ అర్గం మీరు

† 11:10 మలా 3:1. †† దావీదు రాజా కిత్తిక సముయేలు ప్రవక్త పుస్తకమ్ దు రాస్త మనాద్. 21:1-6. † గుడారమ్ దు విజా విస్తాంతి దినమ్ దు దేవుణుదిజ్ వ్రాజె సిత్తిలెకెండ్ 12 కొత్త రొట్టెజ్, సమాజ గుడారమ్ దు మన్ని బల్గాదు ఇడ్డి మంజినె కొత్త రొట్టెజ్ ఇడ్డి బాణిజ్ లాగితి పదాయ్ రొట్టెజ్ పుజెరిబు తిసార్. లేవ 24:5-9 అయకాలమ్ దు యెరుసల్లేమ్ దు మన్ని దేవుణు గుడిః సిల్లితాద్. దావీదు రాజా మరియాతి సాల్ మొసు కాలమ్ దునె యెరుసల్లేమ్ దు మన్ని దేవుణు గుడిః వాండ్లు తొహెన్. †† 12:7 హోసెయ 6:6.

నెసిమంజినక ఇహిజ, ఇని తవుబా కిఇవరి ముస్సు తప్పు మాటెజ్ వెహోవతార్ మరి. ⁸ ఎందానిజ్ నాను యాలెకెండ్ వెహినిక ఇహిజ, లోకుమరిసి ఆతి నజీ విజా దన్నిజ్ అతికారం మనాద్. విస్తాంతి దినమ్దు లోకుర్ ఇనిక కిదెజ్వలె ఇజి వెహిజ్బా నజీ మనాద్. ⁹ అబ్బెణిజ్ సాన్ని మహివలె, వాండ్రు యూదురు మీటిజ్ కిని ఉండ్రి ఇండ్రో సాహాన్."

¹⁰ వస్తా అర్తి ఉండ్రి కియు మన్నికాన్ ఒరెన్ అబ్బె మహాన్. యేసు ముస్సు తప్పు మొప్పజ్ ఇనికాదో ఉండ్రి సజతివందిజ్ సుడిజి వారు వన్నిజ్ ఈహు వెన్బాతార్, "విస్తాంతిదినమ్దు ఎయెరిజ్బా నెగెండ్ కినిక దేవుణు రూలుదిజ్ తగ్గాదా?". ¹¹ యేసు వరిజ్ ఈహు వెహిజ్, "మీ లోఇ ఎయెరిజ్బా ఉండ్రి గొరై మహిజ, విస్తాంతిదినమ్దు అక్క ఉండ్రి గాందదు అర్తిజ, మీరు దనిజ్వెల్లి లాగిఇదెరా? ¹² మెండగొరైదిజ్ ముస్సు లోకు ఎస్సానో విలువ మన్నికాన్. అందెజె విస్తాంతిదినమ్దు మేలు కినిక దేవుణు మోసెజ్ సీత్తి రూలుదిజ్ తగ్గాద్." ¹³ అయావలె వాండ్రు వస్తా కియు అర్తి వన్నిజ్ "నీ కియు నవ్అ", ఇజి వెహిజ్. వాండ్రు కియు సాహాన్. అయావలె అక నెగెండ్ మన్ని మరి ఉండ్రి కియు లెకెండ్ ఆతాద్. ¹⁴ గాని పరిసయరు వెల్లి సాహారె యేసుజ్ ఎలాగ నప్పజ్ ఇజి వన్నిజ్ వడిఎండ ఆలోసనం కిత్తార్.

దేవుణు ఏర్పాటు కితికాన్

¹⁵ యేసు అయా సజతి నెస్తాండ్రి అబెణిజ్ సాహాన్. నండొండార్ వన్ని వెనుక సాహార్. వాండ్రు పరి జబ్బుది పరిజ్ విజెరిజ్ నెగెండ్ కిత్తాన్. ¹⁶ నా వందిజ్ ఎయెరిజ్బా వెహిజ్ ఇజి పరిజ్ వెహిజ్. ¹⁷ యెనయ ప్రవక్త వెలు దేవుణు ముజాల వర్తితి యా మాటెజ్ వూర్తి ఆదెజ్ ఇజి యా లెకెండ్ జర్తితాద్.

¹⁸ "ఇదిలో, నాను ఏర్పాటు కితి నా పణి మన్ని వీండ్రె, నాను వన్నిజ్ ప్రేమిసిని, వన్ని ముస్సు నర్ల ఆజిని. నాను వన్ని ముస్సు నా ఆత్మదిజ్ పోక్కు. వీండ్రు విజా జాతిది పరిజ్ నాయం తీరిన్నాలె. ¹⁹ వీండ్రు జటిజ్ ఆవన్, డేల్స్వన్, విన్ని కంటం వీదిజి ఎయెరిజ్ విన్పెన్వన్. ²⁰ నలిగతి గడిదిజ్ వాండ్రు తప్పి విసీర్వన్, నమన దీవదిజ్ వాండ్రు నవ్ఎన్ †. వాండ్రు నాయమ్దిజ్ గెల్పిసినాన్. ²¹ లోకుర్ విజెరె వన్నిజె ఆసదాన్ ఎర్దు సుడిజి మంజినార్. వాండ్రు విజా జాతిజ పరిజ్ నాయం తీరిన్నాన్." ††

యేసుని బయల్పెబ్బులు

²² అయావలె సెగెండ్, దెయం అస్తిమహిజ్ వర్తిదెజ్ అల్జ గుల్ల ఆతి ఒరెన్ వన్నిజ్ యేసు డగ్రు తతార్. యేసు వన్నిజ్ నెగెండ్ కిత్తాన్. వాండ్రు సుడిదెజ్, వర్తిదెజ్ అట్టాన్. ²³ లోకుర్ విజెరె బమ్మ ఆజి, "మాప్ ఎర్దుసుడిజి కాపికిజి మంజిని దావీదు రాజా తెగ్గదికాన్ వీండ్రు ఆవండ్రా?", ఇజి వర్తిజి మహార్.

²⁴ పరిసయరు అయ మాట వివారె, "విజా దెయమ్కాజ్ నెయ్యి ఆతి బయల్పెబ్బులు సాయమ్దాన్ వీండ్రు దెయమ్కాజ్ పేర్జినాన్", ఇజి వెహిజ్.

²⁵ యేసు పరి ఆలోసనమ్కు నెసి పరిజ్ ఈహు వెహిజ్. "ఎమేణి దేనమ్దికారెబ వ రిజ్ వారె వగ ఆజి ఎర్లిజి మహిజ అయ దేసం పాడానాద్. అయాలెకెండ్ ఎమేణి పట్నమ్దికార్ గాని ఇండ్రోణికార్ గాని, పరిజ్ వారె, వగ ఆజి ఎర్లిజి మహిజ నీ ఎమేణి పట్నం గాని ఇల్లు గాని ఏలుబా లావ్ రొస్సు నిల్పి మన్వద్.

²⁶ సయ్యాను అడిగి మన్నికార్ ఉండ్రి జటుదికార్, మరి ఉండ్రి జటుదివరివెలు వగ ఆజి ఎర్లె ఆజి విదెం కిజి మహిజ, వన్ని ఏలుబడి: ఎలాగ లావ్ రొస్సు నిల్పి మంజినాద్." ²⁷ బయల్పెబ్బులు సాయమ్దాన్ నాను దెయమ్కాజ్ పేర్జి, మీ లోకుర్ ఎలాగ దెయమ్కాజ్ పేర్జినార్? అందెజె నా వందిజ్ మీరు వెహిజెజ్ తవు ఇజి వారె రుజాప్ కిజినార్. ²⁸ గాని దేవుణు ఆత్మ సత్తుదాన్ నాను దెయమ్కాజ్ పేర్జి ఇహిజ, నిజమె దేవుణు ఏలుబడి: కినిక మీ నడిమి వాత మనాద్.

²⁹ సుడిదు, ఒరెన్ సత్తుమని వన్నిజ్ ముజాల తోహోవండ, వన్ని ఇండ్రో డుగిజి ఇండ్రోణి సామనమ్కు ఎయెరిజ్బా ఒకెజ్ అల్నార్? ముజాల వన్నిజ్ అసి తోహిజనె డొజి కిదెజ్ అల్నార్. ³⁰ నా వెలు కూర్ణి మన్ఇకాన్ ఎయెన్బా నజి వగాతికాన్ ఆనాన్. లోకురిజ్ దేవుణు డగ్రు తత్తెజ్ నా వెలు కూర్ణిజి మన్ఇకాన్ లోకాజ్ సెద్రిస్సికాన్ ఆజినాన్. ³¹ మరి నాను మిజి వెహినిక ఇనిక ఇహిజ, లోకుర్ కిని విజా పావమ్కాజ్, దూసణదిజ్ దేవుణు సెమిన్నాన్, గాని దేవుణు ఆత్మదిజ్ దూసిని వెహిజె ఆకెజ్ ఎసెజ్బా సెమిన్వన్. ³² లోకు మరిసి ఆతి నజి వడిఎండ ఇనికబా వర్తిజి దేవుణు వన్నిజ్ సెమిన్నాన్. గాని దేవుణు ఆత్మదిజ్ వడిఎండ వర్తిని వన్నిజ్ యా లోకమ్దుబా, వాని లోకమ్దుబా దేవుణు సెమిన్వన్.

³³ మరాన్ నెగ్గె ఇహిజ దని పండుబా నెగ్గెకదె. నీలిజ, మరాన్ నెగ్గెక ఆవండ మహిజ దని పండుబా నెగ్గెక ఆవద్. మరాతి పండుదానె మరాన్ ఎలాగ మర్తికాదో ఇజి నెప్పజె ఆనార్. ³⁴ వినం మన్నిసరాన్ నన్నికిదెరా, సెఇకిదెరాతి మీరు నెగ్గె మాటెజ్ ఎలాగ వర్తిదెజ్ అట్టెదెర్? మీ మన్నుదు మీరు ఒడిబిని దన్నిజ్ తగితి లెకెండ్నె మీ వెయు వర్తిజినాద్. ³⁵ నెగ్గె మన్ను మన్ని వన్నిజ్ కూలిజ్ కొట్టుకిత్తి మన్నిలెకెండ్, వని మన్నుదు నెగ్గెకెజె మంజినె. అందెజె వన్ని వెయుదాన్ నెగ్గె మాటెజె వానె సెఇ మన్ను మనివన్నిజ్ సెఇకెజె మంజినె. అందెజె వన్ని వెయుదాన్ సెఇ మాటెజె వానె. ³⁶ గాని నాను మిజి వెహినిక ఇనిక ఇహిజ, దేవుణు తీర్పు తీరిస్సి రొజాదు, లోకుర్ వర్తితి మహి విజా మాటెజె వందిజ్ లెక్క సీదెజ్ వలె. ³⁷ అహిజ మీ మాటెజాణిజె మీరు సిక్కుదాన్ తప్పె ఆనిదెర్, సిల్లిజ మీ మాటెజాణిజె మీరు మీ ముస్సు సిక్కు తప్పె ఆనిదెర్.

ఓన ఉండ్రి గుర్తు

³⁸ నస్సివలె సెగెండ్ పరిసయరుని యూదురి రూలుజ్ నెస్సిస్సికార్ యేసు డగ్రు వాజి వన్నిజ్, "బోదకినికి, నీను దేవుణుబాణిజ్ వాతికాన్ ఇనిదన్నిజ్ గుర్తు లెకెండ్ సీను తోరిసిని ఉండ్రి బమ్మాతి పణి సుడుదెజ్ ఇజి కోరిజినాప్", ఇజి వెహిజ్. ³⁹ వాండ్రు పరిజ్ "యా తరమ్దికిదెర్ ఆతి మీరు సెఇకిదెర్. దేవుణుదిజ్ నెస్ఇకిదెర్నె, గుర్తు లెకెండ్ ఉండ్రి బమ్మాతి పణి కిజి తోరిన్ అ ఇజి వెహిజెదెర్. గాని దేవుణు ప్రవక్త ఆతి ఓనెజ్ † జర్తితిక తప్పె మరి ఇని గుర్తుబా ఎయెరిజ్బా తోర్వద్. ⁴⁰ ఓన మూండ్రి రొస్సు పేరి మెయ పాటాదు ఎలాగ మహండ్రో, అయలెకెండ్నె, లోకుమరిసి ఆతి నానుబా మూండ్రి రొస్సు బూమి లోఇ మంజినలె.

† అయ మాటదిజ్ అర్ధం ఇనిక ఇహిజ, లోకుర్ దేవుణు ముస్సు మన్ని నమకమ్దిజ్ కండెక్ వెనుక అతిజ్నో దయరం సిల్లెండ ఆతజ్నో యేసు వన్నిజ్ డి:సి సిన్ మొకొం మహోవన్.
 †† 12:21 యెనయ 42:1-4. ‡ వడాయ్ ఒప్పుమానమ్దు ఓన వందిజ్ రాస్త మనాద్ వాండ్రు వయెనం కిజి మహి ఓడదాన్ సమదరమ్దు విసిరి ఆతిజ్ ఉండ్రి పేరి మెయ, దేవుణు వెహిజె వజి వన్నిజ్ డి:జెతాద్ మూండ్రి రొస్సు వెనుక వన్నిజ్ సమదరం ఒడ్డుదు పాణమ్దాన్ కక్తాద్ ఓన గుర్తు వందిజ్ మూసె ఆని వందిజ్ మరి మూండ్రి వాండ్రు సాతి పరి బాణిజ్ మరి మర్తిజి నిజిజె వెహిజ్.

41 ఓన వెళ్లి మాటెజ్ విహార నినివెదికార్ వరి పావమ్కు ఒప్పు కొడిజి డిస్త సితార్. అందెజె తీర్పు తీరిసిని దినమ్దు వారు యా తరమ్ది వరి వెట నిల్లి విరిముస్సు తీర్పు తీరిస్సార్లె. ఇదిలో, ఓనెజ్ మిస్తికాన్ ఒరెన్ ఇబ్బె మనాన్ ఇజి నాను వెస్సెన. 42 అక్కరి దినమ్కాజ్ తీర్పు తీరినివలె, దసిణ దేసెమ్ది రాణి ఉండ్రి సానిలెకెండ్ బాన్ మంజినాద్దె. ఎందనిజ్ ఇహిజ సాలోమోను వర్గిని గెణంమన్ని మాటెజ్ వెండ్రెజ్ నండ్ దూరం మన్ని దన్ని దేసెమ్దాన్ వాతాద్. ఇదిలో, సాలోమోనుజ్ మిస్తికాన్ ఒరెన్ ఇబ్బె మనాన్. గాని యా తరమ్దికార్ వన్ని మాటెజ్ గిబ్బుజ్ ఒడిజి వెన్పర్, అందెజె యా తరమ్ది వరిజ్ తీర్పు మంజినాద్లె. 43 ఉండ్రి దెయం ఒరెన్ వన్నిజ్ డిసి వెల్లి వాతి వెనుక, మండ్రెజ్బాడ్డి వందిజ్ రెబాజి బిడిమ్బూమిదు బూలాజినాద్. గాని ఎంబెబా దనిజ్బాడ్డి దొప్పొవతాద్. 44 సస్తివలె 'నాను డిస్తి వాతి నా ఇండ్రో మరజ్ సానాల', ఇజి దనిజ్ అది నెవ్నాద్. మరజి వాతిజ్ అది డిస్తి సిత్తికాన్, నెగెండ్ సెబాజి సుబరం కిజి ఎయెర్బా మనఇ ఇల్లు లెకెండ్ మన్నక సూణాద్. 45 సస్తివలె అది మరజి సాన్ని, దన్నిజ్ ఇంక సెఇకెజ్ అతి మరి ఏడు దెయమ్కాజ్ దన్నివెట కూక్కు తనాద్. అవిక్ వని లొఇ సాన్ని అబెనె బస కినె. అయావలె వన్ని గతి ముందాహి దనిజ్ ముస్సు కస్టం ఆనాద్. అయలెకెండ్నె యా తరమ్ది వరిజ్ గతిబా మంజినాద్."

యేసు అయ్సిన తంబెరిజు

46 యేసు మంద లోకుర్ వెట వర్గిజి మహివలె, వన్ని అయ్సిన తంబెరిజు వన్నివెట వర్గిదెజ్ ఇజి వెల్లి నిహా మహార్. 47 అయావలె ఒరెన్, "ఇదిలో నీ యాయని నీ తంబెరిజు నీ వెట వర్గిదెజ్ ఇజి వెల్లి నిహా మనార్", ఇజి వన్నిజ్ వెప్తాన్. 48 అందెజె వెప్తివన్నిజ్ సుడిజి, "ఎయెద్ నా యాయ? ఎయెరు నా తంబెరిజు?", ఇజి వెన్బాతాన్. 49 వన్ని సిసూర్జ కియె తోరిసి, "ఇదిలో నా యాయని నా తంబెరిజు. 50 వరలోకామ్దు మన్ని నా బుబ్బెజ్ ఇస్టం ఆతివజ కినికాండ్రె నా తంబెరి, నా తజి, నా యాయ", ఇజి వెప్తాన్.

విత్కు విత్తివన్ని కత.

13 అయ దినమ్దునె, యేసు ఇండ్రోణిజ్ వెల్లి సాన్ని సమ్దరం పడకాదు బస్తాన్. 2 మంద లోకుర్ వన్ని డగ్రు వాతిజ్ వాండ్రు ఉండ్రి డోణిదు ఎక్కు బస్తాన్. లోకుర్ విజెర సమ్దరం పడకాదు నిహార్. 3 అయావలె వాండ్రు వరిజ్ సుడిజి నండ్ సజతిజ్ కత వజ వరిజ్ వెప్తాన్ "ఒరెన్ రయ్యు వాండ్రు విత్కు విత్తెజ్ సాహాన్. 4 వాండ్రు విత్కు మహిజ్ సెగం విత్కు సరి పడకాదు అర్తె. పాటిజ్ వాజి వన్కాజ్ తిహి.

5 సెగం విత్కు సటు ముస్సు మని లావ్లోతు సిలి డుల్లిదు అర్తె. డుల్లి లోతు లావ్ సిల్లితిజ్ అవి వెటనె నేర్తె. 6 గాని డుల్లి తకు మహిజ్ వెలెజ్ లొఇ సాన్ఇతిజ్, పాదు సాని ఎండ తాక్తిజ్ అవి సాతె. 7 సెగం విత్కు సాప్పుతుమెజ అర్తె. సాప్పు తవుజ్ పెరిసి వన్కాజ్ అణసు తిగితె. 8 మరి సెగం విత్కు నెగ్గి బూమిదు అర్తె. అబ్బె విత్తి విత్తుదిజ్ వంద వంతుజ్, అరువయ్ వంతుజ్, మువయ్ వంతుజ్ లెక్క పండితె. 9 గిబ్బుజ్ ఒడిజి వెంజి అయాలెకెండ్ నడిజి మండ్రు.

10 వన్ని సిసూర్ వాతారె, "ఎందనిజ్ నీను కత వజ వరిజ్ వెస్సెన", ఇజి వన్నిజ్ వెన్బాతార్. 11 వాండ్రు వరిజ్ ఈహు వెప్తాన్. "దేవుణు ఏలుబడి కిని వందిజ్ డాజితి మని సజతిజ్ దేవుణు మిజి తెలివి కిత మనాన్, గాని విరిజ్ తెలివి కిపిన్. 12 దేవుణు ఏలుబడి కిని వందిజ్ నెస్తి మని వన్నిజె మరి తెలివి కినాన్. వన్నిజ్ మరి నండ్ నెస్తిస్సాన్. ఇనికబా అర్దం ఆఇ వన్నిబాణిజ్ వాండ్రు నెస్తిమనికబా లాగి ఆనాద్. 13 ఎందనిజ్ నాను కత వజ వరిజ్ వెస్సెన ఇహిజ, వారు సుడిజినార్ గాని సుడిజితిక వరిజ్ తోర్పిద్. వెంజినార్ గాని నెగెండ్ వినపర్, అర్దంబా కిపిర్.

14-15 మీరు ఎస్తివలెబా వెంజినెదెర్ గాని అర్దం కిదెజ్ అట్ఇదెర్. ఎస్తివలెబా సుడిజినెదెర్ గాని ఇనిక ఇజి నెస్ఇదెర్. వారు వరి కణకాణిజ్ సుడిజి, గిబిబాణిజ్ వెంజి మన్నుదాన్ అర్దం కిజి నా దరోట్ మహిజ, నాను వరిజ్ నెగెణ్ కిత మరి. గాని అయ లెకెండ్ జెర్గిపిండ వరి మన్ను కొడుపుదాన్ నిండ్రిత మనాద్. వరి గిబిబిజ్ మందజ్ అతె. వారు వరి కణ్కు మూక్త మనార్. † యా లెకెండ్ ఎనయ ప్రవక్తవెట దేవుణు ముజాల వర్గితి మాట వరి ముస్సు పూర్తి అతె.

16 మీ సుడిజినెకెజ్, వెంజినెకెజ్, మీరు అర్దం కిజినెదెర్. అందెజె మీరు దేవుణు సీజిని దీవనమ్కు మన్నకిదెర్. 17 నండ్ండార్ ప్రవక్తరుని నీతి నిజాయి మన్నికార్ మీరు సుడిజిని వన్కాజ్ సుడిదెజ్ ఆస అతార్, గాని సుడిదెజ్ అట్వతార్. మీరు వెంజిని వన్కాజ్ విండ్రెజ్ ఆస అతార్ గాని విండ్రెజ్ అట్వతార్.

18 విత్కు విత్తివన్ని కతదిజ్ అర్దం మీరు జాగర్త వెండ్రు. 19 ఎయెర్బా దేవుణు ఏలుబడి కిని వందిజ్ వెహి మాటెజ్ వెంజి దనిజ్ అర్దం అట్విండ మహిజ, సయ్యాన్ వాజి వన్ని మన్నుదు వితి దనిజ్ పెర్న ఒనాన్. యాకాదె మడిజు నడిమిహాన్ సాని సర్దు అర్తి మన్నివిత్కు. 20 సెగెండార్ సట్టు ముస్సు మని లోతు సిల్లి డుల్లి నన్నికార్. సెగం విత్కు అయా డుల్లిదు అర్తె, గాని వారు దేవుణు మాట వెంజి సర్దదాన్ దనిజ్ వెటనె మన్నుదు ఇడ్వార్. 21 వారు కండెక్ కాలం దేవుణుముస్సు నమకమ్దాన్ నిల్వార్. గాని కస్టమ్కు, స్రమెజ్ వానివలె వెటనె దేవుణు ముస్సు మన్ని నమకం వారు డిసి సీజినార్. 22 మరి ఒరెన్ విత్కు అర్తి మన్ని సాప్పుతువెజ్ నేర్తి బూమి నన్నికాన్. వాండ్రు దేవుణు మాట వెంజినాన్ గాని యా లోకమ్ది బత్కు వందిజ్ విసారం ఆజి మరి డబ్బు వందిజ్ సెఇ ఆస ఆజి, వనిజ్ అణసు తిగిజి మంజినె. వన్ని బత్కుదు వలం సీలి నన్నికాన్ ఆనాన్. 23 మరి ఒరెన్ విత్కు అర్తి మన్ని నెగ్గి బూమిలెకెండ్ మనాన్. వాండ్రు దేవుణు మాట వెంజి దనిజ్ అర్దం కిజినాన్. వాండ్రు, విత్తి విత్తుదిజ్ వంద వంతుజ్, అరువయ్ వంతుజ్, మువయ్ వంతుజ్ వలం సీనాన్.

కారు మొక్కెజ్

24 యేసు మరి ఉండ్రి సజతి కత వజ వరిజ్ వెప్తాన్. "దేవుణు ఏలుబడి ఇహిజ, వన్ని మడిజు నెగ్గి విత్కు విత్తి వన్నిజ్ పోలిత మనాద్. 25 గాని విజేరె నిర్త కిజి మహివలె, వన్ని పగాతికాన్ వాతాండ్రె, కూలిజ నడిమి కారు విత్కు వితాండ్రె సాహాన్. 26 కూలిజ్ నేర్జి పిరితెనె, సెరెక్ పోక్తివలె, నెగ్గి కూలిజ్లెకెండ్ మన్ని కారుబా తోరితాద్. 27 వన్ని పణి మసిర్ మడిజు యాజుమాని డగ్రు వాతారె, "ఓ బాబు, నీను నీ మడిజు నెగ్గి విత్కునె వితిగదె? మరి ఎమేణి యా కారు మొక్కెజ్ వాతె?", ఇజి వెన్బాతార్.

28 "ఒరెన్ పగాతికాన్ యాక కితాన్", ఇజి వాండ్రు వెప్తాన్. అయ పణి మనిసిర్ మాపు సాన్ని వనకాజ్ లాగిజి కొటు కిదెజ్ నిజి ఇస్టమ్నా? ఇజి వెన్బాతార్.

† 13:14-15 యెసయ 6:9,10.

29 అయావలె వాండ్రు, “ఏలు పాని, నెగ్గి కూలిజ్లెకెండే మన్ని కారు మొక్కెజ్ మీరు లాగ్గివలె వనకవెట ఒకవేల కూలిజ్బా తెన్నెదెరను. 30 కొయ్ని కాలం వానిదాక రుండిబా కూడఃజి పిరిప్పిద్. కొయ్ని కాలమ్దు, నెగ్గి కూలిజ్ లెకెండే మన్నికారు మొక్కెజ ముజాల కొయ్జి కటెజ్ తొప్పి సుర్దు, వెనుక కూలిజ్ కొయ్జి తసి నా కొటుదు వాక్తు, ఇజి కొయ్ని వరిజ్ వెహ్నా”, ఇజి వెహ్నాన్.

సర్కుగిడ కత

31 యేసు మరి ఉండ్రీ సజతి కత వజ వరిజ్ వెహ్నాన్. “దేవుణు ఏలుబడిః ఇహిజ, సర్కు మొక్కెజ్ విత్కుదిజ్ పాలిత మనాద్. ఒరెన్, అక్క వన్ని మడిఃజ విత్తాన్. 32 అయాక విజా విత్కు లొఇ ఇజిరికాదె, గాని పిరితిజ కున మొక్కెజ విజా వనకాజ్లొఇ పెరిక ఆజి మరాన్ లెకెండే ఆనాద్. ఆగనమ్దు ఎగ్గిజిని పాటిజ్ వాజి దన్ని కొమెజ గూడు తొప్పి బస్సె. 33 యేసు మరి ఉండ్రీ సజతి కత వజ వరిజ్ వెహ్నాన్. “దేవుణు ఏలుబడిః ఉండ్రీ బోదెలి నండొ నెగ్గి దూరుదు కలప్పిమన్ని పులాజ్ మన్ని కండెక్ దూరుదిజ్ పాలిత మనాద్. అయాక కలప్పి మన్ని దూరుదిజ్ విజా పులాజ్ కినిదాక వణి కినాద్.” 34 యేసు కత వజన విజా మాటెజ్ లోకురిజ్ వెహ్నాన్. కత వజ ఆవండ ఇనికబా వరిజ్ వెహ్విత్తాన్. 35 “నాను కత వజనె వెయ్దాన్ వెహ్నా. లోకు పుట్టి బాణిజ్ అసి డాఃజితిమన్ని సజతిజ్ నాను తెలివి కిన్ †, ఇజి ప్రవక్త వెట దేవుణు ముజాల వర్గితి మాటెజ్ వూర్తి ఆతాద్. 36 నస్తివలె వాండ్రు లోకురిజ్ డిఃసి ఇండ్రొ సాహాన్. వన్ని సినూర్ వన్ని డగ్గు వాజి, “మడిఃజ మన్నినెగ్గి కూలిజ్లెకెండే మన్ని కారు మొక్కెజ వందిజ్ వెహ్ని కతదిజ్ అర్దం మజి వెహ్అ”, ఇజి వెహ్నాన్. 37 అందెజె వాండ్రు ఈఘ వెహ్నాన్. “నెగ్గి విత్కు విత్తికాన్ లోకు మరిసి ఆతి నాను. 38 మడిఃజ యా లోకం. నెగ్గి విత్కు దేవుణు ముస్సు, నమకం ఇడ్డి మన్ని దేవుణు కొడొఃర్ నెగ్గి కూలిజ్లెకెండే మన్ని కారు మొక్కెజ్, సయ్తాను కొడొఃర్. 39 వనకాజ్ విత్తికాన్ వగాతికాన్ అతి సయ్తాను. కోత్త కొయ్నిక యా లోకమ్దిజ్ ఆక్కరదిసం. కొయ్నికార్ దేవుణు దూతార్.

40 నెగ్గి కూలిజ్ లెకెండే మన్ని కారుదిజ్ లాగ్గి కొట్టుకిజి సుర్గి లెకెండేనె యా లోకమ్ది ఆకరదిసమ్బా వానాద్. 41-42 నెగ్గి కూలిజ్ లెకెండే మన్ని కారుదిజ్ లాగ్గి కొట్టు కిజి సనుద్ సుర్గి లెకెండే, పావం కిజిని వరిజ్, మరి పావం కిబిన్ని విజా దన్నిజ్ నా ఏలుబడిఃదాన్ వెల్లి పాక్తెజ్ ఇజి, లోకుమరిసి ఆతి నాను నా దూతారిజ్ పాక్తాలె. వారు వరిజ్ సినుద్ వినీరనాలె. అబ్బె వారు అడఃబాజి, పల్కు కొప్పి మంజినార్.

43 నీతి నిజాయి్దు మనికార్ వరి బుబ్బాతి దేవుణు కిని ఏలుబడిఃదు పాద్దు లెకెండే జాయ్ సీజి మంజినార్. మీరు గిబ్బుజ్ ఒడఃజి వెంజి అయావజ నడిఃజి మండ్రు.

దేవుణు ఏలుబడిః

44 “దేవుణు ఏలుబడిః కినిక, మడిఃజదు డాప్పిమన్ని విలువతి ఆస్తిదిజ్ పాలిత మనాద్. ఒరెన్ ఆ విలువతి ఆస్తిదిజ్ సుడఃతిజ్, ఎయెర్బా నెన్విండ మరి డాప్పి, గొప్ప సరదదాన్ సాన్ని వన్నిజ్ మనికెజ్ విజా పార్ని అయ మడిఃజ కొటాన్. 45 మరి నాను మిజి వెహ్నిన, దేవుణు ఏలుబడిః కినిక ఇహిజ, ఒరెన్ ముజెలు సపుకారి రెబాజిని గొప్ప విలువ మన్ని ముజెలు లెకెండేనె. 46 వాండ్రు రెబాజినిలెకెండే మన్ని, ఉండ్రీ విలువతి ముజెలుదిజ్ సుడఃతాండ్రె, సాన్ని వన్నిజ్ కల్గితి మనికెజ్ విజా పార్ని అయ ముజెలు కొటాన్.

47 మరి నాణు మిజి వెహ్నిన, దేవుణు ఏలుబడిః కినిక ఇహిజ, నమ్దరమ్దు పాక్కిని రకరకమ్ది మొయెజ్ అన్ని వలాదిజ్ పాలిత మనాద్. 48 అయ వల నిండ్రీతిజ్ మొయెజ్ అన్నికార్, వల పడకాదు లాగ్గి బసి, నెగ్గి మొయెజ గంపాదు ఇడ్వార్. సెజ మొయెజ వినీరనార్. 49 యా లెకెండేనె యా తరమ్ది ఆక్కర దినంబా వానాద్. దేవుణు దూతార్ వాజి నీతి నిజాయి్దు మన్ని వరిబాణిజ్, సెజవరిజ్ ఎరలిన్నార్. 50 వారు వరిజ్ గొప్ప పెరి సిను బాడ్డిదు అర్పవ్నార్. అబె అడఃబాజి, పల్కు కొహ్కీ మంజినార్.” 51 “యా విజా సజతిజ వందిజ్ మిజి అర్దం ఆతాదా?”, ఇజి యేసు వరిజ్ వెన్బాతాన్. “ఒఒ”, ఇజి వారు మరజి వెహ్నాన్. 52 “దేవుణు ఏలుబడిః కిని వందిజ్ నెస్తి మన్ని యూదురి రూలుజ్ నెస్సిన్సికార్ విజెరె, వన్ని ఆస్తి ఇడ్డి మన్ని గదిదాన్ పడాయికెజ్, కొత్తకెజ్ ఉండ్రె లెకెండే వెల్లి తని ఇండ్రొణి ఎజామానిజ్ లెకెండే మనాన్”, ఇజి వాండ్రు వరిజ్ వెహ్నాన్.

53 యేసు యా కతెజ్ వెహ్ని వీజితి వెనుక, అబెణిజ్ సాహాన్. 54 వన్ని సాంత పల్కుమ్దు వాతాండ్రె, వాండ్రు యూదురు మీటిజ్ కిని ఇల్కాజ్ లోకురిజ్ నెస్సిని మహాన్. “వన్నిజ్ యా గెణం, యా బమ్మూతి పణిజ్ కిని సత్తు ఎంబెణిజ్ వాతాద్”, ఇజి వారు బమ్మూ ఆజి వర్గితార్. 55 “వీండ్రు కంసెల్ వాండ్రు మరిసి ఆండ్రా? విన్ని అయ్సి పేరు మరియ గదె? యాకోబు, యోసేపు, సీమోను, యూద ఇనికార్ విన్ని తంబెరిసిర్ గదె? 56 విన్ని తజిసిక్ మా వెట మనెగదె? యాకెజ్ విజా వినిజ్ ఎంబెణిజ్ వాతె? 57 వారు వన్ని ముస్సు కోపం ఆజి మహోర్. గాని యేసు వరిజ్ “ఒరెన్ ప్రవక్త, వన్ని సాంత ఇండ్రొనె గవరవం సిల్లికాన్ ఆజినాన్”, ఇజి వెహ్నాన్. 58 వన్ని ముస్సు వరిజ్ నమకం సిల్లితిజ్ వాండ్రు అబ్బె లావ్బమ్మూతి పణిజ్ కిపితాన్.

యోహాను బుర కత్తినార్

14 1-2 నస్తివలె హీరోదురాజు యేసు వందిజ్ మాటెజ్ విహండ్రె, “వీండ్రు సాతి వరిబాణిజ్ మరజి నిజితి బాప్పిసం సీని యోహాను. అందెజె యా బమ్మూతి పణికిని సత్తు వన్ని లొఇ మనాద్”, ఇజి వన్ని పణి మన్నిరిజ్ వెహ్నాన్.

3 వన్ని తంబెరిసి ఆతి పిలిపు ఆల్పి హీరోదియ వందిజ్ హీరోదురాజు ఆడ్ర సిత్తిలెకెండే యోహానుజ్ అసి గొలుసుదాన్ తొప్పి జెలిదు ఇడ్డ మహోర్. 4 ఎండనిజ్ ఇహిజ, “దనిజ్ నీ వందిజ్ అల్పి లెకెండే ఇడె ఆతిక దేవుణు మోసెజ్ సిత్తి రూలుదిజ్ పడివిద్”, ఇజి యోహాను వన్నిజ్ వెహ్నా మహాన్. 5 యోహానుజ్ సప్తెజ్ ఇజి హీరోదు రాజు ఒడిఃబితాన్, గాని లోకుర్ విజెరె వీండ్రు ఒరెన్ దేవుణు ప్రవక్త ఇజి వెహ్ని మహిజ్ వన్నిజ్ సప్తెజ్ తియెలాత మహాన్.

6 హీరోదు రాజు పుట్టి రోజా వాతిజ్, హీరోదియ గాల్పి వాజి వరి వందిజ్ డాప్పి కరజితాద్. హీరోదు రాజజ్ గొప్ప సరద ఆతాన్. 7 అందెజె అది ఇనిక లొస్తిజ్బా సీని ఇజి వాండ్రు దనివెట ఉండ్రీ ఒట్టు పాక్కి దన్నిజ్ ఉండ్రీ మాట సిత్తాన్. 8 అయ్సి దనిజ్ సుత్తిన్సి లెకెండేనె అది సాహదె, “బాప్పిసం సీని యోహాను బుర కత్తి

† 13:35 కీర్తన 78:2.

ఉండ్రి పలెందు సిద", ఇజి లోస్తాద్. 9 రాజు గొప్పు బాద ఆతాన్. గాని వాండ్రు కితి ప్రమాణం వందిజ్, వన్ని వెట విందుదిజ్ బస్తిమిహి కూలెజ్ వందిజ్ అది లొస్తిక సీదెజ్ ఇజి ఆడ్ర సితాన్. 10 జెలిదు మహి యోహాను బుర్ర కట్టిస్తన్. 11 వన్ని బుర ఉండ్రి పలెమ్దు ఇడ్డి తపిసి దనిజ్ సిబిస్తాన్. అది అయాక దని అయ్సి డగు ఒత సితాద్. 12 యోహాను సిసూర్ వాజి వన్ని పినుగు పెర్లి ఒసి సమాది కితార్. నస్తివలె వారు యేసు డగు వాతారె వెహ్టార్.

అయ్దు వేలుజ్ లోకాజ్ బోజనం సీనిక

13 జర్గితి సజతిజ్ విజా విహండ్రె యేసు ఉండ్రి డోణి ఎక్కి ఎయెర్బా మన్ఇ ఉండ్రి బాడ్డిదు ఒరేండ్రె సాహాన్. వాండ్రు సాహి సజతి వెంజి అయ పట్టుమదికార్ నండొండార్ నడిసి వన్ని వెనుక సాహార్. 14 వాండ్రు అతాహా పడక జోరె అందితిజ్, డోణిదాన్ డిగితాన్ అయా మంద లోకురిజ్ సుడెతాండ్రె పరి మున్సు, కనికారం ఆతాన్. పరి జబ్బుదివరిజ్ నెగెండ్రె కిత్తాన్. 15 పార్డు ఆతివెలె వన్ని సిసూర్ వన్ని డగు వాజి, "అక్క ఎయెర్ మన్ఇ బాడ్డి, ఏలునె పార్డు ఆతాద్. యా లోకుర్ నాహ్కాజ్ సాన్ని వారె పరిజ్ బోజనమ్కు కొండెజ్ పరిజ్ ఫాకెత్", ఇజి వెహ్టార్. 16 "వారు సాండ్రెజ్ అక్కర్ సిల్లెద్. మీరె పరిజ్ తిండ్రెజ్ ఇనికబా సీదు", ఇజి యేసు పరిజ్ వెహ్టార్. 17 "ఇదిలో, మా వెట అయ్దు రొటెజ్ని రుండి మొయెజ్ మనె", ఇజి వారు వెహ్టార్. 18 "అయకెజ్ నా డగు తగాట్", ఇజి యేసు వెహ్టార్. 19 వెనుక లోకాజ్ పసి గడ్డి మున్సు బస్సు ఇజి వెహ్టాండ్రె అయ్దు రొటెజ్ని రుండి మొయెజ్ కీదు అస్తాండ్రె ఆగాసం దరిజ్ సుడెజి దేవుణుదిజ్ వందనమ్కు వెహ్ని రొటెజ్ రుక్కి సిసూరిజ్ సితాన్. సిసూర్ అక లోకాజ్ సీబాత సితార్. 20 వారు విజేరె పాట పంజా తిహార్. వెనుక మిగిలిత్తి ముక్కెజ్ పన్నెండు గంపెజ్ సిసూర్ వెహ్టార్. 21 బోదెన్ కొడోర్ అవిండ్రె తిహికార్ అయ్దువేలు మన్ని మొగకొడోర్ మహార్.

యేసు ఏరు మున్సు నడిసినాన్.

22 లోకురిజ్ ఫాక్తి వెటనె యేసు వన్ని సిసూరిజ వెటనె ఉండ్రి డోణి ఎక్కి, వన్నిజ్ ఇంక ముజాల అతాహా పడక సాండ్రు ఇజి పరిజ్ ఫాక్తాన్. 23 పరిజ్ ఫాక్తి వెనుక, వాండ్రు ఒరేండ్రె పార్దనం కిడెజ్ ఉండ్రి గొరొత్ ఎక్తాన్. పాదు ఆతివెలె వాండ్రు ఒరేండ్రె అబ్బె మహాన్. 24 గాని డోణి ఒడ్డుదాన్ నండొ దూరం సాహాద్ గొప్పు గాలి కిజి మహిజ్ ఉల్పెజాణిజ్ డోణి ఇతల్ అతాల్ దూజ్జి మహాద్. 25 కోడిజామ్దు యేసు సందారమ్దు ఏరు మున్సు నడిజి పరి డగు సాహాన్. 26 వాండ్రు నమ్దరమ్దు ఏరు మున్సు నడిసినక సిసూర్ సుడెతారె తియెల్ అతార్. "అబయా యాక ఉండ్రి దూబ", ఇజి వారు తియెల్ ఆజి డెల్స్తార్. 27 వెటనె యేసు, "దయ్ రమ్దాన్ మండ్రు, ఇక నానె, తియెల్ ఆమాట్", ఇజి వెహ్టార్. 28 పేతురు, "ప్రబువా, నీనె ఇహిజ, నాను ఏరు మున్సు నడిజి నీ డగు వాదెజ్ సెలవ సిద్త్", ఇజి వెహ్టార్. 29 "రల్", ఇజి యేసు వెహ్టార్. నస్తివలె పేతురు డోణి డిగిజి యేసు దరోట్ ఏరు మున్సు నడిజి తాతాన్. 30 గాని గాలిదిజ్ నిజిత్తి ఉల్పెజ సుడెజి తియెలాజి వాండ్రు ముడుజిజి మహాన్. "ప్రబువా నజీ రిసీత్", ఇజి డెల్స్తాన్. 31 వెటనె యేసు వన్ని కియు సాహ్ని వన్నిజ్ అస్తాన్. "ఇజిరి నమకం మనికి, ఎందనిజ్ నీను అనుమానం ఆతి?", ఇజి వెహ్టార్.

32 వారు డోణి ఎక్కిజ్ గాలి అలెతాద్. 33 నస్తివలె డోణిదు మనికార్ వాజి, "నిజమె, నీను దేవుణు మరిసినె", ఇజి వెహ్ని వన్నిజ్ ఫాగిడిజి మాడిస్తార్. 34 వారు అతాహా పడక సాన్ని గెనెసెరెతు నాటో అందితార్. 35 అబ్బెణి లోకుర్ వన్నిజ్ గర్డు అస్తారె డగు మని నాహ్కాజ్ కబ్బు ఫాక్తార్. లోకుర్ పరి కస్టమ్దు మన్ని పరిజ్ విజేరిజ్ వన్ని డగు తత్తార్. 36 జబ్బు మన్నికార్ వన్ని సాక్క సెంగుబా ముట్టెజ్ బతిమాల్జి సెలవ లొస్తార్. ముట్టికార్ విజేరె నెగెండ్రె అతార్.

నెగ్గెక్కిజ్ సెఇక్కిజ్

15 1-2 నెగొండ్రె పరిసయరుని యూదురిజ్ రూలుజ్ నెస్పిన్సికార్ యెరూసలేమ్దాన్ వాతారె యేసుజ్, "ఎందనిజ్ నీ సిసూర్ బోజనమ్దిజ్ ముందాల కికు నొరబావీర్, పెద్దెల్జ అలవాటుజ నెక్కి ఫాక్కినార్?", ఇజి వెనెబాతార్. 3 యేసు పరిజ్ ఈహు మర్జి వెహ్టార్, "మీరు ఎందనిజ్ మీ అలవాటుజ వందిజ్ దేవుణు ఆడ్రెజ నెక్కి ఫాక్కినిదెర్? 4 మీ యాయ బుబ్బరిజ్ గవరం సీదు, మరి ఎయెర్బా అయ్సి అప్పాసిరిజ్ † దూసిని వెహ్నిజ్ వన్నిజ్ తప్పజెవలె †† ఇజి దేవుణు రూలుదు వెహ్టా మనాద్. 5-6 గాని మీరు నెస్పినిని దన్ని లోఇ తేడ మనాద్ మీరు నెస్పినినిక ఇనిక ఇహిజ ఎయెన్బా, "నాను మిజి ఇనికబా ఉండ్రి సాయం లెకెండ్రె కిన ఇజి ఇట్టి మనిక, దేవుణుదిజ్ సంత సిత్ర మన్ను" ఇజి అయ్సి అప్పాసిరిజ్ వెహ్నిజ్, వాండ్రు మరి గవరమ్దాన్ నెగెండ్రె సుడెదెజ్ అక్కర్ సిల్లెద్. ఇజి అయాలెకెండ్రె మీ అలవాటు వందిజ్ మీరు దేవుణు మాటదిజ్ సీలి లెకెండ్రె కిజినిదెర్.

7-9 వేసం కినికిదెరా, "యా లోకుర్ పరి బెద్వెజాణిజ్ నజి ఫాగ్గిజినార్ గాని పరి మన్ను నా బాణిజ్ దూరం మనాద్. వారు పణిదిజ్ రేండ్ నజి ఫాగిడిజినార్. వారు నెస్పిన్సికెజ్ విజా లోకురి రూలుజ్నె, † ఇజి యెసయ ప్రవక్త వెట దేవుణు ముజాల మీ వందిజ్ పర్గితిక నిజమె", ఇజి వెహ్టార్. 10 యేసు అయ మంద లోకురిజ్ డగు కూక్తాండ్రె ఈహు వెహ్టార్, "మీరు జాగర్త వెంజి నెగెండ్రె అర్దం కిదు. 11 వెయుదాన్ లోఇ సానిక ఇనికబా ఎయెరిజ్బా ఇనిక ఆవద్. గాని లోఇహాన్ వెయుదాన్ వెల్లివాని మాటెజ్నె ఒరెన్ వన్నిజ్ సెఇక కినె." 12 నస్తివలె వన్ని సిసూర్ వాతారె, "యా మాటెజ్ వెంజి పరిసయరు నండొ కోవం ఆతిక నీను నెస్పిదా?", ఇజి వెహ్టార్. 13 వాండ్రు సిసూరిజ్, "పరలోకామ్దు మన్ని నా బుబ్బాతి దేవుణు ఉణునిఇ విజా మొకెజ్ వేలెజాణిజ్ తెరె ఆనె వారబా అయ మొకెజ్ లెకెండ్రెనె. 14 పరిజ్ డిసి సీదు. వారు గుడ్డిదివరిజ్ సరి తోరిస్సి గుడ్డిదికార్. ఒరెన్ గుడ్డిదికాన్ మరి ఒరెన్ గుడ్డి వన్నిజ్ సరి తోరిస్సిజ వారు రివెర్బా గాంతదు అర్నార్", ఇజి వెహ్టార్. 15 అందెజి పేతురు, "యా కత వందిజ్ మజి అర్దం ఆనిలెకెండ్రె వెహ్తా", ఇజి వెహ్టార్. 16 యేసు పరిజ్, "ఏలుబా మీరు మహిపరిలెకెండ్రె మనిదెరా? ఏలుబా నిన్ని మాటెజ్ అర్దం కిడెజ్ మిజి బుద్ది సిల్లెదా? 17 వెయుదాన్ లోఇ సానిక, పాటాదు సాన్ని మరి అయాక మీరు బయ్ల బన్నివలె బూమిదు సాన్నినాద్, ఇక మీరు నెస్పిదెరా? 18 గాని వెయ్దాన్ వెల్లి వాని మాటెజ్ మన్నుదాన్ వాజినె. ఆకెజ్ లోకుదిజ్ సెఇక కిజినె. 19 సెఇ అలోసనమ్కు, సస్పిక్కెజ్, రంకు బూలానిక, కేలార్బూలానిక, డొజ కినిక, అబద్దం వెహ్నికెజ్, దేవుణుదిజ్ దూనిస్సికెజ్ యాకెజ్ విజా మన్నుదానె వాజినె. 20 యాకెజె ఒరెన్ వన్నిజ్ సెఇక కిజినె. కికు నొరబావిండ్రె ఉటిజ అక ఒరెన్ వన్నిజ్ సెఇక కిపి."

† 15:4 నిగ్గమ 21:17; తేవి 20:9. †† నిగ్గమ 20:12 ద్వితి 5:16. ‡ 15:7-9 యెసయ 29:13.

కనానియది బోదెలిజ్ మన్ని నమకం

21 యేసు అబ్బెణిజ్ నండొ దూరం సాన్ని ఉండ్రీ గొరొన్ ఎక్కి డిగితాండ్రె తూరు, సీదోను ఇని పట్టుమ్కాజ్ సెందితి ప్రాంతమ్కాజ్ సాహాన్. 22 వాండ్రు అబ్బె అందితిజ్ అబ్బెణిజ్, కానాన దేనిమ్ది ఉండ్రీ బోదెలి వాతాదె, "ప్రబువా, దావీదు మరిసి నజీ కనికారం తోరిన్ల. నా గాల్నిజ్ దెయం అస్సిజ్ గొప్ప బాద ఆజినాద్", ఇజి డేల్ని వెహ్తాద్. 23 యేసు దనిజ్ ఉండ్రీ మూబా వెహ్తాన్. అందెజి వన్ని సిసూర్ వాజి, "ఇది మా వెట గగోల్ ఆజి వాజినాద్, దనిజ్ ఫాక్ల", ఇజి బతిమూల్తార్. 24 వాండ్రు వరిజ్, "మురుతి మెండగొరెజ్ లెకెండ దేవుణుబానిజ్ దూరం ఆతి ఇసాయేలు లోకుర్ డగ్రు నాను ఫాక ఆత మన్న", ఇజి వెహ్తాన్. 25 అది వన్ని ముజాల వాజి ముణుకుజ్ ఊర్జి, "ప్రబువా, నజీ సాయం కిల", ఇజి వెహ్తాద్. 26 వాండ్రు దనిజ్, "కొడొర్ తిండ్రెజ్ మని రొటెజ్ లాగ్గి నుకుడిజ్ సీనిక నాయం ఆవెద్", ఇజి వెహ్తాన్. 27 అది, "నిజమె ప్రబువా, గాని ఎజమాని తింజిమహిజ్ బల్లదాన్ అర్ని ముక్కెజ్ నుకుడుజ్ తింజినె గదె?", ఇజి వెహ్తాద్. 28 నస్తవలె యేసు, "బయి, నా ముస్సు మని నీ నమకం గొప్ప పెరిక. నీను కోరితి లెకెండెని నిజి ఆపిద్", ఇజి దనిజ్ వెహ్తాన్. అయ గడియారునె దని గాల్ని నెగెండ్ర ఆతాద్.

నాల్లి వెయిజ్ లోకాజ్ బోజనం సీనిక

29 యేసు అబెణిజ్ సాన్ని గలీలయ సమ్దారం వడకాదాన్ వాజి అబె ఉండ్రీ గొరొల్ ఎక్తాండ్రె బస్తాన్. 30 సాటావరిజ్, గుడ్డివరిజ్, గుల్లవరిజ్, కికు కాల్కు అర్తివరిజ్ మరి ఆఇ జబ్బుదివరిజ్ నండొడారిజ్ అసి మంద లోకుర్ వన్ని డగ్రు వాతార వరిజ్ వన్ని కాల్కు అడ్డి ఇట్టార్. వాండ్రు వరిజ్ నెగెండ్ర కిత్తాన్. 31 గుల్లవరిజ్ వర్గిడెజ్ వాతాద్. కికు కాల్కు అర్తికార్ నెగెండ్ర ఆతార్. సాటాదికార్ నడితార్, గుడ్డిదికార్ సుడెడెజ్ అట్టార్. యాకెజ్ సుడెజి లోకుర్ విజెరె బమ్మ ఆతార ఇసాయేలురి దేవుణుదిజ్ ఫాగిడితార్. 32 యేసు వన్ని సిసూర్జ కుక్తాండ్రె వరిజ్, "యా లోకుర్ నావెట మంజి మూండ్రీ దినమ్కు ఆతె. విరిజ్ తిండ్రెజ్ బా ఇనికబా సిల్లెద్. నజీ వరి ముస్సు కనికారం ఆజిన. వరిజ్ బజదాన్ ఫాక్తెజ్ మజీ మన్ను రెప. వారు కణ్కు త్రివిజి సర్దు అర్నారను", ఇజి వెహ్తాన్. 33 సిసూర్ వన్నిజ్, "నిసా మంద లోకురిజ్ తిప్పిజ్ బిడిమ్బూమి ప్రామతమ్దు ఇనిక దొహ్నానె?", ఇజి వెహ్తార్. 34 యేసు వరిజ్, "మీ బాన్ఎసాడు రొటెజ్ మన్నె?", ఇజి వెన్బాతాన్. వారు, "ఏడు రొటెజ్ని సెగం ఇజిరి మెయెజ్ మనె", ఇజి వన్నిజ్ వెహ్తార్. 35 లోకురిజ్ బూమిదు బన్ను ఇజి యేసు వెహ్తాన్. 36 వెనుక అయ ఏడు రొటెజ్ని మెయెజ్ కీదు అస్తాండ్రె దేవుణుదిజ్ వందనమ్కు వెప్పి అయాకెజ్ రుక్కి వన్ని సిసూర్జ సితాన్. వారు లోకాజ్ సీబాజి సితార్. 37 లోకుర్ విజెరె ఫాట వంజా తిహి వెనుక మిగిలితి ముక్కెజ్ ఏడు గంపెజ్ నిండ్రు వన్ని సిసూర్ పెహ్తార్.

38 బోదెక్ని కొడొర్ ఆవండ్ర తిహి మొగకొడొర్ నాల్లివెయిజ్ మహార్. 39 అయ మంద లోకురిజ్ ఫాక్తి వెనుక యేసు డోణి ఎక్తాండ్రె మగదాన్ ఇని నాటొ సాహాన్.

16

నస్తవలె పరిసయరుని సదుకయరు యేసుజ్ డగ్రు పరిక్కి కిడెజ్, వన్ని మాటెబాణిజ్ వన్నిజ్ ఆస్తిజ్ ఇజి డగ్రు వాతార్. దేవుణునె వన్నిజ్ ఫాక్తాన్ ఇనిదన్నిజ్ రుజుప్ లెకెండ్ర ఆగాసమ్దాన్ ఉండ్రీ బమ్మాతి పణి కిడి మజీ తోరిన్ల, ఇజి వెహ్తార్. 2 వాండ్రు వరిజ్, "పాద్దు ఆనివెలె ఆగసం ఎర్తెజ్ మహిజ నేండ్రు నెగెణ్ మంజినాద్ ఇజి మీరు వెప్పినిదెర్. 3 మరి, పెందల ఆగసం ఎర్తెజ్ ఆజి మొసాప్ మహిజ, నేండ్రు గాలి పిరు వానాద్, ఇజి మీరు వెప్పినిదెర్. ఆగసం సుడెజి అయ రోజా ఎలాగ మంజినాద్ ఇజి వెహ్తాజ్ మీరు నెప్పిదెర్, గాని జర్గినికెజ్ సుడెజి కాలమ్దిజ్ గుర్తు అస్తిజ్ అట్ఇదెర్. 4 యా తరమ్దికార్, సెఇకార్ ఆతికార దేవుణు వందిజ్ వరిజ్ మన్ను సిల్లెద్ గుర్తు లెకెండ్ర ఉండ్రీ బమ్మాతి పణి వందిజ్ వెన్బజినార్, గాని దేవుణు ప్రవక్త ఆతి ఓనెజ్ జర్గితిక తప్ప మరి ఇనికబా ఉండ్రీ గుర్తు మరి తోర్ఎద్", ఇజి వెహ్తాన్. 5 వెనుక యేసు వరిజ్ డిసి అబ్బెణిజ్ సాహాన్. 6 వారు డోణి ఎక్తారె సమ్దరం అతాహ పడక సాన్ని మహివలె, వన్ని సిసూర్ రొట్టెజ్ ఒత్తెజ్ ఫాన్ల మహార్. నస్తవలె యేసు, "పరిసయరుది మరి సదుకయరుది పులాజ్ కిని దూరువందిజ్ మీరు గొప్ప జాగర్త మండ్రు", ఇజి వెహ్తాన్.

7 "మాన్ రొట్టెజ్ తెఇతి వందిజె యా మాట వెహ్తాన్", ఇజి ఒరెన్ వెట ఒరెన్వర్జి మహార్. 8 యేసు అక నెస్తాండ్రె, ఎందానిజ్ మీరు నమకం తక్కు మనికిదెర్ ఆజినెదెర్! మీ బాన్ రొట్టెజ్ సిల్లితిజ్ మీరు ఎందనిజ్ ఒరెన్ మరి ఒరెన్ వెట వర్గిజినెదెర్? 9 ఏలుబా మీరు అర్దం కిజి నెస్తిజ్ అట్ఇదెరా? అయ్దు రొట్టెజ్ మహివలె అయ్దు వెయిజ్ లోకాజ్ తిప్పిజ్ మిగిలితికెజ్ ఎసాడు గంపెజ్ పెహ్తాదెరా? 10 మరి ఏడు రొట్టెజ్ మహివలె నాల్లి వెయిజ్ లోకాజ్ తిప్పిజ్ మిగిలితికెజ్ ఎసాడు గంపెజ్ పెహ్తాదెరా? వినుకాజ్ బా మీరు ఎతు కిఇదెరా? 11 నాను వర్గితిక రొట్టెజ్ వందిజ్ ఆవద్ ఇజి ఎందనిజ్ మీరు అర్దం కిజి నెస్ఇదెర్? గాని పరిసయరుని సదుకయరుది పులాని దూరు వందిజ్ మీరు జాగర్త మండ్రు ఇజి నాను వెహ్తా", ఇజి వెహ్తాన్. 12 నస్తవలె వాండ్రు జాగర్త మండ్రు ఇజి వెహ్తాక రొటె తయార్ కిని పులాని దురు వందిజ్ ఆవద్ గాని పరిసయరుని సదుకయరుది పులాని దూరు నని బోద వందిజ్ జాగర్త ఆజి మండ్రు ఇజి వెహ్తాన్, ఇజి వారు అర్దం కిజి నెస్తార్.

13 యేసు పిలిపుది ఆతి కయసెరియ పట్టుమ్దిజ్ డగ్రు మన్ని నాహ్కాజ్ వాతిజ్ "లోకు మరిసి ఆతి నా వందిజ్, నాను ఎయెన్ ఇజి లోకుర్ వెహె ఆజినార్?", ఇజి వన్ని సిసూర్జ వెన్బాతాన్. 14 "నెగొండార్ బాప్పిసం సీని యోహాను ఇజినార్, సెగొండార్ ఏలియ ఇజినార్, మరి సెగొండార్ యిరిమ్మ ఇజినార్, సిల్లె ప్రవక్తెజ్ లోఇ ఒరెన్ ఇజి సెగొండార్ వెహె ఆజినార్", ఇజి వారు వెహ్తార్. 15 అందెజి యేసు, "గాని నాను ఎయెన్ ఇజి మీరు వెప్పినిదెర్?", ఇజి వెన్బాతాన్. 16 పేతురు ఆతి సీమోను, "నీను బత్రిజిని దేవుణు మరిసి ఆతి క్రిస్తు", ఇజి వెహ్తాన్.

17 యేసు, వన్నిజ్, "యోన మరిసి ఆతి సీమోను, నీను దేవుణు సీజిని దీవనమ్కు మంజినికాన్. యాక నిజి తెలియక్తిక లోకుర్ఎయెర్బా ఆవర్ గాని పరలోకామ్దు మని నా బుబ్బాతి దేవుణునె. 18 గాని నాను నిజి వెహ్తాక ఇనిక ఇహిజ నీను పేతురు, నీ పేరుదిజ్ తర్దం సట్టు ఇజి నాను యా సుటు ముస్సు నా సజమ్దిజ్ తొహ్నా. అయా లోకమ్ది సత్తుజ్ దనిజ్ గెల్లిస్తెజ్ అట్ఎద్. 19 దేవుణు ఏలుబడి: కిజిని పరలోకామ్దిజ్ సెందితి ఆతికారం నాను నిజి సీన †, యా

† క్రిస్తు ఇని మాటదిజ్ అర్దం దేవుణు ఏర్పాటు కిత్తి ఫాక్తికాన్ †† పరలోకమ్ది తాలం కిక్కు ఇజి తెలుగుదు రాస్త మనాద్.

లోకమ్మదు నీను ఇనిక తొప్పిదొ, అయ్యాక పరలోకమ్మదుబా తొహా అనాద్. యా లోకమ్మదు నీను ఇనిక కుత్తిదొ, అయ్యాక పరలోకమ్మదుబా కుతె ఆనాద్”, ఇజి వెప్తాన్. 20 వెనుక యేసు, వాండ్లు క్రీస్తు ఆతికాన్ ఇజి ఎయెరిజ్బా మీరు వెప్తాజ్ ఆవద్ ఇజి వన్ని సిసూరిజ్ కనీతం వెప్తాన్.

21 అయ వెలెహాన్ అసి యేసు, నాను యెరూసలేమ్మదు సాండ్రెజ్ వెలె, మరి అబె పెదెలుజ, పెరి పుజెరిబుని యూదురి రూలుజ్ నెస్సిస్సి వరి కిదాన్ నండ్ ఇమ్నెజ్ ఓరిస్సాలె, లోకుర్ నజీ సప్పాలె సాతి మూండ్రి రోజుదు దేవుణు నజీ మరి మర్జి నిక్సినాలె ఇజి నండ్ సజతిజ్ వన్ని సిసూరు వెలు వెప్పి మహాన్.

22 పేతురు యేసుజ్ ఉండ్రి వడఃకాదు కూక్త ఒతండ్రి, “ప్రబువా, నిజీ యా లెకండ్ జర్గిదెజ్ ఆవద్”, ఇజి గటిజ వెప్తాజ్ మొదొల్స్తాన్. 23 అపొజ, వాండ్లు పేతురు దరిజ్ మర్జి బేసి, “ఓ సయ్తానా! నీను నజీ ఉండ్రి అడ్డు లెకండ్ మని. నీ మన్సుదు మని సజతిజ్ దేవుణుబాణిజ్ వాతిక ఆవద్, లోకుర్ ఒడఃబనికెజ్”, ఇజి వెప్తాన్.

24 నస్తివలె యేసు వన్ని సిసూరిజ్ సుడఃజి, “ఎయెన్బా నా వెనుక వాడెజ్ ఇపొజ, వాండ్లు వన్ని సాంత ఆసెజ్ విజా డిఃసి సీజి వన్నిజ్ వాజిని కష్టంకు విజా ఓరిస్సెజ్ తయారాజి పిండఃజి నా వెలు సాదెజ్బా తయారాజిని నా వెనుక వాడెజ్కలె. 25 ఎయెన్బా వన్ని పాణమ్దిజ్ వాండ్రి కావాడఃదెజ్ ఇజి సుడఃతిజ వన్నిజ్ ఎలాకాలం మంజిని బత్కు మన్వద్. నా వందిజ్ ఎయెరిజ్బా వన్ని పాణం నస్తిం ఆతిజ, వాండ్లు ఎలాకాలం మంజిని బత్కుదు సానాన్లె. 26 ఎయెన్బా వాండ్లు కొరిజినిక్యెజ్ దొహొక్సి యా లోకమ్ది ఆస్తిని సర్ద విజా దొహొక్సి వెనుక దేవుణువెలు ఎలాకాలం మంజిని బత్కుదు సాన్వండ మహిజ ఇని లబం మనాద్? దేవుణువెలు ఎలాకాలం మంజిని బత్కుదిజ్ బదులు మరి ఇనిక సీదెజ్ అట్నాన్? 27 లోకు మరిసి ఆతి నాను, నా బుబ్బతి దేవుణు గొప్ప జాయ్దాన్, వన్ని విజా దూతరిజ్ తోడుః అసి రాజా లెకండ్ వానాలె. వెనుక ఒరెన్ వన్నిజ్ వన్ని వణిదిజ్ తగితి లెకండ్ పలం సీనాలె. 28 లోకుమరిసి ఆతి నాను రాజా లెకండ్ ఏలుబడిః కినిక సూణిదాక, ఏలు నిహిమన్ని వరిలో ఇనిగొండార్ సావర్ ఇజి నాను మిజి నిజం వెప్పాన్”, ఇజి వెప్తాన్.

యేసు, మోసెని ఏలియ

17 ఆరు రోస్సు, వెనుక యేసు, పేతురుని యాకోబు, యాకోబు తంబెరిసి ఆతి యోహానుజ్బా కూక్తాండ్రి వన్నివెలు ఒతాన్. వారు నండ్ ఎత్తుమని ఉండ్రి గొరోన్ ముస్సు. ఎక్త సాహర్. 2 అబ్బె వరి ముందాల వన్ని రూపు మారితాద్. వన్ని మొకొం పాద్దు లెకండ్ ఆతాద్. వన్ని సాకెజ్ మెర్సిని జాయ్లెకండ్ తెలాజ్ ఆతె. 3 ఇదిలో, నస్తివలె అబ్బె మోసెని ఏలియ యేసు వెలు వర్గిజి మంజినిక వరిజ్ తోరె ఆతాద్. 4 నస్తివలె పేతురు, “ప్రబువా, మాటు ఇబ్బె మహిజ నెగెద్. నిజీ ఇస్టం ఇపొజ, ఇబ్బె నిజీ ఉండ్రి, మోసెజ్ ఉండ్రి, ఏలియజ్ ఉండ్రి, ఆహె మూండ్రి గుడుఃసెజ్ తొహ్న”, ఇజి వెప్తాన్. 5 వాండ్లు వర్గిజి మహివలె నండ్ జాయ్మని ఉండ్రి మొసాప్ వరిజ్ వేడ్గితాద్. “ఇదిలోన్ వీండ్లు నజీ ఇస్టమాతి నా మరిన్. విన్ని ముస్సు నాను సర్ద ఆత మన్న. విన్ని మాటెజ్ నెగెండ్ వెండ్లు”, ఇజి ఉండ్రి జాటు అయ మొసాపుదాన్ వాతాద్.

6 సిసూర్ యా మాట విహారె నండ్ తియెల్ అజి వడఃగ్గి అర్తార్. 7 యేసు వరి డగ్రు వాజి వరిజ్ ముట్టి, “నిజ్దు, తియెల్ ఆమాట్”, ఇజి వెప్తాన్. 8 వారు కణ్సు పెర్రి బేస్తిజ్ యేసుజ్ తప్ప మరి ఎయెరిజ్బా తొప్పితాద్. 9 వారు గొరోన్ డిగ్గిజి వాజి మహివలె, “లోకు మరిసి ఆతి నాను, సాతి వరిబాణిజ్ మర్జి నిజ్నిదాక, మిజి తోరె ఆతి యా సజతిజ్ వందిజ్ ఎయెరిజ్బా వెహ్మోట్”, ఇజి యేసు వరిజ్ వెప్తాన్.

10 నస్తివలె వన్ని సిసూర్, “ఏలియ † ముజాల వాడెజ్ ఇజి ఎందనిజ్ యూదురి రూలుజ్ నెస్సిస్సికార్ వెప్పానార్?”, ఇజి వన్నిజ్ వెన్బాతార్. 11 అందెజి వాండ్లు, ఏలియానె ముజాల వాజి మండ్రెజ్, యాక నిజమె. వాండ్లు వాజి విజా నెగెణ్ తయారొ కిసాన్. 12 అపొజ ఏలియ ముజాల వాత మహాన్, గాని వారు వన్నిజ్ గుర్తు అస్టెజ్అట్వండ వరిజ్ ఇస్టమాతి లెకండ్ వన్నిజ్ వడిఃఎండ కితార్. లోకుమరిసి ఆతి నానుబా అయాలెకండ్ వరి కిదాన్ ప్రమెజ్ ఓరిస్సాలె”, ఇజి వరిజ్ వెప్తాన్.

13 బాప్తీసం సీని యోహాను వందిజ్ వాండ్లు వరివెలు వర్గిజినాన్ ఇజి వారు అర్దం కితార్.

దెయం అస్తి కొడఃదిజ్ నెగెణ్ కిజినాన్

14 వారు మంద లోకుర్డగ్రు వాతివలె ఒరెన్ వన్ని డగ్రు వాజి వన్ని ముందాల ముణ్కు ఊరిజి, 15 “ప్రబువా నా మరిన్ ముస్సు నీ కనికారం తోరిన్లె వాండ్లు మూర్పు పెప్తాజ్ నండ్ బాద ఆజినాన్. వాండ్లు ఎసెజ్ ఎసెజ్ సినుద్ సీలిజ ఏరుదు అర్పి మంజినాన్. 16 నాను నీ సిసూర్ డగ్రు వన్నిజ్ తత్త గాని వారు వన్నిజ్ నెగెండ్ కిడెజ్ అట్వెతార్”, ఇజి వెప్తాన్.

17 అందెజి యేసు, “యా తరమ్దికిదెర్ ఆతి మీరు మహికార్ మిజి నెస్సిస్సి తప్ప సరిదాన్ నడిఃసి మన్నదెర్. మీరు నాముస్సు నమకం సిల్లికిదెర్. నాను ఎస్సా కాలమ్కు దాక నాను మిజి ఓరిసి మండ్రెజ్ వలె వన్నిజ్ నా డగ్రు తగాట్”, ఇజి వెప్తాన్. 18 నస్తివలె యేసు అయ దెయమ్దిజ్ ఉండ్రి ఆడ్ర సితిజ్ అక్క వన్నిజ్ డిఃస్టతాద్. అయ గడిఃయాదునె ఆ ఇజిరికాన్ నెగెండ్ ఆతాన్.

19 దని వెనుక వన్ని సిసూర్వాండ్లు ఒరేండ్రి మహివలె యేసు డగ్రు వాతారె, “మాపు ఎందనిజ్అయ దెయమ్దిజ్ సాన్పిస్సెజ్ అట్వెతాప్?”, ఇజి వెన్బాతార్. 20-21 ఉండ్రి సర్పుగిడ నస్తి నమకం మహిజ యా గొరోన్దిజ్ సుడఃజి, “ఇబ్బెణిజ్ అబ్బె సాన్ల” ఇజి వెప్తాజి అది అబ్బె సానాద్. మీరు కిడెజ్ అట్ఇక ఇనికబా మన్వద్, ఇజి నాను మిజి నిజం వెప్పాన్”, ఇజి వెప్తాన్. మిజి సస్సా నమకం సిల్లెద్, అందెజి మీరు కిడెజ్ అట్ఇదెర్.

22 వారు గలీలయ దేసమ్మదు వాతివలె యేసు, “లోకు మరిసి ఆతి నాను లోకుర్ కియుదు ఒపజెపె ఆనాలె. 23 వారు నజీ సప్పాలె, మరి మూండ్రి దినమ్మదు నాను మర్జి నిజెఅనాలె”, ఇజి వరిజ్ వెప్తాజ్ వారు నండ్ దుకం ఆతార్.

24 యేసుని వన్ని సిసూర్ కెప్పొహముదు వాతివలె, సెగం సెకల్ †† లెక్క పన్ను పెర్నికార్ పేతురు, డగ్రు వాతారె, “మిజి బోద్ కినికాన్ దేవుణు గుడిఃది పన్ను సివండ్లా?”, ఇజి వెన్బాతార్. 25 “ఒఒ వాండ్లు సీనాన్”, ఇజి వాండ్లు వెప్తాన్. పేతురు ఇండ్రి వాతిజ్, వాండ్లు వర్గివిండ ముజాల యేసు వర్గితాన్. “సీమోను, యా

† పాడలు ఒప్పమానమ్మదు మన్ని మలాకి ప్రవక్త పుస్తకమ్మదు రస్తిమన్నిలెకండ్ ఇపొజ, ఏలియ ముజాల వాడెజ్ ఇజి యూదురు నమ్మిజినార్. మలాకి 3:1, 4:5-6. †† యెరుసలేమ్మదు మన్ని దేవుణు గుడిఃదిజ్ అవసరమ్మతికెజ్ కిజి నెగెండ్ సుడిఃదెజ్ ఒరెన్వెర్సెప్పబాణిజ్, సెగం సెకల్ పన్నులెకండ్ పెర్జి మహాన్. యూదురు ఆతి మొగవారు 20 వయ్యుడాట్టిమహికార్ విజెరె గుడిః పన్ను సీదెజ్ ఇజి దేవుణుమాటదు రాస్త మనాద్. అక్క రుండి రోస్సు కూలిదిజ్ సమానం మహాద్. నిర్గమ 30:13-16. 2దిసరు 24:9-14, నెహెమ్య 10:32.

లోకమీది రాజు ఎయెర్బాణిజ్ సిస్టుని పన్నుజ్ ఒనూలు కిజినార్ వరి సాంత దేసెమీది వరిబాణిజ్నా, సిల్లిజ అయదేసెమీదు మన్ని ఆజ దేసెమీదివరి బాణిజ్నా? నీను ఇనిక ఒడేబిజిని?" ఇజి వన్నిజ్ వెన్బాతాన్. 26 "వారు విద్దెం కిజి గెల్సి దేసెమీదివరిబాణిజ్నా", ఇజి పేతురు వెప్టాన్. యేసు వన్నిజ్, "అహిజ సాంత దేసెమీదికార్ సిపిండ త్పు ఆజినార్. 27 మాటు వరిజ్ అడ్డు మంజిని వరిజ్లెకెండ్ మండ్రెజ్ ఆవద్. నీను సేరుదు సాన్ని గాలం పాస్సి ముండాల దొహ్కొని మొయదిజ్ అసి దని వేయు రెక్సి సుడేతిజ, ఉండ్రె సెకెల్ కాసు దని వెయదు మంజినాద్. అయాక లాగ్గి నీ వందిజ్నీ నా వందిజ్ పన్ను సిల", ఇజి వెప్టాన్.

దేవును కిని ఏలుబడిడు పెరికాన్

18 నస్తివలె సిసూర్ యేసు డగ్రు వాజి, "దేవుణు కిని ఏలుబడి: కినివలె మాలో ఇ యెన్ అబ్బె పెరికాన్ మంజినాన్?", ఇజి వన్నిజ్ వెన్బాతాన్. 2 వాండ్రు ఒరెన్ ఇజిరి కొడొ:దిజ్ కూక్సి వరి నడిమి నిల్చాన్. 3 మరి వాండ్రు ఈహు వెప్టాన్, "మీరు ఇజిరి కొడొ:ర్ లెకెండ్ మన్ను మరిసి, వరి లెకెండ్ ఆవండ మహిజ, మీరు ఎసెజ్బా దేవుణు కిని ఏలుబడిడు సాండ్రెజ్ అబ్ఇదెర్, ఇజి నాను మిజి నిజం వెప్సిన్. 4 అందెజె యా ఇజిరి కొడొ: లెకెండ్ తగ్ అనికాన్ ఎయెండ్రొ, వాండ్రె దేవుణు కిని ఏలుబడిడు పెరికాన్ ఆనాన్.

5 మరి ఎయెర్బా నా మున్ను మన్ని నమ్మకమీదు యా ఇజిరి కొడొ:ర్ లెకెండ్ ఆతికాన్ ఇజి ఒడేబినాండ్రొ ననివన్నిజ్ డగ్రు కినికాన్, నజి డగ్రు కిజినాన్. 6 గాని, నా మున్ను నమకం ఇట్టి మని యా కొడొ: నన్ని ఒరెన్ వన్నిజ్, ఎయెర్బా పాపం కిబిస్తిజ, వాండ్రు వన్ని మెడదు ఉండ్రె పెరి జత్తవణుకు తొహి ఆజి నమ్దరం అడ్డి ముడు:గిజి సానిక వన్నిజ్ ఒడ్డె నెగెద్.

7 ఎందానిజ్ ఇహిజ, లోకురిజ్ పాపం కిబిస్తి సజతిజ వందిజ్ యా లోకమీది వరిజ్ స్రమెజ్ తప్ఉ. యాకెజ్ తప్ఎండ వాదెజ్వెలె. గాని యాకెజ్ ఎయెన్వెలె వానెనా వన్నిజ్ వెప్టాజ్ అబ్ఇ నని కస్టమ్కు మంజిని. 8 నీ కియూబా, నీ కాల్కుబా నిజి పాపం కిబిస్తిజ, దనిజ్కత్తి విసీర్ల. రుండి కికు కాల్కు మంజి ఎలాకాలం మంజిని సిసుబాడిడు అర్ని దనిజ్ ఇంక, కికు కాల్కు సిల్లెండ ఆజి ఎలాకాలం దేవుణు వెల మంజిని బత్కుదు సానిక నెగెద్. 9 మరి నీ కణక నిజి పాపం కిబిస్తిజ దనిజ్లాగ్జి విసీర్ల. రుండి కణకు మంజి ఎలాకాలం మంజిని సిసుబాడిడు అర్ని దనిజ్ ఇంక, ఉండ్రె కణక మంజి ఎలాకాలం దేవుణు వెల మంజిని బత్కుదు సానిక నెగెద్.

10 యా ఇజిరి వరి లో ఇ యెరిజ్బా మీరు ఇజిరి కణకు సుడేమాట్. ఎందానిజ్ ఇహిజ పరలోకామీదు నా బుబ్బు డగ్రు మంజిని దూతార్ ఎస్తివలెబా వరిజ్ సుడేబి మంజినార్.

మరుతి గొరె కత.

11 గొరెజ్ లెకెండ్ మురుతి సాహి లోకురిజ్ రెబాజి రక్సిస్సెజ్ ఇజినె లోకుమరిసి † ఆతి నాను ఇబ్బె వాత మన్ను ††. 12 ఒరెన్ వన్నిజ్ వంద గొరెజ్ మంజి వన్నాజ్ లో ఇ ఉండ్రె మురుతిజ, మహి తొంబయ్ తొమ్మిది గొరెజ్ డిసి, మురుతి గొరెదిజ్ రెబాజి సాన్ఎండ్రొ? మీరు ఇనిక ఒడేబిజినిదెర్? 13 దనిజ్ దొహ్కొతిజ, వన్ని మురుఎండ మని తొంబయ్ తొమ్మిది గొరెజ్ మున్ను యా మురుతి ఉండ్రె గొరె వందిజ్ వాండ్రు గొప్ప సర్ద ఆనాన్, ఇజి నాను మిజి నిజం వెప్సిన్.

14 అయలెకెండ్నె యా ఇజిరి వరిలో ఇ ఒరెన్బా పాడా:జి సాండ్రెజ్ దేవుణు మంజిని బాడిడు మని మీ బుబాతి దేవుణుదిజ్ ఇష్టం సిల్లెద్.

15 మరి నీ తంబెరిజ లో ఇ ఒరెన్ నిజి త్పు పణిజ్ కతిజ, మరి ఎయెర్బా నెన్విండ వాండ్రుని నీను మనివెలె వాండ్రు కితి త్పు పణిజ్ తోరిస్ల. వాండ్రు నీ మాట వెహిజ నీను వన్నిజ్ మర్జి నీ వెల కూడేబి మంజిని వన్నిలెకెండ్ కిత్తి. 16 గాని వాండ్రు నీ మాట విన్విండ మహిజ, ఒరెన్ వన్నిజ్నా, రిపిరిజ్నా నీ వెల తోడు: అసి వన్ని డగ్రు సాన్ల. అహిజ దేవుణు మాటదు మని లెకెండ్ రిఎర్ మువర్ది సాసిరి మాటెజవెల విజా సజతిజ్ నిజమాతికెజ్ ఇజి రుజాప్ కిదెజ్ వలె ‡. 17 వాండ్రు వరి మాటబా విన్విండ మహిజ, అయ సజతి దేవుణు సజమీదిజ్ తెలియ కిల. సజమీది వరి మాటబా వాండ్రు విన్విండ మహిజ వన్నిజ్ ఆజ వన్ని ననికాన్, సిల్లిజ వన్ను పెర్సికాన్ †† ఇజి సుడేల. 18 యా బూమి మున్ను మీరు ఇనిక తొహిదెరో, అయాకెజ్ దేవుణు మంజిని బాడ్డిదుబా తొహి ఆనెలె. మరి యా బూమి మున్ను మీరు ఇనిక కుత్తిదెరో, అయాకెజ్ పరలోకావ్దు దేవుణుబా అడ్డు కిసాలె. మరి యా బూమి మున్ను ఇనిదన్నిజ్ సెలవ సీనిదెరో పరలోకామీదాన్ దేవుణుబా దన్నిజ్ సెలవ సీసాలె ఇజి నాను మిజి నిజం వెప్సిన్. 19 మరి ఎయెర్బా రిఎర్కూడేబి, ఉండ్రె మన్ను కల్లిజి ఇనికబా లొస్తిజ్బా, పరలోకామీదు మన్ని నా బుబ్బాతి దేవుణు, మీరు కోరిజిని లెకెండ్ మీ వందిజ్ కినాన్లె. 20 అహిజ ఎంబె రిపిర్నా, మువర్నా నా పేరుదాన్ కూడేబి వాజి మహిజ, అబ్బె వరివెల నాను మంజినలె."

కనికారం తోరిస్ఇ పణిమనిసి

21 నస్తివలె పేతురు యేసు డగ్రు వాతండ్రె, "నా తబేరి ఒరెన్ నా వెల త్పు కితిజ నాను ఎసాడు సుట్టు వన్నిజ్ సెమిస్సెజ్? ఎడు: సుట్టు సెమిస్సెజ్ ఆనాదా?", ఇజి వెన్బాతాన్. 22 యేసు వన్నిజ్, "ఏడు సుట్టు ఆవద్. డబయ్, సుట్టు ఏడు †† ఇజి నాను నిజి వెప్సిన్", ఇజి వెప్టాన్. 23 ఎందానిజ్ ఇహిజ దేవుణు ఏలుబడి: కినిక ఇహిజ, వన్ని పణిమస్సిరవెల వారు వన్ని బాణిజ్ లొస్తిమన్ని అపుదిజ్ లెక్కు సూణి ఒరెన్రాజాజ్ పాలిత మనాద్. 24 లెక్కు సుడేదెజ్ మొదోల్స్తి వలె, వది వెయుజ్ తాలందుజ్ ††† అప్ప లొస్తిక మర్జి సీదెజ్ మన్ని ఒరెన్ వన్నిజ్, వన్ని డగ్రు తత్తార్. 25 వన్నిజ్ అప్ప తీరిస్సెజ్ అబ్ఇతిజ్, వన్నిజ్నీ వన్ని ఆల్సిజ్, కొడొ:రిజ్, మరి వన్నిజ్ కల్లితి మనికెజ్ విజా పార్ని అప్ప తీరిస్ల ఇజి యాజమాని ఆడ్ర సిత్తాన్. 26 అయ పణిమణిసి వన్ని ఎద్దు ముణుకుజ్ ఊరిజి మాడి:స్తాండ్రె, "నజి సెమిస్ల నజి మరి కండెక్ సమయం సిదా నాను అప్ప విజా మర్జి సీన" ఇజి బతిమాల్తాన్. 27 అయ ఎజామాని పణిమనిసి మున్ను

† లోకుమరిసి ఇని మాట అరామియ బాసదాన్, "నాను" సిల్లిజ "నజి,నాది", ఇజి అద్దమానెలెకెండ్ యూదురు వెప్సి మహార్. యేసుప్రబుబా వన్ని వందిజ్ వెప్టాజ్ యాలెకెండ్ వెప్సి మహాన్. యాలెకెండ్ వెప్సిమహివలె నానె క్రీస్తు ఇజి వాండ్రు తినాజ్ వెహివిండ వన్ని వందిజ్ వెప్సి మహాన్. దానియేలు ప్రవక్త పుస్తకమీదు రాసి మన్ని దన్నిజ్ తగితిలెకెండ్, వాండ్రు యా పేరు వన్ని వందిజ్ వెప్సి మహాన్. దానియేలు 7:13-14. యేసుజ్ పగాతికార్ వాండ్రు మాముల్గె వన్ని వందిజ్ అహి వెప్సిన్ ఇజి ఒడేబితార్. గాని వన్నిజ్ సమ్మితికార్ వాండ్రె క్రీస్తు ఇజి వెప్సి మహాన్ ఇజి అర్దం కిత్తార్. †† గ్రీక్కు బాహుదు రాస్తిమన్ని ముకెలమాతి పుస్తకమీకాజ్ యా మాట మన్నె గాని సెగం పుస్తకమీకాజ్ సిల్లెద్ ‡ ద్వితి కాండం 19:15 †† యూదురు ఆతికార్ ఇనిదన్ని వందిజ్బా వన్ను పెర్సివరివెల కూడిబి మన్వీర్ †† నాల్ వంద తొంబయ్ సుట్టు ఇహిజ ఎస్తివలెబా సెమిస్ మండ్రెజ్ ఇజి అద్దం. ††† ఉండ్రె వెయి తాలందు ఇహిజ వెయి లక్కు రూసాయ్దిజ్ లాన్ మన్నె

కనికారం ఆజి, నీ అప్పు విజా తెవితాద్ ఇజి వన్నిజ్ సాండ్రైజ్ సెలవ సిత్తాన్. 28 గాని అయ పణిమనిసి వెల్లి వాజి సాన్ని మహివలె, వన్నిజ్ వంద దినారముకు † అప్పు మని, వన్నివెల కూడఁజి పణికిజిని ఒరెన్ వన్నిజ్ సుడఁతాన్. వన్నిజ్ అస్తాండ్రై గాతిక పడిసి, “నీను నజి అప్పు మన్ని డబ్బు మరజి సిదా”, ఇజి బలవంతం కిత్తాన్. 29 వన్నివెల కూడఁజి పణికినికాన్ ఆతి అయ పణిమనిసి వన్ని ఎర్లు ముణుకుజ్ ఊరిజి, “నజి సెమిన్ అ, నిజి మరి కండెక్ సమయం సిదా? నిజి సీదెజ్ మన్ని అప్పు విజా నాను మరజి సీన”, ఇజి బతిమాలతాన్. 30 గాని వాండ్రు అక ఒప్పుకొడవండ, అప్పు విజా మరజి సీనిదాక వన్నిజ్ జేలుదు ఇడిస్తాన్. 31 వరివెల కూడఁజి పణికినికార్ సెగొండార్, యా జరిగితిక విజా సుడఁతార నండో బాద ఆతార్. వారు సాన్ని జగ్గితిక విజా ఎజామానిజ్ వెప్తార్. 32-33 నస్తవలె అయ ఎజామాని వన్నిజ్ కూకొస్తాండ్రై, “ముారికం మని పణిమనిసి, నీను నజి బతిమాలతాన్ నాను కనికారం ఆజి నిజి సెమిసి, నీ అప్పు విజా తెవితాద్ ఇజి నిజి వెప్తిలెకెండే నీ వెలు కూడఁజి పణి కిని వన్నిజ్ సీనుబా సెమిసి వన్ని మున్సు, కనికారం తోరిస్తెజ్ గదె?”, ఇజి వెన్ బాతాన్. 34 నస్తవలె అయ ఎజామాని వన్ని మున్సు కోపం ఆతాండ్రై వాండ్రు అప్పు విజా మరజి సీనిదాక వన్నిజ్ హిమ్ సెమిన్ కినివరిజ్ ఒవజెప్తాండ్రై జేలిదు ఇడిస్తాన్.

35 మీరు మీ మన్సుదాన్ మీ తంబెరిజవెల సెమిన్ ఏండ మహిజ పరలోకామ్దు మన్ని నా బుబ్బాతి దేవుణుబా యా లెకెండేన మీ లోఇ ఒరెన్ వెల కినాన్.

అల్సినజ్ డిస్సి సీని వందిజ్

19 యా మాటెజ్ వెప్తి పీజితి వెనుక యేసు గలిలయ డిసి, యోర్దాన్ గడ్డ అతాహ పడక మని యూదయ నాహ్కాజ్ సాహాన్. 2 మంద లోకుర్ వన్ని వెనుక సాహార్. వాండ్రు అబ్బె వరి జబ్బుది వరిజ్ నెగెండే కిత్తాన్. 3 సెగొండార్ వరిసయరు, వన్ని మాటెజాణిజ్ వన్నిజ్ తప్పు అస్తెజ్ ఇజి వన్ని డ్రు వాతార, “ఇని తప్పబా తోవండ ఒరెన్ వన్ని ఆల్సిజ్ డిసి సీనిక దేవుణు మోసెజ్ సిత్తి రూలుజ్ వజ నాయమ్నా?”, ఇజి వెన్ బాతాన్. 4 వాండ్రు వరిజ్, “ముజాహాన్ దేవుణు లోకురిజ్ తయార కితివలె వరిజ్ మొగ్గ కొడఁజిని బోదెలి లెకెండే తయార కిత్తాన్ †. 5 అందెజె మొగ్గ కొడఁజి వన్ని అయసి అప్పానిరిజ్ డిసి వన్ని ఆల్సి వెల కూడఁజి నాన్. వారు రివర్ ఉండ్రై ఒడఁజి అనార్. 6 అందెజె అబ్బెణిజ్ అసి వారు రివర్ ఆవండ ఉండ్రై ఒడఁజి అన మంజినార్. అందెజె దేవుణు జత కుడుప్పి వరిజ్ లోకుర్ కేట కిదెజ్ ఆవద్ ఇజి దేవుణు మాటదు రాస్తి మన్నిక మీరు ఎనెజ్ బా సద్విఇతిదెరా?”, ఇజి వరిజ్ వెన్ బాతాన్. 7 వారు వన్నిజ్, అక్క అయాలెకెండే మహిజ, ఒరెన్ వన్ని ఆల్సిజ్ డిస్టెజ్ ఇహిజ, ఉండ్రై విడ్డిః ఆకు రాసి సీజి దనిజ్ డిస్టెజ్ అనాద్ ఇజి మోసె ఎందనిజ్ ఆడ్ర సిత్తాన్?”, ఇజి వెన్ బాతాన్. 8 యేసు వరిజ్, “మిజి ససా కటిసమతి మన్సు మహిజ్, మోసె అయ లెకెండే సెలవ సిత్తాన్ గాని ముజాహాన్ అసి అయ లెకెండే జగ్గివితాద్. 9 రంకు బూలాతిజానె తప్పు మరి ఇనిదని వందిజ్ బా ఒరెన్ వన్ని ఆల్సిజ్ డిసి మరి ఉండ్రై దనిజ్ ఇడె ఆతిజ వాండ్రు దనివెల రంకు బూలానికాన్ ఆజినాన్ ఇజి నాను మిజి వెప్తాన్”, ఇజి వెప్తాన్. 10 వన్ని సిసూర్ వన్నిజ్, “ఆల్సి మాసిర్ నడిమి సజతిజ్ యాలెకెండే మనాద్ ఇహిజ, పెండ్రై ఆవండ మంజినికాదె నెగెద్”, ఇజి వన్నిజ్ వెప్తాన్. 11 యేసు వరిజ్, “మీరు వెప్తి మాట విజెరి అస్తెజ్ అట్వెర్, గాని దేవుణు ఎయెరిజ్ అయ లెకెండే సితాండ్రై వారి కిదెజ్ అట్నార్. 12 సెగొండార్ ఆండెరిజ్ †† లెకెండేనె అయిసి పాలాదాన్ పుట్నార్. సెగొండారిజ్ లోకుర్ ఆండెరిజ్ లెకెండే కిజినార్. మరి సెగొండార్ దేవుణు ఏలుబడిః వందిజ్ పెండ్రై ఆవండ వరిజ్ వారి ఆండెరిజ్ ఆజి మంజినార్. 13 నస్తవలె యేసు కికు ఇడ్డి పార్దనం కదెజ్ ఇజి సెగొండార్ ఇజిరి కొడఁజిరిజ్ వన్ని డ్రు తత్తార్. వన్ని సిసూర్ కొడఁజిరిజ్ తత్తి వరిజ్ జటిజ్ ఆజి గోల కిత్తాన్. 14 గాని యేసు, “యా ఇజిరి కొడఁజిరిజ్ నా డ్రు రప్పిర్, వరిజ్ అడ్డు కిమాట్. దేవుణు ఏలుబడిః కినిక నినివరిదినె”, ఇజి వరిజ్ వెప్తాన్. 15 వరి మున్సు కికు ఇడ్డి పార్దనం కితి వెనుక వాండ్రు అబ్బెణిజ్ సాహాన్.

ఆస్తి మని దజడాయెన్.

16 ఇదిలో, ఒరెన్ యేసు డ్రు వాతండ్రై, “ఓ బోదకినికి, దేవుణు వెల ఎలాకాలం మంజిని బత్తుదు నాను మండ్రైజ్ ఇహిజ నాను ఇని నెగ్గి పణికికెదెజ్”, ఇజి వన్నిజ్ వెన్ బాతాన్. 17 యేసు వన్నిజ్, “నెగ్గి పణిజ వందిజ్ ఎందనిజ్ నీను నజి వెన్ బాజిని? నెగ్గికాన్ దేవుణు ఒరెండ్రై మనాన్. దేవుణు ఎలాకాలం మంజిని బత్తుదు నీను మండ్రైజ్ ఇహిజ, దేవుణు సీతి ఆడ్రైజ్ లోజిజి మన్ అ”, ఇజి వెప్తాన్. 18 వాండ్రు, “ఇని ఆడ్రైజ్?”, ఇజి వన్నిజ్ వెన్ బాతిజ్ యేసు వన్నిజ్, “సప్తెజ్ ఆవద్, రంకు బూలాదెజ్ ఆవద్, డొజ కిమా, అబద్దమదిజ్ సాస్యం వెహ్మా. 19 అయిసి అప్పానిరిజ్ గవరమ్దాన్ నెగెణ్ సుడఁజి. †† మరి నీను నిజి ప్రేమినిలెకెండే మహివరిజ్ ప్రేమిన్ అ” †††, ఇజి వెప్తాన్. 20 అందెజె అయ దజడాయెన్, “యాకెజ్ విజా నాను కిజినె మంజిన. మరి ఇనిక నజి తకు మనాద్?”, ఇజి వెప్తాన్. 21 యేసు వన్నిజ్, “నీను పూర్తి నెగ్గికి ఆదెజ్ కోరితిజ, నీను సాన్ని నిజి కల్గితి మనికెజ్ విజా పార్సి, బీదాతివరిజ్ సీబాజి సీ అ. ఆహా కితిజ పరలోకామ్దు నిజి ఆస్తి కల్గిజి మంజినాద్. వెనుక నావెల రల”, ఇజి వెప్తాన్. 22 అయ దజడాయెన్ నండో ఆస్తి కల్గిజి మనికాన్ కాక అయ మాట విహండ్రై ఇజిరి మొకొం అతాండ్రై సాహాన్. 23 నస్తవలె వన్ని సిసూర్ జ సుడఁజి, యేసు”, ఆస్తి మన్నికాన్ దేవుణు కిని ఏలు బడిదు సాండ్రైజ్ గొప్పు కస్టం ఇజి నాను మిజి నిజం వెప్తాన్. 24 మరి నాను మిజి వెప్తిక ఇనిక ఇహిజ, ఆస్తి మనికాన్ దేవుణు ఏలుబడిదు సాని దనిజ్ ఇంక, ఒంటె దొపానం బొరొదాన్ డుఁగెనిక సులు ఆనాద్”, ఇజి వెప్తాన్. 25 సిసూర్ యా మాట విహర నండో బమ్మ ఆతార, “దేవుణు రక్సిస్తి లెకెండే ఎయెన్ మండ్రైజ్ అట్నార్?”, ఇజి వెప్తాన్. 26 యేసు వరిజ్ సుడఁజి, “యాక లోకాజ్ అట్ ఇకాదె, గాని దేవుణు విజా కిదెజ్ అట్నాన్”, ఇజి వెప్తాన్. 27 పేతురు వన్నిజ్ సుడఁజి, “ఇదిలో మాపు విజా డిస్టెజె నీ వెల వాజినాప్, మిజి ఇనిక దొహ్ కాద్దు?” ఇజి వెన్ బాతాన్. 28 యేసు వరిజ్, “యా లోకం మరి కొత్తాక ఆనివెలె లోకు మరిసి ఆతి నాను గొప్పు జాయ్ మని గొప్పు సింహాసనమ్దు బసి ఇస్రాయేలుది పన్నెండు తెగ్గాతివరిజ్ తీర్పు తీరిస్సివెలె, నా వెనుక వాతి మీరుబా, నావెల పన్నెండు గొప్పు సింహాసనమ్కాజ్ బసి వరిజ్ తీర్పు కినిదెరిలె. 29 మరి ఎయెర్ బా నా వందిజ్ వరి ఇల్లుజొల్లు, అన్నతంబెరిజబ, బీబి తడిసికెజ్ బా, అయిసి అప్పానిరిజ్ బా, బూమిపుట, కొడఁజి కొక్రరిజ్ బా డిస్సి సీతిజ నినివరిజ్ యాకెజ్ వంద వందుజ్ దొహ్ కాడ్డె. దన్నివెల ఎలాకాలం మంజినిబత్తుబా దొహ్ కాడ్డె. 30 గాని మొదొహికార్ ఇజి ఒడఁజిని నండొండార్ కడెవెరిదికార్ అనార్. కడెవెరిదికార్ ఇజి ఒడఁజిని నండొండార్ మొదొహికార్ అనార్లె.

† వంద దినారముకు ఇహిజ అయ కాలమ్దు పది రొస్కా పణికిని కూలిదిజ్ సమానం మహాద్. †† 19:4 ఆది 1:27. † 19:5 ఆది 2:24. †† అందెర ఇహిజ వాండ్రు కొడఁజి ఇడ్డెజ్ అట్ ఇనాన్. †† 19:19 నిర్గమ 20:12-16; ద్వితి 5:16-20. ††† 19:19 లేవ 19:18.

ద్రాసటోటాదు పణికినికార్

20 "దేవుణు ఏలుబడి కినిక ఇహిజ, వన్ని ద్రాసటోటాదు పణికిదెజ్ పణికిని వరిజ్ కూక్తెజ్ పెండాల నిజ్జె వెల్లి సాన్ని మహి ఉండ్రీ టోట యెజమానిజ్ పోలిత మనాద్. 2 ఉండ్రీ రోజు పణికిదెజ్ ఉండ్రీ దినారం † కూలి సీన ఇజి ఒప్పకొటాండ్రె, వన్ని ద్రాక్కు టోటాదు పణి కిదెజ్ వరిజ్ పోక్తాన్. 3 వెనుక అంబెలి వేలాదు వాండ్రు వెల్లి సాహివలె సత్తాదు ఇని పణి సిల్లెండ నిహిమని సెగొండారిజ్ సుడెతాన్. 4 వాండ్రు వరిజ్, "మీరుబా నా ద్రాక్కుటోటాదు పణికిదెజ్ సాండ్రు, మిజీ సరియూని కూలి సీన", ఇజి వెప్తాన్. 5 వారు సాహార్. మరి వాండ్రు పన్నెండు గంటజ, మూండ్రీ గంటజబా ఆహె కితాన్. 6 మరి అయ్దు గంటజ సాహిజ్ మరి సెగొండారికాలి నిహిమనివరిజ్ సుడెతాన్. వాండ్రు వరిజ్, "యా దినం విజు ఎందనిజ్ మీరు ఇబ్బె సెడ్డినె నిహిమహిదెర్?", ఇజి వెన్బాతాన్. 7 వారు వన్నిజ్, "ఎయెర్బా ఇని పణికిదెజ్బా మజి కూక్వితార్, అందెజ్", ఇజి వెప్తాన్. వాండ్రు వరిజ్ "మీరుబా నా ద్రాస టోటాదు పణికిదెజ్ సాండ్రు", ఇజి వెప్తాన్. 8 పాదు ఆతివెలె అయ ద్రాస టోట ఎజమాని పణి సూణి వన్నిజ్ కూక్తాండ్రె, "పణికినివరిజ్ కూక్కి, కడవేరి వాతివరిబాణిజ్ మొదొల్ని ముండాల వాతికార్ దాక వరిజ్ కూలి సీల", ఇజి వెప్తాన్. 9 పార్దు డిగ్గివలె పణికిదెజ్ వాతివరిజ్ ఒరెన్ ఒరెన్ వన్నిజ్ ఉండ్రీ దినారం కూలి దోహ్కాన్. 10 ముండాల వాతికార్ మజి లావ్ దోహ్కాన్, ఇజి ఒడెబితార్ గాని వరిజ్బా వ్రతి ఒరెన్ వన్నిజ్ ఉండ్రీ దినారమ్నె కూలి దోహ్కాన్. 11 అయ్యాక దోహ్కాన్వెలె వారు టోట ఎజమానిజ్ ఎద్దు మొరొ ఆతార్. 12 వారు, "కడెవెరిదు వాతికార్ ఉండ్రీ గంటనె పణి కితార్ గాని వెలార్ కస్టబడెజి విజు పణి కితిమని మజి ఎందనిజ్ నీను వరిజ్ సమానం కితి?", ఇజి వెన్బాతార్. 13 వాండ్రు వరి లొఇ ఒరెన్ వన్నిజ్, "బయి, నాను మిజి ఇని అనెయం కివిత. ఉండ్రీ దినారమ్నిదెజ్ పణి కిని ఇజి మీరు ఒప్పకొటిదెర్ గదె? 14 మీ కూలి అసి మీరు సాండ్రు. మిజి సీతి లెకెండ్ కడెవెరిదు వాతివన్నిజ్బా సీదెజ్ నజి ఇప్టం ఆతాద్. 15 నా డబుదాన్ నజి ఇప్టమాతి లెకెండ్ కిదెజ్ నజి అక్కు సీలెదా? నాను వరిజ్ ఒదరిసి సీతి వందిజ్ నీను గోస ఆజినిదెర్?", ఇజి వెన్బాతాన్. 16 అయా లెకెండ్నె కడెవెరిదికార్ ఇజి ఒడెబిజినికార్ మొదొహికార్ ఆనార్, ముందొహికార్ ఇజి ఒడెబినికార్ కడెవెరిదికార్ ఆనార్."

యేసు వన్ని సాపు వందిజ్ మరి వెప్పినాన్.

17 యేసు యెరూసలేమ్దు సాన్ని మహివలె, వాండ్రు వన్ని పన్నెండు మణిసిరి సిసురిజ్ ఉండ్రీ వడెకాదు కూక్త ఒతాండ్రె వరిజ్ ఈహు వెప్తాన్. 18 ఇదిలో మాలు యెరూసలేమ్దు సాన్నినాట్. అబ్బె లోకుమరిసి ఆతి నాను పెరి పుజెరిజ, యూదురి రూలుజ్ నెప్పిన్నీ వరిజ్ ఒవజెపె ఆనాలె. వారు నజి సాపుదిజ్ సిక్కు సీనార్లె. 19 మరి వారు నజి వెకస్తి, కొరెడెబాణిజ్ డెయేజి, సీలవ పోక్తెజ్ యూదురు ఆజ వరిజ్ ఒవజెప్పార్లె. మూండ్రీ రోస్కాన్ నాను మరజి నిక్కాన్లె." 20 నస్తివలె జెబెదెయి మరిసిరి అయ్సీ వరి వెట యేసు డగ్గు వాతాదె ముణుకుజ్ ఊరిజి మాడిసి, "నాయం కిల", ఇజి వెప్తాద్. 21 "నీను ఇనిక కోరిజిని?", ఇజి వాండ్రు వెప్తాన్. అందెజె అది, "నీను రాజు వజ ఏలుబడి కినివెలె, యా నా రివెర్మరిసీర్ ఒరెన్ నీ ఊణెర్ వడెకాదుని ఒరెన్ నీ డేబ్ర వడెకాదు బసి మండ్రెజ్ ఇజి నాను కోరిజిని", ఇజి వెప్తాద్. 22 యేసు, "నీను ఇనిక వెన్బాజినాదొ ఇజి నిజి తెలివద్", ఇజి వెప్తాండ్రె వరిజ్, "నాను ఉండెజ్మని గినాదిక ఉండెజ్మీరు అటనిదెరా?", ఇజి వెప్తాన్. వారు, "మాన్ ఉండెజ్ అట్వాన్", ఇజి వెప్తాన్. 23 యేసు వరిజ్, "తవ్విండ నాను ఊణి గినాదిక మీరు ఊణెదెర్, గాని నా ఊణెర్ వడెకాదుని డేబ్ర వడెకాదు బసి కిబిన్నిక నా కీదు సీల్లెద్, నా బుబ్బు కియుదాన్ ఎయెరిజ్ తయార్ కిత మనాండ్రొ వరిజ్ అక్కెజ్ దోహ్కాన్", ఇజి వెప్తాన్. 24 మహి వది మస్సిర్ సిసూర్ వరి అయ్సీ యేసుజ్ లొస్తి అయ మాట విహారి రివెర్ ముస్కు కోవం ఆతార్. 25 యేసు వరిజ్ విజెరిజ్ కూక్తాండ్రె వరిజ్, "యూదురు ఆఇవరి రాజుర్ వరి లోకుర్ ముస్కు అతికారమ్దాన్ మంజినార్. వరి పెరి అదికారిజు వరిజ్ మని అతికారమ్దాన్ లోకురిజ్ అణసు తిగిజినార్ ఇజి మీరు నెస్సిదెర్ గదె? 26 గాని మీరు వారు లెకెండ్ మండ్రెజ్ ఆవద్. గాని మీ లొఇ ఎయెర్బా పెరికాన్ ఆదెజ్ ఇహిజ, వాండ్రు మిజి పణిమన్ని ఆదెజ్వెలె. 27 మరి ఎయెర్బా విజెర్ ముస్కు పెరికాన్ ఆదెజ్ ఇజి కోరిజినికాన్, వాండ్రు మిజి విజెరిజ్ వెలి పణికి వనిలెకెండ్ ఆజి మండ్రెజ్. 28 ఎలాగ ఇహిజ లోకు మరిసి ఆతి నాను, విజెర్ నజి పణి కిపీర్ ఇజి నాను రెవితా, గాని పణి కిదెజె వాత మన్ను. మరి నండొండారిజ్ బత్తిక్కిజ్, వరిజ్ విడుడల కిదెజ్ వరి వందిజ్ నా పాణం సీదెజె నాను వాత మన", ఇజి వెప్తాన్.

గుడిదికార్ సుడెజినార్

29 యేసుని వన్ని సిసూర్ యెరికో పట్టుమ్దాన్ సాన్ని మహిజ్, నండొ లోకుర్ వన్ని వెనుక సాహార్. 30 ఇదిలో సరివడకాదు బస్తిమని రివెర్ గుడ్డిదికార్, యేసు అయా సరిదాన్ సాన్నినాన్ ఇజి వెహారి, "ప్రబువా, దావీదు మరిసి, మా ముస్కు కనికారం తోరిస్ల", ఇజి డేలిసి వెప్తాన్. 31 లోకుర్ వరిజ్ 'వలక్ మండ్రు' ఇజి గోల కితార్. గాని వారు, "ప్రబువా, దావీదు మరిసి మా ముస్కు కనికారం ఆల", ఇజి మరి ఒదె డేల్ని వెప్తాన్. 32 యేసు నిహండ్రె వరిజ్ కూక్తాన్. "నాను మిజి ఇనిక కిదెజ్ ఇజి మీరు కోరిజినిదెర్?", ఇజి వరిజ్ వెన్బాతాన్. 33 "ప్రబువా మా కణ్కు సూణి లెకెండ్ కిల", ఇజి వారు వెప్తాన్. 34 యేసు వరి ముస్కు కనికారం ఆతాండ్రె వరి కణకాజ్ ముట్టాన్. వెటనె వారు సుడెదెజ్ అట్టారి వన్ని వెట సాహార్.

ఓసన్న

21 1-2 వారు యెరూసలేము అందిని ముంజాల, ఒలివ మరెక్ మని గొరొన్ ముస్కు మని బెత్పాగె ఇని నాటొ వాతార్. వాతిజ్ యేసు వన్ని సిసూర్ రివెరిజ్ కూక్తాండ్రె ఈహు వెప్తాన్. "మీ ఎద్దు మని నాటొ సాండ్రు. అందితిజ సరి, తొప్తా మన్ని ఉండ్రీ గాడెదెజ్ని దనివెట మని గాడెదె పిలాదిజ్బా మీరు సూణిదెర్. వనకాజ్ కుత్తి నా డగ్గు పేరిజి తగాట్. 3 ఎయెర్బా మిజి ఇనికబా వెన్బాతిజ వనకాజ్ ప్రబుజ్ కావాలి ఇజి వన్నిజ్ వెప్తా. వెటనె వాండ్రు వనకాజ్ మీ వెట పోక్తార్."

† అయ కాలమ్దు ఉండ్రీ రోజు పణికిదెజ్ కూలి ఉండ్రీ దినారం మహాద్.

45 "ఇదిలోన్ గాడేదె ముస్సు, ఎక్కి, సార్లిదాన్ నీ రాజా వాజినాన్. గాడేదె పిల్ల ఆతి ఇజిరి గాడేదె ముస్సు, ఎక్తాండ్రె, నీ డగ్రు వాజినాన్ ఇజి సీయోను గాల్పి † ఆతి దనిజ్ వెప్టూ", ఇజి దేవుణు ప్రవక్తవెట †† దేవుణు ముజాల వర్గితి మాటెజ్ పూర్తి ఆదెజ్ యాకెజ్ జర్గితె. 6 యేసు వరిజ్ వెప్టూ వజనె సిసూర్ సాహారె కిత్తార్. 7 వారు గాడేదెని దని పిలదిజ్ తత్తార్. వన్యాజ్ ముస్సు, వరి సాల్వెజ్ వప్టిజ్, యేసు దని ముస్సు, బస్తాన్. 8 నండొండార్ వరి సాల్వెజ్ సరి అందు వప్టార్. మరి నండొండార్ మరెకాణి కొమెజ్ కత్తి సరి అందు వప్టార్. 9 మంద లోకుర్ వన్ని ముందాల సాన్ని మహికార్, వన్ని వెనుక వాజి మహికార్, "దావీదు మరిసిజ్ ఓసన్న †! ప్రబు సీత్తి ఆతికారమ్దాన్ వాజినకాన్ పాగ్డె: ఆనికాన్ వరలోకామ్దు దేవుణుదిజ్ ఓసన", ఇజి వారు డేల్పి మహార్. 10 యేసు యెరూసలేం పట్టమ్దు వాతిజ్, లోకుర్ విజెరె "వాండ్రు ఎయెన్?", ఇజి బమ్మ ఆతారె ఒరెన్ మరి ఒరెన్ వెట వర్గిజి మహార్. 11 "పీండ్రు గలీలయదు మన్ని నజరేతు ఇని నాటోణి ప్రవక్త ఆతి యేసు", ఇజి వన్ని వెట మహి అయ మంద లోకుర్ వెప్టార్.

యేసు దేవుణు గుడిడు సాన్నినాన్.

12 యేసు దేవుణు గుడి: లోఇ సాహండ్రె, అబ్బె గుడి: అర్జుదు మహి కొణి వరిజ్ పార్పి వరిజ్ విజేరిజ్ వెల్లి పోక్తాన్. డబ్బు మారిసిని వరి బల్లెజ్ని పావుర పాటిజ్ పార్పివరి పీటెజ్ మహ్త విసీర్తాన్. 13 వాండ్రు వరిజ్, "నా ఇలు పార్దనం కిని ఇలు ఇజి కూకె ఆనాద్లె, †† ఇజి దేవుణు మాటదు రాస్త మనాద్ గాని మీరు దనిజ్ డొజారిజ సాలం †† లెకెండ్ కితి మనిదెర్", ఇజి వెప్టాన్. 14 గుడ్డిదికార్, సాటాదికార్ దేవుణు గుడిడు వన్ని డగ్రు వాతిజ్ వాండ్రు వరిజ్ నెగెండ్ కిత్తాన్. 15 గాని వాండ్రు కితి బమ్మూతి వణిజ సుడే:జి, దేవుణు గుడి: అరజుదు మని కొడో:ర్, "దావీదు మరిసిజ్ ఓసన్న", ఇజి డేల్పినిక విహారె, పెరి పుజెరిజుని, యూదురి రూలుజ్ నెస్పిన్కార్ నండొ కొవం ఆతారె. 16 వారు వన్నిజ్, "యా కొడో:ర్వెస్పినిక ఇనిక ఇజి నీను వెంజినిదా?", ఇజి వెన్బాతారె. యేసు వరిజ్, "ఓ వెంజిని, కొడో:ర్ని ఇజిరి కొడో:ర్ని వెయుదాన్ నీను పాగ్డి:జిని మాటెజ్ తయార్ కితి మన్ని" ††† ఇజి దేవుణు మాటదు రాస్త మనిక మీరు ఎనిజ్బా సద్విఇతిదెరా?", ఇజి వెప్టాన్. 17 వాండ్రు వరిజ్డి:సి పట్టమ్దాన్ వెల్లి సాహండ్రె బెతానియ ఇని నాటో సాన్ని అయ రయ్యు అబ్బె మహాన్.

బొడెమరాన్ వప్పినాద్

18 పెందల వాండ్రు మరేజి పట్టమ్దు సాన్ని మహిజ్ వన్నిజ్ బజ కట్టాద్. 19 సరి పడెకారు మని ఉండ్రె బొడెమరాన్ సుడే:జి, మరాన్ డగ్రు వాతండ్రె సుడే:తిజ్ ఆకుజ్ తప్ప మరి ఇనికెజ్ తోర్ఉతె. వాండ్రు దనిజ్ సుడే:జి, "మరి ఎనిజ్బా నీను కాయెజ్ అస్ఇలె", ఇజి వెప్టాన్. వెటనె బొడెమరాన్ వహ్తా సాహాద్. 20 సిసూర్ అక్క సుడే:తారె బమ్మూ ఆతారె, "నిస్సా బేగి బొడెమరాన్ ఎలాగ వహ్తా సాహాద్?", ఇజి వారు వర్గితార్. 21 యేసు వరిజ్, "నాను మిజి నిజం వెస్సిన, మిజి నమకం మంజి, మీ లోఇ అనుమానం సిల్లెండ మహిజ, యా బొడెమరాన్దిజ్ కితికదె ఆవండ, యా గొరోతిజ్ సుడే:జి", నీను ఇబ్బెణిజ్ పెరి ఆజి నమ్దారమ్దు సాన్ని అర్ల" ఇజి వెహ్తె అయవజనె జర్గినాద్లె. 22 మిజి నమకం మహిజ మీరు పార్దనం కిజి ఇనిక లొస్పిదెర్, అయాక మిజి దోహ్కాద్లె", ఇజి వెప్టాన్. 23 యేసు దేవుణు గుడిడు సాహండ్రె గుడి: అర్జుదు బోదకిజి మహివలె, పెరి పుజెరిజుని లోకుర్ పెద్దెల్జ వన్ని డగ్రు వాతారె, "ఇని అతికారమ్దాన్ నీను యా పణిజ్ కిజిని? ఎయెర్ నిజి యా అతికారం సిత మనార్?", ఇజి వన్నిజ్ వన్బాతారె.

24 యేసు వరిజ్, "నానుబా మిజి ఉండ్రె మాట వెన్బాన. అయాక మీరు నజి వెహ్తె ఇని అతికారమ్దాన్ నాను యా పణిజ్ కిజిని ఇజి నానుబా మిజి వెహ్తె. 25 బాప్తినం సీని యోహనుజ్, బాప్తినం సీదెజ్ మని అతికారం ఎంబెణిజ్ వాతాద్ దేవుణుబాణిజ్నా, సిల్లిజ లోకుర్ బాణిజ్నా?", ఇజి యేసు వరిజ్ వెన్బాతాన్. "దేవుణుబాణిజ్ వాతాద్" ఇజి మాటు వెహ్తె, మరి ఎందానిజ్ మీరు వన్నిజ్ నమ్మిఇతిదెర్? ఇజి మిజి వెన్బానాన్. 26 గాని, యోహను ఒరెన్ దేవుణు ప్రవక్త ఇజి లోకుర్ విజెరె నమిజినార్. అందెజె లోకుర్ బాణిజ్ వాతాద్" ఇజి వెహ్తె మిజి తియిలెనె, ఇజి వరి లోఇ వారె వర్గితార్. 27 అందెజె వారు, "మిజి తెలివద్", ఇజి యేసుజ్ మరేజి వెప్టార్. నస్తివలె వాండ్రు, "ఇని అతికారమ్దాన్ యా పణిజ్ కిజిని ఇజి నానుబా మిజి వెహ్తె", ఇజి వరిజ్ వెప్టాన్.

రిఎర్ మరిసిర్ కత

28 "దిన్నివందిజ్ మీరు ఇనిక ఒడే:బిజినిదెర్? ఒరెన్వన్నిజ్ రిఎర్ మరిసిర్ మహార్. వాండ్రు పెరివన్ని డగ్రు సాహండ్రె, "మరిన్, నేండ్రు నీను ద్రాక్స టోటాదు సాన్ని పణి కితి", ఇజి వెప్టాన్. 29 వాండ్రు, "నాను సాన్ఎ, ఇజి మరేజి వెప్టాన్. గాని వెనుక మన్ను మారిస్తాండ్రె సాహాన్. 30 నస్తివలె అప్పాసి, కొగ్గిమరిని డగ్రు సాహండ్రె అయా వజనె వెప్టాన్. వాండ్రు, ఒబా, నాను సాన్", ఇజి వెప్టాన్ గాని సాన్ఎతాన్. 31 "యా రిఎర్ మరిసిర్ లోఇ అప్పాసి వెహ్తె వజ కితికాన్ ఎయెన్?", ఇజి యేసు వరిజ్ వెన్బాతాన్. వారు, "పెరికాండ్రె", ఇజి వెప్టాన్. యేసు వరిజ్ "పన్ను పెరినకారని సానిదికెజ్ మిజి ఇంక ముజాల దేవుణు కిని ఏలుబడిడు సానారె ఇజి నాను మిజి నిజం వెస్సిన. 32 ఎందనిజ్ ఇహిజ యోహను వాతాండ్రె, సీతి నిజాయిద్దాన్ బత్తిదెజ్ ఇజి మిజి సరి తోరిస్తాన్ గాని మీరు వన్నిజ్ నమిఇతిదెర్. పన్ను పెరికారని సానిదికెజ్ వన్నిజ్ నమ్మితార్. అయాకెజ్ సుడే:తిజ్బా మీరు మన్ను మరిసి మీరు కితి తప్పజ్ ఒప్పకొడి:జి డి:సి సీజి వన్నిజ్ నమిఇతిదెర్", ఇజి వెప్టాన్.

పాలి సితి టోట కత

33 "మరి ఉండ్రె కత విండ్రు. బూమి మనికాన్ ఒరెన్ ఉండ్రె ద్రానటోట ఉణుస్తాన్. దని సుటులం కోట తోహ్తాన్. ద్రాక్స పట్టు, రసం లాగ్దెజ్ ఉండ్రె గానుగు తయార్ కిబిస్తాన్. కాపికిదెజ్ ఉండ్రె ఎత్తుమని ఇలుబా తయార్ కిత్తాన్. వెనుక అయ ద్రాక్స టోట సెగొండార్ రయ్తురిజ్ పాలిదిజ్ సితాండ్రె వయనం కిజి మరి ఉండ్రె దేనుం సాహాన్. 34 పట్టు వండ్రె కాలమ్దు వన్ని వంతుజ్ లొస్పెజ్ ఇజి వన్ని పణి మన్నిరిజ్ పాలి అస్తి మని వరి డగ్రు పోక్తాన్. 35 పాలి అస్తిమనికార్ వన్ని పణి మన్నిరిజ్ అస్తారె ఒరెన్ వన్నిజ్ డెయ్తారె, ఒరెన్ వన్నిజ్ నస్తారె, మరి ఒరెన్ వన్నిజ్ వణకాణిజ్ డెయ్తారె. 36 మరి, వాండ్రు ముజాల పోక్తివరిజ్ ఇంక నండొండార్

† యెరుసలేం పట్టమ్దిజ్ సీయోను పట్టం ఇజిబా పేరు మహాద్ ఎందానిజ్ ఇహిజ అయ పట్టం సీయోను గొరొన్ ముస్సు, తోహ్తె మహాద్. అమదెజె సీయోను గాల్పి ఇజి వెహ్తెవలె యెరుసలేం పట్టమ్ది వరిజ్ గుర్తు కిజి వెహ్తెమహార్ వారు ఇహిజ ఇస్రాయేలు లోకుర్ గుర్తు. †† 21:4-5 జేకెర్ 9:9. † అరామయ బాసాదు ఓసన్న ఇని మాటదిజ్ మజి వీలు రక్తీనల ఇజి అర్దం మనాద్. గాని లోకుర్ పాగ్డి:జె మరి ఎయెన్బా పెరికాన్ వానివలె వరిజ్ కూక్కి ఒనిలెకెండ్బా వెహ్తెమహార్. †† 21:13 యెసయ 56:7. ††† 21:13 యిర్మీయా 7:11. †††† 21:16 కీర్తన 8:2.

పణిమస్సిరిజ్ ఫాక్టాన్. వరిజ్ బా పాలి అస్తిమనికార్ అయాపజనె కితార్. 37 "నా మరినిజ్ ఫాక్టిజ్ వన్నిజ్ వారు గవరం సీనార్ లో", ఇజి వెహ్తాండ్రె కడెవెరిదు వన్ని మరినిజ్ వరి డగ్రు ఫాక్టాన్. 38-39 గాని పాలి అస్తిమనికార్ మరినిజ్ సుడెతారె, "పిండ్రు యా తోటాదిజ్ అకు మనికాన్, రదు, మాటు వినిజ్ నప్పి యా టోట మా సాంతదిక కిసాట్", ఇజి వన్నిజ్ అసి ద్రాక్కు తోటదిజ్ వెల్లి విసీరెతారె వన్నిజ్ సప్తార్. 40 అందెజె అయా ద్రాస టోట ఎజుమాని వానివలె అయ పాలి అస్తిమనివరిజ్ ఇనిక కిసాన్? ఇజి వెన్ బతాన్. 41 "అయా సెఇవరిజ్ నండో కటిసమతి సాపుదాన్ సప్తాన్. మరి పట్టు పండ్లి కాలమ్దు వన్నిజ్ సరియాతి వందుజ్ సీని రెయ్యురిజ్ ద్రాస టోట పాలిదిజ్ సీనాన్", ఇజి వారు వెహ్తార్.

42 యేసు వరిజ్, "ఇలు తోప్పికార్ నెక్తి ఫాక్టి పణుకునె, మూలాదిజ్ బుర్ర పణుకు ఆత మనాద్. యాక దేవుణు కీదాన్ జగ్గితిక. యాక మా కణకెజ బమ్మాతిక', ఇజి దేవుణు మాటదు రాస్తి మనిక మీరు ఎసెజ్ బా సద్విఇతిదెరా?".

43 అందెజె దేవుణు ఏలుబడి: కినిక మీ నడిమిహన్ లాగ్గి దనిజ్ తగితి పట్టు సీని వరిజ్ సీనాన్", ఇజి నాను మిజి వెహ్తాన్. 44 ఎయెన్ బా యా పణుకు ముస్సు అర్దిజ్ వాండ్రు ముకెజ్ అనాన్. యా పణుకు ఎయెన్ ముస్సు అరీనాదో వాండ్రు గుండ అనాన్", ఇజి యేసు కత వెహ్తి వీజితాన్. 45 యేసు వెహ్తి కతెజ్ విహారె పెరి పుజెరిబుని వరిసయ్యెరు, వరి వందిజె వాండ్రు వెహ్తి మనాన్ ఇజి అర్దం కితార్. 46 వారు వన్నిజ్ కయదు కిడెజ్ ఉండ్లి ఉపాయ సుడెతారె గాని లోకుర్ విజెరె వన్నిజ్ ఒరెన్ ప్రవక్త ఇజి నమ్మితి వందిజ్ లోకురిజ్ తియెలాతార్.

పెండ్లివిందు

22 యేసు మరి కతవజ వరిజ్ వెహ్తాన్ 2 "దేవుణు కిని ఏలుబడి: ఇహిజ వన్ని మరిని పెండ్లిదిజ్ విందు తయార్ కితిమని ఒరెన్ రాజాజ్ ఫాలిత మనాద్.

3 పెండ్లి విందుదిజ్ రదు ఇజి ముజాల వెహ్తి మహివరిజ్ కుక్కి తగాట్ ఇజి వాండ్రు వన్ని పణిమస్సిరిజ్ వరి డగ్రు ఫాక్టాన్. గాని వాదెజ్ ఒవ్ ఏతార్.

4 నస్తివలె వాండ్రు మరి సెగొండార్ పణిమస్సిరిజ్ బా ఫాక్టాండ్రె, "పెండ్లి విందుదిజ్ రదు", ఇజి ముజాల వెహ్తి మహివరిజ్, "నాను కోడ్డెజ్, బలస్తి పడెజ్ ఒహ్ పిసి విజా తయార్ కిత మన. పెండ్లి విందుదిజ్ మీరు రదు ఇజి వరిజ్ వెహ్తాన్", ఇజి వరిజ్ వెహ్తాన్. 5 వారు పణిమస్సిరిజ్ వెహ్తి మాటదిజ్ కండెకీబా లన్యం కిపిండ, ఒరెన్ వన్ని మడిజెజ సాహాన్ మరి ఒరెన్ వన్ని బేరమ్దిజ్ సాహాన్. 6 మహికార్ వన్ని పణిమస్సిరిజ్ అస్తారె మర్యాద లాగ్గి సప్తార్. 7 అయ రాజా నండో కోపం ఆతాండ్రె వన్ని సయెనమ్దిజ్ ఫాక్టి వన్ని పణిమస్సిరిజ్ సస్తివరిజ్ కతిస్తాండ్రె, వరి పట్టుమ్దిజ్ సినుదాన్ ముటిస్తాన్. 8 వెనుక వాండ్రు పెండ్లి విందు తయార్ అత మనాద్, వన్ని పణి మస్సిరిజ్, "గాని ముజాల పెండ్లి విందుదిజ్ కుకెఆతి మహికార్ విందుదిజ్ వాదెజ్ తగ్గికార్ ఆవర్. 9 మీరు రస్త సహాకాజ్ సాన్ని మిజి తోరినివరిజ్ విజెరిజ్" విందుదిజ్ రదు' ఇజి కుక్కు", ఇజి వెహ్తాన్. 10 అయ పణిమస్సిరిజ్ రస్త సహాకాజ్ సాహారె వరిజ్ తోరితి నెగ్గివరిజ్, సెఇవరిజ్ కుడుప్పి, వరిజ్ తత్తెజ్ అట్టివరిజ్ విజెరిజ్ తత్తార్. పెండ్లి విందు సమ్దె నిండ్రితాద్. 11 నస్తివలె పెండ్లి విందుదిజ్ వాతివరిజ్ సుడెదెజ్ రాజా వాతాన్. పెండ్లిసాక్కు తొడుగిపిండ పెండ్లి విందుదిజ్ అబ్బె బస్తిమని ఒరెన్ వన్నిజ్ సుడెతాన్. 12 రాజా వన్నిజ్, "ఓ, కులాయెన్, పెండ్లిసాక్కు తొడుగిపిండ నీను ఎలాగ లొఇ వాతి?", ఇజి వెన్ బాతాన్. వాండ్రు వరిపిండ అలేత మహాన్.

13 నస్తివలె రాజా, "వినిజ్ కిక్కుకాల్కు తొప్పి వెల్లి దూరమ మన్ని సీకటి బాడిదు విసీర్దు. అబ్బె వాండ్రు ఎలాకాలం అడెబాజి, పల్కు కొహ్ క్షిక మంజినాన్", ఇజి వన్ని పణి మస్సిరిజ్ వెహ్తాన్. 14 "కుకె ఆతికార్ నండొండార్ గాని, ఎగ్గె ఆతికార్ కొండారె."

కయిసరిజ్ పను సీని వందిజ్

15 నస్తివలె వరిసయ్యెరు వెల్లి సాన్ని వాండ్రువర్గిని మాటదాన్ యేసుజ్ తప్ప అస్సెజ్ ఇజి కుట్ట ఆజి మహార్. 16 వారు వరి సిసూరిజ్, హీరోదియరు † జటుదివరివెట యేసు డగ్రు ఫాక్టార్. వారు సాన్ని, "బోద కినిక, నీను, మస్సు కద్దిపిండ దేవుణు సరివందిజ్ నిజమ్దాన్ బోదిసిని నెగ్గికి ఇజి మాపు నెస్సాప్. నీను లోకురి ఎలాగ మర్తికార్ ఇజి మొకొం సుడెజి వరిజ్ సర్ద కిబిస్సెజ్ ఇజి వర్గినికె ఆఇ. 17 అహిజ కయెసరుజ్ పను సీనిక నాయమా? నీను ఇనిక ఒడెబిజిని? మిజి వెహ్తా", ఇజి వన్నిజ్ వెహ్తార్. 18 యేసు వరి సెఇ బుద్దిజ్ నెస్తాండ్రె, "వేసం కినికీదెరా! ఎందనిజ్ నాను వహ్తి మాటదాన్ నజి అస్సెజ్ సుడెజినిదెరా? 19 పన్ను సీని ఉండ్లి కాసు నజి తోరిస్తు", వారు ఉండ్లి దినారం వన్ని డగ్రు తతార్. 20 "దిని ముస్సు మని బొమ్మ ఎయెర్ది? రాస్తిమని రాంత ఎయెర్ది?", ఇజి వాండ్రు వరిజ్, వెన్ బాతాన్. 21 వారు, "కయిసరుది", ఇజి వెహ్తార్. నస్తివలె వాండ్రు, "కయిసరుది కయెసరుజ్ సీదు, దేవుణుది దేవుణుదిజ్ సీదు", ఇజి వరిజ్ వెహ్తాన్. 22 యా మాట వెంజి బమ్మ ఆతారె వారు వన్నిజ్ డి:స్త సాహార్.

23 సాతికార్ మర్జి నిజ్నిక సిల్లెద్ ఇజి సదుకయ్యెరు వెహ్తాన్. వారు అయా రోజుదునె వన్నిడగ్రు వాజి ఈహు వెన్ బాతార్. 24 "బోదకినిక, ఒరెన్ కొడెఱ్ సిల్లెండ సాతిజ వన్ని తంబెరి సాతివన్ని ఆల్సిజ్ పెండ్లి ఆజి సాతివన్ని వందిజ్ కొడెఱ్ పుటిస్సెజ్ వలె ఇజి మోసి రాస్తి సీతి రూలుదు మనాద్. 25 మా నడిమి ఏడు గురు తంబేరెజు మహార్. పెరికాన్ పెండ్లి ఆతాండ్రె సాతాన్. వన్నిజ్ కొడెఱ్ సిల్లెర్ కక వన్ని తంబెరి సాతివన్ని ఆల్సిజ్ ఇడె: ఆతాన్. 26 నడిమి వాండ్రుని కొగ్గి నడిమి, అయా లెకెండెన్ వీన్ కొడెఱ్ దాక విజెరె దనిజ్ పెండ్లి ఆజి సాతార్. 27 కడెవేరిదు అయా బోదెల్ బా సాతాద్. 28 అహిజ సాతి వరిబాణిజ్ మర్జి నిజ్ని వెలె యా ఏడుగురు లొఇ ఎయెరిజ్ అది ఆల్సి ఆనార్ లె? ఇనిక ఇహిజ బత్తిజిమహివలె అది ఏడుగురుదిజ్ బా ఆల్సి ఆత మహాద్ గదె?", ఇజి వెన్ బాతార్.

29 యేసు వరిజ్, "దేవుణు మాట ఇజి, మీరు నెస్ ఇదెర్ దేవుణు సత్తు ఎస్సా ఇజి మీరు నెస్ ఇదెర్ అందెజె అర్దం కిపిండ మీరు నండో తప్పమాటెజ్ వెహ్తానిదెర్. 30 ఎందనిజ్ ఇహిజ, సాతి విరబాణిజ్ మర్జి నిజ్ని వెలె ఎయెర్ బా పెండ్లి ఆవర్, పెండ్లిదిజ్ సివర్. వారు పరలోకామ్ది దేవుణుదూతెజ్ లెకెండె మంజినార్. 31-32 సాతికార్ మర్జి నిజ్ని వందిజ్ దేవుణు మిజి వెహ్తి మనిక మీరు ఎసెజ్ బా సద్విఇతిదెరా? నాను అబ్రాహాము దేవుణు, ఇస్సాకు దేవుణు, యాకోబురి దేవుణు ఇజి వాండ్రు సాతి వరి దేవుణు ఆవర్, బత్తిజిని వరి దేవుణునె" ††, ఇజి వెహ్తాన్. 33 అయ మాట విహారె వన్ని బోద వందిజ్ లోకుర్ బమ్మ ఆతార్.

† హీరోదియరు జటుదికార్ రోమదికార్ యూదురు ముస్సు కిని ఏలుబడి:దిజ్ ఇస్టం కిత్తి యూదురు ఆతికార్. వరిసయ్యెరిజ్ హీరోదియరిజ్ ఇని సాత్తు సిల్లెద్. గాని లోకుర్ యెనుప్రబజ్ ఇస్టమానిదన్నిజ్ తియెలాజి మహార్. †† 22:31-32 నిగ్రమ 3:6.

పెరి ఆడ్ర

34 యేసు సదుకయరు వెయ్కు మూక్తాన్ ఇజి విహార పరిసయరు కూడఁజి వాతార్. 35-36 పరి లొఇ ఒరెన్ దేవుణు రూలుజ్ నెగెండ్ నెస్సికాన్, “ఓ బోదకినికి దేవుణు సీతి ఆడ్రెజి లొఇ పెరి ఆడ్ర ఇనిక?” ఇజి వన్నిజ్ పరీక్కు కిదెజ్ వెన్బాతాన్. 37 యేసు వన్నిజ్, “నీ పూర్తి మన్నుదాన్, నీ పూర్తి ఆత్మదాన్, నీ పూర్తి పాణమదాన్ నీ ప్రబు ఆతి దేవుణుదిజ్ ప్రేమిస్తెజ్. †38 యాకాదె గొప్ప ముక్కెలమతికని, మరి మొదోహి ఆడ్ర. 39 రుండి ఆడ్ర ఇనిక ఇహిజ, “నీను నిజి ప్రేమిన్ని లెకెండ్ మహి వరిజ్బా ప్రేమిన్. †40 దేవుణు సీతి రూలుజ్ని ప్రవక్తరు వర్గితి మాటెజి పునాది ఆతిక యా రుండి ఆడ్రెజ్”, ఇజి వరిజ్ వెహ్. 41-42 పరిసయరు కూడితి మనివెలె యేసు వరిజ్ సుడఁజి, క్రీస్తు వందిజ్ మీరు ఇనిక ఒడఁబిజినిదెర్? వాండ్రు ఎయెర్ది కుటుమ్దికాన్ ఆనాన్? ఇజి వెన్బాతాన్. “వాండ్రు దావీదు రాజు తెగ్గదికాండ్ర”, ఇజి వారు వెహ్.

43-44 అయాలెకెండ్ మహిజ మీరు నిజం వెహ్నినిదెర్. “నాను నీ పగాతి వరిజ్ నీ పాదమ్క అడిఁగి ఇడ్డిదాక నీను నా ఉణెర్ పడఁకాదు బసి మన్. ఇజి ప్రబు నా ప్రబు వెట వెహ్. † యా లెకెండ్ దేవుణు ఆత్మదాన్ దావీదు వర్గితివలె వన్నిజ్ ఎలాగ ప్రబు ఇజి కూక్కినాన్? 45 దావీదు వన్నిజ్ ప్రబు ఇజి కూక్కిజ్, వాండ్రు ఎలాగ వన్ని మరిసి ఆనాన్?”, ఇజి వాండ్రు వరిజ్ వెన్బాతాన్. 46 ఎయెర్బా మర్జి ఉండ్రీ మాటబా వెహ్జె అట్వతార్. అయా రోజుదాన్ వన్నిజ్ ఇనికబా వెన్బాదెజ్ ఎయెర్జెబా దయరం సాల్వతాద్.

ఏడు కష్టమ్కు

23 నస్తవలె యేసు లోకురిజ్ని వన్ని సిసూర్జిజి ఈహు వెహ్. 2 యూదురి రూలుజ్ నెస్సిన్సికాని పరిసయరుజ్, ముండాల మోసెజ్ మహి లెకెండ్ అతికారమ్దాన్ దేవుణు సీతి రూలుజ్ నెస్సిస్తెజ్ అక్కు మనికార్. 3 అందెజి వారు మిజి వెహ్ని విజా వసకాజ్ లొజిజి అయాలెకెండ్ కిదెజ్వెలె. గాని పరి పణిజి సుడఁజి, పరి లెకెండ్ కిమాట్. ఎందనిజ్ ఇహిజ వారు వెహ్గర్ గాని అయ లెకెండ్ కిపర్. 4 లోకుర్ గుజమ్దు పిండెదెజ్ అట్వ నని బరుజ్ తొహ్ని ఇడ్డి లెకెండ్ మని పెరి పణిజ్ కిదెజ్ ఇజి బలవంతం కినార్ గాని ఉండ్రీ డెస్సందాన్ కద్దిస్తెజ్ అట్టి సుల్కాని బరు లెకెండ్మన్ని ఇజిరి సాయమ్బా వారు కిపర్. 5 లోకుర్నూజి వందిజి వారు విజా పణిజ్ కిజినార్. దేవుణు మాటెజ్రాస్తి ఇట్టి ఇజిరి పెట్టెదిజ్ †1 పెరిక కిజినార్. మరి పరి సాకెజాణి †2 అన్నుజ్ పెరికెజ్ కిజినార్. 6 విందుదు వారు ముకెలమాతి బాడిఁజ్ కోరిజినార్. యూదురు మీటిజ్ కిని ఇల్కాజ్ బస్తెజ్ ఇజి వారు ముకెలమాతి బాడిఁజ్ కోరిజినార్. 7 సతెజి నడిఁమి వారు లోకుర్ వెట మాడిఁసె ఆదెజ్, బోదకినికార్ ఇజి కూకె ఆదెజ్ కోరిజినార్.

8 గాని మీరు ఇహిజ, ‘బోదకినికి’ ఇజి కూకె ఆమాట్. ఎందనిజ్ ఇహిజ దేవుణు ఒరెండ్రె మి బోదకినికాన్ మీరు విజిదెరె అన్నతంబేర్జు. 9 బూమి మున్ను, ఎయెర్జెబా బుబ్బు ఇజి పేరు ఇడఁమాట్. దేవుణు ఒరెండ్రె మీ బుబ్బు. వాండ్రు పరలొకామ్దు మనాన్. 10 మీరు ఎయిదెర్బా నెస్సిన్సికి ఇజి కూకె ఆమాట్. ఎందనిజ్ ఇహిజ క్రీస్తు ఒరెండ్రె మిజినెస్సిన్సికాన్. 11 మీ లొఇ విజెరిజ్ ఇంక పెరికాన్, విజెరిజ్ పణిమన్ని ఆదెజ్వెలె. 12 ఎయెర్బా వన్నిజ్ వాండ్రె పెరికాన్ కితిజి వాండ్రు ఇజిరికాన్ ఆనాన్. ఎయెర్బా వన్నిజ్ వాండ్రె తగె ఆతి మహిజి వాండ్రు పెరికాన్ ఆనాన్. 13 వేసం కినికిదెరాతి పరిసయరుజ్ని ఊదురు రూలుజ్ నెస్సిసినికిదెరా! అబయా, మిజి ఎసానొ కష్టమ్కు వానె. ఎందనిజ్ ఇహిజ లోకుర్ దేవుణు ఏలుబడిదు సాన్ఎండ పరి ఎద్రు సిస్టెజ్ కెహ్ని పాక్కినిదెర్. మీరె సాన్ఇతిదెర్. సాండ్రెజ్ సుడఁజి మహి వరిజ్ సరి సిఇతిదెర్. 14 వేసం కినికిదెరాతి పరిసయరుజ్ని యూదురు రూలుజ్ నెస్సిసినికిదెరా, అబయా, మిజి ఎసానొ కష్టమ్కు వానె. మీరు సిగు సిల్లెండ రాండి బోదెకాజ్ మొసెం కిజి మిజి లాబం తప్పిసినిదెర్ మీరు ఎలాగమర్తికార్ ఇజి నస్తెజ్ ఆవద్ ఇజి మీరు లోకుర్ ఎద్రు లావ్ సీరిండ్ మన్ని పార్దనం కిజినిదెర్. దన్నివందిజ్ మిజి పెరి సిక్కు వానాద్దె.

15 వేసం కినికిదెరాతి పరిసయరుజ్ని యూదురి రూలుజ్ నెస్సిసినికిదెరా, అబయా! మిజి ఎసానొ కష్టమ్కు వానె. ఒరెన్ వన్నిజ్ మీవెట కుడుఁప్తెజ్ మీరు నమ్దరం డాట్టి బూమి విజా బాలాజినిదెర్. ఒరెన్ మీ వెట కూడిఁతిజి, వన్నిజ్ ఎల్లకాలం సిను మంజిని బాడిఁదు సాండ్రెజ్, మిజి ఇంక రుండి వంతుజ్ తగ్గి ననికాన్ తయార్ కిజినిదెర్.

16 యూదురు రూలుజ్ నెస్సినికెదెర్ ఆతి మీరు లోకురిజ్ నెగ్గసరి తోరిస్తెజ్ మన్నికిదెర్, గాని మీరు మహివరిజ్ సరి తోరిసిని గుడ్డిదికార్ లెకెండ్ మన్నిదెర్ అబయా! మిజి ఎసానొ కష్టమ్కు వానె. ఒరెన్ దేవుణు గుడిఁ తోడుఁ ఇజి వర్వణం కితిజి, అయ వర్వణమ్దాన్ వాండ్రు తప్ప ఆదెజ్ ఆనాద్. గాని దేవుణు గుడిఁ లొఇ మని బజారం తోడుఁ ఇజి ప్రమాణం కితిజి వాండ్రు అయ ఒప్పమానమ్దాన్ తప్ప ఆదెజ్ అట్వన్ ఇజి మీరు నెస్సిసినిదెర్. 17 గుడ్డియాతి బుద్ది సీతికిదెరా! ఎమేణిక పెరిక? దేవుణు గుడిఁదు మని బజారమ్నా, సీటిజి బజారమ్దిజ్ దేవుణు వందిజ్ కేట కిత్తక ఇజి కిజిని దేవుణుగుడిఁనా? 18 మరి ఎయెర్బా సంద సుర్ని మాలి పీట తోడుఁ ఇజి ప్రమాణం కితిజి, వాండ్రు అయ ప్రమాణమ్దాన్ తప్ప ఆదెజ్ అట్వాన్. గాని దని మున్ను మని పూజి సీతి వసకాజ్ తోడు అసి ప్రమాణం కితిజి వాండ్రు అయ ప్రమాణమ్దాన్ తప్ప ఆదెజ్ అట్వన్ ఇజి మీరు నెస్సిసినిదెర్. 19 యూదురు రూలుజ్ నెస్సిసిని గుడ్డిదికార్ లెకెండ్ మన్నికిదెరా! ఎమేణిక పెరిక? పూజి సీతికాదా? సీటిజి పూజి సీతిదన్నిజ్ దేవుణు వందిజ్ కేట కిత్తిలెకెండ్ కిజిని సంత సుర్ని మాలి పీటనా? 20 అందెజి సంత సుర్ని మాలి పీట తోడుఁ అసి ప్రమాణం కినికాన్ సంద సుర్ని మాలి పీటదిజ్ మరి దని మున్ను మన్ని విజా వసకాజ్ తోడు అసి ప్రమాణం కిజినాన్. 21 మరి దేవుణు గుడిఁ తోడు అసి ప్రమాణం కినికాన్, దేవుణు గుడిఁదిజ్ని దని లొఇ మంజిని విజా వసకాజ్ని బాన్మంజిని దేవుణుదిజ్ తోడు అసి ప్రమాణం కిజినాన్. 22 పరలొకం తోడు ఇజి ప్రమాణం కినికాన్, దేవుణు బన్ని సింహాసనమ్దిజ్ని దని మున్ను బని మంజిని దేవుణుదిజ్బా తోడు అసి ప్రమాణం కిజినాన్.

† 22:37 ద్వితీ 6:5. †† 22:39 లేవీ 19:18. ‡ 22:43-44 కీర్తన 110:1. †† యా ఇజిరి పెట్టెజ్ తోలుదాన్ తయార్ కితిక్యెజ్ దన్ని లొఇ వడాయ్ ఒప్పమానమ్దు మన్ని సగం మాటెజ్ రాసి ఇడ్డి మంజినార్. నిర్గమ 13:1-10, 13:11-16. ద్వితీ 6:4-9, 11:13-21. దేవుణు మాటదు రాస్తి మన్నికెజ్ ద్వితీ 6:8, 11:18. యా లెకెండ్ లొజిజి మంజినాన్ ఇజి తోరిస్తెజ్ 12 వయస్సు డాట్టి మొగ్గకొడెర్ యాపెటె ఉండ్రీ పరి నొద్రుదుని మరి ఉండ్రీ పెటె డేబ్ర కియుదుబా తోహా ఆజి మహార్. ముకెలం పార్దనం కినివలె అహా కిజి మహార్. †† యూదురు అతికార్ దేవుణు పణికినికార్ ఇజి తోరెదెజ్, మరి దేవుణు సీతి ఆడ్రెజ్ ఎత్తు కిబిస్తెలెకెండ్ ఉండ్రీ సీతి రంగు సాల్వ నస్తెజ్ పార్వాజి మహార్. యాక పార్వాదెజ్ ఇజి వరిజ్ ఆడ్ర సీత్త మహాన్ సంక్య 15:37-41, ద్వితీ 22:12. గాని యూదురిజ్ రూలుజ్ నెస్సిసినికాని పరిసయరిజ్ వారు గొప్ప నెగెండ్ దేవుణుదిజ్ లొజిజినికార్ ఇజి తోరిస్తెజ్ అక్కెజ్ గొప్ప పెరిక పార్వాజి మహార్.

23 వేసం కినికిదెరాతి పరిసయరుజేని యూదురి రూలుజ్ నెస్పిస్సికిదెరా, అబయా మిజి ఎసానొ కష్టమ్కు వానె. మీరు పాదిన కుసాదాన్, సోపుదాన్, జిలకారదాన్ † దేవుణుడిజ్ దసమ్బాగం †† సీజినదెర్. గాని నాయం, కనికారం, దేవుణు ముస్సు, మని నమకం నన్ని దేవుణు సీత్తి రూలుదుమన్ని ముకలమతి మాటెజ్ మీరు నెక్కి పాక్కినిదెర్. రుండిబా ఉండ్రె లెకండ్ కిజి మంజినక ఇహిజ ఒదె నెగండ్ మహాద్ మరి. 24 సరి తోరిస్సి గుడ్డిదికిదెరా! ఊణిదని లొఇ డోమెజ్ అర్తి మహిజ మీరు జాలిస్సిదెర్. గాని ఒంటె ననికెజ్ అర్తిజ అక్క నెస్సెజ్ సిల్లెద్ ఇజి అయాలకండ్నె డిజేనికిదెర్ మీరె.

25 వేసం కిజినదెర్ అతి, యూదురి రూలుజ్ నెస్పిస్సికిదెరా, పరిసయరుజాండె, లోకుర్ ముస్సుహాన్ మిడిస్సి ఇడ్డిగిన్నెజ్ని కుడుకెజ్ లెకండ్ మన్నికిదెర్. మీరు మీరుబా వెల్లిహాన్ సుడిఃతిజ నెగ్గెవరిలెకండ్ తోరె ఆజినదెర్. గాని మీ మస్సు నిండ్రు సెఇ బుద్దిజ్ని సెఇఉదెసమ్కు, మరి నాను గణస్తికెజ్ విజా నజేనె ఇజి ఒడ్డిబిని వరిలెకండ్నె. 26 గుడ్డి అతి పరిసయ వాండ్రు ముజాల మీరు మస్సు నెగ్గెండ్ కిదు, అయాలెలె మీరు లొఇని వెల్లి మిడిస్సి మని కుడుకెజ్ని గినెజ్లెకండ్ అనిదెర్.

27 వేసం కినికిదెరాతి, యూదురి రూలుజ్ నెస్పిస్సికిదెరా, పరిసయరుజాండె, వెల్లిదాన్ సుడిఃతిజ మీరు గొప్ప సాకుమని సున్నం డెయ్తి మని దూకి ననికిదెరె! దూకి లొఇ సాతి పరి డుమ్ము, మరి విజా సెఇకెజ్ మన్నిలెకండ్ మీరుబా మన్నిదెర్. 28 అయాలెకండ్నె మీరు వెల్లి సుడిఃతిజ నాయం మనికిదెర్ ఇజి తోరె ఆజి నిదెర్. గాని లొఇ మీరు బక్తి మనికాన్ ఇజి పాజిజి నికిదెర్, సెఇ బుద్దిదాన్ నిండ్రితి మన్నికిదెర్.

29 వేసం కినికిదెరాతి యూదురి రూలుజ్ నెస్పిస్సికిదెరా, పరిసయరుజాండె, మిజి ఎసానొ కష్టమ్కు వానె. మీరు దేవుణు ప్రవక్తరు దూకిజ ముస్సు సమాది తొప్పి, సీతినిజాయి మన్ని పరి సమాది ముస్సు సాకు కిజినదెర్. 30 అనిగొగొర్ కాలమ్దు మాపు మంజినక ఇహిజ, వారు దేవుణు ప్రవక్తరిజ్ నస్తి మహివలె వరివెట మాపు కూడెఃతాప్ మరి ఇజి మీరు వెప్పి మంజినదెర్. 31 అందెజె దేవుణు ప్రవక్తరిజ్ నస్తి మహి వరి మరిసీర్ ఇజి మీ మాటదానె మిజి మీరె సాసెం వెహి ఆజినదెర్. 32 అందెజె మీ అనిగొగొర్ కితి పావమ్దు తకు మనిక మీరు పూర్తి కిదు.

33 సరాన్ ననికిదెరా! సరాస్సు కొడొఃనని మీరు ఎలాగ ఎలాకాలం సిసు మంజిని బాడ్డిదాన్ తప్ప అనిదెర్. 34 అందెజె నాను, ప్రవక్తరుజ్ని బుద్దిమని వరిజ్, బోద కిని వరిజ్ మీ నడిఃమి పాక్కిన. సెగొండారిజ్ మీరు నప్పిదెర్, మరి సెగొండారిజ్ మీరు సిలువ పాక్కిదెర్, మరి సెగొండారిజ్ యూదురు మీటిజ్ కిని ఇల్కాణిజ్ కొర్డెజిజిజ్ డెయ్జి ఉండ్రె పల్లమ్దాన్ మరి ఉండ్రె పల్లమ్దు ఉల్పిదెర్. 35 సీతి నిజాయి మనికాన్ అతి ఏబెలు నలదాన్ మొదోల్సి, దేవుణు గుడిఃదిజ్ని సంత సుర్ని మాటి పీటదిజ్ నడిఃమి మీరు నస్తి మహి బెరాకియ మరిసి అతి జెకరియదాక, సీతి నిజాయి మన్నికారాతి విజేరిజ్ నస్తిపరి నల బూమి కారిస్తి మన్ని వందిజ్ సిక్కు మీ ముస్సునె వానెలె. 36 యా సిక్కుజ్ విజా యా తరమ్ది పరి ముస్సునె వానె ఇజి నాను మిజి నిజం వెప్పిస.

37 ఓ యెరూసలేమా, యెరూసలేమా నీను ప్రవక్తరుజ్ నప్పికి, నీ డగ్రు పాక్తివరిజ్ పణకాణిజ్ డెయ్నికి, ఉండ్రె కొరు దని పిలెకాజ్ కుడుఃప్పి దని రెకెజె అడ్డి ఇడ్డి లెకండ్, నీ కొడొఃరిజ్ కుడుఃప్పెజ్ ఇజి నాను ఎసాడు సుట్టునో ఆస్సు అత మన్ను. గాని నిజి ఇస్టం సిల్లెండ మహాద్. 38 ఇదిలో దేవుణు వన్నిగుడిః డిఃసి సినాన్, అందెజె అక్క కాలి మంజినాద్. 39 ప్రబు సీత్తి అతికారమ్దాన్ అనికాన్" † ఇజి నీను వెప్పిదాక నజి నీను మరి సుడిఃఇ, ఇజి నాను నిజి నిజం వెప్పిస."

తరమ్దిజ్ ఆక్కరదిజ్ గుర్తు.

24 1-2 యేసు దేవుణు గుడిఃదాన్ సాతాండ్రె దూరం సాన్ని మహిజ్, సిసూర్ వన్ని డగ్రు వాతారె, దేవుణు గుడిః వందిజ్ కూక్కుసాప్పి గొప్పజ వర్తిజి మహోర్. వాండ్రు వరిజ్, "మీరు యాకెజ్ విజా సుడిఃతిదెర్. గాని ఇక్క ఉండ్రె పణకు ముస్సు, మరి ఉండ్రె పణకు నిల్పి మన్వండ ఆహి ఆనాద్లె, ఇజి నాను మిజి నిజం వెప్పిస", ఇజి వెప్పిస.

3 యేసు ఒలివ మరెక్ మని గొరొన్ముస్సు, బస్తి మహివలె, మరి ఎయెర్ డగ్రునిల్లెండ మహివలె, సిసూర్ వన్ని డగ్రు వాతారె, "యాకెజ్ ఎసిజ్ జగ్గెనె? నీను మర్జి వానిదనిజ్, మరి యా తరమ్దిజ్ ఆక్కరదిజ్ గుర్తుజ్ ఇనికెజ్? మిజి వెహిఅ", ఇజి వెనబాతారె. 4 యేసు వరిజ్ ఈహు వెప్తాన్. "ఎయెన్బా నిజి మోసెం కిపండ జాగ్గ్ర సుడిఃజి మండ్రు. 5 ఎందానిజ్ ఇహిజ నండొండార్ వాజి, నా పేరు ఇడెః ఆజి, "నానె క్రీస్తు" ఇజి వెప్పి నండొండారిజ్ మొసెం కినార్. 6 మీరు విదెమ్కు వందిజ్ వెనిదెరెలె. మరి విదెమ్కు వానెలె ఇజి సాటిస్సికబా వినిదెరెలె. అయాలెలె తియెల్ అపిండ మండ్రు. యాకెజ్ విజా జగ్గెదెజ్వెలె. గాని యాక ఆక్కర అపిద్. 7 లోకుర్ ముస్సు, లోకుర్ని దేసెమ్కాజ్ ముస్సు, దేసెమ్కు వగ ఆజి మంజిని. అబ్బె ఇబ్బె నండొ నాహ్కెజ్ కరు, బూమి కద్దినికెజ్ వానెలె. 8 యాకెజ్ విజా ఉండ్రె బోదెలి కిదు అస్సెజ్ ముజాల వాని నొప్పి మొదోల్సి లెకండ్. 9 నస్తివలె లోకుర్ మిజి అసి తొప్పి హిమ్మెజ్ కిజి సస్సెజ్ ఒపజెప్పారెలె. నా ముస్సు, నమకం ఇట్టి వందిజ్ లోకామ్దు మన్ని విజా జాతిదికార్ మిజి ఇస్టం కిపండ ఆనార్. 10 నండొండార్ పరి నమకం డిస్సి సీనారెలె. ఒరెన్ మరి ఒరెన్ వన్నిజ్ మొసెం కినాన్. ఒరెన్ మరి ఒరెన్ వన్నివెట పడిఃపండ ఆనాన్. 11 నండొండార్ డొజె ప్రవక్తరు వాజి తప్ప బోదెజ్ నెస్సిసి లోకుర్జె తప్ప సర్దు నడిఃపిసి, నండొండారిజ్ మొసెం కినార్. 12 దేసెమ్ది రూలుజ్ లొజిపిండ బత్తిజినికార్. ఆజినిజ్ లోకుర్ ప్రేమ సిల్లికార్ ఆనార్. మహివరిజ్ ప్రేమిస్సి ప్రేమ సిల్లెండొజి మంజినార్. 13 గాని ఆక్కరదాక కష్టమ్కు ఒరిసిని వన్నిజ్ దేవుణు రక్తిస్సారెలె. 14 దేవుణు ఏలుబడిః కిని వందిజ్ సువార్త బూమి ముస్సు, మని లోకాజ్ విజా ఉండ్రె సాక్సిం లెకండ్ వెహి అనాద్లె. నస్తివలె యా తరమ్దిజ్ ఆక్కర వానాద్.

15 ప్రవక్త అతి దానియెలువెట దేవుణు ముజాల వర్తితి మహి లెకండ్, "నానం కిని సెఇక ఆతిక" † దేవుణు గుడిఃదు నెగ్గి బాడిఃదు నిల్పి మంజినక సూణివెలె (యాక సద్వినికాన్ నెసి అర్దం కిదెజి) అయ గడిఃయ వానాద్లె. 16 నస్తివలె యూదయ దేసెమ్దు మంజినకార్ గొరొకాజ్ ఉహ్కెజ్ వలె. 17 మిదె ముస్సు మంజినకాన్ ఇండ్రెణిజ్ ఇనికబా వెల్లి ఒతెజ్ ఇజి డిగ్గెజ్ అపిద్. 18 మడిఃజ మంజినకాన్ వన్ని సాల్వెజ్ ఒత్తెజ్ ఇజి ఇండ్రె వాదెజ్ అపిద్. 19 అయ దినమ్కు కొడొఃరిజ్ పాలు ఉట్టిస్సి అయ్నికాజ్, పాటాదు మన్ని బోదెకాజ్ ఎస్సానొ కష్టమ్కు మన్నికెజె. 20-21 అయాలెజ్ ఉండ్రె పినికాలమ్దునో, రోమని దినమ్దునో రెపిండ అపిద్ ఇజి పార్దనం కిజి మండ్రు. ఎందానిజ్ ఇహిజ, లోకం మొదోల్సి బాణిజ్అసి ఏలుదాక రెఇ నని కష్టమ్కు వానె. అందెజె అయాలె కష్టమ్కాణిజ్ తప్ప ఆదెజ్ ఇజి మీరు ఉహ్కె సానిక ఉండ్రె పిన్నికాలమ్దునో, విన్రాంతిదినమ్దునో † అపిండ మండ్రెజ్ ఇజి పార్దనం కిజి మండ్రు. 22 అయాలె కష్టమ్కు మన్ని దినమ్కు తక్కు కిదెజ్ ఇజి దేవుణు ఒడ్డిబిపిండ మహిజ బూమి ముస్సు, మన్నకాన్ ఎయెన్బా తప్ప ఆదెజ్ అట్వన్. గాని దేవుణు ఎరెల్లిస్తి మన్ని పరి వందిజ్

† పాదిన, సాపు, జిలకార ఇక్కెజ్ విజా కరిదికెజ్ అఉ ఇక్క, తిండిదిజ్ రుసి కూడుఃజ్ ఇజి పంబ కినివలె కలస్సికెజ్. †† అబ్బహ్మునె తొలిత దసమ్బాగం సీత్తిలెకండ్ పడాఃయే ఒప్పమానమ్దు రాప్ప మనాద్. అది 14:20. వెనుక ఇనాయెలు లోకుర్ వరిజ్ దోహ్కె వనక లొఇ దసంబాగం సీదెజ్ ఇజి దేవుణు అడ్డి సీత్తాన్. దసంబాగం ఇహిజ పది లొఇ ఉండ్రె. ‡ 23:39 క్రీస్తు 118:26.

అయా దినమ్ కు తక్కు కిన్నాలె. 23 అయా కాలమ్ దు ఎయెన్ బా మిజి, "ఇదిలో క్రీస్తు ఇబ్బె మనాన్", సిల్లిజ, "వాండ్రు అబ్బె మనాన్" ఇజి వెహ్తిజ వరి మాటెజ్ అస్మాట్. 24 నస్తివలె డొజక్రీస్తుర్, డొజ ప్రవక్తరు వాజి నండ్ బమ్మాతి పణిజ్, ముజాల ఎనిజ్ బా తోఇ నని బమ్మాతి పణిజ్ కిజి, అట్టిజ దేవుణు ఎర్లిస్తి మన్నివరిజ్ బా మోసిం కిదెజ్ సూణార్. 25 జాగర్త మండ్రు! ఏలె అక్కెజ్ ఇనిక్కెబా జర్గినె ముజాలె నాను మిజి వెహ్త మన.

26 అందెజె ఎయెన్ బా, "ఇవిలోన్ వాండ్రు అబ్బె బిడిమ్ బూమిదు ప్రాంతమ్ దు మనాన్" ఇజి వెహ్తిజ్ బా మీరు సాన్మాట్. సిల్లిజ, "ఇవిలోన్ వాండ్రు ఇబ్బె గొనె మనాన్" ఇజి వెహ్తిజ్ బా నమ్మిమాట్. 27 ఎందానిజ్ ఇహిజ, మిర్గినెక ఎలాగ తూర్పుదాన్ పడమార దాక తోరె ఆజినాదో, అయలెకెండెనె లోకు మరిసి ఆతి నాను వానివలెబా మంజినాద్, 28 డేగెజ్ వానివలె పినుగుజ్ మంజినె ఇజి గుర్తు కిదెజ్ అట్టిలెకెండె యేసు వానిదన్నిజ్ బా టెబాజ్ తోర్గి గుర్తుజ్ మంజినె.

29 అయా కష్టమ్ కు మని దినమ్ కు వీజితివెటనె, "పాద్దు సీకటి ఆనాద్, నెల జాయ్ సిపద్, ఆగానమ్ దు మని సుక్కెజ్ రాల్తె. ఆగానమ్ దు మన్నిలావ్ రకమ్ ది సత్తు మన్నికెజ్ కద్గినె. 30 నస్తివలె లోకుమరిసి ఆతి నాను వానిదనిజ్ గుర్తు ఆగానమ్ దు తోర్నాద్. బూమి ముస్సు, మని నండ్ తెగ్గజాణికార్ గుండె కొత్తె ఆజి అడఃబనార్. నస్తివలె లోకుమరిసి ఆతి నాను గొప్ప సత్తుదాన్ దేవుణు జాయ్ దాన్ ఆగానమ్ దు మని మొసాపు ముస్సు, వానిక వారు సూణార్లె.

31 జోడుబంకెజ జాబుదాన్ నాను నా దూతెజ్ పాక్కు. వారు ఆగానమ్ దు యా కొసాదాన్ అయా కొసాదాక నాలగి దిక్కుజాణిజ్ దేవుణు ఎర్లిస్తి మన్ని వరిజ్ ఉండ్రెబాన్ కినార్.

32 ఇదిలో బొడె మరానిదెజ్ సుడఃజి యాక మీరు నెస్తు. బొడె మరాన్ ఆకు రాల్లి సిగ్రిస్తివెలె, ఎండ కాలం డగు ఆతాద్ ఇజి మీరు నెసినిదెర్. 33 అయలెకెండెనె మీరు యాకెజ్ విజా జర్గినెక సూణివెలె, నాను దారబంద్రమ్ దునె మన్న ఇజి మీరు నెస్తు. 34 యాకెజ్ జర్గినెదాక యా తరమ్ దికార్ తవ్విండ బత్తిజినె మంజినార్ ఇజి నాను మిజి నిజం వెహ్తినె. 35 ఆగానమ్ దు బూమిబా సిల్లెండ ఆనె, గాని నా మాటెజ్ ఎనిజ్ బా అయాలెకెండె సాన్ ఉ. 36 అయ దినం వందిజ్ అయ గడియ వందిజ్ ఎయెర్ బా నెన్ పర్. పరలోకామ్ దు మన్ని బుబ్బాతి దేవుణు అవిండ దేవుణు దూతార్ గాని మరిసిబా నెన్ పర్. 37 నోహుళు కాలమ్ దు ఎలాగ మనెనో, అయలెకెండెనె లోకుమరిసి ఆతి నాను వానికబా మంజినాద్. 38 గడ్డ నిండ్రెని ముజాల నోహుళు ఓడః లోఇ డుఃగితిమహి దినమ్ దాక లోకుర్ ఉణిజి, తింజి, పెండ్లి ఆజి, పెండ్లిదిజ్ సీజి మహార్ †. 39 బూమి విజా ముడిఃగ్గినె లెకెండె గడ్డ నిండ్రెని విజెరిజ్ పేర్గి ఒతిదాక, ఇనిక జర్గినాద్లె ఇజి వారు నెన్ పండ మహార్. అయా లెకెండెనె లోకుమరిసి ఆతి నాను వానివలెబా మంజినాద్. 40 రివెర్ మడిఃజ మంజినార్. ఒరెన్ వన్నిజ్ డిఃసి ఒరెన్ వన్నిజ్ కూక్కు ఒనాన్. 41 రుండి బోదెక్ ఉండ్రె జెత్త పణకుదు నూర్జి మంజినె. ఉండ్రె దనిజ్ డిఃసి ఉండ్రె దనిజ్ కూక్కు ఒనాన్.

42 ఎవేణి దినమ్ దు మీ ప్రబు వానాండ్రె ఇజి మిజి తెలిపద్. అందెజె మీరు జాగర్తదాన్ ఎద్దు సుడఃజి మండ్రు. 43 యాక మీరు అర్దం కిజి నెస్తు. ఎవేణి గడియాదు డొఃజారి వానాన్ ఇజి ఇండ్రెణి ఎజామాని నెస్తిజ, డొఃజారి ఇండ్రె డుఃగెదెజ్ సరి సివిండ తెలి మంజి సుణాన్. 44 మీరు నా వందిజ్ ఒడఃబిఇ గడియాదు, లోకు మరిసి ఆతి నాను వాన. అందెజె మీరు ఎస్తివలెబా తయార్ ఆజి మండ్రెజ్ వెలె.

45 బుద్దిమని నమిదెజ్ అట్టిమని పణిమన్ని ఎయెన్? ఇండ్రెణి వరిజ్ విజెరిజ్ నెగెన్ సుడఃజి సరి ఆతి వేలాదు, వరిజ్ సరి ఆతి బోజనం సిదెజ్ ఇజి ఇండ్రెణి ఎజామాని ఒపజెస్తి లెకెండె మన్నికాండ్రె బుద్ది మన్ని పణిమనిసి. 46 అయ ఎజామాని మర్జి వానివలె, వన్నిజ్ ఒపజెస్తి లెకెండె అయా పణిమన్ని కిజి మంజినెక ఇహిజ అయ ఎజామాని సుడఃతిజ అయ పణిమన్నిజ్ నెగెద్. 47 అయ ఎజామాని వన్నిజ్ కల్గితిమని విజా దనిజ్ సూణికాన్ లెకెండె అయ పణిమనిసి కిన్నాన్ ఇజి నాను మిజి నిజం వెహ్తినె. 48-49 "గాని అయ పణిమనిసి సెఇకాన్ ఆజి నా ఎజామాని వాదెజ్ నండ్ ఆలస్యం ఆనాద్", ఇజి అయ సెఇ పణిమన్ని వన్ని మన్నుదు ఆలోసనం కిజి వన్నివెట పణికిని వరిజ్ డెయ్ జి, మరి ఉణివరివెట కూడఃజి ఉణిజి తింజి మంజినాన్. 50 వాండ్రు తోఇ దినమ్ దు ఒడఃబిఇ గడియాదు వన్ని ఎజామాని వానాన్. 51 అయ ఎజామాని వన్నిజ్ కత్తి, బక్తి మనికాన్ ఇజి పాజిజిని వరివెట వరివందిజ్ తయార్ కిత్తిమన్ని బాడిఃదు పాక్నాన్. అబ్బె పల్కు కొహ్ క్షి, అడఃబాజి మంజినార్.

పదిమణిసి విడిః బోదెక్

25 మరి దేవుణు ఏలుబడిః కినిక ఇహిజ వరి నూనెజాణి దీవెజ్ అసి పెండ్లి దజడః వన్నిజ్ ఎద్దు సుడఃదెజ్ సాహిమహి పదిమన్ని విడ్డిః బోదెకాజ్ పాలిత మనాద్. 2 వినకాజ్ లోఇ అయ్ దుగురు బోదెక్ బుద్ది సిలికెజ్, అయ్ దుగురు బోదెక్ బుద్ది మనికెజ్. 3 అయ బుద్ది సిలికెజ్ వనక దీవెజ్ అస్తి గాని నూనెజ్ ఒడఃతె. 4 బుద్ది మనికెజ్ వనక దీవెజెవెట సీసిజ నూనెబా ఒతె. 5 పెండ్లి దజడఃయెన్ వాదెజ్ ఆలస్యం ఆతిజ్ అవిక విజా కొహ్ జి నిద్ర కిజి మహా. 6 వదరయ్తు, "ఇవిలోన్ పెండ్లి దజడఃయెన్, వన్నిజ్ ఎద్దు సుడఃదెజ్ వాతి బోదెకాండె వెల్లి రదు", ఇజి ఉండ్రె గగోలిదాన్ జాటు వాతాద్. 7 నస్తివలె బోదెక్ విజాండెక్ నిజ్ జి వన్యా నూనెజాణి దీవెజ్ సాడిఃతిజ్ ఎకిసి నెగండె కిత్తె. 8 గాని అయ బుద్ది సిలికెజ్, "మా దీవెజ్ నమ్ జి సాస్తినె. అందెజె మీ నూనె లోఇ కండెక్ మజిబా సిదాట్", ఇజి బుద్ది మని వనకాజ్ లొస్తి. 9 అయావలె బుద్దిమని బోదెజ్, "సిల్లె, సిల్లిజ మజిని మిజి సాల్ విండ ఆనాద్. అందెజె మీరు పార్నివరిబాన్ సాస్తి కొండు", ఇజి వెహ్తె. 10 అవి నూనె కొండెజ్ సాస్తి మహిజ్ పెండ్లి దజడః వాతాన్. నస్తివలె తయార్ ఆతి మనికెజ్ వన్నివెట పెండ్లి విందుదిజ్ లోఇ సాహా. దని వెనుక సేహాలెజ్ కహెవె ఆతె. 11 దన్ని వెనుక, మహి బుద్దిసిల్లి బోదెక్ వాజి, "బాబు, బాబు మజి సెహ్ రెల", ఇజి కూక్తె. 12 వాండ్రు వరిజ్, "నాను మిజి నిజం వెహ్తినె, నాను మిజి నెన్ ప", ఇజి వెహ్తెన్. 13 నాను వాజిని రోజా గాని అయ గడిఃయబా మీరు నెన్ ఇతిదెర్, అందెజె మీరు తెలి ఆజి మండ్రె.

†† 24:15 దాని 9:27; 11:31; 12:11. †† పిన్నికాలమ్ దు గొప్ప వెరి పిరు వాజి మహాద్. అందెజె విజాబాన్ గడ్డెజ్ నిండ్రెని మన్నిజ్ పిన్నిదిజ్ పయనం కిదెజ్ గొప్ప కష్టమాజి మంజినాద్ మండ్రెజ్ బాడ్డి దొహ్ కెజ్ నె, తిండి దొహ్ కెజ్ నె గొప్ప కష్టమాజినాద్ యూదురి రూలుజ్ వజ విస్తాంతిదినమ్ దు మూడు నాలగి మయిలుదిజ్ లాన్ దూరం పయనం కిదెజ్ అసిద్ ఇజి మహాద్. † 24:29 యెనయ 13:10; 34:4. †† దేవుణు బూమి విజా ముడుగ్గిని లెకెండె పేరు రవిసి గడ్డ నిండ్రెని ముజాల ఉండ్రె ఓడ తాయార్ కిదెజ్ ఇజి నోహుళుజ్ వెహ్తెన్. అయా ఒడ 300 మూరెజ్ సాంపు 50 మూరెజ్ వెడల్పు 30 మూరెజ్ ఎత్తు మన్నిక. నోహుళుని వన్ని ఇండ్రెణికార్ విజెరె, మరి విజా జంతుజ్ పాట్టిజ్ పార్గిజ్ అండు పాత్తు జత్త లెక్క ఒడదు దుఃగ్గి ఏడు రొస్సు వెనుక పేరు వాదెజ్ మొదల్లిదాక లోకుర్ వరిజ్ అలవాటుజ్ లెకెండె బత్తిజి మహార్.

మూఎర్ పణిమణిసిర్

14 మరి దేవుణు ఏలుబడిః కినిక ఇహిజ ఒరెన్ దేసం సాండ్రెజ్ ఇజి వన్ని పణిమణిసిర్ కూక్కి, వన్ని ఆస్తి పరిజ్ ఒవజెప్పి వన్ని లెకెండ్ మనాద్. 15 వండ్రు ఒరెన్ పణిమణిసిర్ అయ్దు తాలంతుజ్ †. మరి ఒరెన్ వన్నిజ్ రుండి, తాలంతుజ్ మరి ఒరెన్ వన్నిజ్ ఉండ్రె తాలంతుజ్ యాలెకెండ్ ఒరెన్ ఒరెన్ దన్ని వెట పణికిదెజ్ అట్టి లెకెండ్ పరిజ్ సితాన్. వెనుక వాండ్రు పయనం కిజి దేసం సాహాన్. 16 అయ్దు తాలంతుజ్ లొస్తికాన్ వెటనె సాన్ని వనకవెట బేరం కిజి మరి అయ్దు తాలంతుజ్ గణస్తాన్. 17 రుండి తాలంతుజ్ లొస్తికాన్ బా అయా లెకెండ్ నె కిజి మరి రుండి గణస్తాన్. 18 గాని ఉండ్రె తాలంతు లొస్తికాన్ సాహాండ్రె బూమిదు గాంద కారిసి వన్ని ఎజమాని డబ్బు మూస్తాన్. 19 లావకాలం సాహి వెనుక పరి ఎజమాని మర్జి వాతండ్రె పరి సెత్తి డబ్బుజాణిజ్ వారు ఇనిక కిత్త మనార్ ఇజి సుడఃతాన్. 20 నస్తివలె అయ్దు తాలంతు లొస్తికాన్, మరి అయ్దు తాలంతుజ్ తతాండ్రె, “బాబు నీను నజి అయ్దు తాలంతుజ్ ఒవజెప్పి గదె, ఇదిలో అకెజె ఆవండ మరి అయ్దుబా నాను కుడువ్”, ఇజి వెహ్సాన్.

21 వన్ని ఎజమాని వన్నిజ్, “నమకం ఇడెదెజ్ అట్టి నెగ్గి పణిమణి, నీను నెగెండె కిత్తి. యా కండెక్ బాన్ నిజి నమిదెజ్ అట్టి నని పణి నీను కిత్తి. అందెజె నండో వనకాజ్ నాను నిజి ఒవజెప్పాలె. నీను వాజి నీ ఎజమానివెట సర్ల ఆజి మన్అ”, ఇజి వెహ్సాన్.

22 రుండి తాలంతుజ్ లొస్తికాన్ వాతాండ్రె, “ఎజమాని నీను నజి రుండి తాలంతుజ్ ఒవజెప్పి గదె, ఇదిలో అకెజె ఆవండ మరి రుండి తాలంతుజ్ గణస్తా”, ఇజి వన్నిజ్ వెహ్సాన్. 23 ఎజమాని వన్నిజ్, “నమకం ఇడెదెజ్ అట్టి నెగ్గి పణిమణిసి, నీను నెగెండె కిత్తి. యా కండెక్ బాన్ నీను నమిదెజ్ అట్టి నని పణి నీను కిత్తి. అందెజె నిజి నండో వన్కాజ్ ఒవజెప్ప. నీను వాజి నీ ఎజమాని వెట సర్ల ఆజి మన్అ”, ఇజి వెహ్సాన్.

24 నస్తివలె ఉండ్రె తాలంతు లొస్తికాన్ వాతాండ్రె, “బాబు నీను విత్త బాడిదాన్ కొయ్నికి, మరి ఉణున్ ఇ బాడిదాన్ పంట కొయ్ని మూర్కతం మనికి ఇజి నాను నెస్త. 25 అందెజె నాను తియెల్ ఆజి బూమిదు గాంద కార్జి నీ డబ్బు డావ్. ఇదిలో నీది, నీను లొన్అ”, ఇజి వెహ్సాన్.

26 అందెజె వన్నిజ్ సుడఃజి అయ ఎజమాని, “బదకమాతి నె ఇ పణిమణి, నాను విత్త బాడిదాన్ కొయ్నికాన్, ఉణున్ ఇ బాడిదాన్ పంట కొయ్నికాన్ ఇజి నీను నెస్త? 27 అహిజ నా డబ్బు వడ్డి సీని సవకారిజబాన్ నీను సీని మంజినిక ఇహిజ నాను వాతివెలె వడ్డి కుడుఃప్పి నా డబ్బు నజి దొహ్కాద్ మరి.

28 అయ ఉండ్రె తాలంతు వన్నిబాణిజ్ లాగ్జి పది తాలంతుజ్ మనివన్నిజ్ సీఅ. 29 నమిదెజ్ అట్టికాన్ ఎయెండ్రె, వన్నిజ్ మరి లావ్ దొహ్కా. పరిజ్ మరి నండో కల్గిజి మంజినె. నమ్మిదెజ్ అల్త వన్ని బాణిజ్, వన్నిజ్ కల్గితిమన్ని ఇజిరికబా లాగె ఆనాద్. 30 పణిదిజ్ రె ఇ యా పణిమణిజ్ వెల్లి సీకటుదు విసీర్దు. అబ్బె వల్కు కొహ్కీఅడఃబాజి మంజినాద్.

మెండ గొర్రెజిని ఎలటి గొర్రెజ్

31 నస్తివలె యేసు ఈహు వెహ్సాన్. “లోకుమరిసి ఆతి నాను నా గొప్ప గవరమ్దాన్, నా విజా దూతెజ తోడుః అసి వన్నివెలె, రాజా వజ ఏలుబడిః కిదెజ్ దేవుణు మంజిని బాడిఃదు మంజిని గొవ జాయ్దాన్, విజా దూతారిజ్ నావెట తోడు అసి వానివలె, రాజావజ ఏలుబడిః కిదెజ్ పరలోకమ్దు మంజిని గొప్ప జాయ్ మన్ని నా సింహాసనమ్దు బసి మంజిని. 32 నస్తివలె బూమి ముస్సు మని లోకుర్ విజెరె నా ఎద్దు కూడఃజి వనార్. గొర్రెజ్ మేప్పి గవుడుఃయెన్ ఎలటి గొర్రెజాణిజ్ మెండ గొర్రెజి ఎరీసినిలెకెండ్ నాను లోకాజ్ ఒరెన్ ఒరెన్ వన్నిజ్ ఎర్లిస్తాలె. 33 నాను ఉణెరెపడఃక మెండ గొర్రెజి, డేబపడఃక ఎలటి గొర్రెజి నిల్వాలె.

34 రాజా ఆతి నాను నా ఉణెరె పడఃక మని పరిజ్ సుడఃజి, “నా బుబ్బాతి దేవుణు సిజిని దీవనమ్కు మంజి వన్నిజ్ సెందితికిదెరా, లోకం పుట్టి బాణిజ్ అసి దేవుణు మీ వందిజ్ తయార్ కితిమన్ని దేసం మీ సాంత కిజి మండ్రు. 35 ఎందానిజ్ ఇహిజ, నజి బజ కట్టిజ్ మీరు బోజనం సెతిదెర్, ఏప్పి కట్టిజ్ ఏరు సెతిదెర్, నాను ఆఇకాన్ ఆతిమహిజ్ నజి డగ్రు కితిదెర్. 36 నాను డుమ్డ ఆతిమహిజ్ నజి సాక్సెజ్ సెతిదెర్. జబుదాన్ మహిజ్ నజి నెగెండె సుడఃతిదెర్, నాను జెలిదు మహివలె సుడఃదెజ్ వాతిదెర్, ఇజి వెహ్సాన్.

37 నస్తివలె దేవుణుదిజ్ లొజితిమహి సీతినిజాయిమన్నికార్ ఆతి వారు, “ప్రబువా, ఎస్తివలె నిజి బజదాన్ సుడఃతిజ్ నిజి బోజనం సితావ్? ఎస్తివలె ఏప్పి కట్టిజ్ మాపు నిజి ఏరు సితావ్? 38 ఎస్తివలె ఆఇకి ఆతిమహిజ్ సుడఃజి నిజి డగ్రు కితావ్? ఎస్తివలె డుమ్డ ఆతి మహిక సుడఃజి నిజి సాక్సెజ్ సితావ్? 39 ఎస్తివలె నీను జబుదాన్ మహిక, జెలిదు మహిక సుడఃజి నీ డగ్రు వాతావ్?”, ఇజి వన్నిజ్ వెన్బానార్లె. 40 నస్తివలె రాజాఆతి నాను, “నా తంబెరిజ ఆతివరి లొ ఇజిరికాన్ ఆతి ఒరెన్వన్నిజ్ మీరు ఇనిక కితిదెర్, అయాక మీరు నజి కిత్తిదెర్, ఇజి నాను నిజి నిజం వెహ్సాన్”, ఇజి పరిజ్ వెహ్సా. 41 నస్తివలె వాండ్రు డేబ్ర పడఃకాదు మని పరిజ్ సుడఃజి, “నయెవ్ పాందితికిదెరా, నా డగ్రహాన్ సాండ్రు, సయితానుజ్ని వన్ని దూతర్ వందిజ్ తయార్ కితి మని ఎలాకాలం సిను మంజిని బాడిఃదు సాండ్రు.

42 ఎందనిజ్ ఇహిజ, నాను బజ సాత, గాని మీరు నజి బోజనం సెతిదెర్. ఏప్పి కట్టిజ్ ఉండెజ్ ఇనిక సెతిదెర్. 43 ఆఇకానాతి మహిజ్ మీరు నజి డగ్రు కితిదెర్. డుమ్డ ఆతిమహిజ్ మీరు నజి సాక్సెజ్ సెతిదెర్. జబ్బుదాన్ మహివలె జెలిదు మహివలె మీరు నజి సుడఃదెజ్ రెఇతిదెర్”, ఇజి వెహ్సా. 44 వారుబా వన్నిజ్, “ప్రబువా ఎస్తివలె నీను బజదాన్మహిక, ఏప్పిదాన్మహిక, ఆఇకి ఆతి మహిక, డుమ్డ మహిక, జబుదాన్మహిక, కయ్దు మహిక సుడఃజి నిజి సాయం కివితావ్?”, ఇజి వెన్బానార్. 45 నస్తివలె నాను, “యా ఇజిరి పరి లొ ఒరెన్ వన్నిజ్ ఇనిక మీరు కితిదెర్, అయాక నజిబా మీరు కితిదెర్”, ఇజి పరిజ్ వెహ్సా. 46 నస్తివలె వారు ఎలాకాలం మంజిని సిక్నాదు సానార్లె, గాని దేవుణుదిజ్ లొజితికార్ ఎల్లకాలం మంజిని బత్తుదు సానార్.”

యేసుజ్ పడిఃఎండ కుల్లు ఆజినార్

26 1-2 యేసు యాకెజ్ విజా వెహ్సా వీజితి వెనుక వన్ని సిసూర్జె సుడఃజి, “రుండి రోస్సు వెనుక పస్సు పండోయ్ † వాజినాద్ ఇజి మీరు నెస్తిదెర్. నస్తివలె లోకు మరిసి ఆతి నాను సెలువ పాకె ఆదెజ్ ఇజి ఒవజెపె ఆనాలె”, ఇజి పరిజ్ వెహ్సాన్.

† ఉండ్రె తాలంతు ఇహిజ దినార్కుతు అయాలెకెండ్ ఇహిజ ఆరు వెయిజి రోస్సు. పణికితిజి దొహ్కా కులిదిజ్ సరియాతి డబ్బుజ్ నేహి లెక్కదిజ్ సుడఃజి ఇంసు మింసు ఆరు లెక్కజ్ రూపాయ్ మంజినె. †† యూదురు పరి అని గొగొరెజ్ దేవుణు అయ్యుగుప్తు దేసమ్దు వెటెపణి కిజి మహిబాణిజ్ నండో వంటిజ్ ముజాల డిఃప్పిని తత్తి దన్నిజ్ ఎత్తు కిజినికాదె వస్సు పండోయ్ వస్సు ఇహిజ

3 నస్తవలె పేరి పుజెరిబుని లోకురి పెద్దల్లెజ విజేరె, విజేరె విజా పుజెరిబ ముస్సు, పేరి పుజెరి ఆతి కయవ ఇండ్రొ కూడఃజి వాతార్. 4 యేసుజ్ ఎలాగబా ఉపాయ్ కిజి అసి నస్తజ్ ఇజి అబ్బె వారు ఉండ్రొ ఆలోసనం కితార్. 5 “మాపు ఏలు వన్నిజ్ అస్తజి లోకుర్ వెట గొడఃబ కినార్లె, అందెజె యా పండ్రొయ్దు పోని”, ఇజి వారు వర్గితార్.

ఉండ్రొ బోదెలె యేసు బురాదు వాసనం మన్ని నూనె వక్కినాద్.

67 యేసు బెతానియ ఇని నాటొ ముజాల కుష్టురోగమ్దాన్ మహి సీమోసు ఇండ్రొ వాతిజ్, అబ్బె వాండ్రు బోజనమ్దిజ్ బస్తాన్. నస్తవలె ఉండ్రొ బోదెలి నూన్నాజ్ పలుకుదాన్ తయార్ కిత్తి ఉండ్రొ సీసాదు †, నండ్రొ విలువమని, నండ్రొ వాసనం మని నూనె ఉండ్రొ పేరి సీస తత్తాదె వన్ని బుర్ ముస్సు వాక్తాద్. 89 సిసూర్ అక్క సుడఃజి కోపం ఆతారె, “ఎందనిజ్ యా ణిదిజ్రెఇ ణి? యాక నండ్రొ డబ్బుదిజ్ పోరిసి, అయ డబ్బు బీదవరిజ్ సీదెజ్ ఆనాద్ గదె?”, ఇజి వెప్తాన్.

10 యేసు అక్క నెస్తాండ్రె, “యా బోదెలి నా వందిజ్ ఉండ్రొ నెగ్గి పణి కితాద్ మీరు ఎందనిజ్ దన్నిజ్ అర్ల కిజినిదెర్? 11 బీదాదికార్ మీవెట ఎస్తవలెబా మంజినార్. గాని నాను ఎలాకాలం మీ వెట మన్వె. 12 నజి మూస్సి వందిజ్ తయార్ కిత్తి లెకండె యా బోదెలి యా నూనె నా ఒడఃల్ ముస్సు వాక్తాద్. 13 యా బూమి ముస్సు ఎంబెబా యా దేవుణు ఏలుబడిః కిని వందిజ్ సువార్త సాటిస్సివెలె అది కితి యా పణి దన్నిజ్ ఎత్తుకిత్తి లెకండె సాటిసి మంజినాద్లె”, ఇజి వెప్తాన్. 14-15 నస్తవలె వన్నెండు మణిసిర్ సిసూర్ లొఇ ఒరెన్ ఇస్కరియోతు యూద ఇనికాన్ పేరి పుజెరిబ డగ్రు సాహోండ్రె, “నాను యేసుజ్ మిజి ఒపజెప్తిజ నజి ఇనిక సీనిదెర్?”, ఇజి వెన్బాతాన్. అందెజె వారు ముప్పయ్ వెండి రూపయ్బు తూస్తారె వన్నిజ్ సితార్. 16 అబ్బెణిజ్ అసి యూద యేసుజ్ వరిజ్ ఒపజెప్తిజ్ ఉండ్రొ అవ్కాసం సుడఃజి మహాన్.

ప్రబు ఏర్పాటు కిత్తి బోజనం

17 పులాజ్ సిల్లి రొట్టెజ్ తయార్ కిని పస్సు పండ్రొయ్ది మొదోహి దినమ్దు వన్ని సిసూర్ యేసు డగ్రు వాతారె, “పస్సు ఉండెజ్ నీ వందిజ్ మాపు ఎంబె తయార్ కిదెజ్, ఇజి నీను కోరిజిని?”, ఇజి వన్నిజ్ వెన్బాతాన్. 18 వాండ్రు వరిజ్, “మీరు పట్టుమ్దు పలానివన్నిబాన్ సాన్ని, నా సమయం డగ్రు ఆతాద్. నా సిసూర్ వెట కూడఃజి నీ ఇండ్రొ పస్సు పండ్రొయ్ కిదెజ్ ఇజి బోదకినికాన్ వెప్పినాన్, ఇజి వన్నిజ్ వెప్తాన్”, ఇజి వరిజ్ వెప్తాన్. 19 వన్ని సిసూర్ సాన్ని యేసు వరిజ్ వెప్తా లెకండెనె పస్సు పండ్రొయ్దిజ్ తయార్ కితార్. 20 పాద్దు ఆతివెలె వన్ని వన్నెండు మన్ని సిసూర్ వెట బోజనమ్దిజ్ బస్తాన్. 21 వారు బోజనం కిజి మహివలె వాండ్రు, “మీ లొఇ ఒరెన్ నజి ఆఇవరి కీదు ఒపజెప్పాన్లె, ఇజి నాను మిజి నిజం వెప్పినాన్”, ఇజి వెప్తాన్.

22 వారు విజేరె నండ్రొ దుకం ఆజి ప్రతి ఒరెన్ ఒరెన్, “ప్రబువా, నిజమె నాను ఆవ గదె?”, ఇజి వన్నిజ్ వెన్బాతాన్.

23 యేసు, “నావెట గినెదు కియు ముడుఃక్కికాన్ ఎయెండ్రొ వాండ్రె నజి ఒపజెప్పికాన్. 24 లోకుమరిసి ఆతి నా వందిజ్ దేవుణు మాటదు రాస్తమహి లెకండె నాను సానాలె, గాని లోకు మరిసి ఆతి నజి ఎయెన్ ఒపజెప్పాండ్రొ వన్నిజ్ కష్టమనె. వాండ్రు పుటేంండ మంజినిక ఇహిజ వన్నిజ్ ఎస్సానో బాగ మహాద్ మరి”, ఇజి వెప్తాన్.

25 వన్నిజ్ ఒపజెప్పి యూద, “బోదకినికి నాను ఆవ గదె?”, ఇజి వెన్బాతాన్. యేసు, “ఒఒ నీనె”, ఇజి మర్జి వెప్తాన్.

యేసుజ్ ఒపజెప్పెజ్ యూద ఒపు కొడ్డినాన్.

26 వారు బోజనం కిజి మహిజ్ యేసు ఉండ్రొ రొట్టె అస్తాండ్రె దేవుణుదిజ్ వందనమ్కు వెప్పి, అయాక రుక్కి, వన్ని సిసూర్జ సితాండ్రె, “మీరు యాక లోసి తిండ్రు, యాక నా ఒడఃల్”, ఇజి వరిజ్ వెప్తాన్.

27 మరి వాండ్రు గిన్న అసి దేవుణుదిజ్ వందనమ్కు వెప్పి, అయాక వరిజ్ సీజి, “దిన్ని లొఇ మనిక విజేరె ఉండు. 28 యా గిన్నాదు మన్నిక నా నల, నండ్రొండ్రొజ్ వరి పావమ్కు సెమిస్తెజ్ ఇజి కారిసిని నా నల. ఇక్కదె దేవుణు నా నలదాన్ కిజిని ఒపుమానం. 29 నా బుబ్బాతి దేవుణు కిని ఏలుబడిఃదు మరి మీ వెట కొత్తాజ్ ఉణిదాక ద్రాక్చ పట్టు రసం మరి ఎసెజ్బా నాను ఉణ్లె, ఇజి నాను మిజి వెప్పినాన్”, ఇజి వెప్తాన్ 30 మరి, ఉండ్రొ పాట † పార్తారె వారు ఒలివ మరెక్ మని గొరొన్ ముస్సు సాహోర్.

పేతురు వన్నిజ్ నెన్వ ఇజి వెప్తాన్లె ఇజి యేసు మూజాల వెప్పినాన్.

31 నస్తవలె యేసు వరిజ్ సుడఃజి, “గొరెజ్ అడినివన్నిజ్ నాను కత్తాలె, గొరెజ్ మంద సెదరినె సానెలె ‡, ఇజి దేవుణు మాటదు రాస్త లెకండె, యా పాదోయ్నె నా వందిజ్ నిల్దెజ్ అట్వంండ మీరు విజిదెరె నజి డిఃసి సానిదెరెలె. 32 గాని దేవుణు నజి మర్జి బత్తుదు నిక్తి వెనుక, మిజి ఇంక ముజాల గలీలయదు సానాలె”, ఇజి వెప్తాన్. 33 అందెజె పేతురు, “విజేరె మీ వందిజ్ నిల్దెజ్ అట్వంండ డిఃసి సాహిజ్బా, నాను ఎసెజ్బా నిజి డిఃసి సాన్వ”, ఇజి వన్నిజ్ వెప్తాన్. 34 యేసు వన్నిజ్, “యా పాదోయ్నె కొర్లు కెరెని ముజాల నీను, నజి నెన్వ ఇజి మూండ్రొ సుట్టు నీను వెప్పిలె, ఇజి నాను నిజి నిజం వెప్పినాన్”, ఇజి మర్జి వెప్తాన్. 35 పేతురు వన్నిజ్, “నాను నీ వెట సాదెజ్ ఇహిజ్బా గాని నిజి నెన్వ ఇజి ఎసెజ్బా వెవ్”, ఇజి వెప్తాన్. మహి సిసూర్బా అయాలెకండె వెప్తాన్.

డాట్టి సాహిజ ఇహిజ సస్తికానాతి దేవుణు దూత, మెండగొరెది నల దారబంద్రమ్కాజ్ రాసి ఆతి మన్ని ఇల్లాజ్ డట్టి సాహి సమయమ్దిజ్ గుర్తినినాద్. అయ ఇల్లా, పుట్టి పేరి వన్నిజ్ దేవుణు దూత సవ్మతాన్ గాని మెండ గొరెది నల దారబంద్రమ్కాజ్ రాన్ ఇ అయగుచ్చ దేసెమ్ది వరి విజా ఇల్లాజ్ పుట్టి పేరి వరిజ్ విజేరిజ్ దేవుణు దూత సస్తాన్. యా పండ్రొయ్ విజా సమయమ్దిజ్ కినార్ యూదురు విజా దేసెమ్కాజ్ పండ్రొయ్ కిదెజ్ ఇజి యెరుసల్లెమ్దు కూడఃజి వానార్ నిర్గమ 12. † యా నూన్నాజ్ పలుకు వేరు అలబ్బాస్తరు ఇజి, యా పలుకు నండ్రొకరిదిక తెల్లాజ్ మంజినాద్ యాక గీసి లోకుర్ పుసెజ్ తయార్ కిజినార్ †† మాములుగ కీర్తన 113-114. పస్సు పండ్రొయ్దిజ్ బోజనం కిదెజ్ మొదోల్లిని వెలె పార్తారె. 115-118 బోజనం కిత్తి వీటిజి పోర్జి మహోర్. ‡ 26:31 జీకరి 13:7.

గెత్సెమని టోట

36 నస్తవలె యేసు వన్ని సిసూర్వెల గెత్సెమని ఇని టోటాదు సాహాన్. వాండ్రు వరిజ్, "నాను అబె సాన్ని పార్దనం కిజి మర్జి వానిదాక ఇబ్బె బసి మండ్రు", ఇజి వెప్టాన్. 37 పేతురుని జెబెదయి మరిసిరిజ్పన్నెవెల ఒతాన్. వాండ్రు నండో దుకం ఆజి బాద ఆదెజ్ మొదొల్స్తాన్. 38 వాండ్రు వరిజ్, "నాను సాదెజ్ డగ్రు ఆతిలెకెండో మన్ను ఓరిస్తెజ్ అబ్జ నసా బాద నజి కల్లిజినాద్. మీరు ఇబ్బెనె బసి నావెల తెలి మండ్రు", ఇజి వెప్టాన్. 39 యేసు అబ్బెణిజ్ కండెక్ దూరం సాహాండ్రె ముణుకుజ్ ఊర్జి, "నా బుబ్బ, నీను అట్టిజ యా కప్టమ్కు నా బాణిజ్ లాగ్ల. గాని నా ఇష్టం వజ అఎద్, నీ ఇష్టం వజనె జగ్గిపిద్", ఇజి పార్దనం కితాన్. 40 వెనుక వాండ్రు సిసూర్ డగ్రు మర్జి వాతివెలె వారు నిర్ద కినిక సుడెజి, "ఉండ్రె గంటబా నా వెల తెలి ఆజి మండ్రెజ్ మీరు అబ్జిదెరా? ఇజి పేత్రుజ్ వెన్బాతాన్. 41 "నయ్యూసు మిజి పరిస కిజి తప్పదు సాన్వండ పార్దనం కిజి తెలి మండ్రు. ఆత్మ తయారినె గాని ఒడొల్ సత్తు సిల్లెండ ఆజినాద్." 42 మరి రుండి సుట్టు సాన్ని, "నా బుబ్బ, యా కప్టమ్కు నాబాణిజ్ లాగ్లెజ్ ఆఎద్, నాను ఓరిస్తెజ్పలె ఇపాజి నీను ఇష్టం ఆతి లెకెండో, అయావజనె జగ్గిపిద్", ఇజి పార్దనం కితాన్. 43 మరి వాండ్రు మర్జి వాతివెలె, వరి కణక రెపెజ్ బరుదాన్ మూగ్గి మహిజ్ వారు మరి నిర్ద కిజినిక సుడెజాన్. 44 వాండ్రు మర్జి సాహాండ్రె మూండ్రె సుట్టుబ అయా మాటెజ్నె వెప్పా పార్దనం కితాన్. 45 వెనుక వాండ్రు వన్ని సిసూర్ డగ్రు వాత్తాండ్రె వరిజ్ సుడెజి, "ఏలుబా మీరు నిర్ద కిజి రోమ్జినిదెరా? ఇదిలో లోకుమరిసి ఆతి నజి సెఇవరి కియుదు ఒవజెప్పి గడియ డగ్రు ఆతాద్. 46 ఇదిలో నజి ఒవజెప్పికాన్ వాజినాన్, లెదు మాటు వరి వెల దసూల్ ఆదెజ్ సానాట్", ఇజి వెప్టాన్.

యేసుజ్ అసి తొనాప్పినార్

47 వాండ్రు వర్గిజి మహివలె, పన్నెండు మణిసి సిసూర్ లోఇ ఒరెన్ యూద వాతాన్. పెరి పుజెరిజు, లోకురి పెద్దెల్జె పాక్తిమని మంద లోకుర్ కూడమ్కు, డుడ్డు అస్తారె వన్ని వెల వాతాన్. 48 యేసుజ్ ఒవజెప్పికాన్, "నాను ఎయెరిజ్ముదు కిజిననో, వన్నిజ్లస్తు", ఇజి ఉండ్రె గుర్తు లెకెండోముజాల వరిజ్ వెప్టా మహాన్. 49 యూద వెలనె యేసు డగ్రు వాతండ్రె, "బోదకినికి", ఇజి వెప్టాండ్రె పామ్జి వన్నిజ్ ముదు కితాన్. 50 యేసు వన్నిజ్, "కూలాయెన్, నీను ఇనిక కిదెజ్ వాతిదొ అక్క కిల", ఇజి వెప్టాన్. నస్తవలె లోకుర్ ముజాల్ వాజి వన్ని ముస్సు అరిసి వన్నిజ్ అస్తారె తొప్టాన్. 51 అయావలెనె యేసు వెల మహికాన్ ఒరెన్ వన్ని కియు సాప్పి కుర్ల లాగితాండ్రె పెరి పుజెరిజ్ వణిమన్ని గిబ్బె తెవు కత్తాన్. 52 యేసు వన్నిజ్, "నీ కూడం మర్జి ఒరాదు ఇడెజె, కుర్ల అన్నికార్ విజెరె కుర్లదానె సానార్. 53 నాను ఏలు నా బుబ్బెజ్ సాయం లొస్తిజ, నా బుబ్బ పన్నెండు గుంపుజ్ సయనమ్ది వరిజ్ ఇంక లామ్దూతెజ నా వందిజ్ పాక్వెండ్రా? మీరు ఇనిక ఒడెబిజినిదెరె? 54 గాని నాను అయలెకెండో లొస్తిజ, యాలెకెండెనె ఇకెజ్ జగ్గిదెజ్ ఇజి దేవుణు మాటదు రాస్తి మహిక ఎలాగ పూర్తి ఆనాద్? 55 అయావలె యేసు మంద లోకురిజ్ సుడెజి, "నాను ఒరెన్ డొజ కినికాండ్రా? మీరు కుర్లజాణిజ్, కొణెజాణిజ్ నజి అస్తిజ్ వాతిదెరా? విజా రోస్సు నాను దేవుణు గుడిజెదు బసి బోదిసి మహగదె. అయావలె మీరు నజి అన్ఇతిదెర్. 56 ఎందనిజ్ ఇపాజి ముజాల దేవుణు వర్గితి మాటెజ్ ప్రవక్తరు రాస్తి మహికెజ్ అయాలెకెండో పూర్తి ఆదెజ్ యాకెజ్ విజా జగ్గితె", ఇజి వెప్టాన్. నస్తవలె వన్ని సిసూర్ విజెరె వన్నిజ్ డిస్తారె ఉమ్క సాహాన్.

యేసు యూదురి కొర్టుదు

57 యేసుజ్ అస్తికార్ వన్నిజ్ విజా పుజెరిజ ముస్సు పెరి పుజెరి ఆతి కయవ ఇండ్రె తత్తాన్. అబ్బె పెరి పుజెరిజు లోకురి పెదలుజు కూడిత వాత మహాన్. 58 దినిజ్ ఆక్కర్ ఇనిక ఆనాదొ ఇజి నెస్తిజ్, పేతురు కండెక్ దూరమ్దాన్ వన్ని వెనుక సాన్ని విజా పుజెరిజ ముస్సు పెరి పుజెరి ఇలు అర్బదు కాపకిని వరి వెల బస్తాన్. 59 పెరి పుజెరిజు, నన్హెద్రి నజం † ఇజి యూదురి కొర్టుదికార్ విజెరె యేసుజ్ సప్తెజ్ తగితి రుజాన్ వందిజ్ వన్ని ఎర్దు అబద్దం సాక్యం వెప్పివరిజ్ రెబాజి మహాన్. 60 వన్ని ఎర్దు అబద్దం సాక్యం వెప్పికార్ నండొండార్ వాతార్ గాని వన్నిజ్ సప్తెజ్ తగ్గి ఇనికబా దొప్పొవతాద్. 61 కడెవెరిదు రిఎర్ ముజాల వాజి, "నాను దేవుణు గుడిదిజ్ అర్పి మరి మూండ్రె రోస్కాజ్ లోఇ దనిజ్మర్జి తొప్టాజ్ అట్టు ఇజి వాండ్రు వెప్టాన్", ఇజి వారు వెప్టాన్. 62 నస్తవలె విజా పుజెరిజ ముస్సు పెరి పుజెరి ఆతికాన్ నిజెత్తాండ్రె యేసుజ్, "నీను ఇనికబా మర్జి వెహాదా? వీరు మీ ముస్సు వెప్పాని యా మాటెజ్ ఇనికెజ్?", ఇజి వెప్టాన్. 63 గాని యేసు ఇనికబా వర్గివండ జమన మహాన్. అందెజె విజా పుజెరిజ ముస్సు పెరి పుజెరి ఆతికాన్ వన్నిజ్ సుడెజి, "బత్రిజిని దేవుణుదిజ్ తోడు అసి నీ వెల ప్రమాణం కిజి నాను నిజి వెన్బాజిని, "నీను క్రీస్తు నా, దేవుణు మరిసినా? అపాజి నజి వెహా", ఇజి వెప్టాన్. 64 యేసు వన్నిజ్, "నీను వెప్పాక నిజమె. గాని లోకుమరిసి ఆతి నాను, వాని గొప్ప అతికారం మన్ని కాలమ్దు దేవుణు ఉణెర్ వడెకాదు బసిమంజి ఆగానమ్దాన్ మొసావు ముస్సు వానిక మీరు సూణిదెర్ ఇజి నాను మిజి విజెరిజ్ నిజం వెప్పాన్", ఇజి వెప్టాన్. 65 నస్తవలె విజా పుజెరిజ ముస్సు పెరి పుజెరి ఆతికాన్ నండో కోపం ఆతండ్రె, వన్ని సాక్కెజ్ కిని ఆజి, "వాండ్రు దేవుణుదిజ్ దూసిని వర్గితాన్! మరి ఇంక సాక్కిరిజు అవ్వనరం సిల్లెద్. ఇదిలో వాండ్రు దేవుణుదిజ్ దూసిని వర్గితిక మీరె వెహిదెర్. 66 మీరు ఇనిక ఒడెబిజినిదెరె?", ఇజి వరిజ్ వెప్టాన్. అందెజె వారు", వీండ్రు సాపుదిజ్ తగ్గికాన్", ఇజి వెప్టాన్. 67-68 నస్తవలె వారు వన్ని మొకొమ్దు పూని, ముటి అసి గుదితార్. సెగొండార్ కియుదాన్ డెయ్జి, "క్రీస్తు నిజి డెయ్తికాన్ ఎయెండ్రె ఇజి మజి వెహాల, నీను దేవుణు ప్రవక్తగదె?", ఇజి వెప్టాన్.

† సిన్హెద్రిం నజం ఇపాజి 71 లోకుర్ మంజిని యూదురి పెరి కొర్టులెకెండో మహాద్ విజెరె పుజెరిజ ముస్సు పెరిపుజెరిఆతికాన్ మరి పెరి పుజెరి ఇనికాన్ ఇజిరి నజతిజ వందిజ్ తీర్పు తీరిసి మహాన్. నన్హెద్రిం నజమ్దు అయి నమయమ్ది పెరి పుజెరి వన్ని ఇండ్రెణి మొగవారు, మహి ముకెలమాతి పుజెరి ఇండ్రెణికార్ దేవుణు గుడి కాన్ కినివరి నెయ్యి, ముజాల పెరి పుజెరిలెకెండో మహికార్ మంజినార్. యెరూసల్లెమ్దు మన్ని సిన్హెద్రిం నజమ్దిజెనె పెరి నజతిజ వందిజ్ తీర్పు తీరిస్తెజ్ అతికారం మనాద్.

పేతురు యేసుజేసెస్ ఏ ఇజి మూండ్రీ సుటు వెప్పినాన్.

69 అయావలె వెల్లి అరబుదు పేతురు బన్తి మహిజ్ పణిమన్ని ఆతి ఉండ్రీ బోదెలి వాతాదె, "సీనుబా గలీలయాదికాన్ యేసు వెట మహికి", ఇజి వెప్తాన్. 70 పేతురు, "సీను ఇనిక వర్గిజినిదో నజీ తెలివేద", ఇజి బాన్ మహి విజేరె ఎద్దు వెప్తాన్. 71 వాండ్రు అబ్బెణిజ్ వెల్లిహి గవుని డగ్రు సాహిజ్, మరి ఉండ్రీ పణిమన్ని ఆతి బోదెలి వన్నుజ్ నుడేజి, "పిండ్రు నజరేతుదికాన్ ఆతి యేసు వెట మహాన్", ఇజి అబె మహివరిజ్ వెప్తాన్. 72 వాండ్రు నాను వన్నువెట మండ్రేజ్ సిల్లెద్ ఇజి ప్రమాణం కిజి, "నాను వన్నుజ్ నెస్ ఎ", ఇజి వెప్తాన్. 73 కండెక్టయం ఆతి వెనుక అబ్బె నిహిమహికార్ పేతురు డగ్రు వాజి, "నిజమె, సీనుబా వన్నువెట మహికి. సీను వర్గిని మాట విహిజానె తెలిజినాద్", ఇజి వెప్తాన్. 74 నస్తివలె వన్నుజ్ వాండ్రె నయివేసిబె ఆజి ప్రమాణం కిజి, "నాను వన్నుజ్ నెస్ ఎ", ఇజి వరిజ్ వెప్తాన్. వెటనె కొరు కెరెతాద్. 75 నస్తివలె, "కొరు కెరెని ముజాలె నజీ నెస్ ఎ ఇజి మూండ్రీ సుటు సీను వెప్పిలె", ఇజి యేసు వన్నుజ్ వెప్పి మాట ఎతు కితాండ్రె పేతురు వెల్లి సాహండ్రె గుండె కొతె ఆజి డటం అడఃబతాన్.

యూద, వన్నుజ్ వాండ్రె ఉరి ఆజినాన్

27 పెండాల, పెరి పుజెరిబుని లోకురి పెద్దెల్జ విజేరె యేసుజ్ నప్పిజ్ ఇజి ఉండ్రీ నిర్ణం కిబిన్నెజ్ ఇజి ఉండ్రె కుట్ర ఆతార్. 2 వారు వన్నుజ్ తొవ్తారె, రోమఅతికారి ఆతి పీలాతు డగ్రు తత్తారె వన్నుజ్ ఒవజెప్తారె. 3 నస్తివలె వన్నుజ్ ఒవజెప్తి యూద, వారు యేసుజ్ నప్పెజ్ ఇజి తీర్పు కితార్ ఇజి నెస్తాండ్రె, మన్నుదు నండో దుకం ఆజి అయ మువయ్ వెండి రుపయెజు పెరి పుజెరిబుని పెద్దెల్జ ఎద్దు మహ్త తత్తాన్. 4 "ఇని తప్ప సిలివన్నుజ్ ఒవజెప్తానె నాను పాపం కిత", ఇజి వాండ్రు వెప్తాన్. "దనిజ్ నజీ ఇని పాతు సిల్లెద్. అయకా నీ బాజిత", ఇజి వారు వెప్తాన్.

5 అందెజె యూద అయ వెండి రుపయెజ్ దేవుణుగుడిః లొఇ విసీర్తాండ్రె సాహాన్. వెనుక సాన్ని వన్నుజ్ వాండ్రె ఉరి లాగె ఆతాన్.

6 పెరి పుజెరిబు అయ వెండి రుపయెజు పెవ్తారె, "ఇకెజ్ ఒరెన్ వన్నుజ్ నప్పి వందిజ్ సిత్తి డబ్బుజ్, అందెజె నంద పెటెదు అర్ప్పిక దేవుణు రూలుదిజ్ పడిఃవేద", ఇజి వర్గితార్. 7 వారు అయ డబుదాన్ ఆఇ దేసెమ్ది వరిజ్ మూన్నెజ్, కుమెరివన్ను మడిఃజ్ కొణాట్ ఇజి ఉండ్రీ నిర్ణం కితార్. 8 అందెజె ఏలుదాక అయ మడిఃజ, "నల మడిఃజ" ఇజి కూకె ఆజినాద్. 9-10 "దేవుణు నజీ ఆడ్ర సిత్తిలెకెండ, ఇస్రాయేలు లోకుర్ వన్ను వందిజ్ విలువ లెకెండ సిత్తి ముప్పయ్ వెండి రుపయెజ్ వారు లాగితారె కుమెరి వన్ను బూమి కొండెజ్ సితార్" †. ఇజి దేవుణు ముజాలె ప్రవక్త ఆతి యిరిమ్మ్య వెట వర్గితక యా లెకెండ పూర్తి ఆతాద్.

యేసు పీలాతు ఎద్దు నిల్పినాన్

11 యాకెజ్ జరిగిజి మహివలె యేసు పెరి అతికారి ఆతి పీలాతు ఎద్దు నిల్పి మహాన్. నస్తివలె అతికారి ఆతి పీలాతు, "యూదురిజ్ రాజా ఆతికి సీనెనా?", ఇజి వన్నుజ్ వెన్బాతాన్. "నిజమె, సీను వెప్పి లెకెండనె", ఇజి యేసు మర్జి వెప్తాన్. 12 పెరి పుజెరిబు, పెద్దెల్జ వన్ను మున్ను తప్పజ్ మోప్పివెలె వాండ్రు ఇనికబా మర్జి వెన్బాతాన్. 13 నస్తివలె పీలాతు, "పీరు సీ మున్ను ఎసా తప్పజ్ మోప్పినార్, యాకెజ్ విన్ఇతిదా?", ఇజి వన్నుజ్ వెన్బాతాన్. 14 వాండ్రు వారు వెప్పి మాటెజ్ ఉండ్రె దనిజ్బా మర్జి ఇనికబా వెన్బాతాన్. అందెజె అతికారి నండో బమ్మ ఆతాన్.

15 వన్నువండోయ్ దిజ్ జెలిదు మన్నువరి లొఇ, లోకుర్ కోరజిని ఒరెన్ వన్నుజ్ విడుదల కిని అలవాటు అతికారిజ్ మనాద్. 16 అయావలె బరాబ ఇని ఒరెన్ మూర్కతం మన్ని అన్నయ వాండ్రుననికాన్ ఒరెన్ జెలిదు మహాన్. 17 అందెజె లోకుర్ విజెరె కూడేజి వాతివెలె పీలాతు, "నాను ఎయెరిజ్ విడుదల కిదెజ్ ఇజి మీరు కోరిజినిదెర్? బరబ్బెనా, సిల్లిజి క్రీస్తు ఇజి కూకె ఆజిని యేసుజా?", ఇజి వరిజ్ వెన్బాతాన్. 18 వారు యేసు మున్ను గోన ఆతారె వన్నుజ్ ఒవజెప్త మనార్ ఇజి వాండ్రు నెస్త మనాన్.

19 పీలాతు నాయం తీరిస్సి బాడిఃదు బన్తి మహివలె వన్ను ఆల్పి, "ఇని తప్పబా సిల్లి అయా నెగ్గివన్నుజ్ ఇనికబా కిదెజ్ సీను కూడేదెజ్ ఆవిద్. వన్ను వందిజ్ నేండ్రు ఉండ్రీ కలాదు నాను నండో బాద కల్లిత మన", ఇజి వన్నుజ్ కబ్బురు పాక్తాద్.

20 పెరి పుజెరిబుని పెద్దెల్జ, బరబ్బెజ్ డిఃసి సీజి యేసుజ్ నప్పెజ్ ఇజి అతికారి ఒప్పిలెకెండ వెప్తాజ్ ఇజి లోకురిజ్ రేప్పి మహాన్. 21 "యా రిఎర్ లొఇ ఎయెరిజ్ నాను డిస్సెజ్ ఇజి మీరు కోరిజినిదెర్?", ఇజి అతికారి వరిజ్ వెన్బాతిజ్, "బరబ్బెజ్ నె", ఇజి వారు మర్జి వెప్తాన్. 22 "అహిజ క్రీస్తు ఇజి కూకె ఆజిని యేసుజ్ నాను ఇనిక కిదెజ్?", ఇజి వరిజ్ వెన్బాతిజ్ "వన్నుజ్ సిలువ పాక్ అ", ఇజి విజేరె వెప్తాన్. 23 "ఎందానిజ్ వన్నుజ్ సిలువ పాక్తెజ్, వాండ్రు ఇని తప్ప పణి కితాన్?", ఇజి పీలాతు వరిజ్ వెప్తాజ్, "వన్నుజ్ సిలువ పాక్ అ", ఇజి మరి ఒదె వారు డేల్పి వెప్తాన్. 24 గగోలిసె లావేఆజినిక ఆవండె మరి ఇనికబా కిదెజ్ అట్వేన్ ఇజి నెస్తాండ్రె పీలాతు, లోకుర్ విజెరె ఎద్దు ఏరు లొసి వన్ను కికు నొరబజి, "ఇని తప్పసిల్లి వన్ను నలదిజ్ నజీ ఇని సమందం సిల్లె, మిజినె సమందం మనాద్", ఇజి వెప్తాన్. 25 అందెజె లోకుర్ విజెరె, "వన్ను నల మా మున్నుని మా కొడోర్ మున్ను మసిద్ ††", ఇజి మర్జి వెప్తాన్. 26 నస్తివలె వారు కోరితి లెకెండనె వాండ్రు బరాబెజ్ వరి వందిజ్ డిస్సె సితాన్. గాని యేసుజ్ కొరడేజాణిజ్ డెయేజి సిలువ పాక్తెజ్ ఒవజెప్తాన్.

సయ్ నమ్దికార్ యేసుజ్ వెక్రిసినార్.

27 నస్తివలె అతికారి సయ్ నమ్దికార్ యేసుజ్ వారు బత్తిజిని స్రెబోరియం ఇని ఇండ్రొ ఒతారె, సయ్ నమ్దికార్ విజేరె వన్ను సుటులం కూడిఃతారె. 28 వారు వన్ను నీరి సాకెజ్ లాగితారె మరి ఉండ్రీ ఎరాని నీరి సాక వన్నుజ్ తొడుఃగిస్తాతారె. 29 వారు సాప్పాణిజ్ అటారె ఉండ్రీ టొప్పి తయారె కిజి వన్ను బురారు ఇట్టార్. ఉండ్రె డుడు వన్ను ఉణిరెకియుదు అప్పిస్తారె వన్ను ఎద్దు మూణుకుజ్ ఊర్జి, "యూదురిజ్ రాజా ఆతికి గెలిసె అ", ఇజి వెప్పి వన్నుజ్ వెక్రిస్తాన్. 30 వన్ను మున్ను పూసి,

† 27:9-10 జేకె 11:12,13; యర్మీయా 19:1-13; 32:6-9. †† వన్ను నల మా మున్నుని మా కొడోర్ మున్ను రసిద్ - తెలుగు

అయి డుడు లాగ్గి వన్ని బురాదు మరి మరి డెయ్తార్. 31 వన్నిజ్ వ్రెసి వీజితి వెనుక వన్నిజ్ తొడుఁగిసి మహి సీరి సాక్క లాగితారె, వన్ని సీరి సాక్కె తొడిఁగిస్తారె సిలువ పాక్కెజ్ వారు వన్నిజ్ ఒత్తార్.

యేసు సిలువ పాకె ఆజినాన్

32 వారు సాన్ని మహివలె కురెనియ ఇని పట్టుమదికాన్ సీమోను ఇని ఒరెన్ వన్నిజ్ సుడఁతారె, సిలువ పిండఁదెజ్ వన్నిజ్ బలవంతం కితార్. 33 బుర్ర పేణకి ఇని అర్దం ఆని పేరుమని గోల్గోత్త ఇని బాడిఁదు వాతార్. 34 అబె సేందు కలప్పి ద్రాస కడు వన్నిజ్ ఉండెజ్ సిత్రార్ గాని వాండ్రు కెవితాన్, 35 వన్నిజ్ సిలువ పాక్కి వెనుక వన్ని సాక్కె ఎయెరిజ్ దోహొక్కె ఇజి నెస్సెజ్ సీటిజ్ పాక్కారె వన్ని సాక్కె సీబె ఆతార్. 36 దన్ని వెనుక వారు అబ్బె బని వన్నిజ్ కాపకెజి మహార్. 37 “పిండ్రు యూదురిజ్ రాజు ఆతి యేసు”, ఇజి వాండ్రు కితి తపు రాసి వన్ని బురాదిజ్ ముస్సు ఇట్టార్. 38 వన్ని ఉణెర్ పడకాదు ఒరెన్ వన్నిజ్, వన్ని డేబ్ర పడకాదు ఒరెన్ వన్నిజ్ రివర్ డొజారిజు వన్ని వెట సిలువ పాక్కార్.

39-40 అయి సర్దు సానికార్ విజేరె బుర్ర దుక్కి, “దేవుణు గుడిఁదిజ్ అర్పి మూండ్రి దిన్మకాజ్ మర్జి తొప్పికి, సీను దేవుణు మరిసి ఇహిజు నిజి సీనె రక్కిన్ల, సిలువదాన్ డిఁగిజి రఅ”, ఇజి వన్నిజ్ పడిఁవెండ సెఇ మటెజ్ వెప్పి మహార్.

41 అయి లెకెండెన, పెరి పుజెరిజు, లోకురి పెద్దెల్లెజు, దేవుణు మోసెజ్ సీతి రూలుజ్ నెప్పిసికార్ విజేరె వన్నిజ్ వెక్కిస్తార్. 42 “పిండ్రు మహి వరిజ్ తప్పిస్తాన్, గాని వన్నిజ్ వాండ్రె తప్పి ఆదెజ్ అట్వితాన్. వాండ్రు ఇస్రాయేలుది రాజు ఇహాన్. ఏలు వాండ్రు సిలువ ముస్సుహాన్ డిఁగితిజు వన్నిజ్ మాపు నమినాన్. 43 వాండ్రు దేవుణు ముస్సు నమకం ఇట్టార్. “నాను దేవుణు మరిసి’ ఇజి వెప్టాన్. అందెజె దేవుణుదిజ్ వన్నిజ్ సిలువదాన్ రక్కిస్తాండ్రా, ఇజి మాటు సూణాట్ దేవుణు వన్నిజ్ తప్పిసీన్ ఇజి వారు వెప్టాన్. 44 అయా లెకెండెన వన్నివెట సిలువ పాకె ఆతి మని డొజారిజ్బా వన్నిజ్ వెక్కిస్తార్.

యేసు సిలువాదు సాజినాన్

45 మదెనమ్దాన్ మూండ్రి గంటెజ్దాక దేసెం విజు సీకటి ఆతాద్. 46 డగ్రు మూండ్రి గంటెజ్ఆతివెలె యేసు, “ఏలి, ఏలి లమ సబక్తాని”, ఇజి నండొ డేల్లివెప్టాన్. “నా దేవుణు, నా దేవుణు నజి ఎండనిజ్ కియు డిఁస్తి?”, † ఇజి యా మాటదిజ్ అర్దం. 47 అబ్బె నిహి మహికార్ సెగొండార్ యా మాట విహారె, “వాండ్రు ఏలియెజ్ కూక్కినాన్”, ఇజి వెప్టాన్.

48 వెటనె వరి లొఇ ఒరెన్ ఉహొక్కి సాన్ని దూది తత్తాండ్రె పులూని రసమ్దు ముడుక్కి యేసుజ్ ఉండెజ్ ఉండ్రె డుడుదాన్ వన్ని వెయదు అందిస్తాన్. 49 మహికార్”, ఇనిక కిమ, ఏలియ వాజి వన్నిజ్ తప్పిస్తాన్సు, సూణాట్”, ఇజి వెప్టాన్. 50 యేసు మరి డటం డేల్స్తాండ్రె పాణం డిఁస్తాన్. 51 అయి గడిఁయాదునె దేవుణు గుడిఁదు మని తెర ముస్సుహాన్ అడ్డి దాక కింజితాదె రుండి ముకెజ్ ఆతె. బూమి కద్దితాద్. సటుజ్బదెజ్ ఆతె. 52 దూకిజ్ రే ఆతెనె ముజాల సాతి మహి సీతి నిజాయితి మనికార్ నండొండార్ ఒడొల్దాన్ మర్జి నీజితార్. 53 వారు దూకిజాణిజ్ వెల్లి వాజి, యేసు సాతి వరిబాణిజ్ మర్జి నిజితి వెనుక దేవుణు వన్నివందిజ్ కేట కితి పట్టుమదు †† సాన్ని నండొండారిజ్ తోరె ఆతార్. 54 నదాతివతి ‡ వెటయేసుజ్ కాపకెజి మహికార్ బూమి కద్దినిక, మరి జగ్గితికెజ్ విజు సుడఁజి నండొ తియెల్ ఆతార్. “పిండ్రు, నిజమె దేవుణు మరిసినె”, ఇజి వెప్టాన్. 55 నండొండెక్ బోదెక్ కండెక్ దూరమ్దాన్ సుడఁజి మహె. వారు యేసుజ్ అవ్సరం ఆతికెజ్ కిజి గలిలయదాన్ వన్నివెట వాతికెజ్. 56 వన్యా లొఇ మగ్దలెనె మరియాని, యాకోబు, యోసె ఇని వరి అయ్సె ఆతి మరియని జెబెదాయి మరిసిరిజ్ అయ్సె బానె మహార్.

యేసుజ్ మూస్సిక

57-58 యేసుజ్ లొజిజి మనికానాతి అరిమతా ఇని పట్టుమదికాన్ యోసీపు ఇని ఒరెన్ అస్తి మన్నికాన్. పాద్దు ఆతివెలె, వాండ్రు పిలాతు డగ్రు సాహొండ్రె యేసు ఒడొల్ లొస్తాన్. యేసు ఒడొల్ వన్నిజ్ సీదెజ్ ఇజి పిలాతు ఆడ్ర సితాన్. 59 యోసీపు అయి ఒడొల్ లొస్తాండ్రె నెగ్గి తెలూని పాతెజాణిజ్ †† సుటిసి, సటుదిజ్ దొల్పిస్తి, వన్ని వందిజ్ తయార్ కితి మహి కొత్త దూకిదు ఇడఁతాన్. 60 ఉండ్రె గుండ్రాని సెప్ట పణకు సడిపిసి దూకిదిజ్ అడు కితాండ్రె సాహాన్. 61 మగ్దలెనె మరియాని మరి ఉండ్రె మరియ అబ్బె దూకిదిజ్ ఎద్రు బస్సెమహె.

దూకిదిజ్ కాప్ కిజినార్.

62-63 మర్సనాండిజ్, ఇహిజు విస్త్రాంతిదినం వందిజ్ తయార్ ఆని దినం వెనుక, పెరి పుజెరిజుని, పరిసయ్రు పిలాతు డగ్రు కూడఁజి వాతారె, “బాబు, అయి అబద్దం వెప్పి మొసెం కితికాన్ బక్కితి మహివలె, “మూండ్రి దిన్మకు ఆతి వెనుక నాను మర్జి నీజ్నాలె” ఇజి వెప్టా మహిక మజి ఎతు మనాద్. 64 అందెజె మూండ్రి దిన్మకుదాక దూకిదిజ్ నెగెండ సుడఁదెజ్ ఆడ్ర సెట. సెల్లిజు వన్ని సినూర్ వాజి వన్నిజ్ పెర్జి ఒసి, వాండ్రు సాతి వరి బాణిజ్ మర్జి నిజితాన్, ఇజి లోకురిజ్ వెహ్నార్. ఆహె కితిజు కడెవెరిదిక మొదొహిదనిజ్ ఇంక మరి ఒదె మోసెం ఆనాద్”, ఇజి వెప్టాన్.

65 అందెజె పిలాతు, “కాప్ కినివరిజ్ ఒసి మీరు కియుదాన్ కిదెజ్అట్టి లెకెండె దూకిదిజ్ జాగర్త కాపకెదు”, ఇజి వరిజ్ వెప్టాన్. 66 వారు సాన్ని అయి దూకిదిజ్ సెలు పాకిస్తారె, జాగర్త సుడఁదెజ్ కాప్ కిని వరిజ్బ ఇడఁతార్.

† 27:46 కీర్తన 22:1. †† యెరూసలేం. ‡ సయ్సమది వంద మణిసిరిజ్ సడిపిసికాన్. †† ఉండ్రె రకం గొప్ప విలువాతి సునాజ్ మన్ని పాతెజ్.

యేసు మరణి నిజీజినాన్

28 విస్తాంతిదినం గడస్తి సాహి వెనుక, వారమ్దిజ్ మొదోహి దినమ్దు జాయ్ అజి మహివలె, మగ్దలెనె మరియాని మరి ఉండ్రీ మరియు దూకిదు సుడెడెజ్ సాహార్. ² వెటనె బూమి కద్దితాద్. ఎందనిజ్ ఇహిజ పరలోకమ్దాన్ ఒరెన్ దేవుణు దూత డిగిత వాత్తాండ్రె అడు మహి పణుకు ఎర్గిసి దని ముస్సు బస్త మహాన్. ³ అయ దూత ఒడోల్ మిర్గిని జాయ్ లెకెండ్ మహాద్. వన్ని సాక్సెజ్ గాండులెకెండ్ తెలాజ్ మహా. ⁴ వన్నిజ్ సుడెజి కాప్ కినికార్ తియెల్ ఆతారె వణక్కి వరి పాణం సాహి లెకెండ్ అత మహార్. ⁵ దేవుణు దూత అయ బోదెకాజ్ సుడెజి, “మీరు తియెల్ ఆమాట్. సిలువ పాకె ఆతిమన్ని యేసుజ్ మీరు రెబాజినిదెర్ ఇజి నాను నెసిన. ⁶ వాండ్రు ఇబ్బె సిల్లెన్. వాండ్రు వెప్తి లెకెండ్ నె మరణి నిజీతాన్. రదు, వాండ్రు గూర్తిమహి బాడి: సుడెదు. ⁷ మీరు బేగి సాన్ని వాండ్రు సాతి వరిబాణిజ్ మరణి నిక్తాన్. వాండ్రు మిజి ఇంక ముజాల గలీలయ సాన్నినాన్. మీరు అబ్బె వన్నిజ్ దసూల్ ఆనిదెర్, ఇజి వన్ని సిసూరిజ్ వెవ్తు. ఇదిలో యాక ఏలు నాను మిజి వెప్సిన ఇజి వరిజ్ వెప్తాన్. ⁸ అందెజె అవిక్ తియెల్ ఆజి గొప్ప సర్దదాన్ వన్ని సిసూర్జ యా మాటెజ్ వెప్తాజ్ ఉహ్క్కి సాహా. ⁹ వెటనె యేసు వన్కా ఎర్దు తొరె ఆతాండ్రె, “మిజి నెగెండ్ మనిద్”, ఇజి వెప్తాన్. అవిక్ వన్ని డగ్రు వాజి పాదమ్కు అసి వన్నిజ్ వడ్గి మాడిస్సి. ¹⁰ నస్తివలె యేసు, “మీరు తియెల్ ఆమాట్. మీరు సాన్ని నా కూలెజ వెట గలీలయదు సాండ్రు ఇజి వెవ్తు. వారు అబె నజి దసూల్ ఆనార్లె”, ఇజి వనకాజ్ వెప్తాన్.

¹¹ అవిక్ సాన్నిమహిజ్, దూకిదిజ్ కాప్ కిజి మహికార్ సెగొండార్ పట్టుమ్దు సాహారె, జగ్గితి నజతిజ్ విజా పెరి పుజెరిజ వెట వెప్తాన్. ¹²⁻¹³ అందెజె వారు లోకురి పెద్దెల్జ వెట కూడెజి వాతారె ఉండ్రీ ఆలోసనం కితార్. వారు అయ సయనమ్ది వరిజ్ నండ్ డబ్బుజ్ సితారె, “మాపు నిర్త కిజి మహివలె వన్ని సిసూర్ మదరెతు వాతారె వన్నిజ్ పెప్తా ఒతారె ఇజి మీరు వెవ్తు. ¹⁴ యా మాట అతికారి గిబ్బుదు సాహిజ మాపు వన్నివెట వర్గిజి మిజి ఇనికబా రెవండ సూణాప్లె”, ఇజి వరిజ్ వెప్తాన్. ¹⁵ అందెజె అయ సయనమ్దికార్ డబ్బు అస్తారె వరిజ్ వెప్తావజనె కితార్. యా డొజకత ఏలుబా యూదురి లొఇ సాటె ఆజినె మంజినాద్. ¹⁶ పదకొండు మన్ని సిసూర్ యేసు వరిజ్ వెప్తి మన్ని గలీలయాది గొరొత్ సాహార్. ¹⁷ వారు వన్నిజ్ సుడెతిజ్ వన్నిజ్ పాగ్డిజి మాడిస్తార్. గాని సెగొండార్ అనుమానం ఆతార్. ¹⁸ నస్తివలె యేసు వరి డగ్రు వాతండ్రె, “పరలోకమ్దుని బూమి ముస్సు విజా అతికారమ్కు దేవుణు నజి సిత మనాన్. ¹⁹ అందెజె మీరు సాన్ని విజా జాతిజాణి వరిజ్ నా సిసూర్ కిదు. బుబ్బు పేరుదాన్, మరిన్ పేరుదాన్, దేవుణు ఆత్మ పేరుదాన్ వరిజ్ బాప్తినం సీదు. ²⁰ మరి నాను మిజి ఆగ్గు సితాలెకెండ్, నాను మిజి నెస్పిస్తి విజా వనకాజ్ లోజిజి మండ్రెజ్ ఇజి వరిజ్ నెస్పిస్తు. ఇదిలో నాను యా లోకమ్ది ఆక్కర్ దాక ఎలాకాలం తవ్వండ మీవెట మంజిన”, ఇజి వరిజ్ వెప్తాన్.

మార్కు

నెల్ల కిబిసినిక

యా పుస్తకం రాస్తికాన్ మార్కు, పిండ్లు బర్నబెజ్ దడ్లుదికాన్. విన్నిజ్ మరి ఉండ్రి పేరు యోహాను ఇజిబా కూక్కార్. బర్నబని పవులు నెల్లదాన్ పేతురువెట కూడఃజి క్రీస్తు సేవపణి కిదెజ్ మార్కుజ్ అవ్కానం దోహక్తాద్. యా సువార్త రాస్తెజ్ పేతురుబాణిజ్ నెస్తాండ్రె రాస్తాన్ ఇజి అర్దమాజినాద్. రాస్తి కాలం క్రీస్తు యా లోకమ్దు వాజి సాజి మర్రి నిజితివెనుక సెగం వంటెజ్ గడఃస్తివెనుక రాస్తాన్. ముకెలమతిక, క్రీస్తు గొప్ప పేరి బమ్మాతి పణిజ్ కిత్తి దేవులు మరిసి ఇజి, దేవులుదిజ్ సేవ కితికాన్ ఇజి, మార్కు రాసి తోరిస్తాన్. క్రీస్తు వెప్పి బోదదిజ్ ఇంక క్రీస్తు కిత్తి బమ్మాతి గొప్ప పేరి పణిజ వందిజ్ లాపు వెప్పి రాస్త మనాన్. క్రీస్తు కిత్తి గొప్ప పేరి బమ్మాతి పణిజ్ వద్దెనిమితి రాస్త మనాన్. నాలిగెనె కతెజ్వజ రాస్తాన్.

యోహాను దేవులు మాటసాటిసినాన్

1 దేవులు మరిసి ఆతి యేసు క్రీస్తు † వందిజ్ సువార్త ఇబ్బె మొదోలీసినాద్. 2 పూర్బ దినమ్కాజ్ ముజాల్ దేవులు వన్ని మరిసిజ్ వెప్పి మాటెజ్ యెసయ ప్రవక్త ఈహు రాస్త మహాన్. "ఇదిలో, నాను నా కల్లు తన్నివన్నిజ్ నీ ముజాల పాక్సిన. లోకు నిజి డ్గరు కిదెజ్ ఇజి వాండ్రు నీ ముందల నీ సరి నెగెండ్ కినాన్ †. 3 బిడిమ్బూమిదాన్ వాండ్రు ఈహు డెల్లి వెప్పినాన్ ప్రబుజ్ లోకుడగు వాదెజ్ సరి తయర్కిదు. ప్రబుజ్ లోకుడగు వాదెజ్ సరి తినాజ్ కిదు ‡. 4 యెసయ ప్రవక్త వెప్పివజ యోహాను బిడిజ్ బూమిదు వాతాన్. "లోకుర్ పాపమ్కు డిసిసిజి బాప్తినం లాగి ఆదు. దేవులు పాపమ్కు సెమిస్నాన్ ఇజి వెప్పి యోహాను బానె లోకాజ్ బాప్తినం సీజి మహాన్.

యేసు బాప్తినం లాగి ఆజినాన్

5 యూదయ దేసెమ్దికార్ విజెరె, యెరూసలేం పట్టుమ్దికార్ విజెరె సాత్తారె యోహాను డగు వాతార్. వారు పాపమ్కు ఒప్ప కొటార్. యోహాను వరిజ్ యెర్దాన్ గడ్డాదు బాప్తినం సితాన్. 6 యోహాను ఒంటె బులుస్కాణిజ్ తయార్ కిత్తి సాక్కి పార్వాజి, నడఃముదు తోలు బెల్లు తొహ్తా మహాన్. వాండ్రు మెపిలెక్కి అడివి తేనె తింజి మహాన్. 7 యోహాను లోకాజ్ ఈహు వెప్పి వెప్తాన్, "నా వెనుక ఒరెన్ వానాన్. వాండ్రు నజి మిస్తి నండ్రా పెరికాన్. వన్ని జోడు బెల్లు కూతెజ్బా నాను ఏవటితికాన్ అవ. 8 నాను మిజి ఏరుదు బాప్తినం సీజిన. నా వెనుక వానికాన్ దేవులు ఆత్మదాన్ బాప్తినం సీనాన్". 9 ఆ దినమ్కాజ్ ఒరెండు యేసు గలీలయదు మన్ని నజరేతుదాన్ యెర్దాన్ గడ్డాదు వాతాన్. అబ్బె యోహాను యేసుజ్ యెర్దాను గడ్డాదు బాప్తినం సితాన్. 10 గడ్డాదాన్ వెల్లి వాజిమహిజ్ ఆగాసం రే ఆతాదె దేవులు ఆత్మ పావరపాటి లెకెండ్ వన్ని ముస్సు వానిక యేసు సుడఃతాన్. 11 "సీను నాను ప్రేమిసిని నా మరిన్. నీ వందిజ్ నాను నండ్రా సర్ద ఆజిన", ఇజి పరలోకమ్దాన్ ఉండ్రి కంటం వాతాద్.

12 వెటనె దేవులు ఆత్మ యేసుజ్ బిడిమ్ బూమిదు పాక్తాన్. 13 వాండ్రు అబ్బె నలవయ్ రోస్సు రెయుపాగల్ మహాన్. సయ్యాన్ యేసుజ్ తప్ప కిబిసిజ్ వరిన కిబి సుడఃతాన్. అబ్బె అడివి జంతుజ్వెట మహాన్. దేవులుదుతార్ వన్నిజ్ నెగెండ్ సుడఃతార్.

యేసు సిసూరిజ్ కూక్కినాన్.

14 హీరోదు రాజా యోహానుజ్ జెలిదు ఇడితివెనుక యేసు గలీలయదు సాహండ్రె దేవులుసువార్త బోదిస్తాన్. 15 "దేవులు ముజాల్లె ఏర్పాటు కిత్తి టయం ఏలు వాతాద్. దేవులు ఏలుబడి కిని గడియ డగు ఆత మనాద్. మీ పాపమ్కు ఒప్పకొడఃజి డిసిసిదు, నాను వెప్పి సువార్త నమ్మదు", ఇజి యేసు వరిజ్ బోదిస్తాన్.

16 యేసు గలీలయ సమ్దరం ఒడ్డుదాన్ సాన్సిమహిజ్ సీమోనుజ్ వన్నితంబెరెసియాతి అంద్రెయెజ్ సుడఃతాన్ వారు సమ్దరమ్దు వల పాక్కి మొయేజ్ అసి మహార్. ఎందానిజ్ ఇహిజ వారు జాలెరిజు. 17 "నా వెట రదు. లోకాజ్ ఎలాగ నా సిసూర్ కిదెజ్ ఇజి నెప్పిస్తాలె", ఇజి యేసు వరిజ్ వెప్తాన్. 18 వారు వెటనె వలేజ్డిసి వన్నివెట సాహార్. 19 యేసు కండెక్ దూరం నడిజి సాహిజ్ జెబెదయ మరిసి యాకోబుని, యాకోబు తంబెర్ని యోహాను, వరిడోణిదు బని వలేజ్ నెగెండ్ కిబి మహి సుడఃతాన్. 20 యేసు వరిజ్ సుడఃతివెటనె కూక్తాన్. వారు అప్పానిజ్, వన్నివెట కూడఃజి పణికినివరిజ్ డోణిదు డిసి యేసువెట సాహార్.

యేసు దెయమ్దిజ్ ఉల్పినాన్

21 యేసుని వన్నిసిసూర్, కపెర్నాము ఇని పట్టుమ్దు సాహార్. విస్తాంతిదినమ్దు యేసు యూదురి మీటిజ్ ఇండ్రా సాహండ్రె నేరెప్పిజ్ మొదోలీస్తాన్. 22 యేసు నెప్పిస్తిక విహార లోకుర్ నండ్రా బమ్మ ఆతార్. ఎందానిజ్ ఇహిజ యూదురి రూలు నెప్పిస్తివరి లెకెండ్ ఆఎండ నండ్రా అతికారమ్దాన్ మన్ని

† లోకాజ్ రక్తిజ్ దేవులు ఏరెపాటు పాక్తాన్. †† మలాకి 3:1. ‡ యెసయ 40:3.

వన్నలెకండె నెన్పిస్తాన్. 23 నస్తివలె పరి మీటిజ్ ఇండ్రా దెయం అస్తి మహికాన్ ఒరెన్ మహాన్. 24 వాండ్రు "నజరేతుదికి యేసు, మా వెట నిజి ఇని పణి? మా పణి విజా అడు కిదెజ్ వాతిదా? నీను ఎయెండ్రా ఇజి నాను నెసిన. నీను దేవుణు బాణిజ్ వాతి నెగ్గి వాండ్రు", ఇజి డటం గగోలాజి వెప్తాన్. 25 అందెజె యేసు, "అల్లెజి మన్అ. విన్నిజ్ డిసి వెల్లి రల", ఇజి ఆ దెయమ్దిజ్ కోపం దాన్ వెప్తాన్. 26 అయవలె అయ దెయం అది అస్తిమహివన్నిజ్ దూక్కి డట్టం డేల్స్తాదె డిస్త సాహద్. 27 అబ్బె మనికార్ విజెరె ఇక సుడెతారె నండో బమ్మ ఆతార్. "ఇక ఇనిక? వీండ్రు కొత్త సజతిజ్ నెర్పిసినాన్. దేవుణు సత్తు దాన్ అతికారమ్దాన్ వీండ్రు సాన్అ ఇజి దెయమ్కాజ్ వెప్పినాన్. అవి డిసి సాస్సినె", ఇజి ఒరెన్ వెట ఒరెన్ వర్గితార్. 28 వన్ని వందిజ్ మాటెజ్ అయా గలీలయ ప్రాంతం సుటుల విజా వెటనె సెద్రితె.

యేసు నండొండారిజ్ నెగెండె కిజినాన్.

29 వారు మీటిజ్ కిని ఇండ్రాణాజ్ సాస్సి యాకోబు, యోహానువెట, కూడితారె సీమోను, అంద్రెయ ఇని పరి ఇండ్రా సాహార్. 30 సీమోను మీమ్మి నోబు అస్త మహాద్. వారు వెటనె దని వందిజ్ యేసు వెట వెప్తార్. 31 యేసు దని డగ్రు వాజి కీదిజ్అసి దనిజ్నెక్తాన్. నస్తివలె నోబు డిస్తాద్. నోబు డిస్తాజ్ అది పరిజ్ ఉండెజ్ సితాద్. 32 పార్దు సాహి ఆతివలె లోకుర్ నండో నండో రకమ్కాణిజ్ బాద ఆజి మహిపరిజ్ దెయమ్కు అస్తివరిజ్ విజెరిజ్ యేసు డగ్రు తత్తార్. 33 పటనమ్దికార్ విజెరె ఆ ఇల్లు ముజాల్ కూడిత మహార్. 34 యేసు నండో రకమ్కాణి జబ్బుమహి నండొండారిజ్ నెగెండె కిజినాన్. దెయం అస్తివరిబాణిజ్ వన్కాజ్ ఉల్వ్తాన్. వీండ్రు దేవుణు మరిసి ఇజి దెయమ్కు నెస్తి మహి అందెజె వాండ్రు వన్కాజ్ వర్గింండ కిజినాన్.

యేసు గలీలయదు సాటిసినాన్

35 మర్చు నాండిజ్ యేసు సీకటి మంబునె నిజ్జి పెందల ఎయెర్ సిల్లి ఉండ్రెబాడ్డిదు సాహాండ్రె పార్దనం కితాన్. 36 సీమోను, వన్ని వెట మహికార్, యేసుజెరెబాజి మహార్. 37-38 యేసుజ్ సుడెతారె, "విజెరె నిజి రెబాజినార్", ఇజి వెప్తాజ్ యేసు, "డగ్రు మని మరి పట్టుమ్కాజ్బా సానాల్. నాను అబెబా దేవుణు మాటెజ్ సాటిస్టెజ్టలె. దన్ని వందిజె నాను వాత మన్న", ఇజి వెప్తాన్. 39 యేసు గలీలయ విజా బూలాజి యూదురు మీటిజ్ కిని ఇల్కాజ్ బోద్రిస్తాన్. దెయం అస్తి పరిబాణిజ్ వన్కాజ్ ఉల్వ్తాన్.

యేసుప కుష్టు రోగం ఆతివన్నిజ్నెగెండె కిజినాన్.

40 ఒరెన్ కుష్టు రోగం మనికాన్ యేసు డగ్రు వాజి ముణుకుజ్ ఊర్జి, "నిజి ఇస్టం మహిజ నజి నెగెండె కిదెజ్ అల్నె", ఇజి బతిమాలితాన్. 41 యేసు వన్ని ముస్సు కనికారం ఆజి కియు సాస్సి వన్నిజ్ ముట్టి, "నజి ఇస్టమ్నె, నీను నగెండె ఆల", ఇజి వెప్తాన్. 42 వెటనె వన్నిజ్ మహి జబ్బు డిస్తాద్. వాండ్రు నెగెండె ఆతాన్.

43-44 అయవలె యేసు, "ఎయెవెటబా ఇనికబా వెహ్మ. నీను తినాజ్ సాస్సి నీ ఒడెఃల్యూద పుజెరిజ్ తోరిన్అ. నీను నెగెండెఆతి వందిజ్ మోసె ముజాల్ ఆడ్ర సెతివజ దేవుణుదిజ్నెంత సెల" అహె నీను నెగెండె ఆతి ఇజి లోకురిజ్ తోరిన్అ", ఇజి కనితం వెప్పి పాక్తాన్. 45 గాని ఆ నెగెండెఆతికాన్ సాస్సి వాండ్రు నెగెండెఆతిక విజెరిజ్ మరి ఒద్దె వెప్తాన్. అహెబా విజాబాణిజ్ నండో లోకుర్ యేసుబాన్ వాతార్.

యేసు కిక్కు కాల్కు అర్తివన్నిజ్ నగెండె కిజినాన్

2 సెగం రోస్సు ఆతి వెనుక యేసు మరి కపెర్నహముదు వాతాన్. వాండ్రు ఇండ్రా వాతాన్ ఇని విజెరె వెహార్. 2 నండో లోకుర్బాన్ కూడిజి వాతార్. అస్తెజ్ అల్నె లోకుర్వాతార్. అందెజె ఇల్లు లోఇబా అర్బుదుబా బాడ్డిః సిల్లెండ ఆతాద్, యేసు పరిజ్ దేవుణు మాటెజ్ బోద్రిస్తాన్. 3 కిక్కు కాల్కు అర్తి వన్నిజ్ † నాల్వెర్ పిండిత తతారె సెగెండార్ యేసుబాన్ వాతార్. 4 అబ్బె నండో లోకుర్ మహిజ్ వన్నిజ్ యేసు డగ్రు ఒతెజ్ అల్వంండ ఆతార్. అందెజె యేసు నిహిమహి జాగముస్సు మెడదిజ్ బోరోకితారె ఆ జబ్బు ఆతివన్నిజ్ సాహదాన్ యేసు నిల్లిమహిబాన్ డిస్తార్ ††. 5 వన్నిముస్సు మని పరి నమకం సుడెతాండ్రె, యేసు జబ్బు ఆతివన్నివెట కూలయెజ్ నీ పావమ్కు సెమి ఆతె మన్న", ఇజి వెప్తాన్. 6 అబ్బె సెగెండార్ యూదురి రూలు నేర్పిన్కార్ బస్త మహార్. వారు మనుస్సుదు. 7 వీండ్రు ఎందానిజ్ ఈహు వెప్పినాన్. వీండ్రు దేవుణువెట సమానం ఆతికాన్ ఇజి దేవుణుదిజ్ దూసినాన్. దేవుణు ఒరెండ్రె పావమ్కు సెమిస్పికాన్ గదె", ఇజి వారు ఒడిజితార్.

8 వారు ఈహు ఒడిజినిక యేసుజ్ వెటనె తెలితాద్. యేసు పరిజ్ వెప్తాన్, "ఎందానిజ్ మీరు మీ మనుస్సుదు అహె ఒడిజినిదెర్? 9 యా జబ్బుది వన్నిజ్ నీ పావమ్కు సెమి ఆతె మన్న ఇజి వెప్పిక సులునా? నీను నిజ్జి సావ పెర్ది నడిల ఇజి వెప్పిక సులునా? 10-11 లోకు మరిసి ఆతి నజి లోకురి పావమ్కు సెమిస్పెజ్ బూమి ముస్సు అతికారం మనాద్. ఇజి మీరు నెస్తిజ్వలె ఇజి వెప్తాండ్రె కిక్కు కాల్కు అర్తి వన్నిజ్ "నాను నిజి వెప్పిన, నిజ్అ, నీ సావ అసి ఇండ్రా సాన్అ", ఇజి వెప్తాన్. 12 వెటనె ఆ కిక్కు కాల్కు అర్తికాన్ నిజ్జి వన్ని సావ అసి వారు విజెరె సుడెజి మహిజ్ నడిజి సాహాన్. అక్కు సుడితారె వారు విజెరె బమ్మ ఆతార్. "నిన్ని పణి మాట్ ఎసెజ్బా తోవ్" ఇహార దేవుణుదిజ్ స్తుతి కితార్.

పను పెర్సికాన్ లేవిజ్ యేసు కూక్కినాన్

13 యేసు మరి గలీలయ నమ్దరం గట్టుదు సాహాన్. లోకుర్ వన్ని డగ్రు వాతిజ్ పరిజ్ దేవుణు మాటెజ్ నెస్పిస్తాన్. 14 యేసు నడిజి సాస్సి మహిజ్ అల్వయేఇని వన్ని మరిసి లేవి ‡ ఇని పను పెర్సికాన్ ఒరెన్ వన్ని ఆపిసుదు బస్తమహిక సుడెతాన్. యేసు వన్నిజ్ "నీను నా సిసుడు ఆల. నా వెట రల", ఇజి

† వక్రవయపు ఇనిజబ్బుదాన్ నడిదెజ్ అల్నాన్ †† అయ దేసంతు మెడడెజ్ ఎలాగ తయార్ కిసార్ ఇహెజి పటెజ్ వప్పి దన్నిముస్సు డుల్లిదాన్ పణుకుజ్దాన్ మేడ పాక్తార్. మేడ ముస్సు ఎక్తెజ్ ఇహెజి పావన్కాజ్ మన్న ‡ విన్నిజ్ మరి ఉండ్రె వీరు మత్తుయి విన్ని పణి వన్నెపెర్సికాదె.

వెహ్సాన్. లేవి నిజజ్ఞాండ్ర యేసువెట సాహాన్. 15 వెనుక యేసు లేవి ఇండ్ర బోజెనమ్దిజ్ బస్తాన్. సెఇ పణి కినికార్ అబ్బె మహార్. వను పెర్నికార్ వారు యూదురు వెహ్సా రూలు వజ నడిఃఇకార్. ఎసాండారో లోకుర్ యేసువెట మహార్. వారుబా యేసు, వన్ని సిసూర్వెట బోజెనమ్దిజ్ బస్తాన్.

16 పరిసయరు లోఇ మన్ని యూదురి రూలుజ్ నెస్పిస్నికార్ వనిజ్ నుడఃజి “ఎందనిజ్ వీండ్రు వన్నుపెర్నివరివెటని పాపం కినివరివెట ఉణిజినాన్”, ఇజి సిసూరిజ్ వెన్బాతార్. 17 యేసు ఆ మాట వెంజి “నెగెండ్ సిల్లివరిజ్ డాక్టరు కావాలి. నెగెండ్ మన్నివరిజ్ ఎందానిజ్లు మరి డాక్టరు. నీతి నిజమాతి మన్నివరిజ్ అవద్. పాపం కితివరిజ్ కూక్తైజె నాను వాత మన్ను, ఇహాన్.

ఉపాస్ వందిజ్ యేసుజ్ వెన్బాతార్

18 అయవలె బాప్తిసం సీని యోహాను సిసూర్ని, పరిసయరు, యూదురి రూలువజ ఉపాస్కిజి మహార్. సెగొండార్ లోకుర్ వాజి యేసుజ్ వెన్బాతార్, “యోహాను సిసూర్ ఉపాస్కిజినార్, పరిసయరి సిసూర్ ఉపాస్కిజినార్, ఎందానిజ్ నీ సిసూర్ ఉపాస్కివెర్?”. 19 యేసు ఈహు వెహ్సాన్, “పెండ్లి కూలెజ్ పెండ్లిదజ్డఃవెట మన్నివెలె ఉపాస్ మండ్రజ్ అల్లూరా? పెండ్లిదజ్డఃవరివెట మన్నివలె వారు ఉపాస్ మండ్రజ్ అట్వెర్. 20 పెండ్లిదజ్డఃవెర్ పరి నడిఃమిహాన్ ఒని దినం వానాదెలె. అయ రోజు వారు ఉపాస్మంజినార్. 21 యేసు మరి వెహ్సాన్: “ఎయెర్బా పాడాయ్ పాతదు కొత్త ముక్క, కూడఃప్పి గుత్వెర్. అహె కితిజ అయకొత్త పాత ముక్క వడాయి పాతదిజ్ లాగ్నాదె బొరో ఒద్దె లాపు ఆనాద్. 22 “ఎయెర్బా పడాయ్ తోలుసన్నిదు కొత్త ద్రాక్కుకలు వాక్వెన్. అహె కితిజ కొత్త ద్రాక్కుకలు పాజు వాజి అయ సన్ని పెడెల్నాద్. ద్రాక్కుకలు విజా వాజ్న సానాద్. సన్ని పాడునాద్. అందెజె కొత్త ద్రాక్కుకలు కొత్త తోలు సన్నిదునె వాక్తైజె”.

యేసు విజా వన్యాజ్ ముస్సు ప్రబు

23 ఉండ్రి విస్తాంతి దినమ్దు యేసుని సిసూర్ పంట గుడ్డెదాన్ నడిఃసి సాన్ని మహార్. అయవలె సిసూర్ సెరెక్ తెప్పి మహార్. 24 పరిసయరు అయక సుడఃతారె, “ఇదిలో ఎందానిజ్ వారు విస్తాంతి దినమ్దు రూలుదిజ్ తప్పినార్. ఇజి వన్నిజ్ వెహ్సాన్.

25 అయవలె యేసు వెహ్సాన్, “దావీదురాజు, వన్నివెట మహి లోకుర్ బజ కట్టిజ్ వాండ్రు ఇనిక కిత్తాండ్ర ఇజి మీరు ఎసెజ్బా నద్విఇదెరా? 26 అబ్యాతారు ఇనికాన్. విజెరె పుజెరిజ ముస్సు, పెరి పుజెరి మహివలె దావీదురాజు నమాజ గుడారమ్దు డుఃగితాండ్ర, దేవుణు ఎర్దు ఇడ్డి రొట్టెజ్ లాగితాండ్ర తిహాన్. అక్క పుజెరి తప మరి ఎయరెర్బా తిండ్రజ్ అవద్ గాని తిహాండ్ర వన్నివెట మహివరిజ్బా సిత్తాన్.

27 వెనుక యేసు వరిజ్ వెహ్సాన్, “ముజాల్ దేవుణు లోకుదిజ్ విస్తాంతిదినం ఏర్పూటు కిత్తాన్. గాని విస్తాంతి దినమ్వందిజ్ లోకుదిజ్ ఏర్పూటు కివెన్. 28 లోకుమరిసి ఆతి పిట్టి నజి విజా వన్యాజ్ ముస్సు అతికారం మనాద్. మరి, విస్తాంతి దినమ్దు ఇనిక కిదెజ్ ఇజి లోకాజ్ వెహ్సాజ్బా అతికారం మనాద్.

యేసు కియు అర్తివన్నిజ్ నెగెండ్ కిజినాన్

3 మరి యేసు యూదురి మీటిజ్ ఇండ్ర సాహాన్. అబె ఉండ్రి కియు అర్తికాన్ ఒరెన్ మహాన్. 2 అబ్బె మహికార్ సెగొండార్ యేసు యా జబ్బుదివన్నిజ్ విస్తాంతిదినమ్దు నెగెండ్ కియాండ్ర ఇజి బాగ సుడఃజి మహార్. ఎందనిజ్ ఇహిజ విస్తాంతిదినమ్దు ఇని పణిబా కిదెజ్ అవద్ కాక యేసుజ్ ఇని దన్నిజ్బా తప్ప మొప్పైజ్ ఇజి సుడఃజి మహార్. 3 యేసు కియు అర్తివన్నిజ్, “విజెరి ముజాల వాజి నిల్అ”, ఇజి వెహ్సాన్.

4 నస్తివలె యేసు, “దేవుణు మోసెజ్ సీతి రూలువజ విస్తాంతి దినమ్దు నెగ్గి పణి కిదెజా, సెఇ పణి కిదెజా? పాణం అర్తిపైజ్నా? ఇజి వరిజ్ వెన్బాతాన్. గాని వారు అలెతార్. 5 వరి మన్ను గ్రాజిమహిజ్ యేసు నండ్ దుకం ఆతాన్. కోపం దాన్వరిజ్ సుడఃతాన్. అయ కియు అర్తివన్నివెట, “నీ కియు నవ్అ”, ఇజి వెహ్సాన్. వాండ్రు కియు సాప్తిజ్ ఆ కియు నెగెన్ ఆతాద్. 6 నస్తివలె పరిసయరు వెల్లి సాహి వెటనె హెరోది ఇని వరివెట కూడఃజి యేసుజ్ ఎలాగ్నప్పైజ్ ఇజి ఆలోసనం కిత్తార్.

యేసువెట మంద లోకుర్ సాన్నినార్

7 అందెజె యేసు వన్ని సిసూర్వెట గలీలయ సమ్దరంబాన్ సాహాన్. మందలోకుర్ గలీలయదాన్ వరివెనుక సాహార్. 8 యేసు కిత్తి గొప్ప పణిజ వెంజి యూదయ దేసిమ్దు మన్ని విజా నాహ్మణికార్, యెరూసలేందాన్, సమ్దరం పడకాద్ తూరు సీదోను ఇని పట్టుమి ప్రాంతమ్కాజ్ వాతి నండ్ లోకుర్ వన్నిబాన్ వాతార్. 9 నండ్ లోకుర్ వాజి మహిజ్ నిల్లిమండ్రజ్ ఇహాకు ఆజి దన్ని ముస్సు ఆవండ్ మండ్రజ్ ఉండ్రి ఇజి డోణి తసి బానె ఇడ్దు ఇజి సిసూర్ వెట యేసు వెహ్సాన్. 10 ఎందానిజ్ ఇహిజ నండ్ండారిజ్ యేసు నెగెన్కితాన్. అందెజె జబ్బు ఆతిమహికార్ విజెరె యేసుజ్ ముట్టైజ్ ఇజి నెక్కె ఆజి సాహార్. 11 దెయం అస్తికార్ యేసుజ్ సుడఃతివెటనె వన్ని ముజాల్ ముణుకుజ్ ఊర్జి, పడగ్జి మాడిఃస్తారె “నీను దేవుణు మరిసి”, ఇజి గగోలాతార్. 12 “నాను ఎయెన్ ఇజి ఎయెర్వెట వెహ్సాట్”, ఇజి యేసు వరివెట కసితం ఆడ్ర సిత్తాన్.

యేసు వన్నెండు మణిసిరిజ్ అపొస్తురువజ ఏర్పాటు కిజినాన్.

13 వెనుక యేసు ఉండ్రి గొరోత్ ఎక్కి సాహాండ్రె వన్నివెట ఒత్తెజ్ వాండ్రు కోరితివరిజ్ వన్ని డగ్రు కూక్తాన్. వారు వన్నిబాన్ సాహార్. 14 యేసు వన్నెండు మనిసిరిజ్ వన్నిబాన్ మండ్రజ్ ఇజి, దేవుణు మాట విజెరిజ్ వెహ్సావందిజ్ ఫాక్తైజ్ ఇజి ఏర్పాటు కిత్తాన్. (విరిజె అపొస్తురు ఇజి కూక్తాన్) 15 దెయమ్కాజ్ ఉల్పైజ్ అతికారం వరిజ్ సితాన్. 16-19 యా వన్నెండు మణిసిర్ ఎయెర్ ఎయెర్ ఇహిజ సీమోను (యేసు వన్నిజ్ పేతురు ఇని పేరు సితాన్) జెబెదయ మరిసిర్ యాకోబు, వన్ని తంబెర్సి యోహాను ఇనికార్ (యేసు వరిజ్ బోయనర్గనున్ ఇని పేరు సిత్తాన్. దన్ని అర్దం ఇనిక ఇహిజ దిడఃజినికార్ ఇజి) అందెయ, పిలిప్ప, బర్తోలోమయ,

మత్తయి, తోమా, అల్ఫయ మరిసి యాకోబు, తద్దుయి, యుదయ దేసెంవందిజ్ ఉసారాజిని సీమోను †, యేసుజ్ యూదురు అతికారిజ కీదు ఒవజెప్పికానాతి ఇస్కరియాతు యూద.

యేసు బయల్జెబ్బులు ఇని దెయం సాయందాన్ దెయమ్కాజ్ ఉల్పిసాన్ ఇహోర్.

20 యేసు ఉండ్రొ ఇండ్రొ వాతిజ్ మరి నండొ లోకుర్ అబ్బె కూడితార్. అందెజె యేసుజ్ని సిసూరిజ్, బోజనం కిదెజ్బా కాలి సిల్లెతాద్. 21 యేసు ఇండ్రొణికార్ యా సజతి ఏహారె వన్నిజ్ మత్తి సెద్రితాద్ ఇజి వెప్పి వన్నిజ్ అస్సెజ్ సాహోర్.

22 యెరూసలేమ్దాన్ వాతి యూదురి రూలుజ్ నెస్సిస్సికార్ వెహ్తార్, "దెయమ్కాజ్ నెయ్కి ఆతి బయల్జెబ్బులు †† విన్నిజ్ అస్తాన్. వన్ని సత్తుదాన్ వీండ్రు దెయమ్కాజ్ పేర్జినాన్", ఇజి వెహ్తార్.

23 నస్తివలె యేసు వరిజ్ కూక్కి వరిజ్ అర్దమాదెజ్ కత వజ ఈహు వెహ్తాన్, "సయ్యాన్ సయ్తానుజ్ ఎలాగ ఉల్పాన్. 24 ఉండ్రొ దేసమ్దికార్ వరిజ్ వారె జటిజాజి ఎర్లిజి మహిజ అయ దేసెం పాడానాద్. 25 ఉండ్రొ ఇండ్రొణికార్ వరిజ్ వారె జటిజాజి ఎర్లిజి మహిజ ఆ కుటం పాడానాద్. 26 సయ్యాన్ వన్ని గుంపుదు మన్నివరివెల జటిజాజి కేట ఆతిజ నండొ కాలం వరిముస్సు ఏలుబడి కిదెజ్ అట్వన్. 27 ఒరెన్ సత్తుమన్ని వన్నిజ్ ముజాల తోహోపిండ, ఎయెర్బా వన్ని ఇండ్రొ డుగ్గిజి సామనమ్కు ఒత్తెజ్ అట్వన్. ముజాల వన్నిజ్ తోహ్తిజానె డొజె కిదెజ్ అట్వన్ ‡. 28 నాను నిజం వెప్పెన, లోకుర్ కినివిజా పాపమ్కాజ్ని, దూసిసిని మాటెజ్ దేవుణు సెమిస్సాన్. 29 గాని దేవుణు ఆత్మదిజ్ దూసిస్తిజి వన్ని పాపం ఎసెజ్బా సెమిన్వన్. వన్ని పాపం ఎలా కాలం మంజినాద్". 30 యేసు ఈహు ఎందానిజ్ వెహ్తాన్ ఇహిజ సయ్యాన్ సాయమ్దాన్ యేసు దెయమ్కాజ్ ఉల్పిసాన్ ఇజి యూదురి రూలుజ్ నేస్సిసికార్ వెహ్తార్.

యేసు అయ్సి తంబెర్సిర్

31 యేసు అయ్సిని తంబెర్సిర్ వాండ్రు మన్ని ఇల్లుముజాల్ వాతారె యేసుజ్ కూక్కి తగ్గె ఇజి ఒరెన్వన్నిజ్ ఇండ్రొ షాక్తార్. 32 అయ ఇండ్రొ యేసు సురుల నండొ లోకుర్ బస్సు మహోర్. వారు వెహ్తార్, "సీ యాయ తంబెర్సిర్ వెల్లి సహారె నిజి కూక్కిసాన్". 33-34 దనిజ్ యేసు, "నా యాయ? నా తంబెర్సిర్ ఎయెర్ ఇజి నాను వెహ్". అబ్బె సురుల బస్తిమనివరిజ్ సుడెజి యేసు వెహ్తాన్, "ఇదిలో నా యాయని, నా తంబెర్సిర్". 35 "ఎందనిజ్ ఇహిజ దేవుణుదిజ్ ఇస్టమాతివజ కినికాండ్రె నా తంబెర్, నా తజి, నా యాయ ఇజి వెహ్తాన్.

విత్తు విత్తివన్ని కత

4 యేసు మరి ఒర్బు గలీలయ సమ్దరం పడెకాదు నెస్పిస్తిజ్ మొదోల్స్తాన్. మందలోకుర్ వన్ని డగు వాతిజ్ సమ్దరమ్దు ఉండ్రొ డోణిదు ఎక్కి బస్తాన్. లోకుర్ విజెరె సమ్దరం పడెకాదు నిహోర్. 2 అయవలె వాండ్రు నండొ సజతిజ కతవజ వరిజ్ నెస్సిస్సాన్. వాండ్రు ఉండ్రొ సజతి కత వజ ఈహు వెహ్తాన్.

3 సుడెదు, ఒరెన్ రయ్దు వాండ్రు విత్తు విత్తెజ్ సాహోన్.

4 వాండ్రు విత్తి మహిజ్ సెగం విత్తు సరి పడెకాదు అర్తె. ఆ పాటిజ్ వనకాజ్ పెహ్తె తిహె. 5-6 మరి సెగం విత్తు సటు ముస్సు లావ్ డుల్లి సిల్లిబాన్ అర్తె. డుల్లి లావు సిల్లితిజ్ అవి వెటనె నేర్తెగాని వెల లోఇ సాన్ఇజ్ పొద్దు సాసి ఎండ తాక్తివలె అవి సాతె సాహె. 7 మరి సెగం విత్తు సాప్పు తుపెజ్ లోఇ అర్తె. సాప్పు తుపెజ్ పిరిజి వనకాజ్ తిగితె. అందెజె వంట వండవతాద్. 8 మరి సెగం నెగ్గి బూమిదు అర్తె. అక్కెజ్ నేర్జి పిరితెనె విత్తి విత్తుదిజ్ ముప్పయ్ వంతుజ్ లెక్క వండెతె. 9 యేసు మరి వెహ్తాన్, "గిబ్బుజ్ ఒడెజి వెంజి అయవజ నడిజి మండ్రు".

10 యేసు ఒరెండ్రె మహిజ్ వన్నెండు మణిసిర్ సిసూర్ని మరి సెగొండార్, "సీను కత వజ నెస్పిస్తి మాటెజ అర్దం ఇనిక?" ఇజి వన్నిజ్ వెన్బాతార్.

11-12 అందెజె యేసు, "దేవుణు కిని ఏలుబడి వందిజ్ డాజితిమహి గొప్ప సజతిజ్ దేవుణు మిజి తెలివి కిత్త మనాన్. గాని మహివరిజ్ విజాబా కతవజ నెస్పిస్తిజ్ ఎందానిజ్ కతవజ వెహ్త ఇహిజ "వారు సుడిసార్ గాని తోవర్. వెండ్రెజ్ ఇహిజ వెంజినార్ గాని అర్దం కిదెజ్ అట్వన్. ఎందానిజ్ ఇహిజ వారు అర్దం కిజి వరి పాపమ్కు సెమిస్సాన్ ††" ఇహోన్. 13 యేసు వరివెల వెహ్తాన్, "రయ్దువన్ని వందిజ్ నాను కతవజ వెహ్తాక మిజి అర్దం ఆవదా? అహిజ నాను కతవజ వెహ్తాకెజ్ విజా మిజి ఎలాగ తెలిసాద్? 14 విత్తికాన్ దేవుణు మాట వెహ్తాకాన్. 15 సెగొండార్ విత్తు అర్తి సరి పడెకనన్నికార్. వారు వెహ్తావెలనె సయ్యాన్ వాజి ఆ మాటెజ్ లాగ్గి ఒసినాన్. 16 మరి సెగొండార్ విత్తు అర్తి సటువణుకు ముస్సు మన్ని ఇస్సా నన్నికార్. వారు దేవుణుమాట వెహ్తావెలనె సర్దదాన్ మన్నుదు ఇడ్వార్. 17 గానివెల లోఇ సాన్ఇలెకెండ దేవుణుమాట వరి మన్ను లోఇ సాన్వద్. వారు కండెక్ కాలం నమ్మిజి మంజినార్. దేవుణుమాట నమ్మితి వందిజ్ కస్టమ్కు మాలెజ్, వానెవెలె దేవుణు ముస్సు మన్ని వరి నమకం వెటనె డిస్సు సీనార్.

18-19 మరి సెగొండార్ విత్తు అర్తి సాప్పు తుపెజ్ నేర్తి బూమివజ మనార్. గాని ఎలాగ బత్తిదెజ్ ఇని వందిజ్ మన్ని విసారం, డబ్బు గణిసిని వందిజ్ మన్ని ఆస విజా కూడిజి వారు దేవుణుదిజ్ నమ్మిండ్ కిదెజ్ వారు వెహ్తా మాటదిజ్ అణసు తిగ్గిజి. వంట వండవండ ఆతిలెకెండ వారుబా ఆజినార్. 20 సెగొండార్ అర్తి విత్తునెగ్గి బూమిదువజ మనార్. వారు దేవుణుమాట వెంజి అర్దం కిజి దేవుణు ముస్సు నమకం ఇడ్వార్. నెగ్గి బూమిదు అర్తి విత్తు బస్తెణిదిజ్ ముప్పయ్ బస్సెజ్ అర్వయ్ బస్సెజ్ వంద బస్సెజ్ పండ్తివజ వారు మంజినార్."

† రోమాది ఏలుబడిదాన్ యూదుయ దేసమ్దిజ్ విడుదల కిదెజ్ ఉసార్దాన్ సుడెజిని యూదురు సజం మనాద్. అయా సజమ్దికాన్ ఒరెన్ సీమోను †† యాక సయ్యానుజ్ మరి ఉండ్రొ పేరు ‡ సత్తుమన్నికాన్ ఇజి యేసు సయ్యాన్ వందిజ్ వెహ్తానాన్. సయ్యాన్ ముస్సు యేసుజ్ సత్తు మనాద్ ఇజి వెహ్తానాన్. †† యెసయ 6:9,10.

దీవ జాయ్ సీనివజ కంతుద్ ఇడ్డెజ్

21 యేసు పరివెల ఈహు వెహ్సాన్, “దీవ కసిసి అబల మూక్కినొ మన్సుం అడిగినొ ఎయెరుబా ఇడ్వేర్. జాయ్ సీనివజ దీవ కంతుదు ఇడ్వార్. 22 ఎందానిజ్ ఇహిజ ఏలు డాఃజీతి మన్నికెజ్ విజా ఒర్వెండ్ తోరె ఆనె. 23 మీరు గిబ్బుజ్ ఒడ్ఃజి వెంజి అయావజ నడిఃజి మండ్లు”. 24 యేసు మరి వెహ్సాన్, “మీరు వెహిక జాగర్త అర్దం కిదెజ్వలె. మీరు నెగ్రెండ అర్దం కిజిమహిజ, దేవుణు వన్ని మాటెజ్ అర్దం కిబిన్నాలె. ఒఒ మరి ఒద్దె అర్దం కిబిన్నాలె. 25 నాబాణిజ్ వెంజి అర్దం కిజివన్నిజ్ దేవుణు మరి తెలివి కినాన్. గాని వెంజి అర్దం కిజివన్నిబాణిజ్ వాండ్లు అర్దం కిత్తి మన్నికెజ్బా లాగ్నాన్”.

నెర్జి పిరిసిని విత్కువందిజ్ కత

26 యేసు మరి వెహ్సాన్, “దేవుణు ఏలుబడిః ఈహు మనాద్. ఒరెన్ రయు వాండ్లు విత్కు బూమిదు విత్సినాన్. 27 వాండ్లు రెయ్యూజ్నిద్ర కిజి పెందల నిజ్జే మంజినాన్. వన్నిజ్ తెలివించ ఆ విత్కు నేర్జి పిరిసిని. 28 ముజాల ఆకు, దన్ని వెనుక సెరెన్, దన్ని వెనుక సెరెన్దు గింజ ఇక విజా బూమినె పుటిసినాద్. 29 పంట పండ్నాద్. కొయ్నికాలం వాతిజ్ వాండ్లు కొడుఃవేలి అసి కొయ్జినాన్”.

సర్కుగింజ వందిజ్ కత

30 మరి యేసు ఈహు వెహ్సాన్, “దేవుణు వన్నిలోకురిజ్ కినిఏలుబడిః ఇని దనివెల పోలిస్తెజ్ ఆనాద్? మాటు ఎమేణి కతవజ అయాక నెస్పిస్తెజ్ అట్నాట్? 31 అయాక సర్కు గింజదిజ్ పాలిత మనాద్. అక్క బూమిదు విత్తివలె లోకమ్దు మన్ని విజా విత్కూజ్ లొఇ ఇజిరికాద్. 32 ఆహిజ్బా అక్క విత్తివలె నేర్జి పిరిసిని విజా కుస మొక్కెజ్లోఇ పెరిక ఆనాద్. దన్ని కొమెజ్ పెరికెజ్ ఆనె. ఆగసమ్దు ఎగ్రిజిని పాటిజ్ వాజి దన్ని నీడఃదు గూడుక్ తొప్పినె”. 33 వారు అర్దం కిదెజ్ అట్టి నసా దేవుణు మాటెజ్ ముజాల్ వెహ్సా లెకెండ్ కత వజ యేసు నండ్ వెహ్సాన్. 34 కత వజ ఆవండ యేసు పరిజ్ ఇనికబా నెస్పిన్వితాన్. అహిజ యేసు వన్ని సిసూర్ వెల ఒరెండ్ మహివలె విజా వన్కూజ్ అర్దం కిజి వెహ్సాన్.

యేసు తుపాన్దిజ్ నిల్పినాన్

35 ఆ పాదొయ్నమ్దరం అతాహ పడక సానాట్ ఇజి యేసు సిసూర్ వెల వెహ్సాన్. 36 లోకాజ్ డిఃసి యేసు మహి డోణిదు ఎక్కి సిసూరు వన్నిజ్ ఒతార్. మరి సెగం డోణిజ్బా పరి వెల మహి. 37 వారు సాన్ని మహిజ్ పెరి తుపాన్ వాతాద్. ఉల్కెల్ విజా డోణిదు డెయ్తె ఏరుడోణిదు నిండ్రితె. 38 యేసు డోణి వెనుకపడక బుర్రగడిః ముస్సు నిద్ర కిజి మహాన్. సిసూరు వన్నిజ్ నిక్కి, “బోదకినికి, మాటు విజా ముడఃగిజినాట్. నిజి విసారం సిలెదా?” ఇజి వన్నిజ్ వెహ్సాన్. 39 యేసు నిజ్జి గాలిదిజ్ ఉల్కెజ, పల్లక్ ఆదు ఇజి వెహ్సాన్ పెరి గాలి అణస్తాద్ విజా అలెతాద్. 40 నన్దివలె వాండ్లు, “మీరు ఎందనిజ్ తియెల్అజినిదెర్? మిజి నా ముస్సు నమకం సిలెదా?”, ఇజి సిసూర్ వెల వెహ్సాన్. 41 వారు గొప్ప తియెలాతార్, “పిండ్లు ఎలాగ మహ్తికాండ్ గాని, గాలి నమ్దరమ్బా విన్ని మాటదిజ్ లోజిత్తె”, ఇజి ఒరెన్వెల మరి ఒరెన్ వర్గితార్.

యేసు దెయం అస్తిమహివన్నిజ్నెగెణ్కిజినాన్

5 యేసుని సిసూర్ సమ్దరం అతాహ పడక గెరసిను ఇని లోకురి ప్రాంతమ్దు వాతార్. 2 యేసు డోణి డిఃగితి వెలనె దెయం అస్తికాన్ ఒరెన్ దూకిజాణ్ ఎర్దు వాతాన్. 3 వాండ్లు దూకిజాణిజ్ బత్తిజి మహాన్ † వన్నిజ్ గొల్కుదాన్బా తొహెజ్ ఎయెర్బా అట్వేర్. 4 నండ్ సుట్టు వన్ని కాలూజ్ కిక్కాజ్ గొల్సొణిజ్ తొహెజ్బా వాండ్లు గొల్సొ తప్పి ముక్కెజ్ కిత్తాన్. ఎయెరుబా వన్నిజ్ సాదిస్తెజ్ అట్వేతార్. 5 వాండ్లు రెయ్యుబా వెడెకబా దూకిజాణ్ గొర్కాణ్ గగోలాజి వన్నిజ్ వాండ్లె పణుకుజాణ్ డెయె ఆజి మహాన్.

6 వాండ్లు దూరమ్దాన్ యేసుజ్ సుడఃతాండ్లె ఉహ్కీవాజి ముణుకుజ్ ఊర్జి మాడిఃస్తాన్. 7 విజా దన్నిజ్ అతికారం ఆతి దేవుణు మరిసియాతి, యేసువా, నా వెల నిజి ఇని పణి? నజి బాద కిపి ఇజి దేవుణు పేరు అసి నీను ఒట్టు కిల”, ఇజి డేల్సి వెహ్సాన్. 8 ఎందానిజ్ ఇహిజ యేసు, ఓ దెయం, విన్నిజ్ డిఃసి వెల్లి సాన్అ”, ఇజి వెహ్సాన్ మహాన్.

9 యేసు, “నీ పేరు ఇనిక? ఇజి వెన్బాతాన్. వెన్బాతిజ్, నా పేరు సీన, ఇహిజ మాపు నండ్ండార్ ఇజి వెహ్సాన్. 10 మజి యా దేసిమ్దాన్ ఉల్పొ ఇజి దెయం అస్తికాన్ యేసుజ్ మరి మరి బతిమాలితాన్. 11 అయావలె పండ్రిజ్ మంద గొరొన్ సెల్కుదు మెయ్జే మహి. 12 ఆ దెయమ్కు, మజి పండ్రిజ్ లొఇబా పోక్అ. వనకలోఇ సాండ్రిజ్ మజి సెలువ సిదా”, ఇజి యేసుజ్ బతిమాలితె. 13 అందెజి వాండ్లు వన్కూజ్ సెలవ సిత్తాన్ అయావలె దెయమ్కు వన్నిజ్ డిఃసిని పండ్రిజ్లోఇ సాహి. అయపండ్రిజ్ మంద విజా గొర్కాణ్ ఉహ్కీ వాజి ఒడ్డుదాన్ సమ్దరమ్దు అర్నినె సాతె. అక్కెజ్ డగ్గు రుండి వెయిజ్ పండ్రిజ్ మహి.

14 పండ్రిజ్ మేప్పికార్ ఉహ్కీ సాన్ని పట్టుమ్ది పరిజ్ పట్టుమ్ది వల్సెజ మన్నివరిజ్ జగ్గిత్తిక్కెజ్ వెహ్సాన్. లోకుర్ జర్తిక సుడఃదెజ్ సాహార్. 15 వారు యేసు డగ్గు వాతిజ్ నండ్ దెయమ్కు అస్తిమహికాన్ సాక్కెజ్ తొడిఃగిజి నెగ్గి బుదిదాన్ అబ్బొబ్బిమ్మహిక సుడఃతార్. సుడఃతారె తియెలాతార్. 16 యాక సుడఃతికార్ దెయమ్కు అస్తివన్నిజ్ ఇనిక జగ్గితాద్, పండ్రిజ్ ఇనిక జగ్గితాద్ ఇజి విజా లోకాజ్ వెహ్సాన్. 17 అయవలె లోకుర్ యేసుజ్, “మా ప్రాంతం డిఃసి సాన్అ”, ఇజి బతిమాలితార్. 18 యేసు డోణి ఎక్కిజ్ దెయమ్కు అస్తిమహికాన్ వన్ని డగ్గు వాతాండ్లె, నీ వెల నానుబా వాన ఇజి బతిమాలితాన్. 19 గానియేసు సరి సిపితాన్,

† అయ దేసిమ్దికార్, నట్టుబొకెజి సాంమ్లెకెండ్ తయార్ కిజి సాతివరిజ్ సమాది కిజి మహార్. పీనుగు సాంమ్లొఇ ఇడ్డి పణుకుదాన్ సాంమ్దిజ్ మూసి మహార్. యా దెయం అస్తిమహికాన్ బానె మహాన్.

నీను ఇండ్రో సాన్ని ప్రబు నీ వందిజ్ కిత్తి గొప్ప పణివందిజ్ వాండ్రు నీ ముస్సు ఎలాగ కనికారం తోరిస్తాన్ ఇనివందిజ్ వరిజ్ వెహా ఇజి వెహ్లాన్. 20 వాండ్రు సాహండ్రె యేసు వన్ని వందిజ్ కిత్తి గొప్ప పణిదెకపాలీదు వెహ్లాజ్ మొదొల్స్తాన్. అక్క వెంజి విజేరె బమ్మ ఆతార్.

యేసు సాతి అయ్లిజ్ నిక్కినాన్, జబ్బు ఆతిమహి అయ్లికొడొడిజ్ నెగెండ కిజినాన్

21 యేసు డోణిదు ఎక్కి సమ్దరం అతాహ వడక మరి సాహాన్. నస్తవలె నండొ లోకుర్ వన్ని డగ్రు వాతార్. యేసు సమ్దరం ఒడ్డుదు నిహ మహాన్. 22-23 నస్తవెలె ఉండ్రె యూదురి మీటిజ్ ఇండ్రోణి అతికారి యూయారు ఇని ఒరెన్బానె వాతాన్. వాండ్రు యేసు డగ్రు వాజి వన్ని పాదమ్కాజ్ మాడిస్తాండ్రె, నా ఇజ్జి గాలు సాజినాద్, దయకిజి నీను వాజి అది బత్తిని వజ దని ముస్సు కిక్కు ఇడొజి నెగెన్ కితి, ఇజి బతిమాలితాన్. 24 యేసు వన్నివెలె సాహాన్. సీన లోకుర్ నెక్కె ఆజి యేసువెలె సాహాన్. 25 వరిలో ఇ ఉండ్రె అయ్లి కొడొః మహాద్. అది వన్నెండు పండెజాణ్ వెల్లి ఆని జబ్బుదాన్ బాద ఆజి మహాద్. 26 అది సీన డాక్టరుజాబాన్ నెగెన్ అదెజ్ సాహాద్ గాని ఆ జబ్బు సాన్ ఏతాద్. అకాదె అవిండ దనిజ్మని డబ్బు విజా కర్సు ఆతిజ్బా ఆ జబు సాన్ ఏండ మరి నండొ ఆతాద్. 27-28 అది యేసువందిజ్ వెహ్ మహాద్. యేసు అయ సరిదాన్ వాజినాన్ ఇజి వెంజి యేసు తొడిగితి మన్ని నిర్రి సాక్క † సెంగుదు ముట్టిజసరి నెగెన్ ఆన ఇజి ఒడొజితాద్. అది లోకుర్ వెలె సాన్ని యేసు వెనుక వాతాదె వన్ని నీరిసాక్కది సెంగుదిజ్ ముట్టాద్. 29 వెలెనె వెల్లి సానిక నిహాద్. దనిజ్ మహి జబు డిస్తాద్ ఇజి అది నెస్తాద్.

30 వన్నిలో ఇహాన్ దేవుణు సత్తు వెల్లి సాహాద్ ఇజి యేసుజ్ తెలితాద్. వెలెనె వాండ్రు లోకురిజ్ మర్జి సుడొజి, ఎయెర్ నా సాక్కదు ముట్టాన్? ఇజి వెన్బాతాన్. 31 దన్ని సినూర్, సీన లోకుర్ నెకె ఆజి నిజి ముట్టినార్ గదె. ఆహా ఆతిజ్బా నజి ఎయెర్ ముట్టార్ ఇజి ఎండనిజ్ వెహ్లాని? ఇజి యేసుజ్ వెహ్లాన్. 32 నజి ముట్టికాన్ ఎయెండ్రొ ఇజి వరివందిజ్ యేసు సురులె సుడొజి మహాన్. 33 అయవలె అయ బోదెలి అది నెగెన్ ఆతిక నెసి నండొ తియెల్ ఆజి వన్నిపాదమ్కుజ్ మూడికుజ్ ఊర్జి వజితాద్. దన్నిజ్ జర్గితిక విజా వెహ్లాద్. 34 యేసు దనిజ్, బయి నీను నా ముస్సు నమకం ఇడ్డి అందెజె నీను నెగెన్ ఆతి. సమదనమ్దాన్ సాన్ అ. నీను నెగెండ్రె ఆతి ఇహాన్. 35 యేసు వర్జిజిమహిజ్ యూయారు ఇండ్రోణిజ్ సెగొండార్ వాజి, నీ గాలు సాతాద్. బోదకిని వన్నిజ్ యేలు బాద కిదెజ్ అక్కర్ సిల్లెద్ ఇజి యూయారుజ్ వెహ్లాన్. 36 వారు వెహ్లాజ్ వెన్ ఇవజ యేసు అయ అతికారిజ్, తియెల్ అమ, నా ముస్సు నమకం ఉండ్రె ఇడొజి ఆజి వెహ్లాన్. 37 యేసు పేతురు, యాకోబు, యాకోబు తంబెర్జి యోహాను మరి ఎయెజ్బా వన్నివెలె ఒవతాన్. 38 వారు యూదురి మీటిజ్ ఇల్లు అతికారి ఇండ్రొ సాహాన్. అయవలె అబ్బె లోకుర్ గగోలాజి అడొబాజి మహిక సుడొజితార్. 39 యేసు ఇలు లో ఇ సాన్ని వరిజ్ వెహ్లాన్, మీరు ఎండనిజ్ గగోలాజి అడొబాజినిదెర్? యా ఇజ్జికాద్ సావద్ ఇది నిద్ర కిజినాద్. 40 వారు యేసుజ్ వెక్కిసి సికితార్. యేసు అడొబాజి మహి లోకాజ్ విజేరిజ్ వెల్లి ఫాక్తాన్. వెల్లి ఫాక్కి, అయ్సి అపాసిరిజ్, వన్నివెలె మహి సినూరిజ్ అసి యేసు ఆ ఇజ్జికాద్ మహి గదిదు సాహాన్. 41 ఆ ఇజ్జిదన్నిజ్ కీదు అస్తాండ్రె, తలీత కుమి ఇజి వెహ్లాన్. అయ మూదిజ్ అర్దం ఇనిక ఇహిజ ఇజ్జి అయ్లి నిజ్ అ ఇజి నాను నీ వెలె వెహ్లాన ఇజి, 42 అయ్లి వెలెనె నిజ్ జి నడితాద్. దనిజ్ వన్నెండు పండెజ్ వయసు. అబ్బె జర్గితిక సుడొజితార్ అయ్సి అపాసిరు, సినూరు బమ్మ ఆతార్. 43 జర్గితిక ఎయెజ్బా వెహ్లాజ్ ఇజి యేసు వరిజ్ కసితం ఆడ్ర సితాన్. దన్నిజ్ బోజనం సీదు ఇజి అయ్సి అపాసిరిజ్ వెహ్లాన్.

యేసుజ్ సాంతనాటొ గవరం సివతార్

6 యేసు అబ్బెణాన్ వన్ని సాంత పల్లుమాతి నజరేతు సాహాన్. సినూర్బా వన్ని వెలె సాహాన్. 2-3 విస్తాంతి దినమ్దు వాండ్రు యూదురి మీటిజ్ ఇండ్రొ నేరేపెస్తెజ్ మొదొల్స్తాన్. అక్క వెహికార్ నండొండార్ బమ్మ ఆజి, వీండ్రు ఎమేణిజ్ నెస్తాన్? విన్నిజ్ నిన్ని గెణం ఎమేణిజ్ దొహ్లాక్తాద్? వీండ్రు బమ్మాని పణిజ్ కిజినాన్. వీండ్రు మాపు నెసిని కంసెల్ వాండ్రు గదె. వీండ్రు మరియమ్మ మరిసిగదె. యాకోబు, యోసి, యూద, సీమోను, విని తంబెర్జిర్ గదె. విన్ని తజిసిక్ మా వెలె మన్నెగదె. ఇజి వెహ్లాన్. వారు వన్నిముస్సు కోవమాజి మహాన్. 4 దన్నిజ్ యేసు ఇనిక ఇజి వెహ్లాన్ ఇహిజ, ఒరెన్ ప్రవక్తెజ్ సాంత పల్లుమ్దు, సాంత ఇండ్రొ, సాంత కుటుమ్దివరిబాన్ గవరం సిల్లెద్. మరి ఎంబె సాహిజ్బా వన్నిజ్ గవరం మనాద్.

5 సెగొండార్ జబ్బు ఆతివరిజ్ కియుదాన్ ముట్టి నెగెన్ కిత్తాన్ గాని అబ్బె నండొ బమ్మాతి పణికిదెజ్ యేసు అట్వతాన్. 6 వన్ని ముస్సు వరిజ్ నమకం సిల్లిదిజ్ వాండ్రు బమ్మ ఆతాన్. యేసు సురులె మన్ని నాహ్లాజ్ బూలాజి నేరేపెస్తాన్.

యేసు వన్నెండు మణిసిర్ సినూరిజ్ ఫాక్కినాన్

7 యేసు వన్నెండు మణిసిర్ సినూరిజ్ వన్ని డగ్రు కూక్తాండ్రె రివరిజ్ రివరిజ్ ఫాక్తాన్. వరిజ్ దెయమ్కాజ్ పేరదెజ్ అతికారం సిత్తాన్. 8-9 మీరు ప్రయనం కినివెలె కియుదు ఉండ్రె డుడ్డునె ఒత్తెజ్. బోజనం గాని సన్ని గాని డబ్బు గాని ఒత్తెజ్ ఆవద్. సాండ్రెజ్ కాల్యాజ్ జోడ్కు ఒత్తగాని, పార్పాదెజ్ రుండి సాక్కెజ్ ఒమాట్, ఇజి యేసు వెహ్లాన్. 10 మీరు ఎయె ఇండ్రొ సానిదెరో, అయ పల్లుం డిస్సిదాక బానె మండ్రు. 11 ఎంబెబా మిజి లోకుర్ డగ్రు కివిండ మహిజ మీ మాట వెండ్రెజ్ కెఇతిజ, అబ్బెణిజ్ మీరు డిసి సానివెలె మీ పాదమ్క డుల్లి దులువు. వరిముస్సు వారె దేవుణుబాణిజ్ సిక్కి తప్పె ఆజినార్ ఇన్నిదన్నిజ్ గుర్తులెకెండ్రె ఆహా డుల్లి దులువు. 12 సినూర్ సాన్ని లోకాజ్, పావమ్కు డిస్టు ఇజి బోదిస్తాన్. 13 లోకురిజ్ అస్తి నండొ దెయమ్కాజ్ పేరజి, జబ్బు ఆతి నండొండారిజ్ నూనె రాసి నెగెండ్రె కిత్తార్.

బాప్తిసం సీని యోహానుజ్ రాజా సస్తాన్

14 యేసు పేరు విజాబాన్ సారిత సాహాద్. అందెజె యేసు కిత్తి గొప్ప పణిజవందిజ్ హేరీదురాజా వెహాన్. సెగొండార్ ఇనిక వెహ్లాన్ ఇహిజ "వీండ్రు సాతివరిబాణిజ్ మర్జి నిజితి బాప్తిసం సీని యోహాను అందెజె యా బమ్మాతి పణిజ్ కిదెజ్ నత్తు వన్నిలో ఇ మంజినాద్" ఇహాన్. 15 సెగొండార్ వీండ్రు ఏలియ ప్రవక్త ఇహాన్. మరి

† అయ కాలమ్దు అయ దేసమ్ది మొగవారు నీరి సాక్క తొడిగిజి మహాన్. దన్ని అడిగి మాముల్ సాక్కని బెట్టు తొడిగిజి మహాన్

సెగొండార్ వీంధ్రు ముజల్ మహి దేవుణు ప్రవక్తలొక ఒరెన్ ప్రవక్త వజ మనాన్ ఇజి వెహ్టార్. 16 హీరోదురాజా యాక విజా వెంజి నాను బుర డెయిన్తి యోహాను నిజ్జి బత్తికాండ్రె యేసు ఇజి వెహ్టార్.

17-18 హీరోదురాజా ఎందానిజ్ ఈహు వెహ్టార్ ఇహిజ, వాండ్రు వన్ని తంబెర్సియాతి పిలివు ఆలీసి హీరోదియెజ్ తతాన్. యోహాను హీరోదుజ్, నీ తంబెర్సి ఆలీసిజ్ నీవందిజ్ ఇడె ఆతిక దేవుణు మోసిజ్ సిత్తి రూలుదిజ్ వడిఎద్ ఇజి వెహ్టార్. అందెజె దన్ని వందిజ్ వాండ్రు యోహానుజ్ అసి తొహ్తాండ్రె జెలిదు ఇడిస్తాన్.

19 అందెజె హీరోదియె యోహాను ముస్సు వగదాన్ మహాద్. వన్నిజ్ సపిస్తెజ్ సుడెతాద్ గాని అట్వితాద్. 20 ఎందానిజ్ ఇహిజ హీరోదు యోహానుజ్ తియెలాతాన్. వాండ్రు ఒరెన్ నీతి నిజాయితి మన్నికాన్ ఇజి దేవుణు కేటాకాన్ ఇజి, హీరోదు రాజా నెస్తాన్. అందెజె జెలిదు ఇడ్డి కాపాడజి మహాన్. యోహాను వెహ్టి మాటెజ్ వెహివలె హీరోదురాజా అరదం కిడెజ్ అట్వితాన్ గాని సర్దదాన్ వెంజి మహాన్.

21 అహిజ యోహానుజ్ సపిస్తెజ్ హీరోదియెజ్ ఉండ్రె అన్కాసం వాతాద్. అక్క ఎలాగ ఇహిజ హీరోదురాజా వాండ్రు పుట్టిరోజా గుర్తు కిడెజ్ అయానాండిజ్ ఉండ్రె పెరి విందు కితాన్. వాండ్రు గవ్రుమెంటు అదికారిజ, నయ్మేది వరిలొక పెరి అతికారి గలీలయ దేసెమేది పెద్దెల్జ విజెరిజ్ విందుదిజ్ కూక్తాన్. 22-23 నస్తివలె హీరోదియె గాలీని విందుదిజ్ వాతి వరిజ్ సర్ద కిబిస్తెజ్ వరి ముజాల డాట్టి కరజితాద్. అక్క సుడితారె విజెరె సర్ద ఆతార్. సర్ద ఆతిజ్ హీరోదురాజా, నిజ్ ఇస్ట్రమాతిక ఇనికబా నజి లొనల, అక్క నాను నిజి సీన, ఇజి దనివెల ఒట్టు కితాన్. 24 అది సాన్ని అయ్నివెల, నాను రాజుజ్ ఇనిక లొస్తెజ్ ఇజి వెన్బాతాన్. అయ్సి, బాప్తిసం సీని యోహాను బుర లొనల ఇజి వెహ్టార్. 25 వెలనె అది రాజా డగ్రు సాన్ని బాప్తిసం సీని యోహాను బుర కత్తి ఉండ్రె వల్లెమదు ఇడెజి ఏలె నజి తసిసిదా ఇజి వెహ్టార్.

26 అక్క వెహ్తాండ్రె హీరోదురాజా గొప్ప బాద ఆతాన్ గాని, వాండ్రు కిత్తి ఒట్టువందిజ్ వన్నివెల బోజనమ్దిజ్ బస్తిమహి కూలెజ వందిజ్ దన్నివెల కిత్తి మాట తప్తెజ్ కెపితాన్, ఇజి వెహ్టెజ్ అట్వితాన్. 27-28 వెలనె రాజా యోహాను బుర కత్తి తగల ఇజి జమానుజ్ ఆడ్ర సీజి పోక్తాన్. జమాను జెలిదు సాన్ని యోహాను బుర కతాండ్రె ఉండ్రె వల్లెమదు ఇడెజి తతాండ్రె అయ్లిదిజ్ సిత్తాన్. అది ఆ బుర అయ్సిజ్ సిత్తాద్. 29 జగ్గతిక వెంజి యోహాను సిసూర్ వాజి ఆ పీనుగుదిజ్ పెరజి ఒసి సమాది కితార్.

యేసు అయ్దు వెయిజ్ మణిసిరిజ్ బోజనం సీజినాన్

30 అపాస్తరు మరజివాతాజి వారు కిత్తి పణిజ్ విజా, బోదిస్తి వన్యాజ్ వందిజ్ విజా యేసుజ్ వెహ్టార్. 31 నస్తివలె యేసు "ఎయెరు సిల్లిబాన్ మాటె సాన్ని సణె రోమ్నాట్, ఇజి సిసూర్వెల వెహ్టార్. ఎందానిజ్ ఇహిజ నండొ లోకుర్ వాదెజ్ సాండ్రెజ్ ఆతార్. బోజనం కిడెజ్బా కాళి సిల్లెండ ఆతాద్. 32 అందెజె వారు ఉండ్రె డోణి ఎక్కి ఎయెర్బా మన్ఇ బాడ్డిదు వారె సాహార్. 33 యేసుని, సిసూర్ సాన్నిమహిజ్ నండొ లోకుర్వరిజ్ సుడెతారె వరిజ్గుర్తు అసి విజా వట్టుమకాణ్ ఉహ్కెక్కి వరిజ్ ఇంక ముజాల బాన్ సాహార్ అందితార్. 34 యేసు డోణిదాన్ డిగితివలె మహి నండొ లోకాజ్ సుడెజి వన్ని పాణం నొత్తాద్. ఎందానిజ్ ఇహిజ వారు గవ్డుయెన్ సిల్లి సెద్రితి గొరెజ్లెకండె మహార్. అందెజె యేసు వరిజ్ నండొ సజతిజ్ నెసెవెస్తాన్. 35-36 యేసు నెరెపిసి మహిజ్ పాద్దుఆజి మహాద్. సిసూర్ వన్నిడగ్రు వాజి యాక ఎయెరు మన్ఇ బాడ్డి. ఏలె పాద్దు ఆజినాద్. వడకాద్ మన్ని నాహ్కాజ్ వల్సెజ సాన్ని బోజనం కొండెజ్ విరిజ్ పోకల. ఇహార్. 37 గాని యేసు సిసూరిజ్ మీరె వరిజ్ తిండ్రెజ్ ఇనికబా సీదు", ఇజి వెహ్టార్. దన్నిజ్ వారు మాపు సాన్ని రుండి వంద దెనారిదిజ్ † రొట్టెజ్ కొడెజి తత్రెజ్బా నిసాని లోకురిజ్ సాల్వద్ ఇజి వెహ్టార్. 38 మీబాన్ ఎసాన్డు రొట్టెజ్ మన్నె? సాన్ని సుడెదు", ఇజి యేసు సిసూరిజ్ వెహ్టార్. వారు సాన్ని సుడెతారె అయ్దు రొట్టెజ్ రుండి మెయెజ్ మన్నె ఇజి వెహ్టార్.

39 విజెరిజ్ పసిగడ్డి మన్నిబాన్ గుంపుజ్లెకండె బసెకిదు ఇజి యేసు సిసూరిజ్ వెహ్టార్. 40 లోకుర్ యాపయ్ మనిసిర్, గుంపుజ్ వంద మనిసిర్ గుంపుజ్ బస్తార్. 41 అయవలె యేసు అయ్దు రొట్టెజ్, రుండి మెయెజ్ అసి, ఆగసం దరోట్ సుడెజి వనకవందిజ్ దేవుణుదిజ్ వందనమ్కు వెహ్టార్. వెహ్తాండ్రె రొట్టెజ్ రుక్కి లోకురిజ్ సీబాజి సీదు ఇజి వెహ్టి సిసూర్జ్ సిత్తాన్. అయ మెయెజ్బా విజెరిజ్ సీబాజి సీదు ఇజి సిత్తాన్. 42 వారు విజెరె పాల వంజా తిహార్. 43 మిగిలిత్తి రొట్టె ముక్కెజ్, మరి మెయెజ్ ముక్కెజ్ వన్నెండు గంపెజ్ సిసూర్ కెహ్టార్. 44 రొట్టెజ్ తిహికార్ మెుగవారె అయ్దువెయిజ్ లోకుర్ మహార్.

యేసు సమ్దరం ముస్సు నడిజినాన్

45 యేసు లోకాజ్ పోక్కి వెనుక వెలనె సిసూరిజ్ డోణిదు ఎకిసి అతాహపడెక బేత్తుయిద ఇని నాటొ వన్నిజ్ ఇంక ముజాల సాండ్రు ఇజి వెహ్టి పోక్తాన్. 46 వరిజ్ పోక్కి యేసు పార్దనం కిడెజ్ గొరొత్ ఒరెండ్రె మహాన్. 47 పాద్దు ఆతివలె డోణి సమ్దరం నడిమి మహాద్, యేసు గొరొత్ ఒరెండ్రె మహాన్. 48 గాలి ఎద్దు డెయిన్జ్ డోణి నడెపిస్తెజ్ సిసూరిజ్ గొప్ప కస్టం ఆత్తాద్. అక్క యేసు సుడెతాన్. కోడిజం ఆజిమహిజ్ యేసు సమ్దరం ముస్సు నడిజి వాతాండ్రె సిసూర్మన్ని డోణి డాట్టిసాండ్రెజ్ నడిసి వాతాన్. 49 యేసు సమ్దరం ముస్సు నడిజినిక సిసూర్సుడెతారె అక ఉండ్రె దూబ ఇజి ఒడిబితార్. వారు డులం గగోల్ ఆతార్.

50 అక్క దూబను ఇజి వారు నండొ తియెలాతార్. వెలనె యేసు వరివెల, "సమ్దరమ్దాన్ మండ్రు ఇక్క నానె తియెలామ", ఇజి వరిజ్ వెహ్టార్. 51 నస్తివలె యేసు వరివెల డోణిదు ఎక్తాన్. గాలి విజా అణస్తాద్. వారు నండొ బమ్మ ఆతార్.

52 యేసు అయ్దు రొట్టెజ్ రుండి మెయెజాణ్ అయ్దువెయిజ్ లోకాజ్ బోజనం సిత్తిక సుడెతిజ్బ యేసు కిత్తి అయా బమ్మాతి పణివందిజ్ అర్దం కిపితార్. ఎందానిజ్ ఇహిజ వరి మన్ను గట్టిజ్ మహాద్.

† రోమది వరి కాలమ్దు మన్ని డబ్బు ఇక్క అయకాలమ్దు ఉండ్రె దినారి ఉండ్రె రోజాది కూలి.

యేసు గనెసెరెతు ఇనిబాన్ లోకాజ్ నెగెండ్ కిజినాన్

53 వారు సమ్దరం డాట్టి గనెసెరెతు ఇనిబాన్ వాతారె డోణి అబ్బె త్తూర్. 54 వారు డోణి డిఃగితిజ్ సరి లోకుర్ యేసుజ్ గుర్తు అస్తూర్. 55 వెలనె ఆ దేసెమ్ది నాహ్కాణికార్ విజేరె సాన్ని జబ్బు ఆతివరిజ్ యేసు మనాన్ ఇజి వెహి బాడిడు సాపాదు పిండ్లి తత్తెజ్ మొదొ ల్స్తూర్. 56 యేసు నాహ్కాజ్ పట్టుమ్కాజ్ ఎంబె సాహిజ్బా లోకుర్ జబ్బు ఆతివరిజ్ యేసు వాని సర్దు తత్తె ఇడెఃతూర్. యా జబ్బుఆతికార్ నీ సాక్కు సెంగుదుబా ముట్టెజ్ సెల్లె సిదా ఇజి బతిమాలజ్ యేసుజ్ మరి మరి వెస్తూర్. ఎస్సాండార్ వన్ని సాక్కుదిజ్ ముట్టితారొ వారు విజేరె నెగెండ్ ఆతూర్.

యూదుపెదెలుజూ రూలుజ్ దేవుణు రూలుదిజ్తేడః వాతాద్

7¹⁻² యెరూసలేమ్దాన్ వాతి పరిసయ్యరుని, యూదురి రూలు నెస్సెసినికార్ సెంగొండార్ యేసుబాన్ కూడఃజి వాతూర్. యేసు సిసూర్ యూదురుజ రూలుదు వెస్తాలెకెండ్ కిక్కు నొర్బవండ బోజనం ఉణిజి మహిక వారు అబ్బె సుడఃతూర్. అక్క పరిసయ్యరు సుడిఃతిజ తప్ప. 3 పరిసయ్యరు, యూదురు, విజేరె, పూర్బమ్దికార్ వెస్తూరూలు వజ కిక్కు నొర్బాతి వెన్కనె ఉణఃతూర్. 4 వారు సత్తూదాన్ వాతిజ, రూలువజ ఏరు లొంజె ఆవండ ఇనికబా ఉణివర్. ఇక్కాదె ఆవండ గిన్నెజ్ కుండెజ్ మరి కంసు బిందెజ్ ఎలాగ మిడిఃస్సెజ్ ఇజి నండొ రూలుజ్ వరిజ్ మన్నె. ఆ రూలుజ్ వజ వారు కిజినార్. 5 అందెజె పరిసయ్యరుని, యూదుర్ రూలుజ్ నెస్పెసినికార్, “ఎందానిజ్ నీ సిసూర్ పూర్బమ్దికార్ వెస్తూ రూలువజ నడిఃవండాజినార్ ఎందానిజ్ వారు కిక్కు నొర్బవండ బోజనం కిజినార్”, ఇజి యేసుజ్ వెన్బాతూర్. 6-7 యేసు వరిజ్, “వేసం కినికారాతి మీ వందిజ్ యెనయ ప్రవక్త ఎస్తిక నిజమె. యా లోకుర్ నజి వెయుదాన్ గవరం సీజినార్ గాని పరి మన్ను నాబాణిజ్ దూరం మనాద్. వారు నజి పాగిడిఃజి మాడిఃసినికార్ గాని అక్క పణిడిజ్ రెవద్. ఎందానిజ్ ఇహిజ వారు లోకుర్ వెస్తూ రూలు దేవుణు మాట ఇజి లోకాజ్ నెస్సెసినికార్ †. 8 దేవుణు వెస్తూ రూలు డిఃసిసిజి, మీరు పూర్బమ్దికార్ వెస్తూ రూలువజ నడిఃజినిదెర్”, ఇజి వెస్తూన్.

9 యేసు వరిజ్ మరి వెస్తూన్, “పూర్బమ్దికార్ వెస్తూవజ నడిఃదెజ్, ఇజి దేవుణు ఆడ్రెజ్ పడఃకాదు నెక్కెజ్ మిజి బాగ తెలినాద్. 10 ఎలాగ ఇహిజ మీ యాయ బుబ్బరిజ్ గవరం సీజి బాగ సుడఃదెజ్ ఇజి యాయెజ్ గాని బుబ్బెజ్ గాని దూసిస్తిజ వన్నిజ్ సస్సెజ్ ఇజి దేవుణు మోసెజ్ సిత్తి రూలు మనాద్. 11-12 గాని ఒరెన్ వన్ని అయ్సె అపాసిరిజ్, నాను మిజి ఇనికబా ఉండ్రె సాయమ్లెకెండ్ కిన ఇజి ఇడ్తిమన్నిక కొర్బాన్ ఇజి వెస్తూజ నాండిజ్ అసి వాండ్రు అయ్సె అపాసిరిజ్ ఇనికబా సాయం కిదెజ్ అవసరం సిల్లెద్ ఇజి మీరు నెస్పెసినిదెర్. (కొర్బాన్ ఇహిజ దేవుణుదిజ్ సిన ఇజి ఒట్టు కినిక ఇజి అర్దం) 13 ఈహు మీ పూర్బమ్దికార్ వెస్తూవజ నడిఃజి మీరు దేవుణు వెస్తూ రూలుదిజ విలువ సిల్లెండ కిజినిదెర్. నిన్ని నజతిజ్ నండొ మిరు కిజినిదెర్”.

14 యేసు లోకాజ్ మరి వన్నిడగ్రు కూక్తాండ్రె “నాను వెస్సెసినిక మీరు విజిదెరె జాగర్తవెంజి నెగెండ్ అరదం కిదు. 15-16 వెయుదాన్ లోఇ సానికెజ్ ఇనికబా లోకాజ్ మయ్య కిదెజ్ అట్వద్. గాని మన్ను లొఇహాన్ వెల్లి వానికదె లోకాజ్ నెస్పెజ్ కిజినాద్”.

17 యేసు లోకాజ్ డిఃసి ఇండ్రొ వాతివెనుక వన్ని సిసూర్, కతవజ వెస్తూ దన్నిజ్ అర్దం వెన్బాతూర్. 18-19 యేసు వరిజ్ ఈహు వెస్తూన్ “మీరుబా ఆఇవరికెండ్ అర్దం కిదెజ్ అట్ఇదెరా? వెల్లిహాన్ పాటలొజ సాని ఇని బోజనమ్బా లోకాజ్ మయ్య కిద్. ఎందనిజ్ ఇహిజ అక్క మన్నుదు సాన్వండ వన్ని పాటాదునె సాన్నినాద్. అక్క పాటాదాన్ బయలు బస్సివలె వెల్లి సాన్నినాద్. ఇజి మీరు నెస్పెసినిదెర్”. (ఇబ్బె సుడఃతి ఇని బోజనమ్బా ఉండెజ్ ఆనాద్ ఇజి యేసు సెలవ సిత్తాన్) 20 మరి యేసు వెస్తూన్, ఒరెన్ వన్ని మన్నులొఇహాన్ వెల్లి వానికదె వన్నిజ్ మయ్య కిజినాద్. 21-22 మన్నులొఇహాన్ వానిక ఇనికెజ్ ఇహిజ, సెఇ ఆలోసనమ్కు, కెలార్బూలానిక, లోకాజ్ నెస్సెకెజ్, రంకు బూలానిక, ఆఇవరిజ్ మన్నికెజ్ దొహ్కెజ్ ఇజి ఆస, సెఇ పణి కినిక, మొసెం కినిక, మన్నుదు అసనె ఆజి మండ్రెజ్ అట్ఇక, గోస దూసిసినిక, నానె పెరికాన్ ఇజి గర్త అనిక, అర్దం కిఇ మన్ను మన్నిక. 23 యాక్కెజ్ విజా లోకుర్ మన్నులొఇహాన్ వెల్లి వాజి ఒరెన్ వన్నిజ్ మయ్య కినె.

ఉండ్రె కనానియది అయ్లి కొడః యేసు మున్ను ఇడ్తి నమకం

24 యేసు అబెణిజ్ నండొ దూరం సాన్ని ఉండ్రె గొరొన్ ఎక్కి డిఃగితాండ్రె తూరు సీదోసు ఇని పట్టుమ్కాజ్ డగ్రు మన్ని ముటెజ సాహాన్. బానెఉండ్రె ఇండ్రొ సాన్ని ఎయెజ్బా తెలివండ మంజిన ఇజి మన్నుదు ఒడఃబితాన్. గాని వాండ్రు అట్వితాన్.

25-26 యూదురు ఆఇ జాతిదు పుట్టి సురోపెకొనియదికాద్ ఉండ్రె అయ్లి కొడః యేసు అబ్బె మనాన్ ఇజి వెంజి వెలనె అబ్బె వాతాదె యేసు సాదమ్కాజ్ అర్తాదె మాడిఃస్తాద్. దన్ని గాల్పిజ్ దెయం అస్త మహాద్. “నా గాలుజ్ అస్తిమన్ని దెయమ్దిజ్ ఉల్వెల”, ఇజి యేసుజ్ బతిమాలితాద్. 27 దన్నిజ్ యేసు, “ముజాల్ కొడఃరిజ్ పాట పంజా బోజనం తిప్పిజ్. కొడఃర్ తిండ్రెజ్ మన్ని రొట్టెజ్ లాగిజి నుకుడిఃజ్ సీనిక తగ్గవద్”, ఇజి వెస్తూన్ ††. 28 అది, “ప్రబు, నీను వెస్తూజ్ నిజమె. గాని నుకుడిఃజ్బా కొడఃర్ ఉణిజి బల్ల అడిఃగి అర్వెక్తి ఉణిజినె గదె ఇజి వెస్తూద్. 29 యేసు, నీను బాగ వెస్తూ. నీను ఇండ్రొ సాన్ల. ఆ దెయం నీ గాలుజ్ డెస్త సాహాద్ ఇహాన్. 30 అది ఇండ్రొ సాన్ని సుడఃతిజ్ గాల్పి మన్నం మున్ను గూర్త మహాద్. దెయం దనిజ్ డిఃస్త సాహాద్.

యేసు బొయర నతి ఆతివన్నిజ్ నెగెండ్ కిజినాన్

31 యేసు తూరు ప్రాంతం డిఃసి, సీదోసు, దెకపాలి ప్రాంతమ్దాన్ గలీలయ సమ్దరం డగ్రు వాతూన్. 32 నస్తివలె బొయర నతియాతి ఒరెన్వన్నిజ్ సెగొండార్ యేసుబాన్ తత్తూర్. “విన్ని మున్ను కియు ఇడఃజి నెగెండ్ కిల”, ఇజి బతిమాలిజ వెస్తూర్. 33 యేసు లోకుర్బాణిజ్ వన్నిజ్ అజ ఒసి, డెస్సెక్కి వన్ని గిబ్బుదు ఇడ్తాన్. వన్ని సాంత డెస్సెక్కి పూస్తాండ్రె గుల్ల వన్నిజ్ నాలికాదు ముట్టాన్. 34 ముట్టాండ్రె ఆగసం దరోట్ దేవుణుదిజ్ సుడఃజి ఉసుర్ గొటాండ్రె బాదఆజి ఎపాత ఇజి వెస్తూన్. దని అర్దం ఇనిక ఇహిజ రే ఆదెజ్ ఇజి. 35 వెలనె వన్నిగిబ్బిజ్ వెండ్రెజ్, వన్ని నాలిక వర్గిదెజ్ వాతూద్. వాండ్రు బాగ వర్గిదెజ్ మొదొల్స్తూన్. 36 “ఎయెవెట

† యెనయ 29:13 †† యేసు వెస్తూ దన్ని అరదం ఇనిక ఇహిజ ముజాల వన్నిసాంత లోకురాలి యూదురిజ్ వాండ్రు నెగెండ్ కిదెజ్వలె పరిజ్ వానికెజ్ ఆఇవరిజ్ సీదెజ్ అవద్ ఇజి

వెహ్మట్", ఇజి యేసువరిజ్ కసితం వెహ్మన్. నా వందిజ్ వెహ్మట్ ఇజి నండా వెహ్మట్ బా అలెవండ వారు యేసువందిజ్ మరి నండా వెహ్మర్. 37 యేసు విజా బాగ కిత్తాన్. బోయరవన్నిజ్ బా వెనివజ, గుల్లవన్నిజ్ బా వర్గినివజ కిజినాన్ ఇజి వారు వెహ్మారె బమ్మ అతార.

యేసునాల్గివెయిజ్ మణిసిరిజ్ బోజనం సీజినాన్.

8 1-2 ఆ దినమ్కాజ్ మరి ఒర్పు నండా లోకుర్ కూడ్డి వాతార. వరిజ్ ఉండెజ్ బోజనం ఇనికబా సిలిజ్ యేసు వన్ని సిసూర్జ కూక్తాండ్రె వెహ్మన్, నజి యా లోకుర్ నావెల వాజి మూండ్రె రోస్సు ఆతె. వరిజ్ తిండ్రెజ్ ఇనికబా సిల్లెద్. అందెజి విరి వందిజ్ నా పాణం నోజిన. 3 విరిజ్ నాను బోజనం సిపిండ ఇల్కాజ్ పోక్తిజి కణుకు తర్వజి సర్దు అర్నార్. ఎందనిజ్ ఇహిజి వరిలోఇ సెగొండార్ నండా దూరమ్దాన్ వాత మనార్", ఇజి వెహ్మన్. 4 అయవలె వన్ని సిసూర్ వెహ్మర్, బిడిమ్బూమిదు విరిజ్ విజెరిజ్ బోజనం సిదెజ్ ఎవేణిజ్ తతెజ్? 5 మీ బాన్ ఎసాడు రొటెజ్ మన్నె? ఇజి యేసు సిసూరిజ్ వెన్బాతాన్. మా బాన్ ఏడు మన్నె ఇజి సిసూర్ వెహ్మర్. 6 అయవలె యేసు లోకాజ్ బూమిదు బమ్మ ఇజి వెహ్మన్. ఆ ఏడు రొట్టెజ్ అసి దేవుణుదిజ్ వందనమ్కు కితాండ్రె. వన్కాజ్ రుక్సి లోకాజ్ సీబాజి సిదెజ్ సిసూరిజ్ సిత్తాన్. వారు లోకాజ్ సీబాజి సిత్తాన్. 7 వరిబాన్ సెగం ఇజి మొయెజ్ బా మహి. యేసు వన్కాజ్ బా వందనమ్కు వెహ్మి సీబాజి సీదు ఇజి సిసూరిజ్ సిత్తాన్. 8 లోకుర్ విజెరి పాట వంజా తిహార్. వెనుక సిసూర్ మిగ్గితి రొట్టె ముక్కెజ్ ఏడు; గపెజ్ కెహ్మర్. 9-10 డగ్రు నాల్గి వెయిజ్ లోకుర్ అబ్బె మహార్. లోకాజ్ విజెరిజ్ పోక్తి యేసు సిసూర్వెల ఉండ్రె డోణి ఎక్తాండ్రె దల్గునుత ఇని ప్రాంతం సాహాన్.

11 సెగొండార్ పరిసయరు వాతార యేసువెల తర్పిస్తెజ్ మొదొల్స్తాన్. దేవుణునె వన్నిజ్ పోక్తాన్ ఇనిదన్నిజ్ రుజువ్ లెకెండ్రె ఆగనమ్దాన్ ఉండ్రె బమ్మూతి పణికిజి మజి తోరిస్ అ ఇజి వెహ్మర్. 12 యేసు మన్నుదు గొప్ప బాదఅజి ఉసుర్ కొటాండ్రె యా లోకుర్ ఎందనిజ్ బమ్మ అని పణి తోరిస్ అ ఇజి వెహ్మినార్. యా లోకాజ్ గుర్తులెకెండ్రె ఇని బమ్మూమాని పణిబా దేవుణు తోరిస్ ఏన్ నిజమెఇజి వెహ్మన్. 13 నస్తవలె యేసు వరిజ్ డిస్తాండ్రె డోణి ఎక్సి నమ్దరం డాట్టి అతాహ పడెక సాహాన్.

యేసు పరిసయరువందిజ్ హేరోదువందిజ్ వెహ్మినాన్

14 అహిజి సిసూర్ రొట్టెజ్ తత్తెజ్ పోక్తాన్. వరిబాన్ డోణిదు ఉండ్రె రొటె మహాద్. 15 యేసు సిసూరిజ్ వెహ్మన్. పరిసయరుది పులాజ్ కిని దూరు † వందిజ్, మరి హేరోదురాజుది పులాజ్ దూరు వందిజ్ మీరు జాగర్త మండ్రు.

16 మాటు రొట్టెజ్ తిత్తెజ్ యేసు ఈహు వెహ్మినాన్, ఇజి వారు ఒరెన్వెల ఒరెన్ వర్గితార్. 17 వారు వెహ్మినానిక యేసు నెసి ఎందానిజ్ మీరు రొట్టెజ్ సిల్లితివందిజ్ వర్గినిదెర్? ఏలుబా అర్దం కిజి నెస్తెజ్ అట్ ఇదెరా? మీ మన్ను గట్టి ఆత మనాదా? 18 మిజి కణుకు మంజిబ తోఇదెరా? గిబెజ్ మంజిబా వెన్ ఇదెరా? ఇనికబా ఒడెజి ఇదెరా? 19 అయదు రొట్టెజ్ ముక్కెజ్ కిజి అయదు వెయిజ్ లోకాజ్ సీబాతి సిత్తిజ్ మిగ్గితిక్కెజ్ ఎసాడు; గంపెజ్ మీరు కెహ్మిదెర్? ఇజి యేసు సిసూరిజ్ వెన్బాతాన్. అందెజి సిసూర్ వన్నెండ్రె గంపెజ్ కెహ్మి ఇహార్. 20 యేసు మరి వెన్బాతాన్, ఏడు రొట్టె ముక్కెజ్ కిజి నాల్గి వెయిజ్ లోకాజ్ సీతి వెనుక మిగ్గితికెజ్ ఎసాడు గంపెజ్ కెహ్మిదెర్? ఏడు గంపెజ్ ఇజి వారు వెహ్మర్. 21 యేసు సిసూరిజ్ వెహ్మన్, మీరు ఏలుబా నాను కితి బమ్మూతి పణిజి వందిజ్ అర్దం కిదెజ్ నెన్ ఇదెరా?

యేసు బేత్ సయ్య పట్నమ్దు ఒరెన్ గుడ్డివన్నిజ్ నెగెండ్రె కిజినాన్

22 యేసుని, వన్ని సిసూర్ బేత్ సయ్య ఇని నాటో వాతార. అయవలె సెగొండార్ ఒరెన్ గుడివన్నిజ్ యేసుబాన్ తత్తార. యేసు, నీను విన్నిజ్ ముట్ అ", ఇజి వాండ్రు నెగెండ్రె అనివందిజ్ బతిమాలితార.

23 యేసు అయ గుడివన్నిజ్ కీదు అస్తాండ్రె నారు డాటిసి ఒత్తాన్. అయ గుడివన్ని కణుకాజ్ పూసి డెస్సెజాణ్ ముట్టి "నిజి ఇనికబా తోర్జినాదా", ఇజి వెన్బాతాన్. 24 వాండ్రు కణుకు పెర్జి, సెడిబా తోర్జినాద్, గాని లోకు మరెక్ సెడిజిని వజ తోర్జినాద్ ఇజి వెహ్మన్. 25 మరి ఒర్పు యేసు వన్ని కణుకె ముట్టాన్. నస్తవలె వన్ని కణుకు నెగెండ్రె అతిజ్ విజా నెగెండ్రె సుడెతాన్. 26 యేసు వన్నిజ్ బేత్ సయ్య మర్జి సాన్మా ఇజి వెహ్మి వన్ని ఇండ్రె పోక్తాన్.

యేసు ఎయెన్ ఇజి పేతురు వెహ్మినాన్

27 యేసుని, వన్ని సిసూర్ పిలిపుది ఆతి కయనరయ పట్నమ్దిజ్ డగ్రు మన్ని హాహ్కెజ్ వయనం కిజి మహార్. సాన్సి మహిజ్ సర్దు యేసు వరిజ్ వెన్బాతాన్, నాను ఎయెన్? ఇజి లోకుర్ వర్గినినార్?

28 దన్నిజ్ సిసూర్, సెగొండార్ నీను బాప్తిసం సీని యోహాను ఇజినార్. మరి సెగొండార్ నీను పూర్బమ్దాన్ మహి ఏలియ ప్రవక్త ఇజినార్. మరి సెగొండార్ నీను పూర్బమ్దు మహి ప్రవక్తలోఇ ఒరెన్ ఇజి వెహ్మినాన్, ఇహార్.

29 అహిజి మీరు నజి ఎయెన్ ఇజి వెహ్మినానిదెర్? ఇజి యేసు సిసూరిజ్ వెన్బాతాన్. నస్తవలె పేతురు, నీను క్రీస్తు ఇహిజి దేవుణు ఏర్పాటు కితిపోక్తాన్", ఇజి వెహ్మన్. 30 యాక ఎయెర్వెలబా వెహ్మట్ ఇజి కసితంవరిజ్ ఆడ్ర సిత్తాన్.

యేసు వన్ని సావువందిజ్ వెహ్మినాన్

31 యేసు వరిజ్ నెన్ పిస్తెజ్ మొదొల్స్తాన్, లోకుమరిసి ఆతి నాను నండా మాలెజ్ ఓరిస్తెజ్ వలె. యూద పెద్దెలెజ, పెరి పుజెరిబు, యూదురి రూలుజ్ నెన్ పిస్తెకార్ నజి నెక్కపాక్కార్ లోకుర్ నజి నన్నాలె. సాజి మూండ్రె దినమ్కాజ్ దేవుణు నజి మర్జి నిక్కాన్లె. 32 యేసు యాకెజ్ విజా డాప్ ఎండ్రె వెహ్మిజ్ పేతురు యేసుజ్ ఉండ్రెవడెకాదు ఒసి, ప్రబువ నిజి యలెకెండ్రె జగ్గిదెజ్ ఆవిద్ ఇజి గటిజ వెహ్మిజ్ మొదొల్స్తాన్.

† హేరోదురాజు కితి తప్ప పణిజిని పరిసయరు నెస్తి తప్ప బోదెజ్ పులాజ్ దూరు పులాజ్ కినిలెకెండ్రె లోకాజ్ సెఇక కిజినాద్ ఇజి యేసు వెహ్మినాన్.

33 యేసు సినుర్దరోట్ మరణి సుడేజి కోపమ్దాన్ పేతురుజ్ వెహ్సాన్. "ఓ సయ్యనా నాబాణిజ్ డిఃసి సాన్అ. నీ మన్నుదు మన్ని ఆలోసనమ్కు దేవుణుబాణిజ్ వాతికెజ్ ఆఱు. లోకుబాణిజ్ వాతికదె నీను ఆలోసనం కిజిన".

34 నస్తవలె యేసు లోకాజ్ విజేరిజ్, సినుర్దజ వన్నిబాన్ కూక్కి ఈఱు వెహ్సాన్. ఎయెన్బా నావెట వాదెజ్ ఇహిజ వాండ్రు వన్ని సాంత ఇస్టమ్కు నజీ నమ్మితివందిజ్ వన్నిజ్ వాని ఇని మాలెజ్బా ఓరిస్తెజ్ తయారాజి నావెట వాదెజ్ †. 35 ఎయెరుబా వన్ని పాణదిజ్ కాపాడెదెజ్ సుడేతిజ వన్నిజ్ ఎలాకాలం దేవుణువెట బత్రిని బత్సు దొహ్సావద్. గాని ఎయెన్బా నా వందిజ్, నువార్త వందిజ్ వన్ని పాణం సీతిజ వన్నిజ్ ఎలాకాలం దేవుణువెట బత్రిని బత్సు దొహ్సావాద్. 36 ఒరెన్ వాండ్రు కొరితివజ యా లోకమ్ది ఆస్తిసుకం విజా దొహ్సాఅజి వన్నిజ్ ఎలాకాలం దేవుణువెట బత్రిని బత్సు దొహ్సావ్ండా మహిజ, ఇని లాబం ఇని లాబంబా సిల్లెద్. 37 ఎందానిజ్ ఇహిజ ఎలాకాలం బత్రిని పాణమ్దిజ్ బదులు ఇనికబా సీదెజ్ లోకఅట్వన్. 38 యా తరమ్దికార్ నండా సెఇకార్ దేవుణువందిజ్ మన్ను సిల్లెండ మన్నికార్. నా బుబ్బ ఆతి దేవుణుజాయ్దాన్ దేవుణు దూతెజ వెట వానివలె, నా వందిజ్ నామాటెజవందిజ్ సిగు ఆనివరివందిజ్ లోకుమారిసియాతి నానుబా సిగు ఆన".

9 యేసు వరిజ్ ఈఱు వెహ్సాన్, "నాను నిజం వెహ్సాన్. ఇబ్బె నిహిమహి వరిలోఇ సెగొండార్ దేవుణు గొప్పసత్తుదాన్ వన్ని లోకురిజ్ ఏలుబడిః కిజినక సూణిదాక సావర్".

యేసువుబుజ్ మూర్తి మారిసినాద్.

2 ఆరు రోస్సుసాహివెనుక యేసు పేతురు, యాకోబు, యోహానుజ్ వన్నివెట ఉండ్రి పెరి గొరొత్ కూక్కి ఒత్తాన్. ఆ నాల్ఎరతప్ప అబ్బె మరి ఎయెర్బా సిల్లెర్. అబ్బె వరిఎద్దు వన్నిమూర్తి మారితాద్. 3 యేసు ఫారెవతి మహి సాక్కు జిగిజిగి మెరిసిని తెల్లానిజాయ్ వజ ఆతాద్. యా లోకమ్దు నసా తెల్లాజ్ నొర్బానికార్ ఎయెర్ సిల్లెర్. 4 మోసెని, ఏలియ వరిజ్ తోరె ఆతార్. వారు యేసువెట వగ్గిజి మహార్. 56 అక్క సుడేజి సినుర్ తియెలాతార్. అందెజె పేతురు ఇనిక వెహ్సాజ్ నెన్ఏండ, "ప్రబు, మాటు ఇబ్బె మహిజనెగెద్. అందెజె మూండ్రి గుడుసెజ్ తొహ్సావ్. నిజి ఉండ్రి, మోసెజ్ ఉండ్రి, ఎలియెజ్ ఉండ్రి" ఇహాన్. 7 అయవలె ఉండ్రి మోసాప్ వరిజ్ పిడేగితాద్. అయవలె అయ మోసాప్ లోఇహాన్, "పిండ్రు నా ఇస్టమాతి నా మరిన్. విన్నిమాట వెండ్రు", ఇజి ఉండ్రి కంటం వాతాద్. 8 వెటెన వారు సురుల సుడేతిజ్ వరివెట యేసు తప్ప ఎయెర్బా తొర్వితార్.

9 వారు గొరొన్ డిఃగిజివాజి మహివలె, "లోకుమారిసియాతి నాను సాతివరిబాణిజ్ మరణి నిజినిదాక మీరు సుడేతిక మహిక ఎయెజ్బా వెహ్సాట్", ఇజి యేసు వరిజ్ కనితం వెహ్సాన్. 10 యేసు వెహ్సావజ వారు ఎయెజ్ వెహ్సావండ వరిమన్నుదు ఇడేజి వరిలోఇ వారె వగ్గితార్, "సాజి నిజ్నిక ఇహిజ అర్దం ఇనిక?". 11 నస్తవలె వారు యేసుజ్ వెన్బాతార్, "ఏలియ ముజాల్ వాదెజ్వెలె ఇజి యూదురి రూలు నెన్ఏన్సికార్ ఎందానిజ్ వెహ్సానార్? 12 యేసు ఏలియ ముజాల్ వానాన్ ఇజి వెహ్సా కిజెమె. వాండ్రు వాజి విజా కొత్తజ్ కినాల్లె ††. గాని లోకుమారిసియాతికాన్ నండా కస్టమ్కు ఓదిసి మాలెజ్ ఆజి లోకువన్నిజ్ నెక్కిపాక్కాల్లె ఇజి రాస్తి దనిజ్ అర్దం మిజి తెలినాదా? 13 గాని నాను మిజి వెహ్సాన, ఏలియ వాతాన్. వన్ని వందిజ్ రాస్తి లెకెండ వరిజ్ ఇస్టం ఆతి వజ వారు వన్నిజ్ కితార్. ఇజి వెహ్సాన్.

దెయం అస్తికొడేదిజ్ యేసు నెగెండ కిజినాన్

14 యేసుని, సినుర్, మహి సినుర్ మహిబాన్ వాతిజ్ సినుర్ సురుల నండా లోకుర్ కూడేతి మహిక సుడుఃతార్. యూదురి రూలు నెన్ఏన్సికార్ సినుర్వెట వాదిసి మహార్. 15 అబ్బె మహి లోకుర్ విజెరె యేసుజ్ సుడేతారె నండా బమ్మ ఆజి వెటెనె వన్నిబాన్ ఉహ్సావనిజి వన్నిజ్ మాడిఃస్తార్.

16 నస్తవలె యేసు, "మీరు ఇనిదన్నిజ్ సినుర్వెట వాదిసి మహిదెర్? ఇజి వెన్బాతాన్.

17 ఆ జనమ్లోఇ ఒరెన్ ఈఱు వెహ్సాన్, "మెస్టర్, నా మరిసిజి నీ డగ్రు తత్త. వన్నిజ్ ఉండ్రి దెయం అస్సాదె వన్నిజ్ వగ్గిఏండ కితాద్. 18 ఆ దెయం నా మరిన్అస్సి వేడెడు అబ్బెనె వన్నిజ్ అర్పిసినాద్. నస్తవలె వాండ్రు వెయుదాన్ పెంపులు కక్కి పల్కు కొహ్సానినాన్. వాండ్రు డుడ్డువజ డజ్న ఆజినాన్. ఆ దెయమ్దిజ్ ఉల్పు ఇజి నీ సినుర్ వెట నాను వెహ్సా గాని సినుర్ అట్వితార్. 19 యేసు వెహ్సాన్, "నమకం సిల్లి యా తరమ్దికిదెరా, నాను ఎస్సాకాలం మీవెట మంజిన? మీరు కిజినికెజ్ ఎస్సా ఓరిస్తెజ్? వన్నిజ్ నా డగ్రు తగ్గల". 20 నస్తవలె వారు ఆ కొడేదిజ్ యేసుడగ్రు తత్తార్. ఆ దెయం యేసుజ్ సుడేతిజ్సరి వన్నిఒడేల్ విజా వణకిసి బూమిద్ అర్పాద్. అర్పాదె వాండ్రు సుడేబాజి పాబు కక్తాన్.

21 నస్తవలె యేసు, "వన్నిజ్ దెయం అసి ఎస్సా కాలం ఆతాద్?", ఇజి అపానిజ్ వెన్బాతాన్. "ఇజ్జి వెలెహానె", ఇజి అప్సాసి వెహ్సాన్. 22 "ఆ దెయం కొడేదిజ్ నప్తెజ్ ఇజి నండానుట్టు సినుర్, సిల్లిజ ఏరుదు అర్పి మహాద్. నీను ఇనికబా కిదెజ్ అట్టి ఇహిజ మా మున్ను కనికారం ఆజి మజి సాయం కిల", ఇజి అప్సాసి యేసుజ్ వెహ్సాన్. 23 యేసు వెహ్సాన్, "నీను ఇనికబా కిదెజ్ అట్టిజ ఇజి మీరు నజి వెహ్సాదెరా? ఎయెన్బా దేవుణు మున్ను నమకం ఇడ్డిజ వన్నిజ్ దేవుణు ఇనికబా కిదెజ్ అట్టాన్". 24 వెటెనె ఆ ఇజ్జి వన్ని అప్సాసి, "నాను నమిజిన. అనుమానం సిల్లెండ నమినివజ నాను నిజి నమ్మిడెజ్ సాయం కిల", ఇజి డటం వెహ్సాన్. 25 అబ్బె లోకుకూడేజి ఉహ్సా వానిక యేసు సుడేజి ఆ దెయమ్దిజ్ "ఓ గుల్లబొయెర దెయం, యా కొడేదిజ్ డిఃసి వెల్లి సాన్అ ఇజి నాను ఆడ్ర సీజిన. ఎనిజ్బా మరణి వన్ని లోఇ రమ", ఇజి డటిసి వెహ్సాన్. 26 నస్తవలె ఆ దెయం గగొలాజి వన్నిజ్ గొప్ప వణకిసి డిఃస్త సాహాద్. ఆ కొడేదిజ్ సుడేతిజ సాతివన్నివజ మహాన్. అక్క సుడేజి నండాండార్ "యా కొడేః సాత సాహాన్" ఇహార్. 27 గాని యేసు వన్ని కీదు అసి నిక్తిజ్ వాండ్రు నిహాన్.

28 యేసు ఉండ్రి ఉండ్రె సాహివెనుక, యేసు అజ మహిజ్ వన్నిసినుర్, "మాపు ఎందానిజ్ దెయమ్దిజ్ ఉల్పెజ్ అట్వితాప్? ఇజి వెన్బాతార్. 29 అందెజె యేసు, "యా రకం దెయమ్కు పార్దనం వెలెనె గాని మరి ఇనిదనివెలెబా సాన్ఉ", ఇజి వెహ్సాన్.

† † వడాయ్ ప్రమాణమ్దు మన్ని మలాకి ప్రవక్త రాసి పుస్తకమ్దు రాస్తిమన్నిలెకెండ ఇహజ ఏలియ ముజాల వాదెజ్ ఇజి యూదురి నమ్మిజినార్. మలాకి 3:1; 4:5-6.

యేసు వన్ని సాపువందిజ్ మరి వెస్సినాన్

30 వారు అబెణిజ్ సాన్ని గలీలయదాన్ సాన్ని మహార్. వారు ఎంబె మంజినారొ ఇజి ఎయెజ్బా తెలిదెజ్ యేసుజ్ ఇష్టం సిల్లెతాద్. 31 ఎందానిజ్ ఇహిజ, యేసు వన్ని సిసూర్జ నెస్పిసి మహాన్. ఇనిక ఇహిజ, "లోకుమరిసియాతి నజి లోకాజ్ ఒవజెప్పాలె. వారు నజి సప్పార్. మూండ్రి రోస్కాజ్ నాను బత్రిజి నిజ్నాలె. 32 గాని యేసు వెస్సినాను సిసూర్ అర్దం కివతార్. ఆ మాటెజ వందిజ్ వన్నిజ్ వెన్బాదెజ్ వారు తియెలాతార్.

విజేరిజ్ ముస్సు పెరికాన్ ఎయెన్?

33 వారు కపెర్నహము ఇని పట్నమ్దు వాతార్. వారు ఇండ్రో వాతిజ్ యేసు మీరు సర్దు ఒరెన్వెట ఒరెన్ ఇనిదని వందిజ్ వాదిసి మహిదెర్. ఇజి వెన్బాతాన్. 34 గాని వారు ఇనిక వర్గింండ అలెతార్. ఎందానిజ్ ఇహిజ వానివలె సర్దు 'మా లోఇఎయెన్ పెరికాన్' ఇజి ఒరెన్వన్నివెట మరిఒరెన్ వాదిసి మహార్. 35 నస్తివలె యేసు బస్తాండ్రె వన్నెండు మణిసిరి సిసూరిజ్ కూక్కి ఈహు వెప్సాన్, ఎయెన్ మహి వరిముస్సు పెరికాన్ ఆనాండ్రో, వాండ్రు విజెరి ఇంక అగిజి మండ్రెజ్. వాండ్రు విజేరిజ్ సేవ కిదెజ్. 36-37 వెనుక యేసు ఒరెన్ ఇజి కొడొడిజ్ తసి వరినడిఃమి నిల్పాన్. మరి ఆ కొడొడిజ్ ఎతాండ్రె ఈహు వెప్సాన్, "ఒరెన్ ఇజి కొడొడిజ్ ఎయెర్ నా పేరు అసి వరిఇండ్రో డగ్రు కినారొ వారు నజి డగ్రు కినార్. ఎయెర్ నజి డగ్రు కినారొ నజి ఆఎండ నజి ఫోక్తివన్నిజ్ డగ్రు కినార్.

మా ముస్సు వగసిల్లికాన్ మా వడఃకాదు మన్నికాండ్రె

38 యోహాను వెప్సాన్, "మేస్సర్, ఒరెన్ నీ పేరు అసి దెయమ్కాజ్ ఉల్పిక్తి మాప్ నుడఃతాప్. వాండ్రు మాలోఇ మనికాన్ ఆవన్. అందెజి మాపు వన్నిజ్ అడ్డు క్రితాప్. 39 యేసు వెప్సాన్, "వన్నిజ్ మీరు అడ్డు కిమాట్. నా పేరు అసి యేలు బమ్మాతి వణికినికాన్ వెటనె నా వందిజ్ సెఇక వెహ్ ఏన్. 40 మా ముస్సు వగ సిల్లికాన్ మా వడఃకాదు మనికాండ్రె. 41 నాను నిజం వెస్సిన, ఎయెర్బా మీరు క్రీస్తు వారుఇజి వెస్సిన, నా పేరు అసి గినాడు ఏరుఉండెజ్ మిజి సితిజ దేవుణు వరిజ్ నిజం ఇనాయం సీనాన్.

తప్పకిబిసినివన్నిజ్ నండొ సిక్కి వానాద్

42 నాముస్సు నమ్మకం ఇడ్డి యా ఇజిరి కొడొఃనన్ని వరిలోఇ ఒరెన్వన్నిజ్ ఎయెర్బా తప్పకిదెజ్, సరి తోరిస్తిజి వాండ్రు మెడఃదు పెరి జతవణుకు తోహా ఆజి నమ్దరమ్దు అడఃగి ముడిఃగి సానొక వన్నిజ్ నెగెద్. ఎందానిజ్ ఇహిజ తప్పకిబిస్సివన్నిజ్ ఒడ్డి సిక్కి వాన్ద్. 43 నీ కియు నిజి తప్ప కిబిస్తిజి దనిజ్ కత్తి వీసీర్ అ. 44 రుండి కికు మంజి ఎలాకాలం సిసు మంజినిబాన్ సాన్ ఏండ ఉండ్రె కియు మంజి ఎలాకాలం బత్రిదెజ్ దేవుణుబాన్ సానిక నెగెద్. 45-46 నీ కాలు తప్పకిబిస్తిజి దన్నిజ్ కత్తి వీసీర్ అ. రుండి కాల్యు మంజి ఎలాకాలం సిసు మంజినిబాన్ దేవుణు నిజి అర్వేంండ, సాట వాండ్రు ఆజి ఎల్ల కాలం బత్రిదెజ్ దేవుణు బాన్ సానిక నెగెద్. 47 నీ కణుక తప్పకిబిస్తిజి దన్నిజ్ లాగ్గి విసీర్ అ. రుండి కణుకు మంజి దేవుణు నిజి నరకమ్దు అర్పెండ ఉండ్రె కణక మంజి దేవుణు ఏలుబడిఃదు మంజినిక నెగెద్. 48 బానె వరి పిడుఃకు † సాఉ. సిసు నమ్ ఏద్". 49 సారూదాన్ ఇడ్డివజ దేవుణుదిజ్ నమ్మిని వన్నిజ్ సిసు నని కష్టందాన్ ఇడ్డాన్. 50 సారు, నెగ్గికాదె గాని దన్నిజ్ మని రుసి సాహిజ ఎలాగ మరి దన్నిజ్ రుసి తప్పిస్తిజ్ ఆనాద్? మీరుబా సారు రుసి సీనివజ ఒరెన్వెట ఒరెన్ సమనం కల్గిజి మండ్రెజ్".

అల్పిజ్డిఃస్తిజ్ నాయమ్నా ఇజి యేసు నెస్పిసినాన్

10 యేసు, వాండ్రు మహిబాణిజ్ డిఃసి యూదయ ప్రాంతమ్దు వాజి యెర్దాన్ గడ్డ డాట్టాన్. మరి వన్నిబాన్ నండొ లోకుర్ వాతార్. ఎసెజ్బా నెస్పిసినిలెకండె యేసు వరిజ్ నెస్పిస్సాన్. 2 నెగొండార్ వరిసయరు యేసుడగ్రు వాజి వన్నిమాటెజ తప్ప అస్తిజ్ నుడఃతార్. వారు యేసుజ్ వెన్బాతార్, మోసె సితి రూలువజ ఒరెన్ వన్నిఅల్పిజ్ డిఃస్తిజ్ తగితి రూలుమనాదా? 3 అందెజి యేసు, మోసె ఇని రూలు మిజి సితాన్? ఇజి వరిజ్ వెన్బాతాన్. 4 ఒరెన్ వన్ని అల్పిజ్ డిఃస్తిజ్ ఇహిజ ఉండ్రె ఆక్కు రానీసీజి దన్నిజ్ డిఃస్తిజ్ ఆనాద్. ఇజి మోసె సితి రూలుదు మనాద్, వారు వెప్సార్. 5 యేసు వెప్సాన్, మీ ముస్సుజ్ నస్సా గర్ల ఆతిజ్నె యా ఆడ్ర రాసి సితాన్. 6 గాని దేవుణు లోకాజ్ పుటిస్తివలె మొగకొడొః అయేలి కొడొఃలెకండె వరిజ్ పుటిస్సాన్. 7 అందెజి మొగవాండ్రు వన్ని అయేసి అపాసిజ్ డిఃసి వన్ని అల్పివెట కూడఃజి మంజినాన్. 8 రిఎర్ ఉండ్రె ఒడొఃల్వజ ఆజిమంజినార్. అందెజి మరి ఎసెజ్బా వారు రిఎర్ ఆఎండ ఉండ్రె లోకునె. 9 అందెజి దేవుణు జత్తకూడిఃస్తివరిజ్ లోకు అజ కినిక ఆవద్. 10 వారు ఇండ్రో మహివలె సిసూర్ యా సజతి వందిజ్ యేసుజ్ మరి వెన్బాతార్. 11 యేసు వెప్సాన్, "ఒరెన్ అల్పిజ్ డిఃసి మరిఉండ్రె దనిజ్ ఇడ్డెఆతిజి వాండ్రు రంకు బూలాజినాన్. 12 అయ లెకండె అయేలికొడొః మాసిజ్ డిఃసి మరి ఒరెన్వన్నిజ్ ఇడ్డెఆతిజి అది రంకుబూలాజినాద్".

యేసు ఇజిరి కొడొఃరిజ్ దీవిసినాన్

13 లోకుర్, వరిఇజిరి కొడొఃరిజ్ వరిముస్సు వన్ని కిక్కు ఇడ్డెదెజ్ ఇజి యేసుబాన్ తత్తార్. అక్కు నుడఃతారె సిసూర్ వరిజ్ జట్టిజ్ ఆతార్. 14 గాని యేసు అక్కు నుడఃతాండ్రె సిసూర్ముస్సు కోపం ఆతాన్. "యా ఇజిరి కొడొఃరిజ్ నా డగ్రు రవీర్. వరిజ్ అడ్డు కిమాట్. ఎందానిజ్ ఇహిజ యాలెకండె మన్నికారె దేవుణు ఏలుబడిఃదు మంజినార్. 15 నాను వెప్సాకె నిజమె. ఇజిరి కొడొఃర్ నమకం ఇడ్డివజ దేవుణుముస్సు నమకం ఇడ్డికారె దేవుణు ఏలుబడిఃదు మంజినార్. సిల్లికార్ సాన్ ఏర్", ఇజి యేసు వెప్సాన్. 16 నస్తివలె యేసు అయ ఇజిరి కొడొఃరిజ్ ఎత్తి, వరి ముస్సు కిక్కు ఇడ్డిజ్ పామ్ జి దీవిస్సాన్.

† నజ్జెసానిదన్నిజ్ లోఇమున్ని పిడుఃకుజ్

ఆస్తి మనికాన్ యేసుడగ్గు వాజినాన్

17 యేసు అబ్బెణాన్ సాండ్రెజ్ సాత్తిజ్ ఒరెన్ ఉహాక్కి వాజి వన్ని ముజాల్ ముణుకుజ్ ఊర్జి మాడిస్తాన్, “ఓ నెగ్గి బోదకినికి, దేవుణువెట ఎలాకాలం మంజిని బత్తుదు మండ్రెజ్ ఇహిజ నాను ఇనిక కిదెజ్”, ఇజి యేసుజ్ వెన్బాతాన్. 18 “నీను ఎందానిజ్ నజి నెగ్గికి ఇజి వెహాసిని? దేవుణు ఒరెండ్రె నెగ్గికాన్. మరి ఎయెన్బా నెగ్గికాన్ ఆవన్. 19 దేవుణు వెహి రూలువిజా నిజి తెలినాద్. లోకాజ్ సప్తజ్ ఆవద్, రంకు బూలాదెజ్ ఆవద్, డొజ కిమా, అబద్దమ్దిజ్ సాస్య వెహ్మా, ఎయెజ్బా మోసెం కినిక ఆవద్, యాయ బుబ్బురిజ్ గవరమ్దాన్ నెగ్గెండ్రె సుడిఃదెజ్”, ఇజి యేసు వన్నిజ్ వెహ్మాన్. 20 వెహ్మాజ్ “బోదకినికి, ఇజిరి వెలెహాన్ అసి యా విజావనకాజ్ లోజిజిని నాను మంజిన”, ఇజి వాండ్రు వెహ్మాన్. 21 యేసు వన్నిజ్ సుడిఃజి వన్నిజ్ ప్రీమిస్తాన్. “నీను ఉండ్రె కిదెజ్ మనాద్. అక్క ఇనిక ఇహిజ నీను సాస్యి నిజి కల్లితిమనిక విజా పార్సి అయ డబ్బుజ్ బిదాతివరిజ్ సిఅ. అయవలె పరలోకమ్దు నిజి ఆస్తి దోహక్కాద్. వెనుక వాజి నా సిసూ ఆఅ”, ఇజి యేసు వెహ్మాన్. 22 యామాట వెహండ్రె వాండ్రు మొకొం ఊతాండ్రె మన్నుదు దుకమాజి సాహాన్. ఎందానిజ్ ఇహిజ వాండ్రు నండ్రె ఆస్తి మన్నికాన్. 23 నస్తివలె యేసు సురుల సుడిఃజి సిసూర్జి వెహ్మాన్. “ఆస్తి మన్నికాన్ దేవుణు ఏలుబడిః అడిగి మండ్రెజ్ ఎస్సానొ కష్టం.

24 యేసు వెహ్మా మాటెజ్ సిసూర్ వహారె బమ్మ ఆతార్. యేసు మరి వెహ్మాన్, “కొడొరాండె దేవుణు ఏలుబడిః అడిగి మండ్రెజ్ ఎస్సానొ కష్టం. 25 ఆస్తిమన్నికాన్ దేవుణుకిని ఏలుబడిఃదిజ్ లోజిజి మండ్రెజ్ ఇహిజ కష్టం. ఉండ్రె ఒంటె బోబానం బోరొదాన్ డుగ్గినిక దన్నిజ్ ఇంక సులునె”.

26 యాక వెంజి సిసూర్ మరి ఒద్దె బమ్మ ఆతార్. అహిజ దేవుణు రక్సిస్తిలెకెండ్రె ఎయెన్ మండ్రెజ్ అటూన్? ఇజి వారు ఒరెన్వెట మరి ఒరెన్ వెహ్మాన్. 27 నస్తివలె యేసు వరిజ్ సుడిఃజి, అయా లోకాజ్ అట్ఇకాదె గాని దేవుణు విజా కిదెజ్ టూన్”, ఇజి వెహ్మాన్. 28 నస్తివలె పేతురు, మాపు విజా డిస్తాపె సివెట వాతాప్ ఇజి యేసుజ్ వెహ్మాన్.

29-30 యేసు మరి వెహ్మాన్, నాను వెహ్మా ఇనిక ఇహిజ, నా వందిజ్, సువార్త వెహ్మా వందిజ్, ఇలుజొల్లు నా దాదతంబేరిజు, తజిబిబికాజ్, కొడొరిజ్, అయ్సిఅపాసిరిజ్, బూమిజ్ డిస్తివన్నిజ్ యా లోకమ్దునె వంద వందుజ్ ఇల్కు, దాదతంబేరిజ్, బిబితజికు, కొడొరిజ్, అయ్సిఅపాసిర్, బూమి, కల్లినాద్. అక్కాదె ఆవండ దేవుణుదిజ్ నమ్మితివరిజ్ యా లోకమ్దు కష్టమ్కుబా వానె. గాని దేవుణు రాజవజ వానివలె వాండ్రు ఎలాకాలం దేవుణువెట బత్కినాన్.

31 అయలెకెండ్రె కడెఃవెరిదికార్ ఇజి ఒడిఃబినికార్ మొదొహికార్ ఆనార్. ముందహికార్ ఇజి ఒడిఃబినికార్ కడెఃవెరిదికార్ ఆనార్.

యేసు మరిఉండ్రె సుటు వన్నిసాపు వందిజ్ వెహ్మానాన్

32 యేసుని, సిసూర్ యెరూసలేమ్దు సాస్యి మహార్. లోకుర్బా వరివెట సాస్యి మహార్. యేసు వరి ముజాల్నడిఃతాన్. యేసు యెరూసలేమ్దు సాస్యిని వందిజ్ సిసూర్ బమ్మఆతార్. లోకుర్ తియెలాతార్. యేసు వన్నెండ్రు మణిసిర్ సిసూర్ వన్నిడగ్గు కూక్కి, వన్నిజ్ జరినిక వరిజ్ వెహ్మాన్. 33 “ఇదిలో మాటు యెరూసలేమ్దు సాస్యినాల్. లోకుమరిసియాతి నాను పెరి పుజెరిజ, యూదురి రూలువెహ్మా వరిజ్ ఒవజెప్పార్లె. వారు నజి సాపుదిజ్ సిక్కి సీజి యూదురు ఆఇవరిజ్ నజి ఒవజెప్పార్లె. 34 వారు నజి వెక్కిసి, నా ముస్కు పూసి, కొర్దదాన్ డెయ్జి సప్పార్లె. మూండ్రె రోస్కాణిజ్ మరజి నిజ్నాలె”, ఇజి వెహ్మాన్.

యాకోబుని యోహాను యేసువెట ఉండ్రెమాట వెహ్మానాన్

35 నస్తివలె జెబెదయ మరిసిరాతి యాకోబు యోహాను ఇనికార్ యేసుడగ్గు వాతారె, “ఓ బోదకినికి, మాపు ఇనికబా లొస్తిజి అక్క మజి సీదెజ్వెలె” ఇహార్. 36 యేసు వరిజ్ “నాను మీ వందిజ్ ఇనిక కిదెజ్?”, ఇజి వెన్బాతాన్. 37 వారు, “నీను రాజవజ ఏలుబడిః కినివలె మజి ఒరెన్వన్నిజ్ నీ ఉణెర్ పడెకాదు ఒరెన్వన్నిజ్ నీ డెబ్బె పడెకాదు బసె కిఅ ఇజి కోరిజినాప్”, ఇజి వెహ్మాన్. 38-39 యేసు వరిజ్ “మీరు ఇనిక లొసినిదెరో మీరు నెన్ఇదెర్. నాను ఓరిస్సెజ్ మన్ని నండ్రె బాదెజ్ మీరు ఓరిస్సెజ్ అట్టిదెరా? నాను పొందిని బాప్తిసం పొందిదెజ్ అట్టిదెరా?”, ఇజి వరిజ్ వెన్బాతిజ్ వారు, “మాప్ అటూప్ ఇహార్. దనిజ్ యేసు నాను ఓరిస్సి నండ్రెబాదెజ్ మీరు ఓరిస్సిదెర్. నాను పొందిని బాప్తిసం మీరు పొందిదెజ్. 40 గాని నా ఉణెర్ పడెకాద్ డెబ్బె పడెకాద్ ఎయెర్ బస్సెజ్ ఇజి తీర్మనం కితిక నాను ఆవ. దన్ని వందిజ్ దేవుణు తీర్మనం కిత్త మనాన్. వాండ్రు తీర్మనం కితివరిజ్ అక్క సీనాన్.

41 మహి పది మన్ని సిసూర్ యా మాట వెహారె యాకోబుని యోహాను ముస్కు కోవమాతార్. 42 యేసు సిసూరిజ్ విజెరిజ్ కూక్కి ఈపల వెహ్మాన్, “యూదురు ఆఇవరిలో ఇ ఏలుబడిః కిదెజ్ అతికారం మన్నికార్ వరిముస్కు అతికారం తోరిస్సార్ వరిలో ఇ పెరికార్ వరిజ్ మన్ని అతికారమ్దాన్ లోకురిజ్ అణను తిగ్జినార్ ఇజి మిరు నెన్సిదెర్. 43 మీరు వరిలెకెండ్రె మండ్రెజ్ ఆవద్. గాని మీ లో ఇ ఎయెన్బా పెరికానాదెజ్ ఇహిజ వాండ్రు మిజి పణిమణిసిర్ లెకెండ్రె ఆదెజ్ వలె. 44 మరి ఎయెన్బా మిజి విజెరె ముస్కు నెయ్కి ఆదెజ్ ఇహిజ వాండ్రు మిజి విజెరిజ్ వెటిపణిమణిసిలెకెండ్రె ఆదెజ్ వలె. 45 ఎందానిజ్ ఇహిజ లోకు మరిసిఅతి నానుబా లోకాజ్ సేవ కిదెజ్ వాత గాని సేవ కిబె ఆదెజ్ రేపిత. మరి నండ్రెండ్రె వరి పావమ్కాణ్ విడుఃదల కిదెజ్ నా పాణం సీదెజ్ వాత మన్న”.

యేసు గుడ్డిఅతి బర్తిమయిజ్ నెగెండ్రె కిజినాన్

46 యేసుని సిసూర్ యెరికొపట్టుమ్దు వాతార్. వారు నండ్రె లోకుర్వెట పట్టుమ్దాన్ సాస్యి మహిజ్ తిమాయి మరిసి అతి బర్తిమయి ఇని గుడ్డివాండ్రు సరి పడెకాదు లోసాపాదెజ్ బస్త మహాన్. 47 సరి దాన్ వాజినాన్ నజెరతువాండ్రు యేసు ఇజి వెంజి, “ఓ యేసు, దాపీదుమరిసి నా ముస్కు కనికరం తోరిస్అ”, ఇజి డటం గగోల్ఆతాన్.

48 సేన లోకువన్నిజ్ “పలాక్ మండ్రు ఇజి గోల కిత్తార్. గాని వాండ్రు “ఓ దాపీదుమరిసి, నా ముస్కు కనికరం తోరిస్అ”. మరి ఒద్దె డట్టం డేల్స్తాన్. 49 యేసు నిహండ్రె, “వన్నిజ్ కూకల”, ఇజి వెహ్మాన్. వెహ్మాజ్ వారు ఆ గుడ్డివన్నిజ్ కూక్కి, “దయరం మన్అ, యేసు నిజి కూక్కినాన్, నిజ్అ”, ఇజి వెహ్మాన్. 50 వెటనె వాండ్రు వన్ని సిరి సాక్క విసీర్తాండ్రె నిజిజి యేసు బాన్వతాన్.

51 యేసు వచ్చివెలు, “నాను నిజీ ఇనిక కిదెజ్ఇజి నీను కోరిజిని?”, ఇజి వెన్బాతాన్. నస్తీవలె వాండ్లు, “యేసు, నాను బేస్తజ్ ఆపిద్”, ఇజి వెహ్లాన్. 52 యేసు, “నీను నా ముస్కు నమకం ఇడ్డి అందెజె నీను నెగెండ్ ఆతి నీను ఇండ్ట్రా సాన్ఆ” ఇహ్. వెటనె సుడుఁదెజ్ అట్టాన్. వాండ్లు యేసువెలు సాహ్.

యేసుజ్ రాజువజ మర్యాద సీజినార్

11 1-2 యేసుని, వన్నిసిసూర్ యెరూసలేం డగ్రుమన్ని బెత్పాగె బేతానియ ఇని నాహ్కజ్ వాతార్. యా నాహ్కు ఒలివ గొరొన్డగ్రు మన్నె. అబ్బె వాతిజ్ యేసు సిసూర్ రిపిరిజ్ కూక్కి, “మీరు ఎద్దు మని నాటో సాండ్లు. అబ్బె సాహిజసరి తొహ్తి మని ఉండ్డి పెరి గాడఁదె పిల్ల మీరు సూణిదెర్ దని ముస్కు ఎయెర్బా ఎసెజ్బా బన్వితారె. దనిజ్ కుత్తి నాబాన్ పేర్జి తగాట్”. 3 “మీరు ఎందా కుత్తినదెర్ ఇజి ఎయెర్బా వెహ్తిజ, యాక ప్రబుజ్ కావాలి. మరి వెటనె దన్నిజ్ మర్జి ఫోక్నాన్ ఇజి వెహ్తు” ఇహ్. 4-5 వారు సాన్ని ఇల్లుముజాల్ వీదిదు తొహ్తి మని ఉండ్డి గాడఁదె పిల్లదిజ్ సుడ్తారె. వారు దనిజ్కుత్తి మహిజ్, అబ్బె మనికార్, “ఎందానిజ్ మీరు యా గాడఁదె పిల్లదిజ్ కుత్తినదెర్”, ఇజి వెన్బాతార్. 6 యేసు వరిజ్ వెహ్తి వజనె సిసూర్ వెహ్తార్. అబ్బె మహికార్ వరిజ్ సరిసెత్తార్. 7 వారు గాడఁదె పిల్లదిజ్ యేసుబాన్ తత్తార్. దన్నిముస్కు బన్జిజ్ వరి పాతెజ్ వహ్తిజ్ యేసు దన్నిముస్కు ఎక్కి యెరూసలేమ్దు సాండ్రెజ్ సాతాన్. 8 సాహిజ్ సిన లోకు వరి నీరి సాక్యెజ్ సర్దు వహ్తార్. మరి సెగొండార్గుడ్డెదు మని మరెకాణి కొమ్మెజ్ తతారె సర్దు వహ్తార్. ఆహె కిజి వారు యేసుజ్ మర్యాద కిత్తార్. 9-10 ముజాల్ సాన్ని మహికార్, వెనుక వాజి మహికార్, “ఓసన్న! ప్రబు సీత్తి అతికారమ్దాన్ వాజినికాన్ ఫాగ్డఁడె ఆనికాన్ †. మా అని గొగొఆతి దావీదు రాజువజ ఎలుబడిఁ కిదెజ్ వాని ప్రబు గొప్ప వాండ్లు వరలోకమ్దు మన్ని దేవుణుదిజ్ ఓసన్న!”, ఇజి డేల్స్తార్. 11 యేసు యెరూసలేమ్దు వాజి దేవుణు గుడిఁదు సాహ్. అబ్బె మహి విజాదనిజ్ యేసు సుడ్తాన్. గాని పాద్దు ఆతిజ్ వన్నెండు మణిసిరి సిసూర్వెలు బేతానియ నాటో సాహ్.

పట్టు సిల్లి బొడెమరాన్

12 మర్చ నాండ్డిజ్ యేసు, వన్ని సిసూరు బేతానియదాన్ సాన్నిమహిజ్ యేసుజ్ బజ కట్టాద్. 13 యేసు దూరమ్దాన్ ఉండ్డి బొడెమరాన్ సుడ్ఁతాన్. పట్టు కాలం ఆఇజ్బా మరాతు ఆకుజ్ మహె. మరాత్పట్టు మంజినె ఇజి డగ్రు సాహండ్రె సుడ్ఁతాన్. గాని ఆకు తప పట్టు సిల్లి. 14 యేసు ఆ మరాతిజ్” నీ పట్టు మరి ఎసెజ్బా లోకురెత్తిన్వండ ఆపిర్” ఇజి వెహ్లాన్. వాండ్లు వెహ్తిక సిసూర్ విహర్.

యేసు యెరూసలేమ్దు మన్ని పెరిదేవుణుగుడిఁదు సాహ్

15 యేసుని వన్ని సిసూర్ యెరూసలేమ్దు వాతిజ్, యేసు అబ్బెమహి యూదురి దేవుణు గుడిఁదు సాహ్. అబ్బెగుడిఁ అర్బుదు మహి కొణి వరిజ్ ఫోర్నివరిజ్ విజెరిజ్ వెల్లి ఫోక్నాన్. డబ్బు మారిన్నీ వరి బల్లెజ్ని పాపురఫాటిజ ఫోర్నిని వరి పిటెజ్ మహ్తా విసీర్తాన్. 16 ఇని సామానమ్బా ఎయెర్బా దేవుణు గుడిఁ బాడిఁదాన్ బరు మోస్తజ్ యేసు సరి సీవితాన్. 17 యేసు వరిజ్ నెన్పిసినివెలె ఈహు వెహ్లాన్, “నా గుడిఁ విజెరి లోకాజ్ పార్దనం కిని గుడిఁ ఇజి కూకె ఆనాద్లె ††, ఇజి దేవుణు మాటదు రాస్త మనాద్. గాని మీరు దన్నిజ్ డొజారిజ సాలం ‡ లెకెండ్ కిత్తి మన్నిదెర్”.

18 యేసు వెహ్తిక లోకుర్ విజెర్ వెంజి బమ్మ ఆతార్. అబ్బె మహి పెరిపుజెరిబు, యూదురి రూలుజ్ నెన్పిసినికార్ అక్క సుడ్ఁజి తియెలాతార్. యేసుజ్ ఎలాగ నస్తజ్ ఇజి ఆలోసనం కిత్తార్. 19 పాద్దు ఆతివలె యేసుని, వన్ని సిసూర్ ఆ పట్టుమ్దాన్ సాహ్.

పట్టు సిల్లి బొడెమరాన్ వందిజ్ యేసు వెహ్తినాన్

20 పెందాల్తె వారు సాన్నిమహిజ్ యేసు పట్టు రెబాతి బొడెమరాన్ వెలెజాణిజ్ మరాన్ విజా సాతిక వారు సుడుఁతారె. 21 పేతురు యేసు వెహ్తిక గుర్తు కిత్తాన్. “ప్రబు నీను సయన్ సీత్తి బొడెమరాన్ సాత మనాద్”, ఇజి వెహ్లాన్.

22-23 యేసు వరివెలు ఈహు వెహ్లాన్, “మీరు దేవుణు ముస్కు నమకం ఇడుఁదు. నాను నిజం వెహ్తిన. ఎయెర్బా యా గొరొణ్దిజ్” పెర ఆజి సమ్దరమ్దు అర్అ’ ఇజి వన్ని మన్నుదు అనుమానం సిల్లెండ్ నమిజి వెహ్తిజ ఆ వజనె జగ్గినాద్”. 24 అందెజె నాను వెహ్తిన, మీరు పార్దనం కినివెలె మీరు ఇనికెజ్ లొసినదెర్ అక్కెజ్ దోహ్కెండ్ ముజాలె అక్కెజ్ దోహ్కెన్ ఇజి నమ్మిదు. నస్తీవలె అక్కెజ్ విజా మిజి కల్లినె. 25 మీరు ఎసెజ్బా పార్దనం కినివెలె ఎయెర్బా మీ ముస్కు తప్పకిత్త మనాన్ ఇహిజ వన్నిజ్ సెమిస్తజ్. 26 నస్తీవలె వరలోకమ్దు మన్ని నీ బుబ్బాతి దేవుణు మీ తప్పజ్బా సెమిస్తాన్.

యేసుజ్ ఎయెన్ అతికారం సితాన్ఇజి వెన్బాజినార్

27 యేసుని, వన్నిసిసూర్, మరి యెరూసలేమ్దు వాతార్. యేసు అబ్బె దేవుణుగుడిఁ నడిఁజి మహిజ్ పెరిపుజెరిబు యూదురి రూలుజ్ నెన్పిసినికార్ యూదపెద్దెల్లజ్ వన్నిబాన్ వాతార్. 28 వారు యేసుజ్ వెన్బాతార్, “నీను ఇని అతికారమ్దాన్ యా పణిజ్ కిజిని? యాపణిజ్ విజాకిదెజ్ ఎయెన్ నిజి అతికారం సితాన్?”. 29 యేసు వెహ్లాన్, “నాను మిజి ఉండ్డిమాట వెన్బాన. నజి జబాబ్ వెహ్తు. అయవలె యా పణిజ్ ఎమేణి అతికారమ్దాన్ కిజిన ఇజి నాను మిజి వెహ్తు. 30 యోహానుజ్ బాప్తీసం సీదెజ్ అతికారం ఎంబెణిజ్ వాతాద్? దేవుణు బాణిజ్నా, లోకుర్బాణిజ్నా? నజి వెహ్తు.

31-32 యేసు వెహ్తిపూట వెంజి వరిలోఇ వారి ఒడిఁబితార్. దేవుణుబాణిజ్ వాతాద్ ఇజి వెహ్తిజ అయవలె ఎందనిజ్ మీరు వన్నిజ్ నమ్మిఇతిదెర్ ఇజి వెన్బానాన్. లోకుర్ బాణిజ్ వాతాద్ ఇజి వెహ్తిజ వారు లోకాజ్ తియెల్ ఆతార్. ఎందానిజ్ ఇహిజ యోహాను దేవుణు మాట వెహ్తి ప్రవక్త ఇజి లోకుర్ నమ్మితార్. 33 అందెజె వారు, “మజి తెలిపెద్”, ఇజి మర్జి వెహ్తార్. అయవలె యేసు, “అహిజ, యా ఎంమేణి అతికారమ్దాన్ యా పణిజ్ కిజిన ఇజి మిజి నానుబా వెహ్”, ఇజి వెహ్లాన్.

† కీర్తన 118:26. †† యెసయ 56:7. ‡ యిర్మీయ 7:11

పాలిసిత్తి టోటకత

12 యేసు వరిజ్ కతవజ ఈహు వెహ్లాన్. "ఒరెన్వన్నిజ్ కండెక్ బూమి మహాద్. వాండ్లు ఆ బూమిదు ద్రాసమొకెజ్ ఉణుస్తాన్. దన్ని సురుల కోటి తొహిస్తాన్. దన్నిలో ఇ ద్రాక్పబుల్లరసం ప్రిజ్ పణుకుదు ఉండ్రి గసుగు తయార్ కిబిస్తాన్. టోట కాప్కిదెజ్ ఉండ్రి ఎత్తుమన్ని ఇల్లుబా తయార్ కిత్తాన్. వెనుక ద్రాసటోట సెగొండార్ రెయ్యుతురిజ్ పాలిదిజ్ సిత్తాండ్రె పయనం కిజి మరి ఉండ్రి దేసం సాహాన్. 2 పబ్బు వంట్ని కాలమ్దు ఆ టోట ఎజమాని వన్నిజ్ వానివంతు లోసీ తగ్ల ఇజి ఒరెన్ పణిమన్నిజ్ పాలి అస్తిమన్నివరిడగు ఫాక్తాన్. 3 గాని పాలి అస్తిమన్నికార్ వన్నిజ్ డెయ్యారె వహి కీదాన్ మర్రి ఫాక్తార్. 4 అయవలె ఆ టోట ఎజమాని మరి ఒరెన్ పణిమణిసిజ్ వరిడగు ఫాక్తాన్. వారు వన్నిజ్బురాదు గాయం ఆనివజ డెయ్జి సిగు కిజి ఫాక్తార్. 5 యజమాని, వెనుక, మరి ఒరెన్వన్నిజ్ వరిబాన్ ఫాక్తాన్. వన్నిజ్ వారు డెయ్య సప్తార్. అయవజనె ఎజమాని వన్ని పణిమణిసిర్ సేన లోకురిజ్ ఫాక్తాన్. సెగొండారిజ్ వారు డెయ్తార్. మహివరిజ్ సప్తార్. 6 ఆక్కర్దిజ్ అయ ఎజమానిజ్ వాండ్లు ప్రేమ కిత్తి ఒరెండ్రెమహి మరిసి మిగిలిత్తాన్. అందెజె వన్నిజ్ ఫాక్తాన్. ఆ పాలి అస్తిమన్నికార్ నా మరిసిజ్ గవరం సీనారెలె ఇజి వరిబాన్ ఫాక్తాన్.

7 ఆ పాలి అస్తిమన్నికార్ ఎజమాని మరిసిజ్ సుడెతారె వీండ్లు యా టోటదిజ్ అక్కుమన్నకాన్ రద్దు మాటు విన్నిజ్ సప్తి యా టోట మాది కినాట్", ఇజి వారు కూడిజి వర్గితార్. 8 అందెజె వారు ముస్సు అర్తాండ్రె వన్నిజ్ సప్తార్. సప్తారె టోట వెల్లి విసీర్తార్. 9 ఆ టోట ఎజమాని వరిజ్ ఇనిక కినాన్? వాండ్లు వాజి ఆ అస్తిమహివరిజ్ సప్తాండ్రె ఆ టోట ఆ ఇ రెయ్యురిజ్ పాలిదిజ్ సీనాన్.

10-11 యేసు మరి వెహ్లాన్. "ఇల్లు తొహికార్ నెక్కిపాక్తి పణుకునె మూలదిజ్ ములపణుకు ఆతాద్. యాక దేవుణు కియుదాన్ జర్గితిక. యక మా కణుకెజ బమ్మాతిక † ఇజి దేవుణు మాట రాస్తి మన్నిక మీరు సద్విఇదెరా?

12 యేసు యా కతవజ నెన్పిస్తిక వెహారె 'మా వందిజ్ వెహ్లాన్' ఇజి పెద్దెలుబు నెస్తారె యేసుజ్ అస్తెజ్ ఇజి సుడెతారె. గాని మందలోకురిజ్ తియెలాతారె వన్నిజ్ డిస్తారె సాహాన్.

పన్ను సీదెజా ఫానినా ఇజి వెన్బాజినార్

13 వెనుక వారు పరిసయరుజ్ని హెరోదురాజు పార్టిలో ఇ సెగొండారిజ్ యేసుమాటదు తవు అస్తెజ్ వన్నిబాన్ ఫాక్తార్. 14 వారు వన్ని డగు వాజి, ఓ బోదకినికి, సీను నిజం వెహ్లాకి ఇజి మావెస్సామ్. సీను ఇజిరికార్ ఇజి పెరికార్ ఇజి తేడ తొఇకి వరిజ్ ఇస్టమాతిలెకెండ్ వర్గినికి ఆ ఇ దేవుణు సరి వందిజ్ నిజమ్దాన్ నెన్పిసినికి. కయసరుజ్ పన్ను సీనిక నాయమ్నా ఆవిదా? 15 యూదురు ఆతి మాపు అక్కుసీదెజా ఫానినా? ఇజి యేసుజ్ వెన్బాతారె. వారు వేసం కినికార్ ఇజి నెసి "వీరు నా మాటదు ఎందానిజ్ తవు అస్తెజ్ సుడెజినిదెర్? ఇజి యేసు వెన్బాతాన్. యేసు మరి వెహ్లాన్, ఉండ్రి దినారి కాసు తసి నజి తోరిస్త". 16 వారు తసి వన్నిజ్ తోరిస్తారె. నస్తవలె వాండ్లు, దిన్నిముస్సు మన్ని బొమ్మ ఎయెది, దని ముస్సు రాస్తి రాంత ఎయెది? ఇజి వెన్బాతాన్. "కయసరుది", ఇజి వారు వెహ్లాన్. 17 అయవలె యేసు కయసరుజ్ సెందితికెజ్ కయసరుజ్ సీదు. దేవుణుదిజ్ సెందితికెజ్ దేవుణుదిజ్ సీదు ఇజి వెహ్లాన్. యేసు వెహ్లాక వారు వెంజి బమ్మ ఆతారె.

సాతి వెనుక బత్రిపర్ ఇజి సెగొండార్ వెహ్లానినార్

18 నస్తవలె సాతివెనుక మర్జి నిజినిక సిల్లెద్ ఇజి నెన్పిసిని సదుకయరు ఇనివరి లో ఇ సెగొండార్ యేసుడగు వాతారె. వారు యేసుజ్ ఉండ్రి ప్రస్త వెన్బాతారె. 19 "ఓ బోదకినికి, ఒరెన్ పెండ్లి ఆతి వెనుక కొడోర్ సిల్లెండ సాతిజ వన్ని తంబెరెసి ఒన్నిసిజ్ ఇడె ఆజి కొడోర్ ఇడిదెజ్. అహె సాతివరి వందిజ్ కొడోర్ పుటిస్తెజ్వలె ఇజి మోసె సిత్తి రూలుదు మనాద్. 20 ఏలు సుడెజి ఉండ్రి కాలమ్దు ఏడుగురు తంబెరిబు మహారె. తోల్సర్దికాన్ ఉండ్రి బోదెలిదిజ్ పెండ్లి ఆతాన్. కొడోర్ సిల్లెండ సాతాన్. 21 సాతిజ్ నడిసి వాండ్లు ఒనిసిజ్ పెండ్లి ఆతాన్. వాండ్లుబా కొడోర్ సిల్లెండ సాతాన్. వెనుక కొగ్రి నడిసి దన్నిజ్ ఇడె ఆతాన్. 22 అహె ఏడుగురుబా దన్నిజ్ పెండ్లి ఆజి కొడోర్ సిల్లెండ సాత సాహారె. కడవెరిదు అయ బోదెలిబా సాతాద్. 23 అహిజ సాతివరిబాణిజ్ మర్జి నిజివెలె అ బోదెలి అయా ఏడు గురు లో ఇ ఎయెజ్ ఆల్పి ఆనాద్? ఏడుగురుదిజ్బా ఆది ఆల్పి ఆత మహాద్గదె? 24 యేసు వరిజ్ ఈహు వెహ్లాన్. "దేవుణు మాటెజ్ మీరు నెన్ఇదెర్. దేవుణుసత్తు ఎస్సా ఇజి మిజి నెన్ఇదెర్. అందెజె మీరు తవు వెహ్లానిదెర్. 25 సాతి వరిబాణిజ్ మర్జి నిజివలె ఎయెర్బా పెండ్లి ఆవర్. పెండ్లిదిజ్ సివర్ వారు పరలోకమ్దు మన్ని దేవుణు దూతెబలెకెండ్ మంజినార్. 26 సతి వరిజ్ దేవుణు మర్జి నిజివందిజ్ మోసె రాస్తి పుస్తకమ్దు, వెయ్జి మహి తుపెజా డగుహాన్ దేవుణు మోసెజ్ వర్గితి మాట మీరు సద్విఇదెరా? నాను, అబ్రాహం దేవుణు, ఇస్సాకు దేవుణు, యాకోబురిదేవుణు, ఇజి దేవుణు అయవలె వెహ్లాన్ 27 అందెజె వాండ్లు సాతిసాహికార్ మాడిసిని దేవుణు ఆవన్ బత్రిపర్ మన్నికార్ మాడిసిని దేవుణునె ఇజిమాటు సుడిజినాట్. సాతికార్బత్రిపర్ ఇజి మీరు వెహ్లాక గొప్ప తవు ††.

విజా రూలుదు లో ఇ ముకెలమాతి రూలు ఎమేణిక?

28 యూదురిజ్ రూలు నెన్పిస్తివరి లో ఇ ఒరెన్బానె వాజి యేసు సదుకయరుజవెట వాదిసినిక వెహాన్. వారు మర్జి వెహ్లాజ్ అల్ఇవజ యేసువరిజ్ జబాబ్ సిత్తాన్ ఇజి సుడెజి వాండ్లు వెన్బాతాన్ దేవుణు సిత్తి విజా రూలుజలో ఇ ముకెలమాతిక ఎమేణిక?" 29 దన్నిజ్ యేసు వెహ్లాన్, "విజా వన్నాజ్ లో ఇ ముకెలమాతిక యాకదె, "ఓ ఇస్రాయేలుదికిదెరా, మీరు వెండ్లు. ప్రబువాతి మా దేవుణు ఒరెండ్రె. 30 సీను సీ పూర్తి మన్నుదాన్, పూర్తి పాణుమ్దాన్, పూర్తి

† కీర్తన 118:22,23. †† అబ్రాహం, ఇస్సాకు, యాకోబు ఇనికార్ యూదురు పెరి అనిగొగెరు వారు నండొ వంటిజ ముందాల సాతసాహారె. గాని వారు ఏలు దేవుణుబాణిజ్ బత్రిపర్ వన్నిజ్ మాడిసి మంజినార్.

బుద్ధిదాన్, పూర్తి సత్తుదాన్ ప్రబువాతి దేవుణుడిజ్ ప్రేమిస్తాడే".^{†1} దిన్నీ వెనుక ముకెలమాతి రూలు ఇనిక ఇహిజ, "నీను నిజేనే ప్రేమిస్సీలెకెండ్ మహిపరిజ్ విజేరిజ్ ప్రేమిస్ల",^{††} యా రుండి రూలుజ మిస్తిక రూలుజ్ మరి ఎవేణికబా సిల్లెద్. ³² నస్తీవలె అయ మణిసి వెహ్సాన్. ఓ బోదకినికి నీను బాగ వెహ్సా. "దేవుణు ఒరెండ్. వాండ్రు తప్ప మరి ఎయెన్ దేవుణు సిలెన్", ఇజి నీను వెహ్సాక నిజమె. ³³ నీ పూర్తి పాణుమ్దాన్, పూర్తి బుద్ధదాన్ పూర్తి సత్తుదాన్ నీ దేవుణుఆతి ప్రబుజ్ ప్రేమిస్తాడే, నిజి నీనే ప్రేమిస్సీవజ మహిపరిజ్ ప్రేమిస్తిక, దేవుణుడిజ్ సీజిని విజా పూజెజ ముస్సు, దేవుణుడిజ్ కిజిని దూపమ్కాజ్ ముస్సు నండొ ముకెలమాతిక". ³⁴ యేసు వెహ్సాక వాండ్రు నెగ్రెండ్ అర్దం కిజి జబాబ్ వెహ్సాన్ ఇజి సుడేజి యేసు ఈహు వెహ్సాన్. "నీను దేవుణుడిజ్ ఏలుబడిః అడిగి మండ్రెజ్ డగ్గు ఆతి. అబ్బెణాన్ ఎయెన్బా యేసుజ్ ఇనికబా వెన్బాదెజ్ దయరం సిల్లెద్.

³⁵ ఒర్పు యేసు దేవుణుగుడిఃదు నెన్పిసి మహిజ్ ఈహు వెన్బాతాన్. రాజువజ వాని క్రీస్తు పూర్వమ్దు మహి దావీదురాజు కుటుమ్దు పుట్టాన్ ఇజి యూదురిజ్ రూలుజ్ నెన్పిసికార్ ఎండనిజ్ వెహ్సాన్? ³⁶ దావీదురాజు దేవుణుఆత్తుదాన్ ఈహు వెహ్సాన్: "నాను నీ పగ వరిజ్ నీ పాదం అడ్డి ఇడ్డిదాక నీను నా ఉణెర్ వడక బసి మన్ల ఇజి ప్రబు నా ప్రబువెల వెహ్సాన్ †. ³⁷ దావీదురాజు క్రీస్తుజ్ ప్రబుఇజి కూక్కినాన్. అహిజ ఎలాగ క్రీస్తు వన్ని మరిసి ఆనాన్?". యేసు వెహ్సాక వెంజి లోకుర్విజేరె నండొ సర్ద అతార్.

³⁸ యేసు లోకాజ్ నెన్పిసినివెల ఈహు వెహ్సాన్. "యూదురి రూలుజ్ నెన్పిసినివరి వందిజ్ జాగర్త మండ్రు. వారు నండొ దరది నీరి సాక్క †† తొడగిజి బూలాదెజ్ కొరిజినార్. సత్తెజ నడిఃమి పెరికార్ ఇజి మాడిఃమి ఆదెజ్ కొరిజినార్. ³⁹ యూదురి మీటిజ్ ఇండ్రొ సాహిజ ముకెలమాతి బాడ్డిదు బస్తెజ్, విందుదు సాహిజ బస్తెజ్ ముకెలమాతి బాడ్డిదు వారు కోర్జినార్. ⁴⁰ ఇనిక సిల్లి ముండమణిసిజ్ మొసిం కిజి వన్కాజ్ కల్లితిక వారు ఒనార్. లోకుర్ విజేరె విరిజ్ సుడేజి గొప్ప నెగ్గెకార్ ఇజి వెహ్సావజ వారు నండొ పార్దనం కిజినార్. నిని లోకాజ్ గొప్ప సిక్కు వానాద్".

ముండ మన్ని ఆర్పె నంద

⁴¹ యేసు దేవుణుగుడిఃదు సంత సీనిపెటె ఎర్దుబస్తాన్. దేవుణుగుడిఃదు వాతికార్ సంత పెటెదు డబ్బు అర్పెమహిక వాండ్రు సుడేజి మహాన్. ఆస్తిమన్నకార్ నండొండార్ నండొ డబ్బుజ్ ఆ పెటెదు అర్పెత్తార్. ⁴² నస్తీవలె ఉండ్రె బీద ముండ మన్ని వాజి రుండి కాణిజ్ అర్పెత్తార్. ⁴³ యేసు సిసూరిజ్ వన్నెడగ్గు కూక్కి, "నాను నిజం వెహ్సాన్, దేవుణు సుడేతిజ్ యా ఇనిక సిల్లి రాండి బోదెలి మహివిజేరిజ్ ముస్సు లావు అర్పెత్తార్. ⁴⁴ ఆస్తిమన్నికార్ వరిజ్ కల్లితి ఆస్తిబాణిజ్ అర్పెత్తార్. గాని అది దన్నుజ్ సిల్లిబాణిజ్ దన్నుజ్ బత్తిదెజ్ మన్నికెజ్ విజా సంత పెట్టెదు అర్పెత్తార్", ఇజి వెహ్సాన్.

యేసు గుడిఃవందిజ్ వెహ్సాన్

13 యేసు దేవుణుగుడిఃదాన్ సాన్ని మహిజ్ వన్ని సిసూర్ లోఇ ఒరెన్, "ప్రబు యా పణుకుజ్ ఎస్సా గొప్పవి యా మేడెజ్ ఎస్సా గొప్పవి", ఇజి వెహ్సాన్. ² వన్నుజ్ యేసు వెహ్సాన్, "మీరు ఏలు సుడేజిని యా గొప్ప నెగెండ్ తొర్జిని మేడెజ్ ఉండ్రె వణుకు ముస్సు మరి ఉండ్రె వణుకు నిల్పిమన్ ఏండ లోకుర్ వనకాజ్ లాగ్గు అర్పెత్తార్ పూర్తి నాసనం కినార్లె". ³ యేసు దేవుణుగుడిః ఎర్దు ఒలివ గొర్తోత్, బస్తి మహిజ్ పేతురు, యాకోబు, యోహాను, అంద్రెయ ఇనికార్ మరి ఎయెర్బా వెన్ఎండ యేసుజ్ వెన్బాతార్. ⁴ "యాకెజ్ ఎసిజ్ జగ్గివెలె? ఇక్కెజ్ విజా జగ్గిదెజ్ డగ్గు ఆతాద్. ఇజి తొరిసిని గుర్తు ఇనిక? మజి వెహ్లె. ⁵ యేసు వరిజ్ వెహ్సాన్, "ఎయెర్బా మిజి మొసిం కిండ్ జాగర్త సుడేఃదు మండ్రు. ⁶ నండొ లోకుర్ నా పేరు ఇడెఃజి వానారెలె. "దేవుణు ఏర్పాటు కిత్తి పాక్తి క్రీస్తు నానె", ఇజి వెహ్సా నండొండారిజ్ మొసిం కినార్లె. ⁷ మీరు విద్దెమ్కు వందిజ్ వినిదెర్లె. మరి విద్దెమ్కు వానెలె ఇజి సాటిసినిక వెనిదెర్లె. అయవలె తియెలామి. అక్కెజ్ విజా జగ్గిదెజ్ వెలె. గాని యాక ఆక్కర్ అపద్. ⁸ లోకుర్ముస్సు లోకుర్ని దేసమ్కాజ్ ముస్సు దేసమ్కు విద్దెం ఆనాలె. అబ్బె ఇబ్బె నండొబాన్ బూమి కద్దినాద్లె. కరు వానాద్లె. యాక్కెజ్ విజా ఉండ్రె బోదెలి కియుదు అస్తెజ్ ముజల వానినాపిజ్ మొదొల్స్తీలెకెమడ్ ఇక్కెజ్ విజా జగ్గిజి మహిజ ఆక్కర్ దినమ్కు వాజినాద్ ఇజి నెస్సెజానాద్. ⁹ మీరు జాగర్త మండ్రెజ్. లోకుర్ మిజి కొర్టుదు ఒవజెప్పార్లె. యూదురి మీటిజ్ ఇల్కాజ్ మిజి కొరెడెఃజాణిజ్ డెయ్నార్లె. రాజువజ ముందాల అదికారిజ ముందాల, నా ముస్సు నమకం ఇట్టివందిజ్ మిజి నిల్పార్లె. అయావెలె నా వందిజ్ సువార్త వెహ్సాదెర్లె. ¹⁰ దేవుణు సువార్త బూమిముస్సు మరి విజేరిజ్ ఆక్కర్ దినమ్కాజ్ ముజల వెహ్సాజ్ వలె. ¹¹ వారు మిజి తొహ్సి ఒసి కోర్టుదు ఒప్పజెప్పివెలె మీరు అబ్బె ఇనిక వెహ్సాజ్ ఇజి బెజ ఆమాట్. అయవలె దొహ్సెల్లె. వెహ్సాకిదెర్ మీరు ఆఇదెర్ దేవుణు ఆత్తు మిజి వెహ్సాకాదె మీరు వెహ్సాదెర్". ¹² యేసు మరి వెహ్సాన్. "దాద్ది తంబేర్సిజ్ తంబెర్సి దాద్దిజ్ అప్పాని మరిసిజ్ సప్తెజ్ ఒవజెప్పార్లె. కొడార్ అయ్సి అపాసిర్ ముస్సు గొడఃబలజి వరిజ్ నప్పార్లె. ¹³ మీరు నా ముస్సు నమకం ఇడ్డివందిజ్ విజేరె మీ ముస్సు పగదాన్ మంజినార్లె. ఆక్కర్దాక ఓరిస్సి వన్నిజ్ దేవుణు రక్కినార్లె.

దేవుణుగుడిః లోఇ నండొతియెల్ అనిక ఉండ్రె వానాద్లె

¹⁴ దేవుణుగుడిః లోఇ మండ్రెజ్ ఆఇ నాసనం కిని సెఇక ఆతిక ఉండ్రె † దేవుణు గుడిఃదు నెగ్గి బాడ్డిదు నిల్పి మంజినిక సూణివలె (యాక సద్వినికాన్ అర్దం కిదెజ్ వలె) యూదయ దేసమ్దు మంజినికార్ గొర్కాజ్ ఉహ్సాజ్ వెలె. ¹⁵ ఇల్లు ముస్సు మన్నికార్ ఇనికబా సామానం తత్తెజ్ ఇజి మర్జి ఇండ్రొ సాన్కాట్. ¹⁶ గుడెదు వణి కిజి మహికార్ వరి పాత తత్తెజ్ ఇజి మర్జి ఇండ్రొ సానిక అపద్. ¹⁷ ఆ దినమ్కాజ్ పాటద్ మన్ని వన్కాజ్ పాలు ఊటేపిసిని వనకాజ్ గొప్ప కష్టం. ¹⁸ ఇక పినికాలమ్దు రెంండ పార్దనం కిదు. ¹⁹ ఎందానిజ్ ఇహిజ దేవుణు యా లోకం పుటిస్సిబాణిజ్ అసి ఏలుదాక రెఇనిన్ని గొప్ప కష్టమ్కు వానె. నిన్నికెజ్ మరి ఎసిజ్ బా రెకె. ²⁰ దేవుణు ఆ కష్టం ఆతి రోస్సుతకు కిపిండ మహిజ ఎయెన్బా తప్ప ఆదెజ్ అలట్ వన్. గాని దేవుణు ఎర్లెస్తివరి వందిజ్ ఆ రోస్సుకు దేవుణు తక్కు, కిత్తాన్. ²¹ ఆ రోస్సుజ్ ఎయెర్బా ఇదిలో క్రీస్తు అబ్బె మనాన్, సిల్లిజ్ క్రీస్తు ఇబ్బె మనాన్, ఇజి వెహ్సాజ్ వరి మాట నమ్మిమాట్. ²² ఆ కాలమ్దు నానె క్రీస్తు ఇజి

† ద్వితీ 6:4,5. †† లేవి 19:18. ‡ క్రీస్తు 110:1. †† యా నండొ దరది నీరి సిక్కు వెరి లోకు తొడిగిజి మహాన్. †† యా సెఇక ఇనికెజి వెహ్సాజ్ సిల్లెద్ ఆఇ దేయమ్క మాటిపిల వందిజ్ నా క్రీస్తుజ్ ఎర్లెసిని వన్ని వందిసా వెహ్సానాన్. దిన్ని వందిజ్ దానియెల్ ప్రవక్త రాప్త మహాన్ 9:27; 11:31; 12:11.

అబద్ధం వెహ్నికార్, నానె దేవుణు పోక్తి ప్రవక్త ఇజి అబద్ధం వెహ్నికార్ వానార్. వారు నండో బమ్మాతి పణిజ్ ముజాల ఎసెజ్బా తోఇ నన్ని బమ్మాతి పణిజ్కెజి మోసం కిదెజ్ సూణార్. అట్టిజ దేవుణు ఎర్లిస్తీ మన్ని పరిజ్బా మొసం కిదెజ్ సూణార్. 23 అందెజి మీరు జాగర్త మండ్రెజ్. నాను ముజాలె విజా మిజీ వెహ్తా మన్న.

లోకుమరిసి దేవుణుజాయ్దాన్ వారిరోజా

24²⁵ ఆ కష్టమాతి రోస్కుసాహి వెనుక పాదు సీకటి ఆనాద్. నెల జాయ్ సివిద్. సుక్రెజ్ ఆగసమ్దాన్ రాల్నె. ఆగాసమ్దు మన్నికెజ్ కద్దినె. 26 నస్తవలె లోకు మరిసియాతి నండో సత్తుదాన్ గొప్ప జాయ్దాన్ కూడిఃతి సాకుదాన్ మొసాహి ముస్సువానిక లోకుర్ సూణార్లె. 27 నాను నా దూతరిజ్ పోక్నానె యా లోకమ్ది కొసెజదాన్ ఆగసమ్ది కొసెజదాక నాల్లి మూలెజాణిజ్ దేవుణు ఎర్లిస్తీ పరిజ్ ఉండ్రెబాన్ తపిన్న.

బొడెమరాన్ది సజతి

28 బొడెమరాన్దిజ్ సుడెఃజి యాక మీరు నెస్సు. దన్ని ఆక్కుజ్ రాల్జి సిగ్గిసివలె ఎండకాలం డగ్రు ఆతాద్ ఇజి మీరు నెస్సిదెర్. 29 ఆయలెకండ్నె మీరు యాక్సెజ్ విజా జగ్గిజినిక సుణివలె నాను మర్జి వాదెజ్ డగ్రు ఆతాద్ ఇజి నెస్సినిదెర్లె. 30 యా సజతిజ్ విజా జాగ్గిని ముందాల య తరమ్దికార్ సావర్ ఇజి నాను మిజీ నిజం వెహ్నిన. 31 ఆగసం బూమి సిల్లెండ ఆనె. గాని నా మాటెజ్ ఎలాకాలం మంజినె.

ఎయెన్ నెస్ఇ రోజా, ఎయెన్ నెస్ఇ గడిఃయ

32 నాను మర్జి వాని రోజావమదిజ్, గడిఃయవందిజ్ ఎయెజ్ నెస్వెర్. బుబ్బనె ఆవండ్ పరలోకమ్దు మన్ని దూతారబా మరిసిబా నెస్వెర్. 33 యేసు మరి వెహ్తాన్, "మీరు పార్తనం కిజి జాగర్త మండ్రు. ఆ రోజా ఎసెజ్వానాద్ మిజీ తెలివెద్. 34 ఎలాగ ఇహిజ ఒరెన్, ఎజామాని వన్ని ఇల్లు వన్ని పణిమన్నిరిజ్ ఒపజెప్పి, పరిపరిపణిజ్ పరి పరిజ్ తోరిసి, ఇల్లు కాపుదిజ్ ఒరెన్ వన్నిజ్ ఇడ్డి దేసం సాండ్రెజ్ సాహి వజనె.

35 అందెజి మీరు జాగర్త ఎద్దుసుడిఃజి మండ్రు. ఎందనిజ్ ఇహిజ ఇల్లు ఎజామాని పార్దు ఆతివెలె వానానో, మదరెయ్యు వానానో, కొరు కెరినె వెలె వానానో, సిల్లిజి జాయ్ఆతిజి వానానో మిజీ తెలివెద్. 36 ఎజామాని వందిజ్ ఎద్దు సుడిఃఇ గడిఃయదు వెటనె వాతిజి మీరు నిద్ర కిజి మనికవాండ్రు సుడుఃదెజ్ ఆవెద్. 37 నాను మిజీ వెహ్తాకదె విజెరిజ్బా వెహ్నిన. జాగర్త కావ్కిదు".

14

పస్కు వండోయ్ని, పులాజ్ ఆజి రొట్టెజ్ † వండోయ్వాదెజ్ రుండి రోస్కు మనాద్. పెరిపుజెరిజుని, యూదుర్ రూలు నెస్పినిసికార్ యేసుజ్ ఎలాగవా ఉపాయ్కిజి అసి సప్తెజ్ సుడిఃజినార్. 2 "వండోయ్లోఇ వన్నిజ్ తోహ్తాజి లోకు గొడఃబ కినార్ అందెజి వండోయచ లోఇ పోని ఇజి వారు వెహ్తార్.

ఉండ్రీ అయ్లికొడోః యేసు బురాదు వాసనం నూనె వాక్తాద్

3 యేసు బేతనియ ఇనినాటో సీమోసు ఇన్ని వన్ని ఇండ్రో బోజనమ్దిజ్ బస్తాన్. విండ్రు కుష్టురోగం ఆస్తిమహిజ్ యేసు నెగెండ్ కిత్త మహాన్ నస్తవలె ఉండ్రీ బోదెలి నూనజ్ పలుకుదాన్ తయార్ కిత్తి ఉండ్రీ సీసాదు † నండో విలువమన్ని జబమామ్ని ఇని నెగ్గి వాసనం మన్ని నూనె తత్తాదె మూతడగ్రు రెక్కి యేసు బురాదు వాక్తాద్. 4⁵ అబ్బె మహికార్ సెగొండార్ యాక సుడెఃజి కోవమాజి పరిలోఇ వారె వెహ్తార్, "ఎందానిజ్ యా నూనె పాడు కిజినాద్? యా నూనె మూండ్రీ వందెజ్ దినారమ్జ్ ముస్కు డబ్బుదిజ్ పార్పి అయ డబ్బు బీదది పరిజ్ సీదెజ్ ఆనాద్గదె", ఇజి దన్నిజ్ గోల ‡ కిత్తార్. 6 నస్తవలె యేసు, "దన్నిజ్ ఉండ్రీ డిఃస్తు ఎందనిజ్ దన్నిజ్ అర్ల కిబిసినిదెర్? అది నజి నెగ్గి పణి కిత్తాద్. 7 బీదదికార్ ఎస్తివలెబా మీవెట మంజినార్. పరిజ్ ఎసెజ్బా మీరు సాయం కిదెజానాద్. గాని నాను ఎలాకాలం మీవెట మన్. 8 అది కిదెజ్ అట్టిపణి విజా కిత్తాద్. నజి సమాది కిని ముజాల పీనుగు తయార్కిని అలవాటువజి నా ఒడోల్దిజ్ వాసనం నూనె వాక్కి అది నజి తయార్ కిత్తాద్. 9 నాను మీవెట నిజం వెహ్నిన, యా బూమి ముస్కు ఎంబెబా దేవుణు సువార్త అది ఏలుబడిః వందిజ్ సువార్త సాటిసినివలె అది కిత్తి యా నెగ్గిపణి దన్నిజ్ ఎత్తు కినిలెకండ్ సాటిసి మంజినాదెలె".

10 నస్తవలె పన్నెండు మణిసిర్ సిసూర్లోఇ ఒరెన్ ఇస్కరియోతు యూద ఇనికాన్ యూదురి పెరిపుజెరిజునాన్ సాన్ని యేసుజ్ ఒపజెప్పెజ్ తోడుః కిన ఇజి వెహ్తాన్. 11 యూదవెహ్తాక వెంజి పెరిపుజెరిజు సర్ద ఆతార్. వన్నిజ్ డబ్బుజ్ సీనావ్ఇజి వారు ఒట్టు కిత్తార్. అందెజి యేసుజ్ ఒపజెప్పెజ్ యూద ఉండ్రీ అవ్కాసం సుడెఃజి మహాన్.

యేసు సిసూర్వెట పస్కు బోజనం ఉణిజినాన్

12 పులాజ్ సిల్లి రొట్టెజ్ తయార్ కిని పస్కువండోయ్ది మొదోహి దినం వాతాద్. అయ దినం దేవుణుదిజ్ మెండ గొరె పిల్లాదిజ్ పూజా కినిక యూదురి అలవాట్. యేసు సిసూర్ వన్ని డగ్రు వాజి, పస్కు బోజనం ఉండెజ్ నీవందిజ్ మాపుఎంబె సాన్ని తయార్ కిదెజ్ నీను కొరిజిని? ఇజి వెన్బ్తార్. 13 యేసు రివర్ సిసూరిజ్ కూక్కి, "మీరు పట్టుమ్దు సాండ్రు. అబ్బె ఒరెన్, కుండాదు ఏరు పిండెజి మీ ఎద్దు వానాన్. మీరు వన్నివెట సాండ్రు. 14 వాండ్రు సాహి ఇండ్రోణి ఎజామానిజ్, "నా సిసూర్ వెట పస్కు బోజనం కిదెజ్ఎంబె గది మనాద్ ఇజి బోదకినికాన్ నిజి వెన్బాజినాన్, ఇజి వెహ్తు. 15 నస్తవలె ఆ ఇల్లు ఎజామాని విజా తయార్ఆతి మేడముస్కు మని పెరి గది ఉండ్రీ తోరిస్నాన్. అబ్బె మజీ పస్కు బోజనం తయార్కిదు", ఇజి వెహ్తాండ్రె పాక్తాన్. 16 సిసూర్పట్టుమ్దు సాహారె యేసు వెహ్తాలెకండ్నె విజా సుడెఃతార్. వారు పస్కు బోజనం తయార్ కిత్తార్. 17 పార్దు ఆతిజ్యేసు వన్నెండు మంది సిసూర్వెట అబ్బె వాతాన్. 18 వారు బోజనం కినివెలె యేసు వెహ్తాన్, "మీ లోఇ ఒరెన్ నజి పగాతిపరి కియుదు ఒపజెప్పానె ఇజి నాను నిజం వెహ్నిన". 19 అక్క వెంజి వారు నండోదుకం ఆజి ఒరెన్ వెనుక ఒరెన్ "నాను

† వినకవందిజ్ ముకెలమాతి మాటెజి అర్దం వెహ్నిని బుకుదు వండోయ్ మాటె రాస్తిబాన్ సుడుఃదు †† యా నునాజ్ పలుకు పేరు అలబాస్థరు ఇజి యా పణకు నండో కరిదితిక తెల్లాజ్ మంజినాద్. యక గిసి లోకుర్ పునెజ్ తయార్ కిజినార్ ‡ అయకాలమ్దు ఉండ్రీ దినారి ఉండ్రీ రోజాది కూలి

అవుగదా? ఇజి వన్నిజ్ వెన్బాతార్. 20 యేసు వెహ్సాన్, "మీరు వనెండు మనిసిర్లో ఇ ఒరెన్, నావెట గినెదు రొట్టె ముడెక్సికాండ్రె †. 21 లోకుమరిసి నా వందిజ్ దేవుణు మాటదు రాస్తి మహిలెకెండ్ నాను సానానె. గాని లోకు మరిసియాతి నజీ ఒవజెప్పి వన్నిజ్ గొప్పు కట్టం. వాండ్రు ఫుట్విండ్ మంజినక ఇహిజ వన్నిజ్ ఎస్సానో బాగ మహాద్ మరి".

యేసుజ్ గుర్తుకిని బోజనం

22 వారు బోజనం కిజిమహిజ్ యేసు ఉండ్రొట్టె అస్తాండ్రె దేవుణుదిజ్ వందనమ్కు వెహ్సి ముకెజ్ కిజి సిసూరిజ్ సితాన్. "మీరు యక లోసెతిండ్రు, ఇక నా ఒడోలో", ఇజి వరిజ్ వెహ్సాన్. 23 వెనుక యేసు ద్రాక్కు కల్లు మన్న గిన అసి దేవుణుదిజ్ వందనమ్కు కిజి వరిజ్ సితాన్. వారు విజెరె ఆ గినదిక ఉటార్. 24 యేసు మరి వెహ్సాన్. "ఇక్క నా నల, నండొండారిజ్ వరి పావమ్కు సెమిస్సెజ్ ఇజి కారిసిని. నా నల ఇక్కాదె దేవుణు నా నలదాన్ కిజిని ఒవుమానం. 25 నాను నిజం వెహ్సాన్, దేవుణు కినిఎలుబడిడు నాను కొతాజ్ ఉణి దినం దాక మరి ఎనెజ్బా ద్రాక్కు కల్లు ఉణెవ". 26 మరి ఉండ్రె పాట † పార్తార ఒలివ మరెక్ మన్ని గొరొన్ ముస్సు సాతార్.

పేతురు యేసుజ్ నెన్వ ఇజి వెహ్సాన్లె ఇజి ముజాల వెహ్సానాన్

27 వారు సానివెలె యేసు వరిజ్ వెహ్సాన్. మీరు విజెరెరె నజీ డిసి సానిదెరె. ఎందనిజ్ ఇహిజ దేవుణు మాటదు యాలెకెండ్ రాస్త మనాద్. "గొరెజ్ అడినివన్నిజ్ నాను కత్తాలె. గొరెజ్ మంద సెద్రినె సానెలె". †28 గాని దేవుణు నజీ మరెజి బత్తుదు నిక్తివెనుక మిజి ఇంక ముజల గలీలయదు సానాలె. ఇహాన్. 29 నస్తివలె పేతురు, "విజెరె మీ వందిజ్ నిల్లెజ్ అట్విండ్ డిసిని సాహిజ్బా నాను నిజి డిసిన్ సాన్వ". 30 యేసు వెహ్సాన్, "ఓ పేతురు, నాను నిజి నిజం వెహ్సాన్, యా పాదొయ్ కొరు రిజెరెని ముజల నీను నజి నెన్వ ఇజి ముసార్ వెహ్సాన్". 31 గాని పేతురు ఒవుకొడెవిండ్ ఒద్దె డట్టం వెహ్సాన్, "నాను నీ వెట సాతిజ సాన. నాను నిజి నెన్వ ఇజి వెహ్సాన్". అయ వజనె వారు విజెరె వెహ్సాన్.

యేసు గెత్సేమనె టోటదు పార్దనం కిజినాన్

32 నస్తివలె యేసు, వన్నిసిసూర్వెట గెత్సేమనె ఇని టోటదు సాహార్. యేసు సిసూరిజ్, "నాను సాన్ని పార్దనం కిజి మరెజివాని దాక మీరు ఇబ్బె మండ్రు", ఇజి వెహ్సాన్. 33 యేసు పేత్తుజ్, యాకోబుజ్, యాహనుజ్ వన్ని వెట ఒతాన్. వాండ్రు నండొ దుకం ఆజి బాద ఆదెజ్ మొదోల్స్తాన్. 34 వాండ్రు వరిజ్ వెహ్సాన్, "నాదెజ్ డగ్రు ఆతిలెకెండ్ మన్ను బరిస్సెజ్ అట్ఇ నస్సా బాదనజి కల్లిజినాద్. మీరు ఇబ్బెనె బసి నా వెటె తెల్లి మండ్రు.

35 యేసు అబ్బెణిజ్ సెగం దూరం సాహండ్రె పడిగిజి అర్తాండ్రె "ఓబా, నిజి ఇస్టమాతివజ యా కస్టమ్కాన్ నజి తస్సిన్ఆ", ఇజి పార్దనం కితాన్. 36 యేసు దేవుణుదిజ్ ఈహు వెహ్సాన్, "ఓ బా నీను విజా కిదెజ్ అట్టి. యా కస్టమ్కు నా బాణిజ్ లాగ్ల. గాని నా ఇస్టమ్వజ ఆఎద్, నీ ఇస్టంవజనె ఆపిద్". 37 పార్దనం కితివెనుక యేసు సిసూర్డగ్రు సాహిజ్ వారు నిద్ర కిజి మహార్, "ఓ సీమోను, నీను నిద్ర కిజినిదా? ఉండ్రె గంటబా తెలి ఆజి మండ్రెజ్ మీరు అట్ఇదెరా?", ఇజి పేతురుజ్ వెన్బాతాన్. 38 నయ్తును మిజి వరిస కిజి తప్పదు అన్విండ్ ఇహిజ పార్దనం కిజి తెలి ఆజి మండ్రు ఆత్మ తయార్నె, గాని ఒడోల్దిజ్ సత్తు సిల్లెండ్ ఆజినాద్.

39 యేసు మరి ఒర్పు సాన్ని ముజాల్ వెహ్సి మాటెజ్నె వెహ్సి పార్దనం కితాన్. 40 యేసు మరెజివాజి నుడెతిజ్ సిసూర్ మరి నిద్ర కిజి మహార్. ఎందనిజ్ ఇహిజ వరి కణుకు రెప్పెజ్ బరుదాన్ ముగిజె మహా. నస్తివలె వారు యేసుజ్ ఇనిక వెహ్సాజొ తెలివితాద్. 41 యేసు ముసారి వాజి సిసూర్ నిద్ర కిజి మహిక నుడెతిజ్ వరిజ్ వెహ్సాన్, "ఏలుబ మీరు నిద్ర కిజి రోమ్జినిదెరా? ఏలు ఆనాద్. ఇదిలో, లోకుమరిసియాతి నజి సెఇవరికియుదు ఒవజెప్పి గడియె డగ్రు వాతాద్. 42 లెదు, ఏలు మాట్ వరివెట. దనూలాదెజ్ సానాట్ ఇదిలో నజి ఒవజెప్పికాన్ వాజినాన్".

యేసుజ్ అరెస్టి కిజినార్

43 యేసు యా మాటెజ్ వెహ్సిమహిజ్ వన్నెండు మనిసిర్ సిసూర్లో ఇ ఒరెనాతి ఇస్కరి యోతు యూద ఇనికాన్ అబ్బె వాతాన్. పెరిపుజెరిబు లోకురి పెద్దలుబు ఫాక్తిమన్ని మందలోకుర్ కూర్దెజ్, కోణెజ్ అస్తారె వన్నివెట వాతర్. 44 యేసుజ్ ఒవజెప్పికాన్, "నాను ఎయెరిజ్ ముద్దు కినానో వన్నిజ్ మీరు తోహ్సా జాగర్త ఒతు", ఇజి ముజల వరిజ్ ఉండ్రె గుర్తులెకెండ్ వెహ్సా మహాన్. 45 యూద వెటనె యేసుడగ్రు వాతాండ్రె, "ఓ బోదకినికి" ఇజి వెహ్సి వన్నిజ్ పాంబితాండ్రె ముదు కితాన్. 46 నస్తివలె వన్నివెట వతిమహిలోకుర్ యేసుజ్ అస్తారె తోహ్సార్. 47 వెటనె యేసుడగ్రు మహిసిసూర్ లో ఇ ఒరెన్, వన్ని కూర్ద లాగ్లి విజెరి ముస్సు పెరిపుజెరిబు ముస్సు మన్ని చణిమనిసి ఆతి వని గిబ్బె తెవు కత్తాన్. 48 యేసు వెహ్సాన్, "నాను డొబాండ్రునా? నజి అస్సెజ్ కూర్దెజ్ కోణెజ్ అసి ఎందనిజ్ మీరు వాతిదెర్? 49 రోజా నాను మీ వెటనె మంజి దేవుణుగుడిడు నెన్పిస్త గదె. అయవలె మీరు నజి ఎందనిజ్ అన్ఇతిదెర్? గాని దేవుణు మాటదు రాస్తివజ ఇక విజా ఈహు జగ్గిదెజ్ వెలె". 50 నస్తివలె వన్ని సిసూర్ విజెరె వన్నిజ్ డిస్సారె ఉహ్క సాహార్. 51-52 ఒరెన్ దజడాయెన్, యేసు వెనుక, లోకుర్ వెట సాన్ని మహాన్. వాండ్రు సాక్క తొడ్గివిండ్ ఉండ్రె పాతనె పిడ్గిత మహాన్. వారు వన్నిజ్ అస్తిజ్ వాండ్రు పిడిగితిమన్ని పాతడిసి డుమ్డ ఆతాండ్రె ఉహ్కాన్.

† యేసుని వన్ని సిసూర్ బోజనం కితివెలె ఉండ్రె గినాది పట్టురసమ్మ రొట్టె ముడుక్కార్ డగ్రుమన్ని కూలెజ్నె ఈహు గిన్నాదాన్ తినార్ †† కీర్తన 115-118 బోజనం కిత్తి వీజిత్తిజ పార్బెజ మహార్ ‡ జెకరియ 13:7.

యేసుజ్ నన్హాద్రి సజంఇని యూదురి కొర్టునడిఃమి నిల్వార్.

53 యేసుజ్ తొప్పొ ఒతికార్ వన్నిజ్ విజెరిపుజేరిజ ముస్సు పెరిపుజెరిబాన్ తత్తార్. పెరిపుజెరిజ్ విజేరె, పెద్దెల్జు, యూదురి రూలుజ్ నెన్పిసినికార్ అబ్బె కూడ్డి వాత మహార్. 54 యేసుజ్ విజేరి ముస్సు పెరిపుజెరిజ ఇండ్రి ఒసిమహిజ్, పేతురు వెనుక దూరమ్దాన్ సాన్ని డేవ దాక వాతాన్. వాండ్రు అబ్బె కాప్కినివరివెల బస్తాండ్రి సిను కాయ్జి మహాన్. 55 పెరిపుజెరిజు విజేరె, అబ్బె కూడ్డి వాతి నన్హాద్రిం సజం విజా యేసుజ్ సప్తెజ్ తగితి రుజాప్ వందిజ్ వన్ని ఎద్రు అబద్దం వెప్పివరిజ్ రెబాజి మహార్. గాని వన్నిజ్ సప్తెజ్ అగితి రుజాప్ వెప్పి ఎయెర్బా దొహ్కీతార్. 56 నండ్రిండ్రి వన్నిముస్సు అబద్దం సాసెమ్కు వెప్తార్. గాని ఒరెన్ వెప్తాక మరి ఒరెన్ వెప్తా దనిజ్ తేడః మహాన్.

57 నస్తవలె సెగొండ్రి వన్నిముస్సు ఈహు అబద్దం సాసెమ్కు వెప్తార్. 58 "లోకు తొప్పొ యా దేవుణుగుడిఃదిజ్ నాను అన్పి విసీర్జి, మూండ్రి రోస్కాజ్ లోకు కీదు పణి అఎండ మరి ఉండ్రి దేవుణుగుడిః తొప్పొ ఇజి వాండ్రు వెప్తాక మాప్వహాప్", ఇజి వారు వెప్తార్. 59 గాని వారు వెప్తా సాస్యమ్బా ఒరెన్ వెప్తాక మరి ఒరెన్ వెప్తా దనిజ్ తేడః ఆతాన్. 60 నస్తవలె విజెరి ముస్సు పెరిపుజెరి నిజేతాండ్రి యేసుజ్ వెన్బాతాన్, "నీను ఇనికబా మర్జి వెహాఇదా? వీరు నీ ముస్సు వెప్పిని యా మాటెజ్ ఇనికెజ్?". 61 గాని యేసు ఇనికబా మర్జి వెహావండ అలెతాన్. విజేరె పుజెరిజ ముస్సు పెరిపుజేరి యేసుజ్ మరి వెన్బాతాన్, "నీను దేవుణు మరిసిఆతి క్షీస్తునా?".

62 యేసు వెప్తాన్, "నానె, లోకుమరిసియాతి నాను గొప్ప అతికారం మన్ని దేవుణు ఉణెర్ పడఃకాదు బసిమంజినిక, సయణిడెర్ మరి ఆగనమ్దు దాన్ మొసాప్ ముస్సు నాను వానిక మీరు నూణిడెర్". 63-64 విజెరి పెరిపుజెరి ముస్సు పెరి పుజేరి యేసు వెప్తాక వెంజి వన్ని సాక వాండ్రి కిని ఆతాండ్రి †. వెప్తాన్, "మరి ఇంక సాసిరిజ్ అవనరం సిల్దెన్. వాండ్రు వెప్తాక మీరు వెహిడెర్. వాండ్రు దేవుణు దూసిసి వర్గితిక మీరు వెహిడెర్ దన్నివందిజ్ మీరు ఇనిక వెప్పినిడెర్? యేసు దేవుణుదిజ్ దూసిస్తి వందిజ్ సిక్కు కిజి సప్తెజె ఇజి విజేరె ఒప్పుకొటార్. 65 నస్తవలె సెగొండ్రి యేసు ముస్సు పూస్తార్. వారు గరండ్దాన్ వన్ని కణుకేజ తొప్పొ కణుకేజ్ మూక్తారె వన్నిజ్ గుతార్. నిజి ఎయెర్ గుతార్ ఇజి తొవండ వెహాఅ", ఇజి వన్నివెల వెప్తార్. జమానుబుబా యేసుజ్ కికాణిజ్ డెయ్తారె ఒత్తార్.

యేసుజ్ నానునెన్ఎ ఇజి పేతురు వెప్పినాన్

66 పేతురు విజెరి ముస్సు పెరి పుజెరి అర్బుదు మహివలె అయ ఇండ్రిణి పణి మన్ని ఉండ్రి అబ్బె వాతాన్. 67 పేతురు సిను కాయ్జిమహిక సుడఃజి వాండ్రు ఎయెన్ ఇజి నెన్జె అది నెగ్రెండ సుడిఃతాన్. "నీనుబా నజరేతు వాండ్రు ఆతి యేసువెల మహికి", ఇజి అది వెప్తాన్.

68 అందెజె పేతురు, "నీను ఇనిక వర్గిజినిదొ నజి తెలివ్ద", ఇజి వెప్పొ వెల్లి గప్పనిడెర్ సాహాన్. నస్తవలె కొరు కెరెతాన్. 69 అయ పణికినికాద్ పేత్తుజ్ గప్పనిడెర్ గు సుడఃజి అబ్బె నిహిమహి వరివెల మరి వెప్తాన్, "పిండ్రు వరిలోఇమహ్కాన్ ఒరెన్". 70 గాని పేతురు మరి, "నాను అవ ఇజి వెప్తాన్. సణెం సాహివెనుక పేతురు డెర్ సహిమహికార్, "నీను గలీలయదికి, నిజం నీనుబా వరిలోఇ ఒరెన్", ఇజి వెప్తార్. 71 నస్తవలె పేతురు, "మీరు వెహాసిని వన్నిజ్ నజి నెన్ఎ ఇజి వెప్పొ వన్నిజ్ వాండ్రి నయివ్ సీబెఅజి ఒట్టు కితాన్.

72 వెలనె రిజ ఒర్పు కొరు కెరెతాన్. నస్తవలె పేతురు, యేసు వన్నివెల, "కొరు రిజ కెరెని ముజల నీను నజి నెన్ఎ ఇజి ముసార్ వెప్పొల", ఇజి వెప్పొమాట ఎత్తు కితాండ్రి నండ్రి దుకమాజి అడఃబతాన్.

యేసుజ్ తొప్పొపిలాతుజ్ ఒవజెప్పినార్

15 పెందాల సీకటి మన్బునె, పెరిపుజెరిజు, యూదపెదెలుజు, యూదురి రూలుజ్ నెన్పిసినికార్, నన్హాద్రిం సజమ్దికార్ విజేరె కూడ్డి యేసుజ్ ఎలాగ సప్తెజ్ ఇజి ఆలోననం కితార్. వారు వన్నిజ్ తొప్పొ ఒత్తారె రోమ దేసెమ్ది అతికారిఆతి పిలాతుజ్ ఒవజెప్తార్. 2 "నీను యూదురి రాజానా?", ఇజి పిలాతు యేసుజ్ వెన్బాతాన్. నస్తవలె యేసు, "ఒఒ నీను వెప్తాలెకెండెనె", ఇజి వెప్తాన్. 3 పెరిపుజేరిజు యేసుముస్సు నండ్రి తప్పజ్ మొస్తార్. 4 నస్తవలె పిలాతు యేసుజ్ మరి వెన్బాతాన్, "నీను మర్జి ఇనికబా వెప్పిదా? వీరు నీ ముస్సు ఎస్సా తప్పజ్ మొప్పినార్ గదె". 5 అహా వెప్తొజిబా యేసు ఇని మాటబా మర్జి వెహాతాన్. అక్క సుడఃజి పిలాతు బమ్మ ఆతాన్.

6 ఏంబు ఏంబు కిని వన్క వండ్రియ్దిజ్ లోకుర్ కోరిజిని ఒరెన్ కయ్దువన్నిజ్ విడుదల సీదెజ్ పిలాతుజ్ అలవాటు. 7 అయవలె బరబ్బుఇనికాన్ ఒరెన్ అన్నయవాండ్రు నన్నికాన్ జెలిదు మహాన్. వాండ్రు, వన్నివెల మహికార్, ఏలుబడిః కినివరిజ్ ఎద్రిస్తారె సెడొండ్రిజ్ సప్త మహార్. అందెజె వరిజ్జెలిదు ఇట్త మహార్. 8 లోకుర్ పిలాతుబాన్ వాజి, "నీను కిని ఆలవాటువజ ఒరెన్వన్నిజ్ డిఃసి సీల", ఇజి వెప్తార్. 9-10 పెరిపుజెరిజు గోస ఆతారె యేసుజ్ నజి ఒవజెప్తార్ ఇజి పిలాతు నెస్తాన్. అందెజె వాండ్రు "యూదురిరాజాజ్ నాను మిజి డిఃసి సీదెజ్ కొరిజినిదెరా? ఇజి వెన్బాతాన్. 11 గాని పెరిపుజెరిజు బరబ్బేజ్ డిఃసి సీజి యేసుజ్ సప్తెజ్ ఇజి ఆతికారి ఒప్పొలెకెండె వెప్తాన్ ఇజి లోకురిజ్ రేప్పొ మహార్.

12 నస్తవలె పిలాతు, "యూదురిరాజా ఇని మీరు వెహాసినివన్నిజ్ నాను ఇనిక కిదెజ్?", ఇజి వెన్బాతాన్. 13 వారు, "వన్నిజ్ సిలువ పాక్అ", ఇజి నండ్రి డేల్స్తార్. 14 అందెజె పిలాతు, "ఎందనిజ్ వన్నిజ్ సిలువ పాక్జె? వాండ్రు ఇని తప్పవణి కివన్", ఇజి వెప్తాన్. గాని వారు, "వన్నిజ్ సిలువ డెయ్జి సప్అ", ఇజి నండ్రి డేల్స్తార్. 15 పిలాతు లొకాన్సెర్గ కిబిస్తిజ్ బరబ్బేజ్ విడుదల కితాన్, యేసుజ్ కొర్డెజాణిజ్ డెయ్జిని. సిలువ పాక్జె ఒవజెప్తాన్.

† నండ్రి కొసం ఆతాన్ ఇజి తొరెప్పెజ్ సాక్క, కిన్నార్. గాని విజేరె పుజేరి ముస్సు మన్ని పెరి పుజెరి వన్ని సాక్కకెప్పెజ్ అవిదె ఇజి లేవి. 21:10 దు రాస్త మనాన్.

సయనమ్దికార్యేసుజ్ వెక్కిస్తార్

16 నస్తవలె సయనమ్దికార్యేసుజ్ పైటోరియం ఇని పిలాతుని పెరిఇండ్రొ ఒతారె అబ్బె మహి సయనమ్ది వరిజ్ విజేరిజ్ కూడుస్తార్. 17 వారు యేసుజ్ ఎరాని రంగుది నీరి సాక్క పార్చీసి సాప్కాణిజ్ అటారె ఉండ్రొ టోపి తయారో కిజి బురారు ఇడ్డెతార్. 18 "యూదురి రాజు గెల్చిఅ? ఇజి వెస్సె వారు యేసుజ్ వెక్కిస్తార్. 19 వారు మరి మరి డుడుదాన్ వన్ని బురారు డెయ్యారె వన్నిముస్సు పూస్తార్. వెనుక ముణుకుజ్ ఊరజి వన్నిజ్ మాడిసి వెక్కిస్తార్. 20 వారు వెక్కిసి విజితి వెనుక వన్నిజ్ తోడిగిసి మహి ఎరాని సాక్క లాగ్లి వన్ని నీరి సాక్క తోడిగిస్తారె సిలువ పాక్కెజ్ వన్నిజ్ ఒత్తార్.

యేసుజ్ సిలువదు డెయ్యెజినార్

21 కురేనియాదికార్యే సీమోసు ఇని ఒరెన్ ఉండ్రొ నాటోహాన్ అయసరి వాజి మహాన్. నస్తవలె యేసువందిజ్ సిలువ పిండెదెజ్ సయనమ్దికార్యే సీమోసుజ్ బలవంతం కిత్తార్. సీమోసు, అలెక్కందరుని, రూపుఇని వరి అప్పాసి. 22 వారు గొల్గొతఇని బాడ్డిదు యేసుజ్ తత్తర్. గొల్గొత ఇహిజు బుర్ర పిణికి బాడ్డిఇజి అర్దం. 23 అబె యేసుజ్ ఉండెజ్ ద్రాక్కకలుదు బోలం † ఇని సేందుమాయం కలిప్పి సిత్తర్. గాని వాండ్రు కెపితాన్. 24 సయనమ్దికార్యే యేసుజ్ సిలువదు డెయ్యార్. వెనుక వన్ని సాక్కెజ్ ఎయెజ్ దోహ్కె ఇజి నెస్సెజ్ సీటిజ్ పాక్కారె వని సాక్కెజ్ సీబె ఆతార్. 25 పెందాల తొమ్మిది గంటెజ్ యేసుజ్ సిలువ డెయ్యెతార్. 26 "యూదురిజ్ రాజు", ఇజి యేసుముస్సు మోప్పి నేరం బోర్డుదు రాసి సిలువారు ఇడ్డార్. 27-28 యేసువెలు రివర్ డొజారిజ్ సిలువారు పాక్కారె. ఒరెన్ వన్నిజ్ ఉణెర్ వడెకారు ఉండ్రొ సిలువారు, మరి ఒరెన్ వన్నిజ్ డేబ్లి వడెకారు ఉండ్రొ సిలువారు. 29-30 నస్తవలె అయ సరిదాన్ సాన్నిమహికార్యే వరి బురరూక్కి యేసుజ్ దూసిస్తార్, "ఒహో దేవుణుగుడిదిజ్ అర్పి విసీరజి మూండ్రొ రోస్కాజి నాను తొహ్కె నిజి నినె రక్కిసి. సిలువదాన్ డిగ్జి రల" ఇహార్. 31-32 అయవజనె పెరిపుజెరిబుని యూదురి రూలునెస్పినికార్యే, "వీండ్రు మహివరిజ్ రక్కిస్తాన్. గాని వీండ్రు వినిజె రక్కిస్తెజ్ అట్వన్. ఇస్తాయేలురాజు ఆతి క్రిస్తు ఏలు సిలువదాన్ డిగ్జి వాతిజ అక్క నూణావె మాపు నమనావ్", ఇజి ఒరెన్ వెలు ఒరెన్ వెస్సె వన్నిజ్ వెక్కిస్తార్. యేసువెలు సిలువ డెయ్యెఆతి డొజారుబుబా వన్నిజ్ వెక్కిస్తార్.

యేసు సిలువముస్సు పాణం డిస్తాన్

33 వేడె వన్నెండు గంటెజాణిజ్ మూండ్రొ గంటేజ్ దాక దేసం విజు సీకటి ఆతాద్. 34 మూండ్రొ గంటేజ్ యేసు, "ఎలోయ, ఎలోయ లమ సబక్తాని", ఇజి డటం డేల్చి వెహ్. దని అర్దం ఇనిక ఇహిజు, "నా దేవుణు, నా దేవుణు నజి ఎందనిజి నీను డిస్సి ఇజి. 35 బానె నిహికార్యే సెగొండార్ యామాట వెహ్, "ఇదిలో వీండ్రు ఎలియేజ్ కూక్కినాన్" ఇహార్. 36 ఒరెన్ ఊహ్కె సాన్ని దూతి తత్తాండ్రె సెందు ద్రాక్క కలుదు ముడెక్కి ఉండ్రొ డుడ్డుదాన్ యేసుజ్ ఉండెజ్ వెయ్యు అందిస్తాన్. "నణెం మండ్రు. ఏలియ వాజి వినిజ్ డిప్పాండ్రొ సీలేనో నూణాట్", ఇజి వాండ్రు వెహ్. 37 నస్తవలె యేసు డటం డేల్స్తాండ్రె పాణం డిస్తాన్. 38 అయవలె యెరూసలేమ్దు మహి దేవుణు గుడిదు మహి తెర ముస్సుహాన్ అడిగిదాక కింజితాదె రుండి ముక్కెజ్ ఆతె. 39 సిలువ డెయ్యెబాన్ నిహిమహి సయనమ్ది మంద మణిసిరిజ్, యేసు ఈహు డేల్స్తాండ్రె పాణం డిస్టిక సుడెజి, "వీండ్రు నిజం దేవుణు మరిసినె", ఇజి వెహ్. 40 సెగొండెక్ అయ్లికొడెక్ దూరం నిల్చి సుడెజిమహి. వన్కాజ్ లోఇ మగ్దలేనె మరియ, ఇజిరి యాకోబు, యోసె ఇనివరి అయ్సిఆతి మరియ, సలోమి ఇనికెజ్ మహి. 41 యేసు గలీలయదు మహివలె ఇవిక్వన్నివెలు సాన్ని వన్నిజ్ అన్సరమాతికెజ్ కిజిమహి. ఇవిక్వఎండ యెరూసలేమ్దు యేసువెలు వాతి నండొ అయ్లికొడెక్ బా అబ్బె మహి.

యేసు పినుగు సమాదిదు ఇడ్డార్

42-43 అరిమతయి ఇని పట్టుమ్దికార్యే యోసేపుఇని ఒరెన్ అబ్బె మహాన్. వాండ్రు సన్హాద్రిం సజమ్దు మన్నివరిలో ఇ పెరికాన్ ఒరెన్. దేవుణు ఏలుబడి వందిజ్ వాండ్రు ఎద్రు సుడెజి మహాన్. వీండ్రు సాన్ని, దయేరమ్దాన్, యేసు పినుగు సిలువ ముస్సుహాన్ జాయ్ మనుబునె డిప్పెజ్ పిలాతుబాన్ సెలవలోస్తాన్. అయ దినం విస్తాందిదినం ముజాల మహి తయారో కినిదినం. అండెజి అయ తయారో కినిదినం పాదొయ్నె యోసేపు పిలాతుబాన్ సెలవ లొస్తెజ్ సాహాన్. 44 యేసు ఎస్కాండె సాతాన్ ఇజి వెంజి పిలాతు బమ్మ ఆతాన్. సయనమ్ది వరిఅతికారిజ్ కూక్కి వెనెబాతిజ్ యేసు ఎస్కాండె సాతాన్ ఇజి నెస్తాన్. 45 యేసు సాతాన్ ఇజి సయనమ్ది వరిఅతికారి వెహి మాట పిలాతు వెంజి యోసేపుజ్ యేసుజ్ పినుగు ఒవజెప్తాన్. 46 యోసేపు నెగ్గె తెల్లని పాత కొడెజితిసి, పినుగు సిలువదాన్ డిప్పి అయ పాతెజాణ్ పినుగుదిజ్ సుటిసి సటుదిజ్ దొల్చి దూకిదు ఇడ్డార్. ఉండ్రొ గుండ్రని స్వ వణుకు సడిసిసి దూకిదిజ్ అడ్డు కిత్తాండ్రె మూక్తాన్. 47 మగ్దలేనె మరియ, యోసె అయ్సిఆతి మరియ యేసు పినుగుదిజ్ ఇడ్డిబాడ్డి సుడెజె.

యేసు మర్రి నిజిత్తాన్

16 విస్తాందిదినం గడిసిసాహివెనుక, మగ్దలేని మరియ, యాకోబు అయ్సి మరియ, సలోమి, ఇనికెజ్ యేసు పినుగుదిజ్ రాస్తెజ్ వాసనం నూనె కొడిజి తత్తె. 2 వారమ్దిజ్ మొదొహి దినమ్దు పెందాలై నిజ్జి పాడ్డు సాసి మహివలె అవిక్వనమాది డగ్రు సాహి. 3 నమాది డగ్రు సాన్ని మహిజ్ అవిక్ "నమాది మూక్తి వణుకు మా వందిజ్ ఎయెర్ గూర్పూర్?" ఇహె. 4 నస్తవలె అవిక్ నుడెతిజ్ ఎయెర్ అయ పెరివణుకు సమాదిదాన్ గూర్పెలెకండె తోరితాద్. అది ఒద్దె పెరిక 5 నస్తవలె అవిక్ అయ నమాది లో ఇ వజ్జి సాహిజ్ నీరి తెల్లని సాక్క పారపాజి ఉణెర్ వడెకాద్ బన్ని మహి ఒరెన్ దజ్డెయెసుజ్ సుడెజె. వన్నిజ్ సుడెజి అవిక్ నండొ తియెల్ ఆతె. 6 అయ దజ్డెయెన్ వరివెలు,

† బోలం కల్పతిజ నప్పి నెస్పంద ఆనాద్

“తియెల్ ఆమాట్, సిలువ పాకె ఆతి మన్ని నజరేతు వాండ్రు ఆతి యేసుజ్ మీరు రెబాజినిదెరా? వాండ్రు ఇబ్బె సిల్లెన్. వాండ్రు బత్తిజి నిజిత మనాన్. వన్నిజ్ ఇడ్డి బాడ్డి సుడేదు.

⁷ వాండ్రు మిజి ఇంక ముజాల గలీలయ మీరు సాన్నినాన్ వాండ్రు మిజి వెహ్తివజ మీరు అబ్బెవన్నిజ్ సూణిదెరై ఇజి సిసురిజ్ మరి పేతురుజ్ వెహ్తు”, ఇజి వెహ్తున్. ⁸ అక్క వెహెనె అవిక్ వణక్కి బమ్మ ఆజి సమాదిదాన్ వెల్లి వాజి బాణిజ్ ఉహ్క్కి సాహె. అవిక్ తియెల్ ఆతెనె ఎయెర్వెటబా ఇనికబా వెహ్ఉతె.

యేసు మగ్దలేని మరియెజ్ తోరె ఆతాన్

⁹ యేసు ఆదివారం పెందాల్నే సమాదిదాన్ బత్తిజినిజ్జి మగ్దలెనె మరియెజ్ తోరె ఆతాన్. యా మరియ ఎయెర్ ఇహిజ యేసు ఏడు దెయమ్కాజ్ ఉల్పి నెగెండ్ కిత్తి అయ్లి కొడాః. ¹⁰ యేసువెట మహికార్ యేసు సాతిజ్ దుకమ్దాన్ ఒడేబిజి అడబాజి మహిజ్, అది సాహదె విజా సజతిజ్ వరిజ్ వెహ్తుద్. ¹¹ యేసు బత్తిజి నిజితాండ్రె నజి తోరె ఆతాన్ ఇజి అది వెహ్తి మాట వారు నమ్మివ్తార్.

యేసు రిపర్ సిసురిజ్ తోరెఆతాన్

¹² వెనుక రిపర్ సిసుర్ ఉండ్రె నాలో నడిసి సాన్నిమహిజ్ యేసు వరిజ్ తోరె ఆతాన్. గాని ఆఇ మూర్తి వజ తోరెఆతాన్. ¹³ వారు సాన్ని, మహి సిసురిజ్ యా సజతి వెహ్తుర్. గాని వారు యా రిపెరి మాటేబా నమివ్తార్.

యేసు వడకొండు మణిసి సిసురిజ్ తోరెఆతాన్

¹⁴ మరి ఒర్పువడకొండు మణిసి సిసుర్ బోజనం కిజిమహివలె యేసువరిజ్ తోరె ఆతాన్. యేసు నిజితి వెనుక వన్నిజ్ సుడేతివరి మాట నమివ్తాతివందిజ్, వరి అనుమానమ్దిజ్ యేసు వరిజ్గటిజ వెహ్తున్. ¹⁵ యేసు వరివెట, “మీరు లోకం ముస్సు మని విజా దేసమ్కాజ్ సాన్ని దేవుణు సువార్త విజేరిజ్ వెహ్తు.

¹⁶ ఎయెర్బా నా ముస్సు నమకం ఇడేబి బాప్తినం లాగెఅతిజ వరిజ్ దేవుణు రక్కిస్సాన్. గాని నా ముస్సు నమకం ఇడేఇతి వరిజ్ సిక్కు వానాద్.

¹⁷ ఎయెర్ నజి నమ్మినారొ వారు యా బమ్మాతి పణిజ్కెదెజ్ అల్వార్. అక్సెజ్ ఇనికెజ్ ఇహిజ నా పేరుదాన్ వారు దెయమ్కాజ్ ఉల్వ్వార్. వారు కొత్తబాసెజ్ వర్గినార్. ¹⁸ సారాస్కాజ్ అస్తిజ్బా అవిక్ కట్టిజ్బా సాపర్. ఇనికబా గొప్ప విసమాతిక ఉటిజ్బా సాపర్. జబ్బు ఆతివరి ముస్సు కికు ఇట్టిజ వారు నెగెండ్ ఆనార్”, ఇజి వెహ్తున్.

దేవుణు యేసుజ్ పరలోకమ్దు ఒత్తాన్

¹⁹ యేసు యాకెజ్ విజా వెహ్తివెనుక దేవుణు యేసుజ్ పరలోకమ్దు ఒత్తాన్. యేసు అబ్బె దేవుణు ఉణెర్ వడకాద్ బస్తాన్. ²⁰ యేసు సిసుర్ విజాబాన్ సాన్ని దేవుణు సువార్త వెహ్తుర్. వారు కిత్తి విజా పణిదిజ్ దేవుణు సాయం కిత్తాన్. వారు కిత్తి బమ్మాతి పణిజాణ్ వారువెహ్తి మాట నిజం ఇజి దేవుణు తోరిస్తాన్.

మార్కు

నెల్య కిబిసినిక

యా సువార్త లూక ఇని ఒరెన్ డాక్టరు, దెయెపిలెజ్ రాస్తికాదె. యేసు యా లోకమ్దు బత్తిత్తివలె జగ్గితి దన్నివందిజ్ కత వజ రాస్త మనాన్. యేసు పుడుగు వందిజ్ మహి సువార్త ఇంక లావు వెహ్తా మనాన్. మరి యేసు కిత్తి నండొ బమ్మాని పణిజ వందిజ్, నండొండార్ జబ్బుదాన్ మహి వరిజ్ నెగెన్ కిత్తిదన్ని వందిజ్ వెహ్తానాన్. యేసు దేవుణు మరిసి ఇహిజ్ బా లోకు వజ పుట్టి, లోకురి పావమ్కాజ్ వందిజ్ సాజి, మరి దేవుణువెల ఎలాకాలం బత్తిని బత్తుగుదు నడిపిసినాన్ ఇజి యా సువార్తదు వెహ్తానాన్.

1 ¹⁴ లూక తియెపిలెజ్ రాసినాన్. మా నడిమి జగ్గితి సజతిజ వందిజ్ కతవజ రాస్తజ్ నండొండార్ సుడెఃతార్. మొదోహనె, యా సజతిజ సుడెఃతి సాసిర్, మరి, సువార్త బోదిన్సికార్ మజి వెహ్తార్. వారు మజి వెహ్తా వజనె, వీరు రాస్తార్. నాను యా సజతిజ్ విజా మొదోహనె బాగ నెస్త మహ. అందెజె అయాకెజ్ నీ వందిజ్ వరన రాస్తజి బాగ మంజినాద్ ఇజి నాను ఒడెఃబిత. ఎందానిజ్ ఇహిజ, అయావలె నిజి నెపిన్సి విజా వన్కాజ్ పూర్తి అర్దం నిజి నెస్తజానాద్.

బాప్తినం సీని యోహాను పుడగు వందిజ్ వెహ్తానాన్.

5 హోదూరాజా యూదయ దేసెం ఏలుబడిః కిజి మహివలె, జెకరియ ఇని ఒరెన్ పుజెరి మహాన్. వీండ్రు అబియ పుజెరి జట్టుదు మహికాన్. విన్ని ఆల్ని ఎలిసబెతు. అది అహోను పుజెరి కుటుమ్దికాద్నె. ⁶ వీరు రిఎర్బా, నిండ నిల్లెండ ప్రబు సీతి ఆడెజ, రూలుజ విజా లోజిజి, దేవుణు ముందాల నీతినిజాయితిదాన్ మహార్. ⁷ ఎలిసబెతు గొడ్డు బోదెలి. అందెజె వరిజ్ కొడెఃర్ సిల్లెర్. వారు రిఎర్బా నండొ డొక్ర ఆతార్. ⁸ ఉండ్రి సట్టు జెకరియ జట్టుజ్ పుజెరి పణికిదెజ్ వంతు వాతాద్. అయావలె జెకరియ దేవుణు ముందాల పుజెరి పణి కిజినాన్. ⁹ పుజెరిజ మన్ని అలవాటు లెకెండ్, సీటి హెక్తారె, జెక్రయెజ్ ఏర్పాటు కితార్. దేవుణు గుడిఃదు సాన్ని దూపం సురుదెజ్ వన్నిజ్ ఏర్పాటు కితార్. ¹⁰ దూపం సురుదెజ్ వేల ఆతాద్. నస్తివలె అబ్బె కూడిఃతిమహి మందలోకుర్ విజెరె వెల్లి మంజి పార్దనం కిజి మహార్. ¹¹ నస్తివలె, దేవుణుదిజ్ దూపం సుర్ని మాలి పిటె ఉజెర్వడెఃకాద్ దేవుణు దూత నిహాన్. నిహండ్రె వన్నిజ్ తోరె ఆతాన్. ¹² జెకరియ, దేవుణు దూతెజ్ సుడెఃతాండ్రె, గజిబిజి ఆజి నండొ తియెల్ ఆతాన్. ¹³ అయావలె దేవుణు దూత వన్నిజ్, “జెకరియ, నీను తియెల్ ఆమ. నీ పార్దనం దేవుణు వెహాన్. నీ ఆలు ఎలిసబెతు ఒరెన్ కొడెః ఇద్దాద్. వన్నిజ్ యోహాను ఇజి పేరు ఇడెదెజ్. ¹⁴⁻¹⁷ వాండ్రు ప్రబు ఎర్దు పెరికాన్ ఆనాన్. ద్రాక్కు కలుని మరి సోస్తిక ఇనికబా వాండ్రు ఉణ్ఎన్. అయిసి పాటలోఇ పిండం ఆతి బాణిజ్ మొదోల్ని దేవుణు ఆత్మ వన్నిజ్ నడిపిస్సాన్. ఇస్రాయేలు దేసెమ్ది లోకురిజ్ నండొండారిజ్ వరి దేవుణు ఆతి ప్రబు దరోట్ మహ్ని తనాన్. ఏలియ ప్రవక్త లెకెండ్ నండొ గొప్ప నత్తుదాన్ వాండ్రు ప్రబు ముజాల సానాన్. ఎందానిజ్ ఇహిజ, అప్పాసి మరిసిరిజ్ కూడుఃప్తెజ్. నాయం మన్నికార్ బుద్దిదాన్ నడిఃనివజ, విరి సరిదు దేవుణుమాట వెన్ఇవరిజ్, నడిఃపిస్తెజ్ ప్రబు వానివలె, వన్నిజ్ ఎర్దు సుడెఃదెజ్ లోకాజ్ తయార్ కినివందిజ్ యా లెకెండ్ కినాన్లె. అందెజె వాండ్రు పుట్టివెలె మిజి గొప్ప నర్ద కినాన్లె. మరి, నండొండారిజ్ నర్ద కిబిస్సాన్లె”, ఇజి వెహ్తాన్. ¹⁸ నస్తివలె జెకరియ దేవుణు దూతెజ్ వెన్బాతాన్, “యాక ఎలాగ నాను నెస్తజ్? నాను డొక్ర. నా బోదెల్బా డొక్రి ఆతాద్”, ఇజి. ¹⁹ అందెజె దేవుణు దూత, “నాను గబ్రియెలు. దేవుణు పడెఃకాద్ నిల్ని మంజినికాన్. నీ వెట వర్గిజి, నిజి యా నెగ్గ కబ్బు వెహ్తాజ్ దేవుణు నజి షాక్త మనాన్. ²⁰ గాని నాను వెహ్తా మాటెజ్ నీను నవిఇతి. అందెజె యాకెజ్ జగ్గినిదాక, నీను గుల్ల ఆజి మంజినిలె. నాను వెహ్తాకెజ్ జగ్గిదెజ్ దేవుణు ఏర్పాటు కితి కాలమ్దు, పూర్తి ఆనెలె”, ఇజి వెహ్తాన్.

²¹ నస్తివలె లోకుర్ జెక్రయెజ్ కాప్ కిజి మహార్. వీండ్రు ఎందనిజ్ దేవుణు గుడిఃదు నిసా ఆల్సెం ఆతాన్ ఇజి బమ్మ ఆజి మహార్. ²² వాండ్రు వెల్లి వాతివెలె, వరి వెట వర్గిదెజ్ అబ్ఎతాన్. అయావలె దేవుణు గుడిఃదు వినిజ్ దేవుణు ఇనికదో ఉండ్రి దర్సనం † తోరిస్తాన్ ఇజి నెస్తార్. వెయు రజతిజ్, వాండ్రు వరిజ్ కియు సయ్న కితాన్. వాండ్రు గుల్ల ఆజి మహాన్. ²³ వన్ని పణి కాలం వీజితిజ్ వాండ్రు వన్ని ఇండ్రె సాహాన్. ²⁴ సెగం రోస్సు. సాహి వెన్కా, వన్ని ఆల్ని ఎలిసబెతు పాత డిఃస్తాద్. అయ్దు నెలదాక అది ఇండ్రెనె మహాద్. ²⁵ “ప్రబునె నా వందిజ్ యాక కితాన్. ఏలు నా ముస్సు కణక పెహ్తా బస్తాండ్రె లోకుర్ ఎర్దు నజి మహి సిగుసెట్టు లాగితాన్”, ఇజి వెహ్తాన్.

యేసు పుడుగు వందిజ్ వెహ్తానాన్

²⁶ ఎలిసబెతు పాత డిఃసి ఆరునెలాదు, దేవుణు గబ్రియెలు దూతెజ్, గలిలయ ప్రాంతమ్దు మన్ని నజెరేతు ఇని పట్టుమ్దు షాక్తాన్. ²⁷ యోసేపు ఇన్ని ఒరెన్ వన్నిజ్ వెన్బాతి ఉండ్రి విడ్డి బోదెలిబాన్ దేవుణు దూత సాహాన్. అయ విడ్డి బోదెలి పేరు మరియ. యోసేపు దావీదు కుటుమ్దికాన్. ²⁸ దేవుణు దూత లోఇసాహండ్రె, మరియామ్మెజ్ సుడెఃజి, “వందనం, ప్రబు నీ వెట మనాన్. నిజి నెగెండ్ దీవిస్త మనాన్”, ఇజి వెహ్తాన్. ²⁹ అయ మాటెజ్ వెహదె, మరియ నండొ బాద ఆతాద్. వన్ని మాటెజిదెజ్ అర్దం ఇనికదో ఇజి దన్ని గర్భమ్దు బమ్మ ఆతాద్. ³⁰ అయావలె దేవుణు దూత దన్నిజ్, “మరియ నీను తియెల్ ఆమ. దేవుణు

† దర్సనం ఇహిజ ఇనికాద్ ఉండ్రి సజతి కల లెకెండ్ టెటాజ్ తోరె ఆనికాదె అయాక దేవుణు సత్కదాన్ తోరె ఆజినాద్

నీ ముస్సు కనికారం తోరిస్తా మనాన్. 31 నీను పాత డిండి, ఒరెన్ కొడొడిజ్ ఇడ్డిలె. వన్నిజ్ యేను ఇజి పేరు ఇడ్డిఱ. 32 వాండ్రు పెరికాన్ ఆనాన్. విజాదనిజ్ అతికారం మని దేవుణు మరిసి ఇజి కూకె ఆనాన్లె. వన్ని అనిగొగొర్ ఆతి దావీదు రాజా ఆతివజ, దేవుణుఆతి ప్రబు వన్నిజ్ రాజా కినాన్లె. 33 వాండ్రు, యాకోబుజ్ తెగ్గతివరిజ్ ఎలాకాలం ఏలుబడి: కినాన్లె. ఏలుబడి: కిడెజ్ అతికారం వన్నిజ్ ఎలాకాలం మంజినాద్లె”, ఇజి వెహ్హాన్. 34 అయావలె అది, “నాను ఎసిజ్బా మొగకొడొ: వెలు కూడ్డిఎనె. యాక ఎలాగ జగ్గినాద్?” ఇజి దేవుణు దూతెజ్ వెన్బాతాన్. 35 అందెజె దేవుణు దూత, “దేవుణు ఆత్మ నీ ముస్సు వానాన్లె. మొసాప్ కితిజు నీడ పిడ్డిక్కాద్. అయలెకెండ, విజా దన్నిజ్ అతికారం మన్ని దేవుణు సత్తు నిజి పిడ్డిక్కాద్. అందెజె పుట్టికాన్ దేవుణు బాణిజ్ వానికాన్. వాండ్రు దేవుణు మరిసి ఇజి కూకె ఆనాన్లె. 36 నీ డగ్గుహి లోకుఆతి ఎలిసబెతు డొక్కి కాలమ్దు ఒరెన్ బయిజ్ పాత డిస్ట మనాద్. గొడ్డు బోదెలి ఇజి కూకె ఆతిదనిజ్ ఏలు ఆరు నెలెజ్. 37 విజా కిడెజ్ దేవుణు అట్టికాన్”, ఇజి వెహ్హాన్.

38 అయావలె మరియ, “ఇదిలో, నాను దేవుణు పణిమణిసి. నీను వెహ్హి లెకెండె నజి జగ్గిపిద్”, ఇజి వెహ్హాద్. అకవెహ్హొడ్డె దేవుణు దూత దని బాణిజ్ సాహాన్.

మరియ ఎలిసబెతుబాన్ ససాన్సినాద్

39 అయావలెనె, మరియ తయార్ ఆతాద్. ఆతాదె, యూదయ దేసెమ్ది గొరొణ్ ప్రాంతమ్దు మని ఉండ్రె పట్టుమ్దు బేగి సాహాద్. 40 అబ్బె మని జెకరియ ఇండ్రొ సాహాదె, ఎలిసబెతుజ్ దసూల్ఆతాదె, నమొస్తి వెహ్హాద్. 41-42 మరియ వెహ్హి వందనం ఎలిసబెతు వెహ్హెవలె, దన్ని పాటాద్ మన్ని పిండం సర్దదాన్ కద్దితాద్. ఎలిసబెతు దేవుణు ఆత్మ దాన్ నిండ్రెజి సర్దద ఆజి ఈహు డుం వెహ్హాద్. “అబ! బోదెకా లొఇ, దేవుణు నిజెనె నెగెండ దీవిస్తాన్. నీ పాటాద్ మన్ని కొడొడిజ్బా దీవిస్తాన్. 43 నా ప్రబుజ్ అయేసి నా డగ్గు వాదెజ్ నాను ఏవటిదిక ఆవి. 44 ఇదిలో నీ వందనం నా గిబ్బుదు అర్దిజ్, నా పాటాద్ మన్ని పిండం సర్దదాన్ కద్దితాద్. 45 ప్రబు దనిజ్ వెహ్హి మాటెజ్ జగ్గినాద్ ఇజి సమకం ఇట్టికాద్ గొప్పది.

మరియ దేవుణుదిజ్ పాగిడిజి పార్జినాద్.

46 అయావలె మరియ ఈహు వెహ్హాద్. “నా పాణం ప్రబు గొప్ప పెరికాన్ ఇజి వెహ్హినాద్. 47-49 వాండ్రు వన్ని పణిమణిసిఆతి నా ఇజి బత్తుదిజ్ సుడ్డిఱాన్. అందెజె నా పాణం నజి రక్కిస్తి దేవుణు బానె సర్దద ఆజినాద్. గొప్ప సత్తు మన్ని దేవుణు నా వందిజ్ గొప్ప పణిజ్ కితాన్. అందెజె ఏలుదాన్ లోకుర్ విజెరె నా వందిజ్, దేవుణు దీవిస్తికాద్ ఇజి వెహ్హెర్లె. వాండ్రె నెగ్గి దేవుణు. 50 వన్నిజ్ తియెల్ ఆనివరి ముస్సు వన్ని కనికారం తర తరం మంజినాద్. 51 వాండ్రు వన్ని సత్తుదాన్ గొప్ప పణిజ్ కితాండ్రె తోరిస్తాన్. నానె పెరికాన్ ఇజి వరి లోఇ ఒడ్డిబిజి గర్ల ఆతి వరిజ్ వాండ్రు సెద్దిస్తాన్. 52 గర్ల మని అతికారిజ, అతికారం దాన్ డిష్టాండ్రె ఇజిరి వరిజ్ పెరికార్ కితాన్. 53 బజాతివరిజ్ నెగ్గి టిండి సీజి సర్దద కిబిస్తాన్. మని వరిజ్ వహి కీదానె పాక్తాన్. 54-55 మా అనిరిజ్ ‘కనికారం తోరిస్తాన్’ ఇజి ఒట్టు కితి వజ వాండ్రు కితాన్. వన్నిజ్ సేవ కిని ఇస్రాయేలు లోకాజ్ కనికారం ఆజి సాయం కితాన్. అబహమ్ముజ్ వన్ని కుటుమ్ది వరిజ్ విజెరిజ్ ఎలాకాలం కనికారం తోరిస్తాన్ ఇజి ఒట్టు కితాన్. అయాక వాండ్రు ఒడ్డిబిఱాన్”, ఇజి మరియ వెహ్హాద్. 56 అది డగ్గు మూండ్రె నెలెజ్ దాక ఎలిసబెతు బాన్ మహాదె దని ఇండ్రొ మర్జి సాహాద్.

బాప్తీసం సీని యోహాను పుట్టినాన్.

57 నెలెజ్ నిండ్రెతివలె, ఎలిసబెతుజ్ ఒరెన్ కొడొ: పుట్టాన్. 58 ప్రబు దన్నిముస్సు కణక పెహ్హ బేస్తాన్ ఇజి పడకాదికార్ని కూలెజ్ వెహారె, దన్నివెలు నండొ సర్దద ఆతార్. 59 కొడొ: పుట్టి ఎనిమిది దినమ్దు వన్నిజ్ సునతి కిడెజ్ కూడిఱాత్. కొడొడిజ్ అప్పాసి పేరు నన్నిక ఇడ్డిదెజ్ వారు ఒడ్డిబిఱాత్. 60 నస్తివలె అయేసి, “అహు పాని! వన్నిజ్ యోహాను ఇజి పేరు ఇడ్డిదెజ్”, ఇజి వెహ్హాద్. 61 అందెజె వారు, “మీ కూలెజె లొఇ ఎయెరిజ్బా నిన్ని పేరు సిల్లెద్”, ఇజి దనిజ్ వెహ్హెర్. 62 వనిజ్ ఇన్ని పేరు ఇడ్డిదెజ్ అప్పాసి కోరిబినాన్ ఇజి నెస్తిజ్ వారు కియు సయన కిజి జెక్యెజ్ వెన్బాతాన్. 63 నస్తివలె వాండ్రు ఉండ్రె రాసిని బల్లె లొస్తాండ్రె, “విన్ని పేరు యోహాను”, ఇజి రాస్తాన్. వారు విజెరె నండొ బమ్ము ఆతార్. 64 వెలునె, వన్నిజ్ వర్గిదెజ్ వెయు వాతాద్. దేవుణుదిజ్ పాగిడిజి వర్గిదెజ్ మొదోల్స్తాన్. 65 పడకాదికార్ విజెరె గొప్ప తియెల్ ఆతార్. యూదయ దేసెమ్ది గొరొణ్ ప్రాంతం విజా లోకుర్ విజెరె యా జగ్గితి సజతిజు వందిజ్ వర్గిజి మహార్. 66 యాక వెహికార్ విజెరెబా దని వందిజ్ ఒడ్డిబిజి, “యా కొడొ: ఎలాగ మహ్మికాన్ ఆనాన్లెనా”, ఇజి వెహ్హాన్. ప్రబు సత్తు వన్నివెలు మహాద్ ఇజి వారు నెస్తార్.

జెకరియ పాగిడిజి పార్జినాన్

67 నస్తివలె వన్ని అప్పాసి జెకరియ, దేవుణు ఆత్మదాన్ నిండ్రెజి, దేవుణు వెహ్హెజ్ మని సజతిజు వందిజ్ ఈహు వెహ్హాన్. 68 “ఇస్రాయేలు లోకురి దేవుణుదిజ్ పాగిడిజినాల్. ఎందనిజ్ ఇహిజ, వాండ్రు వన్ని లోకురిజ్ డిబిస్తి వందిజ్ వాత మనాన్. 69 ఒరెన్ సత్తు మని మజి గొప్పజ రక్కిస్తివన్నిజ్ మా వందిజ్ సిత మనాన్. అయ వాండ్రు వన్ని పణి మణిసి ఆతి దావీదు కుటుమ్దు మనికాండ్రె. 70-71 సేన దినమ్కాజ్ ముజాలె, దేవుణు వన్ని బాణిజ్ వాతి ప్రవక్తెజెవెలు ఒట్టు కిత మనాన్. ఒట్టు ఇనిక ఇహిజ, “మా పగాతివరి బాణిజ్ మజి రక్కిస్తిఇజి. “మజి దూసిస్తి వరిబాణిజ్ రక్కిస్తి”, ఇజి. అయా ఒట్టువజనె, మజి రక్కిస్తి వన్నిజ్ సితాన్. 72 మరి వాండ్రు వెహ్హాన్, “మా అనిరిజ్ ఒట్టు కితి వజ కనికారం తోరిస్తాన్ ఇజి. వన్ని వందిజ్ కేలు ఆతి ఒప్పుమానం ఒడ్డిబిఱాన్ ఇజి. 73-74 మా బుబ్బు ఆతి అబ్రాహము వెలు ఒట్టు కితాన్, మా పగ ఆతివరి బాణిజ్ మజి తప్పిస్తాన్ ఇజి, తియెల్ సిల్లెండ వన్నిజ్ సేవ కిడెజ్ మజి సాయం కిన ఇజి. 75 మరి, మాలు దేవుణుదిజ్ కేలు ఆతి లోకుర్ వజ సీతి నిజాయితిదాన్ మా బత్తు విజా వన్ని ఎద్దు మండ్రెజ్ మజి తయార్ కిన ఇజి”, వెహ్హాన్. 76 మరి, నా కొడొ: నీను విజా దన్నిజ్ అతికారం మన్ని దేవుణు ప్రవక్త ఇజి కూకెఆనిలె. ఎందనిజ్ ఇహిజ, నీను ముజాలె సాన్సి ప్రబుజ్ లోకుడగ్గు వాదెజ్ సరి నెగెణ్ కినిలె. 77 నీ వన్ని లోకాజ్ వెహ్హెలె, “దేవుణు వరి పావమ్కు సెమిని వరిజ్ రక్కిస్తిన్లె”, ఇజి. 78 మా దేవుణు నండొ కనికారం మనికాన్. వాండ్రు దేవుణు మంజిని బాడ్డిదాన్ పాద్దు సాని లెకెండ రక్కిస్తి వన్నిజ్ తప్పిస్తాన్లె. 79 ఎందనిజ్ ఇహిజ, సీకటిదు మని వరిజ్ సాపు బత్తుదు మని వరిజ్ జాయ్ సీదెజ్. మజి సమాదనం దాన్ నడిపిస్తెజ్. దిని వందిజె వాండ్రు రక్కిస్తి వన్నిజ్

తపిస్తానలె", ఇజి జెకరియ వెహ్సాన్. ⁸⁰ కొడొ: పిరితాన్. దేవుణు అత్తు సత్తు దాన్ పిరితాన్. వాండ్రు ఇస్రాయేలు లోకురిజ్ తోర్ని దాక యెరూసలేమ్దిజ్ వెల్లి బిడిమ్ బూమిదు ఒరెండ్రె బత్తితాన్.

2 అయ కాలమ్దు రోమ గవర్మెంటు అడిగి మన్నివిజా లోకురిజ్ జమబంది లెకజ్ రాస్తెజ్ ఇజి కయినరు అయుగుస్తు ఉండ్రె ఆడ్ర సితాన్. ² కురెనియ ఇని ఒరెన్ సిరియ రాస్త్రందిజ్ సుడొజి మహివలె యా మొదోహి జమబంది లెకజ్ రాస్తాన్. ³ విజెరె వరి వరి పట్నమ్కాజ్ పేర్కు రాసి ఆదెజ్ సాహార్. ⁴ అయలెకెండ్రె యోసిపు ఇనికాన్ ఒరెన్బా సాహాన్. వీండ్రు దావీదు కుటుమ్దికాన్. దావీదు పట్నం బేత్లెహిము. అందెజె వాండ్రు గలిలయ ఇని ప్రాంతమ్ది నజరేతు ఇని పట్నం దాన్, యూదయ ప్రాంతమ్దు మని బేత్లెహిము ఇని పట్నమ్దు సాహాన్. ⁵ వన్నిజ్ వెన్బాతి మహి మరియు వెట జమబంది రాసి ఆదెజ్ సాహాన్. అయావలె దన్నిజ్ నెలెజ్ నిండ్రెతె మహి. ⁶ వారు అబె మహివలె దనిజ్ నోపిజ్ వాతె. ⁷ అది దని తోల్సుర్ కొడొ:దిజ్ ఏరుళాబాతాద్. వరిజ్ మండ్రెజ్ లార్జి ఇలు దోహికెతాద్. దోహ్కొఇతిజ్ పుట్టి కొడొ:దిజ్ కసిలిజాణిజ్ సుటిస్తారె, కొడ్డిజు సాలాది డోణిద్ త్రెస్తారె.

గొరెజ్ గవుడుజు దేవుణు దూత నెగ్గికల్లు వెహ్సాన్

⁸ నస్తవలె, అయ ప్రాంతమ్దు సెగొండార్ గొరెజ్ గవ్డుజుజ్ వరి గొరెజు, మడిజు మంద కితారె రెయేతు కాపుకిజి మహార్. ⁹ అయావలె ఒరెన్ దేవుణు దూత వరిజ్ తోరె ఆతాన్. ప్రబు జాయ్ వరి సుటులం వాతాద్. వారు నండ్రెతియెల్ ఆతారె. ¹⁰ అయావలె దూత వరిజ్, "పీరు తియెల్ ఆమాట్. లోకురిజ్ విజెరిజ్ నండ్రె సరద కిబిన్ని నెగ్గి కల్లు నాను వెహ్సా. ¹¹ నేండ్రు దావీదు పట్నమ్దు మిజి రక్సిన్కాన్ ఒరెన్ పుట్ట మనాన్. వాండ్రు ప్రబు ఆతి క్రిస్తు. ¹² యాకదె నాను మిజి వెహ్సాదనిజ్ గుర్తు "ఒరెన్ బయిదిజ్ కసిలిజాణిజ్ సుటిస్తారె, సాలాది డోణిద్ త్రెప్తి మనిక సూణిదెరె", ఇజి వెహ్సాన్. ¹³⁻¹⁴ వెటనె, దేవుణు మంజిని బాడిది నండ్రె దూతెజ్ అయ దూతవెట కూడితె. కూడితారె, "విజా దన్నిజ్ అతికారం మన్ని దేవుణుదిజ్ పాగిడిజునాట్. యా లోకమ్దు వాండ్రు ఇస్టం కిని లోకురిజ్ సమాదనం మనీద్" ఇజి దేవుణుదిజ్ పాగిడిజు మహార్. ¹⁵ దూతెజ్ వరిజ్ డిస్తారె, దేవుణు మంజిని బాడిదు సాహార్. సాహి వెనుక గొరెజ్ గవ్డుజుజ్, "మాటు బేత్లెహిముదు సాస్సి, ప్రబు మజి వెహ్సాన్ యా జగ్గితి సజతిజు సూణాట్", ఇజి ఒరెన్దిజ్ ఒరెన్ వగ్గితారె.

¹⁶ వారు బేగి సాహారె, మరియుమ్యెజ్, యోసిపుజ్, డోణిదు త్రెప్తి మని కొడొ:దిజ్ సుడొతారె. ¹⁷ వారు వన్నిజ్ సుడొతారె, యా కొడొ: వందిజ్ వరిజ్ వెహ్సా మాటెజ్ విజెరిజ్ వెహ్సాన్. ¹⁸ గొరెజ్ గవుడుజుజ్ వెహ్సాకెజ్ వెహికారె విజెరె నండ్రె బమ్మ ఆతారె. ¹⁹ గాని మరియు జగ్గితి సజతిజు విజా గర్బమ్దు ఇడ్డి దన్నివందిజ్ ఎత్తుకిజి మహాద్. ²⁰ గవుడుజుజ్ వరిజ్ వెహ్సాకెజ్, వారు సుడొతికెజ్ విజా వన్కా వందిజ్ దేవుణుదిజ్ గవ్డం సీజి వన్నిజ్ నండ్రె పాగిడిజు మహ్తా సాహార్. దేవుణు దూత వరిజ్ వెహ్సా వజనె విజా జగ్గితె.

²¹ పుట్టి ఎనిమిది రోమ్కు ఆతిజ్, బయిజ్ సుసతి కితారె. అయావలె వారు వన్నిజ్ యేసు ఇజి పేరు ఇట్టారె. పాత డిస్ఎండ్ర ముజాలె దేవుణు దూత వెహ్సా పేరునె ఇట్టారె. ²² దేవుణు మోసెజ్ సీతి రూలుజ్దు మన్నివజ సుబ్రరమ్వందిజ్ పూజెజ్ కిదెజ్ దినం ఆతాద్. అయావలె యోసిపుని మరియు బయిజ్ దేవుణుదిజ్ ఒవజెప్తిజ్, యెరూసలేమ్దు ఒత్తారె. ²³ ఎందానిజ్ ఇహిజు, మోసె రాస్తెజ్ ప్రబు వెహ్సా రూలుదు మనాద్, "విజా తొలిత పుట్టి కొడొ:దిజ్ దేవుణు వందిజ్ కెట ఇడొ:దెజ్ †. ²⁴ మరి, మోసె రాస్తెజ్ ప్రబు వెహ్సా రూలుదు మని వజ, "జత గువండెజ్నో రుండి పార పాటి పిలెకుజ్నో పూజ సీదెజ్ ††", ఇజి. అయావజ ఒత్తారె. ²⁵ అయావలె, సుమెయోను ఇనికాన్ ఒరెన్ యెరూసలేమ్దు మహాన్. వీండ్రు సీతి నిజయేతి మనికాన్. దేవుణుదిజ్ తియెల్ ఆతికాన్. ఇస్రాయేలు లోకాజ్ రక్సిన్ని వన్ని వందిజ్ ఎద్దు సుడొజి మహాన్. దేవుణు అత్తు వన్ని వెట మహాన్. ²⁶ ప్రబు ఏర్పాటు కితి పోక్తి క్రిస్తుజ్ తోవిండ, నీను సాఇలె, ఇజి దేవుణు అత్తు వన్నిజ్ వెహ్తా మహాన్. ²⁷ దేవుణు వన్నిజ్ నడిపిస్తవజ వీండ్రు దేవుణు గుడిదు సాహాన్. నస్తవలె, దేవుణు మోసెజ్ సీతి రూలుదు మని లెకెండ్రె కిదెజ్ అయేసి అపాసిర్ కొడొ: ఆతి యేసుజ్ తత్తారె. ²⁸ అయావలె సుమెయోను కొడొ:దిజ్ కికాణిజ్ పెహ్తాండ్రె దేవుణుదిజ్ పాగిడిజు ఈహా వెహ్సాన్. ²⁹ "ప్రబువా, నీను వెహ్సా మాటెజ్ వజ నాను వన్నిజ్ సుడొత. అందెజె నీ వణి మణిని ఆతి నజి ఏలు సమాదనం దాన్ కూక్సి ఒఒ. ³⁰⁻³¹ ఎందానిజ్ ఇహిజు, లోకుర్ విజెరె సుడొ:దెజ్ నీను తయార్ కితి రక్సిన్నివన్నిజ్నా కణకాణిజ్ నాను సుడొత మన్ను. ³² వాండ్రు ఇస్రాయేలు ఆఇ వరిజ్ దేవుణు సరిదు నడపిస్తెజ్ జాయ్లెకెండ్రె ఆనాన్లె. నీ ఇస్రాయేలు లోకాజ్ గొప్ప గవ్డం వాండ్రు కల్లిస్తాన్లె.

³³ అయావలె వాండ్రు కొడొ: వందిజ్ వెహ్సా మాటెజ్ వెహారె అయేసి అపాసిర్ నండ్రె బమ్మ ఆతారె. ³⁴⁻³⁵ సుమెయోను వరిజ్ దీవిస్తాండ్రె, వన్ని అయేసి ఆతి మరియెజ్, "ఇస్రాయేలు లోకుర్ నండ్రెండ్రార్ నాననం అనివందిజ్, నండ్రెండ్రార్ బత్తిని వందిజ్ దేవుణు వినిజె ఏర్పాటు కితాన్. వీండ్రు దేవుణు ఏర్పాటు కితి ఉండ్రె గుర్తు. లోకుర్ అయక నెక్కు పార్కారె. ఆహి, వారు మన్నుదు విని వందిజ్ ఒడిబితికెజ్ వెల్లి ఆనె. అయక నీను సూణివెలె కూడం గుత్తి సాహి లెకెండ్రె నీ మన్నుదు దుకం వానాద్లె", ఇజి వెహ్సాన్. ³⁶⁻³⁷ నస్తవలె పనుయెలు గాడ్ని ఆతి అన్న ఇని ఉండ్రె ప్రవక్త మహాద్. అది ఆసిరు ఇని జాతిదు మనికాద్. అది పెండ్రె ఆజి ఏడు పంటెజ్ మాసి వెట బత్తితాద్. ఎనబయేనాల్గి పంటెజ్ దాక ముండ్రె మొప్ప మహాద్. అది నండ్రె డొక్ర ఆతాద్. దేవుణు గుడి: దాన్ ఎసెజ్బా డిస్ఎండ్ర, రెయు పాగాల్ ఉపాసదాన్ పార్దనమ్దాన్ దేవుణుదిజ్ పాగిడిజు మాడిసి మహాద్. ³⁸ ఆ గడియదునె, అది దేవుణు గుడి:దు యోసిపు, మరియు, యేసుబాన్ సాహదె దేవుణుదిజ్ పాగిడితాద్. యెరూసలేమ్ది లోకుర్ రోమ అతికారిజు అడిగి మహాన్. వారు వరిజ్ డిబిన్ని ఒరెన్ వన్నిజ్ ఎద్దు సుడొ:జి మహాన్. ఆహి ఎద్దు సుడొ:జి మహి వరివెట కొడొ:వందిజ్ వెహ్సాద్.

³⁹ యోసిపుని మరియు మోసె రాస్తెజ్ ప్రబు వెహ్సా రూలుజ్దు కిదెజ్ వెహ్సా మనికెజ్ విజా కితారె. కితి వెనుక, మహ్తారె గలీలయదు మని నజరేతు ఇని వరి పట్నమ్దు సాహార్. ⁴⁰ కొడొ: సత్తు దాన్ పిరితాన్. వన్నిజ్ నండ్రె బుద్ది మనాద్. దేవుణు వన్నిజ్ దీవిసిన్ మహాన్.

† నిర్గమ 13:2,12. †† లేవ 12:8.

యేసు పెద్దలిజవెట వర్గిజినాన్.

41 ఏంటు ఏంటు యేసు అయ్యేసి అపాసిర్ యెరూసలేమ్దు వస్సు † వండాయ్దిజ్ సాన్ని మహార్. 42 వారు ఏంటు సాన్ని మహి అలవాటువజ, యేసుజ్ వన్నెండు పంటజ్ మహివలె వండాయ్దిజ్ సాహార్.

43 వండాయ్ వీజితిజ్, వారు మర్జి వాజి మహార్. గాని కొడొః ఆతి యేసు యెరూసలేమ్దు నిహన్. వన్ని అయ్యేసి అప్పాసిర్ అయాక నెన్వతార్. 44 వీండ్రు మంద లోఇ మనాన్ ఇజి ఒడెబిజి, ఉండ్రీ రోజి వారు నడిజి వాతార్. వెనుక వారు వరి కూలెజబాన్ నెల్వ ఆతి వరిబాన్ వన్నిజ్ రెబాజినార్. 45 వాండ్రు తోర్ఇతిజ్, వన్నిజ్ రెబాజి యెరూసలేమ్దు మర్జి వాతార్. 46 మూండ్రీ దినమ్కుక వెనుక, వాండ్రు, దేవుణు గుడిడు బోద కినివరి నడిమి బస్తిక సుడెతార్. వాండ్రు వరి మాటెజ్ వెంజి, వరిజ్ మరి వెన్బాజి మహాన్. 47 వన్ని మాటెజ్ వెహికార్ విజెరె, వాండ్రు మహి వెహి మాటెజ వందిజ్, వన్ని బుద్ది వందిజ్ నండో బమ్మ ఆతార్. 48 వన్ని అయ్యేసి అపాసిర్ వన్నిజ్ సుడెతిజ్ నండో బమ్మ ఆతార్. వన్ని అయ్యేసి ఈహు వహ్లాద్ “నా మరిన్, నీను ఎందనిజ్ మజి ఈహు కితి? ఇదిలో నీ బుబ్బని నాను నండో బాద ఆజి నిజి రెబాజి వాతాప్”, ఇజి వహ్లాద్.

49 దనిజ్ వాండ్రు, “మీరు నజి ఎందనిజ్ రెబాతిదెర్. నాను నా బుబ్బి పణిదు మండ్రెజవలె ఇజి మీరు నెన్ఇదెరా?”, ఇజి వహ్లాన్. 50 గాని వాండ్రు వరిజ్ వెహి మాటెజ్ వారు అర్దం కివెతార్. 51 వెనుక వాండ్రు వరివెట సోతాండ్రె నజిరెతు వాతాన్. అబ్బె వరిజ్ లోజిజి మహాన్. వన్ని అయ్యేసి యా జగ్గిజిని విజా నజతిజ్ దని మన్నుదు ఇడ్డి మహాద్. 52 యేసు బుద్దిదు, వయుసుదు పిరితాన్. దేవుణు, లోకుర్ మరి మరి వన్నిజ్ ప్రీమిసి మహార్. వన్ని ముస్సు సర్ద ఆజి మహార్.

3 పాంతి పిలాతు ఇనికాన్యూదయ రాస్త్తం ఏలుబడిః కిజి మహాన్. హేరోదు గలిలయ రాస్త్తమ్దిజ్ అతికారి. హేరోదుజ్ తంబెరసిఆతి పిలుప్పు ఇతూరియని త్రకోసీతి రాస్త్తమ్కాజ్ అతికారి. అబిలేనే రాస్త్తమ్కాజ్ లునానియ అతికారి. అయావలె తిబెరియ కయిసరు ఇనికాన్ విరిజ్ విజెరె ముస్సు రాజు. వాండ్రు వదిహేసు పంటెజాణిజ్ విరిజ్ ఏలుబడిః కిజినె వాజినాన్. 2 అయావలె, అన్నని కయప పుజెరిజ ముస్సు పెరి పుజెరి. అయావలె బిడిమ్ బూమిదు, జెకరియ మరిసి ఆతి యోహాను వెట దేవుణు వర్గితాన్. 3 అందెజె వాండ్రు, “మీరు పావమ్కు డిసి బాప్తినం లాగె ఆదు. దేవుణు మీ పావమ్కు సెమిన్నాన్”, ఇజి యెర్దాను గడ్డ వడకాదు మన్ని ప్రాంతం విజా సాన్నిబోదిసి మహాన్. 4 యెసయ ప్రవక్త రాస్తివెలె విన్నివందిజ్ ఈహు వెహినాన్. “బిడిమ్ బూమిదు ఒరెన్ ఈహు డేల్లి వెహినాన్. “ప్రబుజ్ లోకుడగు వాడెజ్ సరినెగెన్ కిల. వన్నిజ్ నడిదెజ్ సరితినాజ్ కిదు. 5 విజా గాతెజ్ నిండ్రీసె. విజా గొరొకని మెటెజ్ బయలు కిల. వెకో సరిజ్ తినానికెజ్ కిల. కరుకు సరిజ్ సున్నజ్తికెజ్ కిల. 6 అయావలె విజెరె, దేవుణు వరిజ్ రక్సిన్ని దన్నివందిజ్ నూణారలె †”, ఇజి. ఆహె రాస్తిమహి లెకెండో యోహాను బోదిస్తాన్. 7 యోహాను వన్నిడగు బాప్తినం లాగెఅదెజ్ వాజిని మంద లోకురిజ్ ఈహు వహ్లాన్ “మీరు వినం మన్నిసరాన్ లెకెండో మన్నికెదెర్, దేవుణుబాణిజ్ కోపం వాజినాన్ ఇజి నమ్మిజి మీరు వాతిదెరా? సిల్లెద్. వన్ని కొవమ్దాన్ తప్పెఅదెజ్ ఇజి మీరువాతిదెరా? నిజమే అయలెకెండో ఇజి నాను ఒడిబిదెజ్ సిల్లెద్. 8 మీ పావమ్కు ఒప్పుకొడొఃజి డిసి సీజి దన్నిజ్ తగితి పణిజ్ కిజి తోరిస్తు. “మాపు అబ్రాహము తెగ్గాలికాప్”, ఇజి మీరు మీ మన్నుదు వర్గిమాట్. ఎందానిజ్ ఇహిజ, యా పణుకుబాణిజ్ అబహప్పుజ్ కొడొఃరిజ్ తయార్ కిదెజ్ దేవుణు అట్నాన్”, ఇజి నాను మిజి వెహిన్. 9 దేవుణు మరెక మొదొల్కత్తి విసీరెదెజ్ కియుదు గొడెలి అస్తి వన్నిజ్ పాలిత మనాన్. నెగ్గి పట్టు అసెఇ మరెకాజ్ విజా కత్తి సిసుద్ విసీరెనాన్”, ఇజి వహ్లాన్.

10 అయావలె లోకుర్ విజెరె, “అపొజి మాపు ఇనిక కిదెజ్?”, ఇజి వెన్బాతార్. 11 యోహాను వహ్లాన్, “రుండి సాకెజ్ మన్నికాన్ ఉండ్రీ నిలివన్నిజ్ సీదెజ్. అయలెకెండో టిండి మన్నికాన్ నిలివన్నిజ్ సీదెజ్”, ఇజి. 12 వన్ని పెర్నికార్బా బాప్తినం లాగె అదెజ్ వాతార్. వారు, “ఓ బోదకినికి, మాపు ఇనిక కిదెజ్?”, ఇజి వెన్బాతార్. 13 దనిజ్ వాండ్రు, “మిజి ఎసా లొస్తాజ్ ఆడ్ర నిత మనాదొ, ససా లొస్తు. నండో లొస్తాట్”, ఇజి వహ్లాన్. 14 నస్తివలె సెగొండార్ ఉద్దం కినికార్, “మాపు ఇనిక కిదెజ్?”, ఇజి వెన్బాతార్. అందెజె వాండ్రు, “బెద్రిసి ఎయెబాన్ డబ్బు డిబిస్నాట్. అనయం వెహి డబ్బు లొస్తాట్. మీ జీతం దానె సర్దు ఆదు”, ఇజి వహ్లాన్.

15 వీండ్రు క్రీస్తుసు ఇజి యోహాను వందిజ్ లోకుర్ విజెరె వరి మన్నుదు ఒడెబితార్. వారు ఆస దాన్ క్రీస్తుజ్ ఎర్దు సుడెజి మహార్. 16 అయావలె యోహాను వరిజ్ విజెరిజ్ వహ్లాన్, “నాను మిజి ఏరుదాన్ బాప్తినం సీజిని. నజి మిస్తి నండో పెరికాన్ మరి ఒరెన్ వాజినాన్. వన్ని జోడ్కు బేల్తు కుతెజ్ నాను ఏవటికాన్ ఆఎ. వాండ్రు మిజి దేవుణు ఆత్మదాన్ సిసుదాన్ బాప్తినం సీనాలె. 17 వాండ్రు గాలి ఇడెని సీహి కీదు అప్త మనాద్. వాండ్రు వన్నికలమ్దిజ్ సుబ్బరం కిజి, గింజెజ్ కొటు కిజి గాలి ఇడెజినాన్. గింజెజ్ గాదిద్ ఇడ్నాన్. పాటుదిజ్ నమ్మిజి సిసుదు సురనాన్. 18 యా మాటెజ్ అవండ, మరి నండో నజతిజ్ వెహి లోకురిజ్ పణిసి వహ్లాన్. సువార్త బోదిసి వహ్లాన్. 19 వాండ్రు హేరోదు ఇని అతికారిజ్ వహ్లాన్, వన్ని కొడొఃసి హేరోదియవెట హేరోదు పాపం కెత్తాన్ ఇజి. మరి, హేరోదు కితి విజా తప్పుజబా వహ్లాన్. 20 అందెజె వాండ్రు యోహానుజ్ జెలిదు ఇట్నాన్. ఆహె హేరోదు కితి విజా తప్పుజవెట యోహానుజ్ జెలిదు ఇడిస్తి తప్పుబా కూడితాద్.

యేసు బాప్తినం లాగెఆజినాన్

21 యోహానుజ్ జెలిదు ఇడ్డి ముజాల, ఉండ్రీ రోజి లోకుర్ విజెరె బాప్తినం లాగె ఆతార్. అయావలె యేసు బా బాప్తినం లాగె ఆతాన్. 22 వాండ్రు పార్దనం కిజి మహివలె, ఆగాసం రెయ్ ఆతాదె దేవుణు ఆత్మ ఉండ్రీ పార పాటిజ్ మూర్తి లెకెండో డిగ్జిజి వన్ని ముస్సు వాతాద్. అయావలె, “నీనె నాను ప్రీమిస్సి నా మరిన్. నీ వందిజ్ నాను నండో సర్ద ఆజిన”, ఇజి పరలోమ్దాన్ ఉండ్రీ జాటు వాతాద్.

23 యేసు వన్ని సేవణి మొదొల్లివెలె వన్నిజ్ డగ్గుదిజ్ ముప్పుయ్ పంటెజ్ వయ్సు మహాన్. వీండ్రు యోసేపు మరిన్నె ఇజి ఒడిబిజి మహార్. యోసేపు హెలి మరిసి 24 హెలి మత్తతు మరిసి మత్తతు లేవి మరిసి లేవి మెల్లి. మరిసి మెల్లి యన్న మరిసి యన్న యోసేపు మరిసి 25 యోసేపు మత్తతియ మరిసి మత్తతియ ఆమోసు మరిసి ఆమోసు నాహోము మరిసి నాహోము ఎస్తికి మరిసి ఎస్తికి నగ్గయ మరిసి 26 నగ్గయ మయతు మరిసి మయతు మత్తతియ మరిసి మత్తతియ సిమియ మరిసి సిమియ యేసెక మరిసి యేసెక యోదా మరిసి 27 యోదా యోహాను మరిసి యోహాను రేపా మరిసి రేపా జెరుబాబెలు మరిసి జెరుబాబెలు

† పులాజ్ సెల్లి రొబ్బెతయార్ కిజి తిని వండాయ్ వస్సు వండాయ్ †† యెసయ 40:3-5.

సయిల్తీయెలు మరిసి సయిల్తీయెలు నేరి మరిసి 28 నేరి మెల్కి మరిసి మెల్కి అది మరిసి అది కోసాము మరిసి కోసాము ఎల్కాదాము మరిసి ఎల్కాదాము ఏరు మరిసి 29 ఏరు యోహానవ మరిసి యోహానవ ఎలియెజరు మరిసి ఎలియెజరు యోరియ మరిసి యోరియ మత్తతు మరిసి మత్తతు లేబి మరిసి 30 లేబి సిమెను మరిసి సిమెను యూద మరిసి యూద యోసేపు మరిసి యోసేపు యోనాము మరిసి యోనాము ఎల్కాకిము మరిసి 31 ఎల్కాకిము మెలెయా మరిసి మెలెయా మేన్నా మరిసి మేన్నా మత్తతు మరిసి మత్తతు నాతాను మరిసి నాతాను దావీదు మరిసి 32 దావీదు, యెసయ మరిసి, యెసయ ఓబెదు మరిసి ఓబెదు బోయసు మరిసి బోయసు సల్కను మరిసి సల్కను నయస్సాను మరిసి 33 నయస్సాను అమ్మినాదబు మరిసి అమ్మినాదబు అరాము మరిసి అరాము ఎస్రాము మరిసి ఎస్రాము పెరెసు మరిసి పెరెసు యూదా మరిసి 34 యూదా యాకోబు మరిసి యాకోబు ఇసాకు మరిసి ఇసాకు అబ్రాహాము మరిసి అబ్రాహాము తేరహు మరిసి తేరహు నాహోరు మరిసి 35 నాహోరు సేరుగు మరిసి సేరుగు రయూకు మరిసి రయూకు పెలెగు మరిసి పెలెగు హెబెరు మరిసి హెబెరు సేలహు మరిసి 36 సేలహు కెయినాను మరిసి కెయినాను అర్చక్కుదు మరిసి అర్చక్కుదు సేము మరిసి సేము నోవహు మరిసి నోవహు లెమెకు మరిసి 37 లెమెకు మెతుసెలె మరిసి మెతుసెలె హనోకు మరిసి హనోకు యెరుదు మరిసి యెరుదు మహాలెలు మరిసి మహాలెలు కేయినాను మరిసి 38 కేయినాను ఎసోసు మరిసి ఎసోసు సేతు మరిసి సేతు ఆదాము మరిసి ఆదాము దేవుణు మరిసి.

యేసుజ్ వరిస కిజినాన్

4 యేసు దేవుణు ఆత్మదాన్ పూర్తి నిండితాండ్రె, యోర్దాన్ గడ్డదాన్ మర్జి వాతాన్. 2 నలవయ రోస్కు దేవుణు ఆత్మ వన్నిజ్ బిడిమ్ బూమిదు నడిపిస్తాన్. అబె, నయతాను వన్నిజ్ వరిస కిదెజ్ సుడెతాన్. వాండ్రు అయా రోస్కాజ్ ఇనికబా ఉణెంండ మహాన్, కడెవెరిదు వన్నిజ్ బజ కట్టాద్. 3 అయావలె సయ్తాన్, "సీను దేవుణు మరిసి ఇహిజ, యా పణుకు టిండి ఆని లెకెండ వోఅ", ఇజి వెప్తాన్. 4 అందెజె యేసు, "లోకు బత్కిజినక టిండిదానె ఆవద్ #", ఇజి దేవుణు మాటదు రాస్త మనాద్", ఇహాన్. 5-6 అయావలె నయతాన్ వన్నిజ్ ఎత్తు మని బాన్ ఒతండ్రె, లోకమ్దు మని విజా దేనమ్కు జామె తోరిస్తాన్. "యా లోకమ్ది అతికారం సంసారం, విజా నాను నిజి సీన. ఎందనిజ్ ఇహిజ అయాకెజ్ విజా నజినె దేవుణు ఒపజెప్త మనాన్. నజి ఇస్టం ఆతి ఎయెరిజ్బా సీదెజ్ నజి అక్కు మనాద్. 7 అందెజె సీను నజి పాగిడిజి మాడిస్తిజ, యాకెజ్ విజా సీవి ఆనె", ఇహాన్. 8 నస్తివలె యేసు, "సీను సీ దేవుణు ఆతి ప్రబుజ్నె పాగిడిజి మాడిసి, వన్నిజె సేవకిదెజ్ # ఇజి దేవుణు మాటదు రాస్త మనాద్", ఇజి మర్జి వెప్తాన్. 9 వెన్కా వన్నిజ్ యెరూసలెమ్దు కూక్ ఒత్తాండ్రె, దేవుణుగుడి: కోసాదు నిల్వ్తాండ్రె, "సీను దేవుణు మరిసి ఇహిజ ఇబ్బెణిజ్ అడిగి డాట్అ. 10-11 ఎందానిజ్ ఇహిజ, "నిజి నెగ్రెండ కాపాడెదెజ్ నీ వందిజ్ వన్ని దూతారిజ్ దేవుణు ఆడ్ర సీనాన్. నీ పాదం పణుకుదు తగ్గింండ వారు నిజి వరి కికాణిజ్ పెర్న అస్సార్ #, ఇజి దేవుణు మాటదు రాస్త మనాద్", ఇజి వన్నిజ్ వెప్తాన్ 12 అందెజె యేసు, "సీ దేవుణుఆతి ప్రబుజ్, పరిస కిదెజ్ ఆవద్ #", ఇజి దేవుణు మాటదు రాస్త మనాద్", ఇజి మర్జి వెప్తాన్. 13 నయతాన్ విజా పరిసెజ్ వీస్తాండ్రె సెగం కాలం వన్నిజ్ డిస్ససాహ మహాన్.

యేసు గలీలయదు వన్ని సేవణి మొద్లీనాన్

14 యేసు దేవుణు ఆత్మ సత్తుదాన్ గలీలయ ప్రాంతమ్దు మర్జి సాహాన్. అయా ప్రాంతం విజా వన్ని వందిజ్ మాటెజ్ సెద్రితె. 15 వాండ్రు యూదురి మీటిజ్ ఇల్కాజ్ నేరిపిస్తాన్. విజెరె వన్నిజ్ పాగిడితాన్.

యేసుజ్ నజరేతుదాన్ పేర్జినార్

16 వెనుక, వాండ్రు పిరితి వన్ని పట్నుమ్దు సాహాన్. అయాక నజరెతు. వన్ని అలవాటు వజ విస్తాంతి దినమ్దు యూదురి మీటిజ్ ఇండ్రె సాహాండ్రె దేవుణు మాట నద్విదెజ్ ఇజి నిహాన్. 17 మీటిజ్ ఇండ్రెణి పణిమణిసి వన్నిజ్ యెసయ ప్రవక్త రాస్తి పుస్తకం సితాన్. వాండ్రు అయాక రెక్తిజ్ ఈహు రాస్తి మనికెజ్ వన్నిజ్ దోహ్కాద్.

18-19 "ప్రబు ఫాక్తి దేవుణు ఆత్మ నావెట మనాన్. అందెజె వాండ్రు బీద ఆతి వరిజ్ సువార్త వెప్తాజ్ నజి ఏర్పాటు కితాన్. తోహా ఆతి వరిజ్, "మిజి విడుఃదల వాతాద్", ఇజి వెప్తాజ్, గుడ్డి వరిజ్, "మీ కణుకుజ్ తోరెనె", ఇజి వెప్తాజ్, నల్లితి వరిజ్ డి:సిస్సిజ్, దేవుణు వన్ని లోకురిజ్ రక్సిస్సికాలం వాతాద్ ఇజి వెప్తాజ్ వాండ్రు నజి ఫాక్త మనాన్ #", ఇజి రాస్తి మనికెజ్ వన్నిజ్ దోహ్కాద్. 20 యాకెజ్ నద్విజి, పుస్తకం మూక్తాండ్రె పణిమణిసిజ్ మహ్తా సితండ్రె బస్తాన్. మీటిజ్ ఇండ్రె మహికార్ విజెరె వన్నిజ్ డిట బేస్తార్. 21 వాండ్రు వరిజ్, "ఏలు నాను నద్వితి దేవుణు మాటెజ్ మీరు వెహివెలెనె అయాక పూర్తి ఆతె", ఇజి వెప్తాన్. 22 వారు విజెరె వన్ని వందిజ్ నెగ్గెజ్ వెప్తాన్. వన్ని వెయ్దాన్ వాతి నెగ్గి మాటెజ్ బమ్మ ఆజి, "వీండ్రు యోసేపు మరిసి గదె?", ఇజి వెప్తాన్.

23 యేసు వరిజ్ వెప్తాన్, "ఓ గురు, నిజి సీనె నెగెణ్ కిబ్బె ఆఅ", ఇని బుద్ది మాట మీరు తవ్విండ నజి వెహ్నాదెర్. మరి, మీరు నజి, 'సీను కపర్నహోము ఇని పట్నుమ్దు కిత్తి పణిజ్ మాపు వెహ్. అయా పణిజ్ ఇబ్బె నీ సాంత పట్నుమ్దుబా కిల', ఇజి వెహ్నాదెర్. 24 ఎమేణి ప్రవక్తెజ్ బా సాంత పట్నుమ్దు లోకుర్ గవరం సివర్, ఇజి నిజం నాను మీ వెట వెహ్సిన. 25 వెండ్రు, ఏలియ దినమ్కాజ్, ఇస్రాయేలు దేనమ్దు మూండ్రె పంటెజ్ ఆరు నెలెజ్ దాక పిరు రవండ మహాద్. గొప్ప కరు వాతివలె, అబె నండ్రె రాండి బోదెక్ మహా ఇనిక నిజమ్నె. 26 గాని, దేవుణు ఏలియెజ్ వరి ఎయెర్బాన్బా ఫాక్ఎతాన్. సీదోను ప్రాంతమ్ది సారెపాతు ఇని నాటోణి రాండి బోదెలిబానె ఫాక్సాన్. 27 అయాలెకెండ, ఏలిసా ప్రవక్త కాలమ్దు, ఇస్రాయేలు దేనమ్దు నండ్రెండ్రె పెరికస్టం దాన్ మహాన్. గాని వారు ఎయెర్బా నెగెణ్ ఆవతార్. సిరియ దేనమ్దు మని నయమాన్ ఒరెండ్రె నెగెణ్ ఆతాన్", ఇజి నాను మిజి వెహ్సిన. ఇజి యేసు వెప్తాన్.

28 యా మాటెజ్ వెహివలె, యూదురి మీటిజ్ ఇండ్రె మహికార్ విజెరె వెరి కోపం ఆతార్ 29 వారు నిహారె, పట్నుమ్దాన్ వన్నిజ్ పేర్తార్. వారు వన్నిజ్ మెటుదు ఒతార్. వరి పట్నుం అయా మెటుద్నె తయార్ కిత మనాద్. గడియ బుర్త కిజి వన్నిజ్ అర్వెజ్ ఇజి ఒతార్. 30 గాని మంది నడిమిజానె, వన్నిసరి వాండ్రు సాహాన్.

† ద్వితి 8:3. †† ద్వితి 6:13. ‡ కీర్తన 91:11-12. †† ద్వితి 6:16. †† యెసయ 61:1-2.

యేసు దెయ్యముదొంగి పీఠానాన్

31 వెన్నా వాండ్రు గలిలియతి కపెర్నహము ఇని పట్నముదు వాతాన్. విస్త్రాంతి దినముదు యూదురి మీటిజ్ ఇండ్రొ బస్త్రాండ్రె లోకురిజ్ నేకొపిని మహాన్. 32 వాండ్రు నెన్పిన్చి మాటెజ్ వెహరె, లోకుర్ నండొ బమ్మ అతార్. ఎందనిజ్ ఇహిజ, నండొ అతికారం దాన్ వాండ్రు వెహన్. 33-34 యూదురి మీటిజ్ ఇండ్రొ, ఒరెన్ దెయం అస్తికాన్ మహాన్. వాండ్రు, “నజరెతు వాండ్రు ఆతి యేసువా, మా వెట నిజి ఇని పణి? మజి నాననం కిదెజ్ వాతిదా? నీను ఎయిదొ ఇజి నాను నెన్న. నీను దేవుణు బాణిజ్ వాతి నెగ్గి వాండ్రు”, ఇజి డటం గగోల్ ఆజి వెహన్. 35 అందెజె యేసు, “అలెజి మన్ల. వినిజ్ డిసి వెల్లి రల”, ఇజి డటం అయా దెయ్యముదొంగి వెహన్. నస్తివలె అయా దెయం, అది అస్తి వన్నిజ్, వరి విజెరె నడిఃమి అర్హాదె వన్నిజ్ ఇని నస్టం కిఎండ డిఃస్ట సాహద్. 36 అయావలె లోకుర్ విజెరె నండొ బమ్మ అతార్. “అబ్బ, యాక ఎసాహి మాట. వీండ్రు దేవుణు సత్తుదాన్, అతికారముదాన్ సాన్ల ఇజి దెయ్యముకాజ్ వెహిసాన్. అవి డిసి సాన్నినె”, ఇజి ఒరెన్దిజ్ ఒరెన్ వర్గితార్. 37 వన్ని వందిజ్ మాటెజ్ అయా ప్రాంతముదు విజా సెద్రితె.

యేసు నండొండారిజ్ నెగెండ కిజినాన్

38 యేసు యూదురి మీటిజ్ ఇండ్రొణాజ్ నిజితండ్రె, సిమెనును వన్ని ఇండ్రొ సాహన్. అయావలె వన్ని మీమిని నండొ నోబు దాన్ మహాద్. దనిజ్ నెగెన్ కిల ఇజి వారు బతిమాలతార్. 39 అందెజె వాండ్రు దని డగ్రు సాహండ్రె, “నోబు సాన్ల”, ఇజి డటం వెహన్. డటం వెహిజ్ నోబు దనిజ్ డిఃస్ట సాహద్. వెటనె అది నిజితాదె, వరిజ్ మర్యాద కితాద్.

40 పాదు అర్చి మహాద్. అయావలె లోకుర్ నండొ రకమ్కాణిజ్ బాద ఆజి మహి వరిజ్ విజెరిజ్ వన్ని డగ్రు తతార్. కస్టముదాన్ మహి వరి విజెరె ముస్సు కికు ఇడ్డి వరిజ్ నెగెన్ కితాన్. 41 యాకదె ఆవండ, నండొ దెయ్యముకు, నీనె దేవుణు మరిసి, ఇజి గగోల్ ఆజి నండొండారిజ్ డిఃస్ట సాహి. వాండ్రు అలెజి మండ్రు ఇజి వన్కాజ్ డటం వెహన్. వాండ్రు క్రీస్తు ఇజి దెయ్యముకు నెన్న మహి. అందెజె వాండ్రు వన్కాజ్ వర్గిండ కితాన్.

42 పెందాలె వాండ్రు సాతాండ్రె బిడిఃమ్ బూమిదు సాహన్. లోకుర్ వన్నిజ్ రెబాజి వాతార్. వన్నిజ్ సుడఃతిజ్ వాండ్రు వరిజ్ డిసి సాన్ఎండ, వన్నిజ్ ఆప్ కిదెజ్ సుడఃతార్. 43 గాని వాండ్రు, “నాను మహి పట్నముకాజ్ బా దేవుణు ఏలుబడిః కిని కాలం వందిజ్ సువార్ల వెహిజ్వలె. దిని వందిజ్ దేవుణు నజి పాక్తాన్”, ఇజి వరిజ్ వెహన్. 44 వెన్నా వాండ్రు యూదయ దేనముదు మని యూదురి మీటిజ్ ఇల్కాజ్ బోదిసి మహాన్.

యేసు సిసూరిజ్ కూక్కినాన్

5 ఉండ్రె రోజా, యేసు గనెనరెతు సెరుడగ్రు నిహమహాన్. నండొ లోకుర్ దేవుణు మాటెజ్ వెండ్రెజ్ నెకెఆజి వన్ని ముస్సు అర్చి మహాన్. 2 నస్తివలె జాలెరిబు సెరు దరిద్ డిఃస్టి మహి రుండి డోణిజ్ వాండ్రు సుడఃతాన్. అయా జాలెరిబు వరి వల్లెజ్ నొరెజి మహాన్. 3 వాండ్రు దని లోఇ ఉండ్రె డోణిద్ ఎక్తాన్. ఆక సిమెనుతి. ఎక్తాండ్రె దరిదాన్ కండెక్ నెక్తు ఇజి వన్నిజ్ వెహన్. వాండ్రు డోణిద్ బస్త్రాండ్రె నండొ లోకాజ్ నెస్సిని మహాన్. 4 వాండ్రు వెహి వీజితివలె, సిమోనుజ్, “ఏరు నిరి మని బాన్ డోణి నడిఃపిన్ల. మెయెజ్ అస్తిజ్ మీ వల్లెజ్ వీసీర్తు”, ఇహాన్. 5 అందెజె సిమెను, “ఓ బోదకినికి, రెయు విజా మాపు అరల ఆతాప్. గాని మజి ఇనికబా దొహ్యుతె. అహిజ్బా నీను వెహిని మాట వజ వల్లెజ్ పాక్తా”, ఇజి వన్నిజ్ వెహన్. 6 వారు అయాలెకండ కితార్. నండొ మెయెజ్ అస్తార్. వరివల్లెజ్ కింజిని వజ ఆతె. 7 అయావలె వారు వేరె డోణిద్ మని, వరి జత్త కూడఃజి పణికిని వరిజ్, “వాజి మజి తోడుః కిదు”, ఇజి కియు సయన కితార్. వారు వాతారె, రుండి డోణిజ్ మెయెజ్ నిహార్. డోణిజ్ ముడుగ్గిలెకండ ఆతె. 8 సిమోను ఇని పేతురు యాక సుడఃతాండ్రె, యేసు కాల్యు ఎద్రు ముణుకుజ్ ఊరితండ్రె, “ప్రబువా, నజి డిసి సాన్ల, నాను పావం కితికాన్”, ఇజి వెహన్. 9 ఎందానిజ్ ఇహిజ, వాండ్రుని వన్నివెట మనికార్ విజెరె వారు అస్తి యా మెయెజ్ కొట్టు సుడఃతారె నండొ బమ్మ అతార్. 10 అయాలెకండెనె, సిమోనువెట కూడఃజి పణి కిని యాకోబు ని యాహానుబా బమ్మ అతార్. వారు జెబదయ మరిసిర్. అందెజె యేసు, “తియెల్ఆమా. నిసా కాలం నీను మెయెజ్ అస్తి పణికితి. ఏలు లోకాజ్ నా సిసూరికిదెజ్ నెన్పిన్నాలె”, ఇజి సిమోనుజ్ వెహన్. 11 వారు వరి డోణిజ్ సెరు ఒడ్డుదు తతారె, విజా డిఃస్టారె. వన్నివెట సాహాన్.

కస్టురోగం ఆతివన్నిజ్ నెగెండ కిజినాన్

12 యేసు ఉండ్రె పట్నముదు మహివలె కస్టురోగం † ఇనిపెరి జబ్బు లాపుఆతి ఒరెన్ అబ్బె మహాన్. వాండ్రు యేసుజ్ సుడఃతివలె ముణుకుజ్ ఊర్జి మాడిఃస్తాండ్రె, “ప్రబువా, నాను నెగెండ ఆదెజ్ ఇజి నిజి మన్ను మహిజ నజి నెగెన్ కిదెజ్ అట్టి”, ఇజి బతిమాలతాన్. 13 అందెజె యేసు వన్నికెయు సాప్చి వన్నిజ్ ముట్టి, “నజి మన్ను మనాద్, నీను నెగెన్ ఆల”, ఇజి వెహన్. వెటనె వన్నిజ్ మహి అయా కస్టురోగం వన్నిజ్ డిఃస్తాద్. 14 యేసు వన్నిజ్, “ఎయె వెటబా ఇనికబా వెహ్య. గాని నీను తినాజ్ సాన్ని నీ ఒడోల్ పుజెరిజ్ తోరిన్ల. నీను నెగెన్ ఆతి వందిజ్ మోసె ముజాలె ఆడ్రసితి వజ దేవుణుదిజ్ సంత సిల. ఆహా నీను నెగెన్ ఆతి ఇజి లోకురిజ్ తోరిన్ల”, ఇజి కసితం వెహా పాక్తాన్. 15 గాని వన్ని వందిజ్ మాటెజ్ మరి ఒదె, నాహ్యుజ్ విజా సెద్రితె. అందెజె నండొ లోకుర్ వన్నిమాటెజ్ వెండ్రెజ్, వరి కస్టుమాణిజ్ నెగెన్ ఆదెజ్ ఇజి వన్నిడగ్రు కూడఃజి వాజి మహాన్. 16 గాని వాండ్రు, నడిఃమి నడిఃమి పార్దనం కిదెజ్ ఇజి ఎయెర్ సిల్లి బాడిఃదు సాన్ని మనాన్.

† కిక్కాజ్ పాదముకాజ్ డిఃస్టిజ్ తెవ్జి సాని పెరిజబ్బునె ముజాలె కస్టురోగం జబ్బు వాతిబాన్ ముట్టిజ వారు నెన్పిర్ ముజాలె కస్టురోగం మన్నికార్ నాటొ మండ్రెజ్ అక్కుసిల్లెద్ వారు పట్నం వెల్లి మండ్రెజ్ వారు సుబ్బరం ఆకాన్ మటిలె అతికారెజెనె ఒడిఃబినార్ అందెజె, వారుపుజెరిజ డగ్రు సాన్నినెగెండ అతార్ ఇజి పుజెరిబు వెహిజానె నాటొ వాదెజ్ ఆనాద్. అయవలె వారు సుబ్బరం ఆతమనార్ ఇజినె నమకం

కిక్కు, కాల్కు, అర్చివన్నిజ్ నెగెండ్ కిజినాన్.

17 ఉండ్రీ నాండీజ్, యేసు ఉండ్రీ ఇండ్రొబసి బోదిసి మహాన్. గలీలయ, యూద దేనమ్దు మన్ని విజా నాహ్కాణిజ్, యెరూసలెమ్దాన్ వాతి పరిసయ్రుని యూదురి రూలు నెస్పిస్సికార్ అబ్బె బసి వెంజి మహార్. కష్టమ్దు మన్నివరిజ్ నెగెన్ కిదెజ్ దేవుణునిత్తి సత్తు వన్నివెట మనాద్. 18 నస్తివలె, కిక్కు, కాల్కు, అర్చి వక్నవాయు ఇని జబ్బుది వన్నిజ్, సెగొండార్ ఉండ్రీ సాపాద్ పిండిత తత్తార్. లోఇబసి యేసు ఎర్దు ఇడదెజ్ నండొ అర్ల ఆజి మహార్. 19 అబ్బె మందలోకుర్ మహిజ్, వన్నిజ్ యేసు డగ్రు ఒతెజ్ అట్వెతార్. అందెజె వారు వన్నిజ్ ఇల్లు ముస్సు, ఒత్తార్. ఒత్తార్, రేకం బొరొ కితారె సాపాదాన్ మంద నడిమి యేసు ఎర్దు డిప్తార్. 20 యేసు వన్నిముస్సు, మన్ని వరి నమకం సుడేతాండ్రె, "కూలాయెన్, నీ పావమ్కు నాను సెమిస్త మన్న", ఇజి వన్నిజ్ వెప్తాన్. 21 అయావలె పరిసయ్రుని ని యూదురి రూలుజ్ నెస్పిస్సికార్ వరి లోఇ ఈహు వర్గితార్. "పిండ్తు ఎయెన్? నాను నీ పావమ్కు సెమిస్త మన్న ఇజి వెప్సి దేవుణు వెట సమానం ఆజి దేవుణుదిజ్ దూసిస్నాన్. దేవుణు ఒరెండ్రె పావమ్కు సెమిస్సికాన్ గదె", ఇజి.

22 వారు ఒడేబితిక యేసుజ్ తెలితాద్. వాండ్రు వరిజ్, "ఎందనిజ్ మీరు అహు మీ మన్నుదు ఒడేబిజినిదెర్? 23 యా జబ్బుది వన్నిజ్ నీ పావమ్కు నాను సెమిస్త మన్న ఇజి వెప్సిక సులునా? నీను నిజ్జి నడియ ఇజి వెప్సిక సులునా? 24 లోకు మరిసి ఆతి నజి లోకు పావమ్కు సెమిస్తజ్ బూమి ముస్సు అతికారం మనాద్ ఇజి మీరు నెస్తిజ్వలె ఇజి వెప్తాండ్రె, అయా కిక్కు కాల్కు అర్చి వక్నవాయు వన్నిజ్, "నాను నిజి వెప్సి, నిజ్జి సావ అసి ఇండ్రొ సాన్అ", ఇజి వెప్తాన్. 25 వెటనె వాండ్రు విజెరె ముజాలె నిజితండ్రె, వాండ్రు గూర్తి మని సావ నిక్తాండ్రె దేవుణుదిజ్ పాగ్డిజి ఇండ్రొ సాహాన్. 26 వారు విజెరె నండొ బమ్మ ఆత్తారె, దేవుణుదిజ్ పాగిడితార్. వారు దేవుణుదిజ్ నండొ తియెల్ ఆజి, "అబ్బ! మాటు నేండ్రు నండొ బమ్మ అతి వణిజ్ సుడేతాట్", ఇజి వెప్తార్.

లేవి ఇన్ని ఒరెన్వన్నిజ్ కూక్సినాన్

27 యాక కిత్తి వెన్కా, యేసు సాతాండ్రె, లేవి ఇని ఒరెన్ వన్ను పెర్చివన్నిజ్ సుడేతాన్. వాండ్రు వన్ను పెర్చి వరి ఆపిసుదు బస్త మహాన్. యేసు వన్నిజ్, "నీను నా సిసూడు ఆల. నా వెట రల", ఇజి వెప్తాన్. 28 లేవి విజా డిస్తాండ్రె, నిజ్జి వన్ని వెట సాహాన్. 29 వెనుక లేవి యేసు వందిజ్ వన్ని ఇండ్రొ ఉండ్రీ పెరి విందు కితాన్. వన్ను పెర్చికార్ని మరి నండొండార్ వరి వెట ఉండ్రెజ్బస్తార్. 30 అయావలె పరిసయ్రుని ని వరి జబుద్ మని యూదురి రూలుజ్ నెస్పిస్సికార్ యేసు సిసూరిజ్, "ఎందనిజ్ మీరు వన్నుపెర్చివరివెట, మరి సెఇ వరివెట ఉణిజి తింజినిదెర్", ఇజి మొరొ ఆత్తార్.

31 అందెజె యేసు వరిజ్, "నెగెండ్ సిల్లి వరిజె డాక్టరు కావాలి. నెగెండ్ మన్నివరిజ్ ఎందనిజ్లు మరి డాక్టరు. 32 నాను పావం కిజిని వరిజ్ కూక్సి, వరి పావమ్కు వారు ఒప్పుకోడిజి డిస్పిసిని వందిజ్ వాత మన్న. మాపు నీతినిజాయితి మనికాప్ ఇజి ఒడేబిని వరిజ్ కూక్జె రవ", ఇజి వెప్తాన్.

ఉపాస్వందిజ్ యేసుజ్ వెన్బాజినార్

33 అయావలె, పరిసయ్రుని వరి జబుద్మని యూదురి రూలు నెస్పిస్సికార్ వన్నిజ్, "యాహాను సిసూర్ డిసిడిస్ఎండ ఉపాస్ కిజి పార్దనం కిజినార్. అయలెకెండెన్ పరిసయ్రుని సిసూర్బా. గాని నీ సిసూర్ ఉణిజి తింజి మంజినార్", ఇజి వెప్తార్. 34 అందెజె యేసు, "పిండ్లి దజడె పెండ్లి కూలెజవెట మన్నివెలె వారు ఉపాస్ కిజినారా? 35 పెండ్లి దజడెజ్ వరి నడిమిహాన్ ఒని రోస్సు, వానెలె. అయావలె వారు ఉపాస్ అయా రోస్కాజ్ మంజినార్", ఇజి వెప్తాన్.

36 వాండ్రు వరిజ్ కతవజ ఉండ్రీ నెస్పిస్తాన్. "ఎయెన్బా కొత్త సాక్కుదాన్ ఉండ్రీ ముక్కు కిసి వడాఁయి దనిజ్ పాక్ఎన్. అయాలెకెండె కితిజ, వాండ్రు కొత్త సాక్కు కిసిపిస్తాన్. కింజితి కొత్త ముక్కు వడాఁయి దనిజ్ తగ్గవద్. 37 మరి, ఎయెన్బా కొత్త ద్రాక్కుకల్లు వడాఁయి తోలు సన్నిదు వాక్ఎన్. అయాలెకెండె వాండ్రు వాక్తిజ కొత్త ద్రాక్కుకల్లు పాబువాజి అయా తోలుసన్ని పెడెల్నాద్. ద్రాక్కుకల్లు విజా వాజ్న సానాద్. సన్నిపాడానాద్. 38 అందెజె కొత్త ద్రాక్కుకల్లు కొత్త తోలు సన్నిదు వాక్జెవెలె. 39 ఎయెన్బా వడాఁయి ద్రాక్కుకల్లు ఉటివెనక కొత్తక కోరిఎన్. ఎందానిజ్ ఇహిజ, 'పడాఁయి కెగ్గి', ఇజి వెప్తాన్".

6 ఉండ్రీ విస్తాంతి దినమ్దు యేసుని వన్ని సిసూర్వంట గుడ్డెదాన్ సాన్ని మహార్. అయావలె వన్ని సిసూర్ సెరెక్ తెస్తారె, వరికిదాన్ నులుసి, తింజి మహార్.

2 నస్తివలె సెగొండార్ పరిసయ్రు, "ఎందనిజ్ మీరు దేవుణు మోసెజ్ సీతి రూలుజ్ తస్సినివణి విస్తాంతి దినమ్దు కిజినిదెర్?", ఇజి వెన్బాతార్.

3 అయావలె యేసు, "దావీదురాజుని వన్నివెట మహికార్, బజ కట్టివెలె, ఇనిక కితాండ్రె ఇజి మీరు దేవుణుమాటదు ఎసెజ్బా నద్విఇతిదెరా? 4 వాండ్రు ఇనిక కితాన్ ఇహిజ, దేవుణుగుడిఁదు డుగితాండ్రె దేవుణు ఎర్దు ఇడ్డి రొట్టెజ్ లాగితండ్రె తిహాన్. పుజెరిజ్ తప్ప మరి ఎయెర్బా అయాకెజ్ తిండ్రెజ్ ఆవద్. గాని వాండ్రు తిహండ్రె వన్నివెట మన్నివరిజ్బా సిత్తాన్. 5 అందెజె లోకుమరిసి ఆతి నజి విజా వన్నాజ్ ముస్సు అతికారం మనాద్. మరి, విస్తాంతి దినమ్దు ఇనిక కిదెజ్ ఇజి లోకాజ్ వెప్తాజ్బా అతికారం మనాద్", ఇజి వరిజ్ వెప్తాన్. 6 ఉండ్రీ నాండీజ్ విస్తాంతి దినమ్దు, యూదురి మీటిజ్ కిని ఇండ్రొ సాహాండ్రె, నెస్పిసి మహాన్. అబ్బె ఉజెర్ కియు అర్చికాన్ ఒరెన్ మహాన్. 7 పరిసయ్రుని ని యూదురి రూలుజ్ నెస్పిస్సికార్, యేసుజ్ ఇన్ని దనిజ్బా నేరం మొప్పెజ్ ఇజి సుడేజి మహార్. అందెజె, యేసు యా జబుది వన్నిజ్ విస్తాంతి దినమ్దు నెగెన్ కిరాండ్రె ఇజి బాగ సుడేజి మహార్. 8 అహిజ, యేసు వారు ఒడేబిజినిక నెస్తాండ్రె, కియు అర్చి వన్నిజ్, "నీను వాజి విజెరె నడిమి నిల్అ", ఇజి వెప్తాన్. అయావలె వాండ్రు నిజితండ్రె అబ్బెనిహాన్. 9 అయావలె యేసు వరిజ్, "నాను మిజి వెన్బాజిన, దేవుణు మోసెజ్ సీతి రూలుజ్ వజ, విస్తాంతి దినమ్దు నెగ్గి వణిజ్ కిదెజా, సెఇ వణిజ్వణి కిదెజా? పాణమ్దిజ్ నిల్పెజా, పాణమ్దిజ్ అర్పెజా?", ఇజి వెన్బాతాన్.

10 వెన్బాతాండ్రె వరిజ్ విజెరిజ్ బస్తాండ్రె, అయా కియు అర్చి వన్నిజ్, "నీ కియు నవఅ", ఇజి వెప్తాన్. వాండ్రు ఆహె కితాన్. వన్ని కియు నెగెన్ ఆతాన్.

11 అయావలె వారు వెర్చి కోవమ్దాన్ నిండ్రెతారె, యేసుజ్ ఇనిక కిదెజ్ అనాద్ ఇజి ఒరెన్దిజ్ ఒరెన్ వర్చెతార్.

వన్నెండు మణిసిర్ సిసూర్

12 ఆ దినమ్కాజ్ ఉండ్రీ నాండిజ్ యేసు పార్దనం కిదెజ్ ఇజి గొరొత్ సాహాన్. సాహాండ్రె ఆ రెయ్య విజా దేవుణుదిజ్ పార్దనం కిత్తాన్. 13 పెందాల్ అతివెలె వాండ్రు వన్ని సిసూర్జ కూక్తాండ్రె, పరిలోఇ వన్నెండు మణిరిజ్ ఏర్పాటు కిత్తాన్. పరిజ్ అపాస్తుడు ఇజి కూక్తాన్. 14-16 వీరు ఎయెర్ ఇహిజ, పేతురు ఇజి వాండ్రు పేరు ఇడ్రి సిమెను, వన్ని తంబెర్ని అతి ఆంద్రెయ, యాకోబు, యోహాను, పిలిపు, బర్దలోమాయి, మత్తాయి, తోమా, అల్పాయి మరిసి అతి యాకోబు, యూదయ దేసం వందిజ్ ఉసార్ అజిని సిమోను †, యాకోబుజ్ మరిసి అతి యూద, ఇస్కరియెతు యూద. యా ఇస్కరియెతు యుదనె, వెన్నా యేసుజ్ యూదురు అతికారిజ కీదు ఒపజెప్పికాన్.

17 వాండ్రు యా వన్నెండు మణిసిర్ సిసూర్వెట డిగిజి వాతండ్రె, ఉండ్రీ బయిలుదు నిహాన్. వన్ని సిసూరు నండొండార్, యూదయ దేసమ్దు మని విజా నాహ్కణికార్, యెరూసలెమ్దాన్, సమ్దరం వడఃకాద్మని తూరు, సీదొను పట్టుమ ప్రాంతమ్కాజ్వాతి నండొ లోకుర్ అబె మహార్. వారు వన్ని మాటజ్ వెండ్రెజ్, పరిజ్ మన్ని కష్టమ్కు సాన్పె ఆదెజ్ ఇజి వాతార్. 18 దెయమ్కు అస్తి నండొ బాద ఆజి మహికార్ నెగెణ్ ఆతార్. 19 దేవుణు సత్తు వన్నిబాణిజ్ వాజి విజెరె నెగెణ్ ఆజి మహార్. అందెజె లోకు విజెరె వన్నిజ్ ముట్టెజ్ ఇజి ఆన ఆతార్. 20 అయావలె వాండ్రు వన్ని సిసూర్జ సుడఃతాండ్రె, ఈహు వెప్పినాన్. "బీదదికార్ అతి మీరు గొప్ప వారు. ఎందనిజ్ ఇహిజ, దేవుణు మిజి ఏలుబడిః కిజినాన్. 21 ఏలు బజ సాజిని మీరు గొప్ప వారు. ఎందనిజ్ ఇహిజ, దేవుణు మిజి కావాలస్తికెజ్ మీ మన్ను నిండ్రు సీనాన్. యేలు అడఃబాజిని మీరు గొప్ప వారు. ఎందనిజ్ ఇహిజ, మీరు సిక్కిదెర్. 22 లోకు మరిసి అతి నజి నమ్మితి వందిజ్ లోకుర్ మిజి దూసిసి కేట కినార్. నిందెజ్ ముప్పి సీను సెక ఇజి వెప్పె నెక్కు పాక్కార్. అయావలె మీరు గొప్ప వారు. 23 నిన్ని కష్టమ్కు వానివలె నెర్ద ఆజి డాట్తు. ఎందనిజ్ ఇహిజ, దేవుణు మంజిని బాడిఃదు మిజి వన్ని పలితమ్కు గొప్ప నండొ మనె. యా లెకెండెనె, మిజి బాద కిజిని విరి అనిసిర్, పరి కాలమ్దు మహి ప్రవక్తె బాద్ద కిత్తార్. 24 గాని, ఓ అస్తిమనికిదెరా, అబాయా మిజి ఎసా గొప్ప బాదెజ్ వానెలె. ఎందనిజ్ ఇహిజ, మిజి విజా సుకం దొహ్క మనాద్.

25 ఏలు పాట వంజా ఉణిజినికిదెరె, అబాయా మిజి ఎసా గొప్ప బాదెజ్ వానెలె. మీరు బజ సానిదెరెలె. యేలు సిక్కినికిదెరె. అబాయా మిజి ఎసా గొప్ప బాదెజ్ వానెలె. మీరు దుకం కిజి అడఃబానిదెరెలె.

26 లోకు విజెరె మీ వందిజ్ నెగ్గికెజ్ వెప్పి వెలె, అబాయా మిజి ఎసా గొప్ప బాదెజ్ వానెలె. ఎందనిజ్ అయలెకెండెనె పరి అనిసిర్ అబద్దం వర్గిని ప్రవక్తెబా కిత్తార్.

ప్రేమ వందిజ్ వెప్పినాన్

27 నా మాటెజ్ వెంజిని మిజి నాను వెప్పిన, మీ పగాతివరిజ్ ప్రేమిస్తు. మిజి దూసిప్పివరిజ్ నెగ్గికెజ్ కిదు. 28 మిజి సాయెమ్ సీని వరిజ్, "దేవుణు మిజి నెగ్గికెజ్ సిప్పిన్", ఇజి దీవిస్తు. మిజి బాదెజ్ కిని పరి వందిజ్ పార్దనం కిదు. 29 ఎయెన్బా మిజి ఉండ్రీ లెపాద్ డెయితిజ, మరి ఉండ్రీ లెప బా తోరిస్తు. ఎయెన్బా మీరు వడఃగితి మని సాల్వ ఒతిజ, వన్నిజ్ మీ సాక్కుబా సిఅ. 30 మిజి లొస్సివరిజ్ విజెరిజ్ సీదు. మీ సాంతతిక పెర్రి ఒసిని వరిజ్ ఆక మరి లొస్మాట్. 31 లోకుర్ మిజి ఎలాగ కిదెజ్ ఇజి మీరు కోరిజినిదెరె అయాలెకెండె మీరు వరిజ్ కిదు.

32 మిజి ప్రేమిస్సివరిజె మీరు ప్రేమిస్తిజ, దేవుణు మిజి ఇనాయం సీనాన్ ఇజి ఒడిఃబిజినిదెరా? పాపం కినికార్బా వరిజ్ ప్రేమిస్సి వరిజ్ ప్రేమిస్తి. 33 మిజి నెగ్గికెజ్ కినివరిజె మీరు నెగ్గికెజ్ కితిజ, దేవుణు మిజి ఇనాయం సీనాన్ ఇజి ఒడిఃబిజినిదెరా? పాపం కినికార్బా ఆహె కిజినార్. 34 అప్పు మర్జి సీనార్ ఇజి నెస్సివరిజె మీరు సితిజ, దేవుణు మిజి ఇనాయం సీనాన్ ఇజి ఒడిఃబిజినిదెరా? పాపం కినికార్బా ఆహె కిజినార్. వారు సితికెజ్ విజా మర్జి సీనార్ ఇజి ఒడిఃబిజి పాపం కిజిని వరిజ్ సీజినార్. 35 గాని మీరు మీ పగ్ అతి వరిజ్ ప్రేమిస్తు. వరిజ్ నెగ్గికెజ్ కిదు. మర్జి సీనార్ ఇజి ఆన సిల్లెండ, అప్పు సీదు. అయావలె మిజి నండొ ఇనాయమ్కు ఆనెలె. మీరు విజా దనిజ్ అతికారం మని దేవుణు మరిసిర్ ఆనిదెరె. ఇహిజ, మీరు వాండ్రు కినిలెకెండె కినిదెరె. ఎందనిజ్ ఇహిజ, దేవుణు మేలుదిజ్ నెన్ఇవరిజ్బా సెఇ వణిజ్ కిని వరిజ్బా దయ తోరిస్సాన్. 36 మీ బుబ్బ అతి దేవుణు ఎలాగ కనికారం అతికాండ్రె అయావజ మీరుబా మండ్రు.

తీర్పు కిదెజ్ అవద్

37 ఒరెన్ వన్ని ముస్సు వెహ్మాట్. అయ లెకెండె దేవుణు మీ ముస్సు వెహ్మాన్. లోకు కిని వన్కాజ్ మీరు తీర్పు కిమాట్. అయాలెకెండె మీ ముస్సు దేవుణు తీర్పు కివెన్. లోకుర్ మిజి బాదెజ్ కితిజ, మీరు మర్జి కిపిండ వరిజ్ డిఃస్తు. అయాలెకెండె దేవుణు మిజి డిఃస్సాన్లె. 38 మహి వరిజ్ సీదు. దేవుణు మిజి సీనాన్లె. మిజి నండొ సీనాన్లె. తిగ్జి, కుదిలిసి, వజ్జి సాని లెకెండె మీ ఒడిఃద్ సీనాన్లె. మీరు కొలిజి సితివజనె మిజి దొహ్కాద్లె.

39 సన్తివలె వాండ్రు కత వజ యాక నెన్పిస్తాన్. అయాక ఇనిక ఇహిజ, "ఒరెన్ గుడ్డి వన్నిజ్ మరి ఒరెన్ గుడ్డి వాండ్రు సరి తోరిస్తెజ్ అబ్నాండ్రా? తోరిస్తెజ, వారు రివెర్బా గాతదు అర్నార్గిదె? 40 నద్వినికాన్ నెన్పిసీని వన్నిముస్సు పెరికాన్ అవన్. గాని సదు పూర్తి నెస్సికాన్ ఎయెన్బా వన్నిజ్ నెన్పిస్తి వన్నివజ మంజినాన్. 41 మీ కణకాదు మన్ని తూలం నన్నిక సుడఃఏండ మీ తంబెరిజె కణకాద్ మన్ని కాసరాదిజ్ ఎందనిజ్ బేసిని? 42 నీ కణకాదు మన్ని తూలం నన్నిక లాగ్ఏండ, మీ తంబెరిజ్, 'ఓ తంబెరి నీ కణకాదు మన్ని కసరాదిజ్ లాగ్న', ఇజి ఎలాగ వెప్తాజ్ ఆనాద్. వేసం కినికిదెరె, మీ సాంత కణకాదు మన్ని తూలం ననిక ముజాలె లాగ్దు. అయావలె మీ తంబెరిజె కణకాద్ మన్ని ఇజిరి కసరాదిజ్ నెగెండె సుడిఃజి లాగ్దెజ్ అట్టి. 43 నెగ్గి మరాల్ సెఇ పట్టు అన్ఉ. అయాలెకెండె సెఇ మరాల్ నెగ్గి పట్టు అన్ఉ. 44 విజా మరెకాజ్బా పట్టు సుడిఃజి నెస్తిజ్ ఆనాద్. ఎయెర్బా బొడః పట్టు సాప్పు తుపెజాణిజ్కొయివర్. అయాలెకెండె ద్రాక్కు పట్టు బా సాప్పు లబదాన్ కొయివర్. 45 నెగ్గి మన్ను మన్నివన్నిజ్ కూలిజ్ కొట్టు కిత్తి మన్నిలెకెండె వన్ని మన్నుదు నెగ్గికెజె మంజినె. అందెజె వన్ని వెయుదాన్ నెగ్గి మాటెజ్ వానె. సెఇ మన్ను మన్నివన్నిజ్ సెఇకెజె మంజినె. అందెజె వన్ని వెయుదాన్ సెఇ మాటెజ్ వానె.

† రోమది ఏలుబడిఃవాన్ యూదయ దేసమ్దిజ్ విడదల కిదెజ్ ఉసార్దాన్ సుడిఃజిని యూదయ సజం మనాద్. అయాసజమ్దికాన్ ఒరెనె సీమోను

46 నాను వెళ్లి మాటెవ్వజ మీరు కివండ మరి మీరు ఎందనిజ్ ప్రబువా, ప్రబువా ఇజి నజీ కూక్సినిదెర్? 47 నా డగ్రువాజి నా మాటెజ్ వెంజి అయావజ కినికాన్ ఎయెరిజ్ పోలిత మనాండ్రొ ఇజి నాను నెన్పిసిన్.

48 వాండ్రు వునాది నిరిడ్ కార్సి నట్టుముస్సు వునాది కితాండ్రె ఇల్లు తొప్పి వన్ని లెకెండ మనాన్. పెరి గడ్డ వాతాద్. ఇల్లుదిజ్ పెరి గడ్డ డెయితిజ్బా అది అర్వెతాద్. ఎందనిజ్ ఇహిజ, అది నెగ్రెండ తొహ ఆత మనాద్. 49 గాని నా మాటెజ్ వెంజిబా అయావజ కినికాన్, బూమి ముస్సు వునాది పాక్ఎండ ఇల్లు తొప్పి వన్ని లెకెండ మనాన్. పెరిగడ్డ డెయితిజ్ నణమె అయా ఇల్లు అర్తాద్. ఇల్లు పూర్తి పాడాతాద్.

7 వాండ్రు వెప్తాజ్ మన్నిమాటెజ్ విజా లోకురిజ్ వెన్పిసి వీస్తాండ్రె, కపెర్నూము ఇన్ని పట్నమ్దు వాతాన్. 2 అబ్బె రోమ సయిన్మదిజ్ సదాతిపతి † ఒరెన్ మహాన్. అతికారిజ్ నండొ ఇస్టం అతి ఒరెన్ వెట్టిపణి కినికాన్ వన్నిజ్ మహాన్. వాండ్రు జబు లావు ఆతాదె సాదెజ్ డగ్రు ఆత మహాన్. 3 అయా అతికారి యేసు వందిజ్ వెహండ్రె, సెగొండార్ యూదుర్ పెద్దెల్జ వన్ని డగ్రు పోక్తార్. ఎందనిజ్ ఇహిజ, వాండ్రు వాజి వన్ని వెటి పణి కిని వన్నిజ్ నెగెన్ కిదెజ్ ఇజి. 4-5 వారు వన్ని డగ్రు వాతారె, “యా అతికారి మా లోకాజ్ నండొ ప్రిమిస్తాండ్రె మజి మీటిజ్ కిదెజ్ ఇజి ఇల్లు తొప్పిస్తాన్. అందెజె నీను వాజి వన్ని వెటి పణిమణిసిజ్ నెగెన్ కిదెజ్ వాండ్రు తగ్గికాన్”, ఇజి మరి మరి బతిమాలతార్. 6 అందెజె యేసు వరివెల సాహాన్. వాండ్రు ఇల్లు డగ్రు వాతాన్. అయావలె సతాదివ కూలెజ, “మీరు యేసు బాన్ సాన్ని ఈహు వెప్తు, “ప్రబువా, నీను వందమా. నా ఇండ్రొ నీను వాదెజ్ నాను ఏవటితికాన్ అవు. 7 గాని నెగెన్ ఆల ఇన్ని నీ మాటాదాన్ నా వెట్టిపణి మణిసి నెగెండ్రె అనాన్లె, ఇజి నాను నెసిన్. 8 ఎందనిజ్ ఇహిజ, నా ముస్సు అతికారం మనికార్ మనార్. నా అడిగి ఉద్దం కినికార్ మనార్. నాను ఒరెన్ వన్నిజ్ సాన్ల ఇహిజ సానాన్. మరి ఒరెన్ వన్నిజ్ రల ఇహిజ, వానాన్. నా పణిమణిసిజ్ యాక కిల ఇహిజ కినాన్”, ఇజి వెప్తాండ్రె పోక్తాన్. 9 యేసు యా మాటెజ్ వెహండ్రె, వన్ని వందిజ్ బమ్మ ఆతాన్. వాండ్రు వన్ని వెల వాతిమన్ని లోకుదరిజ్ మహ్తాండ్రె, “అబ్బ, ఇస్రాయేలు లోకుర్ లోఇబా విన్నిజ్ మన్ని నమకం లెకెండ్రె, నమకం మని ఒరెన్ వన్నిజ్బా నాను నుడెవత ఇజి మీ వెల నాను వెప్పాన్”, ఇజి వెప్తాన్. 10 వన్నిబాన్ వాతివరిజ్ యేసు మహ్తా పోక్తాన్. వారు ఇండ్రొ సాహారె, నెగెన్ ఆతి వెటిపణి మణిసిజ్ నుడెతార్.

సాతి వన్నిజ్ బత్రిస్సాన్

11 యాక కితి వెనా, యేసు నాయి ఇని పట్నమ్దు సాన్ని మహాన్. వన్ని సిసూర్ని మంద లోకు వన్నివెల కూడెజి సాన్ని మహాన్. 12 వాండ్రు పట్నం వెల్గు డగ్రు వాతివెలె సాతికాన్ ఒరెన్ వన్నిజ్ సోవతారె, సెగొండార్ పిండిజి ఒసి మహాన్. సాతికాన్ అయ్సిజ్ ఒరెండ్రె మరిసి. అది ముండ బోదెలి. పట్నమ్ది మంద లోకుర్ దన్నివెల మహాన్. 13 ప్రబు ముండ బోదెలిదెజ్ నుడెతివెలె, వన్ని పాణం నొతాద్. అడెబామా, ఇజి దన్నిజ్ వెప్తాన్.

14 వాండ్రు డగ్రు వాతండ్రె, జజాద్ ముట్టిజ్, పిండిజి ఒసి మహికార్ నిహార్. యేసు సాతి వన్నిజ్, “ఓ దబడె, నాను నిజి వెప్పాన్, నిజెల ఇజి”, ఇజి వెప్తాన్. 15 అయావలె సాతికాన్ నిజెజి బస్తాండ్రె, వర్దిదెజ్ మొదొల్స్తాన్. యేసు, వన్నిజ్ అయ్సిజ్ ఒపజెప్తాన్. 16 వారు విజెరె బమ్మ అజి తియెల్ ఆతార్. “ఒరెన్ పెరి ప్రవక్త మా నడిమి వాతాన్. వన్ని లోకురిజ్ సాయం కిదెజ్ దేవుణు వాతాన్”, ఇజి వెప్తారె దేవుణుదిజ్ పాగిడితార్. 17 యేసు వందిజ్ యా మాటెజ్ యూదయ దేసం ని డగ్రు మని ప్రాంతమ్కాజ్ విజా సెద్రితె.

యేసుని యోహాను సిసూరు వర్గిజినార్.

18-19 బాప్తిసం సీని యోహానుజ్ సిసూర్ యా జగ్గితి పణిజ వందిజ్ యోహానుజ్ వెప్తాన్. నస్తివలె వాండ్రు వరి లోఇహాన్ రిఎర్ సిసూర్జ కూక్తాండ్రె, “వానికి నీనెనా? నీలిజ, మాపు మరి ఒరెన్ వందిజ్ ఎద్రు నుడెదెజా?”, ఇజి ప్రబుజ్ వెన్బాదెజ్ యేసుడగ్రు పోక్తాన్.

20 వారు యేసుడగ్రు వాతారె, “నీనెనా వాజినికి? నీలిజ మాపు మరి ఒరెన్ వన్నిజ్ ఎద్రు నుడెదెజా? ఇజి వెన్బాదెజ్ బాప్తిసం సీని యోహాను మజి నీ డగ్రు పోక్తాన్”, ఇహాన్. 21 అయావలెనె, యేసు జబ్బుదివరిజ్ బాదదాన్ మన్ని వరిజ్, దెయమ్కు అన్ని వరిజ్ నండొండారిజ్ నెగెన్ కితాన్. నండొ గుడ్డిది వరిజ్ నూణిలెకెండ్రె కితాన్. 22 అందెజె వాండ్రు వన్నిడగ్రు వాతివరిజ్, “గుడ్డిదికార్ నుడె ఆజినార్. సాటదికార్ నడిజినార్. కస్టమ్దికార్ ఇని పెరిజబ్బు మన్నికార్ నెగెన్ ఆజినార్. బొయిరదికార్ వెంజినార్. సాతికార్ నికెఆజినార్. బీదాతివరిజ్ సువార్త వెహాలజినాద్. ఇజి యాలెకెండ్రె మీరు నుడెతికెజ్, వెంజినికెజ్ మద్రి సాన్ని యోహానుజ్ వెప్తు. 23 నా ముస్సు నమకం డెస్ఎండ మంజినికాన్ దేవుణు సీని దీవనమ్కు మంజినికాన్అనాలె”, ఇజి వరిజ్ వెప్తాన్.

24 యోహాను సిసూర్ సాహి వెనుక, యేసు యోహాను వందిజ్ మంద లోకు వెల ఈహు వెప్తాజ్ మొదొల్స్తాన్. “ఇనిక నుడెదెజ్ మీరు బీడిమ్బూమి ప్రాంతమ్దు సాహిదెర్? గాలిదిజ్ కద్దిజిని గడ్డిదిజ్ నుడెదెజా? 25 సిల్లిజ, మరి ఇనిక నుడెదెజ్ సాహిదెర్? మెతాని సాక్కెజ్ తొడిగితి మని ఒరెన్ వన్నిజ్ నుడెదెజా? సిల్లి, నండొ దర మన్ని సాక్కెజ్ తొడిగిజి, నుకం బత్రిసికార్ రాజారి ఇల్కాజ్ మంజినార్. 26 అహిజ, మీరు ఇనిక నుడెదెజ్ సాహిదెర్? ఒరెన్ ప్రవక్తెనా? ఒబ, ఒరెన్ ప్రవక్త ముస్సు పెరివన్నిజ్ నుడెదెజ్ సాహిదెర్ ఇజి నాను మిజి వెప్పాన్ 27 విన్నివందిజ్ దేవుణు మాటదు ఈహు రాస్త మనాద్, “ఇదిలో, నాను నా కబ్బుతనివన్నిజ్ నీ ముజాల పోక్కిన వాండ్రు నీ ముజాల నీ సరి నెగెన్ కినాన్ ††”.

28 బోదెకాజ్ పుట్టి వరిలోఇ యోహాను ఇంక పెరికాన్మరి ఎయెన్బా సిలెన్. గాని దేవుణు ఏలుబడి కిని లోకుర్ లోఇ తగిసి కొటికాన్ యోహాను ముస్సు పెరికాన్ ఇజి నాను మిజి వెప్పాన్. 29 యేసు వెప్తికెజ్ వహారె లోకుర్ విజెరె పన్ను పెర్నికార్బా దేవుణు కిజినిక విజా నాయమ్దానె కిజినాన్ ఇజి లోకుర్ ఎద్రు ఒప్పుకొటార్. ఎందనిజ్ ఇహిజ, వారు యోహాను బాణిజ్ బాప్తిసం లాగి ఆత మహాన్. 30 గాని వరిసయ్రుని యూదురి రూలు నెప్పిన్నికార్ యోహాను సీని బాప్తిసం లాగి ఆవతార్. వారు వరి వందిజ్ దేవుణు ఎతు కితి సజతి నెక్త పోక్తాన్.

† వంద విద్దెం కినివరిజ్ నడిపిసికాన్. †† మలాకి 3:1.

31 యీ తరమేది లోకాజ్ నాను ఇన్ని దని దనటాన్ పోలీసి వెహ్రాజ్? వారు ఇని దనిజ్ పోలిత మనార్? 32 వారు, సతాదు బసి మంజి పెండ్లి ఇండ్రో ని సాతి ఇండ్రో జర్గిజిని దని వందిజేవత్తు కిజి కర్జిజిని కొడొరిజ్ఫాలిత మనాద్. అయీ కొడొరి బెర్నదిజ్ బెర్న కూకె ఆజి ఈహు కర్జిజినార్. "మాపు పిరుడిః ఊహ్కాప్ గాని మీరు కర్జిజితిదెర్. మాపు సాతి ఇండ్రోణి పాటెజ్పార్వాప్ గాని మీరు అడఃబాఇతిదెర్".

33 ఎందానిజ్ ఇహిజ, బాప్తిసం సీని యోహాను మాముల్ బోజనం ఉణిజి, ద్రాక్య కడు ఉణిఎండ వాతాన్. అందెజె మీరు, "వనిజ్ దెయం అస్తాద్", ఇజి వెస్సినదెర్. 34 లోకు మరిసెఅతి నాను ఉణిజి తింజి వాజినాన్. అందెజె మీరు ఇదిలో వీంధ్రు టిండి కకుర్తికాన్, సాస్సికాన్, వన్ను పెర్నివరిజ్ పాపం కినివరిజ్ కులాయెన్ ఇజి వెస్సినదెర్. 35 గాని దేవుణుబాణిజ్ వాతి గెణం మనికార్ అయీ గెణం నిజమాతిక ఇజి వరి విజా నెగ్గి పణిజాణిజ్ రుజాప్ కిజినార్.

పాపం కిత్తి బోదెల్దిజ్ సెమిసినాన్

36 పరిసయరు లొఇ బెర్న వన్నివెట బోజనం కిదెజ్ యేసుజ్ కూక్తాన్. అందెజె యేసు పరిసయరు ఇండ్రో సాహండ్రె, వన్ని వెట బోజెనమ్దిజ్ బస్త మహాన్. 37 ఆ నాటో పాపం కిజి మహి ఉండ్రో బోదెలి మహాద్. యేసు పరిసయరు ఇండ్రో బోజెనమ్దిజ్ బస్త మహాన్ ఇజి నెస్తాదె, నూనాజ్ పణుకుదాన్ † తయార్ కితి ఉండ్రో సీసాదు నెగ్గి వాసనం సీని నూనె తత్తాద్. 38 యేసు, కాల్యు వెన్కా మహ్తాండ్రె బస్త మహాన్కాక అది వెనక వన్ని పాదమ్క డగ్గు నిహాద్. నిహాదె అడఃబాజి మహాద్. అది దన్ని కణెర్దాన్ వన్ని పాదమ్కాజ్ ఊత్తాదె దని కొపుదాన్ తెల్తాద్. వన్ని పాదమ్కాజ్ ముదు కితాదె వాసనం సీని జటమామ్సీ నూనె రాస్తాద్.

39 వన్నిజ్ కూక్తి పరిసయి వాండ్రు యాక సుడఃతాండ్రె, వీంధ్రు నిజం ఇక బెర్న ప్రవక్త ఇహిజ, వినిజ్ ముట్టి బోదెలి ఎయిదో ఎలాగ మర్తికాదో ఇజి నెస్తాన్ మరి. ఎందనిజ్ ఇహిజ, ఇది పాపం కినికాద్, ఇజి మన్నుదు ఒడిఃబితాన్. 40 అందెజె యేసు, "ఓ సీమోసు సీవెట ఉండ్రో మాట వెహ్రాజ్ మనాద్", ఇజి వన్ని వెట వెహ్రాజ్, "బోదకినికి వెహ్రా", ఇహాన్.

41 అయావలె యేసు", బెర్న అప్పు సీతి వన్నిజ్ రివెర్ అప్పు లొస్సికార్ మహార్. వరి లొఇ బెర్న అయ్దు వందెజ్ వెండి రుపాయిజు మరి బెర్న యాబయి వెండి రుపాయిజు సీదెజ్ మనాద్. 42 అప్పు తిర్స్సెజ్ వరిజ్ డబ్బు సిల్లెద్. అందెజె వరిజ్ రివెర్బా డబ్బు లొస్ఎండ డిస్తాన్. ఏలు, విరి లొఇ ఎయెన్ వన్నిజ్ నండో ప్రేమిస్నాన్? ఇజి వెన్బాతాన్. 43 అందెజె సీమోసు, "వాండ్రు ఎయెరిజ్ నండో సీతండ్రె, లొస్ఎండ డిస్త సీతాండ్రో వాండ్రె నండో ప్రేమిస్నాన్, ఇజి నాను ఒడిఃబిజిన", ఇహాన్. అందెజె యేసు, "సీను నెగెండ ఎత్తు కితిదె వెహ్రా", ఇహాన్.

44 ఇహండ్రె, ఆ బోదెల్ దెరోట్ సుడఃజి సీమోసుజ్ ఈహు వెహ్రాన్. "యీ బోదెల్దిజ్ సీను సుడఃజిని గదె. నాను సీ ఇండ్రో వాత. సీను నా పాదమ్కు ఊర్పాదెజ్ ఏరు సిఇతి. గాని ఇది దని కణెర్దాన్ నా పాదమ్కు ఊత్తాదె, దని కొపుదాన్ తేలితాద్. 45 సీను నజి ముదు కిజి డగ్గు కిఇతి. గాని ఇది నాను వాతి బాణిజ్ అసి నా పాదమ్కు ముదు కిజిని మనాద్. 46 సీను నా బురాదు నూనె రాస్ఇతి. గాని ఇది నా పాదమ్కాజ్ వాసనం సీని నూనె రాస్తాద్. 47 అది నండో ప్రేమిస్నాద్. అందెజె దని నండో పాపమ్కు దేవుణు సెమిస్నాన్, ఇజి నాను సీ వెట వెహ్రాన్. ఎయెరిజ్ దేవుణు తక్కు సెమిస్త మనాండ్రో, వాండ్రు తక్కునె ప్రేమిస్నాన్".

48 మరి యేసుదనిజ్, "దేవుణు సీ పాపమ్కు సెమిస్త మనాన్", ఇజి వెహ్రాన్. 49 వన్ని వెట ఉండెజ్ బస్తి మహికార్, "పాపమ్కు సెమిస్త మన్న ఇజి వెహ్రాజ్ వీంధ్రు ఎయెన్?", ఇజి బెర్నదిజ్ బెర్న వర్గిజి మహార్. 50 అందెజె యేసు, "సీను నా మున్ను నమకం ఇడ్డి. అందెజె సీ పాపమ్కాణిజ్ దేవుణు రక్సిస్నాన్ ఇజి ఆ బోదెల్దిజ్ వెహ్రాన్.

యేసు విత్తు వందిజ్ వెహ్రాని కత

8 సెగం రోస్సు సాహి వెనుక, యేసు, దేవుణు కిని ఏలుబడిః వందిజ్ సువార్త పట్నమ్కాజ్ నాహ్కాజ్ బోదిసి వెహ్రా వాజి మహాన్. 2-3 వన్నెండు మణిసి సీసూరు వన్ని వెట మహార్. దెయం బాణిజ్, కస్టమ్కాణిజ్ నెగెణ్ ఆతి సెగొండెక్ బోదెక్బా వన్ని వెట మహా. వన్కా లొఇ ఏడు దెయమ్కాణిజ్ యేసు డిఃసిస్తి మగ్దలలె ఇని మరియ, హెరోద్ ఇండ్రో ఎజమాని వణి కిజి మహి కూజ ఇని వన్ని ఆల్సి యొహాన, సుసనయ, మరి నండో బోదెక్బా మహా. వన్కాజ్ కల్గితి మన్ని లొఇ అవికు, యేసువన్ని సీసూర్ వందిజ్ కర్కు కిజి మహార్.

4 విజా పట్నమ్కాణిజ్ లోకుర్ యేసుడగ్గు వాజి మంద ఆతివెలె, వాండ్రు ఉండ్రె కత వజ ఈహు నెస్పిస్తాన్. 5 "బెర్న రయ్తు వాండ్రు విత్తు విత్తెజ్ సాహాన్. వాండ్రు విత్తు విత్తి మహిజ్ సెగం సరి పడఃకాద్ అరై. అర్తి విత్కాజ్ మట్టి సాస్సి మహార్. ఆగాసమ్ది పాటిజ్బా వాతెనె పెహ్తా తిహా. 6 మరి సెగం సటు మున్ను మన్ని డులిదు అరై. నేరితె గాని తడిః సిల్లెండ ఆతిజ్ సాతె. 7 మరి సెగం సాప్పు తవుజ్ నడిఃమి అరై. సాప్పు తువెజ్వెట పిరితె గాని వన్కాజ్ తిగితె. 8 మరి సెగం నెగ్గి బూమిదు అరై. ఆకెజ్ పిరితెనె పంట నెగెండ వండితాద్. నండో జణి ఆతాద్. విత్తి విత్తుదిజ్ వంత వంతుజ్లెకెండ ఆతె. యేసు యీ మాటెజ్ వెహ్రా, 'రుండి గిబిజాణిజ్ వెంజి అయావజ నడిఃదు"', ఇజి వెహ్రాన్.

9 వెనుక వన్నిసీసూర్ యీ కతవజ నెస్పిస్తి దనిజ్ అర్దం ఇనిక ఇజి వెన్బాతార్. 10 వెన్బాతిజ్ వాండ్రు, "దేవుణు కిని ఏలుబడిః వందిజ్ డాఃజితి మహి సజతిజ్ దేవుణు మిజి తెలివి కిత మనాన్. గాని మహికార్ దేవుణు మాటదు వెహ్రా లెకెండ, 'సుడఃజినార్ గాని తోవెర్, వెంజినార్ గాని అర్దం కివెర్ ††. అందెజె వరిజ్ కతవజ నాను నెస్పిసిన. 11 యీ కతవజ నెస్పిస్తి దనిజ్ అర్దం ఇనిక ఇహిజ, విత్తు ఇహిజ దేవుణు మాట. 12 విత్తు అర్దిసరి పడఃకాద్ పోలికార్ ఎయెర్ ఇహిజ, దేవుణు మాట వెనికార్. గాని వారు దేవుణుదిజ్ నమిజి, వాండ్రు వరిజ్ రక్సిన్ఎండ మంజిని వందిజ్ నయ్తాను వాజి వరి మన్నుదు మన్ని దేవుణు మాట పెర్రి ఒనాన్. 13 విత్తు అర్ది సట్టుమున్ను మని డుల్లిదిజ్ పోలికార్ ఎయెర్ ఇహిజ, దేవుణు మాట వెనివెలె సర్దదాన్ మన్నుదు ఇడ్డికార్. గాని వెల్లె లొఇ సాని లెకెండ దేవుణు మాట వరి మన్ను లొఇ సాన్ఎద్. వారు సెగం కాలం నమినార్ గాని కస్టం వానివలె డిస్తాన్. 14 విత్తు అర్ది సాప్పు తవుజ్ నడిఃమి పోలికార్ ఎయెర్ ఇహిజ, దేవుణు మాట వెంజి నమకం బా ఇడ్డాన్. గాని వారు ఆహా బత్తిజి సానివలె బత్తువందిజ్ మన్ని విసారం, సంసారం, సుకం వందిజ్ ఒడిఃబినార్.

† యీ నూనాజ్ పణుకు పేరు అలబాస్థరు ఇజి యీ పణుకు నండో కరిదితిక తెల్లాజ్ మంజినాన్ యాక గీసి లోకుర్ పునిజ్ తయార్ కిజినార్. †† యెసయ 6:9.

యాకెజ్ వరి నమకం తీగజి పాక్కినె. వరి బత్తుదాన్ ఇన్ని లాబంబా సిల్లెద్. 15 విత్తు అర్ది నెగ్గి బూమిదిజ్ పోలితికార్ ఎయెర్ ఇహిజ, దేవుణు మాట వెనికార్. వారు వరిజ్ తగ్గి నెగ్గి మన్నుదు దేవుణు మాట ఇడ్వార్. కష్టమకు వాతిజ, వారు అయాకెజ్ ఓరిసి నమకమ్దాన్ పిరినార్.

దీవ వందిజ్ వెప్పినాన్.

16 ఎయెన్బా దీవ కసిసి వెన్నా తబల మూక్కినో, మంసం అడ్డినో ఇడ్వెన్. గాని లోఇ వానివరిజ్ జాయి తోరదెజ్ ఇజి దీవ కంత్ూదునె ఇడ్వార్. 17 డాజితిక ఇనికబా వెల్లి ఆనాన్. ముస్తిక ఇనికబా తోరెఅజి వెల్లితనె. 18 అందెజె మీరు వెంజినికెజ్ అర్దం కిజి మండ్రు. ఎందనిజ్ ఇహిజ, నా బాణిజ్ వెంజి అర్దం కిజిని వన్నిజ్ దేవుణు మరి తెలివి కినాన్. గాని వెంజి అర్దం కిఇవన్నిజ్ వాండ్రు అర్దం కిత మన ఇజి ఒడ్జిబితికెజ్ బా లాగ్నాన్. 19 నస్తివలె యేసు అయ్సిని తంబెరిసిర్ వన్నిజ్ సుడెడెజ్ వాతార్. గాని లోకుర్ నండ్ మహిజ్ వన్ని డగ్రు సాండ్రెజ్ అట్వితార్. 20 అయావలె ఒరెన్, "నీ యాయ నీ తంబెరిబు నిజి సుడెడెజ్ కోరిజి వెల్లి నిహ మనార్", ఇజి వన్నిజ్ వెప్తాన్. 21 వెప్తాజ్ యేసు, "దేవుణు మాటెజ్ వెంజి అయావజ నడిసికారె నా యాయ నా తంబెరిబు", ఇజి వెప్తాన్.

యేసు పెరిగాలి తువాన్దిజ్ ఆప్కిజినాన్

22 నస్తివలె ఉండ్రి నాండిజ్ యేసు వన్నిసిసూర్జ, "గనెసరెతు ఇన్ని సెరు అతాహ వడెక సానాట్", ఇజి వెప్తాన్. అందెజె వారు ఉండ్రి డోణిదు ఎక్తారె సాహార్. 23 వారు సాన్ని మహిజ్, యేసు నిర్ది కితాన్. అయావలె పెరి గాలి తువాన్సెర్దు ముస్సు వాతాదె, డోణిదు ఏరు నిండ్రిజినాన్. వారు పెరి ప్రమాదమ్దు మనార్. 24 అయావలె సిసూరు వన్ని డగ్రు సాహారె, "ప్రబువా, ప్రబువా మాపు సానా సానావ్లె", ఇజి వన్నిజ్ నిక్తార్. వాండ్రు నిజితండ్రె పెరిగాలి ఉల్లాలుబుదిజ్, "పలక్ ఆదు", ఇజి డటం వెప్తాన్. పెరిగాలి అణస్తాద్. విజా అలెతె. 25 అయావలె వాండ్రు, "ఎందనిజ్ మిజి నా ముస్సు నమకం సిల్లెద్?", ఇజి వరిజ్ వెన్బాతాన్. వారు బమ్మజి తియెల్దాన్, "సిండ్రు గాలిదిజ్ ఏరుదిజ్ అణస్తు ఇజి ఆడ్ర వెప్తాజ్ అవి లోజిజినె. వీండ్రు ఎయెండ్ర", ఇజి ఒరెన్వెట ఒరెన్ వర్గితార్.

దెయమ్కు అస్తివన్నిజ్ నెగెండ్ కిజినాన్.

26 వారు గరసినియ ఇని లోకురి ప్రాంతమ్దు వాతార్. అయా ప్రాంతం గలిలయ ప్రాంతమ్దిజ్ ఎర్దు మనాద్. 27 వాండ్రు సెరుగటుద్ డిగితివెలె, ఆ పట్టుమ్దికాన్ ఒరెన్ యేసుడగ్రు వాతాన్. వాండ్రు దెయమ్కు అస్తికాన్. నండ్ కాలమ్కాణిజ్ సాక్రెజ్ తోడిగిఎండ, ఇండ్ర మన్ఎండ, దూకిజాజ్ † మహాన్. 28 వాండ్రు యేసుజ్ సుడెతాండ్రె డటం డేల్లి వన్ని పాదమ్క ఎర్దు ముణుకుజ్ ఊరితాన్. ఊరితండ్రె, "విజా దనిజ్ అతికారం మన్ని దేవుణు మరిసి ఆతి యేసు, నా వెట నిజి ఇన్ని వణి, నజి బాద కిమ ఇజి నిజి బతిమాల్జిన", ఇజి డేల్లి వెప్తాన్. 29 ఎందనిజ్ ఇహిజ, యేసు, వినిజ్ డిసి వెల్లి సాన్ల ఇజి ఆ దెయమ్దిజ్ ఆడ్ర సిత మహాన్. అది వన్నిజ్ నండ్ సుట్టు అసి మహాద్. అందెజె వన్నిజ్ గొలుస్కాణిజ్ కాల్యాజ్ కికాజ్ తోప్పి కాప్ కిని వరిజ్ ఇట్టాద్. గాని వాండ్రు గొలుస్కాజ్ తెప్పి, దెయమ్కు వన్నిజ్ బిడిమ్బూమిదు ఉలుప్పి మహె. 30 యేసు వన్నిజ్, "నీ పేరు ఇనిక?", ఇజి వెన్బాతాన్. నండ్ దెయమ్కు వన్ని లోఇ మహిజ్ వాండ్రు, "సేన", ఇజి వెప్తాన్. 31 మజి దర్దిదు పాక్మా ఇజి మరి మరి బతిమాల్తె. 32 నస్తివలె నండ్ వండ్రిజ్ మంద గొరోణ్ సెల్కారు మెయిజి మహె. అందెజె వన్నా లోఇ సాండ్రెజ్ మజి సెల్వ సిదా", ఇజి వన్నిజ్ బతిమాల్తె. అందెజె వాండ్రు సెల్వ సితాన్. 33 అయావలె దెయమ్కు వన్నిజ్ డిసెనె వండ్రిజ్ లోఇ సాహె. ఆ వండ్రిజ్ మంద గొరోత్దాన్ ఉహ్కీ వాజి సెర్దురు అర్తెనె సాతె. 34 వండ్రిజ్ మేప్పి మహికార్ జగ్గితి దనిజ్ సుడెతారె ఉహ్కీ సాన్ని ఆ పట్టుమ్ది వరిజ్, పట్టుమ్ది వల్సెజ మని వరిజ్ జగ్గితికెజ్ వెప్తాన్. 35 లోకుర్ యా జగ్గితికెజ్ సుడెడెజ్ సాహార్. వారు యేసు డగ్రు వాతిజ్ దెయమ్కు డిస్తి సాహికాన్ సాక్రెజ్ తోడిగిజి నెగ్గి బుద్దిదాన్ యేసు పాదమ్క అడిగి బస్తి మహి సుడెతార్. సుడెతారె తియెల్ ఆతార్. 36 యాక సుడెతికార్ దెయం అస్తికాన్ ఎలాగ నెగెణ్ ఆతాన్ ఇజి మరి లోకురిజ్ వెప్తాన్. 37-38 అయావలె గరసినియ లోకురి ప్రాంతమ్దు మన్ని లోకుర్ విజెరె, నండ్ తియెల్ ఆతార్. అందెజె, "మజి డిసి సాన్ల", ఇజి యేసుజ్ వెప్తాన్. అందెజె యేసు డోణి ఎక్తాండ్రె మర్జి సాన్ని మహిజ్, దెయమ్కు డిస్తి సాహికాన్, "నాను బా నీ వెట వానా", ఇజి బతిమాల్తాన్. 39 గాని యేసు, "నీను మర్జి ఇండ్రె సాన్ల. దేవుణు నీ వందిజ్ కిత్తి గొప్ప వణి విజా వెహ్ల", ఇజి వెప్తాండ్రె పాక్తాన్. వాండ్రు సాహండ్రె యేసు వన్నివందిజ్ కిత్తి గొప్ప వణి పట్టుం విజా వెప్తాన్.

యేసు సాతి అయిలిజ్ నిక్కినాన్, జబ్బుఆతి మహిబోదెల్దిజ్ నెగెణ్ కిజినాన్

40 యేసు మర్జి వాతివెలె, నండ్ లోకుర్ వన్నిజ్ ఎర్దు సుడెజి మహార్. అందెజె వారు వన్నిజ్ డగ్రు కిత్రార్. 41-42 నస్తివలె, యూదురి మీటిజ్ ఇండ్రెణి అతికారి యాయురు ఇనికాన్ యేసు పాదం ముస్సు అర్తాండ్రె, "నజి ఒరెదె గాలు. అది సాదెజ్ డగ్రు ఆత మనాద్. దనిజ్ డగ్రు పనెండు పంటెజ్. అందెజె నీను నా ఇండ్రె రల", ఇజి బతిమాల్తాన్. వాండ్రు సాన్ని మహిజ్ నండ్ లోకుర్ వన్ని ముస్సు నెకె ఆజి అర్ది మహార్. 43 అయావలె ఉండ్రి బోదెలి పనెండు పంటెజాణిజ్ వెల్లి ఆని జబుదాన్ బాద ఆజి మహాద్. ఎయెర్బా దనిజ్ నెగెణ్ కిడిజ్ అట్వితార్. 44 యేసు వెన్నాజ్ వాతాదె, వాండ్రు తోడిగితిమన్ని వన్నిరి సాక్కుది సెంగుదిజ్ ముట్టాద్. ముట్టి వెటనె దనిజ్ వాజి మహి నల అణస్తాద్. 45 యేసు, "నజి ముట్టికాన్ ఎయెన?", ఇజి వెన్బాతాన్. విజెరె, "మాపు నెన్వెప్", ఇజి వెప్తాన్. అయావలె పేతురు, "బోదకినికిదా, నండ్ లోకుర్ కూడితారె నీ ముస్సు అర్గినార్ గదె", ఇజి వెప్తాన్. 46 గాని యేసు, "నజి ఎయెండ్రె ముట్టాన్. నా లోఇదాన్ దేవుణు సత్తు వెల్లి సాసి సాని లెకెండ్ నజి తెలిజినాద్", ఇజి వెప్తాన్. 47 అయావలె అది యేసుజ్ డాజ్జి సాండ్రెజ్ అట్వె ఇజి నెస్తాదె వణిక్కి వాతాదె వన్ని పాదం ఎర్దు ముణుకుజ్ ఊర్జి వజితాద్. నాను ఎందనిజ్ వన్నిజ్ ముట్టు ఎలాగ వెటనె నెగెణ్ ఆత ఇనిక విజెరె ఎర్దు అది వెప్తాద్. 48 అందెజె యేసు", గాలు, నీను నా ముస్సు నమకం ఇడ్డి. అందెజె నీను నెగెణ్ ఆతి. నమాదనమ్దాన్ సాన్ల", ఇజి దనిజ్ వెప్తాన్. 49 యేసువర్గిజి మహివలెనె, యాయురు ఇండ్రెణికాన్ ఒరెన్

† అయి కాలమ్దు మెడె సట్టు వణుకుదు దొల్వ్తి సాలమ్దు ఇడ్జి పెరి వణుకయదాన్ మూక్కి మహార్.

వాతండ్రి, "నీ గాలు సాతాద్. బోదకినివన్నిజ్ మరి వందిన్మ", ఇజి వన్నిజ్ వెహ్లాన్. 50 యేసు అయా మాట వెహ్లాండ్రి, "తియెల్ ఆమ. నా ముస్సు నమకం ఉండ్రె ఇడెఃఅ. అది నెగెన్ ఆనాద్", ఇజి యాయిరుజ్ వెహ్లాన్. 51 యాయిరు ఇండ్రో వాతివెలె, పేతురు, యాకోబు, యోహాను ఇని వరిజ్ ని ఇజి దని అయిసి అప్పాసిరిజ్బా లోఇ ఒతాన్. గాని మహివరిజ్ లోఇ సాండ్రెజ్ సరి సిపితాన్. 52 విజెరి దన్ని వందిజ్ గుండెజి డెయ్ఎ ఆజి, అడఃబాజి మహార్. యేసు వరిజ్, "అడఃబామాట్, అది నిద్ర కిజినాద్ గాని సాఎద్", ఇజి వెహ్లాన్. 53 అది సాతాద్ ఇజి వారు నెస్స మహార్. అందెజె యేసుజ్ సెకాల్ కిత్తార్. 54 అపొజ, యేసు దన్నికిదు అస్తాండ్రె, "ఇజి బయి నిజ్అ", ఇజి వెహ్లాన్. 55 దనిజ్ పాణం మరజి వాతిజ్ అది నిజితాద్. అయావలె వాండ్రు దనిజ్ బోజనం సీదు ఇజి ఆడ్రె సితాన్. 56 దని అయేసి అపాసిర్ నండో బమ్మ ఆతార్. గాని వాండ్రు యాక ఎయెరిజ్బా వెహ్లాట్ ఇజి వరిజ్ ఆడ్రె సితాన్.

సిసూరిజ్ వణి ఒవజెప్పినాన్

9 యేసు వన్నెండ్రు మణిసి సిసూరిజ్ కూక్కి కుడుఃప్తాండ్రె విజా దెయమ్కాజ్ పేర్దెజ్, కస్టమ్కాజ్ నెగెన్ కిదెజ్ వరిజ్ సత్తుని అతికారం సిత్తాన్. 2 వాండ్రు, "దేవుణు ఏలుబడిః కిసాన్ ఇజి సువార్త బోదిస్సెజ్, కస్టమ్కాజిజ్ మహి వరిజ్ నెగెన్ కిదెజ్", ఇజి వరిజ్ పోక్తాన్. 3 మరి వాండ్రు వెహ్లాన్, "మీరు వయాణం వందిజ్ కీదు డుడ్డు గాని, సన్ని గాని రొట్టె గాని, డబ్బు గాని రుండి సాక్రెజ్ గాని ఇనికబా ఒత్తెజ్ ఆవద్. 4 మీరు ఎయె ఇండ్రో సానిదెరో, అయా పట్నం డిస్సిదాక బానె మండ్రు. 5 మిజి ఎయెర్ డగ్రు కిపిండ మహిజ ఆ పట్నమ్దాన్ డిసి సానివలె మీ పాదమ్కాజి డుల్లిబాన్ దుల్పు. దేవుణు మాట వారు నెక్త పాక్తిజ్ దేవుణు వరిజ్ కోపం ఆతాన్ ఇజి తోరిస్సెజ్ ఆహె డుల్లి దులుప్తు", ఇజి వరిజ్ వెహ్లాన్. 6 అందెజె వారు సాతారె, నాహ్కాజ్ విజా బూలాజి, సువార్త బోదిసి, ఎంబెబా కస్టమ్దాన్ మహి వరిజ్ నెగెన్ కిజి మహార్.

7-8 గలీలయ ముటదిజ్ రాజా ఆతి హేరోదు యేసుని వన్నిసిసూరు కిత్తి వణిజ్ వందిజ్ వెహివెలె అసల అర్దం ఆవిండ్ర మహాన్. ఎందనిజ్ ఇహిజ, సెగొండార్ యోహాను సాతండ్రి మరజి నిజితాన్ ఇజి, సెగొండార్ ఏలియ ప్రవక్త తోరె ఆతాన్ ఇజి మరి సెగొండార్ పూర్బా కాలమ్దు మహి ఒరెన్ ప్రవక్త నిజిత వాతాన్ ఇజి యేసు వందిజ్ వర్గిజి మహార్. 9 అయావలె హేరోదు, "నాను యోహాను బుర్త డెఃయిస్త గదె. మరి ఎయి వందిజ్ యా సజతిజ్ నాను వెంజిన? వాండ్రు ఎయెన్?", ఇజి వన్నిజ్ సుడెఃదెజ్ ఆన ఆతాన్.

అయ్దు వేలు లోకాజ్ బజ తిర్చినాన్.

10 అపాస్త్రుడు మరజి వాతారె, వారు కిత్తి వణిజ్ విజా యేసుజ్ వెహ్లాన్. వాండ్రు వరిజ్ వెట కూక్తాండ్రె, బత్సయ్యుద ఇని పట్నమ్దు కేట సాహార్. 11 గాని మంద లోకుర్ ఆక నెస్తారె, వన్ని వెన్కా వాజి మహార్. వాండ్రు వరిజ్ డగ్రు కితాండ్రె దేవుణు ఏలుబడిః వందిజ్ వరిజ్ వెహ్లాన్. కస్టమ్దు మహి వరిజ్ నెగెన్ కిత్తాన్.

12 పాడ్డు డిఃగిజి మహివలె, వన్నెండ్రు మణిసి సిసూర్ వాతారె, "మాటు ఎయెర్ మనిఇ బాడిఃద్ మనాట్. అందెజె యా లోకురిజ్ మండ్రెజ్ బాడిః, ఉండెజ్ టిండి, దోహ్కీని వజ పడఃకాద్ మన్ని నాహ్కాజ్ వల్సెజి పోక్అ", ఇహార్.

13 యాక వెహ్లాండ్రి, యేసు, "మీరె వరిజ్ తిండ్రెజ్ ఇనికబా సీదు", ఇజి వెహ్లాన్. వెహ్లాజ్ వారు, "మాబాన్ అయ్దు రొట్టెజ్, రుండి మొయెజ్ మనె. నిసా మంద లోకుదిజ్ బోజనం కొండెజ్ మాపు అట్నాపా?", ఇజి వెహ్లాన్. 14 (వాతి మని లోకుర్ లోఇ మొగకొడెఃరినె డగ్రు అయ్దు వేలుజ్ మనార్) వాండ్రు, "యాబయి మణిసిర్ యాబయి మణిసిర్ వర్స బసె కిదు", ఇజి వన్ని సిసూర్జ వెహ్లాన్. 15 వారు ఆహె కిజి విజెరిజ్ బసె కిత్తార్. 16 నస్తివలె వాండ్రు అయ్దు రొట్టెజ్ని రుండి మొయెజ్ అస్తాండ్రె, ఆగసం దరోట్ బేసి, వన్కాజ్ వందిజ్ దేవుణుదిజ్ వందనం వెహ్లాన్. అయాకెజ్ ముకెజ్ కితాండ్రె లోకురిజ్ సీబాజి సీదు ఇజి వన్ని సిసూర్జి సిత్తాన్. 17 వారు విజెరి పాట పంజా తిహార్. తిహె వెనుక మిగిలితి ముకెజ్ పనెండు గంపెజ్ సిసూరు కెహ్లాన్. 18 ఉండ్రె నాండిజ్ యేసు ఒరెండ్రె పార్దనం కిజి మహాన్. వన్ని సిసూర్ వన్ని డగ్రు మహార్. అయావలె వాండ్రు, "నాను ఎయెన్ ఇజి లోకుర్ వర్గిజినార్?", ఇజి వరిజ్ వెన్బాతాన్. 19 వారు, "బాప్తిసం సీని యోహాను ఇజి సెగొండార్ వెహ్లానార్. సెగొండార్ ఏలియ ప్రవక్త ఇజినార్. మరి సెగొండార్ పూర్బా కాలమ్దు సాతి ప్రవక్తె లోఇ ఒరెన్ మరజి నిజితాన్ ఇజి వర్గిజినార్", ఇజి వన్నిజ్ వెహ్లాన్. 20 "అపొజ, మీరు నాను ఎయెన్ ఇజి వెహ్లానెదెర్?", ఇజి వరిజ్ వెన్బాతిజ్, పేతురు, "దేవుణు ఏర్పాటు కిత్తి పోక్తి క్రిస్తు", ఇజి వెహ్లాన్. 21 యాక ఎయెవెట వెహ్లాట్ ఇజి కసితం వరిజ్ ఆడ్రె సితాన్. 22 మరి, "లోకు మరిసి ఆతి నాను నండో కస్టమ్కు ఓరిస్సెజ్వలె. యూద పెద్దెల్లెజ, పెరి పుజెరిజు, యూదురి రూలు నెస్సిస్సికార్ నజి వెల్లి కినార్. లోకుర్ నజి నప్పారెలె. సాజి మూండ్రె దిన్మకాజ్ దేవుణు నజి నిక్నాన్లె", ఇజి వెహ్లాన్. 23 మరి వాండ్రు వరిజ్ విజెరిజ్ ఈహు వెహ్లాన్. "ఎయెన్బా నా వెట వాదెజ్ ఇహిజ, వాండ్రు వన్ని సాంత ఇస్టమ్కు డిసి, వన్నిజ్ వాని కస్టమ్కు రోజా ఓరిసి సాదెజ్బా తయార్ ఆజి నా వెట వాదెజ్. 24 ఎయెన్బా వన్ని సాంత పాణమ్దిజ్ కాపాడెఃదెజ్ సుడఃతిజ, వన్నిజ్ ఎల్లకాలం దేవుణు వెట బత్కిని బత్కు దోహ్కెవద్. గాని ఎయెన్బా నా వందిజ్ వన్ని పాణం సీతిజ, వన్నిజ్ ఎల్లకాలం దేవుణు వెట బత్కిని బత్కు దోహ్కెవద్. 25 ఒరెన్ వాండ్రు, వాండ్రు కోరితి విజా, యా లోకమ్ది సంసారం సుకం విజా దోహ్కె ఆజి, వన్నిజ్ ఎలాకాలం దేవుణు వెట బత్కిని బత్కు దోహ్కెవండ మహిజ, ఇన్ని లాబం? 26 నా వందిజ్ నా మాట వందిజ్ సిగు ఆని ఎంబె వన్నిజ్బా నాను నెస్స ఇజి వెహ్లాజ్ లోకు మరిసి ఆతి నానుబా సిగు ఆన. నాను దేవుణు జాయ్దు ఒడఃబిదెజ్ అట్ఇ నని సాకుదాన్ వానా. అయావలె నా బుబ్బదిని, దూతెజది జాయ్ ఒడఃబిదెజ్ అట్ఇ సాకుబా నా వెట మంజినాద్. అయావలె నా వందిజ్ నా మాట వందిజ్ సిగు ఆతి వన్ని వందిజ్ నానుబా సిగు ఆన. 27 నాను మిజి నిజం వెహ్లాన్, "ఇబ్బె నిహి మన్ని వరి లోఇ సెగొండార్, దేవుణు వన్ని లోకురిజ్ ఏలుబడిః కిజినక సూణిదాక సాఎర్".

యేసుజ్ మూర్తి మారిసినాద్.

28 యా మాటెజ్ వెహ్లా డగ్రు ఉండ్రె వారం వెన్కా వాండ్రు, పేతురు, యాకోబు, యోహాను ఇన్ని వరిజ్ వెట్ట కూక్తాండ్రె, పార్దనం కిదెజ్ ఉండ్రె గొరోత్ ఎక్తార్. 29 వాండ్రు పార్దనం కిజి మహివలె వన్ని మొకమ్ది మూర్తి మారితాద్. వన్ని సాకెజ్ తెలాజ్ ఆతె, జిగి జిగి మెరిసి మహి. 30-31 అయావలె, దేవుణు మంజిని

బాడ్డిదాన్ రిఎర్ వన్ని వెల వర్గిజి మహార్. దేవుణు బాణిజ్ వాతి జాయ్ వరి సుటులం మహాద్. వారు మోసె, ఏలియ ఇనికార్. యేసు యెరూసలేమ్దు సాజి, ఆహా దేవుణు ఎతు కితిక బేగి పూర్తి కిని వందిజ్ వర్గితార్.

32 పీతురు ని వన్ని వెల మహికార్ బాగ నిద్ర కితార్. తెలి ఆతి మహిజ్ వారు యేసుజ్ మని దేవుణు జాయ్దిజ్ వన్ని వెల నిహి మని రిఎరిజ్బా సుడఃతార్. 33 ఆ రిఎర్ వన్ని బణిజ్ సాన్ని మహిజ్, పీతురు యేసుజ్, "బాబు, మాటు ఇబ్బె మనిక గొప్ప నెగెద్. అందెజె నిజి ఉండ్రీ మోసెజ్ ఉండ్రీ ఏలియెజ్ ఉండ్రీ మండ్రెజ్ మూండ్రీ గుడుఃసెజ్ తోహ్నాన్. †

34 వాండ్రు ఆహా వర్గిజి మహిజ్ మొసాప్ వాతాదె వరిజ్ పిడఃగితాద్. వారు మొసాప్ లొఇ సాహివలె సిసూరు తియెల్ ఆతార్. 35 అయావలె, "పిండ్రు నాను ఏర్పాటు కితి నా మరిను. విని మాటెజ్ వెండ్రు", ఇజి ఉండ్రీ జాటు మొసాప్దాన్ వాతాద్. 36 అయా జాటు వాతి వెనుక యేసుజ్నె తోరితాద్. సిసూరు సుడఃతి వన్కాజ్ ఉండ్రీ దనిజ్బా అయా దిన్మకాజ్ మహి ఎయెరిజ్బా వెహ్ఎండ అల్లెత మహార్.

దెయం అస్తి ఒరెన్ కొడఃదిజ్ నెగెన్ కిజినాన్

37 మహ్నా నాండిజ్, వారు ఆ గొరొణ్ డిఃగిజి వాతివలె నండొ లోకుర్ వన్నిజ్ ఎద్రు వాతార్. 38 అయావలె ఆ మంద లోకు లొఇ ఒరెన్, "ఓ బోదకినికి, నా మరిసిజ్ కనికారం తోరిసెల ఇజి నాను నిజి బతిమాల్లిన. వాండ్రు నజి ఒరెండ్రె మరిసి. 39 ఉండ్రీ దెయం వన్నిజ్ అస్నాద్. వెటనె వాండ్రు డెడిఃస్నాన్. వెయ్దాన్ పంపుల్ వాజి అది వన్నిజ్ గజగజ వణికిని ఆర్పాద్. వన్నిజ్ నండొ బాద కిజి వందిసిని డిఃస్నాద్. 40 దనిజ్ సాన్పిస్తిజ్ నీ సిసూర్జ బతిమాల్త గాని వారు కిదెజ్ అటవెతార్", ఇజి మొరొ కిత్రాన్.

41 అందెజె యేసు, "యా తరమ్దు మనికిదెరా, మీరు తప్పు సరిదు నడఃపె ఆజినికిదెర్. నమకం సిలికిదెర్. ఎసాడ్ రోస్కు మీవెల మంజిన? మీరు కినికెజ్ ఎసా ఓరిస్తిజ్?", ఇజి వెహ్ండ్రె, "నీ మరినిజ్ ఇబ్బె తగ్ల", ఇజి వన్నిజ్ వెహ్సాన్.

42 ఆ కొడః వాజిమహివలె వన్నిజ్ అసి మహి దెయం వన్నిజ్ అర్పాదె గజ గజ వణకిస్తాద్. అయావలె యేసు ఆ దెయమ్దిజ్ సాన్ల ఇజి డటిసి వెహ్సాన్. కొడఃదిజ్ నెగెన్ కితాండ్రె అసాసిజ్ ఒవజెప్తాన్. 43 లోకుర్ యా జగ్గితిక సుడఃతార్, దేవుణు గొప్ప సత్తు మనికాన్ ఇజి నండొ బమ్మ ఆతార్. 44 యేసు కితి పణి వందిజ్ లోకుర్ విజెరె బమ్మ ఆజి మహివలె, వాండ్రు ఈహు వన్ని సిసూరిజ్ వెహ్సాన్. "నాను యేలు వెహ్సాని మాటెజ్ బాగ వెంజి పోస్ఎండ మండ్రు. లోకు మరిసి ఆతి నాను లోకు కీదు ఒవజెపె ఆనాల", ఇజి. 45 గాని వాండ్రు వెహ్సా మాటెజ్ వరిజ్ అర్దం ఆవతాద్. దేవుణు ఆక డాప్తాన్. ఎందనిజ్ ఇహిజ వారు అర్దం కిఎండ మండ్రెజ్. ఆ మాట వందిజ్ వన్నిజ్ వెన్బాదెజ్ వారు తియెల్ ఆతార్.

పెరికాన్ ఎయెన్ఇజి గొడఃబ రేప్పినార్

46 సిసూరు లొఇ ఎయెన్ పెరికాండ్రొ ఇజి ఉండ్రీ ఇజి గొడబ వాతాద్. 47 యేసు వరి మన్సుదు మన్ని ఆలోసన నెస్తాండ్రె ఒరెన్ ఇజి కొడఃదిజ్ అస్తాండ్రె వన్ని పడఃకాద్ నిల్పాన్. 48 నిల్పొ వెన్కా వాండ్రు వరిజ్, "ఎయెన్బా యా ఇజి కొడఃదిజ్ నా ముస్కు నమకం ఇడ్డికాన్ఇజి ఒడిఃబిజి డగ్రు కితిజ, నజి డగ్రు కితి వజ. నజి డగ్రు కితికాన్ నజి పాక్తి దేవుణు డగ్రు కితి వజ. మీ లొఇ ఎయెన్ తగిజి మంజి నాండ్రొ వాండ్రె పెరికాన్", ఇజి వెహ్సాన్. 49 అయావలె యోహాను, "బోదకినికి, నీ సత్తుదాన్ దెయమ్కాజ్ పాక్తి మహి ఒరెన్ వన్నిజ్ మాపు సుడఃతాప్. వాండ్రు మా వెల మనికాన్ ఆవెన్. అందెజె మాపు వన్నిజ్ అడ్డు కితాప్", ఇజి వెహ్సాన్. 50 అందెజె యేసు, "వన్నిజ్ అడ్డు కిమాట్. ఎందనిజ్ ఇహిజ, మీ ముస్కు పగ సిలికాన్ మీ దరిజ్ మనికాన్", ఇజి వన్నిజ్ వెహ్సాన్.

యెరూసలేమ్దు పయాణం కిజినాన్

51 యేసు పరలోకమ్దు సాండ్రెజ్ దిన్మకుడగ్రు ఆతివెలె వాండ్రు మన్సు పూర్తి నమకం కిజి యెరూసలేమ్దు సాండ్రెజ్ సాతాన్. 52 వాండ్రు వన్నిజ్ మండ్రెజ్ బాడ్డిః తయార్ కిదెజ్ ఇజి సెగొండారిజ్ ముజాల్ పాక్తాన్. వారు దని వందిజ్ సమరియ ఇసన్ని దేసెమ్ది ఉండ్రీ నాటొ వాతార్. 53 గాని నాటొణికార్ వన్నిజ్ డగ్రు కితితార్. ఎందనిజ్ ఇహిజ వాండ్రు యెరూసలేమ్దు మన్ని దేవుణు గుడిఃదు సాని ఒరెన్ యూద వాండ్రు. 54 సిసూర్జ లొఇ యాకోబు, యోహాను ఇనికార్ యాక సుడఃతార్, "ప్రబువా, యా లోకురిజ్ నాసనం కిదెజ్ ఆగాసం దాన్ మాపు సిసు తపిస్తిజ్ నిజి ఇస్టమ్నెనా?", ఇజి వెన్బాతార్. 55 యేసు వరి దరొట్ మహ్తాండ్రె వరిజ్ గటిజ వెహ్సాన్. 56 నస్తివలె వారు మరి ఉండ్రీ నాటొ సాహార్. 57 వారు సరిదాన్ సాన్ని మహివలె, ఒరెన్, "నీను ఎంబె సాహిజ్బా నాను నీ వెల వానా", ఇజి వన్ని వెట వెహ్సాన్. 58 అందెజె యేసు, "నక్కెజ మండ్రెజ్ బొరొజ్మన్నె. ఆగాసమ్ది పాటిజ మండ్రెజ్ గూడుఃకు మనె. గాని లోకు మరిసి ఆతి నజి బుర్ల అడ్డు కిదెజ్బాడి సిల్లెద్", ఇజి మర్జి వెహ్సాన్. 59 వాండ్రు మరి ఒరెన్ వన్నిజ్, "నా వెట రల", ఇజి వెహ్సాన్. అయావలె అయా వాండ్రు, "ప్రబువా, ముజాల నాను సాన్ని నా బుబ్బెజ్ ముసి వానా", ఇజి వెహ్సాన్. 60 అందెజె యేసు, "సాతికారె వరి సాతివరిజ్ముస్తిజ్. గాని నీను సాన్ని దేవుణు ఏలుబడిః వందిజ్ బోదసెల", ఇజి వెహ్సాన్. 61 మరి ఒరెన్, "ప్రబువా, నీ వెట నాను వానా. గాని నాను ముజాల మర్జి సాన్ని నా ఇండ్రొణి వరిజ్ వెహ్సాన్ వాన", ఇజి వెహ్సాన్. 62 అందెజె యేసు, "మేడిః ముస్కు కియు ఇడ్డి వెన్కా మర్జి బేస్సికాన్ ఎయెన్బా దేవుణు ఏలుబడిః కినివరి లొఇ ఎందనిజ్ పణిదిజ్ రఇకాన్", ఇజి వెహ్సాన్.

డబయ్ మణిసి సిసూరిజ్ సువార్త వందిజ్ పాక్సినాన్.

10 యాక జగ్గితి వెనుక, ప్రబు మరి డబయ్ మణిసి సిసూరిజ్ ఏర్పాటు కితాన్. వాండ్రు సాని విజా పట్టుమ్కాజ్ విజా బాడిఃదు వన్ని ముజలె రిఎరిజ్ రిఎరిజ్ పాక్తాన్. 2 పాక్సి, వాండ్రు వరిజ్ ఈహు వెహ్సాన్, "కొయ్దెజ్ మన్నిపంబ లెకెండ్రొ లోకుర్ నండొండార్ మన్నె. గాని తక్కునె కొయ్నికార్ తక్కునె అందెజె వన్ని పంబ కొయ్నివందిజ్ పణికిని వరిజ్ పోక్ల, ఇజి కోత్త ఏజామానిజ్ బతిమాల్దు ఇజి వెహ్సాన్. 3 మీరు సాండ్రు! ఇదిలో, కార్నుకుడిఃజ నడిఃమి గొర్రె

† వాండ్రు వెహ్సాక ఇనికదొ వన్నిజె తెలిపిద్

పిల్లకాజ్ పాక్తిలెకెండ్ నాను మిజి పాక్సిన. 4 మీరు సన్ని గాని, డబ్బుజ్ ఇడ్డి సన్ని గాని, సన్నిదు మరి ఉండ్రీ జత జోడేకు గాని ఒకెజ్ అవెద్. మీరు సర్దు ఎయెరిజ్ నెగెణ్ మనిదా ఇజి నిల్పి వర్గజి, సమయం పాడు కిమ. 5 మీరు ఎయె ఇండ్రొ బా సానివలె, "యా ఇండ్రొ మంజిని వరిజ్ సమాదనం కల్లిపిద్ ఇజి ముజాల వెప్తు. 6 సమాదనం కోరిజినికాన్ ఒరెన్ బాన్ మహిజ, మీ సమదనం వన్ని ముస్సు, మంజినాద్. సిలిజ, మర్జి మీ బానె వానాద్. 7 వారు ఇనిక సిలిజ్ బా ఉణిజి తింజి బానె మండ్రు. ఎందనిజ్ ఇహిజ, పణి కిని వన్నిజ్ వన్నిజ్ కావాలి సైజ్ దోహ్ కైజ్ తగ్గికాన్. ఇల్కు ఇల్కు బూలమాట్.

8 మరి మీరు ఎమేణి పట్నమ్దు సానివలె వారు మిజి డగ్రు కిజి ఇనిక సిలిజ ఆకదె ఉండు. 9 బాన్ మని కస్టమ్ది వరిజ్ నెగెణ్ కిదు. దేవుణు ఏలుబడి కిని కాలం మీ డగ్రు వాత మనాద్ ఇజి వరిజ్ వెప్తు. 10-11 గాని మీరు ఎమేణి పట్నమ్దుబా సానివలె వారు మిజి డగ్రు కిపిండ మహిజ, అయా పట్నమ్ది వీదిజ సాన్ని, "మా పాదమ్కాజ్ కస్తి మన్ని మీ పట్నమ్ది డుల్లిబా ఇబ్బె దుల్లిప్పి సానిసినావ్. ఎందనిజ్ ఇహిజ, దేవుణు మీ ముస్సు కోపం ఆత మనాన్ ఇజి తోరిస్తెజ్. గాని ఒడేబిదు ఏలుబడి కిని కాలం డగ్రు ఆత మనాద్ ఇజి తవ్విండ నెస్తు", ఇజి వెప్తు. 12 నాను మిజి వెహిసిన, దేవుణు తీర్పు కిని దినమ్దు యా పట్నమ్ది వరిజ్ సిక్కు మరి నండొ మంజినాద్. సాదొమ పట్నమ్దు మహి లోకురిజ్ నసా మన్ఎద్. 13 ఓ కొరాజి పట్నమ్దు మనికిదెరా, అబాయా మిజి ఎసా పెరి కస్టమ్కు వానెలె. ఓ బెత్సెయుద పట్నమ్దు మనికిదెరా, అబాయా మిజి ఎసా గొప్ప పెరి కస్టమ్కు వానెలె. ఎందనిజ్ ఇహిజ, మీ నడిమి కితి బమ్మాతి గొప్ప పణిజ్ తూరు సిదొను ఇని పట్నమ్కాజ్ కినిక ఇహిజ, వారు పూర్బమ్దునె బస్త గరండెజ్ తోహా ఆజి, నీరు వాకె అజి, పావమ్కు డిస్తావ్ ఇజి తోరిస్తారె మరి. 14 దేవుణు తీర్పు కినివలె మీ పట్నమ్కాజ్ సిక్కు, తూరు సిదొను పట్నమ్కాజ్ నండొ మంజినాద్లె. 15 కపర్నహాము పట్నమ్దు మనికిదెరా, ఆగానం దాక గొప్ప పెరికావ్ ఇజి ఒడిబిజినిదెరా? సిల్లె, దేవుణు మిజి వాండ్రు మంజిని బాడిదాన్ అర్పాన్లె. ఇహిజ, దేవుణు మిజి నాసనం కినాన్లె. 16 మరి యేసు వన్ని సిసూరిజ్, "మీ మాట వెనికాన్ నా మాట వెనాన్. మీ మాటదిజ్ నెక్కు పాక్సికాన్, నా మాటదిజ్ నెక్కు పాక్సాన్. నా మాటదిజ్ నెక్కు పాక్సికాన్, నజి పాక్తి వన్నిజ్ నెక్కు పాక్సాన్", ఇజి వెప్తున్. 17 డబయ్ మణిసి సిసూరు సరదాన్ మర్జి వాతారె, "ప్రబుబా, దెయమ్కుబా, నీ అతికారం దాన్ సాండ్రు ఇజి మాపు ఆడ్ర సీజినివలె మజి లోబడిజినె", ఇజి వెప్తున్. 18 సస్తివలె యేసు, "ఒఒ, నయ్తాను మిరిస్తి లెకెండ్ వన్ని అతికారం సిల్లెండ ఆగాసమ్దాన్ అర్తిక నాను సుడేత 19 సారన్కాజ్ సారకుపిజ మట్టెజ్ మిజి అతికారం సిత మన్న. నయ్తాను సత్తుదిజ్ గెలిస్తెజ్ మిజి అతికారం సిత మన్న. నయ్తాను మిజి ఇనికబా కిదెజ్ అట్ఎన్. 20 దెయమ్కు మిజి లోబడిజినె ఇజి సరద లాపు ఆమ. గాని దేవుణు మీ పేరు వాండ్రు మంజిని బాడిదు రాస్త మనాన్ ఇజి నండొ సరద ఆదు", ఇజి వెప్తున్ 21 అయావలె యేసు, దేవుణు ఆత్మదాన్ నండొ సరద ఆజి, "ఓ బా, నీనె ఆగాసమ్దిజ్ బూమిదిజ్ ప్రబు. నాను నిజి పాగిడిజినె. ఎందనిజ్ ఇహిజ, గెణం మని వరిజ్, సదు మని వరిజ్, యా నిజమాతి సజతి డాప్పిది, ఇజి కొడొ లెకెండ్ మని వరిజ్ తోరిస్తి. ఒఒ బా, అయ లెకెండ్ కిదెజి నిజి ఇస్టం ఆతాద్. 22 నా బుబ్బు నజి విజా సజతిజ్ నా కీదు ఒపజెప్తు మనాన్. మరిసి ఎయెండ్రొ ఇజి అప్పాసి నెన్నాన్. మరి ఎయెన్బా నెన్ఎన్. అప్పాసి ఎయెండ్రొ ఇజి మరిసి ని అప్పాసిజ్ తెలివి కిదెజ్ మరిసి ఎర్లికారెనె నెన్నార్. మరి ఎయెన్బా నెన్ఎన్", ఇజి వెప్తున్.

23-24 వాండ్రు సిసూర్ దరోట్ మహ్తాండ్రె, "దేవుణు వందిజ్ వాండ్రు కిని ఏలుబడి వందిజ్ మీరు సుడేతి గొప్ప సజతిజ్ సుడేదిజ్ అట్టి మీరు అంతు సిల్లి సరద మంజినికారె. ఎందనిజ్ ఇహిజ, నండొ ప్రవక్తరు, రాజురుజు మీరు సుడేజినికెజ్, సుడేదిజ్ ఇజి ఆస ఆతారె గాని సుడేదిజ్ అట్ఎతారె. మీరు వెహికెజ్ వెండ్రెజ్ ఇజి ఆస ఆతారె గాని అట్ఎతారె", ఇజి వన్ని సిసూరిజ్ నె వెప్తున్.

పడకాదికాన్ ఎయెన్ ఇనివందిజ్ యేసు వెహిసినాన్

25 ఉండ్రీ నాండిజ్, యూదురు రూలు నెన్పిన్నాన్ ఒరెన్ నిజ్జి, "ఓ బోదకినికి, ఎలాకాలం దేవుణు వెట బత్కిని బత్కు దోహ్క నాను ఇనిక కిదెజ్?", ఇజి యేసుజ్ వరిక్కు కిజి వెన్బాతాన్. 26 అందెజె వాండ్రు, యూదురి రూలుదు ఇనిక రాస్త మనాద్. బాన్ ఇనిక సద్విజిని?", ఇజి వెప్తున్. 27 వాండ్రు, "సి ప్రబుఅతి దేవుణుదిజ్ నీ పూర్తి మన్నుదాన్, నీ పూర్తి పాణమ్దాన్, నీ పూర్తి సత్తుదాన్, నీ పూర్తి బుద్దిదాన్ ప్రేమిస్తెజ్". మరి, "నిజి నీను ప్రేమిసిని లెకెండ్ మహివరిజ్ ప్రేమిన్ల ఇజి రాస్త మనాద్", ఇజి వెప్తున్. 28 అందెజె యేసు, "నీను నెగెణ్ వెప్తి. ఆహా కిల. అయావలె నీను ఎలాకాలం దేవుణు వెట బత్కినిలె", ఇజి వన్ని వెట వెప్తున్. 29 అయావలె అయా యూదురి రూలు నెన్పిన్నాన్ నీతి నిజాయితి మనికాన్ నాను ఇజి తోరె ఆదెజ్ ఈహు వెన్బాతాన్, "నా పడకాదికాన్ ఎయెన్?", ఇజి. 30 అందెజె యేసు ఈహు మహి వెప్తున్. "ఒరెన్ యెరూసలెమ్దాన్ డిగెజి యెరికొ పట్నమ్దు సానివలె సెగొండారె డొజారి వన్నిజ్ అస్తారె. అస్తారె, వాండ్రు తొడిగితి మహికెజ్ లాగితారె. వన్నిజ్ ఇజి పాణం ఇట్టారె డెయితారె డిస్తె సాహార్. 31 యావలె ఒరెన్ యూదురి పుజెరి ఆ సరిదాన్ సాండ్రెజ్ పణి తాక్తాద్. వాండ్రు వన్నిజ్ సుడేతాండ్రె పడకదాన్ సాహార్. 32 అయా లెకెండ్నె, లేవి † ఒరెన్ ఆ సరిదాన్ నె సాహార్. గాని వాండ్రుబా సుడేతాండ్రె పడకదాన్ ఎర్లిజి సాహార్. 33-34 అయా సరిదాన్ నె ఒరెన్ సమరియ వాండ్రు పయాణం కిజి మహాన్. వాండ్రు అర్తి మని వన్నిజ్ సుడేతాండ్రె వన్ని పాణం నొతాద్. వన్ని డగ్రు సాహాండ్రె ఒలివ ఇని నూనె, ద్రాక్కుకల్లు వాక్తాండ్రె వన్ని గాయమ్కాజ్ తోహ్కాన్. వాండ్రు వన్ని సాంత గాడె ముస్సు ఎక్కిస్తాండ్రె ఉండ్రీ లార్జి ఇండ్రొ సాహార్. వన్నిజ్ నెగెణ్ సుడేతాన్. 35 మహ్న నాండిజ్ వాండ్రు రుండి వెండి రుపాయుజ్ లాగితండ్రె లార్జి సవ్కారిజ్ సితాన్. సితండ్రె, "వినిజ్ నెగ్రెండ సుడేత. వినివందిజ్ మరి కర్పు ఆతి మహిజ నాను మర్జి వానివలె అయా డబ్బు నిజి సీన", ఇజి వన్ని వెట వెహ్తాండ్రె సాహార్. 36 యా కత వెహ్తి వీస్తి వెనుక, యేసు వన్నిజ్, "డొజారి అస్తి వన్నిజ్ యా మువర్ లొఇ ఎయెన్ పడకాదికాన్ ఆనాన్, ఇజి నీను వెహ్ల", ఇజి వెన్బాతాన్. 37 యూదురి రూలు నెన్పిన్నాన్, "పన్ని ముస్సు పాణం నొత్తికాండ్రె, వన్ని పడకాదికాన్", ఇహాన్. అందెజె యేసు, "నీను సాన్ని యా లెకెండ్నె కిల", ఇజి వెప్తున్.

మార్త మరియ

38 యేసు ని వన్ని సిసూరు పయనం కిజి సాన్ని మహార్. ఉండ్రీ నాటొ సాహార్. అబ్బె మార్త ఇన్ని ఉండ్రీ బోదెలి దన్ని ఇండ్రొ వన్నిజ్ డగ్రు కిత్తాద్. 39 దనిజ్ మరియ ఇన్ని ఉండ్రీ తజిసి మనాద్. అది ప్రబు పాదమ్క డగ్రు బస్తాదె వన్ని బోద వెంజి మహాద్.

† దేవుణుగుడిదు రోజా సీవ కిని లేవి జాతిదు మన్నికాండ్రె లేవి ఇనికాన్.

40 మార్త విజా పణి వందిజ్ నండొ బాద ఆజి వన్ని డగ్గు వాతాద్. వాతాదె, “ప్రబువా, నాను ఒరెనె పణి కిదెజ్ నా తజి డిఃస్త మనాద్. నిజి బాద సిల్లెదా? నజి తోడుః కిల ఇజి దనిజ్ వెహాల”, ఇజి వెహాద్. 41-42 అందెజె యేసు, “మార్త, నీను నండొ పణిజ వందిజ్ విసారిసి బాద ఆజిని. గాని ముకెలమతిక ఉండ్రె. మరియ అయా నెగ్గి దనిజ్ కోరితాద్. దన్నిబాణిజ్ ఎయెన్బా అయాక లాగ్గి ఒతెజ్ అట్ఎన్”, ఇజి వెహాన్.

యేసు పార్దనం నెస్పిస్తాన్

11 ఉండ్రె నాండిజ్ యేసు ఉండ్రె బాడిఃదు పార్దనం కిజి మహాన్. వాండ్రు పార్దనం వీన్తి వెనా, వన్ని సిసూర్ లొఇ ఒరెన్, “ప్రబువా, యోహాను వన్ని సిసూరిజ్ పార్దనం నెస్పిస్తాన్. అయాలెకండ్రె మజిబా పార్దనం నెస్పిస్అ”, ఇజి వన్నిజ్ వెహాన్. 2 అందెజె యేసు వరిజ్, మీరు పార్దనం కినివెలె ఈహు వెహు. “ముస్సు, మన్ని మా బుబ్బు, లోకుర్ విజెరె నీ పేరు గొప్ప నెగ్గెక ఇజి గవరం సిపిర్. నీను లోకుర్ విజెరిజ్ ఏలుబడిః కిపిన్. 3 రోజు రోజు కావాలిన్తి టిండి మజి సిదా. 4 మజి పావమ్కు కితి వరిజ్ మాపు సెమిన్తి వజ నీను మా పావం సెమిన్అ. తప్ప కిబిన్తిసెఇ అనిజ్ మాలోఇ రెవండ్రె మజి ఇడెఃఅ”, ఇజి వెహాన్. 5-6 మరి యేసు వరివెలె ఈహు వెహాన్. “మీ లొఇ ఒరెన్ వన్నిజ్ ఒరెన్ కూలాయెన్ మనాన్. నీను మదరయితు వన్నిబాన్ సాన్ని, ‘ఓ కూలవాండ్రు, నజి మూండ్రె రొట్టెజ్ బదలు సిదా. ఎందనిజ్ ఇహిజ, మరి ఒరెన్ కూలాయెన్ వయాణం కిజిని సరిదాన్ నా బాన్ వాత మనాన్. వన్నిజ్ సీదెజ్ నాబాన్ ఇనికబా సిల్లెద్”, ఇజి వెహిని.

7 అయావలె వాండ్రు లొఇహాన్, “నజి బాద కిమ. సెహాల కెహ్తా మనాద్. నా ఇజి కొడోఃర్ నా వెట నిద్ర కిజినార్. నిజ్జి సీదెజ్ నాను అట్ఎ”, ఇజి వెహానండ్రా? 8 నాను మిజి వెహిన్, వన్నిజ్ నిజ్జి సీదెజ్ ఇస్టం సిలిజ్బా వాండ్రు నిజ్జి సీనాన్. ఎందనిజ్ ఇహిజ, వాండ్రు కూలాయెన్ ఇజి ఒడిఃబిజి అహు కిపిన్. గాని సిగు డిస్తాండ్రె ఏక ఏక లొసినాన్ ఇజి ఒడిఃబిజి నిజి కావలన్తిక విజా సీనాన్. 9 అందెజె నాను మిజి వెహిన్, మీరు ఇనిక లొస్పిదెరో, అక్కు దేవుణు మిజి సీనాన్. ఇనిక మీరు రెబాజినిదెరో అక దేవుణు మిజి సీనాన్. కొత్తు, మీ వందిజ్ దేవుణు సేహ్లా రెనాన్లె. 10 ఎందానిజ్ ఇహిజ, లొస్పి విజెరిజ్ దోహాక్సె. రెబాని వన్నిజ్ తోరె ఆజినాద్, కొత్తిని వన్నివందిజ్ సిహ్లా రే ఆనాద్.

11 మీ లొఇ అప్పాసి ఆతికాన్ ఎయెన్బా, వన్ని మరిసి మొయ లొస్పిజ, సరాన్ సీనాండ్రా? 12 కొరు గుడ్డు లొస్పిజ, సార్కుప్పి సీనాండ్రా? 13 అహిజ, మీరు సెఇకిదెర్ ఆతిజ్బా, మీ కొడోఃరిజ్ నెగ్గి ఇనాయమ్కు సీదెజ్ నెస్పిదెర్. అహిజ, ముస్సు, మన్ని మీ బుబ్బు వన్నిజ్ లొస్పి వరిజ్ ఎసానో దేవుణు ఆత్మ సీనాన్”.

యేసు బయిల్జెబెలు

14 యేసు ఒరెన్ వన్ని బాణిజ్ గుల్ల దెయమ్దిజ్ పేర్జి మహాన్. ఆ దెయం డిఃస్తి సాహి వెనా, గుల్ల ఆతి మహికాన్ వర్గితాన్. అక సుడఃతారె లోకుర్ విజెరె బమ్మ అతార్. 15 గాని వరి లొఇ సెగొండార్, “దెయమ్కాజ్ నెయ్కె ఆతి బయిల్జెబెలు సత్తుదాన్ వీండ్రు దెయమ్కాజ్ పేర్జినాన్ ఇజి వర్గితార్. 16 మరి సెగొండార్ వన్నిజ్ వరిన కిదెజ్ సుడఃతారె. దేవుణుని వినిజ్ఘాక్త మనాన్ ఇజి రుజాప్ కిదెజ్ ఉండ్రె గుర్తు లెకండ్రె ఉండ్రె బమ్మ అని పణికిజి తోరిన్అ ఇజి వెహాన్. 17 వాండ్రు వరి ఆలోసన నెస్తాండ్రె వరి వెట ఈహు వెహాన్, “ఎమేణి దేసెమ్దికార్బా వరిజ్ వారె జటిజ్ ఆజి కేట ఆతిజ పాడాఃనాద్. ఆహె, ఉండ్రె కుటుమ్దికార్బా వరిజ్ వారె జటిజ్ ఆజి కేటఆతిజ, ఆ కుటుం నిల్పెద్. 18 అయాలెకండ్రె సయ్యాను దెయమ్కుబా వరిజ్ వారె జటిజ్ఆజి కేట ఆతిజ, సయ్తాను వరి ముస్సు కిని ఏలుబడిః ఎలాగ నిల్నాద్? సయ్యాను సత్తుదాన్ నాను దెయమ్కాజ్ పేర్జిన ఇజి మీరు వెహినిదెర్ గదె. 19 అహిజ, మీ సాంత లోకుర్ ఇన్ని దని దనటాన్ దెయమ్కాజ్ పేర్జినార్. అందెజె మీ సాంత లోకుర్నె మీరు తప్పిదెర్ ఇజి రుజాప్కిజినార్. 20 నాను దేవుణు సత్తుదాన్ దెయమ్కాజ్ పేర్త మన్నుఇహిజ దేవుణు ఏలుబడిః కినిక మీడగ్గు వాతమనాన్ ఇజి రుజాప్ ఆజినాద్.

21 విజా అయిదమ్కు తొడిగిజి ఒరెన్ సత్తుమనికాన్ వన్నిఇల్లు అస్తి విజా కాప్ కితిజ, ఇనికబా సారిసాన్ఎద్. 22 గాని వినిజ్ మిన్తి నండొ సత్తు మనికాన్ ఒరెన్ వినిజ్ అస్తాండ్రె విని ముస్సు గెలిన్తిజ, వీండ్రు నమ్మితి అయిదమ్కు విజా వాండ్రు లాగ్గి, విని ఆస్తి సీబాన్ సీనాన్. 23 నా దరిజ్ మన్ఇకాన్ నజి వగాతికాన్. నా వెట మంద కిఇకాన్, సెత్రిస్తాన్. 24 ఉండ్రె దెయం ఒరెన్ వన్నిజ్ డిఃస్తి సాహి వెనక, దనిజ్ మండ్రెజ్ బాడ్డి రెబాజి బయిలుదు బూలాజినాద్. గాని ఎంబెబా దనిజ్ బాడ్డి దోహాక్ఇతిజ్, “నాను డిఃస్తి వాతి నా ఇండ్రె మర్జి సానాలె”, ఇజి వెహాన్. 25 మర్జి వాతిజ్ అది డిఃస్తివాతికాన్ నెగెండ్రె సిపాజి సుబ్బరం కిజి ఇల్లు లెకండ్రె, నెగెన్ మనాన్ ఇజి నెస్తాద్.

26 నస్తివలె అది మర్జి సాన్ని దనిజ్ ఇంక సెఇకెజ్ ఆతి మరి ఏడు దెయమ్కాజ్ కూక్త తనాద్, అవిక్ వన్ని లొఇ సాన్ని అబ్బు కినె. అయవలె వన్ని గతి ముందాహి దన్నిజ్ ముస్సు క్షప్తమానాద్. 27 యేసు యా మాటెజ్ వెహిన్ మహివలె, ఆ మంద లొఇ మన్ని ఉండ్రె బోదెలి, “నిజి కాస్తి పాసకితి నీ యాయ అంతు సిల్లి సర్ద మంజినికాద్”, ఇజి డటం వెహాన్. 28 అయావలె వాండ్రు, “నిజమనె, గాని దేవుణు మాట వెంజి అయావజ నడిఃని విజెరెబా అంతు సిల్లి సర్ద మంజినికార్”, ఇజి వెహాన్.

29 లోకుర్ మరి నండొ కూడిఃతి మహివలె, వాండ్రు ఈహు వెహాన్. “యా తరమ్దికార్ నండొ సెఇకార్. వారు ఉండ్రె గుర్తు లెకండ్రె ఉండ్రె బమ్మ అని పణి కిల ఇజి వెనెబాజినార్. గాని దేవుణు ప్రవక్త ఆతి ఓనెజ్ జర్గిదిక అఎండ, మరి ఇన్ని గుర్తుబా వరిజ్ తోర్ఎద్. 30 నినవె పట్టుమ్దివరిజ్ ఓనె ఎలాగ ఉండ్రె గుర్తు మహండ్రె అయాలెకండ్రె లోకు మరిసిఆతి నాను యా తరమ్దివరిజ్ ఉండ్రె గుర్తు మనాన్. 31 అక్కిరి దినమ్ది తీర్పుదు, దనిజ్ దేసెమ్ది రాణి యా తరమ్ది లోకుర్ వెట నిజ్నాదె వరి ముస్సు నేరం మొప్పాద్. ఎందనిజ్ ఇహిజ, సాలోమోను వెహిన్ గెణం మన్ని మాటెజ్ వెండ్రెజ్ బూమి కొసారు మన్ని దని దేసెమ్దాన్ అది వాతాద్. ఏలు సాలోమునుజ్ మిన్తి పెరికాన్ ఇబ్బె మనాన్. 32 కడఃవేరి దినమ్ది తీర్పు, నినివె పట్టుమ్ది లోకుర్ యా తరమ్ది లోకుర్ వెట నిల్నారె, వరి ముస్సు నేరం మొప్పార్. ఎందనిజ్ ఇహిజ, ఓనె వెహి బోద వెహారె, వారు పావమ్కు డిఃసి ఒప్పుకొటార్. ఏలు ఓనెజ్ మిన్తి పెరికాన్ ఇబ్బె మనాన్.

ఒడొలేది దీవవందిజ్ వెప్పినాన్

33 ఎయెర్బా దీవ కసిసి వెనుక డాప్పినో, తూము మునినో ఇడవెర్. గాని లోఇ వానివరిజ్ జాయి తోరదెజ్ ఇజి దీవ కంతుూదుద్నె ముస్సునె ఇడ్వార్. 34 నీ ఒడొలేది దీవ లెకండె నీ కణుకు. నీ కణుకు నెగ్రెండ మనివలె, నిజీ విజా సుడొడెజ్ ఆనాద్. అయాకెజ్ సెఇకెజ్ ఆతిజ, నిజీ సుడొడెజ్ అల్ఇ. 35 అందెజె సీకటు మన్ఎండ, నాను నెస్పిస్సి నిజమాతి సజతిజ్ ఆతి జాయి మీ మన్సుదు మండ్రెజ్ సుడొడు. 36 అందెజె మన్సు పూర్తి అయా జాయిదాన్ నిడ్రింతి మహిజ, అయాక నాను నెస్పిస్సి వజ, నెగ్రెండ మీరు బత్రిజినిదెర్ ఇజి తోర్వాద్. ఉండ్రీ పెరి జాయి నీ ముస్సు డెయితిజ ఎలాగ మంజినాద్, అయాలెకండె అయా జాయి నాను నెస్పిస్సి వజ మీరు బత్రిజినిదెర్ ఇజి తోర్వాద్. 37 యేసు వర్గిజి వీస్తి వెనుక ఒరెన్ పరిసయు వాండ్రు, వన్ని వెట ఉండెజ్ రల, ఇజి కూక్తాన్. అందెజె వాండ్రు లోఇ సాహండ్రె ఉండెజ్ బస్తాన్. 38 ఉణి ముజాల వాండ్రు యూదురిజ్ మన్ని అలవాటు వజ కియు నోర్బా'తాన్ ఇజి నెస్తాండ్రె, ఆ పరిసయు వాండ్రు బమ్మతాన్. 39 అందెజె ప్రబు ఈహు వెహ్వాన్, "పరిసయురుజాండె, లోకుర్ ముస్సుహోన్ మిడిస్తి ఇడ్చి గిన్నెజ్ని సాడువెజ్ లెకండె మన్నికిదెర్? మీరు మిజిబా వెల్లిహాన్ సుడిజు నెగ్రెందె లెకండె తోర్ ఆజినిదెర్. గాని మీ మన్సు సెఇ బుద్దిజాణిజ్, కకుర్తిదాన్ కూడితి ఆసదాన్ నిండ్రెతె మన్నె. 40 బుద్ది సిలికిదెరా, ఒడొలే తయార్ కిత్తి దేవుణునె మీ మన్సుదు మన్ని ఆలోసనమ్కు నెసినికాన్ 41 మీరు కనికారం ఆజి, మిజి కల్లితి మన్ని లోఇహాన్ సిల్లి వరిజ్ దాన సీదు. అయావలె దేవుణు ఎద్రు నెగ్రెకిదెర్ ఆనిదెర్. 42 పరిసయురుజాండె, అబాయా, మిజి ఎసానో కష్టమ్కు వానెలె. ఎందానిజ్ ఇహిజ, పుదిన, సదావ, విజా కుసెజ్, విజా దనిజ్బా దసం బాగం సీజినిదెర్. గాని మీరు లోకురిజ్ నాయం కిఇదెర్. దేవుణుదిజ్ ప్రేమిన్ఇదెర్. రుండిబా ఉండ్రెలెకండె కిజి మంజినిక ఇహిజ ఒడ్డె నెగ్రెండె మహాద్ మరి. 43 పరిసయురుజాండె, అబాయా మిజి ఎసానో కష్టమ్కు వానెలె. ఎందానిజ్ ఇహిజ, యూదురి మీటిజ్ ఇల్కాజ్ ముకెలమాతి బాడిడు బస్సెజ్ మీరు ఆస ఆనిదెర్. సతజ నడిమి పెరికార్ ఇజి మాడెసె ఆదెజ్ కోరిజినిదెర్. 44 పరిసయురుజాండె, అబాయా, మిజి ఎసానో కష్టమ్కు వానెలె. ఎందానిజ్ ఇహిజ, మీరు తోర్ఇ దూకిలెకండె మంజినిదెర్. లోకుర్ దూకి ఇజి నెస్ఎండ వన్కా ముస్సు నడిజినార్. 45 అయావలె యూదురి రూలు నెస్పిస్సాన్ ఒరెన్, "బోదకినికి, నీను యా లెకండె వెప్పి మజిబా దుసలాడిజిని", ఇజి వెహ్వాన్. 46 అందెజె యేసు, యూదురు రూలు నెస్పిస్సికిదెరా, అబాయా మిజి ఎసానో కష్టమ్కు వానెలె. ఎందానిజ్ ఇహిజ, లోకుర్ కిడెజ్ ససా కష్టం మన్ని యూదురి రూలుజ్, అలవాటుజ్ వారు కిడెజ్ ఇజి వెప్పినిదెర్. గాని మీరు వరిజ్ ఉండ్రీ డుడొస్సు దాన్బా తోడు: కిఇదెర్. 47 యూదురి రూలు నెస్పిస్సికిదెరా, అబాయా మిజి ఎసానో కష్టమ్కు వానెలె. ఎందానిజ్ ఇహిజ, మీ అనిరిజ్ సప్తి ప్రవక్తరి, దూకిజ్ ముస్సు మీరు గుండమ్కు పెర్జినిదెర్. 48 అయావలె వారు కితిపణివెట మీరు కూడితి మనిదెర్ ఇజి రుజాప్ కిజినిదెర్. సాక్సెర్లెకండె మనిదెర్ వారు ప్రవక్తరిజ్ సప్తార్. మీరు వరి గుండమ్కు పెర్జినిదెర్. 49 అందెజె, దేవుణు వన్ని గెణమ్దాన్, 'నాను వరి నడిమి ప్రవక్తెజ, అపొస్తుడుజ ఫొక్కు. వరి లోఇ సెగొండారిజ్ వారు సప్తార్లె. మరి సెగొండారిజ్ మాలెజ్ కిసార్లె. 50-51 యా లోకం పుట్టి బాణిజ్ మొదొల్లి లోకుర్ సప్తి విజా ప్రవక్తరి నల్ల వందిజ్ యా తరమ్ది లోకురిజ్ సిక్కు వానాద్. ఇహిజ, ఏబేలు నల దాన్ మొదొల్లి జెకరియ నల దాక. జెక్రయెజ్ నంద సుర్మి మాలి పీటని దేవుణు వందిజ్ కేటాలె గది, దినిజ్ నడిమినె సప్తార్. వరిజ్ విజెరిజ్ సప్తికెజ్ విజా యా తరమ్దివరి పణినె ఇజి నాను నిజం మీవెట వెప్పినాన్.

52 యూదురి రూలు నెస్పిస్సికిదెరా, అబాయా, మిజి ఎసానో కష్టమ్కు వానెలె. ఎందానిజ్ ఇహిజ, దేవుణు వందిజ్ మన్ని గెణమ్దు నడిపిసిని సేహాలది తాలం మీరు ఆనినిదెర్. మీరు దేవుణుదిజ్ టెబాజ్ నెస్ఇదెర్. దేవుణుదిజ్ నెస్సెజ్ ఆస మన్ని వరిజ్ మీరు అడ్డు కిజినిదెర్. 53-54 వాండ్రు అబెదాన్ సాహి వెనుక, పరిసయురు యూదురి రూలు నెస్పిస్సికార్ నండొ కోపమ్దాన్ వన్నిముస్సు నేరం మొప్తార్. వన్ని వెయ్దాన్ వాని మాటెజ లోఇ తపుజ్ అస్సెజ్ ఇజి నండొ సజతిజ వందిజ్ ప్రస్సెజ్ వెనబాజి మహార్.

12 నస్తివలె వెయుజ్వెయుజ్ లోకుర్ కూడిజి వాతార్. ఒరెన్దిజ్ ఒరెన్ మట్టె ఆజి మహార్. అయావలె యేసు ముజాలె వన్ని సిసూర్ వెట ఈహు వర్గిదెజ్ మొదొల్స్తాన్. "మాపు నెగ్రెకాప్ ఇజి పరిసయేరు తోర్ ఆని వేసం, పులూని దూరు లెకండె మనాద్. అందెజె జాగర్త మండ్రు. 2 డాష్టిక మన్నికెజ్ విజా తోర్ఆనెలె. నెస్ఎండ ముస్సు మన్నికెజ్ విజా నెసె ఆనెలె. 3 అందెజె మీరు సీకటుదు వర్గితికెజ్ జాయిదు వెనార్. ఇహిజ, డాజ్జి వర్గితికెజ్ విజెర వెనార్లె. మీరు గదిజ, గిబ్బుదు వర్గితికె మెడెజు ముస్సు సాట్వార్లె.

4 నా కూలెజాతి మీ వెట వెప్పినా, ఒడొలేదిజ్ సప్తి వెనుక మరి ఇనికబా కిడెజ్ అల్ఇ వరిజ్ తియెల్ ఆహాట్. 5 గాని మీరు ఎయెరిజ్ తియెల్ ఆదెజ్ ఇజి నాను నెస్పిస్సి. ఒడొలేదిజ్ సప్తి వెనుక, ఎలాకాలం మంజిని బాడిడు పాక్తెజ్ అతికారం మన్ని వన్నిజ్ తియెల్ ఆదు. నిజమె నాను వెప్పినా, వన్నిజ్ తియెలాదు. 6 అయేదు వంట పాటిజ రుండి కాసుదిజ్ ఫార్నార్ గదె? గాని వన్కాలోఇ ఉండ్రె దనిజ్బా దేవుణు ఫాస్ఎన్. 7 మీ బురాది కొప్పు విజాబా దేవుణు లెక్కిస్త మనాన్. తియెలామాట్. మీరు నండొ వంట పాటిజ మిస్తి విలువ మన్నికిదెర్.

8 నాను మిజి వెప్పినా, లోకుర్ ముజాలెనజి ఒపుకోణి ఎయెవన్నిజ్బా లోకుమరిసి ఆతి నాను దేవుణు దూతెజ ఎద్రు ఒప్పకోణా. 9 గాని లోకుర్ ఎద్రు నజి నెస్ఎ ఇన్ని వన్నిజ్ దేవుణు దూతెజ్ ఎద్రు నాను బా నెస్ఎ ఇజి వెహ్నా. 10 లోకుమరిసిఆతి నా ముస్సు ఎయెన్బా వడిజు మాట వర్గితిజ, దేవుణు వన్నిజ్ సెమిస్సాన్. గాని దేవుణు ఆత్మదిజ్ దూసిస్సి ఎయెరిజ్బా దేవుణు సెమిస్ఎన్.

11 వారు మిజి యూదురి మీటిజ్ ఇల్కాణిజ్ యూదురి అతికారిజ ఎద్రునో, పెద్దల్జ ఎద్రునో ఒనార్. అయావలె ఎలాగ మరజి వెహ్వాజ్, ఇనిక వెహ్వాజ్, ఇనిక వర్గిదెజ్ ఇజి బెజఆమాట్. 12 ఎందానిజ్ ఇహిజ, మీరు వర్గిదెజ్ మనిక అయా గడియద్నె దేవుణు ఆత్మ మిజి నెస్పిస్సాన్.

ఆస్తివన్ని బుద్దిసిల్లి వన్నివందిజ్నెస్పిసిని కత

13 అయావలె ఆ మందలొఇ ఒరెన్, "బోదకినికిదా, నా బుబ్బ గెణస్తి దనిజ్ నజి వానివంతు సీబాజి సిల ఇజి నా అన్నెజ్ వెహ్వా", ఇజి వెహ్వాన్. 14 అయావలె యేసు, "ఒరె, మీ ముస్సు తీర్పు కిని వన్ని వజనో, సీబాజి సీని వన్ని వజనో నజి ఎయెన్ నిల్తాన్?" ఇజి వెహ్వాన్. 15 మరి వరిజ్ వెహ్వాన్, "జాగర్త మండ్రు. ఇని దనిజ్బా లాపుఆనిజ్ ఆమాట్. ఎందానిజ్ ఇహిజ, ఎసా ఆస్తిమన్నికాన్ ఆతిజ్బా, వన్ని ఆస్తిలోఇ వన్ని బత్సు, ఆవద్. ఇహిజ ఆస్తివన్నిజ్ నిజమాతి బత్సు సివద్.

16 మరి వాండ్లు వరిజ్ కతవజ ఈహు నెన్పిస్తాన్. “ఒరెన్ ఆస్తి మనివన్నిజ్ బూమిదు నండొ పంట పండితాన్. 17 అయావలె వాండ్లు, ‘నా గింజ ఇడ్దెజ్ నజీ బాడ్డి సాల్వద్. అందెజె ఇనిక కిదెజ్?’, ఇజి వన్నిమన్నుదు వాండ్లు ఒడిబితాన్.

18 ఒడిబితాండ్రె, ‘నాను ఈహుకిన. నా గాదిజ్ లాగ్గి పెరికెజ్ కిన. అబె నా గింజెజ్, మహి సామానమ్కుజ్ విజు ఇడ్డు’, ఇజి వెహ్లాన్. 19 మరి నాను, నా వెట ఈహు వెహ్లా, ‘నజీ నండొ పంటెజ్ వందిజ్ నండొ ఆస్తి కుడుఱ్వు మన్న. సుకం ఆల. ఉణల, తిన్ల, సర్ద ఆజి మన్ల’, ఇజి.

20 గాని దేవుణు వన్నిజ్, ఓ బుద్ది సీలికి, యా రెయునె నీ పాణం లొసిన. అయావలె నీ వందిజ్ ఇడ్డి మనికెజ్ ఎయెరిజ్ ఆనెలె? ఇజి 21 సాంత బత్తు, వందిజ్ ఆస్తి కుడుఱ్వు ఎయెరిజ్బా యా లెకెండ్ వానాద్. గాని, దేవుణు ఎర్దు, దేవుణుదిజ్ ఇష్టం ఆనివజ వాండ్లు ఆస్తిమనికాన్ ఆవన్”.

ఇని దనిజ్బా విసారిస్మాట్.

22 మరి, యేసు వన్ని సినూర్వెట ఈహు వెహ్లానాన్, “అందెజె, నాను మిజి వెహ్లాన, మీరు ఇనిక ఉండెజ్ ఇజి పాణం వందిజ్ విసారిస్మాట్. ఇనిక తొడిగిదెజ్ ఇజి ఒడొల్వందిజ్ విసారిస్మాట్. 23 ఎందానిజ్ ఇహిజ, టిండి మున్ను పాణం ముకెలమతిక. సాక్కెజ్ మున్ను ఒడొల్ ముకెలమతిక. 24 కాకిజవందిజ్ సుడెదు. అవి విత్తెజ్, కొయిఉ, వన్నాజ్ గాదినొ గప్పెజ్నొ సిల్లు. గాని దేవుణు వన్నాజ్ తిండి సీజినాన్. అహిజ పాటిజ మున్ను మీరు ఎసా విలవ మనికెదెర్. 25-26 మీ లొఇ ఎయెన్బా విసారిసి వన్ని బత్తుదిజ్ ఉండ్రీ గంటబా కుడుఱ్వు మీ వయసు పిరివ్తెజ్ అట్నెదెరా? అట్నెదెర్. యా ఇజి పణికిదెజ్ మీరు అట్నెదెర్ ఇహిజ మరి ఎందనిజ్ మహి పెరి నజతిజ వందిజ్విసారిస్మిదెర్. 27 పూజదిజ్ సుడెదు. అవి కష్టబడిఉ. సాక కిదెజ్ నూలుజ్ తయార్ కిఉ. ఆజ్బ విజు ఆస్తి కలిగితి మన్ని సాలోమెన్రాజు యా ఉండ్రీ పూజలెకెండ్ సాకు మన్ని ఉండ్రీ సాక్కె తొడిగివితాన్ ఇజి నాను మిజి వెహ్లాన. 28 నేండ్లు మంజి విగెహిజ్ సినూదు విసిర్ని మడిజ మంజిని గడ్డిదిజ్ యా లెకెండ్ దేవుణు సాకు సితాన్, ఇహిజ ఇజిరి నమకం మన్నికెదెరా మరి ఒద్దె నెగెండ్ సాకెజ్ మిజిసాక్కెజ్ తొడిగిన్పింద్రా?

29 ఇనిక ఉండెజ్, ఇనిక తిండ్రెజ్ ఇన్ని దనిజ్ ఎత్తు కిజి విసారిస్మాట్. 30 ఎందనిజ్ ఇహిజ, దేవుణుదిజ్ నెన్ఇకార్నె విన్క, వందిజ్ రెబాజినార్. మిజి యాకెజ్ కావాలె ఇజి మీ బుబ్బాతి దేవుణు నెన్నాన్. 31 గాని దేవుణు మిజి ఏలుబడి: కినాన్ ఇజి ఆసఆదు. అయావలె దేవుణు మిజి కావాలిస్తెకెజ్ విజు సీనాన్. 32 ఇజిరిమంద తియెల్ ఆమాట్. దేవుణు, వన్నిబత్తుదు రాజాలెకెండ్ ఇట్టి వరిజ్ నెగెకెజ్ సీదెజ్ మీ బుబ్బ ఇష్టంఆత మనాన్. 33 మిజి కల్లితి మనికెజ్ పార్ని బిదవరిజ్ సీదు. అయావలె మీరు దేవుణు మంజిని బాడిదు మీ వందిజ్ ఆస్తిగణస్మిదెర్. అబ్బె డొజారి రవన్. కరి తిన్వద్. అందెజె మీ ఆస్తితకు ఆవద్. 34 ఎందనిజ్ ఇహిజ, మీ ఆస్తిఎంబె మనాద్, అబెనె మీ మన్నుబా మంజినాద్. 35-36 ఎన్వెలెబా పణికిదెజ్ నడుము తొహ ఆజి, తయార్ఆజి మండ్లు. మీ దీవెజ్ ఎన్వెలెబా కనిసి మండ్లు. పెండ్రీ విందుదాన్ ఇండ్రొ వాజిని ఎజమానిజ్ ఎర్దు సుడెజి మంజిని పణిమణిసిరి పాలిసి మండ్లు. ఎజమాని విందుదాన్ వాజి సేహ్లా కొత్తివెలె వెటనె సేహ్లా వాండ్లు రేనాన్. నన్నివరిజ్ పాలిసి మండ్లు. 37 ఎజమాని వాతివెలె, వన్ని వందిజ్ తెలి మంజి ఎర్దు సుడెజి మంజిని పణిమణిసిరిజ్ నెగెద్. నిజమె నాను వెహ్లాన, ఎజమాని, నడుము తొహ ఆజి, బోజెనమ్దిజ్ వాతి వరిజ్ బనె కిజి వరిజ్ తిండి సీనాన్. 38 మదరెయితునొ కోడిజామ్నొ ఎజమాని వాతివెలె, వన్నివందిజ్ ఎర్దు సుడెజి తెలి మంజిని వన్నిజ్ నెగెద్. 39 ఎమేణి గడియదు డొజారి వానాన్ ఇజి ఇండ్రెణి ఏజమాని నెన్జి వాండ్లు తెలిమంజి వన్నిఇల్లు బొొ కివిండ సుణాన్ ఇజి మీరు నెస్తు. 40 మీరు నా వందిజ్ ఎర్దు సుడెజి గడ్డియారు, లోకు మరిసి ఆతి నాను వాన. అందెజె మీరు బా తయార్ ఆజి మండ్రెజ్ వెలె.

41 అయావలె పేతురు, “ప్రబువా, యా కతవజ మజీనె నెన్పిస్సిదా, విజిరిజ్ నెన్పిస్సిదా?”, ఇజి యేసుజ్ వెన్బాతాన్.

42 అందెజె యేసు, “నమకం మని, బుద్దిమని గొత్తి మణిసి ఎయెన్? ఎయెన్ ఇహిజ, ఇండ్రెణి మహి గొత్తియారిజ్ సరిఆతి గడ్డియూ సుడెజి వరి కార్డువజ వరిజ్ దొహ్క మన్ని తిండి సామనమ్కు సీదెజ్ ఇజి ఎజమాని వరిమున్ను, ఏర్పాటు కిత్తికాండ్రె. 43 ఎజమాని మర్జి వానివలె వెహ్లావజ పణికితి వన్నిజ్ నెగెద్.

44 అయ ఎజమాని వన్నిజ్ కల్లితి మన్ని విజు దనిమున్ను అతికారం మని వన్నిలెకెండ్ వన్నిజ్ కినాన్, ఇజి నాను నిజం వెహ్లాన. 45-46 గాని, ఉండ్రీ వేల యా గొతియయెన్, ‘నా ఎజమాని వాదెజ్ ఆల్సెం ఆజినాన్’ ఇజి వన్నిమన్నుదు ఒడిబిజి, మహి గొతియారిజ్ గొతియాణికాజ్ డెయిజినాన్. వాండ్లు ఉణిజి, తింజి సాస్ట మహాన్. ఆహె మహిజ్, వాండ్లు ఎర్దు సుడెజి దినమ్దు నెన్ఇ గడియారు వన్ని ఎజమాని వానాన్. అయావలె వాండ్లు వన్నిజ్ కత్తి దేవుణుదిజ్ నమ్ఇ వరివెట వరి వందిజ్ తయార్ కిత్తిమన్ని బాడ్డిదు పాక్కాన్.

47 ఎజమాని ఇష్టమ్కు నెసిబా అయావజ కివిండ తయారాజి మన్ఎండ మన్ని గొతియ వన్నిజ్ నండొ సిక్సినాన్. 48 ఎజమాని ఇష్టమ్కు నెన్ఎండ, సిక్సదిజ్ తగితి పణిజ్ కితి వరిజ్ కండెక్ సిక్సినె సీనాన్. ఎయెరిజ్ దేవుణు నండొ సిత్త మనాండ్రొ వన్నిబాణిజ్ నండొ లొస్నాన్. ఎయెన్బాన్ దేవుణు మరి నండొ ఒపజెవ్త మనాండ్రొ, వన్నిబాణిజ్ నండొనె లొస్నాన్. 49 సిసు లెకెండ్ మన్ని దేవుణు సీని సిక్స యా లోకమ్దు తత్తెజ్ నాను వాతమన. ఆక విజిరిజ్ సుర్నాద్. ఏలునె సురుదెజ్ మొదొల్లిజి బాగ మంజినాద్, ఇజి ఆస ఆజిని. 50 కష్టం ఇని ఉండ్రీ బాప్తినంబా లాగెఅదెజ్ మనాద్. ఆక్క పూర్తి కినిదాక నజీ నండొ విసారం మంజినాద్లె. 51 యా లోకమ్దు సమాదనం తతెజ్ నాను వాతమన్ను ఇజి మీరు ఒడిబిజినిదెరా? సిల్లె, కేటకిదెజ్నె వాత మన్న. 52 ఏలుదాన్ అయ్దుగురు మంజిని ఉండ్రీ కుటుం వరిజ్ వారె కేట ఆనార్లె. మువర్ ఉండ్రీ పడకాద్ రివర్ మరి ఉండ్రీ పడకాద్. 53 వారు కేట ఆనార్లె. అప్పాసి మరిసిజ్నె, మరిసి అప్పాసి జ్నె, అయిసి గాల్పిజ్నె, గాడ్డి దని అయ్సిజ్నె, మీమ్సి దన్ని కొడెసిజ్నె, కొడెసి దన్ని మీమ్సిజ్నె పడిఎండ మంజినాద్లె.

54 అయావలె వాండ్లు మందలొకుదిజ్ ఈహు వెహ్లాన్, “పడకమటదాన్ మొసాహి వాతిక సుడెతిజ పిర్లు వానాద్లె, ఇజి మీరు వెహ్లాదెర్. ఆహె జగ్గినాద్. 55 దసిణదాన్ గాలి వాతిజ గొప్పఎండ కినాద్ ఇజి వెహ్లాదెర్. ఆహె జగ్గినాద్. 56 వేసం కినికెదెరా, మీరు బూమిదు ఆగాసమ్దు జగ్గినికెజ్ సుడెజి గుర్తు అస్తెజ్ నెన్నెదెర్. మరి ఎందానిజ్ యా కాలమ్దు జగ్గినికెజ్ గుర్తు అస్తెజ్ మీరు అట్వండ మంజినిదెర్? 57 ఎమేణిక నాయం ఇజి మిజి మీరె తర్దు కిదెజ్ అట్నెదెరా? 58 మీ మున్ను నేరం మొప్పివన్నివెట లాయిరి కోర్టుదు సాన్ని మహివలె నర్దు వన్ని వెట రాజినం ఆదెజ్ సుడెదు. సిలిజ, వాండ్లు మిజి తీర్పు కిని వన్ని డగ్గు ఈడిసి ఒనాన్. తీర్పు కినికాన్ జమాన్జ ఒపజెవ్నాన్. వాండ్లు మిజి జెలిదు ఇడ్నాన్. 59 తీర్పు కినికాన్ లొస్సి డబ్బు విజు సీనిదాక జెలిదాన్ వెల్లి వాదెజ్ అట్నెదెర్ ఇజి నాను మిజి వెహ్లాన.

పాపం డి:సిసిదు, సిల్లిజ నాసనం వానాద్

13 అయావలె బాన్ మహికార్ సెగొండార్ యేసుజ్, గలీలియాతి సెగొండార్ వరిజ్ వెహ్. ఇనిక వెహ్ ఇహిజ, గలీలియాతికార్ పూజ కిజి మహివలె, విలాతు వరిజ్ సపిస్తాన్. అయావలె పూజసిత్తి నలని లోకుర్నల కూడితాద్. 2 అందెజె యేసు వరిజ్, "వరిజ్ సహారె యా లెకండ్ నండ్ బాదెజ్ కితార్. అందెజె వారు మహి గలీలియాతి వరి విజెరె ఇంక నండ్ పాపం కితికార్ ఇజి మీరు ఒడిబిజినిదెరా? 3 సిల్లెద్ ఇజి మీవెల వెహ్. గాని మీరు పాపంకు డి:సిసిదు. సిల్లిజ, మీరు విజిదెరెబా అయాలెకండ్ నాసనం ఆనిదెర్. 4 మరి సుడె:దు, సిలొయుము ఇని పట్టుమీదు నిరిండ్ తొహ్మిమన్ని గుడి: అర్దిజ్, యెరూసలెమ్దు బత్రిజి మహికార్ వద్వనిమితి మణిసి సాతార్. వారు బత్రిజిని వరి ఇంక నండ్ సెకార్ ఇజి మీరు ఒడిబిజినిదెరా? 5 సిల్లె ఇజి నాను మీ వెల వెహ్. గాని మీరు పాపం డి:సిసిదు. సిల్లిజ, మీరుబా అయాలెకండ్ నాసనం ఆనిదెర్. 6 మరి వాండ్రు కతవజి ఈపల నెస్పిస్తాన్. ఒరెన్ వన్నిజ్ ద్రాక్కు టోట మనాద్. అబ్బె వాండ్రు బొడెమరాన్ ఉండ్రి ఉణుస్తాన్. వాండ్రు దన్నిపట్టు రెబాతివెలె ఇనికబా దొహ్కెవతాద్. 7 అందెజె వాండ్రు, 'ఇదిలో నాను మూండ్రి పంటెజాణిజ్ యా మరాతి పట్టుజ్ రెబాజి వాజిన. గాని ఇనిక బా దొహ్కెవతాద్. దినిజ్ కత్తి విసీర్. దిన్నిదనాట్ యా బూమి ఎండనిజ్ పాడా:దెజ్?', ఇజి టోట కాపీకిని వన్నివెల వెహ్. 8 అందెజె వాండ్రు, "బాబు యా ఉండ్రి ఏంటు మనిద్. నాను సుటులం కార్సి గతం పాక్సి నూణాట్. 9 అక్కపట్టు అస్తిజ నెగెద్, అస్ఇజ కత్తి విసీర్", ఇజి వెహ్.

విస్తాంతిదినమ్దు నడు:ము వజితి ఉండ్రి బోదెలిదిజ్ నెగెకెజినాన్

10 ఉండ్రి విస్తాంతిదినమ్దు, యేసు ఉండ్రి యూదురి మీటిజ్ ఇండ్ బోదె కిజి మహాన్. 11 అబె వద్వనిమితి పంటెజాణిజ్ నడు:ము వక్సి దెయం అస్తి ఉండ్రి బోదెలి మహాద్. దన్ని నడు:ము వజితిజ్, అసల నెగెన్ నిల్దెజ్ అట్వద్. 12 యేసు దనిజ్ సుడె:తాండ్రి, "రల", ఇజి డగ్రు కూక్తాన్. మరి, "బిబి, నిజి మన్ని కట్టమకాణిజ్ నాను డి:సిసిన్", ఇజి దనిజ్ వెహ్. 13 మరి దనిముస్సు వన్ని కికు ఇట్టాన్. వెలనె అది నెగెన్ నిహదె, దేవుణుదిజ్ పాగిడితాద్. 14 విస్తాంతి దినమ్దు యేసు నెగెన్ కితిజ్, యూదురి మీటిజ్ ఇండ్రి అతికారి నండ్ కోపం ఆతాన్. ఆతాండ్రి, లోకురిజ్ పణి కిదెజ్ ఆరు దినమ్కు మనె. అందెజె మీరు ఆ దినమ్కు లోఇ వాజి నెగెన్ ఆదు. విస్తాంతి దినమ్దు రమాట్", ఇజి వెహ్. 15 అందెజె యేసు, "ఓ వేసం కినికిదెరా, మీ లోఇ విజిదెరెబా మీ డా:నుదిజ్, మీ గాడె:దెదిజ్ విస్తాంతి దినమ్దు సాలాదాన్, డి:సిసి ఏరు సీజినిదెర్ గదె? 16 అహిజ, అబ్రాహముజ్ తెగ్గతి యా బోదెలిదిజ్ వద్వనిమితి పంటెజ్ సయతాను తొహ్త ఇట్టా మనాన్. విస్తాంతి దినమ్దు దనిజ్ తొహ్కె బాణిజ్ డి:సిసిజ్ కూడె:వదా?", ఇజి వరిజ్ వెహ్. 17 వాండ్రు యా మాటెజ్ వెహ్ వలె వన్ని పగాతికార్ విజెరె సిగు ఆతారె, మొకం డిహ్. గాని లోకుర్ విజెరె వాండ్రు కితి గొప్ప పెరిపణిజ్ వందిజ్ సర్ల ఆతారె. 18 మరి యేసు వన్ని లోకురిజ్, "దేవుణు వన్ని లోకురిజ్ కిని ఏలుబడి: ఇన్ని దనిజ్ పాలిత మనాద్. ఇనిదనివెల నాను పాలిన్? 19 అక్కసర్ను గింజిదిజ్ పాలిత మనాద్. ఒరెన్ ఆక ఒతండ్రి వన్ని టోటాదు ఉణుస్తాన్. ఆక పిరిసి మరాన్ ఆతాద్. ఆగాసం ముస్సు ఎగ్రిజిని పాటిజ్ దనికొమెజ ముస్సు గూడుక్ తొహ్కె", ఇజి వెహ్. 20 మరి వెహ్ నాన్, "దేవుణు వన్ని లోకురిజ్ కిని ఏలుబడి: ఇని దని వెల పాలిత మనాద్? 21 అక్క పులాని దూరుదిజ్ పాలిత మనాద్. ఉండ్రి బోదెలి అక్కబతాదె మరి నండ్ దూరు వెల కలస్తాద్. వాక్తి దూరుదిజ్ బా పులాజ్ కితాద్.

ఇహ్కు సరి

22 యేసు యెరూసలెమ్దు సాండ్రిజ్ ఇజి పయాణం కిజి మహివలె సరి పడె:కాద్ మన్ని నాహ్కె పట్టుమకాజ్ బోదిసి మహాన్. 23 అయావలె ఒరెన్, "ప్రబువా, సెగొండార్ దేవుణు సిక్కుదాన్ తప్పె ఆనారా?", ఇజి వెన్ బాతాన్. 24 అందెజె వాండ్రు వరిజ్, "ఇహ్కు దార్ బందరం దాన్ డుగ్ దెజ్ నండ్ కట్టబడి:దు. ఎండనిజ్ ఇహిజ, నండ్ండార్ సాండ్రిజ్ సుడె:జినార్. గాని వారు సాండ్రిజ్ అట్వెర్ ఇజి మీ వెల వెహ్. 25 ఇండ్రిజి ఎజమాని నిజ్జి సిహ్ కెహ్తి వెన్కా మీరు వెల్లినిల్లి, సిహ్ కత్తి "బాబు, మజి సిహ్ రెల", ఇజి వెహ్. అయావలె వాండ్రు, "మీరు ఎమేణికిదెరో నాను మిజి నెస్వ", ఇజి వెహ్. 26 అందెజె మీరు, "ని వెల మాపు ఉణిజి, తింజి మహా. నీను మా వీదిజ బోదిన్ గదె", ఇజి వెహ్. 27 గాని వాండ్రు, "మీరు ఎమేణికిదెరో, మిజి నాను నెస్వ. సెఇపణి కిని మీరు విజిదెరె, నా బాణిజ్ డి:సిసి సాండ్రు", ఇజి వెహ్. 28 మరి వాండ్రు, "అబ్రాహము, ఇస్సాకు, యాకొబురిజ్ విజెరె ప్రవక్తరు దేవుణు మంజిని బాడి:దు వాండ్రు ఏలుబడి: కినివెలె మంజినిక సుడె:జినిదెర్. గాని వాండ్రు మిజి వెల్లి కినాన్. అయావలె, మీరు అడె:బాజి, పల్కు కొహ్కె ఎలాకాలం సిను మంజిని బాడ్డిదు మంజినిదెర్. 29 మరి, దేవుణు మంజిని బాడి:దు వాండ్రు ఏలుబడి: కినివలె, తూర్పుదాన్ పడె:మటదాన్, ఉస్సన్ దాన్, దసిణదాన్ నండ్ యూదురు ఆఇకార్ వాజి వింతుదు బస్సార్. 30 ఇదిలో, పెరికాప్ ఇజి ఒడి:బితికార్ ఇజ్రికార్ ఆనారె. తగిజి మహికార్ ముజాల్ ఆనారె", ఇజి వెహ్.

యేసుయెరునలెంవందిజ్ దూకమాజినాన్

31 అయావలెనె, సెగొండార్ పరినయరు వాతారె, "నీను ఇబ్బెణిజ్ సాసి సాన్. హెరోదు నిజి సప్తెజ్ సుడె:జినాన్", ఇజి యేసుజ్ వెహ్. 32 అందెజె వాండ్రు, "మీరు సాన్ని ఆ పాడు కిని నక్కవెల ఈపల వెహ్. "నాను నేండ్రు, విగహిజ్, దెయమ్కాజ్ పిర్జి, కట్టమదివరిజ్ నెగెన్ కిజి, మువహి, దినమ్దు పూర్తి కిని. 33 గాని నాను నేండ్రు, విగహిజ్, మువహిజ్ నా సరిదు నాను సాండ్రిజ్ వెలె. ఎండనిజ్ ఇహిజ, ప్రవక్త యెరునలెమ్దిజ్ వెల్లి సాదెజ్ అవెన్. 34 ఓ యెరూసలెమ్దు మనికిదెరా, మీరు ప్రవక్తరిజ్ సప్తిదెర్. మీ డగ్రు దేవుణు పాక్తి వరిజ్ పణికాణిజ్ డె:యితిదెర్. కొరు దన్నిపిల్లెకాజ్ దన్నిరెక్కెజ్ అడి:గి ఎలాగ ఇహ్కె, అయావజి మిజి డగ్రు కిదెజ్ ఎసాడ్ సుట్టు నాను ఆస ఆత, గాని నిజి ఇష్టం సిల్లెండ మహాద్. 35 ఇదిలో, దేవుణు వన్ని గుడి:డి:సి సానాన్. ప్రబు సిత్తి అతికారమ్దాన్ వాతికాన్ పాగిడి:ఆనికాన్ † ఇజి మీరు వెహ్ దూక మీరు నజి తొఇదెర్ ఇజి మీ వెల వెహ్.

యేసు పరిసయ్ ఇండ్రో బోజెనమ్దిజ్ సాన్సినాన్

14 ఉండ్రీ విస్తాంతి దినమ్దు, యేసు పరిసయరు అతికారిజ ఒరెన్ వన్ని ఇండ్రో బోజెనమ్దిజ్ సాహాన్. అయావలె యేసు ఇనిక కింద్రో ఇజి వారు బాగసుడేజి మహోర్. 2 నస్తవలె కిక్కుకాలు, వాస్తికాన్ ఒరెన్ వన్ని ఎద్రు మహాన్. 3 యేసు, విస్తాంతి దినమ్దు నెగెణ్ కినిక మీ యూదురిజ్ రూలుజ్ తప్పికాదా నిలికాదా?”, ఇజి పరిసయరుజని యూదురి రూలు నెస్పిన్నివరిజ్ వెన్బాతాన్. 4 గాని వారు అలెత మహోర్. అందెజె యేసు అయా జబుది వన్నిజ్ డగ్రు కూక్తాండ్రె, నెగెణ్ కితాండ్రె షాక్తాన్. 5 వెనుక వాండ్రు వరిజ్, “మీ లోఇ ఎయెది బా గాడెది గాని కోడి: గాని విస్తాంతి దినమ్దు గుటాద్అర్జి, దన్నిజ్ వెలనె వెల్లి లాగ్ఇదెరా?”, ఇజి వెన్బాతాన్. 6 యా మాటెజ్ వారు మర్జి వెప్తాజ్ అట్వితార్.

7 వాతి కూలెజ్, విందుదు ముకెలమాతి బాడిజ్ సుడేజి బాన్ బస్తిక సుడేతాన్. సుడేతాండ్రె కతవజ ఈహు నెస్పిస్తాన్. 8-9 ఎయెన్బా పెండ్రీ విందుదిజ్ మిజి కూక్తివెలె, పెరికార్బస్సిబాడిదు బస్టాట్. ఉండ్రీ వేలా మిజి ఇంక పెరివన్నిజ్ వాండ్రు కూక్తాన్సు. వాండ్రు వాతిజ, మీ రివరిజ్ కూక్తికాన్ వాజి నిజి, “ఇదిలో, నీ బాడ్డి: వినిజ్ సెల”, ఇజి వెప్తాన్. నస్తవలె మీరు సిగు ఆజి వెన్కాహి బాడి:దు బస్టిజ్ సానిదెర్. 10 అందెజె మిజి ఎయెన్బా కూక్తిజ, మీరు సాన్ని వెన్కాహి బాడి:దు బస్టు. అయావలె మిజి కూక్తికాన్ వాజి, “కూలాయెన్ నీను పెరికార్బస్సి బాడి:దు సాన్ని బన్అ”, ఇజి వెప్తాన్. అయావలె నీ వెల బస్తివరి ఎద్రు నిజి గొప్ప గవరం వానాద్. 11 వన్నిజ్ వాండ్రె పెరికాన్ ఇజి ఒడేబని ఎయె వన్నిజ్బా దేవుణు ఇజ్రికాన్ కినాన్. వన్నిజ్ వాండ్రె ఇజ్రికాన్ ఇజి తగిజి ఒడేబని ఎయె వన్నిజ్బా దేవుణు పెరికాన్ కినాన్. 12 మరి, యేసు వన్నిజ్ విందుదిజ్ కూక్తి వన్నివెల, “నీను విందు కిదెజ్ ఇహిజ, నీ కూలెజన్, నీ అన్నారిజ్నో, నీ నేస్వమ్కాజ్నో, నీ పడకాద్ మన్ని సంసారిజనో కూక్కు. ఎందనిజ్ ఇహిజ, ఉండ్రీ వేలా వారు నిజి మర్జి కూక్తార్. అయావలె నీను కిత్తిదన్నిజ్ వారు మర్జి కిజినార్. 13 అందెజె నీను విందు కినివెలె, బీదాతి వరిజ్, నీర్నమ్దివరిజ్, సాటవరిజ్, గుడ్డివరిజ్ కూకెల. 14 ఎందనిజ్ ఇహిజ, మిజి మర్జి సీదెజ్ వారు అట్వెర్. అందెజె దేవుణు మిజి దీవిన్నాన్లె. దేవుణు తీర్పు కిని దినమ్దు నీతి మన్ని విజా లోకురివెల నీను సాజి మర్జి నిజెనె వెలె, నీను కితి నెగ్గి పణి వందిజ్ దేవుణు మిజి మర్జి సీనాన్.

పెరివిందు వందిజ్ వెహ్సినాన్

15 వన్ని వెల ఉండ్రేజ్ బస్తిమహి వరిలోఇ ఒరెన్ యాక విహండ్రె, యేసుజ్, “దేవుణు ఏలుబడి: కినిక టెటాజ్ నూణివెలె, విందుద్ ఉణికాన్ అంతు సిల్లి సర్ద మంజినికాన్ ఆనాన్లె”, ఇజి వెప్తాన్. 16-17 అందెజె యేసు ఈహు వెప్తాన్. “ఒరెన్ విందు కిదెజ్ ఇజి వన్ని నండ్రో కూలెజ కబ్బుజ్ షాక్తార్. విందు తయార్ అతిజ్, వన్ని పణిమణిసెజ్ కూక్తాండ్రె, “ఉండ్రేజ్ రదు. విజా తయార్ అతె ఇజి కబ్బు కిత్తివరిజ్ సాన్ని వెహ్అ”, ఇజి షాక్తాన్. 18 గాని కూలెజ్ ఉండ్రె లెకెండ్ పణిజ్ వెహ్సి తప్పి ఆతార్. మొదోహికాన్, “నాను ఉండ్రీ మడిజ్ కొట మన్న. నాను అయక సాన్ని సుడేదెజ్వెలె, నజి సెమిన్ల ఇజి బతిమాలజిన”, ఇజి వెప్తాన్. 19 మరి ఒరెన్, “నాను అయదు సెర్కు డాను కొట మన్న. ఆకెజ్ నెగెణ్ మనెనో సెలెనో ఇజి సుడేదెజ్ సాన్నిన. నజి సెమిన్ల, ఇజి బతిమాలజిన”, ఇజి వెప్తాన్. 20 మరి ఒరెన్, “నాను ఏలు పెండ్రీ ఆత మన్న. అందెజె వాదెజ్ అట్వె”, ఇజి వెప్తాన్. 21-22 పణిమణిసి మర్జి వాతండ్రె, యా మాటెజ్ వన్ని ఎజామానిజ్ వెప్తాన్. అయావలె అయా ఇండ్రో ఎజామాని కొవం ఆతండ్రె, “నీను పట్టుక వీదిజ, నందిజ బేగి సాన్ని బీదాతి వరిజ్, నీర్నమ్ది వరిజ్, సాటాది వరిజ్, గుడ్డి వరిజ్ కూక్తి తగ్లె”, ఇజి పణి మణిసెజ్ వెప్తాన్. వాండ్రు, “బాబు నీను వెహ్సి లెకెండ్ కిత. గాని మరి నండ్రో బాడ్డి మనాద్”, ఇజి వెప్తాన్. 23 అయావలె ఎజామాని, “నా ఇల్లు నిండ్రేదెజ్, నీను నాహ్కా వీదిజ నందిజ సాన్ని లోకురిజ్ ఈడి:సి తగ్లె”, ఇజి వన్ని పణిమణిసెజ్ వెప్తాన్. 24 ఎందానిజ్ ఇహిజ, కూక్తి అయా కూలెజ లోఇ ఒరెన్బా ఆ టిండి రుసి నెస్వెన్”, ఇజి మీ వెల వెహ్సిన.

సిసుడుఆనికాన్ ఎలాగమండ్రేజ్ ఇజి వెహ్సినాన్

25 మంద లోకు వన్ని వెల సాన్ని మహివలె వరిదరిజ్ సుడేజి వాండ్రు ఈహు వెప్తాన్. 26 “ఎయెన్బా నా సిసూడు: ఆదెజ్ ఇహిజ, నజి ఇంక, వన్ని అయిసి అపానిజ్ వన్ని ఆలు ని కొడోరిజ్, వన్ని అన్న తంబెరిజ్, వన్ని తజి బీబిజ్ మరి వన్ని సాంత పాణమ్దిజ్బా నండ్రో ప్రేమిస్తిజ్ ఆవద్. వాండ్రు నండ్రో ప్రేమిస్తిజ, నా సిసూడు: ఆదెజ్ అట్వెన్. 27 ఎయెన్బా కస్టమ్కు ఓరిసి సాదెజ్బా ఇస్టం ఆజి నా వెల వాతిజనె నా సిసూడు: ఆనాన్. 28 మీ లోఇ ఎయెన్బా ఉండ్రీ నిరి గుడి: తోహ్తెజ్ఆస వాతిజ, వాండ్రు ముజాల బసి, దనిజ్ కర్పు ఎసా ఆనాద్ ఇజి లెక్కుసూణాన్. పణి పూర్తి కిదెజ్ వన్ని కీదు మనిక ఆనాద్, సాల్వెద్ ఇజి సూణాన్ గదె? 29-30 అయక తోవండ్రె వాండ్రు పునాది పాక్సి, పూర్తి తోహ్తెజ్ అట్ఇతిజ, అక్కసూణికార్ విజెరె, “పిండ్రు తోహ్తెజ్ మొదోల్స్తాన్ గాని పూర్తి కిదెజ్ అట్వెతాన్”, ఇజి వన్నిజ్ కరాయి ఇనార్. 31 ఒరెన్ రాజా మరి ఒరెన్ రాజావెల ఉద్దం కిదెజ్ సాండ్రేజ్ ఇహిజ, వాండ్రు ముజాలె బస్టాండ్రె సుణాన్, ఇరువయ్ వేలుజ్ లోకురివెల అయా రాజా వాజినాన్. వన్ని ముస్సు ఉద్దం కిదెజ్ నా పది వెయ్యుజ్లోకుర్ వెల నాను అటూనా, సెలెనా ఇజి. 32 అట్ఇజ, అయా రాజా దూరం మనివెలెనె సల్వెణిజ్ షాక్సి నమాదనం కిదెజ్ వాండ్రు సుణాన్. 33 అయలెకెండ్నె, మీ లోఇ ఎయెన్బా వన్నిజ్ కల్లితికెజ్ డి:స్ఎండ్ మహిజ, నా సిసూడు: ఆవన్. 34 షారు నెగ్గెకె, గాని దనిజ్ మన్ని రుసి సాహిజ, ఎలాగ మరి రుసి తప్పిస్తిజ్ ఆనాద్? 35 అయాక బూమిదిజ్బా గాని గత్తమ్దిజ్బా గాని పణిదిజ్ రవద్. అందెజె అయాక వెల్లి విసీర్నార్. గిబ్బుజ్ ఒడే:జి వెండ్రు. అయావజ నడి:జి మండ్రు”, ఇజి వెప్తాన్.

మురుతి గొర్రె దోహ్కాస్సినాన్

15 ఉండ్రీ నాండిజ్ పన్ను పెర్సికార్ని పాపం కిజినికార్ ఇజి యూదురు సుడే:తికార్ విజెరె వన్ని బోద వెండ్రేజ్ వన్ని డగ్రు కూడి:త మహోర్. 2 పరిసయరు ని యూదురి రూలుజ్ నెస్పిన్నికార్, “పిండ్రు పాపం కిజిని వరిజ్ డగ్రు కిజి వరివెల కూడి:జి బోజనం కిజినాన్”, ఇజి సణిజెతార్. 3 అందెజె వాండ్రు వరిజ్ కతవజ నెస్పిస్తాన్. 4 “ఉండ్రీ వేల మీ లోఇ ఒరెన్వన్నిజ్ వంద గొర్రెజ్ మనె. వన్కాలోఇ ఉండ్రీ గొర్రె మురుతిజ, వాండ్రు అయా తోమ్బయి తోమెది గొర్రెజ,

† కీర్తన 118:26.

అడివిడు డిసి మురుతి మని గొర్రెదోహ్నాదాక రెబానాన్ గదె? 5⁶ అది దోహ్నాక్తివలె సరద ఆజి వన్ని గుంజమ్దు పిండిజి ఇండ్రో తనాన్. మరి వన్ని కూలెజ పడఃకాతి వరిజ్ కూక్కి, “మురుతి మహి నా గొర్రె దోహ్నాక్తి. అందెజె నా వెట సరద ఆదు”, ఇజి వెహ్నాన్. 7 అయా వజనె, తోమ్బయి తోమెది మణిసిర్ పాపం ఒప్పుకొండెజ్ అవునరం సిలి సీతి నిజాయితిదికార్ మనార్. వరి వందిజ్ కల్గిని సరద ముస్సు పావమ్కు డిసి సీతి వన్ని వందిజ్ దేవుణు మంజిని బాడిఃదు నండ్రో సరద కల్గినాద్, ఇజి నాను మీ వెట వెహ్నాన్”.

మురుతి రువయి దోహ్నాక్తినాద్.

8 “మరి, ఉండ్రీ బోదెల్దిజ్ వది వెండి రుపాయి మహి. వన్కాలోఇ ఉండ్రీ రుపాయి మురుతిజ, అది దీవ కసిసి, ఇల్లు సిపాజి, అది దోహ్నాక్తిదాక నెగెండ రెబావిదా? 9 అక్కదోహ్నాక్తివలె దన్ని కూలెజాణిజ్, పడఃకాతి వన్కాజ్ కూక్కి, “నా మురుతి మహి రుపాయి దోహ్నాక్తాద్. అందెజె నా వెట సర్ద ఆదు”, ఇజి వెహ్నాద్. 10 అయావజనె పావమ్కు డిసి సీతి వన్ని వందిజ్ దేవుణు వన్ని దూతెజ ఎద్దు సర్ద ఆజినాన్ ఇజి నాను మీ వెట వెహ్నాన్”.

తప్పి సాహి మరిసి మర్జి వాజినాన్

11 మరి వాండ్రు ఉండ్రీ వెహ్నాన్, “ఒరెన్ వన్నిజ్ రిఎర్ మరిసిర్ మహాన్. 12 కొగ్గి మరిసి, “ఓ బా, నీను గణన్తి దన్నిలోఇ నజి వానివంతు సిదా”, ఇజి అపాసిజ్ లొస్తాన్. అందెజె అపాసి వన్ని ఆస్తి వరిజ్ సీబాత సిత్తాన్.

13 నెగం రోస్సు సాహి వెనుక, కొగ్గి మరిసి వన్నిజ్ కల్గితెజ్ విజా కుడుప్పి, నండ్రో దూరం మన్ని దేసమ్దు సాహాన్. అబ్బె వాండ్రు సెఇ అలవాటుజ ఆతాండ్రె వన్ని ఆస్తివిజా పాడు కిత్తాన్. 14 విజా కర్పు కిత్తివెనుక, ఆ దేసమ్దు గొప్పు కరు వాతాద్. వన్నిజ్ ఇనిక బా దోహ్నాక్ ఎతాద్. 15 అందెజె వాండ్రు ఆ దేసమ్ది ఒరెన్ వన్ని డగ్గు పణికిదెజ్ సాహాన్. వాండ్రు వండ్రీజ్ మెప్పెజ్ వన్ని మడిఃజ వన్నిజ్ పోక్తాన్. 16 వండ్రీజ్ తిని పాడుః తింజి బజ సాన్పిన్జె ఇజి ఆస ఆతాన్. గాని ఎయెర్ బా వన్నిజ్ ఇనికబా సివితార్. 17 వన్నిజ్ బుద్ది వాతివెలె వాండ్రు ఈహు ఒడిఃబితాన్, “నా బుబ్బ డగ్గు ఎసాండాో పణిమణిసిర్ మనార్. వరిజ్ ఉండ్రెజ్ అల్వ నసా జావ దోహ్నాక్తినాద్. ఇబ్బె నాను బజ సాజిన.

18 నాను ఇబ్బె డిసి నా బుబ్బ డగ్గు సాన్సి, “ఓ బా, నాను దేవుణుదిజ్ వడఃఇ పణి కిత్. నీ ఎద్దు పాపం కిత్. 19 నీ మరిన్ ఇజి కూకా ఆదెజ్ నాను ఏవటితికాన్ ఆవ. నీ పణిమణిసి ఒరెన్ వన్నిలెకెండ్ నజి సుడఃఅ”, ఇజి నాను వెహ్నాన్, ఇజి ఒడిఃబితాండ్రె అబెణిజ్ డిస్తాండ్రె వాజినాన్.

20 వాండ్రు దూరం మహివలెనె అప్పాసి వన్నిజ్ సుడఃతాన్. వన్ని పాణం నొతాండ్రె ఉహ్నాక్తి సాన్సి పాంబితాండ్రె ముదు కిత్తాన్. 21 నన్తివలె వాండ్రు అప్పాసిజ్, “ఓ బా, నాను దేవుణుదిజ్ వడఃఇ పణి కిత్. నీ ఎద్దు పాపం కిత్. నీ మరిన్ ఇజి కూకా ఆదెజ్ నాను ఏవటితికాన్ ఆవ”, ఇజి వెహ్నాన్. 22 గాని అప్పాసి వన్ని పణిమణిసిర్ కూక్తాండ్రె, “సాక్క బేగి తగ్ల. వినిజ్ తోడిఃగిస్తు. బొందు ఇడఃకిస్తు. పాదమ్కూజ్ జోడిఃకు తోడిఃగిస్తు. 23 బలిన్తి దూడః తసి ఓహ్నాక్తు. మాటు తింజి సర్ద ఆనాల్. 24 ఎందానిజ్ ఇహిజ, యా నా మరిన్ సాతి లెకెండ్ మహాన్. మరి ఏలు బత్తితాన్. మురుతి లెకెండ్ మహాన్. మరి యేలు దోహ్నాక్తాన్”, ఇజి వెహ్నాన్. వారు సర్ద ఆజి మహాన్. 25 అయావలె పెరిమరిసి మడిఃజ సాహ మహాన్. వాండ్రు మడిఃజాణిజ్ వాజి ఇల్లు డగ్గు వాతివెలె, బాజెజ్ డెయిజినిక, కర్జిజినిక వెహాన్.

26 అందెజె వాండ్రు పణిమణిసిర్ లొఇ ఒరెన్ వన్నిజ్ కూక్తాండ్రె, ఇనిక జర్గిజినాద్, ఇజి వెన్బాతాన్.

27 అయా పణిమణిసి, “నీ తంబెరి వాతాన్. వాండ్రు నెగ్రెండ మర్జి వాతివందిజ్ నీ బుబ్బ బలన్తి దూడః ఓహ్నాక్తాన్”, ఇజి వెహ్నాన్.

28 పెరి మరిసి కోపం ఆతండ్రె, లొఇ సాండ్రెజ్ కెలతాన్. అందెజె అప్పాసి వెల్లి వాతండ్రె, లొఇ రల, ఇజి వన్నిజ్ బతిమాలతాన్. 29 అయావలె వాండ్రు వన్ని అప్పాసి వెట, “ఇదిలో నిసాడు వంటెజాణిజ్ ఒరెన్ గొతియయెన్ లెకెండ్ పణి కిత్త. ఎసెబా, నీ మాటెజ్ నాను లొజివిండ మన్విత. నా కూలెజ్ వెట సర్ద ఆదెజ్ నీను నజి ఉండ్రీ గొర్రె పిల్లబా సిఇతి. 30 గాని సాని బూలాలని వరిజ్ సీజి నీ ఆస్తి విజా పాడు కిత్తి యా మరిసి వాతిజ్ బలన్తి దూడః ఓహ్నాక్తి”, ఇజి వెహ్నాన్. 31 అందెజె అప్పాసి, “నా మర్రిన్, నీను ఎన్తివలెబా నా వెటనె మన్ని. నజి మనికెజ్ విజా నీవి. 32 మాటు విందు కిజి సరద ఆనిక నెగెద్. ఎందానిజ్ ఇహిజ, నీ యా తంబెరి సాతి లెకెండ్ మహాండ్రె, మర్జి నిజితాన్. మురుతి లెకెండ్ మహాండ్రె దోహ్నాక్తాన్”, ఇజి వన్ని వెట వెహ్నాన్.

తెలివి మన్ని పెరిగొత్తియవన్ని కత

16 మరి, యేను వన్ని సిసూర్జ ఈహు వెహ్నాన్. ఒరెన్ సంసారం మన్ని వన్ని ఇండ్రోణి నజతిజ సూణి పెరి గొతియయెన్ ఒరెన్ మహాన్. యా గొతియయెన్ సామనమ్కు పాడు కిజినాన్ ఇజి నేరం మొప్పిక వెహాన్. 2 అందెజె వన్నిజ్ కూక్తివెస్తాండ్రె, “నీ వందిజ్ నాను వెంజిని యా మాట ఇనిక? ఇండ్రోణి పణిజ లెక్క తోరిన్ల. ఎందానిజ్ ఇహిజ, నీను ఏలుదాన్ నా గొతియయెన్ ఆఇ”, ఇజి వన్నిజ్ వెహ్నాన్. 3 యాక వెహాండ్రె వాండ్రు ఈహు ఒడిఃబితాన్. “నా ఎజమాని యా పణిదాన్ నజి లాగ్జినాన్. అందెజె నాను ఇనిక కిదెజ్? కార్తెజ్ అల్వ. లొసి ఉండ్రెజ్ సిగు వాజినాద్. 4 యా పణిదాన్ లాగ్గివెలె, లోకుర్ నజి డగ్గు కినిలెకెండ్ ఇనిక కిదెజ్ ఇజి నాను నెసిన్. 5 అందెజె వాండ్రు వన్ని ఎజమాని బాన్ అప్పు ఒతివరిజ్ ఒరెన్ ఒరెన్ వన్నిజ్ కూక్తివెస్తాన్. “నీను నా ఎజమాని బాణిజ్ ఎసా ఒతిమన్ని?”, ఇజి మొదోహి వన్నిజ్ వెన్బాతాన్. 6 వాండ్రు, “వంద కాయెజ్ నూనె”, ఇజి వెహ్నాన్. అందెజె వాండ్రు, “ఇదిలో నీ సీటి. బేగి బసి యాబయి కాయెజ్ ఇజి రాన్ల”, ఇజి వెహ్నాన్. 7 వెన్కాహివన్నిజ్, “నీను ఎసా ఒతిమన్ని?”, ఇజి వెన్బాతాన్. వాండ్రు, “వంద తూముజ్ గోదము”, ఇజి వెహ్నాన్. అయావలె వాండ్రు, “ఇదిలో నీ సీటి. ఎనబయి తూముజ్ ఇజి రాన్ల”, ఇజి వెహ్నాన్. 8 అనెయం కిత్తి యా పెరి గొత్తియయెన్ తెలివందిజ్ ఎజమాని పాగిడిఃతాన్. ఎందానిజ్ ఇహిజ, వానికాలమ్ది వన్ని బత్తు వందిజ్ వాండ్రు యా లెకెండ్ కిత్తాన్. అందెజె యేను, వెహ్నానాన్, “దేవుణుదిజ్ నమిజి వాండ్రు వెహ్నా వజ నడిఃనివరి ముస్సు, అయా పెరి గొతియయెన్ లెకెండ్, యా లోకమ్ది నజతిజ వందిజె ఒడిఃబినికార్ తెలిమనికార్. వారు వరిలెకెండ్ మన్ని వరివెట కూడఃజి పాడిఃజి మండ్రెజ్ తెలిమనికార్. 9 మీరు యా లోకమ్దు బత్తిజిని మనివలె ఇబ్బె మిజి మనికెజ్ విజా దని వెట మీరు నెగ్రెండ తెలిదాన్ మండ్రెజ్ సుడఃదు. ఎందనిజ్ ఇహిజ, మీరు మీ బత్తు

ఇబ్బె డిస్సివలె దేవుణు మిజి వాండ్రు మంజిని బాడిడు ఎలాకాలం మండ్రేజ్ డగ్రు కినానెలె. 10 తక్కు దన్నిముస్సు నమకం మంజినికాన్ లావు దన్నిముస్సుబా నమకమ్దాన్ మంజినాన్. తక్కు దన్నిముస్సు నమకం సిలికాన్, లావు దన్నిముస్సుబా నమకం మన్ఎన్.

11 అందెజె, మిజి మన్ని ఆస్తి నమకమ్దాన్ తోఎండ మహిజ, నిజమాతి ఆస్తి ఎయెర్ మిజి ఒవజెవ్నార్. 12 వడకాతి పరి దన్నిముస్సు నమకమ్దాన్ తోఎండ మహిజ, నీ సాంతదిక ఆతి నిజమాతి ఆస్తి ఎయెన్ మిజి సీనాన్. 13 ఎమేణి గొతియయెన్బా రిఎర్ యజమానరిజ వందిజ్ఉండ్రె లెకెండ్పణి కిదెజ్ అబ్ఎన్. వాండ్రు ఒరెన్ వన్నిజ్ ఇస్టం కివిండ మరి ఒరెన్ వన్నిజ్ ప్రీమిస్నాన్. నీలిజ, ఒరెన్ వన్ని మాట వెంజి నమకమ్దాన్ మంజినాన్. మరి ఒరెన్ వన్నిజ్ దుసలాడ్జినాన్. అయలెకెండ్నె దేవుణుదిజ్ ని డబ్బుదిజ్ ఉండ్రె లెకెండ్నె సేవకిదెజ్ మీరు అల్ఇదెర్", ఇజి వెప్నాన్.

14 డబ్బు ఆస మన్ని పరిసయెరు యా మాటెజ్ విజా వెవారె, వన్నిజ్ వెక్తిస్తార్. 15 వాండ్రు పరిజ్ ఈహు వెప్నాన్, "లోకుర్ ముజాల మీరు నీతి నిజాయితి మనికిదెర్ ఇజి తోరిస్సిదెర్. గాని దేవుణు మీ మన్నుదికెజ్ నెస్నాన్. లోకుర్ ఎద్రు గొప్ప విలువ మనిక దేవుణుదిజ్ ఇస్టం సిల్లికాదె. 16 దేవుణు మోసెజ్ సీత్తి రూలుజ్ని ప్రవక్తరు రాస్తికెజ్ బాప్తిసం సీని యోహాను కాలం దాక బోదిసి మహార్. అబెణిజ్ అసి దేవుణు, వన్నిలోకురిజ్ కిని ఏలుబడి: వందిజ్ సువార్త వెవో ఆజి మహాద్. దేవుణు కిని ఏలుబడిడు మండ్రేజ్లోకుర్నండో కస్టబడిజినార్. 17 ఆగసం బూమి సిల్లెండ ఆదెజ్సులునె, గాని దేవుణు నీతి రూలుబది ఉండ్రె గీతబా తప్పి సాన్ఎద్. 18 ఎయెన్బా వన్ని ఆల్నిజ్ డిసి మరి ఉండ్రె బోదెల్దిజ్ ఇడ్డె: ఆతిజ, దని వెల వాండ్రు రంకు బూలాజినాన్. మాసిజ్ డిస్సి దనిజ్ ఒరెన్ఇడె: ఆతిజ, వాండ్రు రంకు బూలాజినాన్.

ఆస్తిమున్నికాన్సి లొసిఉణి లాజరు

19 ఒరెన్ ఆస్తిమున్నికాన్ మహాన్. వాండ్రు నండో కరిది సాక్కెజ్ తోడ్జిగిజి విజా దినమ్కు సుకం ముస్సు మహాన్. 20 లాజరు ఇని లొసిఉణికాన్ ఒరెన్ మహాన్. వన్ని ఒడోల్కండి విజా పుట్టు మహా. ఆస్తిమున్ని వన్ని ఇండ్రాణి డేవాద్ వన్నిజ్ ఇట్టా మహార్. 21 వన్ని బల్లదాన్ అరి జావ వరెజ్ ఉణిజి బజ సాన్పెస్టెజ్ ఆసఆజి మహాన్. నుకుడిజ్బా వాజి వన్ని పుట్టు నాక్కి మహా.

22 లొస్సి ఉణికాన్ సాతాన్. దేవుణు దూతెజ్ వన్నిజ్ దేవుణు మంజిని బాడిడు అబ్రాహం పడకాదు ఒతాన్. ఆస్తిమున్నికాన్బా సాతాన్. వన్నిజ్ ముస్తార్. 23 వాండ్రు అయా లోకమ్దు బాదఆజినె, బుర్త పెర్తి ముస్సు బేస్తాన్. దూరం మన్ని అబ్రాహముజ్ని వన్నివడకాద్ మన్ని లాజరుజ్ సుడ్జెతాన్. 24 అందెజె వాండ్రు, "బుబ్బ ఆతి అబ్రాహము, నా ముస్సు కనికారం తోరిస్ల. నాను యా సినుదు నండో బాద ఆజినె. అందెజె లాజరు వాజి వన్ని డెస్సె, ఏరుదు ముడుక్కి నా నాలిక సలెజ్ కిదెజ్ వన్నిజ్ ఫోక్ల", ఇజి డేల్లి వెప్నాన్. 25 అందెజె అబ్రాహము, "మరిన్ నీను బత్తితి కాలమ్దు సుకం ముస్సు మహా. గాని లాజరు కస్టమ్దు మహాన్. ఏలు వాండ్రు ఇబ్బె సుకం దాన్ మనాన్. నీను కస్టమ్దు మన్ని. 26 యాకదె ఆవండ, ఇబ్బెణికార్ అబ్బె వాదెజ్ అబ్ఎండ, అబెణికార్ ఇబ్బె వాదెజ్ అబ్ఎండ మజి నిజి నడిసి పెరిజోరె ఇట్టా మనాద్", ఇజి వెప్నాన్.

27-28 అయావలె వాండ్రు, "అహిజ, ఓ బా, నజి అయ్దుగురు దాదార్ మనార్. వారు బా యా కస్టమ్కు మన్నిబాడిడు రవండ మండ్రేజ్ నా బుబ్బ ఇండ్రా లాజరుజ్ ఫోక్ల. వాండ్రు సాస్సి పరిజ్ వెప్నాన్, ఇజి నాను నిజి బతిమాల్జిన", ఇహాన్. 29 అందెజె అబ్రాహము, "పరి డగ్రు మోసి రాస్తికెజ్, ప్రవక్తరు రాస్తికెజ్ మనె. వారు అయాకెజ్ వెంజి మండ్రేజ్", ఇజి వన్నిజ్ వెప్నాన్. 30 వాండ్రు, "బుబ్బాతి అబ్రాహము, ఆహి వారు కివెర్. సాతికాన్ ఒరెన్ పరి డగ్రు సాస్సి వెప్టిజనె, వారు పాపమ్కు డిసి సీనార్", ఇజి వెప్నాన్. 31 అందెజె వాండ్రు, "మోసి రాస్తి మనికెజ్ ప్రవక్తరు రాస్తికెజ్ వారు వెన్ఎండ మహిజ, సాతికాన్ మర్జి నిజ్జి సాస్సి వెప్టిజబా వారు నమ్మివెర్", ఇజి వెప్నాన్.

17 యేసు వన్ని సిసూరజ ఈహు వెప్నాన్. "తప్పజ్ కిబిస్సి సజతిజ్ తప్ఎండ వానెలె. గాని యా సజతిజ్ ఎయెవెల వానెనో వన్నిజ్ అబాయా, నండో బాద. 2 ఎయెన్బా నా ముస్సు నమకం ఇడ్డి మన్ని యా కొడ్జె: నన్ని ఒరెన్వన్నిజ్ తప్పకిబిస్టెజ్ సుడ్జెతిజ పెరిసిక్కి వానాద్. దిన్నిముస్సు ఇజిరిసిక్కినె వన్ని మెడెడు జత్త పణుకు తోప్పొ సందారమ్దు విసీరినిక. ఆకదె వన్నిజ్ నెగెద్. 3 అందెజె మీ వందిజ్ మీరె జాగర్త మండ్రు. నీ తంబెరినో, ఎయెన్బా నిజి తప్పు కితిజ, వన్నిజ్ డటం బుద్ది వెవోల. వాండ్రు తప్పడిసి ఒప్పకొటిజ వన్నిజ్ సెమిస్ల. 4 ఉండ్రె దినమ్దు ఏడు సుట్టు, వాండ్రు నిజి తప్పజ్ కిజి, ఏడు సుట్టు, నీ డగ్రు వాజి 'నాను తప్పడిసి ఒప్పకొడిజినె', ఇజి వెప్టిజ నీను వన్నిజ్ సెమిస్ల". 5 నస్తివలె వన్నెండు మణిసి అపాస్తుడుజ, మజి నండో నమకం సిదా", ఇజి ప్రబుజ్ లొస్తార్. 6 అందెజె వాండ్రు, "మిజి సర్కుగింజ నస్తు నమకం మహిజ, యా మలబరి మరాతిజ్ సుడ్జెజి, "వెలెజాణిజ్ పెరె ఆజి సందారమ్దు ఉణుసె ఆల", ఇజి వెప్టి వెలె అది మిజి లోజినాద్. 7-8 ఉండ్రె వేల, మీలొఇ ఒరెన్వన్నిజ్ డూదెజ్నో గొరెజ మేప్టిజ్నో వెట్టిపణి కినికాన్ ఒరెన్ మనాన్. వాండ్రు మడిజదాన్ వాతిజ, "బేగి రల, వాజి ఉణల", ఇజి వెప్టిదెరా? సిల్లె, గాని, 'సుబ్బరం ఆజి వర్ల, నజి బాట సీజి ఉణితిని దాక మన్ల. వెనుక నీను ఉణల', ఇజి వెప్టిదెర్. 9 వన్నిజ్ ఒవజెప్టి పణి కితిజ్ ఎజామాని వన్నిజ్ వందనమ్కు వెప్నాండ్రా? 10 అందెజె మీరు బా మిజి ఒవజెప్టి పణిజ్ విజా కితి వెనుక, "మాటు పణిమణిసీర్. వందనమ్కు వెవో ఆదెజ్ అవ్సరం సిల్లెద్. మాటు కిదెజ్ మన్ని పణినె కితాట్", ఇజి వెప్టిజ్.

పది మణిసిర్ కుస్టురోగం మన్నికార్ నెగెణ్ ఆజినార్

11 యేసు యెరూసలెమ్దు సాస్సి మహివలె, సమరియ గలిలయ ముట్ట సరిఅద్దుదాన్ సాస్సి మహాన్. 12-13 వాండ్రు ఉండ్రె నాటో సాస్సి మహివలె పది మణిసి కుస్టురోగం మనికార్ వన్నిజ్ ఎద్రు వాతార్. వారు దూరం నిహారె, "యేసు ఎజామాని, మా ముస్సు కనికారం తోరిస్ల", ఇజి డెడిస్తార్. 14 వాండ్రు పరిజ్ సుడ్జెతాండ్రె, "సాస్సి, మీరు నెగెణ్ ఆతిదెర్ ఇజి పుజెరిజ తోరె ఆదు", ఇజి వెప్నాన్. వారు సాస్సి మహిజ్ నెగెణ్ ఆతార్. 15 పరిలొఇ ఒరెన్, నెగెణ్ ఆత ఇజి నెస్తాన్. వాండ్రు డటం దేవుణుదిజ్ పాగిడిజి మర్జి వాతాన్. 16 వాతాండ్రె యేసుజ్ పాదమ్కు ముస్సు, ముణుకుజ్ ఊర్జి మాడిస్తాండ్రె, వందనమ్కు వెప్నాన్. వాండ్రు సమరియదికాన్. 17 అందెజె యేసు, "పది మణిసిర్ నెగెణ్ ఆతార్ గదె. ఆ తోమెది మణిసిర్ ఎంబె మనార్? 18-19 ఎందానిజ్ వీండ్రు ఒరెండ్రె దేవుణుదిజ్

పొగడిదెజ్ మరజి వాతాన్. వీండ్లు యూదురిజ్ సెంద్ ఇకాన్. ఇసాయేలుదికార్ ఎందనిజ్ తోరె ఆవతార్?", ఇజి వెప్తాన్. వెప్తాండ్రె, "నీను నిజ్ జి సాన్ అ. నీను నా ముస్సు నమకం ఇడ్డి అందెజె నెగెణ్ ఆతి", ఇజి వన్నిజ్ వెప్తాన్.

దేవుణు రాజావజ వానివందిజ్ వెప్సినాన్

20 ఒర్రెండు, దేవుణు ఏలుబడిః కినిక లోకుర్ ఎసిజ్ సూణార్ ఇజి పరిసయిరు వన్నిజ్ వెన్ బాతార్. అందెజె వాండ్లు, "దేవుణు రాజావజ వాని ముజాల్ తోర్ని గుర్తు ఇనిక సిల్లెద్. 21 దేవుణు మిజి ఏలుబడిః కినిక ఇయేలె మొదొల్స్ మనాన్. అందెజె, ఇదిలో ఇబ్బె మనాద్, అదిలో అబ్బె మనాద్ ఇజి లోకుర్ వెప్సి గుర్తు ఇనిక సిల్లెద్", ఇజి వరిజ్ వెప్తాన్. 22 మరి వాండ్లు వన్ని సిసూర్ జ వెప్తాన్, "లోకు మరిసి ఆతి నాను గొప్ప అతికారం దాన్ సోకుదాన్ మంజినిక కండెక్ టయం బా సుడెదెజ్ ఇజి మీరు కోరిజిని రోస్సు వానెలె. గాని ఆ రోస్సు లొఇ ఉండ్డి రోజాబా మీరు తొఇదెర్. 23 లోకుర్ మిజి, "ఇదిలో ఇబ్బె మనాన్, అదిలో అబ్బె మనాన్", ఇజి వెప్సార్. గాని వరి వెట సాన్మాట్. వరి మాట అసాట్. 24 ఎందానిజ్ ఇహిజ, ఆగనమ్దు మెరిస్సెలె ఉండ్డి పడెకదాన్ మరి ఉండ్డి పడెకాద్ జాయి తోర్నివజనె లోకు మరిసి ఆతి నాను వానివలె మంజినాద్. 25 గాని ముజాల యా తరమ్దికార్ నజి నెక్సిపాక్సినార్. వాండ్లు నండొ ఇమ్సెజ్ ఓరిస్సెవెలె.

26 నోవాహు కాలమ్దు మహిలెకండెనె లోకు మరిసి ఆతి నాను వాని ముజాల మంజినాద్. 27 నోవాహు ఓడెదు సానిదాక లోకుర్ ఉణిజి తింజి మహార్. పెండ్లి ఆజి పెండ్లిదెజ్ సీజి మహార్. నస్తవలె గడ్డ నిండ్డిజి, వరిజ్ విజెరిజ్ నాసనం కిత్తాద్. 28 లోతు కాలమ్దు మహిలెకండెనె, నాను వాని ముజాల మంజినాద్. లోకుర్ ఉణిజి, తింజి, కొడుఃజి పార్ని మహార్. వల వాక్సి, ఉణుసి, ఇల్పు తొప్పి మహార్. 29 లోతు సాదొమ డిఃస్తి సాహి నాండిజ్, ఆగనమ్దాన్ సీను రంజికం పీరు లెకండె వాజి వరిజ్ విజెరిజ్ నాసనం కిత్తాద్.

30 యా లెకండెనె, లోకు మరిసి ఆతి నాను వాని దినమ్దు జగ్గిజి మంజినాద్. 31 నాను వాని దినమ్దు, మీద్దె ముస్సు మంజినికాన్ ఇండ్రొ మన్ని వన్ని సామనమ్కు ఒతెజ్ డిగ్దెజ్ అవద్. అయలెకండెనె మడిఃజ మంజినికాన్ ఇనికబా ఒతెజ్ మరజి వాదెజ్ అవద్. 32 లోతు ఆలేనిజ్ ఒడెబిదు. అది దేవుణు వెప్సి మాట వెన్ ఇతిజ్ సాతాద్. 33 ఎయెన్ బా వన్ని సాంత పాణమిదిజె కాపాడెదెజ్ మడెఃతిజ వన్నిజ్ ఎలాకాలం దేవుణు వెట బత్కిని బత్కు దొహ్కవద్. ఎయెన్ బా నా వందిజ్ వన్ని పాణం సీతిజ, వాండ్లు ఎలాకాలం దేవుణు వెట బత్కిని బత్కు దొహ్కాద్. 34 నాను మీ వెట వెప్సిన, అయా పాదొయి రివర్ ఉండ్డి మన్సమ్దు గూర్నార్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిఃస్తి సానాన్. 35 రుండి బోదెక్ కూడెఃజి నూర్ జి మంజినె. ఉండ్డి దనిజ్ దేవుణు ఒనాన్. ఉండ్డి దనిజ్ డిఃస్తి సానాన్. 36 రివర్ మడిఃజ మంజినార్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిఃస్తి సానాన్. 37 అయావలె సీసూరు, "ప్రబువా, ఎంబె యాక జగ్గినాద్?", ఇజి వెనబాతార్. వెనబాతిజ్ వాండ్లు, "పీసుగు ఎంబె మంజినాద్ ఇజి నెస్సెజ్ డెగెజ్ ఉండ్డి గుర్తు ఆనిలెకండె, యేసు వానిక నెస్సెజ్ టెబాజ్ గుర్తుజ్ మన్నె.

డిఃన్ ఏండ వాతి రాండిబోదెలి కత

18 వన్నిసీసూర్ డిఃన్ ఏండ ఎస్తివలెబా పార్లన కిజి మండ్రెజ్ ఇజి నేరేపెస్సెజ్ యేసు వరిజ్ కతవజ ఈహు నెస్పిస్తాన్. 2 అక్క ఇనిక ఇహిజ, ఉండ్డి పట్నమ్దు ఒరెన్ నాయం కినికాన్ మహాన్. వాండ్లు దేవుణుదిజ్ తియెల్ ఆఇకాన్. లోకాజ్ లసెం కిఇకాన్. 3 ఆ పట్నమ్దు ఉండ్డి రాండి బోదెలి మహాద్. అది వన్ని డగ్గు డిఃన్ ఏండ వాజి, "నా ముస్సు పగ ఆతికాన్ ఒరెన్ మనాన్. వాండ్లు నజి సీదెజ్ మనిక సీనెలెకండె సీను నాయం తీరిన్ అ", ఇజి బతిమాలజ్ మహాద్. 45 వాండ్లు సెగం కాలం కెపెతాన్. వెనుక వాండ్లు, "నాను దేవుణుదిజ్ తియెల్ ఆఇకాన్. లోకాజ్ లసెం కిఇకాన్. గాని యా ముండ బోదెలి డిఃన్ ఏండ వాజి నజి ఏక ఏక లొసినాద్. అందెజె అది మరి మరి వాజి బాద కల్గిసేవండ దన్నిజ్ నాయం తీర్న", ఇజి వన్నిజ్ వాండ్రె వెప్తాన్. 6 మరి యేసు వెప్తాన్, "విండ్లు, యా సీతి నిజాయితి సీలి నాయం కినికాన్ ఇనిక వెప్తాన్ ఇజి. 7 అహిజ, సీతి నిజాయితి మన్ని దేవుణు, వాండ్లు ఏర్పాటు కితి వన్ని లోకుర్ రెయు పాకాల్ వన్నిజ్ పార్లనం కితిజ, వాండ్లు వరిజ్ నాయం తీర్సేవండ మంజినాండ్రా? వాండ్లు ఆలేసం కినాండ్రా? 8 నాను మీ వెట వెప్సిన, వాండ్లు బేగి నాయం తీర్సాన్. గాని లోకు మరిసి ఆతి నాను మరజి వానివలె, నా ముస్సు నమకం దాన్ మన్ని వరిజ్ సుణానా?

వరిసయిని పన్నుపెర్ని వన్ని కత

9 సెగొండార్ మాపు సీతి మనికావ్ ఇజి వరిజ్ వారె గర్త ఆజి మహివరిజ్ దుసలాడెఃతికార్ మహార్. నన్నివరిజ్ వాండ్లు కతవజ నెస్పిస్తాన్. 10 "రివర్ లోకుర్ పార్లనం కిదెజ్ ఇజి దేవుణు గుడిఃదు సాహార్. ఒరెన్ వరిసయి వాండ్లు ఒరెన్ పన్ను పెర్నికాన్. 11 వరిసయి వాండ్లు సాహండ్రె, వన్నిలొఇ వాండ్లు ఈహు పార్లనం కిత్తాన్, "ఓ దేవుణు, నాను మహి లోకుర్ లెకండె ఆవ. ఆసగొటుజు లెకండె, అనయం కిని వరిలెకండె, రంకు బూలాని వరి లెకండె ఆవ. యా పన్ను పెర్ని వన్ని లెకండెబా ఆవ. అందెజె నిజి వందనమ్కు.

12 నాను వారమ్దిజ్ రుండి సుట్టు ఉపాస్ మంజిన. నజి వాజిని విజా దన్నిలొఇబా నిజి దెసం బాగం సీజిన", ఇజి పార్లనం కిత్తాన్. 13 గాని పన్ను పెర్నికాన్ దూరం నిహాన్. వాండ్లు ఆగాసం దరొబ్ బా బేసేవండ, వన్ని గుండె కొత్తె అజి, "ఓ దేవుణు, నాను పాపం కితిక. నజి కనికారం తోరిన్ అ", ఇజి వెప్తాన్.

14 నాను మీ వెట వెప్సిన, వరిసయి వన్ని ముస్సు విని పావమ్కునె దేవుణు సిమిస్తాన్. వీండ్లు దేవుణు ముజాల సీతి నిజాయితి మనికాన్ ఇజి తీర్సె అతండ్రె ఇండ్రొ సాహాన్. వన్నిజ్ వాండ్రె పెరికాన్ ఇజి ఒడెబినికాన్ ఎయెన్ బా ఇజ్రికాన్ ఆనాన్. వన్నిజ్ వాండ్రె తగిజి ఇజ్రికాన్ ఇజి ఒడెబినికాన్ ఎయెన్ బా పెరికాన్ ఆనాన్.

ఇజిరికొడొరిజ్ యేసుడగ్గు కిజినాన్

15 సెగొండార్, యేసుడగ్గు ఇజిరి బయిరిజ్ బా తసి మహార్. వరిముస్సు వన్నికిక ఇడెదెజ్ ఇజి తత్తార్. అక్క సుడెఃతారె సీసూర్ వరిజ్ జటిజ్ ఆతార్. 16 గాని యేసు, కొడొరిజ్ వన్ని డగ్గు కూక్తాన్. కూక్తాండ్రె, "యా ఇజ్రి కొడొరిజ్ నా డగ్గు రవీర్. వరిజ్ అడు కిమాట్. ఎందానిజ్ ఇహిజ, యా కొడొరి లెకండె మనికారె

దేవుణు ఏలుబడికి కినివెలె మంజినార్. 17 నిజమె, మీ వెట వెప్పిన, ఇజ్రి కొడొకొర్ నమ్మిని వజ, దేవుణుదిజ్ నమినికార్ దేవుణు ఏలుబడిడు మజినార్. నమ్మిఇకార్ మండ్రెజ్ అట్వెర్”.

ఒరెన్ అస్తిమన్నికాన్ యేసువెట వర్గజినాన్

18 ఒరెన్ అతికారి యేసుజ్ సుడఃజి, “ఓ నెగ్గి బోదకినికి, ఎలాకాలం దేవుణువెట బత్రిని బత్తు దొహొకిద్ఇహిజ, నాను ఇనిక కిదెజ్”, ఇజి వెన్బాతాన్.
 19 అందెజె యేసు, “నాను నెగ్గికాన్ ఇజి ఎందనిజ్ నీను వెప్పిని దేవుణు ఒరెండ్రె నెగ్గికాన్. మరి ఎయెన్బా నెగ్గికాన్ ఆఎన్”, ఇజి వెప్తాన్. 20 మరి వన్నిజ్, “రకుం బూలామా. లోకుదిజ్ సప్మా. డొజ కిమ. అబద సాక్సి వెహమా. నీ యాయ బుబ్బెజ్ గవ్నమ్దాన్ నెగెండ సుడఃఅ † ఇని మోసె సీత్తి ఆడ్రెజ్ నెసినిగదె”, ఇజి వెప్తాన్. 21 వెప్తాజ్ వాండ్రు, “ఇజ్రివెలెహాన్ అసి యా విజా వన్కాజ్ లోజిజిన వాజిన”, ఇజి వెప్తాన్.
 22 యేసు యాక వెహొండ్రె వన్నిజ్, “మరి ఉండ్రె బా సీన్ కిదెజ్ మనాద్. నిజి కల్గితిమనికెజ్ విజా పార్ని అయా డబ్బుజ్ బీద వరిజ్నిఅ. అయావలె దేవుణు మంజిని బాడిడు నిజి సంసారం మంజినాద్. మరి, నీను వాజి నా సిసూడుః ఆఅ”, ఇజి వెప్తాన్. 23 యా మాటెజ్ వెహిజ్, వన్ని మొకొం ఇజ్రిక ఆతాద్. ఎందనిజ్ ఇహిజ, వాండ్రు నండ్రొ అస్తిమనికాన్. 24 యేసు వన్నిజ్ సుడఃజి, “అస్తిమనికార్ దేవుణు కిని ఏలుబడిడిదిజ్ అడిఃగి మండ్రెజ్ ఎసానొ కస్టం. 25 ఒరెన్ సంసారం మనికాన్ దేవుణు కిని ఏలుబడిడిదిజ్ అడిఃగి మన్ని దని ముస్సు ఉండ్రె ఒంటె దొబానం బొరొదాన్డుఃగ్దెజ్ సూలు ఆనాద్”, ఇజి వెప్తాన్. 26 అయావలె యా మాటెజ్ వెహికార్, “అహిజ, దేవుణు రక్సిస్తి లెకెండె ఎయెర్ మండ్రెజ్ అట్వెర్?”, ఇజి వెన్బాతాన్. 27 అందెజె యేసు, “లోకు కిదెజ్ అట్ఇక దేవుణు కిదెజ్ అట్వాన్”, ఇజి వెప్తాన్. 28 నస్తివలె పేతురు, “ఇదిలో, మాపు మజి కల్గితి మనికెజ్ విజా డిఃస్తావె నీ వెట వాతావ్”, ఇజి వెప్తాన్. 29-30 అందెజె యేసు, “ఒరెన్ వన్ని ముస్సు దేవుణు ఏలుబడికి కిదెజ్ ఇజి ఇల్లదిజ్బా ఆల్నిజ్బా, దాద తంబెరిజ్బా అయిసి అప్పాసిరిజ్బా కొడొకొకొదిజ్బా, డిఃస్తికాన్ ఎయెండ్రొ వన్నిజ్ యేలు మరి నండ్రొ కల్గినాద్. వాని కాలమ్దు వన్నిజ్ ఎలాకాలం దేవుణు వెట బత్రిని బత్తుదు బా మంజినాద్, ఇజి కసితం నాను మీ వెట వెప్పిన”, ఇజి వెప్తాన్.

యేసు వన్ని సాపువందిజ్ సిసూరిజ్ వెప్పినాన్

31 యేసు వన్ని వన్యెండు మణిసిర్ సిసూరిజ్ కూక్సి వరిజ్ ఈహు వెప్తాన్. “ఇదిలో మాటు యెరూసలెమ్దు సాస్సినాట్. లోకు మరిసి ఆతి నా వందిజ్ ప్రవక్తరు రాస్తి విజా మాటెజ్ అబ్బె పూర్తి ఆనాద్. 32-33 యూదురు ఆఇ వరి కీదు నాను ఒపజెపె ఆన. వారు నజి వెక్సిసి సిగు లాగ్గి, నా ముస్సు పూసి కొరెడొజాణిజ్ డెఃయిజి సప్పార్. మూండ్రె దినమ్కాజ్ నాను మర్జి నికెమ్ ఆనాలె. 34 గాని సిసూరిజ్ యా మాటెజ్ లొఇ ఉండ్రెబా అర్దం ఆవతార్. దిన్ని అర్దం వరిజ్ డాఃజితాద్. వాండ్రు వెప్పి నజతిజ్ వారు నెన్వెతార్.

గుడ్డి వాండ్రు బేస్తెజ్ అట్సినినాన్

35 యేసు యెరికొ పట్టుమ్దిజ్ డగ్రు వాతివెలె, ఒరెన్ గుడ్డి వాండ్రు సరి పడఃకాద్ బసి లొసి మహాన్. 36 సీన లోకుర్ అయా సరిదాన్ సాస్సి మహిక, వెహొండ్రె, ఇనిక జర్గిజినాద్ ఇజి వెనబాతాన్. 37 వారు వన్నిజ్, “నజరెతు వాండ్రు ఆతి యేసు, సాన్సినినాన్”, ఇజి వెప్తాన్. 38 వాండ్రు, “ఓ దావీదు మరిసి ఆతి యేసువా, నా ముస్సు కనికారం తోరిన్అ”, ఇజి డటం డేల్స్తాన్.
 39 ముజాలె సాస్సి మహికార్, “అలెఅ”, ఇజి వన్నిజ్ కసితం వెప్తాన్. గాని వాండ్రు మరి నండ్రొ దావీదు మరిసి, నా ముస్సు కనికారం ఆఅ”, ఇజి మరి ఒదె డటం డేల్స్తాన్. 40-41 యాక వెహొండ్రె యేసు అబ్బె నిహాన్. “అయా గుడ్డి వన్నిజ్ నా డగ్రు తగ్అ”, ఇజి వరిజ్ డటం వెప్తాన్. వాండ్రు వాతిజ్, నాను నిజి ఇనిక కిదెజ్ ఇజి కోరిజిని?”, ఇజి వన్నిజ్ వెన్బాతాన్. దనిజ్ వాండ్రు, “ప్రబువా, నాను బేస్తెజ్ ఇజి ఆన ఆజిన”, ఇజి వెప్తాన్. 42 అందెజె యేసు, “ఇదిలో నీను సూణిలె. నీను నా ముస్సు నమకం ఇడ్డి. అందెజె నెగెన్ ఆతి”, ఇజి వెప్తాన్. 43 వెటెనె వాండ్రు బేస్తెజ్ అట్వాన్. వాండ్రు దేవుణుదిజ్ పాగిడిఃజి యేసువెట సాహాన్. యాక సుడఃతిజ్ లోకుర్ విజెరిబా దేవుణుదిజ్ పాగిడిఃతార్.

జకయ ఇని వన్ను పెర్ని వన్నిజ్కూక్సినినాన్

19 యేసు నడిఃజి యెరికొ పట్టుమ్దు వాతండ్రె అయా సరిదాన్ సాస్సి మహాన్. 2 జకయ ఇన్ని ఒరెన్ అబ్బె మహాన్. వాండ్రు వన్ను పెర్ని వరిజ్ నెయ్కి. వాండ్రు గొప్ప అస్తిమన్నికాన్. 3 యేసుజ్ సుడఃదెజ్ ఇజి వాండ్రు కోరితాన్. గాని నండ్రొ లోకుర్ మహిజ్ వన్నిజ్ సుడఃదెజ్ అట్వెతాన్. ఎందనిజ్ ఇహిజ, వాండ్రు కురికాన్. 4 యేసు అయా సరిదాన్వె వాజి మహిజ్, వాండ్రు ముజాలె ఉహొక్సి సాస్సి ఉండ్రె బొడ్డె మరాత్ ఎక్తాన్. 5 యేసు మరాన్ అడిఃగి వాతివెలె, ముస్సు బేసి, “జకయ, బేగి డిఃగ్జి రల. నేండ్రు నాను నీ ఇండ్రొ మండ్రెజ్ వెలె”, ఇజి వన్నిజ్ వెప్తాన్.
 6 అందెజె వాండ్రు గజిబిజి డిగితాండ్రె వన్ని ఇండ్రొ కూక్త ఒత్తండ్రె సర్దదాన్ డగ్రు కిత్తాన్. 7 యాక సుడఃతారె, లోకుర్ విజెరి సణిజితార్. “పిండ్రు, పాపం కిని వన్ని ఇండ్రొ కూల సాహాన్”, ఇజి. 8 అయావలె జకయ నిజితండ్రె, యేసుజ్ ఈహు వెప్తాన్. “ఇదిలో ప్రబువా, యేలు నా ఆస్తి లొఇ సగం బీదవరిజ్ సీజిన. అనయమ్దాన్ ఎయె బాన్బా ఇనిక లొస్తిజ, నాను దని నాల్లి వంతు మర్జి సీన”, ఇజి వెప్తాన్.
 9 యేసు వన్నిజ్, “నేండ్రు యా ఇండ్రొణి వరి పాపమ్కు దేవుణు సెవిస్త మనాన్. ఎందనిజ్ ఇహిజ, విన్ని అనిసిఆతి అబ్రాహాము దేవుణు ముస్సు నమకం ఇడ్డి వజ, పిండ్రుబా నమకం ఇట్వాన్. 10 లోకు మరిసి ఆతి నాను పాడాఃజి సాని వరిజ్ రెబాజి రక్సిస్తిజ్ వాత”, ఇజి వెప్తాన్.

† నిర్గమ 20:12-16, ద్వితి 5:16-20.

పణిమణిసిర్ కత

11 లోకుర్ యాకెజ్ వెంజి మహార్. వాండ్లు యెరూసలెం డగ్రు ఆతాన్. దేవుణు రాజు వజ వెటనె వానాన్లె ఇజి లోకుర్బా ఒడెబితార్. అందెజె వాండ్లు కత వజ వరిజ్ ఈహు నెన్పిస్తాన్. 12 ఒరెన్ రాజు వజ కుటుమ్దికాన్ వన్ని దేసమ్దు రాజు ఆదెజ్ ఇజి ఉండ్రి దూరం మని దేసెం సాహాన్. మరి, మర్జి వాదెజ్ ఇజి సాహాన్. 13 సాని ముజాల, వన్ని పణిమణిసిర్ లొఇ వది మణిసిర్ కూక్కి ఒరెన్ ఒరెన్ వన్నిజ్ ఉండ్రి మీనా † సిత్తాన్. సితాండ్రె, "నాను మర్జి వాని దాక బేరం కిజి మండ్లు", ఇజి వరిజ్ వెప్తాన్.

14 గాని వన్ని పట్టుమ్దికార్ వన్నిజ్ ఇస్టం సెలెతాద్. అందెజె వారు, "పిండ్లు మజి ఏలుబడి: కిదెజ్ మజి ఇస్టం సిల్లెద్", ఇజి వన్ని వెనుక పెరి రాజుజ్ కల్లు ఫాక్టార్. 15 అహిజ్బా, వాండ్లు రాజు ఆతాన్. మర్జి వాతివెలె, వాండ్లు డబ్బు సెత్తి మణిసిర్, అయా డబుదాన్ బేరం కిజి ఇనిక గణస్తార్ ఇజి నెన్జెజ్ వరిజ్ కూక్కిస్తాన్. 16 వరిలొఇ మొదొహికాన్ వన్ని డగ్రు వాజి, "బాబు, నీను సెతి యాబయి రుపాయుజాణిజ్, అయ్దు వందెజ్ రుపయుజు వాతె", ఇజి వెప్తాన్. 17 వాండ్లు, "నెగ్గె పణిమణిసి నీను నెగెండ కితి. నీను ఇజ్జి పణిదు నమకం దాన్మహి. అందెజె వది పట్టుమ్క ముస్సు అతికారి ఆల", ఇజి వెప్తాన్. 18 అయావలె మరి ఒరెన్ వాజి, "బాబు, నీను సెతి యాబయి రుపాయుజాణిజ్ రుండి వందెజ్ యాబయి రుపాయుజు వాతె", ఇజి వెప్తాన్. 19 నీను బా అయ్దు పట్టుమ్క ముస్సు అతికారి ఆల", ఇజి వెప్తాన్.

20-21 అయావలె మరి ఒరెన్ వాజి, "బాబు, ఇదిలో నీ డబ్బు. నీను నీది ఆఇక ఒనికి. నీను విత్ఇకెజ్ కొయ్జి ఒనికి. నీను గటి పాణం మనికి. అందెజె నిజి తియెల్ ఆజి యా డబ్బు రుమాల్దు మూట తోహ్క ఇత్తా మహా", ఇజి వెప్తాన్. 22-23 అందెజె వాండ్లు వన్నిజ్ వెప్తాన్, "పణిదిజ్ రఇ పణిమణిసి, నీ వెయిది సాంత మాటదిజ్నె, నాను నిజి తీర్పు తిర్సిన. నాను నాది ఆఇదనిజ్ పెర్సి ఒనికాన్ ఇజి, నాను విత్ఇకెజ్ కొయ్జి ఒనికాన్ ఇజి నీను నెన్సి గదె. నాను గటి పణం మనికాన్ ఇజి నీను నెన్సి. మరి ఎందనిజ్ నా డబ్బు బెంకుదు ఇడెఇతి? అహు ఇట్టిక ఇహిజ, నాను మర్జి వాతివెలె వడ్డిదాన్ దొహ్కాద్ మరి. 24 విన్నిబాన్ మన్నిడబ్బు లాగ్గి వది పట్టుమ్కాజ్ అతికారి ఆతి మొదొహివన్నిజ్ సీదు", ఇజి పడెకాద్ నిహి మహి వరిజ్ వెప్తాన్. 25 వారు, "బాబు, వన్నిజ్ అయ్దు వందెజ్ రుపాయుజు మనె గదె", ఇజి వెప్తాన్. 26 వెప్తాజ్ వాండ్లు, "నమిదెజ్ తగ్గి వన్నిజ్ మరి నండొ కల్గినాద్లె. గాని నమిదెజ్ తగ్గె వన్నిజ్ కల్గితి మన్ని కండెకా లగ్నాన్, ఇజి నాను మీ వెట వెప్తాన్. 27 మరి, నాను వరి ముస్సు ఏలుబడి: కిదెజ్ ఇస్టం సిల్లి నా పగ ఆతి వరిజ్ ఇబ్బె తగ్గె. వరిజ్ నా ఎద్రు కత్తు", ఇజి వెప్తాన్.

28 యేసు యా మాటెజ్ వెప్తా వెనుక, యెరుసలం సాండ్రెజ్ వరి ముజాల సాస్సినాన్. 29-30 ఒలివ గొరొణ్ డగ్రు మన్ని బెత్సెనెగె, బెతానియ ఇని నాహ్కాజ్ డగ్రు వాతాన్. వాతివెలె వన్ని సిసూర్ లొఇ రిఎరిజ్ కూక్కి, "మీ ఎద్రు మన్ని నాలొ సాండ్లు. అబె సాహిజ సరి, తోహ్క మని గాడెదె పిల్ల తోర్నాద్. దన్నిముస్సు ఎసెజ్బా ఎయెర్బా బన్ఎరె. దనిజ్ కుత్తి పేర్జి తగాట్. 31 ఎయెన్బా, "మీరు ఎందనిజ్ దనిజ్ కుత్సెసిదెర్, ఇజి వెన్బాతిజ, యాకెజ్ ప్రబుజ్ కావాలి, ఇజి వరిజ్ వెప్తు", ఇజి వెప్తాండ్రె ఫాక్టాన్. 32 ఫాక్కి మనికార్ సాస్సి వాండ్లు వరిజ్ వెప్తి లెకెండెనె సుడెతార్. 33 వారు ఆ గాడెదె పిల్లదిజ్ కుత్తి మహిజ్, దన్ని ఎజామాసూర్, "మీరు ఎందనిజ్ గాడెదె పిల్లదిజ్ కుత్సెసిదెర్", ఇజి వెన్బాతార్. 34 అందెజె వారు, "యాక ప్రబుజ్ కావాలి", ఇజి వెప్తాన్. 35 వారు యేసుడగ్రు తత్తార్. తతారె, దన్నిముస్సు వరి పాతెజ్ పహార్. యేసుజ్ దని ముస్సు ఎకిస్తార్. 36 వాండ్లు సాస్సి మహిజ్, వరి పాతెజ్ సాన్సెని సర్దు పహార్. 37 ఒలివ గొరొణ్ డిగ్గి వాని సర్దు వాతివెలె, వన్ని సిసూర్ ని వన్ని వెట మన్ని మంద లోకుర్ విజెరె దేవుణుదిజ్ పాగిడితార్. వారు సుడెతి విజా గొప్ప పణిజి వందిజ్ సర్దదాన్ దేవుణుదిజ్ డటం పాగిడితార్. వారు ఈహు పాగిడితార్.

38 "దేవుణు సెతి అతికారమ్దాన్ వాజిని రాజుజ్ పాగిడె: ఆనికాన్ †. వరలోమ్దు సమాదనం మనాద్. ముస్సు మన్ని దేవుణు గొప్ప పెరికాన్", 39 నన్సివలె ఆ మంద లొఇ మన్ని సెగొండార్ పరిసయ్రుజు, "ఓ బోదకినికి, నీ మంద సిసూర్ విజెరిజ్ అలెజి మండ్లు ఇజి డటం వెహాల", ఇజి వెప్తాన్. 40 అందెజె వాండ్లు, "మీరు అల్లెత మహిజ, యా పణుకుజ్ డటం డేల్లి పాగిడిజెనె ఇజి నాను మీ వెట వెప్తాన్", ఇజి వెప్తాన్. 41-42 వాండ్లు యెరూసలెం పట్నం డగ్రు వాతండ్రె, పట్టుమ్దిజ్ సుడెజి అబ్బె మన్ని లోకుర్ వందిజ్ అడెబతాన్. అడెబతాండ్రె ఈహు వెప్తాన్, "మీరు యా దినమ్దు బా సమాదనం ఆని సజతిజ నెన్సిజి మిజి ఎసానా మేలు మంజినాద్. గాని యేలు యాకెజ్ మీ కణకాజ్ తోర్ఎండ డాజెత మనె. 43-44 దేవుణు మిజి రక్సిస్తాజ్ మీ డగ్రు వాతి కాలం మీరు నెన్ఇదెర్. అందెజె మీ పగ్ఆతికార్ మీ సుటులం కోట తోహ్కె వల్లి సాన్ఎండ, లాపు అడ్డుజ్ కినార్. వారు మిజి, మీ పట్టుమ్దిజ్ పూర్తి నాసనం కినార్. వారు పణుకు ముస్సు పణుకు మన్ఏండ పట్నం పూర్తి నాసనం కిని కాలం వానాద్లె.

యేసు గుడిదాన్ సవ్కారిజ పేర్జినాన్

45-46 యాకెజ్ వెప్తాండ్రె, వాండ్లు దేవుణు గుడిదు సాహాన్. అయావలె అబ్బె సవ్కారిజు పార్సి మహార్. వరిజ్, "నా గుడి: పార్దనం కిదెజ్ ఇడ్డి గుడి: † ఇజి దేవుణు మటదు రాస్త మనాద్. గాని మీరు డొజారి మంజిని సాలం † † లెకెండె దనిజ్ కితిదెర్", ఇజి వెప్తాండ్రె వరిజ్ పేర్తాన్. 47 యేసు రోజా, గుడిదు బోదకిజి మహాన్. పెరిపుజెరిజు, యూదురి రూలుజ్ నెస్సిస్సికార్, లోకుర్ లొఇ మన్ని పెద్దెల్బు వన్నిజ్ సప్తెజ్ సుడెజి మహార్. 48 గాని లోకుర్ విజెరె వన్ని మాటెజ్ బాగ వెంజి వన్ని సుటులం మహిజ్, వన్నిజ్ సప్తెజ్ అట్వెతార్.

యేసు అతికారం వందిజ్ వెన్బాజినార్

20 అయా దినమ్కలొఇ ఉండ్రి నాండిజ్, వాండ్లు దేవుణు గుడిదు లోకాజ్ నేర్పిసి, సువార్త బోదిసి మహాన్. అయావలె పెరి పుజెరిజు ని యూదురి రూలుజ్ నెస్సిస్సికార్, పెద్దెల్బు వెట కూడెజి వన్ని ముస్సు వాతాద్. 2 నీను ఇనిఅతికారమ్దాన్ యా పణిజ్ కిజిని? ఎయెన్ నిజి యా అతికారం సితాన్? మజి వెహాల", ఇజి వన్నిజ్ వెన్బాతార్. 3 అందెజె వాండ్లు, "నాను బా మిజి ఉండ్రి మాట వెన్బానా. 4 బాప్సిం సీదెజ్ అతికారం యాహనుజ్ ఎయె బాణిజ్

† ఉండ్రి మీనా మూండ్రి నెలెజె పణిదిజ్ కూల్ † † కీర్తన 118:26. ‡ యెసయ 56:7. †† యిర్మీయ 7:11.

వాతాద్ దేవులు బాణిజ్ నా లోకు బాణిజ్ నా నజి యేలు వెహు? ఇజి వెహున్. 5 వరిలో ఇ వారు ఈహు వర్గితార్. దేవులు బాణిజ్ వాతాద్ ఇజి మాటు వెహుజ, ఎందనిజ్ మీరు వన్నిజ్ నమ్ ఇతిదెర్ ఇజి వాండ్లు వెన్ బానాన్. 6 లోకుర్ బాణిజ్ ఇజి మాటు వెహుజ, లోకుర్ విజెరె మజి పణకాణిజ్ డెయినార్. ఎందనిజ్ ఇహిజ, యోహోను, ఒరెన్ దేవులు ప్రవక్త ఇజి విజెరె వూర్తి నమ్మిజినార్. 7 అందెజి వారు, “అయాక ఎంబెణిజ్ వాతాదో మజి తెలివద్”, ఇజి వారు మర్జి వెహుర్. 8 అహిజ, ఎంబెణి అతికారమ్ దాన్ నాను యా పణిజ్ కిజిన ఇజి నాను బా వెహో”, ఇజి యేసు వరిజ్ వెహున్.

రయుజ కత

9 మరి, వాండ్లు ఉండ్రి కత వజ లోకురిజ్ నెన్ పిస్తాన్. “ఒరెన్ లోకు ద్రాక్స బోట ఉణుస్తాన్. ఆ బోట సెగొండార్ రయ్ తూజ తనక సితాన్. సితండ్రె నండ్రో కాలం మండ్రెజ్ ఉండ్రి దూరం దేసెం సాహాన్. 10 పంట కొయ్ ని కాలమ్ దు వన్నిజ్ వాని పట్టుజ వంతు లోసి తగ్గల ఇజి ఒరెన్ గొతియ వన్నిజ్ రయ్ తూజ డగ్రు ఫాక్తాన్. అయా రయ్ తూజ వన్నిజ్ డెయితారె వహి కీదాన్ మర్జి ఫాక్తార్. 11 వాండ్లు మరి ఒరెన్ గొతియ వన్నిజ్ ఫాక్తాన్. వారు వన్నిజ్ బా డెయిజి, సిగు కితారె వహి కీదాన్ ఫాక్తార్. 12 మరి బా, ఒరెన్ వన్నిజ్ ఫాక్తాన్. వారు వన్నిజ్ గాయమ్ కు ఆని లెకండ్ డెయితారె వెల్లి విసిర్తార్. 13 అయావలె ద్రాక్స బోట ఎజామాని, “నాను ఇనిక కిదెజ్? నాను లావు ప్రేమిన్ని నా సాంత మరిసిజ్ ఫాక్స. వారు వన్నిజ్ గవరం సీనార్ లెనూ”, ఇజి ఒడెబితాండ్రె ఫాక్తాన్. 14 గాని పాలి ఆస్తి మన్నికార్ వన్నిజ్ సుడెతారె, “వీండ్లు యా బోటాదిజ్ అక్కు మనికాన్. యా బోట మాది ఆదెజ్ వన్నిజ్ నవ్వాట్. రదు”, ఇజి వరి లో ఇ వారు వర్గితార్. 15 అందెజి వారు వన్నిజ్ ద్రాక్స బోటదాన్ వెల్లి ఫాక్తారె సప్తార్. అహిజ, ద్రాక్స బోట ఎజామాని వరిజ్ ఇనిక కినాన్? 16 వాండ్లు వాజి, అయా రయ్ తూజ సస్సి మహి వరిజ్ బోట ఒపజెవ్వాన్. లోకుర్ యాక వెహారె, “ఆ లెకండ్ కిదెజ్ ఆవద్”, ఇజి వెహుర్.

17 యేసు వరిజ్ డిటం బేసి ఈహు వెన్ బాతాన్, “అహిజ, ఇల్లు తోహివ్కార్ నెక్తి ఫాక్తి పణుకు మూలదిజ్ మూల పణుకు ఆతాద్ † ఇజి దేవులు మాటదు రాస్తి మన్ని దన్ని అర్దం ఇనిక?

18 అయా పణుకు ముస్సు అర్ని విజెరె ముకెజ్ ఆనార్. అయా పణుకు ఎయెన్ ముస్సు అర్నిజ, వాండ్లు సింద్ సింద ఆనాన్”. 19 యూదురి రూలుజ్ నెస్పిన్సికార్, పెరి పుజెరిజు, మా వందిజ్ నె వీండ్లు కత వజ వెహున్ ఇజి నెహారె, వెలనె వన్నిజ్ అస్తిజ్ సుడెతారె. గాని లోకురిజ్ తియెల్ ఆతారె, అన్ ఎతారె.

20 అందెజి వారు వన్నిజ్ బాగ గురి కిజి మహోర్. ఎందనిజ్ ఇహిజ, వాండ్లు వెహిని మాట లో ఇని దనిజ్ బా తవు అసి వన్నిజ్ తోహిని అతికారిజ బాన్ ఒపజెవ్వాజె. దిని వందిజ్ వారు నండ్రోండారిజ్ ఫాక్సివార్. యా సెగొండార్ మాపు సీతి నిజాయితి మనికాన్ ఇజి వేసం కినికార్. నని వరిజ్ వన్ని డగ్రు ఫాక్తార్. వీరు సాన్ని వన్ని మాటెజలో ఇ తవు అస్తిజ్ ఇజి. 21 వారు వాతారె వన్నిజ్, “ఓ బోదకినికి, నీను నిజమతిక వెహి బోదకిని ఇజి మాపు నెహ్వాన్. నీను ఇజ్రికార్ పెరికార్ ఇజి తేడ తో ఇకి. దేవులుదిజ్ ఇస్టం ఆతి నిజమాతి బత్తు వందిజ్ నీను నిజం నెస్పిన్సి ఇజి మాపు నెహ్వాన్. 22 మాపు కయ్ సరుజ్ వన్ను సీనికెజ్ నాయమ్ నా? అనయమ్ నా?”, ఇజి వన్నిజ్ వెన్ బాతారె. 23-24 వాండ్లు వరి సె ఇ బుద్దిదిజ్ నెహ్వాండ్రె వరిజ్, “ఉండ్రి దినారి కాసు తోరిస్తు. దిని ముస్సు మన్ని బోమ్మ ఎయెది? రాస్తి మన్ని రాంత ఎయెది?”, ఇజి వెన్ బాతాన్. “కయిసర్ వి”, ఇహోర్ వారు. 25 అందెజి వాండ్లు, “కయిసరుది, కయ్ సరుజ్ నీదు. దేవులుది దేవులుదిజ్ నీదు”, ఇజి వెహున్. 26 వారు అబ్బె మంద ఎద్రు వాండ్లు వెహి మాటదు తవు అస్తిజ్ అట్ ఎతారె. వాండ్లు మర్జి వెహి మాటదిజ్ నండ్రో బమ్మ ఆతారె అలెతారె.

27 నస్తివలె సెగొండార్ సదుకయ్ రు యేసు డగ్రు వాతారె. సాతి వెనుక మర్జి నిజ్ నికెల్లి ఇజి వారు వెహివార్. వారు వాతారె ఈహు వెన్ బాతారె. 28 ఓ బోదకినికి, ఒరెన్ కొడోర్ సిల్లెండ్ సాతిజ. వన్ని తంబెర్ని ఒన్నిజ్ ఇడ్డె: ఆజి కొడోర్ ఇడ్డె:దెజ్. ఆహో సాతి వన్ని వందిజ్ కుటుం నిల్పెజ్, ఇజి మోసె మజి రాస్తి సిత్తమనాన్. 29-31 యేలు సుడె:ల, ఉండ్రి కాలమ్ దు, దాదతంబెర్సిరి, ఏడు గురు మహోర్. తోల్ వరిదికాన్ ఉండ్రి బోదెల్ దిజ్ పెండ్లి ఆతాన్. కొడోర్ సిల్లెండ్ సాతాన్. సాతిజ్, నడి:పి వాండ్లు దనిజ్ ఇడ్డె: ఆతాన్. కొడోర్ సిల్లెండ్ సాతాన్. వెనుక కొగ్రి నడి:పి దనిజ్ ఇడ్డె: ఆతాన్. కొడోర్ సిల్లెండ్ వాండ్లుబ సాతాన్. ఆహో ఏడు గురు బా కొడోర్ సిల్లెండ్ సాతారె. 32 కడి:వేరిదు ఆ బోదెల్ బా సాతాద్. 33 అందెజి సాతి వరిబాణిజ్ మర్జి నిజ్ ని వెలె, ఆ బోదెల్ ఎయెరిజ్ ఆల్ని ఆనాద్? ఆ ఏడు గురుదిజ్ బా అది ఆల్ని ఆత మహోద్ గదె?”, ఇజి వెన్ బాతారె.

34 అందెజి యేసు వరిజ్ ఈహు వెహున్, “యా లోకమ్ ది లోకుర్ పెండ్లి ఆజినార్. పెండ్లిదిజ్ నీజినార్. 35 గాని సాతి వరిబాణిజ్ మర్జి నిజ్ జి వరలో కమ్ దు మండ్రెజ్ తగ్గికార్ పెండ్లి ఆవెర్. పెండ్లిదిజ్ నీవెర్. 36 ఎం ఆనిజ్ ఇహిజ, వారు మరి సావెర్. వారు దేవులు దూతెజ ఫోలితికార్. వారు సాపుదాన్ మర్జి నిజ్ నార్. అందెజి వారు దేవులు కొడోర్. 37-38 సాతికార్ నిజ్ నార్ ఇజి మోసె నెగ్రెండ్ రుజాఫ్ కిజినాన్. లట కన్ని బాన్ మోసె సాహోన్. అబ్బె, ‘అబ్రాహము దేవులు, ఇస్సాకు దేవులు, యాకోబు దేవులు ఇజి వాండ్లు దేవులు ఆతి ప్రబు వందిజ్ వెహివార్. అయావలె అబ్రాహము, ఇస్సాకు, యాకోబు బత్కినివార్ ఇజి తోర్నాద్. వాండ్లు బత్కిని మన్ని వరిజ్ నె దేవులు. సాతి వరిజ్ దేవులు ఆవెన్. ఎందనిజ్ ఇహిజ, వన్ని వెల కూడి:తి మనికార్ విజెరె బత్కినివార్.

39 సెగొండార్, యూదురి రూలుజ్ నెస్పిన్సికార్, “బోదకినికి, నీను నెగెండ్ వెహి”, ఇజి వన్నిజ్ వెహుర్. 40 వెనుక వారు వన్నిజ్ ఇనిక బా వెన్ బాదెజ్ ఎయెరిజ్ బా దయ్ రం సాల్ ఏతారె.

41 యేసు వరివెల ఈహు వెహున్. “క్రీస్తు దావీదు తెగ్గొతికాన్ ఇజి ఎలాగ వారు వెహివార్? 42-43 ‘నాను నీ పగాతి వరిజ్ నీ పాదమ్ క అడి:గి ఇడ్డిదాక, నీను నా ఉతెర్ పడె:కాదు బన్ అ”, ఇజి ప్రబు నా ప్రబు వెల వెహున్ †”, ఇజి కీర్తన పుస్తకమ్ దు దావిదునె వెహివార్. 44 దావిదునె వన్నిజ్, “ప్రబు” ఇజి కూక్సివార్. అయావలె వాండ్లు ఎలాగ దావీదు మరిసి ఆనాన్.

45-46 లోకుర్ విజెరె వెంజి మహివలె, యేసు వన్ని సిసూరిజ్ వెహున్, “మీరు యూదురి రూలుజ్ నెస్పిన్సివరి వందిజ్ జాగర్త మండ్రు వారు నిరీ సాక తోడె:గిజి బూలాదెజ్ ఇస్టం అతికార్. సత నడి:పి పెరికార్ ఇజి మాడె: ఆదెజ్ కోరిజినార్. యూదురి మీటిజ్ ఇండ్రె పెరికార్ బన్ని బాడి:దు బస్సెజ్, విందుద్ నెగ్రి బాడి:దు బస్సెజ్ కోరిజినార్. 47 వారు రాండ్ బోదెక్ ఇల్కాణికెజ్ అనయమ్ దాన్ లాగ్ జినార్. మహి వరి ఇంక నెగ్రికాప్ ఇజి తోరె ఆదెజ్ నిరీ పార్దనం కిజినార్. దేవులు వరిజ్ నండ్రో సిక్కు నీనాన్”.

† కీర్తన 118:22. †† కీర్తన 110:1.

21 యేసు దేవుణు గుడిఁదు బస్తాండ్రె, సుటులం బేస్తాన్. అయావలె ఆస్తిమన్నికార్ నంత పెట్టెదు పెరి నంత అర్పేసినిక సుడేతాన్. 2 ఇనిక సిల్లి ఉండ్రె రాండి బోదెలి నంత అర్పేసిక బా సుడేతాన్. అది రుండి పయిసెజ్ అర్పెత్తాద్. 3 వాండ్రు వరిజ్, "నాను నిజం మీ వెట వెప్పిన, యా ఇనిక సిలి రాండి బోదెలి మహి విజెరె ముస్సు లావు అర్పెత్తాద్. 4 వారు విజెరె వరిజ్ కల్లితి మన్ని సంసారం బాణిజ్ అర్పెత్తాద్. గాని అది దనిజ్ సిల్లి బాణిజ్ దనిజ్ బత్తిదెజ్ మనికెజ్ అర్పెత్తాద్", ఇజి వెప్తాన్.

5 అయావలె వన్ని సిసూర్లోఇ సెగొండార్, అయా దేవుణు గుడిఁ వందిజ్ వర్గిజి మహార్. నెగ్గి పణుకుదాన్ తోహ్కెక యా గుడిఁ ఇజి వర్గితార్. నంద సిత్తి నెగ్గి ఇనాయమ్కు ఇబ్బె ఇడ్డె మనె. గొప్ప సాకు మనాద్", ఇజి వర్గితార్. 6 అయావలె యేసు, "మీరు సుడేతికెజ్ పణుకు ముస్సు పణుకు మన్పండ అరి ఆని దినమ్కు వానెలె", ఇజి వెప్తాన్. 7 అయావలె వారు, "ఓ బోదకినికి, యాకెజ్ ఎసెజ్ జర్గిజినె? యాక జర్గిని కాలం డగ్రు ఆతాద్ ఇజి తోరిన్ని గుర్తు ఇనిక?", ఇజి వెన్బాతార్.

8 అందెజె వాండ్రు వెప్తాన్, "మీరు మొసెం కిబె అఎండ జాగర్త మండ్రు. ఎందనిజ్ ఇహిజ నండొండార్ నా పేరు అసి వానార్లె. వారు, "నానె దేవుణు పొక్తి క్రీస్తు ఇజి, కాలం డగ్రు ఆతాద్ ఇజి వెప్పి వానార్. వరి వెట సాస్మాట్. 9 మీరు విదెమ్కు వందిజ్, జిబిజ్ వందిజ్ వెనివెలె తియెల్ ఆమాట్. యాక ముజాలె జర్గిదెజ్వెలె. గాని ఆక్కర్ రోజు వెటనె రెఉ.

10 మరి వాండ్రు వరిజ్ వెప్తాన్, "లోకుర్ ముస్సు లోకుర్, రాజెం ముస్సు రాజెం జటిజ్దిజ్ నిజ్నార్లె. 11 అబ్బె ఇబ్బె బూమి గొప్ప కద్దినికెజ్ వానెలె. నండొ దేనమ్దు కర్తుజ్, నండొ లోకురిజ్ సెర్తిజి అన్ని కష్టమ్కు వానెలె. గొప్ప తియెల్ కల్లిన్ని గుర్తుజ్ ఆగాసమ్దు పుట్టెలె.

12 గాని యాకెజ్ జర్గిని ముజాల, వారు మిజి అస్సార్, ఇమ్సెజ్ కినార్. వారు మిజి యూదురి మీటిజ్ ఇండ్రొని, జెలిదు ఒవజెప్పార్. రాజుజ ముజాల, మహి అతికారిజ ముజాల మిజి తనార్. యాకెజ్ విజు నా ముస్సు నమకం ఇడ్డి వందిజె జర్గినె. 13 అయావలె, యాకదె మీరు నా వందిజ్ సువార్త వెప్తాజ్ నెగ్గి సమయం. 14 వారు వెన్బానివెలె, వరిజ్ ఎలాగ మర్జి వెప్తాజ్ ఇజి ఒడేబిజి ముజాల బాద ఆవ ఇజి తిరుమానం కిజి మన్అ.

15 ఎందానిజ్ ఇహిజ, మీ పగాతికార్ ఎయెర్బా మిజి ఎద్రిస్ఎండ మంజిని వజ మీరు వెప్తాజ్మాటెజ్, గెణం నాను మిజి సీన. 16 మిజి మీ అయిసి అఫాసీర్బా దాదతంబెర్సినిబా కూలెజ్బా అతికారిజబాన్ సిక్స సిబిసెజ్ ఒవజెప్పార్. మీ లోఇ సెగొండారిజ్ వారు సప్పార్. 17 నా ముస్సు నమకం ఇడ్డి వందిజ్ విజెరె మీ ముస్సు పగదాన్మంజినార్. 18 గాని మీరు ఎలాకాలం బత్తినార్. 19 కష్టమ్కు ఓరిసి మండ్రు. అయావలె మీజి ఎలాకాలం దేవుణు వెట బత్తిని బత్తు దొహ్కెద్రి. 20 యెరూసలెం పట్నం సుటులం ఉద్దం కినికార్ కూడేజి మహిక, మీరు సుడేతిజ, దన్ని నాసనం డగ్రు ఆతాద్ ఇజి మీరు నెస్తిజ్వెలె. 21 అయావలె నాసనం ఆవండ మండ్రెజ్ యూదయ దేనమ్దు మన్నికార్ గొరొకాజ్ ఉహ్కెజ్వెలె. యెరూసలెం పట్నం సడిఁమి మనికార్ వెల్లి ఉహ్కెజ్వెలె. యెరూసలెం పట్నం వెల్లి మనికార్ లోఇ సాండ్రెజ్ అవద్. 22 ముజాలె రాస్తి మనికెజ్ పూర్తి అదెజె యా సిక్స దినమ్కు. 23 ఆ దినమ్కాజ్ ఫాటాద్ మన్ని వన్కాజ్, పాలు ఉట్పిస్సి వన్కాజ్ గొప్ప కష్టం. ఎందనిజ్ ఇహిజ, యూదయ దేసెం ముస్సు నండొ కష్టమ్కు వానెలె. దేవుణు కోపం యా లోకుర్ ముస్సు వానాద్లె. 24 వారు కూర్దెజాణిజ్ సానార్లె. సెగొండారిజ్ తోహ్కెప్పి వయ్ దేసెమ్కాజ్ విజు ఒనార్లె. దేవుణుదిజ్ నెస్ఇకార్ యెరుసలెమ్దిజ్ ఏలుబడిఁ కినార్లె. వరి ఏలుబడిఁ అబ్బె పూర్తి ఆని కాలమ్దాక యెరూసలెం వరి అడిఁగి ఆనాద్.

25 పొద్దు, నెలదు, సుక్కెదు బమ్మక్కిని గుర్తుజ్ తోర్నెలె. నమ్దరమ్ది ఉల్కెజ్ గొప్ప గగోల్ కిజి వరిజ్ తియెల్ కల్లిన్ని. ఆహి బూమిద్ మన్ని లోకుర్ విజెరె ఇనిక కిదెజ్ ఇజి అర్దం కిప్పండ మంజినార్. 26 ఆగనమ్దు మన్ని నండొ రకమ్కాణికెజ్ కద్లినె. అందెజె లోకమ్దు జర్గిని వన్కాజ్ వందిజ్ ఎత్తు కిజి తియెల్ ఆజి లోకుర్ సానార్. 27 అయావలె లోకు మరిసి ఆతి నాను మొసాపుదు వానిక వారు సూణార్. గొప్ప అతికారం దాన్ గొప్ప జాయ్దాన్ కూడితి సాకుదాన్ మొసావ్దు వానిక వారు సూణార్. 28 యాకెజ్ జర్గిదెజ్ మొదొల్సివెలె నిల్లి బుర్త పెర్దు. ఎందానిజ్ ఇహిజ, మీ కష్టమ్కాణిజ్ విడుఁదల డగ్రు ఆజినాద్.

29 వాండ్రు వరిజ్ కతవజ నెస్పిస్తాన్. బొడెమరాతిజని విజు మరెకాజ్ సుడేదు. 30 ఆకెజ్ సెగ్రిసివెలె, జేట కాలం డగ్రు ఆతాద్ ఇజి మీర సుడేజి నెసినిదెర్. 31 అయా లెకెండె, మీరు యా సజతిజ్ జర్గినిక సూణివెలె, దేవుణు యా లోకమ్దిజ్ ఏలుబడిఁ కిజినిక డగ్రు ఆతాద్ ఇజి నెసినిదెర్. 32 యా సజతిజ్ జర్గినిదాక, యా తరమ్దికార్ సాపర్, ఇజి నాను మీ వెట కసితం వెప్పిన. 33 ఆగాసం బూమి సిల్లెండ ఆనాద్. గాని నా మాటెజ్ ఎసెజ్బా అయాలెకెండె సాన్ఉ. 34 మీరు ఉణిజి తింజి మత్తుదాన్ మన్పండ యా లోకమ్ది బత్తు వందిజ్ విసారిస్ఎండ జాగర్త మండ్రు. సిల్లిజ, లోకుమరిసిఆతి నాను వాని దినం ఉరి వాతి లెకెండె వెటనె వానాద్. అందెజె జాగర్త మండ్రు. 35 యా లోకమ్దు బత్తిజిని లోకుర్ విజెరె ముస్సు అయా దినం నెస్ఎండ వానాద్. 36 యా జర్గిదెజ్ మన్ని విజు వన్కాజ్ ఓరిసి మంజిని సత్తు వందిజ్, లోకు మరిసి ఆతి నా ముజాలె నిల్ని సత్తు వందిజ్ ఎస్తివలె బా పార్దనం కిజి జగర్త మండ్రు. 37 యేసు రోజు దేవుణు గుడిఁదు వేడెక నెప్పిసి మహాన్. రెయ్క ఒలివ గొరొత్ మండ్రెజ్ సాన్ని మహాన్. 38 లోకుర్ విజెరె పెందాల్నె, వన్ని మాటెజ్ వెండ్రెజ్ దేవుణు గుడిఁదు వాజి మహార్.

యేసుజ్ ఒవజెప్పెజ్ యూద ఒప్పుకోటాన్

22 వస్సు ఇని పులాజ్ సిల్లి రొట్టెజ్ తయార్కిని పండొయి డగ్రు ఆతాద్. 2 నస్తివలె పెరిపుజెరిజు, యూదురి రూలుజ్ నెప్పిస్సికార్ యేసుజ్ ఎలాగ సప్తెజ్ ఇజి ఉపాయి సుడేజి మహార్. ఎందానిజ్ ఇహిజ, వారు లోకురిజ్ తియెల్ ఆజి మహార్. 3 అయావలె, వన్నెండు మణిసి సిసూర్ లోఇ మన్ని ఇస్కరియెతు ఇని యూదెజ్ సయ్తాను అస్తాన్.

4 వాండ్రు పెరి పుజెరిజ, అతికారిజ బాన్ సాహండ్రె ఎలాగ వన్నిజ్ వరికిదు ఒవజెప్పెజ్, ఇజి వరివెట వర్గితార్. 5 అందెజె వారు సర్ద ఆతారె, వన్నిజ్ డబ్బు సీనావ్ ఇజి ఒప్పుకోటాన్. 6 వాండ్రు దనిజ్ ఒప్పుకోటాన్. మంద లోకుర్ సిల్లివెలె వన్నిజ్ వరిజ్ ఒవజెప్పెజ్ తన్కాసం సుడేజి మహాన్. 7 పులాజ్ సిల్లి రొట్టెజ్ తయార్కిని పండొయి కిని దినం వాతాద్. ఆ దినమ్దు మెండ గొర్తె పిల్లెజ్ పూజ సీజి వస్సు బోజనం కిదెజ్. 8 అందెజె యేసు పేతురుజ్, యోహనుజ్, "మీరు సాన్ని, మాటు వస్సు బోజనం ఉండెజ్ తయార్ కిదు", ఇజి వెప్తాండ్రె వరిజ్ పొక్కినాన్.

9 వారు, “మావు ఎంబె తయార్ కిదెజ్ ఇజి నీను కోరిజిన?” ఇజి వన్నిజ్ వెన్ బాతార్. 10-11 అందెజె యేసు వరిజ్ ఈహు వెప్తాన్. “మీరు పట్టుమ్దు సానివెలె, కుండాదు ఏరు పిణ్ జి ఒరెన్ మీ ఎర్దు వానాన్. వాండ్రు సాని ఇండ్రొ వన్ని వెట సాండ్రు. సాన్ని ఆ ఇండ్రొణి యజమానిజ్, ఈహు వెప్తా, ‘నాను నా సిసూర్ వెట వస్సు బోజనం కిదెజ్ గది ఎంబె మనాద్ ఇజి బోదిస్సికాన్ నిజి వెన్ బాజినాన్’, ఇజి. 12 అయావలె ఆ ఎజామాని విజా తయార్ కితి మేడః ముస్సు మన్ని పెరి గది ఉండ్రీ తోరిస్నాన్. అబ్బె మీరు తయార్ కిదు”, ఇజి వెప్తాన్. 13 వారు పట్టుమ్దు సాహారె, యేసు వరిజ్ వెప్తివజ విజా సుడఃతార్. వారు వస్సు బోజనం తయార్ కితార్.

14 వస్సు బోజనం కిదెజ్ టయం ఆతివెలె, వాండ్రు వన్ని వన్నెండు మణిసిర్ అపాస్తలు వెట బోజెనమ్ దిజ్ బస్తార్. 15 అయావలె వాండ్రు వరిజ్, “నజి సమ్మి ముజాల మీ వెట కూడఃజి యా వస్సు బోజనం ఉండెజ్ నండో ఆస ఆత. 16 ఎందానిజ్ ఇహిజ, యా వస్సు బోజెనమ్ దిజ్ గుర్తు దేవుణు రాజెమ్దు పూర్తి ఆనిదాక నాను మరి ఎసెజ్ బా ఉణెవ. 17 యేసు ద్రాక్కుకల్లు మన్ని గిన్న అసి దేవుణుదిజ్ వందనం కితాన్. కితాండ్రె, “లోసి, మీరు సీబాజి ఉండు. 18 ఎందానిజ్ ఇహిజ, ఏలుదాన్ దేవుణు లోకురిజ్ ఏలుబడిః కినిక నూణిదాక నాను మరి ద్రాక్కు పట్టు రసం ఉణెవ ఇజి నాను మీ వెట వెప్సిన్”, ఇజి వెప్తాన్. 19 మరి వాండ్రు రొట్టె అసి దేవుణుదిజ్ వందనం వెప్సి దనిజ్ ముకెజ్ కిజి వరిజ్ సితాన్. “ఇక మీ వందిజ్ సీజిన నా ఒడఃల్ దిజ్ గుర్తు. నజి ఎత్తు కిదెజ్ యాక కిజి మండ్రు”, ఇజి వెప్తాన్.

20 అయలెకెండెనె, బోజనం ఆతి వెన్కా, వాండ్రు వరిజ్ ద్రాక్కుకల్లు మన్ని గిన్న సితాన్. ‘యా గినెదు మనికెజ్ మీ పాపమ్క వందిజ్ వాక్కిని నా నలదిజ్ గుర్తు. యాకదె నా నలదాన్ దేవుణు ఇడ్డి కొత్త ఒవుమానం. 21 గాని నజి ఒవజెప్పికాన్ నావెట బోజెనమ్ దిజ్ బస్త మనాన్. 22 దేవుణు ఏర్పాటు కితి వజ, లోకు మరిసి ఆతి నాను సానాలె. గాని నజి ఒవజెప్పి వన్నిజ్ అబాయా గొప్ప కస్టం”, ఇజి వెప్తాన్. 23 వారు యా వణిజ్ వరి లోఇ ఎయెన్ కిసాన్ ఇజి వరి లోఇ వారె వర్గితార్. 24 మరి, వరిలోఇ ఎయెన్ పెరికాన్ ఇజి ఉండ్రీ ఇజి గొడఃబ వాతాద్. 25 అందెజె యేసు వరిజ్, “దేవుణుదిజ్ నెన్ ఇ వరి రాజార్ వరి ముస్సు నండో అతికారం కిజినార్. వరి ముస్సు అతికారమ్దు మనికార్, ‘మావు లోకురిజ్ కూలెజ్, ఇజి అనువె ఆజినార్. 26 గాని మీరు అయ లెకెండె మన్మాత్. మీలోఇ పెరికాన్ అతికాన్ తగిసి ఇజి వన్నిలెకెండె ఆదెజ్. నెయ్ కి సేవ కిని వన్ని లెకెండె ఆదెజ్. 27 సుడఃదు, ఎయెన్ పెరికాన్. విందుదు బస్సికాండ్రా, బాట కిజి సీనికాండ్రా? విందుదు బస్సికాండ్రె గదె? గాని నాను మీ నడిఃమి, సేవ కిని వన్ని లెకెండె మన్న. 28 నా కస్టమ్దు మీరె నా వెట నమ్మకమ్దాన్ నిహి మహికిదెర్. 29 నా బుబ్బు వన్ని లోకురిజ్ ఏలుబడిః కిదెజ్ అతికారం నజి ఒవజెప్పి వజ, నాను మిజి అయా అతికారం ఒవజెప్పిన. 30 అందెజె నాను ఏలుబడిః కినివెలె నా విందుదు నా వెట ఉణిజి తినిదెర్. మీరు రాజార్ బసి మంజిని సింహాసనమ్కాజ్ బసి ఇస్సాయేలురి వన్నెండు తెగ్గాతి వరిజ్ ఏలుబడిః కినిదెర్.

పేతురు యేసుజ్ నెన్ ఇజి వెప్తాన్ ఇజి యేసు వెప్సిన్.

31 “ఓ సిమోన్, సిమోన్, ఇదిలో రయు వాండ్రు గింజెజ జలిస్సి వజ, నీ లోఇ మన్ని నెగ్గెజ్ నెన్ జె నయ్తాను నిజి వరిస కిసాన్. దిన్నివందిజ్ సెల్వ దొహ్క మనాద్. 32 గాని సిమోన్, నీను నమకం డిసెంండ మండ్రెజ్ నాను నీ వందిజ్ పార్దనం కిత మన్న. నీను మరజి నా దరిజ్ వానివలె, మహి సిసూరిజ్ వరి నమకం పిరివ్ అ”, ఇజి వెప్తాన్. 33 అయావలె సిమోను, “ప్రబువా, నీ వెట జెలిదు వాదెజ్, నీ వెట సాదెజ్ బా నాను తయార్ నె”, ఇజి వెప్తాన్. 34 దన్నిజ్ యేసు, “పేతురు నాను వెప్సిన్, నేండ్రు కొరు కెరెయెండ ముజాల నీను నజి నెన్ ఇజి ముసార్ వెప్సిలె”, ఇజి వెప్తాన్. 35 మరి, వాండ్రు వరిజ్ వెన్ బాతాన్, “డబ్బు ఇడ్డి ససి, మరి ఉండ్రీ ససి, జోడ్డు సిల్లెండ నాను మిజి ఫాక్తివెలె, మిజి ఇనికబా తక్కు ఆతాదా?”, “సిల్లా”, ఇజి వారు వెప్తార్.

36 “అహిజ, ఏలు, మిజి డబ్బు ఇడ్డి ససి మహిజ, ఆక ఒతెజ్. అయలెకెండెనె, మరి ఉండ్రీ ససి బా ఒతెజ్. మిజి ఉండ్రీ కూడం సిలిజ, మీ సాక పార్ని ఉండ్రీ కూడం కొండెజ్. 37 ఎందానిజ్ ఇహిజ, ‘జెలిదు మన్ని వరి వెట వన్నిజ్ కుడుస్తార్ †’, ఇజి దేవుణు మాటదు రాస్త మనాద్. నాను వెప్సిన్, అయా మాట నావెట పూర్తి ఆదెజ్ వెలె. నిజమె నా వందిజ్ రాస్తి మనికెజ్ పూర్తి ఆజినాద్”, ఇజి వరిజ్ వెప్తాన్.

38 అయావలె సిసూర్, “ప్రబువా, ఇదిలో ఇబ్బె రుండి కూణమ్కు మనె”, ఇజి వెప్తాన్. దనిజ్ వాండ్రు, “ఆకెజ్ ఆనె”, ఇజి వెప్తాన్.

యేసు ఒలివ గొరొత్ పార్దనం కిజినాన్

39 యేసు పట్టుం డిస్తాండ్రె వన్నిజ్ మన్ని అలవాటు లెకెండె ఒలివ గొరొత్ సాహాన్. వన్ని సిసూర్ వన్ని వెట సాహార్. 40 అబ్బె సాహిజ్, వాండ్రు వరిజ్, “సయ్ తాన్ సికుదు అర్పెండె పార్దనం కిదు”, ఇజి వెప్తాన్. 41 వాండ్రు వరి బాణిజ్ పణుకు విసిర్ని ససా దూరం సాహాండ్రె, ముణుకుజ్ ఊర్ జి పార్దనం కిజినాన్. 42 “ఓ బా, నిజి ఇస్టం ఆతిజ యా కస్టమ్కు నా బణిజ్ లాగ్ అ. అహిజ్ బా నా ఇస్టం ఆవద్, నీ ఇస్టమ్ నె ఆపిద్”, ఇజి. 43 అయావలె దేవుణు మంజిని బాడ్డిః దాన్ ఉండ్రీ దేవుణు దూత వన్నిజ్ తోరె ఆతండ్రె, వన్నిజ్ ఓదరిస్తాన్. 44 వాండ్రు ఓరిస్సెజ్ అట్ ఇ గొప్ప దుకమ్దు మహిజ్, మరి నండో పార్దనం కితాన్. వన్ని రూణు నల బొటుజ్ లెకెండె బూమిదు అర్తె.

45 వాండ్రు పార్దనం కితి నిజితండ్రె, వెనుక సిసూర్ డగ్రు సాహాన్. సాహిజ్ వారు దుకం దాన్ నిద్ర కిజినక సుడఃతాన్. 46 అందెజె వాండ్రు వరిజ్, “ఎందనిజ్ మీరు నిద్ర కిజినిదెర్? నిజెజి, నయ్తాను మిజి వరిస కిజి తప్పదు అర్పెండె పార్దనం కిదు”, ఇజి వెప్తాన్.

యేసుజ్ అరెస్టు కిజినార్

47 యేసు యా మాటెజ్ వెప్సి మహిజ్, నండో జెనం వాతాద్. వనెండు సిసూర్ లోఇ మన్ని యూద ఇనికానె వరి ముజాల సాహాన్. వాండ్రు యేసుజ్ ముదు కిదెజ్ వన్ని డగ్రు వాతాన్. 48 అయావలె యేసు, “ఓ యూద, ముదు కిజినె, నీను లోకు మరిసి ఆతి నజి ఒవజెప్పిదా?”, ఇజి వన్నిజ్ వెన్ బాతాన్. 49 యేసు వెట

† యెసయ 53:12.

మహి సినుర్ జగ్గినకెళ్ సుడేతిజ్, వారు, “ప్రబువా, మాపు కూర్దదాన్ వరిజ్ కత్తెజ్?”, ఇజి వెన్బాతార్. 50 వరి లొఇ ఒరెన్ విజా పుజెరిజ ముస్సు, పెరి పుజెరి పణిమణిసిజ్ ఉణెర్ గిబ్బు తెవు కత్తాన్.

51 గాని యేసు, “అలె కిదు”, ఇజి వెహ్తాండ్రె, అయా పణిమణిసిజ్ గిబ్బుదిజ్ ముట్టాండ్రె వన్నిజ్ నెగెండ కిత్తాన్. 52 యేసు వన్నిజ్ అన్జిజ్ వాతి పెరి పుజెరిజు, దేవుణు గుడిః అతికారిజు పెద్దెల్జ వెట, “నాను డొజ వాండ్రునా? నజి అన్జిజ్ పెరి కూడమకు కొణెజ్ అసి మీరు వాతిదెర్? 53 రోజా నాను మీ వెటనె మంజి గుడిఃదు నేర్పిన్త గదె. అయావలె మీరు నజి తోహొఇతిదెర్. యాకదె నజి తోహొఇత్తెజ్ దేవుణు మిజి సీత్తి నమయం. ఏలు నయ్తాన్ అతికారమ్దు మనాన్”, ఇజి వరిజ్ వెహ్తాన్.

యేసుజ్ నెన్వే ఇజి పేతురు వెప్పినాన్

54 వారు వన్నిజ్ తోహొఇత్తారె, విజా పుజెరిజ ముస్సు, మన్ని పెరి పుజెరి ఆతి వన్ని ఇండ్రొ ఒతాన్. పేతురు దూరం దాన్ వెన్యా సాన్ని మహాన్. 55 వారు డేవ నడిఃమి, సిను ఎర్సి కూడఃజి బసి మహివలె, పేతురు వరి వెట బన్తాన్.

56 అయా ఇండ్రొఇజి పణిమణిసి ఉండ్రె, పేతురు సిను డగ్గ బస్తిక సుడఃతాన్. వాండ్రు ఎయెన్ ఇజి నన్జెజ్ వన్నిజ్ డిటాజ్ బేస్తాన్. బేస్తాదె, “పిండ్రు బా వన్ని వెట మహాన్”, ఇజి అది వెహ్తాన్. 57 అందెజె పేతురు, “ఓ బీ, నాను వన్నిజ్ నెన్వే”, ఇజి వెహ్తాన్. 58 నణెం వెనుక మరి ఒరెన్ వన్నిజ్ సుడఃతాన్. “సిను బా వరి వెట మహికిదె”, ఇజి వెహ్తాజ్, “బాబు, నాను వన్నిజ్ నెన్వే”, ఇహాన్. 59 డగ్గు ఉండ్రె గంట వెన్యా, మరి ఒరెన్ కసితం వెహ్తాన్, “నిజమె, పిండ్రు బా వన్ని వెట మహాన్. ఎండనిజ్ ఇహిజ, పిండ్రు గలిలియదికానె”, ఇజి. 60 దన్నిజ్ పేతురు, “ఓ బాబు, సిను వెహ్తాక నజి తెలివెద్”, ఇజి వెహ్తాన్. వాండ్రు వెప్పిమహివలె వెటనె కొరు కెరెతాన్. 61 యేసు వెనుక మహ్తాండ్రె పేతురుజ్ డిఃటాజ్ బేస్తాన్. అయావలె ప్రబు వన్నిజ్, నేండ్రు కొరు కెరెని ముజాల సిను నజి నెన్వే ఇజి ముసార్ వెప్పిలె ఇజి”, వెప్పి మాట పేతురు ఒడఃబితాన్. 62 పిండ్రు వెల్లి సాహండ్రె నండొ దుకం ఆజి అడఃబితాన్.

కాప్ కినికార్ యేసుజ్ వెక్కిసినార్

63 యేసుజ్ కాప్ కిజి మహికార్ వన్నిజ్ వెక్కిసి డెఃయిదెజ్ మొదొల్వార్. 64 వారు ని కణకెజ కనిల్దాన్ తోహొఇత్తారె, “ఓ ప్రవక్త, వెహొఅ, ఎయెన్ నిజి డెఃయితాన్ ఇజి”, ఇజి వెన్బాతార్. 65 వారు వన్నిజ్ దూసిన్సి మరి నండొ మాటెజ్ వన్నిజ్ వెహ్తార్.

యేసుజ్ పిలాతుని హెరోదుజ్ ముజాల నిల్వార్.

66 పెందాల్ ఆతివెలె, యూదురి పెద్దలుజ్, పెరి పుజెరిజు, యూదురి రూలుజ్ నెస్సిన్సికార్ విజెరె కూడిఃతార్. యేసుజ్ వరి ముజాల నిల్వార్. 67-68 వారు వన్నిజ్, “సిను క్రీస్తు నా, మజి వెహొఅ”, ఇజి వెన్బాతార్. అందెజె యేసు వరిజ్, “క్రీస్తు ఇజి నాను వెహ్తాజ, మీరు నమిఇదెర్. నాను మిజి వెన్బాతిజ మీరు మరీజి వెహొఇదెర్. 69 గాని ఏలుదాన్, లోకుమరిసిఆతి నాను గొప్ప అతికారం మని దేవుణు ఉణెర్ పడఃకాదు బన్నలె”, ఇజి వెహ్తాన్. 70 అయావలె వారు విజెరె, “అహిజ, సిను దేవుణు మరిసినా?”, ఇజి వన్నిజ్ వెన్బాతార్. వెన్బాతిజ్ వాండ్రు, “మీరు వెప్పి లెకెండెనె, నానె దేవుణు మరిసి”, ఇజి వెహ్తాన్. 71 అందెజె వారు, “ఎందానిజ్ మజి మరి రుజాప్ వెప్పికార్. వన్ని వెయ్దానె మాట వెహొట్”, ఇజి వెహ్తార్.

23

అయావలె, యూదురు అతికారిజు విజెరె నిహారె, యూదయ దేసెం సుడఃజిని రోమ అతికారి ఆతి పిలాతు బాన్ వన్నిజ్ ఒత్తార్. 2 వారు, “పిండ్రు మా లోకుర్ నడిఃమి గొడఃబ రేప్పినాన్. రోమ రాజా ఆతి కయ్సరుజ్ వన్ను సీమాట్ ఇజి వెప్పినాన్. నానె క్రీస్తు అహిజ రాజా ఇజి వెప్పినాన్”, ఇజి వన్ని ముస్సు, నేరం మొత్తార్. 3 అందెజె పిలాతు యేసుజ్, “సిను యూదురిజ్ రాజానా?”, ఇజి వెన్బాతాన్. వెన్బాతిజ్, “ఓఓ, సిను వెప్పి వజనె”, ఇజి మరీజి వెహ్తాన్. 4 పిలాతు పెరి పుజెరిజ వెట మంద లోకుర్ వెట, “విని ముస్సు, నజి, ఇని తన్ను బా తోర్వెద్”, ఇజి వెహ్తాన్. 5 గాని వారు, “ఏక ఏక వెహ్తార్”, “పిండ్రు యూదయ దేసెమ్ది లోకుర్ విజెరిజ్ వన్ని మాట నెస్సిసి గొడబ రేప్పినాన్. యా పణి గలిలియదు మొదొల్లి ఇబ్బె దాక వాతాన్”, ఇజి. 6 యాక వెంజి, “పిండ్రు గలిలియదికాండ్రె”, ఇజి పిలాతు వెన్బాతాన్. 7 యేసు హెరోదు ఏలుబడి కిని గలిలియ ముటదికాన్ ఇజి పిలాతు నెస్తాన్. అందెజె వాండ్రు వన్నిజ్ హెరోద్బాన్ షాక్తాన్. అయావలె హెరోదు బా యెరూసలెమ్దు మహాన్.

8 హెరోదు యేసుజ్ సుడఃతివెలె నండొ సర్ద ఆతాన్. ఎండనిజ్ ఇహిజ, యేసు వందిజ్ నండొ వెహొ మహాన్. నండొ కాలమ్దాన్ వన్నిజ్ సుడఃదెజ్ అస ఆజి మహాన్. యేసు కిని బమ్మ ఆని పణిజ సుడఃదెజ్ కోరితాన్. 9 అందెజె వాండ్రు నండొ మాటెజ్ వెన్బాతాన్. గాని యేసు ఇనికబా మరీజి వెహొవతాన్. 10 పెరి పుజెరిజు, యూదురి రూలుజ్ నెస్సిన్సికార్ బాన్ నిల్లి, వన్ని ముస్సు డటిసి నేరం మొప్పి మహాన్. 11 హెరోదుని వన్ని నయ్నమ్దికార్ వన్నిజ్ వెక్కిసి సెకాల్ కిత్తార్. నండొ దర మన్ని గొప్ప ఉండ్రె సాక తొడఃగెన్పిస్తాండ్రె పిలాతు డగ్గు మరీజి షాక్తాన్. 12 అయా రోజానె పిలాతుని హెరోదు కూలెజ్ ఆతార్. దిని ముజాలె వారు పగ్దాన్ మహాన్.

13-14 అయావలె పిలాతు, పెరి పుజెరిజ, అతికారిజ, లోకాజ్ కూకెవెస్తాండ్రె వరిజ్, “లోకుర్ నడిఃమి గొడబ రేప్పినాన్ ఇజి వెప్పి వినిజ్ మీరు నా బాన్ తతిదెర్. మీ ఎద్దు నాను వినిజ్ వెన్బాత. గాని మీరు వెప్పి నేరం ఇనికబా విని లొఇ నజి తోర్వెత్. 15 అయలెకెండెనె, హెరోదుజ్బా తోర్వెత్తాన్. వాండ్రు వినిజ్ మా డగ్గు మరీజి షాక్తాన్. ఇదిలో పిండ్రు సావుదిజ్ తగితి ఇన్ని పణి బా కివెన్. 16 అందెజె నాను వినిజ్ సిక్కి సీజి డిన్న సీన్”, ఇజి వెహ్తాన్. 17 (ఏంటు ఏంటు కిని పన్ను పండొయిదిజ్ లోకు కోరిపాతి ఒరెన్ జెలిదు మన్ని వన్నిజ్ డిఃసి సీదెజ్ పిలాతుజ్ అలవాటు).

18 గాని లోకుర్ విజెరె, “నవ్ల వన్నిజ్ బరబెజ్ మజి డిఃసి సిదా”, ఇజి ఉండ్రె లెకెండె డటం డేడిస్తార్. 19 బరబ్బు పట్టుమ్దు గొడఃబ రేప్పిస్తాండ్రె, సెగొండారిజ్ సస్తాన్. అందెజె వన్నిజ్ జెలిదు ఇట్టా మహాన్. 20 యేసుజ్ డిఃసెజ్ కోరిజి పిలాతు మరి లోకురిజ్ నాను వన్నిజ్ డిఃసెజా? ఇజి వెన్బాజినాన్. 21 గాని వారు, “వినిజ్ సిలువాదు కుటిజాణిజ్ డెఃయిజి నవ్ల, సిలువాదు కుటిజాణిజ్ డెఃయిజి నవ్ల”, ఇజి నండొ గగొల్ ఆతార్.

22 ముసారీదిజ్ వాండ్రు వరిజ్, “ఎందానిజ్? ఇన్ని తప్పు వీండ్రు కితాన్? సావుదిజ్ తగితి ఇన్ని తప్పు బా నాను విని లోఇ తోవిత. అందెజె నాను వినిజ్ సిక్కు సీజి డిస్సు సీన్”, ఇజి వెప్తాన్ 23 గాని వారు, “వినిజ్ సప్తెజ్వెలె”, ఇజి మరి మరి డలు డేడిస్తార్”. ఆహా వరి గగోల్ గెలిస్తాద్. 24 అందెజె పిలాతు వారు వెప్తి వజ జర్గిపిద్ ఇజి తీర్పు సిత్తాన్. 25 పిలాతు వారు లొస్తి వన్నిజ్ డిస్సు సిత్తాన్. అయా వాండ్రు పట్టుమదు గొడబ రేవేతి వందిజ్ సెగొండారిజ్ సప్తి వందిజ్ జెలిదు మహాన్. యేసుజ్ వారు కోరితివజ కిదెజ్ వరి కీదు ఒపజెప్తాన్.

యేసుజ్ సిలువారు కుటిజాణిజ్ డెయిజినార్

26 వారు వన్నిజ్ ఒసి మహార్. అయావలె, మరి ఉండ్రె దేసెమది కురనియ పట్టుమదికాన్ ఆతి సిమోన్ ఇనికాన్ ఒరెన్ యెరూసలెం పట్టుం వెల్లిదాన్ అయా సరి యెరూసలెం పట్టుమదు వాజి మహాన్. వారు వన్నిజ్ అస్తారె, యేసువెలె, వన్ని వందిజ్ సిలువ పిండిదెజ్ వన్నిజ్ సితార్. 27 మంద లోకుర్ వన్ని వెన్కా వాజి మహార్. వరిలోఇ బోదెక్ వన్ని వందిజ్ గుండె కొత్తె ఆజి అడబాజి వాజి మహా. 28 యేసు వరిదరిజ్ మర్జి, “యెరుసలెమది బీబకండె, మీరు నా వందిజ్ అడబామాల్. మీ వందిజ్ మీ కొడోర్ వందిజ్ అడబాదు. 29 ఎందానిజ్ ఇహిజ వారు, “గొడ్డు బోదెకాజ్ బా పాలు ఉటపిన్ ఇ వన్కాజ్ గొప్ప నెగెద్”, ఇజి వెప్పి దినమ్కు వానెలె. 30 అయావలె వారు, “మా ముస్సు అర్ల”, ఇజి గొరొకాజ్ వెలె, మజి వడెగ్ల”, ఇజి మెటెజ వెట వెహ్నార్లె.

31 ఎందానిజ్ ఇహిజ, “మరాన్ † వసీజ్ మనివెలె నిసా బాదెజ్ కితిజ మరాన్ వహ్హిజ మరి ఎసా బాద కినారొ”, ఇజి వెప్తాన్. 32 మరి రిఎర్ డొజారిజబా వన్నివెలె సప్తెజ్ ఒసి మహార్. 33 వారు బుర్ పిణికి ఇజి కూక్కి బాడిదు వాతార్. అబ్బె యేసుజ్ సిలువారు కుటిజాణిజ్ డెయ్తార్. ఒరెన్ వన్నిజ్ ఉజెర్ వడెకాద్, మహి వన్నిజ్ డేబర వడెకాద్. సిలువ పాక్తార్. 34 అయావలె యేసు, “ఓ బా, వీరు కిజినిక ఇనిక ఇజి విరిజ్ తెలివిద్. అందెజె విరిజ్ సెమిన్ల”, ఇజి పార్లనం కితాన్. వారు వన్ని సాక్సెజ్ సీబె ఆదెజ్ సీటిజ్ పాక్తార్.

35 లోకుర్ నిహారె సుడెజి మహివలె, అతికారమ్దు మనికార, “వీండ్రు మహి వరిజ్ రక్సిస్తాన్. వీండ్రు క్రీస్తు ఇహిజ, వినిజ్ వీండ్రె రక్సిసె ఆపిన్”, ఇజి వెప్పి వెక్కిస్తార్. 36-37 నయనమ్దికారబా వాతారె, వన్నిజ్ సెకాల్ కితార్. వారు వన్నిజ్ సేందుదిక ఉండ్రె ఉండెజ్ సితారె, “సీను యూదురి రాజా ఇహిజ, నిజి సీనె రక్సిసె ఆల”, ఇజి వెప్పి సెకాల్ కితార్. 38 “వీండ్రు యూదురిజ్ రాజా” ఇజి వన్ని ముస్సు మొప్పి నేరం బోర్డుదు రాసి సిలువారు ఇట్టార్. 39 సిలువారు డెయితి డొజారిజ లోఇ ఒరెన్, “సీను క్రీస్తుగదె. నిజి సీనె రక్సిసె ఆపిన్. మజి బా రక్సిన్ల”, ఇజి వన్నిజ్ దూసిస్తాన్. 40-41 గాని మహికాన్, “సీను దేవుణుదిజ్ తియెల్ ఆఇదా? వన్నిజ్ దోహక్కి సిక్కునె నిజి బా దోహక్త మనాద్. నాయం దానె మజి సిక్కిస్తార్. ఎందనిజ్ ఇహిజ, మాటు కితి మని వణిదిజ్ తగితి సిక్కు సితార్. గాని వీండ్రు ఇని తప్పు బా కివన్”, ఇజి వన్నిజ్ గోల కితాన్. 42 మరి, “యేసు, సీను రాజా ఆజి మర్జి వానివలె, నజి ఒడెబిల”, ఇజి వెప్తాన్. 43 అందెజె యేసు, “నిజమె నాను సీ వెట వెప్పిన, నేండ్రు సీను నా వెట పరలోకమ్దు మంజినెలె”, ఇజి వెప్తాన్.

యేసుసిలువ ముస్సు పాణం డిస్తాన్.

44-45 అయావలె సమయం వేడె వన్నెండు గంటెజ ఆతాద్. మూండ్రు గంటెజదాక లోకం విజా సీకటి వాతాద్. పాదు జాయి సిలతాద్. యెరూసలెం గుడిః తెర మహి పాత ముస్సుహాన్ అడ్లి దాక నడిమిహాన్ రుండి ముకెజ్ కింజితాద్. 46 యేసు, “ఓ బా, నా పాణం సీ కీదు ఒపజెప్పిన”, ఇజి వెప్తాన్. యా లెకెండె వెప్తాండ్రె వాండ్రు పాణం డిస్తాన్. 47 అయావలె సయినమ్దివరి అతికారి, జర్గితిక సుడెజతండ్రె, “నిజమె వీండ్రు సీతినిజయిదికాండ్రె”, ఇజి వెప్పి దేవుణుదిజ్ పాగిడితాన్. 48 సుడెదెజ్ కూడిఃతి వాతి లోకుర్ విజెరె జర్గితికెజ్ సుడెజి, గుండె కొత్తె ఆజి మర్జి ఇండ్రె సాహాన్. 49 గాని వన్నిజ్ నెల్వ ఆతికార్ విజెరె, నెలవాతివరి లోఇ గలిలయదాన్ వన్ని వెట వాతి బోదెకు, దూరం నిల్చి యాకెజ్ సుడెజి మహార్.

యేసుజ్ సమాది కిజినార్

50-51 అయావలె యోసేపు ఇనికాన్ ఒరెన్ మహాన్. వాండ్రు యూదయ దేసెమది ఆరిమతియ ఇన్ని పట్టుమదికాన్ వాండ్రు సన్హాద్రి సజమ్దు మన్ని వరిలోఇ పెరికాన్ ఒరెన్. వాండ్రు సీతి నిజాయితి మనికాన్. యేసుజ్ సిలువారు డెయిజి సప్తెజ్ యూద పెద్దల్జ కితి తిరుమానం ఒప్పకొడెవతాన్. దేవుణు ఏలుబడిః తోరె ఆనివందిజ్ వాండ్రు ఎద్రు సుడెజి మహాన్. 52 వాండ్రు పిలాతు డగు సాహండ్రె యేసు పీనుగు లొస్తాన్. 53 వాండ్రు, అయా పీన్గు సిలువ ముస్సుహాన్ డిస్తాండ్రె తెల్లని పాతదాన్ సుటిసి నటు వణుకుదిజ్ దొల్సె దూకిదు ఇట్టాన్. అయా దూకిదు, ముజాలె ఎయెరిజ్బా ఇడెవె. 54 అయా రోజా, విస్తాంతి దినం ముజాల మన్ని తయార్ కిని రోజా. విస్తాంతిదినం మొదొల్స్తెజ్ టయం డగు ఆజినాద్.

55 యేసు వెట గలిలయదాన్ వాతి బోదెకు యోసేపు వెట సాహె, దూకి ని వన్నిజ్ ఇట్టిక సుడెజె. 56 వాండ్రు ఇండ్రె మహారె, పీన్గుదిజ్ రాస్తిజ్ వాసనం నూనె తయార్ కితార్. విస్తాంతి దినం మొదొల్స్తెజ్ యూదురి రూలుజ్ నమ్మిజి అవిక్ రొంబితార్.

యేసు మర్జి నిజ్జినాన్

24 వారమ్దిజ్ మొదొహి రోజా కోడిఃజామ్నె, బోదెకు అవి తయార్ కితి వాసనం నూనెజ్ అస్సె దూకిదు సాహె. 2-3 అవిక్ అబ్బె వాతిజ్, దూకి మూక్కి పెరివణుకు గూర్బాతి మహిక సుడెజె. అవిక్ లోఇ డుగితిజ్ యేసు పీనుగు తోర్వతాద్. 4 దిన్ని వందిజ్ బమ్మ ఆజి సిహి మహివలె, మిరిస్సివజ తెలాని సాక్సెజ్ తోడెగితి రిఎర్ మొగవారు వన్కా డగు నిహార్. 5 అవిక్ నండొ తియెల్ ఆజి ముణుకుజ్ ఊర్జి మాడిస్సె. 6 అయావలె అయా మొగవారు వన్కాజ్, “ఎందనిజ్ మీరు బత్తితి మన్నివన్నిజ్ సాతివరిబాన్ రెబాజిన్దెర్? వాండ్రు ఇబ్బె సితెన్. నిజిత మనాన్. మీ వెట గలిలయదు మహివలె వాండ్రు ఇనిక వెప్తాన్ ఇజి

† యాక యూదురి ఉండ్రె మాట. దిని అర్దం ఇనిక ఇహిజ తప్పకిఇతి నజివారు సిక్కు సీతిజ నండొ సెఇవరిజ్ దేవుణు ఎన్నా సిక్కు సీనాన్.

ఎత్తు కిదు. 7 ఇనిక వెహ్లాన్ ఇహిజ, 'లోకుమరిసి సెఇవరి కీదు ఒవజెవి ఆదెజ్వెలె. సిలువాదు పాకె ఆజి, వాండ్రు సాజి మూండ్రీ రోస్కాజ్ నిజ్నాన్లె', ఇజి వెహ్లాన్. 8 అయావలె అవిక్ యేసువెహ్లా మూట ఒడేబితె.

9 దూకిదాన్ మహ్లానె, అబె సుడేతికెజ్ విజా పదకొండు మణిసి సిసూరిజ్నె మహి వరిజ్ విజెరిజ్ వెహ్లా †. 10 అవిక్ ఎయెక్ ఇహిజ, మగ్దలెనె మరి, యోసన, యాకోబుజ్ అయిసి ఆతి మరియ, వన్యావరివెట మహి మరి సెగొండెక్ బోదెక్ ఇవిక్నె జగ్గితికెజ్ అపాస్తుడురిజ్ వెహ్లాకెజ్ ††. 11 గాని వారు బోదెక్ వెహ్లా మాటెజ్ నమివతార్. ఎందానిజ్ ఇహిజ, ఆకెజ్ వంబర మాటెజ్ లెకెండె వారు ఒడేబితార్. 12 అహిజ్బా, పేతురు నిజ్తండ్రె, దూకిదు ఊహ్వాక్సి సాహాన్. వజీతి సుడేతికెజ్ పీన్గు సుటిస్తి తెల్లాని పాతెజ్ అరి మహికెదె సుడేతాన్. వాండ్రు జగ్గితికెజ్ వందిజ్ బమ్మ అజి ఇండ్రా మరీజి సాహాన్.

యేసు రివర్ సిసూరిజ్ తోరె ఆజినాన్

13 అయా రోజానె, సిసూరిలో ఇ రివర్ ఎమాయుఇని ఉండ్రీ నాటో సాన్ని మహార్. ఎమాయు యెరూసలెమ్దాన్ పదకొండు కిలో మీటర్ దూరం మనార్. 14 వారు రివర్ జగ్గితి విజా వందిజ్ వర్గిజి మహార్. 15-16 వారు ఆహె వర్గిజి మహిజ్ యేసు వాండ్రె వాజి వరి వెట నడితాన్. వారు వన్నిజ్ సుడేతార్, గాని వన్నిజ్ గుర్తు అస్టెజ్ అటవతార్. 17 నస్తివలె యేసు, "మీరు నడిజి వర్గిజిని యా మాటెజ్ ఇనికెజ్", ఇజి వరిజ్ వెన్బాతాన్. వారు దుకందాన్ మొకొం డిష్టారె, కద్దిఎండ నిహార్. 18 వెనుక వరిలో ఇ క్లెయిపా ఇనికాన్ ఒరెన్ యేసుజ్, "యెరూసలెమ్దు కుల వాతి వరి లో ఇ మంజి, సాహి రోస్కాజ్ జగ్గితికెజ్ నెస్ఇతికి సిను ఒరిదె", ఇజి వెహ్లాన్. 19 "ఇనికెజ్ జగ్గితి?", ఇజి వాండ్రు వెన్బాతాన్. దనిజ్ వారు ఈహు వెహ్లాన్. "నజెరితుదికాన్ యేసుజ్ జగ్గితి నజతిజ వందిజ్ వర్గిజినాన్. వాండ్రు ఒరెన్ ప్రవక్త. వాండ్రు కితి గొప్ప వణిజాణిజ్ వెహ్లా గొప్ప నజతిజాణిజ్ దేవుణు వన్నిజ్ ఇష్టం ఆతాన్. లోకుర్ విజెరి బా వన్నిజ్ ఇష్టం ఆతారె నమ్మితార్. 20 మా పెరి పుజెరిబు, అతికారిబు, రోమ అతికారి కీదు సాపుదిజ్ సిక్కు సీదెజ్ వన్నిజ్ ఒవజెవతార్. వారు వన్నిజ్ సిలువాదు కుటిజాణిజ్ డేయిజి నష్టార్. 21 వీండ్రునె ఇస్రాయేలు లోకాజ్ డిస్పిస్సికాన్ ఇజి మాపు ఎద్రు సుడేజి మహాప్. యాకెదె ఆవండ, యా నజతి జగ్గిజి నేహాన్ మూండ్రీ దినమ్కు ఆతె.

22-23 మరి. మా లో ఇ మన్ని సెగొండెక్ బోదెక్ మజి నండ్రా బమ్మ కిబిస్తి. ఎలాగ ఇహిజ, కోడిజామ్నె దూకిదు సాహి గాని వన్యాజ్ వన్ని పీన్గు తోర్ఎతార్. అవీకు మరీజి వాతెనె మజి ఈహు వెహ్లా. దూతార్ వన్యాజ్ తోరె ఆతారె, యేసు బత్తిక మనాన్ ఇజి వెహ్లాన్ ఇజి. 24 మా వెట మనికార్ సెగొండార్ దూకిదు సాహారె, బోదెక్ వెహ్లా వజనె సుడేతార్. వన్నిజ్ వారు సుడేవతార్.

25-26 అయావలె వాండ్రు వరిజ్, "బుద్ది సిలికిదెర్, ప్రవక్తరు వెహ్లా మాటెజ్ విజా నమిదెజ్ మిజి నండ్రా కష్టం ఆజినాన్. క్రీస్తు యా లెకెండ మాటెజ్ఓరిసి, దేవుణు మంజిని బాడిదు వన్నివెట అతికారమ్దు మండ్రెజ్గదె?", ఇజి వెహ్లాన్. 27 వాండ్రు దేవుణు మాటదు వన్ని వందిజ్ రాస్తి మన్ని దని అర్థం వరిజ్ వెహ్లాన్. మోసి రాస్తి పుస్తకమ్దాన్ మొదొల్లి ప్రవక్తరు విజెరి రాస్తి పుస్తకమ్ దాక మన్ని మటెజ వెహ్లా వాతాన్.

28 వారు సాన్నిని నారు డగ్రు ఆతిజ్, వాండ్రు వరిజ్ డిసిని మరి దూరం సాన్నిని లెకెండె నడితాన్. 29 గాని వారు, "మా వెట మన్ల. పొద్దుఆజినాన్. సీకాట్ ఆతాద్", ఇజి వెహ్లాన్ వన్నిజ్ మరి మరి వెహ్లాన్. అందెజె వాండ్రు వరి వెట మండ్రెజ్ సాహాన్. 30 వాండ్రు వరి వెట ఉండెజ్ బస్తివెలె, రొటె అస్టాండ్రె దేవుణుదిజ్ వందనమ్కు వెహ్లా దనిజ్ రుక్సి వరిజ్ సితాన్ 31 వెటనె వారు వీండ్రు యేసు ఇజి గుర్తు అస్టార్. గాని వాండ్రు వరిజ్ తోర్ఎండ ఆతాన్. 32 అయావలె వారు రివర్, "వాండ్రు నర్దు, మా వెట వర్గిజి, దేవుణు మాటెజ్ మజి నెస్పిస్తివెలె, మా మన్సుదు నండ్రా సరద వాతి లెకెండె ఆతాద్ గదె", ఇజి ఒరెన్ వెట ఒరెన్ వర్గితాన్. 33-34 వెటనె వారు నిజితారె, యెరూసలెమ్దు సాహార్. అబె, వారు పదకొండు మణిసిర్ సిసూరిని వరి వెట మహికార్ కూడేజి, "నిజమె, యేసు మరీజి నిజితాన్. సిమొనుజ్తోరె ఆతాన్ ఇజి వర్గిజి మహిక సుడేతాన్. 35 అయావలె వారు రివర్, నర్దు జగ్గితికెజ్ యేసు రొటె రుక్సివెలె వారు ఎలాగ గుర్తు అస్టారొ దన్నివందిజ్ వెహ్లాన్.

సిసూర్ కూడితివెలె వరిజ్ తోరె ఆజినాన్

36 వారు వర్గిజి మహివలెనె యేసు వాండ్రె వరి నడిమి నిహండ్రె, "నమాదనం కల్గిపిదె", ఇజి వెహ్లాన్. 37 దూబ తోరితాద్ ఇజి ఒడేబిజి వారు నండ్రా తియెల్ ఆతార్. 38 నస్తివలె వాండ్రు, "ఎందానిజ్ మీరు తియెల్ ఆజినదెర్? ఎందనిజ్ అనుమానమ్కు మీ మన్సుద్ వాజినె? 39 నానె వాండ్రు ఇజి నమిదెజ్ నా కిక్కాజ్ కాల్యాజ్ సుడేదు. ఎందానిజ్ ఇహిజ, నజి మన్ని లెకెండె దూబదిజ్ ఒడోల్ మన్ఉ. 40 యా మటెజ్ వెహ్లా వాండ్రు వరిజ్ వన్ని కిక్కు కాల్యు తోరిస్తాన్.

41-43 అహిజ్బా వారు నర్దుదాన్ బమ్మదాన్ ఇంక నమ్మిండ మహార్. అందెజె వాండ్రు వరిజ్, "తిండ్రెజ్ ఇనికబా మనాదా?", ఇజి వెన్బాతిజ్, వారు ఉండ్రీ సుహ్లా మొయ ముకెజ్ సితార్. వాండ్రు లొస్తాండ్రె వరి ఎద్రు తిహాన్. 44 మరి వాండ్రు వరిజ్, "నాను మీ వెట మహివలె యాకెజ్నె మీ వెట వెహ్లా. ఇనిక ఇహిజ, మోసి రాస్తి పుస్తకమ్దు, ప్రవక్తరు రాస్తి పుస్తకమ్దు, కీర్తన పుస్తకమ్దు నా వందిజ్ రాస్తి మనికెజ్ విజా పూర్తి ఆదెజ్వెలె", ఇజి. 45 వాండ్రు దేవుణు మాటెజ్ అర్థం కిదెజ్ వరిజ్ సాయం కిత్తాన్. 46-47 వాండ్రు వరిజ్ ఈహు వెహ్లాన్. "యా మాటెజ్ రాస్త మనాద్. అయ్యాక ఇనిక ఇహిజ, క్రీస్తు మాటెజ్ ఓరిసి, సాజి మూండ్రీ రోస్కాజ్ నిజ్నాన్ సాపుదాన్ నిజ్నాన్లె. యెరూసలెమ్దు మొదొల్లి లోకాజ్ విజెరిజ్ వన్ని అతికారమ్దాన్ 'పావమ్కు ఒప్పుకోడేల', దేవుణు సెమిస్సాన్", ఇని మాట వెహ్లా ఆనాదెల్. 48 మీరు సుడేతికెజ్ లోకాజ్ వెహ్లాజ్. 49 నా బుబ్బ ఒట్టు కితి దేవుణు ఆత్మదిజ్ నాను మిజి పొక్కు. గాని మున్సుహాన్ సత్తు మీ మున్సు వానిదాక మీరు యెరూసలెం పట్టమ్దునె మండ్రు.

† యా పన్నువర్గికార్ యూదురి దేసమదిజ్ బాదకిజిని రోమ ప్రబుత్వం వందిజ్ వణికినికార్ విరు యూదురిజ్ వడేఇకార్ అకాదె ఆవండ వీరు నండ్రా వన్ను లోసి యూదురిజ్ బాద కినార్. ఆహె అనయమ్దాన్బా వారు అస్తి గణిస్సాన్. వారు యూదురి రూలజ్ లోజ్పర్ అందెజె యూదురు వరిజ్ పావం కినికార్ ఇజి వెహ్లాన్. †† యాక యూదురి ఉండ్రీ మూట దిన్ని అరదం ఇనిక ఇహిజ తప్పకిఇతి నజి వారు సిక్కుసీతిజ నండ్రా నెఇవరిజ్ దేవుణు ఎస్సా సిక్కు సీనాన్ ఇజి.

దేవుణు యేసుజ్ పలోకమ్దు ఒసినాన్

⁵⁰ పట్నం వెల్లి బెతానియ నారు డగు దాక వాంధ్రు వరిజ్ ఒతాన్. వాంధ్రు కికు పెహ్తాండె, వరిజ్ దీవిస్తాన్. ⁵¹ దీవిసి మహివలె వాంధ్రు వరిజ్ డిస్తాన్. దేవుణు వన్నిజ్ వాంధ్రు మంజిని బాడిడు ఒత్తాన్. ⁵²⁻⁵³ వారు వన్నిజ్ మాడిస్తారె, నండొ సర్దదాన్ యెరూసలెమ్దు మర్జి వాతార్. వారు డిస్ ఏండ గుడిడు మంజి, దేవుణుదిజ్ పాగిడిజి మహార్.

మార్కు

నల్ల కిబిసినిక

వన్నెండు మణిసిర్ సిసూర్ లో ఇ ఒరెనాతి యోహాను రాస్తే పుస్తకమనె యాక. యేసు యా లోకమదు బత్కిజి మహివలె జగ్గితి దన్నివందిజ్ కతవజ వాండ్లు వప్పినాన్. యేసు ఎయెన్? వాండ్లు దేవులు మరిసి, దేవులు వెట మహికాన్, గాని వాండ్లు దేవులునె. తయార్ కితిక ఇనికబా వాండ్లు సిల్లెండ కల్లివతాద్. వాండ్ల దేవులు మాట, లోకురి విజెరి పావమ్కు సాన్పిస్తెజ్ పూజ ఆతి మెండ గొరై పిల్ల లెకెండె వాండ్లు. ఎలాకాలం బత్కిని బత్కు సీని టిండి లెకెండె వాండ్లు. లోకమదిజ్ జాయి లెకెండె మనాన్. నెగ్గి గవుడుఎన్ లెకెండె మనాన్, సావుదాన్ మర్జి నిజిత్తి బత్కు సీనికానె వాండ్లు ఇజి యేసు వందిజ్ యా పుస్తకమదు వెప్పినాన్. యా సువార్త రాసి మహివలె, రోమ గవర్మెంటుదు మన్నికార్ దేవులుదిజ్ నమ్మిత్తి వరిజ్ నండో మాలెజ్ కిజి మహర్. అందెజె నమ్మిత్తి వరిజ్ దయిరం సీదెజ్ యోహాను రాస్తెకాదె యా పుస్తకం.

యేసు క్రీస్తు దేవులు వాక్యం

1 లోకం పుటినేండ ముజాలె, దేవులు వందిజ్ వెప్పిన వాక్యం ఇనికాన్ ఒరెన్ మహాన్. వాండ్లు దేవులు వెట మహాన్. వాండ్ల దేవులు. 2 వాండ్లు లోకం పుటినేండ ముజాలె, దేవులువెట మహాన్. 3 విజా వన్నివెట దేవులు తయార్ కితాన్. కల్లితిమన్నిక ఇనికబా వాండ్లు సిల్లెండ కల్లివతాద్. 4 జీవు వన్నిబాన్ మనాద్. అయా జీవు లోకురిజ్ జాయి ఆత మనాద్. 5 జాయ్ సీకటిదు జాయ్ సీజినాద్. గాని సీకటిదుమన్నికార్ జాయ్దిజ్ నెన్వితార్. 6 దేవులు బాణిజ్ పోక్తి ఒరెన్ మణిసి వాతాన్. వన్ని పేరు యోహాను. 7 వాండ్లు అయా జాయ్వందిజ్ సాస్యం వెహైజ్ ఒరెన్ సాసెలెకెండె వాతాన్. ఎందానిజ్ ఇహిజ, విన్నిబోద వెంజి లోకుర్ విజెరె అయా జాయ్దిజ్ నమ్మిదెజ్ వాతాన్. 8 యోహాను అయా జాయ్ ఆవన్. గాని అయా జాయ్వందిజ్ సాక్యం వెహైజ్ వాతాన్. 9 అయా జాయ్నె నిజమాతి జాయ్. నిజమాతి జాయ్ లోకమదు వాజి లోకురిజ్ విజెరిజ్ జాయ్ సీజినాన్. వాక్యంనె నిజమాతి జాయ్. 10 వాండ్లు లోకమదు మహాన్. లోకమదు మనికెజ్ విజా వన్నివెటనె దేవులు తయార్ కితాన్. గాని లోకుర్ వన్నిజ్ పోలిస్తెజ్ అట్వితార్. 11 వాండ్లు వన్ని సాంత దేనమదు సాహాన్. గాని వన్ని సాంత యూదురి లోకుర్ వన్నిజ్ డగ్గు కివితార్. 12 వన్నిజ్ ఎసాండార్ డగ్గు కితార్, వారె వన్నిముస్సు నమకం ఇట్టికార్. నన్నివరిజ్ వన్నికొడోర్ ఆదెజ్ వాండ్లు అతికారం సిత్తాన్. 13 వారు అప్పాసి వెట పుట్టికార్ ఆవర్. ఒడోల్ ఆసదాన్ పుట్టికార్ ఆవర్. వారు ఎత్తు కితివజ పుట్టికార్ ఆవర్. దేవులునె వరిజ్ వన్ని కొడోర్ ఇజి ఇట్టాన్. 14 వాక్యం ఇనికాన్ లోకు ఆతాండ్రె మా నడిమి బత్కితాన్. వాండ్లు మా ముస్సు వన్నిదయాదర్మం పూర్తి తోరిస్తాన్. వాండ్లు దేవులు వందిజ్ నిజమాతికెజ్ పూర్తి తోరిస్తాన్. వాండ్లు ఎసా గొప్పపెరికాన్ ఇజి మాపు నుడెతాప్. బుబ్బు బాణిజ్ వాతి ఒరెండ్రె మరిసి ఆతి గొప్ప పెరివన్నిజ్ నుడెతాప్. 15 యోహాను వన్నివందిజ్ సాక్యం వెప్పినాన్. వాండ్లు లోకురిజ్, "నా వెన్కా వానికాన్ నజి విస్సికాన్. ఎందానిజ్ ఇహిజ, వాండ్లు నాను పుట్వంది ముజాలె మన్నికాన్ ఇజి నాను వెహైకాన్ పిండ్రె", ఇజి డటం డేల్లి వెహైజ్. 16 వన్ని పూర్తి దయాదర్మంవందాన్ వాండ్లు మజి విజెరిజ్ దీవిస్తాన్. కాలమ్కు గడప్పి మహిజ్బా వాండ్లు మజి దీవిసెనె మంజినాన్. 17 యూదురిజ్, రూలుజ్ మోసెవెట దేవులు సితాన్. వన్ని దయా దర్మం ని వన్ని వందిజ్ నిజమాతి సజతిజ్ యేసు క్రీస్తు వెట వాతె. 18 ఎయెన్బా ఎసెబ్బా దేవులుదిజ్తోఎన్. గాని అప్పాసి పడెకాద్ మన్ని, దేవులు వెట నమానం ఆతి, ఒరెండ్రె మరిసినె దేవులు ఎయెన్ ఇజి మజి తెలివి కిబిస్తాన్.

యోహాను యేసు వందిజ్ వెప్పిన సాస్యం

19-20 యెరూసలెమ్దాన్ యూదురి పెద్దలిజు, యోహాను డగ్గు పుజెరిజు ని లేవి జాతిదు మన్ని వరిజ్ పోక్తార్. "నీను ఎయెన్ ఇజి వెహె ఆజిని?", ఇజి వెన్బాదెజ్ వరిజ్ పోక్తార్. నస్తివలె యోహాను ఈహు వరిజ్ సాక్తి వెహైజ్. "నాను క్రీస్తు ఆవ", ఇజి నెగ్గెండ వెహైజ్. 21 అయావలె వారు, మరి నీను ఎయెన్? నీను ఏలియ ప్రవక్తనా? ఇజి వెన్బాతార్. "ఆవ", ఇహాన్. "నీను మాపు ఎద్దు సూణి ప్రవక్తనా?", ఇజి వెన్బాతిజ్, "ఆవ", ఇహాన్. 22 అందెజె వారు, "నీను ఎయెన్? మజి పోక్తివరిజ్ మర్జి వెహైజ్ నీను ఉండ్రె జబాబు సిదా. నీ వందిజ్ నీను ఇన్నిక ఇజి వెహె ఆజిని?", ఇజి వెన్బాతార్. 23 దన్నిజ్ యోహాను యెసయ ప్రవక్త వెహైజ్ వెహైజ్. "ప్రబు వందిజ్ సరితినాజ్ కిదు, ఇజి బిడిమ్ బూమిదు డేలోసినివన్ని లెకెండె † మన్న నాను". 24-25 వన్ని డగ్గు వాతికార్ వరిసయరు పోక్తికార్. అయావలె, అయా వరిసయరుజ లోఇ సెగొండార్ వన్నిజ్, "నీను క్రీస్తు ఆఇజ, ఏలియ ప్రవక్త ఆఇజ, మాపు ఎద్దు సూణి ప్రవక్త ఆఇజ, మరి ఎందనిజ్ నీను బాప్తినం సీజిని?", ఇజి వెన్బాతార్.

26 దన్నిజ్ వాండ్లు, "నాను ఏరుదాన్ బాప్తినం సీజిన. గాని మరి ఒరెన్ మనాన్. వాండ్లు మీ నడిమి మనాన్. వన్నిజ్ మీరు పోలిస్ఇదెర్. 27 వాండ్ల నా వెన్కా వాజినికాన్. వన్ని జోడెకు బేట్టు కూతెజ్బా నాను ఏవటికాన్ ఆవ", ఇజి వెహైజ్. 28 యెర్దాను ఇన్ని గడ్డ అతాహ పడెకాద్ మన్ని బెతానియ ఇన్ని పట్టుమదు యూకెజ్ విజా జగ్గితె. బానె యోహాను బాప్తినం సీజి మహాన్.

† యెసయ 40:3.

29 మర్సనాండిజ్, యేసు వన్నిడగు వాజినక యోహాను సుడేతాన్. సుడేతండ్రె వాండ్రు, “ఇదిలో లోకురి పావమ్క వందిజ్ పూజ ఆదెజ్దేవుణు పోక్తి వన్ని మెండ గొర్రె పిల్ల. వాండ్రు లోకురి పావమ్కు సాన్నిస్సాన్”, ఇజి వెహ్లాన్. 30 “నా వెన్కా ఒరెన్ వాజినాన్, వాండ్రు నజి ఇంక మిస్తికాన్. ఎండనిజ్ ఇహిజ, వాండ్రు నాను పుబ్ఎండ ముజాల మన్నికాన్ ఇజి నాను ఎయె వందిజ్ వెహ్లాన్ వాండ్రె వీండ్రు”. 31 వీండ్రు ఎయెన్ ఇజి నానె నెన్ఎత. గాని ఇస్రాయేలు లోకురిజ్ వీండ్రు ఎయెన్ ఇజి తెలివి కిని వందిజె నాను ఏరుదాన్ బాప్తినం సీజి వాత”, ఇజి వెహ్లాన్.

32 మరి వాండ్రు నెస్తిక ఈహు సాక్సి వెహ్లాన్: “దేవుణు ఆత్మ ఉండ్రె పారపాటి లెకెండ్రె ఆగానమ్దాన్ డిగ్జిజి వాజి వన్నిముస్సు మంజినక నాను సుడేత. 33 నానుబా వన్నిజ్ నెస్ఎండ మహ. గాని ఏరుదాన్ బాప్తినం సీఅ ఇజి నజి వెహ్లాన్ పోక్తి దేవుణునె నజి వెహ్లాన్, ‘దేవుణు ఆత్మ డిగ్జిజి ఎయెర్ ముస్సు మంజినక నీను సూణిదో వాండ్రె దేవుణు ఆత్మదాన్ బాప్తినం సీనాన్’, ఇజి. 34 వెహ్లా లెకెండ్రె వినిజ్ జగ్గితక నాను సుడేత. అందెజె నాను వెహ్లాన్, ‘వీండ్రె దేవుణు మరిసి ఇజి’.

యేసు మొదోహి సిసూర్

35 మర్సనాండిజ్, మరి, యోహాను వన్ని రివెర్ సిసూర్ వెట నిహ మహాన్. 36 అయావలె యేసు అయా సరి సాన్ని మహిజ్, వన్నిజ్ డిటం సుడేజి, ‘ఇదిలో, పూజ ఆదెజ్ దేవుణు పోక్తి వన్ని మెండ గొర్రె పిల్ల’, ఇజి వెహ్లాన్. 37 అయా రివెర్ సిసూర్ వాండ్రు వెహ్లాన్ వెహరె, యేసు వెన్కా సాహార్. 38 యేసు మహ్లాండ్రె, వారు వెన్కా వాజినక సుడుతాన్. సుడేతాండ్రె వరిజ్, “వీరు ఇనిక రెబాజినెదెర్?”, ఇజి వెన్బాతాన్. వారు వన్నిజ్, “రబ్బు, ఇహిజ బోదిస్సికాన్, నీను ఎంబె మంజిని?”, ఇజి వెన్బాతార్. 39 వాండ్రు, “రదు, వాజి సుడేదు”, ఇహాన్. అందెజె వారు సాహరె, వాండ్రు మంజినిబాన్ సుడేతార్. అయా రోజు వారు వన్నివెట మహార్. అయావలె రహారమ పాగల్నాల్లి గంటెజ్ ఆత మహాద్. 40 సిమోన్ పేతురు తంబెర్లి ఆతి ఆండ్రెయ ఇన్నికానె యోహాను వెహ్లాన్ వెంజి యేసువెట సాహి రివెర్ లోఇ ఒరెన్. 41 వాండ్రు వెటనె, వన్నిఅన్నసి సిమోనుజ్ రెబాతాండ్రె, “మాపు మెసయెజ్ † సుడేతాప్”, ఇజి వెహ్లాన్. 42 వెహ్లాండ్రె వన్నిజ్ యేసు డగు తతాన్. యేసు సిమోనుజ్ సుడేజి, “నీను యోహాను మరిసి ఆతి సిమెను. నీను కేప ఇజి కూకె ఆనిలె”, ఇజి వెహ్లాన్. (గ్రీకు బాసదు అయా మాట పేతురు ఇజి రాస్త మనాద్. దని అర్థం ఇన్నిక ఇహిజ నటు ఇజి).

యేసుపిలిపుజ్ నతనయేలుజ్ కూక్సినాన్

43 మహ్లా నాండిజ్, గలీలయ ముటదు సాండ్రెజ్ ఇజి యేసు ఒడేజితాన్. అయావలె, వాండ్రు పిలిపుజ్ దసూల్ ఆతాతాండ్రె వన్నిజ్, “నా వెట వాజి నా సిసూడు: ఆఅ”, ఇజి వెహ్లాన్. 44 పిలిపు బెత్సెయ్య ఇని పట్టుమ్దికాన్. పిలిపు, ఆండ్రెయ, పేతురు వీరు ఉండ్రె పట్టుమ్దికార్. 45 పిలిపు నతనయేలు ఇని వన్నిజ్ రెబాతాండ్రె వన్నిజ్, “మోసె రాస్తి సీతి రూలుదు వాండ్రు రాస్తి మన్ని వన్నిజ్, ప్రవక్తరు బా రాస్తి మన్ని వన్నిజ్ మాపు దసూల్ ఆతాప్. వాండ్రు నజరెతుదికాన్ ఆతి యేసు. యోసేపు మరిసి”, ఇజి వెహ్లాన్. 46 అందెజె నతనయేలు వన్నిజ్, “నెగ్గెకెజ్ ఇనికబా నజరెతుదాన్ వానాదా?”, ఇజి వెన్బాతాన్. వన్నిజ్ పిలిపు, “వాజి సుడేఅ”, ఇహాన్. 47 యేసు నతనయేలు వన్ని డగు వాజినక సుడేతండ్రె, “ఇవిలోని నిజమాతి ఇస్రాయేలుదికాన్ వాజినాన్. విని లోఇ ఇన్ని సెఇకెజ్బా సిల్లు”, ఇజి వన్ని వందిజ్ వెహ్లాన్. 48 అయావలె నతనయేలు వన్నిజ్, “నీను ఎలాగ నజి నెస్సి?”, ఇజి వెన్బాతిజ్ యేసు, “పిలిపు నిజి కూక్ఎండ ముజాలె, నీను బొడెమరాన్ అడిగి మరిసి నాను సుడేత”, ఇహాన్. 49 నతనయేలు, “బోదిస్సికి, నీను దేవుణు మరిసి. నీను ఇస్రాయేలు లోకురి రాజు”, ఇహాన్. 50 అందెజె యేసు వన్నిజ్, “నీను బొడెమరాన్ అడిగి మంజినక నాను సుడేత ఇజి నాను వెహ్లాన్ నీను నమిజిని. దినిజ్ ఇంక మిస్తి నండ్రె పెరి పణిజ్ నీను సూణిలె”, ఇజి వెహ్లాన్. 51 వాండ్రు వన్నిజ్, “నాను నిజం వెహ్లాన్, ఆగానం రెయ్ ఆజి దేవుణు దూతెజ్ లోకుమరిసిఆతి నా డగు ఎక్సి సానిక డిగ్జిజి వానిక నీను సూణిలె”, ఇజి వెహ్లాన్.

యేసు కితి మొదోహి బమ్మ ఆతి పణి

2 రుండి దినమ్కు సాహి వెన్కా, గలీలయ ముటది కానా ఇని పట్టుమ్దు ఉండ్రె పెండ్రె జగ్గితాద్. 2 యేసు అయేసిబాన్ మహాద్. యేసుజ్ని వన్ని సిసూర్జబా ఆ పెండ్రెదు కూక్తార్. 3 ద్రాక్కుకల్లు వీజితివెలె, యేసు అయేసి వన్నిజ్, “ద్రాక్కుకల్లు వీజితాద్”, ఇజి వెహ్లాన్. 4 అయావలె యేసు, “ఓ యా, దిని వందిజ్ నీను నజి ఎండనిజ్ పణిసిని? నాను ఎయెన్ ఇజి తోరె ఆదెజ్ దేవుణు నా వందిజ్ ఏర్పాటు కితి వేలా ఇంక రవెదె”, ఇజి వెహ్లాన్. 5 యేసు అయేసి పణికినివరిజ్, “వాండ్రు మిజి ఇన్నిక వెహ్లాన్బా మీరు కిదు”, ఇజి వెహ్లాన్. 6 దేవుణుదిజ్ ఇస్టం ఆత్తివజ మండ్రెజ్ యూదురు సుబ్బరం ఆనార్. సుబ్బరం ఆనివందిజ్ వారు నోర్బానార్. అయాక వరి ఉండ్రె ఆసారం. ఆహి నోర్బాని దన్నివందిజ్ పణుకుదాన్ తయార్ కితి గోలమ్కు మహి. డగు తొంబయ్దాన్ నూటి మువయ్ లీటర్ ఏరు అస్సి. నన్ని గోలమ్కు ఆరుబాన్ మహి. 7 యేసు, “అయా గోలమ్కాజ్ ఏరు నిహతు”, ఇజి పణికిని వరిజ్ వెహ్లాన్. వారు నిండ్రు నిహ్తార్. 8 అయావలె వాండ్రు వరిజ్, “ముడుక్సి నవ్దెరి బాన్ ఒతు”, ఇజి వెహ్లాన్. వారు అయా లెకెండ్రె కితార్. 9 నవ్దెరి యెలు ద్రాక్కు కడు ఆతి ఏరు రుసి సుడేతాన్. అయా ద్రాక్కుకల్లు ఎమేణిజ్ వాతాదో ఇజి ఆ ఏరు ముడుక్తి ఒతి పణికిని వరిజె తెలినా ద్గాని నవ్దెరిజ్ తెలివెద్. వాండ్రు పెండ్రె మరిసిజ్ కూక్తాన్. 10 కూక్తాండ్రె వన్నిజ్, “విజెరె కూలెజ నెగ్గె ద్రాక్కుకల్లు ముందాలె సీనార్. లాపు ఉటి వెన్కా అడ్డెబెడ్డెదిక సీనార్. గాని నీను ఏలుదాక నెగ్గె ద్రాక్కుకల్లునె ఇడ్డి మన్ని”, ఇజి వెహ్లాన్. 11 యాకాదె యేసు కితి మొదోహి బమ్మ ఆతి పణి. యాక గలీలయ ముటది కానా ఇన్ని పట్టుమ్దు జగ్గితాద్. అయా లెకెండ్రె జిజి, యేసు వాండ్రు గొప్పపెరికాన్ ఇజి తోరిస్తాన్. వన్ని సిసూర్ వన్ని ముస్సు నమకం ఇట్టార్. 12 దిని వెన్కా వాండ్రు వన్ని అయిసి, తంబెర్సిర్, సిసూర్ వెట కపర్నహోముదు సాహాన్. అబ్బె సెగం దినమ్కు మహార్.

† మోసయ ఇహిజ దేవుణు వన్ని లోకురిజ్ రక్సిస్టెజ్ ఏర్పాటు కితి పోక్తికాన్. ఇది ఏల్లి బాస

యేసు దేవుణుగుడిదాన్ బేరం కినివరిజ్ వెల్లి పాక్కినాన్

13 యూదురి పస్కు వండొయి కిదెజ్ కాలం డగ్రు ఆతాద్. అందెజె యేసు యెరూసలెమ్దు సాహాన్. 14 బాన్ దేవుణుగుడిది అరుబుదు బేరం కిజిని వరిజ్ వాండ్రు సుడెతాన్. కోడ్డిజ్, గొర్రెజ్, పూజ కిని వందిజ్ పారపాటిజ్ పార్ని వరిజ్ సుడెతాన్. వయు దేసెమ్ది డబ్బుజ్ మరిసి యూదురి కాసుజ్ సీజిని బేరం కిని వరిజ్ బా సుడెతాన్. 15 అయావలె వాండ్రు నాసుదాన్ కొరెడ కితాండ్రె, కొడ్డిజు, గొర్రెజు వెట వరిజ్ విజెరిజ్ అరుబుదాన్ పేర్తాన్. డబ్బుమరిసి బేరం కినివరి డబ్బు విజా సెద్రిస్తాండ్రె, వరిబల్లెజ్ మహ్లాన్. 16 పార పాటిజ్ పార్ని వరివెట, “విస్కాజ్ ఇబ్బెణిజ్ ఒతు. నా బుబ్బ ఇల్లు సత్తలెకెండ్ కిమాల్”, ఇజి వెహ్లాన్. 17 నస్సెవలె వన్నిసిసూర్, “ఓ దేవుణు, నీ ఇల్లువందిజ్ నజిమన్ని గొప్ప ఆస, ఉండ్రె సిసులెకెండ్ నా లొఇ కన్నాద్ †”, ఇజి దేవుణు మాటదు రాస్తె మనిక వారు ఒడెబితార్. 18 అయావలె యూదురు, యా పణిజ్ కిదెజ్ నిజి ఇని అతికారం మనాద్? ఉండ్రె బమ్మ ఆని పణికిజి మజి తోరిసి అయాక రుజాప్ కిత, ఇజి వన్నిజ్ వెహ్లాన్. 19 “యా గుడి: డెయిజి అల్వెత్తు. మూండ్రె రోస్కాజ్ నాను మరి తొహ్లా”, ఇజి యేసు వరిజ్ వెహ్లాన్. 20 దన్నెజ్ యూదురు, “యా గుడి: తొహ్లాజ్ నలవయ్ ఆరు పంటెజ్ ఆతాద్. నీను మూండ్రె రోస్కాజిజ్ తొహ్లాదా?”, ఇహార్. 21 గాని దేవుణుగుడి: వందిజ్ వెహ్లావలె వన్ని ఒడె:ల్ వందిజె వెహ్లాన్. 22 వాండ్రు సాతాండ్రె మరెజి నిజితివెనుక, యా లెకెండ్ మాట వాండ్రు వెహ్లాన్ ఇజి సిసూరు ఒడిబితార్. అందెజె దేవుణు మాట వారు నమ్మితార్. యేసు వెహ్లా మాటబా నమ్మితార్. 23 యేసు పస్కువండొయ్ దిజ్ యెరూసలెమ్దు మహివలె, వాండ్రు కితి బమ్మ ఆతి పణిజ్ సుడెతారె, నండొండార్ వన్నిజ్ నమ్మితార్. 24 గాని వాండ్రు వరిజ్ వన్నిజె ఒవజెప్ అతాన్. ఎందనిజ్ ఇహిజ, వాండ్రు విజెరిజ్ నెస్సాన్. 25 ఎయెర్ బా వన్నిజ్ లోకుర్ వందిజ్ వెహ్లాజ్ అవ్ నరం సిల్లెద్. ఎందానిజ్ ఇహిజ, వరి మన్నుదు మన్ని ఆలోననమ్కు వాండ్రు నెసినాన్.

యేసు నికొదిముజ్ నెస్పిస్సాన్

3 యుదురిజ్ అతికారి ఆతి నికొదెము ఇనికాన్ ఒరెన్ మహాన్. వాండ్రు పరినయరుబు లొఇ ఒరెన్. 2 వాండ్రు ఉండ్రె పాదొయ్, యేసుడగ్రు వాతాన్. వాతాండ్రె, “ఓ బోదకినికి, నీను దేవుణు పాక్కి ఒరెన్ నెస్పిస్సాన్ ఇజి మాపు నెసినాప్. దేవుణు ఒరెన్ వన్నివెట సిల్లెండ మహిజ, నీను కిజిని బమ్మఆతి పణిజ్ కిదెజ్ ఎయెన్ బా అట్ ఎవ్”, ఇజి వెహ్లాన్. 3 అందెజె యేసు వన్నివెట ఈహు వెహ్లాన్: “నాను నిజమ్ నె వెహ్లాన్, ఒరెన్ మరి కొతాజ్ పుట్టిజనె, దేవుణు ఏలుబడిదు మంజినాన్”. 4 అయావలె నికొదెము, “పిరితిలోకు ఒరెన్ ఎలాగ మరి కొతాజ్ పుట్టాన్. వాండ్రు అయిసి పాటాద్ సాన్ని మరి ఉండ్రె సుట్టు. పుట్టెజ్ అట్ ఎవ్”, ఇజి వెహ్లాన్. 5 యేసు వెహ్లాన్, “నాను నిజ్ నె వెహ్లాన్, ఒరెన్ బాప్తెనె లాగె అఎండ మహిజ, దేవుణు ఆత్మ బాణిజ్ కొత్త బత్తు దొహ్ కెండ్ మహిజ, వాండ్రు దేవుణు ఏలుబడిదు మన్ ఎవ్. 6 యాయ బుబ్బర్ వెటనె కొడె:ర్ కానినార్. గాని దేవుణు ఆత్మ వెటనె దేవుణు కొడె:ర్ ఆనార్. 7 “నీను మరి కొతాజ్ పుట్టెజెవెలె”, ఇజి నాను వెహ్లా మాటదిజ్ నీను బమ్మ ఆమా. 8 “గాలి దన్నెజ్ ఇస్టమాతి బాడిద్ డెయ్యాద్. నీను దన్నిజాటు వెని గాని అది ఎంబెణిజ్ వాజినాద్, ఎంబె సాన్నినాద్, ఇజి నిజి తెలివెద్. అయలెకెండ్ నె, దేవుణు ఆత్మ ఒరెన్ వన్నిజ్ కొత్త బత్తు సిదెజ్ వన్నిజ్ ఇస్టమాతివజ విజా కినాన్. వాండ్రు అయాక ఎలాగ కినాన్ ఇజి తెలివెద్”. 9 “యాక ఎలాగ జగ్గినాద్?”, ఇజి నికొదెము యేసుజ్ వెన్ బాతాన్.

10 దనిజ్ యేసు, “ఇస్రాయేలుదు మన్ని బోదిసిని వరిలొఇ తగమాతికి ఒరెన్ నీను గదె? యాకెజ్ నీను నెస్ ఇదా? 11 నాను నిజం వెహ్లాన్, మాపు నెస్తికెజె వెహ్లానాప్, సుడెతికెజె వెహ్లానాప్. గాని మీరు అయాకెజ్ నమ్మిఇదెర్. 12 యా బూమిదు జగ్గిని దన్నివందిజ్ నాను మిజి వెహ్లా మన్ను. గాని మీరు నమిఇ. అహిజ, నాను దేవుణు మంజిని బాడిదు మన్ని నజతిజ వందిజ్ వెహ్లాజ, మరి మీరు ఎలాగ నమ్మినిదెర్? 13 ఎయెన్ బా ఎస్సెబా దేవుణు మంజిని బాడిదు సాన్ అతాన్. దేవుణు మంజిని బాడ్డి: దాన్ డిగితి వాతి లోకుమరిసి ఆతి నాను ఆవండ మరి ఎయెన్ బా దేవుణు మంజిని బాడిదు సాన్ అతాన్. 14-15 బిడిమ్ బూమిదు మోసె కంసుదాన్ తయార్ కితి సరాసదిజ్ పెహ్లా లెకెండ్, లోకు మరిసి ఆతి నాను పెరె ఆనాలె. నా ముస్కు నమకం ఇడ్డి వరిజ్ విజెరిజ్ ఎలాకాలం బత్కిని బత్కు దొహ్ కివందిజె నాను పెరె ఆదెజెవెలె.

16 దేవుణు లోకుర్ విజెరిజ్ ఎసానా ప్రేమిస్తాన్. అందెజె వాండ్రు వన్ని ఒరెండ్రె ఒరెన్ మరిసిజ్ సాదెజ్ సితాన్. వన్నిజ్ నమినికార్ ఎలాకాలం సిసుదు మన్ ఎండ, ఎలాకాలం దేవుణు వెట మంజిని వందిజ్ వాండ్రు మరిసిజ్ సితాన్. 17 దేవుణు లోకురిజ్ తీర్పు సీజి సిక్కు సీని వందిజ్ ఆవెద్, వాండ్రు వన్ని మరిసిజ్ లోకమ్దు పాక్కి. గాని వాండ్రు వరిజ్ ఎల్లకాలం మన్ని సిక్కుదాన్ గెల్పెస్సివందిజె పాక్తాన్. 18 మరిసిజ్ నమ్మిని ఎయెరిజ్ బా తీర్పు సీజి సిక్కు సీనిక సిల్లెద్. గాని వన్నిజ్ నమిఇ వరిజ్ ఏలునె దేవుణు తీర్పు సీజి సిక్కు సిత మనాద్. ఎందనిజ్ ఇహిజ, దేవుణు ఒరెండ్రె మరిసిజ్ వారు నమ్మివతార్. 19 జాయ్ లోకమ్దు వాతమనాద్. గాని లోకుర్ జాయ్ దిజ్ ప్రేమిన్ ఎండ సీకట్ దిజ్ ప్రేమిస్తార్. ఎందనిజ్ ఇహిజ, వారు సెఇ పణిజ్ కిజినార్. యాక సుడెజినె, లోకురిజ్ దేవుణు తీర్పు సీజి సిక్కు సీనాన్. 20 సెఇ పణిజ్ కిజినికార్ విజెరె జాయ్ దిజ్ ఇస్టం కివెర్. వారు జాయ్ దు రెవెర్. ఎందనిజ్ ఇహిజ, వరి సెఇ పణిజ్ విజా జాయ్ దు తోర్నె ఇజి తియెల్ ఆజినార్. 21 గాని నిజమాతి పణిజ్ కినికాన్ ఎయెన్ బా జాయ్ దు వాజినాన్. ఎందానిజ్ ఇహిజ, వారు కిజిని పణిజ్ విజా దేవుణుదిజ్ లొజిజి కిజినార్ ఇజి జాయ్ వెల్లి తోర్నాద్”, ఇజి వెహ్లాన్.

బాప్తెనెం సీని యోహాను యేసువందిజ్ సాసి వెహ్లానాన్.

22 వెనుక, యేసుని, వన్నిసిసూర్ యూదయప్రాతమ్దు సాహార్. బాన్ వాండ్రు వరివెట సగం కాలం గడప్పి, లోకురిజ్ బాప్తెనెం సీజిని మహాన్. 23 సలిముడగ్రు అయినొ ఇన్ని బాడిదు యోహాను బాప్తెనెం సీజి మహాన్. ఎందనిజ్ ఇహిజ, బాన్ నండొ ఏరు మహా. లోకుర్ వన్ని డగ్రు సాన్ని బాప్తెనెం లాగె అజి మహార్. 24 యాక యోహానుజ్ జెలిదు ఒఇ ముజాల జగ్గితాద్. 25 యోహాను సిసూర్ ని ఒరెన్ యూద వాండ్రు సుబ్రం అని యూదురు రూలు వందిజ్ వెహ్లా గొడెబ ఆతార్. 26 వారు యోహానుడగ్రు వాతారె, “బోదకినికి, యెర్దాను గడ్డ అతాల్ ని వెట ఒరెన్ మహాన్ గదె. నీను వన్ని వందిజ్ వెహ్లా మన్ని. ఇవిలొన్ వాండ్రు ఏలు

† కీర్తన 69:9.

బాప్తీసం సీజినాన్. లోకుర్ విజెర వన్నిడగు సాన్సినార్”, ఇజి వెహ్. 27 అందెజె యోహాను వెహ్, “దేవుణు ఇష్టం కితివజనె ఒరెన్ వన్నిబత్తురు విజా జిగ్జినాద్. 28 “నాను క్రీస్తు ఆపి. గాని వన్నిజ్ ఇంక ముజాల దేవుణు నజీ షాక్తాన్”, ఇజి నాను వెహ్కా మీరు వెహ్దెర్. 29 పెండ్లి ఆని వన్నిదిన్ పెండ్లి బోదలి. పెండ్లి దబడః కూలయెన్ వన్నిడగు మంజి వాండ్లు వెహ్కాజ్ వెంజినాన్. వెహ్నినికెజ్ వెంజినాకాదె కూలాయెన్ వన్ని సర్ద. పెండ్లి దబడః కూలాయెన్ పెండ్లి దబడఃవెట సర్ద ఆని లెకెండ్ నా సర్ద క్రీస్తువెట పూర్తి ఆజినాద్. 30 వాండ్లు పెరికాన్ ఆదెజ్వలె. నాను ఇజ్జికాన్ ఆదెజ్. 31 పరలోకమదాన్ వాజినికాన్ విజెరి ముస్సు పెరికాన్. యా లోకమదాన్ వాజినికాన్ యా లోకమదికానె. వాండ్లు లోకమది నజతిజ వందిజ్ వెహ్నినాన్. పరలోకమదాన్ వాజినికాన్ విజెరి ముస్సు పెరికాన్. 32 వాండ్లు సుడఃతి వనకవందిజ్ వెహ్ వన్కా వందిజ్ వెహ్నినాన్. గాని సెగొండార వాండ్లు వెహ్నినికెజ్ డగు కినార్. 33 వన్నిమాట వెంజినికాన్ దేవుణు వెహ్నినికెజ్ నిజం ఇజి ముద్ద పాకె ఆజినాన్. 34 దేవుణు షాక్తాన్ దేవుణు మాటనె వర్గజినాన్. ఎందనిజ్ ఇహిజ, దేవుణు వన్ని ఆత్మ అంతు సిల్లెండ్ వన్నిజ్ సీజినాన్. 35 అప్పాసి మరిసిజ్ ప్రేమిన్నాన్. అందెజె వాండ్లు వన్నిజ్ విజాదనిజ్ అతికారం సిత్త మనాన్. 36 మరిసి ముస్సు నమకం ఇడ్డి మన్నివన్నిజ్ ఎలాకాలం దేవుణువెట బత్తిని బత్తు మనాద్. గాని వన్నిజ్ లోజ్ ఇ వన్నిజ్ ఎలాకాలం బత్తిని బత్తు సిల్లెద్. గాని దేవుణు సిక్త వన్ని ముస్సు ఎలాకాలం మనాద్.

యేసు సమరియ దేసెమది బోదెలివెట వర్గజినాన్

4 1-2 యోహాను ఇంక యేసు నండొండారిజ్ వన్ని వెట కుడుఃప్పినాన్, వరిజ్ బాప్తీసం సీజినాన్ ఇజి పరిసయరు వెహర్. (నిజం ఇన్నిక ఇహిజ, యేసు ఎయెరిజ్ బాప్తీసం సివతాన్. వన్ని సిసూర్నె సితార్) 3 ఆహి పరిసయరు వర్గజినార్ ఇజి యేసునెస్తాండ్రె, వాండ్లు యూదయ ప్రాంతం డిస్తాండ్రె గలీలయ ముటదు మరి మహ్తా సాహాన్. 4 వాండ్లు సమరియ దేసెమదాజె సాండ్రెజ్ సరి మనాద్. 5 అందెజె వాండ్లు సమరియ దేసెమదు మన్ని సుకారు ఇన్ని పట్టుమదు వాతాన్. అయా పట్టుం, పూర్బమదు బత్తిజి మహి యాకోబు వన్ని మరిసి యెసెపుజ్ సిత్తి మన్ని బూమిడగు మన్నికాద్. 6 యాకోబు కారిస్తి నూతి బాన్ మహాద్. యేసు పయిణం కిజి వందితాండ్రె అయా నూతి డగు బస్తాన్. నస్తివలె, మదెనం.

7 అయావలె సమరియాతి బోదెలి ఉండ్రె ఏరు ఒతెజ్ బాన్ వాతాద్. యేసు దని వెట, “ఏహా కట్టినాద్. ఏరు బుకెండ్ సిదా”, ఇహాన్. 8 (వన్ని సిసూర్ టిండి కొండెజ్ పట్టుమదు సాహ మహార్) 9 అయా బోదెలి వన్నిజ్, “సిను యూద వాండ్లు. నాను సమరియ బోదెలి. అబాయా, సిను నజీ ఏరు లొస్సిదా”, ఇహాద్. (ఎందనిజ్ ఇహిజ, యూదురు సమరియతి వరి వెట కూడఃజి మన్వర్) 10 అందెజె యేసు, “సిను దేవుణు సీనిక నెన్ని మంజినక ఇహిజ, నిజీ ఏరు లొస్సికాన్ ఎయెన్ ఇజి నెన్నిమంజినకిహిజ, సిను వన్నిజ్ దేవుణు సీనిక వెన్బాతి మరి. వాండ్లు నిజీ ఎలాకాలం బత్తిస్పిస్సి ఏరు సితాన్ మరి”, ఇజి వెహ్. 11 అయా బోదెలి వన్నిజ్, “బాబు నూతి నిరిక మనాద్. ఏరు లాగ్దెజ్ నిజీ డొక్కు ఇన్నిక సిల్లెద్. మరి ఎలాగ సిను బత్తిస్పిస్సి ఏరు లాగ్గి? 12 మా అనిగొ యాకోబు యా నూతి మజీ సితాన్. వాండ్లు, వన్ని మరిసిర్, వన్ని కోడ్డిజ్, గొరెజ్ విజా యా నూతిది ఏరు ఉణిజి మహార్. సిను వన్నిజ్ మిస్తికిదా?”, ఇజి వెహ్.

13-14 అందెజె యేసు, “యా ఏరు ఉణి విజెరిజ్బా మరి ఏహ్కా కట్టాద్. గాని నాను సీని ఏరు ఉణివరిజ్ ఎసెజ్బా ఏహా కట్వెద్. నాను సీని ఏరు బూమిదాన్ సాసిని ఊట ఏరు లెకెండ్ వన్ని లొఇ వంజినె. అయాక వన్నిజ్ ఎలాకాలం దేవుణు వెట బత్తిని బత్తు సీజినాద్”, ఇజి వెహ్. 15 నస్తివలె అది, “బాబు యా ఏరు నజీ సిదా. అయావలె ఎసెజ్బా ఏహా కట్వెద్. ఇబ్బె వాజి ఏరు లాగ్గి ఒతెజ్ నజీ అవసరం సిల్లెద్”, ఇజి వెహ్. 16 యేసు దనిజ్, “సాన్ని నీ మాసిజ్ ఇబ్బె కూక్కి తగ్గె”, ఇజి వెహ్. 17 దన్నెజ్ అది, “నజీ మాసి సిలెన్”, ఇహాద్. అందెజె యేసు, “నజీ మాసి సిలెన్ ఇజి సిను వెహ్మాట నిజమనె. 18 నిజీ అయదుగురు మాసిర్ మహార్. ఏలు నీ వెట మంజినికాన్ నీ మాసి ఆవన్. సిను నిజమనె వెహ్”, ఇహాన్. 19 అయావలె అది వెహ్, “బాబు సిను ఒరెన్ ప్రవక్త ఇజి నాను నెన్నా. 20 మా సమరియది అనిగొగార్ యా గొరొత్నె దేవుణుదిజ్ పాగిడిజి మాడిస్తార్. గాని యూదురు ఆతి మీరు, దేవుణుదిజ్ పాగిడిజి మాడిస్తెజ్ మన్ని బాడ్డి యెరూసలెం ఇజి వెహ్నినిదెర్”.

21 అందెజె యేసు, “బీబి, యెరుసలెమ్దుబా, యా గొరొత్బా బుబ్బు ఆతి దేవుణుదిజ్ మీరు పాగిడిజి మాడిసెఇ ఉండ్రె కాలం వాజినాద్. సిను నా మాట నమ్మి. 22 ఎలాగ మర్తి వన్నిజ్ పాగిడిజి మాడిసెనెదెర్ ఇజి మిజి తెలివద్. గాని యూదురు ఆతి మజి తెలినాద్, ఎలాగ మర్తి వన్నిజ్ మాపు పాగిడిజి మాడిస్తాన్ ఇజి. ఎందనిజ్ ఇహిజ, యూదురు బాణిజె, లోకురిజ్ రక్సిన్నికాన్ వాజినాన్. 23 దేవుణు ఆత్మసత్తుదాన్ లోకుర్ బుబ్బెజ్, వరి మన్ను పూర్తి నిజం పాగిడిజి మాడిసిని ఉండ్రె కాలం వాజినాద్. అయాక ఏలునె మనాద్. ఆహె పాగిడిజి మాడిసిని వరిజె దేవుణుదిజ్ ఇష్టం. 24 దేవుణు, ఆత్మనె. అందెజె వన్నిజ్ పాగిడిజి మాడిస్సికార్ వన్ని ఆత్మ సత్తుదాన్, నిజం ఇక వన్నిజ్ పాగిడిజి మాడిస్తెజ్వలె”, ఇజి వెహ్.

25 అయా బోదెల్ వన్నిజ్, “క్రీస్తు ఇజి కూకె ఆని మిసియ వానాన్ ఇజి నాను నెన్నె. వాండ్లు వానివలె మజి విజా వన్కా వందిజ్ టెటాజ్ వెహ్”, ఇజి వెహ్. 26 అయావలె యేసు, “నీవెట వర్గజిని నాను వాండ్రె”, ఇజి వెహ్.

27 అయావలెనె వన్ని సిసూర్ మర్జి వాతార్. వాండ్లు అయా బోదెల్ వెట వర్గజినిక సుడఃతార నండొ బమ్మ ఆతార్. గాని నిజీ ఇన్నిక కావాలి ఇజి బా, సిను ఎందనిజ్ దన్నివెట వర్గజిని ఇజిబా ఎయెర్బా వెన్బావితార్. 28-29 అయా బోదెల్ దని కుండ డిస్తాదె పట్టుం సాహాద్. సాహాదె, బాన్ మహి లోకురిజ్, “నాను కితి విజా వన్కా వందిజ్ నజీ వెహ్ ఒరెన్ వన్నిజ్ మీరు వాజి సుడఃదు. వీండ్లు క్రీస్తు ఆపంద్రా?”, ఇజి వెహ్. 30 వారు పట్టుమదాన్ సాతార వన్నిడగు వాజి మహార్. 31-32 అయావలె వన్ని సిసూరు, “మెస్సరు ఇనికబా ఉణామె”, ఇజి వన్నిజ్ బతిమాలితార్. ‘మిజి తెలిఇ బోజనం నజీ ఉండెజ్ మనాద్”, ఇజి వాండ్లు వరిజ్ వెహ్. 33 “వన్నిజ్ బోజనం ఎయెన్బా తతాండ్రా?”, ఇజి ఒరెన్దిజ్ ఒరెన్ సిసూర్ వర్గతార్.

34 యేసు వరిజ్, “నజీ షాక్తాన్ నజీ వెహ్ పణి పూర్తి కినికాదె నా బోజనం లెకెండ్ మనాద్. 35 ‘నాల్లి నెల్లెజ్ మనాద్ పంబ కొయని కాలం’, ఇజి మీరు వెహ్నిదెర్గదె. నాను మిజి వెహ్, మీ కణుకు పెర్తి మడిజు సుడఃదు. ఆకెజ్ సాహతెనె పండితె మన్నె. 36 నా మాటెజ్ వెండ్రెజ్ తయార ఆతి మన్ని యా లోకురిజ్ సుడఃఅ. కొయిదెజ్ సాహతి మన్ని మడిజు లెకెండ్ మనాద్. వరిజ్ ఎలాకాలం దేవుణు వెట బత్తిని బత్తు దోహ్కాద్ ఇజి నా డగు తని వన్నిజ్ లాబం మనాద్. విత్తికాన్ కొయినికాన్ రివర్ కూడఃజి సర్ద ఆని లెకెండ్ వీండ్లు ని విని ముజాల లోకురిజ్ సువార్త వెహ్కార్ రివర్ కూడఃజి సర్ద ఆనార్. 37 ‘విత్తికాన్ ఒరెన్.

కొయినాన్ మరి ఒరెన్, ఇజి వెహ్నిక నిజమ్నె. 38 మహికార్ కష్టబడిజి పణి కితార్. మీరు కిఇతిదెర్. వారు కష్టపడిజి కితి పణిది లాబం లాగ్దెజ్ నాను మిజి ఫాక్సిన.

నండొ సమరియదికార్ యేసుజ్ నమిజినార్.

39 “నాను కితి విజా వన్యా వందిజ్ వాండ్రు నజి వెహ్నన్”, ఇజి అయా బోదెలి మాట వెహారె, అయా పట్నమ్ది నండొ సమరియదికార్ యేసుజ్ నమ్మితార్.

40 అందెజె సమరియదికార్ వన్ని డగ్రు వాతారె, “మా డగ్రు మన్అ ఇజి వన్నిజ్ బతిమాళితార్. అందెజె వాండ్రు అబె రుండి రోస్సు మహాన్. 41 వన్ని మాట వెహారె, మరి నండొండార్ వన్నిజ్ నమ్మితార్.

42 వారు అయా బోదెల్దిజ్, “సీను వెహ్ని దనిదాన్ ఆవద్ మాపు యేలు నమిజినిక. గాని విని మాటెజ్ మాపు వెహాప్. నిజమె, వీండ్రె లోకురిజ్ పాపమ్కాజ్ రక్సిస్సికాన్ ఇజి మాపు నెసిహాప్. అందెజె మాపు వినిజ్ నమ్మిజినాప్”, ఇహార్.

యేసు అతికారి మరిసిజ్ నెగెణ్ కిజినాన్

43 రుండి రోస్సు బాన్ మహి వెన్యా, యేసు సమరియదాన్ గలీలయ ప్రాంతమ్దు సాహాన్. 44 (యేసునె వెహ్న మహాన్, “ఒరెన్ ప్రవక్తెజ్ వన్నిసాంత ప్రాంతమ్దు ఎయెర్బా గవరం సివర్”, ఇజి) 45 వాండ్రు గలీలయదు వాతివలె, గలీలయదికార్ వన్నిజ్ డగ్రు కితార్. ఎందనిజ్ ఇహిజ, వారుబా వస్య వండొయిదిజ్ యెరూసలెమ్దు సాహ మహారె, వాండ్రు అబ్బె కితి విజా పణిజ్ సుడెత మహార్.

46 వాండ్రు గలీలయది కానా ఇన్ని పట్నమ్దు మరి వాతాన్. బానె వాండ్రు ఏరుదిజ్ ద్రాక్స కడు కితాన్. అబ్బె ఒరెన్ గవర్మెంటు అతికారి మహాన్. వన్ని మరిసి కపర్నహముదు కష్టం అర్త మహాన్. 47 యేసు యుదయదాన్ గలీలయదు వాతాన్ ఇజి వెహివెలె వాండ్రు యేసు డగ్రు వాతాన్. వాతండ్రె, “నా మరిన్ సాదెజ్ డగ్రు ఆత మనాన్. అందెజె సీను వాజి వన్నిజ్ నెగెణ్ కిల”, ఇజి వన్నిజ్ బతిమాల్తాన్. 48 యేసువన్నిజ్, “నండొ బమ్మాని గుర్తుజ్ సుడెతిజనె మీరు నమినిదెర్”, ఇజి వెహ్నాన్. 49 అయా అతికారి, “బాబు, నా మరిన్ సాని ముజాల రల”, ఇజి వెహ్నాన్. 50 దన్నిజ్ యేసు వన్నిజ్, “సాన్అ. సీ మరిన్ బత్కినాన్”, ఇజి వెహ్నాన్. వాండ్రు యేసు వెహ్నిమాట నమితాండ్రె సాహాన్. 51 వాండ్రు సాన్ని మహివలె వన్ని ఇండ్రెణి పణి మణిసీర్ వన్ని ఎర్దు వాతారె, “సీ మరిన్ బత్కిత మనాన్”, ఇహార్. 52 ఎసాడు గంటెజ్ వన్నిమరిసి నెగెణ్ ఆతాన్ ఇజి వరిజ్ వెన్బాతిజ్ వారు, “ఇవన్ ఒంటి గంటదిజ్ నోబు డిస్టాద్”, ఇజి వెహ్నార్. 53 సీ మరిన్ బత్కినాన్ ఇజి యేసు వెహ్ని ఆ బయిమ్దునె, వన్నిమరిన్ నెగెణ్ ఆతాన్ ఇజి బుబ్బు నెస్తాన్. అందెజె వాండ్రు వన్ని కుటుమ్దికార్ యేసుజ్ నమ్మితార్. 54 యాకదె యేసు యుదయదాన్ గలీలయదు వాతి వెనుక కిత్తి మరి ఉండ్రె బమ్మాతి పణి.

5 వెన్యా యూదుర్జ పండొయ్ ఉండ్రె వాతాద్. అందెజె యేసు యెరూసలెమ్దు సాహాన్. 2 యెరూసలెం సుటులం తోహ్కె క్కోటదు గొరెజ్ సాని గోర్జె ఉండ్రె మనాద్. దన్నిడగ్రు ఉండ్రె సెరు మనాద్. దన్ని పేరు ఎబ్బె బాసదు బెదెన్ ఇజి. దన్నిజ్ అయ్దు అరుజుజ్ సురులం మన్నె. 34 అయా అరుజుజు మందెజ్ మందెజ్ కష్టమ్కాణికార్ గూర్త మహార్. గుడ్డిదికార్, సాటాదికార్, కిక్కుకాల్కూ అర్దికార్ బాన్ మహార్. ఎస్తివలెనొ ఉండ్రె సుటు దేవుణు దూత ఒరెన్ అయా సెర్దుడు డిగెజి ఏరుదిజ్ కద్దిసిసాన్. అయావలె ఎయెన్ ముజాల ఏరుదు డిగెనాండ్రె, వాండ్రు ఎలాగ మర్రి జబ్బు ఆతికాన్ ఆతిజ్బా నెగెణ్ ఆనాన్. యా కష్టమ్కాణికార్ ఏరు కద్దిని దన్నిజ్ ఎర్దుసుడెజి మహార్.

5 వరి లోఇ ఒరెన్ మహాన్. వాండ్రు ముప్పయెనిమిది పంటెజాణిజ్ కష్టమ్దాన్ మహాన్. 6 యేసు వన్నిజ్ సుడెతాన్. వాండ్రు నండొ పంటెజాణిజ్ కష్టమ్దాన్ మనాన్ ఇజి నెసాండ్రె, వన్నిజ్, “సీను నెగెణ్ ఆదెజ్ కోరిజినిదా?”, ఇజి వెన్బాతాన్.

7 వెన్బాతిజ్ అయా కష్టమ్దికాన్, “బాబు, ఏరు కద్దిసినివలె నజి సెరుదు డిస్టెజ్, ఎయెన్బా నజి సిల్లెన్. నాను డిగెన్ ఇనిజ్, నజి ఇంక ముజాలా మరి ఒరెన్ డిగెజినాన్”, ఇజి వెహ్నాన్.

8 యేసు వన్నిజ్, “సీను నిజ్జి సీ సాప అసి నడిల”, ఇజి వెహ్నాన్. 9 వెలనె వాండ్రు నెగెణ్ ఆతండ్రె వన్ని సాప నిక్రాండ్రె నడితాన్. యాక విస్తాంతి దినమ్దు జర్గితాద్. 10 అందెజె యూదురు నెగెణ్ఆతి వన్నిజ్, “నేండ్రు విస్తాంతి దినం గదె. సీను సాపెజ్ నిక్కి ఒతెజ్ ఆవద్. ఎందనిజ్ ఇహిజ, మోసె సీతి రూలుజ్దు వెహ్నినాద్, ఇన్ని పణిబా విస్తాంతి దినమ్దు కిదెజ్ ఆవద్ ఇజి”, ఇజి వెహ్నార్. 11 దన్నిజ్ వాండ్రు, “నజి నెగెణ్ కితికాన్, ‘సీ సాప నిక్కి నిడిల’, ఇజి నజి వెహ్నాన్”, ఇహాన్. 12 అందెజె వారు, “సీ సాపెజ్ నిక్కి నడిల ఇజి నిజి వెహ్నికాన్ ఎయెన్?”, ఇజి వెన్బాతార్. 13 నెగెణ్ కిత్తికాన్ ఎయెన్ ఇజి వన్నిజ్ తెలివితాద్. ఎందనిజ్ ఇహిజ, అబ్బె మందలోకుర్ కూడిత మహార్. యేసు వరి లోఇహాన్ తప్ప ఆతండ్రె సాహాన్. 14 వెనుక యేసు వన్నిజ్ దేవుణు గుడిడు సుడెతాన్. సుడెతండ్రె వన్నిజ్, “సుడెల, సీను ఏలు నెగెణ్ ఆతి. ఏలుదాన్ పాపమ్కు కిమ. సీలిజ నిజి మరి బాదెజ్ లావు వానె”, ఇహాన్. 15 వాండ్రు సాహాండ్రె వన్నిజ్ నెగెణ్ కితికాన్ యేసు ఇజి యూదుర్జ వెహ్నాన్.

16 అందెజె యా పణిజ్ యేసు విస్తాంతిదినమ్దు కితిజ్ యూదురు వన్నిజ్ నండొ మాలెజ్ కిత్తార్. 17 గాని యేసు వరిజ్, “నా బుబ్బు ఎస్తివలెబా నెగ్గి పణిజ్ మహి వరి వందిజ్ కిజినె మంజినాన్. నానుబా కిజిన”, ఇజి వెహ్నాన్. 18 యా లెకండె యేసు వెహ్నిజ్, యూదురు వన్నిజ్ సప్తెజ్ మరి నండొ సుడెతార్. ఎందనిజ్ ఇహిజ, వాండ్రు విస్తాంతిదినమ్ది రూలుజ్ తప్పికాదె ఆవండ్రె, దేవుణు వన్ని సాంత బుబ్బు ఇజిబా వెహ్నినాన్. అయాలెకండె, వాండ్రు దేవుణు వెట సమానం ఆతికాన్ ఇజి వెహ్ ఆజినాన్. అందెజె యేసుజ్ సప్తెజ్ మరి నండొ సుడెతార్.

19 యేసు వరిజ్ ఈహు మర్జి వెహ్నాన్. “నాను మిజి నిజం వెహ్నిన, మరిసి ఆతి నాను ఇనికబా నా సాంత సత్తుదాన్ కిదెజ్ అల్వెన్. నా బుబ్బు ఇన్ని ఇనికెజ్ కిజినిక సుడెజినాన్, అయాలెకెజ్ నాను బా కిజిన. బుబ్బు కిజినికెజ్ మరిసి బా కిజినాన్. 20 ఎందనిజ్ ఇహిజ, అపాసి మరిసిజ్ ప్రీమిసాన్. వాండ్రు కిజినికెజ్ విజా మరిసిజ్ తోరిసాన్. వాండ్రు వన్నిజ్ దినిజ్ మిస్తి మరి నండొ పెరి పణిజ్ తోరిసాన్. అయాలెకెజ్ సుడెజి మీరు విజెరె నండొ బమ్మ ఆనిదెర్. 21 అప్పాసి ఎలాగ సాతివరిజ్ నిక్కి, వరిజ్ బత్కిసిసాండ్రె అయ లెకండె, మరిసిబా బత్కిసిసాన్. వన్నిజ్ ఇష్టం మన్ని వరిజ్ బత్కిసాన్. 22-23 అప్పాసి ఎయెరిజ్బా, వారు తీర్పు కివెన్.

గాని విజెరిజ్ తీర్పు కిదెజ్ మరిసిజ్ అతికారం విజా ఒవజెవ్వు మనాన్. అపానిజ్ గవరం సీనిలెకండ్ విజెరె మరిసిజ్ గవరం సీదెజ్నె యా అతికారం ఒవజెవ్వు మనాన్. మరిసిజ్ గవరం సిఇకాన్ ఎయెన్బా, వన్నిజ్ ఫాక్తి అపానిజ్ గవరం సిఏన్.

24 నాను మిజి నిజం వెప్పిన, నా మాట వెంజి, నజి ఫాక్తి వన్నిజ్ నమ్మిజినివన్నిజ్ ఎలాకాలం దేవుణు వెట బత్కిని బత్కు మనాద్. వన్నిజ్ నాను తీర్పుసి. వన్నిజ్ ఎలాకాలం మన్ని సిక్చ సిల్లెద్. గాని వాండ్రు ఎలాకాలం దేవుణు వెట బత్కినాన్. 25 సాతి లెకండ్ మనికార్ దేవుణు మరిసి ఆతి నాను వెప్పి మాటెజ్ వెని కాలం వాజినాద్. అయాక ఏలునె వాత మనాద్. నా మాటెజ్ వెంజి, అయ లెకండ్ కినికార్ బత్కినార్, ఇజి నాను మిజి నిజమ్నె వెప్పిన. 26 ఎందానిజ్ ఇహిజ, నా బుబ్బ బాణిజె బత్కు వానాద్. వాండ్రు విజెరె బత్కిసిని లెకండ్, నాను లోకురిజ్ బత్కిస్సెజ్ నజి అతికారం సిత మనాన్. 27 మరి లోకురిజ్ తీర్పు సీదెజ్ వాండ్రు నజి అతికారం సిత మనాన్. ఎందనిజ్ ఇహిజ, నాను లోకు మరిసి.

28 దిన్నివందిజ్ బమ్మ ఆమాల్. ఎందానిజ్ ఇహిజ, దూకిదు మనికార్ విజెరె నా మాటెజ్ వెని కాలం ఉండ్రి వాజినాద్. 29 వారు దూకిదాన్ వెల్లి వానార్. నెగ్గి పణిజ్ కితికార్ నిజ్జి మరి ఎల్లకాలం దేవుణు వెట బత్కినార్. సెఇ పణిజ్ కితికార్ నిజ్జి సిక్చ ఫాందినార్. 30 నా సాంత సత్తుదాన్ ఇనికబా కిదెజ్ నాను అట్వ. దేవుణు వెప్పి వజనె నాను తీర్పు సీజిన. అందెజె నాను తీర్పు సీజి సిక్చ సీనిక నాయం ఆత్తిక. ఎందానిజ్ ఇహిజ, నాను నజి ఇష్టం ఆతి వజ కి, నజి ఫాక్తి వన్నిజ్ ఇష్టం ఆతివజనె కిజిన.

31 నా వందిజ్ నానె వెప్పిజ, నాను వెప్పినె వన్కాజ్ పేరు సిల్లెద్. 32 గాని నా వందిజ్ మరి ఒరెన్ సాక్చి వెప్పినాన్. వాండ్రు నా బుబ్బ. వాండ్రు నా వందిజ్ వెప్పిని సాక్చి నిజం ఇజి నాను నెనిన.

33 మీరు యోహాను డగ్రు సెగొండారిజ్ ఫాక్తిదెర్. వాండ్రు నా వందిజ్ నిజమాతి సాక్చి వెప్తాన్ 34 లోకుర్ నా వందిజ్ వెప్పిని సాక్చి నజి అవుసరం సిల్లెద్. గాని మీరు యోహాను వెప్పి మాటెజ్ నమిజి దేవుణు మిజి రక్తిస్సెజ్, నాను వాండ్రు వెప్పి దని వందిజ్ వెప్పిన. 35 ఉండ్రి దివ కని జాయ్ సీజినిలెకండ్ యోహాను నిజమాతికెజ్ నెన్పిస్తాన్. సెగం కాలం వన్ని మాటెజ్ వెంజి మీరు సరెద్ ఆతిదెర్. 36 నాను కిజిని పణిజ్ యోహాను వెప్పి సాక్చి ఇంక గొప్ప పేరి సాక్చినె. ఎందనిజ్ ఇహిజ, నాను పూర్తి కిదెజ్ బుబ్బ నజి ఒవజెవ్వుకెజె నాను కిజిని పణిజ్. అయా పణిజ్ బుబ్బ నజి ఫాక్తి మనాన్ ఇజి రుజువ్ కిజినె. 37-38 మరి, నజి ఫాక్తి బుబ్బనె నా వందిజ్ నిజమాతికెజ్ వెప్పినాన్. మీరు వన్నిజ్ ఎసెజ్బా వెన్ఇతిదెర్. వన్ని రూపు ఎసెజ్బా తొఇతిదెర్. వన్ని మాటెజ్ మీ మన్నుదు ఇడెఇతిదెర్. ఎందనిజ్ ఇహిజ, వాండ్రు ఫాక్తి నజి మీరు నమిఇదెర్. 39-40 మీరు దేవుణు మాట బాగ సద్విజినిదెర్. ఎందనిజ్ ఇహిజ, అయాక మిజి ఎలాకాలం దేవుణు వెట బత్కిని బత్కు సీనాద్ ఇజి ఒడెబిజినిదెర్. అయా మాటెజ్ నా వందిజె వెప్పినె. గాని దేవుణు వెట ఎలాకాలం బత్కిని బత్కు వందిజ్ నా డగ్రు రెఇదెర్. 41 లోకుర్ ఫాగ్డిజినికెజ్ నాను కోరివి. 42 గాని మీరు ఎలాగ మర్చికిదెర్ ఇజి నాను నెన్న. మీరు దేవుణుదిజ్ నిజం ప్రీమిన్ఇకిదెర్ ఇజి నాను నెన్న. 43 నా బుబ్బ సిత్తి అతికారమ్దాన్ నాను వాత మన్న. గాని మీరు నజి డగ్రు కిఇదెర్. మరి ఒరెన్, వన్ని సాంత అతికారమ్దాన్ వాతిజ, మీరు వన్నిజ్ డగ్రు కినిదెర్. 44 లోకుర్ ఫాగ్డిదెజ్ ఇజి మీరు కోరిజినిదెర్. ఒరెండ్రె దేవుణు అతికాన్ మిజి ఫాగ్డిదెజ్ మీరు కోర్ఇదెర్. మరి మీరు ఎలాగ నజి నమ్మినిదెర్? 45 నాను బుబ్బ డగ్రు నేరం మోప్పాన్ ఇజి మీరు ఒడెబిమాల్. మీరు ఆస దాన్ ఎద్రు సుడెతి మోసెనె మీ మున్ను నేరం మోప్పాన్. 46 మీరు మోసెజ్ నమ్మినికిదెర్, నజిబా నమ్మితార్ మరి. ఎందానిజ్ ఇహిజ, మోసె నా వందిజ్ రాస్త మనాన్. 47 మీరు వాండ్రు రాస్త మనికెజ్ నమ్మిఇదెర్. మరి ఎలాగ నాను వెప్పినికె నమ్మినిదెర్?".

యేసు అయ్దు వేయు మొగ్గకొడెరిజ్ బోజనం సీజినాన్

6 దన్నివెనుక యేసు గలీలయ సమ్దరం డాట్టి అతాహ ఒడ్డుద్ సాహాన్. తిబెరియ సమ్దరం ఇజిబా ఇనార్. 2 కస్టమ్దాన్ మహి వరిజ్ వాండ్రు నెగెణ్ కితి బమ్మ ఆతి పణిజ లోకుర్ సుడెతార్. అందెజె మంద లోకుర్ వన్ని వెట వాతార్. 3 యేసు అబెణి గొరోణ్ సెల్కాదు ఎక్తాండ్రె వన్ని సిసూర్ వెట బస్త మహాన్. 4 నస్తవలె యూదురు కిని వన్క. ఇని వండాయ్ డగ్రు ఆత మహాద్. 5 యేసు కణక పెప్పి బేస్సిజ్, మంద లోకుర్ వన్ని డగ్రు వాజినిక సుడెతాన్. "మీరు ఉండెజ్ బోజనం ఎలాగ కొండెజ్ ఆనావ్?", ఇజి పిలిపుజ్ వెన్బాతాన్. 6 ఇనిక కిదెజ్ ఇజి యేసు నెన్నాన్ గాని పిలిపుజ్ వన్నిమున్ను నమకం మనాదా ఇజి సుడెదెజె వాండ్రు అయా లెకండ్ వెన్బాతాన్. 7 అందెజె పిలిపు, "వరి లొఇ ఒరెన్ ఒరెన్ కండెక్ కండెక్ ఉండెజ్బా రుండి వందెజ్ వెండి రుపాయుజాణి బోజనం కొటిజ్బా సాల్వద్", ఇజి వన్నిజ్ వెప్తాన్. 8 అయావలె వన్ని సిసూర్ లొఇ ఒరెన్ ఆతి ఆంద్రెయ ఇనికాన్ యేసుజ్ వెప్తాన్. వీండ్రు సిమోన్ పేతురుజ్ తంబెర్చి. 9 వాండ్రు ఇన్నిక వెప్తాన్ ఇహిజ, 'ఇబ్బె ఒరెన్ ఇజ్జి కొడెః మనాన్. వన్నిబాన్ అయ్దు యావల రొట్టెజ్, రుండి మొయెజ్ మనె. గాని నిసా మందదిజ్ యాకెజ్ సాల్ఉ", ఇజి వెప్తాన్. 10 అయావలె యేసు, "యా లోకాజ్ బసె కిదు", ఇజి వెప్తాన్. అయా బాడిమం నండొ గడ్డి మనాద్. అందెజె మొగ్గకొడెరి బస్తార్. వారి డగ్రు అయ్దు వెయుజ్ మహార్. 11 యేసు అయా రొట్టెజ్ అస్తాండ్రె, దేవుణుదిజ్ వందనమ్కం వెప్తాండ్రె, బస్తి వరిజ్ సీబాజి సితాన్. అయాలెకండ్ మొయెజ్బా. వరిజ్ కావాలస్తి నసా సీబాత సితాన్. 12 వారు ఫాటవంజా తిహి వెనుక, "ఇన్నిక పాడు ఆవండ, మిగిలితికెజ్ కొటు కిదు", ఇజి సిసూర్జ వెప్తాన్. 13 అందెజె మిగిలితికెజ్ సిసూర్ కెప్తార్. లోకుర్ తిహి వెన్నా మన్ని అయ్దు యావల రొట్టెజాణి ముకెజ్ కొటు కితార్, వన్నెండు గప్పిజ్ నిప్తార్. 14 యేసు కిత్తి యా బమ్మాతి పణి సుడెతార్, "నిజమె, లోకమ్దు వాని ప్రవక్త వీండ్రె", ఇజి వెప్తార్. 15 యా లోకుర్ వాజి, కెఇ కెఇ నజి రాజా కినార్ ఇజి యేసు నెస్తాన్. అందెజె వాండ్రు బాణిజ్ డిస్తాండ్రె ఒరెండ్రె మరి గొరోణ్ సాహాన్.

యేసు సమ్దరం మున్ను నడిజినాన్

16-17 పాద్దు ఆతివెలె, వన్నిసిసూర్ డిజితార్, సమ్దరం ఒడ్డుదు వాతార్. అబ్బె వారు ఉండ్రి డోణిదు ఎక్తార్, సమ్దరం డాట్టి, కపర్నహొముదు సాండ్రెజ్ ఇజి సాతార్. అయావలె సీకాట్ ఆతాద్. యేసు వరి డగ్రు ఇంక రవండ మహాన్. 18 నస్తవలె పేరి గాలి ఉండ్రి వాతాద్. సందారమ్దు లావు ఉల్కెజ్ నిజెతె. 19 వారు రమారవి మూండ్రి నాల్గి మయలు నడిపిస్తాన్. అయావలె యేసు సందారం ఏరు మున్ను నడిజి డోణి డగ్రు వాజినిక సుడెతార్. అయాక సుడెతార్, వారు నండొ తియెల్ ఆతార్.

20 గాని వాండ్లు, "నానె, తియెల్ ఆమాట్", ఇజి వరిజ్ వెప్తాన్. 21 అందెజె వారు వన్నిజ్ డోణిదు ఎకిస్తెజ్ ఇష్టం ఆతార్ గాని వెటనె వారు సాండ్రెజ్ సరి సాతి మన్ని గలుదు అందితార్. 22 సిసూరు డోణి ఎక్కి సాని ముజాల నిహి మహి నమ్దరం ఒడ్డుదు మంద లోకుర్ మహార్. మహ్నా నాండిజ్ వారు నెస్తార్, అబ్బె ఉండ్రె డోణెనె మహాద్. యేసు వన్ని సిసూర్ వెట అయా డోణి ఎక్కి సాన్వతాన్. సిసూర్నె ఎక్త సాహార్ ఇజి. 23 నస్తవలె, తిబెరియదాన్ మరి డోణిజ్ వాతె. యేసు రొట్టెజ వందిజ్ దేవుణుదిజ్ వందనమ్కు వెప్తాన్. వెప్తి వెన్కా, లోకుర్ అయాక తిహార్. వారు రొటెజ్ తిహి బాడ్డిః డగ్రు అయా డోణిజ్ వాతె. 24 యేసుని వన్ని సిసూర్ బాన్ సిల్లెర్ ఇజి మంద నెస్తార్. ఆహా నెస్తవలె, వారు డోణిజ్ ఎక్తారె, వన్నిజ్ రెబాజి కపర్నహొముదు సాహార్. 25 వారు యేసుజ్ అతాహ ఒడ్డుదు సుడఃతార, "బోడకినికిదా, సీను ఎన్కాండె ఇబ్బె వాతి?", ఇజి వన్నిజ్ వెన్బతార. 26 దన్నిజ్ యేసు వెప్తాన్, "నాను మీ వెట నిజం వెహ్సిన, మీరు పాట పంజా రొటెజ్ తిహిదెర్. అందెజె మీరు నజీ రెబానిదెర్. గాని నాను కితి బమ్మ ఆతి పణి అర్దం నెస్సి వందిజ్ అఎద్ రెబాజినిక. 27 వాడాఃజి సాని టిండి వందిజ్ కష్టబడఃమాట్. గాని ఎలాకాలం దేవుణు వెట బత్కిని బత్కు సీని నిజమాతి టిండి వందిజ్ కష్టబడఃదు. లోకు మరిసి అయా టిండి మిజి సీనాన్. ఎందనిజ్ ఇహిజ అయా టిండి సీదెజ్ వన్నిజ్ బుబ్బు ఆతి దేవుణు అతికారం సిత మనాన్. 28 వారు వన్నిజ్, "మాపు దేవుణు పణికిదెజ్ ఇహిజ, ఇన్నిక కిదెజ్వెలె?", ఇజి వెన్బతార. 29 యేసు వరిజ్, "దేవుణు పాక్తి వన్నిముస్సు నమకం ఇడఃజి మంజినికాదె దేవుణు సేవ పణి", ఇజి వెప్తాన్. 30 అందెజె వారు, "అహిజ, సీను ఇని బమ్మాని పణికినిలె? అయాక సుడఃజి నీ ముస్సు నమకం ఇడఃజి సీను ఇనిక కినిలె? 31 మోసె వెట మహి మా అనిగొగొర్ బీడిమ్బూమిద్ మన్న ఇని బోజనం ఉటార్. దేవుణు మాటదు రాస్త మనాద్, 'వారు ఉండెజ్ దేవుణు మంజిని బాడ్డిదాన్ వాండ్లు బోజనం సితాన్ ఇజి'", ఇజి వెప్తాన్. 32 అందెజె యేసు వరిజ్ వెప్తాన్, "నాను మిజి నిజం వెహ్సిన, దేవుణు మంజిని బాడ్డిదాన్ బోజనం మిజి సితాన్ మోసె అఎన్, గాని నా బుబ్బునె సితాన్. వాండ్రె మిజి దేవుణు మంజిని బాడ్డిదాన్ నిజమాతి బోజనం సీజినికాన్. 33 దేవుణు సీజిని బోజనం ఇన్నిక ఇహిజ, వాండ్లు మంజిని బాడిదాన్ డిఃగితి వాతి, యా లోకమ్ది లోకురిజ్ ఎలాకాలం దేవుణు వెట బత్కిని బత్కు సీజినికాన్". 34 అహిజ, ప్రబువా, యా బోజనం ఎలాకాలం మజి సీజి మన్అ", ఇజి వారు వన్నిజ్ వెప్తార్.

35 అందెజె యేసు వరిజ్ ఈహు వెప్తాన్, "ఎలాకాలం దేవుణు వెట బత్కినిదెజ్ లోకురిజ్ బత్కిన్పిస్సి టిండి నానె. నా డగ్రు వాజినికాన్ ఎసెజ్బా బజ సాఎన్, నజీ నమ్మినికాన్ ఎసెజ్బా ఏహ్కా సాఎన్. 36 నాను మిజి వెప్తి లెకండె, మీరు నజీ సుడఃతి మనిదెర్, గాని నజీ నమిఇదెర్. 37 బుబ్బు నజీ ఒపజెప్తి లోకుర్ విజెరె నా డగ్రు వానార్. నా డగ్రు వాని ఎయెరిజ్బా నాను వెల్లె నెక్కి ఫాక్మ్. 38 ఎందానిజ్ ఇహిజ, నాను నజీ ఇష్టం వాతి లెకండె కిదెజ్ అఎద్, దేవుణు మంజిని బాడ్డిదాన్ డిఃగితి వాతిక. గాని నజీ పాక్తి వన్నిజ్ ఇష్టం వాతి లెకండె కిదెజె డిగిత వాత. 39 నజీ పాక్తి దేవుణు, నా బాణిజ్ ఇన్నిక కోరిజినాన్ ఇహిజ, వాండ్లు నజీ ఒపజెప్తి వరి లోఇ ఎయెరిజ్బా నాను డిఃస్టెజ్ అఎద్. గాని వరిజ్ నాను మరి వాని కడఃవెరి దినమ్దు ఎలాకాలం బత్కినిజె. యాకదె వాండ్లు నా బాణిజ్ కోరిజినాన్. 40 నా బుబ్బు కోరిజినిక ఇన్నిక ఇహిజ, నాను దేవుణు మరిసి ఇజి నెసి నజీ నమ్మిని ఎయెరిజ్బా ఎలాకాలం దేవుణు వెట బత్కిని బత్కు మండ్రెజ్ ఇజి. మరి నాను మర్జి వానివలె నాను వరిజ్ సావుదాన్ బత్కినిజె ఇజి. యాకదె నా బుబ్బు నా బాణిజ్ కోరిజినాన్. 41 యూదురు యేసువందిజ్ మొరొ ఆతార్. దేవుణు మంజిని బాడ్డిదాన్ డిఃగితి వాతి టిండి నానె, ఇజి వాండ్లు వెప్తాన్. దిని వందిజ్ వారు మొరొ ఆతార్. 42 వారు, "పిండ్లు యోసేపు మరిసి ఆతి యేసు గదె? విని అయిసి అప్పానిరిజ్ మాటు నెస్సాట్గదె? మరి 'నాను దేవుణు మంజిని బాడ్డిదాన్ డిఃగిత వాత', ఇజి పిండ్లు ఎలాగ వెహ్సినాన్", ఇజి వర్గిజినార్.

43 అందెజె యేసు, "మీ లోఇ మీరు మొరొ ఆమాట్. 44 నజీ పాక్తి బుబ్బు ఎయెరిజ్బా నా డగ్రు నడిపిన్ఎండ మహిజ, వారు నా డగ్రు వాదెజ్ అట్ఎర్. నాను వన్నిజ్ కడఃవెరి దినమ్దు నాను వానివలె సావుదాన్ బత్కినిజె. 45 ప్రవక్తరు దేవుణు మాటదు ముజాలె రాస్త మనాద్, 'దేవుణునె లోకురిజ్ విజెరిజ్ నెన్పిస్సాన్', ఇజి. బుబ్బు వెప్తి మాట వెంజి, అయాకెజ్ వన్ని బాణిజ్ నెస్తికార్ నాడగ్రు వానార్. 46 దేవుణు బాణిజ్ వాతికానె అఎండ మరి ఎయెన్బా బుబ్బెజ్ తొపిన్. వాండ్లు ఒరెండ్రె బుబ్బెజ్ సుడఃత మనాన్. 47 నాను మీ వెట నిజమ్నె వెహ్సిన, నా ముస్సు నమకం ఇడ్చివన్నిజ్ ఎలాకాలం దేవుణు వెట బత్కిని బత్కు మనాద్. 48 ఎలాకాలం దేవుణు వెట బత్కినిదెజ్ లోకురిజ్ బత్కిన్పిస్సి టిండి నానె. 49 మీ అనిరు బీడిమ్బూమిదు మన్న ఇన్ని బోజనం ఉటార్. గాని వారు సాతార్. 50 గాని యా టిండి ఎయెర్ ఉటిజ్బా వారు సాఎర్. సాఇ నని టిండినె దేవుణు మంజిని బాడ్డిదాన్ డిఃగితి వాతిక. 51 నానె దేవుణు మంజిని బాడ్డిదాన్ డిఃగితి వాతి ఎలాకాలం దేవుణు వెట బత్కిని బత్కు సీని టిండి. ఎయెన్బా యా టిండి తిహిజ, వాండ్లు ఎలాకాలం బత్కినాన్. నా సాంత ఒడఃలెన్ నాను సీని టిండి. యా లోకమ్దికారె ఎలాకాలం బత్కినిదెజ్ నాను అయక సీజిన". 52 యేసు వెప్తికె వెహరె, అయావలె యూదురు వారె వరి లోఇ ఉండ్రె గొడఃబ రేజిజాద్. "విని ఒడఃల్ ఎలాగ మాటు తిండ్రెజ్ మజి సీనాన్", ఇజి వర్గితార్. 53 అందెజె యేసు వరిజ్ వెప్తాన్, "నిజమె నాను మీ వెట వెహ్సిన, లోకుమరిసి ఆతి నా ఒడఃల్ మీరు తిన్ఎండ మహిజ, నా నల మీరు ఉణెఎండ మహిజ, మీరు ఎలాకాలం బత్కినిజె. 54 నా ఒడఃల్ తిని ఎయెరిజ్బా, నా నల ఉణి ఎయెరిజ్బా ఎలాకాలం దేవుణు వెట బత్కిని బత్కు మనాద్. నాను వన్నిజ్ కడఃవెరి దినమ్దు నాను వానివలె సావుదాన్ ఎలాకాలం బత్కినిజె. 55 ఎందానిజ్ ఇహిజ, నా ఒడఃల్, నా నల యాకెజె తిండ్రెజ్ ఉండెజ్ మనికెజ్. యాకెజె నిజమాతి టిండి. 56 నా ఒడఃల్ తినికాన్, నా నల ఉణికాన్, నా వెట కూడఃజి మంజినాన్. నాను వన్ని వెట కూడఃజి మంజిన. 57 లోకుర్ విజెరిజ్ బత్కినిదెజ్ పాణం సీజిని బుబ్బు నజీ పాక్త మనాన్. వాండ్లు నజీ బత్కు సీజినాన్. అయాలెకండె ఎయెన్బా నా ఒడఃల్ తిహిజ, నాను వన్నిజ్ ఎలాకాలం దేవుణు వెట బత్కిని బత్కు సీని. 58 నానె దేవుణు మంజిని బాడ్డిదాన్ డిఃగితి వాతి టిండి. మీ అనిరిజ్ ఉటి మన్న ఇన్ని బోజనంలెకండె అఎద్ యాక. వారు ఉటారె సాతార్. గాని యా టిండి తినికాన్ ఎయెన్బా ఎలాకాలం బత్కినాన్. 59 కపెర్నహుముదు మన్ని యూదురి మీటిజ్ ఇండ్రె నేరెపిని మహివలె వాండ్లు యా మాటెజ్ వెప్తాన్.

60 వన్ని సిసూర్ నండొండార్ యా మాటెజ్ వెహరె, "యా మాటెజ్ గొప్ప కష్టం ఆతికెజ్. ఎయెన్దనిజ్ అర్దం కినాన్?", ఇజి వర్గితార్. 61 వన్ని మాటెజ్ వందిజ్ వన్ని సిసూర్ మొరొ ఆజినార్ ఇజి యేసు నెస్తాండ్రె వరిజ్, "యా మాటెజ్ మిజి బాద కిజినెనా?", ఇజి వెన్బతాన్. 62 "అహిజ, లోకు మరిసి ఆతి నాను, ముజాలె నాను మహి బాడిఃదు ఎక్కి సానికె మీరు సూణివలె, మీరు ఇన్నిక ఒడఃబినిదెరె?" 63 దేవుణు ఆత్మనె, ఎలాకాలం దేవుణు వెట బత్కిని బత్కు సీజినాన్. లోకుర్ అయాక సీదెజ్ అట్ఎర్. నాను మిజి వెహ్సినె మాటెజ్వెట, దేవుణు ఆత్మ మీ ముస్సు వాజినాన్. దేవుణు ఆత్మ మిజి బత్కు సీజినాన్", ఇజి వెప్తాన్. 64 "గాని మీ లోఇ సెగొండార్ నాను వెహ్సినె మాటెజ్ నమ్మిఇకారె మనార్". సిసూర్ లోఇ ఎయెన్ వాండ్లు వెహ్సినె మాటెజ్ నమ్మిఎర్, ఎయెన్ వన్నిజ్ ఒపజెప్తాన్ ఇజి యేసు మొదొహనె నెస్త మహాన్. అందెజె వాండ్లు ఆహి వెప్తాన్. 65 యేసు మరి వెహ్సినాన్, "మీ లోఇ సెగొండార్ నమ్మిఇదెర్. అందెజె నాను మీ వెట వెహ్ మన్న, బుబ్బు

సరి సిఎండ మహిజ, ఎయెన్బా నా డగ్రు వాడెజ్ అట్వన్, ఇజి. 66 దిన్ని వెనుక, వన్ని సిసూర్ లొఇ నండొండార్ వన్నిజ్ డిస్తారె వన్నివెట మరి సాన్ఎతార్. 67 నస్తివలె యేసు వన్నెండు మణిసి సిసూరిజ్, “మీరు బా నజి డిసి సాండ్రెజ్ కోరిజినెదెరా?”, ఇజి వెన్బాతాన్. 68 అందెజె సిమోన్ పేతురు, “ప్రబువా, ఎయెర్బాన్ మాపు సాండ్రెజ్? నీ మాటెజ్నె ఎలాకాలం దేవుణు వెట బత్రిని బత్సు వందిజ్ వెప్పినె. 69 మాపు ఏలు నమ్మిజినాన్, మాపు నెస్తాప్, నీనె దేవుణు బాణిజ్ వాతికాన్ ఇజి”, ఇజి వెప్తాన్.

70 అందెజె యేసు, మిజి వన్నెండు మణిసిర్ సిసూరిజ్ ఏర్పాటు కితిక నానె గదె. గాని మీ లొఇ ఒరెన్, నయ్యానుజ్ మన్ని బుద్ది ననికాన్ మనాన్”, ఇజి వెప్తాన్. 71 వాండ్రు ఇస్కరియొతు సిమోన్ మరిసి యూద వందిజ్ వెప్తాన్. యూద సిసూర్ లొఇ ఒరెన్ ఆతిజ్బా వాండ్రు యేసుజ్ వెన్కా ఒవజెప్పాన్లె.

యేసు తంబెర్సిర్ వన్నిజ్ నమ్మివర్

7 వెనుక, యేసు గలీలయ దేసమ్దునె మంజి నాహ్మజ్ బూలాజి మహాన్. వాండ్రు యూదయ దేసమ్దు మండ్రెజ్ కెవితాన్. ఎందానిజ్ ఇహిజ, యూదురు వన్నిజ్ సప్తెజ్ సుడెజి మహాన్. 2 నస్తివలె, యూదురి ఉండ్రె పండొయ్ డగ్రు ఆతాద్. అయా పండొయ్ పేరునె గుడుస పండొయ్ † ఇజి. 3 పండొయ్ డగ్రు ఆతిజ్, యేసు తంబెర్సిర్ వన్నిజ్, “ఇబ్బెణిజ్ నీను యూదయ దేసమ్దు సాన్. ఎందానిజ్ ఇహిజ, నీ సిసూర్ ఆతికార్ నీను కిజిని బమ్మి ఆతి పణిజ్ సుడెదెజ్”, ఇజి వెప్తాన్. 4 “పెరికాన్ అదెజ్ కోరిజినెకాన్ ఎయెన్బా డాప్పి వన్ని పణి కివెన్. విజెరె ఎద్దునె కినాన్. నీను యా బమ్మాని పణిజ్ కిజిని ఇహిజ, నిజి నీనె లోకమ్ది లోకుర్ ఎద్దు తోరె అదెజ్ మరి. యా గలీలయదికార్ ఉండ్రె అవండ”, ఇజి వెప్తాన్. 5 వన్ని తంబెర్సిర్బా వన్నిజ్ నమ్మెవతార్. 6 అందెజె యేసు వరిజ్, “నాను పండొయిదిజ్ సాండ్రెజ్ సమయం ఇంక రవదె. గాని మిజి ఎస్తివలెబా సాండ్రెజ్ ఆనాద్. 7 యా లోకమ్దు మన్ని దేవుణుదిజ్ దూసిస్సికార్ మిజి దూసిస్వెర్. ఎందానిజ్ ఇహిజ, మీరు బా వరి వెట మనిదెర్. గాని వారు నజి దూసిస్సారె. ఎందానిజ్ ఇహిజ, వారు సెఇకెజ్ కిజినార్ ఇజి నాను వెప్పినె. 8 మీరు పండొయిదిజ్ సాండ్రు. నాను ఏలు సాన్. ఎందానిజ్ ఇహిజ, నాను సాండ్రెజ్ సమయం పూర్తి రవదె”, ఇజి వెప్తాన్. 9 యాక వెప్తాండ్రె వాండ్రు గలీలయదు మహాన్.

యేసు గుడుస పండొయ్దిజ్ సాన్సినాన్

10 వన్ని తంబెర్సిర్ పండొయ్దిజ్ సాహి వెన్కా, వాండ్రు బా సాహాన్. లోకుర్ విజెరె వన్నిజ్ నెస్ఇ లెకెండ వాండ్రు డాజ్జి సాహాన్. 11 గాని పండొయ్దు, యూదురు వన్నిజ్ రెబాజి, “అయా వాండ్రు ఒంబొప్పిన్”, ఇజి వెన్బాజి మహాన్. 12 లోకుర్ లొఇ వన్ని వందిజ్ నండొ మొరొ ఆతార్. సెగొండార్ వాండ్రు నెగ్గికాన్ ఇజి, మరి సెగొండార్, సిల్లె వాండ్రు లోకురిజ్ మోసెం కిజినెకాన్ ఇజి మొరొ ఆతార్. 13 గాని యూదురిజ్ తియెలాజి, ఎయెర్బా వన్ని వందిజ్ డటం వెప్పెవితార్.

యేసు పండొయ్దు నెస్పిస్సాన్

14 పండొయి దినమ్కు సెగం ఆతాద్. అయావలె వాండ్రు దేవుణు గుడిది అరుబుదు సాహాండ్రె అబె మన్ని లోకురిజ్ నెర్పిసినాన్. 15 అందెజె యూదురు నండొ బమ్మి ఆతారె, “వీండ్రు బడిదు సాన్ని సద్విఇతికాన్ గదె? మరి ఎలాగ వీండ్రు నిసా నెస్ట మనాన్?”, ఇజి వర్గితార్. 16 నస్తివలె యేసు వెప్తాన్, “నాను నేర్పిస్సి మాట నా సాంత మాట అవద్. గాని అయాక నజి షాక్తి వన్ని బాణిజ్ వాజినాద్. 17 దేవుణు ఇస్టం కిదెజ్ కోరిజినెకాన్ ఎయెన్బా, నాను నేర్పిస్సి మాట దేవుణు బాణిజ్ వాజినాద్, నా సాంత అతికారం దాన్ నాను నేర్పిసినికాద్ ఇజి నెస్సాన్. 18 సాంత అతికారమ్దాన్ నెస్పిసినికాన్ ఎయెన్బా వన్నిజ్ గవరం వాదెజె నెస్పిస్సాన్. గాని వన్నిజ్ షాక్తి వన్నిజ్ గవరం వాదెజ్ ఇజి కోరిజినెకాన్ నిజామాతికాన్. వన్ని లొఇ ఇనితప్పబా సిల్లెద్. 19 దేవుణు మోసెజ్ సిత్తి రూలుజ్ వాండ్రు మిజి సితాన్ గదె? గాని మీ లొఇ ఒరెన్బా ఆ రూలుజ వజ నడెఇదెర్. మీరు ఎందానిజ్ నజి సప్తెజ్ సుడెజినిదెర్?”, ఇజి వెప్తాన్. 20 అయావలె మందలోకుర్, “నిజి దెయం అస్తాద్. ఎయెర్ నిజి సప్తెజ్ సుడెజినెకాన్?”, ఇజి మరజి వెప్తాన్. 21 యేసు వరిజ్ వెప్తాన్, “నాను బమ్మాతి ఉండ్రె వణి కిత. మీరు విజిదెరె నండొ బమ్మి ఆతిదెర్. 22 మీరు సునతి కిదెజ్ ఇజి మోసె మిజి రూలు సిత మనాన్. అందెజె మీరు కొడొదిజ్ విస్తాంతి దినమ్దు సునతి కిజినెదెర్. సుడెదు, మోసె అవన్ సునతి మొదొల్స్తికాన్, మీ అనిరెనె అయాక మొదొల్స్తార్. 23 విస్తాంతిదినమ్దు ఒరెన్ కొడొదిజ్ సునతి కిజినెదెర్. ఎందానిజ్ ఇహిజ, మోసెజ్ దేవుణు సిత్తి రూలుజ్ తప్పెజ్ అవద్ఇజి. అహిజ, నాను ఒరెన్ లోకుదిజ్ విస్తాంతి దినమ్దు పూర్తి నెగెణ్ కితి వందిజ్ మీరు ఎందానిజ్నా ముస్సు కోపం ఆజినెదెర్? 24 మీరు ముస్సు తోర్జిని దన్నివందిజ్ సుడెజి తీర్పు కిమాట్. గాని నిజమాతికెజ్ సుడెజి తీర్పు కిదు.

యేసు నిజం క్రీస్తునా ఇజి వెన్బాజినార్

25 నస్తివలె సెగొండార్ యెరుసలెమ్దికార్, “వినిజె గదె అతికారిబు సప్తెజ్ సుడెజినెకాన్. 26 ఇవిలోన్ వీండ్రు దయ్దమ్దాన్ విజెరె ఎద్దు వర్గిజినాన్. గాని వారు వన్నిజ్ ఇనికబా ఇన్వెర్. వీండ్రు క్రీస్తు ఇజి అతికారిబు నిజమె ఒప్పకొలారా? 27 క్రీస్తు వానివలె, వాండ్రు ఎమేణికాన్ ఇజి ఎయెర్బా నెస్వెర్. గాని వీండ్రు ఎంబెణికాన్ ఇజి మాపు నెస్సాప్”, ఇజి వర్గితార్. 28-29 అందెజె యేసు గుడి అరుబుదు నేర్పిసి మహివలె, ఈఘు డటం వెప్తాన్. “నాను ఎయెన్, ఎమేణికాన్ ఇజి మీరు నిజం నెస్సిదెరా? నాను నా సాంత ఇస్టందాన్ వాతికాన్ అవ. గాని నజి షాక్తాన్ ఒరెన్ మనాన్. వాండ్రు నిజమాతి దేవుణు. మీరు వన్నిజ్ నెస్ఇదెర్. గాని నాను వన్నిజ్ నెస్సు. ఎందనిజ్ ఇహిజ, నాను వన్ని బాణిజ్ వాత మన్ను. వాండ్రె నజి షాక్తాన్”, ఇజి. 30 యాకెజ్ వెహారె, వారు వన్నిజ్ అప్పెజ్ సుడెజెతార్. గాని ఎయెన్బా వన్నిజ్ అన్ఎతార్. ఎందానిజ్ ఇహిజ, వాండ్రు అస్సె అదెజ్ దేవుణు ఏర్పాటు కితి సమయం రెవదె. 31 అహిజ్బా లోకుర్ లొఇ నండొండార్ వన్ని ముస్సు నమకం ఇట్టార్. వారు, “వీండ్రు నండొ బమ్మాని పణిజ్ కిత్తాన్. లోకురిజ్ రక్సిస్సెజ్ దేవుణు ఏర్పాటు కితి షాక్తి క్రీస్తు వానివలె, విని ముస్సు మరి నండొ

† అయా పండొయ్ కాలమ్దు రొడ్డెజాణిజ్ గుడిస లొప్పొరెబానె మంజినార్. వరి అన్నిసిర్ ఇస్టయేలు లోకుర్ నలవయ్ వంటెజ్ వయనం కిజి మహివలె గుడుసాదు మహిదన్నివందిజ్ ఎత్తుకిజి యూదురు యా పండొయ్ కిజినార్.

బమ్మాయి పణిజ్ వాండ్రు కివాండ్రా?”, ఇజి వెహ్లా. 32 లోకుర్ యేసు వందిజ్ అయాకెజ్ మొరొ ఆజినికెజ్ వరిసయిరు వెహర్. నస్తివలె పెరి పుజెరిబు ని పరిసయరు వన్నిజ్ తొప్పొ ఒతెజ్ దేవుణు గుడిది జమాన్జె ఫోక్టార్. 33 అందెజె యేసు, “నాను మీ వెట సెగం కాలమ్నె మంజినె. వెన్కా నాను నజి ఫోక్తి వన్ని డగ్రు సాన్సిన. 34 మీరు నజి రెబానిదెర్. గాని తొఇదెర్. నాను మన్ని బాన్ మీరు వాదెజ్ అబ్ఇదెర్”, ఇజి వెహ్లాన్.

35-36 నస్తివలె యూదురు అతికారుబు, ఒరెన్వెట ఒరెన్, “పిండ్రు మజి తోరెండ ఎంబె సాండ్రెజ్ సుడెజినాన్? వాండ్రు, సెగొండార్ యూదురు మా బాణిజ్ సెద్రిజి బత్తిజిని గ్రీకు పట్టుమ్కాజ్ సానాండ్రా? వాండ్రు యూదురు ఆఇ వరిజ్ నేరెపిసాండ్రా? వాండ్రు వెప్పినాన్, “మీరు నజి రెబానిదెర్. గాని తొఇదెర్. నాను మన్ని బాన్ మీరు వాదెజ్ అబ్ఇదెర్” ఇజి. ఎందానిజ్ వాండ్రు ఆహె వెప్పినాన్?”, ఇజి వర్గిలార్.

37 వండ్రాయ్ కడెవెరి రోజా వాతాద్. కడెవెరి రోజానె ముకెలమాతి దినం. అయా నాండిజ్ యేసు నిహండ్రె ఈహు డటం వెహ్లాన్. “ఏప్పొ కట్టికాన్ ఎయెన్బా నా డగ్రు రల. నాను వన్నిజ్ ఉండెజ్ సీన. 38 దేవుణు మాటదు వెహ్లాజ, “నా ముస్సు నమకం ఇడ్తి ఎయెర్ గర్బం దాన్బా, నిజమాతి బత్తు సీని ఏరు సోసి సానెలె. అయాక ఉండ్రె ఊట సోసి సాని లెకెండ్రె సానెలె. 39 ఇబ్బె యేసు నిజమాతి బత్తు సీని ఏరు ఇజి వెహ్లాక దేవుణు ఆత్మ వందిజె. యా దేవుణు ఆత్మ యేసు ముస్సు నమకం ఇడ్తి వరిజ్, యేసుజ్ దేవుణు మంజిని బాడిడు ఒతి వెన్కా దొహ్కాన్లె. గాని యేసు యాక వెహ్లావలె, దేవుణు వన్ని ఆత్మ వన్నిజ్ నమ్మితి వరిజ్ సీవండ్రె. ఎందానిజ్ ఇహెజ, దేవుణు యేసుజ్ వన్ని వెట వన్ని గొప్ప జాయ్దు మండ్రెజ్ దేవుణు మంజిని బాడిడు ఒవండ్రె.

40 వన్ని మాటెజ్ వెహరె, లోకుర్ లోఇ సెగొండార్, “నిజమె, పిండ్రె మాపు ఎద్రు సుడెజి మహి ప్రవక్త”, ఇజి వెహ్లా. 41 మరి సెగొండార్, “సిల్లె పిండ్రె క్రీస్తు”, ఇహర్. గాని సెగొండార్, “క్రీస్తు ఎలాగ గలీలయదాన్ వానాన్? 42 క్రీస్తు దావీదు రాజు కుటుమ్దాన్, దావీదు బత్తిజి మహి పట్టుమాతి బెల్లెహమ్దాన్ వానాన్, ఇజి దేవుణు మాటదు మనాద్ గద”, ఇహర్. 43 ఆహె వన్ని వందిజ్ లోకుర్ ఎరెలితార్. 44 సెగొండార్ వన్నిజ్ అస్తెజ్ కోరితార్. గాని ఎయెర్బా వన్నిజ్ అసవతార్.

45 అందెజె యేసుజ్ అస్తెజ్ వాతి దేవుణు గుడిది జమానుబు మరెజి పెరి పుజెరిబు ని పరిసయరుబు బాన్ సాహర్. వారు జమాన్జె, “మీరు ఎందానిజ్ వన్నిజ్ అసి తొఇదెర్?”, ఇజి వెన్బాతార్. 46 దన్నిజ్ వారు, “పిండ్రు వెహ్లా మాటెజ్ లెకెండ్రె ఎయెర్బా ఎనిజ్బా వెహ్లాన్”, ఇహర్. 47 పరిసయరుబు, “మీరు బా మొసం ఆత్తిదెరా? 48 అతికారిబు లోఇనో పరిసయరుబు లోఇనో ఎయెన్బా వన్నిజ్ నమితాండ్రా? 49 గాని యా మంద లోకుర్ దేవుణు మోసెజ్ సిత్తి రూలుజ్ నెన్ఎర్. అందెజె వరిజ్ దేవుణు సాయెప్ సీనాన్”, ఇజి వెహ్లా. 50 నికొదిమొస్ ఇనికాన్ ఒరెన్ ముజాలె యేసు డగ్రు సాహ మహాన్. వాండ్రు పరిసయరుబు లోఇ మన్నికాన్. 51 నస్తివలె నికొదెము, “మా యూదురి రూలుబు వజ, ఒరెన్ వాండ్రు వెప్పొనికెజ్ మాపు ముజాల వెంజి, వాండ్రు కితికెజ్ నెస్సి వెన్కెనె వన్ని ముస్సు తీర్పు కిదెజ్ ఆనాద్”, ఇజి వెహ్లాన్. 52 అందెజె వారు, “సీను బా గలీలయదాన్ వాతికాండ్రా? సీను దేవుణు మాట బాగ నద్వెల. ఒరెన్ ప్రవక్తబా గలీలయదాన్ సాప్సన్, ఇజి సీను నస్తివలె నెస్సిలె”, ఇజి వెహ్లా. 53 వెనుక వారు విజెరె పరిపరి ఇల్కాజ్ సాహర్.

రంకు బూలాజి మహి బోదెల్దిజ్ యేసుడగ్రు తసిసార్

8 గాని యేసు ఒలివ గొరొత్ †సాహన్. 2 జాయ్ ఆతివెలె మరి వాండ్రు దేవుణు గుడిది అరుబుదు వాతాన్. లోకుర్ విజెరె వాజి వన్నిడగ్రు కూడితార్. వాండ్రు బస్తాండ్రె వరిజ్ నెస్పిసినాన్. 3-4 నస్తివలె పరిసయరుని యూదురి రూలుజ్ నెస్సిన్నీకార్ ఉండ్రె బోదెల్దిజ్ తతార్. అది, రంకు బూలాజి మహివలె వారు దన్నిజ్ అస్తార్. వారు దన్నిజ్ మంద ఎద్రు నిల్వారె యేసుజ్, “బోదెకినికెదా, యా బోదెల్ రంకు బూలాజి మహివలె, మాపు అస్తాప్. 5 మోసె మజి రూలు సిత్తివెలె మజి ఆద్ర వెహ్లాన్, “ఆహె బూలాని వన్కాజ్ పణాణిజ్ డెయిజి సప్తెజో ఇజి. గాని సీను ఇనిక వెప్పొని”, ఇజి వెన్బాతార్. 6 వన్ని ముస్సు నేరం మోస్తెజ్ ఇజి వన్నిజ్సీకుదు అరెప్తెజ్ అహు వెన్బాతార్. గాని యేసువజితాండ్రె బూమిదు వన్ని డెస్కూదాన్రాసి మహాన్. 7 వారు మరిమరి వెన్బాజి మహిజ్, వాండ్రు బుర్ర పెహ్లాండ్రె వరిజ్, “మీ లోఇ పాపం కిఇకాన్ ముజాల దన్నిజ్ పణుకుదాన్ డెయ్దు”, ఇజి వెహ్లాన్. 8 వెహ్లాండ్రె వాండ్రు మరి వజ్జెజి, బూమిదు రాసి మహాన్. 9 గాని వారు యా మాటెజ్ వెహరె, ఒరెన్ వెన్కా ఒరెన్ డిస్తె సాహర్. ముజాలె పెరికార్ సాహర్. వెన్కా ఇజ్జికార్. ఆహె విజెరె సాహర్. యేసుని అయా బోదెల్సి బాన్ మహర్. అది నిహిమహిబానె మహాద్. 10 యేసు బుర్ర పెహ్లాండ్రె, దనిజ్, “వారు ఎంబె మనార్? ఎయెర్బా, నిజి తీర్పు సీజి సిక్స సింబా?”, ఇజి వెన్బాతాన్. 11 “సిల్లె బాబు”, ఇహాద్ అది. అందెజె యేసు, “అహెజ, నానుబా, నిజి తీర్పు సీజి సిక్స సింబ. సాన్ల. ఏలుదాన్ మరి పాపం కిమా”, ఇహాన్.

యేసు లోకమ్ది లోకురిజ్ జాయ్

12 మరి, యేసు లోకురిజ్ వెప్పొనాన్, “నానె లోకమ్ది లోకురిజ్ జాయ్. నా సిసూ ఆనికాన్ ఎయెన్బా సీకటుదు మన్ఎన్. గాని వన్నిజ్ బత్తు సీని జాయ్ మంజినాద్”. 13 నస్తివలె పరిసయరు వన్నిజ్, “సీనె సీ వందిజ్ సాక్సి వెప్పొని, మరి ఎయెర్బా అయాక నిజం ఇజి వెహ్లాండ్రె. అందెజె సీ సాక్సమ్దిజ్ నిజం సిల్లెద్”, ఇజి వెహ్లా. 14 అందెజె యేసు వెహ్లాన్, “నానె నా వందిజ్ సాక్సి వెప్పొన. అహిజ్బా నాను వెహ్లా సాక్సి నిజమ్నె. ఎందానిజ్ ఇహెజ, నాను ఎమెణాజ్ వాత, ఎంబె సాన్సిన ఇజి నాను నెన్న. గాని మీరు నెన్ఇదెర్ నాను ఎమెణాజ్ వాత ఎంబె సాన్సిన ఇజి. 15 మీరు లోకుర్ సుడెజినికెజ్ సుడెజి తీర్పు సీజినిదెర్. గాని నాను అయాలెకెండ్రె ఎయెర్బా తీర్పు సింబ. 16 నాను తీర్పు సిత్తిజ్బా నాను సిత్తి తీర్పు నిజమ్నె. ఎందానిజ్ ఇహెజ, నాను ఒరెన్ ఆవ తీర్పు సీజిని. నజి ఫోక్తి బుబ్బు నా వెట మనాన్. 17 దేవుణు మోసెజ్ సిత్తి మీ రూలుజ్దు రాస్తె మనాద్, ‘రిపిర్ వెప్పొని సాని ఉండ్రె లెకెండ్రె మహిజ, అయాక నిజం ఇజి’. 18 నానె నా వందిజ్ సాక్సి వెప్పొన. మరి నజి ఫోక్తి నా బుబ్బు బా నా వందిజ్ సాని వెప్పొనాన్”. 19 నస్తివలె వారు వన్నిజ్, “ఎంబె సీ బుబ్బు మనాన్?”, ఇజి వెన్బాతార్. దన్నిజ్ యేసు”, మీరు నజి నెన్ఇదెర్. నా బుబ్బెజ్ నెన్ఇదెర్. మీరు నజి నెస్సికిహెజ, నా బుబ్బెజ్బా నెస్సిదెర్ మరి”, ఇజి వెహ్లాన్. 20 వాండ్రు యా మాటెజ్ దేవుణు గుడిడు సంత అరెప్పొ పెటెజ్ ఇడ్డిబాన్ మంజి నెస్పిసి మహివలె వెహ్లాన్. గాని ఎయెన్బా వన్నిజ్ అసవతార్. ఎందానిజ్ ఇహెజ, వన్నిజ్ అస్తెజ్ దేవుణు ఎత్తు కిత్తి సమయం రెవిదె. 21 మరి యేసు వరిజ్, “నాను సానాలె. మీరు నజి రెబానిదెర్. మీరు పావమ్కు కిజి మంజిని సానిదెర్. నాను సాని బాడిడు మీరు వాదెజ్ అబ్ఇదెర్”, ఇజి వెహ్లాన్. 22 అందెజె యూదురు ఒరెన్ వెట ఒరెన్, “వన్నిజ్ వాండ్రె సవె ఆనాండ్రా? వాండ్రు వెప్పొనాన్ గదె నాను సాని బాడిడు మీరు వాదెజ్

† అయా గొరొత్ ఒలివ మరెకె నండ్రె మన్నె అందెజె ఒలివ గొరొన్ ఇనార్

అట్లైతే ఇజ్రా' ఇజి వర్గితార్. 23 యేసు వరిజ్ ఈహు వస్తాన్: "మీరు ఇబ్బె యా లోకమ్దికిదెర్. గాని నాను ముస్సు దేవుణు మంజిని బాడిదికాన్. మీరు యా లోకమ్దికిదెర్. నాను ఇబ్బెణికాన్ ఆఎ. 24 నాను మిజి వేహ్ మన్న మీరు పాపం కిజి మంజిని సానిదెర్ ఇజి. నాను ఎయెన్ ఇజి వేహ్సినానో, నానె వాండ్రు ఇజి మీరు నమ్మిఎండ మహిజ, మీరు నిజమ్నె పాపమ్దు మంజిని సానిదెర్". 25 వారు వన్నిజ్, "సీను ఎయెన్?", ఇజి వెన్బాతార్. 'నాను ఎయెన్ ఇజి మొదోహనె వేహ్ మనానో, నానె వాండ్రు', ఇహాన్. 26 యేసు మరి వస్తాన్ "మీ వందిజ్ నండ్ వేహ్జ్ నజి మనాద్. మీ ముస్సు నండ్ తీర్పుజ్బా మనాద్. గాని నజి పాక్తాన్ నిజామాతికాన్. వాండ్రు నజి వేహ్ సజతిజ్నె నాను లోకమ్ది లోకరిజ్ వేహ్సిన. 27 వాండ్రు దేవుణు మంజిని బాడిదు మన్ని వన్ని బుబ్బు వందిజె వరిజ్ వేహ్సినాన్ ఇజి వారు అర్దం కివితార్. 28 అందెజె యేసు వరిజ్, "మీరు లోకు మరిసి ఆతి నజి సిలువాదు సమ్మివెలె, మీరు నమ్మిదెర్, నాను ఎయెన్ ఇజి. మరి, నాను నా సాంత అతికారం దాన్ ఇనికబా కిఎ. గాని నా బుబ్బు నజి నెన్పిన్పివజనె నాను వేహ్సిన, ఇజి మీరు నమ్మిదెర్. 29 నజి పాక్తాన్ నజి తోడు: మంజినాన్. వాండ్రు నజి ఒరెన్ వన్నిజె డిన్వతాన్. ఎందానిజ్ ఇహిజ వన్నిజ్ ఇష్టం వాతికెజె నాను ఎన్పివలెబా కిజిన", ఇజి వస్తాన్. 30 వాండ్రు యా మాటెజ్ వేహ్సినె నండ్ండార్ వన్ని ముస్సు నమకం ఇడ్డార్.

అబ్రాహము కొడోర్

31 వన్ని ముస్సు నమకం ఇడ్డి యూదురిజ్ వాండ్రు వస్తాన్, "నాను వేహ్ మాటెజ్ లోజిజి మహిజ, మీరు నిజమ్నె నా సిసూర్ ఆనిదెర్. 32 నమ్మివలె మీరు దేవుణు వందిజ్ నిజమాతికెజ్ నెమ్మిదెర్. అయాక మిజి పాపమ్కాణిజ్ డిన్పిస్తాద్". 33 వారు వన్నిజ్, "మాపు అబ్రాహము తెగ్గుదు పుట్టికావ్. మాపు ఎనిజ్బా ఎయె అడిగి వెట్టివణి మణిసిరి లెకండ్ మన్ఎపె. నమ్మివలె 'మీరు డిబె ఆనిదెర్', ఇజి ఎలాగ వేహ్సిన", ఇజి వస్తాన్. 34 అందెజె యేసు, "ఒరెన్ వెట్టివణి కినికాన్, ఎలాగ తోహా ఆతి మన్ని వజ ఎజమాని అడిగి మంజి నాండ్రో, అయాలెకండ్ పాపం కిని విజెరె పాపమ్దిజ్ అడిగి తోహా ఆతి లెకండ్ మంజినాన్. 35 ఒరెన్ వెట్టివణి కినికాన్ అక్కు మన్ని వన్ని లెకండ్ ఎలాకాలం అయా ఇండ్రో మండ్రెజ్ అట్ఎన్. గాని అయా ఇండ్రోణి మరిసిజ్ ఎలాకాలం అయా ఇండ్రో అక్కు మంజినాద్. 36 అందెజె దేవుణు మరిసి మిజి తోహా ఆతి బాణిజ్ డిన్పిస్తాజ, మీరు నిజమ్నె డిబెఆనిదెర్. 37 నాను నెన్న మీరు అబ్రాహము తెగ్గుతికిదెర్ ఇజి. గాని మీరు నజి సప్తెజ్ సుడెజినిదెర్. ఎందానిజ్ ఇహిజ నాను వేహ్సిన మాటెజ్ మిజి వడిజె. 38 నా బుబ్బు నజి తోరిన్పిజ్ నాను వేహ్సిన. గాని మీరు మీ బుబ్బు వేహ్సినకెజ్ కిజినిదెర్", ఇజి వస్తాన్. 39 నమ్మివలె వారు, "అబ్రాహమునె మా బుబ్బు", ఇజి వస్తాన్. 40 "మీరు అబ్రాహము కొడోర్ ఇహిజ, మీరు అబ్రాహము కితి పణిజ్నె కితిదెర్ మరి. దేవుణు బాణిజ్ నాను వేహికెజె మిజి వేహ్జ్ నాను ఎనిజ్బా సుడెజె. గాని మీరు నజి సప్తెజ్ సుడెజినిదెర్. అబ్రాహము యా లెకండ్ ఇనికబా కిఎన్. 41 మీ బుబ్బు కిజినికెజె మీరు బా కిజినిదెర్", ఇజి వస్తాన్. అయావలె వారు, "మాపు అప్పాసి వెట పుట్టికాపె. దేవుణు ఒరెండ్రె మా బుబ్బు", ఇహాన్. 42 అందెజె యేసు వరిజ్ ఈహు వస్తాన్: "దేవుణునె మీ బుబ్బు ఇహిజ, మీరు నజి ప్రేమ్మిదెర్ మరి. ఎందానిజ్ ఇహిజ, నాను దేవుణు బాణిజ్ వాత. నాను యేలు ఇబ్బె మన్న. నాను నా సాంత ఇష్టమ్దాన్ రెవిత. గాని వాండ్రు నజి పాక్తాన్. 43 ఎందానిజ్ నాను వేహ్సిన మాటెజ్ మీరు అర్దం కిఇదెర్? ఎందానిజ్ ఇహిజ, నాను వేహ్సిన మాటెజ్ వెండ్రెజ్ మీరు కెఇదెర్. 44 మీ బుబ్బు నయ్తానె. మీరు వన్ని కొడోర్. మీరు వన్నిజ్ ఇష్టం ఆతికెజ్ కిడెజ్ కోరిజినిదెర్. మొదోహన్ అసి వాండ్రు సమ్మికాన్. వాండ్రు నిజమాతి బాడిదు నిల్వెన్. ఎందానిజ్ ఇహిజ, వన్ని లోఇ నిజమాతికెజ్ నిల్ల. వాండ్రు అబద్దం వర్గినివలె, వన్ని సాంత బుద్దిదాజె వర్గినినాన్. ఎందానిజ్ ఇహిజ, వాండ్రు అబద్దం వర్గినికాన్. అబద్దం వర్గిని వరి అపాసి. 45 గాని నాను దేవుణు వందిజ్ నిజమాతికెజ్ వేహ్సిన. అందెజె మీరు నజి నెన్ఇదెర్. 46 మీ లోఇ ఎయెన్బా నాను తపు కితికాన్ ఇజి రుజాప్ కిడెజ్ అట్నాండ్రా? నాను నిజమాతికెజ్ వేహ్జె, ఎందానిజ్ మీరు నజి నమిఇదెర్. 47 దేవుణు కొడోర్ ఆతికార్ వన్ని మాటెజ్ వెనార్. మీరు దేవుణు కొడోర్ ఆఇదెర్. అందెజె నా మాటెజ్ వెన్ఇదెర్".

48 నమ్మివలె యూదురు వన్నిజ్, "సీను సమరియదికి, నిజి దెయం అస్తాద్ ఇజి మాపు వేహ్సిన మాటదు తపు ఇనికబా మనాదా?", ఇహాన్. 49 నజి దెయం అన్ఎద్. నాను నా బుబ్బెజ్ గవరం సీజిన. గాని మీరు నజి కరాయి ఇజినిదెర్. 50 నాను నా వందిజ్ గవరం అన్ఎ ఆడెజ్ సుడె:ఎ. గాని అయాకెజ్ సుడెజినికాన్ ఒరెన్ మనాన్. వాండ్రె నా వందిజ్ నాయమ్దాన్ తీర్పు సీజినికాన్. 51 నా మాటెజెవజ బత్కినికాన్ ఎయెన్బా సాఎన్, ఇజి నాను నిజం మీ వెట వేహ్సిన", ఇజి మరెజి వస్తాన్. 52 అయావలె యూదురు, "ఏలు మాపు నెస్తాప్ సీను దెయం అస్తికి ఇజి. అబ్రాహము సాతాన్. అయా లెకండ్ ప్రవక్తరుబా సాతార్. గాని సీను వేహ్సిన, 'నా మాటెజె వజ బత్కినికాన్ ఎయెన్బా సాఎన్', ఇజి.

53 సీను మా బుబ్బు ఆతి అబ్రాహము ఇంక పెరికిదా? వాండ్రు సాతాన్. అయా లెకండ్ ప్రవక్తరు బా సాతార్. సీను ఎయెన్ ఇజి సీను ఒడెబిజిని?", ఇజి వస్తాన్.

54 అందెజె యేసు, "నానె నజి పాగ్డిఃతిజ దనిజ్ విలువ సిల్లెద్. గాని నజి పాగ్డిఃతికాన్ నా బుబ్బునె. వన్నిజె మీరు, మా దేవుణు ఇజి వేహ్సినదెర్. 55 మీరు వన్నిజ్ నెన్ఇదెర్. గాని నాను వన్నిజ్ నెన్న. నాను వన్నిజ్ నెన్ఎ ఇజి వేహ్జె, మీ లెకండ్ ఒరెన్ అబద్దం వర్గినికాన్ ఆత మరి. గాని నాను వన్నిజ్ నెన్న. వన్నిమాటెజె వజ బత్కిజిన. 56 మీ బుబ్బాతి అబ్రాహము, నాను వాని దినం సుడెడెజ్ అల్లు ఇజి సర్ద ఆతాన్. వాండ్రు అయా దినం సుడెతాండ్రె సర్ద ఆతాన్", ఇజి వస్తాన్. 57 నిజి ఏలు యాబయ్ వంటెజ్బా సిల్ల. సీను అబహమ్ముజ్ సుడెఃతిదా?", ఇజి యూదురు వన్నిజ్ వస్తాన్. 58 అందెజె యేసు, "అబ్రాహము పుట్వండ ముజాలె నాను మన్న ఇజి నిజం మీ వెట వేహ్సిన", ఇజి వస్తాన్. 59 యాక వేహ్జ్, వారు వన్నిజ్ డెయ్దెజ్ వణుకు పెహ్తార్. గాని వాండ్రు డాజిఃతాండ్రె గుడిదాన్ సాహాన్.

పుట్టివలెహన్ అసి గుడ్డి ఆతివన్నిజ్ నెగండ్ కిజినాన్

9 యేసు సాన్ని మహివలె, పుట్టిబాణిజ్ అసి గుడ్డి ఆతి ఒరెన్వన్నిజ్ సుడెఃతాన్. 2 నమ్మివలె వన్నిసిసూర్ వన్నిజ్, "బోదకినికి, ఎయెర్ పాపం కితిజ్ వీండ్రు గుడ్డిదాన్ పుట్టాన్? వీండ్రునా విన్ని అయ్సి అప్పాసిరినా?", ఇజి వెన్బాతార్. 3 అందెజె యేసు, "వీండ్రు పాపం కితిజ్ అవద్, విన్ని అయ్సి అప్పాసిర్ పాపం కితిజ్ అవద్. గాని దేవుణు ఒరెండ్రె కిడెజ్ అట్టి వణి వినిలోఇ సుడెడెజె వీండ్రు గుడ్డి ఆతాండ్రె పుట్టాన్. 4 వేడె మనివలె, మాటు నజి పాక్తివన్ని పణి కిడెజ్వలె. సీకట్ బేగి ఆనాద్. అయావలె ఎయెర్బా ఇనికబా కిడెజ్ అట్ఎన్. 5 నాను యా లోకమ్దు మనివలె, యా లోకమ్దివరిజ్ జాయ్లెకండ్ మన", ఇజి వస్తాన్.

6 వెళ్తుండే, వాండ్లు బూమిదు పూస్తాన్. వన్ని పూసవలిదాన్ కండెక్ బుర్ద కితాండ్రె, అయా బుర్ద గుడిః వన్ని కణకెజ ముస్సు రాస్తాన్. 7 రాస్తాండ్రె, "సిను సాన్ని సిలోయుము ఇన్ని గుమ్మిదు కణుకు నొరె ఆఅ", ఇజి వెప్తాన్. (సిలోయుము ఇన్ని మాటదిజ్ పోక్తికాన్ ఇజినె అర్దం) వాండ్లు సాహండ్రె నొరె ఆతాన్. వన్ని కణుకు నెగణ్ఆతె. వాండ్లు మరజి వాతాన్. 8 అయావలె వన్ని పడఃకాదికారని వాండ్లు ముజాలె లొన్పానిక సుడిఃతి మహికార్ వెన్బాతార్, "పిండ్లు అబ్బె బసి లొసి మహికాన్గదె", ఇజి. 9 సెగొండార్, "పిండ్ల", ఇజి. మరి సెగొండార్, "సిలె, వినిలెకెండ మన్ని మరి ఒరెనె", ఇహాన్. గాని వాండ్లు, "నానె లొన్పాజి మహికాన్", ఇజి వెప్తాన్. 10 అయావలె వారు, "సి కణుకు ఎలాగ రెకె ఆతె?", ఇజి వెన్బాతార్. 11 అందెజె వాండ్లు, "యేసు ఇజి కూక్కి ఒరెన్బుర్ద కితాండ్రె నా కణకెజ ముస్సు రాస్తాన్. సిలోయుము ఇన్ని గుమ్మిదు సాన్ని నొరె ఆఅ, ఇహాన్. అందెజె నాను సాన్ని నొరె ఆత్తిజ్నాను సుడిఃదెజ్ అట్ట", ఇహాన్. 12 "ఎంబె మనాన్ అయా వాండ్లు", ఇజి వారు వెన్బాతార్. "ఏమె నాను నెన్ఏ", ఇహాన్ వాండ్లు. 13 ముజాల గుడ్డిదాన్ మహివన్నిజ్ వారు పరిసయరుజు డగు తత్తార్. 14 ఉండ్రె విస్తాంతి నాండిజె, యేసు బుర్ద కితాండ్రె అయా వన్ని కణుకు నెగణ్ కితాన్. 15 పరిసయరు బా సిను ఎలాగ బేస్తిజ్ అట్టి ఇజి వెన్బాతార్. వాండ్లు, "అయా వాండ్లు నా కణుకు ముస్సు బుర్ద రాస్తాన్. నాను నొరెబాత. ఏలు నాను బేసిన", ఇహాన్. 16 అందెజె సెగొండార్ పరిసయరు, "యా వాండ్లు దేవుణు బాణిజ్వాతికాన్ఆఎన్. ఎందానిజ్ ఇహాజ, విస్తాంతిదిసమదు అహు కిజి వాండ్లు రూలుజ్ తస్సినాన్", ఇహాన్. గాని మరి సెగొండార్, "ఒరెన్పాపం కిజినికాన్ ఎలాగ నిసా బమ్మాని పణిజ్ కిదెజ్ అట్టాన్", ఇహాన్. ఆహా వారు కేటెజ్ ఆతార్. 17 అందెజె పరిసయరు మరి అయా గుడిఃదాన్ మహి వన్నిజ్, "వాండ్లు నీ కణుకునె రేక్తాన్. అందెజె నీను వన్ని వందిజ్ ఇన్నిక వెస్సినె", ఇజి వెన్బాతార్. దనిజ్ వాండ్లు, "వాండ్లు ఒరెన్ ప్రవక్త", ఇహాన్. 18 యా యూదురు అదికారిజు, పిండ్లు గుడిఃదాన్ మహాన్. పిండ్లు ఏలు రెకె ఆతండ్రె బేసినాన్ ఇజి నమ్మిత్తార్. అందెజె వారు వన్ని అయిసి అపాసిజ్ రపిస్తార్. 19 రపిస్తారె పరిజ్, "పిండ్లు మీ మరిన్నా? పిండ్లునా గుడిదాన్పుట్టాన్ఇజి మీరు వెస్సినెదెర్. అహాజ, ఏలు వాండ్లు ఎలాగ బేసినాన్?", ఇజి పరిజ్ వెన్బాతార్. అహు వెన్బాని దాక, వాండ్లు గుడిదాన్ మహాన్. వాండ్లు నెగణ్ఆతాండ్రె బేసినాన్ ఇజి నమ్మిత్తార్.

20 వన్ని అయిసి అప్పాసిరె వెప్తార్, "పిండ్లు మా మరిన్, ఇజి మాపు నెస్సాప్. పిండ్లు గుడిః దాన్పుట్టాన్ఇజి బా నెస్సాప్. 21 గాని ఏలు వాండ్లు ఎలాగ బేసినాన్ ఎయెన్వన్ని కణుకు రెక్తాన్ఇన్నిక మాపు నెన్ఏవ్. వాండ్లు బుద్ది వాతికాన్గదె. వన్నిజ్వెన్బాదు. వాండ్లు వన్నిజ్జరితిక వెప్తాన్", ఇజి వెప్తార్. 22 వన్ని అయిసి అపాసిరె ఆహా వెప్తార్. ఎందానిజ్ ఇహాజ వారు యూదురి అదికారిజ తియెల్ ఆతార్. యా యూదురు ఉండ్రె తిరుమానం కిత మహాన్. ఎయెన్బా యేసు క్రీస్తు ఇజి ఒప్పుకోటిజ వన్నిజ్యుదురి మీటిజ్ ఇండ్రాదాన్ వెల్లి కిదెజ్ ఇజి. 23 అందెజె వన్ని అయిసి అప్పాసిరె, వాండ్లు బుద్ది వాతికాన్గదె, వన్నిజ్వెన్బాదు", ఇజి వెప్తార్. 24 అందెజె యూదురు అతికారిజు మరిబా గుడిదాన్మహి వన్నిజ్ కూక్కిస్తార్. కూక్కిస్తారె, "సిను దేవుణుదిజ్ పాగిడిఃజి వెహాల. నిజి నెగణ్ కితాన్ ఇజి నీను వెస్సినె యా వాండ్లు పాపం కిజినికాన్ ఇజి మాపు నెసినాప్", ఇహాన్. 25 నస్తివలె వాండ్లు, "వాండ్లు పాపం కిజినికాన్ సిలెనా ఇజి నాను నెన్ఏ. ఉండ్రె నాను నెస్సె. నాను గుడిఃదాన్ మహా. ఏలు నాను బేసిన", ఇజి వెప్తాన్. 26 వారు వన్నిజ్, "వాండ్లు నిజి ఇనిక కితాన్? వాండ్లు ఎలాగ నీ కణుకు రెక్తాన్?", ఇజి వెన్బాతార్. 27 అందెజె వాండ్లు, నాను ముజాలె మిజి వెప్తా మన. గాని మీరు వినెదెర్. ఎందానిజ్ మీరు మరిబా విండ్రెజ్? మీరుబా వన్ని సిసూరెఆదెజ్ కోరిజినెదెరా?", ఇజి వెప్తాన్. 28 "సిను బా వన్ని సిసూనె. మాపు మోసె సిసూరెజ. 29 దేవుణు మోసెవెట పర్తితాన్ ఇజి మాపు నెసినాప్. గాని అయా వాండ్లు ఎమేణికాన్ ఇజి మాపు నెన్ఏవ్", ఇజి వారు వన్నిజ్నండె దూసిస్తార్. 30 అందెజె వాండ్లు ఈహు వెప్తాన్, "అబ్బు గొప్ప పణి యాక! వాండ్లు ఎమేణికాన్ ఇజి మీరు నెన్ఇదెర్ గాని వాండ్లు నా కణుకు రెక్తాన్. 31 దేవుణు పాపం కినివరి మొరొ వినెవన్ ఇజి మాటు నెస్సాల్. వన్నిజ్ గన్రం సీజి వన్నిజ్ ఇస్టం ఆతి పణిజ్కెని పరి మొరొ వాండ్లు వినాన్. 32 యాయ పాటొఇహానె గుడిదాన్ మహివన్ని కణుకు ఎయెన్బా ఎనెజ్బా రెక్తికె వినెవర్. 33 నా కణుకు రేక్తి యా వాండ్లు దేవుణు బాణిజ్వాతికాన్ అవన్ఇహాజ నజి నెగణ్కిదెజ్అట్ఏతాన్మరి". 34 దన్నిజ్ వారు, "సిను పాపమదానె పుట్టికి. ఏలు మజి నెన్పిస్తెజ్ వాజినెదా?", ఇజి వెప్తారె వన్నిజ్వెల్లి కితార్.

35 అయా గుడ్డిదాన్ మహివన్నిజ్ పరిసయరు వెల్లి కితార్ ఇజి యేసు విహాన్. వాండ్లు వన్నిజ్ సుడిఃతివెలె, "సిను లోకు మరిసిజ్ నమిజినెదా?", ఇజి వెన్బాతాన్. 36 వెన్బాతిజ్ వాండ్లు, "బాబు నాను వన్నిజ్ నమిదెజ్ వాండ్లు ఎయెన్ ఇజి నజి వెహాల", ఇహాన్. 37 అయావలె ఏలు, "సిను యేలు వన్నిజ్సుడిఃతి మన్ని. వాండ్రె నీ వెట పర్తిజినెకాన్", ఇజి వెప్తాన్. 38 నస్తివలె వాండ్లు, "ప్రబుమా, నాను నిజి నమిజినె", ఇహండ్రె యేసు పాదమకాజ్ ముణుకుజ్ ఊరజి మాడిఃస్తాన్. 39 అందెజె యేసు, "నాను లోకురిజ్కెకె కిదెజె వాత మన. గుడివారు బేస్తిజ్ బేస్తికార్ గుడిః ఆదెజ్ నాను వాత మన", ఇహాన్. 40 నస్తివలె వన్నిడగు నిహి మహి సెగొండార్ పరిసయరు వాండ్లు వెస్సినెక విహారె. విహారె, "ఇనిక? మాపు బా గుడిదికాపా?", ఇజి వెన్బాతార్. 41 అందెజె యేసు, "మీరు గుడిఃదికిదెర్ ఇహాజ, దేవుణు మీ పాపమకు లెక్క కివితాన్ మరి. గాని 'మాపు సుడిఃజినాప్' ఇజి మీరు వెస్సినెదెర్. అందెజె మీ లొఇ పాపమకు నిహా మనె", ఇజి వెప్తాన్.

10 "గొరెజ సాలదు, సరిదాన్ డుగ్విండ, ఆఇ సరిదాన్ డుగ్వికాన్ డొజారి కజరి ఆత మనాన్. 2 గాని సరిదాన్ డుగ్వికాన్ గొరెజ్ గవుడుఃయెన్. 3 సాలదిజ్ రయ్క కాప్కినికాన్, వన్నివందిజ్ సేప్లా రేనాన్. గొరెజ్ వన్నికంటం వెన్నె. వాండ్లు వన్నిసాంత గొరెజ పేరు అసి కూక్కి వన్కాజ్ వెల్లి సాప్తాన్. 4 వన్ని సాంతవనకాజ్ విజా వెల్లి సాప్తి వెనుక, గొరెజ ముజాల వాండ్లు నడిఃనాన్. గొరెజ్ వన్ని కంటం నెస్సె. అందెజె అవి వన్నివెట సానె. 5 గాని నెన్ఇవన్ని కంటం అవి నెన్ఉ. అందెజె వన్నివెట సాన్ఏండ, అవి వన్నిబాణిజ్ ఉహ్సె, ఇజి నాను నిజం మీవెట వెస్సినె. 6 యేసు అబ్బె నిహిమహిపరిజ్ కతవజ యాక నెన్పిస్తాన్. గాని వారు వాండ్లు వెస్సినెదనిజ్ అరదం కివితార్.

7 అందెజె వాండ్లు మరి పరివెట ఈహు వెప్తాన్: "నాను నిజం మీవెట వెస్సినె, నానె గొరెజ్ సరిలెకెండ మన్న. 8 నా ముజాల వాతికార్ విజెరెబా డొజారి కజరి ఆత మనార్. గాని గొరెజ్ పరిజ్ వినెఉతె. 9 నాను దేవుణుడగు సాండ్రెజ్ సరిలెకెండ మన్న. నా వెట డుగ్వికాన్ ఎయెన్బా నెగ్రెండ మంజినాన్. వాండ్లు లొఇ సాన్ని వెల్లి వాజి మేత మేజి మంజినాన్. 10 డొజారి డొజ కిదెజ్నొ, సప్తెజ్నొ పాడు కిదెజ్నొ వానాన్. మరి ఇన్నిదనిజ్బా రెవన్. నాను నజి వెనిపరిజ్ దేవుణువెట ఎలాకాలం బత్తిని బత్తు సీని వందిజె వాత మన్న. అయ్యాక పూర్తి సీని వందిజె వాత మన్. 11 నాను గొరెజ నెగ్గి గవుడుఃయెన్. నెగ్గి గవుడుఃయెన్ గొరెజ వందిజ్ వన్ని పాణం సీనాన్. 12 జీతం వందిజ్ గొరెజ్ అడిజినెకాన్ గవుడుఃయెన్ ఆవన్. అక్కెజ్ వన్ని సాంతగొరెజ్ ఆఉ.అందెజె దుమాలగొండి వాజినెక సుడిఃజి

గొర్రెజడిసి ఉహ్కాన్. అయావలె దుమాల్గొండి వన్కాజ్ అసి సెద్రిస్నాద్. 13 వాండ్లు జీతం వందిజ్ అడిజినాన్. గొర్రెజ ముస్సు వన్నిజ్ బాజిత సిల్లెద్. అందెజె వాండ్లు డిస్సు ఉహ్కాన్.

14¹⁵ నాను గొర్రెజ నెగ్గి గవుడుఁయెన్. బుబ్బు నజి ఎలాగ నెసినాండ్రో, నాను బుబ్బెజ్ ఎలాగ నెసినానో, అయావజ నాను గొర్రెజ నెసిన. నా గొర్రెజ్ నజి నెసినె. నాను గొర్రెజవందిజ్ నా పాణం సీజిన. 16 యా మందదు మనికెజ్ ఆవిండ, మరి సెగం గొర్రెజ నజి మన్నె. వన్కాజ్ బా నాను పీర్జి తత్తెజ్ వెలె. అవి నా కంటం వినె. అయావలె మంద ఉండ్రె ఆనాద్. గవుడుఁయెన్ ఒరెన్ ఆనాన్. 17 నాను మర్జి బత్తినివందిజె, నా పాణం సీజిన. అందెజె నా బుబ్బు నజి ప్రీమిస్నాన్. 18 ఎయెన్ బా నా పాణం నా బాణిజ్ లాగ్ వీన్. నా సాంత ఇష్టమ్ దానె నా పాణం సీజిన. నా పాణం సీదెజ్ నజి అతికారం మనాద్. మర్జి లాగ్ ఆదెజ్ బా నజి అతికారం మనాద్. యా లెకెండ్ కిదెజ్ ఇజినె నా బుబ్బు నజి ఆడ్ర సిత్తమనాన్”.

19 వాండ్లు వెహ్తి యా మాటెజవందిజె, యూదురు లోఇ ఉండ్రె ఇజ్ గొడఁబ పుట్టాద్ 20 వరి లోఇ నండొండార్, “వీండ్లు దెయం అస్తికాన్, వెరి వాండ్లు, విన్నిమాట ఎందానిజ్ వెంజినెదెర్”, ఇజి వెహ్తార్. 21 మరి సెగొండార్, “దెయం అస్తికాన్ ఒరెన్ యాలెకెండ్ వర్గివీన్. దెయం గుడిఁదివరిజ్ నెగెండ్ కిదెజ్ అల్నాదా?”, ఇజి వెహ్తార్.

యూదురు యేసుజ్ నమ్మివర్.

22 అయావలె పిన్నికాలం. యెరూసలెమ్ దు యూదురు దేవుణుగుడిఁదు బసె ఆతి దినంవందిజ్ ఎత్తుకిని పండొయ్ కిజినార్ †.

23 నస్తివలె యేసు, దేవుణుగుడిఁదు మన్ని సాలోమోను అరుజు ఇజి కూకె ఆని అరుజుదు బూలాజి మహాన్. 24 అయావలె యూదురు వన్ని సుటులం ఆతారె, “ఎసాడ్ రోస్సు నీను మజి టెటాజ్ వెహ్ వీండ, అనుమానమ్ కు ఇడ్జిని? నీను క్రీస్తు ఇహిజ, మజి తినాజ్ వెహ్ అ”, ఇహార్. 25 అందెజె యేసు, నాను మీవెల వెహ్. గాని మీరు నమ్మిఇదెర్. నా బుబ్బు సత్తుదాన్ నాను బమ్మాని పణిజ్ కిజిన. అయా పణిజ్ నావందిజ్ సాసి వెహ్సినె. 26 గాని మీరు నమ్మిఇదెర్. ఎందానిజ్ ఇహిజ, మీరు నా గొర్రెజ్ ఆఇదెర్. 27 నా గొర్రెజ్ నా కంటం వెంజినె. నాను వన్కాజ్ నెసిన. అవి నావెట వాజినె. 28 నాను వన్కాజ్ ఎలాకాలం దేవుణువెట బత్తిజిని బత్తు సీజిన. అవి ఎసెజ్ బా నానం ఆఉ. వన్కాజ్ ఎయెన్ బా నా కీదాన్ ఒత్తెజ్ అట్ వీన్. 29 వనకాజ్ నజి సీత్తి నా బుబ్బు విజెరిజ్ ఇంక పెరికాన్. అందెజె ఎయెన్ బా వనకాజ్ బుబ్బుకీదాన్ డొజ కిజి ఒత్తెజ్ అట్ వీన్. 30 నానుని నా బుబ్బు, ఉండ్రె ఆత మనాప్”, ఇజి వెహ్తార్. 31 నస్తివలె, యూదురు వన్నిజ్ మరి డెఁయిదెజ్ ఇజి పణుకు పెహ్తార్. 32 గాని యేసు వరిజ్, “నా బుబ్బు సత్తుదాన్ నండొ బమ్మ ఆని పణిజ్ కిజి మిజి తోరిస్త మన్ను. వనకలోఇ ఎమేణి పణి వందిజ్ నజి మీరు పణుకుజాణిజ్ డెఁయినెదెర్?”, ఇజి వెహ్తార్. 33 అందెజె యూదురు, “మాపు పణుకుజాణిజ్ డెఁయిజినిక నీను కిత్తి ఇని నెగ్గి పణిజవందిజ్ ఆవీద్. గాని నీను ఒరెన్ లోకుఆజి మంజి, నాను దేవుణు ఇజి వెహ్ ఆజి దేవుణుదిజ్ దూసిస్సివందిజె మాపు పణుకుజాణిజ్ డెఁయినాప్”, ఇజి వెహ్తార్.

34 అందెజె వాండ్లు వరిజ్ ఈహు వెహ్తార్, “మీరు దేవుణుజు” ఇజి దేవుణుని వెహ్తార్ ††, ఇజి దేవుణు మాటదు రాస్త మనాద్ గదె? 35 దేవుణు మాటదు వెహ్సినికెజ్ ఎసెజ్ బా తవ్ ఉ. దేవుణు మాట సిత్తి లోకురిజ్, ‘దేవుణుజు’, ఇజి దేవుణు కూక్కినాన్. 36 బుబ్బాతి దేవుణునె నజి వన్ని వందిజ్ కేట కితాండ్రె యా లోకమ్ దు షాక్తాన్. అహిజ, ‘నానె దేవుణుమరిసి’ ఇజి నాను వెహ్సివలె దేవుణుదిజ్ దూసిస్సాన్ ఇజి మీరు ఎలాగ వెహ్సినిదెర్. 37 నాను నా బుబ్బు వెహ్తి పణికివీండ మహిజ, నజి నమ్మిమాట్. 38 గాని నాను కిత్తి అయా పణిజ నమ్మిదు. నజి నమ్ ఇజ్ బా అయా పణిజ నమ్మిదు. ఎందానిజ్ ఇహిజ, బుబ్బు నావెట కూడఁజి మంజినాన్. నాను బుబ్బువెట కూడఁజి మంజిన, ఇజి మీరు నెసి అర్దం కిజి మండ్రెజ్. 39 యాకెజ్ విహారె, మరి వారు వన్నిజ్ అస్తిజ్ సుడఁతారె. గాని వాండ్లు వరి కీదాన్ తప్ప ఆతాండ్రె సాహాన్.

40 వాండ్లు యెర్దాను గడ్డ అతాహ పడఁకాద్ మన్ని ఉండ్రె బాడిఁదు మరిబా సాహాన్. బానె యాహాను బాప్తినం సీజి మహాన్. వాండ్లు బాన్ మహాన్.

41 నండొండార్ వన్నిడగ్రు వాతార్. వారు, “యోహాను ఇని బమ్మాని పణిబాన్ కివీతాన్. గాని విని వందిజ్ యెహాను వెహ్తి సజతిజ్ విజా నిజామ్ నె”, ఇజి వెహ్తార్.

42 అబ్బె నండొండార్ యేసుముస్సు నమకం ఇడ్డార్.

సాతి లాజరుజ్ నిక్కినాన్

11 ¹⁻³ బెతానియ ఇన్ని నాటో లాజరు ఇన్నికాన్ ఒరెన్ మనాన్. వన్ని బీబిక్ నె మార్త మరియ ఇనికెజ్. యా మరియనె యేసు పాదమ్ కాజ్ అతరు ఇన్ని వాసన నూనె వాక్తాదె, దన్నిక్కోప్పదాన్ తెల్తాద్. ఉండ్రె నాండిజ్ లాజరుజ్ జబ్బు వాతాద్. నీర్ నం లాపు ఆతిజ్, వన్ని బీబీన్ కి యేసుడగ్రు కబ్బు షాక్తె, ప్రబువా, నీను లాపు ప్రీమ కిజిని నీకులాయెన్ నీరసం ఆత మనాన్, ఇజి. 4 యేసు యా కబ్బు విహండ్రె, “వాండ్లు సావీన్. సానివందిజ్ వాతిక ఆవీద్ యా నీర్ నం. గాని దేవుణు గొప్ప పెరికాన్ ఇజి లోకురిజ్ తోరిస్సెజ్. ఎందానిజ్ ఇహిజ, దిన్నిదటాన్ దేవుణు మరిసి గొప్పపెరికాన్ ఇజి తోరె ఆదెజ్”, ఇజి వెహ్తార్. 5 యేసు మార్తెజ్, దన్నితజిని మరియెజ్, లాజరుజ్ లాపు ప్రీమిస్నాన్. 6 గాని లాజరు నీర్ నం లాపు ఆతాన్ ఇజి కబ్బు విహిజ్ బా వాండ్లు బేగి సాన్ వీతాన్. వాండ్లు మహి బాన్ మరి రుండి రోస్సుబా మహాన్. 7 వెనుక వాండ్లు వన్ని సిసూర్జ, “రదు, మాటు యూదయ దేనమ్ దు మర్జి సానాట్”, ఇజి వెహ్తార్. 8 అయావలె వారు, “బోదకినికి, యూదురు నిజి పణకాణిజ్ డెఁయెదెజ్ సెగం రోస్సు ముజాలె సుడఁతారె గదె. మరిబా నీను అబ్బె సాండ్రెజ్ సుడఁజినెదా?”, ఇహార్. 9 అందెజె యేసు, “వేడకాజ్ వన్నెండు గంటెజ్ మనె. సిలె? అందెజె ఒరెన్ వేడె బూలాతిజ, వాండ్లు తోరో ఇడ్జి అర్ నె. ఎందానిజ్ ఇహిజ, వాండ్లు యా లోకమ్ ది జాయి సుడఁజినాన్. 10 గాని వాండ్లు రెయితు బూలాతిజ, వాండ్లు తోరో ఇడ్జి అర్నాన్. ఎందనిజ్ ఇహిజ, వన్ని లోఇ జాయి సిల్లెద్”, ఇజి వెహ్తార్. 11 యాక వెహ్తండ్రె, మరి సిసూరిజ్ వెహ్సినాన్, “మా కూలాయెన్ ఆతి లాజరు నిద్రకిజినాన్. వన్నిజ్ నికెజ్ నాను బాన్ సాన్సిన. 12 వన్ని సిసూరు, “ప్రబువా, వాండ్లు నిద్రకిజినాన్ ఇహిజ, వాండ్లు నెగెణ్ అనాన్ లె”, ఇహార్. 13 లాజరు సాత మనాన్ ఇజి యేసు వెహ్తార్. గాని వన్నిసిసూర్ మాముల్ నిద్రవందిజె వాండ్లు వెహ్సినాన్ ఇజి ఒడిబితారె. 14-15 అందెజె వాండ్లు వరిజ్ తినాజ్ వెహ్తార్, “లాజరు సాతాన్. అయావలె నాను వన్నివెట మన్ ఏత. అందెజె నాను మీ వందిజ్ నర్ల ఇజిన. ఎందానిజ్

† యెరుసలెం గుడిఁ ముజాల నానం కిత్తార్ అయాక మరి తోహారె గుడిఁదు పార్దనం కిదెజ్ పూజిజ్ కిదెజ్ మొదొల్లెనార్. అయాకాలం ఒడిబిజి యూదురు కిని వండొయెనె యా గుడిఁదు బసె ఆతి దినం వందిజ్ ఎత్తుకిని పండొయె. †† క్రీస్తు 82:6.

ఇహిజ, మీరు నజీ నమ్మినిదెర్లె. అందెజె రదు, వన్ని బాన్సానాట్", ఇజి వెప్తాన్. 16 నస్తవలె దిదుము ఇజి కూకె ఆని తోమా మహి సిసూరిజ్, "రదు మాటు బా సానాట్. వన్నివెట సాదెజ్సానాట్", ఇహాన్.

17 యేసు వాతివలె, లాజరుజ్ సమాది కిజి నాల్గి దినమ్కు ఆతె ఇజి నెస్తాన్. 18-19 బెతానియ యెరూసలెమ్దాన్ ఎంజు ఇంసుమింసు రుండి మయ్లుజ్ దూరం మన్నె. నండొండార్ మార్తెజ్ మరియెజ్ ఓదిస్తెజ్ వాత మహార్. వరి తంబెర్ని సాతి వందిజ్, వారు ఓదిస్తెజ్ వాతార్. 20 యేసువాజినాన్ ఇజి వెప్తి మాట విహాదె, మార్త ఎర్దు సాహాద్. వన్నిజ్ సుడెదెజ్ అది సాహాద్. గాని మరియ ఇండ్రొ బస్త మహాద్. 21 నస్తవలె మార్త యేసుజ్, "ప్రబువా, నీను ఇబ్బె మంజినిక ఇహిజ, నా తంబెరి సాంతాన్మరి. 22 గాని ఏలుబా నీను దేవుణుదిజ్ ఇనిక లొస్తిజ్బా వాండ్రు నిజి సీనాన్ ఇజి నాను నెన్న", ఇజి వెప్తాద్. 23 అందెజె యేసు, "నీ తంబెర్ని మర్జి నిజ్నాన్లె", ఇజి వెప్తాన్. 24 అయావలె అది, "యా లోకమ్దిజ్ కడెవెరి దినమ్దు, వాండ్రు మరి బత్రినాన్లె ఇజి నాను నెన్న", ఇహాద్. 25-26 అందెజె యేసు దనిజ్ ఈహు వెప్తాన్, "నానె సాతి వరిజ్ నిక్సికాన్. వరిజ్ మరి బత్కు సీనికాన్ నానె. నజీ నమ్మినికాన్ ఎయెన్బా వాండ్రు సాతిజ్బా మరి బత్రినాన్. నజీ నమ్మిజి బత్రిజిని ఎయెన్బా ఎసెజ్బా సాన్. నీను యాకెజ్ నమిజినిదా?". 27 అయావలె అది, "ఓఓ, నాను నమిజిన, నీనె దేవుణు మరిసి ఆతి క్రిస్తు ఇజి. నీనె యా లోకమ్దు వాదెజ్మన్నికాన్ ఇజి దేవుణు వెప్తికె", ఇజి వెప్తాద్.

28 యాకెజ్ వెప్తాదె, అది మర్జి సాహాదె, దన్నితజి మరియెజ్కూక్తాదె, "బోదిస్తికాన్ఇబ్బె మనాన్. నిజి కూక్సినాన్", ఇజి గిబ్బు డగ్రు వెప్తాద్. 29 మరియ యాక విహిజ్, అది గజిబిజి నిజితాదె, వన్ని డగ్రు సాహాద్. 30 అయావలె యేసు ఇంక ఆ నాటొ రెండ్రె. మార్త వన్నిజ్ దసూల్ఆతి బాడిద్నె మహాన్. 31 మార్తెజ్ ఓదరిసి దనివెట ఇండ్రొ మహి యూదురు అది గజిబిజి నిజ్జి సాన్నినిక సుడెతివలె, అది అడెబదెజ్ దూకిదు సాన్నినాన్సు ఇజి దన్నివెనుక సాహార్.

32 యేసు వన్ని బాడిదు మరియ వాతాదె, వన్నిజ్ సుడెతాదె, వన్ని పాదమ్కాజ్ అర్తాద్. అర్తాదె, "ప్రబువా, నీను ఇబ్బె మంజినిక ఇహిజ, నా తంబెరి సాంతాన్మరి", ఇహాద్. 33 అది అడెబాజినిక యేసు సుడెతాన్. దని వెట వాతి యూదురు బా అడెబాజినిక సుడెతాన్. అయావలె వాండ్రు మన్నుదు బాద ఆతాండ్రె మొకొం డెప్తాన్. 34 "వన్నిజ్ఎంబె ఇడ్తి మన్నిదెర్?", ఇజి వరిజ్ వెన్బాతాన్. "వాజి సుడెఅ ప్రబువా", ఇహార్ వారు. 35 యేసు కనీర్డిఃప్తాన్ 36 అయావలె యూదురు, "సుడెదు వాండ్రు ఎసా వన్నిజ్మిస్తాన్", ఇజి వెప్తాద్. 37 గాని వరి లొఇ సెగొండార్, "పిండ్రు గుడిః వరిజ్ నెగెణ్కెతాన్. మరి ఎందనిజ్లాజరు సావెండ కిదెజ్అవతాన్", ఇజి వర్గితార్. 38 అయావలె యేసు నండొ బాద ఆతాండ్రె దూకిదు వాతాన్. అయాక ఉండ్రె సాలం. దన్నిముజాల ఉండ్రె పెరి పణుకు ఇడ్డ మహార్. 39 యేసు, "అయా పణుకు లాగిదు", ఇజి వెప్తాన్. నస్తవలె సాతివన్ని బీదెసి మార్త వన్నిజ్, "ప్రబువా, వినిజ్ముసి నాల్గి రోస్కు ఆజినాద్. అందెజె గొప్ప కంపు ఏలు మంజినాద్లె", ఇజి వెప్తాద్ 40 అందెజె యేసు దనిజ్, "నీను నమ్మితిజ, దేవుణు గొప్ప పెరికాన్ ఇజి నీను సూణిలె ఇజి నాను నిజి వెప్తా గదె?", ఇజి వెప్తాన్. 41 అందెజె వారు పణుకు లాగితార్. యేసు కణుకు ముస్కు బస్తాండ్రె, "ఓ బా నీను నా పార్దనం వెంజినిజ్నిజి వందనమ్కు. 42 నీను ఎస్తవలె బా నజీ వెంజినిలె ఇజి నాను నెన్న. గాని ఇబ్బె నిల్ని మంజిని యా లోకుర్వందిజ్ నాను నిజి వందనమ్కు వెప్తా మన. ఎందానిజ్ ఇహిజ, నీనె నజి ఫొక్తి మన్నికాన్ఇజి వారు నమిదెజ్", ఇజి పార్దనం కితాన్. 43 పార్దనం కితాండ్రె, వాండ్రు, "లాజరు వెల్లి రల", ఇజి డేల్లి డటం వెప్తాన్. 44 అయావలె లాజరు వెల్లి వాతాన్. వన్ని కికు కాల్కు పాతెజాణిజ్నుటిస్త మహార్. వన్ని మొకొం రూమూల్దాన్ తొక్కొత మహాద్. యేసు వరిజ్, "వన్నిజ్నుటిస్త మన్నికెజ్లాగిదు. వన్నిజ్ నడిఃనిలెకెండ్ కిదు", ఇహాన్.

యేసుజ్నెప్తెజ్ సుడెజినార్

45 అందెజె మరియెజ్ సుడెదెజ్ వాతి యూదురు లొఇ నండొండార్, యేసు కితిక సుడెతాదె, వన్ని ముస్కు నమకం ఇత్తార్. 46 గాని వరి లొఇ సెగొండార్ పరిసయురుజ డగ్రు సాన్ని, యేసు కితిక వరిజ్ వెప్తార్. 47 నస్తవలె పెరి పుజెరిబు నీ పరిసయురు, పెర్లల్జ కూకెపిస్తారె, "వాండ్రు గొప్ప బమ్మ ఆని పణిజ్ కిజినాన్? అందెజె మాటు ఇన్నిక కిదెజ్? 48 మాటు వన్నిజ్ యా లెకెండ్ పణి కిదెజ్ సరి సితిజ, లోకుర్ విజెరె వన్నిజ్ నమినార్. రోమాదికార్ వానారె, మా గుడిః, యూదురు ఆతి మజి విజా నాసనం కినార్", ఇజి వర్గితార్.

49-50 నస్తవలె వరి లొఇ కయవా ఇన్నికాన్ ఒరెన్ మహాన్. వాండ్రు అయా ఏటు విజా పుజెరిజ ముస్కు పెరి పుజెరి. వాండ్రు వరిజ్, "మీరు ఇనికబా నెస్ఇతిదెర్. రోమాదికార్ మా గుడిః, యూదురు ఆతి మజి పూర్తి నాసనం కినిదని ముస్కు లోకుర్ వందిజ్ ఒరెన్ వాండ్రు సానికాదె మిజి నెగెద్ ఇజి మీరు నెస్ఇదెరా?", ఇహాన్.

51-52 వాండ్రు వెప్సిని దని అర్దం వాండ్రె నెస్వతాన్. గాని వాండ్రు ఆ ఏటు విజా పుజెరిజ ముస్కు పెరి పుజెరి. అందెజె యేసు యూదురు వందిజ్ సానాన్లె ఇజి, యూదురు వందిజె ఆవండ, సద్దితి మన్ని దేవుణు కొడొరిజ్ కుడుప్పి తని వరిజ్ ఉండ్రె లోకుర్కిదెజ్. దనివందిజ్ యేసు సానాన్లె ఇజి వాండ్రు ఎతు కిజి జర్గొఇ ముజాలె వెప్తాన్. 53 అందెజె అయా నాండిజ్అసి వన్నిజ్నెప్తెజ్ వారు సుడెజి మహార్. 54 అందెజె యేసు విజెరె వన్నిజ్ నెస్సిలెకెండ్ బూలావతాన్. గాని వాండ్రు ఎయెర్ మన్జ ఇబాడిః డగ్రు మన్ని ఉండ్రె ప్రాంతమ్దు సాహాన్. అయా ప్రాంతమ్దు మన్ని ఎస్తయెం ఇన్ని ఉండ్రె పట్టుమ్దు వన్ని సిసూర్ వెట వాండ్రు మహాన్.

55 యూదురి పస్కవండొయ్ డగ్రు వాతివలె, నండొ ప్రాంతమ్కాణిజ్ నండొండార్ యెరూసలెమ్దు సాహార్. పండొయ్ ముజాల విజెరె సుబ్బరం మనిక ఉండ్రె ఆసారం. అందెజె, వారు సుబ్బరం మన్నివందిజ్ వారు యెరూసలెమ్దు వాతార్. 56 వారు యేసుజ్ రెబాజినె మహార్. వారు దేవుణు గుడిః అరుబుదు నిహి మహివలె, ఒరెన్ వెట ఒరెన్, "ఇన్నిక ఒడెబిజిని? వాండ్రు పండొయ్దిజ్ వానాండ్రా, సిలెనా?", ఇజి వర్గితార్. 57 గాని పెరి పుజెరిబు ని పరిసయురు ఉండ్రె ఆడ్రె సిత మనార్. ఎయెన్బా యేసు ఎంబె మనాన్ ఇజి నెస్తిజ, వాండ్రు వరిజ్వెప్తాజ్. ఎందానిజ్ ఇహిజ, వన్నిజ్ అరెస్టు కిదెజ్.

12 పస్కవండొయ్ మొదొల్స్తెజ్ ఆరు దినమ్కు మనె. అయావలె, యేసు లాజరు మన్ని బెతానియ ఇని పట్టుమ్దు సాహాన్. యా లాజరుజ్నె యేసుసావుదాన్ బత్రిస్తాన్. 2 అబ్బె వారు యేసువందిజ్ ఉండ్రె వింతు తయార్ కితార్. మార్తనె వింతుదు సవదరెణి. బోజనమ్దిజ్ బన్ని మహిపరివెట లాజరుబా యేసువెట బస్తాన్. 3 నస్తవలె, మరియ ఉండ్రె సీసాదు మన్ని వాసన నూనె లాగితాదె, యేసు పాదమ్కాజ్ వాక్తాదె దనికొపుదాన్ వన్ని పాదమ్కు

తెలితాద్. యా వాసన నూనె, నండొ కరిద్తిక. యాక జబమాంసి ఇని ఉండ్రీ మొకదానె, తయార్ కితిక. అది వాసన నూనె వాక్తివెలె, అయా ఇల్లు విజా నెగ్గి వాసనందాన్ నిండ్రీతాద్.

45 అయావలె వన్ని సిసూర్ లోఇ ఒరెన్ఆతి ఇస్కరియొతు యూదా, “ఎందానిజ్ యా వాసనం నూనె మూండ్రీ వందెజ్ వెండి రుపాయ్జు పార్ని అయా డబ్బు బీదాతి వరిజ్ సిఇతి?”, ఇజి వెహ్సాన్. యా ఇస్కరియొతు యుదనె, వెన్కా యేసుజ్ యుదురి అదికారిజ కీదు ఒవజెప్పికాన్. 6 ఏలు వాండ్రు యా లెకెండ్ వెహ్సాక, బీదాతివరిజ్ నెగెండ సుడేజిన ఇజి అవద్ గాని వాండ్రు డొజ వాండ్రు. వరి సేవవణి వందిజ్ లోకుర్ సీజిని డబ్బు ఇడ్డి సన్ని వీండ్రె అస్త మనాన్. వాండ్రు వన్కాలోఇహాన్ వన్ని సాంత కర్పు వందిజ్ డొజ కిజి మహాన్. అందెజె వాండ్రు ఆహా వెహ్సాన్. 7 అందెజె యేసు, “దనిజ్బాద కిమాట్. నజీ సమాది కిని దినమ్దాక అయాక దని బాన్మన్సిద్. 8 బీదదికార్ ఎస్తివలెబా మీ వెట మంజినార్. గాని నాను ఎలాకాలం మీ వెట మన్ఎ”, ఇజి వెహ్సాన్. 9 అహిజ, యూదుర్జ లోఇ మంద లోకుర్, యేసు బెతానియదు మనాన్ ఇజి నెస్తారె అబె వాతార్. వారు యేసుజ్ సుడేదెజ్ఇజిని ఆవండ, వాండ్రు సావుదాన్బత్కిస్తి లాజరుజ్ సుడేదెజ్బా వాతార్. 10-11 అందెజె పెరి పుజెరిజు, లాజరుజ్బా సస్తెజ్ ఇజి ఆలోసనం కితార్. ఎందానిజ్ ఇహిజ, వన్నిజ్ జగ్గితి దనివందిజ్ సుడేజి యూదురు నండొండార్, వరి పెద్దల్లెజి డిసి యేసుముస్సు నమకం ఇడేజి మహార్. 12 మర్ననాండేజ్, వస్క వండొయ్దిజ్ యెరుసలెం పట్టుమదు వాతి మందలోకుర్ యేసు యెరుసలెమదు వాజినాన్ ఇజి వెహ్సాన్. 13 అందెజె వారు ఈత మటెజ్ అస్తారె, పట్టుమదాన్ వెల్లి సాహార్. వన్నిజ్ ఎద్దు సాన్ని, “ఓనన్న ప్రబు సీత్తి అతికారమదాన్ వాజిని వన్నిజ్ పాగిడిసిద్. ఇస్రాయేలు లోకురిజ్ ఏలుబడిః కినిరాజాజ్ పాగిడిసిద్”, ఇజి డటం డేల్ని వెహ్సాన్.

14-15 “ఓ సియోను గాలీసి †, తియెలామాట్. ఇవిలోన్ మీ రాజా గాడఃదె పిల్ల ముస్సు ఎక్క బస్తాండ్రె వాజినాన్ †”, ఇజి దేవుణు మాటదు రాస్తి మన్నిలెకెండె, యేసు ఉండ్రీ గాడఃదె పిల్లదిజ్ సుడేతాండ్రె దనిముస్సు బస్తాండ్రె వాజినాన్. 16 అయావలె వన్నిసిసూర్ యా జగ్గితి వన్కాజ్ అర్దం కిపితార్. గాని వెనుకయేసు సాజి, మరి బత్కిజి, దేవుణు మంజిని బాడిదు వన్ని వెట గొప్ప జాయ్దు మండ్రెజ్ దేవుణు వన్నిజ్ ఒతివెలెనె, యా జగ్గితి సజతిజ్ వన్నివందిజ్ దేవుణు మాటదు ముజాలె రాస్త మనాన్ ఇజి అయాక వన్నిజ్ జగ్గితాద్ ఇజి వారు అర్దం కితార్. 17 అహిజ, యేసు లాజరుజ్ దూకిదాన్ కూక్కి సావుదాన్ మరి బత్కిస్తివలె వన్ని వెట మహి లోకుర్నె, లాజరుజ్ జగ్గితిక సాటిసినార్. 18 యా లోకుర్ వెహ్సా మాట విహారె, మంద లోకుర్వన్నిజ్ ఎద్దు సాన్సినార్. ఎందానిజ్ఇహిజ, వాండ్రు బమ్మాత్తి గొప్ప పణిజ్ కిత్రాన్ ఇజి వెహ్సాన్. 19 అయావలె పరిసయ్రుజు వరిజ్ వారె, “ఇదిలో, నండొ లోకుర్ వన్ని వెన్కా సాన్సినార్. మాటు కిజినికెజ్ ఇనికబా, వన్ని వెట సాన్ఎండ వరిజ్ ఆవ్కిక”, ఇజి వర్గితార్.

యేసు వన్నిసావు వందిజ్ వర్గినాన్

20 నస్తివలె, వస్క వండొయ్ కినివలె దేవుణుదిజ్ పాగిడిజి మాడిస్తిజ్ యెరుసలెమదు వాతి వరి లోఇ సెగొండార్ యూదురు ఆఇకార్ మహార్. 21 వారు గలీలయ ప్రాంతమది బెత్నయిదు పట్టుమది పిలిపు డగ్రు వాతారె, “బాబు మాపు యేసుజ్ సుడేదెజ్ ఆస ఆజినాప్”, ఇజి వెహ్సాన్. 22 పిలిపుజ్వెహ్సాజ్, వాండ్రు ఆండ్రెయెజ్ వెహ్సాన్. పీరు రిపీర్ కూడ్డి యేసుజ్ వరి ఆస వెహ్సాన్.

23-24 అందెజె యేసు వరివెట ఈహు వెహ్సానాన్. “లోకు మరిసి ఆతి నజీ దేవుణు వన్ని వెట వన్ని జాయిదు మండ్రెజ్ వాండ్రు మంజిని బాడిదు ఒని దినమ్కు డగ్రు ఆతె మనె. నాను నిజం వెహ్సాన్ ‘ఉండ్రీ గోదము గిడ బూమిదు అర్ని సాఎండ మహిజ, అది అయ లెకెండ్ మంజినాద్. గాని ఆ గిడ సాతిజ నండొ గిడజ్ఆనె. 25 ఎయెన్బా వన్ని సాంత పాణమ్దిజ్ లాపు ప్రేమిసిజ, వాండ్రు వన్ని పాణం ఎలాకాలం దేవుణు వెట బత్కిని బత్కుదు మన్ఎండ అయాక పాడు కిజినాన్. గాని ఎయెన్బా యా లోకమ్దు బత్కినివలె, వన్ని సాంత పాణమ్దిజ్ లాపు ప్రేమిన్ఎండ మహిజ, వాండ్రు ఎలాకాలం బత్కిని బత్కు వందిజ్ వన్ని పాణం కాపాడిజినాన్. 26 ఎయెన్బా నజీ సేవ కితిజ, వాండ్రు నా సిసూ ఆదెజ్వలె. నాను ఎంబె మంజినాన్, అబె నజీ సేవ కినికాన్బా మంజినాన్. నజీ సేవ కిని వన్నిజ్ నా బుబ్బు గవ్దం సీనాన్”. 27 మరిబా వాండ్రు వెహ్సానాన్, “ఏలు నా పాణం బాద ఆజిన. నాను ఇన్నిక ఇండ్రెజ్? ఓ బా, నజీ వాని కస్టమ్దాన్ నజీ తప్పిన్ల, ఇజి వెహ్సాజా? సిలె. ఎందానిజ్ ఇహిజ, యా కస్టమ్కు ఓరిస్తి వందిజె నాను వాత మన. 28 ఓ బా, నీను గొప్ప పెరికి ఇజి లోకురిజ్తోరె ఆత”, ఇజి వెహ్సాన్. అయావలె ఆగాసమ్దాన్ ఉండ్రీ జాటు వాతాద్. “నాను గొప్ప పెరికాన్ ఇజి నీను కితి పణిజాణిజ్ తోరె ఆత మన. నీను సాజి మరి బత్కినివలె నాను మరి అయాక తోరె ఆన”, ఇజి జాటుదు దేవుణు వర్గితాన్. 29 నస్తివలె అబె నిహి మహి లోకుర్ అయాక విహారె, అయా జాటు ఆగాసమ్దు దిడిఃతిక ఇజి వెహ్సాన్. గాని మరి సెగొండార్, “దేవుణు మంజిని బాడిదాన్దేవుణు దూత ఒరెన్ వన్ని వెట వర్గితాన్”, ఇహార్.

30 అందెజె యేసు, “ఏలు మీరు జాటుదాన్విహి మాటెజ్నజీ దేవుణు పోక్తాన్ఇజి మీరు నెస్తిజ్మి వందిజె వాతె. నా వందిజ్ ఆవద్. 31 ఇయేలె, దేవుణు యా లోకమ్ది లోకురిజ్ తీర్పు సీని సమయం. ఇయేలె లోకమ్ది అతికారి ఆతి సయ్తానుజ్ వన్ని అతికారమ్దాన్ దేవుణు వెల్లి నెక్కి సమయం. 32 నజీ బూమి ముస్సుహాన్ సిలువాదు ఎక్కిస్తివలె, విజా దేసెమ్కాణి లోకురిజ్, నాను నా డగ్రు తపిస్సాలె”, ఇజి వెహ్సాన్. 33 వన్నిజ్ఎలాగ సవ్నారెలె ఇజి లోకురిజ్ తోరిస్తిజ్ వాండ్రు యా మాటెజ్జగ్గిని ముజాలె వెహ్సాన్.

34 అయావలె మంద లోకుర్వన్నిజ్, “దేవుణు మాటదు మాపు నద్విజినాప్గదె క్రిస్తు ఎలాకాలం బత్కినాన్లె ఇజి. మరి నీను ఎలాగ వెహ్సాని, లోకు మరిసి ఆతి నిజీ సిలువాదు ఎక్కిస్తివలె ఇజి. అహిజ, నీను వెహ్సాని లోకు మరిసి ఎలాగ మర్తికాన్.

35 అందెజె యేసు, “వాండ్రె జాయి ఇజి వన్ని వందిజె వరిజ్ ఈహు వెహ్సానాన్: ‘జాయి ఆతి నాను మీ వెట సెగం కాలమ్నె మంజినలె. అందెజె సీకట్వాని ముజాల, జాయ్ఆతి నాను మనివలె మీరు నజీ ఇస్టం ఆని వజ నడిఃదు. సీకటుదు నడిఃనికాన్ వాండ్రు ఎంబె సాన్సినాండ్రె ఇజి వాండ్రు నెన్ఎన్. 36 అందెజె మీరు జాయ్దు బత్కిజిని నా కొడొర్ఆదెజ్, జాయి ఆతి నాను మీ వెట మనివలె నజీ నమ్మిదు. వాండ్రు యా మాటెజ్వెహ్సాండ్రె వరిబాణిజ్ సాహండ్రె వరిజ్ తోర్ఎండ డాజ్జి మహాన్. 37 వాండ్రు నిసా గొప్ప బమ్మాత్తి పణిజ్ పరిఎద్దు కితిజ్బా యూదురు లోఇ నండొ లోకుర్ వన్నిజ్ నమివితార్. 38 ప్రబువా మాపు వెహ్సా మాటెజ్ ఎయెర్ నమ్మితార్? ఎయెర్ దేవుణు వన్నిసత్తు తోరిస్సాన్?’, ఇజి యెసయ ప్రవక్త వెహ్సా మాట పూర్తిఆని వందిజె వారు నమ్మివితార్.

† జేకరి 9:9 †† సియెసు గాలీసి ఇజి ఇబ్బె వెహ్సానిక యెరుసలెమదు మన్ని వరిజె. ‡ యెసయ 53:1

39⁴⁰ యెసయ ప్రవక్త మరి ఈహు వెహ్తా మనాన్, 'వారు వరి కణకాణిజ్ తోవొండ మండ్రెజ్ దేవులు వరి కణుకు గుడిః కితాన్. వారు వరిదాన్ అర్లం కిఎండ మండ్రెజ్ దేవులు వరి మన్నుసు గటి కితాన్. వరిజ్ నెగెణ్ కిదెజ్ వారు నా డగ్రు రెఎండ మండ్రెజ్ నాను అయా లెకెండ కిత", ఇజి. అందెజె వారు యేసుజ్ † నమ్మిదెజ్ అల్వొండఆతార్. 41 యెసయ ఎందానిజ్ యా లెకెండ వెహ్తాన్ ఇహిజ, యేసు గొప్ప పెరికాన్ ఇజి వాండ్రు సుడత మహాన్. వాండ్రు వెహ్తా మాటెజ్ యేసు వందిజె వెహ్తానె.

42 గాని యూదురు అదికారిజలొఇ నండొండార్ యేసు మున్ను నమకం ఇల్లార్. గాని వరినయరు వరిజ్ ఇన్నిక కినార్ ఇజి తియెల్ ఆజి వారు యేసుజ్ నమ్మిజినాప్ ఇజి లోకుర్ ఎద్దు వెహ్తాలె. వరిజ్ యూదురి మీటిజ్ ఇండ్రొణిజ్ వెల్లి కినార్ ఇజి తియెల్ ఆతార్. 43 ఎందానిజ్ ఇహిజ, వారు దేవులు వరిజ్ పాగిడిః దని మున్ను లోకుర్ వరిజ్ పాగిడిఃదెజ్ ఇజి నండొ కొరితార్.

44 మరి యేసు ఈహు డటం వెహ్తానాన్, "నా మున్ను నమకం ఇడ్డికాన్ ఎయెన్బా నజిన్ ఆఎండ, నజి పొక్తివన్నిజ్బా నమిజినాన్. 45 నజి సుడఃజినికాన్ ఎయెన్బా నజి పొక్తి వన్నిజ్బా సుడఃజినాన్. 46 నజి నమ్మినికాన్ ఎయెన్బా సీకట్దు బత్తిఎండ మంజిని వందిజ్ నాను జాయి లెకెండ లోకమ్దు వాత మన్ను.

47 నా మాటెజ్ వెంజి అయావజ కిఇవన్నిజ్, తీర్పు సీజినాను సిక్కు సివ. ఎందానిజ్ ఇహిజ, ఆహా తీర్పు సీజి సిక్కు సీదెజ్ ఆవద్ నాను అయా లోకమ్దాన్ వాతిక. గాని లోకురిజ్ రక్తిన్ని వందిజె వాత. 48 నజి నెక్కి పొక్తి నా మాటెజ్ వజ కిఇవన్నిజ్, వాండ్రు కిఇకాదె వన్నిజ్ ఎలాకాలం మన్ని సిక్కు సీనాద్. నాను వెహ్తా మాటెజ్ ఆకార్ దినిమ్దు నాను మరజి వానివలె వన్నిజ్ తీర్పు సీనాద్. 49 ఎందనిజ్ ఇహిజ, నాను నా సాంత అతికారమ్దాన్ వెహ్తా ఆవద్. గాని నజి పొక్తి నా బుబ్బనె, నాను ఇన్నిక వెహ్తాజ్, ఎలాగ వెహ్తాజ్ ఇజి ఆడ్ర సిత మనాన్. 50 వాండ్రు వెహ్తా ఆడ్రెజ్ లొజిజినికాన్ ఎలాకాలం బత్తినాన్. అందెజె నా బుబ్బ నజి వెహ్తా ఇజి వెహ్తాజ్ నాను వెహ్తానె.

యేసు వన్నిసినూరిజ్ పాదమ్కు నొర్జినాన్

13 నస్తవలె, వస్కు వండొయ్ కిని ముజాహి దినం. యా లోకం డిసి బుబ్బ డగ్రు సాండ్రెజ్ టయం ఆతాద్ ఇజి యేసు నెస్తాన్. వాండ్రు ఎస్తవలెబా వన్ని మున్ను నమకం ఇడ్డివరిజ్ ప్రేమిసి మహాన్. వాండ్రు సానిదాక ప్రేమిసినె మహాన్. 2 యేసుని వన్ని సినూరు పాదొయ్ బోజనమ్దిజ్ బస్త మహాన్. సిమెసు మరిసి ఆతి ఇస్కరియెతు యూద మన్నుదు నయ్తాను ముజాలె ఉండ్రె ఆలోన పుటిస్త మహాన్, యేసుజ్ సెఇవరి కీదు ఒవజెప్తెజ్ ఇజి. 3 బుబ్బ వన్నిజ్ విజా దనిమున్ను అతికారం ఒవజెప్త మహాన్, ఇజి యేసు నెస్తాన్. వాండ్రు దేవులుబాణిజ్ వాత మహాన్, దేవులుడగ్రు సాన్నినాన్ ఇజిబా నెస్తాన్. 4 అందెజె వాండ్రు బీజనమ్దిజ్ బస్త మహిబాణిజ్ నిజితాండ్రె, వాండ్రు పిడఃగితి మన్ని సాల్వ లాగితాండ్రె ఉండ్రె తువాలు నడుముదు తొహా ఆతాన్. 5 తొహ్తాండ్రె, ఉండ్రె వల్లెమ్దు ఏరు వాక్తాండ్రె వన్ని సినూర్ పాదమ్కు నొర్జి వన్ని నడుముదు తొహ్తి మహి తువాలదాన్ వరి పాదమ్కు తేల్జినాన్.

6 ఆహా, వాండ్రు సిమెసు పెతురుడగ్రు వాతివలె, వాండ్రు, "ప్రబువా, నీను నా పాదమ్కు నొర్దెజ్ సుడఃజినిదా?", ఇజి వెన్బాతాన్. 7 అందెజె యేసు, "నాను ఇనిక కిజిన్ ఇజి ఏలు నీను నెన్ఇ గాని వెనుక నీను అర్లం నెన్నిలె", ఇజి వన్నిజ్ వెహ్తాన్. 8 అయావలె పేతురు, "సిల్లె, నీను నా పాదమ్కు ఎసెజ్బా నొర్దెజ్ ఆవద్", ఇజి వెహ్తాన్. దనిజ్యేసు, "నాను నీ పాదమ్కు నొర్వండమహిజ, నీను నా సినూడు ఆఇ", ఇజి వెహ్తాన్. 9 అయావలె సిమోన్ పేతురు, "అహిజ ప్రబువా, నా పాదమ్కునె ఆవండ నా కికు, నా బుర్రబా నొర్ల", ఇజి వెహ్తాన్. 10 అందెజె యేసు, "ఏరుఈబతి వన్నిజ్ వన్నిఒడఃలే విజా నొర్దెజ్ అవనరం సిల్లెద్. వన్ని పాదమ్కునె నొర్దెజ్. ఎందానిజ్ ఇహిజ, పాదమ్కునె వెటనె డుల్లిఆనె. నా సినూర్ ఆత్తి మీరు విజెదె సుబ్రం ఆతిదెర్. గాని ఒరెన్ ఆవన్", ఇజి వెహ్తాన్. 11 వన్నిజ్సెఇవరి కీదు ఒవజెప్తికాన్ ఎయెన్ ఇజి వాండ్రు నెసి మహాన్. అందెజె మీరు విజెరె సుబ్రం ఆత్తికిదెర్ ఆఇదెర్, ఇజి వాండ్రు వెహ్తాన్.

12 వరి పాదమ్కు నొర్జి వీన్తి వెన్కా, వాండ్రు లాగితి ఇడ్డి వన్ని సాల్వ పిడఃగితాండ్రె, బోజనమ్దిజ్ బస్తిమహి బాడిఃదు సాహాన్. సాహాండ్రె వాండ్రు వరిజ్ వెన్బాజినాన్, "నాను ఏలు మిజి కితివణిది అర్లం మిజి తెలినాదా? 13 మీరు నజి కూక్కివలె, 'ఓ బోదకినికి' ఇజినో, 'ఓ ప్రబువా' ఇజినో కూక్కిసెనిదెర్. నాను బోదకినికానె. ప్రబునె. అందెజె మీరు కూక్కినిక తప్ప సిల్లెద్. 14 ఏలు మీ ప్రబు ఆతి, బోదకినికి ఆతి నాను నీ పాదమ్కు నొర్త మన్ను. అందెజె మీరుబా ఒరెన్ మరి ఒరెన్ వన్ని పాదమ్కు నొర్దెజ్. 15 నాను మిజి కితిలెకెండ మీరు బా కిని వందిజ్, అయా వణి ఎలాగ కిదెజ్ఇజి నాను మిజి తొర్నిస్త మన్ను. 16 నాను నిజం వెహ్తానె, ఎమేణి వణి మన్నిసి బా వన్ని ఎజామాని మున్ను పెరికాన్ ఆవన్. అయ లెకెండ ఎమేణి కబ్బు తనికాన్బా వన్నిజ్పొక్తి వన్ని మున్ను పెరికాన్ ఆవన్. 17 మీరు ఏలు యా నిజమాతి నజతిజ్ నెస్తెదెర్. అందెజె మీరు అయా లెకెండకితిజ మీరు గొప్ప వారు".

యేసు వన్నిజ్ సెఇవరికీదు ఒవజెప్తి దనివందిజ్ జర్గినిముజాలె వెహ్తానాన్

18 "మీరు పాపమ్కాణిజ్నొరె ఆత్తిదెర్ ఇజి నాను వెహ్తానిక మీ విజెరె వందిజ్ ఆవద్. నాను ఏర్పాటు కితికార్ ఎలాగ మర్తికార్ఇజి నాను నెస్త. గాని, 'నా వెట బోజనం ఉణిజి మహికాన్నజి వడఃఇకాన్ ఆతాన్', ఇజి దేవులు మాటదు రాన్తి మన్ని మాట పూర్తి ఆదెజ్ నాను యా లెకెండ కిత్త. 19 అయ్యాక జర్గినివలె, నానె మెసయ ఇజి మీరు నమినివందిజె, అయ్యాక జర్గిని ముజాల, యెలె నాను వెహ్తానె. 20 నాను నిజం వెహ్తానె, ఎయెన్బా నాను పొక్తివన్నిజ్డగ్రు కితిజ, వాండ్రు నజి డగ్రు కితి లెకెండ. ఎయెన్బా నజి డగ్రు కితిజ, నజి పొక్తి వన్నిజ్డగ్రు కితి లెకెండ", ఇహాన్. 21 యేసు యాక వెహ్తావలె వన్ని మన్నుదు బాద ఆతండ్రె, "నాను నిజం వెహ్తానె, మీ లొఇ ఒరెన్ నజి సెఇవరి కీదు ఒవజెప్తిన్లె", ఇజి వెహ్తాన్.

22 అయావలె వన్ని సినూర్ ఎయెన్వందిజ్ వాండ్రు ఈహు వెహ్తాన్ ఇజి అర్లం ఆఇతిజ్ ఒరెన్ మొకొం ఒరెన్సుడః ఆజినార్. 23 బోజనమ్దిజ్ బస్త మహివలె, సినూర్ లొఇ యేసు నండొ ప్రేమిస్తి సినూ వన్ని డగ్రునె బోజనమ్దిజ్ బస్త మహాన్. 24 సిమోన్ పేతురు వన్నిజ్ సయన్ కిజి, "ఎయెన్ వందిజ్ వాండ్రు వర్గిజినాన్ఇజి వన్నిజ్ వెన్బాఅ", ఇజి వెహ్తాన్.

† యెసయ 6:10.

25 అందెజె అయా సినుడుః యేసుజ్ రోస్పె ఆజి, “ప్రబువా, వాండ్రు ఎయెన్?”, ఇజి వెన్బాతాన్. 26 అందెజె యేసు, “నాను యా రొటె ముక పులాదు ముడుక్కి ఎయెన్సినానా వాండ్రె నజి ఒపజెప్పికాన్”, ఇజి వెప్తాన్. వెప్తాండ్రె ముక పులాదు ముడుక్కి సిమొసు మరిసి ఆతి ఇస్కరియొతు యుడెజ్ సిత్తాన్. 27 యూద అయా రొట్టెముక్కు తిహి వెటనె సయతాను వన్ని లొఇ డుగితాండ్రె వన్ని ముస్సు అతికారం కితాన్. అయావలె యేసు, “నీను కిడెజ్ ఒడెఃబిజినిక బేగి కిల”, ఇజి వెప్తాన్. 28 గాని బోజెనమ్దిజ్ బస్తివరి లొఇ ఎయెరిజ్బా ఎందానిజ్ యేసు ఆహ వెప్తాన్ ఇజి అర్దం ఆవతాద్. 29 వరి కర్సువందిజ్ మన్ని డబ్బు విజా యూద కీదునె మనె. అందెజె వండ్రెయిదిజ్ కావాలిస్తికెజ్, సాన్ని కొల్ల ఇజిను, సీలజ బీదాతివరిజ్ డబ్బు సీల ఇజి వెప్పినాన్సు ఇజి సిసూర్ సెగొండార్ ఒడెఃబితార్. 30 యూద ఆ రొట్టెముక్కు తిహివెటనె వెల్లి సాహాన్. అక్కు రెయు.

31 వాండ్రు సాహి వెన్యా యేసు ఈహు వెప్తాన్, “లోకు మరిసి ఆతి నాను ఎసా గొప్ప పెరికాన్ ఇజి లోకుర్ ఏలునూణార్లె. దేవుణు ఎసా గొప్ప పెరికాన్ ఇజి నా వెట నూణార్లె. 32 దేవుణు గొప్ప పెరికాన్ ఇజి లోకు మరిసి వెట తోరె ఆతిజ, లోకు మరిసి గొప్ప పెరికాన్ ఇజి దేవుణునె తోరిస్నాన్. అయాక వెటనె తోరిస్నాన్. 33 నాను ప్రేమిస్సికిదెరా, కండెక్ నమయమ్నె నాను మీ వెట మంజిన. మీరు నజి రెబానిదెర్, గాని యూదురు అదికారిజ నాను వెప్తి లెకెండ్ర, “నాను సాని బాడిఃదు మీరు వాడెజ్ అట్ఇదెర్” ఇజి ఏలు మీవెట వెప్పిన.

34 నాను కొత్త ఆడ్ర మిజి సీజిన. మీరు ఒరెన్ మరి ఒరెన్ వన్ని వెట ప్రేమిస్ల, ఇజి. నాను మిజి ప్రేమిస్తిలెకెండ్ర మీరు బా ఒరెన్ వన్ని వెట ఒరెన్ ప్రేమిస్తిజ్వలె. 35 మీరు ఒరెన్ వన్ని వెట ఒరెన్ ప్రేమిస్తిజ, మీరు నా సిసూర్ ఇజి లోకుర్ విజెరె నెస్నార్.

36 అయావలె సిమోన్ పేతురు, “ప్రబువా, నీను ఎంబె సాన్సినె?”, ఇజి వెన్బాతాన్. వెన్బాతిజ్ యేసు, “నాను ఏలు సాని బాడిఃదు నీను ఏలు వాడెజ్అట్ఇ. గాని వెన్యా వాలె”, ఇజి వెప్తాన్ 37 అందెజె పేతురు, “ప్రబువా, ఎందానిజ్ నాను ఏలు మీ వెట వాడెజ్ అట్ఇ. నీ వందిజ్ సాడెజ్బా నాను తయార్నె”, ఇజి వెప్తాన్. 38 అందెజె యేసు, “నా వందిజ్ సాడెజ్బా నీను నిజం తయార్నెనా? కొరు కెరెని ముజాలె, ‘నీను నజి నెస్ప’ ఇజి ముసార్ వెప్పాలె”, ఇజి వెప్తాన్.

యేసు వన్ని సిసూరిజ్ దయరం సీజినాన్

14 యేసు మరిబా వన్ని సిసూరిజ్ వెప్పినాన్, “మీ మన్సుదు తియెల్ ఆజి బాద ఆమాట్. దేవుణు ముస్సు నమకం ఇడ్డిదెర్. నా ముస్సుబా నమకం ఇడెఃదు. 2 వరలోకమ్దు నా బుబ్బు ఇండ్రె నండ్రె గదిజ్మనె. అయ లెకెండ్ర సిల్లెండ్ర మహిజ, నాను మిజి వెప్తా మరి. మిజి ఉండ్రె బాడిః తయార్కిడెజ్ నాను అబ్బె సాస్సిన. 3 నాను సాన్ని మిజి ఉండ్రె బాడ్డి తయార్ కితి వెనుక, నాను మర్జివాజి నావెట నాను మంజినిబాన్ మీరుబా మండ్రెజ్, కూక్కు ఒనాలె. 4 నాను సాస్సిన బాడిఃదు సాండ్రెజ్ సరి మీరు నెస్సిదెర్”, ఇజి వెప్తాన్.

బుబ్బుడ్రు సాండ్రెజ్ నానెసరి ఇజి వెప్పినాన్

5 అయావలె తోమా వన్నిజ్, “ప్రబువా, నీను ఎంబె సాస్సినె ఇజి మాపు నెస్పివ్. అందెజె సరి మాపు ఎలాగ నెస్సెజ్ ఆనావ్?”, ఇజి వెప్తాన్. 6 అందెజె యేసు వన్నిజ్, “నానె బుబ్బు డ్రు సాండ్రెజ్ సరి. నానె బుబ్బు వందిజ్ నిజమాతికెజ్ తోరిసి నెస్పిస్నాన్. నానె ఎలాకాలం దేవుణు వెట బత్కిని బత్కు సీనికాన్. నా వెటనె లోకుర్ విజెరె బుబ్బుడ్రు సానార్. 7 నాను ఎయెన్ ఇజి మీరు నెస్తి మహిదెర్ఇహిజ, నా బుబ్బు ఎయెన్ఇజిబా మీరు నెస్తిదెర్మరి. ఏలుదాన్ మీరు వన్నిజ్నెస్తి మనిదెర్, సుడిఃతి మనిదెర్”, ఇజి వెప్తాన్. 8 నస్తివలె పిలిపు, “ప్రబువా, బుబ్బెజ్ మజి తోరిస్ల. ఆకాదె మజి సాలు”, ఇజి వన్నిజ్ వెప్తాన్.

9 అందెజె యేసు వన్నిజ్, నాను నిసా కాలం మీ వెట మహ. మహిజ్బా నీను నజి నెస్ఇదా పిలిపు? నజి సుడెఃతికాన్ ఎయెన్బా నా బుబ్బెజ్ సుడెఃత మనాన్. అయావలె బుబ్బెజ్మజి తోరిస్ల ఇజి ఎలాగ నీను వెప్తాజ్ అట్సినె? 10 నాను నా బుబ్బు వెట కూడిఃత మన. బుబ్బు నా వెట కూడిఃత మనాన్ ఇజి నీను నమ్ఇదా? నాను మీ వెట వెప్పినె మాటెజ్నా సాంత మాటెజ్ ఆఉ. గాని నా వెటకూడిఃతి మన్ని బుబ్బు బాణిజ్వాతికెజె అయాకెజ్. వాండ్రు వన్ని వణిజ్ నావెట కిబిసినాన్. 11 నాను నా బుబ్బు వెట కూడిఃత మన, బుబ్బు నా వెట కూడిఃత మనాన్ ఇజి నాను వెప్పినెక మీరు నమ్మిదు. సీలజ, నాను కిజిని విజా బమ్మ ఆని వణిజ సుడెఃతి అయాక నమ్మిదు. 12 నాను నా బుబ్బు డ్రు సాస్సిన. అందెజె నజి నిజం నమ్మితికాన్, నాను కిజిని బమ్మ ఆని వణిజ్ వాండ్రు బా కినాన్. ఒఒ, దనిజ్ఇంక లాపు వణిజ్ వాండ్రు కినాన్ ఇజి మీ వెట నిజం ఇక వెప్పిన. 13 నా ఇప్తమ్దిజ్ కూడిఃతి మన్ని ఇనికబా మీరు లొస్తిజ, నాను అయాక కిన. బుబ్బు గొప్ప పెరికాన్ ఇజి లోకురిజ్ తోరిస్తిజ, మరిసి ఆతి నాను అయాక కిన. 14 నా ఇప్తమ్దిజ్ కూడిఃతి మన్ని ఇనికబా మీరు లొస్తిజ, నాను అయాక కిన.

15 మీరు నజి ప్రేమిస్తిజ, నా ఆడ్రెజ్మీరు వెనిదెర్. 16 నాను బుబ్బెజ్ లొస్సు. మీ వెట ఎలాకాలం మండ్రెజ్ మరి ఒరెన్ తోడుః మంజిని వన్నిజ్ బుబ్బు మిజి సీనాన్. 17 వాండ్రు దేవుణు బాణిజ్ నిజమాతికెజ్ వెప్పినె దేవుణు ఆత్మ క్రీస్తుజ్ నమ్మిఇకార్ ఒరెన్ తోడుః మంజిని వన్ని వజి వన్నిజ్ డ్రు కిడెజ్ అట్పిర్. ఎందనిజ్ ఇహిజ, వారు వన్నిజ్ రెబావిర్. వన్నిజ్ నెస్పెర్. గాని మీరు వన్నిజ్ నెస్సిదెర్. ఎందానిజ్ ఇహిజ, వాండ్రు మీ వెట మంజినాన్. మీ లొఇ మంజినాన్. 18 నాను మిజి డిసి సానివలె, మిజి దిక్కు సీలి వరి లెకెండ్రెడిఃవ. నాను మర్జి మీ డ్రు వానాలె. 19 నీగం కాలం వెన్యా, నజి నమ్మిఇకార్ నజి మరి తొవర్లె. గాని మీరు నజి సూణిదెర్. నాను బత్కిని. అందెజె మీరుబా బత్కినిదెర్. 20 నాను నా బుబ్బువెట కూడిఃత మన్న, మీరు నా వెట కూడిఃతి మనిదెర్. నాను మీ వెట కూడిఃత మన ఇజి దేవుణు ఆత్మ మీ నడిఃమి మండ్రెజ్వాని దినమ్దు మీరు నెస్సిదెర్. 21 నా ఆడ్రెజ్ వెంజి అయావజి కినికానె నజి ప్రేమిస్సికాన్. నజి ప్రేమిస్సి వన్నిజ్ నా బుబ్బు ప్రేమిస్సాన్. నాను వన్నిజ్ప్రేమిసి వన్నిజ్తోరె ఆన”, ఇజి యేసువెప్తాన్.

22 నస్తివలె ఇస్కరియొతు యూద ఆఇ మరి ఒరెన్యుదు, “ప్రబువా నీను లోకురిజ్ విజెరిజ్ తోరెఆపండ్ర, ఎలాగ నీను మజి తోరె ఆనిలె?”, ఇజి వెన్బాతాన్. 23 అందెజె యేసు, “ఒరెన్ నజి ప్రేమిస్తిజ, వాండ్రు నా మాటెజ్ వినాన్. అయావలె నా బుబ్బు వన్నిజ్ ప్రేమిస్సాన్. నా బుబ్బుని నాను వన్నిడ్రు వాజి వన్నివెట మంజినావ్. 24 నజి ప్రేమిస్ఇకాన్, నా మాటెజ్ వినవ్. మీరు వెంజిని యా మాటెజ్నా సాంత మాటెజ్ ఆఉ. నజి ఫొక్తి నా బుబ్బువె. 25 నాను మీవెట మంజినె యా మాటెజ్ వెప్తా మన్న. 26 నా బుబ్బు, నా బదులు తోడుః మంజిని వన్నిజ్ ఇహిజ, దేవుణు ఆత్మదిజ్ ఫొక్తివెలె, వాండ్రు మిజి దేవుణు వందిజ్ విజా నజితిజ్ నెస్పిస్నాన్. నాను మిజి వెప్తి విజా వన్యాజ్ ఎత్తు కిబిసి మంజినాన్. 27 నాను మిజి డిసి సాన్సిన. గాని మీరు నమాదనమ్దాన్

మంజినెదర్లె. అయా సమాదనం నా బాణిజ్ వాజినాద్. నజీ నమ్మిల్ లోకురిజ్ మన్ని సమాదనం ననికాద్ ఆవీదనా బాణిజ్ వాజినాద్. మీ మన్నుదు విసారిసి బాద ఆమాట్. మీరు తియెల్ ఆమాట్.

28 'నాను సాన్సిన. మర్జి మీ డగ్రు వానాలె', ఇజి నాను వెప్తి మాట మీరు విహిదెర్. నా బుబ్బు నజీ ఇంక పెరికాన్. అందెజె మీరు నజీ నిజం ప్రేమిస్తిజ, వీండ్రు బుబ్బు డగ్రు సాన్సినాన్ ఇజి సర్ద ఆజినెదెర్. 29 యాకెజ్ జగ్గినివలె, నాను వెప్తికెజ్ నిజం ఇజి మీరు నమ్మిని వందిజె, అయాకెజ్ జగ్గిని ముజాల, ఇయెలె నాను మిజి వెప్తా మన్ను. 30 మరి నండొ నమయం మీ వెట వర్గిదెజ్ నాను అట్వలె. ఎందానిజ్ ఇహిజ, యా లోకమ్ ది అతికారి ఆతి సయ్తాను వాజినాన్. నా మున్ను వన్నిజ్ ఇన్ని అతికారం సిల్లెద్. 31 గాని, నాను నా బుబ్బెజ్ ప్రేమిస్తి. అందెజె వాండ్రు వెప్సినికెజ్ విజా అయావజ నాను కిజిన ఇజి లోకమ్ దికార్ నెస్తిజ్ వలె. రదు, ఇబ్బెణిజ్ సానాట్', ఇజి వెప్తాన్.

15 నాను నిజమాతి ద్రాక్చబడ్డుదిజ్ మొదొల్. నా బుబ్బు పణికినికాన్. 2 నా వెట కూడితి మన్ని పట్టు అన్ ఇ విజా కొనెజ్ వాండ్రు కత్నాన్. పట్టు అన్ ని విజా కొనెజ్, మరి నండొ పట్టు అస్తివందిజ్ తెప్పాన్. 3 నాను మీవెట వెప్తి మాటెజ్, మీ పావమ్ కాణిజ్ సుబ్బరం కిత్తె మనె. 4 నాను మీ వెట కూడిజి మంజినెలెకెండ్ మీరు నా వెట కూడిజినె మండ్రు. ఇన్ని కొనెజ్ బా బడ్డుదు మన్ ఏండు మహిజ, అవి పట్టు అన్ ఉ. పట్టు అస్తిజ్ ఇహిజ, అవి బడ్డుదు మండ్రెజ్ వలె. అయాలెకెండ్, నావెట కూడితి మహిజనె, మీరు పట్టు అస్తిదెర్.

5 నాను ద్రాక్చబడ్డుదిజ్ మొదొల్. మీరు కొనెజ్. ఎయెన్ బా నా వెట కూడిజి మంజి, నాను వన్ని వెట కూడితి మహిజ, వాండ్రు నండొ పట్టు అస్తిన్. నాను సిల్లెండు, నజీ ఇస్టం ఆతి నెగ్గెకెజ్ ఇనికెజ్ బా మీరు కిదెజ్ అట్ ఇదెర్. 6 వెల్లి విసిర్తి ఉండ్రి కొన వప్తి లెకెండ్, నా వెట కూడిజి మన్ ఇకాన్ మనాన్. వాండ్రు వెల్లి ఆజి వప్పాన్. నన్ని కొనెజ, లోకుర్ కుంబ కిజి సుర్ నార్. ఆకెజ్ వెయెనె. 7 మీరు నావెట కూడిజినె మంజి నాను వెప్తిక మీ లొ ఇ మహిజ, ఇనిక బా మీరు దేవుణుదిజ్ లొస్తు. వాండ్రు అయాక మిజి సీనాన్. 8 మీరు నండొ పట్టు అసి ఆహా నా సిసూర్ ఇజి తోర్ అతిజ, నా బుబ్బు గొప్ప పెరికాన్ ఇజి లోకురిజ్ తోరిసినిదెర్.

9 నా బుబ్బు నజీ ప్రేమిస్తి లెకెండ్, నాను మిజి ప్రేమిస్తి. నాను మిజి ప్రేమిస్తి వందిజె, నా వెట కూడిజినె మండ్రు. 10 నాను నా బుబ్బు వెప్తి ఆడ్రెజ్ లొజిత మన. వాండ్రు నజీ ప్రేమిస్తిన్. అయాలెకెండ్ మీరు నాను వెప్తి ఆడ్రెజ్ లొజిత, నాను మిజి ప్రేమిసినె మంజిన. 11 నజీ మన్ని సర్ద మిజి బా మండ్రెజ్, మీ సర్ద పూర్తి ఆదెజ్, ముజాలె వెప్తి యా మటెజ్ నాను మిజి వెప్తా మన్ను. 12 నాను మిజి ప్రేమిసినె, మీరు ఒరెన్ వన్ని వెట ఒరెన్ ప్రేమిసి మండ్రు ఇజినె నా ఆడ్ర. 13 ఒరెన్ వన్ని కూలెజ వందిజ్ వన్ని సాంత పాణం సీనికాదె నండొ ప్రేమ. దిని ఇంక మిస్తి మరి ప్రేమ సిల్లెద్. 14 నాను ఆడ్ర సితిక మీరు కితిజ, మీరు నా కూలెజ. 15 ఒరెన్ పణికినికాన్, వన్ని ఎజామాని కిని పణిజ్ నెస్ ఎన్. అందెజె నాను మరి ఎనెజ్ మిజి పణికినికార్ ఇజి కూక్ ఏ, గాని కూలెజ్ ఇజి కూక్ మన. ఎందనిజ్ ఇహిజ, నాను నా బుబ్బు బాణిజ్ వికాకెజ్ విజా మిజి వెప్తా మన్ను. 16 మీరు నజీ ఏర్ పాటు కిఇదెర్. గాని నాను మిజి ఏర్ పాటు కిత్తె. పట్టు అస్తివజ, మీరు సాన్ని లోకురిజ్ సువార్త వెప్సి దేవుణు దరోట్ మహి తని వందిజె నాను మిజి ఏర్ పాటు కితానె పాక్కిన. మీరు అస్తి పట్టు ఎలాకాలం మంజినాద్. అయావలె మీరు నా ఇష్టమిదిజ్ కూడితి మన్ని ఇనిక బా బుబ్బెజ్ లొస్తిజ, వాండ్రు సీనాన్. 17 మీరు ఒరెన్ వన్నివెట ఒరెన్ ప్రేమిస్తిజ్ ఇజినె నాను సీజినె ఆడ్ర.

18 యా లోకమ్ దు మన్ని దేవుణుదిజ్ దూసిస్తికార్, మిజి దూసిస్తిజ, మీరు ఒడిబిదు వారు మిజి దూసిస్తి ముజాలె నజీ దూసిస్తికార్ ఇజి. 19 మీరు యా లోకమ్ దు మన్ని దేవుణుదిజ్ దూసిస్తి వరిలొ ఇ మన్నికిదెర్ ఇహిజ, వరి సాంత లోకుర్ వజ వారు మిజి ప్రేమిస్తికార్ మరి. గాని నాను వరి లెకెండ్ మీరు మన్ ఏండు, మిజి ఎర్గిస్త. అయావలె, మీరు వరి లొ ఇ మన్నికిదెర్ ఆఇదెర్. అందెజె వారు మిజి దూసిసినార్. 20 ఎమేణి పణిమణిసిబా వన్ని ఎజామాని మున్ను పెరికాన్ ఆవన్ ' , ఇజి నాను వెప్తి మాట మీరు ఎత్తు కిదు. వారు నజీ హిమ్మెజ్ కితార్ ఇహిజ, మిజి బా హిమ్మెజ్ కినార్. వారు నా మాటెజ్ లొజితార్ ఇహిజ, మీ మాటెజ్ బా లొజినార్. 21 మీరు నజీ నమ్మితి వందిజ్ వారు యా లెకెండ్ విజా మిజి కినార్. ఎందానిజ్ ఇహిజ, వారు నజీ షాక్తి వన్నిజ్ నెస్ ఏర్. 22 నాను వాజి దేవుణు వందిజ్ నిజమాతికెజ్ వరిజ్ వెప్తి ఏండు మంజినె ఇహిజ, వారు పావమ్ కు కితార్ ఇజి దేవుణు వరిజ్ సుడె ఏతాన్ మరి. అహిజ, ఏలు వారు వరి పావమ్ కాణిజ్ తప్ప ఆదెజ్ అట్ ఏర్. ఎందానిజ్ ఇహిజ, నాను వరిజ్ వెప్తా మన్ను. 23 నజీ దూసిస్తికాన్ నా బుబ్బెజ్ దూసిసినాన్. 24 ఎయెన్ బా కి ఇ బమ్మూని పణిజ్ నాను వరి నడిమి కి ఏండు మంజినె ఇహిజ, వారు పావమ్ కు కితార్ ఇజి దేవుణు వరిజ్ సుడె ఏతాన్ మరి. గాని ఏలు వారు యా బమ్మూ అని పణిజ్ సుడె త మనార్. అహిజ్ బా, నజీ ని నా బుబ్బెజ్ వారు దూసిస్త మనార్. 25 'ఇని కారణంబా సిల్లెండు వారు నజీ దూసిస్తికార్', ఇజి దేవుణు మాటదు రాస్తి మన్ని మాట పూర్తి అదెజె యా లెకెండ్ వారు కిజినార్.

26 నాను మీ డగ్రు తోడు మంజినె వన్నిజ్ ఇహిజ, దేవుణుబాణిజ్ నిజమాతికెజ్ వెప్తి తోరిస్తి దేవుణు ఆత్మెజ్ షాక్తు. వాండ్రు బుబ్బు బాణిజ్ మీ డగ్రు వానాన్. అయావలె నా వందిజ్ విజా వాండ్రు వెహ్నాన్. 27 నాను సేవ మొదొల్ని బాణిజ్ మీరు నావెట మనిదెర్. అందెజె మీరు బా నా వందిజ్ విజెరిజ్ వెహ్నెజ్ వలె.

16 "మిజి ఇమ్ సెజ్ కినివలె, మీరు నమకం దాన్ డిస్ ఏండు మంజినె వందిజె, మిజి దూసిస్తికార్ కిని సజతిజ వందిజ్ నాను వెప్తా. 2 వారు మిజి యూదురి మీటిజ్ ఇల్కాణిజ్ వెల్లి కినార్. మిజి సప్పికాన్ ఎయెన్ బా, వాండ్రు దేవుణుదిజ్ సర్ద కిజిన ఇజి ఒడిబిని కాలం వాజినె. 3 వారు నన్నికెజ్ కినార్. ఎందనిజ్ ఇహిజ, బుబ్బెజ్ నో నజీనో నెస్ ఏర్. 4 అయ కాలం వానివలె, నాను దినివందిజ్ వెప్తా మన ఇజి మీరు ఎత్తుకిని వందిజ్ నాను యాక మీ వెట వెప్తా మన. నాను యాకెజ్ ముజాలె మిజి వెహ్నెజ్ వలె. ఎందానిజ్ ఇహిజ, నాను మీవెట మహా".

దేవుణు ఆత్మ కిని పణిజ్

5 "ఏలు నాను నజీ షాక్తి వన్ని డగ్రు సాన్నిన. గాని మీ లొ ఇ ఎయెన్ బా, 'సీను ఎంబె సాన్నిని?', ఇజి నజీ వెన్ బా ఇదెర్". 6 నాను యా సజతిజ్ మిజి వెప్తి మనిజ్, మీ మన్నుదు దుకమ్ దాన్ నిండ్రిత మనాద్. 7 గాని నాను నిజం మీ వెట వెహ్నాన, మిజి మేలు వాని వందిజె నాను సాన్నిన. నాను సాన్ ఏండు మహిజ, తోడు మంజినెకాన్ మీ డగ్రు రెవన్. గాని నాను సాహిజ, నాను వన్నిజ్ మీ డగ్రు షాక్తు. 8 వాండ్రు వాజి, దేవుణుదిజ్ నమ్మి ఇవరిజ్ పాపం ఇహిజ ఇన్నిక ఇజి, నాను సీతి నిజాయితి మన్నికాన్ ఇజి, దేవుణు సీని ఎలాకాలం మన్ని సిక్కి ఇన్నిక ఇజి కనీతం వెహ్నె తోరిస్తిన్. 9 వారు పాపం కిత్తె మనార్ ఇజి వాండ్రు కనీతం వెహ్నె

† 13:16 సుడె:దు

తోరిస్తాన్. ఎందానిజ్ ఇహిజ, వారు నజీ నమ్మివర్. 10 నాను సీతి నిజాయితీ మన్నికాన్ ఇజి వాండ్రు కసితం వెప్పి తోరిస్తాన్. ఎందనిజ్ ఇహిజ, నాను నా బుబ్బు డగ్రు సాన్సిన. మీరు నజీ మరి తొఇదెర్. 11 దేవుణు సీని ఎలాకాలం మన్ని సిక్కు ఇన్నిక ఇజి పరిజ్ కసితం వెప్పి తోరిస్తాన్. ఎందానిజ్ ఇహిజ, దేవుణుదిజ్ నమిఇ పరి ముస్సు అతికారం కిని నయ్తానుజ్, దేవుణు ఎలాకాలం మన్ని సిక్కు సిత్రమనాన్.

12 'నజీ మరి నండా మిజి వెహెజ్ మనాద్, గాని ఏలు మీరు నసా అర్దం కిదెజ్ అబ్ ఇదెర్. 13 గాని దేవుణు వందిజ్ నిజమాతికెజ్ నెన్ పిస్సి దేవుణు ఆత్మ వానివలె, వాండ్రు దేవుణు బాణిజ్ వాజిని విజా నిజమాతికెజ్ మీరు నెస్సెజ్ మిజి నడిపిసినాన్. వాండ్రు వన్ని సాంతదిక ఇనికబా వెహ్ ఎన్. గాని బుబ్బు వెప్పినికెజ్ వెంజి మిజి వెహ్ ఎన్. వాండ్రు జగ్రిని వన్కాజ్ వందిజ్ మిజి వెహ్ ఎన్. 14 నాను వెప్పిని నిజమాతికెజ్ వెంజి, అయ్యాక మిజి వెహ్ ఎన్. అయ్ లెకెండ్ నాను గొప్ప పరికాన్ ఇజి మిజి తోరిస్తాన్. 15 బుబ్బెజ్ మన్నికెజ్ విజా నాదినె. అందెజె నాను వెహ్, నాను వెప్పిని నిజమాతికెజ్ వాండ్రు వెంజి, అయ్యాక మిజి వెహ్ ఎన్ ఇజి. 16 సెగం రోస్సు వెన్కా, నాను సాన. మీరు నజీ మరి తొఇదెర్. మరి సెగం రోస్సు వెన్కా, మీరు నజీ సూణిదెర్".

17 వన్ని సిసూర్ లొఇ సెగొండార్ ఒరెన్ వెట ఒరెన్ ఈహు వెహ్ ఎన్, "సెగం కాలం వెన్కా మీరు నజీ తొఇదెర్. మరి సెగం కాలం వెన్కా మీరు నజీ సూణిదెర్. నాను నా బుబ్బు డగ్రు సాన్సిన. అందెజె మీరు నజీ తొఇదెర్", ఇజి వాండ్రు వెప్పిని తరదం అర్దం ఇనిక? ఇజి. 18 "సెగం కాలం' ఇజి వాండ్రు వెప్పిని దని అర్దం ఇన్నిక? వాండ్రు వెప్పిని దనిజ్ మజి అర్దం రెవిండ ఆజినాద్", ఇజి మరి వగ్గిజినె మహార్.

19 దినివందిజ్ వారు వన్నిజ్ వెన్ బాదెజ్ కోరిజినార్ ఇజి యేసు నెస్తాండ్రె, ఈహు పరిజ్ వెప్పినాన్, "సెగం కాలం వెన్కా మీరు నజీ తొఇదెర్. మరి సెగం కాలం వెన్కా మీరు నజీ సూణిదెర్, ఇజి నాను వెహ్ దని అర్దం ఇన్నిక ఇజినా మీరు ఒరెన్ దిజ్ ఒరెన్ వెన్ బాజినెదెర్? 20 మీరు దుకం కిజి అడఃబానిదెర్ గాని దేవుణుదిజ్ దూసిస్సికార్ సరద ఆనార్. మీరు దుకం కినిదెర్ గాని మీ దుకం వెనుక సరదమనాద్ ఇజి నాను మీ వెట నిజం వెప్పిన్. 21 ఉండ్రి బోదెలి ఏరుఈబదెజ్ నోపిదిజ్ అడఃబానాద్. ఎందానిజ్ ఇహిజ, దనిజ్ నెగెండ్ అదెజ్ కాలం ఆతాద్. గాని దన్నికొడః పుట్టిజ, లోకమ్ దు ఒరెన్ పుట్టాన్ ఇజి సరదదాన్ అయ్యా బాదెజ్ అది ఎత్తు కిపిద్. 22 అయాలెకెండ్ మిజి బా. మీరు ఏలు దుకం ఆనిదెర్. గాని నాను మర్జి వానివలె మిజి మరి సూణ. అయ్యావలె మీరు సరద ఆనిదెర్. అయ్యా సరద ఎయెన్ బా మీ బాణిజ్ లాగ్ దెజ్ అబ్ ఎన్. 23 నాను నిజితి సాహి వెన్కా, మీరు ఇనికబా నెస్సెజ్ నజీ వెన్ బాఇదెర్. ఎందానిజ్ ఇహిజ, దేవుణు ఆత్మ మిజి నెన్ పిస్సాన్. నా ఇస్టమ్ దిజ్ కూడిఃతి మన్నికెజ్ ఇన్నికబా మీరు బుబ్బెజ్ లొస్తిజ, వాండ్రు అయ్యాక సీనాన్, ఇజి నాను నిజం మీ వెట వెప్పిన్. 24 ఏలుదాక నా ఇస్టమ్ దిజ్ కూడిఃతి మన్నికెజ్ ఇన్నికబా లొస్తిజిదెర్. మీ సరద పూర్తి ఆని వందిజ్ లొస్తి. మిజి దోహ్కానాద్.

25 నాను మిజి కతవజ యా సజతిజ్ నెన్ పిస్తి మన. గాని కతవజ నెన్ పిస్తి ఏండ, బుబ్బు వందిజ్ మిజి టెట అర్దం ఆనిలెకెండ్ వెప్పి కాలం వాజినాద్. 26 అయ్యా కాలమ్ దు, నా ఇస్టమ్ దిజ్ కూడిఃతి మన్నికెజ్ మీరు లొస్తిదెర్. మీరు లొస్తికెజ్ పరిజ్ సిఅ ఇజి బుబ్బెజ్ వెహ్ ఇజి నాను వెహ్ ఏ. 27 ఎందానిజ్ ఇహిజ, బుబ్బునె మిజి నండా ప్రేమిస్సాన్. మీరు నజీ ప్రేమిస్సిదెర్. నాను బుబ్బు బాణిజ్ వాత ఇజి మీరు నమిజినిదెర్. అందెజె వాండ్రు మిజి నండా ప్రేమిస్సాన్. 28 నాను బుబ్బు బాణిజె యా లోకమ్ దు వాత. ఏలు నాను యా లోకం డిసి మర్జి బుబ్బు డగ్రు సానిన్". 29 నస్తివలె వన్ని సిసూర్, "ఇదిలో, వానివలె నీను కత లెకెండ్ ఆపిండ, అర్దం ఆని లెకెండ్ వెప్పిని. 30 నీను విజా నెస్తికె ఇజి ఏలు మాపు నెసినాప్. ఎయెర్ బా నిజి వెన్ బా ఏండ ముజాలె, వారు ఒడఃబిజినికెజ్ నీను నెసినె ఇజి మాపు నెసినాప్. అందెజె నీను దేవుణు బణిజ్ వాతికి ఇజి మాపు నమ్మిజినాప్", ఇజి వెహ్ ఎన్.

31 అందెజె యేసు, "మీరు ఏలు నమిజినిదెరా? 32 ఇదిలో, మీరు మీ ఇల్కాజ్ నెన్ ద్రిజి సాని కాలం వాజినాద్. అయ్యాక ఏలె వాత మనాద్. మీరు నజీ డిసి సానిదెర్ లె. నాను ఒరెనె ఆన. గాని నాను ఒరెనె ఆఎ. నా బుబ్బు నావెట మనాన్. 33 మీరు నా వెట కూడిఃతి మన్నిదెర్. అందెజె మీరు సమాదనం దాన్ మండ్రెజ్ నాను యా సజతిజ్ మిజి వెహ్ మన. యా లోకమ్ దు మిజి కస్టమ్ కు బాదెజ్ మనె. గాని దయ్ రమ్ దాన్ మండ్రు. నాను యా లోకమ్ దు మన్ని దేవుణుదిజ్ దూసిస్సివరిజ్ గెలస్త మన్ను.

యేసు వన్నివందిజ్ పార్దనం కిజినాన్

17 యా మాటెజ్ వెప్పి వీస్తాండ్రె, యేసు ముస్సు పరలోకం దరోట్ బేసి ఈహు పార్దనం కిజినాన్. "ఓ బా, నాను సాదెజ్ నీను ఏర్ పాటుకితి కాలండగ్రు ఆత మనాద్. నీను గొప్పపెరికి ఇజి నీ మరిన్ ఆత్తి నాను తోరిస్సి వందిజ్ ని మరిన్ ఆత్తి నాను గొప్పపెరికాన్ ఇజి నీను తోరిస్ ఆ. 2 నీను నజీ సీతిలోకుర్ విజెరిజ్ ఎలాకాలం దేవుణువెట బత్రినిబత్తు నాను సీనివందిజ్, నీను లోకుర్ విజెరి ముస్సు నజీ అతికారం సీత్తి. 3 ఒరెండ్రె నిజమాతి దేవుణుఆతి నిజిని, నీను యా లోకమ్ దు షాక్తి యేసు క్రీస్తుజ్ నెస్తిజనె ఎలాకాలం దేవుణువెట బత్రినిబత్తు మనాద్. 4 నాను కిదెజ్ ఇజి నీను నజీ సీత్తి పణివిజా నాను పూర్తి కిజి నీను గొప్పపెరికి ఇజి బూమిముస్సు నాను తోరిస్త. 5 ఏలు ఓ బా, లోకం నీను పుటిస్సి ముజాలె నివెట నాను మహివలె నజీ గవరం కితిలెకెండ్, ఏలు నీ ఎద్దు నజీ గవరం కితి.

యేసు సిసూర్ వందిజ్ పార్దనం కిజినాన్.

6 నీను నజీ సీతివరిజ్ నాను నీ వందిజ్ వెప్పి తోరిసి నెస్తిస్త. మీరు దేవుణుదిజ్ దూసిస్సి ననికార్ ఆవర్. మీరు నీ వారు. నీను పరిజ్ నజీ సీతి. నీ మాటెజ్ వారు లొజెతార్. 7 నీను నజీ సీతి విజా నీబాణిజె వాతెమనె ఇజి ఏలు వారు నెస్టార్. 8 ఎందానిజ్ ఇహిజ, నీను నజీ సీతి మాటెజ్ నాను పరిజ్ సీత. వారు అయికెజ్ నమ్మిలార్. నాను నీ బాణిజ్ వాతికాన్ ఇజి వారు అనుమానం సీల్లెండ నెస్టార్. నీనె నజీ షాక్తి ఇజి వారు నమ్మిత మనార్. 9 నాను యా సిసూర్ వందిజ్ పార్దనం కిజిన. యా లోకమ్ దు లోకుర్ విజెరివందిజ్ నాను పార్దనం కిపి. గాని నీను నజీ సీతి విరివందిజ్ పార్దనం కిజిన. ఎందానిజ్ ఇహిజ, మీరు నీ వారు. 10 నా వారు విజెరి నీ వారు. నీ వారు విజెరి నా వారు. అయలెకెండ్ వారు బత్రినారె, నాను గొప్పపెరికాన్ ఇజి వారు తోరిసినార్. 11 ఏలు నాను నీ డగ్రు వాజిన. నాను మరి యా లోకమ్ దు మన్ ఏ. గాని మీరు ఇబ్బె మంజినార్. ఓ నెగ్గి బుబ్బు, మాటు ఉండ్రె ఆతి లెకెండ్ వీరుబా ఉండ్రె అదెజ్, నీను నజీ సీతి సత్తుదాన్ పరిజ్ కాపాడఃట.

12 నాను యా లోకమ్దు వరి వెట మహివలె, నీను నజి సీతి సత్తుదాన్ వరిజ్ కాపాడత. నాను వరిజ్ నెగ్రెండ తప్రిసి మహ. వరి లోఇ ఎలాకాలం నాసనం ఆదెజ్ మన్నికాన్ ఆవిండ, మహికార్ విజెరె ఎలాకాలం నాసనం ఆవతార్. దేవుణు మాటదు రాస్తి మనికెజ్ పూర్తి ఆదెజ్ యాకెజ్ విజా జగ్గిదెజ్ వలె.

13 నాను ఏలు నీ డగ్రు వాజిన. నజి మన్ని సర్ద వరి మన్నుదుబా నిండ్రు మంజిని వందిజె, నాను యా లోకమ్దు మన్నివలెనె యా సజతిజ్ వెహ్సిన. 14 నాను వరిజ్ నీ మాటెజ్ సిత మన్ను. యా లోకమ్దు మన్ని దేవుణుదిజ్ దూసిస్సికార్ వరిజ్ దూసిస్తార్. ఎందానిజ్ ఇహిజ, నాను లోకమ్దికాన్ ఆఇలెకెండ, వారు బా లోకమ్దికార్ ఆవర్. 15 నీను వరిజ్ యా లోకమ్దాన్ ఒల ఇజి నాను పార్దనం కివీ గాని సయ్యూను బాణిజ్ వరిజ్ కాపాడతల ఇజినె పార్దనం కిజిన. 16 నాను లోకమ్దికాన్ ఆఇలెకెండ, వారు బా లోకమ్దికార్ ఆవర్. 17 నీ నిజమాతి మాటెజ్ నెస్పిసి, వారు దేవుణువందిజ్ కేట ఆతిలెకెండ వరిజ్ ఇడత. నీ మాటెజ్ నిజమాతి మాటెజ్. 18 నీను నజి యా లోకమ్దు పాక్తి లెకెండ, నాను వరిజ్ లోకమ్దు పాక్సిన. 19 నిజమాతి మాట నెసి వారు వరిజె నీ కీదు ఒవజెప్పిని వందిజ్, నాను వరి వందిజ్ నీ కీదు ఒవజెపె ఆజిన.

యేసు దేవుణుదిజ్ నమ్మితివరిజ్ విజెరెవందిజ్ పార్దనం కిజినాన్

20-21 ఓ బా, నాను కిజిని పార్దనం వరి వందిజె ఆవి. వరి మాటెజ్ వెంజి నమ్మిదెజ్ మన్ని వరిజ్ విజెరె వందిజ్ నాను పార్దనం కిజిన. ఎందానిజ్ ఇహిజ, నీను నా వెట కూడతెజి మంజిని లెకెండ, నాను నీ వెట కూడతెజి మంజిని లెకెండ వారు విజెరె ఉండ్రె ఆదెజ్. నీను నజి పాక్తి మన్ని ఇజి లోకమ్ది లోకుర్ విజెరె నమ్మినివందిజ్ వారు మావెట కూడతెజి మనీర్. 22 నాను పెరికాన్ ఇజి నీను నజి గవరం నాను వరిజ్ సిత మన. మాటు ఉండ్రె ఆతి లెకెండ వారుబా ఒండ్రె అదెజె నాను సిత. 23 వారు పూర్తి ఉండ్రె ఆవివందిజ్ నాను వరివెట కూడతెజి మన. నీను నా వెట కూడతెజి మన్ని. నీను నజి పాక్తి ఇజి, నీను నజి ప్రేమిస్సి లెకెండవరిజ్ బా ప్రేమిస్సి ఇజి లోకుర్ విజెరె నెస్సి వందిజ్ వారు ఉండ్రె ఆదెజ్.

24 ఓ బా, నీను వరిజ్ నజి సీతి. అందెజె నాను మంజిని బాన్ వారుబా మండ్రెజ్ ఇజి నాను కోరిజిన. ఎందానిజ్ ఇహిజ, నాను గొప్ప పెరికాన్ ఇజి నీను నజి సీతి గవరం వారు సుడతెజె. లోకం పుటిస్ వండ ముజాల, నీను నజి ప్రేమిస్తి. అందెజె నీను నజి అయా గవరం సీతి.

25 సీతి నిజాయితీ మన్ని బుబ్బు, లోకమ్ది లోకుర్ నిజి నెస్ ఎర్. గాని నాను నెన్ను. నీను నజి పాక్తి ఇజి వీరు నెసినార్. 26 నాను వరి వెట కూడతెజి మంజిని వందిజ్, నీను నజి ప్రేమిస్తి లెకెండ, వారు బా మహివరిజ్ ప్రేమిస్తివందిజ్ నాను నీ వందిజ్ వరిజ్ నెస్ పిస్త మన. నెస్ పిసినె మంజిన.

యేసుజ్ అరెస్టు కిజినార్

18 యేసు పార్దనం వీస్తి వెన్కా, వన్ని సిసూర్ వెట సాతాండ్రె, కెద్రాన్ ఇని జోరడాట్టి సాహాన్. అబ్బె ఉండ్రె టోట మహాద్. వాండ్రుని వన్నిసిసూర్ అయా టోటాదు సాహార్.

2 నండొ సుట్టు. యేసుని వన్నిసిసూర్ అబ్బె కూడతెజి మహార్. అందెజె యేసు అయా టోటాదు మంజినాన్ లె ఇజి యూద నెస్నాన్. వీండ్రె యేసుజ్ యుదురి అదికారిజ కీదు ఒవజెప్పికాన్. 3 అందెజె యూద అబె వాతాన్. పెరి పుజెరిజు వరిసయ్యరు పాక్తి సెగొండార్ దేవుణు గుడిది జమాజ్ ణు, మరి రోమ సయ్యనమ్ది సెగొండారిజ్ బా వన్ని వెట కూక్త తత్తాన్. వారు సిసు బొద్దు, లాండెరిజు, కూణమ్కు అన్న మహార్. 4 యేసు వన్ని ముస్సు. వానికెజ్ విజా నెసినె, వాండ్రు సాతాండ్రె వరిజ్, "మీరు ఎయెరిజ్ రెబానిదెర్?", ఇజి వెన్ బాతాన్. 5 దన్నిజ్ వారు, "నజరేతుది యేసుజ్", ఇహార్. అందెజె వాండ్రు, "వాండ్రు నానె", ఇజి వెహ్సాన్. అయావలె యేసుజ్ ఒవజెప్పి యూద వరి వెట నిహా మహాన్. 6 'వాండ్రు నానె', ఇజి యేసు వరిజ్ వెహ్సాలె, వారు వెన్కా గుసె ఆజి బూమిదు అర్తార్. 7 మరి వాండ్రు వరిజ్ వెన్ బాతాన్, "మీరు ఎయెరిజ్ రెబానిదెర్?", ఇజి. "నజరేతుది యేసుజ్", ఇహార్ వారు. 8 అందెజె యేసు, "నాను మిజి వెహ్సాగదె, వాండ్రు నానె ఇజి. మీరు నజి రెబానిదెర్ ఇహిజ, నా సిసూర్ ఆత్తి విరిజ్ పాక్తు", ఇజి వెహ్సాన్. 9 వారు సిసూరిజ్ పాక్తిజ్, "నీను నజి సీతి వరి లోఇ ఒరెన్ వన్నిజ్ బా నాను పాడుకివీ" ఇజి వాండ్రు ముజాలె వెహ్సి మాటెజ్ పూర్తి ఆతె.

10 సిమోన్ పేతురు డగ్రు ఉండ్రె కూడం మహాద్. నస్తవలె వాండ్రు అయాక లాగితండ్రె, విజా పుజెరిజ ముస్సు, పెరిపుజెరి వణిమన్నిసిజ్ ఉజెరెగిటి కత్తాన్. అయా వణిమన్నిసి పేరు మల్కు. 11 యేసు పేతురుజ్, "నీ కూడం దన్నిఒరదు ఇడత. నాను ఓరిస్టెజ్ నా బుబ్బు ఏర్పాటుకితి ప్రమెజ్ నాను ఓరిస్టెజ్ ఆవిదె ఇజి నీను ఒడతెజినిదా?", ఇజి వెహ్సాన్.

యేసుజ్ అన్న ముజాల ఒసినార్

12-13 నస్తవలె రోమ సయ్యనమ్దికార్, వరి అతికారి, జమానుర్ యేసుజ్ అస్తారె తోహ్కాతార్. వారు వన్నిజ్ తోహ్కాతారె, ముజాల, అన్న ఇని వన్నిడగ్రు ఒతార్. వాండ్రు అయా ఏంటు విజా పుజెరిజ ముస్సు, పెరి పుజెరి ఆతి కయపెజ్ మామీసి. 14 యా కయవనె, 'లోకుర్ విజెరె వందిజ్ ఒరెన్ సానికాదె నెగెద్' ఇజి యూదురి అతికారిజ్ బుద్ది వెహ్సి మహాన్.

పేతురు యేసుజ్ నెస్ పి ఇజి వెహ్సినాన్

15 సిమోన్ పేతురు ని మరి ఒరెన్ సినూ యేసు వెన్కా సాహార్. అయా సినూ, విజా పుజెరిజ ముస్సు, పెరిపుజెరిజ్ నెల్ల ఆతికాన్. అందెజె వాండ్రు యేసువెట పెరిపుజెరి ఇండ్రెణి డేవాదు సాహాన్. 16 పేతురు గవుని వెల్లి నిహామహాన్. పెరిపుజెరిజ్ నెల్ల ఆతి అయా సినూ మర్జి వాతండ్రె, గవ్ నెడగ్రు నిల్లి మంజిని అయ్ లిదిజ్ వెహ్సాండ్రె, పేతురుజ్ లోఇ కూక్త ఒతాన్.

17 అయావలె అయా అయ్ లి పేతురువెట, "నీనుబా వన్ని సిసూర్ లోఇ ఒరిగదె?", ఇజి వెన్ బాతాన్. దన్నిజ్ వాండ్రు, "నాను ఆవి?", ఇహాన్. 18 అయావలె గొప్ప పిని మహాద్. అందెజె అతికారిజుని వణిమన్నిసిరెసిను ఎరెని దన్ని సులులుం నిల్లికాయజి మహార్. పేతురుబా వరివెట నిసాండ్రె, సిసు కాయజి మహాన్.

పెరి పుజెరి యేసుజీవేనబాజినాన్

19 అయావలె, విజా పుజెరిజ ముస్సు మన్ని పెరిపుజెరి యేసుజీ వన్నిసిసూర్ వందిజ్ వాండ్రు నెన్పిన్సి బోద వందిజ్ వెన్బాజి మహాన్. 20 అందెజె యేసు, "నాను లోకుర్ విజెరె ఎర్దునె వెహ్మన. యూదురు విజెరె కూడ్డి వాజి మంజిని, యూదురి మీటిజ్ ఇల్కాజ్ని దేవుణుగుడిడు ఎస్తివలెబా నేరిపిసి మహా. నాను ఇనికబా డొజసాటు వెహ్మేత. 21 మరి ఎందానిజ్ నజీ వెన్బాజిని? నా మాట విహివరిజ్వేనబా. నాను వెహ్మిక్వేవర్గిక్వేవారు నెస్సార్", ఇజి వెహ్మన్.

22 యేసు యాకెజ్ వెహ్మిజ్, అబ్బె నిహిమహి అతికారిజ లోఇ ఒరెన్ యేసుజ్ ఉండ్రె లెవడెయితాండ్రె, "యాలెకండ విజా పుజెరిజ ముస్సు మన్ని పెరిపుజెరిజ్ మర్జి వెహ్మిని?", ఇజి వెహ్మన్. 23 అయావలె యేసు, "నాను తవు ఇన్నిక వెహ్మిజ, అయాక నజీ వెహ్మే. గాని నాను నిజం వెహ్మిజ, ఎందనిజ్ నజీ డెయిజిని?", ఇజి వెహ్మన్. 24 అందెజె అన్న వన్నిజ్ తోహ్మి డెసనె విజా పుజెరిజ ముస్సు పెరిపుజెరి కయవడగు పాక్తాన్.

యేసుజ్ నెన్పే ఇజి పేతురు మరివెహ్మినినాన్

25 పేతురు సిసు కాయిజి నిహా మహాన్. అయావలె మహికార్వన్నిజ్, "సిసుబా వన్ని సిసూర్లోఇ ఒరిగదె?", ఇజి వెన్బాతార్. గాని పేతురు, "నాను ఆవ", ఇజి కెమితాన్. 26 నస్తివలె పేతురు గిబ్బె తెవ్కతి పణిమన్నిసి బంతుకులు ఒరెన్ అబ్బె మహాన్. వాండ్రు విజా పుజెరిజ ముస్సు మన్ని పెరి పెరి పుజెరి పణిమన్నిసిలోఇ ఒరెన్. వాండ్రు, "నిజీ వన్నివెల టోటాదు నాను నుడెతగదె?", ఇహాన్. 27 మరిబా, "నాను నెన్పే", ఇజి వెహ్మన్. వెలనె కొరు కెరెతాన్.

యేసుజ్పిలాతు ముజాల ఒసినార్

28 వెన్కా యూదురు యేసుజ్ కయవ బాణిజ్రోమా గవర్నరు మన్ని పెరి ఇండ్రె ఒతార్. అయావలె పెందాల్ఆతాన్. యూదురు ఆఇ వన్ని ఇండ్రె డుగ్జి మయ్ల ఆనావ్ఇజి ఒడిబిజి వారు గవర్నరు మన్ని ఇండ్రె డుగ్గివితార్. ఎందానిజ్ఇహిజ, వారు వస్సు బోజనం ఉండెజ్నుబమ్మక మండ్రెజ్వలె. అయాక ఉండ్రె ఆసారం. 29 అందెజె గవర్నరు ఆతి పిలాతు, వెల్లి వరిడగు వాతండ్రె, విని ముస్సు ఇనిఇని నేరమ్కు మొప్పినిదెర్?", ఇజి వెన్బాతాన్. 30 అయావలె వారు, "పింధ్రు తవు కిఇకాన్ ఇహిజ, సి బాన్తెవతావ్మరి", ఇజి మర్జి వెహ్మన్. 31 పిలాతు వరిజ్, "మీరె వన్నిజ్ఒసి, మీ యూదురి రూలుదు మన్ని వజ తీర్పు సీదు", ఇహాన్. దనిజ్వారు, "ఎయెరిజ్బా సప్తెజ్మజి అక్కుసిల్లెద్", ఇహాన్. 32 యేసుఎలాగ మర్తి సాపు సానాన్ఇజి వాండ్రు వెహ్మి మాటెజ్ పూర్తి ఆదెజ్ యాక జగ్గితాన్. 33 పిలాతు వన్ని ఇండ్రె మర్జి సాహండ్రె, యేసుజ్ కూక్కిస్తాండ్రె వన్నిజ్, "సిసు యుదురిజ్రాజానా?", ఇజి వెన్బాతాన్. 34 అందెజె యేసు, "సిలోఇహాన్ వాతి మాటనా, మహికార్నా వందిజ్నిజి వెహ్మిరా?", ఇజి వెన్బాతాన్. 35 అయావలె పిలాతు, "నాను యూద వాండ్రనా? నీ సాంత లోకుర్ని నీ సాంత పెరిపుజెరిజ నిజీ నాబాన్ ఒవజెస్తార్. సిసు ఇన్నిక కితి?", ఇజి వెహ్మన్. 36 అందెజె యేసు, "నా అతికారం యా లోకమ్ది రాజారిజ్ మన్ని అతికారం లెకండ మన్నిక ఆవద్. నన్నిఅతికారం నజీ మహిజ, యూదురు నజీ అరెస్టు కింద్రె నా సిసూర్ అడ్డు కిత్తార్ మరి. గాని నాను యా లోకమ్ది రాజా ఆవ", ఇజి వెహ్మన్. 37 "అహిజ, సిసు ఒరెన్రాజానా?", ఇజి పిలాతు వెహ్మన్. అందెజె యేసు, "నాను రాజా ఇజి సిసు వెహ్మిని. నిజమాతి మాటెజ్వెహ్మి వందిజె నాను పుట్టనె యా లోకమ్దు వాత. సిజమాతికెజ్ కోరిజినికాన్ నాను వెహ్మిని మాటెజ్ వినాన్", ఇజి వెహ్మన్. 38 అయావలె పిలాతు, "నిజమాతి మాటెజ్ఇన్నికెజ్?", ఇజి వెన్బాతాన్. వెన్బాతాండ్రె వాండ్రు వెల్లి యూదురు బాన్సాహండ్రె, "వినిజ్తిర్పు సీదెజ్విని లోఇ ఇన్ని నేరంబా తోర్వద్. 39 గాని మీ అలవాటులెకండ్రె, ఏంటుఏంటు వస్సు వండ్రెయ్ కాలమ్దు, "కయ్దు మన్ని ఒరెన్వన్నిజ్మజి డిసి పాక్అ", ఇజి మీరు లొస్సిదెర్. అందెజె యుదురిజ్రాజాజ్ నాను డిసి సీదెజ్ మీరు కోరిజినిదెరా?", ఇజి వెన్బాతాన్. 40 అయావలె వారు, "పాని! వినిజ్పాని. బరబెజ్డిసి సీదా మజి", ఇజి డేల్లి మర్జి వెహ్మన్. యా బరబ్బ ఒరెన్ కజారి.

19 అందెజె పిలాతు, "యేసుజ్ ఒసి కొరడెజాణిజ్ డెయ్దు", ఇజి నయ్నమ్దివరిజ్ వెహ్మన్. 2-3 నయ్నమ్దికార్ సాప్పాణిజ్ టోపి తయార్ కితార్ వన్ని బురాదు తోడిగిస్తార్. వారు వన్నిజ్నండ్రె ఎరాని నరి సాక్క తోడిగిస్తార్, వన్నిడగు సాన్ని, "యూదురిజ్ రాజా నిజి జెయము", ఇజి వెక్కి వెహ్మన్. వారు వన్ని లెపాదు డెయ్తార్. 4 మరి ఉండ్రెనుటుబా, పిలాతు వన్ని ఇండ్రెణిజ్ వెల్లి వాతాండ్రె, మంద యూదురిజ్ ఇదిలో, వన్ని లోఇ ఇనితవుబా నజీ తోర్వద్ ఇజి మీరు నెస్టెనాను వన్నిజ్వెల్లి మీ డగ్గు తపిన్న", ఇజి వెహ్మన్. 5 అందెజె యేసుజ్ సాప్పాణి టోపి ని ఎరాని సాక్క తోడిగిస్తార్ వెల్లి తతార్. అయావలె పిలాతు వరిజ్, "ఇవిలోనాండ్రు", ఇజి వెహ్మన్.

6 పెరిపుజెరిజుని దేవుణు గుడిది జమాజ్ణు వన్నిజ్ నుడితార్, "వన్నిజ్ సిలువాదు కుటిజాణిజ్ డెయిజి సవ్అ, సిలువాదు కుటిజాణిజ్ డెయిజి సవ్అ", ఇజి డేడిస్తార్. గాని పిలాతు, "విని లోఇ నజీ ఇన్ని తవు బా తోర్వద్. అందెజె మీరె వన్నిజ్ఒసి, సిలువాదు డెయిజి సప్తు", ఇహాన్. 7 అయావలె వారు, "మజి మా యూదురి రూలుజ్మనాద్. అయా రూలుజ్ వజ వీండ్రు సాదెజ్వలె. ఎందానిజ్ఇహిజ, వీండ్రు, "నానె దేవుణు మరిసి ఇజి వెహ్మన్", ఇహాన్. 8 పిలాతు యా మాటెజ్విహిజ్మరి ఒదె తియెల్ఆతాన్. 9 వాండ్రు మరి వన్ని ఇండ్రె డుగితాండ్రె యేసుజ్, సిసు ఎంబెణిజ్ వాతికి? ఇజి వెన్బాతాన్. గాని యేసు మర్జి ఇనికబా వెహ్మిలాన్. 10 అందెజె పిలాతు, "సిసు నా వెల వర్గెదా? నిజి సిలువాదు కుటిజాణిజ్ డెయ్జి సప్తెజ్బా నజీ అతికారం మనాద్. విడుడల కిదెజ్బా అతికారం మనాద్ ఇజి సిసు నెన్ఇదా?", ఇహాన్. 11 అందెజె యేసు, "నా ముస్సు దేవుణు నిజి అతికారం సితిజ్నె, నిజి అతికారం మనాద్. అందెజె నజీ నీ బాన్ఒవజెప్పికాన్నిజి ఇంక లాపు పాపం కిత్తాన్", ఇజి వెహ్మన్.

12 యా మాట వివాండ్రె పిలాతు యేసుజ్విడుడల కిదెజ్నండ్రెతాన్. గాని యూదురు, "సిసు వినిజ్డిసి సితిజ, సిసు కయ్సరు రాజాజ్కూలవాండ్రు ఆఇ. రాజా ఇజి వన్నిజ్ వాండ్రె వెహ్మి ఆనికాన్ ఎయెన్బా కయ్సరుజ్ వగ ఆతికాన్", ఇజి మరి డుల డేల్స్తార్.

13 పిలాతు యా మాటెజ్విహిజ్వెలె, వాండ్రు యేసుజ్వెల్లి తతాన్. తతాండ్రె నాయం తిర్నికాన్ బన్ని కుర్నిదు బస్తాండ్రె యేసుజ్సిలువాదు డెయ్అ ఇజి తీర్పు సితాన్. అయా కుర్ని పణకాణిజ్ తయార్ కితి బాడి: ఇజి కూక్కి బాడి:దు మనాద్. అయా బాడి:జ్విబ్బె బాసదు గబత ఇనార్.

14 నస్తవలె పన్నవండోయ్ నడిమి మన్ని విస్త్రాంతిదినం ముజాల మన్ని తయారీఆని రోజు. పెందాల్ఆరు గంటెజ్ఆతాద్. అయావలె పిలాతు, "ఇవిలోన్ మీ రాజు", ఇజి యుదురిజ్ వెహ్. 15 అందెజె వారు, "నవ్ల వన్నిజ్, నవ్ల వన్నిజ్, సిలువాదు వన్నిజ్ కుంటిజాణిజ్ డెయ్ జి సవల", ఇజి డెడిస్తార్. "నాను మీ రాజుజీసిలువాదు కుటిజాణిజ్ డెయిజి సవెజా?", ఇజి పిలాతు వెనబాతాన్. అయావలె పెరి పుజెరబు, "కయ్ సరు ఒరెండ్రె మా రాజు. మరి ఎమేణి రాజు మజి సిల్లెన్", ఇజి వెహ్.

16 అందెజె పిలాతు యేసుజ్ సిలువాదు డెయ్ జి సవెజ్ వరిజ్ ఒవజెహ్. వారు వన్నిజ్ ఒతార్.

యేసుజ్ సిలువాదు పాక్సినార్

17 యేసు వన్ని సాంత సిలువ పిండిజి, పట్టుం వెల్లి వాతండ్రె బుర్ పిణికి ఇజి కూకె ఆని బాడిడు వాతాన్. ఎబ్రి బాసదు దన్నిజ్ గోల్ గోత ఇనార్. 18 అబ్బె సయ్ నమ్దికార్ వన్నిజ్ సిలువాదు కుటిజాణిజ్ డెయ్ తార్. వారు రివర్ లోకురిజ్ బా వన్నివెల సిలువాదు కుటిజాణిజ్ డెయ్ తార్. యేసుజ్ నడిమి ఇట్టాన్. ఒరెన్ వన్నిజ్ ఉజెరి పడకాద్. ఒరెన్ డెబర పడకాద్. ఆహె సిలువాదు డెయ్ తార్. 19 పిలాతుబా ఉండ్రె బోర్డు తయారీ కిబిస్తాండ్రె, సిలువాదు తోవ్నాత్ ఇట్టాన్. అయా బోర్డుదు, 'నజెరతుదికాన్ ఆతి యేసు. యూదురిజ్ రాజు', ఇజి రాసి ఇట్టాన్. 20 ఎబ్రి, గ్రీకు, రోమ యా మూండ్రె బాసిజాణిజ్ బోర్డుదు ఆహెరాస్త మహార్. యేసు ప్రబుజ్ సిలువాదు డెయితి బాడ్డిః పట్టుం డగ్రు మనాద్. అందెజె నండ్రెండ్రె యూదురు అయాక సద్విత్తార్. 21 నస్తవలె యూదుర్జ పెరి పుజెరిబు పిలాతుజ్, "యూదురిజ్ రాజు ఇజి రాస్త. గాని 'నానె యూదురిజ్ రాజు', ఇజి వీండ్రు వెహ్ ఇజి రాస్ల", ఇహార్. 22 అందెజె పిలాతు, "నాను రాస్తి మన్నికదె మన్నిద్. మరి మారిస్ ఏ", ఇహాన్. 23 సయ్ నమ్దికార్ యేసుజ్ సిలువాదు కుటిజాణిజ్ డెయితివలె వన్ని సాక్సెజ్ లాగితార్. వాండ్రు వేడ్ గితి మహె సాల్ వదిజ్ నాల్గి ముకెజ్ కిస్తారె, ఉండ్రె ముక ఒరెన్ వన్నిజ్ ఆహె సీబె ఆతార్. పాదమ్ దాక మంజిని ఉండ్రె నిరీ సాక్సెజ్ మహాద్. అయాక కుటు సిలిక. ముస్కుహాన్ అడ్డి దాక కుటు సిల్లెండ్రె ఉండ్రె లెకెండ్రె గుత మహాద్. 24 ఒరెన్ మరి ఒరెన్ వెల, "అయాక కిస్నాత్. ఎయెరిజ్ అయాక వానాద్ ఇజి సీటి పాక్సి సూణాట్", ఇజి వగ్గితార్. 'నా సాల్వ వారు సీబె ఆతార్. నా నిరీ సాక వరిజ్ సీటి పాక్సార్ †', ఇజి దేవుణు మాటదు రాస్తి మనికెజ్ పూర్తి ఆని వందిజ్ యాక జగ్గితార్. సయ్ నమ్దికార్ అయాలెకండ్రె కిత్తార్. 25 నస్తవలె, యేసుజ్ డెయ్ తి సిలువ డగ్రు వన్ని అయిసి, వన్ని కొగ్రి అయిసి, క్లోపా ఇన్ని వన్ని ఆల్లి మరియ, మగ్దలెనె మరియ ఇనికెజ్ నిహె మహె. 26 యేసువన్ని అయిసిని వాండ్రు నండ్రె ప్రేమిస్తి సిసూ, డగ్రునిహె మహిక సుడెతాండ్రె అయిసిజ్, "ఓ యా, నేండ్రుహాన్ వీండ్రె నీ మరిన్ లెకెండ్రె మంజినాన్ లె", ఇజి వెహ్. 27 మరి సిసూడుజ్, "ఇదిలో నీ యాయ", ఇజి వెహ్. నాండిహాన్ అయా సిసూ దనిజ్ వన్ని ఇండ్రె కూక్ ఒతాన్.

యేసు సాజినాన్

28 వెన్యా, బుబ్బు ఒవజెహ్ పణిజ్ విజు ఏలు పూర్తిఆతె, ఇజి ఏలు నెస్తాన్. నెస్తాండ్రె, కీర్తన పుస్తకమ్దు రాస్తి మన్ని మాటెజ్ పూర్తి ఆని వందిజ్ 'నజి ఏప్పి కట్సినాద్', ఇజి వెహ్. 29 అయావలె అబె నండ్రె సేందు ద్రాక్కు కడు మన్ని ఉండ్రె డొకు మహాద్. సయ్ నమ్దికార్ ఉండ్రె దూది ననిక అయా సేందు ద్రాక్కుకల్దు ముడుకేతారె, అయాక ఇసాపు మరాతి కొమాదు తోవ్తారె, వన్ని వెయ్దు సిత్తార్. 30 వాండ్రు అయాక ఉటాండ్రె, "నా పణిజ్ పూర్తి ఆతాద్", ఇజి వెహ్. 31 నస్తవలె, అయా రోజు విస్త్రాంతిదినం ముజాల మన్ని తయారీఆని రోజు. మహ్నా నాండిజ్ విస్త్రాంతి దినం. యా దినం ముకెలమాతిక. ఎందానిజ్ ఇహెజ, యూదురి పస్క వండ్రెయి అయనాండిజె మొదలెసిసాద్. నాండిజ్ మొడ సిలువాదు మండ్రెజ్ వరిజ్ ఇష్టం సిల్లెద్. అందెజె యూదురు పిలాతుజ్, సిలువాదు పాక్తి వరి కాల్యు రుజు డెయ్ జి వరిజ్ బేగి నెపిసి, వరి పీనుగు సిలువెజాణిజ్ డెప్తెజ్ నెల్వ లొస్తార్. 32 పిలాతు నెలవ సిత్తిజ్, సయ్ నమ్దికార్ వాతారె, యేసువెల సిలువాదు డెయితి మొదహె వన్ని కాల్యు రుజు డెయ్ తార్. వెన్యా మహె వన్ని కాల్యు బా రుజు డెయ్ తార్. 33 గాని యేసుడగ్రు వాతిజ్, వాండ్రు ముజాలె సాతాన్ ఇజి వారు నెస్తార్. అందెజె వారు వన్ని కాల్యు రుజు డెయ్ వేతార్. 34 గాని సయ్ నమ్దివరి లోఇ ఒరెన్ బలెందాన్ ఉండ్రె పడకాదు గుతాన్. గుతిజ్ వెలెనె, ఏరు నల సాతె. 35 మీరుబా నమినివందిజ్, యాక జగ్గితివలె సుడెతికాన్ దనివందిజ్ వెహ్. వాండ్రు వెహ్ కి నిజమ్ నె. వాండ్రు నిజం వెహ్ నాన్ ఇజి వాండ్రు నెస్తాన్.

36-37 'వన్ని డుముక లోఇ ఉండ్రె బా రుజ్ ఏద్ ††', ఇజి, మరి, 'వారు గుతివన్నిజ్ వారు సూణార్ ‡, ఇజి రాస్తి మన్ని దేవుణు మాటెజ్ పూర్తిఆని వందిజె యా నజతిజ్ జగ్గితె.

యేసుజ్ సమాది కిజినార్

38 యోసిపు ఇనికాన్ ఒరెన్ మహాన్. వాండ్రు అరిమతియ ఇని పట్టుమ్దికాన్. వాండ్రు యేసు సిసూ ఒరెన్. గాని వాండ్రు అయాక ఎయెరిజ్ బా వెహ్ ఏతాన్. ఎందానిజ్ ఇహెజ, వాండ్రు యూదురిజ్ తియెల్ ఆతార్. వెన్యా వాండ్రు యేసు పీనుగు సిలువదాన్ డిప్పి సమాది కిదెజ్ పిలాతుజ్ నెల్వ లొస్తాన్. నెల్వ సితిజ్ వాండ్రు వాతండ్రె మొడః ఒతాన్. 39 నికొదిమె ఇన్నికాన్ ఒరెన్ బా వన్ని వెల సాహాన్. యా నికొదిమెనె, ముజాలె, యేసుజ్ రెయ్ తు సాన్ని సుడెతికాన్. వాండ్రు డగ్రు ముప్పయ్ నాల్గి కె. జి, బోలము కలప్తి అగరు ఇన్ని మొడః నబ్ వండ్రె ఇడ్డి మాయమ్కు తత్తాన్ 40 వారు రివర్, యేసు పీనుగు ఒతారె, మాయమ్కు రాసి తెలాని పాతెజాణి సుటిస్తార్. యూదురు సమాది కిని ముజాలె, పీనుగుతయారీ కిని అలవాటు లెకెండ్రె ఈహు కిత్తార్. 41 యేసుజ్ సిలువాదు డెయ్ తి బాడిడు ఉండ్రె టోట మనాద్. అబ్బె వణుకుదు దొలిస్తి ఉండ్రె కొత్తదూకి మహాద్. అబ్బె ఎయెరిజ్ బా ఎసిజ్ బా ఇడెవరె. 42 అయా రోజు యూదురి విస్త్రాంతిదినం ముజాలె మన్ని తయారీఆని రోజు. మరి, అయా దూకిడగ్రు మహాద్. అందెజె వారు యేసుజ్ అబ్బె ఇట్టార్.

20 వారమ్దిజ్ మొదహె రోజు పెందాల్, సీకట్ మన్ బునె మగ్దలెనె మరియ పీనుగు నూనెజ్ రాస్తెజ్ దూకిదు సాహాద్. అది వాతిజ్, పీనుగు ఇడ్డి సమాదిదిజ్ మూక్తి పణుకు లాగితిక సుడెతాద్. 2 అందెజె అది ఉమ్నోజి సాన్ని, యేసు నండ్రె ప్రేమిస్తి సిసూ బాన్, సిమోన్ పేతురుబాన్ వాతాదె వరిజ్, "ప్రబుజ్

† కీర్తన 22:18. †† జెకె 12:10. ‡ నిర్గమ 12:46, కీర్తన 34:20.

సమాదిదాన్ వారు ఒకానొకరు. వన్నిజ్ ఎంబె ఇడ్డారొ ఇజి మాపు నెస్వప్", ఇజి వెహ్లాద్. (మరియవెట మరి సెగొండెబోదెక్బా మహా) ³ అందెజి పేతురుని, అయా సిసూ సాతార సమాదిదు సాహార్. ⁴ వారు రివర్ ఉక్పాజి సాన్సి మహార్. గాని అయా సిసూ పేతురుజ్ ఇంక బేగి ఉక్పాతాండ్రె సమాది ముజాల వాతాన్. ⁵ వాండ్రు వజ్జెజి సుడెతిజ్, తెలాని పాతెజ్ అబె అర్త మహిక సుడెతాన్. వాండ్రు లొఇ డుగ్గోతాన్. ⁶⁻⁷ నస్తివలె సిమోన్ పేతురు వన్ని వెన్యా, వాతండ్రె లొఇ డుగితాన్. వాండ్రు తెలాని పతెజ్ అర్తి మహిక సుడెతాన్. యేసు బుర్త సుటిస్తి మహి వన్సెబా అబ్బె అర్త మహిక సుడెతాన్. అయా వన్సె, తెలాని పాతవెట కూడెవండ సుటిస్తిడెసనె వేరె మహాద్. ⁸ వెనుక ముజాల సమాదిదు వాతి సిసూబా డుగితాన్. వాండ్రు పాతెజ్ అర్తి మహిక సుడెతాండ్రె, యేసు మర్జి నిజెతాన్ ఇజి నమ్మితాన్. ⁹ యేసు సాతి వరిబాణిజ్ తవ్వండ మర్జి నిజెనాన్లె ఇజి దేవుణు మాటదు రాస్తి మన్ని మాటదిజ్ వారు ఇంక అర్తం కిరె. ¹⁰ సిసూర్ వరి ఇల్కాజ్ మర్జి సాహార్.

యేసు మగ్దలెనె మరియెజ్ తోరెఅజినాన్

¹¹ మరియ మరి సమాదిదు వాత మహాద్. అది వెల్లినిహదె, అడెబాజి మహాద్. అడెబాజినె అది వజ్జెజి సమాది లొఇ సుడెతాద్. ¹² అయావలె, తెలాని పాతెజ్ పార్వెపాతి రివర్ దేవుణు దూతెజ అది సుడితాద్. యేసు పేనుగుమహి బాడిడు బస్త మహార్. పాదమక దరిజ్ ఒరెన్ బస్త మహాన్. బుర్త గాడిద్ ఒరెన్ బస్త మహాన్. ¹³ వారు మరియెజ్, "ఓ బీ ఎందానిజ్ నీను అడెబాజినె?", ఇజి వెన్బాతాన్. అందెజె అది, "నా ప్రబు మొడె ఎయెరో పెహ్లా ఒకానొకరు. ఎంబె ఇడ్డారొ నజె తెలివద్", ఇజి వెహ్లాద్. ¹⁴ యా మాటెజ్ వెహ్లాద్, వెన్యా మర్జి బేస్తాద్. బేస్తాజ్ యేసు అబ్బె నిహి మహిక సుడెతాద్. గాని వన్నిజ్ గుర్తు అన్వితాద్. ¹⁵ అయావలె యేసు, "ఓ బీ, ఎందానిజ్ నీను అడెబాజినె? ఎయెరిజ్ రెబాజినె?", ఇజి వెన్బాతాన్. వీండ్రు అయా టోటాదు పణి కినికాన్సు ఇజి ఒడిబెజి, "బాబు, నీను వన్ని పేనుగుపిండితి ఒతి మహిజ, ఎంబె ఇడ్డి మన్నిదొ నజె వెహ్లా. నాను సాస్తి వన్నిజ్ పర్తి ఒనాలె", ఇజి వెహ్లాద్. ¹⁶ నస్తివలె యేసు దన్నిజ్, "మరియ", ఇజి కూక్తాద్. వెటనె అది మర్జి వన్ని దరిజ్ మహాద్. వాండ్రు యేసు ఇజి గుర్తు అస్తాదె ఎబ్బె బాసదు, "రబుని", ఇజి కూక్తాద్. దని అర్తం బోదిస్సికాన్ ఇజి. ¹⁷ అయావలె యేసు, "నాను నా బుబ్బడగు ఇంక మర్జి సాన్వెనె. అందెజె సజెఅసి మన్మా. గాని నీను నా సిసూర్ డగు సాస్తి వరిజ్, "నాను నా బుబ్బడగు మర్జి సాన్వెనె. వాండ్రునె నా బుబ్బ మి బుబ్బ. వాండ్రె నా దేవుణు మీ దేవుణు", ఇజి వెహ్లా. ¹⁸ అందెజె మగ్దలెనె మరియ సిసూర్ డగు వాతాదె, "ప్రబుజ్ సుడెత", ఇజి వెహ్లాద్. మరి ప్రబు దన్నిజ్ వెహ్లాకెబా వెహ్లాద్.

యేసు వన్ని సిసూరిజ్ తోరె అజినాన్

¹⁹ అయా ఆదివారమ్నె, పాదొయ్ సిసూర్ కూడితారె, సెహ్లా కెప్పి బస్త మహార్. ఎందానిజ్ ఇహిజ, వారు యుదురిజ్ తియెల్ అతార. యూదురు వరిజ్ అదికారుజ ఒపజెప్పారె ఇజి. నస్తివలె యేసు వాతండ్రె వరినడిమి నిహండ్రె, "సమాదనం కల్లిపిద్", ఇజి వెహ్లాన్. ²⁰ యాక వెహ్లాండ్రె, సిలువాదు డెయ్ వ ఆతివలె వన్ని కికాజ్, వన్ని వడెకాద్ వాతి గాయమ్మకు వాండ్రు వరిజ్ తోరిస్తాన్. ప్రబుజ్ సుడెతారె సిసూర్ నండొ సర్ద అతార.

²¹⁻²² మరి బా యేసువరిజ్, "మిజి సమాదనం కల్లిపిద్. నా బుబ్బ వన్ని మాట బోదిస్తెజ్ నజె యా లోకమ్మదు పొక్తి వజ నాను మిజి పొక్తిన", ఇజి వెహ్లాండ్రె, వరి ముస్సు తూబితాన్. తూబితాండ్రె, వరిజ్, "దేవుణు ఆత్మదిజ్ మీ మన్నుదు ఇడెదు. ²³ మీరు ఎయిపావమ్మకు సెమిస్సిదెరో, వరి పావమ్మకు సెమిస్త్ మనె. ఎయిపావమ్మకు మీరు సెమిస్ ఇదెరో, అయకెజ్ సెమిసి మన్ఉ", ఇజి వెహ్లాన్.

యేసుతోమెజ్ తోరె అజినాన్

²⁴ యేసు సిసూరిజ్ తోరె ఆతివలె, వన్నెండ్రు మన్నిసీర్ సిసూర్ లొఇ మన్ని దిదుము ఇన్ని తోమా సిల్లెండ మహాన్. ²⁵ అందెజె మహి సిసూర్, "మాపు ప్రబుజ్ సుడెతాన్ ఇజి వెహ్లాజ్, వాండ్రు, "నాను వన్ని కికాజ్ కుంటిబాణిజ్ డెయెతి గాయమ్మది మనదిజ్ తోఎండ, అయా మనదు ముట్వండ, వన్ని వడెకాదు నాను కియు ఇడెవండ, వాండ్రు నిజెత మనాన్ ఇజి నమి", ఇహాన్. ²⁶ ఉండ్రె వారం వెన్యా వన్ని సిసూర్ విజెరె మరిబా కూడితారె, ఉండ్రె ఇండ్రె మహార్. తోమాబా వరివెట మహాన్. సేహ్లా కెహ్లా ఆత మహాద్. గాని యేసు వాతండ్రె వరినడిమి నిహండ్రె, "సమాదనం కల్లిపిద్", ఇజి వెహ్లాన్. ²⁷ మరి తోమెజ్, "నీ డెస్సె ఇబ్బె ఇడెఅ. నా కికాజ్ సుడెఅ. నీ కియు సాస్తి నా వడెకాద్ మన్ని గాయమ్మదు ఇడెఅ. అనుమానం సిల్లెండ నమిఅ", ఇజి వెహ్లాన్. ²⁸ అయావలె తోమా, "నీనె నా ప్రబు. నీనె నా దేవుణు", ఇజి వెహ్లాన్. ²⁹ అందెజె యేసు వన్నిజ్, "నీను నజె సుడెతిజ్ నిజెతమనాన్ ఇజి నమ్మితి. నజె తోవండ నమ్మితికార్ గొప్ప వారు", ఇజి వెహ్లాన్.

³⁰ యేసు వన్నిసిసూర్జ నడిమి, మరి నండొ బమ్మాని వణిజ్ కితాన్. అయకెజ్ యా పుస్తకమ్మదు రాన్ఉ. ³¹ గాని, యేసు క్రీస్తు ఇజి, వాండ్రు దేవుణుమరిసి ఇజి మీరు నమ్మినివందిజ్, వన్ని ముస్సు మన్ని మీ నమకమ్దాన్ మిజి ఎలాకాలం దేవుణువెట బత్తిని బత్తు దొప్పివందిజ్ యాకెజ్ రాస్త మన్నె.

21 దిని వెనుక, యేసు తిబెరియ సమ్దరం డగు మరి వన్ని సిసూర్జ తోరె అజినాన్. వాండ్రు ఈహు తోరె అతాన్. ² సిమోన్ పేతురు, దిదిమ ఇజి కుకెఆని తోమా, గలీలయ ప్రాంతమ్మది కానా ఇన్ని పట్నమ్మది నతనయేలు, జెబెదయ మరిసిర్ ఆతి యాకోబు యోహాను, మరి రివర్ సిసూర్ కూడిత మహార్. ³ సిమోన్ పేతురు, "నాను మొయెజ్ అస్సెజ్ సాన్వెనె", ఇజి వరిజ్ వెహ్లాన్. అయావలె వారు, "మాపు బా నీ వెట వానావ్", ఇహార్. అందెజె వారు సాహార, ఉండ్రె డోణి ఎక్తార సాహార్. గాని ఆ రెయతు ఇనికబా అన్వితార. ⁴ పార్దు సాన్ మహివలె, యేసు సమ్దరం దరిదు నిహన్. గాని వన్ని సిసూర్ యేసుఇజి గుర్తు అన్వితార. ⁵ అందెజె వాండ్రు వరిజ్, "తంబెరిజాండె, మొయెజ్ ఇన్నికబా అస్సిదెరా?", ఇజి వెన్బాతాన్. వారు, "సిల్లెద్", ఇజి వన్నిజ్ వెహ్లాన్. ⁶ నస్తివలె వాండ్రు, "డోణి ఉకెరె వడెకాదు మీ వలెజ్ పాక్తు. మిజి దొహ్లానె", ఇజి వెహ్లాన్. వారు అయ లెకెండ కిత్రార్. మొయెజ్ నండొ అర్తె. వల లాగ్ దెజ్ అన్వితార.

7 అయావలె, యేసు నండొ ప్రేమిస్తీ సినూ, "వాండ్రు ప్రబు", ఇజి పేతురుజ్వెహ్లాన్. "వాండ్రు ప్రబు", ఇజి అయా సినూ వెహ్లా మాట విహి వెటనె, సిమోన్ పేతురు వాండ్రు లాగితి ఇడ్డి సాల్వ వేడ్గితాండ్రె, సమ్దరమ్దు డాట్లాన్. 8 వారు గలుదాన్ ఎంజు మెంసు నూరు మూరెజ్నె దూరం మనార్. అందెజె మహి సినూర్ మొయెజ్మన్ని వల లాగ్జినె డోణిదు వాతార్.

9 వారు డిగ్జి వాతిజ్గలుదు, సినూ డిప్పుజ్ దనిముస్కు మొయెజ్ రొటెజ్ తోరితె. 10 యేసు వరిజ్, "పీరు ఏలు అస్తి మహి సెగం మొయెజ్ అగాట్", ఇజి వెహ్లాన్. 11 సిమోన్ పేతురు డోణి ఎక్తాండ్రె వల గలుదు లాగితాన్. అబె నూటి యాబయి మూండ్రీ పరి మొయెజ్వలదు నిండ్రీతె మహె. గాని నిసా మహిజ్బా వల కింజ్వితాద్. 12 యేసు వరిజ్, "రదు తిండ్రు", ఇజి వెహ్లాన్. వాండ్రు ప్రబు ఇజి వరిజ్తెలితార్. అందెజె, సీను ఎయి ఇజి వన్నిజ్ వెన్బాదెజ్ సినూర్ లొఇ ఎయెన్ వన్నిజ్బా దయరం సిల్లెతాద్. 13 యేసు వాతాండ్రె, రొట్టెజ్ లాగితాండ్రె వరిజ్ సీబాత సితాన్. అయ లెకెండ్ మొయెజ్బా సితాన్. 14 యేసు సాతి వరిబాణిజ్ బత్రితి వెన్యా, దినివెట ఏలు ముసార్ సినూర్జ తోరె ఆత్తాన్. 15 వారు తిహి వెన్యా, యేసు సిమోన్పేతురుజ్, "యోహాను మరిసి ఆతి సిమోను, సీను మహి సినూర్జ ఇంక సీను నండొ నజీ ప్రేమిస్తీదా?", ఇజి వెన్బాతాన్. "ఒఒ ప్రబువా, నాను నిజీ ప్రేమిస్తీ ఇజి సీను నెస్సీ", ఇజి వాండ్రు వెహ్లాన్. అందెజె యేసు, "నా గొర్రె పిలెకాజ్మేవ్అ", ఇజి వెహ్లాన్. 16 మరిబా యేసు వన్నిజ్, "యోహాను మరిసి ఆతి సిమోను, సీను నజీ ప్రేమిస్తీదా?", ఇజి వెన్బాతాన్. "ఒఒ ప్రబువా, నాను నిజీ ప్రేమిస్తీ ఇజి సీను నెస్సీ", ఇజి రిజ వెహ్లాన్. అందెజె యేసు, "నా గొర్రెజ్అడిఃఅ", ఇజి వెహ్లాన్. 17 "యోహాను మరిసిఆతి సిమోను, నజీ ప్రేమిస్తీదా?", ఇజి ముసార్వెన్బాతాన్. సీను నజీ ప్రేమిస్తీదా ఇజి ముసార్దిజ్వెన్బాతిజ్, పేతురు బాద ఆతాన్. "ప్రబు సీను విజా నెస్సీకి. నాను నిజీ ప్రేమిస్తీ ఇజి సీను నెస్సీ", ఇజి పేతురు వెహ్లాన్. అందెజె యేసు, "నా గొర్రెజ్ మెవ్అ", ఇజి వెహ్లాన్. 18 "నాను నిజం సీవెట వెహ్లాన, సీను దజడః మనివలె, సీను తయార్ ఆజి నీ ఇస్టం ఆతి బాడిఃదు సాహి. గాని సీను డొక్ర ఆనివెలె, సీకికు సీను సాహ్ని. మరి ఎయెన్బా నిజి తొహ్ని నిజి ఇస్టం సిల్లి బాడిఃదు పిండిజి ఒనాన్", ఇజి వెహ్లాన్. 19 పేతురు ఎలాగమర్రి సాపు సాజి దేవుణు గొప్పపెరికాన్ ఇజి తోరిస్తాండ్రె, దనివందిజ్ వాండ్రు యా మాటెజ్వెహ్లాన్. వెన్యా వన్నిజ్, "నా సినూ ఆజి రఅ", ఇజి వెహ్లాన్. 20 పేతురు వెనుక మహ్తాండ్రె, యేసు నండొ ప్రేమిస్తీ సినూ, వరి వెన్యా వాజినక సుడ్తాన్. (యా సినూనె వస్కు బోజనం తిహివలె యేసు గుంజమ్దు ఒరిగితాండ్రె, "ప్రబువా, నిజి అదికారిజ కీదు ఒపజెప్పికాన్ ఎయెన్", ఇజి వెన్బాతికాన్). 21 పేతురు వన్నిజ్ సుడఃతాండ్రె, "ప్రబువా, వినిజ్ఇన్నిక జగ్గినాద్?", ఇజి వెన్బాతాన్. 22 అందెజె యేసు, "నాను మర్జి వానిదాక వాండ్రు బత్రిదెజ్నజీ ఇస్టం ఆతిజ, నిజి ఇన్నిక? సీను నా సినూ ఆజి వెన్యా వాదెజ్వలె", ఇజి వెహ్లాన్. 23 యేసు అయలెకెండ్ వెహ్లాజ్, యా సినూ సావన్ ఇజి ఉండ్రీ మాట మహి వరి నడిఃమి సెద్రిస్తాద్. గాని వాండ్రు సావన్ ఇజి యేసు వెహావ్తాన్. నాను వానిదాక వాండ్రు బత్రిదెజ్నజీ ఇస్టం ఆతిజ, నిజి ఇన్నిక?", ఇజినె వాండ్రు వెహ్లాన్. 24 యా సజతిజ వందిజ్ వెహ్లాకాన్ యా సినూనె. వీండ్రె ఆయాకెజ్ రాస్త ఇట్లాన్. వాండ్రు వెహ్లాకెజ్ నిజం ఇజి మాపు నెసినావ్. 25 యేసు మరి నండొ సజతిజ్ కితాన్. అయాకెజ్ విజా రాసి ఇడ్దెజ్ ఇహిజ, రాసిని పుస్తకమ్కు అస్సెజ్ యా లోకమ్దు మన్ని బాడ్డి సాల్వెద్ ఇజి నాను ఒడ్కీస్తు ఇజి.

మార్కు

నెల్ల కిబిసినిక

లూక సువార్త రాస్తిమహి లూకనె యా పుస్తకం రాస్తాన్. లూక ఒరెన్ డాక్టరు. క్రీస్తు సకం 60-63 నడిమి యాక రాస్త మనాద్ ఇజి వెస్సినార్. క్రీస్తు సాజి నిజీతి వెన్నా మొదోహి 30 పంటెజ్ లోఇ జగ్గితికెజ్ ఇబ్బె రాస్త మన్నె. లూక సువార్తదు యేసుక్రీస్తు కిత్తి గొప్ప పణిజ వందిజ్ లూక రాస్తాన్. వెనుక, యేసుక్రీస్తు పరలోకమ్దు సాహి వెనుక దేవుణు ఆత్మ వాతండ్రె వన్ని అపొస్తురు వెట గొప్ప బమ్మాతి పణిజ్ కిత్తాన్. యూదయదేసమ్దాన్ అంతియొకయాదు, బాణిజ్ రోమపట్నం దాక యేసుక్రీస్తు వందిజ్ సువార్త సాటిస్తారె అపొస్తురు అయ కాలమ్దు కిత్తి పణిజ వందిజ్ ఇబ్బె రాస్త మనాద్.

దేవుణు యేసుజ్ పరలోకమ్దు ఒతాన్

1 ¹⁻² నా స్త్రీయమాతి దెయ్యెపిలా, నాను ముందాల్ రాస్తి పుస్తకమ్దు, దేవుణు యేసుజ్ పరలోకమ్దు ఒనెండ యేసు కిత్తి విజా పణిజ వందిజ్, యేసు నెస్పిస్తి విజా మాటెజవందిజ్ రాస్త మనాద్. దేవుణు యేసుజ్ పరలోకమ్దు ఒనిముందాల యేసు, వాండ్రు ఏర్పాటు కిత్తి అపొస్తురుజ్ వారు కిని పణి వందిజ్ దేవుణు ఆత్మ సత్తుదాన్ ఆడ్ర సిత్తాన్. ³ యేసు కష్టమ్కు ఓరిసి సాతి వెనుక నిజీతండ్రె, నాను బత్తిత్త ఇజి అపొస్తురు అనుమాసం సిల్లెండ నమ్మిదెజ్ యేసు పరిజ్ తోరె ఆతాన్. నలవయ రోస్సాజ్ నండ్రె సుట్టు యేసు అపొస్తురుజ్ తోరె ఆతండ్రె దేవుణు ఏలుబడి: వందిజ్ వర్గితాన్. ⁴ వారు కూడెజి వాతివలె యేసు ఈహు ఆడ్ర సిత్తాన్, "యెరూసలేం పట్నం డిసి సాన్మాల్. నా బుబ్బు మిజి సీనా ఇజి ఒట్టు కిత్తి వన్ని ఆత్మ ఇని ఇనాయమ్వందిజ్ నాను ముందాల్నె వెహ్గదె. దన్నివందిజ్ కాప్ కిజి మండ్రు. ⁵ యోహాను ఏరుదాన్ బాప్తినం సిత్తాన్. గాని సెగం రోస్సు సాహిజ దేవుణు మిజి వన్ని ఆత్మదాన్ బాప్తినం సీనాన్", ఇహాన్. ⁶ అపొస్తురు యేసు వెట కూడెజి వాతారె వెన్బాతారె, "ప్రబువా, ఏలునె మా ఇప్రాయేలు లోకాజ్ మా దేసెమ్ది ఏలుబడి: మర్జి సీనిలెనా?". ⁷ యేసు వెహ్గన్, "కాలం వందిజ్ నా బుబ్బానె ఏర్పాటు కిత్తాన్. అక్కజ్ విజా నా బుబ్బాతి దేవుణు అతికారమ్దు మనాద్. యాకెజ్ విజా ఎసిజ్ జర్గినాద్ ఇజి మీరు నెస్సెజ్ అవ్సరం సిల్లెద్. ⁸ అహిజ, దేవుణు ఆత్మ మీ ముస్సు వానివలె మీరు సత్తు ఆనిదెర్. అయావలె మీరు యెరూసలేమ్దు, యూదయ దేసెం విజా, సమరియ దేసెం విజా, లోకం విజాబాన్ నా వందిజ్ వెస్సినా సాసిర్ ఆనిదెర్". ⁹ యా మాటెజ్ వెహ్గండ్రె వారు సుడెజిమహిజ్ దేవుణు యేసుజ్ పరలోకమ్దు ఒతాన్. అయావలె ఉండ్రె మొసావ్ వాతాదె అడ్డు కిత్తిజ్ వారు యేసుజ్ తోర్పండ్రె ఆతారె. ¹⁰ యేసు ఆగాసం ముస్సు సాస్తి మహిజ్ వారు ఆగాసం దరోట్టె డిటం బేసి మహార్. అయావలె వెటనె తెల్లని పాతెజ్ పాతిపాతిమహి రిఎర్ దూతారె పరి డగ్రు నిహార్. ¹¹ "ఓ గలీలయాదికిదెరా, మీరు ఎందనిజ్ ఆగాసం దరోట్ సుడెజినిదెర్? మీ డగ్రుహాన్ దేవుణు పరలోకమ్దు యేసుజ్ ఒతాన్. ఎలాగ సాహండ్రె అయావజనె మర్జి వానాన్లె", ఇజి వారు పరిజ్ వెహ్గార్.

త్రియెజ్ అపొస్తురు వెట కూడెజిజ్ ఏర్పాటు కిత్తార్

¹² వెనుక అపొస్తురు ఒలివ మరెక్ మన్ని గొరొతాన్ యెరూసలేం పట్నమ్దు మహ్తా సాహార్. (ఒలివ మరెక్ మన్ని గొరొన్ యెరూసలేం పట్నం డగ్రునె. ఉండ్రె కిలో మీటర్ దూరం మనాద్) ¹³ వారు యెరూసలేమ్దు సాహారె వారు మహి మేడె: గదిదు ఎక్తార్. వారు ఎయెర్ ఎయెర్ ఇహిజ, పేతురు, యోహాను, యాకోబు, అండ్రెయ, పిలిపు, తోమా, బర్తోలోమయి, మత్తయి, అల్వయ్ మరిసి ఆతి యాకోబు, జలోతె ^{††} ఇని మరి ఉండ్రె పేరు మహి సీమోను, యాకోబు మరిసి ఆతి యూద ఇనికార్. ¹⁴ వారు విజేరె కూడితారె ఉండ్రె మన్నుదాన్ డిస్పండ్రె పార్దనం కిజి మహార్. పరివెట సెగొండెక్ అయ్లికొడెక్బా వాతె మహె. యేసు యాయ ఆతి మరియ, వన్ని తంబెర్సీర్బా అబ్బె మహార్.

¹⁵ సెగం రోస్సు సాహి వెనుక డగ్రు డగ్రు నూట ఇర్వయ్ మణిసిర్ యేసుజ్ నమ్మికికార్ కూడిత మహార్. పేతురు పరినడిమి నిహండ్రె ఈహు వెహ్గన్, ¹⁶ "తంబెరిజాండ్రె, దేవుణు మాటదు రాస్తి మహిక తవ్పండ్రె జర్గితాద్. దేవుణు ఆత్మ సత్తుదాన్ దావీదు రాజా యూద వందిజ్ ముందాల్నె వెహ్గికాద్ జర్గితాద్. యా యూద యేసుజ్ అస్సెజ్ వాతివరిజ్ సరి తోరిస్తాన్. ¹⁷ వాండ్రు మా లోఇ ఒరెన్. ఎందనిజ్ ఇహిజ మాపు అపొస్తురు వెట కూడెజి పణి కిదెజ్ యేసు వన్నిజ్ ఏర్పాటు కిత్తాన్".

¹⁸ (యా యూద మొసెం పణిదాన్ సంపాదిస్తి డబ్బుజాన్ బూమి కొలాన్. అబ్బె గడియబుర కిత్తాండ్రె అర్తాండ్రె సాతాన్. అయావలె పాట బదెజ్ ఆజి వస్సెజ్ విజా వెల్లి సాతె. ¹⁹ యెరూసలేమ్దికార్ విజేరె యా సజతిజ్ వెహారె నెస్టారె. అందెజె యూద అర్దిసాతి యా బూమిదిజ్ పరి బాసాదు అక్కెల్లెమ ఇజి వెహ్గార్. దన్ని అర్దం ఇనిక ఇహిజ, 'ఒరెన్ లోకుదిజ్ నస్తి వందిజ్ దొహ్తి డబ్బుదాన్ కొటి బూమి' ఇజి అర్దం).

²⁰ పేతురు మరి వెహ్గన్, "కిర్తనం పుస్తకమ్దు ముందాల్నె ఈహు రాస్త మనాద్: వన్ని ఇల్లు ఎయెన్బా మన్పండ్రె ఆపిన్, దన్ని లోఇ ఎయెన్బా బత్తిఎండ్రె ఆపిన్". ఈహుబా రాస్త మనాద్: అపొస్తుడు † వజ వాండ్రు కిత్తి పణి మరి ఒరెన్ లాగి ఆపిన్. ²¹⁻²² అందెజె మాపు పదకొండు మణిసిర్ అపొస్తురు వెట కూడెజి

† అయ కాలమ్దు ఇప్రాయేలు లోకరి దేసెం రోమాదికార్ ఏలుబడి: కిజి మహార్. †† జలోతె ఇహిజ పటుదల మన్నికాన్ ఇజి అర్దం ‡ అపొస్తురు. సజమ్దిజ్ సుడెజి నడిపిస్సెజ్ ఏర్పాటు ఆజి పాకె ఆతికార్

మండ్రేజ్ మరి ఒరెన్ వన్నిజ్ ఏర్పాటు కిదెజ్పలె. యోహాను యేసువ్రబుజ్ బాప్తీసం సిత్తి బాణిజ్ అసి యేసువ్రబు పరలోకమ్దు సానిదాక మా నడిమినె కూడేజిపాడేజి మా వెట మహికాన్ ఒరెన్ వన్నిజ్ అవ్నరం. ఎందనిజ్ ఇహిజ యేసు సాతి పరిబాణిజ్ మర్రజి బత్రితాన్ ఇజి వాండ్రుబా మా వెట సాసి మండ్రేజ్.

23 అందెజి కూడేజి వాతి మహికాన్ రిఎరి పేర్కు వెహ్సార్. ఒరెన్ యోసేపు (వన్నిజ్ యుస్తు, బర్బుబ ఇని పేర్కుబా మహా) మరి ఒరెన్ మత్తియ. 24²⁵ అయావలె వారు ఈహు పార్దం కిత్తార్, “వ్రబువా, విజెరి మన్నుదు మన్ని విజా ఆలోసనమ్కు నీసు నెసిని. యూద, వన్నిజ్ తగితి బాడ్డిదు సాహాన్. వాండ్రు డిసిసాహి పణి, ఇహిజ నజమదిజ్ నడేపిసి సేవకిని పణి సీదెజ్ వన్నిజ్ బదలు యా రిఎర్ లొఇ ఎయెజ్ నీసు ఏర్పాటు కిత్తి ఇజి మజి తోరిన్అ”. 26 వెనుక వారు సీటిజ్ పాక్టార్. అయావలె మత్తియ ఇని పేరుదాన్ సీటి వాతాద్. అందెజి మత్తియెజ్బా పదకొండు మణిసిర్ అపాస్తురు వెట లెక్క కల్వ్తార్.

పెంతెకొస్తు పండాయ్ నాండిజ్ దేవుణు ఆత్మ వాజినాద్

2 పెంతెకొస్తు ఇని పండాయ్ నాండిజ్ యేసుజ్ నమ్మితికార్ విజేరెకూడేజి ఉండ్రె ఇండ్రె మహార్. 2 వెటనె ఆగాసమ్దాన్ ఉండ్రె జాటు వాతాద్. అయ జాటు, పేరి గాలి వానివజ జాటుదాన్ వాతాదె వారు బస్తిమహి ఇండ్రె నిండ్రెతాద్.

3 వారు సుడేతిజ్ సినుబొద్దు లెకెండ్ తోర్నిక ఉండ్రె వాతాదె ఒరెన్ ఒరెన్ ముస్సు ఉండ్రె ఉండ్రె కొనెజ్ డికితె. 4 విజేరె ముస్సు దేవుణు ఆత్మ నత్తు వాతిజ్ వారు, పరిజ్ నెన్ఇ బాసెజ్ వర్గిదెజ్ మొదొల్స్తార్. దేవుణు ఆత్మనె నెన్ఇ బాసె వర్గిదెజ్ పరిజ్ నత్తు సిత్తాన్.

5 అయావలె విజా దేనమ్కాణిజ్ వాతిమహి బక్తిమన్ని యూదురు యెరూసలేం పట్నమ్దు మహార్. 6 యూదురు మంద లోకుర్ యా జాటు వాతిబాన్ కూడితార్. వారు వర్గినిక వీరు వన్ని వన్ని సాంత బాసిజాణిజ్ వెహెరె యా కూడేజి వాతి మహి యూదురు బమ్మ ఆతార్. “వీరు మాటు వర్గిని బాసిజ్ వర్గినికార్ కొటె”, ఇజి వెహ్సార్. 7 అయావలె వాతి మహికాన్ విజేరె ఒదె బమ్మ ఆతార్ ఒరెన్ వెట ఒరెన్ వెహ్సార్, “యాక ఎలాగ? వీరు విజేరె గలీలయాదికార్ ఆపరా? 8 గాని మాపు పుట్టిమహి నాహ్కాణి ఆఇ ఆఇ బాసిజ్ యా గలీలయాదికార్ వర్గినికార్. యాక మాపు వెంజినాప్. 9-11 ప్రియికు, మదియికు, ఎలామియికు, మెసాపాతేమియ, యూదయ, కవదొకియ, పాంతు, అసియ, పుగియ, పంపులియ, అయ్గుపు, కురేనె డగ్రు మన్ని లిబియ, రోమ దేనమ్దాన్ కూల వాతికార్ (యూదురు, యూదమతం నమ్మితి యూదురు ఆఇకార్) క్రేతియురు, అరెబియురు, దేవుణు కిత్తి గొప్ప పణిజ్ మాటు విజెటె పుట్టి బాసాదు వెస్సిక వెంజినాల్. 12 ఒడిబిత్తిజ మన్ను కూడేవిద్. యాక ఇనిక ఆనాద్లెనా”, ఇజి వారు విజేరె పంబ్ర ఆతార్ ఒరెన్ వెట ఒరెన్ వర్గితార్.

13 సెగొండార్ వీరు తియాజ్ ద్రాక్సు రసం ఉటారె సోస్త మనార్ ఇజి పరిజ్ సెకాల్ కిత్తార్.

పేతురు కూడేజి వాతి లోకుర్ వెట వెహ్సినాన్.

14 అయావలె పదకొండు మణిసిర్ అపాస్తురు వెట మహి పేతురు నిజితండ్రె అబ్బె కూడేజి వాతి లోకుర్ వెట డటం వెహ్సాన్, “యెరూసలేమ్దు బత్రిజిని మా సాంత లోకుర్ ఆతి యూదయ లోకాండె, నాను వెహ్సెక నెగ్రెండ వెండ్రు. వీరు విరిజ్ నెన్ఇ బాసిజ్ వర్గితిక మీరు వెహిదెర్. 15 మీరు ఒడిబిని లెకెండ్ వీరు సాస్తికార్ ఆపెర్. పాద్దు సాసి ఏలు అంబెలి వేడబా ఆపెద్. 16 గాని దేవుణు మాటెజ్ వెహ్సె యోవెల్ ప్రవక్త ముజాలె వెహ్సెకదె మీరు సుడేజినిదెర్.

17 యోవెల్ ప్రవక్త ఇనిక వెహ్సాన్ ఇహిజ ఆకార్ దినమ్కాజ్ నాను ఇనిక కిని ఇజి దేవుణు వెహ్సినాన్. విజా లోకాజ్ నా ఆత్మదిజ్ సీని. మీ మరిసిర్, మీ గాడ్చిక్, ప్రవక్తరు లెకెండ్ దేవుణు మాటెజ్ వర్గినార్లె. మీ దజ్డెజ్ దేవుణు బాణిజ్ వాని దర్బనమ్కు † సూణార్. మీ డొక్టార్బా దేవుణు బాణిజ్ వాని కలెజ్ సూణార్లె. 18 అయ ఆకార్ దినమ్కాజ్ నా ముస్సు నమకం ఇడేతి పణి మణిసిరిజ్బా విజేరిజ్, అయ్లి కొడొకాజ్, మొగ్గ కొడొకాజ్ నా ఆత్మ సీనా. వారు విజేరె దేవుణు మాటెజ్ వెహ్సెర్లె. 19 ఆగాసం ముస్సు విజేరె సూణి వజ నాను గొప్ప బమ్మాతి పణిజ్ తోరిస్తు. యా బూమి ముస్సు ఎయెర్బా తొఇ పణి నాను కిని. నల, సిను, కర్నిగోయి బూమి ముస్సు వానెలె. 20 వ్రబు మర్రజి వాని అయ గొప్ప బమ్మాని దినం వాని ముజాలె పాద్దు సీకటి ఆనాద్లె. నెల నల లెకెండ్ ఎరాజ్ ఆనాద్లె. 21 అయావలె ఎయెర్బా దేవుణు పేరు అసి వన్ని ముస్సు నమకం ఇట్టిజ పరిజ్ విజేరిజ్, దేవుణు, తీర్పుదాన్ గెల్పెస్సెన్లె.

22 పేతురు మరి వెహ్సాన్, “ఇస్రాయేలు లోకాండె, నెగ్రెండ వెండ్రు. నజరేతు వాండ్రు ఆతి యేసు అతికారం దేవుణు బాణిజ్ వాతిక ఇజి దేవుణు రుజుప్ కిత్తాన్. ఎలాగ ఇహిజ, యేసు వెట మీ లొఇ కిత్తి గొప్ప పణిజాజ్, ఎయెర్ కిదెజ్ అల్ఇ బమ్మాతి పణిజాణ్ రుజుప్ కిత్తాన్. యాక విజా మీరు నెసినిదెర్. 23 యా యేసుజ్, ఒరెన్ మణిసి మీ డగ్రు ఒపజెహ్సాన్. యా నజతి దేవుణు ముందాలె నెస్తాన్. యాక దేవుణు ముందాలె ఏర్పాటు కిత్తి నజతి. మీరు యేసుజ్ సెఇపరి దర్బుదాన్ అస్సిదెరి సిలువ ముస్సు డెయేజి సప్సిదెర్. 24 గాని దేవుణు యేసుజ్ సాపుదాన్ తప్పిసి బత్రిస్తాన్. నండొ మాలెజ్ ఆజి సాతాన్ గాని దేవుణు వన్నిజ్ సాపుదు డిసివ్తాన్. యేసుజ్ ఎలాకాలం తొహ్సి ఇడేదెజ్ సాపుదిజ్ అట్వండ ఆతాద్. 25 యేసు మాటెజ్ దావీదురాజా ముందాలె ఈహు వెహ్సాన్ నాను దేవుణుదిజ్ ఎల్లకాలం నా డగ్రు సుడేజి మహా. దేవుణు నా ఉణెర్ వడెక మనాన్. అందెజి నాను మన్నుదు మాలెజ్ ఆపె. 26 అందెజి నా మన్నుదు నాను గొప్ప సర్ద ఆజిన. నాను సర్ద ఆజి వర్గిజిన. నాను నా ఒడొకాల్ దేవుణుదిజ్ ఒపజెహ్సాన్. ఎందనిజ్ ఇహిజ ఒడొకాల్ సాతి వెనుక మరి బత్రిస ఇజి నాను నెసిని. 27 ఎందనిజ్ ఇహిజ నీను నా పాణమ్దిజ్ డిసివ్ఇ. నమ్మిదెజ్ తగ్గికాన్ ఆతి నీ సేవ కినివన్ని పీనుగు నబ్జి సాండ్రేజ్ సరి సిఇ. 28 నీను నజి ఎలాకాలం బత్రిసి సరి తోరిస్సి. నీను నా వెట మహిజ్ నాను గొప్ప సర్ద ఆజిన”.

29 “నా తంబెరిజాండె, నాను దయ్ రమ్దాన్ వెహ్సిన, మా అనిగొ ఆతి దావీదురాజా సాతండ్రె వన్నిజ్ ముస్తార్. వన్నిజ్ ముస్తి బాడ్డి ఎంబె మనాద్ ఇజి ఏలుబా మాటు నెసినాల్. 30 గాని దావీదురాజా దేవుణు ప్రవక్త. దేవుణు వన్ని పేరు అసి వాండ్రె దావీదురాజా వెట ఒట్టు పాక్టాన్. అక్క ఇనిక ఇహిజ, దావీదురాజా కుటుమ్దాన్ ఒరెన్ వన్నిజ్ దావీదురాజా లెకెండ్ రాజా కిని ఇజి. యాక దావీదురాజా నెస్స మహాన్. 31 దేవుణు యేసుక్రీస్తుజ్ సాతి పరి బాణిజ్ డిసివ్ఇ ఇజి, యేసుక్రీస్తు పీనుగు నబ్జి సాన్వద్ ఇజి దావీదురాజా ముందాలె నెస్తాన్. ముందాలె నెస్తాండ్రె, యేసు సాతి వెనుక మరి మర్రజి నిజ్నాన్లె ఇజి ముందాలె దావీదురాజా వెహ్సాన్. 32 యా యేసుజ్ దేవుణు మర్రజి బత్రిస్తాన్. దన్నిజ్ మాపు విజెపె సాసిర్. 33 అహిజ దేవుణు యేసుజ్ వన్ని ఉణెర్ వడెకాద్ బన్పిసి వన్నిజ్

† యూదురు పండాయ్ వేడెదు వెంబాలె ఉణెవెర్. పార్దంం వీజితి వెనుక తొమ్మిది గంట వెసుకానె ఉణెర్ †† దర్బనమ్కు. దేవుణుబాణిజ్ వాని మాటెజ్ని బొమ్మెజ్ కలారు సుడేతి లెకెండ్ తెలివి మహివలె సూణిక

ఇంక మిస్తి గవరం ఏలు సిత్తాన్. దేవుణు సీనా ఇజి ఒట్టు కిత్తి వన్ని ఆత్మ యేసుజ్ సిత్తాన్. ఏలు మీరు సుడేజినికెజ్ వెంజినికెజ్ యేసు మజి సీనా ఇజి వెహ్తి దేవుణు ఆత్మనె. 34³⁵ దావీదురాజు వెహ్తిక వన్ని వందిజె ఆవద్. దావీదురాజు పరలోకమ్దు సాన్వన్. గాని వాండ్రు ఈహు వెహ్తాన్, నాను నిజి వడేఇ వరిజ్ ని పాదమ్కాజ్ ముణుకుజ్ ఊరిజి మాడిన్సిన్సిదాక సీను నా ఉణెర్ వడకాదు బసి మన్ అ ఇజి దేవుణు నా ప్రబు వెట వెహ్తాన్.

36 పేతురు మరి వెహ్తాన్, “ఇస్రాయేలు కుటుమ్దికార్ ఆతి మాటు విజెటె యాక అనుమానం సిల్లెండ నెస్తజ్ వలె. మీరు సీలువాద్ నస్తే యేసుజ్ దేవుణు ప్రబువజ, క్రీస్తువజ ఏర్పాటు కిత్తాన్”. 37 యాక వెహ్తార లోకుర్ వరి మన్నుదు నండో బాద ఆజి పేతురుజ్ మరి అపాస్తురుజ్ వెన్బాతాన్, “దాదారండె, ఏలు మాపు ఇనిక కిడెజ్ అల్నాప్?”. 38 అయావలె పేతురు వెహ్తాన్, “మీ పాపమ్కు విజా ఒప్పుకొడేజి డిసిసీజి, దేవుణుదిజ్ లోజిజినావ్ ఇజి విజెరిజ్ తోరిస్తజ్ యేసు, క్రీస్తు ఇజి, వాండ్రు, మీ ప్రబు ఇజి తోరిస్తజ్ బాప్తినం లాగె ఆదు. అయావలె మీ పాపమ్కు నొరె ఆనె. దేవుణు సీనా ఇజి ఒట్టు కిత్తి దేవుణు ఆత్మ నిజి దోహ్కాద్లె.

39 దేవుణు సీనా ఇజి ఒట్టు కిత్తి యా దేవుణు ఆత్మ మిజి, మీ కొడోరిజ్, దూరమ్ది వరిజ్ విజెరిజ్ దేవుణు సీనాన్. వన్ని ముస్సు నమ్మిదెజ్ దేవుణు కూక్తి వరిజ్ విజెరిజ్ దేవుణు ఆత్మ సీనాన్”. 40 మరి నండో నండో మాటెజాణ్ పేతురు వరిజ్ గటిజ వెహ్తాన్. దేవుణుదిజ్ డిసి సాని యా సెఇ లోకాజ్ వాని తీర్పుదాన్ మీరు గెల్చి సాండ్రెజ్ ఇజి పేతురు వరిజ్ మరి మరి వెహ్తాన్. 41 పేతురు వెహ్తి మాటెజ్ నమ్మితికార్ బాప్తినం లాగె ఆతాన్. అయా రోజు రమరమి మూండ్రీ వేలు లోకుర్ యేసుజ్ నమ్మిత్తి వరివెట కూడితాన్.

నమ్మిత్తికార్ కూడేజి మంజినార్

42 వారు అపాస్తురు నెన్సిన్సి మాటెజ్ డిసిన్విండ మహార్. వారు యేసుజ్ నమ్మిత్తికార్ కూడేజి మంజిని బాన్ డిసిన్విండ కూడేజి వాతారె ప్రబు ఏర్పాటు కిత్తి బోజనం కిజి మహార్. డిసిన్విండ పార్దనం కిజి మహార్. 43 అపాస్తురు దేవుణు సత్తుదాన్ నండో బమ్మాని వణిజ్ బమ్మాని గుర్తుజ్ కిత్తారె. అయావలె విజెరె నండో బమ్మ ఆతారె. 44 యేసుజ్ నమ్మిత్తికార్ విజెరె ఉండ్రె మన్ను మంజి వరిజ్ కల్లితి మహిక విజా విజెరె వందిజ్ కర్చు కిత్తారె. 45 అక్కాదె ఏవిండ వారు వరి ఆస్తిజ్ పార్చి ఎయెజ్ ఎయెజ్ అవ్సరం మనాదో వరిజ్ సిత్తారె. 46 రోజు తవ్విండ వారు యెరూసలేమ్దు మన్ని దేవుణు గుడిది డేవాదు కూడేజి వాజి మహార్. వారు విజెరె ఇల్లదిజ్ తవ్విండ కూడేజి వాతారె సర్ద ఆజి బోజనం కిజి మహార్. ఎయెజబా అవ్సరం మన్ని వరిజ్ వారు సర్దదాన్ సీజి మహార్. 47 వారు దేవుణుదిజ్ స్తుతి కిజి మహార్. బాన్ మహికార్ విజెరె యా యేసుజ్ నమ్మిత్తి వరి వందిజ్ ‘వీరు ఎసానో నెగ్గికారె’ ఇజి వెహ్తాన్. రోజురోజు యేసుప్రబు ముస్సు నమకం ఇడేతి వరి లెక్క వాండ్రు నండో కిత్తాన్.

నడిదెజ్ అల్ ఇ సాట వన్నిజ్ పేతురు నెగండ కిత్తాన్.

3 ఒర్నెండు వేలె మూండ్రీ గంటెజ్ టయమ్దు, లోకుర్ దేవుణు గుడిదు పార్దనం కిని టయమ్దు పేతురు, యోహాను, రిఎర్ కూడేజి దేవుణు గుడిదు సాన్ని మహార్. 2 పుట్టి బాణిజ్ అసి నడిదెజ్ అల్ ఇ ఒరన్ సాట వాండ్రు అబ్బె దేవుణు గుడి లోఇ సాని సరివడకాద్ డబ్బు లోని మహాన్. దేవుణు గుడిదు డేవాదు సాని అయ సరి పేరు సుందరం ఇహార్. అయ సాట వన్నిజ్ వన్ని లోకుర్ రోజు పిండిజి తసి అయ వడకాద్ ఇడేజి మహార్. 3 పేతురు యోహాను దేవుణు గుడిదు సాని సరి డర్చు వాతిజ్ అయ సాట వాండ్రు డబ్బుజ్ లొస్తాన్. 4 లొస్తజ్, పేతురు వన్నిజ్ డిటం బేస్తాన్. యోహానుబా వన్నిజ్ డిటం బేస్తాన్. పేతురు వన్నివెట, “సీను మా దరోట్టె బేసెఅ” ఇహాన్. 5 అందెజె సాట వాండ్రు, వీరు ఇనికబా సీనార్ ఇజి ఒడిబిజి వరి దరోట్టె బేస్తాన్. 6 గాని పేతురు, “నిజి సీదెజ్ నా బాన్ డబ్బుజ్ సిల్లు. గాని నా బాన్ మనిక నాను నిజి సీనా. నజరేతుదికాన్ యేసుక్రీస్తు అతికారమ్దాన్ నీను నడిఅ”, ఇహాన్. 7 పేతురు అయ సాట వన్నిజ్ ఉణికిదు అస్తాండ్రె నిక్తాన్. వెటనె వన్ని పాదమ్కు కణక కాల్కు సత్తు ఆతె. 8 వాండ్రు లిట్నె నిజితండ్రె నడితాన్. పేతురు యోహాను వెట దేవుణు గుడి డేవాదు నడిజి సాహండ్రె డాట్టి దేవుణుదిజ్ స్తుతి కిత్తాన్. 9 వీండ్రు నడిసినిక, దేవుణుదిజ్ స్తుతి కినిక విజెరె సుడేతారె. 10 దేవుణు గుడిదు సాని సుందరం ఇని సరిడర్చు బసి డబ్బు లోని మహి అయ సాట వాండ్రు వీండ్రె ఇజి వారు గుర్తు అస్తారె. వన్నిజ్ జర్గితిక సుడేజి వారు విజెరె గొప్ప బమ్మ ఆతారె.

దేవుణు గుడిదు మన్ని లోకుర్ వెట పేతురు వర్గిజినాన్

11 పేతురు, యోహానుని అయ నెగండ ఆతికాన్ దేవుణు గుడిదు మన్ని సాలోమోను ఇని అరబుదు మహార్. ఆ నెగండ ఆతికాన్ పేతురుజ్ యోహానుజ్ గటిజ కిక్కాజ్ అసి మహాన్. అబ్బె మహికార్ జర్గితిక సుడేజి గొప్ప బమ్మ ఆతారె పేతురు యోహానుని నెగండ ఆతి సాట వాండ్రు మహిబాన్ ఉహ్సాని వాతారె. 12 లోకుర్ విజెరె కూడేజి వానిక సుడేతండ్రె పేతురు వరిజ్ వెన్బాతాన్, “ఇస్రాయేలు లోకాండె, ఇబ్బె జర్గితిక సుడేజి మీరు ఎందనిజ్ బమ్మ ఆజినిదెర్? మీరు ఎందనిజ్ మజి బేసినెదెర్? మా సాంత సత్తుదాన్, మా బక్తిదాన్ వీండ్రు నడిదెజ్ కిత్తాప్ ఇజి మీరు ఒడిబిజినిదెరా? 13 మా అనిగ్గోర్ ఆతి అబ్రాహం, ఇస్సాకు, యాకోబు పార్దనం కిత్తి దేవుణు, యా సాట వన్నిజ్ నెగండ కిజి వన్ని సేవ కినికాన్ ఆతి యేసుజ్ నండో మర్యాద సిత్తాన్. గాని మీరు యా యేసుజ్ సప్తెజ్ ఒవజెప్పెదెర్. పిలాతు యేసుజ్ డిసిసీదెజ్ ఒడిబిజిబా మీరు పాని ఇహిదెర్. 14 పాపం సిల్లి నీతినిజయిమన్ని వన్నిజ్ మీరు పాని ఇజి వెహ్తిదెర్. లోకాజ్ సప్తి ఒరన్ వన్నిజ్ మీరు డిసిసీదు ఇజి వెహ్తిదెర్. 15 విజా దన్నిజ్ బత్తు సత్తి వన్నిజ్ మీరు సప్తిదెర్. గాని దేవుణు వన్నిజ్ మరీజి నిక్తాన్. యా సజతి వందిజ్ మాపు విజెమె సాసీర్.

16 యేసు సత్తుదాన్ నె యా సాట వాండ్రు సత్తుఆతాన్. మీరు విజిదెరె ఏలు సుడేజినిక యేసు పేరుదు ఇడ్తి నమకమ్దానె వాతాద్. యేసు ముస్సు ఇడ్తి నమకమ్దానె వన్నిజ్ సత్తు వాతాద్”. 17 “ఏలు నా తంబెరిజాండె, మీరుని, మీ పెద్దెలుజ్, యేసుజ్ కిత్తిక మీరు ఇనిక కిజినిదెరో ఇజి నెన్విండ కిత్తిదెర్ ఇజి నాను

† యేసుప్రబు సాపు వందిజ్ గుర్తు కిడెజ్ మన్ని బోజనం

నెన్న. 18 దేవులు నండొ పంటెజ్ ముందాలై విజేరె ప్రవక్తర్ వెట 'వన్ని క్రీస్తు కస్టమ్కు ఓరిస్సాలె' ఇజి వెహ్తా మహాన్. దేవులు ముందాలై వెహ్తావజనె ఈహు జరితార్. 19-20 దేవులు మీ పాపమ్కు సెమిస్సి వందిజ్ మీరు మీ పాపమ్కు ఒప్పుకోడేజి డిసిసిజి దేవులు డగు మర్జి రదు. దేవులు మీ ఆత్మదిజ్ నెగ్గి పాణం సీని వందిజ్, దేవులు మీ వందిజ్ ఏర్పాటు కిత్తి క్రీస్తు ఆతి యేనుజ్ మీ డగు పాక్సి వందిజ్ దేవులు డగు మర్జి రదు. 21 దేవులు ముందాలై వాండ్లు పాక్తి ప్రవక్తర్ వెట వెహ్తావజ దేవులు విజా దన్నిజ్ కొత్తాక లెకెండ్ కినిదాక యేను వరలోకమ్దు మండ్రెజ్ వలె. 22 దేవులు - ప్రవక్తరు లోఇ ఒరెన్ మోని ఇనికాన్ ఈహు వెహ్తాన్: "ప్రబు ఆతి మీ దేవులు, నా లెకెండ్ ఒరెన్ ప్రవక్తజ్ మీ లోకుర్ లోఇహాన్ పుటిస్సాలె. వాండ్లు వెహ్తాక విజా మీరు నెగ్గెండ్ వెంజి లోజిదెజ్ వలె.

23 ఎయెర్బా ఆ ప్రవక్త వెహ్తాక వెంజి లోజింండ మహిజ వాండ్లు దేవులు లోకుర్ వెట మన్వండ వూర్తి పాడానా సానాన్.

24 సముయేలు ప్రవక్త, వన్ని వెనుక వాతి ప్రవక్తరు విజేరె యా దిన్మకాజ్ వందిజ్ దేవులు సిత్తి మాటెజ్ ముందాలై వెహ్తా మహాన్. 25 దేవులు ప్రవక్తర్ వెట కిత్తి ఒట్టు మీ వందిజె. దేవులు మీ అనిగోగోరు వెట కిత్తి ఒట్టు మీ వందిజె. మీ అనిగోగో ఆతి అబ్రాహాం వెట దేవులు కిత్తి ఒట్టు ఇనిక ఇహిజ, మీ తెగాది వన్ని బాణిజ్ యా లోకమ్దు మన్ని విజేరిజ్ నాను దీవిస్సు. 26 అందెజె దేవులు వన్ని సేవ కిని క్రీస్తుజ్ ఏర్పాటు కితాండ్రె ముందాల మీబానె పాక్తాన్. ఎందనిజ్ పాక్తాన్ ఇహిజ మీ సెఇ వణిజాణ్ మజి డిసిసి దేవులుబాన్ మర్జి తసి మిజి దీవిస్సెజ్ వన్నిజ్ పాక్తాన్", ఇజి పేతురు వెహ్తాన్.

పేతురుజ్ యోహానుజ్ అస్తార్

4 పేతురు యోహాను లోకుర్ వెట వర్జిజి మహిజ్ పుజేరిజు, సదుకెయరు, దేవులు గుడిఁదు మన్ని జమాన్జ అతికారి పేతురు యోహాను బాన్ వాతార్.

2 అపొస్తరు నెన్పిసినిక వెహారె వారు కోపం ఆతార్. ఎందనిజ్ ఇహిజ యేను సాజి మర్జి బత్తితాన్ ఇజి వెహ్తా సాతికార్ మరి బత్తినార్ ఇజి వారు రుజువ్ కితార్. 3 వారు పేతురుజ్ యోహానుజ్ తొహ్త ఒతారె మహ్న నాండిజ్ పెందాల దాక జెలిదు ఇట్టార్. ఎందనిజ్ ఇహిజ అయావలె పాదోయ్ ఆత మహాద్.

4 గాని వారు నెన్పిసినిక వెహికార్ నండొ లోకుర్ యేనుజ్ నమ్మితార్. యేనుజ్ నమ్మిత్తి వరి లెక్క ఏలు రమరమి అయ్దు వేలు ఆతాద్.

5 మహ్న నాండిజ్ యూద అతికారిజ్, యూద పెద్దెలుజు, యూదురి రూలు నెస్సిసినికార్ వీరు విజేరె యెరూసలేమ్దు కూడిత వాతార్. 6 విజేరె పుజేరిజు ముస్సు పెరి పుజేరి ఆతి అనయు, కయవయు, పెరి పుజేరి కుటుమ్దికార్ యోహాను, అలెక్సంతరు ఇనికార్, మరి సెగొండార్ మొగకొడోర్ బాన్ కూడిత వాతార్. 7 వారు పేతురుజ్ యోహానుజ్ వరి ముందాల నిల్వారె వెన్బాతార్, "మీరు ఎమేణి సత్తుదాన్, ఎయె పేరుదాన్ ఇక కిత్తిదెర్?"

8-9 అయావలె దేవులు ఆత్మ సత్తు పేతురు ముస్సు వాతాద్. అయ సత్తుదాన్ నె పేతురు వెహ్తాన్: "లోకాజ్ అతికారిజాండె, పెద్దెలుజాండె, యా సాట వన్నిజ్ కిత్తి నెగ్గి వణి వందిజ్ వాండ్లు ఎయె సత్తుదాన్ నెగెండ్ ఆతాన్ ఇజి మీరు మజి నేండ్లు కరాయి ఇజినిదెర్. 10 దిన్ని వందిజ్ మాపు వెహ్తాజ్ ఇహిజ, మీరు విజెదెర్, ఇస్రాయేలు లోకుర్ విజేరె యాక నెస్సెజ్ వలె. మీరు సిలువాదు డెయేజి సప్తి యేనుక్రీస్తుజ్ దేవులు మర్జి బత్తిస్తాన్. సాతి బత్తిత్తి నజరేతు వాండ్లు ఆతి యేనుక్రీస్తు సత్తుదాన్ వీండ్లు పూర్తి నెగెండ్ ఆజి మీ నడిఁమిదు మనాన్. 11 యా యేనుక్రీస్తు వందిజ్ ఈహు రాస్త మనాద్. అక్క ఇనిక ఇహిజ, ఇల్లు తొహ్ని మీరు నెక్తిపాక్తి వణుకునె మూలదిజ్ మూలవణుకు ఆతాద్.

12 యేనునె మిజి వాజిని సిక్కుదాన్ గెల్పెస్సెజ్ అట్టాన్. ఎందనిజ్ ఇహిజ యా లోకమ్దు లోకాజ్ వాని సిక్కుదాన్ వరిజ్ గెల్పెస్సెజ్ మరి ఎయెరి పేరుబా దేవులు సివితాన్. యేను పేరునె సిత్తాన్.

13 పేతురు యోహాను తియెల్ ఆవండ నెగ్గెండ్ వర్జిని మాటెజ్ వెంజి సన్హాద్రిం సజమ్దికార్ బమ్మ ఆతార్. 'వీరు ఇనికబా నెన్ఇకార్, పెరి సదువు సద్విఇకార్' ఇజి నెస్తారె బమ్మ ఆతార్. పేతురు యోహాను యేను వెట కూడేజి మహికార్ ఇజి వారు నెస్తార్. 14 గాని ఆ నెగెండ్ అతికాన్ పేతురు యోహాను వెట నిల్పి మహిజ్ ఇనికబా మర్జి వెహ్తాజ్ సన్హాద్రిం సజమ్దికార్ అట్వెతార్. 15 అందెజె వారు పేతురుజ్ యోహానుజ్ నెగెండ్ ఆతి వన్నిజ్ సజమ్ లోఇహాన్ వెల్లి పాక్తారె వరి లోఇ వారె వర్జితార్. 16 "వరిజ్ ఇనిక కిదెజ్? వీరు కిత్తి బమ్మాని వణి వందిజ్ యెరూసలేమ్దికార్ విజేరె నెసినార్. అక్క జర్గివెతాద్ ఇజి మాటు వెహ్తాజ్ అట్వెట్. 17 యేను పేరు అసి ఎయెన్ వెటబా ఎసెజ్బా ఇనికబా వెహ్తాజ్ ఇజి మాటు వరిజ్ గటిజ వెహ్తాజ్. యా సజతి మహికారబా నెన్వండ మండ్రెజ్" ఇహాన్.

18 అయావలె వారు పేతురుజ్ యోహానుజ్ లోఇ కూక్తారె, "ఎసెజ్బా యేను పేరు అసి వెహ్తాజ్. యేను పేరు అసి బోదిస్మాట్", ఇజి ఆడ్ర సితార్. 19 గాని పేతురు యోహాను ఈహు వెహ్తార్, "ఏలు మీరె వెహ్తు, దేవులుదిజ్ లోబడేదెజా మిజి లోజిదెజా? దేవులు సుడేతిజ ఎమేణిక సరియాతిక? 20 మాపు ఇహిజ, మాపు సుడేతి దన్ని - వందిజ్ మాపు వెహి దన్ని వందిజ్ వెహ్ - ఏండ మండ్రెజ్ అట్వెట్".

21 పేతురుజ్ని యోహానుజ్ ఎలాగ సిక్కు సీదెజ్ ఇజి వారు నెన్వెతార్. ఎందనిజ్ ఇహిజ దేవులు కిత్తి గొప్ప వణి వందిజ్ లోకుర్ విజేరె దేవులుదిజ్ స్తుతి కిజి మహాన్. అందెజె సజమ్దికార్ పేతురుజ్ యోహానుజ్ 'యేను పేరు అసి వెహ్తాజ్ ఆవద్' ఇజి గటిజ మరి బెద్రిసి వెహ్తారె డిస్తార్. 22 దేవులు వన్ని సత్తుదాన్ బమ్మాతి వణి కిజి నెగెండ్ కిత్తి యా సాట వన్నిజ్ వయేను నలవయే వంటెజ్ ఎక్కునె మహాద్.

సమ్మిత్తి వరి పార్దనం

23 పేతురు యోహాను డిఁబె ఆతి వెటనె సమ్మిత్తి వరి డగు సాహార్. సాహారె పెరి పుజేరిజు, పెద్దెలుజు వరి వెట వెహ్తాక విజా వెహ్తార్. 24 పేతురు యోహాను వెహ్తాక వెహారె వారు విజేరె కూడితారె ఉండ్రె మన్సుదాన్ దేవులుదిజ్ ఈహు పార్దనం కితార్, "విజా దన్నిజ్ ప్రబు ఆతి దేవులు, నీనె ఆగాసం, బూమి, సమ్దరం, వనక లోఇ మన్ని విజా దన్నిజ్ పుటిస్సి. 25 దేవులు, నీ సేవ కినికాన్ ఆతి మా అనిగోగో దావీదురాజా వెహ్తాక నీ ఆత్మ సత్తుదాన్ నీనె వెహ్పెస్సి. అక్క ఇనిక ఇహిజ, యా యూదురు ఇకాకార్ ఎందనిజ్ కోపం ఆజినార్. యా లోకుర్ ఎందనిజ్ ఇని దన్నిజ్ వణిదిజ్ రెవకెజ్ ఒడిఁబిజినార్? 26 బూ లోకమ్ది రాజార్, అతికారి లోకుర్, ప్రబు ఆతి దేవులు వెట, దేవులు ఏర్పాటు కిత్తి క్రీస్తు వెట ఎద్రిస్సెజ్ కూడేజి వాజినార్.

27 ఆహె హిరోదు, పాంతి పిలాతు, యూదురు, యూదురు ఆఇ లోకుర్ వెట యా పట్నమ్దు కూడిత మహాన్. వారు నీను ఏర్పాటు కిత్తి పాపం సిల్లి నీ సేవ కినికాన్ ఆతి యేనుజ్ సెస్సెజ్ ఒడిఁబిజి మహాన్. 28 దేవులు, నీ సత్తుదాన్, నీ ఇస్టమ్దాన్ ఇనిక జర్గినాద్లె ఇజి ముందాలై నీను ఏర్పాటు కిత్తిదో అయాలెకెండ్

వారు కిత్తార్. 29 ఏలు ప్రబువా, వారు మజి బద్రిసిని దన్నిజ్ సుడెఱ. మీ సేవ కినికార్ ఆతి మాపు నండొ దయరమ్దాన్ నీ మాటెజ్ బోదిస్తెజ్ మజి సత్తు సిదా. 30 కష్టమ్కు మన్ని వరిజ్ నెగెండొ కిజి మీ సత్తు తోరిన్ఱ. మీ బాణిజ్ వాతి నమ్మిదెజ్ తగ్గికాన్ ఆతి మీ సేవ కినికాన్ ఆతి యేసు పేరుదాన్ గొప్ప బమ్మాతి వణిజ్ బమ్మాతి గుర్తుజ్ కిఱ”.

31 వారు పార్దనం కిత్తి వెనుక వారు కూడెఱిజి మహి బాడ్డి కద్దితాద్. అయావలె దేవుణు ఆత్మ సత్తు వరి ముస్సు వాతాద్. వారు దయరమ్దాన్ దేవుణు మాటెజ్ వెహోర్.

నమ్మితికార్ వరి ఆస్తి అపాస్తురుబాన్ తతార్

32 నమ్మితికార్ విజేరె ఉండ్రె మన్ను ఆజి ఎయెన్బా సరినె వన్నిజ్ మన్నిదన్ని - బాణిజ్ ఇనికబా నాదినె ఇజి ఆవద్ ఇజి వరిజ్ మన్నిక విజెరె వందిజ్ కర్పు కిత్తార్. 33 దేవుణు సత్తుదాన్ బమ్మాతి వణిజ్ కిజి అపాస్తురు ప్రబు ఆతి యేసు, సాతివరి - బాణిజ్ మరీజి బత్తితాన్ ఇజి సాసి వెస్సి మహోర్. దేవుణు దయాదర్మం వరి ముస్సు నండొ మహోర్. 34-35 బూమిజ్ ఇల్లు కల్లితి మహికార్ విజేరె అక్కెజ్ పార్సి కల్లితి డబ్బు అపాస్తురు డగ్గు తతార్. విజేరిజ్ వరివరి అవ్సరం సుడెఱిజి సీబాజి సితార్. అందెజె వరి లొఇ ఎయెన్బా సరి అవ్సరం వాతిజ తక్కు సిల్లెండ ఆతాద్.

36 కుప్త దేసమ్దు పుట్టి లేవి కుటుమ్దికాన్ ఆతి యాసేపు ఇని ఒరెన్ మహోర్. వన్నిజ్ అపాస్తురు బర్బు ఇజి కూక్కి మహోర్. (వన్ని పేరు అర్దం ఇనిక ఇహిజ సాయం కినికాన్ ఇజి) 37 వాండ్రు వన్నిజ్ మహి బూమి ఉండ్రె పార్సి అయ డబ్బు అపాస్తురు డగ్గు తతాన్.

అననియ, సపీర

5 అయావలె అననియ ఇని ఒరెన్ మహోర్. వన్ని ఆల్సి పేరు సపీర. వారుబా ఉండ్రె బూమి పార్తార్.

2 పార్తారె మాసి సెగం ఇట్టాండ్రె మిగ్గితి డబ్బు అపాస్తురు డగ్గు ఒతాన్. యాక విజా ఆల్సిబా నెస్తాద్. 3 అయావలె పేతురు అననియెజ్, “నీ బూమి పార్తి డబ్బుజాణి సెగం డాఱ్ఱి దేవుణు ఆత్మదిజ్ ఎందనిజ్ మొసెం కిత్తి? నన్ని మొసెం వణి కిదెజ్ నీను ఎందనిజ్ నీ మన్నుదిజ్ సయ్యానుజ్ ఒవజెస్తి? 4 బూమి నీ బాన్ మహివలె నీదినెగదె. అక్క పార్తివలెబా ఆ డబ్బు నీ సాంతన గదె. నిన్ని వణి కిదెజ్ ఎందనిజ్ నీ మన్నుదు ఒడిఱిత్తి? నీను లోకు వెట ఆవద్, దేవుణు వెటనె అబద్దం వర్గితి”, ఇజి వెహోన్.

5 అననియ యా మాటెజ్ వెహివెటనె అర్తాండ్రె పాణం డిఱిస్తాన్. యాక వెహికార్ విజేరె తియెల్ ఆతార్. 6 దజ్డాయెర్ వాతారె పీనుగుదిజ్ పాతెజ్ సుటిస్తారె, పిండిజి ఒతారె ముస్తారె.

7 రమరవి మూండ్రె గంటెజ్ వెన్కా వన్ని ఆల్సి జగ్గితిక నెన్ఱండ లొఇ వాతాద్. 8 పేతురు దన్ని వెట, “మీరు యా బూమి నిస్సా డబ్బుదిజె పార్తిదెరా, వెహోఅ”, ఇహోన్. వెన్బాతిజ్ అది, “నిస్సాదిజె పార్తావ్”, ఇహోద్. 9 పేతురు దన్ని వెట, “మీరు రిఇదెరె కూడెఱిజి దేవుణు ఆత్మదిజ్ తప్పు వెహిదెరె. దేవుణు ఆత్మదిజ్ తప్పు వెహి మొసెం కిదెజ్ మీరు ఎందనిజ్ ఒడిఱిత్తిదెరె? ఇదిలో నీ మాసిజ్ ముస్తికార్ ఇప్పె మనార్. వారు నిజిబా పిండిజి ఒనార్”, ఇహోన్.

10 వెటనె అది పేతురు పాదం డగ్గు అర్తాదె పాణం డిఱిస్తాద్. అయ దజ్డాయెర్ లొఇ వాతారె అది సాతాద్ ఇజి సుడెఱిజి దన్నిజ్ పిండిత ఒతార్. ఒతారె మాసి డగ్గు ముస్తారె. 11 దేవుణు సజమ్దు మహికార్ విజేరె, యా మాటెజ్ వెహికార్ విజేరె గొప్ప తియెల్ ఆతార్.

అపాస్తురు నండొ లోకాజ్ నెగెండొ కిత్తార్

12 అపాస్తురు లోకుర్ నడిఱి నండొ బమ్మాతి వణిజ్ బమ్మాతి గుర్తుజ్ కిత్తార్. నమ్మితికార్ విజేరె ఉండ్రె మన్ను ఆజి దేవుణు గుడిఱిదు మన్ని సాలోమోసు అరుబు ఇని బాడ్డిదు కూడెఱిజి వాజి మహోర్. 13 ‘యా నమ్మితికార్ ఎస్సానొ నెగ్గికార్’ ఇజి లోకుర్ వెహోర్. అహిజ్బా మరి ఎయెర్బా నమ్మితికార్ వెట కూడెఱిజె తియెల్ ఆతార్. 14 గాని నండొ లోకుర్, మొగ్గకొడోర్, అయ్లికొడోర్ యేసుజ్ నమ్మితికారె నమ్మిత్తి వరివెట కూడిఱిజె. 15 అందెజె అపాస్తురు కిత్తి గొప్ప వణిజ్ సుడెఱిజె కష్టం మన్ని వరిజ్ సావ ముస్సు మన్నమ్ ముస్సు పేతురు నడిఱిజి వాని సరివడెకాదు తతార్. ఎందనిజ్ ఇహిజ పేతురు అయ సరి వానివలె వన్ని సీడెబా తాక్తిజె నెగెండొ ఆనార్ ఇజి. 16 యెరూసలేమ్దు సురుల మన్ని నాహ్కణిజ్బా నండొ లోకుర్ బాన్ వాతార్. వరి లొఇ కష్టమ్కు ఆతివరిజ్, దెయమ్ కాణిజ్ మాలెజ్ ఆతివరిజ్ అబె తసి మహోర్. విజేరె నెగెండొ ఆతార్.

యూదురి అతికారిబు అపాస్తురిజ్ మాలెజ్ కిత్తార్

17 నస్తివలె విజేరె పుజేరిజ ముస్సు పెరి పుజేరి, వన్ని వెట కూడిఱి మహికార్ విజేరె, ఇహిజ, సదుకెయరు ఇని పార్తి లొఇ సెగొండార్ అపాస్తురు వెట గొప్ప గోస ఆతార్. 18 వారు అపాస్తురుజ్ అస్తారె పట్టుమ్దు మన్ని జెలిదు ఇట్టార్. 19 గాని దేవుణు దూత పాదోయ్ వాతండ్రె జెలిది సేహ్లాజ్ రేతాండ్రె వరిజ్ వెల్లి తతాన్. 20 వెల్లి తతాండ్రె దూత, “మీరు దేవుణు గుడిఱి డేవాదు సాస్సి లోకాజ్ విజెరిజ్ యా కొత్త బత్తువందిజ్ పూర్తి వెహు” ఇహోన్.

21 వారు జాయ్ ఆని డగ్గు దేవుణు గుడిఱి డేవాదు సాహార దూత వెహి వజ లోకాజ్ బోదిస్తెజ్ మొదోల్స్తాన్. వెనుక, విజేరె పుజేరిజ ముస్సు పెరి పుజేరి, వన్నివెట మహికార్ వాతారె సన్హద్రి సజమ్దు మహి యూదవెద్దెలుజ విజేరిజ్ కూక్కి మీటిజ్ కిత్తార్. మీటిజ్దు కూడిఱిజె జెలిదు మన్ని అపాస్తురుజ్ వరిబాన్ తత్తెజ్ జమాన్జె పాక్తార్. 22-23 గాని వారు జెలిదు సాస్సి సుడెఱిజ్ పేతురుని యాహోసు లొఇ సిల్లెర్. వారు మహ్త వాతారె వెహోర్, “మాపు సాస్సి సుడెఱిజ్ జేలిదు సేహ్లాజ్ తాలం అర్పె మహి, కాప్ కినికార్ సేహ్లాజ ముందాలనె నిహ మహోర్. గాని మాహి సాస్సి సేహ్లాజ్ రేనివలె లొఇ వారు సిల్లెర్”. 24 వీరు వెహిజె వహారె పెరి పుజేరిబు, దేవుణు గుడిఱి జమాన్జె అతికారి గొప్ప బమ్మ ఆతారె, ‘ఇక ఇనిక ఆనాద్లెనొ’ ఇజి ఒడిఱిజె.

25 అయావలె ఒరెన్ వాతండ్రి, “ఇదిలో మీరు జెలిదు ఇడ్డిమహి లోకుర్ ఏలు దేవుణు గుడిఁదు నిహార లోకాజ్ బోదిసినార్”, ఇజి వెహ్లాన్. 26 వెహ్లాజ్, అతికారి జమానుజ వెట సాహండ్రి అపాస్తురుజ్ కూక్త తతార్. ‘లోకు మజి వణుకుజాణిజ్ డెయ్నారలెను’ ఇజి తియెల్ ఆతార అపాస్తురుజ్ ఒపిసి కూక్త తతార్.

27 వరిజ్ కూక్త తతార నన్హద్రిం నజం నడిఁమి నిల్వార. నిల్వారె విజెరె పుజెరిజ ముస్సు, పెరి పుజెరి వరివెట వెన్బాతాన్. 28 “యా యేసు పేరు అసి బోదిస్మాట్” ఇజి మాపు మిజి డటం బెద్రిసి వెహ్లాజ్ గదె. గాని మీరు యెరూసలేమ్దు విజా మీ బోద సాట్టిదెర్. సాతి వన్ని వందిజ్ మాప్ వన్నిజ్ సహ్లాప్ ఇజి మీరు మా ముస్సు, తప్పు ఇడ్డెదెజ్ నుడెజినిదెర్”, ఇహాన్. 29 దన్నిజ్ పేతురు మరి అపాస్తురు, “లోకాజ్ ఆవద్, దేవుణుదిజె మాపు లోజిదెజ్ గదె? 30 మీరు యేసుజ్ సిలువాదు డెయ్జి సహ్లాదెర్. గాని మా అనిగొగారి వలెహాన్ అసి మన్ని దేవుణు, వన్నిజ్ సాతి వరి బాణిజ్ నిక్తాన్. 31 యా యేసుజ్ రాజు మరిసి వజ, విజెరిజ్ రక్కిసిని వన్ని వజ దేవుణు గొప్పు మర్యాద సితండ్రి వన్ని ఉణెర్ వడఁకాదు బన్పిస్తాన్. ఎందనిజ్ ఇహిజ ఇస్రాయేలు లోకుర్ వరి పావమ్కు డిసి దేవుణుదిజ్ లోజిదెజ్. వరి పావమ్కు నొరె ఆదెజ్ సరి సీదెజ్ ఇజి దేవుణు వన్ని ఉణెర్ వడఁకాదు యేసుజ్ బన్పిస్తాన్. 32 యా సజతిజ వందిజ్ మాపు సాసిర్. దేవుణుదిజ్ లోజిని వరిజ్ దేవుణు సీని వన్ని ఆత్మబా యా సజతిజ వందిజ్ సాసి”, ఇజి వెహ్లాన్.

33 అపాస్తురు వెహ్లాక వెంజి విజెరె పుజెరిజ ముస్సు, పెరి పుజెరి, వన్నివెట మహికార్ కోవం ఆతార ‘వరిజ్ సహ్లాప్’ ఇజి ఒడిబితార్. 34 అయావలె సజమ్దు మహి పరిసయరు లోఇ ఒరెన్ గమాలియేలు ఇనికాన్ నన్హద్రిం సజమ్దు నిహండ్రి వెహ్లాన్, “వీరు సణెం సజమ్దాన్ వెల్లినె మనీర్”. గమాలియేలు ఎయెన్ ఇహిజ యూదురి రూలుజ్ నెస్పిసిని వరిలోఇ ఒరెన్. లోకుర్ విజెరె వన్నిజ్ మర్యాద సీజి మహాన్. 35 అపాస్తురుజ్ వెల్లి పాక్తారె గమాలియేలు సజమ్ది లోకాజ్ ఈహు వెహ్లాన్, “ఇస్రాయేలు లోకాండ్రి, యా లోకాజ్ మీరు ఇనిక కిదెజ్ ఇజి ఒడిబిజినిదెర్ జాగర్త మండ్రు. 36 సెగం పంటెజ్ ముందాల దూద ఇనికాన్ ఒరెన్ నిజిత్తండ్రి నాను గొప్పువాండ్రు ఇజి వెహ్లాన్. రమరమి నాల్లి వందెజ్ లోకుర్ వన్నివెట కూడితార్. ఎయెరో వన్నిజ్ సహ్లా. వన్నివెట కూడితి మహికార్ విజెరె సెద్రితారె వరి వణి ఇని దన్నిజ్ రెవండాతా సాహాద్. 37 వెనుక, లోకుర్ లెక్క సుడఁసి జనాబా దిన్మకాజ్ గలీలయ వాండ్రు ఆతి యూద ఇనికాన్ ఒరెన్ నిజిత్తాన్. మంద లోకుర్ వన్నివెట కూడితారె వారు ఏలుబడి కినివరి ముస్సు, ఎద్రిస్తారె. వన్నిజ్బా ఎయెరో సహ్లా. వన్నివెట కూడితి మహికార్ విజెరె సెద్రిత సాహా. 38 అందెజె, నాను ఇనిక వెహ్లాన్ ఇహిజ, విరిజ్ ఇనికబా కిమాట్. విరిజ్ డిసిసిఅ. ఎందనిజ్ ఇహిజ విరి ఆలోసనమ్కు, విరి వణిజు లోకువలెహాన్ వాతిక ఇహిజ అది ఇనిదన్ని వణిదిజ్ రెవండాన్ సానాద్. 39 గాని ఇక్క దేవుణు బాణిజ్ వాతిక ఇహిజ విరిజ్ అడ్డు కిదెజ్ మీరు అట్ఇదెర్. అక్కాదె ఆవండ్ మీరు దేవుణు వెట టంటెజ్ అతికార్ ఇజి మిజి తెలినాద్”. 40 సజమ్దికార్ గమాలియేలు వెహ్లా మాటదిజ్ ఒప్పుకోటార్. వారు అపాస్తురుజ్ కూక్కిసిని వరిజ్ కొరడెదాన్ డెయ్బిసి యేసు పేరు అసి ఎసెజ్బా బోదిస్మాట్ ఇజి డటం వెహ్లా వరిజ్ డిస్తారె.

41 యేసు పేరు వందిజ్ మాలెజ్ ఒరిస్సెజ్ తగితికార్ ఆతి వందిజ్ అపాస్తురు డెయ్తి దెబ్బ తిహిజ్బా సర్ద అజి అబెణిజ్ సాహా. 42 రోజు అపాస్తురు దేవుణు గుడిఁ డేవాదు, లోకురి ఇల్కాజ్ బోదిసి మహా. యేసు దేవుణు పాక్తి క్రీస్తునె ఇజి నెగ్గమాట వారు తప్వండ్ బోదిసి మహా.

అపాస్తురు ఏడుగురు మొగ వరిజ్ ఏర్పాటు కితార్

6 యేసుపుబుజ్ నమ్మితికార్ ఆ కాలమ్దు నండొ లోకుర్ అజి వాతార్. అయావలె ముండ మణిసిరిజ్ బోజనం సీని దన్నిలోఇ, మా ముండ మణిసిరిజ్ బోజనం సివర్ ఇజి గ్రీకు బాస వర్గిని యూదురు ఏవ్రి బాస వర్గిని యూదురు ముస్సు, మెరో ఆతార్. 2 అయావలె వన్నెండు మణిసిరి అపాస్తురు నమ్మితి వరిజ్ విజెరిజ్ కూక్తరె వెహ్లాన్, “మాపు బోజనం సీబాజి సీని వందిజ్ దేవుణు మాట నెస్పిస్సెజ్ డిసి సీనిక తగివద్. 3 తంబెరిజాండ్రి, అందెజె ఏడుగురు మొగ వరిజ్ ఏర్పాటు కిదు. మీ లోఇ దేవుణు ఆత్మ నిండ్రితి మన్ని, గెణం నిండ్రితి మన్ని విజెరె ఒప్పుకోటి మని ఏడుగురు మొగ్గ వరిజ్ ఏర్పాటు కిదు, మాపు వరిజ్ యా వణి ఒవజెప్పాన్. 4 అహిజ మాపు పార్దనం కిదెజ్, దేవుణు - మాట నెస్పిస్సెజ్ కేట మంజినాప్”, ఇహాన్.

5-6 అపాస్తురి మాటెజ్ అబ్బె కూడితి మహి లోకాజ్ విజెరిజ్ ఇస్టం ఆతాద్. అందెజె దేవుణు ముస్సు, పూర్తి నమకం ఇడ్డెజి దేవుణు ఆత్మ సత్తు పూర్తి నిండ్రితి మహి సైపాను, పిలిపు, ప్రాకొరు, నికనొరు, తిమెసు, వర్మనసు, యూద మతమ్దు కూడితి అంతియెకియ దేసెమ్దికాన్ నికొలాసు ఇని ఏడుగురు మొగవరిజ్, నమ్మితికార్ అపాస్తురి ముందాల తతార్. అపాస్తురు పార్దనం కితారె వరి ముస్సు, కిక్కు ఇడ్డెజి వరిజ్ అయా వణి కిదెజ్ అతికారం సితార్. 7 అందెజె మరి నండొ లోకుర్ దేవుణు మాటెజ్ నమ్మితార్. యెరూసలేమ్దు మన్ని నమ్మితి వరి లెక్క నండొ అజి వాతాద్. నండొండారె పుజెరిజు యేసుపుబు ముస్సు నమకం ఇట్టార్.

లోకుర్ సైపానుజ్ అస్తారె

8 వరి లోఇ ఒరెన్, సైపాను ఇనికాన్, దేవుణు దయదర్మమ్దాన్ దేవుణు ఆత్మ సత్తుదాన్ నిండ్రితాండ్రి లోకుర్ నడిమి గొప్పు బమ్మాని వణిజ్ బమ్మాని గుర్తుజ్ కిజి మహాన్. 9 గాని, కురెనియ పట్టుమ్దికార్ యూదురు, అలెక్సంత్రియ పట్టుమ్దికార్ యూదురు, (వీరు లిబెర్రి ఇని యూదురు మీటిజ్ ఇండ్రెణి గుంపుదికార్) మరి కిలికియ దేసెమ్దాన్ వాతి యూదురు, అసియ దేసెమ్దాన్ వాతి యూదురు వాతారె సైపాను వెట తర్కిస్తారె. 10 గాని వాండ్రు వెహ్లా మాటెజె ఎద్రిస్సెజ్ వారు అట్వండాతారె. ఎందనిజ్ ఇహిజ దేవుణు బాణిజ్ వాతి గెణమ్దాన్, దేవుణు ఆత్మ సత్తుదాన్ సైపాను వరివెట వర్గితాన్.

11 అయావలె వారు, ‘వీండ్రు మోసె ముస్సు, దేవుణు ముస్సు, దూసిసిని మాటెజ్ వర్గినిక మాప్ వెహాప్’ ఇజి వెహ్లాజ్ సెగొండారె లోకాజ్ ఎయెర్ నెస్వండ్ సుత్రిస్తారె కూడుజెస్తారె. 12 కూడుజెస్తారె, లోకాజ్, పెద్దెల్జ, యూదురి రూలు నెస్పిసినికార్ విజెరిజ్ రేహ్లా వన్ని ముస్సు, వాతారె. వాతారె సైపానుజ్ అస్తారె యూద పెద్దెల్జ నన్హద్రిం ఇని పెరి సజమ్దు తతార్. బానె అబద్దం సాసి వెహ్లా వరిజ్ నిల్వారె. 13 వారు ఈహు వెహ్లా, “వీండ్రు ఎస్తివలెబా దేవుణుదిజ్ కేట కిత్తి యా దేవుణు గుడిఁదిజ్, మోసె సిత్తి రూలుజె వెత్తెకం వర్గిజినాన్. 14 యా సజరేట వాండ్రు ఆతి యేసు యా దేవుణు గుడిఁ పాడు కినాన్, మాటు ఎలాగ నడిదెజ్ ఇజి మోసె మా అనిగొగొరిజ్ సిత్తి మాటెజ్ మారిస్నాన్ ఇజి వీండ్రు వెహ్లా మాపు వెహాప్”. 15 నన్హద్రిం సజమ్దికార్ సైపాను మొకొం డిటం నుడెజి మహిజ్ వన్ని మొకొం దేవుణు దూత మొకొం లెకెండ్ జాయ్ తోర్కిక వారు నుడెజెతారె.

స్త్రీపాను సన్హాద్రిం సజమ్దు మన్ని వరివెట వర్గజినాన్

7 అయావలె విజేరె పుజేరిజ ముస్సు పెరి పుజేరి స్త్రీపానుజ్ వెన్బాతాన్, "యా మాటెజ్ నిజమా? పీరు వెప్తి లెకెండ్ నీను వెప్తిదా సిల్లెదా?". 2 దన్నిజ్ స్త్రీపాను వెప్తిక ఇనిక ఇహిజ, "తంబెరిజాండె, బుబ్బరాండె, వెండ్రు, మా అనిగొగొ ఆతి అబ్రాహం ఆరోను ఇని పట్టుమ్దు బత్తిఎండ ముందాల, మెసాపాతెమియ ఇని దేసమ్దు బత్తిజి మహాన్. అయావలె నండొ జాయ్ మన్ని దేవుణు వన్నిజ్ తోరె ఆతాన్. 3 దేవుణు అబ్రాహం వెట ఈహు వెప్తాన్, 'నీను నీ దేసిం డిసి, నీ సాంత లోకాజ్ డిసి నాను నిజి తోరిసిని దేసిం సాన్'.

4 అయావలె వాండ్రు కల్లియుజ్ బత్తిజి మహి మెసాపాతెమియ దేసిం డిసి ఆరోను పట్టుమ్దు సాస్సి బత్తితాన్. వన్ని బుబ్బ సాతి వెనుక అబెణిజ్ మీరు ఏలు బత్తిజిని యా దేసమ్దు బత్తిదెజ్ దేవుణు వన్నిజ్ కూక్త తతాన్. 5 అయావలె దేవుణు వన్నిజ్ ఉండ్రీ ముక బూమిబా అక్కు సిపితాన్, యా దేసమ్దు. గాని అయావలె అబ్రాహముజ్ కొడొఃర్ సిల్లితిజ్బా దేవుణు వన్ని వెట ఉండ్రీ మాట సిత్తాన్. అక్కు ఇనిక ఇహిజ, 'నిజి, నీ పాటెజాణి వరిజ్ విజెరిజ్ యా బూమి ఆనాద్'. 6 దేవుణు వన్ని వెట, 'నీ పాటెజాణికార్ ఆఇ దేసమ్దు సానార బానె ఆఇకార్ లెకెండ్ మనార్. అయ దేసమ్దికార్ నీ లోకాజ్ నాల్లి వందెజ్ పంటెజ్ వెట్టివణి కిజిని వరిలెకెండ్ వణి కిజిని వరిజ్ లోజిజి మంజిని వజ ఇడెజి మాలెజ్ కినార్'. 7 గాని వారు ఎమేణి దేసమ్దు వణి కిజినారొ అయ దేసమ్ది వరిజ్ నాను తీర్పు తీరిసి సిస సీనాలె. వెనుక వారు ఆ దేసిం డిసి వాజి యా బాడ్డిదు మంజి నజి పాగ్డిజి మాడిఃన్నార్లె ఇజి వెప్తా మహాన్. 8 దేవుణు అబ్రాహం వెట 'విజెరి కుటుమ్కాజ్ పుట్టి మొగ్గ కొడొఃరిజ్ సునతి కిదెజ్ వలె', ఇజి వెప్తాన్. అందెజ్ అబ్రాహం, వన్ని మరిసి ఇస్సాకు పుట్టి ఏడు రోస్సు వెనుక మహ్న నాండిజ్, ఇహిజ, ఎనిమిది రోస్కాజ్ సునతి కిత్తాన్. ఇస్సాకు, వన్ని మరిసి యాకోబుజ్ సునతి కిత్తాన్. యాకోబు వన్ని పన్నెండు మంది మరిసిరిజ్ సునతి కిత్తాన్. యా పనెండు మందినె ఇస్సాయేలుది పనెండు కుటుమ్ది అనిగొగొర్ ఆతార్.

9-10 యా పన్నెండు మంది అనిగొగొర్ వరి లోఇ తంబెరి ఆతి యోసేపు ముస్సు గోన ఆతారె వన్నిజ్ గొత్తి వణి కిదెజ్ పార్తారె. ఆహి యోసేపు అయ్గుప్తు దేసమ్దు గొత్తి వణి కిత్తాన్. గాని దేవుణు వన్ని వెట మహండ్రె వన్నిజ్ వాతి విజా మాలెజాణిజ్ తస్తిస్తాన్. దేవుణు వన్నిజ్ గెణం సిత్తిజ్ అయ్గుప్తు రాజా ఆతి పరో యోసేపు ముస్సు దయ తోరిస్తాన్. పరో రాజా యోసేపుజ్ అయ్గుప్తు దేసమ్దిజ్ నడిపిసిని వన్నిలెకెండ్ నిల్స్తాన్. పరో రాజాజ్ కల్లితి మహి విజా వనకాజ్ ముస్సు నడిపిసిని వన్నిలెకెండ్ కిత్తాన్.

11 అయావలె అయ్గుప్తు దేసమ్దు విజా, మా అనిగొగొర్ బత్తిజి మహి కనాను దేసమ్దు విజా పెరి కరు వాతాద్. కరు వాతిజ్ నండొ మాలెజ్ వాతె. మా అనిగొగొర్ ఆతి వరిజ్ తిండి దొస్కొవండ ఆతాద్. 12 అయావలె, అయ్గుప్తు దేసమ్దు తిండి మనాద్ ఇజి యాకోబు వెహాన్. వెహండ్రె వన్ని మరిసిరిజ్, ఇహిజ, మా అనిగొగొర్జె ముందాలె ఉండ్రీ సుటు బాన్ ఫాక్తాన్. 13 వారు మరి ఉండ్రీ సుటు సాహిజ్, యోసేపు, వన్ని దాదారిజ్ వాండ్రు ఎయెన్ ఇజి నెల్ల కిబె ఆతాన్. అయావలె యోసేపు కుటుమ్ది వరి వందిజ్ పరో రాజా నెస్తాన్. 14 వెనుక యోసేపు వన్ని బుబ్బ ఆతి యాకోబుజ్ వన్ని సాంత లోకాజ్ విజెరిజ్ అయ్గుప్తు దేసమ్దు రదు ఇజి కల్లు ఫాక్తాన్. వారు మొత్తం డబయ్ అయ్దుగురు మహాన్. 15 అయావలె యాకోబు, వన్నివెట మహికార్ విజేరె అయ్గుప్తు దేసిం సాహాన్. వారు అబ్బె బత్తితారె. వెనుక యాకోబు, మహి అనిగొగొరు బానె సాతార్. 16 వెనుక వరి డుముక్ సెకెం ఇని పట్టుమ్దు మర్జి తత్తారె, ముందాల అబ్రాహం హామారు మరిసిరి బాణిజ్ కొటి దూకి లోఇ ముస్తార్ †.

17 దేవుణు అబ్రాహముజ్ ముందాలె సిల్లి మాట వజ జగ్గిదెజ్ డగ్రు ఆజి వాతాద్. అయావలె మా లోకు అయ్గుప్తు దేసమ్దు నండొ లోకు ఆజి వాతార్. 18 అయావలె, యోసేపు ఎయెన్ ఇజి నెన్ఇ ఒరెన్ రాజా అయ్గుప్తు దేసమ్దిజ్ ఏలుబడిః కిదెజ్ మొదొల్స్తాన్. 19 యా రాజా మా లోకాజ్ మాయ మాటెజ్ వెప్తి మొసిం కిత్తాన్. గొప్ప మాలెజ్ కిత్తాన్. మొగ్గకొడొఃర్ పుట్టిజి వరిజ్ సప్తెజ్ వెటనె గడ్డదు విస్సిర్లెజ్ వలె ఇజి యా రాజా ఆడ్ర సిత్తాన్. ఎందనిజ్ ఇహిజ వారు సాజి సాండ్రెజ్.

20 ఆ కాలమ్దు మోసి ఇనికాన్ ఒరెన్ పుట్టాన్. వాండ్రు సుడెఃదెజ్ గొప్ప నెగ్గికాన్. వాండ్రు మూండ్రీ నెలెజ్ దాక వన్ని బుబ్బ ఇండ్రొ పిరితాన్. 21 మూండ్రీ నెలెజ్ వెనుక వన్నిజ్ ఇండ్రొ వెల్లి సాప్పి గడ్డ ఒడ్డుదు ఇట్టార్. అయావలె పరో రాజా గాల్పి వాతాదె కొడొఃదిజ్ లాగితాదె దన్ని మరిసి లెకెండ్ ఫాస కిజిస్తాద్. 22 మోసిజ్ అయ్గుప్తు వరి విజా తెలివి నెసేపిస్తాన్. వాండ్రు, వర్గిని మాటెజ్ లోఇ బాగ వర్గిదెజ్ అట్టాన్. కిని వణిజ్ లోఇ నెగ్రెండ కిదెజ్ అట్టాన్.

23 మోసిజ్ నలవయ్ పంటెజ్ ఆతివలె నా సాంత లోకుర్ ఆతి ఇస్సాయేలుర్ బానె సాస ఇజి బుద్ది పుట్టాద్. 24 వాండ్రు సాహిజ్ అయ్గుప్తుదికాన్ ఒరెన్, ఒరెన్ ఇస్సాయేలు వన్నిజ్ మాలెజ్ కిజి మహిజ్ సుడెఃతాన్. సుడెఃతండ్రె, ఇస్సాయేలు వన్నిజ్ గెల్పిస్తెజ్ ఇజి అయ్గుప్తు వన్నిజ్ సప్తాన్. ఆహి నాయం తీరిస్తాన్.

25 ఇస్సాయేలు లోకాజ్ వరి బాదెజాణిజ్ డిఃబిస్తెజ్ దేవుణు నజి ఫాక్తాన్ ఇజి మోసి ఒడిఃబితాన్. గాని వారు అర్దం కిపితార్. 26 మహ్న నాండిజ్ మోసి ఇస్సాయేలు లోకాజ్ సుడెఃజి సాహాన్. రివర్ ఇస్సాయేలు లోకుర్ టంటెజ్ ఆజి మహిజ్ మోసి వరిజ్ సుడెఃతండ్రె, 'ఒరె ఒరె బాబు, మీరు తంబెరి రిఇదెర్గదె? మీరు ఎందనిజ్ ఒరెన్ వన్ని ముస్సు ఒరెన్ టంటెజ్ ఆజినిదెర్' ఇజి వెప్తాండ్రె వారు రిఎరిజ్ కూడుఃపైజ్ ఇజి సుడెఃతాన్. 27-28 గాని ఆఇ వన్ని ముస్సు అనయం కినికాన్ వెప్తాన్, 'మా ముస్సు అతికారి వజ మండ్రెజ్, తీర్పు తీర్పి వన్నివజ మండ్రెజ్ నిజి ఎయెన్ ఏర్పాటు కిత్తాన్? నీను ఇవన్ అయా అయ్గుప్తు వన్నిజ్ నస్తిలెకెండ్ నజిబా సప్తెజ్ ఇజి సుడెఃజినిదా ఇజి వెప్తాండ్రె మోసిజ్ నెక్తఫాక్తాన్. 29 యాక వెహండ్రె మోసి తియెల్ ఆతాన్. వెటనె అయ్గుప్తు దేసిం డిసి సాహాన్. మిద్యాను ఇని దేసమ్దు సాహండ్రె ఆఇకాన్ లెకెండ్ బత్తితాన్. బానె పెండ్రీ ఆతండ్రె రివర్ కొడొఃరిజ్ ఇట్టాన్. 30 నలవయ్ పంటెజ్ వెనుక, సినాయి ఇని పెరి గొరోన్ డగ్రు మన్ని బిడిఃమ్ బూమిదు మహిజ్, ఒరెన్ దేవుణు దూత మోసిజ్ తోరె ఆతాన్. యా దూత వెయిజి మహి తుప్పెజి నడిఃమి ఉండ్రీ సీను కొణ లోఇ తోరె ఆతాన్.

31 మోసి అక్కు సుడెఃతిజ్ బమ్మ ఆతాన్. బమ్మ ఆతండ్రె నెగ్రెండ సుడెఃదెజ్ తుప్ప డగ్రు సాహాన్. డగ్రు సాహిజ్ దేవుణు మాట ఈహు వెహాన్, 32 'నాను నీ అనిగొగొర్ ఆతి అబ్రాహం, ఇస్సాకు, యాకోబు ఇని వరి దేవుణు'. యాక వెహండ్రె మోసి తియెల్ ఆజి వణక్తాన్. సుడెఃదెజ్బా అట్వితాన్.

† అయ కాలమ్దు అయ్గుప్తు దేసమ్దికార్ పీసుగుదిజ్ నూనె రాసి పాత లోఇ ఇడ్వార్, సబ్బిండ మండ్రెజ్

33 దేవులు మరి వెహ్లాన్, 'నీ జోడుకు కుత్తి ఇడే. నీను నిహిమన్ని బాడ్డి దేవుణుదిజ్ కేట ఆతి బాడ్డి'. 34 అయ్గుప్తు దేనమ్దు మన్ని నా లోకాజ్ మాలెజ్ నాను నెగ్రెండ సుడే. వారు అడఃబానిక వెహ. అందెజె నాను వరిజ్ డిఃబిన్జిజ్ డిఃగిత వాత. ఏలు రఅ నిజి నాను అయ్గుప్తు దేసెం షాక్కు ఇజి వన్నివెట వెహ్లాన్.

35 'మా ముస్సు అతికారి వజ మండ్రెజ్ తగ్గు త్వికాన్ వజ మండ్రెజ్ నిజి ఏయెర్ ఏర్పాటు కిత్తాన్' ఇజి వెహ్లాన్ ఇస్రాయేలు లోకుర్, ముందాల నెక్కి షాక్కి యా మోసెజ్నె, దేవులు అతికారి వజ, తస్సినికాన్ వజ వరిబాన్ షాక్తాన్. వెయ్జి మహి తుప్ప లోఇ తోరె ఆతి దేవులు దూత సాయమ్దాన్ మోసెజ్ దేవులునె షాక్తాన్. 36 అయ్గుప్తు దేనమ్దు బమ్మ వణిజ్ కిజి మోసె ఇస్రాయేలురిజ్ తస్సిన్ తతాన్. ఎర్రజ్ నమ్దరంబానె, మరి వారు నలవయ్ పంటెజ్ నడిఃజి సాహిమహి బిడిమ్ బూమిదుబా మోసె బమ్మాని వణిజ్ బమ్మాని గుర్తుజ్ కిత్తాన్. 37 యా మోసెనె ఇస్రాయేలురు వెట, 'దేవులు నజి షాక్కి లెకెండ్ మీబాణిజె ఒరెన్ ప్రవక్తెజ్ మీబాన్ షాక్తాన్, ఇహాన్. 38 బిడిమ్ బూమిదు సజం కూడితి మహి ఇస్రాయేలు లోకుర్ వెట మహికాన్ యా మోసెనె. మా అనిగొగొర్ వెట మహికాన్ వీండ్రె. సీనాయి గొరొతు దేవులు దూత విన్నివెటనె వగ్గితాన్. మజి సీదెజ్ దేవులు బాణిజ్ ఎల్లకాలం బత్కిని మాటెజ్ తత్తికాన్ వీండ్రె.

39 గాని యా మోసెజ్ మా అనిగొగొర్ లోజిజి మన్ఏండ నెక్తపాక్తార్. మర్జి అయ్గుప్తు దేనమ్దు సాహిజె నెగ్గెడ్ ఇజి వారు కోరితార్. 40 అయ్గుప్తు దేసెమ్దాన్ మజి కూక్కి తత్తి యా మోసె ఇనిక అతాండ్రె మజి తెలివెద్. అందెజె మర్జి అయ్గుప్తు దేనమ్దు సాండ్రెజ్ మజి ముందాల నడిఃదెజ్ దెయమ్కు తయార్ కిజి సిదా ఇజి మోసె అన్నసి ఆతి ఆరోసు వెట వెహ్లాన్. 41 అయావలె వారు ఉండ్రె దూడః లెకెండ్ బొమ్మ తయార్ కిత్తరె పూజ కిత్తార్. పరి కిక్యాణిజె తయార్ కిత్తి దన్నిముస్సు వారు నండ్రె సర్ల ఆతార్. 42 గాని దేవులు కోపం ఆతండ్రె మొకొం వెనక మహ్లాన్. ఆగాసమ్దు మన్నికెజ్ సుడేదెజ్, నెల షాద్దు సుక్కెజ్ విజా దన్నిజ్ పూజ కిదెజ్ వరిజ్ డిఃస్స సిత్తాన్. ప్రవక్తరు ముందాలె రాస్తిమహిక దిని వందిజె. అక్క ఇనిక ఇహిజ 'ఇస్రాయేలు లోకాండె, మీరు బిడిమ్ బూమిదు నల్వయ్ పంటెజ్ నడిఃని సాస్సి మహివలె పూజ కిత్తిక నజీనె ఆవెద్. 43 మీరు పూజ కిహాల్ ఇజి తయార్ కిత్తి మొలూకు రొంవయు ఇని సుక్కెజాణి దెయమ్కాజె గూడాఃరమ్దు పిండితి ఒసి మహిదెర్. వనకాజె పూజ కిత్తిదెర్. అందెజె బబులోసు దేసెం అతార్ మిజి తోహ్ని ఒతెజ్ నాను సరి సీనాలె. 44 మా అనిగొగొర్ బిడిమ్ బూమిదు సాస్సి మహివలె సాసి గూడారం పరివెట మహాద్. దేవులు మోసెజ్ తోరిస్తి లెకెండ్ మోసె యా సాసి గూడారం 'తయార్ కిత్తాన్. 45 మరి లావు పంటెజ్ వెనుక యెహోసువ ఇనికాన్ అయ టయమ్దు యా సాసి గూడారం పిండిత ఒతండ్రె మా అనిగొగొరిజ్ నడిఃపిస్తాన్. అయావలె ఇస్రాయేలు లోకాజ్ సీనా ఇజి దేవులు వెహ్లా దేనమ్దు వారు సాహార్. దేవులు పరివెట మహిజె బానె మహి యూదురు ఆఇ లోకుర్ వెట ఉద్దం కితార్, గెల్స్తారె ఆ దేసెం సాంతం కిత్తార్. బానెబా మా అనిగొగొర్ యా సాసి గూడారం పిండిత ఒతార్. దావీదురాజు వరిజ్ ఏలుబడిః కిత్తి కాలమ్దాక యా సాసి గూడారం బానె మహాద్. 46 దావీదురాజు ఇహిజ దేవులు వెహ్లా వజ నడిఃతికాన్. దేవులు దయ వన్ని ముస్సు లావు మహాద్. అహిజెబా మా అనిగొగొర్ ఆతి యాకోబు షార్దనం కిత్తి యా దేవుణుదిజ్ ఎలాకాలం మండ్రెజ్ ఉండ్రె గుడిః తోహ్లాజ్ దావీదు రాజు వెనబాతిజెబా దేవులు సరి సీనితాన్. 47 గాని దావీదురాజు మరిసి ఆతి సాలోమొనుజ్నె దేవులు గుడిః తోహ్లాజ్ సరి సిత్తాన్. 48 అహిజెబా విజెరిజ్ ఇంక గొప్ప పరి దేవులు, లోకు కిక్యాణిజ్ తయార్ కిత్తి బాడ్డిదు మన్ఏన్.

49 దేవులు మాటెజ్ ప్రవక్త ఈహు వెహ్లానాన్: "పరలోకం నాను బనిసి సిమనసం †. బూమి నా పాదమ్కు ఇడ్డి పీట. నాను మండ్రెజ్ ఉండ్రె గుడిః తోహ్లాజ్ మీరు అల్ఇదెర్. 50 ఎందనిజ్ ఇహిజ, పరలోకం, బూమి, దన్ని లోఇ మన్నికెజ్ విజా నానె పుటిస్త". 51 మూర్కం బుద్ది మన్నికిదెరా, దేవులు మాటెజ్ ఒప్పుకోటాప్ ఇజి మీరు సుసతి కిత్తిదెర్ గాని దేవులు మాటెజ్ గిబ్బిజాణి వెంజిబా సరినె వెన్ఇ లెకెండ్ మంజినిదెర్. వెహిజెబా సరినె మన్నుదు ఇడేఏండ లోజిఇదెర్. మీ అనిగొగొర్ లెకెండ్ మీరుబా ఎనిజెబా సరినె దేవులు ఆత్మదిజ్ నెక్కిపాక్సినిదెర్. 52 మీ అనిగొగొర్ ప్రవక్తరిజ్ విజెరిజ్ గొప్ప మాలెజ్ కిత్తార్. దేవులు షాక్కు ఇజి వెహ్లా ఆ నీతి వాండ్రు వందిజ్ ముందాలె వెహ్లా ప్రవక్తరిజెబా మీ అనిగొగొర్ సహ్లార్. ఏలు ఆ నీతి వన్నిజ్ మీరు ఒపజెప్తిదెర్. వన్నిజ్ సప్తిదెర్. 53 దేవులు వన్ని దూతవెట మిజి సిత్తి రూలుజ్ మిజి దోహ్లాజె గాని మీరు దన్నిజ్ లోజిఇతిదెర్".

స్తైపానుజ్ వణుకుజాణిజ్ డెయ్జినార్

54 యా మాటెజ్ వెహరె వారు గొప్ప కోపం ఆతారె స్తైపానుజ్ సుడేఃజి పల్కు కోహ్లాక్తార్. 55 గాని స్తైపాను దేవులు ఆత్మ సత్తు పూర్తి నిండ్రెజి ఆగాసం దరోబ్ సుడేతాన్. సుడేఃతిజ్ దేవులు గొప్ప జాయ్ సుడేతాన్. యేసుప్రబు దేవులు ఉణెర్ పడఃక నిహి మహిక సుడేతాన్. 56 "సుడేఃః, ఆగాసం రే ఆతి మహిక, లోకు మరిసి ఆతి యేసు దేవులు ఉణెర్ పడఃక నిహిమహిక నాను సుడేఃజిన", ఇజి స్తైపాను వెహ్లాన్.

57 గాని యా మాటెజ్ వెహరె వెటనె వారు గిబ్బిజ్ మూకె ఆతారె డటం గగోలాజి విజెరె ఉండ్రె ఆజి వన్ని ముస్సు వాతార్. 58 పట్టుమ్దాన్ వెల్లి లాగిత ఒతారె వన్నిజ్ వణుకుజాణి డెయ్జిజె సప్తెజ్ మొదొల్స్తాన్. వణుకుజ్ విసీరెన్ సాసి లోకుర్ పరి సాక్కెజ్ ముందాల సపులు ఇని ఒరెన్ దజడాఃయెన్ పాదమ్కాజ్ డగ్గు తత్తారె ఇట్టార్.

59 వారు స్తైపానుజ్ వణుకుజాణిజ్ డెయ్జిజె మహిజ్ స్తైపాను, "యేసుప్రబువా నా పాణమ్దిజ్ ఏలు నీ డగ్గు కూడువేఅ", ఇజి షార్దనం కిత్తాన్. 60 వెనుక స్తైపాను ముణుకుజ్ ఊరిజి, "ప్రబువా, వీరు కిజిని యా పాపం విరి ముస్సు మోహ్పు", ఇజి డటం డేల్స్తాన్. యా మాట వెహ్లాండ్రె వాండ్రు పాణం డిఃస్తాన్. స్తైపానుజ్ సప్తిక సపులు ఒప్పుకోటాన్.

దేవుణుదిజ్ నమ్మితి వరిజ్ సపులు పాడుః కిజినాన్

8 ఆ దినమ్కాజ్ యెరూసలేమ్దు మహి దేవులు సజమ్దిజ్ గొప్ప మాలెజ్ ఆజి మహాద్. అపాస్తురు ఆఏండ మహి నమ్మితికార్ విజెరె యూదయ సమరియ దేసమ్కాజ్ సెద్రిత సాహార్. 2 బక్తి కల్లితి నమ్మిత్తి లోకుర్ స్తైపానుజ్ సమాది కితారె వన్ని వందిజ్ గొప్ప దుకం ఆజి అడఃబాతార్. 3 నస్తివలె సపులు ఇనికాన్ యేసుప్రబు ముస్సు నమకం ఇడ్డిమహి పరి నమకం పాడుః కిదెజ్ సుడేతాన్. ఇల్కాజ్ ఇల్కాజ్ డుఃగిజి మొగ్గకొడాఃరిజ్ అయ్లికొడాఃకాజ్ ఈడిఃసి ఒసి జెలిరు ఇడేఃజి, వాండ్రు సజమ్దిజ్ పాడుః కిదెజ్ మొదొల్స్తాన్.

† సాసి గూడారం. దేవులు ఇబ్బె మనాన్ ఇజి లోకాజ్ వెహ్లా మహి గూడారం †† సిమనసం. తీర్పు కిదెజ్ రాజార్ బనిని కుర్చి

సమరియ దేసమ్మదు సువార్త సాటిస్టార్

4 అయావలె సెద్రితి సాహి సజమ్దికార్ సువార్త సాటిసి విజ బాడ్డిజ విజెరిజ్ వెన్విసి బూలాతార్. 5 అయావలె అపాస్తురు ఏర్పాటు కిత్తివరి లొఇ ఒరెన్ పిలిపు ఇనికాన్ సమరియ పట్నమ్దు సాహాన్. అబ్బె యేసు, క్రీస్తు † ఇజి బోద్దిస్తాన్. 6 పిలిపు వెహ్ మాటజ్ లోకుర్ విజేరె నెగ్రెండ వోహారె వాండ్రు కిత్తి బమ్మాని గుర్తుజ్ సుడేతార్. 7 కిక్కు కాల్కు సాటికార్, సాటవారు నండోండార్ అబ్బె వాతారె నెగ్రెండ ఆతార్. నండోండార్ లోకుర్ దెయం అస్తి మహికార్ అబ్బె మహార్. దెయమ్కు నండో గగోలాజి వరిజ్ డిస్సి సాహి. 8 అందెజె సమరియ పట్నమ్దు నండో సర్గ కల్లితాద్.

గార్ది పణి కిసి సిమోసు

9 సమరియ పట్నమ్దు సిమోసు ఇని ఒరెన్ మహాన్. సిమోసు ఆ పట్నమ్దు సెగం పంటజ్ గార్ది విదె కిజి నాను ఒరెన్ గొప్ప వాండ్రు ఇజి వెహ్ని మహాన్. అబ్బె మహి లోకాజ్ సిమోసు బమ్మ కిజిసి మహాన్. 10 అయ పట్నమ్దు మహికార్ ఇజిరికార్ పెరికార్ విజేరె వీండ్రు 'దేవుణు గొప్ప సత్తు ఇనికాన్' ఇజి వెహ్ని వన్ని ముస్సు, నమకం ఇడేతార్. 11 నండో కాలం సిమోసు గార్ది పణి కిజి లోకాజ్ బమ్మ కిజిసి మహాన్. అందెజె వారు సిమోసుజ్ నమ్మితార్. 12 గాని దేవుణు ఏలుబడి: వందిజ్, యేసుక్రీస్తు వందిజ్ పిలిపు పట్నమ్ది లోకాజ్ సాటిస్టిజ్ యా సువార్త వెహికార్. నమ్మితారె మొగ్గకొడోర్, అయ్లికొడోర్ బాప్తీసం లాగె ఆతార్. 13 అయావలె సిమోసుబా నమ్మిజి బాప్తీసం పాందితాండ్రె పిలిపుజ్ డిస్విండ వన్నివెలెనె మహాన్. పిలిపు కిసి బమ్మాని గుర్తుజ్, బమ్మాని పణిజ్ సుడేజి సిమోసు గొప్ప బమ్మ ఆతాన్.

14 యేసు ప్రబు వందిజ్ వెహ్ని సువార్త సమరియ దేసమ్దికార్ ఒప్పుకొటార్ ఇజి యెరూసలేమ్దు మన్ని అపాస్తురు వెహార్. వెహారె పేతురుజ్ యోహానుజ్ వరి డగ్రు ఫోక్తార్ 15 వీరు వాతారె సమరియ పట్నమ్దు నమ్మితి వరి ముస్సు దేవుణు ఆత్మ సత్తు వాదెజ్ ఇజి పార్దనం కిత్తార్. 16 ఎందనిజ్ ఇహిజ అబ్బెణి దాక దేవుణు ఆత్మ సత్తు వరి ఎయేరి ముస్సుబా రెవీండ మహాద్. వారు ప్రబువాతి యేసు పేరుదాన్ బాప్తీసం ఉండ్రెనె లాగె ఆజి మహార్. 17 అయావలె పేతురు, యోహాను వరి ముస్సు కిక్కు ఇడ్డిజ్ దేవుణు ఆత్మ సత్తు వరి ముస్సు వాతాద్.

18-19 అపాస్తురు లోకుర్ ముస్సు కిక్కు ఇట్టి వలె వారు దేవుణు ఆత్మదాన్ నిండ్రెజినార్ ఇజి సిమోసు సుడేతాన్. సుడేతండ్రె, "నాను ఎయెన్ ముస్సు కిక్కు ఇడ్డానొ, వాండ్రు దేవుణు ఆత్మ సత్తుదాన్ నిండ్రెని వజ యా అతికారం నజీబా సిదా", ఇజి వెహ్ని వరి ముందాల డబ్బు ఇట్టాన్. 20 అయావలె పేతురు, "సిను డబ్బు సీజి దేవుణు వరం సంపాదనం కిన ఇజి ఒడిబిత్తిదా? నీ డబ్బు నీ వెలు నాసనం ఆపిద్. 21 నీ ఆలోసనం దేవుణు సుడేతిజ్ సరి ఆతిక ఆపిద్. అందెజె మాపు కిసి పణిదు నిజీ ఇని వంతు సిల్లెద్. 22 అందెజె యా సెఇ ఆలోసనమ్కు డిసిసిజి దేవుణు డగ్రు వాజి పార్దనం కిదు. సిను ఒడిబిత్తి ఆలోసనమ్ వందిజ్ దేవుణు నిజీ సిమిస్తాన్. 23 నీ మన్నుదు నండో గోన నిండ్రెత మనాద్ ఇజి నాను నెస్తా. అక్కాదె అపిండ నీ పావమ్కు నిజీ తొహ్తా మన్నె ఇజి నాను నెస్తా", ఇజి పేతురు వెహ్. 24 దన్నిజ్ సిమోసు, "సిను వెహ్కెజ్ ఇనికబా నా ముస్సు రెవీండ మీరు నావందిజ్ యేసుప్రబుజ్ పార్దనం కిదు", ఇజి పేతురుజ్ యోహానుజ్ వెహ్. 25 వెనక పేతురు, యోహాను సాసి వెహ్ని, యేసుప్రబు సువార్త సాటిసి, యెరూసలేమ్దు మహ్తా వాతార్. వాని సరి సమరియదు మహి నండో నాహ్కాజ్ సువార్త సాటిసి వాతార్.

పిలిపు అయ్యియెపియది వన్నిజ్ బాప్తీసం సిత్తాన్

26 అయావలె, ఒరెన్ దేవుణు దూత పిలిపుజ్ వెహ్, "సిను దసిణం దరోట్ సాన్ని యెరూసలేమ్దాన్ గాజ ఇని పట్నం సాని బిడిమ్ బూమిదు సాన్అ", ఇజి వెహ్. 27-28 అందెజె పిలిపు సాతాండ్రె సాహాన్. సాన్ని మహిజ్ ఒరెన్ అయ్యియెపియదికాన్ రదం †† ముస్సు సాన్నినాన్. వాండ్రు అయ్యియెపియ దేసమ్ది రాణి కందెకెబాన్ ముకెలమతి పణి కినికాన్ ఒరెన్. ఇని పణి ఇహిజ దేసమ్ది డబ్బు నడిపిసిని దన్ని ముస్సు వీండ్రు మంత్రి. వీండ్రు యెరూసలేమ్దు పార్దనం కిదెజ్ సాహాండ్రె మరీజి సాన్నినాన్. సాన్ని మహిజ్ వీండ్రు రదమ్దు బసి యెసయ ప్రవక్త రాస్తి పుస్తకం సద్విజినాన్. 29 అయావలె దేవుణు ఆత్మ పిలిపుజ్, "సిను రదం డగ్రు సాన్ని దన్ని వెలు నడిజి సాన్అ", ఇజి వెహ్. 30 పిలిపు రదం డగ్రు ఉహ్కీ సాహిజ్ అయా అయ్యియెపియదికాన్ యెసయ ప్రవక్త రాస్తి పుస్తకం సద్విజినాన్. పిలిపు అక్కు వెహాన్. వెహాండ్రె, "సిను సద్విజినిక అర్దం కిజినిదా?", ఇజి వెన్బాతాన్. 31 వెన్బాతిజ్, "ఎలాగ అర్దం కిన? ఎయెన్బా నజీ అర్దం వెహ్విండ మహిజ ఎలాగ అర్దం కినా? రదమ్ ముస్సు ఎక్కి నా వెలు బన్అ. దిన్ని అర్దం వెహ్ని సిదా" ఇహాన్, అయ అయ్యియెపియదికాన్. అందెజె పిలిపు రదం ఎక్కి వన్ని డగ్రు బస్తాన్. 32 అయ అయ్యియెపియదికాన్ సద్విజి మహి మాటజ్ ఇనికెజ్ ఇహిజ "సప్తజ్ ఒని గొర్రె వజ వన్నిజ్ ఒతార్. బుడుసుక్కుజ్ కత్తిసినివలె అలెజి మంజిని మెండగొర్రెపిల్ల వజ అలేత మహాన్. వాండ్రు ఇనికబా ఇన్వతాన్. 33 వారు వన్నిజ్ సిగు కిత్తార్. వన్నిజ్ నాయం దోహ్కేవీండ్రాత సాహాద్. వన్ని సాటెజాణి వరి వందిజ్ ఎయెర్బా వెహ్విండ ఆనార్. ఎందనిజ్ ఇహిజ, వన్ని పాణమ్దిజ్ బూమి ముస్సుహాన్ లాగితార్".

34 అయ అయ్యియెపియదికాన్ ఈహు వెన్బాతాన్, "ప్రవక్త ఎయె వందిజ్ ఈహు వెహ్నినాన్? వన్ని వందిజెనా, మరి ఒరెన్ వందిజా? దయ కిజి వెహ్అ". 35 అందెజె పిలిపు అయ అయ్యియెపియదికాన్ సద్విజి మహి యెసయ ప్రవక్త రాస్తి పుస్తకమ్దు మహి మాటదాన్ మొదొల్ని యేసుప్రబు వందిజ్ సువార్త వెహ్. 36 ఆహా వారు సాన్ని మహిజ్ ఏరు మహి ఉండ్రె బాడ్డిదు వాతార్. అయ అయ్యియెపియదికాన్ వెహ్, "ఇబ్బె ఏరు మన్నె. నాను బాప్తీసం లాగె ఆదెజ్ ఇనికబా అర్దు మనాదా?". 37 దన్నిజ్ పిలిపు, "సిను మన్ను పూర్తి యేసుప్రబుజ్ నమ్మిత్తిజి బాప్తీసం లాగె ఆదెజ్ ఇని అర్దుబా సిల్లెద్", ఇహాన్. అందెజె వాండ్రు, "ఒఒ, యేసుక్రీస్తు దేవుణు మరిసి ఇజి నాను నమ్మిజిన", ఇహాన్.

† క్రీస్తు (యెసయ) ఇహిజ దేవుణు ఏర్పాటు కిత్తి ఫోక్తాన్ ఇజి అర్దం †† రదం ఇహిజ గుర్తుకాజ్ ఉండ్రె బంటి పూట్నార్

38 అయావలె, "రదం నిల్వేత", ఇజి అయ్యుయిపియదికాన్ ఆడ్ర సిత్తాన్. రదం నిల్వేతాండ్రె వాండ్రు, పిలివు, రివర్ డిఃగ్జి ఏరుదు డిఃగితార్. పిలివు అయ్యుయిపియది వన్నిజ్ బాప్తిసం సిత్తాన్. 39 వారు ఏరు లోఇహాన్ వెల్లి వాతిజ్ వెటన దేవుణు ఆత్మ పిలివుజ్ కూక్ట ఒతాన్. అయ్యుయిపియదికాన్ పిలివుజ్ మరి సుడఃఏతాన్. గాని వాండ్రు సర్ద ఆజి వన్ని సరినె సాహాన్.

40 పిలివు సుడఃతిజ్ అజోతు పట్టుమ్దు మన్న ఇజి నెస్తాన్. అబ్బెణిజ్ సాసి వాండ్రు సాహి సరిదు మహి విజా పట్టుమ్కాజ్ యేసు ప్రబు వందిజ్ సువార్త వెప్పి కయ్సరియ ఇని పట్టుమ్దాక వాతాన్.

సవులు యేసుప్రబుజ్ నమ్మితాన్

9¹⁻² అయావలె సవులు ఇనికాన్ యేసుప్రబు ముస్సు, నమ్మితి వరిజ్ బెద్దిసి మహాన్. వరిజ్ మాలెజ్ కిజి మహాన్. వాండ్రు విజేరె పుజేరిజ ముస్సు పెరి పుజేరిబాన్ సాహాండ్రె దమస్సు పట్టుమ్దు మన్ని యూదురి మీటిజ్ ఇల్కాణి పెద్దెల్జె సీదెజ్ ఉత్తమ్కు లోస్తాన్. ఇని ఉత్తమ్కు ఇహిజ, దమస్సు పట్టుమ్దు యేసుప్రబు ముస్సు, నమకం ఇడ్డికార్ ఎయెర్బా మహిజ, మొగ్గొడొఃర్ గాని అయ్లికొడొఃక్ గాని వరిజ్ తొప్పి ఒసి యెరూసలేం పట్టుమ్దు తతెజ్ సవులుజ్ అతికారం మనాద్ ఇజి వెప్పిని ఉత్తమ్కు.

3 విజేరె పుజేరిజ ముస్సు పెరి పుజేరి సిత్తి ఉత్తమ్కు అస్తాండ్రె సవులు దమస్సు పట్టుమ్దు సాండ్రెజ్ సాత్తాన్. దమస్సు పట్టుం డగ్రు వాజి మహిజ్ గడెం ఆగనమ్దాన్ ఉండ్రె గొప్ప జాయ్ వన్ని సురులం డెయ్తాద్. 4 అయావలె సవులు బూమిదు అర్తాన్. అర్దిజ్, "సవులు, సవులు, నీను ఎందనిజ్ నజి మాలెజ్ కిజిని", ఇజి వన్ని వెట వెప్పి ఉండ్రె మాట వెహాన్.

5 "ప్రబు, నీను ఎయి", ఇజి సవులు వెనబాతాన్. "నీను మాలెజ్ కిజిని యేసునె నాను. 6 ఏలు నిజ్జి పట్టుమ్దు సాన్త. నీను ఇనిక కిదెజ్ ఇజి ఒరెన్ నిజి వెహూనాలె", ఇజి మాట వెహూన్. 7 సవులు వెట సాన్ని మహికార్ జాటు వెహార్ గాని ఎయెరిజ్బా తోర్వేతార్. వారు అల్లెత నిహ మహార్. 8 సవులు బూమిదాన్ నిజిత్తాండ్రె బేస్తాన్ గాని కణుకు తోర్వేండ ఆతె. అందెజె వారు వన్నిజ్ కికాజ్ అస్తారె దమస్సు పట్టుమ్దు నడిఃపిసి ఒతార్. 9 వాండ్రు మూండ్రె రోస్సు, కణుకు తోర్వేండ మహాన్. ఇనికబా తిన్వేండ ఉణెవండ మహాన్.

10 దమస్సు పట్టుమ్దు యేసుప్రబు సిసూడుః ఒరెన్ అననియ ఇనికాన్ మహాన్. యేసుప్రబు వన్నిజ్ దర్సనమ్దు తోరె ఆతండ్రె, "అననియ", ఇజి కూక్టాన్. కూక్తిజ్ అననియ, "ప్రబువా నాను ఇబ్బె మన్న", ఇహాన్.

11 యేసుప్రబు వన్నివెట, "నీను తినాజ్ ఇజి కూక్తి సరిదు సాన్త. బానె యూద ఇని వన్ని ఇండ్రె సాన్ని తార్పు పట్టుమ్దికాన్ సవులు ఇని వన్ని వందిజ్ వెనబాత. సవులు పార్లనం కిజి మంజినాన్. ఉండ్రె దర్సనమ్దు సవులు ఇనిక సుడఃతాన్ ఇహిజ, 12 అననియ ఇనికాన్ ఒరెన్ వాతండ్రె వన్ని కణెకెజె నెగెండ కిజి మరి సూణి లెకెండ ఆదెజ్ వన్ని బురారు కిక్కు ఇడ్డివజ సుడఃతాన్", ఇజి వెహూన్.

13 దన్నిజ్ అననియ వెహూన్, "ప్రబు వీండ్రు యెరూసలేమ్దు నిజి కేట ఆతి వరిజ్ ఎస్సానో మాలెజ్ కిత్తాన్ ఇజి వన్ని వందిజ్ నాను నండ్రె వెహ మహా. 14 ఇబ్బె యా పట్టుమ్దు నీ ముస్సు, నమకం ఇడ్డి వరిజ్ తొప్పి ఒసి యెరూసలేమ్దు ఒతెజ్ వన్నిజ్ అతికారం సీని ఉత్తమ్కు పెరి పుజేరిజ బాణిజ్ అస్తాండ్రె వాత మహాన్". 15 యేసుప్రబు అననియ వెట, "నీను సాన్త. యూదురు ఆఇ లోకర్ నడిఃమి, రాజారిజ నడిఃమి, ఇస్రాయేలు లోకాజ్ నడిఃమి నా వందిజ్ వెహిజ్ నాను వన్నిజ్ ఏర్పాటు కిత మన్న. 16 నా వందిజ్ వాండ్రు ఎసానో మాలెజ్ ఆనాన్ ఇజి నాను వన్నిజ్ తోర్వేన్", ఇహాన్.

17 అందెజె అననియ అయ ఇండ్రె సాహాండ్రె సవులు ముస్సు, కిక్కు, ఇత్తాన్. "సవులునా, నీను వాతి సరిదు నిజి తోరె ఆతి ప్రబు ఆతి యేసు నజి షాక్ట మనాన్. నీను మరి సూణి వందిజ్ దేవుణు ఆత్మ సత్తు నీ ముస్సు, వాని వందిజ్ నజి షాక్ట మనాన్", ఇజి సవులు వెట వెహూన్. 18 అయావలె వన్ని కణకాణిజ్ షారోజ్ నన్నికెజ్ రాల్లిజ్ సుడఃదెజ్ అత్తాన్. సవులు నిజితండ్రె బాప్తిసం లాగె ఆతాన్. 19 వెనుక బోజనం కితాండ్రె సత్తు ఆతాన్.

సవులు దమస్సు పట్టుమ్దు, యెరూసలేం పట్టుమ్దు యేసుప్రబు వందిజ్ వెప్పినాన్.

సవులు దమస్సు పట్టుమ్దు మహి యేసుప్రబు సిసూర్ వెట సెగం దినమ్కు మహాన్. 20 యూదురి మీటిజ్ ఇల్కాణి తిన్నాజ్ సాహాండ్రె యేసునె దేవుణు మరిసి ఇజి యేసుప్రబు వందిజ్ బోద్దిస్సెజ్ మొదొల్స్తాన్. 21 అక్క వెహికార్ విజేరె నండ్రె బమ్మ ఆతార్. యెరూసలేమ్దు యేసుప్రబుజ్ నమ్మితి వరిజ్ పాడుః కిజి మహికాన్ వీండ్రెగదె. యేసుప్రబుజ్ నమ్మితి వరిజ్ తొప్పి పెరి పుజేరిర్ డగ్రు కూక్తి ఒతెజ్ ఇబ్బెబా వీండ్రు వాత మనాన్ ఇజి వెహూర్. 22 అహిజ్బా పవులు మరి నండ్రె సత్తుదాన్ బోద్దిసి మహాన్. యేసునె దేవుణు షాక్తి క్రిస్టు ఇజి రుజావ్ కితాండ్రె దమస్సు పట్టుమ్దు మహి యూదురుజ్ గాబు కితాన్. 23 నండ్రె రోస్సు, సాహి వెనుక సవులుజ్ సప్తెజ్ ఇజి యూదురు ఆలోసనం కితార్. 24 గాని వరి ఆలోసనం సవులుజ్ తెలితాద్. వన్నిజ్ సప్తెజ్ వారు రెయువేల పూర్తి పట్టుం వెల్లి సాని సేహా † బాన్ సుడఃజి కాత మహార్. 25 గాని వన్ని సిసూర్ రయ్యు వన్నిజ్ ఒతారె ఉండ్రె గంపదు బని కితారె పట్టుం సురుల మన్ని గోడఃదు మన్ని ఉండ్రె కిటికి బోరొదాన్ వన్నిజ్ అడిఃగి డిఃఫారె.

26 సవులు యెరూసలేమ్దు సాహిజ్ సిసూర్ వెట కూడఃదెజ్ సుడఃతాన్. గాని వాండ్రు సిసూర్ లోఇ ఒరెన్ ఆవ్ ఇజి వారు ఒడిఃబితారె వన్నిజ్ వరివెట కూడుఃప్తెజ్ తియెల్ ఆతార్. 27 గాని బరబ్బు ఇనికాన్ వన్నిజ్ అపాస్సురుబాన్ కూక్తి ఒతాన్. సవులు దమస్సు పట్టుమ్దు సాహి సరిదు ఎలాగ యేసుప్రబు వన్నిజ్ తోరె ఆతాన్ ఇజి, ఎలాగ యేసుప్రబు వన్నివెట వర్గితాన్ ఇజి, వెనుక సవులు ఎలాగ దమస్సు పట్టుమ్దు తియెల్ సిల్లెండ యేసుప్రబు వందిజ్ బోద్దిస్సెజ్ ఇజి బరబ్బు అపాస్సురు వెట వెహూన్. 28 అయావలె అపాస్సురు సవులుజ్ కూడుఃప్తెజ్ వాండ్రు వరివెట కూడిఃత మహాన్. వరివెట కూడిఃతాండ్రె యెరూసలేమ్దు విజా బాడ్డిదు సాన్ని తియెల్ సిల్లెండ యేసుప్రబు వందిజ్ బోద్దిస్సెజ్ మొదొల్స్తాన్. 29 గ్రీకు బాన వర్గిని యూదురు వెట వర్గితాండ్రె తర్కిస్తాన్. అందెజె వారు సవులుజ్ సప్తెజ్ సుడఃతార్. 30 యాక తెలితారె సిసూర్ వన్నిజ్ డిగు మన్ని కయ్సరియాదు ఒతారె తార్పు పట్టుం షాక్టార్.

† సేహా. దమస్సు పట్టుం సురుల పెరి గోడః తొహా మహాద్. గోడఃదు పట్టుం వెల్లి సాని సేహిజ్ మహి. బానె పట్టుం కావ్ కినికార్ కావ్ కిజి మహాద్

31 అయి కాలమ్మదు యూదయ, గలిలయ, సమరియ దేసమ్కాజ్ మహి దేవుణు సజం తియెల్ సిల్లెండ సమదానమ్దాన్ మహార్. సజం దేవుణుదిజ్ లోజిజి దేవుణు ఆత్మ సాయమ్దాన్ సత్తు ఆజి వాతె. నమ్మితికార్ నండొండార్ ఆజి వాతార్.

పేతురు లుదదు యోపాదు బమ్మాతి వణిజ్ కిత్తాన్

32 అయావలె పేతురు నాహ్లానాహ్లా, పట్టుమ్కువట్టుమ్కు సాస్సి లుద ఇని నాటొ దేవుణుదిజ్ కేట ఆతి వరిజ్ సుడిః సాహాన్. 33 బానె ఒరెన్ అయ్నెయి ఇనికాన్ ఎనిమిది పంటెజాణ్ అసి నిజ్దెజ్ అబ్బ ఇ వన్నిజ్ సుడిఃతాన్. వాండ్రు కిక్కు, కాల్య, అర్తికాన్. 34 పేతురు వన్నిజ్ సుడిఃజి, "అయ్నెయి, యేసుక్రీస్తు నిజి నెగండ కిజినాన్. నిజ్జి, నీ మంసం నీనె పెర్లి ఉండ్రీ వడఃకాద్ ఇడఃఅ" ఇహాన్. 35 వెటనె అయ్నెయి నిజిత్తాన్. లుదా నాటొదు, సారోను దేసమ్దు మహికార్ విజేరె, వన్నిజ్ జర్గితిక సుడిఃతారె యేసుప్రబుజ్ నమ్మితార్.

36 అయావలె యోప ఇని పట్టుమ్దు తబిత ఇని ఉండ్రీ అయ్లె కొడొః మహాద్. అదిబా యేసుప్రబు సిసూ. గ్రీకు బాసాదు దన్ని పేరు దొర్కు. దొర్కు ఇహిజ డుపి ఇజి అర్దం. అది ఎసెజా నెగ్గి వణి కిజి మహాద్. సిల్లి వరిజ్ సాయం కిజి మహాద్. 37 గాని అది అయావలె ఉండ్రీ కష్టం అస్తాదె సాతాద్. వారు పీనుగుదిజ్ ఏరు వడిస్తారె మేడః ముస్సు, మన్ని గదిదు తెర్లెత్తార్. 38 లుద పట్టుం యోప పట్టుం డగ్రు మహాద్. పేతురు అబ్బె మనాన్ ఇజి యోపాదు మన్ని సిసూర్ వెహరె రిఎరె మణిసిరిజ్ ఫాక్సి, "దయ కిజి వెటనె రల", ఇజి కట్టు ఫాక్టార్. 39 పేతురు నిజితండ్రె వరివెట యోపాదు సాహాన్. వారు వన్నిజ్ మేడఃగది లోఇ ఒతార్. అబ్బె ముండ మణిసిక్ అడఃబాజి, దొర్కు వరివెట మహివలె గుతిస్తె సాక్యెజ్ పాతెజ్ తోరిసి వన్ని సురుల నిహి.

40 పేతురు విజేరిజ్ వెల్లి ఫాక్టాండ్రె ముణుకుజ్ ఊర్జి పార్దనం కిత్తాన్. పీనుగుదిజ్ సుడిఃజి, "తబిత, నిజ్అ" ఇహాన్. అయావలె అది బేస్తాదె పేతురుజ్ సుడిఃజి నిజిత బస్తాద్. 41 పేతురు దన్నిజ్ కిక్కుజ్ అస్తాండ్రె నిక్తాన్. నమ్మితి వరిజ్, ముండ మణిసికాజ్ కూక్సి అది బత్తిత్తాద్ ఇజి వరిజ్ ఒపజెత్తాన్. 42 యాక యోపాదు మనికార్ విజేరె నెస్తారె నండొండార్ యేసుప్రబు ముస్సు, నమకం ఇట్టార్. 43 పేతురు యోపాదు సీమోను ఇని ఒరెన్ తోల్కు పార్ని వన్నిబాన్ యోప పట్టుమ్దు నండొ దిసమ్కు బత్తిత్తాన్.

పేతురు కొర్నేలియెజ్ సువార్త వెప్పినాన్

10 అయావలె కయ్సరియ ఇని పట్టుమ్దు, ఉద్దం కినివరి లోఇ కొర్నేలి ఇని ఒరెన్ సదాతిపతి † మహాన్. వాండ్రు, వన్ని అడ్డి మహి ఉద్దం కినికార్ ఇటలి దేసమ్దాన్ వాతి మహి గుంపుదికార్ ఇజి కూకె ఆతమహార్. 2 కొర్నేలి, వన్ని ఇండ్రొణికార్, బక్తి మనికార్. వారు దేవుణుదిజ్ తియెల్ ఆతికార్. వాండ్రు సిల్లి వరిజ్ వన్నిజ్ మనిక సెడ్డినె సీజి మహాన్. దేవుణుదిజ్ ఎస్తివలెబా పార్దనం కినికాన్. 3 ఒర్నేండు మదెనం రమరమి మూండ్రీ గంటెజ, దేవుణు బాణిజ్ వాతి ఒరెన్ దూత వన్నిబాన్ నిహండ్రె, "కొర్నేలి", ఇజి కూక్తాన్. కూక్తిజ్ యా దూతెజ్ టెటాజ్ సుడిఃతాన్. 4 కొర్నేలి గొప్ప తియెల్ ఆతండ్రె, "ప్రబు, ఇనిక?", ఇహాన్. దూత వెప్టాన్, "నీను దేవుణుదిజ్ కిత్తి పార్దనమ్కు, సిల్లి వరిజ్ సీని దానం విజా దేవుణు సుడిఃతండ్రె నీ వందిజ్ ఒడిఃబిజినాన్. 5 ఏలు యోప ఇని పట్టుమ్దు లోకాజ్ ఫాక్సి పేతురు ఇజి కూకె అసి సీమోను ఇని వన్నిజ్ కూక్సిన్ల. 6 వాండ్రు సమదరం డగ్రు మన్ని సీమోను ఇని తోల్కు తయార్ కినికాన్ ఒరెన్ వన్ని ఇండ్రొ బత్తిజినాన్".

7 యాక వెప్పి దూత సాహిజ్, కొర్నేలి వన్ని వణి మణిసిరె రిఎరెజ్ కూక్సిస్తాన్. ఎస్తివలెబా వన్నివెట కూడిఃజి మంజిని బక్తి మన్ని ఒరెన్ ఉద్దం కిని వన్నిజ్బా కూక్సిస్తాన్. 8 జర్గితిక విజా వరివెట వెప్టాండ్రె వరిజ్ యోప పట్టుమ్దు ఫాక్టాన్.

పేతురు సుడిఃతి దర్దనం

9 మర్సనాండిజ్ వారు సాస్సి యోప పట్టుం డగ్రు ఆతార్. అయావలె మదెనం ఆతాద్. పేతురు పార్దనం కిదెజ్ మేడః †† ముస్సు ఎక్తాన్. 10 పేతురు గొప్ప బజ కట్టిజ్ ఇనికబా ఉండెజ్ కోర్తాన్. బోజనం తయారాజి మహిజ్ వాండ్రు ఉండ్రీ దర్దనం సుడిఃతాన్. 11 అక్క ఇనిక ఇహిజ అగాసం రె ఆజి నాల్లి సెంగుజ అసిమహి పెరి దుపాటి ననిక ఉండ్రీ బూమిదు డిపె ఆతిలెకెండ్ సుడిఃతాన్. 12 దన్ని లోఇ బూమి ముస్సు, మన్ని నాల్లి కాల్య, మన్ని విజా రకం జంతుజ్, బూమి ముస్సు, ఊజి బూలానికెజ్, ఆగనమ్ ముస్సు ఎగ్రిని ఫాటిజ్ మహి.

13 అయావలె, "పేతురు, నిజ్అ, నప్పి తిన్ల", ఇజి, ఉండ్రీ మాట పేతురు వెహాన్. 14 దన్నిజ్ పేతురు, "సిల్లె ప్రబువా, తిండ్రెజ్ ఆఇకెజ్ ఎసెజ్బా నాను తిన్ల", ఇజి వెప్టాన్ ‡.

15 వెప్టాజ్, మాట మరి వాతాద్, "దేవుణు నెగ్గిక ఇజి ఇడ్డికెజ్ నీను సెవద్ ఇజి ఎర్లిస్సు".

16 ఈహు మూండ్రీ సుట్టు, జర్గితాద్. వెటనె ఆ దుపాటినన్నిక అగాసమ్దు మరజి పెరి ఆతాద్. 17 దర్దనమ్దు సుడిఃతి దన్ని అర్దం ఇనికాద్ ఇజి పేతురు గొప్పజ ఒడిఃబిజి మహాన్. అయావలె కొర్నేలి ఫాక్తి లోకుర్ సీమోను ఇల్లు ఎమేణిక ఇజి వెన్బాజి నెస్తారె వన్ని ఇల్లు ముండాల వాతార్. 18 "పేతురు ఇజి కూకె అసి సీమోను ఇబ్బె మనాండ్రా, సిల్లెండ్రా", ఇజి పేరు అస్తారె డేడిస్తార్.

19 పేతురు దర్దనమ్దు సుడిఃతి దన్ని వందిజ్ ఒడిఃబిజి మహివలెనె దేవుణు ఆత్మ వన్నివెట వెప్టాన్, "సీమోను, మువెర్ లోకుర్ నిజి రెబాజినార్. 20 నీను నిజ్జి అడ్డి డిఃగిజి సాన్ల. అనుమానం ఆపండ వరివెట సాన్ల. ఎందనిజ్ ఇహిజ నానె వరిజ్ ఫాక్ట".

21 పేతురు డిఃగిజి సాహండ్రె, "మీరు నజిని రెబాజినిదెర్. ఎందనిజ్ వాతిదెర్?", ఇహాన్. 22 దన్నిజ్ వారు, "సదాతిపతి అతి కొర్నేలి మజి ఫాక్టాన్. వాండ్రు నీతి నిజాయితి మన్నికాన్. దేవుణుదిజ్ తియెలాజి మన్నికాన్. వాండ్రు గొప్ప నెగ్గికాన్ ఇజి యూదురు విజేరె వెప్పినార్. ఒరెన్ దేవుణు దూత వన్నిజ్ తోరె ఆతండ్రె, పేతురుజ్ నీ ఇండ్రొ కూక్సి తసి వన్ని మాటెజ్ వెన్ల" ఇహాన్, ఇజి వెప్టార్. 23 అయావలె పేతురు వరిజ్ ఇండ్రొ తతాండ్రె, "నేండ్రు మా బాన్ మండ్రు", ఇహాన్.

† వంద మంది విదెం కినివరిజ్ నడిప్పి రోమ అతికారి. †† మేడ ముస్సు, బాన్ మహి ఇల్కాజ్ ముస్సు, మేడెజ్ మన్నె. ఎక్సి సాస్సి బస్తెజ్ అనాద్ ‡ యూదురుజ్ తిండ్రెజ్ ఆఇకెజ్ నెగం మన్నె, అక్యెజ్ తిన్వర్

పేతురు కొర్రెలి ఇండ్రో సాన్నినాన్.

మహ్న నాండిజ్ పేతురు నిజీతంద్రె వరివెట పయనం ఆతాన్. యోపాదికార్ సెగొండార్ యేసుప్రబుజ్ నమ్మితికార్ వరివెట సాహార్. 24 ఉండ్రె రోజు పయనం ఆతారె మహ్న నాండిజ్ వారు కయసరియాదు అందితారె. కొర్రెలి వన్ని కుటుమ్ది వరిజ్ వన్ని డగ్రుహి కూడెజ ఇండ్రో కూడుస్తాండ్రె పేతురు వందిజ్ కాన్ కిజి మహాన్. 25 పేతురు ఇండ్రో వాతిజ్ కొర్రెలి సాహండ్రె వన్ని పాదమ్కాజ్ అర్తాండ్రె వన్నిజ్ మాడిస్తాన్. 26 గాని పేతురు వన్నిజ్ నికాండ్రె, "నిజ్అ, నానుబా నీ నన్ని లోకునె" ఇహాన్.

27 కొర్రెలి వెట వర్గిజి పేతురు లోఇ సాహిజ్ మంద లోకుర్ బాన్ కూడెజిమహిక సుండెతాన్. 28 పేతురు వరి వెట వెహ్సాన్. "మా యూదురి రూలు వజ ఇహిజ యూదురు ఆఇ లోకుర్ వెట కూడెనిక ఆవద్. వరివెట మంజినిక ఆవద్. ఇక్క మీరు నెసినిదెర్గదె. గాని లోకాజ్ ఎయెరిజ్బా తక్కుదికార్ ఇజి ఇండ్రెజ్ ఆవద్ ఇజి దేవుణు నజీ తోరిస్త మనాన్. 29 అందెజె నజీ కూకొప్పిజ్ నాను అడ్డు వెహ్విండ వాత. నజీ ఎందనిజ్ కూకొప్పిదెర్. ఏలు వెహ్అ", ఇహాన్.

30 అయావలె కొర్రెలి వెహ్సాన్, "నాల్లి దినమ్కు ముందాల యా గడియారునె నాను మదెనం మూండ్రె గంటెజ ఇండ్రో పార్లనం కిజి మహ. వెటనె మెర్గిని నన్ని పాతెజ్ పారాతి మన్ని ఒరెన్ నా ఎద్దు నిహాన్. 31 "కొర్రెలి, దేవుణు నీ పార్లనమ్కు వెహాన్. సిల్లి వరిజ్ సెడ్డినె సిత్తికెజ్ దేవుణు సుండెతాన్. 32 యోపాదు కబ్బు పొక్కి పేతురు ఇజి కూకె ఆని సీమోసుజ్ కూక్కిన్అ. వాండ్రు సమ్దరం డగ్రు తోల్కు తయార్ కినికాన్ ఒరెన్ సీమోసు ఇని వన్ని ఇండ్రో బత్కిజినాన్. 33 అందెజె వెటనె నిజీ కబ్బు పొక్త. నీను వాతికాదె నెగెద్. ఏలు మాపు విజెవ దేవుణు డగ్రు వాతాప్. మా వెట వెహ్సాజ్ దేవుణు నిజీ ఆడ్ర సిత్తి విజా మాటెజ్ వెండ్రెజ్ మాపు వాతాప్.

34 దన్నిజ్ పేతురు వెహ్సాన్, "దేవుణు విజెరిజ్ ఉండ్రె లెకెండ్రె సుండెజినాన్, ఇజి ఏలు నాను నిజమనె నెన్నా. 35 ఎమేణి జాతి ఇహిజ్బా దేవుణుదిజ్ తియెలాజి, నీతి నిజాతిదాన్ నడితిజ దేవుణు వన్నిజ్ ఒప్పుకొణాన్. 36 యేసు క్రీస్తు విజెరిజ్ ప్రబు. దేవుణు వెట లోకాజ్ కూల తొప్పిస్తెజ్ వాండ్రు యేసుజ్ పొక్తాన్. యేసువలెహాన్ ఇసాయేలు లోకాజ్ సమదనం వాతాద్ ఇజి దేవుణు సువార్త పొక్తాన్. 37 యోహాను దేవుణు మాటెజ్ బోదిసి బాప్తిసం సిత్తి వెనుక గలీలయాదాన్ మొదొల్లి యూదయ దేనమ్దు విజా ఇనిక జగ్గితాద్ ఇజి మీరు నెసినిదెర్. 38 యాక ఇనిక ఇహిజ, దేవుణు, నజరేతు వాండ్రు ఆతి యేసుజ్ దేవుణు ఆత్మ సత్తు సీజి ఏర్పాటు కిత్తాన్. వాండ్రు సాన్ని నెగ్గి పణిజ్ కితాండ్రె నయాన్ లోకురిజ్ కిజిని బాదెజాణిజ్ డిబిస్తాన్. దేవుణు వన్నివెట మహిజానె వాండ్రు అక్కెజ్ విజా కిదెజ్ అట్టాన్.

39 వాండ్రు యూదురి దేనమ్దుని, యెరూసలేమ్దుని, కిత్తి విజా వనకాజ్ మాపు సానిర్. యూదురు వన్నిజ్ సిలువాదు డెయూరె సప్తార్. 40 గాని మూండ్రె రోస్సాజ్ దేవుణు వన్నిజ్ సాతి వరిబాణిజ్ నికాండ్రె మజి తోరిస్తాన్. 41 విజెరె లోకాజ్ వాండ్రు తోరె ఆవతాన్. దేవుణు ముజాలె ఏర్పాటు కిత్తి సానిర్, ఇహిజ, మజెనె వాండ్రు తోరె ఆతాన్. సాతి వరిబాణిజ్ నిజీతి వెన్నా మాపె వన్నివెట తింజి ఉణిజి మహాన్. 42 సాతి వరిజ్, బత్కిజిని వరిజ్ తీర్పు సీదెజ్ దేవుణు యేసుజె ఏర్పాటు కిత్తాన్ ఇజి సాని వెప్పి సువార్త సాటిస్తెజ్ యేసుప్రబు మజి ఆడ్ర సిత్తాన్. 43 ప్రవక్తరు విజెరె వన్ని వందిజ్ ఇని సాని వెహ్సార్ ఇహిజ, వన్ని మున్ను నమకం ఇడ్డి విజెరి పావం దేవుణు వన్ని వందిజ్ సెమిస్తానె ఇజి.

యూదురు ఆఇ వరిజ్ దేవుణు ఆత్మ సత్తు, దోహ్కెసినాద్.

44 పేతురు యా మాటెజ్ వెప్పి మహిజెనె, వన్ని మాటెజ్ వెంజి మహివరి మున్ను దేవుణు ఆత్మ వాతాద్. 45 పేతురు వెట వాతి మహి నమ్మితికార్ యూదురు, యాక సుండెతారె బమ్మ ఆతారె. "యూదురు ఆఇ వరిజ్బా దేవుణు ఆత్మ సత్తు ఇని ఇనాయం దేవుణు సీజినాన్", ఇజి బమ్మ ఆతారె. 46 ఎందనిజ్ ఇహిజ దేవుణు ఆత్మ సత్తు వరి మున్ను వాతిజ్ వారు ఆఇ బాసెజ్ వర్గిజి దేవుణు ఎసానా పెరికాన్ ఇజి స్తుతి కినిక వీరు వెహర్.

అయావలె పేతురు వెహ్సాన్, 47 "మజి దేవుణు ఆత్మ దోహ్కె లెకెండ్రె విరిజ్బా దోహ్కె. ఏలు వీరు ఏరుదు బాప్తిసం లాగె ఆదెజ్ ఇహిజ ఎయెర్బా అడ్డు కిదెజ్ అట్టారా?". 48 అందెజె యేసుక్రీస్తు పేరు అసి ఏరుదు బాప్తిసం లాగె ఆదెజ్ పేతురు వరిజ్ ఆడ్ర సిత్తాన్. వెనుక, సెగం రోస్సు మా వెట మన్అ ఇజి వారు పేతురుజ్ వెహ్సార్.

పేతురు జర్గితికెజ్ వెప్పినాన్.

11 యూదురు ఆఇ లోకుర్బా దేవుణు - మాటెజ్ నమ్మితార్ ఇజి యూదయ దేనమ్దు మన్ని నమ్మిత్తికార్ని, అపొస్తురు వెహర్. 2-3 అందెజె పేతురు ఎక్కు యెరూసలేమ్దు సాహివలె బానె మహి సునతి కిబె ఆతి యూదురు, వన్నివెట తర్కిస్తారె. "నీను సునతి కిబె లోకుర్ వెట కూడితి మహి, వరివెట ఉణిజి మహి", ఇజి వన్ని మున్ను తర్కిస్తారె.

4 అయావలె పేతురు, జర్గితికెజ్ విజా మొదొహాన్ అసి వరివెట వెహ్సాన్. 5 "నాను యోప పట్నమ్దు మహివలె ఒరెనెండ్రె పార్లనం కిజి మహిజ్ ఉండ్రె దర్లనం సుండెత. ఇనిక సుండెత ఇహిజ, అగాసం రే ఆజి నాల్లి సెంగుజె అనిమహి పెరి దుపాటి ననిక ఉండ్రె బూమిదు డిఃపె అతిలెకెండ్రె నా డగ్రు డిఃగిజి వాతాద్. 6 అక్క నెగ్రెండ్రె సుండెతిజ్ దన్ని లోఇ నాల్లి కాల్కు మన్ని జంతుజ్, అడివి జంతుజ్, బూమి మున్ను ఉణిజి బూలానికెజ్, అగాసం మున్ను ఎగ్రిని పొటిజ్ నజీ తోరితె. 7 అయావలె, 'పేతురు నిజ్అ. సప్పి తిన్అ', ఇజి ఉండ్రె మాట వెహ.

8 దన్నిజ్ నాను, 'సిల్లె ప్రబు, సెవద్ ఇజి ఇడ్డికెజ్ ఇనికెజ్బా నాను ఎనిజ్బా తిన్వ' ఇహా. 9 అగాసమ్దాన్ మాట మరి వాతాద్, 'దేవుణు నెగ్గిక ఇజి వెహ్సికెజ్ నీను ఏరిస్సు'. 10 ఈహు మూండ్రె సుట్టు వాతాద్. ఆక్కర్దిజ్ అక్కెజ్ విజా అగనమ్దు మర్జి పెరె అతె. 11 యాక జర్గితి వెటనె కయ్యురియదాన్ కొర్రెలి పొక్కి మువెర్ లోకుర్ నజీ రెబాజి నాను మహి ఇల్లు డగ్రు వాతారె. 12 అయావలె దేవుణు ఆత్మ, 'నీను ఇని అనుమానం సిల్లెండ్రె వరివెట సాన్అ' ఇహాన్. వీరు ఆరుగురు నమ్మిత్తికార్బా నావెట వాతారె. వాతారె మాపు కొర్రెలి ఇండ్రో సాహాప్.

13-14 కొర్రెలి ఇండ్రో సాహిజ్, దేవులు దూత వన్నివెల వెప్తికెజ్ విజా వెహ్సాన్. 'నీను యోపాదు లోకాజ్ ఫాక్సి పేతురు ఇజి కూకె ఆని సీమోనుజ్ కూక్సిన్ల. వాండ్లు వానాండ్రె నీను, నీ కుటుమ్దికార్ విజేరె పాపం కిత్తి దన్ని సిక్కుదాన్ ఎలాగ గెలిస్తెజ్ అనాద్ ఇజి వెహ్సానాల్' ఇజి వెప్తికెజ్ విజా కొర్రెలి మజీ వెహ్సాన్.

15 నాను వరివెల వర్గిదెజ్ మొదొల్స్తెజ్, మా ముస్సు దేవులు ఆత్మ తొలిత ఎలాగ వాతాద్ అయావజనె వరి ముస్సుబా వాతాద్. 16 అయావలె నజీ ప్రబు మాటెజ్ గుర్తు వాతాద్. ఇనిక ఇహిజ, 'యోహాను ఏరుదాన్ బాప్తిసం సిత్తాన్. గాని మీరు దేవులు ఆత్మదాన్ బాప్తిసం లాగె ఆనిదెరెల్' ఇజి. 17 అహిజ మాపు ప్రబు ఆతి యేసుక్రీస్తు ముస్సు నమకం ఇట్టి వలె దేవులు మజీ సిత్తి ఇనాయమ్నె వరిజేబా సిత్తాన్. దేవులుదిజ్ అడ్లు కిదెజ్ నాను ఎవటిదికానా?'

18 యాక వెహరె వారు మరి ఇని అడ్లుబా వెహ్సాత్తార్. "నిజమ్నె, యూదురు ఆఇ వరిజేబా వరి పాపమ్కు డి:సిసీజి దేవులుదిజ్ లోజీజి ఎలాకాలం బత్కిదెజ్ దేవులు సరి సీజినాన్", ఇజి వెహ్సి వారు దేవులుదిజ్ స్తుతి కిత్తార్.

అంతియోకయాదు నమ్మితి వరిజ్ క్రీస్తు లోకు ఇజి పేరు వాతాద్.

19 స్తెపానుజ్ సప్తివెనుక యేసుప్రబు ముస్సు నమ్మితి వరిజ్ లాపు మాలెజ్ వాతిజ్ వారు సెద్రిత సాహార్. సెద్రితికార్ సెగొండార్ పెనికె, కుప్ర, అంతియొకియ ఇని దేనమ్దాక సాహరె యూదురిజ్ ఉండ్రెన దేవులు మాటెజ్ వెహ్సార్. 20 గాని వరి లొఇ సెగొండార్ కుప్రదికార్, కురేనియదికార్ మహార్. వారు సాన్ని అంతియోకయాదు మన్ని గ్రీకు బాస వర్గిని వరిజేబా యేసు ప్రబు వందిజ్ సువార్త వెహ్సార్. 21 ప్రబు సత్తు వరివెల మహాద్. అందెజె మంద లోకు దేవులు మాటె నమ్మిత్తారె ప్రబు ముస్సు నమకం ఇత్తార్. 22 యెరూసలేమ్దు మన్ని సజమ్దికార్ యాక వెహరె బర్నబెజ్ అంతియోకయాదు ఫాక్తార్. 23 బర్నబు వాతండ్రె దేవులు దయ వరి ముస్సు వాతాద్ ఇజి సుడె:తాండ్రె సర్ల ఆతాన్. దేవులు ముస్సు ఉండ్రె మస్సుదాన్ నమ్మిదు ఇజి వాండ్రు వరిజ్ దయరం వెహ్సాన్. 24 బర్నబు దేవులు ఆత్మ సత్తుదాన్, నమకమ్దాన్ నిండ్రెతికాన్, నెగ్గికాన్. వాండ్రు దేవులు మాటెజ్ బోద్దిస్తెజ్ మంద లోకుర్ యేసుప్రబు ముస్సు నమకం ఇత్తార్.

25 వెనుక బర్నబు సవులుజ్ రెబాజి తార్పు పట్నం సాహాన్. 26 సవులుజ్ రెబాజి దొహ్కెజ్ వన్నిజ్ అంతియోకయాదు తతాన్. వారు రిఎర్ ఉండ్రె ఏండు బానె మహి సజమ్దికార్ వెల కూడితారె మంద లోకాజ్ దేవులు మాటెజ్ బోద్దిస్తారె. అంతియోకయాదునె, నమ్మితి వరిజ్ క్రీస్తు లోకు ఇజి పేరు తొలిత ఇడె: ఆత మహాద్. 27 యా కాలమ్దు ప్రవక్తరు సెగొండార్ యెరూసలేమ్దాన్ అంతియోకయాదు వాతార్. 28 వరి లొఇ అగబ ఇనికాన్ ఒరెన్ దేవులు ఆత్మదాన్ నిండ్రెతాండ్రె రోమరాజు ఏలుబడి: కిని దేనమ్కాజ్ విజా ఉండ్రె పెరి కరు వానాదెల్ ఇజి వెహ్సాన్. (క్రీస్తుదియ ఇని రాజు ఏలుబడి: కిత్తి కాలమ్దు యా కరు వాతాద్) 29 అయావలె నమ్మితికార్ విజేరె యూదురుదు బత్కిని నమ్మిని వరిజ్ సాయం ఫాక్తెజ్ ఒడి:బితార్. మాపు ఎసా సీనాఫా నసా సీనాప్ ఇజి వారు ఒడి:బితార్. 30 వరి సాయమ్కు వారు బర్నబుని, సవులు వెల పెద్దెలుబాన్ ఫాక్తార్.

పేతురు జెలిదాన్ గెలిస్తాన్.

12 అయ కాలమ్దు పేరోదు రాజు సజమ్ది వరిజ్ సెగొండారిజ్ మాలెజ్ కిదెజ్ మొదొల్స్తాన్. 2 యోహానుజ్ దాద ఆతి యాకోబుజ్ కుర్లదాన్ నపిస్తాన్.

3 యా సజతి యూదురిజ్ ఇస్టం ఆతాద్ ఇజి నెస్తాండ్రె పేరోదు రాజు పేతురుజేబా తొహ్సి ఇడె:దెజ్ ఆడ్ర సిత్తాన్. యూదురి పులాజ్ ఆఇ రొటెజ్ తిని పండొయ్ దిసమ్కాజ్ యాక జర్గితాద్. 4 పేతురుజ్ అరెస్టు కితారె వన్నిజ్ జేలిదు ఇత్తార్. జేలిదు ఇత్తారె వన్నిజ్ కాప్ కిజి మండ్రెజ్ వదహారు మణిసిరె జమానుజ ఒవజెస్తాన్. ఉండ్రె సుటు నాలేవర్ మణిసిరె కాపు మంజినార్. వస్సు పండొయ్ వెన్కా లోకాజ్ నడి:మి తసి పేతురుజ్ తీర్పు తీర్సెజ్ పేరోదు రాజు ఒడి:తాన్. 5 ఆహె పేతురు జెలిదు మహాన్. గాని సజమ్దికార్ వన్ని వందిజ్ గటిజె దేవులుదిజ్ పార్లనం కిజి మహార్.

6 మర్ననాండిజ్ పేతురుజ్ తీర్పు తీర్సెజ్ వెల్లి తన ఇజి పేరోదు రాజు ఒడి:బిత మహాన్. అయ పాదొయ్ పేతురు రిఎర్ జమానుజ నడి:మి రుండి గొల్స్కాణిజ్ తొహె ఆజి నిర్ల కిజి మహాన్. రిఎర్ జమానుజ వెల్లి కాపు మహార్. 7 అయావలె వెలనె ఒరెన్ దేవులు దూత తోరె ఆతాన్. ఆ గది లొఇ జాయ్ నన్ని వెల్లెరె వాతాద్. దూత పేతురుజ్ వడె:కారు డె:యేజి బేగి నిజ్త ఇజి వెహ్సి నిక్తాన్. వన్ని కిక్కాణిజ్ గొల్స్కూ ఊడె:జి అర్తె.

8 దూత వన్నివెల, "నీను నడుముదు తొహె ఆజి జోడ్కు తొడె:గిల", ఇహాన్. పేతురు అక్రెజ్ తొహ్సిజ్ దూత, "నీ పాత పిడి:గ్గి నా వెనక రల", ఇహాన్. 9 పేతురు దూత వెనుక సాహండ్రె జెలిదాన్ వెల్లి వాతాన్. గాని జర్గినిక నిజమె ఆవదొ ఇజి పేతురు నెన్వితాన్. యాక విజా దర్ననమ్దు సుడె:జిన ఇజి ఒడి:బితాన్. 10 వారు ముందాల కాప్ కిని వరిజ్ డాట్సి వెనుకాది వరిజేబా డాట్సి పట్నం సాని ఇనుము గవుని డగ్రు వాతార్. వాతిజ్ అదినె రే ఆతాద్. వారు సాని వాజి ఉండ్రె వీది డాట్సిసాహి వెలనె దూత వన్నిజ్ డి:స్స సాహాన్.

11 అయావలె, జర్గికిజ్ విజా నిజమె ఇజి పేతురు తెలి ఆతాన్. దేవులు వన్ని దూతెజ్ ఫాక్తాండ్రె నజి పేరోదురాజు బాణిజ్ డి:బిస్తాన్. యూదురు నజి ఇనిక కిదెజ్ ఒడి:బితారె దన్ని లొఇహాన్బా డి:బిస్తాన్ ఇజి ఏలు నాను నిజం నెస్తా ఇజి ఒడి:బితాన్. 12 యాక నెస్తాండ్రె పేతురు, మార్కు ఇజి కూకె ఆని యోహానుజ్ అయ్సె ఆతి మరియ ఇండ్రో సాహాన్. బాన్ మంద లోకుర్ కూడి:త మహారె పార్లనం కిజి మహార్. 13 పేతురు వెల్లి మహి సేహ్దు కొత్తాన్. ఎయెన్ ఇజి వెండ్రెజ్ రోద ఇని వణి మణిసిబాన్ సాహాద్. 14 అది పేతురు కంటం గుర్తు అస్తాది గొప్పు సర్ల ఆతాద్. సేహ్ల రేవిండ్ర ఉహ్కె సాహాద్, "పేతురు సేహ్ల డగ్రు నిహ మనాన్", ఇజి మహి వరిజ్ వెహ్సాద్. 15 వారు, "నిజి వెరి మనాద్" ఇహార్. గాని అది మరి మరి వెహ్సిజ్ వారు, "అహిజ వన్ని దూత వాతాద్" ఇహార్.

16 గాని పేతురు సేహ్లాదిజ్ కొత్తి మహాన్. వారు సాన్ని సేహ్లా రేతిజ్ పేతురుజ్ సుడె:తారె గొప్పు బమ్మ ఆతార్. 17 మీరు జమ్న మండ్రు ఇజి పేతురు వరిజ్ కియు సయ్న కితాండ్రె, దేవులు వన్నిజ్ ఎలాగ జెలి లొఇహాన్ వెల్లి తత్తాన్ ఇజి వరిజ్ విజా వెహ్సాన్. యాక యాకోబుజ్ని మహి నమ్మితి వరిజ్ వెహ్సా ఇహండ్రె మరి ఉండ్రె బాడ్డిదు సాహాన్. 18 పెండాహిజ్ జేలిదు మహి జమాన్జెలు గొప్పు గాబ్ర ఆతార్. పేతురు ఇనిక అతాండ్రె ఎంబె సాహండ్రె ఇజి వారు గొప్పు గాబ్ర ఆతార్.

19 పేతురుజ్ రెబాజి దొహ్కెజ్ పేరోదు రాజు ఆడ్ర సిత్తాన్. గాని వారు ఎసా రెబాతిజ్బా తోర్వితాన్. అందెజె పేరోదు రాజు కాప్ కిజిమహి జమాన్జె మరి మరి యా సజతి వందిజ్ వెన్బాజి పేతురు గెల్స సాహాన్ కాక వరి ముస్సు తీర్పు కితాండ్రె వరిజ్ సప్తెజ్ ఆడ్ర సిత్తాన్.

హేరోదు రాజు సాతాన్.

హేరోదు రాజు యూదయదాన్ కయ్ సరియాదు సాహాండ్రె బాన్ సెగం కాలం బత్తితాన్. 20 హేరోదురాజు తూరు పట్టుమది వరి ముస్సు, సీదోసు పట్టుమదివరి ముస్సు గొప్ప కోపం కల్గిజి మహాన్. అందెజె వారు ఉండ్రె మన్నుదాన్ వాతారె రాజు ఇండ్రోణి అతికారి ఆతి ఒరెన్ బ్లాస్టు ఇని వన్నిజ్ వరి పడఃకాదు కూడుఃప్టార్, రాజు వరి ముస్సు నమదనం ఆదెజ్ ఇజి. ఎండనిజ్ ఇహిజ రాజు దేసమ్దానె వరిజ్ పంట దోహాక్సి మహాద్. 21 ఏర్పాటు కిత్తి రోజు, హేరోదు రాజు, రాజార్ తోడఃగిని సాక్సెజ్ పారపాతాండ్రె రాజు కుర్సిదు బస్తాండ్రె వాతివరివెట మీటిజ్ దు వర్గితాన్. 22 అక్క వెహారె లోకుర్, వీండ్లు ఒరెన్ దేవుణు లెకెండ్ వెస్సినాన్, లోకు లెకెండ్ ఆవన్ ఇజి గగోల్ కిత్తార్. 23 రాజు యాక వెహిజ్ దేవుణుదిజ్ స్తుతి కివెతాన్. వెటనె దేవుణు దూత వన్నిజ్ ఉండ్రె కస్టం పుటిస్తిజ్ వాండ్రు పిడుఃకు ఆజి సాతాన్. 24 గాని దేవుణు సువార్త మరి మంద లోకు వెహార్కాక దేవుణు ముస్సు నమకం ఇత్తార్. 25 బర్బుబని సవులు యెరూసలేమ్దు సాస్సి వరి పనిజ్ పీస్తారె మార్కు ఇజి కూకె ఆని యెహోనుజ్ కూడుఃప్టారె యెరూసలేమ్దాన్ మరజి వాతార్.

బర్బుబెజ్ ని సవులుజ్ సువార్త సాటిస్తిజ్ దేవుణు సజమ్దికార్ ఏర్పాటు కిత్తార్.

13 అంతియోకయాదు మహి సజమ్దు, సెగొండార్ ప్రవక్తరు, మరి సెగొండార్ దేవుణు మాటెజ్ బోదిసినికార్ మహార్. వారు ఎయెర్ ఇహిజ, బర్బుబ, నిగెర్ ఇజి కూకె ఆని సిమెయోను, కురేనదికాన్ లూకియ, హేరోదు అంతివాన్ †. 2 వీరు దేవుణుదిజ్ పార్దనం కిజి ఉపాన్ కిజి మహివలె దేవుణు ఆత్మ వెహ్తాన్, "బర్బుబెజ్ ని సవులుజ్ నాను కూక్తి వణి వందిజ్ మీరు ఏర్పాటు కిదు". 3 వెహ్తెజ్, సజం ఉపాన్ మంజి పార్దనం కిత్తారె వరి ముస్సు కిక్కు ఇత్తారె, దేవుణు వెహ్తె వణి వందిజ్ పాక్తార్.

బర్బుబని సవులు కుప్త ఇని ద్విప్పుదు సాహార్.

4 దేవుణు ఆత్మ పోక్తిజ్ బర్బుబని సవులు డిఃగు సమ్దరం డగ్రు మన్ని సెలూకిన ఇని పట్టుం సాహారె ఓడఃదు ఎక్తారె కుప్త ఇని ద్విప్పుదు †† సాహార్. 5 వారు సలామి ఇని పట్టుమదు సాహారె బాన్ మహి యూదురి మీటిజ్ కిని ఇల్కాజ్ సాహారె దేవుణు మాటెజ్ సాటిసి మహార్. మార్కు ఇజి కూకె ఆని యోహాను వరివెట వరిజ్ తోడుః లెకెండ్ మహాన్. 6 వారు అయ ద్విప్పు విజా వయనం కిత్తారె పాపు ఇని పట్టుమదు వాతార్. బానె వారు బర్యేసు ఇజి కూకె ఆని ఒరెన్ యూద వన్నిజ్ సుడఃతార్. వాండ్రు ఒరెన్ సెట్టికాన్. వాండ్రు అబద్దం మాటెజ్ వెహ్సి ప్రవక్త. దేవుణు మాటెజ్ వెహ్సి ప్రవక్త ఇజి నాటిసినాన్ గాని ఆవన్. 7 వాండ్రు రోమ గవర్నరు ఆతి సెర్గిపవులు వెట మహికాన్. అయ రోమ గవర్నరు ఇహిజ వాండ్రు తెలివి మన్నికాన్. వాండ్రు దేవుణు మాటెజ్ వెనా ఇజి బర్బుబెజ్ ని సవులుజ్ కూక్తివెస్తాన్. 8 గాని అయ సెట్టికాన్ వరిజ్ అడ్డు కిత్తాన్. (గ్రీకు బానదు వన్ని పేరు ఎలీమ) రోమ గవర్నరు ఆతి సెర్గిపవులు యేసుప్రబు ముస్సు నమకం ఇడఃఏండాదెజ్ సుడఃతాన్, యా గార్డి విదె కినికాన్. 9-10 అయావలె సవులు (వన్నిజ్ పవులు ఇని పేరుబా మహాద్) దేవుణు ఆత్మదాన్ నిండ్రెతాండ్రె ఎలీమేజ్ తినాజ్ సుడఃజి వెహ్తాన్, "సీను సయ్నాన్ పాటాదికాన్, నీతి నిజాయితి ఆతి విజా దన్నిజ్ పడఃఇకి. నీను వూర్తి సెఇకి, గొప్ప మొసెం కినికి. నిజమాతి దేవుణు మాటెజ్ నిజం ఆఇకెజ్ ఇజి తోరిసిని.

11 ఇదిలో, దేవుణు ఏలు నిజి తీర్పు సీజి సిక్స సీజినాన్. నీను సెగం కాలం గుడ్డి ఆజి పాద్దుదిజ్ సుడఃదెజ్ అట్వండ ఆనిలె" వెటనె వాండ్రు గుడ్డి ఆతాన్. గోయ్ నన్ని గాందుదాన్ వన్ని కణెకెజ్ సీకటి ఆతె. ఎయెర్బా కికాజ్ అసి బుల్లెయ్ కిబిన్నారా ఇజి అతాల్ ఇతాల్ బూలాజి మహాన్. 12 అయ రోమ గవర్నరు జర్గితిక సుడఃతివలె యేసుప్రబు ముస్సు నమకం ఇత్తాన్. ఎండనిజ్ ఇహిజ యేసుప్రబు - వందిజ్ బోద వెంజి బమ్మ ఆతాన్.

పవులుని బర్బుబి పిసిదియ దేసమ్దు మన్ని అంతియోకయాదు సువార్త వెహ్సినార్

13 వెనుక పవులుని వన్నివెట మహికార్ ఓడః ఎక్తారె పాపుదాన్ పంపులియాదు మన్ని పెర్గ ఇని పట్టుం సాహార్. బానె యోహాను వరిజ్ డిఃస్తారె యెరూసలేమ్దు మరజి సాహాన్. 14 వారు పెర్గ పట్టుమదాన్ సాత్తారె పిసిదియ దేసమ్దు మన్ని అంతియోకయాదు సాహార్. బానె వారు విస్తారెతి దిసమ్దు యూదురి మీటిజ్ ఇండ్రె సాహారె బస్తార్. 15 మోసె సత్తి రూలుదాన్, ప్రవక్తరు రాస్తి మాటెజ్ దాన్ సెగం నద్వితి వెనుక మీటిజ్ ఇండ్రోణి అతికారిజు పవులుని బర్బుబ వెట. "దాదారండె, లోకాజ్ బోద్సిజ్ ఇని మాటెజ్బా మహిజ వెహ్తూ" ఇహార్. 16 అయావలె పవులు నిజిఠండ్రె విజేరె అలెజి మండ్రు ఇజి కియ సయన కిత్తాండ్రె వరివెట వెహ్తాన్, "ఇస్తాయేలు లోకాండె, దేవుణుదిజ్ తియెల్ ఆని యూదురు ఆఇ లోకాండె, నా మాట వెండ్రు. 17 మా ఇస్తాయేలు లోకు పార్దనం కిని దేవుణు, మా అనిగొరిజ్, వన్ని లోకుర్ ఇజి మండ్రెజ్ ఏర్పాటు కిత్తాన్. వారు అయ్గుప్త దేసమ్దు ఆఇదేసమ్దివరిలెకెండ్ మహివలె వరిజ్ నండో లోకు ఎల్పిస్తాన్. వెనుక గొప్పసత్తుదాన్ వరిజ్ అబ్బెణాన్ గెల్పిసి తత్తాన్. 18 రమారమి నలవయ్ వంటెజ్ వారు బిడిఃమ్ బూమిదు సాస్సి మహివలె దేవుణు వరిజ్ ఓరిసి మహాన్. 19 కనాను దేసమ్దు మహి ఏడు జాతిజాణి వరిజ్ విదెం కిజి గెల్పిస్తాండ్రె వరిజ్ పాడు కిజి వరి దేసెం వన్ని లోకాజ్ అక్కు లెకెండ్ సిత్తాన్. 20 యాకెజ్ విజా నాల్లి వందెజ్ యబాయ్ వంటెజాణ్ జర్గితె.

వెనుక సముయేలు ఇని ప్రవక్త వాతి కాలమ్దాక వరిజ్ ఏలుబడిః కిదెజ్ తీర్పు తీరిస్సి నెయ్యి లోకాజ్ దేవుణు ఏర్పాటు కిత్తాన్. 21 దన్ని వెనుక ఇస్తాయేలు లోకుర్ 'మజి ఉండ్రె రాజాజ్ ఏర్పాటు కిల' ఇజి వెహ్తెజ్ దేవుణు వరిజ్ బెస్విమసు కుటుమదికాన్ కీసు మరిసి ఆతి సవులుజ్ నలవయ్ వంటెజ్ ఏలుబడిః కిదెజ్ ఏర్పాటు కిత్తాన్. 22 వెనుక సవులుజ్ లాగితాండ్రె దావీదుజ్ రాజువజ దేవుణు ఏర్పాటు కిత్తాన్. దావీదు వందిజ్ దేవుణు ఇని సాసి వెహ్తాన్ ఇహిజ, 'యెనియ మరిసి ఆతి దావీదు ఇహిజ నాను ఓడిఃబిని లెకెండ్ ఓడిఃబిజినాన్. నాను ఇస్టం ఆనికెజ్ వాండ్రు ఇస్టం ఆజినాన్. వాండ్రు ఇనిక కిదెజ్ ఇజి నాను కోరిజినాన్

† హేరోదు అంతివాన్. మార్కు సువార్తదు బాప్తినం సీని యోహానుజ్ జెలిదు ఇడ్డి వెనుక వన్నిజ్ సప్తెజ్ ఆడ్రె సత్తి హేరోదు రాజు వీండ్రె. (మార్కు 6:14-28) రాజు వెట కూడఃజి పిరితి మనయేను, సవులు ఇనికార్ †† ద్విప్పు. సురుల సమ్దరం మన్ని ఇజిరి దేసెం

అక్కజ్ వాండ్రు కినాన్'. 23 యా దావీదు పాటెజాణిజె మా అనిగొగొర్ వెట దేవుణు ఒట్టుకిత్తి లెకెండ ఇస్రాయేలు లోకాజ్ తప్పిన్కిన్ ఆతి యేసుజ్ పుటిస్తాన్. 24 యేసు వాని ముందాల యోహాను ఇస్రాయేలు లోకాజ్ బోదిస్తాన్. ఇనిక ఇహిజ 'విజేరె పావమ్కు ఒప్పుకొడేజి డిసిసిజి బాప్తిసం లాగె ఆదెజ్ ఇజి. 25 యోహాను వన్ని పణి వీన్నివలె లోకాజ్ వెప్తాన్, 'నాను ఎయెన్ ఇజి మీరు ఒడిబిజినిదెర్? మీరు ఒడిబిజినికాన్ ఆవన్ నాను. మీరు ఎద్రు నుడేజి మహికాన్ వెన్కా, వాజినాన్. వన్ని జోడ్కుబెట్టు కూతెజ్బా నాను ఏపటిదిక ఆవ'.

26 తంబెరిజాండె, అబ్రహాం కుటుమదికిదెరా, దేవుణుదిజ్ తియెల్ అనికిదెరా, దేవుణు లోకాజ్ ఎలాగె గెల్పిస్తానై ఇజి కబ్బు దేవుణు మజి విజేరిజె పాక్తాన్. 27 ఎందనిజ్ ఇహిజ యెరూసలేమ్దు మహికార్, వరి అతికారి లోకుర్, యేసు, దేవుణు పాక్తాన్ ఇజి గుర్తు అన్వితార్. విజా విస్తాంతి దినమ్దు వారు ప్రవక్తరు రాస్తి మాటెజ్ నదేవితార్ గాని అర్తం కిపితార్. గాని ప్రవక్తరు ముందాలై వెప్తి అయ మాటెజ్ వజ జర్పిస్తార్. ఎలాగె ఇహిజ యేసుజ్ సప్తజ్ వారు తీర్పు కిత్తార్. 28 యేసుజ్ తీర్పు కిని వన్నిడగు తసి సాపుదిజ్ తగితి తప్పు ఇనికబా కిపితాన్ ఇజి నుడేతిజ్బా గాని విన్నిజ్ సిలువ డెయేజి సప్తు ఇజి వారు పిలాతుజ్ బతిమాలితార్. 29 యేసుజ్ యూదురు ఇనికెజ్ ఇనికెజ్ కినారో ఇజి ప్రవక్తరు రాస్తి మహికెజ్ విజా వారు కిత్తి వెనుక వన్ని సీసూర్ వన్ని పీనుగుదిజ్ సిలువదాన్ డిప్తారె సట్టువణుకుదు దొలిస్తి సాలమ్ లోఇ ఇడ్తార్. 30 గాని దేవుణు యేసుజ్ సాతి వరిబాణిజ్ నిక్తాన్. 31 గలీలయదాన్ యెరూసలేమ్దు వన్నివెట సాన్ని మహి వరిజ్ యేసు నండో రోస్కు తోరె ఆతాన్. వారు ఏలు మాటు ఇస్రాయేలు లోకాజ్ నడిమి యేసుజ్ సాసిర్.

32-33 ఏలు మాపు మిజి సువార్త వెప్పినావ్. అయ సువార్త ఇనిక ఇహిజ దేవుణు యేసుజ్ సాతి వరిబాణిజ్ నిక్తాన్. యాక మా అనిగొగొర్ వెట దేవుణు కిత్తి ఒట్టు. వరిజ్ కిత్తి ఒట్టు వరి పాటెజాణికార్ ఆతి మా వందిజ్ ఏలు జర్పితాద్. "నీను నా మరిన్, నేండ్రు నాను నీ బుబ్బు ఆత మన్న", ఇజి కిర్తన రుండిదు రాస్తి మనిక దిన్నివందిజె.

34 దేవుణు వన్నిజ్ సాతి వరిబాణిజ్ నిక్తాన్. వన్ని పీనుగు సబ్విద్ ఇజి వన్నివందిజ్ దేవుణు మాటాదు ఈహు రాస్త మనాద్. "దావీదుజ్ సీనా ఇజి ఒట్టు కిత్తి నెగ్గి దీవెనమ్కు నాను మిజి తవ్విండ సీనా". 35 కిర్తన పుస్తకమ్దు మరి రాస్త మనాద్. అక్క ఇనిక ఇహిజ "నీను పాక్తివన్ని పీనుగు సబ్బిజి సాండ్రెజ్ సీను సరి సిజ".

36 అహిజ దావీదురాజా దేవుణు ఏర్పాటు కిత్తి వజ వన్ని తరమ్ది వరిజ్ సేవ కిజి పీస్తాండ్రె సాత సాహాన్. వన్ని అనిగొగొరిబాన్ వన్నిజ్బా ముస్తార్. వన్ని పీనుగు సబ్బిజి సాహాద్. 37 గాని సాతి వరిబాణిజ్ దేవుణు నిక్తి యా యేసు పీనుగు సబ్బిజి సాన్వితాద్.

38 అందెజె తంబెరిజాండె, మిజి వెప్పిని సువార్త యాకాదె. పావమ్కు సెమిప్తజ్ యేసు అట్నాన్. యాక మీరు నెగ్గెండ నెప్తెజ్ ఇజి నాను ఆస ఆజిన. 39 మోసి సిత్తి రూలుజ్ ఒరెన్ వన్నిజ్ వన్ని పావమ్కాణ్ డిబిస్తెజ్ అట్ఉ. గాని యేసు ముస్కు నమకం ఇడ్డి వరిజ్ వరి పావమ్కాణ్ యేసు పూర్తి డిబిస్తాన్. 40 ప్రవక్తరు వెప్పివజ మిజి రేవిండ నుడేదు. వారు ఇనిక వెప్తార్ ఇహిజ.

41 "నుడేదు, వెక్సిసికిదెరా, మీరు బమ్మ నిదెరెలె గాని పాడాజి సానిదెరె. ఎందనిజ్ ఇహిజ మీ కాలమ్దు నాను ఉండ్రె బమ్మాని పణి కిన. గాని అయ పణి వందిజ్ ఎయెర్బా వెప్పిజ్బా మీరు నమ్ఇదెర్". 42 పవులుని బర్బు యూదురి మీటిజ్ ఇండ్రెణిజ్ సాత్తిజ్, "వాని విస్తాంతి దినమ్దు వాజి యా మాటెజ్ మజి మరి వెప్పి సిదాట్", ఇజి బానె కూడితి మహికార్ వరిజ్ బతిమాలితార్. 43 మీటిజ్ ఆతి వెనుక నండోండార్ యూదురు, నండోండార్ యూద మతమ్దు కూడితి యూదురు ఆఇ బక్తి మన్నికార్ పవులుని బర్బు వెట సాహాన్. పవులు, బర్బు వరివెట వర్గితార్. దేవుణు మిజి తోర్సి దయాదర్మమ్దిజ్ డిసివిండ ఎలాకాలం నడిదు ఇజి పవులుని బర్బు వరిజ్ ఉసార్ కిబిస్తార్.

44 మరి వాతి విస్తాంతి దినమ్దు పట్టుమదికార్ విజేరె సాహి లెకెండ మంద లోకుర్ దేవుణు మాట వెండ్రెజ్ ఇజి యూదురు మీటిజ్ కిని ఇండ్రె కూడాజి వాతార్. 45 పవులు వెప్పి మాటెజ్ వెండ్రెజ్ మంద లోకుర్ కూడాజినికార్ ఇజి నుడేతారె యూదురు గోస ఆతార్. వారు పవులు వెప్పి మాటదిజ్ మర్జి వెప్తారె వన్నిజ్ దూసలాడితార్.

46 అయావలె పవులు, బర్బు తియెల్ ఆవిండ వెప్తార్, "దేవుణు మాట ముందాల మిజి వెప్తాజ్వలె. అందెజె మాపు ముందాల మిజి వెప్తావ్. గాని మీరు, ఎలాకాలం బత్సిని బత్సు దోహాక్కికావ్ ఆవ్ ఇజి మిజి మీరె నెక్తి పాక్తిదెరె తీర్పు కిబినిదెర్ కక మాపు మిజి డిసి యూదురు ఆఇ లోకుర్ బాన్ సాన్నినావ్.

47 దేవుణు మజి సిత్తి ఆర్త ఇనిక ఇహిజ, 'యూదురు ఆఇ వరిజ్ ఉండ్రె జాయ్ వజ మిజి ఇల్లా మన్న. ఎందనిజ్ ఇహిజ యా లోకమ్దు మన్ని విజా లోకాజ్, వరి పావమ్కాణ్ వాని సిక్చుదాన్ గెలిపెస్తెజి ఇజి వెప్తా మనాన్. 48 యూదురు ఆఇ లోకుర్ విజేరె యా మాటెజ్ వెహారె సర్గ ఆతార్. దేవుణు మాటెజ్ ఎస్సానో నెగ్గెకెజ్ ఇజి వారు వెప్తార్. ఎలాకాలం బత్సిని బత్సుదిజ్ ఏర్పాటు అతికార్ విజేరె దేవుణు మాటెజ్ నమ్మితార్. 49 దేవుణు మాట అయ దేసమ్దు విజా సాటె ఆతాద్.

50 గాని యూదురు ఆ పట్టుమ్దు బక్తి మన్ని పల్కుబడి మనికెజ్ ఆతి అయేలి కొడోక వెట, పెరికార్ ఆతి మొగవరి వెట వర్గిజి కోపం రేప్తారె పవులు ముస్కు, బర్బు ముస్కు మాలెజ్ కితారె వరిజ్ అయా పట్టుమ్దాన్ నెక్త పాక్తార్. 51 అందెజె పవులుని బర్బు, వరి కాల్యాణి దూల్లి అయ పట్టుమ్ది వరి ఎద్రు దుల్ప్తార్. ఎందనిజ్ ఇహిజ వారు దేవుణు మాట నెక్తిపాక్తిజ్ వరిజ్ వాని సిక్చు వారె తప్పిస్తార్ ఇజి సాని లెకెండ మండ్రెజ్ ఇజి. వెనుక వారు ఇకోనియ ఇని పట్టుమ్దు సాహాన్.

52 అంతియోకయాదు మన్ని సీసూర్ ఎసానో సర్గ ఆతార్. దేవుణు ఆత్మ వరి ముస్కు పూర్తి వాతాద్.

పవులు, బర్బు ఇకోనియాదు సువార్త వెప్పినార్

14 పవులుని బర్బు కూడాజి ఇకోనియాదు సాహారె అంతియోకయాదు కిత్తిలెకెండ యూదురు మీటిజ్ కిని ఇండ్రె సాహాన్. వారు నెగ్గెండ బోద వెప్తెజ్ నండోండార్ యూదురు, నండోండార్ యూదురు ఆఇకార్బా నమ్మితార్. 2 గాని నమ్మిఇకార్ యూదురు, యూదురు ఆఇ వరిజ్ రేప్తారె అపాస్టరుజ ముస్కు కోపం పుటిస్తార్. 3 గాని పవులు, బర్బు నండో రోస్కు బానె మహాన్. యేసువందిజ్ దయరమ్దాన్ వర్గితార్. వారు ప్రబు దయాదర్మమ్ వందిజ్ వెప్తి మాటెజ్ నిజం ఇజి ప్రబు విజెరిజ్ తోరిస్తాన్. ఎలాగె ఇహిజ బమ్మాతి పణిజ్ బమ్మాతి గుర్తుజ్ కిడెజ్ పవులుజ్ బర్బుజ్ సత్తు సిత్తాన్. 4 అయ పట్టుమ్దు మహి లోకుర్ రుండి గుంపుజ్ ఆతార్. సెగోండార్ యూదురు పడకాద్, మరి సెగోండార్ అపాస్టరి పడకాద్.

5 అయావలె సెగొండార్ యూదురు ఆఇకార్, మరి సెగొండార్ యూదురు, యూదురి అతికారిబు వెట కూడఃజి అపాస్తురుజ్ అసి వరిజ్ సిగు కిజి పణుకుబాణిజ్ డెయ్జి సప్తెవలె ఇజి ఒడిబిజి మహార్. 6-7 అపాస్తురు అయ సజతి నెస్తారె లుకయెనియాదు మహి లున్త్ర, దెర్బ ఇని పట్నమ్కాన్, వన్సూ సురుల మన్ని దేసమ్కాజ్ ఉమ్సాసి సాహారె అబ్బె సువార్త సాటిస్తారె.

లున్త్ర దెర్బ ఇని పట్నమ్కాజ్ సాసిసినార్

8 లున్త్ర ఇని పట్నమ్దు, నడిదెజ్ అల్ఇ సాట వాండ్లు ఒరెన్ మహన్. వాండ్లు పుట్టిబాణిజ్ మొదొల్ని సాటాదికాన్ ఆతండ్రె ఎసిజ్బా నడిదెజ్ అల్ఏండ బనినె మంజినాన్. 9 వపులు బోదిసి మహిజ్ వాండ్లు వెంజి మహన్. వపులు వన్నిజె సుడఃతిజ్ నెగెండ్ ఆన ఇజి వన్నిజ్ నమకం పుట్టినాద్ ఇజి నెస్తారె. 10 అయావలె వపులు వన్నిజ్, “నిజ్అ, నీ పాదమ్కు బూమిదు మొప్పి నిల్అ”, ఇజి డటం వెప్తాజ్ అయ సాటాదికాన్ లిట్న నిజితండ్రె డాట్టెజ్ మొదొల్స్తాన్. 11 వపులు కిత్తి బమ్మాతి పణి సుడఃతారె బాన్ మహి లోకుర్ లుకొనియ బాసాదు గగోలాతార్. “దెయమ్కు లోకు లెకెండ్ ఆతెనె మాడగు డిగ్జి వాతె”, ఇజి డటం గగోలాతార్. 12 బర్నబెజ్ బ్రుహ్సపతి ఇజి పేరు ఇట్టార్. నండ్ బోద్ వెప్తా వందిజ్ వపులు హెర్న ఇజి పేరు ఇట్టార్. 13 పట్నం వెల్లి మహి బ్రుహ్సపతి గుడిది పుజేరి వాతండ్రె డాకుజ్, పూబుదండ్రె అస్తాండ్రె పట్నం వెల్లి మహి సేహ్లా డగు తత్తాన్. మంద లోకు కూడఃజి వాతారె పూజ కినాట్ ఇజి అయ పుజేరిని, కూడితి మహి లోకుర్ ఒడిబిజితార్. 14 బర్నబని వపులు యాక నెస్తారె వారు కిని పణిదిజ్ ఒప్పుకొడఃఎప్ ఇజి తోరిసిని వందిజ్ వరి సాక్కెజ్ పాతెజ్ కిస్తారె లోకురి నడిమిదు ఉమ్సాక్కి సాహారె డటం వెప్తార్. 15 “తంబెరిజాండ్, మీరు ఎందనిజ్ ఈహు కిజినిదెర్? మాపుబా మీ నన్ని లోకునె. మీరు యా పణిదిజ్ రెఇకెజ్ డిసిసిజి ఆగాసం, బూమి, నమ్దరం, బాన్ మన్ని విజా వనకాజ్ పుటిస్తె బత్తిజి మంజిని దేవుణుదిజ్ నమ్మిదు ఇజి మిజి సువార్త వెప్సానాప్. 16 గడ్డిఃస్తి కాలమ్దు విజా జాతిజ్ వరిజ్ వరిజ్ ఇస్టమాతి వన్సూజ్ పాగిడిజి మాడిస్టెజ్ దేవుణు డిఃస్ట సిత్తాన్. 17 అహిజ్బా దేవుణు ఆగాసమ్దాన్ మిజి పేరు, ఎమెణివేల పంట అయావలె కనికారం ఆజి సీజినాన్. తక్కు సిల్లెండ బోజనం సీజినాన్. మీ మన్సుదిజ్ సర్త కిబిసి పాస కిజినాన్. ఈహు వాండ్లు ఎలాగ మహి దేవుణు ఇజి లోకాజ్ తోరిస్తాన్”. 18 అపాస్తురు యాలెకెండ్ వెప్తాజ్బా వారు విరిజ్ పూజ కివిండ ఆదెజ్ ఇజి లోకురిజ్ అడ్లు కిదెజ్ గొప్ప కస్టం ఆతాద్. 19 అయావలె అంతియొకయాదాన్, ఇకొనియాదాన్ సెగొండార్ యూదురు వాతారె వరి మాటెబాణిజ్ నండ్ లోకాజ్ వరి పడఃకాదు కూడుఃప్తారె. కూడుఃప్తారె, వపులు ముస్సు పణుకుజ్ డెయ్తారె. వాండ్లు సాతాన్ ఇజి ఒడిబిజితారె పట్నం వెల్లి వన్నిజ్ ఈడ్డిస్తారె బానె డిఃస్తారె. 20 గాని సిసూర్ వన్ని సురుల కూడితి మహివలె వపులు నిజితండ్రె పట్నమ్ లొఇ మర్జి సాహాన్. మహ్నా నాండిజ్ వపులు, బర్నబ కూడితారె దెర్బ ఇని పట్నమ్దు సాహార్.

వపులుని బర్నబ సిరియాదు మన్ని అంతియొకయాదు మర్జి సాహార్

21 వపులుని బర్నబ దెర్బ ఇని పట్నమ్దు సువార్త బోదిస్తారె. నండ్ లోకుర్ యేసుప్రబుజ్ నమ్మితారె. వెనుక వపులుని బర్నబ, లున్త్ర, ఇకొనియ, అంతియొకయాదు మర్జి వాతార్. 22 వాతారె, ఎమెణి పట్నమ్ది వరిజ్ బానె సిసూరిజ్ ఉసార్ కిబిస్తారె. “మీ నమకం డిఃనీండ మండ్లు. మాటు నండ్ మాతెజ్ ఓరిసి దేవుణు రాజెమ్దు సాండ్రెజ్ వలె”, ఇజి మరి మరి పణిసి వెప్తార్. 23 వపులు, బర్నబ విజా సజమ్కాజ్ పెద్దెల్జ ఏర్పాటు కితారె ఉపాన్ మంజి పార్దనం కిజి, వారు నమ్మితి దేవుణుదిజ్ వరిజ్ ఒపజెప్తారె. 24 వెనుక పిసిదియ దేసెం డాట్టారె పంపులియాదు వాతార్. 25 పెర్గ ఇనిబాన్ దేవుణు మాటెజ్ బోదిసి వెనుక అతలియ పట్నమ్దు డిగ్జి సాహార్. 26 అబ్బెణిజ్ ఓడః ఎక్తారె వారు మొదొహి సొత్తి సాహి అంతియొకయాదు మర్జి వాతార్. యా అంతియొకయాదునె దేవుణు పణిపందిజ్, వన్ని దయాదర్నమ్దిజ్ ఒపజెపె ఆతారె. అయ పణి వీస్తారె ఏలు బానె మర్జి వాతార్. 27 మర్జి వాతారె సజమ్ది వరిజ్ విజెరిజ్ కూడుఃప్తారె, దేవుణు వరి వెలెనె కిత్తి పణిజ్ విజా వెప్తార్. యూదురు ఆఇకార్ దేవుణుదిజ్ నమ్మిదెజ్ వాండ్లు ఎలాగ సరి సిత్తాన్ ఇజి వెప్తార్. 28 వారు నండ్ కాలం బానె మంజి సిసూరి వెట బత్తిత్తారె.

అపాస్తురు, పెద్దెలుబు ఆలోసనం కిదెజ్ యెరూసలేమ్దు కూడఃజి వాతార్

15 సెగొండార్ యూదయ దేసెమ్దికార్ అంతియొకయాదు వాతార్. వారు అబ్బె మన్ని లోకాజ్ ఈహు నెస్పిస్తెజ్ మొదొల్స్తారె. ఇనిక ఇహిబ మోసి సిత్తి రూలు వజ సునతి కిబె ఆవిండ మహిబ మీరు సిక్కుదాన్ గెలిస్తెజ్ అల్ఇదెర్ ఇజి నెస్పిస్తారె. 2 వపులుని బర్నబ యా సజతి వందిజ్ కూడితారె యూదయ దేసెమ్ది వరివెట నండ్ వర్గిజి ఆహె తర్కిస్తారె. అందెజె యా మాటెజ్ వందిజ్ వపులు, బర్నబ, వరివెట అంతియొకయ దేసెమ్దు మన్ని మరి సెగొండార్ ఎక్కు యెరూసలేమ్దు సాన్ని అబ్బె మన్ని అపాస్తురుబు, పెద్దెల్జ డగు సాండ్రెజ్ వలె ఇజి తీర్మానం ఆతారె. 3 ఆహె అయ సజమ్ది లోకుర్ వరిజ్ పాక్తార్. వారు పినెకె, సమరియ ఇని దేసెమ్క సరి సాహారె బానె మహి వరివెట యూదురు ఆఇకార్ దేవుణు దరోట్ మహ్తా వాతారె దేవుణుదిజ్ నమ్మిజినార్ ఇజి విజా వెప్తారె సాహార్. అబ్బె మహి నమ్మితికార్ యాక వెహారె గొప్ప సర్త ఆతారె. 4 వారు యెరూసలేమ్దు వాతివలె సజమ్దికార్, పెద్దెలుబు, అపాస్తురు విజెరె వరిజ్ గవరం సీజి బనె కిత్తారె. దేవుణు వరివెట కిత్తి పణిజ్ వందిజ్ విజా వారు వెప్తార్. 5 గాని బాన్ వరిసయరు ఇని జుటుదు మహి నమ్మితికార్ సెగొండార్ నిజిజె వెప్తార్, “నమ్మిత్తి వరి లొఇ యూదురు ఆఇ లోకుర్ సునతి కిబె ఆదెజ్ వలె. మోసి సిత్తి రూలుదు మన్ని ఆడెజ్ విజా వారు ఒప్పుకొడఃజి ఆహె కిదెజ్వలె ఇజి మాటు వరిజ్ వెప్తాజ్వలె”, ఇజి వెప్తార్. 6 అయావలె అపాస్తురు, పెద్దెలుబు యా సజతి వందిజ్ ఆలోసనం కిదెజ్ కూడఃజి వాతార్. 7 నండ్ తర్కిసి వెనుక పేతురు నిజితండ్రె వరివెట ఈహు వెప్తాన్. “తంబెరిజాండ్, సెగం కాలమ్కాజ్ ముందొల్నై † యూదురు ఆఇ లోకాజ్ సువార్త వెప్తాజ్ మీ నడిమిహానె దేవుణు నజి ఏర్పాటు కిత్తాన్ ఇజి మీరు నెసినిదెర్.

ఎందనిజ్ ఇహిజ వారుబా దేవుణు మాట వెంజి దేవుణుదిజ్ నమ్మిడెజ్. 8 లోకు ఒడిబనికెజ్ విజా నెసిని దేవుణు, దేవుణుదిజ్ నమ్మితి యూదురు ఆఇ లోకాజ్బా వన్నిబాన్ కూడుఁపాన్ ఇజి తోరిస్తాన్. ఎలాగ తోరిస్తాన్ ఇహిజ మజి సీత్తివజనె యూదురు ఆఇ లోకాజ్బా దేవుణు వన్ని ఆత్మ సీత్తాన్. 9 యూదురు ఆతి మజిని ఆఇ లోకుర్ ఆతి వరిజ్ ఇని తేడ సిల్లెండ దేవుణు ఉండ్రె వజని కిత్తాన్. ఎలాగ ఇహిజ వారు నమ్మితిజ్ వరి మన్నుదు మన్ని పావమ్కు విజా లాగితండ్రె సుబరం కిత్తాన్. 10 అహిజ, మాపు గాని, మా అనిగొగొర్ గాని పిండిదెజ్ అట్ఇ బరుదిజ్ ఎందనిజ్ యా నమ్మితి వరి మున్ను మొప్పినిదెర్? ఆహి మీరు కిత్తిజ మీరు దేవుణుదిజ్ కోపం రేప్పినిదెర్. 11 గాని ప్రబు ఆతి యేసు దయాదర్మమదానె మాటు గెలిస్తమనాట్ ఇజి మాటు నమ్మిజినాట్. అయావజనె వారుబా గెల్స్త మనార్”, ఇహాన్.

12 ఆఇ జాతి లోకుర్ నడిఁమి దేవుణు వరివెట కిత్తి గొప్ప బమ్మతి వణిజ వందిజ్ గొప్ప బమ్మతి గుర్తుజ వందిజ్ పవులు, బర్లుబ వెప్తిజ్, అబ్బె మహి లోకుర్ విజేరె జమ్న అలెతారె వెహార్. 13 వారు వెప్తి పీస్తి వెనుక యాకోబు ఈహు వెప్తాన్. “తంబెరిజాండె, నా మాట నెగ్రెండ వెండ్రు. 14 ఆఇ జాతి లోకుర్ వెట దేవుణు ముందాలై దయ తోరిస్తాన్. అక్క ఎలాగ ఇహిజ వరి బాణిజ్ ఉండ్రె జటు వన్ని సాంత లోకు వజ ఏర్పాటు కిడెజ్ దేవుణు వరిజ్ దయ తోరిస్తాన్. అక్క విజా పేతురు యెలె వెప్తా మనాన్. 15 ప్రవక్తరు ముందాలై వెప్తికెజ్ యాకదె. ఇని తేడ సిల్లెద్. వారు ముందాలై వెప్తి మాట ఇనిక ఇహిజ.

16 “దిన్ని వెనుక నాను మర్జి వాజి దావీదురాజుది అర్తి సాహి ఇల్లు తొప్ప. లాగ్లి వినీర్జి దన్నిజ్ నాను మర్జి తొప్పి దన్నిజ్ నాను ముందాల్ మహిలెకండ్రె కిని. 17-18 అయావలె ఆఇ జాతి లోకుర్ విజేరె నజి రెబానార్లె. ఆఇ జాతి లోకుర్ బాణిజ్ నా పేరు అస్తెజ్ నాను ఏర్పాటు కిత్తికార్ విజేరె నజి రెబానార్లె ఇజి దేవుణునె వెప్పినాన్”, “యాక నండొ కాలమ్కాజ్ ముందాలై దేవుణు వెప్తా మనాన్”.

19 యాకోబు మరి వెప్తాన్, “నా మన్నుదు ఇనిక ఇహిజ, దేవుణు దరోట్ మహి వాతి ఆఇ జాతి లోకురిజ్ మాటు మాలెజ్ కినిక ఆవద్. 20 మాటు వరిజ్ ఉండ్రె ఉత్తం రాసి ఫాక్తెజ్. అబ్బె ఇనిక రాన్జె ఇహిజ, బొమ్మెజ్ పూజ సిత్తి కండ తినిక ఆవద్. అక్క సెఇక. సాని బూలానిక ఆవద్. గొత్తిక పిడిక్కి సప్తిక తినిక ఆవద్. నల తినిక ఆవద్. యాక విజా డిఁసిసీదెజ్. అక్కెజె. మరి ఇనిక సిల్లెద్. 21 ఎందనిజ్ ఇహిజ యాక విజా రాన్తిమని మోసి సిత్తి రూలుజ్ ప్రతి విస్తాంతి దినమ్దు, నండొ కాలమ్కాణిజ్ † యూదురు మీటిజ్ కిని ఇల్కాజ్ సదివిజి మంజినాద్. మోసి వెప్తి మాటెజ్ విజా పట్టుమ్దు బోదిసి మంజినాద్, అందెజె వన్కాజ్ విజా వారు లోబడెదెజ్”, ఇజి వెప్తాన్.

అపొస్తురు ఉండ్రె ఉత్తం రాన్తి ఫాక్తార్

22 అయావలె అపొస్తురు, పెద్దెలుజు, సజమ్దికార్ విజేరె కూడిఁతారె నమ్మిత్తి వరిలోఇహాన్ సెగొండారిజ్ ఏర్పాటు కిజి పవులుని బర్లుబవెట అంతియొకయాదు ఫాక్తెజ్ ఇజి తెగిస్తార్. వారు బర్లుబ ఇని మరి ఉండ్రె పేరు మన్ని యూద వన్నిజ్, సీలెజ్ ఏర్పాటు కిత్తార్. యూదని, సీల రిఎర్. అయ సజమ్దు ముకెలమతికార్.

23 వరివెట సజమ్దికార్ ఉండ్రె ఉత్తం రాన్తి ఫాక్తార్. అబ్బె ఇనిక రాన్తి మనాద్ ఇహిజ, ‘మీ దాదీసీర్ ఆతి అపొస్తురు, పెద్దెలుజు, అంతియొకయాదు, సిరియాదు, కిలికియాదు మన్ని దేవుణుదిజ్ నమ్మిత్తి యూదురు ఆఇ జాతిజ విజేరిజ్ వందనమ్కు ఫాక్కినార్. 24 సెగొండార్ మా డగ్రుహాన్ సాహారె వరి బోదదాన్ మజి మాలెజ్ కిత్తార్, మీ మన్నుజ విజా బాద కిత్తార్ ఇజి మాపు నెప్తాప్. గాని వరిజ్ మాపు ఫాక్వీతాప్, ఇని అతికారంబా సివీతాప్. 25-26 అందెజె, మా యేసు ప్రబు వందిజ్ పాణం సాపుదిజ్ ఒపజెప్పి మా ప్రీయమాతి బర్లుబ, పవులు ఇని వరివెట మా డగ్రుహాన్ సెగొండారిజ్ మీ బాన్ ఫాక్వాన్ ఇజి మాపు ఉండ్రె మన్ను ఆత మనాప్. 27 అందెజె మాపు యూద, సీల ఇని రిఎరిజ్ ఫాక్కినాప్. వారు వాజి మాపు రాన్తి మాటనె వెప్పార్. 28-29 మిజి అవ్సరం ఆతి ఆడ్రెజ్ ఇనికెజ్ ఇహిజ, దెయమ్కాజ్ పూజ కిత్తికెజ్ తిన్కాట్. నల తిన్కాట్. గొత్తిక పిడిక్కి సప్తివనకాజ్ తిన్కాట్. సాని బూలాదెజ్ ఆవద్. యా పణిజ్ కిప్పండ మీరు దూరం మహిజ మిజిని నెగద్. మిజి అవ్సరం ఆతి యా ఆడ్రెజ్ ఆవంద మరి నండొ ఆడ్రెజ్ వెప్పి మీ మున్ను బరు ఇడ్డిక ఆవద్ ఇజి దేవుణు ఆత్మని, మాపు ఉండ్రె మన్ను ఆజినాప్. మిజి మా వందనమ్కు.

30 అయావలె సజమ్దికార్ సెల్వ సిత్తిజ్ వారు సోత్తారె డిఁగు అంతియొకయాదు వాతార్. బానె నమ్మిత్తి వరిజ్ విజెరిజ్ కూడుఁపారె ఉత్తం సీతార్. 31 వారు అయ ఉత్తం సద్వితారె డటం సర్ల ఆతార్. ఎందనిజ్ ఇహిజ అయ ఉత్తం వరిజ్ దయరం కిత్తార్. 32 యూద, సీల రిఎర్ దేవుణు మాటెజ్ వెప్పికార్. అందెజె వారు దేవుణు మాటెజ్ నండొ వెప్పి అబ్బె మహి దాద్గిరిజ్ తంబెరిసిరిజ్ దయరం వెప్పి ఇడ్డార్. అక్క వెంజి వరి మన్నుదు బలం ఆతార్. 33-34 వారు అబ్బె సెగం రొస్సు గడఁపారె. వెనుక, బానె మహి నమ్మితికార్ వరిజ్ యెరూసలేమ్దు వరిజ్ ఫాక్తి వరిబాన్ మర్జి ఫాక్తార్. “దేవుణు సమదనం మీబాన్ మనీద్”, ఇహారె ఫాక్తార్. 35 గాని పవులుని బర్లుబ అంతియొకయాదు మహారె మరి నండొ లోకుర్ వెట దేవుణు మాటెజ్ బోదిసి సువార్త వెప్పి మహార్.

మార్కు వందిజ్ పవులుని బర్లుబ గొడఁబ ఆతార్

36 సెగం రొస్సు ఆతి వెనుక పవులు బర్లుబెజ్, “ఏలు సానాటె మాటు దేవుణు మాట వెప్తి విజా పట్టుమ్కాజ్ మన్ని తంబెరిజు విజేరె ఎలాగ మనారొ ఇజి సూణ సానాట్ ఇజి వెప్తాన్. 37 అయావలె మార్కు ఇజి ఆఇ పేరు మన్ని యోహానుజ్ వరివెట కూక్కి ఒత్తెజ్ బర్లుబ ఇష్టం ఆతాన్. 38 గాని మార్కుజ్ వరివెట ఒత్తెజ్ ఆవద్ ఇజి పవులు వెప్తాన్. ఎందనిజ్ ఇహిజ మార్కు ముందాలె వరివెట పణిదిజ్ సాహిజ్ పూర్తి టయం మన్వీండ పంపులియదు వరిజ్ డిఁస్స సాహాన్.

39 మార్కు వందిజ్ పవులుని బర్లుబ నండొ గొడఁబ ఆతారె రియూజ సాహార్. బర్లుబ మార్కుజ్ వెట ఒత్తండ్రె ఓడఁ ఎక్కి కూపు ఇని ద్విప్పుదు సాహార్. 40 గాని పవులు సీలెజ్ కూక్కి ఒతాన్. బాన్ మహి తంబెరిజు వారు రిఎరిజ్ దేవుణు దయాదర్మమదెజ్ ఒపజెప్తారె వరిజ్ ఫాక్తార్. 41 వారు సోత్తారె సిరియ కిలికియ పట్టుమ్కాజ్ మన్ని సజమ్కాజ్ సాహార్. బానె దేవుణు మున్ను నమకం ఇడ్డివరి నమకం సత్తు కిబిస్తార్.

† యూదురు ఆఇవరివెట సాన్ని సువార్త వెప్తిజ్ దేవుణు పేతురువెట వెప్తి కతవందిజ్ అపొస్తురు కిత్తి వణిజ్ 10:1-1; 1:18. దు సద్విదు. † నండొ కాలం ఇహిజ, రమరమి 200 వంటెజాణిజ్ 300 వంటెజ్ దాక.

వపులుని సీల వెట తిమోతి కూడఃజినాన్

16 వపులు, సీల వెట దెర్బ, లున్త్ర ఇని పట్నమ్కాణ్ వాతాన్. అబ్బె తిమోతి ఇనికాన్ ఒరెన్ యేసుప్రబుజ్ నమ్మిత్తికాన్ మహాన్. వన్ని అయ్సిబా నమకం ఇల్లా మహాద్. అది యూద జాతిదికాద్. వన్ని బుబ్బు ఆఇ జాతిదికాన్. వాండ్రు గ్రీసు దేసెమ్దికాన్. 2 తిమోతి వందిజ్ లున్త్రదు, ఇకొనియాదు నమ్మిత్తికార్ వాండ్రు గొప్ప పేరు మన్నికాన్, ఇజి పాగ్డిఃతార్.

3 తిమోతిజ్ వన్నివెట ఒతెజ్ ఇజి వపులు ఆన ఆతండ్రై వన్నిజ్ సునతి కిబిస్తాన్. ఎందనిజ్ ఇహిజ వన్ని బుబ్బు ఆఇ జాతిదికాన్ ఇజి అబ్బె మహి యూదురు విజేరె నెస్త మహార్. 4 వారు పట్నమ్కాణిజ్ సాన్ని మహిజ్, యేసుప్రబుజ్ నమ్మిత్తికార్ ఎలాగ నడిఃదెజ్ ఇజి యెరూసలేమ్దు మన్ని అపాస్తరు, పెద్దెలుబు ఏర్పాటు కిత్తి ఆడ్రెజ్ బోదిస్తారె అక్కెజ్ లోజిదెజ్ ఇజి వెప్తార్. 5 ఆహా సజమ్దు మన్నివరి నమకం లావు పిరితాద్. వరి లెక్క రోజా రోజా లావు ఆజి మహాద్.

వపులు మసిదోనియ దేసెమ్ది వన్నిజ్ దర్సనమ్దు సుడఃజినాన్

6 ఆనియ ప్రాంతమ్దు దేవుణు మాటెజ్ వెప్పిక ఆవద్ ఇజి దేవుణు ఆత్మ వరిజ్ అడ్డు కిత్తిజ్ వారు వ్రుగియ, గలతీయ దేసెమ్కాణిజ్ సాహార్. 7 అయావలె ముసియ బెతనియ డగ్రు వాతారె బెతనియ సాండ్రెజ్ ఇజి సుడఃతార్. గాని బాన్ సాండ్రెజ్ యేసుప్రబు ఆత్మ వరిజ్ సరి సిపితాన్.

8 అందెజె వారు ముసియ ప్రాంతం డాట్టారె డిఃగు నమ్దరం డగ్రు మని త్రోయ ఇని పట్నమ్దు సాహార్. 9 అయ పాదోయ్ వపులు, బాన్ మహిజ్, ఉండ్రై దర్సనం సుడఃతాన్. అక్క ఇనిక ఇహిజ మసిదోనియ దేసెమ్దికాన్ ఒరెన్ నిల్పి, "సిను మసిదోనియాదు వాజి మజి సాయం కిల", ఇజి బతిమాలితి వజ దర్సనం సుడఃతాన్. 10 వపులు అయా దర్సనం వాతిజ్, మాపు వెటనె మసిదోనియ సాండ్రెజ్ తయారె ఆతాన్. ఎందనిజ్ ఇహిజ, మసిదోనియాది వరిజ్ దేవుణు సువార్త వెప్పి వందిజ్ దేవుణు మజి కూక్త మనాన్ ఇజి మాపు నెస్తాన్.

లుదియ యేసుప్రబుజ్ నమ్మిజినాద్

11 మాపు త్రోయ పట్నమ్దాన్ ఓడః ఎక్తాపె తినాజ్ నమొత్త ఇని ద్విప్పుదు సాహాప్. మహ్న నాండిజ్ నెయపాలి ఇని పట్నమ్దు అందితాన్. 12 అబ్బెణిజ్ పిలిప్పి ఇని పట్నం వాతాప్. మసిదోనియ దేసెమ్దు పిలిప్పి పట్నం ఉండ్రై ముకలమాతి పట్నం. అక్క నండోండార్ రోమాదికార్ బత్తిజి మహి పట్నం. మాపు సెగం రోస్సు ఆ పట్నమ్దు మహాప్.

13 విస్తాంతి దినమ్దు మాపు పట్నం వెల్లి వాతాపె గడ్డ ఒడ్డు దరోట్ యూదురు పార్దనం కిని బాడ్డి మనాద్సు ఇజి వాతాప్. వాతిజ్, బాన్ బస్తాపె కూడఃజి వాతి మహి అయిలి కొడఃకెవెల వర్దిదెజ్ మొదొల్స్తాన్. 14 అయావలె లుదియ ఇని ఉండ్రై అయిలి కొడః వెంజి మహాద్. అది తుయతయర్ పట్నమ్దికాద్. అది లావు దరది ఊద రంగుది పాతెజ్ పార్కికాద్. అది దేవుణుదిజ్ పార్దనం కినికాద్. దేవుణు మాటెజ్ అర్దం కిదెజ్ దేవుణు బుద్ది సిత్తిజ్ అది వపులు వెప్పి మాటెజ్ మన్నుదు ఇడఃతాదె అయావజనె నడిఃతాద్. 15 అది, దన్ని ఇండ్రొణికార్, విజేరె బాప్తీసం లాగ ఆతార్. వెనుక అది, "నాను దేవుణుదిజ్ పూర్తి నమ్మిజిన ఇజి మీరు ఒప్పుకోటిజ నా ఇండ్రొ వాజి మండ్రు", ఇజి మజి బతిమాలితాద్.

వపులుజ్ సీలెజ్ జెలిలోఇ ఇడ్డార్

16 ఒరైండు మాపు పార్దనం కిని బాడ్డిదు సాన్ని మహిజ్ ఉండ్రై వెట్టిపణి కిని ఇజిరి అయిలి మా ఎద్రు వాతాద్. దన్నిజ్ వుతాన్ † ఇని దెయం అస్త మహాద్. అది జాతకం వెప్పి దన్ని ఎజామాసురిజ్ నండొ డబ్బు గణపిస్తాద్. 17 అది వపులుని మజి వెనుక వాజి డటం గగోల్ ఆజి వెప్తాద్, "యా లోకుర్, విజెరిజ్ ఇంక పెరి దేవుణుదిజ్ సేవ కినికార్. దేవుణు ఎలాగ మిజి గెల్పిస్తానై ఇజి వీరు వెహ్సార్లై" ఇహాద్. 18 నండొ రోస్సు అది ఆహా కిజి మహిజ్, వపులు మన్నుదు గొప్ప బాద ఆతండ్రై అయ దెయమ్దిజ్ "సిను యా ఇజిరి దన్నిజ్ డిఃసి సాన్ల ఇజి యేసుక్రీస్తు అతికారమ్దాన్ వెహసిన", ఇజి వెప్తాన్. వెటనె అయ దెయం అయిలిదిజ్ డిఃస్త సాహాద్.

19 గాని దన్ని ఎజామానిరు వరిజ్ వాని డబ్బు విజా సాహా ఇజి సుడఃతారె వపులు సీలెజ్ పట్నం నడిఃమి, అతికారిజ డగ్రు ఈడిఃసి తతార్. 20-21 కోర్టు నడిఃపినిని వరిబాన్ తతారె, "వీరు యూదురు. వీరు బోదిసిని అలవాటుజ్ మజి పడఃఇకెజ్. మాటు రోమాదికాట్. మాటు అక్కెజ్ ఒప్పుకోణిక ఆవద్, అయావజనె నడిఃనిక ఆవద్. మా పట్నమ్దు వీరు గొప్ప కలిబిలి కిజినార్", ఇజి వెప్తార్.

22 అయావలె బాన్ కూడిఃతి మహి లోకుర్ విజేరె వపులుజ్, సీలెజ్ ఎద్రు వాతారె నింద మొవ్తారె గగోల్ ఆతార్. వరి సాక్కెజ్ లాగ్జి వరిజ్ డెయ్యు ఇజి కోర్టు నడిఃపినికార్ ఆడ్రై సితార్. 23 వారు లావు దెబ్బెజ్ డెయ్యారె వపులు సీలెజ్ జెలి లొఇ ఇడ్డార్. "వరిజ్ జాగర్త సుడఃదు", ఇజి జెలి ఎజామానిజ్ ఆడ్రై సితార్.

24 అయ ఆడ్రై వాతిజ్ జెలి ఎజామాని వరిజ్ జెలిదు లొఇ మన్ని గదిదు వరి కాల్యాజ్ డుకేజె లొఇ తొహ్తోండ్రై ఇట్టాన్. 25 రమారమి మదరయెతు వపులుని సీల దేవుణుదిజ్ పార్దనం కిజి పాటెజ్ పార్జి మహార్. వీరు పార్జి మహిజ్ జెలిదు తోహా ఆతి మహికార్ విజేరె వెంజి మహార్. 26 అయావలె వెటనె బూమి విజా డటం కద్దితాదె అయ జెలి పునాదిజ్ విజా కద్దితె. వెటనె సేఫ్లాజ్ విజా రే ఆతె. జెలిదు మహివరి విజెరి కట్టు ఊడిఃతె. 27 అయ జెలి ఎజామాని తెలి ఆతండ్రై జెలిది సేఫ్లాజ్ విజా రే ఆతిమనిక సుడఃతాన్. సుడఃతండ్రై జెలిదు మహికార్ ఉహ్కా సాహార్ ఇజి ఒడిఃబిజి కుర్ల లాగితండ్రై వన్నిజ్ వాండ్రు గుత్తె ఆజి సాదెజ్ తయారె ఆతాన్. 28 అయావలె వపులు, "సిను ఇని కూనిబా కిబె ఆమ. మాప్ విజెపె ఇబ్బెనె మనాప్", ఇజి డటం గగోల్ ఆజి వెప్తాన్.

29 అయ జెలి ఎజామాని, దీవ తగ్గల ఇజి వెప్పి లొఇ ఉహ్కా వాతాండ్రై వణకి వపులు సీలారి పాదమ్కాజ్ డగ్రు అర్తాన్. 30 వాండ్రు వపులుజ్ సీలెజ్ వెల్లి తతాండ్రై వెన్బాతాన్, "బాబురాండె, నాను తప్ప ఆదెజ్ ఇహిజ ఏలు ఇనిక కిదెజ్?".

† వుతాన్ ఇని దెయం యా అయిలిదిజ్ వాని కాలమ్దు జగ్గిని సజతిజవందిజ్ నెప్పిని మహాద్. అక్క వెప్పిజ్ లోకుర్ దన్నిజ్ డబ్బు సీజి మహార్

31 “యేసువులు మున్ను నమకం ఇట్టిజ, అయావలె నీను నీ ఇండ్రోణికార్ విజిదెరె తప్పె ఆనిదెర్”, ఇజి పవులు సీల వెహ్టార్. 32 వవులుని సీల వన్నిజ్, వన్ని ఇండ్రోణి వరిజ్ యేసువులు వందిజ్ సువార్త వెహ్టార్. 33 ఆ పాదోయ్ అయా గడియాయుని వాండ్రు పవులుని సీలెజ్ ఒతాండ్రె వరి దెబ్బెజ్ నొహ్టాన్. వెటనె వాండ్రు, వన్ని ఇండ్రోణికార్ విజెరె బొప్పిసం లాగె ఆతార్. 34 వాండ్రు పవులుజ్ని సీలెజ్ వన్ని ఇండ్రో కూక్కి తసి బోజనం సిత్తాన్. దేవుణు మున్ను నమకం ఇట్టి వందిజ్ వాండ్రు వన్ని ఇండ్రోణికార్ విజెరె నండ్రా సర్ల ఆతార్.

35 పెండల కోర్టు నడిపిసినికార్, “అయ లోకాజ్ డిస్టు”, ఇజి ఆడ్ర సిత్తారె జమాన్జ జెలి ఎజమానిబాన్ ఫాక్టార్. 36 జేలి ఎజమాని అయ మాటెజ్ పవులు వెహ్టాన్. “మిజి డిస్టు ఇజి కోర్టు నడిపిసినికార్ ఆడ్ర ఫాక్ట మనార్. మీరు ఏలు జమ్న సాండ్రు”, ఇజి వెహ్టాన్.

37 గాని పవులు, “మాపు వగ్గిదెజ్ అవకాసం సివండ వారు తీరపు కిజి విజెరె ముండాల డెయ్యార్. మాపు రోమాదిజ్ అక్కు మనికాప్ ఇహిజ్బా మజి జెలిదు ఇట్టార్. ఏలు మజి ఎయెర్బా నెస్వండ ఫాక్టెజ్ నుడెజినార్. మాపు ఒవ్వమ్. వారె వాజి మజి వెల్లి తసి ఫాక్టెజ్”, ఇజి జమానుజ్ వెహ్టాన్. 38 యా మాటెజ్ అయ జమానుజ్ కోర్టు నడిపిసిని వరిజ్ వెహ్టార్. పవులుని సీల రోమాదిజ్ అక్కు మనికార్ ఇజి వెహరె వారు తియెల్ ఆతార్. 39 అయ కోర్టు నడిపిసినికార్ వాతారె పవులుజ్, సీలెజ్ సెమ లొస్తారె జెలిదాన్ వెల్లి కూక్కి తత్తారె ‘పట్టుం డిసి సాండ్రు’ ఇజి వరిజ్ వెహ్టా ఫాక్టార్. 40 వారు జెలిదాన్ వెల్లి వాతారె లుదియబాన్ సాహార్. అబ్బె నమ్మిత్తివరి వెట వర్గిజి వరిజ్ ఆదరిస్తారె వరి నమకందిజ్ సత్తు కిజిసి దయెరమ్ మున్ను మండ్రు ఇజి వెహ్టార్. వెనుక వారు బాణిజ్ సాత్త సాహార్.

పవులు తెనలొనికదు సాహాన్

17 అయావలె పవులుని సీల పిలిప్పి పట్టుమ్దాన్ సాత్తారె అంపిపాలి, అపాలొనియ పట్టుమ్కు డాట్టి దెనలొనిక † ఇని పట్టుమ్దు వాతార్. అబ్బె యూదురు మీటిజ్ కిని ఇల్లు ఉండ్రె మహాద్. 2 పవులు, వాండ్రు ఒజ ఆతి లెకెండ్రె యూదురి మీటిజ్ కిని ఇండ్రో సాహాన్. సాహాండ్రె, బానె మహి వరివెట మూండ్రె విస్తారె దిసమ్కు దేవుణు మాట వెప్పిమహాన్. ఇనిక ఇహిజ, 3 “క్రీస్తు ఇనికాన్ మాలెజ్ ఆజి సానాన్లె. సాజి మర్జి నిజ్నాన్లె ఇజి ప్రవక్తరు రాస్తిక దేవుణు మాటాదు మనార్. అయ లెకెండ్రె జగ్గిదెజె. నాను మీ వెట సాటిసి వెప్పి యా యేసువులునె క్రీస్తు”. యా మాటెజాణిజ్ నదివిజి వెప్పి సిత్తాన్. 4 యూదురు - లొఇహాన్ సెగొండార్ పవులు వెహ్టా మాటెజ్ ఒప్పుకోలారె పవులుని సీల వెట కూడితార్. బక్తి మన్ని గ్రీకు జాతిదికార్ నండ్రాండార్, ముకెలమాతి అయెలికొడొక్ నండ్రాండెక్బా వరివెట కూడితార్.

5 అహిజ యూదురు గోస ఆతార్. గోస ఆతారె ఇని వణి సిల్లెండ్రె తిరిగిని సెఇ లోకాజ్ సర్దుహాన్ కూడుఘారె మండెజ్ ఆజి పట్టుమ్దు కలిబిలి కిజి యాసాను ఇని వన్ని ఇండ్రో సాహార్. ఇండ్రోణి సేహ్లాదిజ్ డెయెత ఫాక్టారె పవులుని సీలెజ్ లోకుర్ నడిమి అసి తనాట్ ఇజి లొఇ డుఃగితార్. 6 గాని పవులుజ్ని సీలెజ్ తోర్వెతారకాక యాసానుజ్ మరి నమ్మిత్తి వరిజ్ సెగొండారిజ్ పట్టుం అతికారిజు డగ్రు లాగిత తత్తార్. “వీరు, యా లోకం విజా కలిబిలి కినికార్, ఇబ్బెబా వాత మనార్. 7 వరిజ్ యా యాసాను వన్ని ఇండ్రో ఇట్టా మహాన్. వీరు విజెరె యేసు ఇజి మరి ఒరెన్ రాజా మనాన్ ఇజి వెప్పి కయెనరు రూలుజ లొజివండ నడిపినార్”, ఇజి డటం గగ్గలాజి వెహ్టార్. 8 యాక వెహరె లోకుర్, పట్టుం అతికారిజు గొప్ప కలిబిలి ఆతార్. 9 అతికారిజు యాసాను బాణిజ్, అయ నమ్మిత్తి వరి బాణిజ్ డబ్బు తొప్పిస్తారె వరిజ్ డిస్ట సిత్తార్.

పవులు బెరెయాదు సాహాన్

10 సీకటి అతిజ్ వెటనె నమ్మిత్తికార్ పవులుజ్, సీలెజ్ బెరెయ ఇని బాడ్డిదు ఫాక్టార్. వారు బానె వాతారె యూదురు మీటిజ్ కిని ఇండ్రో సాహార్. 11 బెరెయాదు మహికార్ తెనలొనికదు మహి వరిలెకెండ్రె ఆవర్. వారు గొప్ప ఆనదాన్ దేవుణు మాటెజ్ వెహరె వనక వందిజ్ ఒడిబిజి మహార్. పవులుని సీల వెప్పి మహి సజతిజ్ నిజమ్నెనొ ఆవెదొ ఇజి వారు రోజా దేవుణు మాటాదు నుడెజి నదివిజి మహార్. 12 అండెజె వరి లొఇ నండ్రాండార్ యూదురు నమ్మిత్తార్. నండ్రాండార్ గ్రీసు జాతిది వరి లొఇ వల్లుబడిజి మన్ని అయెలి కొడొక్కినె మొగకొడొక్కి నమ్మిత్తార్. 13 గాని బెరెయాదుబా పవులు దేవుణు మాటెజ్ సాటిసినాన్ ఇజి తెనలొనికదు మన్ని యూదురు నెస్తారె బాణిజ్ వాతారె బెరెయా లోకాజ్ కోవం పుటిస్తారె కలిబిలి కిత్తార్.

14 అయావలె నమ్మిత్తికార్ పవులుజ్ వెటనె సమ్దరం డగ్రు సాన్ల ఇజి ఫాక్టార్. గాని సీలని, తిమోతి బెరెయాదునె నిహా మహార్. 15 పవులుజ్ ఫాక్టెజ్ సాహికార్ ఏదెన్ను †† పట్టుమ్దాకాన ఒతార్. సీల, తిమోతి వెటనె నా బాన్ రద్దు ఇజి కల్లు సితండ్రె పవులు వరిజ్ మప్పి ఫాక్టాన్.

పవులు ఏదెన్ను పట్టుమ్దు సాహాన్

16 పవులు ఏదెన్ను పట్టుమ్దు సీలెజ్ తిమోతిజ్ ఎద్దు నుడెజి మహాన్. మహిజ్ అయ పట్టుమ్దు వారు మాడిస్తి మహి దెయమ్కాణి బొమ్మెజ్ †నండ్రా మహిజ్ అక్కెజ్ నుడెజి మన్నుదు నండ్రా బాద ఆతాన్. 17 అయావలె యూదురు మీటిజ్ కిని ఇండ్రో సాహాండ్రె యూదురు వెట, బక్తి మన్ని యూదురు ఆఇ వరివెట పవులు వాదిస్తాన్. రోజా రోజా సత సహ్లా కూడిజి వాతి వరివెట వాదిసి మహాన్. 18 అబ్బె లాపు నద్వితి మన్నికార్ ఎపికూరియ జటుదికార్ సెగొండార్ † స్తాయికుల లోకుర్ లొఇ సెగొండార్ మహార్. వారు పవులు వెట వాదిస్తారె. సెగొండార్, యా బడాకి ఇనిక వెప్పినాన్ ఇజి వెహ్టార్. యేసువులు వందిజ్, సాతికార్ మర్జి నిజ్ని వందిజ్ పవులు నెప్పిస్తిజ్ అబ్బె మరి సెగొండార్ వీండ్రు ఆఇ దెయమ్కాజ్ వందిజ్ వెప్పినాన్ ఇజి వెహ్టార్. 19 వారు పవులు అరెయెపగు ఇని సర్దుదు లాగిత తత్తారె, “నీను వెప్పిని యా కొత్త మాట ఎలాగ మర్కాదొ, మాపుబా నెస్టెజ్ ఆనాదా? 20 నీను సెగం కొత్త మాటెజ్ వెప్పిని. అక్కెజ్ మాపు ఎసెజ్బా

† దెనలొనిక పట్టుం మసిదొనియ దేసమ్దు మహాద్. రోమదేసమ్దిజ్ రాజదాని ఆతాద్ యా పట్టుం. నండ్రా అస్తి మహాద్ బాన్. నండ్రాండార్ రోమ్ లోకుర్ని యూదురు బాన్ బత్తిజి మహార్
 †† ఏలు ఏదెన్ను పట్టుం గ్రీకు దేసమ్ది ముకెలమాతి పట్టుం † యా బొమ్మెజ్ అయ పట్టుమ్దికార్ మాడిస్తిమహి దెయమ్కలెకెండ్రె తోరితె †† ఎపికూరియ లోకుర్, స్తాయికుల లోకుర్. వీరు గ్రీకుజాతిలొఇ ఎక్కు నద్వితి లోకుర్. ఎపికూరియ లోకుర్ ఎపికురు ఇని ఒరెన్వన్ని బోదెజ్ వజ నడిపినార్. వన్ని బోద ఇనిక ఇహిజ, ఒడొలెదిజ్ మన్నుదిజ్ సర్ల కిజిసి బత్తిదెజె ఇజి మా బత్తుది ఉదెనం ఇజి. స్తాయికుల లోకుర్ ఇహిజ జెన్ ఇనివన్ని బోదెజ్ వజ నడిపినార్. బత్తుదు ఇనిక జగ్గితిజ్బా జర్గిసిద్ ఇజి వాండ్రు బోదిస్తాన్. బాగ ఆలోసనం కిజిని వారు విజా సూణార్

వెన్ ఇకెజ్. వన్కా అర్లం ఇనికాదొ ఇజి నెన్జె మాపు కోరిజినావ్", ఇజి వెహ్. 21 ఆ ఏదెన్ను పట్టుమ్దికార్ విజేరె, అబ్బె బత్తిజి మహి ఏదెన్ను పట్టుమ్దికార్ ఆఇకారబా ఇనికాదొ ఉండ్రీ కొత్త మాట విని వందిజ్, వర్గిని వందిజ్ లావు ఇష్టమాజి వరి సమయం విజా బానె గడప్పి మహర్.

22 అయావలె పవులు అరెయెపగు సద్దుదు నిహండ్రె ఈహు వెహ్, "ఏదెన్ను పట్టుమ్దికెదెరా, మీరు విజా వణిజ లోఇ గొప్పు బక్తి మన్నుకిదెర్ ఇజి నజీ తోరిజినాద్. 23 ఎందనిజ్ ఇహిజ నాను బూలాజి బూలాజి మీ బొమ్మెజ నెగ్రెండ సుడేజి మహిజ్ ఉండ్రీ మాలి పీట సుడేజి. దన్ని మున్ను 'నెన్ ఇ దెయమ్దిజ్' ఇజి రాస్త మనాద్. అందెజి మీరు నెన్ ఏండ ఇని దన్నిజ్ మాడిసినిదెరొ దన్ని వందిజ్ నాను మిజీ బోదిసిన్", ఇజి వెహ్.

24 పవులు మరి వెహ్, "యా బూ లోకమ్దిజ్, దన్ని లోఇ మన్ని విజావ నకాజ్, దేవుణునె పుటిస్తాన్. అయ దేవుణునె పరలోకమ్దిజ్, బూమిదిజ్ ప్రబు ఆత మనాన్. అయ దేవుణు లోకు తొప్పి గుడిఁదు బత్తివన్. 25 దేవుణునె విజా లోకాజ్ తక్కు, పాణం, విజా సీజినాన్. దేవుణుదిజ్ ఇనికబా తక్కు ఆవండ మన్ ఏద్. అందెజ్ లోకు వన్నజ్ ఇనికబా సీదెజ్ అవనరం సిల్లెద్. 26 దేవుణు ఒరెన్ వన్ని వెట విజా జాతి లోకాజ్ పుటిస్తాన్. ఎందనిజ్ ఇహిజ యా బూలోకం మున్ను విజాబాన్ బత్తిని వందిజ్ పుటిస్తాన్. వారు ఎంబె బత్తిదెజ్ ఇజి, ఎమేణి కాలమ్దు బత్తిదెజ్ ఇజి దేవుణు ముందాల్నె ఏర్పాటు కిత మనాన్. 27 ఎందనిజ్ ఇహిజ ఉండ్రీ వేలా వారు నజీ రెబాజి వానార్పు ఇజి ఇక్కెజ్ విజా దేవుణు ఏర్పాటు కిత్రాన్. దేవుణు మా డగ్రహాన్ దూరం మంజినికాన్ ఆవన్. 28 మాటు దేవుణు వెటనె బత్తినాట్, దేవుణు వెటనె నడిసినిట్, దేవుణు వెటనె మంజినాట్. మీ లోఇ పాటెజ్ రాస్సికార్ వెహ్విజ 'మాటు దేవుణు కొడొఁరె'.

29 అందెజి మాటు దేవుణు కొడొఁరె ఆతిజ్, లోకు, వరి మన్నుదు మన్ని ఆలోననం వజ, వారు నెస్తిమన్ని పణి వజ బజారమ్దాన్, వెండిదాన్, పణుకుజాణ్ తయార్ కిత్ర బొమ్మెజ వజ దేవుణు మనాన్ ఇజి ఒడిఁబిదెజ్ ఆవద్. 30 నస్తివలె మాటు నెన్ ఏండ మహివలె దేవుణు అక్క సుడేతిజ్ బా సుడేఇ లెకండ్రె డిఁస్తాన్. ఏలు ఇహిజ ఎంబెబా వరినె, విజేరె లోకుర్ వరి పావమ్కు డిఁసిసీజి దేవుణుబాన్ రద్దు ఇజి దేవుణు ఆడ్ర సీజినాన్. 31 ఎందనిజ్ ఇహిజ, దేవుణు విజేరె లోకాజ్ నీతినిజుద్దాన్ తీర్పు కిదెజ్ ఉండ్రీ రోజా ఏర్పాటు కిత మనాన్. అయా రోజా దేవుణు ఏర్పాటు కిత్తి ఒరెన్ లోకువెట తీర్పు తీరిస్తాన్. దేవుణు ఆ లోకుదిజ్ సాపుదాన్ మర్జి నిక్త మనాన్. ఎందనిజ్ నిక్తాన్ ఇహిజ ఆ లోకుదిజ్ తీర్పు కిదెజ్ అతికారం మనాద్ ఇజి విజేరిజ్ రుజాన్ కిదెజ్".

32 లోకు సాజి మర్జి నిజ్ని వందిజ్ వెహ్ వరి లోఇ సెగొండార్ కరాయితార్. గాని మరి సెగొండార్ "దిన్ని వందిజ్ మరి వెహ్, వెనావ్", ఇజి పవులుజ్ వెహ్. 33 ఆహి మహిజ్ పవులు వరిబాణిజ్ సాహ్. 34 అహిజ సెగొండార్ పవులు వెహ్ మాటెజ్ నమ్మిత్రారె వన్ని వెట కూడిఁతార్. పవులు వెట కూడిఁతి మహి వరి లోఇ అరెయెపగు సద్దుదికాన్ ఒరెన్ దియెనుసియు, దమరి ఇని ఉండ్రీ అయ్లి కొడొఁ, మరి సెగొండార్ మహర్.

పవులు కొరింతు పట్టుమ్దు సువార్త వెహ్నినాన్

18 వెనుక, పవులు ఏదెన్ను పట్టుమ్దాన్ సోతాండ్రె కొరింతు ఇని పట్టుం సాహ్. అయ కొరింతు పట్టుమ్దు సాహిజ్ బానె పాంతు దేసెమ్దికాన్ అక్కుల ఇని ఒరెన్ యూదు వన్నిజ్ని వన్ని అల్లి ఆతి ప్రిస్కిలదిజ్ సుడేఁతాన్. 2 యూదురు విజేరె రోమ పట్టుం డిఁసి సాండ్రెజ్ వలె ఇజి క్షుద్దియ ఇని రోమ పరిరాజా ఆడ్ర సిత్తాన్. ఆడ్ర సిత్తిజ్ యా అల్లి మాసిర్ ఇటలి దేసెం డిఁస్తారె కొరింతు పట్టుమ్దు కొత్తాజ్ వాతార్. పవులు వరిజ్ సుడేఁదెజ్ సాహ్. 3 పవులు వరివెట బత్తిజి వరివెట కూడిఁజి పణి కిత్రాన్. ఎందనిజ్ ఇహిజ వారుని పవులు టంబుజ్ గుత్తికార్. 4 ప్రతి విస్తాంతి దినమ్దు పవులు యూదురు మీటిజ్ కిని ఇండ్రె సాహ్ండ్రె, యూదురు వెట, గ్రీసు వరివెట తర్కిని వెహ్ని వాండ్రు వెహ్వికెజ్ నిజం ఇజి ఒపిని మహ్. 5 సీలని తిమోతి మసిదోనియదాన్ వాతారె పవులు వెట కూడిఁతార్. అయావలె పవులు పూర్తి టయం దేవుణు మాటెజ్ బోదిసి మహ్. యేసునె క్రీస్తు ఇజి యూదురుజ డటిని సాని వెహ్ని మహ్. 6 పవులు వెహ్ మాటెజ్ యూదురు నెక్తపాక్తారె పవులుజ్ దుసలాడిఁతార్. అయావలె పవులు, "దేవుణు మిజీ సిక్సనీత్తిజి అక్క మీరె మీ మున్ను తపిసినిదెర్. దిన్ని వందిజ్ నా బాన్ తప్పు సిల్లెద్. ఇబ్బెహ్ నాను యూదురు ఆఇ వరిబాన్ సానానె దేవుణు మాటెజ్ నెస్తిస్తాలె", ఇజి వెహ్ండ్రె, సాక్కెజ దూల్లి దుల్వ్హాన్.

7 పవులు యూదురు మీటిజ్ కిని ఇండ్రెహాన్ సోతాండ్రె పడెఁకాద్ మహి తీతియు యూస్తు ఇని వన్ని ఇండ్రె సాహ్. తీతియు దేవుణుదిజ్ పార్దనం కినికాన్. వన్ని ఇల్లు యూదురు మీటిజ్ కిని ఇల్లు డగ్రునె మహ్. 8 యూదురి మీటిజ్ ఇల్లు నడిఁపినికాన్ ఆతి క్రీస్తు, వన్ని ఇండ్రెఁజికార్ విజేరె యేసుప్రబుజ్ నమ్మిత్రార్. మరి కొరింతు పట్టుమ్దికార్ నండొండ్రెబా దేవుణు మాట వెహ్రె నమ్మిత్రారె బాప్తినం లాగె ఆతార్. 9 ఒరెనెండ్రె పాదొయ్, దర్ననమ్దు యేసుప్రబు, "సిను తియెల్ ఆవండ వర్గిల. అలెజి మన్. 10 ఎందనిజ్ ఇహిజ నాను నీవెటనె మంజిన. నిజీ పాడు కిదెజ్ నీ మున్ను ఎయెన్బా రెవన్. ఎందనిజ్ ఇహిజ యా పట్టుమ్దు నాలోకుర్ నండొండ్రె మనార్", ఇజి పవులుజ్ వెహ్. 11 అందెజి పవులు దేవుణు మాటెజ్ నెస్తిని వరి నడిఁటు ఉండ్రీ ఏండుని ఆరు నెలెజ్ దాక మహ్. 12 గాని గలియాసు ఇనికాన్ అయ అకాయ దేసెమ్దిజ్ ఏలుబడి కినికాన్ ఆతివలె యూదురు ఉండ్రె జటు ఆతారె పవులు మున్ను వాతార్. పవులుజ్ అస్తారె కోర్టుదు ఒతార్. 13 వారు పవులు మున్ను పిరాద్ కిత్రాన్. ఇనిక ఇహిజ, "దేవుణుదిజ్ ఎలాగె పార్దనం కిదెజ్ ఇజి మజీ మన్ని రూలుదిజ్ ఎదిరినెహ్ని పిండ్రు ఒపిని మారిస్సిలెకండ్రె వెహ్నినాన్" 14 పవులు వర్గిదెజ్ సుడేఁతాన్. అయావలె గలియాసు యూదురిజ్ ఈహు వెహ్, "యూదురాండ్రె, ఇక్క ఉండ్రీ తప్పు పణి వందిజ్ ఇహిజ, ఉండ్రీ సెఇ పణి వందిజ్ ఇహిజ నాను మీమాటెజ్ నెగ్రెండ వెండ్రెజ్ ఆనాద్. 15 గాని ఇక్క ఇనికాదొ ఉండ్రీ మాటవందిజ్, పేర్కువందిజ్, మీ రూలుజ్ వందిజ్ తర్కిస్తెజ్ ఇహిజ మీరె వన్నిజ్ సుడేఁదు. నిన్ని నజతిజ వందిజ్ తీర్పు తీర్పెజ్ నజీ ఇష్టం సిల్లెద్", ఇజి యూదురు వెట వెహ్. 16 ఈహు వెహ్ండ్రె వరిజ్ కోర్టుదాన్ పేర్తాన్. 17 అయావలె విజేరె కూడిఁతారె యూదురి మీటిజ్ ఇల్లు నడిఁపినికాన్ ఆతి సాస్టెనేసు ఇనివన్నిజ్ అస్తారె కోర్టు డగ్రు తత్తారె డెయ్. అహిజ్బా గలియాసు యా సజతిజ వందిజ్ ఇనికబా ఇన్వతాన్.

ప్రిస్కిలని అక్కుల

18 పవులు దేవుణువెట మొకిత మహాన్కాక అక్క వీస్తివలె బుర్ కత్రె ఆతాన్. కొరింతు పట్టుమ్దు మరి నండ్రె రోస్సు మంజి వెనుక నమ్మిత్తివరిబాణిజ్ సెలవ లోస్తాండ్రె సాహ్. కెంక్రెయాదు సాహరె బుర్ కత్రె ఆతాన్. బాణిజ్ ఓడె ఎక్తాండ్రె సిరియ ఇని దేసెమ్దిజ్ ప్రిస్కిల, అక్కుల వెట సాహ్.

19 వారు ఎవను పట్టుమీదు వాతార్. ప్రిస్టిల అకులరిజ్ డిసిని పవులు సానివలె వీరు యా పట్టుమీదున మంజినార్. పవులు ఇహిజ ఒరెండ్రె బానె మహి యూదురి మీటిజ్ ఇండ్రె సాహాన్. సాహాండ్రె యూదురు వెట తర్కిసి వర్గిజి మహాన్. 20 సెగం రోస్కుమా వెట మన్ల ఇజి యూదురు పవులు వెన్బాతిజ్ పవులు కెవతాన్. 21 వరిజ్ డిసిని సాహివలె, "దేవుణు ఇష్టం ఇహిజ మీ డగ్రు మరజి వాన", ఇజి వెహ్తాండ్రె సాత్రాన్. ఓడః ఎక్తాండ్రె ఎపెసుదాన్ సాహాన్. 22 కయ్సరియాదు అందితాండ్రె పవులు యెరూసలేం పట్టుమీదు ఎక్త సాహాన్. బానె మహి సజమదివరిజ్ సుడిః సాహాన్. వెనుక అంతియాయాదు సాహాన్. 23 బానె సెగం కాలం మహి వెనుక సాతాండ్రె గలతియ వ్రుగియ ఇని దేసమ్కాణిజ్ వర్గు బూలాతాండ్రె నమ్మితి వరిజ్ నెస్సిస్తాన్. దేవుణుదిజ్ డిసినిండ నెగ్రెండ మండ్రు ఇజి వెహ్సి వరిజ్ దయరం సిత్తాన్.

అపాలొ ఇనికాన్

24 అయావలె అలక్సంతియదికాన్ అపాలొ ఇని ఒరెన్ యూదవాండ్రు ఎపెసు పట్టుమీదు వాతాన్. వాండ్రు గొప్ప సద్వితికాన్. దేవుణు మాటదు రాస్తిమన్నికెజ్ విజా బాగ నెస్తిమనికాన్. దేవుణు మాట నెగ్రెండ వర్గిదెజ్ వాండ్రు అటూన్. 25 వాండ్రు యేసు ప్రబువందిజ్ నెగ్రెండ సురీకుదాన్ నెస్పిస్తాన్. ఎలాగ బల్కిదెజ్ ఇజి యేసుప్రులు నెస్పిస్తి మాటెజ్ వాండ్రు నెస్తాన్. గాని యాహాను లోకాజ్ సిత్తి బాప్తిసం వందిజె వాండ్రు నెస్త మహాన్. 26 యూదురు మీటిజ్ కిని ఇండ్రె దయ్సరమ్దాన్ దేవుణు మాటెజ్ వర్గితాన్. ప్రిస్టిల అక్కుల విన్ని మాటెజ్ వెహరె విన్నిజ్ వరి ఇండ్రె కూక్త ఒత్తార్. ఒత్తారె దేవుణు వరిజ్ సిత్తి సువార్త వందిజ్ వీండ్రు నెస్ఇ వనకవందిజ్ వన్నిజ్ నెస్పిస్తాన్. 27 వెనుక అపాలొ అకాయ దేసమ్దు సాండ్రెజ్ సుడెఃతిజ్, ఎపెసుదు మన్ని నమ్మితికార్, నీను సాన్ల ఇజి వెహ్సి, అక్కాయాదు మహి నమ్మితివరిజ్, 'విన్నిజ్ మీ వెట కూడుఃప్రు' ఇజి ఉత్తం రాస్తాన్. వాండ్రు అబ్బె సాహాండ్రె దేవుణు దయూదర్మమ్దాన్ నమ్మితి వరిజ్ నండొ సాయం కిత్తాన్. 28 విజెరె కూడిఃతి మహి బాడ్డిదు అపాలొ యూదురువెట వాదిస్తాండ్రె వరి వాదం తప్పు ఇజి గటిజ వెహ్తాన్. యేసునె క్రీస్తు ఇజి దేవుణు మాటదు రాస్తికెజ్ వెహ్సి రుజువ్ కిత్తాన్.

పవులు ఎపెసు పట్టుమీదు యేసువందిజ్ వెహ్సినాన్

19 అపాలొ కొరింతు పట్టుమీదు మహివలె పవులు, ముస్సుమన్ని దేసమ్ది నాహ్కాణిజ్ బూలాజి సువార్త వెహ్సి ఎపెసు పట్టుమీదు వాతాన్. బాన్ సెగొండార్ సిసూరిజ్ సుడెఃతాన్. 2 "వీరు నమ్మిత్తివలె దేవుణు ఆత్మ సత్తు మీ ముస్సు వాతాదా సిల్లెదా?", ఇజి వరిజ్ వెన్బాతాన్. వెన్బాతిజ్ సిల్లెద్, దేవుణు ఆత్మ మనాద్ ఇజి మాస్ ఎనెజ్బా నెస్వన్, ఇజి వారు వెహ్తార్. 3 దన్నిజ్ పవులు, "వీరు ఎమేణి బాప్తిసం లాగ ఆతిదెర్", ఇజి వెన్బాతిజ్, "మాపు యాహాను సిత్తినన్ని బాప్తిసం లాగ ఆతావ్" ఇహార్. 4 పవులు మరి వెహ్తాన్, "వాపమ్కు ఒప్పుకొడెఃజి డిస్పివరిజె యాహాను బాప్తిసం సిత్తాన్. నా వెనుక వాని యేసు ముస్సు నమకం ఇడమ్", ఇజి వెహ్తాండ్రె బాప్తిసం సిత్తాన్. 5 యాక వెహరె వారు యేసుప్రులు పేరు అస్తారె బాప్తిసం లాగ ఆతార్. 6 పవులు వరి ముస్సు కికు ఇడ్డిజ్ దేవుణు ఆత్మ వరి ముస్సు వాతాద్. వాతిజ్, వారు వరిజ్ నెస్ఇ ఆఇ బాసెజ్ వర్గితార్. దేవుణుబాణిజ్ వాతి మాటెజ్ వెహ్తాజ్ మొదొల్స్తాన్. 7 వారు డగ్రుడగ్రు వన్నెండు మణిసిర్ మొగకొడెఃర్ మహార్.

8 పవులు అయ ఎపెసు పట్టుమీదు మన్ని యూదురి మీటిజ్ ఇండ్రె సాహాండ్రె దేవుణు ఏలుబడిః వందిజ్ తర్కిసి వర్గిజి వరిజ్ ఒప్పుకొడిఃసి దయ్సరమ్దాన్ వర్గితాన్. అహా మూండ్రె నెలెజ్ బానె మహాన్. 9 గాని సెగొండార్ గర్త ఆజి అసల నమ్మివ్తార్. వారు పవులు వెహ్సి సువార్త వందిజ్ విజెరి ముండాల దుసలాడిఃజి వర్గితార్. అందెజె పవులు వరిజ్ డిసిని నమ్మితి వరిజ్ వన్నివెట ఒతండ్రె రోజా రోజా తురాను ఇని ఒరెన్ వన్ని బడిః ఇండ్రె నెస్పిస్త మహాన్. 10 రుండి వంటెజ్ దాక పవులు యాలెకండ్రె వెహ్సిసిత్తిమహిజ్ అయ ఆనియ ప్రాంతమ్దు బల్కిజిని యూదురు, యూదురు ఆఇకార్, విజెరె దేవుణు మాట వెహర్. 11 దేవుణు పవులువెట ఒడ్డె గొప్ప బమ్మూతి వణిజ్ జర్గిస్తాన్. 12 వన్ని తువాలిజ్, నడుఃముదు తొహ్సి కలు జబ్బు మన్నివరి డగ్రు తత్తిజ్ వారు నెగెండ ఆతార్. దెయమ్కు విజా డిఃస్సి సాహె.

13 అయావలె యూదురు లోఇ సెగొండార్ మోటిగురుజ్ బూలాజి దెయమ్కాజ్ పేర్జి మహార్. దెయమ్కాజ్ పేర్జె నెస్తికార్ వారు. వారు యేసుప్రులు పేరు అసి దెయమ్కాజ్ పేర్జె సుడెఃతార్. "పవులు వెహ్సి యేసు సత్తుదాన్ వెహ్సిన, నీను విన్నిజ్ డిసిని సాన్ల ఇజి నాను ఆడ్ర సీజిన", ఇజి వారు దెయమ్కాజ్ అస్తి వరిజ్ వెహ్సి మహార్. 14 స్పెవ ఇని ఒరెన్ యూదపెరిపుజెరి మరిసిర్ ఏడుగురు యా లెకండ్రె దెయమ్కాజ్ పేర్దెజ్ సుడెఃజి మహార్. 15 గాని ఆ దెయం వరివెట, "నాను యేసుజ్ నెస్సా, పవులు నెసిన, గాని మీరు ఎయిదెర్?", ఇజి వెన్బాతాన్. 16 అయ దెయం అస్తిమహికాన్ వరిముస్సు ఎగ్రితాండ్రె విజెరిజ్ అడిఃగి అర్హాండ్రె గెలిస్తాన్. వరి పాతెజ్ కిస్త విసిర్తాండ్రె గొప్ప దెబ్బెజ్ డెయ్తాన్. అందెజె వారు ఏడుగురు లోకుర్ డుమ్డ ఆతారె దెబ్బెజ్ తాక్తిజ్ అయ ఇండ్రెణిజ్ సాత్తారె ఉహ్కార్. 17 అయ ఎపెసు పట్టుమీదు మహి విజెరె యూదురు, యూదురు ఆఇ జాతిదికార్ యాక వెహరె గొప్ప తియెలాతార్. యేసుప్రులు పేరుదిజ్ గొప్ప గవరం సిత్తార్. 18 కొత్తజ్ నమ్మితికార్ నండొండార్ వాతారె వారు కిత్తి సెఇ వణిజ్ విజా విజెరి ముండాల వెహ్తారె ఒప్పుకొటార్. 19 కొత్తజ్ నమ్మితి సెట్టివణికినికార్ నండొండార్ మంత్రమ్కు రాస్తిమని వరి పుస్తకమ్కు తత్తారె విజెరి ముండాల అక్కజ్ సుర్తార్. వారు లెక్కు సుడెఃతిజ్ వనక దర యబాయ్ వెయ్జ్ వెండిరుపాయిజ్ నాతె. 20 ఈహు దేవుణు - మాట విజాబాన్ సాటె ఆతాదె నండొండార్ నమ్మితికార్ ఆతార్.

21 ఇక్కెజ్ విజా జర్గితి వెనుక పవులు మనిదోనియ అకాయ ఇని దేసమ్కాజ్ సాన్ని దేవుణు సజమ్కాజ్ సుడిః సాన్ని వెనుక బాణిజ్ యెరూసలేం పట్టుమీదుబా సాండ్రెజ్వలె ఇజి ఒడిఃఒడిఃబితాన్. వెనుక రోమ్ పట్టుమీదుబా సాండ్రెజ్వలె ఇజి ఒడిఃబితాన్. 22 వన్నివెట కూడెఃజి వణి కిజిమహి తిమోతి, ఎరాస్తు ఇనివరిజ్ మనిదోనియాదు పొక్తాండ్రె పవులు సెగం కాలం ఆనియ ప్రాంతమ్దు బల్కితాన్.

† ఉండ్రె వెండి రుపాయి ఉండ్రె రోజాది కూలి

ఎవను పట్నమ్ము గొడబ జర్జితాద్

23 అయ కాలమ్ము యేసువ్రబు మున్కు లోకుర్ నమకం ఇట్టి వందిజ్ ఉండ్రె గొప్పు గొడబ వాతాద్. 24 ఇక్క ఎలాగ ఇహిజ, దెమెత్రి ఇని ఒరెన్ సరాబు మహాన్. వాండ్రు వెండిదాన్ అర్తెమి ఇని దెయమ్దిజ్ ఇండ్రో ఇడ్డి ఇజిరి గుడిజ్ † తయార్ కినికాన్. యా దెమెత్రిజ్, వన్నివెట మహి సరాబురిజ్ విజెరిజ్ యా పణిదాన్ నండో లాబం దోహొక్కి మహాద్. 25 యా దెమెత్రి యా పణికినివరిజ్, వరిలెకండో ఆఇవణిజ్ కిని వరిజ్ బా కూడుఃవ్రాండ్రె ఈహు వెహొన్, "బాబురాండ్రె, యా పణిదాన్ ఎక్కు ఆస్తి మజి వానాద్ ఇజి మీరు నెసినిదెర్ గదె. 26 గాని కికాణిజ్ తయార్ కినికెజ్ దెయమ్ముకు ఆఉ ఇజి యా పవులు వెహొన్, ఎవను పట్నమ్ము ఉండ్రె ఆవద్, అసియ ప్రాంతమ్ముది విజాబాణిలెకండో నండోందారిజ్ నమ్మిసి మహాన్. ఇక మీరు సుడఃజినిదెర్. వెంజినిదెర్. 27 ఏలు గొప్పు ప్రమాదం ఆజినాద్. మా పణి వందిజ్ మన్ని నెగ్గి పేరు పాడానాద్. అక్కాదె ఆవండ పేరి దెయమాతి యా అర్తెమి దెయమ్ముది గుడిబా ఎయెరిజ్ బా అవ్ సరం సిల్లెండ ఆనాద్. అసియ దేసమ్దికార్ విజెరి, బూలోకం విజా వూజ కిని యా అర్తెమి దెయమ్ముది గొప్పు పేరు సిల్లెండ ఆనాద్", ఇజి యా దెమెత్రి వరివెట వెహొన్.

28 యాక వెహొరె వారు గొప్పు కోపం ఆతారె, "ఎవనుదికార్ వూజకిని అర్తెమి దెయం గొప్పు పేరి దెయం", ఇజి గొప్పు గగోల్ ఆతారె. 29 అయ పట్నమ్ము గొప్పు కలిబిలి ఆతాద్. వారు ఉండ్రె మన్ను ఆతారె పవులువెట బూలాజి మహి మసిదోన్ - యాదికార్ గాయి, అరిస్తర్కు ఇని రిపిరిజ్ అస్తారె అయ పట్నమ్ము మన్ని పేరి సద్దుదు †† లాగిత ఒతారె. 30 మంద కూడితి మహి అయ సద్దుదు సాండ్రెజ్ ఇజి పవులు ఒడిఃఒడిఃబితాన్. గాని నమ్మితికార్ వన్నిజ్ సరి సిపితారె. 31 పవులు కూలయెర్ ఆతి అయ అసియ ప్రాంతమ్ముది అతికారి లోకుర్ సెగొండారెబా లోకుర్ కూడిఃజివాతిమహిబాన్ సాన్మా ఇజి కల్లు పోకారె బతిమాళితారె.

32 అయ సద్దుదు గొప్పు కలిబిలి జర్జితాద్. సెగొండారె అహు వెహొన్, మరి సెగొండారె ఈహు వెహొన్ గగోల్ ఆతారె. గాని వారు ఇని దన్నిజ్ కూడిఃత మనారె ఇజి నండో లోకుర్ నెసిపితారె. 33 యూదురు అలెక్జెండర్ ఇనివన్నిజ్, విజెరి వందిజ్ సిని వర్గిల ఇజి లోకుర్ నడిఃమిహాన్ ముందాల నిల్వారె. అలెజి మండ్రు ఇజి వాండ్రు కియు సాస్తాండ్రె ఉండ్రె మాట †వెహొన్ ఇజి సుడఃజి మహాన్. 34 గాని వాండ్రు యూద వాండ్రు ఇజి నెస్తారె వారు రుండి గంటెజ్ దాక, 'ఎవనువరి అర్తెమి దెయం గొప్పు దెయం' ఇజి ఉండ్రెలెకండో గగోల్ ఆతారె. 35 అయావలె అయ పట్నం కర్ణం †† వాతాండ్రె లోకాజ్ విజెరిజ్ గగోల్ ఆవండ మండ్రు ఇజి వెహొన్. "ఎవను పట్నమ్ముదికెరా, మాపు అర్తెమి పేరి దెయమ్ముది గుడిదిజ్ కాన్ కినికాన్ ఇజి విజెరి నెసినారె గదె. ఆగానమ్దాన్ అర్తి అర్తెమి దెయమ్ముది పణుకుదిజ్ బా కాపు కినికార్ మాపె ఇజి విజెరి నెసినారె గదె. 36 యా సజతిజ విజా ఎద్రిసినిక ఆవద్. అహిజ మీరు ఏలు అలెజి మండ్రెజ్ వలె. ఇనికబా గజిబిజి ఆజి కిడెజ్ ఆవద్. 37 మీరు యా లోకాజ్ లాగితి తత్తిదెర్. గాని పీరు గుడిఃజ డెజ కినికార్ ఆవద్. మా దెయమ్ముదిజ్ దుసలాడివర్. 38 దెమెత్రిజ్, వన్నివెట కూడిఃతి మహి పణిమణిసిరిజ్ ఎయెన్ మున్కుబా నేరం మెపైజ్ ఇహిజ, కోర్ట్టెజ్ నడిఃసిని, అతికారి లోకుర్ మనారె. బానె సాన్ని వారు ఒరెన్ మున్కు మరి ఒరెన్ నేరమ్ముకు సీడెజ్. 39 గాని మరి ఇనివందిజ్ ఇనికబా తగ్గు మహిజ అక్క రోజా జర్జిని సద్దుదు వర్గిజ తీర్పు తీరిస్తెజ్. 40 నేండ్రు జర్జితి గొడబవందిజ్ రోమ్ అతికారిజు మా మున్కు కేను పాక్చారె ఇజి నాను తియలెజిని. జర్జితి గొడబవందిజ్ వెహొజ్ ఇని మాటబా సిల్లెద్. ఎందానిజ్ ఇహిజ యావజ కూడిఃజి గగోలాజి వర్గినిదన్నిజ్ వెహొజ్ అసల కారణం సిల్లెద్", ఇజి వరివెట వెహొన్ ††. 41 వాండ్రు ఈహు వెహొన్ కూడిఃతి మహి వరిజ్ విజెరిజ్ సాండ్రు ఇజి పోక్చాన్.

పవులు మసిదోనియ గ్రీసు దేసమ్ముకాజ్ సాహాన్

20 అయ గొడబ అణస్తి వెనుక పవులు నమ్మిత్తివరిజ్ కూక్సెస్తాండ్రె వరి నమకమ్దిజ్ సత్తు కిబిస్తాన్. దయెరమ్ముమున్కు మండ్రు ఇజి వెహొన్ సెల్వ లొస్తాండ్రె మసిదోనియదు సాండ్రెజ్ సాతాన్. 2 పవులు ఆ దేసం విజా బూలాజి నమ్మిత్తి వరిజ్ సుడఃజి సాహాన్. వరి నమకమ్దిజ్ సత్తు కిబిస్తాన్. వెనుక అకాయ ఇజి కూక్కి గ్రీసు దేసమ్ము వాతాన్ 3 పవులు అబ్బె మూండ్రె నెలెజ్ మహాన్. ఓడః ఎక్కి సిరియాదు సాన ఇజి మహిజ్ యూదురు వన్నిజ్ సప్తెజ్ కుట్ల ఆజి మహాన్ ఇజి వెహొన్. అక్క నెస్తాండ్రె మసిదోనియదాన్ నడిఃజి సాన్ని అబ్బెణాన్ ఓడః ఎక్కి సాండ్రెజ్ ఒడిఃబితాన్. 4 పురు మరిసి ఆతి బెరెయ పట్నమ్ముదికాన్ సావత్తు ఇనికాన్, దెసలోనియదికార్ అరిస్తర్కు, సెకుందు ఇనికార్, దెరిబ పట్నమ్ముదికాన్ గాయి ఇనికాన్, మరి తిమాతి, అసియ దేసమ్ముదికార్ ఆతి తుకికు, త్రోము ఇనికార్ పవులు వెట సాహారె. 5 వీరు ముందాలె సాహారె త్రోయ ఇని పట్నం మా వందిజ్ సుడఃజి మహాన్ ††. 6 పులాజ్ ఆఇ రొట్టెజ వండోయ్ ఆతి వెనుక మాపు పిలిప్పి పట్నం డిఃసి ఓడః ఎక్కి అయదు రోన్కాజ్ త్రోయ ††† పట్నం వాతాప్. అబ్బె ముందాల సాహిమహివరివెట ఏడు రోన్కు మహాప్.

పవులు సాతివన్నిజ్ నిక్తాన్

7 వారమ్ముది మొదోహి రోజా †వ్రబు ఏరపాటు కిత్తి బోజనం తిండ్రెజ్ మాపు కూడిఃత వాతాప్. అయావలె పవులు మర్స నాండిజ్ సానాలె ఇజి వరిజ్ నెస్పిస్తాన్. మదరెయు - దాక నండో మాటెజ్ వర్గిజి మహాన్. 8 మాపు కూడిఃతి మహి మేడః గదిదు నండో దీవెజ్ మహా. 9 అయావలె అయ్యుకు ఇని ఒరెన్ దజ్డాఃయెన్ కిటికిదు బస్తాండ్రె వెంజిమహాన్. వెంజిమహిజ్ నిద్ర వాతాద్. పవులు లాపు సుట్టు నెస్పిస్తా మహిజ్ యా దజ్డాఃయెన్ నిద్ర లావాత్తిజ్ జోజితాండ్రె మూండ్రె అంత్రంకాణిజ్ అడిఃగి అర్తారె. పెహ్తి సుడఃతిజ్ సాత మహాన్. 10 గాని పవులు అడ్డి డిఃగితాండ్రె వన్ని మున్కు అర్సి వన్నిజ్ పాంబిజి అస్తాన్. "మీరు బాద ఆమాట్. వన్ని పాణం వన్నిలో ఇన్ మనాద్", ఇజి వరివెట వెహొన్. 11 పవులు మరి మేడఃమున్కు సాహారె రొటె రుక్కి వరివెట బోజనం కిత్తాన్. జాయానిదాక నండో మాటెజ్ వర్గిజి సాతాండ్రె సాహాన్. 12 వారు బత్తితి మహి అయ దజ్డాఃజ్ ఇండ్రో తతారె గొప్పు సర్ల ఆతారె.

† ఇజిరి గుడిజ్ ఇహిజ అర్తెమి దెయమ్ముది గుడిది ఇజిరి బొమ్మెజ్ †† సద్దు ఇహిజ స్టేడియం లెకండో మహాద్. బానె లోకు కూడిఃనారె బేసు కర్జినారె. లోకు సురుల బస్తారె. ఇరువయెలరువెయ లోకుర్ బస్టెజ్ ఆనాద్ అయ సద్దుదు. కొడఃవేలి నని గుండ్రాజ్ మనాద్ అయ సద్దు. గాని మేడః నిల్లెద్. ఎవను పట్నం నడిఃమిద్ మహాద్ యా సద్దు. † గొడఃబ కినికార్ మాపు యూదురు ఆవద్, పవులుని వన్నివెట మన్నికారె ఇజి వెహొజ్ సుడఃతాన్ †† ముకెలమాతి ఒరెన్ అతికారి †† ఎవను పట్నమ్ము మన్ని లోకుర్ వందిజ్ యా ముకెలమాతి అతికారి, రోమ్ అతికారిజు వెట వర్గినికాన్. లోకు గొడఃబ పుటిస్తెజి వరిజ్ వాని అవుకాసమ్ముకు సిల్లెండ ఆనె ††† యా పుస్తకం రాస్తీమహి లూక పవులువెట వయసం కిడెజ్ మర్జి వాతాన్ ††† మసిదోనియ దేసమ్ము మన్ని పిలిప్పి ఇనిబాణిజ్ ఓడః ఎక్కారె. గాలి వరి ఎద్దు డెయ్ తిజ్ త్రోయ అందిదెజ్ అయదు రోన్కు, అతె. సాహివలె రుండి రోన్కునె అతె మహా. 16:11 † యూదురి దినమ్ముకు లెక్క, కినిక ఎలాగ ఇహిజ సనివారం పాదోయె ఆరు గంటెజ్ కొత్త వారం మొదల్సినాద్. లూక యా పుస్తకం రాస్తీవలె యాలెకండో లెక్క, కిత్తాన్ ఇజి బయబిల్ వందిజ్ ఎక్కు, సదు కిత్తికార్ నండోందారె వెహొనారె

పవులు ఎపెను పట్నమ్ది పెద్దెలుజవెట సెలవ లొస్తాండ్రె యెరూసలేమ్దు సాహాన్.

13 పవులు అసాను ఇనిబాన్ నడిఃజి సాండ్రెజాతిజ్ మాపు వన్నిముందాల ఓడః ఎక్కి అసాను సాహాప్. పవులుజ్ బానె ఓడఃదు ఎక్నాప్ ఇజి మాపు ఒడిఃబిత్రాప్. 14 అసానుదు పవులు మా వెట కూడిఃతివలె మాపు వన్నిజ్ ఓడఃదు ఎక్కిస్తాపె మితులె ఇని బాడ్డిదు వాతాప్. 15 బాణిజ్ సాని మహ్నా నాండిజ్ కియాసు ఇని బాడ్డిజి ఎద్దు వాతాప్. మహ్నా నాండిజ్ నమోసు ఇనిబాన్ సాహాపె బాణిజ్ మహ్నా నాండిజ్ మెలితె ఇని బాడ్డిదు వాతాప్. 16 పెంతెక్కోస్తు ఇని పండాయ్ నాండిజ్ యెరూసలేమ్దు అందిదెజ్వలె ఇజి పవులు తొంత్ర ఆతాన్. ఆసియదు సాహిజ అలస్యం ఆనాద్ ఇజి ఎపెను పట్నమ్దు సాన్ఎండ తినాజ్ సాండ్రెజ్ ఒడిఃఒడిఃబిత్రాన్.

17 అందెజె పవులు మిలెతుదు అందితివలె ఎపెను పట్నమ్దు మన్ని సజమ్ది పెద్దెల్జ వన్నిబాన్ కూకోపిస్తాన్. 18 వారు వన్ని డగు వాతిజ్ పవులు వరివెట ఈహు వెప్తాన్, “నాను ఆసియదు వాతి మొదొల్ దినమ్కాజ్ ఎలాకాలం మీ నడిఃమి ఎలాగ బత్తిజి మహాన్ ఇజి మీరె నెన్నిదెర్గదె. 19 యూదురు నజి సప్తజ్ కుట్ర కిజి నజి మాలెజ్ కిత్తార్ గాని నాను గొప్పు వాండ్లు ఇజి ఒడిఃబిందె కణెరు వాక్కి దేవుణు పణి కిజి ఎలాగ మహాన్ ఇజి నిజినె తెలిదాద్. 20 సిక్నదాన్ ఎలాగ గెలిస్తెజ్ ఇని వందిజ్ అవ్సరమాతిక ఇనికబా సరినె మీలోకుర్ నడిఃమి విజెరె కూడిఃతి మహి బాడ్డిదు నాను సాటిస్త. మీ ఇల్కాజ్బా వాతానె మిజి నెన్నిస్త. 21 పావమ్కు ఒప్పుకోడఃజి డిసిసిజి, దేవుణుదిజ్ లోజిజి, మా ప్రబు ఆతి యేసుక్రీస్తు ముస్కు నమకం ఇడదు ఇజి నాను యూదురిజ్ యూదురు ఆఇ వరిజ్ సాని వెప్తా.

22 ఇదిలో, నాను దేవుణు ఆత్మదిజ్ లోజిత్తానె యెరూసలేమ్దు సాన్నిన. అబ్బె నజి ఇనిక జగ్గినాడ్లెన్ నజి తెలివద్. 23 గాని విజా పట్నమ్కాజ్బా, నజి మాలెజ్ వాజినె ఇజి, యెరూసలేమ్దు నజి జెలిదు ఇద్దార్లె ఇజి, దేవుణు ఆత్మ నజి వెప్పినాన్. 24 గాని నా పాణమ్దిజ్ నాను కండెక్బా విలవ సివ. ఎందానిజ్ ఇహిజ ప్రబు ఆతి యేసు నజి సిత్తి పణి పూర్తి కిదెజె. అయ పణి ఇనిక ఇహిజ దేవుణు దయాదర్మమ్వందిజ్ మన్ని సువార్త వందిజ్ నాను సాని వెప్తాజ్.

25 నాను బూలాజి దేవుణు ఏలుబడిః వందిజ్ మీ నడిఃమి వెప్తా గాని మీలోఇ ఎయిదెర్బా మరి నజి తొఇదెర్లె ఇజి నాను ఏలు నెన్నా. 26 గాని మీలోఇ ఎయిదెర్బా పాడాఃజి సాహిజ నా పూసి తెవితాద్ ఇజి నేండ్రు మీరె సాసిర్ అనిదెర్లె. 27 దేవుణు ఇన్టం పూర్తి నాను మిజి నెన్నిస్త. ఇనికబా డాన్వేత. 28 దేవుణు వన్ని సాంత మరిసి నల సితండ్రె సజమ్దిజ్ నమ్పాదిస్తాన్. అయ సజమ్దిజ్ మీరు బాగ కాన్కిదెజ్. దేవుణు ఆత్మ మిజి సజమ్దిజ్ సుడఃదెజ్ ఒవజెప్పిన. అయ పణిలోఇ నెగ్రెండ సుడఃదు. మీవందిజ్బా మీరు జాగర్త సుడఃదు. 29 నాను సాహి వెనుక క్రూరమాతి కార్నుకుడిఃజ్ నన్ని లోకుర్ మీలోఇ డుఃగ్నార్లె ఇజి నాను నెన్నా. వారు నమ్మితి వరి ముస్కు కనికారం తోరిన్వేర్. సజమ్దిజ్ పాడు కిసార్. 30 మీలోఇహానె సెగొండార్, నమ్మితి వరిజ్ వెకొరి మాటెజ్ వెప్పి నెగ్గి సరిదాన్ లాగ్గి సెఇ సరిదు నడిఃపిసి, వరివెట కూక్కి ఒత్తెజ్ నూణార్లె. 31 అహిజ జాగర్త మండ్రు. నాను మూండ్రె పంటెజ్ దాక రెయుపాగులు కణెరు వాక్కి నమకమ్వందిజ్ విజెరిజ్, ఒరెన్ ఒరెన్ వన్నిజ్ డిన్వేండ వెప్తా మన్న. అక్క మీరు ఒడిఃబిజి జాగర్త మండ్రు.

32 దేవుణుదిజ్ వన్ని దయాదర్మం తోరిస్తి మాటదిజ్ మిజి ఒవజెప్పిన. మీ నమకం నండొ కిదెజ్ అట్టి దేవుణు - మాటదిజ్ మిజి ఒవజెప్పిన. దేవుణుదిజ్ కేట ఆతి వరివెట మిజి అక్క సీదెజ్ అట్టి దేవుణుమాటదిజ్ మిజి ఒవజెప్పిన. 33 నాను ఎయె డబ్బుదిజ్, బజరమ్దిజ్, సాక్కెజ్ పాతెజ్ వందిజ్ ఆన ఆవత 34 నా అవ్సరమ్వందిజ్ గాని నావెట మహివరి అవ్సరమ్కు వందిజ్ గాని నా కికాజణిజె పణి కిజి బత్తిత్త ఇజి మీరు నెనిదిదెర్. 35 నాను కిత్తి విజా పణిజాజ్ మిజి నెన్పిస్తిక ఇనిక ఇహిజ మీరు డటం పణి కిజి సిల్లి వరిజ్ సాయం కిదెజ్. దిన్ని వందిజ్ యేసుప్రబు నెన్పిస్తి మాట గుర్తు కిదెజ్. అక్క ఇనిక ఇహిజ సీనివన్ని సర్ద లొన్నెవన్ని సర్ద ఇంక పెరిక.

36 పవులు ఈహు వెప్తాండ్రె ముణుకుజ్ ఊర్జి వారు విజెరె వెట పార్దనం కిత్తాన్. 37 వారు విజెరె పవులుజ్ పాంబితారె వన్నిజ్ ముద్దు కిజి లాపు అడఃబాతార్. 38 ఎందానిజ్ ఇహిజ, మీరు ఇబ్బెహాన్ నజి సుడఃఇదెర్లె ఇజి పవులు వెప్తి అయ మాటవందిజె గొప్పు దుకం ఆతార్. వారు ఓడః ఎక్కి అందు పవులు ఇట్టా వాతార్.

పవులు యెరూసలేం సాన్నినాన్

21 మాపు వరిజ్ డిసిసొత్తి వెనుక ఓడః ఎక్తాపె తినాజ్ సాన్ని కోసు ఇనిబాన్ వాతాప్. మహ్నా నాండిజ్ రోదు ఇనిబాన్ వాతాపె బాణిజ్ వతరు ఇనిబాన్ వాతాప్. 2 బానె పెనికెదిజ్ సాని ఉండ్రె ఓడః సుడఃతాపె, ఎక్తాపె సాహాప్. 3 సాహాపె కుప్త ఇని ద్విపు మా డేబ్ర పడఃకాద్ సుడఃతాప్ గాని దన్ని డేబ్ర పడఃకదాన్ తినాజ్ సిరియ దరోట్ సాహాపె, తూరు ఇనిబాన్ డిఃగితాప్. బాన్ డిఃపైజ్ ఓడఃదు సామనమ్కు మహి. 4 బాన్ సిసూరిజ్ రెబాజి సుడఃతిజ్ వరివెట కూడిఃతాపె ఏడు రోస్కు బానె మహాప్. ‘సిను యెరూసలేమ్దు సాన్యా’, ఇజి దేవుణు ఆత్మ వెప్తి లెకెండ పవులు వెప్తార్ 5-6 గాని బాణిజ్ సాండ్రెజ్ టయం ఆతివలె మాపు సొత్తాపె పయనం కిత్తాప్. నమ్మితికార్ విజెరె, అయ్లికొడఃక్, కొడఃర్, మా వెట పట్నం వెల్లిదాక ఇడ్డిః వాతార్. మాపు విజెపె నమ్దరం ఒడ్డుదు ముణుకుజ్ ఊర్జి పార్దనం కిత్తాపె ఒరెన్ వెట ఒరెన్ సెలవ లొస్తాపె ఓడః ఎక్తాప్. వారు వరి ఇండ్రొ మర్జి సాహాప్.

7 మాపు తూరుదాన్ సొత్తాపె తొలెమాయి ఇని పట్నమ్దు వాతాప్. బాన్ నమ్మితి తంబెర్సిరిజ్ సుడిః సాహాపె వరివెట ఉండ్రె రోజా మహాప్. 8 మహ్నా నాండిజ్ సొత్తాపె కయ్సరియాదు వాతాప్. బానె సువార్త వెప్పికాన్ పిలిపు ఇండ్రొ సాహాపె వన్ని ఇండ్రొ మహాప్. పిలిపు యెరూసలేమ్దు మన్ని సజమ్దు వర్పాటు కిత్తి ఏడుగురు లొఇ ఒరెన్. 9 అయా పిలిపుజ్ నాల్గురు విడ్డిః అయ్లిక్ మహి. అవిక్ దేవుణుబాణిజ్ వాని మాటెజ్ వెప్పికెజ్.

10 మాపు సెగం రోస్కు బానె మహివలె అగబు ఇని ఒరెన్ ప్రవక్త యూదయ ప్రాంతమ్దాన్ బానె వాతాన్. 11 అగబు మాపు మన్నిబాన్ వాతాండ్రె పవులు నడుముదు తొప్పి మన్ని కటు కుతాన్. కుతాండ్రె, వన్ని కికాజ్ కాల్యూజ్ అగబు తొహి ఆతాన్. తొహి ఆతండ్రె, యా కటు ఎయెర్ది ఇహిజ వన్నిజ్ యెరూసలేమ్దు మన్ని యూదురు తొప్పి ఆఇ లోకాజ్ ఒవజెప్పార్లె ఇజి దేవుణు ఆత్మ వెప్పినాన్ ఇజి యా అగబు వెప్తాన్.

12 యాక మాపు వెహాపె మాపు, బానె మహి నమ్మితికార్, పవులు వెట, “యెరూ - సలేమ్దు సాన్యా”, ఇజి బతిమాలితాప్. 13 దన్నిజ్ పవులు, “మీరు ఎందనిజ్ అడఃబాజి నజి దుకం కిబిసిదిదెర్? నా ప్రబు ఆతి యేసువందిజ్ తొహి అదెజె ఆవద్, వన్ని వందిజ్ యెరూసలేమ్దు సాదెజ్బా నాను ఒప్పుకోడఃజిన”, ఇహాన్. 14 పవులు మా మాటెజ్ ఒప్పుకోడఃఇతిజ్ మాపు అలెతాప్. దేవుణుదిజ్ ఇన్టమాతి వజ జగ్గిపిద్ ఇహాప్. 15 అయ పట్నమ్దు సెగం రోస్కు మహి వెనుక మాపు

సామనమ్కు విజా అస్తాపె ఎక్కు యెరూసలేం పట్టుమ్దు సాండ్రెజ్ సాత్తావ్. 16 కయ్సరియదాన్ సెగొండార్ సిసూర్ మా వెట వాతారె మాపు మండ్రెజ్ ఇజి ఒడిబిల్తి మ్నాసోను ఇండ్రొ మజి తతార్. మ్నాసోను కువుదికాన్. మొదోహాన్ అసి యేసుప్రబు సిసూడుః ఆతికాన్.

పవులు యెరూసలేమ్దు అందితాన్

17 మాపు యెరూసలేమ్దు వాతిజ్ నమ్మిత్తి తంబెర్సిన్ మజి సర్దదాన్ మర్యాద కిత్తార్. 18 మర్చ నాండిజ్ పవులు మా వెట యాకోబు డగ్రు సాహాన్. సజం పెద్దెలుజు విజేరె బానె మహార్. 19 పవులు వరిజ్ మాడిఃస్నాన్. వెనుక యూదురు ఆఇవరిలోఇ పవులు కిత్తి సువార్త పణిదాన్ దేవుణు జగ్గిసికెజ్ విజా పూర్తి వెప్తాన్. 20 వారు ఇక్కెజ్ వెహారె దేవుణుదిజ్ స్తుతి కిత్తార్. పవులు వెట వారు ఈహు వెప్తార్, "పవులునా, యూదురు లోఇ నమ్మిత్తికార్ నండ్రొ వెయుజ్ లోకుర్ మనార్ ఇజి సీను సుడఃజినిగదె. వారు విజేరె దేవుణు మోసిజ్ సిత్తి రూలుజ్ వందిజ్ నండ్రొ పటుదల మనికార్. 21 ఇబ్బె మన్ని యూదురు విజేరె నీవందిజ్ ఉండ్రొ బోగల్ వెహ మనార్. అక్క ఇనిక ఇహిజ, మోసి వెప్తికెజ్ విజా డిఃస్తెజ్ ఇజి సీను యూదురు ఆఇవరి లోఇ బత్రిని యూదురిజ్ నెప్పిసిని ఇజి. వరి ఇజిరి కొడఃరిజ్ సుసతి కినిక ఆవద్ ఇజి సీను నెప్పిసిని ఇజి. మరి, యూదురు ఎలాగ నడిదెజ్ ఇజి మహి పదతిజ్ వజ నడినిక ఆవద్ ఇజి సీను నెప్పిసిని ఇజి. వినకవందిజ్ బోగల్ వెహ మహాన్", ఇహార్. 22 "అహిజ మాటు ఇనిక కిడెజ్? సీను వాతివందిజ్ విజేరె తవ్విండ వెనార్. 23 అందెజె మాపు వెప్పివజ సీను కిల. ఇనిక ఇహిజ మొకు నిల్పి మన్ని నాల్వెర్ మొగావారు ఇబ్బెనె మనార్. 24 సీను వరిజ్ వెట కూక్కి ఒసి వారు మొకుబడిః సాన్పిస్తెజ్ వరివెట దేవుణు గుడిదు సాన్ల. వారు పూజ సీజి బుర్ర బోడి కిడెజ్ మన్ని కర్చు సీని సీల. అహిజ సీవందిజ్ లోకుర్ వెహిమన్ని బోగల్ నిజం ఆవద్ ఇజి విజేరె నెన్నార్. సీను మోసి సిత్తి రూలుజ లోజిజి నడిఃజివాన్ ఇజి విజేరె నెన్నార్. 25 అహిజ యూదురు ఆఇ నమ్మిత్తి వరిజ్ మాపు ఇనిక తీర్మానం కిజి రాస్త మనాద్ ఇహిజ, బొమ్మెడ పూజ కిత్తి వన్నాజ్ తినిక ఆవద్ ఇజి, నల తినిక ఆవద్ ఇజి, మెడః పిడిఃక్కి సప్తి వనకాజ్ తినిక ఆవద్ ఇజి. రంకు బూలానిక ఆవద్ ఇజి". ఈహు సజమ్ది పెద్దెలుజు పవులు వెప్తార్. 26 అందెజె పవులు, మహ్న నాండిజ్ అయ నాల్వెరిజ్ వెట కూక్కి ఒతండ్రె వరివెట సుబ్బరం ఆతాన్. వారు సుబ్బరం ఆజి మంజిని కాలం ఎసెజ్ అందినాద్, వరి లోఇ విజేరివందిజ్ ఎసెజ్ పూజ కిడెజ్, ఇక్కెజ్ వెప్పివందిజ్ పవులు దేవుణు గుడిదు యూదురు లోఇ మొగావారు మండ్రెజ్ మన్ని బాడ్డిదు సాహాన్. †

పవులు యూదురు అస్తార్

27 సుబ్బరం ఆజిమంజిని ఏడు రోస్కు డగ్రు ఆతాద్. అయావలె అసియదాన్ వాతిమహి సెగొండార్ యూదురు, దేవుణు గుడిదు యూద మొగవరిజ్ మన్ని బాడ్డిఃదు పవులు సుడఃతారె, బానె మహి లోకాజ్ విజేరిజ్ కలిబిలి కిత్తార్ వన్నిజ్ అస్తార్. 28 "ఇస్తాయేలు లోకాండ్రె, తోడుః కిడెజ్ రద్దు. మా లోకాజ్ వడఃఇకెజ్, మోసి సిత్తి రూలుజ వడఃఇకెజ్, యా దేవుణు గుడిఃదిజ్ వడఃఇకెజ్ విజా బాడ్డిజు సాన్పి లోకాజ్ విజేరిజ్ నెస్పిసినికాన్ వీండ్రె. అక్కాడె ఆవండ్రె, వీండ్రు యూదురు ఆఇ వరిజ్ దేవుణు గుడిదు కూక్త తతాండ్రె దేవుణుదిజ్ కేట కిత్తి యా బాడ్డి మయ్య కిత్తాన్", ఇజి నండ్రొ గగోలాతార్. 29 ఎందానిజ్ ఇహిజ, పట్టుమ్దు పవులు వెట యూదురు ఆఇ ఎసెసుదికాన్ త్రొప్పిముసు ఇని ఒరెన్ వన్నిజ్ ముందాల్నె వారు సుడఃత మహార్. వన్నిజ్ పవులు దేవుణు గుడిదు యూదురి మొగ్గ వరిజ్ మండ్రెజ్ మన్ని బాడ్డిఃదు తతాన్ ఇజి వారు ఒడిఃబితార్ ††. 30 పట్టుమ్దు మహి లోకుర్ విజేరె కలిబిలి ఆతాన్. విజాబాణిజ్ లోకుర్ మందెజ్ మందెజ్ ఆజి ఉహాక్కి వాతారె పవులుజ్ అస్తారె దేవుణు గుడిదు యూదురి మొగ్గ వరిజ్ మండ్రెజ్ మన్ని బాడ్డిహాన్ వెల్లి లాగితార్. వెటనె యూదురి మొగ్గ వరిజ్ మండ్రెజ్ మన్ని బాడ్డిదు సాని సేప్లాజ్ కెహా ఆతె. 31 పవులుజ్ వారు సప్తెజ్ ఇజి సుడఃజిమహిజ్ యెరూసలేం పట్టుం విజా కలిబిలి ఆతాద్ ఇజి అబ్బె మహి రోసు సయనమ్ది పెరి అతికారిజ్ కట్టు వాతాద్. 32 వెటనె అయ పెరి అతికారి సయనమ్దివరిజ్, సదాతివతివరిజ్ వెట ఒతండ్రె కూడిఃతి మహి లోకుర్ డగ్రు ఉహాక్కి వాతాన్. లోకుర్ అయ పెరి అతికారిజ్, వన్నివెట వాతి సయనమ్ది వరిజ్ సుడఃతిజ్ పవులుజ్ డెఃయ్యెజ్ డిఃస్తార్. 33 అయ పెరి అతికారి డగ్రు వాతండ్రె పవులు అస్తాన్. 'రుండి గొలుస్కాణిజ్ వన్నిజ్ తొచ్చు' ఇజి ఆడ్రె సిత్తాన్. వీండ్రు ఎయెన్? ఇనిక కిత్తాన్ ఇజి వెన్బాతాన్. 34 వెన్బాతిజ్ లోకుర్ సెగొండార్ ఈహు ఇజి, సెగొండార్ అహు ఇజి వెప్పి డెల్లి మహిజ్ గగోల్ లావత్తిజ్ నిజం ఇనికాద్ ఇజి నెస్పిండ్రె ఆతండ్రె 'బారి గోడఃలోఇ వన్నిజ్ ఒతు' ఇజి ఆడ్రె సిత్తాన్. 35 పవులు పాపు అన్ను ముస్కు వాతివలె లోకుర్ ఒడె కోవమాజి లాగ్దెజ్ నెక్తెజ్ కిత్తిజ్ సయనమ్దికార్ పవులుజ్ పిండితారె ఒతార్. 36 ఎందానిజ్ ఇహిజ, వన్నిజ్ నవ్ల ఇజి లోకుర్ విజేరె డటం గగోలాజి వెటసాహార్.

పవులు లోకుర్ వెట వర్గిజినాన్

37 మొదోహి పాపు అన్నుదాన్ ఎక్కి సాన్పి ఆకరి పాపు అన్ను దాక వారు సాహార్. సయనమ్దికార్ పవులుజ్ బారిగోడఃలోఇ ఒత్తెజ్ సుడఃజి మహిజ్ పవులు అయ పెరి అతికారి వెట, సీ వెట ఉండ్రొ మాట వెప్తాజ్ ఆనాదా ఇజి వెన్బాతాన్. అందెజె అయ అతికారి, "గ్రీకు బాస సీను నెసినిదా?", ఇజి వెన్బాతాన్. 38 "యా దినమ్కాజ్ ముందాల్నె అతికారిజు ఎద్రువెప్పి లోకాజ్ నప్పి నాల్లి వెయి లోకాజ్ బిడిఃజ్బూవిదు వెట కూక్కి ఒసి మహి అయ్గస్తె దేసెమ్దికి సీను ఆఇదా?", ఇజి పవులుజ్ వెన్బాతాన్. 39 దన్నిజ్ పవులు, "నాను కిలికియాదు మన్ని తార్చు పట్టుమ్దికాన్ యూద వాండ్రు. నాను అయ గొప్ప పట్టుమ్ది లోకు. లోకుర్ వెట వర్గిదెజ్ నజి సెల్వ సిదా", ఇజి బతిమాలితాన్. 40 పవులు సెలవ లొస్తిజ్ పెరి అతికారి సరి సిత్తాన్. అయావలె పవులు పాపు అన్ను ముస్కు నిహండ్రె లోకాజ్ అలెజి మండ్రు ఇజి కియు సయ్న కిత్తాన్. వారు అలెతి మహివలె పవులు యూదురి బాసాదు ఈహు వెప్తాన్. †

22 "తంబెరిజాండ్రె, బుబ్బరాండ్రె, నా లోఇ ఇని తప్పుబా సిల్లెద్ ఇజి మీరు నెసినివందిజ్ నాను వెప్పిని మాటెజ్ వెండ్రు". 2 పవులు వరి సాంత బాసాదు వర్గినిక వెహారె వారు జమీన అల్లెత మహార్. అయావలె పవులు ఈహు వెప్తాన్. 3 "నాను కిలికియాదు మన్ని తార్చు పట్టుమ్దికాన్ యూద వాండ్రు. అహిజ యా పట్టుమ్దు గొప్ప పేరు పొందితి మేస్టర్ గమాలియలు బాన్ మోసి మా అనిగొగొరిజ్ సిత్తి రూలుజు ఎలాగ లోబడఃదెజ్ ఇజి నెగ్గండ్రె నెస్తానె పీరితా.

† యా బాడ్డిదు మొగవారె మంజినార్. అయ్లికొడఃక్ బాన్ సాండ్రెజ్ ఆవద్ †† యూదురు ఆఇకార్ దేవుణు గుడిః దేవాదు సాండ్రెజ్ ఆవద్. బాన్ యూద మొగకొడః సాండ్రెజ్ ఆనాద్ ఇజి రూలు మనాద్ † యూదవరి బాస ఏత్రి బాస. యూద వుజేరిజు నదెవతి మహి దేవుణు మాటెజ్ ఏత్రి బాసాదునె రాస్త మహాద్. వారు వర్గితి మాట అరాయి బాస

మీరు విజిడెరె నేండ్రు ఎలాగ పలుదలదాన్ మన్నిదెరో అయ వజనె నానుబా యా రూలుజ్ వందిజ్ పలుదలదాన్ మహా. 4 నాను యేసుప్రబు ముస్కు నమ్మితి వరిజ్ మొక్కొడాఃరిజ్, అయ్లి కొడాఃకాజ్ అసి తొప్పి జెలిదు ఇడజి సానేండ మాలెజ్ కిత. 5 దిన్ని వందిజ్, విజేరె పుజేరిజ ముస్కు పెరి పుజేరి, పెద్దెలుజు విజేరె నజి సాసి ఆత మనార్. దమస్కు పట్నమ్దు మహి మా సాంత లోకురాతి యూదురు లొఇ మహి నమ్మితి వరిజ్బా అసి తొప్పి మాలెజ్ కిదెజ్ యెరూసలేమ్దు తతెజ్ ఇజి పుజేరిజ బాణిజ్ ఉత్రము. లొస్త ఒతానె దమస్కు పట్నమ్దు మహి యూదురుబాన్ సాహ.

6 నాను పయనం కిజి దమస్కు పట్నం డగ్రు సాస్సి మహిజ్, మదెనం వేడెదు, ఆగానమ్దాన్ వెటనె గొప్ప జాయ్ నా సుటులం డెయ్తాద్. 7 అయావలె నాను బూమి ముస్కు అర్తానె, 'సవులు, సవులు, నీను ఎందానిజ్ నజి మాలెజ్ కిజిని', ఇజి నావెట ఉండ్రీ జాటు వాతిక వెహ. 8 'ప్రబు, నీను ఎయ్' ఇజి నాను వెనబాత. వెనబాతిజ్ వాండ్రు 'నీను మాలెజ్ కిజిని నజరేతుదికాన్ ఆతి యేసునె నాను', ఇజి నావెట వెహాన్. 9 నావెట సాస్సి మహికార్ అయ జాయ్ సుడెఃతార్ గాని నావెట వర్గితిమహిపన్ని జాటు నెన్వెతార్.

10 అయావలె నాను, 'ప్రబు నాను ఇనిక కిదెజ్' ఇజి వెనబాతిజ్, 'నీను నిజ్జి దమస్కు పట్నం సాన్అ. అబ్బె నీను ఇని పణి కిదెజ్ ఇజి నీ వందిజ్ నాను ఏర్పాటు కిత్తికెజ్ విజా నిజి ఒరెన్ వెన్నానాలె' ఇజి నావెట ప్రబు వెహాన్. 11 అయ సుడెఃదెజ్ అట్ఇ నన్ని పెరి జాయ్ మహిజ్ నాను కణుకు తోర్దెజ్ అట్ఎండత. నావెట మహికార్ నా కికు అసి నడిఃపిసి దమస్కు పట్నమ్దు కూక్త తతార్.

12 అయావలె మోసి సిత్తి రూలుజ్ లోజిజి, బక్తి మన్నికాన్ అననియ ఇనికాన్ ఒరెన్ బాన్ మహాన్. అబ్బె మహి యూదురు విజేరె యా అననియ, ఒరెన్ పల్కుబడిః మన్నికాన్ ఇజి వెప్పి మహార్. వాండ్రు నా డగ్రు వాతాన్. 13 డగ్రు వాతండ్రె నా డగ్రు నిహండ్రె, 'సవులునా, బేసెఅ', ఇజి వెహిజ్ వెటనె నాను బేస్తానె వన్నిజ్ సుడెఃత. 14 అయావలె అయ అననియ వెహాన్, 'మా అనిగొగొరి దేవుణు నిజి ఏర్పాటు కిత మనాన్. దేవుణు నిజి ఇని పణి వందిజ్ ఏర్పాటు కిత్తాండ్రె' అక్క నీను నెన్నెజ్. అందెజి నీను సుడెఃతిమహి, వెహిమహి నీతి నిజాయుతి మన్నికాన్ నిజి ఏర్పాటు కిత్తాన్. 15 ఎందనిజ్ ఇహిజ, నీను సుడెఃతికెజ్, నీను వెహికెజ్, విజా లోకాజ్ సాస్సి వెహిజ్, వన్నివందిజ్ ఉండ్రీ సాసివజ నీను మంజిని. 16 ఏలు ఎందనిజ్ ఆలన్యమాజిని? నిజ్జి బాప్తినం లాగె ఆత. యేసు పేరు అసి, పార్దనం కిజి నీ పావమ్కాజ్ నొరె ఆత, ఇజి వెహాన్. 17 నాను యెరూసలేమ్దు మరజి వాతానె దేవుణు గుడిఃదు పార్దనం కిజి మహా. పార్దనం కిజి మహిజ్ ఎద్దునె ఉండ్రీ దర్దనం సుడెఃత. 18 అయ దర్దనమ్దు నావెట, 'నీను యెరూసలేం డిఃసి గజిబిజి సాన్అ. ఎందానిజ్ ఇహిజ నావందిజ్ నీను వెహి సాసి పేరు ఒప్పుకొడెఃపర్', ఇజి వెప్పి మహిక నాను సుడెఃత.

19 ప్రబు అయ మాట వెహిజ్ నాను, 'నాను యూదురి మీటిజ్ ఇల్కాజ్ వరన సాస్సి మీ ముస్కు నమకం ఇట్టి వరిజ్ డెయ్జి జెలిదు ఇట్టా ఇజి వారు విజేరె బాగ నెసినార్. 20 అక్కాదె అపండ, నీవందిజ్ సాసి వెహి సైపానుజ్ సప్తివలె, నానుబా అక్క ఒప్పుకొటానె వన్నిజ్ సప్తివరి సాల్వెజ్ కాన్కెజి మహాగదె', ఇజి ప్రబు వెట వెహా. 21 గాని ప్రబు, 'నీను సాన్అ, దూరం మన్ని దేసమ్దు బత్రిని యూదురు ఆజవరిబాన్ నాను నిజి షాక్ష్' ఇజి నావెట వెహాన్".

పవులు రోమదిజ్ అక్కు ఆతికాన్

22 యా మాటదాక లోకుర్ పవులు వెంజి మహార్. గాని యాక వెహిజ్, "నిన్ని వన్నిజ్ ఇడ్మాట్. విన్నిజ్ సప్తు. వీండ్రు బత్రిదెజ్ అపిద్", ఇజి వారు విజేరె డటం గగోలాత్తార్. 23 ఈహె వారు గగోలాజి వరి సాల్వెజ్ కిసి విసిరేతార దూల్లి అసి ఎగ్రిస్తార్. 24 అయావలె 'పవులుజ్ బారిగోడః లొఇ తగ్ల' ఇజి రోమ సయనమ్ది పెరి అతికారి ఆడ్ర సిత్తాన్. లోకు పవులు ముస్కు ఎందానిజ్ ఈహు కోపం ఆతార గగోల్ ఆతార్ ఇజి నెప్పి వందిజ్ పవులుజ్ కొర్దాన్ డెయ్దెజ్ అయ అతికారి ఆడ్ర సిత్తాన్. 25 గాని పవులు డెయ్దెజ్ తొహిజ్ పవులు వన్ని డగ్రు మహి సదాతిపతివెట ఈహు వెనబాతాన్, "రోమదిజ్ అక్కు మన్నికాన్ ఆతి ఒరెన్ వన్నిజ్ తీర్పు సిఏండనె కొండెదాన్ డెయ్దెజ్ రోమ రూలుజ్ వజ మిజి అతికారం మనాదా?". 26 అయ సతాతిపతి యాక వెహండ్రె రోమ సయనమ్ది పెరి అతికారిబాన్ సాహండ్రె ఈహు వెహాన్. "నీను ఇనిక కిదెజ్ సుడెఃజిని? వీండ్రు రోమదిజ్ అక్కు మన్నికాన్", ఇజి వెహాన్. 27 అయావలె అయ పెరి అతికారి పవులుబాన్ వాతండ్రె, "నీను రోమదిజ్ అక్కుమన్నికెదినా?", ఇజి వెనబాతాన్. "ఒఒ", పవులు ఇహాన్. 28 దన్నిజ్ అయ పెరి అతికారి, "లాపు డబ్బు సిత్తానె యా రోమది అక్కు నాను ఫాందిత", ఇహిజ్ పవులు, "నాను ఇహిజ పుట్టివలెహానె రోమదిజ్ అక్కు మన్నికాన్" ఇహాన్. 29 అందెజి పవులు వెట డటిసి వెహిజ్ వాతికార్ వెటనె వన్నిజ్ డిఃస్త సితార్. రోమదిజ్ అక్కుమన్ని వన్నిజ్ గొలుస్కాణిజ్ తొహిపిస్త మహ ఇజి నెసి అయ రోమ సయనమ్ది పెరి అతికారి తియెలాతాన్.

పవులు యూద పెద్దెల్జ నడిఃమి వర్గిజినాన్

30 మహ్న నాండిజ్, పవులు ముస్కు యూదురు ఇని నేరం మొప్పారొ ఇజి నెప్పిజ్ అయ రోమ పెరి అతికారి ఆస ఆతాన్. అందెజి పవులు డిఃబిస్తాన్. పెరి పుజేరిజ్ని సంహద్రి సజమ్దిజ్ కూకొపిస్తాండ్రె 'మీటిజ్ కినాట్' ఇజి ఆడ్ర సిత్తాన్. వారు కూడెఃజి వాతివలె పవులుజ్ వరి ముండాల నిల్వూన్.

23 పవులు సంహద్రి సజమ్దివరిజ్ తినాజ్ సుడెఃజి ఈహు వెహాన్, "తంబెరిజాండె, గడిఃస్తి సాహి దినమ్కు విజా నాను దేవుణు ఎద్దు నా గర్బం గడిన్ఏండ మహ". 2 అయావలె విజేరె పుజేరిజ ముస్కు పెరి పుజేరి ఆతి అననియ పవులు డగ్రు నిల్పిమహివరివెట, "వన్ని వెయ్యం డెయ్అ", ఇజి ఆడ్ర సిత్తాన్. 3 దన్నిజ్ పవులు, "నీను తెలాజ్ దూల్లి రాస్తి గోడ్డః † నన్నికి. దేవుణు నిజి డెయ్నాన్లె. మోసి సిత్తి రూలుజ్ తగితివజ నజి తీర్పు కిదెజ్ నీను బస్తిమన్ని. గాని మోసి సిత్తి రూలుదిజ్ తగ్గేండ నజి డెయ్దెజ్ ఆడ్ర సిజినిదా?", ఇహాన్. 4 పవులుడగ్రు నిహికార్, "నీను దేవుణు పెరి పుజేరిదిజ్ దుసలాడిఃజినిదా?", ఇహార్. 5 దన్నిజ్ పవులు, "తంబెరిజాండె, వాండ్రు విజేరె పుజేరిజ ముస్కు పెరి పుజేరి ఇజి నాను నెన్వెత. మీ లోకాజ్ ఏలుబడిః కినివరిజ్ దుసలాడిఃజినిక అపిద్ ఇజి దేవుణు మాటదు రాస్త మనాదె గదె", ఇహాన్. 6 యూద పెద్దెల్జ పెరి సజమ్లొఇ సెగొండార్ వరిసయరు, సెగొండార్ సదుకయరు ఇజి పవులు నెస్తాన్. నెస్తాండ్రె వెనుక పవులు డటం వెహాన్, "తంబెరిజాండె, నానుబా వరిసయ వాండ్రునె, వరిసయవన్నిజ్ పుట్టికాన్. దేవుణు సాతివరిజ్ నికూన్ ఇజి నాను నమ్మిజిని. అక్క నాను ఎద్దు సుడెఃజి మంజిని. దన్నివందిజ్ నాముస్కు తప్పు మొప్పి తీర్పు కిజినార్". 7 పవులు యాక వెహివలె వరిసయరుజ సదుకయరుజ నడిఃమి గోడఃబ

† పవులు కోపమాజి వెహి మాటజ్

పుట్టాద్. గొడఃబ పుట్టాడె వారు రుండి జటుజ్ ఆతార్. 8 (ఎందానిజ్ ఇహిజ సాతికార్ మర్జి బత్తిఎర్, దూతార్ సిల్లు, దెయమ్కు సిలు ఇజి సదుకయరు వెస్సినార్. పరిసయరు ఇహిజ అక్కెజ్ విజు మన్నె ఇజి వెస్సినార్).

9 అయావలె అబ్బె గొప్ప గగోల్ ఆతాద్. పరిసయరులోఇ సెగొండార్ దేవుణు మోసెజ్ సిత్తి రూలుజ్ నెస్సిసినికార్ నిజిత్తారె, “మాపు సుడఃతిజ్, యా లోకు ముస్సు ఇని తప్పుబా తోర్వెద్. ఒరెన్ దూత గాని ఉండ్రీ తోర్దెజ్ అట్ఇకాద్ గాని వన్నివెలు వర్గితాద్సు, ఇజి గొడఃబెజ్ ఆతార్. 10 పరి లొఇ గొడఃబ లావాత్తిజ్ వారు పవులు కిన్నె వినీర్నారెను ఇజి తియెలాతాండ్రె అయ రోము సయనమ్ది పెరి అతికారి సయనమ్ది పరిజ్ పొక్తాండ్రె పవులుజ్ పరి నడిఃమిహన్ లాగ్గి బారిగోడః లొఇ తత్తెజ్ ఆడ్ర సిత్తాన్. 11 ఆ పొదొయ్ పుబు పవులు తోరె ఆతండ్రె, “దయరం ముస్సు మన్అ. నీను యెరూసలేమ్దు నావందిజ్ ఎలాగ సాసి వెప్తాద్ అయావజనె రోము పట్టుమదుబా సాసి వెహొఅ”, ఇజి వెప్తాన్.

పవులు సప్తెజ్ యూదురు కుట్ట కిత్తార్

12 మర్కు నాండిజ్ పెందల సెగొండార్ యూదురు కూడిఃతారె, ‘మాటు పవులు సప్వండ ఉండెజ్ తిండ్రెజ్ ఆవద్’ ఇజి ఒట్టు కితారె పవులు సప్తెజ్ ఇజి పూర్తి తెగిస్తార్. 13 పవులుజ్ సప్తెజ్ అలోసనం కిత్తికార్ సల్వయ్ ముస్సు మొగావారు మహార్. 14 వారు పెరి పుజెరిజబాన్ పెద్దెలుజబాన్ సాహారె వెప్తార్, “మాపు పవులుజ్ సప్వండ ఇనికబా తిన్వప్ ఉణ్వప్, ఇజి గటిజ ఒట్టు కిత మహప్. 15 అందెజె మీరు, సంహద్రి సజమ్దికార్ విజెరె కూడఃబి రోము సయనమ్ది పెరి అతికారి వన్నిజ్ కబ్బు పోకల. అక్క ఇనిక ఇహిజ, పవులు మరి మాబాన్ రప్పెన్ ఇండ్రు. వన్నివెలు మరి వర్గిజి వన్ని వందిజ్ మాపు విజు నెస్సెజ్ ఇజి నాటిస్సెల్. వాండ్రు ఇబ్బె అందివందెన మాపు వన్నిజ్ సప్తెజ్ తయారాజి మనాప్. 16 గాని పవులుజ్ బణిజ ఆతికాన్ యాక నెస్తాండ్రె సెల్లు లొస్తాండ్రె బారిగోడః లొఇ సాన్ని పవులుజ్ వెప్తాన్. 17 అయావలె పవులు సదాతిపతిర్లొఇ ఒరెన్ వన్నిజ్ కూక్తాండ్రె, “యా దజ్డెజ్ రోము సయనమ్ది పెరి అతికారిబాన్ ఒల. పెరి అతికారి వెలు విన్నిజ్ ఉండ్రీ మాట వెప్తెజ్ మనాద్” ఇహాన్. 18 వెప్తెజ్ అయ సతాతిపతి అయ దజ్డెజ్ పెరి అతికారిబాన్ ఒతాన్. ఒతండ్రె, “జెలిదు మన్ని పవులు నజి కూక్తాండ్రె యా దజ్డెజ్ మీబాన్ ఒతెజ్ ఇజి వెప్తాన్. యా దజ్డెజ్ మీ వెలు ఇనికాద్ వెప్తాన్”, ఇజి వెప్తాన్.

19 అయ పెరి అతికారి అయ దజ్డెజ్ కీదు అస్తాండ్రె ఉండ్రీ వడఃకాద్ ఒతాన్. “నా వెలు వెప్తెజ్ ఇని మాట మనాద్?”, ఇజి వన్నిజ్ వెన్బాతాన్. 20 వెన్బాతిజ్ అయా దజ్డెజ్యెన్, “విగెహిజ్ పవులుజ్ సంహద్రి సజం నడిఃమి తసి వన్ని వందిజ్ మరి నెస్సెజ్ ఇజి నాటిసి వన్నివెలు మరి వర్గిదెజ్ నీబాన్ సెలవ లొస్సెజ్ ఇజి యూదురు ఒప్పుకోల మనార్. 21 గాని నీను పరిజ్ సరి సీమ. ఎందానిజ్ ఇహిజ సలవయ్ మణిసిరిజ్ ముస్సు మొగావారు, పవులు సప్వండ మాటు ఉండెజ్ తిండ్రెజ్ ఆవద్ ఇజి ఒట్టు కితారె వన్ని వందిజ్ సరిదు సుడఃబినార్. వారు వన్నిజ్ సప్తెజ్ తయారాత మనార్. మీమాటదిజ్ కాప్ కిజినార్” ఇహాన్.

22 యాక వెహొండ్రె అయ పెరి అతికారి, “నీను నజి యాక వెప్తి ఇజి ఎయెజ్బా వెహొ”, ఇజి గటిజ వెప్తాండ్రె అయ దజ్డెజ్యెనుజ్ పొక్తాన్.

23 వెనుక అయ పెరి అతికారి సదాతిపతిర్ లొఇ రిఎరిజ్ కూక్తాండ్రె, “యా పొదొయ్ తొమ్మిది గంటెజ కయసరియ దాక సాండ్రెజ్ తయార్ ఆదు. రుండి వందెజ్ సయ్యమ్దికార్, డబయ్మణిసిరి గుర్తమ్దాన్ సాని సయనమ్దికార్, రుండి వందెజ్ బల్లెమ్కు అస్తికార్ సాండ్రెజ్ వలె. 24 పవులుజ్ ఎకిసి ఒతెజ్ గుర్తమ్కు సీదు. వన్నిజ్ గవర్నరు ఆతి పీలిక్కుబాన్ ఇని ప్రమాదం రెవండ ఒతెజ్”, ఇజి వెప్తాన్. 25 అయ పెరి అతికారి ఈహె ఉండ్రీ ఉత్తం రాస్తాన్, 26 “క్లవుదియ లూసియ ఆతి నాను గొప్ప పేరు మన్ని పీలిక్కు గవర్నరిజ్ వందనమ్కు వెస్సిన. 27 విన్నిజ్ యూదురు అస్తారె సప్తెజ్ సుడఃతిజ్ నాను నా సయనమ్దివరివెలు వాతానె విన్నిజ్ గెల్పెస్త. ఎందనిజ్ ఇహిజ వీండ్రు రోమదిజ్ అక్కుమన్నికాన్ ఇజి నాను నెస్త. 28 విని ముస్సు యూదురు ఎందనిజ్ నేరం మొప్పినార్ ఇజి నెస్సెజ్ నాను విన్నిజ్ యూదురి సంహద్రి సజమి నడిఃమి ఒత. 29 ఒతిజ్, యూదురి రూలుజలొఇ మన్ని ఇనికెజ్ వందిజ్ వారు విన్నిజ్ నేరం మొప్తార్ గాని, సప్తెజ్నొ, జెలిదు పొక్తెజ్నొ తగితి తప్పుజ్ తోర్ఉతె. 30 విన్నిజ్ సప్తెజ్ ఇజి యూదురు కుట్ట కిజినార్ ఇజి నాను నెస్తానె వెలనె విన్నిజ్ నీబాన్ పొక్తిన. విని ముస్సు నేరం మొప్పికార్బా నీబాన్ వాజి వన్ని ముస్సు మన్ని నేరమ్కు విజు వెప్తెజ్ నాను పరిజ్ ఆడ్ర సిత్తాన్”.

31 అయ రోము సయనమ్ది పెరి అతికారి ఆడ్ర సిత్తిలెకెండె సయనమ్దికార్ పవులు ఆ పొదొయ్నె అంతిపత్తి ఇని పట్టుమ్దాక కూక్త ఒతార్. 32 మహ్సా నాండిజ్ వారు పవులు గుర్తమ్కు అస్తి సయనమ్ది - పరివెలు పొక్తారె మహికార్ మర్జి వాతార్. 33 వారు కయసరియదు అందితిజ్ అతికారి పొక్తి ఉత్తం గవర్నరిజ్ సితార్. పవులుజ్బా గవర్నరుబాన్ ఒవజెస్తార్. 34-35 గవర్నరు అయ ఉత్తం సద్వితాండ్రె పవులు వెలు, “నీను ఎమెణి ప్రాంతమ్దికి”, ఇజి వెన్బాతాన్. “కిలికియదికాన్”, ఇజి వెప్తెజ్, “నీ ముస్సు నేరం మొప్పికార్ వానివలె నీ సజతి సూణ ఇజి వెప్తాన్. పవులు హేరదు రాజు పెరిఇండ్రొ ఇడెజి కాప్ కిజి మండ్రెజ్ ఆడ్ర సిత్తాన్.

పీలిక్కు గవర్నరుబాన్ పవులు నిల్వినాన్

24 అయదు రోమ్కు సాహిజ్ విజెరె పుజెరిజ ముస్సు పెరి పుజెరి ఆతి అననియ, వన్నివెలు సెగొండార్ యూద పెద్దెలుజు, తెర్తుల ఇని ఒరెన్ తగ్గు వర్గినికాన్, డిఃగు మన్ని కయసరియారు వాతార్. వాతారె పీలిక్కు గవర్నరుబాన్, పవులు వందిజ్ మొప్తి నేరమ్కు వెప్తార్. 23 పవులుజ్ కూక్తినె కోర్టుదు నిల్వెస్తాన్. అయావలె తెర్తుల ఇని తగ్గు వర్గినికాన్ పవులు వందిజ్ ఈహె నేరం మొప్తెజ్ మొదొల్స్తాన్, “పెరి పేరు మన్ని గవర్నరు ఆతి పీలిక్కు, నీను నండొ కాలం ఏలుబడిః కిజినిజ్ మాపు సమదానమ్దాన్ మంజి - నాప్. మా జాతివందిజ్ మీరు బాగ కిత్తిజ్ మజి నెగ్గెండ బత్తిదెజ్ అన్సరం ఆతికెజ్ విజు మన్నె. మాపు విజెపె మీరు కిత్తి యా నెగ్గె వణిదిజ్ ఒప్పుకోడఃబి నిజి వందనమ్కు వెస్సినాప్. 4 గాని నాను నీ వణిదిజ్ అడ్డు కివండ, మాపు ఎందానిజ్ మీబాన్ వాతాపా అయ సజతి వందిజ్ వర్గిన. దయ కిజి వెన్అ.

5 యా పవులు గొప్ప గొడఃబ కినికాన్. లోకం విజు యూదురి నడిఃమి గొడఃబెజ్ రేప్పికాన్. వీండ్రు నజరేతుది జటుదిజ్ నెయ్యి. యాక విజు మాపు నెసినాప్. 6-7 వీండ్రు యెరూసలేమ్దు మన్ని దేవుణు గుడిదిజ్ మయ్య కిదెజ్బా సుడఃతాన్. అందెజె మాపు విన్నిజ్ అస్తాన్. గాని రోము సయనమ్ది పెరి అతికారి లూసియ వాతండ్రె మాబాణిజ్ విన్నిజ్ లాగితాన్. 8 నీను విన్నిజ్ వెన్బాఅ. మాపు విన్నివందిజ్ వెప్పికెజ్ విజు నిజెమె ఇజి నిజె నెస్సెజ్ ఆనాద్”.

9 తెర్తుల వెప్తి మాటెజ్ విజు నిజం ఇజి బానె వాతిమహి యూదురుబా ఒప్పుకోటార్.

10 వవులు వర్గిడెజ్ గవర్నరు సయన కిత్తిజ్ వవులు వర్గిడెజ్ మొదోల్స్తాన్, "గవర్నర్ ఆతి పేలిక్కు, నీను నండ్ పంటెజ్ యా యూదురి లోకాజ్ నెగ్రెండ ఏలుబడి: కిజిమహి. అందెజె నాను దయరమ్దాన్ వెహ్సిన. 11 నాను యెరూసలేమ్దు దేవుణు గుడిడు పార్దనం కిడెజ్ సాహిజ్ ఏలు పనెండు రోమ్సునె ఆతె ఇజి విరిజ్ వెన్బాతిజ నీను నెస్సి. 12 దేవుణు గుడి: లోఇబా, యూదురి మీటిజ్ ఇంద్రొబా, పట్టుమదుబా నాను ఎయెన్ వెబబా లోకురిజ్ నెక్తి పాక్తిక, జటు కిజి రేష్టిక, ఇనికబా యూదురు సుడ్డెవతార్. 13 ఏలు నావందిజ్ వీరు వెహ్సికెజ్ నిజం ఇజి రుజాప్ కిడెజ్ వీరు అబ్ఎర్. 14 గాని నాను ఉండ్రె నిజం మాట వెహ్సె. అక్క ఇనిక ఇహిజ. నిజం ఆవద్ ఇజి వీరు వెహ్సెని బోదవజ నాను నడిజెజిన. ఆహె నడిజెజి దేవుణు మోసెజ్ సిత్తి రూలుజ్ వజ విజా, ప్రవక్తరు రాస్తికెజ్ విజా నాను నమ్మిజి మా అనిగొగార్ పాగ్డిజెజి మాడిజెస్తి దేవుణుదిజ్ పార్దనం కిజిన. 15 వీరు నమ్మినివజ నెగ్గికార్, సెఇకార్ విజేరె సాతి వరిబాణిజ్ మర్జి నిజ్నార్ ఇజి నానుబా దేవుణుదిజ్ నమ్మిజి అసదాన్ ఎద్రు సుడ్డెజిన. 16 అందెజె నాను, దేవుణు ఎద్రుగాని, లోకుర్ ఎద్రుగాని నా గర్బం గదిన్ఎండ మండ్రెజ్ సుడ్డెజిన. 17 సెగం పంటెజ్ సాహి వెనుక ఏలు నాను నా సాంత జాతిజ్ సాయం కిడెజ్, దేవుణు గుడిడు పూజ కిడెజ్ యెరూసలేమ్దు వాత. 18-19 దిన్ని వందిజ్ నాను దేవుణు గుడిడు సాహిమహిజ్, సుబ్బరం ఆతి వెనుకానె యూదురు నజి బాన్ సుడ్డెతార్. అయావలె నావెట మంద లోకుర్ ఎయెర్ సిల్లెతార్. ఇని గొడెబ జర్గివతార్. గాని నాను బాన్ మహివలె ఆసియ దేసెమ్దాన్ వాతిమహి సెగొండార్ యూదురు, బాన్ మహారె నా ముస్సు గొడెబ ఆతార్. నా ముస్సు వరిజ్ ఇని నేరం మహిజ వారె వాజి నీ వెట వర్గిడెజ్. 20 సిలిజ నాను సంహద్రి సజమదు వర్గిజ మహిజ్ ఇని తప్పు వర్గిత ఇజి వీరు వెహ్సె. 21 గాని ఉండ్రె మాట నాను వెహ్సె. అక్క ఇనిక ఇహిజ, సాతి లోకుర్ మర్జి బత్కినార్ ఇజి నమ్మినివందిజ్ వీరు నేండ్రు నజి తీర్పు కిజినెదెర్ ఇజి నాను బానె డటం వెహ్సె మహా".

22 వవులు వెహ్సి బోదవందిజ్ గవర్నరాతి పేలిక్కు నెగ్రెండ్ర నెహ్ మహాన్. అందెజె వాండ్రు, "రోమ సయనమ్ది పెరి అతికారి ఆతి లూసియ వానివలె తీర్మానం కిన", ఇజి వెహ్సెండ్రె అయ సద్రు మీటిజ్ ముగిస్తాన్. 23 వెనుక వవులు జేలిదు ఇడెజి వన్నిజ్ కాపు ఇడెడెజ్ సదాతివతిజ్ ఆడ్రె సిత్తాన్. వన్ని లోకుర్ వాజి వన్నిజ్ సుడ్డెజి వన్నిజ్ సాయం కిడెజ్ అడ్డు కిమాల్ ఇజి ఆడ్రె సిత్తాండ్రె వన్నిజ్ కండెక్ సరి సిత్తాన్. 24 సెగం రోమ్సు సాహిజ్ పేలిక్కు వన్ని అల్లి ఆతి ద్రుసిలవెట వాతాన్. అది యూదురి అయోలి కొడె: పేలిక్కు వవులుజ్ కూకోపెస్తాన్. యేసు క్రీస్తు ముస్సు మన్ని నమకంవందిజ్ వవులు వెహ్సికెజ్ వెంజి మహాన్. 25 గాని వవులు సరియాతి పణి కిని వందిజ్, మన్సుదిజ్ అణసె ఆజి ఇడ్డివందిజ్, దేవుణు, లోకుర్ ముస్సు కిని తీర్పువందిజ్ గటిజ వర్గితిజ్ పేలిక్కు తియెలాతాండ్రె, "ఆనె, ఏలు సాన్అ. మరి ఒర్పు టయం మహివలె కూకోపెన్న", ఇజి వెహ్సెండ్రె పాక్తాన్. 26 వవులు నజి డబ్బు సీనాన్సు ఇజిబా పేలిక్కు ఒడిజెబిటాన్. అందెజె వవులు మాట మాటదిజ్ కూకోపెస్తాండ్రె వన్నివెట వర్గితాన్.

27 రుండి పంటెజ్ సాహిజ్, పేలిక్కు వెనుక ఫోర్కియు పెస్తు ఇనికాన్ గవర్నరు ఆతాన్. పేలిక్కు యూదురిజ్ సర్ద కిబిస్తెజ్ వవులుజ్ జెలిదునె ఇత్తాన్.

వవులు పెస్తు ఎద్రు నిల్సినాన్.

25 ఫోర్కియు పెస్తు అయ ప్రాంతమ్దిజ్ గవర్నరు ఆజి మూండ్రె రోమ్సు సాహిజ్ వాండ్రు కయసరియాదాన్ ఎక్సి యెరూసలేమ్దు సాహాన్. 2 బానె పెరి పుజేరిబు యూదురి పెద్దెలుబు వవులు ముస్సు మహి తప్పుజవందిజ్ గవర్నరుజ్ వెహ్సె. 3 "దయ కిజి వవులు యెరూసలేమ్దు ఫోకెఅ", ఇజి వారు గవర్నరుబాన్ నండ్ సుట్టు బతిమాలితార్. ఎందానిజ్ ఇహిజ వవులుజ్ సర్ద సప్తావ్ ఇజి వారు కుట్ర కిజి మహార్. 4 గాని గవర్నరు, "వవులు కయసరియాదు కాప్ ఇత్తా మనాద్. నాను వెటనె బానె సాస్సిన. 5 అందెజె మీలోఇ మన్ని పెరిలోకుర్ నావెట బానె సాండ్రెజ్. వవులు ముస్సు ఇని తప్పుబా మహిజ వీరు కోర్టుదు నేరమ్కు తోరెస్తెజ్ ఆనాద్" ఇహాన్.

6 గవర్నరు వరివెట ఎనిమిదిన్ వది రోమ్సునా మహి వెనుక, డి:గు కయసరియాదు సాహాన్. మహ్సా నాండెజ్ కోర్టుదు సాహాండ్రె తీర్పు కిడెజ్ ఇజి, తీర్పు కినిబాన్ బస్తాన్. 'వవులు కోర్టుదు తగాటో' ఇజి ఆడ్రె సిత్తాన్. 7 వవులు వాతిజ్ యెరూసలేమ్దాన్ డి:గు వాతి యూదురు వన్ని సుటులం నిహారె వన్ని ముస్సు నండ్ రకమ్ది బల్వె ఆతి తప్పుజ్ మొస్తార్ గాని అక్రెజ్ నిజం ఇజి రుజాప్ కిడెజ్ వారు అబ్ఎతార్.

8 వవులు, "నాను యూదురు రూలుజ్ వందిజ్ గాని, యెరూసలేమ్దు మన్ని దేవుణు - గుడి:వందిజ్ గాని, రోమ దేసెమ్దిజ్ ఏలుబడి: కిని కయసరువందిజ్ గాని ఇని తప్పుబా కివిత", ఇజి వన్ని వందిజ్ వాండ్రె వెహ్సెన్.

9 నాను నెగ్గికాన్ ఇజి యూదురు ఒడిబిడెజ్ ఇజి గవర్నరు సుడ్డెతాన్. అందెజె వాండ్రు వవులు వెట వెన్బాతాన్, "యెరూసలేమ్దు సాస్సి బానె నీ వందిజ్ వీరు వెహ్సికెజ్ నిజమెనో అబద్దమెనో ఇజి నాను తీర్పు కిడెజ్ నీను ఒప్పుకోడెజినదా?".

10 దన్నిజ్ వవులు, "రోమ రాజా ఆతి కయసరుది కోర్టుదు నిల్సిన. యా కోర్టుదునె నజి తీర్పు కిడెజ్. యూదురిజ్ ఇని తప్పుబా నాను కివిత. అక్క నీను నెగ్రెండ నెస్సిగదె. 11 నాను ఇని రూలుదిజ్బా తప్తిజ, సావుదిజ్ తగితి పణి కిత ఇహిజ, సిక్నదాన్ తప్తి ఆడెజ్ నాను సుడ్డె:ఏ. గాని నా ముస్సు వీరు వెహ్సికెజ్ నిజం ఆఉ ఇహిజ నజి వరిజ్ ఒవజెప్పెజ్ ఎయెరిజ్బా అక్కు సిల్లెద్. నాను రోమ పెరి రాజా ఆతి కయసరుబాన్ సాండ్రెజ్ ఆజిన", ఇహాన్.

12 అయావలె గవర్నరు వన్నివెటమహి లోకుర్ వెట వర్గితాండ్రె వవులుజ్, "నీను కయసరుబాన్ సాస్సి వెహ్సెజ్ ఇజి వెహ్సి. అందెజె కయసరుబానె సాన్అ", ఇహాన్.

పెస్తు అగ్రెవ రాజా వెట వవులువందిజ్ వెహ్సినాన్

13 సెగం రోమ్సు సాహి వెనుక రాజా ఆతి అగ్రెవ పన్ని తజిని ఆతి బెర్గీకయువెట కొత్త గవర్నరు ఆతి ఫోర్కియు పెస్తుజ్ మాడిజెజ్ కయసరియాదు వాతార్ 14 వారు పెస్తువెట నండ్ రోమ్సు మహార్. మహిజ్ పెస్తు వవులు వందిజ్ రాజా వెట వర్గితాన్, "గవర్నరు ఆతి పేలిక్కు వవులు ఇని ఒరెన్ వన్నిజ్ జెలిదు ఇడిస్తాన్. 15 నాను యెరూసలేమ్దు సాహివలె, యూదురి పెరి పుజేరిబు, పెద్దెలుబు విని ముస్సు నేరమ్కు మొస్తారె సిక్సెని ఇహార్. 16 దన్నిజ్ నాను వరివెట వెహ్సె, 'రోమ అలవాటు ఇహిజ, నిండెజ్ మొష్టికార్ ఎయెన్ ముస్సు తప్పు మొస్తారె, వాండ్రు వాజి వరి నడి:వి వన్ని వందిజ్ వర్గిడెజ్ అవకాసం సింపిండ ముందాల్సె తీర్పు కిడెజ్ ఆఎద్' ఇజి. 17 అందెజె వారు నావెట ఇబ్బె వాతివలె నాను ఆల్సెం ఆవండ మర్సనాండిజ్నె సద్రు కూడె:స్తానె వవులు నాముందాల తపిస్తె.

† యూదయదేసెమ్దిజ్ ఒక్క మన్ని ప్రాంతమ్కాజ్ వీండ్రు రాజా

18 నేరమ్కు మోస్తాకార్ నిహివలె నాను ఒడిబిత్తిలెకెండ్ వారు నేరమ్కు లోఇ ఉండ్రీ నేరంబా వన్ని ముస్సు మొవ్వుతార్. 19 ఇహిజ, వరి మతంవందిజ్, సాతి సాహి యేసు ఇని ఒదెన్వందిజ్ పవులు వెట గొడెబ ఆతికాదె తోరితాద్. పవులు ఇహిజ యేసు బత్తిజనాన్ ఇజి వెహ్సినాన్. 20 యా సజతివందిజ్ మరి ఇనిక కిదెజ్ ఇజి నెన్వందాతానె నాను పవులు వెట, 'సీను యెరూసలేమ్దు సాన్ని బానె దిన్ని వందిజ్ తీర్పు తీరిసె ఆదెజ్ మన్ను ఆజినిదా?', ఇజి వెన్బాత. 21 గాని పవులు, 'రోమ రాజా ఆతి కయ్సరు నజీ తీర్పు కిదెజ్' ఇజి వెహ్సెజ్ నాను వన్నిజ్ కయ్సరుబాన్ ఫాక్సేండ్ ఇబ్బె జెలిదునె ఇడ్దెజ్ ఆడ్ర సిత్త". 22 అగ్రివ రాజా పెన్తువెట, "అయ పవులు వెహ్సెకెజ్ వెండ్రెజ్ నాను ఇష్టమాజిన" ఇహిజ్, "విగహిజ్ సీను వెండ్రెజ్ ఆనాద్", ఇహోన్.

పవులు అగ్రివ రాజా ఎద్రు నిల్సినాన్

23 మహ్సా నాండిజ్ అగ్రివ రాజాని, వన్ని తజ్జిని ఆతి బెర్నికయ రాజా వర్గిని అతికారం ఇండ్ర వాతార్. వారు ఎసా గొప్ప పెరికార్ ఇజి తోరిసి కర్సు ఆతి రాజారి సాక్రెజ్ ఇట్కిజి, బజారం, వెండి ఇడ్డిజి రోమ సయ్నమ్ది పెరి అతికారి లోకుర్ వెట, పట్నమ్ది ముకెలమతివరివెట వాతార్. వాతార పవులుజ్ తగ్ల ఇజి పెన్తు ఆడ్ర సిత్తిజ్ జమానుజ్ సాహారం పవులుజ్ వరి నడిమి తతార్. 24 అయావలె పెన్తు వెహ్సెన్, "అగ్రివ రాజా, మాబాన్ కూడెజి వాతిమహి విజా లోకాండె, మీరు యా పవులు నుడెజినిదెర్. యెరూసలేమ్దు మరి ఇబ్బెబా యూదురు విజేర వీండ్రు బత్కినిక ఆపిద్ ఇజి గగోలత్తార నావెట పిరాడ్ కిత్తార్. 25 గాని సావుదిజ్ తగితిక ఇనికబా వీండ్రు కిమిత్తాన్ ఇజి నాను నెస్తానె రోమ రాజాబాన్ సాండ్రెజ్ వీండ్రు వెహ్సెజ్ రోమ రాజాబాన్ సాన్ని తీర్పు ఆపిద్ ఇజి నాను తీర్మానం కిత. 26 గాని నాను రోమ రాజాజ్ విన్నివందిజ్ ఇనిక రాస్తి ఫాక్సెజ్ ఇజి తోర్వత. తీర్పు కిదెజ్ తగితిక ఇనికబా విని ముస్సు సిల్లెద్. అందెజె మీరు విజేరి నడిమిని, అగ్రివ రాజా, నీ నడిమిబా విన్నిజ్ తత్త మన్ను. మాపు విన్నివెట వర్గివెనుక ఇనికబా రాస్తెజ్ నెన్నాను. 27 తోహ్సి అసి తీర్పు కిదెజ్ ఫాక్తివన్నిముస్సు ఇని నింద మోవ్త మనాద్ ఇజి వెహ్సెండ్ వన్నిజ్ కయ్సరుబాన్ ఫాక్సెజ్ ఆపిద్ ఇజి నాను నెన్నా".

26

అగ్రివ రాజా పవులుజ్ నుడెజి, "ఏలు నీ వందిజ్ వర్గిదెజ్ నాను సరి సీజిన", ఇజి వెహ్సెన్. అయావలె పవులు కియు సాస్తాండ్రె వన్ని వందిజ్ వాండ్రె ముదాయి ఇజి మొదొల్స్తాన్, 2 "అగ్రివ రాజా, యూదురు నా ముస్సు మొప్పి నేరమ్కు నిజం ఆపిద్ ఇజి నావందిజ్ నీ ఎద్రు వర్గిదెజ్ నాను గొప్ప సర్ల ఆజిన. 3 ఎందానిజ్ ఇహిజ యూదురి అలవాటుజ్ విజా వరి గొడెబెజ్ విజా నీను బాగ నెసినికి. అందెజె దయ కిజి నా మాట ఓరిసి వెండ్రు.

4 ఇజిరివలెహోన్ అసి నాను ఎలాగ మహ ఇజి, నా సాంత లోకుర్ నడిమి, నా సాంత దేనమ్దు, యెరూసలేమ్దుబా, ఎలాగ బత్తిజి మహ ఇజి, యూదురు విజేర బాగ నెసినార్. 5 మా మతమ్దు పరిసయ్రి జుబుదికార్ ఉండ్రీ రూలుబా తవ్పిండ్ సీతి నిజాతిదాన్ నడినార్. వరి లోఇ ఒదెన్వజ నాను బత్తిజి మహ ఇజి వారు నావందిజ్ సాని వెహ్సెజ్ ఇహిజ, సాని వెహ్సెజ్ అట్నార్. ఎందనిజ్ ఇహిజ, వారు మొదొహోన్ అసి నజీ నెసినార్. 6 ఏలు ఇహిజ, దేవుణు మా అనిగొగొర్ వెట, సీనా ఇజి కిత్తి ఒట్టుదిజ్ ఎద్రునుడెజి మహిదన్నివందిజ్ నజీ తీర్పు కిజినార్. 7 మా వన్నెండు తెగ్గదికార్ యా ఒట్టువందిజె ఎద్రు నుడెజి దేవుణుదిజ్ రెయు ఫాగల్ డెన్వందె పార్లనం కిజి మంజినార్. 8 రాజా, నానుబా ఆసదాన్ ఎద్రు నుడెజి మంజినిదన్నివందిజె యూదురు నా ముస్సు నేరం మొప్పినార్. 8 సాతివరిజ్ దేవుణు నికాన్ ఇజి నమ్మిదెజ్ మాపు అట్వెన్ ఇజి మీరు ఎందనిజ్ వెహ్సెనిదెర్?

9 నజరేతుదికాన్ యేనువందిజ్ వెహ్సెమని విజా దన్నిజ్ నెక్కిఫాక్సెజ్ నాను అట్టి వణి విజా కిదెజ్వలె ఇజి నానుబా ముందాల ఒడిబిజి మహ. 10 అయావజనె నాను యెరూసలేమ్దు కిత. పెరి పుజేరిజ్ నజీ అతికారం సిత్తిజ్ నాను దేవుణుదిజ్ కేట ఆతి నండొండారిజ్ జెలిదు ఇట్టా. అక్కాదె ఆవండె, వరిజ్ సప్తెజ్ తీర్మానం ఆతిజ్ 'నానుబా ఒప్పొక్కొడెజిన', ఇజి వెహ్సె.

11 నాను నండొ సుట్టు యూదురి మీటిజ్ ఇల్కాజ్ ఇల్కాజ్ సాన్ని నమ్మితి వరిజ్ గొప్ప మాలెజ్ కిత. యేసు ముస్సు నమకం ఇడ్వెప్ ఇజి వారు వెహ్సెదాక నాను బలవంతం కిత. అక్కాదె ఆవండె వరి ముస్సు ఒదె కోవం ఆతానె, ఆఇ పట్నమ్కాజ్బా సాహనె బాన్బా మాలెజ్ కిత".

పవులు ఎలాగ యేసుప్రబుజ్ నమ్మితికాన్ ఆతాన్ ఇజి వెహ్సెనాన్

12 "అహె నాను ఒర్సు, పెరి పుజేరిజు సిత్తి అతికారమ్దాన్ ఆడ్రదాన్ దమస్సు పట్నమ్దు సాన్ని మహ. 13 ఓ రాజా, మదెనె ఆతివలె సర్దు సాన్ని మహివలె, ఆగాసమ్దాన్ వాతి పెరి జాయ్ నుడెజత. అయ జాయ్ పార్దు జాయ్ ఇంక పెరి జాయ్. అక్క నజీ సుటులం, నావెట మహివరి సుటులం డెయ్తాద్. 14 మాపు విజెపె బూమిదు అర్తావ్. అయావలె, 'సవులు, సవులు, సీను నజీ ఎందానిజ్ మాలెజ్ కిజిని? ముల్లు డుడ్డుదాన్ గుతివలె మర్జి వెనుక గుసి ఆతిజ నండొ కస్టం తపిస్సి', ఇజి అరామియ బాసాదు వెహ్సె మాట నాను వెహ్.

15 'సీను ఎయి, ప్రబు', ఇజి నాను వెన్బాతిజ్, 'సీను మాలెజ్ కిజిని యేసు నానె' ఇజి ప్రబు నావెట వెహ్సెన్. 16 'ఏలు నిజ్జి నిల్త. నాను ఎందనిజ్ నిజీ తోరె ఆత ఇహిజ, నావందిజ్ వణి కిదెజ్, నావందిజ్ నేండ్రు నుడెతికెజ్ విజేరిజ్ వెహ్సె, వాని కాలమ్దు నాను నిజీ తోరిస్సికెజ్ విజేరిజ్ వెహ్సె నజీ ఉండ్రీ సానివజ మండ్రెజ్ నిజీ నాను ఏర్పాటు కిజిన. 17 ఇస్రాయేలు లోకాణిజ్ నిజీ నాను గెల్పెన్న. యూదురు ఆఇ లోకాణిజ్ గెల్పెన్న. యూదురు ఆఇవరినడిమి నాను నిజీ ఫాక్సె.

18 ఎందానిజ్ నిజీ ఫాక్సె ఇహిజ, వారు సీకటిదాన్ జాయ్దు వాజి వరి కణెకెజ్ తోరె ఆదెజ్. వరిజ్ సయ్తాన్ సత్తుహోన్ దేవుణు దరోట్ మహ్సెజ్. నా ముస్సు నమకం ఇడ్జి, వరి పాపమ్కు నొరె ఆదెజ్. నావందిజ్ కేట ఆతి వరివెట కూడెజి మండ్రెజ్. దిన్నివందిజె నిజీ వరి నడిమి ఫాక్సెన్' ఇజి ప్రబు నావెట వెహ్సెన్.

19 అందెజె ఓ అగ్రివ రాజా, నాను ఆగాసమ్దాన్ వాతి అయ మాటెజ లోజెత్త. 20 లోజెత్తానె తొలిత దమస్సు పట్నమ్దు, వెనుక యెరూసలేం పట్నమ్దు, మరి యూదయ ప్రాంతం విజా, యూదురు ఆఇ వరిజ్బా నెస్సిప్త. ఇనిక నెస్సిప్త ఇహిజ, విజేరె, పాపమ్కు డెసి దేవుణు దరోట్ మర్దు ఇజి. పాపమ్కు డెస్సిస్తిదన్నిజ్ తగితిలెకెండ్ నెగ్గ వణిజ్ కిదు ఇజి. 21 నాను ఈహె నెన్పెస్తి దన్నివందిజె యూదురు నజీ యెరూసలేమ్దు మన్ని దేవుణు గుడిమ నుడెతార నజీ అస్తారె సప్తెజ్ నుడెతార. 22 గాని గడెస్తి సాహి కాలం విజా దేవుణు నజీ తోదుః మహోన్. అందెజె నాను ఏలు ఇబ్బె నిల్సి తక్కువరివెట, పెరివరివెట నిజం వెహ్సెన. వాని

కాలమ్ దు ఇనికెజ్ జగ్గెనెలె ఇజి ప్రవక్తరుని, మోసె వెహ్తాకెజె నానుబా వెహ్సిన. 23 అక్రెజ్ ఇనికెజ్ ఇహిజ, క్రీస్తు నండొ మాలెజ్ ఆజి సాతాన్. సాతి వరిబాణిజ్ తొలిత నిజ్నాన్. నిజ్జి, యూదురిజ్, యూదురుఅజవరిజ్ దేవుణు - దరోట్ సాండ్రెజ్ జాయ్ తోరిన్నాన్”.

24 పవులు ఈహె, వన్ని వందిజ్ వర్గిజి మహిజ్ పెస్తు, “పవులు, నీను వెరి వాండ్రు. నండొ సదు కిత్తిజ్ అక్క నిజి వెరి కిబిసినాద్”, ఇజి డటం వెహ్సాన్.

25 దన్నెజ్ పవులు, “గొప్ప పెరికాన్ ఆతి పెస్తు, నాను వెరి వాండ్రు ఆవ. నాను నెగ్గిబుద్దిదానె నిజం వెహ్సిన”, ఇహాన్. 26 “రాజా యా సజతిజ వందిజ్ నెసినాన్. అందెజి వన్నివెట దిన్ని వందిజ్ నాను అడ్డు సిల్లెండ వర్గిజిన. దిన్ని వందిజ్ ఇనికబా వన్నిజ్ డాజ్జి మనిక సిల్లెద్. ఎండనిజ్ ఇహిజ, జగ్గెనెకెజ్ విజా ఉండ్రీ మూల పడఃకాద్ జగ్గెవతాద్. 27 ఓ రాజా, ప్రవక్తరిమాటెజ్ నీను నమ్మిజిని ఇజి నాను నెన్నా”. 28 దన్నెజ్ రాజా, “నిస్సా సులువుదాన్ నజి క్రీస్తు లోకు కిదెజ్ ఇజి నీను నజి ఒపిసినదా?”, ఇహాన్.

29 “సులువుదానొ అలస్యమ్దానొ నీను ఒరిదె ఆవ, నేండ్రు నజి వెంజినికార్ విజేరి నా వజ ఆదెజ్ ఇజి నాను దేవుణుదిజ్ పార్దనం కిజిన. గాని నా వజ గొల్స్కాణిజ్ తొహె ఆదెజ్ పార్దనం కివీ”, ఇజి పవులు వెహ్సాన్. 30 అయావలె రాజా, గవర్నరు, బెర్గిక్, వరివెట బస్తి మహికార్ విజేరి నిజిత్తార్. 31 వారు వెల్లి వాతారె, “పిండ్రు సావుదిజ్ గాని, తొహె ఆదెజ్ గాని తగితి పణి ఇనికబా కివితాన్”, ఇజి ఒరెన్ వెట ఒరెన్ వర్గెతాన్. 32 “పిండ్రు ‘కయనరు రాజాబాన్ సాన్’, ఇజి వెహ్సావండ మహాన్ ఇహిజ విన్నిజ్ డిఃస్తినిత్తిక మరి”, ఇజి అగ్రివ రాజా పెస్తుజ్ వెహ్సాన్.

పవులు ఓడః ఎక్కి రోమ పట్టుం సాన్నినాన్

27 మాపు ఓడః ఎక్కి ఇటలి దేసం సాండ్రెజ్ ఇజి ఆడ్ర వాతిజ్, పవులుజ్, మరి జెలిదు మహి సెగొండారిజ్ యూలి ఇని సదాతిపతిజ్ ఒపజెప్తార్. వాండ్రు రోమ సయన్మలోఇ ఉండ్రీ గుంపు ఆతి అవ్గుస్తు ఇని గుంపుదికాన్. 2 మాపు అద్రమత్తియదాన్ వాతి ఉండ్రీ ఓడః ఎక్తావె పయనం ఆతావ్. యా ఓడః ఆసియ ప్రాంతమ్దు సమ్దరం డగ్రు మహి పట్నమ్కాజ్ సానిక. దెనలోనిక పట్నమ్దాన్ ఒరెన్ మసిదోని దేసెమ్దికాన్ అరిస్తరికు ఇనికాన్ మావెట మహాన్. 3 మహ్నా నాండిజ్ సిదోను ఇనిబాన్ వాతావ్. సతాతిపతి ఆతి యూలి పవులు ముస్సు దయ తోరిస్తాండ్రె పవులు వన్ని కూలబాబుర్బాన్ సాన్ని వారు వన్నిజ్ నెగ్గెండ సుడఃదెజ్ సెల్వ సిత్తాన్. 4 వెనుక బాణిజ్ సాతావె కుప్త ఇని ద్విప్పు ఓరమ్దాన్ గాలి తక్కు మహి బాడ్డిదు పయనం ఆతావ్. ఎందానిజ్ ఇహిజ ద్విప్పుదాన్ గొప్ప గాలి సమ్దరం దరోట్ డెయ్జి మహాద్.

5 వెనుక మాపు కిలికియ, పంపులియ ఇని ప్రాంతమ్కాజ్ డగ్రు మహి సమ్దరం డాట్టావె లుకియాదు మన్ని మూర ఇని పట్నమ్దు వాతావ్. 6 బానె అలెక్సాంత్రియదాన్ వాతి ఉండ్రీ ఓడః ఇటలి పట్టుం సాండ్రెజ్ తయారాత మనాద్ ఇజి రోమ సతాతిపతి సుడఃతాన్. సుడఃతండ్రె మజి అయ ఓడఃదు ఎక్కిస్తాన్. 7 మాపు నండొ రోస్సు మెలేక పయనం కిత్తావె గాలివందిజ్ మాలెజ్ ఆతావె క్షీదు ఇని ద్విప్పుదిజ్ ఎద్రు వాతావ్. గాలి మజి ఎద్రు డెయ్తిజ్ అయా సరి మరి సాండ్రెజ్ అటవతావ్. అందెజి మాపు గాలి తక్కు డెయ్తిమహి బాడ్డిదాన్ సాహెవె సలోమ్ ఇని బాడ్డి డాట్టి క్రేతు ద్విప్పు ఓరదాన్ పయనం కిత్తావ్. 8 గాలి డెయ్తిజ్ మాలెజ్ ఆజి, ఓరదాన్ పయనం కిత్తావె నెగ్గిబాడ్డి ఇని కూక్కి జాగదు వాతావ్. దన్ని డగ్రు లుసెయ పట్టుం మహాద్.

9 పయనం కిజినిజ్ నండొ రోస్సు ఆతె. యూదురి పండయ్ ఆతి ఉపాసి రోజాబా గడఃపు సాహాద్. సమ్దరమ్దు ఓడఃదు సాండ్రెజ్ ప్రమాదమాని కాలం ఆత మహాద్. అందెజి పవులు వరిజ్ బుద్ది వెహ్సాన్. 10 “బాబురాండె, మాటు ఏలు సాన్ని మహిజ ఓడఃదిజ్ ఇబ్బె మన్ని సామానమ్కాజ్, పు నస్టమ్కు, మరి మా పాణమ్కాజ్ నస్టమ్కు వానాద్, ఇజి నాను నెన్నా”. 11 గాని అయ రోమ సతాతిపతి పవులు వెహ్తి మాట అన్ఎండ, అయ ఓడః నడిఃపిసినవన్ని మాటెజ్ అయ ఓడః ఎజామాని మాటెజ్ అస్తాన్. 12 పిన్ని కాలమ్దు మండ్రెజ్ అయా బాడ్డి నెగ్గికాద్ ఆవద్ ఇహిజ బాణిజ్ డిఃసి సాతెజ్ నండొండార్ వెహ్సార్. క్రేతదు మన్ని పీనిక్కు ఇనిబాన్ అందిజి బానె పిన్ని కాలం గడఃప్పాట్ ఇజి వారు విజేరి ఒడిఃబితార్. యా పీనిక్కు పట్టుం దనిణ పడఃమర, ఉస్సన్ పడఃమర దరోట్ మొకొం మహ్తా మహాద్.

సమ్దరమ్దు ముసూర్ డెయ్జినాద్

13 దనిణ దరోటాన్ ఉండ్రీ ఇజిరి గాలి డెయ్తిజ్ వారు సాండ్రెజ్ ఒడిఃబిత్తిలెకెండ సానాల్ ఇజి ఒడిఃబితారె, ఓడఃది లంగరు † లాగితారె సాత్తార్. క్రేతు ఒర దానె సాన్ని మహాద్. 14 గాని సణెం వెనుక ఉస్సన్ తూర్పు దరోటాన్ ఊరకులోన్ †† ఇని పెరి గాలి ద్విప్పుదాన్ గొప్పజ్ డెయ్తాద్. 15 పెరి గాలి ఓడఃదిజ్ డెయ్తిజ్ గాలి ఎద్రు సాండ్రెజ్ అటవతాతాద్. అందెజి మాపు గాలి ఎద్రు సాండ్రెజ్ అటవతాతానె గాలి డెయ్తి మహి దరోట్టె ఓడః మహ్తావె సాహావ్.

16 వెనుక కంద ఇని ఉండ్రీ ఇజిరి ద్విప్పు ఓరదాన్ సాహివలె అయ గాలి మా ముస్సు డెయ్విండ అయ ద్విప్పు మజి ముస్తాద్. నండొ కప్పబాడిఃతావె ఇజిరి ఓడఃదిజ్ ముస్సు లాగితావ్. 17 ముస్సు లాగితావె నెగ్గెండ తొహ్త ఇత్తావ్. వెనుక పెరి ఓడఃదిజ్ పెరి నానుదాన్ సుటులం గటిజ తొహ్తార్. మరి సుర్లిసు ఇని ఇస్సు మెటు ముస్సు ఓడః డెయ్నాద్ను ఇజి తియెలాతారె ఓడః మెలేక సానీద్ ఇజి ఓడఃది సావ † డిఃవారె గాలి డెయ్నిదరోట్ సానీద్ ఇజి డిఃస్తాన్. 18 అయ ముసూర్ డిఃవిండ డెయ్జి మహిజ్ మహ్నా నాండిజ్ వారు ఓడఃదు మహి బరుజ్ సమ్దరమ్దు విసిర్డెజ్ మొదొల్స్తాన్. 19 దన్ని మహ్నా నాండిజ్ వారు ఓడః నడఃపిసిన సెగం సామానమ్కు వరి సాంత కికాణిజ్ సమ్దరమ్దు విసిర్డార్. 20 నండొ రోస్సు పార్దు గాని సుక్కెజ్ గాని తోర్విండ మహి. గాలి గొప్పజ డెయ్జి మహాద్. మా పాణమ్దిజ్ ఎలాగ గెల్పెస్సెజ్, మాపు సానాప్లసు ఇజి తియెలాతావ్.

21 వారు నండొ రోస్సు బోజనం కివీండ మహిజ్ పవులు వరి నడిఃపి నిహండ్రె వెహ్సాన్, “బాబురాండె, మీరు నామాట వెంజిమంజినిక ఇహిజ నెగ్గెండ మహాద్ మరి. క్రేతుదాన్ సావిండ మహిదర్ మరి. సావిండ మంజినిక ఇహిజ, యా నస్టమ్కు కప్పమ్కు జగ్గెవిండతాద్ మరి. 22 ఏలు ఇహిజ దయ్రిమ్దాన్ మండ్రు ఇజి నాను గటిజ వెహ్సిన. ఎందానిజ్ ఇహిజ మీలోఇ ఎయెన్బా సాజి సాన్ఇదెర్. గాని ఓడః ఉండ్రెనె పాడఃన సానాద్. 23-24 ఎందానిజ్ ఇహిజ, పాదొయ్ నాను, ఎయె వాండ్రునొ, ఎమేణి దేవుణుదిజ్ పార్దనం కిజిననొ, అయ దేవుణు దూత నాబాన్ వాతండ్రె, పవులు, తియెల్ ఆమ. నీను కయనరు రాజా ఎద్రు నిల్లెజ్వలె.

† బరుమన్ని పణుకుదాన్ తయార్ కిత్తిక. గొల్స్కాణి తొహ్తి ఓడఃదు ఇద్దార్. సమ్దరమ్దు డిఃపిజ ఓడః బానె నిల్లాద్దె, సాన్విద్ †† ఊరకులోన్ ఇని తుహాన్ గాలి డెయ్జి ఓడః సాండ్రెజ్ గొప్ప కప్పమానాద్. అయ గాలి ఉస్సన్ తూర్పు దరోటాన్ డెయ్జినాద్ † గాలి వాజి నెక్కి ఒనిదన్నిజ్ ఓడఃదిజ్ తెరలెకెండ తొహ్తిక

దేవుణు కనికారమాతికాన్. నీవందిజ్ ఇదిలో నీ వెట మన్నివరి పాణమ్కు దేవుణు గెల్పిన్నాన్ల ఇజి వెప్తాన్. 25 అందెజె బాబురాండె, దయరమ్దాన్ మండ్రు. ఎందనిజ్ ఇహిజ దూత నావెట వెప్తావజ జగ్గినాద్ ఇజి నాను దేవుణు మాట నమ్మిజిన. 26 గాని మా ఓడః గాలిదు సాన్ని ఎంబెబా ఉండ్రీ ద్వీపుదు పాడానాద్", ఇజి పవులు వరివెట వెప్తాన్.

27 పదినాల్గి రోస్సు అద్రియ ఇని సమ్దరమ్దు మాపు ముసూర్దజ్ అబె ఇబ్బె బూలాజి మహాప్. మదరెయ్తు ఆతిజ్ ఎంబెనొ ఉండ్రీ దేమ్ డగ్రు వాజినాప్ ఇజి ఓడః నడిపినివరిజ్ ఉదెనమ్దు వాతాద్. 28 అందెజె వారు ఇజిరి బరుదిజ్ తాడు తొప్పి డిష్టారె ఎసా లోతు మనాద్ ఇజి సుడఃతార్. నూట ఇరవయ్ అడుఃగుజ్ లోతు మనాద్ ఇజి నెస్తార్. సెగం వెనుక మరి డిష్టారె తొంబయ్ అడుఃగుజ్ లోతు మనాద్ ఇజి నెస్తార్. 29 మా ఓడః ఓరదు మన్ని పణుకుముస్సు తగ్గినాదొ ఇజి తియెలాతారె వారు ఓడః వెనుకపడఃకదాన్ నాల్గి లంగరుజ్ డిష్టారె జాయ్ ఆనెండ పార్దనం కిజి మహార్. 30 ఇహిజ్, ఓడః నడిఃప్పికార్ ఓడః డిఃసి సాండ్రెజ్ సుడఃతార్. వారు ఓడః ముందాలోపడఃక మన్ని లంగరుజ్ డిష్టారె ఇజి నాటిసి ఓడఃదు మన్ని ఇజిరి ఓడః సమ్దరమ్దు డిష్టారె. ఇజిరి ఓడఃదు ఎక్కిసాండ్రెజ్ ఆలోసనం కిత్తార్. 31 పవులు అక్క నెస్తాండ్రె సదాతిపతివెట, "నయ్నమ్దివరివెట, యా ఓడః నడిఃపినికార్ ఓడః డిఃసి సానార్ ఇహిజ, మీరు తప్పె ఆదెజ్ అల్ఇదెర్", ఇహాన్. 32 అందెజె నయ్నమ్దికార్ ఇజిరి ఓడః తొప్పిమహి నాను కుతారె సమ్దరమ్దు డిష్టారె సితార్.

33 కోడిఃజామ్దు పవులు విజెరె వెట వెప్తాన్, "ఏలు బోజనం కిదు, మీరు బోజనం కిండాజి పదినాల్గి రోస్సు ఆతె. నిస్సా రోస్సు మీరు మన్ను బాద ఆజి ఇనికబా ఉజెంండ మహిదెర్. 34 అందెజె నాను బతిమాల్జిన, బోజనం కిదు. ఎందనిజ్ ఇహిజ మీరు సావండ మండ్రెజ్ వలె ఇహిజ బోజనం కిదెజ్వలె. తియెలామాట్. మీలోఇ ఎయె బుర్రదాన్బా ఉండ్రీ కొప్పుబా రాలజి సాన్వద్ ఇహాన్. 35 ఈహు వెప్తి వెనుక పవులు రొట్టె అస్తాండ్రె వారు సుడఃజి మహివలె దేవుణుదిజ్ వందనమ్కు వెప్తాండ్రె రొటె ముకెజ్ కితాండ్రె తిండ్రెజ్ మొదొల్స్తాన్. 36 వారు విజెరె దయరం ఆతారె బోజనం కిత్తార్. 37 అయ ఓడఃదు మాపు మొత్తం రుండివందెజ్ డబయ్ఆరు - మంది మణిసిర్ మహాప్. 38 వారు పాటపంజా ఉటి వీన్తి వెనుక గొదుముజ్ సమ్దరమ్దు విసీరెతారె ఓడః సుల్కాజ్ కిత్తార్.

ఓడః బదెజ్ ఆజినాద్

39 పాద్దు సాత్తిజ్ వారు అందితి దేసెం ఎంబెణి దేసెం ఇజి నెస్వతార్ గాని ఓడః ఉండ్రీ ఇస్సు మన్ని పడఃకాద్ ఒతెజ్ తగితి ఉండ్రీ నెగ్గి పడఃక సుడఃతారె బాన్ ఒనాల్ ఇజి ఒడిఃబితార్. 40 అందెజె ఓడః నడిఃపినికార్ లంగరుజ్ తొప్పిమహి నాస్సుజ్ కుతారె సమ్దరమ్దు డిష్టారె. ఓడః నడిఃప్పి సుకానుజ్ † కట్టుజ్ కుతార్. ముందాలో పడఃకాదు మహి సావ ఎక్కిసారె గాలి నెక్కి ఒనిలెకెండ ఓరదు నడిఃపిస్తార్. 41 గాని ఓడః ఏరులోఇ మన్ని ఉండ్రీ ఇస్సు మెటుదు డఃసి ఆతాదె ఓడః ముందాపిక ఇస్సాదు నాడిఃతాద్. వెనుక పడఃకాదు పేరి ఉల్కెజ్ డెయ్తిజ్ ఓడః బదెజ్ బదెజ్ ఆత సాహాద్.

42 జెలిదాన్ ఒసి మహి లోకుర్ సమ్దరమ్దు ఈత డెయ్తిజ్ తప్పె ఆజి సానార్ ఇజి తియెలాతారె పరిజ్ నప్పెజ్ నయ్నమ్దికార్ ఆలోసనం కిత్తార్ ††. 43 గాని సతాతిపతి పవులు గెల్పిన్నెజ్ ఒడిఃబిజి నయ్నమ్ది వరి ఆలోసనమ్దిజ్ సరి సివితాన్. ఈత డెయ్తిజ్ నెస్సివారు ముందాల సమ్దరమ్దు డిఃగిజి గదెం డాట్టి ఈత డెయ్తిజ్ ఓరదు సాండ్రు ఇజి ఆడ్రె సిత్తాన్. 44 మహిపరిజ్ బల్లెజ్ నెక్కెజ్ ఓడఃది ముక్కెజ్ అసి ఒడ్డుదు సాండ్రెజ్ ఆడ్రె సిత్తాన్. ఈహా మాపు విజెపె గెల్స్తాపె ఒడ్డుదు అందితాప్.

మెలిత ద్వీపుదు అందిజినార్

28 మాపు తప్పె ఆతి వెనుక అయా ద్వీపు పేరు మెలిత ఇజి నెస్తాప్. 2 అయ ద్వీపుదికార్ మజి కిత్తి సాయం నిస్సా ససా ఆవద్. వారు సిసు ఎత్తారె మజి విజెరిజ్ కూడఃష్టారె. ఎందానిజ్ ఇహిజ పేరు డెయ్తిజ్ మొదొల్స్తాజ్ పిన్ని కితాద్. 3 పవులు ఉండ్రీ కట రివెజ్ పెప్పా తతాండ్రె దోస్తాన్. అక్క సిసుముస్సు అర్పివలె గొప్పె వినం మన్ని ఉండ్రీ సరాన్ వేడిఃదిజ్ వెహికాణ్ వెల్లి వాతాదె పవులు కీదు కట్టాద్. 4 పవులు కీదు సరాన్ దూజ్జిమహిక అయ ద్వీపుదికార్ సుడఃతిజ్ వారు ఒరెన్ వెట ఒరెన్ వర్గితార్, "నిజమ్నె, వీండ్రు లోకాజ్ సప్పికాండ్రె, ఏలు సుడఃఅ, సమ్దరమ్దాన్ గెలిసి వాతాన్ గాని నాయం సీని దేవుణు విన్నిజ్ బత్తిదెజ్ సరి సివెన్.

5 గాని పవులు అయ సరాన్దిజ్ సిసుముస్సు సడఃతిజ్ అది సిసుద్ అర్తాద్. పవులుజ్ ఇనికబా ఆవితాద్. 6 ఆ ద్వీపుదు మనికార్ పవులు ఉజినాన్, సిలిజ వెటనె సానాన్ ఇజి ఒడిఃబిజి సుడఃజి మహార్. గాని వారు సుడఃజిమహిజ్ పవులు ఇనికబా ఆవితాద్. అందెజె వారు పరి మన్ను మారిస్తారె, 'వీండ్రు ఒరెన్ దేవుణులెకెండ మన్నికాన్' ఇజి వెప్తాన్.

7 అయ ద్వీపుది నెయ్యి ఆతి పొప్పి ఇనివన్నిజ్ బానె డగ్రునె బూబుజ్ మహా. వాండ్రు మజి వన్ని కూలెజ వజ మర్యాద సితండ్రె మూండ్రీ రోస్సు వన్ని ఇండ్రె కూడుఃష్టాన్. 8 అయ నెయ్యి అప్పాసి నోబుదిజ్, మరి నెత్తెర్పాటదాన్ బాద ఆజి మహాన్. పవులు, వాండ్రు మహి గదిలోఇ సాహాండ్రె పార్దనం కితాండ్రె వన్ని ముస్సు కికు ఇడెజి వన్నిజ్ నెగెండ్రె కిత్తాన్. 9 ఇక జగ్గితిజ్ అయా ద్వీపుదు కష్టం అన్తిమహికార్ విజెరె బానె వాతారె నెగెండ్రె ఆతార్. 10 వారు మజి నండొ ఇనాయమ్కు సితారె నెగ్గెక కిత్తార్. వెనుక మాపు పయ్నమాతివలె మజి అన్సరం మనికెజ్ విజా ఓడఃదు తత్తారె ఇట్టార్.

పవులు మెలిత ద్వీపుదాన్ రోమ పట్నం సాన్నినాన్

11 ముండ్రీ నెలెజ్ ఆతి వెనుక అలెక్సాండ్రీయదాన్ వాతి ఉండ్రీ ఓడః ఎక్కాపె పయ్నమాతాప్. అయ ఓడః పిన్ని కాలమ్దు మెలిత ద్వీపుదు మహాద్. కాస్తరు, పోలుక్కు ఇని జవల దెయ్మకాణి బొమ్మెజ్ ఆ ఓడః ముందాహిబాన్ మహాద్. 12 మాపు సురకూన్ ఇనిబాన్ వాతాపె బానె మూండ్రీ రోస్సు మహాప్. 13 బాణిజ్ పయ్నమాతాపె సులులుం తిర్వేజి రేగియు ఇనిబాన్ వాతాప్. ఉండ్రీ రోజా వెనుక దసిణ దరోట్దాన్ గాలి డెయ్తిజ్ మహా నాండిజ్ పొతియిలి ఇనిబాన్ వాతాప్. 14 బానె నమ్మితి పరిజ్ సెగొండారిజ్ సుడఃతాప్. 'మాబాన్ వారం రోస్సు మండ్రు' ఇజి వారు మజి బతిమాలితార్. దన్నివెనుక మాపు రోమ పట్నమ్దు

† ఓడః తిర్పి ఇజిరి మర †† కయ్యువారు తప్పె అతిజె వరిజ్ కాన్ కిని నయ్నమ్ది వరిజ్ వరి అతికారి లోకుర్ నప్పెజ్ ఇజి రోమ రూలు మహాద్

వాతావ్. 15 రోమాదు మహి నమ్మితికార్ మాపు రోమాదు వాజినావ్ ఇజి కబు వెహారె సెగొండార్ రోమ పట్టుమ్దాన్ అపియాదు † మహి సత దాక, మరి సెగొండార్ మూండ్రి సత్రమ్కు †† మహి బాడ్డిదాక మజి కూక్కి ఒతెజ్ వాతార్. పవులు వరిజ్ సుడేతిజ్ దేవుణుదిజ్ స్తుతి కిత్తాన్. వన్నిజ్ దయరం వాతాద్. 16 రోమ పట్టుమ్దు అందితిజ్ పవులుజ్, వన్నిజ్ కావ్కిని జమానివెట ఉండ్రి ఆదు ఇండ్రొ కేట మండ్రెజ్ సెలవ దోహ్కాద్.

పవులు రోమదు మన్ని యూదురిజ్ దేవుణు మాట వెప్పినాన్

17 మూండ్రి రోస్సు సాహి వెనుక పవులు బానె మహి యూద పెద్దెల్జ వన్నిబాన్ కూక్కిస్తాన్. వారు కూడేజి వాతివలె పవులు వరివెట వెప్తాన్, "తంబెరిజాండె, మా లోకాజ్ వడేఇకెజ్ గాని, మా అనిగొగొరి అలవాటుజ వడేఇకెజ్ గాని ఇనికబా నాను కివిత. ఇహిజ్బా, నజి యెరూసలేమ్దు అస్తారె రోమవరిజ్ ఒవజెప్తార్. 18 వారు నజి గవర్నరుబాన్ తత్తారె నండె వ్రస్సుజ్ వెన్బాజి సుడేతివలె సాపుదిజ్ తగితి తప్పు ఇనికబా నాను కివిత ఇజి తెలితాద్. అయావలె నజి డిస్సెజ్ సుడేతార్. 19 గాని నజి డిస్సెజ్ యూదురు ఒప్పుకొడేవతార్. అందెజె నా సాంత లోకుముస్సు నజి ఇని మొరొ సిల్లిజ్బా కయ్నరుబాన్ సాన్ని నావందిజ్ వెప్తాజ్ ఆత. 20 అందెజె నాను మిజి సుడేదెజ్ మీ వెట వర్గదెజ్ మిజి కూక్కిస్త. ఎందానిజ్ ఇహిజ ఇస్రాయేలు లోకు ఎయెవన్నివందిజ్ ఎద్దు సుడేజి మంజినారొ వన్నివందిజె నాను ఏలు యా గొలుస్కాన్ తొహా ఆత మన్న", ఇజి వరివెట వెప్తాన్.

21 దన్నిజ్ యూదురు, "యూదయ ప్రాంతమ్దు మన్ని మా లోకాణిజ్ మీవందిజ్ మజి ఇని ఉత్తమ్బా రెవతాద్. ఇబ్బె వాతి మా లోకు ఎయెర్బా మీ వందిజ్ ఇని సెఇ మాటబా వెహ్వతార్. నీను ఇనికాదొ తప్పు కిత్తి ఇజి మాపు వెన్వతావ్. 22 గాని యా సజతివందిజ్ మీ ఆలోసనం ఇనిక ఇజి వెండ్రెజ్ మాపు ఆస ఆజినావ్. ఎందానిజ్ ఇహిజ నీను కూడితి మహి యా జటువందిజ్ విజెరె లోకుర్ వగదాన్ వెప్పినార్ ఇజి మాపు నెసినావ్", ఇహోర్.

23 అందెజె వారు పవులు వెట పలాన్ రోజా కూడేదెజ్ ఏర్పాటు కితారె పవులు బత్రినిబాన్ మంద ఆజి వాతార్. పవులు సెందాహాన్ అసి పాదొయ్దాక నెగ్రెండె వరిజ్ వెప్పి దేవుణు ఏలుబడిః వందిజ్ వరివెట వెప్తాన్. మోసె సిత్తి రూలుజ్ దాన్, ప్రవక్తరు రాస్తి మాటెజాణ్ యేసువందిజ్ తోరిసి, వాండ్రు వెప్పికెజ్ నిజమె ఇజి వెప్పి తోరిస్తాన్. వరిజ్ ఒప్పుకొడిస్సెజ్ సుడేతాన్. 24 పవులు వెప్తి మాటెజ్ సెగొండార్ నమ్మితార్, మహికార్ నమ్మివతార్.

25 వారు ఒరెన్ వెట మరి ఒరెన్ వర్గిజి నెక్త పాక్తారె ఉండ్రె మన్ను ఆదెజ్ అట్ఎండాతారె మర్జి సాహోర్. వారు మర్జి సాని ముందాల పవులు వరివెట ఉండ్రె మాట వెప్తాన్, "దేవుణు ఆత్మ యెసయ ప్రవక్త దాన్ మీ అనిగొగొర్ వెట వెప్తి మాట నిజమె.

26 అక్క ఇనిక ఇహిజ, "నీను సాన్ని యా లోకాజ్ వెప్తు. 'మీరు బాగ వెంజినెదెర్ గాని అర్దం కిదెజ్ అట్ఇదెర్. బాగ సుడేజినిదెర్ గాని తొఇదెర్'. 27 ఎందానిజ్ ఇహిజ యా లోకురి మన్ను బేగి అర్దం కివెద్. వారు కణుకెజ్ గిబ్బాజ్ మూక్త మనార్. సిల్లిజ్ వారు కణకాణ్ సుడేతార్ మరి. మన్నుదు అర్దం కిత్తార్ మరి. నా దరోట్ మప్పిజ నాను వరిజ్ నెగెండ కెన", ఇజి దేవుణు వెప్తాన్.

28 అందెజె దేవుణు రక్కుణ సీనాన్ ఇని సువార్త యూదురు ఆఇ వరిజ్ సీజినాన్ ఇజి, వారు అయ మాట వెనార్, ఇజి మీరు నెస్సెజ్ వతా'. 29-30 రుండి పంటెజ్ పూర్తి పవులు ఉండ్రె ఇల్లు అదె లొస్తాండ్రె బత్రితాన్. వన్నిబాన్ వాతివరిజ్ విజెరిజ్ వాండ్రు డగ్రు కిత్తాన్. 31 దేవుణు ఏలుబడిః వందిజ్, ప్రబు ఆతి యేసుక్రీస్తు వందిజ్ దయరమ్దాన్, ఇని అడ్డు సిల్లెండ, నెప్పిస్తాన్.

† అపియాదు మహి సత రోమ పట్టుమ్దాన్ అరువయ్తొబ్బిది కిలో మీటర్ దూరం మహి †† పయనం కినికార్ నిద్రదిజ్ సాని గదిజ్. మూండ్రి సత్రమ్కు మహి బాడ్డి రోమ పట్టుమ్దాన్ యాబయ్ మూండ్రి కిలో మీటర్ దూరం మహి

మార్కు

నెల్ల కిబిసిని

యా ఉత్తం రాస్తికాన్ ప్రబు ఆతి యేసుక్రీస్తుజ్ అపొస్తుడు ఆతి పవులు. రోమాదు మన్ని దేవుణుదిజ్ నమ్మితివరిజ్ యా ఉత్తం రాస్తాన్. రాస్తి కాలం క్రీస్తుయేసు యా లోకమ్దు వాజి సిలువాదు సాజి, మర్ది నిజ్జి పరలోకమ్దు సాహివెనుక 56 నమస్తం నడిఃమి (ఏ.డి 55-56) రాస్ను మంజిన. యా ఉత్తమ్దు ముకెలమాతిక ఇనిక ఇహిజ, క్రీస్తువందిజ్ వెహ్ని సువార్త. సువార్త ఇహిజ ఇనిక, సువార్త నమ్మితివరిజ్ ఇనికెజ్ జగ్గినె, వినకవందిజ్ రాసినాన్. మరి, దేవుణు లోకురిజ్ నీతినిజయ్తి మన్నికార్ ఇజి ఎలాగ ఇడ్డినాన్, ప్రబు ఆతి యేసుక్రీస్తువలెహోన్ ఎలాగ విడుదల వానాద్ నన్ని నజతిజ వందిజ్ రాసినాన్.

1 క్రీస్తుయేసుజ్ పణి కినికానాతి పవులు ఇని నాను యా ఉత్తం రాసిన. సువార్త వెహ్నిజ్ దేవుణు నజి అపొస్తుడుజ వజ నిల్వ్రాన్. 2 సిన కాలమ్కు ముజాలె, ఇహిజ, యేసు ప్రబు యా లోకమ్దు వానెండ మహివలెనె, దేవుణు మాటెజ్ రాస్తి మహి ప్రవక్తరుబాన్ దేవుణు యా సువార్త వందిజ్ వెహ్ని ఇజి ఒపందం కిత్త మహాన్. 3 దేవుణు మరిసి వందిజె యా సువార్త. వీండ్రు లోకు వజ దావీదు రాజా తెగాదు పుట్టికాన్. 4 వీండ్రు దేవుణు వజ ఇహిజ, దేవుణు మరిసి ఇజి గొప్ప నత్తుదాన్ తోరె ఆతాన్. ఎలాగ ఇహిజ, వాండ్రు సాతి వరిబాణిజ్ మర్జి నిజితాన్. వాండ్రు మా ప్రబు ఆతి యేసు క్రీస్తునె.

5 క్రీస్తు దయాదర్మమ్దాన్ అపొస్తుడు వజ దేవుణు నజి కూక్తాన్. ఎందానిజ్ ఇహిజ, విజా జాతిదికార్ క్రీస్తుముస్సు నమకం ఇడ్డి, వన్నిజ్ మాడిసి, వన్నిజ్ లోజిజి మండ్రెజ్ ఇజి. 6 రోమ పట్నమ్దు యేసు క్రీస్తుజ్ నమ్మితికార్ ఆతి మీరుబా దేవుణు కూక్తి వరి లోఇ మన్నిదెర్. 7 దేవుణు ప్రేమ కిజి, వన్నిజ్ కేట ఆతి మిజి విజేరిజ్ నాను యా ఉత్తం రాసిన. బుబ్బాతి మా దేవుణుబాణిజ్, ప్రబు ఆతి యేసుక్రీస్తుబాణిజ్ కనికారమ్ని నిపాతి మిజి మనీద్ ఇజి నాను పార్దనం కిజిన.

రోమ పట్నమ్దు మన్ని నమ్మితివరిజ్ సాన్ని సుడెఃదెజ్ వవులు కోరిజినాన్

8 యా ఉత్తమ్దు తొలిత నాను మీరు విజిదెరె వందిజ్ దేవుణుదిజ్ వందనమ్కు వెహ్నిన. యేసు ప్రబువలెహోన్ నమ్మితి దన్నివందిజ్ రోమ దేసెమ్దికార్ ఏలుబడిః కిని విజా బాడ్డిదు మన్ని లోకుర్ వెహ్నినార్. 9-10 నాను ఎస్తివలెబా పార్దనం కినివెలె మీ వందిజ్ వెహ్నిని సువార్త పూర్తి మన్నుదాన్ నాను కిజిన ఇజి నెసిని దేవుణునె దిన్నిజ్ సాసి. గాని నాను ఎలాగ ఇహిజ్బా ఏలు వాజి మిజి సుడెఃదెజ్ దేవుణు సిత్తం ఆదెజ్ ఇజి పార్దనం కిజిన.

11 ఎందానిజ్ ఇహిజ, మిజి వాజి సుడెఃజి దేవుణు వందిజ్ బత్తిని బత్తుదు మిజి దయరం కిబిసెజ్ ఇజి ఆన ఆజిన. 12 ఎలాగ దయరం కిబిసెజ్ ఇహిజ మాటు ఒరెన్ వన్ని నమకమ్దాన్ మరి ఒరెన్ వన్నిజ్ దయరం వెహ్నిజ్వెలె. 13 నమ్మితి తంబెరిజాండె, నాను నండొ సుట్టు మిజి సుడిః వాదెజ్ ఇజి ఆలోననం కిత్త ఇజి మీరు నెస్సెజ్వెలె. గాని అట్ఎండ ఆత. ఎందానిజ్ ఇహిజ, నండొ అడ్డుజ్ వాతె. మీ బాన్ వాజి మిజి సుడెఃతిజ మీ బాణిజ్ మజి గొప్ప లాబం వాని లెకెండె. ఎందానిజ్ ఇహిజ మీ నన్ని నండొ జాతిజ నడిఃమి నాను సాని లెకెండె మీ నడిఃమిబా నాను వాజి సువార్త వెహ్నిజె ఇజి. సువార్త వెంజి నమ్మితి దేవుణు కొడొఃర్ ఆనార్.

14 యూదురు ఆఇ వరిజ్ విజేరిజ్ సువార్త వెహ్నిజ్ నాను ఉండ్రి అప్పు మన్నికాన్. గ్రీకు బాన్ నెస్తి వరిజ్బా, నెస్ఇ వరిజ్బా, పెరి సదువు మన్ని వరిజ్బా, సదువు సిల్లి వరిజ్బా వెహ్ని సీదెజ్ ఇజి నజి ఉండ్రి అప్పు మనాద్. 15 అందెజె, రోమ పట్నమ్దు మన్ని మిజిబా యా సువార్త వెహ్నిజ్ ఇజి నాను గొప్ప ఆన ఆత మన.

16 ఎందానిజ్ ఇహిజ, నాను సువార్త వెహ్నిజ్ సిగు ఆవ. యేసుక్రీస్తు ముస్సు నమకం ఇడ్డి విజేరిజ్ వరి పావమ్కాణిజ్ రక్సిస్తిజ్ యా సువార్తదిజ్ దేవుణుబాణిజ్ ఒడ్డె నత్తు మనాద్. యా సువార్త తొలిత యూదురిజ్ వెనుక ఆఇ జాతిజ సాటె ఆజినాద్. 17 యా సువార్తదు దేవుణు ఇనిక వెహ్నినాన్ ఇహిజ, లోకు కిత్తి తప్పు పణిజ వందిజ్ వారు సిక్కు పాందిదెజ్ అక్కుర్ సిల్లెద్ ఇజినె. వారు యేసుప్రబు ముస్సు నమకం ఇడ్డి వందిజె సిక్కుదాన్ తప్పె ఆతార్. యాక ముందాల్ ఒరెన్ దేవుణు ప్రవక్త రాస్తి లెకెండెనె. "ఎయెర్ నీతినిజయ్తికాన్ ఇజి నాను ఇడ్డ మనానొ, వాండ్రు నా ముస్సు నమకం ఇడ్డి వందిజ్ ఎలాకాలం బత్తినాన్".

దేవుణు లోకుర్ ముస్సు నండొ కోవం ఆజినాన్

18 దేవుణువందిజ్ మన్ను సిల్లి లోకాజ్ విజేరిజ్ సెఇవణి కిని విజేరిజ్ దేవుణు సిక్కు సీనాన్ ఇజి పరలోకమ్దాన్ తోరిస్త మనాన్. ఎందానిజ్ ఇహిజ, వరి సెఇ పణిదాన్ దేవుణు వందిజ్ నెస్తిమన్ని నిజమాతికెజ్ విజా వారు అడ్డు కిజినార్. 19 దేవుణు వందిజ్ నిజమాతికెజ్ అర్దం కెదెజ్ వారు అటూర్. ఎందానిజ్ ఇహిజ, దేవుణు ఎలాగమర్తికాన్ ఇజి వాండ్రు విజేరిజ్ తోరిస్త మనాన్. 20 మాపు దేవుణుదిజ్ నెస్ఏవ్ ఇజి ఎయెన్బా వెహ్నిజ్ వీలు సిల్లెద్. ఎందానిజ్ ఇహిజ, దేవుణు ఎలాగ మర్తికాన్ ఇజి మాటు సుడెఃదెజ్ సిల్లె, గాని వాండ్రు లోకం తయార్ కిత్తిబాణిజ్ అసి లోకమ్దు తయార్ కిత్తి వనకబాణిజ్ వాండ్రు ఎలాగ మర్తికాన్ ఇజి ఎలాకాలం మన్ని వన్ని పెరినత్తు ఎలాగమర్తిక ఇజి మాటు సుడెఃజినాల్. అందెజె దేవుణుదిజ్ నెస్ఏవ్ ఇజి ఎయెన్బా వెహ్నిజ్ వీలు సిల్లెద్.

21 యూదులు ఆశ్చర్యం వల్ల, దేవులు ఎలాగ మర్తకాన్ ఇజి నెస్టిబా దేవులు ఇజి మాడిస్ ఎర్, వాండ్లు కిత్తి దన్నివందిజ్ వందనమ్ కు వెహ్ ఎర్. నస్తివలె వారు దేవులు వందిజ్ అర్థం కిదెజ్ అల్ ఎండ ఆతారె. పరి ఆలోసనమ్ కు సెఇకెజ్ ఆతె. 22 వారు బుద్ది మన్నికార్ ఇజి మో ఆజి బుద్ది సిల్లి పణిజ్ కిత్తారె. 23 ఎలాకాలం మంజిని దేవులుదిజ్ పాగిడిజిసగవ్ రం సివీండ బొమ్మెజి పాగిడిజి గవ్ రం సిత్తారె. సబ్బిసాని లోకులెకండ్, పాటిజ్ లెకండ్, జమతుజ్ లెకండ్, మరి బూవి ముస్సు, ఊజి బూలాని వనకాజ్ లెకండ్ తోర్ని బొమ్మెజి తయార్ కిత్తారె వనకాజ్ పాగిడిజి గవ్ రం సిత్తారె.

24 అందెజె వారు, కిదెజ్ ఆశ్చర్యం అసెజ్ పరి మన్నుదు పుట్టి లెకండ్ కిదెజ్, దేవులు పరిజ్ సరి సిత్తాన్. ఇనిక ఇహిజి వారు పరిజె సుగు ఆతి సెఇ పణిజ్ కిత్తారె.

25 ఎందానిజ్ ఇహిజి, నిజమాతి దేవులు వందిజ్, నిజమిదిజ్ డిస్తారె నిజం ఆశ్చర్యం దన్నిజ్ ఇత్తారె. విజా దన్నిజ్ పుటిస్తికాన్ ఆతి ఒరెండ్ర దేవులుదిజ్, మాడిసి వన్నిజ్ లోజిఎండ, దేవులు పుటిస్తి వనకాజ్ మాడిస్తారె, వనకాజ్ లోజిత్తారె. గాని పుటిస్తికెజ్ విజా అయ దేవులుదిజె ఎస్తివలెబా మాడిస్తెజ్ వెలె.

26 అందెజె సిగు ఆతి ఒడోజ్ అసెజి వందిజ్ దేవులు పరిజ్ ఒవజెస్తాన్. అందెజె పరిలోఇ అయ్ లికోడోక్ మాసిరిజ్ సాన్ వండి అయ్ లికోడోకాజ్ దరోట్ ఒడోజ్ అసెజి మహ్తా. 27 అయావజెనె యూదులు ఆశ్చర్యం లోఇ మొగకొడోకార్ ఆల్సికాజ్ ఇద్ వండి మొగకొడోకార్ దరోట్ ఏక ఉల్ పుత్ ఆజి మహ్తారె. వారు మొగకొడోకార్ వెలె సిగు ఆతి పణిజ్ కిత్తారె. అయ ఒద్దె తప్పు ఆతి పణిజ్ పరిజ్ తగితి సక్స ఆజి పరిముస్సు వాతాద్.

28 వారు దేవులుదిజె నెక్తాకారె వన్ని వందిజ్ నెస్తిమన్ని నిజమాతికెజ్ విజా డిస్తిసితారె. నస్తివలె పరి సెఇ బుద్దిదు నడిదెజ్ ఇజి దేవులు పరిజ్ డిస్తిస్తిత్తాన్. అందెజె సరి ఆశ్చర్యం కిదెజ్ పరి బుద్ది మహ్తాద్. 29 విజా రకమ్ కాణి సెఇ పణిజ్ కిదెజ్ వారు ఏక ఒడోజినారె. ఇనికెజ్ ఇహిజి, మహి పరిజ్ సద్దె కిదెజ్, మహిపరిజ్ మన్నికెజ్ మజి దోహ్ కెజ్ ఇజి సెఇ అసెజి, ఎలాగబా మహిపరిజ్ సెఇకె కిదెజ్, మహిపరి వెలె గోస ఆదెజ్, సప్తెజ్, గొడబ కిబిస్సెజ్, మొసెం కిదెజ్, మహిపరివందిజ్ సెఇకెజ్ వెస్తాజ్, సాండి వెస్తాజ్. 30 నండో లోకుర్ మహిపరివందిజ్ తప్పుజ్ వెస్సినారె. నండోండార్ దేవులు ఎర్దు వెత్తెకం కిబినారె, ఆశ్చర్యం సిగు కిబిస్సారె, గర్ల ఆజినారె, పాజిబినకార్ ఆజినారె, మరి రెకరకమ్ ది కొత్త సెఇపణిజ్ ఎలాగ కిదెజ్ ఇజి సుడోజినారె, పరి కొడోకార్ అయ్ సెఇ అప్పాసిరిజ్ లోజివర్.

31 వారు అర్థం కిదెజ్ అల్ ఎర్. ఒవందం కిత్తిలెకండ్ కివర్. నండోండార్ పరి సాంత ఇండ్రోణిపరిజ్ నెగెండ తోవర్. నండోండార్ కనికారం సిల్లికార్ ఆజినారె.

32 నిన్ని పణిజ్ కనిపరిజ్ సప్తెజ్ వలె ఇజి దేవులు వెహ్ మనాన్ ఇజి నెస్టిబా వారు నిన్ని సెఇ పణిజ్ కిబి మంజినారె. అక్కాదె అవండి నిన్ని సెఇ పణిజ్ కినిపరిజ్ వారు డగ్గు కిబినారె.

దేవులు సరియాతి తీర్పు తీరిస్సాన్

2 మహికార్ తప్పు కినికార్ ఇజి మీరు వెహ్ పరిముస్సు తీర్పు తీరిసినిదెరా? అహె వెహ్ జి మీరు మిజెనె తప్పు కినికెదెర్ ఇజి వెహ్ సినిదెర్. మాపు తప్పు కిఇకావ్, ఇజి వెస్తాజ్ మీరు అల్ ఇదెర్. ఎందానిజ్ ఇహిజి, మీరుబా పరిలెకండ్ తప్పు కినికెదెర్. 2 తప్పు కిని యూదులు ఆశ్చర్యం దేవులు తీర్పు తీరిస్తివలె పరిజ్ సరియాతి తీర్పు తీరిస్సాన్ ఇజి మాటు నెసినాల్. 3 అందెజె ఆశ్చర్యం లోకుర్ పాపం కినికార్ ఇజి వెహ్ సిని మీరు అయ పాపమ్ కునె కిబి మహిజి దేవులు తీర్పుదాన్ తప్పు ఆశ్చర్యం ఇజి నెస్తివలె. 4 దేవులు మీవెలె వన్ని గొప్ప విలువాతి దయ, కనికారం తోరిసినాన్. అక్క మీరు ఇజిరి కణకదాన్ సుడోజినిదెరా? దేవులు మీవెలె తోరిసిని కనికారం మీరు పాపమ్ కు ఒప్పుకొడోజి డిసిసిని వందిజెనె ఇజి మీరు నెస్ ఇదెరా?

5 గాని మీరు మీ మన్నుదు గొప్ప గర్ల ఆజి పాపమ్ కు ఒప్పుకొడోజి డిసిసిని వందిజెనె మహిజి దేవులు తీర్పు కిని రోజుదు మీ ముస్సు సిక్స నండో కుంబ కిబిసిదెర్. దేవులు విజా లోకురిజ్ ఉండ్రె లెకండ్ తీర్పు కిని దినమ్ దు మిజెబా తీర్పు కినాన్. 6 దేవులు ఒరెన్ ఒరెన్ వన్నిజ్ వారు కిత్తి పణిజి తగితిక మర్రి సినిన్ లె 17 దేవులుబాణిజ్ జాయ్ ని గవ్ రం, సాపు సిల్లి బత్తు దోహ్ కెజ్ ఇజి డిసిఎండ నెగ్గి పణిజ్ కిబి మహిపరిజ్ దేవులు ఎలాకాలం బత్తిని బత్తు సినిన్. 8 గాని సజె నానె నెగెండ మండ్రెజ్ ఇజి సుడోజిని పరిజ్, దేవులు వెహ్ సిని నిజమాతి మాటదిజ్ డగ్గు కివండి ఒద్దె సెఇపణిజ్ కినిపరిజ్, దేవులుబాణిజ్ గొప్ప కోపం వానాద్. 9 పాపం కిబిని మంజిని ఒరెన్ ఒరెన్ వన్నిజ్ బాదెజ్ వానె. కష్టమ్ కు వానె. నన్ని కష్టమ్ కు యూదురుజ్ మొదొల్సినె. వెనుక యూదురు ఆశ్చర్యం వానె. 10 గాని నెగ్గి పణిజె కినిపరిజ్ దేవులు వన్ని గొప్ప జాయ్ ని గవ్ రం, సాంతి సినిన్. ముందాల యూదురిజ్ వెనుక యూదురు ఆశ్చర్యం సినిన్. 11 ఎందానిజ్ ఇహిజి, దేవులు లోకాజ్ తీర్పు కినివలె తేడె తోవండి తీర్పు కినాన్.

12 విజెరె లోకుర్ పాపం కిత్తిజ్ విజెరిజ్ సక్స వానాద్. దేవులు మోసెజ్ సిత్తి రూలుజ్ వందిజ్ యూదురు ఆశ్చర్యం నెస్ ఏతారె. అందెజె "మీరు ఎందానిజ్ రూలుజి లోజిఇతిదెర్?", ఇజి పరివెలె వెహ్ ఎన్. దేవులు మోసెజ్ సిత్తి రూలుజ్ నెస్తి యూదురుజ్ సిక్స సిదెజ్ దేవులు తీర్పు కినాన్. ఎందానిజ్ ఇహిజి వారు రూలుజి లోజివితారె. 13 నీతినిజయ్ కాన్ † ఎయెన్ ఇహిజి, దేవులు రూలుజ్ వెహ్ కాన్ ఆవ్, అయ రూలుజ్ లోజిత్తికాండ్రె. 14 దేవులు యూదురిజ్ సిత్తి రూలుజ్ యూదురు ఆశ్చర్యం సివితాన్. అహిజెబా వారు అయ రూలుజ్ వజి బత్తిత్తిజ్, అయ రూలుజ్ వారు నెస్తిమనార్ ఇజి మాటు నెసినాల్. అయ రూలుజ్ పరిజ్ సిల్లు గాని మన్నిలెకండ్ వారు నడిజినారె. 15 అయ రూలుజ్ పరి మన్నుదు ఇడె ఆతె మన్నె ఇజి పరి పణిజాణ్ తోరిసినారె. ఒరెన్ నెగ్గి పణిజ్ కిత్తిజెబా సెఇ పణిజ్ కిత్తిజెబా అక్కెజ్ నెగ్గికెజ్, సెఇకెజ్ ఇజి వన్ని మన్నుదు నెసినాన్. అహె దేవులు సిత్తి రూలుజ్ వన్ని బుద్దిదు మన్నె. 16 లోకుర్ పరి మన్నుదు ఎయెరిజ్ నెస్ వండి ఇడ్డిమన్ని ఆలోసనమ్ కు వందిజెబా, దేవులు తీర్పు కిని రోజుదు తీర్పు సినిన్. యెసు క్రీస్తు వెలె యాకెజ్ విజా జర్గిజెనె ఇజి నాను వెహ్ సిని సువార్తదు మనాద్.

దేవులు మోసెజ్ సిత్తి రూలుజ్ వజి నడినికావ్ ఇజి వెహ్ సిని యూదురువందిజ్

17 ఏలు యూదురు ఆతి మిజె ఉండ్రె మాట నాను వెహ్. మాపు యూదుర్ ఇజి మీరు వెహ్ సినిదెర్. దేవులు మోసెజ్ సిత్తి రూలుజ్ వజి నడినికావ్, అందెజె దేవులు తీర్పుదాన్ తప్పు ఆదెజ్ అనావ్, ఇజి మీరు ఒడోజినిదెర్. దేవులు కొడోకార్ ఇజి పాగిడి: ఆజినిదెర్. 18 దేవులుదిజ్ ఇస్త్వమాతిక ఇనిక ఇజి మీరు నెస్సిదెర్. దేవులు రూలుజి వందిజ్ నెగెండ నెస్టిజ్, డగ్గు కిదెజ్ విజా దన్నిజ్ మిస్తి విలువాతికెజ్ ఇనికెజ్ ఇజి మీరు నెసినిదెర్. 19 గుడ్డిపరిజ్ సరి తోరిసి నడిసిని పరిలెకండ్,

† 2:6 కీర్తన 62:12; సామెత 24:12. †† దేవులు ముస్సు, నపకం ఇడ్డి మన్ని పాపమ్ కు దేవులు మాయిత్తికాన్.

యూదురు ఆశువరిజ్ సరియాతి సరి వెప్పి నడఁపిస్తెజ్ అట్నాన్ ఇజి మీరు వెప్పినిదెర్. సీకటిదు నడిఁసిని వరిజ్ జాయ్ తోరిసిని వరిలెకెండ్ మీ మాటెజాణిజ్ యూదురు ఆశువరిజ్ దేవుణు సరి తోరిసినిదెర్ ఇజి వెప్పినిదెర్. 20 బుద్ది సిల్లివరిజ్, యూదురు ఆశువరిజ్ నెప్పిస్తెజ్ అట్నాన్ ఇజి మీరు ఒడిఁబిజినిదెర్. కొడొఁర్ లెకెండ్ మన్నివరిజ్, ఇహిజ దేవుణు వందిజ్ నిజమాతికెజ్ నెన్ఇ వరిజ్ నెప్పిస్తెజ్ అట్టికాన్ ఇజి ఒడిఁబిజినిదెర్. ఎందానిజ్ ఇహిజ, రాస్తిమన్ని దేవుణు మాటదు మన్ని విజా వనకాజ్ ఇంక ఒద్దె విలువాతి గెణం మరి నిజమాతి మాట మీబాన్ మనాద్గదె. 21 మహివరిజ్ నెప్పిసిని మీరు, మిజి మీరె నేర్పె ఆశుదెరా? డొజ కిమాట్ ఇజి గటిజ వెప్పిని మీరు డొజ పణి కిజినిదెరా? 22 రంకు బూలాదెజ్ ఆవిద్ ఇజి వెప్పిని మీరు రంకు బూలాజినిదెరా? దెయమ్కాజ్ డిఁస్తి సిత్తి మీరు దెయమ్క గుడిఁదికెజ్ డొజ కిజినిదెరా? 23 దేవుణు రూలుజ్ మాబాన్ మన్నె ఇజి వెప్పి మీరు అయా రూలుజ లొజిపిండ దేవుణుదిజ్ సిగు తపిసినిదెర్. 24 “మీరు ఈహు కిత్తిజ్ దేవుణు పేరు యూదురు ఆశుకార్ దూసినినార్ 1”, ఇజి దేవుణు మాటదు రాస్తి మన్నిక, మీ వందిజ్బా రాస్తి లెకెండ్నె.

25 దేవుణు మోసిజ్ సిత్తి రూలుజ్ వజ మీరు నడిఁబిజినిదెర్ ఇహిజ మీరు సునతి ఆతి వందిజ్ మిజి లాబం మనాద్. గాని దేవుణు సిత్తి రూలుజ మీరు లొజిఇతిజ మీరు దేవుణు లోకుర్ ఇజి తోరిస్తెజ్ సునతి కిబె ఆశు యూదురు ఆశువరిలెకెండ్ మీరు. 26 అయావజనె, సునతి కిబె ఆశుతిజబా దేవుణు సిత్తి రూలుజ వజ నడిఁసి యూదురు ఆశుకార్ వన్ని సాంతలోకుర్ లెకెండ్ వాండ్రు ఇడ్నాన్గదె. 27 సునతి కిబె ఆశుకార్ గాని దేవుణు రూలుజ లొజిని మిజి తీర్పు కినార్. ఎలాగ ఇహిజ, మిజి రూలుజ విజా రాస్తి మహిజ్బా, సునతి కిబె ఆతిజ్బా అయా రూలుజ లొజిఇతిజ్ యూదురు ఆశుకార్ మిజి తీర్పు కినార్.

28 దేవుణు లోకుర్ ఇజి తోరిస్తెజ్ ఇనికాద్ అలవాటుజ్ లెకెండ్ కినికాన్, నిజమాతి యూద వాండ్రు ఆవిన్. దేవుణు లోకుర్ ఇజి తోరిస్తెజ్ మీ ఒడొల్దిజ్ ఇనికాద్ కిత్తిజ దేవుణు ఒప్పుకొణాన్ ఇజి ఒడిఁబిమాట్. 29 గాని, నిజమాతి యూద వాండ్రు ఎయెన్ ఇహిజ, మన్ను మారిస్తికాండ్రె నిజమాతి యూద వాండ్రు. దేవుణు ఆత్మదాన్ మన్ను మారిస్తికార్ దేవుణు లోకుర్. దేవుణు లోకుర్ ఆదెజ్ ఇజి మరి ఇనికబా కిదెజ్ ఆవిద్. నన్ని వరిజ్ లోకుర్ పాగిడిఁఇతిజ్ గాని దేవుణు వరిజ్ పాగిడిఁనాన్.

దేవుణు నమ్మిదెజ్ తగ్గికాన్.

3 అహిజ, యూద వాండ్రు ఇజి ఇని లాబం మనాద్? సునతి కిబె ఆతికాన్ ఇజి ఇని లాబం మనాద్ ఇజి మీరు వెప్పిదెర్ను? 2 దన్నెజ్ నాను వెప్పిని విజా సజతిజలొఇబా గొప్పు లాబమ్నె! ఎలాగ ఇహిజ, దేవుణు వాండ్రు కిత్తిమన్ని ఒవందమ్కు మన్ని వన్ని మాటెజ్, ముజాల మా అనిగొగుజ్నె సిత్తాన్.

3 అహిజ, యూదురు నండొండార్ దేవుణుదిజ్ నమ్మిదెజ్ తగ్గికార్ ఆవితార్. వారు నమ్మిదెజ్ తగ్గికార్ ఆశుతిజ్, దేవుణు వాండ్రు వెప్పిలెకెండ్ కిపిన్ ఇజి వెప్పినిదెరా? 4 నాను వెప్పి, ఆహి ఇండ్రెజ్ ఆవిద్. దేవుణు వెప్పిలెకెండ్ వాండ్రు కినాన్. లోకుర్ దేవుణు వెట వెప్పిలెకెండ్ కిపిండ అబద్దం వెప్పికార్ ఆతిజ్బా, దేవుణు నిజమ్నె వెప్పాన్. దావీదు రాజా దన్నివందిజ్ కీర్తన పుస్తకమ్దు ఈహు రాస్త మనాన్. దేవుణు ఈహు వెప్తాన్, “సిను వర్గినివలె నీ మాటెజ్ నిజమాతికెజ్ ఇజి లోకుర్ వెప్తార్. లోకు నీ మున్ను నేరం మొప్పెజ్ సుడిఁబినివలె వారు గెలిస్తెజ్ అట్విండానార్గే ††.

5 మాటు తప్పు కినివలె దేవుణు మా పావమ్కు సెమిని వాండ్రు నీతినిజయ్ మన్నికాన్ ఇజి ఒద్దె తోరిసినాన్. అందెజె మాటు తప్పుజ్ కిత్తివందిజ్, మజి సిక్కు సిత్తిజ దేవుణు నాయం కినికాన్ ఆవిన్ ఇజి వెప్పికార్ మనార్. 6 ఆహి ఇండ్రెజ్ ఆవిద్. ఎందానిజ్ ఇహిజ దేవుణు నాయం కినికాన్ ఆవిన్ ఇహిజ, విజెరె లోకాజ్ తీర్పు కిదెజ్ మన్ని అతికారం ఎలాగ మంజినాద్. 7 ఎయెన్బా, “నాను తప్పు వెప్తా”, ఇజి వెప్పిన్ను. గాని నాను తప్పు వెప్తా ఇహిజ దేవుణు నిజమ్నె వెప్పినాన్ ఇజి తోరిజినాద్. అందెజె లోకుర్ దేవుణుదిజ్ పాడిఁడినార్. అహిజ దేవుణుదిజ్ పాగిడు వానివలె నాను తప్పు కిత్తిదన్నిజ్ దేవుణు నజి తీర్పు సీజి సిక్కు సీదెజ్ ఆవిద్ ఇజి మీరు వెప్పిదెర్ను. 8 అయాలెకెండ్ వెప్పికార్ నిజం ఇహిజ, దేవుణు పాగిడిఁ ఆపిన్ ఇజి మాటు పాపం కిజి మండ్రెజ్నా? నానుబా ఈహు వెప్పిన ఇజి సెగొండార్ తప్పు మొప్పినార్. ఈహు వెప్పివరిజ్ దేవుణు తీర్పు తీరిసి తగితి సిక్కు సీనాన్.

దేవుణు ఎద్రు నిజమాతికాన్ ఎయెన్బా సిల్లెన్.

9 అహిజ ఏలు ఇనిక వెప్పాట్? మాటు యూదురు, యూదురు ఆశువరిజ్ ఇంక పెరికాటా? అఎట్. యూదురిజ్ని యూదురు ఆశువరిజ్ విజెరిజ్ దేవుణు తీర్పు కినాన్ ఇజి నాను వెప్తాగదె. ఎందానిజ్ ఇహిజ, పాపం విజెరిజ్ అడిగి ఇడ్జినాద్. 10 దేవుణు మాటదుబా దిన్ని వందిజ్ రాస్తమనాద్. ఇనిక ఇహిజ, “ఎయెన్బా నీతి మన్నికాన్ ఆవిన్, నీతిమన్నికాన్ ఒరెన్బా సిల్లెన్”. 11 సరియాతి ఇనిక ఇజి అర్దం కినికాన్ ఒరెన్బా సిల్లెన్. దేవుణుదిజ్ నెప్పెజ్ ఇజి రెబానికాన్బా సిల్లెన్. 12 విజెరె ఉండ్రెలెకెండ్ సెఇవణిజ్ కినికార్ ఆతారె దేవుణుబాణిజ్ మహ్తా సాహర్. సరియాతి పణి కినికార్ ఎయెర్బా సిల్లెన్. ఒరెన్బా సిల్లెన్ #, 13 “లోకుర్ మాటెజ్ ఎలాగ మన్నె ఇహిజ, పీనుగుదిజ్ మూస్తి వెనుక మర్రి లాగితిజ ఎలాగ కంపు డెయేనాద్, అయాలెకెండ్నె. మాటెజాణిజె మొసం కిజినార్ ††. సరాని విసం లోకాజ్ ఎలాగ పాడిఁ కినాద్ అయాలెకెండ్నె వారు మాటెజాణిజ్ పాడిఁ కినార్” †. 14 “వారు ఆశువరిజ్ నయివ్ కిజినె మంజినార్. ఆశువరిజ్ దూసినినార్.” ††15 లోకాజ్ సప్పెజ్ వరిజ్ సులునె వానాద్. 16 వారు సానిబాన్ విజా నాసనం కిజినార్, లోకాజ్ గొప్పు కష్టమ్కు తపిసినినార్. 17 ఆశువరి వెట సమాదనమ్దాన్ బత్రిదెజ్ ఎసెజ్బా నెన్వర్.” ††18 వరి మన్నుదు దేవుణు ఇహిజ ఇని తియెల్ సిల్లికార్.

19 దేవుణు మాటాదు రాస్తిమన్నికెజ్ విజా దేవుణు ఎయెరిజ్ వన్ని రూలుజ్ నెత్తాండ్రె వరివందిజె ఇజి మాటు నెసినాట్. అందెజె యూదురు గాని యూదురు ఆశుకార్ గాని మా పావమ్క వందిజ్ దేవుణు ఎద్రు ఇనికబా వెహ్విండ్ మంజినాట్. విజెరె తప్పుకిత్తికార్ ఇజి దేవుణు వెప్పినాన్.

20 దేవుణు మోసిజ్ సిత్తి రూలుజ్ వజ కిత్తిదన్నివందిజ్ దేవుణు ఎయెరిజ్బా నీతినిజయ్కాన్ ఇజి వెహ్విన్. ఎందానిజ్ ఇహిజ దేవుణు రూలుజ్ నెప్పిమహిజ్బా మాటు ఎస్సానొ తప్పుజ్ కిత్తికాట్ ఇజి నెస్త మనాట్.

† 2:24 యెసయ 52:5; యెహీ 36:22. †† 3:4 కీర్తన 51:4. † 3:12 కీర్తన 14:1-3; 53:1-3. †† 3:13 కీర్తన 5:9. †† 3:13 కీర్తన 140:3. ††† 3:14 కీర్తన 10:7. ††† 3:17 యెసయ 59:7,8.

క్రీస్తుమున్ను నమకం ఇడ్డికాండ్రె సీతిమన్నికాన్ ఆనాన్.

21 గాని లోకుర్ దేవులు ఎద్దు ఎలాగ సీతినిజయ్తూర్ ఆదెజ్ అబ్నార్ ఇజి దేవులు ఏలు మరి ఉండ్రె సుటు తోరిస్త మనాన్. మోసెజ్ సీత్తి రూలుజు లోజీత్తివలెహాన్ అవద్. గాని దిన్నివందిజ్ మోసెజ్ సీత్తి రూలుదు మరి ఒరెన్ దేవులు ప్రవక్తరు రాస్తి మాటెజు లోఇబా తోరిస్త మహాద్. 22 యేసుక్రీస్తు మున్ను నమకం ఇడ్డివరి పావమ్కు విజా దేవులు మాయిప్తాన్. దేవులు సుడెఱిజు యూదురుని యూదురు ఆఇకార్ ఇజి తెడఱి ఇనిక సిల్లెద్. ఎయెర్ నమ్మిజినారొ దేవులు వరి పావమ్కు విజా మాయిప్తాన్. వారు సీతి నిజాయి మన్నికారె. 23 ఎందానిజ్ ఇహిజు, విజెరె పాపం కిత్తారె దేవులు తయార్ కిత్తిమన్ని గొప్ప జాయ్ పొందిదెజ్ అట్వండాతార్. 24 గాని క్రీస్తుయేసు మా వందిజ్ సాతిజ్, అయ సావుదాన్ మాటు కిత్తి పావమ్కు వందిజ్ వాని సిక్కుదాన్ దేవులు మజి డిఱిస్తాన్. ఎలాగ ఇహిజు, తప్పు కిత్తికార్ ఇహిజ్బా, అయ తప్పుజ్ నాను సెమిస్త మన్న ఇజి దయాదర్మమ్దాన్ ఉండ్రె ఇనాయం లెకెండ్ సెడినె సీజినాన్.

25 లోకురి పావమ్కు వందిజ్ వాని సిక్కు వన్ని మున్ను తపిసి, వన్ని సావుదాన్ లోకురి పావమ్కు వరి నమకమ్దాన్ దేవులు సెమిసిని వందిజె యేసుక్రీస్తుజ్ పోక్తాన్. ఎందానిజ్ ఈహు కిత్తాన్ ఇహిజు, దేవులు సీతినిజయ్తూర్ మన్నికాన్ ఇజి తోరిస్తెజె. ఎందానిజ్ ఇహిజు యేసు వాని ముందాల లోకుర్ పాపం కిత్తిమహివలె దేవులు అక్కెజ్ ఓరిసి మహాన్. పాపం కిత్తివలె సిక్కు సివితాన్. 26 గాని దేవులు అయ పావమ్కు పోన్వన్. యేసు అక్కెజ్ విజా వన్నిమున్ను ఒత్తాండ్రె వరివందిజ్ సాతాన్. దేవులు సీతిమన్నికాన్ ఇజి ఈహు తోరిస్తాన్. యేసు మున్ను నమకం ఇడ్డికార్ సీతినిజయ్తూర్ ఇజి ఇడ్డారె.

27 అందెజె ఏలు, మోసె సీత్తి రూలుజు లోజీత్తిజ్ సీతిమన్నికాట్ ఆతాట్ ఇజి పాగిడిఱెడెజ్ అట్వంట్, యేసుక్రీస్తుజ్ నమ్మితిజానె మాటు కిత్తి పావమ్కు విజా దేవులు మాయిప్తాన్ ఇజి దేవులు వహ్సన్. అయావజనె మాటు సీతి మన్నికాట్ ఆనాట్. 28 రూలుజు లోజీత్తిజు ఆవద్, యేసుక్రీస్తుజ్ నమ్మితిజానె పావమ్కు విజా మాయిపె ఆజి సీతి మన్నికార్ ఆతార్ ఇజి దేవులు వెహ్సన్. యాక మాటు నెసినాట్. 29 దేవులు, వహి యూదురిజ్నె దేవులు ఆవన్గె, మహి జాతిది వరిజ్బా దేవులుగదె. ఒఒ మహి జాతిదివరిజ్బా దేవులునె. 30 ఒరెండ్రె దేవులునె మనాన్. వాండ్రు యూదురిజ్నెని యూదురు ఆఇ వరిజ్నె విజెరిజ్ వరి నమకం వందిజ్ పావమ్కు విజా మాయిప్పి, సీతి మన్నికార్ ఆతార్ ఇజి వెహ్సన్. 31 అహిజు క్రీస్తు మున్ను నమకం ఇడ్డిజ్ దేవులు ఎద్దు సీతి మన్నికార్ ఇజి దేవులు వెహ్సె, రూలుజు విలువ సిల్లెద్ ఇజి ఒడెఱినిదెరెసు. సిల్లె, రూలుజ్ విలువ సిల్లెకెజ్ ఆఉ. యేసుక్రీస్తు మున్ను నమకం ఇడ్డి మహిజ్ అయ రూలుజ్ మరి మరి లోజీదెజె.

నమకమ్దాన్ అబ్రహాం సీతి నిజాయి మన్నికాన్ ఆతాన్

4 అహిజు గొప్ప పేరు మన్ని మా అనిగొగొ ఆతి అబ్రాహము సీతిమన్నికాన్ ఇజి దేవులు వెహ్సె వందిజ్ ఇనిక వెహ్సెజ్? 2 వాండ్రు కిత్తి నెగ్గి వణిజు వందిజ్ దేవులు వన్నిజ్ సీతి నిజయ్తూర్ ఇజి ఇడ్డిజు దన్నివందిజ్ లోకురు వెట పాగిడిఱెడెజ్ అబ్నార్ గాని దేవులుబాన్ పాగిడిఱెడెజ్ అట్వంట్. 3 ఎందానిజ్ ఇహిజు దేవులు మాటాదు ఇనిక రాస్త మనాద్ ఇహిజు, "దేవులు అబ్రాహము వెట కిత్తి ఒవందం వాండ్రు నమ్మితాన్. అందెజె వాండ్రు సీతినిజయ్తూర్ ఇజి దేవులు ఒప్పుకోటాన్" †.

4 ఒరెన్ వణి కిత్తిదన్నిజ్ కూలి దోహ్కెజు అయాక ఇనాయం ఆవద్ గదె. అక్క వన్ని కూలినె. సీతినిజయ్తూర్ ఆదెజ్ ఇహిజుబా అయాలెకెండ్. 5 గాని, తప్పు కిత్తివన్నె తప్పుజ్ దేవులు మాయిప్పి సీతినిజయ్తూర్ మన్నికాన్ ఇజి ఇడ్డాన్. నమ్మిని వన్ని నమకమ్దాన్, వాండ్రు సీతినిజయ్తూర్ ఇజి దేవులు ఇడ్డాన్. గాని, వన్ని వణిజాణిజ్ సీతినిజయ్తూర్ అవన్. 6 దిన్నివందిజ్ దావీదురాజుబా కీర్తన పుస్తకమ్దు రాస్త మనాన్. ఇనిక ఇహిజు, నమకం ఇడ్డివందిజ్ సీతినిజయ్తూర్ ఇజి దేవులు ఇడ్డికార్ గొప్ప సర్ల ఆతికార్. వరి వణివందిజ్ ఆవద్, నమకం వందిజె. 7 పాపం కిత్తిదన్నిజ్ దోహ్కెజు సెమ వందిజ్ వారు సర్ల ఆనికార్. ఎందానిజ్ ఇహిజు, వరి తప్పుజ్ మరి ఎత్తు కిమ ఇజి దేవులు తీర్తనం కిత్తాన్. 8 ఎయెర్ది పావమ్కాజ్ దేవులు లెక్క తొవండ్రొ వాండ్రు సర్ల ఆతికాన్. 9 పావమ్కాజ్ దేవులు సెమిన్తి దన్నివందిజ్ మన్ని సర్ల సునతి ఆతి యూదురిజ్నె ఆవద్. సునతి కిబెఆఇ యూదురు ఆఇ వరిజ్బా మనాద్. అబ్రహాం దేవులు దేవులుదిజ్ నమ్మితాన్. అందెజె వాండ్రు సీతినిజయ్తూర్ మన్నికాన్ ఇజి దేవులు ఒప్పుకోటాన్ ఇజి మాటు నెసినాట్గదె. 10 ఎస్తివలె దేవులు అబ్రహాం వందిజ్ యాలెకెండ్ వెహ్సె? సునతి కిబె ఆవండ ముజాల్నా? సునతి కిబె ఆతి వెనుకానా? అబ్రహాం సీతిమన్నికాన్ ఇజి ఎస్తివలె దేవులు వెహ్సె ఇహిజు, సునతి కిబె ఆని ముందాలనె అబ్రహాం సీతిమన్నికాన్ ఇజి దేవులు వెహ్సె. 11 వెనుక అబ్రహాం సునతి కిబె ఆతాన్. ఎందానిజ్ ఇహిజు దేవులు మున్ను నమకం ఇడ్డి వందిజ్ వాండ్రు సీతి మన్నికాన్ ఆతాన్ ఇజి గుర్తు వందిజె. సునతి కిబె ఆవండ మహివలె దేవులుదిజ్ నమ్మితివరి పాపం దేవులు మాయిప్తాన్. నన్నివరిజ్ బుబ్బలెకెండ్ దేవులు అబ్రాహముజ్ ఇడ్డాన్. 12 అయావజనె నమకం ఇడ్డి సునతి కిబె ఆతివరిజ్బా అబ్రహాం బుబ్బ లెకెండ్నె. సునతి కిబె ఆవండ మహివలె నమకం ఇడ్డి బుబ్బాతి అబ్రహాం లెకెండ్ వారు. వారుబా అయా నమకమ్నె ఇడ్డారె. 13 దేవులు అబ్రహాం వెట ఉండ్రె ఒట్టు కిత్తాన్. ఇనిక ఇహిజు, అబ్రహామ్జ్నె వన్ని కొడొఱె కొక్రారిజ్ యా లోకమ్దిజ్ సీన ఇజి. యా ఒట్టు అబ్రాహముజ్ ఎలాగ దోహ్కాద్ ఇహిజు దేవులు సీత్తి విజా రూలుజ్ వాండ్రు లోజీత్తి వందిజ్ ఆవద్. దేవులు మున్ను నమకం ఇట్టివెలె సీతినిజయ్తూర్ ఆతాన్ కాక యా ఒట్టు దేవులు బాణిజ్ దోహ్కాద్. 14 రూలుజు లోజీత్తి వరిజె, దేవులు సీత్తి ఒట్టు దోహ్కాద్ ఇహిజు, దేవులు మున్ను ఇడ్డి నమకమ్దిజ్ ఇని విలువ సిల్లెద్. ఆహి ఆతిజు దేవులు సీత్తి అయ ఒట్టుబా విలువ సిల్లెండ్ మనాద్. 15 రూలుజ్ మన్నె ఇహిజు లోకు వనకాజ్ లోజీవండ సిక్కు తపిసినార్. ఎంబె రూలుజ్ మహిజ్బా లోకుర్ వనకాజ్ లోజీవర్.

16 నమకం ఇడ్డి రూలుజు లోజీత్తి యూదురునె ఆవద్ అబ్రహాంలెకెండ్ దేవులు మున్ను నమకం ఇడ్డివరిజ్ విజెరిజ్ యా ఒట్టు దోహ్కాద్. దేవులు మున్ను నమకం ఇడ్డివరిజ్ అబ్రహాం ఒరెన్ బుబ్బవజనె. 17 "నాను నిజి నండొ జతిజు బుబ్బ లెకెండ్ ఏర్పాటు కిత్తి మన్న", ఇజి దేవులు అబ్రహాం వెట కిత్తి ఒట్టు దేవులు మాటాదు రాస్త మనాద్. సాతివరిజ్ బత్తు సీజినాన్. వన్ని మాటదాన్ సిల్లివనకాజ్ మన్నిలెకెండ్ కూక్కినాన్, యా దేవులు. వన్నిజె అబ్రహాం నమ్మితాన్. దేవులు ఎద్దు, యా ఒట్టువలెహాన్ మజి విజెరిజ్ అబ్రహాం బుబ్బలెకెండ్ ఆతాన్.

† 4:3 ఆది 15:6. †† 4:8 కీర్తన 32:1,2.

18 దేవులు అబ్రాహముజ్ వెస్తి మాటెజ్ జగ్గిదెజ్ కష్టమాతికెజ్ గాని అక్కెజ్ జగ్గినె ఇజినె నమ్మిజి ఎద్దుసుండేజి మహాన్. అందెజె నండొ జాతిజ బుబ్బవజ ఆని ఇజి దేవులు వెస్తి మాటెజ్ లెకెండె వాండ్రు ఆతాన్. నీ కొడొఁర్ అగనమదు మన్ని లెక్క కిదెజ్ అబ్ ఇ సస్సా సుక్కెలెకెండె నండొండొ ఆనార్ లె ఇజి దేవులు వెస్తి మాటెకెండె జగ్గితాద్. 19 అబ్రాహముజ్ డగ్గు డగ్గు వంద వంటెజ్ ఆత మహాద్. "నాను నిస్సా డొక్క ఆత. నా అల్లి సారాయిబా కొడొఁర్ ఇడ్డెజ్ అబ్ ఏద్", ఇజి ఒడేబిజి మహాన్. అహిజ్ దేవులు వెస్తి మాటెజ్ అబ్రహాం ఇని అనుమానం సిల్లెండె నమ్మిత్తాన్. 20 వన్ని నమకం డిస్ ఏతాన్. దేవులు కిత్తి ఒట్టు వందిజ్ అనుమానం ఆవతాన్. దేవులు వెస్తి లెకెండె జగ్గినాద్ లె ఇజి నమ్మిత్తాండ్రె దేవులుదిజ్ పొగ్ గిడితాన్. 21 దేవులు ఒవందం కిత్తి లెకెండె కిదెజ్ అబ్ నాన్ ఇజి పూర్తి నమ్మిత్తాన్. 22 అందెజె దేవులు మాటదు రాస్త మనాద్, "అబ్రహాం దేవులుదిజ్ నమ్మిత్తాన్. అందెజె దేవులు వన్నిజ్ నీతినిజయ్ మన్నికాన్ ఇజి ఇడ్డాన్", ఇజి 23 నీతినిజయ్ కాన్ ఇజి ఇడె ఆతాన్", ఇజి దేవులు మాటాదు రాస్తి మన్నిక అబ్రహాం ఒరెన్ వందిజె ఆవద్. 24 మా వందిజెబా నీతినిజయ్ మన్నికార్ ఇజి దేవులు ఇడ్డ మనాన్ ఇజి రాస్త మనాద్. సాతివరిబాణిజ్ యేసుక్రీస్తుజ్ నిక్కి దేవులు ముస్సు నమకం ఇడ్డి మా వందిజెబా నీతినిజయ్ కాన్ ఇజి రాస్ ఆతమనాద్. 25 మా సెఇ పణిజ వందిజె యేసు క్రీస్తుజ్ నస్తార్. సాతివరిబాణిజ్ దేవులు వన్నిజ్ నిక్కిజ్, మా పావమ్ కు విజా సెమిస్తాండ్రె మజి దేవులు వెట కూడిత్తికార్ ఇజి ఇడ్డాన్.

దేవులు వెట మజి సాంతి సమదనమ్ ని సర్ల ఆజినాట్

5 మా ప్రబు ఆతి క్రీస్తు మావందిజ్ సాతాన్ ఇజి మాటు నమ్మిత్తిజ్, మాటు దేవులు వెట కూడిజి మంజినాట్. అందెజె దేవులు వెట సాంతి సమదనం వాత మనాద్. 2 యేసుక్రీస్తు మా వందిజ్ సాతిజ్ ఏలు దేవులు మజి తోరిస్తి దయాదర్మం మాటు నెస్త మనాట్. దేవులు ఎస్సానొ గొప్పవాండ్రు ఇజి నెస్తాటె వన్ని గొప్ప జాయ్ దు మాటుబా మంజినాట్ ఇజి ఎద్దుసుండేజి మంజినాల్ ఇ సర్ల ఆజినాట్. 3 అక్కాదె ఆవండ, క్రీస్తుముస్సు నమకం ఇడ్డి వందిజ్ వాని కష్టమ్ కలొ ఇ సర్లదాన్ మంజినాట్. ఎందానిజ్ ఇహిజ, అయ కష్టమ్ కు వాతిజ్ అక్కెజ్ ఎలాగ బరిస్తిజ్ ఇజి మాటు నెస్తెజ్ ఆనాద్. 4 కష్టమ్ కు వానివలె అక్కెజ్ బరిస్తిజ మాటు నెగ్గి గుణమ్ కు మన్నికార్ ఇజి దేవులు మా వందిజ్ ఒప్పు కొడేజినాన్. నెగ్గి గుణమ్ కు మన్నికార్ ఇజి ఒప్పుకొటిజ మాటు ఆనదాన్ ఎద్దుసుండేజి మంజినాట్. 5 దిన్ని వందిజ్ మాటు ఎద్దు సుండేజి మన్నిజ్ అక్క నిజమనె జగ్గినాద్ ఇజి సుండేజినాట్. ఎందానిజ్ ఇహిజ దేవులు మజి ప్రేమిసినాన్ ఇజి మా మన్నుదు మాటు నెగెండె నెస్తాట్. మజి సీత్తి మన్ని దేవులు ఆత్మదానె దేవులు మా ముస్సు మన్ని ప్రేమ వందిజ్ నెసినాట్. 6 ఎలాగ ఇహిజ, మాటు ఇనికబా కిదెజ్ అబ్ ఏండె మహివలె దేవులు ఏర్పాటు కిత్తి కాలమ్ దు, దేవులు వందిజ్ బక్తిస్తిలి వరివందిజ్ క్రీస్తు సాతాన్. 7 నీతినిజయ్ మన్ని వన్నివందిజ్ ఒరెన్ సాదెజ్ ఇహిజ కష్టం. నెగ్గికాన్ ఆతివన్నివందిజ్ ఒరెన్ సానాన్ సు. 8 గాని దేవులు మజి ఎసానొ ప్రేమిసినాన్ ఇజి తోరిస్తాన్. ఎలాగ ఇహిజ మాటు దేవులు వెట వెత్తెకమ్ దాన్ ఆఇసరి నడిసి మహివలెనె క్రీస్తు మా వందిజ్ సాతాన్. 9 అందెజె, క్రీస్తు మా వందిజ్ సాతిజ్ మాటు నీతిమన్నికాట్ ఇజి దేవులు ఇడ్డిమన్నిక నిజమె. అహిజ, ఎలాకాలం మంజిని సిక్కుదాన్ మాటు క్రీస్తువెట తప్తె ఆనాట్ ఇజి మన్నిక ఒడ్డె నిజమాతిక. 10 ఎందానిజ్ ఇహిజ, మాటు దేవులు వెట వగ అస్తి మహివలె దేవులు మరిసి మా వందిజ్ సాతాండ్రె మజి దేవులు వెట కూడుస్తాన్. అహిజ ఏలు దేవులు వెట మాటు కూడితాట్ ఇహిజ, మరి నండొ మజి గెల్పిస్తెజ్ క్రీస్తు అబ్ నాన్ ఇజి మాటు నెసినాట్. వాండ్రు మరజి నిజిత్తిజ్ నె యా గెలుపు మజి వాతాద్. 11 అక్కాదె ఆవద్, మా ప్రబు ఆతి యేసుక్రీస్తు మా వందిజ్ సాతి వందిజెని మా వందిజ్ కిత్తి పణి వందిజ్ సర్ల ఆజినాట్. యేసుక్రీస్తు బాణిజ్ మాటు దేవులువెలె సమదనం మన్నికాట్ ఆతాట్.

ఆదాముని క్రీస్తు

12 ఏలు నాను ఉండ్రె వెస్తి, ఒరెన్ లొకు, ఇహిజ ఆదాం పావం కిత్తిజ్ పావం యా లొకమ్ దు డూగితాద్. పావం కిత్తిజ్ ఆదాం సాతాన్. అందెజె యా లొకమ్ దు విజెరె సాజినార్. విజెరె పావం కిత్తిజ్ విజెరె సాజినార్. 13 దేవులు మోసెవెట రూలుజ్ సిఏండె మహివలె లొకురె పావం కిజి మహార్. గాని వారు కిత్తి తప్పుజె లెక్క సుండే ఏతాన్. ఎందానిజ్ ఇహిజ రూలుజ్ సిల్లెండె మహాద్కాక రూలుజ్ తప్తార్ ఇజి ఇన్ ఏన్. 14 గాని ఆదాం బత్తితి మహి కాలమ్ దాన్ మోసి కాలమ్ దాక బత్తిజి మహికార్ సాతార్. ఎందానిజ్ ఇహిజ ఆదాం కిత్తి పావం లెకెండె వారు కిఏతార్ గాని వారుబా పావం కిత్తార్. ఆదామ్ ని వెనక వాతి క్రీస్తు ఉండ్రెలెకెండ్రె. ఎలాగ ఇహిజ ఆదాం కిత్తి పణిని క్రీస్తు కిత్తి పణి విజెరెజ్ కూడిత వాతాద్. 15 గాని రివెర్ బా ఉండ్రె లెకెండె ఆవర్. దేవులు సెడినె సీత్తి ఇనాయం తతాన్. మరి ఒరెన్ విజెరెజ్ సాపు తతాన్. గాని యేసు క్రీస్తు వన్ని దయాదర్మమ్ దాన్ తత్తి ఇనాయం ఒడ్డె పెరికాదె. దేవులు విజెరెజ్ సెడినె సీత్తి వన్ని దయాదర్మమ్ నె అయ ఇనాయం. 16 ఆదాం కిత్తి పావమ్ దాన్ వత్తిదన్నిజ్ క్రీస్తు సెడినె సీత్తి ఇనాయమ్ దిజ్ లొ ఇ మరి ఉండ్రె తేడె మనాద్. ఇనిక ఇహిజ, ఆదాం ఉండ్రె పావం కితిజ్ దేవులుబాణిజ్ తీర్పు తతాన్. గాని క్రీస్తు దేవులుబాణిజ్ తత్తి ఇనాయం అయాలెకెండె ఆవద్. సెడినె దొహొక్తి అయ ఇనాయం ఇనిక ఇహిజ దేవులు లొకురిజ్ నీతినిజయ్ కాన్ ఇజి ఇడ్డికదె. నీతినిజయ్ కాన్ ఇజి దేవులు లొకురిజ్ ఇడ్డిని అయ ఇనాయం వాతిజ్, లొకుర్ కిత్తి విజా పావమ్ క వందిజ్ "మీ పావమ్ కు విజా నాను మాయిప్ప", ఇజి దేవులు వెహొండ్రె వరిజ్ నీతినిజయ్ కాన్ ఇజి ఇడ్డాన్. 17 ఒరెన్ లొకు తప్పు కిత్తిజ్ లొకురె విజెరె సాజినారె, సాపు లొకురిజ్ ఏలుబడి కిజినాద్. గాని మరి ఉండ్రె ఒడ్డె నిజమె, ఇనిక ఇహిజ, యేసు క్రీస్తు ఇని మరి ఒరెన్ కిత్తి పణిదాన్, దేవులు బాణిజ్ గొప్ప దయాదర్మమ్ ని సెడినె దొహొక్తి నీతినిజయ్ ఇనికెజ్ వాతిజ్ అక్కెజ్ మా బత్తుదు ఏలుబడి కిజినె. 18 ఆహొ ఒరెన్ వన్ని తప్పుదాన్ దేవులు బాణిజ్ తీర్పు వాతి లెకెండె, మరి ఒరెన్ వన్ని సీత్తి పణిదాన్ విజెరె తీర్పుదాన్ తప్తె ఆదెజ్ అబ్ నార్. యా సీత్తి పణి, వరిజ్ ఎలాకాలం బత్తిని బత్తు తతాద్. 19 ఎలాగ ఇహిజ ఒరెన్ లొకు దేవులుదిజ్ లొజిఏండె మహివలె ఎలాగ లొకురె విజెరె తప్పు కిత్తికార్ ఆతారొ, అయాలెకెండెనె మరి ఒరెన్ లొకు దేవులుదిజ్ లొజితిజ్ దేవులు లొకురిజ్ నీతినిజయ్ మన్నికార్ ఇజి ఇడ్డాన్. 20 దేవులు రూలుజ్ లొకురిజ్ వాతివెలె తప్పుజ్ నండొ కిజినాన్ ఇజి లొకర్ నెస్తార్. గాని తప్పుజ్ నండొ ఆతివెలె దేవులుది గొప్ప దయాదర్మమ్ బా దన్నిజ్ ఇంక నండొ పేరిజి వాతాద్.

21 పాపం నండొ ఆజి వాతివలె లోకుర్ సావుదిజ్ తగిజి వాతార్. గాని ఏలు దేవుణు లోకురిజ్ సీతినజయ్ మన్నికార్ ఇజి ఇడ్డిజ్ గొప్ప దయాదర్మం లోకుర్ ముస్సు ఏలుబడి: కిజినాద్. ఎందానిజ్ ఇహిజ మా ప్రబు ఆతి యేసుక్రీస్తు కిత్తి పణిదాన్ ఎలాకాలం బత్సిన బత్సు వాదెజ్ ఇజి.

పాపం వందిజ్ సాతికాల్ గాని క్రీస్తువెల బత్సినకాల్.

6 అహిజ, ఏలు ఇనిక వెహ్నాల్? మాటు పాపం కిత్తివెల దేవుణు గొప్ప దయాదర్మం తోరిస్తాన్ ఇహిజ ఏలు మరి నండొ దయాదర్మం తోరిస్తెజ్ ఇజి మరి నండొ పాపమ్కు కిజినె మండ్రెజ్నా? 2 ఆవద్, మాటు పాపం కిజినె మండ్రెజ్ ఆవద్. ఎందానిజ్ ఇహిజ, పాపం కిదెజ్ ఆస మాటు డి:స్తాల్. నన్ని ఆసెజ్ డి:స్తిజ్ పాపం కిజినె మండ్రెజ్ అల్పట్లె. 3 యేసు క్రీస్తు వెల కూడెదెజ్ ఇజి బాప్తీసం పాందినివలె మాటుబా వన్నివెల సాతాల్ ఇజి విజేరిజ్ వెహ్నాల్. ఇక్క మీరు నెస్తెజ్ వలె. 4 అందెజ్ క్రీస్తు సాతి వెనుక బూమి లోఇ వన్ని పీనుగు ఎలాగ మూసె ఆతాదొ, అయాలెకెండెనె బాప్తీసం పాందితివెలె మాటుబా వన్నివెల మూసె ఆతి లెకెండె ఆతాల్. ఎలాగ ఇహిజ, పాపం కిదెజ్ మన్ని ఆసవందిజ్ బత్సినెజ్ అల్పండె ఆజినాల్. బుబ్బాతి దేవుణుది గొప్ప జాన్ మన్ని సత్తుదాన్ యేసుప్రబు ఎలాగ సావుదాన్ మర్రి నీజితాండె అయాలెకెండె మాటుబా ఉండ్రె కొత్త బత్సుదు మండ్రెజ్ అటూల్. 5 మాటు మా పడా:యే బత్సు డి:సీసీజి యేసుక్రీస్తు వెల వన్ని సావుదు కూడితాల్ ఇహిజ యేసుక్రీస్తు సావుదాన్ మర్రి నిజిత్తి లెకెండె మాటుబా తవ్పండె ఉండ్రె కొత్త బత్సుదు వన్నివెల కూడి:జి మంజినాల్. 6 ఒరెన్ ఎజమాని అడిగి పణికినికాన్ లోజిజి మంజినెలెకెండె, మాటు పాపం కిదెజ్ మన్ని ఆసదిజ్ లోజిజి మండ్రెజ్ ఆవద్. అందెజె యేసుక్రీస్తు సీలువాదు సాతివెలె పాపం కిదెజ్ మన్ని మా ఆసెబా అయ సీలువాదు నెస్తి లెకెండెనె. యాక మాటు గుర్తు కినాల్. 7 సాతిసాహికాన్ పాపం కిదెజ్ మన్ని ఆసెబాణిజ్ డి:బె ఆతికాన్ గె. అయాలెకెండె మాటుబా డి:బె ఆతాల్. 8 అహిజ, మాటు క్రీస్తు వెల సాతి లెకెండె ఇహిజ, క్రీస్తు వెల బత్సినె లెకెండె మాటుబా వన్నివెల బత్సినాల్ ఇజి నమ్మిజినాల్. 9 క్రీస్తు సాతిజ్ దేవుణు క్రీస్తుజ్ సాతి వరిబాణిజ్ మర్రి నికాన్. వాండ్రు మరి సావన్. అందెజె సావు వన్ని ముస్సు అతికారం కిదెజ్ అల్పద్ ఇజి మాటు నెసినాల్. 10 క్రీస్తు సాతివెలె లోకురి పాపమ్కు వందిజ్ ఉండ్రె నుటునె సాతాన్. గాని మర్రి బత్సినెవెలె దేవుణు వందిజ్ బత్సినాన్. 11 అయాలెకెండె మీరుబా పాపం కిదెజ్ మన్ని ఆసదిజ్ సాతికార్ ఇజి మిజి ఇడ్డు. మరి యేసుక్రీస్తు వెల కూడి:తి మహిజ్ దేవుణుదిజ్ ఇస్టమాతి బత్సు బత్సినెదెర్ ఇజి ఇడ్డు. 12 అందెజె, పాపం కిదెజ్ మన్ని ఆసెజ్, సాజి సాని మీ ఒడొ:ల్దు ఏలుబడి: కిదెజ్ ఆవద్. ఎందానిజ్ ఇహిజ, పాపం కిదెజ్ మన్ని ఆసెజ్ వజ కిబిస్తెజె అక్క నుండె:జినాద్. 13 పాపం మీ ముస్సు ఏలుబడి: కిజి సెఇ పణిజ్ కిదెజ్ వాడుకొని ఆయుదమ్కులెకెండె మీ ఒడొ:ల్ది బాగమ్కాజ్ వాడుకొండె:మాల్. గాని సావుదాన్ బత్సుదు వాతివరిలెకెండె మీ ఒడొ:ల్దిజ్ దేవుణుదిజ్ ఒప్పుజెస్తెజ్. నస్తవలె మీ ఒడొ:ల్లి బాగమ్కు సీతినజయ్ మన్ని పణిజ్ కిదెజ్ వాడుకొని ఆయుదమ్కులెకెండె ఆనె. 14 పాపం కిదెజ్ ఇజి ఆస మీ ముస్సు ఏలుబడి: కిదెజ్ ఆవద్. ఎందానిజ్ ఇహిజ దేవుణు తీర్పుదాన్ తప్ప ఆదెజ్ ఏలు మోసె సీత్తి రూలుజ లోజిదెజ్ అవ్సరం సిల్లెద్. గాని పాపం కిపండె మండ్రెజ్ ఏలు దేవుణు దయాదర్మం మీ ముస్సు ఏలుబడి: కిజినాద్.

సీతినజయ్ మన్ని బత్సు బత్సినెజ్ ఇజి మన్ని ఆసదిజ్ మీరు వెటివణి కినివరిలెకెండె లోజిజి మంజినెదెర్

15 ఏలు మాటు దేవుణు మోసెజ్ సీత్తి రూలుజ అడిగి మంజినెజ్, పాపం కిజి మండ్రెజా? ఆవద్, ఎసెజ్బా ఆవద్. 16 ఇనిక ఇహిజ యాక నిజం ఇజి మీరు నెసినెదెర్. ఎయెనీబా వెటివణి కినివన్ని లెకెండె ఒరెన్ ఎజమానిజ్ లోజిజి మండ్రెజ్ నూణివలె, అయ ఎజమానిజ్ వెటివణి కినికాన్ ఆజినాన్ గె. పాపమ్దిజ్ లోజిత్తిజి సావు తపిసినెదెర్. దేవుణుదిజ్ లోజిదెజ్ ఒప్పుకొటిజి దేవుణు మిజి సీతినజయ్కార్ ఇజి ఇడ్డాన్. 17 ముందాల్ మీరు ఇస్టం ఆతి వజ పాపం కిజి, పాపం కిదెజ్ మన్ని ఆస ఇని ఎజమానిజ్ వెటివణి కినికార్ లెకెండె మహిదెర్. గాని వెనుక మిజి దేవుణు వందిజ్ నెస్తిన్తి దన్నువందిజ్ మీరు పూర్తి ముస్సుదాన్ నెస్తిదన్నుజ్ లోజిత్తి మన్నిదెర్. దిన్నివందిజ్ నాను దేవుణుదిజ్ వందనమ్కు వెహ్నాన్. 18 పాపం కిదెజ్ మన్ని ఆసెబాణిజ్ దేవుణు మిజి డి:బిన్తి దన్నుజ్ నాను దేవుణుదిజ్ వందనమ్కు వెహ్నాన్. దేవుణు ఎర్దు సీతినజయ్ మన్ని బత్సు బత్సినెజ్ ఇజి మన్ని ఆసదిజ్ మీరు వెటివణి కినివరిలెకెండె లోజిజి మన్ని దన్నుజ్బా నాను దేవుణుదిజ్ వందనమ్కు వెహ్నాన్.

19 దేవుణు వందిజ్ నిజమాతికెజ్ అర్దం కిబిస్తెజ్ ఇజి నాను అర్దం కిబిసినె మాటెజ్ వెహ్నాన్. ఏలుదాక మీరు వెటివణి కినివరి లెకెండె మీ ఒడొ:ల్ది బాగమ్కు సెఇవణిజ్ కిదెజ్ మరి ఒడ్డె సెఇకెజ్ కిజి, పాపం కిదెజ్ మన్ని ఆసెజ్ లోజిత్తి మహిదెర్. ఏలు దేవుణుదిజ్ కేట ఆతివరిలెకెండె సీతినజయ్ పణిజ్ కిజి దేవుణుదిజ్ వెటివణి కినికార్ లెకెండె మీ ఒడొ:ల్దిజ్ నడి:పిస్తు. 20 మిజి ఇస్టం ఆతివజ బత్సినె పాపం కిదెజ్ మన్ని ఆసెజ్ లోజిజి మహివలె మీరు సీతినజయ్ దాన్ బత్సినెజ్ ఇజి ఎయెర్బా మిజి డటం వెహ్నాత్. 21 గాని ఏలు మిజి నీగు తపిసినె నన్ని బత్సు మిజి ఇని లాబం తెవితాద్. అయ బత్సుదాన్ దేవుణుబాణిజ్ దూరం మండ్రెజ్నె ఆతాద్. నన్ని బత్సు దేవుణు ఇనిక తనాద్ ఇహిజ సావునె తనాద్. 22 గాని ఏలు పాపం కిదెజ్ మన్ని ఆస మీ ముస్సు ఏలుబడి: కిపండె మీరు దన్ని ముస్సు గెలిస్తిదెర్. దేవుణుదిజ్ వెటివణి కినికార్ లెకెండె ఆతిదెర్. నన్ని బత్సుదాన్ వాతి ఉండ్రె వండులెకెండె మీరు దేవుణుదిజ్ కేట ఆతి లోకుర్ ఆతిదెర్. నస్తవలె ఎలాకాలం బత్సినె బత్సు దొహ్కాద్. 23 పాపమ్దిజ్ లోజిజి మహివరిజ్ దొహ్కాక్కి కూలి ఎలాకాలం మన్ని సావు. గాని మా ప్రబు ఆతి క్రీస్తుజ్ నమ్మిత్తివరిజ ఎలాకాలం బత్సినె బత్సు దేవుణు నడినె సీనాన్.

ఆలు మాసీర్ నడి:మి మన్ని రూలుజ్

7 యేసుప్రబుజ్ నమ్మిత్తి మా తంబెరిజాండె, రూలుజ వందిజ్ నెసినెవరి వెట నాను యాక వెహ్నాన్. ఇనిక ఇహిజ ఒరెన్ లోకు బత్సినె మహివలె ఉండ్రెనె రూలుజ లోజిజి మండ్రెజ్ గె. 2 ఎలాగ ఇహిజ, పెండ్లి ఆతివందిజ్ మన్ని రూలుజ నుడె:తిజ, ఉండ్రె అయ్లి కొడొ: దన్ని మాసీవెల మంజినాద్ గె. గాని మాసీ సాతసాహాన్ ఇహిజ అది వన్నిజ్ పెండ్లి ఆతిలెకెండె మండ్రెజ్ అవ్సరం సిల్లెద్ గె. అది మాసీవెల మండ్రెజ్ ఇజి మన్ని రూలుజబాణిజ్ డి:బె ఆతాద్. 3 రూలువజ నుడె:తిజ, మాసీ బత్సినె మహివలె మరి ఒరెన్ వెట అది సాహిజ, అది రంకు బూలానికాద్ ఇనార్. గాని మాసీ సాతిజ పెండ్లి ఆతి మన్ని రూలుదిజ్ లోజిజి మండ్రెజ్ అవ్సరం సిల్లెద్. వెనుక మరి ఒరెన్ వన్నిజ్ పెండ్లి ఆతిజ అది రంకు బూలానికాద్ ఇజి ఇన్వెర్.

4 అయాలెకండెనె మా తంబెరిజాండె, యేసువులు వెల మీరుబా సాతిలెకండె ఆతిదెర్. అందెజె దేవుణు మోసెజ్ సిత్తి రూలుజ్ లోజెనిబాణిజ్ మీరు డిబె ఆతిదెర్. మాసి సాతికాద్ మరి ఒరెన్ వన్నిజ్ పెండ్లి ఆతిలెకండె ఏలు మీరు, సాతివరిబాణిజ్ దేవుణు నిక్కి క్రిస్తువెల కూడితిదెర్. ఎందానిజ్ ఇహిజ, మా బత్సుదాన్ దేవుణువందిజ్ నెగ్గి పట్టు పండెజ్ ఇజి. 5 ఒడొలీది సెఇ ఆసెజ్ వజ కిదెజ్ ఆస ఆని మన్ను మజి అడిజిమహివలె పాపం కిబిస్తెజ్ తగితి ఆసెజ్ మా ఒడొలీది బాగమ్కాజ్ ఏలుబడి: కిజి మహె. దేవుణు మోసెజ్ సిత్తి రూలుజ్ మాటు నెస్తివలె యా ఆసెజ్ పిరితిజ్ పాపం కిజి మాటు సాపు తపిసిని పట్టు పండిస్తాట్. 6 గాని ఏలు యేసువులు వెల సాతిలెకండె మహిజ రూలుజ వెటివణి కినిదన్నిదటాన్ డిబె ఆతాట్. రాస్తిమహి అయ రూలుజ ఏలు మాటు వెటివణి కినికార్ ఆవట్. ఏలు మాటు దేవుణు ఆత్మదిజ్ వెటివణి కినివరివజ ఉండ్రీ కొత్త బత్తిజినాట్.

దేవుణు మోసెజ్ సిత్తి రూలుజ్

7 ఏలు మాటు ఇనిక వెన్నాట్? దేవుణు మోసెజ్ సిత్తి రూలుజ్ పాపం కిదెజ్ మన్ని ఆసెజ్ పుటిసినాద్. అందెజె అయ రూలుజ్ సెఇకెజ్ ఇజి వెన్నాట్? అట్వట్, ఆహు వెన్నాజ్ ఆవద్. గాని పాపం కిజిని ఇజి నాను ఎలాగ నెస్తి ఇహిజ, దేవుణు మోసెజ్ సిత్తి రూలుజాణిజ్ నెస్తిమన్ను. ఎలాగ ఇహిజ, ఆఇవరిజ్ మన్ని వనకాజ్ వందిజ్ ఆస ఆమాట్ ఇజి మోసి సిత్తి రూలుదు వెహోవండ మంజినిక ఇహిజ, అక్క దేవుణు ఎద్రు పాపమ్కు ఇజి నెస్తివలె మరి. 8 ఆఇ వరిజ్ మన్ని వనకాజ్ వందిజ్ ఆస ఆమాట్ ఇజి రూలు మహిజ్ నె, నన్ని ఆసెజ్ పుట్టిజ్ నాను వనకవందిజ్ ఆస ఆత. పాపం కిమాట్ ఇజి రూలుజ్ సిల్లెండ మంజినిక ఇహిజ పాపం కిదెజ్ మన్ని ఆస మా మున్ను ఏలుబడి: కివద్. 9 రూలుజ్ నెస్తివండ మహివలె నాను ఇని బాద సిల్లెండ బత్తిజి మహా గాని రూలుజ్ నెస్తి వెనుక నాను తప్ప ఇజి నెస్తి. దేవుణుబాణిజ్ దూరం ఆత ఇజి నెస్తి. 10 రూలుజ లోజితిజ ఎలాకాలం బత్తిని బత్తు వానాద్ ఇజి నాను ఒడొబిత్త గాని అయ రూలుజాణిజ్ నా సాపుదిజ్ తీర్పు వాత ఇజి నెస్తి మన్ను.

11 ఎలాకాలం బత్తిని బత్తు వానాద్ ఇజి నాను మొసిం కిబె ఆత. అయ రూలుజ్ నాను తప్పానె సాపుదిజ్ తీర్పు తత్త. 12 అందెజె దేవుణు మోసెజ్ సిత్తి రూలుజ్ దేవుణుబాణిజ్ వాతికెజ్. లోకుర్ ఎలాగ నడిదెజ్ ఇజి మన్ని ఆడ్రెజ్ సీతనిజయ్యికెజ్, నెగ్గికెజ్. 13 అహిజ, దేవుణు మోసెజ్ సిత్తి రూలుజ్ నెగ్గికెజ్ గాని నజి సాపుదిజ్ తీర్పు తత్త ఇజి వెన్నాజ? ఆవద్, ఆహు ఆవద్. రూలుజ్ నెగ్గికెజ్ గాని పాపం కిదెజ్ నజి మన్ని ఆస యా రూలుజాణిజ్ ఒడ్డె పిరిక ఆజి తోరె ఆతాదె నాను దేవుణుబాణిజ్ దూరం ఆత. రూలుజ్ ఎందానిజ్ సిత్తాన్ ఇహిజ పాపం కిదెజె మన్ని మా మన్ను తోరిస్తెజె. రూలుజ వజ బత్తిదిజ్ అట్వండ, మాటు పాపం కినికాట్ ఇజి తోరిస్తెజె ఇక్కెజ్ వణిదిజ్ వాతె. ఆహె మాటు ఎస్సానో పాపం కినికాట్ ఇజి నెస్తి యా రూలుజ్ వణిదిజ్ వాతె.

14 దేవుణు మోసెజ్ సిత్తి రూలుజ్ దేవుణు ఆత్మదాన్ వాతికెజ్ ఇజి మాటు విజెటె నెసినాట్. గాని నాను ఇహిజ నావందిజె ఎత్తు కిజిని మన్నుదాన్ మన్ను. పాపం కిదెజ్ మన్ని ఆసదిజ్ ఒరెన్ వెటివణి కినివన్నిలెకండె లోజిజి మంజిని. 15 ఎలాగ ఇహిజ, నాను కినికెజ్ ఎందానిజ్ ఆహె కిజిని ఇజి నాను అర్దం కివ. కిని ఇజి నండొ సుట్టు ఒడొబినికెజ్ కివండ ఆజిని. కిదెజ్ ఇష్టం సిల్లికెజ్ నండొ సుట్టు కిజిని. 16 కిదెజ్ ఇష్టం సిల్లి సెఇకెజ్ నాను కినివెలె ఉండ్రీ సెసిని. ఇనిక ఇహిజ దేవుణు రూలుజ్ నెగ్గికెజ్ ఇజి సెసిని. 17 అందెజె, కిదెజ్ ఇష్టం సిల్లి సెఇకెజ్ నాను కినివెలె, అక్క నాను ఆవ, నా లోఇ మన్ని పాపమ్ నె అక్కెజ్ కిబినినె. 18 ఒడొలీది సెఇ ఆసెజ్ వందిజ్ ఎత్తు కిని నా మన్నులోఇ నెగ్గికెజ్ ఇనికెజ్ సిల్లు ఇజి నాను నెసిని. ఎలాగ ఇహిజ, నెగ్గికెజ్ కిదెజ్ ఇష్టం మనాద్ గాని కిదెజ్ అట్వ. 19 కిని ఇజి ఒడొబిత్తి నెగ్గి వణిజ్ నాను కివ. కిదెజ్ ఆవద్ ఇజి ఒడొబిత్తి సెఇ వణిజ్ నె కిజిని. కిత్తిజె 20 కిదెజ్ ఆవద్ ఇజి ఒడొబిత్తి సెఇ వణిజ్ కిత్తిజె అక్క కినిక నాను ఆవ. నా లోఇ మన్ని పాపమ్ నె అక్కెజ్ కిబినినె. 21 అహిజ, ఇనిక జగ్గిజినాద్ ఇహిజ నాను ఇనికాదొ ఉండ్రీ నెగ్గికెజ్ కిదెజ్ ఇజి సుడొతిజ సెఇకదె కిజిని. 22 ఎందానిజ్ ఇహిజ దేవుణు రూలుజ వందిజ్ నాలొఇ గొప్ప సర్ద ఆజిని. 23 గాని మరి ఉండ్రీ సత్తు నా లొఇ ఏలుబడి: కినిక నాను సుడొజిని. నాను కిని ఇజి సుడొజిని దన్నిజ్ అయ సత్తు నావెల కాట్లాడజినాద్. పాపం కిదెజ్ నా ఒడొల్లి బాగమ్క లొఇ మన్ని ఆసెజె అడిగి నజి ఇడ్డెజ్ అయ సత్తు సుడొజి మంజినాద్. అందెజె గెలిస్తెజ్ అట్వండాజిని. 24 ఒఒ, ఒఒ దిన్నివందిజ్ మన్నుదు గొప్ప కట్టమాతి మణిసి నాను. సాపుదిజ్ తీర్పు వాతి యా ఒడొలీదాన్ నజి డిబిస్సికాన్ ఎయెనిబా మంజినిక ఇహిజ బాగ మహోద్మరి. 25 మా ప్రబు ఆతి యేసు క్రిస్తు వెలనె మజి అయ విడుదల వానాద్. దిన్ని వందిజ్ నాను దేవుణుదిజ్ వందనమ్కు వెస్సిని. అహిజ దేవుణు సిత్తి రూలుజ లోజిదెజ్ సుడొజిని. గాని ఒడొలీది సెఇ ఆసెజ్ కిదెజ్ ఆస ఆని నా మన్ను నజి అడిజి దన్ని అడిగి నజి ఇడ్డినాద్. అందెజె నాను ఏలుబా పాపమ్దిజ్ వెటివణి కినికాన్ లెకండె.

దేవుణు ఆత్మ నడిపిసిని బత్తు

8 అందెజె ఏలు యేసుక్రిస్తు మున్ను నమకం ఇడ్డి దేవుణు ఎద్రు సీతనిజయ్యికార్ ఆతివరిజ్ సెక్స సిల్లెద్. 2 ఎందానిజ్ ఇహిజ, యేసుక్రిస్తుదాన్ వాతి కొత్త బత్తు బత్తిదిజ్ దేవుణు వన్ని ఆత్మ మజి సిత్త మనాన్. అయ ఆత్మ సత్తుదాన్ పాపం కిదెజ్ మన్ని ఆసదాన్ మాటు డిబె ఆత మనాట్. ఆహె సాపుని సిక్కు తపిసిని పాపం కిదెజ్ మన్ని ఆసెజాణిజ్ నాను డిబె ఆత మన్ను. 3 మాటు ఒడొలీది సెఇ ఆసెజాణిజ్ మహిజ్ పాపమ్దాన్ గెల్పిస్తెజ్ దేవుణు సిత్తి రూలుజ్ అట్వండ మహాద్. ఎందానిజ్ ఇహిజ, ఒడొలీది సెఇ ఆసెజ్ అడ్డు కిత్తాద్. గాని దేవుణు మజి డిబిస్తాన్. ఎలాగ ఇహిజ, మా పాపమ్కాజ్ వందిజ్ వన్ని సాంత మరిసిజ్ యా లోకమ్దు పాక్తాండ్రె, ఒడొలీది సెఇ ఆసెజ్ మా మున్ను ఏలుబడి: కినిదన్నిదటాన్ మజి డిబిస్తాన్. వన్ని మరిసి మా లెకండె ఒడొలీదాన్ పుత్తాండ్రె మా పాపమ్కాజ్ వందిజ్ సాతాన్. 4 అందెజె ఏలు దేవుణు సత్తుదాన్ దేవుణు రూలుజ లోజిదెజ్ అట్నాట్. ఒడొలీది సెఇ ఆసెజె లోజిదెజ్ అక్కర్ సిల్లెద్. ఏలు దేవుణు ఆత్మదిజ్ ఇష్టం ఆతి లెకండె బత్తిదిజ్ అట్నాట్.

5 ఒడొలీది సెఇ ఆసెజె లోజిజి బత్తినికార్ దన్ని వందిజె ఎత్తు కిజి మంజినార్. గాని దేవుణు ఆత్మదిజ్ లోజిజి నడినికార్ దేవుణు ఆత్మదిజ్ తగిత్తికెజ్ ఒడొబినార్. 6 పాపం కిదెజ్ ఒడొల్లు మన్ని సెఇ ఆసెజె ఏలుబడి: కిని మన్ను మన్నికార్ దేవుణుబాణిజ్ దూరం ఆనారె సానార్. గాని దేవుణు ఆత్మదిజ్ ఇష్టం ఆతిలెకండె బత్తినికార్ దేవుణువెల బత్తినికార్ వరిలోఇ సాంతి సమదనం మంజినాద్. 7 ఒడొలీది సెఇ ఆసెజ్ ఏలుబడి: కిని మన్ను మన్నికార్ దేవుణువెల కుల్లు

మన్నికార్. వారు దేవులు రూలుజ లోజిఇకార్. లోజిదెజ్ అట్వెర్. 8 అందెజె ఒడోల్ది సెఇ ఆసెజ్ ఏలుబడిః కిస మన్ను మన్నికార్ దేవుణుదిజ్ ఇష్టం ఆతివజ నడిదెజ్ అట్వెర్.

9 దేవుణు ఆత్మ మీ లోఇ మహిజ అయ ఆత్మదిజ్ లోజిజి మండ్రెజ్ అట్విదెర్. ఒడోల్ది సెఇ ఆసెజ్ వందిజ్ లోజిజి మండ్రెజ్ ఎత్తు కిని మన్నుదిజ్ లోజిజి మండ్రెజ్ అక్కర్ సిల్లెద్. క్రీస్తుబాణిజ్ వాజిని ఆత్మ సిల్లికాన్, క్రీస్తుజ్ సెందితికాన్ ఆవన్. 10 గాని మీ లోఇ క్రీస్తుబాణిజ్ వాజిని ఆత్మ మహిజ మీ ఒడోల్ పాపమ్దాన్ సానాద్ గాని మీ ఆత్మ బత్కినాద్. ఎందానిజ్ ఇహిజ దేవుణు మీ పాపమ్కు విజ మాయిప్రాండ్రె నీతి మన్నికార్ ఇజి ఇడ్డ మనాన్. 11 సాతివరిబాణిజ్ యేసుజ్ మరి బత్కిస్తే దేవుణు ఆత్మ మీలోఇ బత్కజిమహిజ, సాతివరిబాణిజ్ క్రీస్తుజ్ మరి బత్కిస్తే దేవుణు సాజిసాని మీ ఒడోల్దిజ్ బా బత్కిస్తాన్. మీలోఇ మన్ని దేవుణు ఆత్మదాన్ యాక కిసాన్.

12 అందెజె తంబెరిజాండె, మాటు ఉండ్రె దన్నిజ్ లోజిజి మండ్రెజ్ బాజిత మన్నికాట్ గాని అక్క ఒడోల్ది సెఇ ఆసెజ్ లోజినిక ఆవద్. 13 ఎందానిజ్ ఇహిజ, మీ ఒడోల్ది సెఇ ఆసెజాణిజ్ ఏలుబడిః కిబె ఆని మన్ను వెప్పిలెకండె నడిఃతిజ మీరు సాన సానార్. గాని దేవుణు ఆత్మదాన్ మీ మన్నుదు మన్ని సెఇ ఆసెజ లాగ్విపాక్తిజ ఎలాకాలం బత్కినిదెర్. 14 దేవుణు ఆత్మ నడిఃవీసిని వజ నడిఃనికార్ దేవుణు కొడోఃరె. 15 ఎందానిజ్ ఇహిజ, దేవుణు మజి సీత్తి ఆత్మ మజి తియెల్ తపిసి వెలి పణిమణిసిర్ లెకండె ముందాల్ మహివజ సిక్కు వానాద్ ఇజి తియెలాజి మండ్రెజ్ ఇడ్వన్. గాని మజి దేవుణు కొడోఃర్ ఇజి ఇడ్డ మనాన్. అందెజె మాటు ఏలు దేవుణుదిజ్ అబ్బ ఇజి కూక్తెజ్ ఆనాద్. 16 మాటు దేవుణు కొడోఃర్ నె ఇజి దేవుణు ఆత్మ మా ఆత్మవెట కూడిఃతాండ్రె నిజం వెస్సినాన్ ఇజి మాటు నెసినాట్. 17 మాటు దేవుణు కొడోఃర్ కాక దేవుణు వన్ని కొడోఃరిజ్ ఇడ్డిమన్ని ఆస్తిదిజ్ అక్క మజి వానాద్. దేవుణు క్రీస్తుజ్ ఇడ్డిమన్ని అక్కజ్ బా క్రీస్తువెట మజి దోహ్త్సె. ఎలాగ ఇహిజ మాటు క్రీస్తువెట వన్ని గొప్ప గవరం దోహ్త్సెజ్ ఇహిజ వన్నివెట కష్టమ్కుబా బరిస్తెజ్ వలె.

వాని కాలమ్దు తోర్ని సాకు

18 యా కాలమ్దు మజి వాని కష్టమ్కు సుడఃతిజ అక్కెజ్ ఏవటిదిక్కెజ్ ఆఉ ఇజి నాను ఒడఃబిజిన. గాని వాని కాలమ్దు దేవుణు మజి తోరిసిని సాకు దిన్నిజ్ ఇంక ఎస్సా గొప్ప పెరిక. 19 దేవుణు కొడోఃర్ ఎయెర్ ఇజి దేవుణు తోరిస్సి కాలం వందిజ్ దేవుణు తయార్ కిత్తికెజ్ విజా ఆనదాన్ ఎద్దుసుడఃజి మంజినె.

20 ఎందానిజ్ ఇహిజ దేవుణు తయార్ కిత్తికెజ్ విజా పణిదిజ్ రెవండ సిక్కు సీజి ఇడ్డాన్. ఎలాగ ఇహిజ అక్కెజ్ కిత్తిక ఆవద్. ఉండ్రె దన్ని వందిజ్ వారు ఎద్దుసుడఃజి మండ్రెజ్ ఇజి దేవుణునె అక్క జర్పిస్తాన్. 21 ఇనిక ఎద్దుసుడఃజి మంజినె ఇహిజ, దేవుణు తయార్ కిత్తికెజ్ విజా ఏలు పాడాఃజి సాని దన్నిజ్ అడిగి ఆతె మన్నె గాని దన్నిబాణిజ్ దేవుణు డిఃబిస్సి దన్నిజ్ ఎద్దుసుడఃజి మంజినె. వన్ని కొడోఃరిజ్ తగితి లెకండె గొప్ప జాయ్ కల్లితి మన్ని విడుఃదల సీనాన్ ఇజి ఎద్దుసుడఃజినె.

22 ఏలుదాక, ఏరుఃబాని ఆయ్లికొడోః నొప్పిదాన్ అడఃబానిలెకండె, దేవుణు తయార్ కిత్తికెజ్ విజా ఉండ్రెలెకండె మొరొ అజి మంజినె. 23 దేవుణు తయార్ కిత్తికెజ్ విజానె ఆఉ, దేవుణు ఆత్మ దోహ్త్తి మాటుబా అడఃబాజి మంజినాట్. మా లోఇ మన్ని దేవుణు ఆత్మ ఇహిజ తోలిత దోహ్త్తి ఉండ్రె ఇనాయం లెకండె. వెనుక వాని పూర్తి ఇనాయమ్దిజ్, ఇహిజ దేవుణు వన్ని కొడోఃరిజ్ ఇడ్డిమన్ని గొప్ప అక్కవందిజ్ మాటు ఎద్దుసుడఃజి మంజినాట్. నస్తివలె మా ఒడోల్ కష్టమ్దాన్ డిఃబె ఆనాద్. 24 దేవుణు మజి రక్కిస్తిబాణిజ్ అసి మాటు మజి వాని జాయ్ కల్లితిమన్ని విడుఃదలవందిజ్ ఎద్దు సుడఃజి మంజినాట్. ఎద్దుసుడఃజి మంజినెక సుడఃతాన్ ఇహిజ ఒరెన్ దన్నివందిజ్ ఎద్దుసుడఃజి మండ్రెజ్ అక్కర్ సిల్లెద్ గదె. ఎందానిజ్ ఇహిజ సుడఃతి వెనుక దన్నివందిజ్ మరి ఎద్దుసుడఃజి మన్వన్ గదె. 25 గాని మాటు సుడఃఇ దన్నివందిజ్ ఎద్దుసుడఃజి మహిజ్, దన్నివందిజ్ ఒరిసి మంజినాట్.

26 అయవజనె మా లోఇమన్ని ఆత్మ వందితిమన్నివలె దేవుణుఆత్మ మజి నత్తు సీజినాన్. ఎలాగ పార్దనం కిదెజ్ ఇజి నెన్ ఏండ మాటిబాణిజ్ వెహ్తెజ్ అట్ ఇనన్ని గుపె ఆనివలె దేవుణు ఆత్మనె మా వందిజ్ పార్దనం కిజినాన్. 27 మా మన్నుదు ఇనిక ఇజి దేవుణు సూణాండ్రె, దేవుణు ఆత్మ వెస్సిక అర్దం కిజినాన్. అక్క ఇనిక ఇహిజ దేవుణు ఆత్మ దేవుణు వెట ఎలాగ పార్దనం కిదెజ్ ఇజి దేవుణు ఆస ఆజినాండ్రె అయవజ దేవుణు ఆత్మ వరివందిజ్ పార్దనం కిజినాన్.

విజావనకాజ్ మున్ను గొప్పజ గెలిస్తాట్

28 దేవుణుదిజ్ ప్రేమిసినివరిజ్ వాండ్రు ఏర్పాటు కిత్తిదన్నిజ్ ఎర్గిస్తివరిజ్, విజా నెగెండె జర్పిసినాన్ ఇజి మాటు నెసినాట్. 29 దేవుణు ముందాల్ నె వన్నిజ్ నమ్మిని వరిజ్ నెస్తాండ్రె వరిజ్ ఎర్గిస్తాన్. వన్ని మరిసిలెకండె ఆనార్ ఇజి దేవుణు వరిజ్ కేట ఇడ్డాన్. ఆహె కిత్తిజ్ క్రీస్తు దేవుణుదిజ్ పెరిమరిసి లెకండె ఆనాన్. దేవుణు కొడోఃరాతి మాటు యేసుజ్ తంబెరుబు లెకండె ఆనాట్. 30 ఎయెర్ దేవుణుదిజ్ నమ్మినార్ ఇజి దేవుణు ముందాల్ నె నెస్తాన్. వరిజ్ దేవుణు కూక్తాన్. దేవుణు కూక్తిజ్ వన్నిడగు సాహివరిజ్ వరి పాపమ్కు విజా సెమిస్తాండ్రె దేవుణు వెట కూడిఃత్తికార్ ఇజి ఇడ్డాన్. కూడుఃప్తి వరిజ్ వన్ని గొప్ప జాయ్ సిత్తాన్.

దేవుణు ప్రేమ

31 ఏలు దన్నివందిజ్ మాటు ఇనిక వెహ్త్టిట్. దేవుణు మా దరిజ్ మహిజ మా ఎద్దు ఎయెర్ బా నిల్వెర్ ఇజినె వెహ్తెజ్. 32 దేవుణు వన్ని సాంత మరిసిజ్ సివిండ ఆపతాన్. గాని గొప్ప కష్టమాతి సాపుదిజ్ ఒవజెప్తాన్. క్రీస్తుజ్ మజి సీత్తి దేవుణు, మాటు వన్ని వందిజ్ బత్కిదెజ్ మజి కావాలిసికెజ్ విజా సివండ్రా? నిజం సీనాన్. 33 దేవుణు ఎర్గిస్తివరి మున్ను తప్పుజ్ మొప్పి వరి మున్ను గెలిస్తెజ్ ఎయెర్ బా అట్వెర్. ఎందానిజ్ ఇహిజ, దేవుణునె మా పాపమ్కు సెమిసి మజి వన్ని వెట కూడుఃప్త మనాన్. 34 మజి సిక్కు సీదెజ్ ఇజి ఎయెర్ బా తీర్పు తీరిస్తెజ్ అట్వెర్. మజి సిక్కు సీదెజ్ ఇజి యేసు తీర్పు సీనాండ్రా? సిల్లెన్. ఎందానిజ్ ఇహిజ, మా వందిజ్ సాతి యేసుజ్ దేవుణు వన్ని ఉణెర్ పడఃకాదు బసయి కిత్తాండ్రె గొప్ప గవరం సిత్తాన్. ఏలు క్రీస్తునె మా వందిజ్ దేవుణుబాన్ బతిమాల్లినాన్ 35 క్రీస్తుజ్ మా మున్ను మన్ని ప్రేమదిజ్ అడ్డు కిదెజ్ ఇనిదన్నిజ్ బా అట్వెర్. స్రమెజ్ వాతిజ్ బా గాని, కష్టమ్కు వాతిజ్ బా గాని, మాలెజ్ వాతిజ్ బా గాని, కరు వాతిజ్ బా గాని, పార్పాదెజ్ సాక్కెజ్ సీలితిజ్ బా గాని, ఇని ప్రమాదమ్కు వాతిజ్ బా గాని, మజి నప్పిజ్ బా గాని క్రీస్తు ప్రేమ ఎసెజ్ బా డిఃవేండ మంజినాద్.

36 యాకెజ్ విజా దావీదు రాజు రాస్తి లెకెండ్ మన్నె. "మాపు మీ లోకుర్ ఆతావ్ కాక ఆకాకర్ ఎసిజ్బా మజీ సప్తెజ్ ఇజి సుడె:జినార్. గొర్రెజ్ కత్తికార్ వనకాజ్ కొయ్దెజ్ సుడె:నిలెకెండ్ మజీ సప్తెజ్ సుడె:జినార్". 37 యాకెజ్ విజా జర్గితీబా మాటు క్రీస్తు ప్రేమదాన్ విజా వనకాజ్ ముస్సు గొప్పజ గెలిసినాట్. 38-39 యాక నాను గటిజ నమ్మజిన. ఇనిక ఇహిజ, సాపు ఆతిజ్బా గాని, బత్సు ఆతిజ్బా గాని, దేవుణు దూతార్ ఆతిజ్బా గాని, దెయమ్క సత్తుజ్ ఆతిజ్బా గాని, ఏలు జర్గినికెజ్ ఆతిజ్బా గాని, వాని కాలమ్దు జర్గినికెజ్ ఆతిజ్బా గాని, ఏలుబడి: కినికార్ ఆతిజ్బా గాని, పెరి ఎత్తుదు మన్నికెజ్ ఆతిజ్బా గాని, పెరి జోరెదు మన్నికెజ్ ఆతిజ్బా గాని, మరి ఇనికబా గాని దేవుణుదిజ్ మా ముస్సు మన్ని ప్రేమదిజ్ అడ్డు కిడెజ్ వనకాజ్ అట్ఉ మా ప్రబు ఆతి యేసుక్రీస్తు మా వందిజ్ కిత్తి గొప్ప పెరి పణిజాణిజ్ దేవుణు వన్ని ప్రేమ తోరిస్తాన్.

యూదురు వందిజ్ వపులు విసారిసినాన్

9 1-2 ఏలు నాను ఉండ్తి వెహ్న, అక్క నిజమ్నె. అబద్దం ఆవద్. నాను వెహ్నక నిజమె ఇజి క్రీస్తు నెసినాన్. నాను వెహ్నక అబద్దం ఆవద్. నా సాంత జాతి ఆతి యూదురు వందిజ్ నా మన్నుదు గొప్ప బాద ఆజిన. డి:స్పిండ దుకం ఆజిన. నాను వెహ్నక నిజమ్నె ఇజి నా మన్నుని దేవుణు ఆత్మ సాసి వెహ్నార్. 3 నా సాంత జాతి ఆతి యూదురు, క్రీస్తుజ్ నమ్మిదెజ్ ఇజి నాను ఆన ఆజిన. అక్క జర్గిదెజ్ దేవుణు బాణిజ్ నా ముస్సు నయవ్ వాతిజ్బా, క్రీస్తుబాణిజ్ నజి ఎర్గిస్తిజ్బా పరవ సిల్లెద్ ఇజి ఒడె:బిజిన. 4 వారు ఇస్రాయేలుదికార్, వన్ని సాంత లోకుర్ ఇజి దేవుణు ఇడ్డికార్. దేవుణు వన్ని గొప్ప గుణమ్దాన్ ఎయెర్ సిల్లి బాడ్డిదు నడిపిస్తికార్. దేవుణు వరి వెటెలు ఒపుమానమ్కు కిత్తాన్. దేవుణుదిజ్ ఎలాగ మాడిస్తిజ్ ఇజి వరిజె వెహ్నాన్. వరిజె దేవుణు సీన ఇజి ఒపుమానమ్కు కిత్త మనాన్. 5 వరి అనిగొగొరు ఆతి అబ్రహాం, ఇస్సాకు, యాకోబు ఇనికార్ ఇస్రాయేలు లోకుర్ లొఇ గొప్ప పేరు పొందితికార్. దేవుణు పాక్కు ఇజి ఒపుమానమ్కు కిత్తి రాజు యా యూదు జాతిలోఇన లోకు వజ పుట్టాన్. విజేరిముస్సు ఏలుబడి: కిని దేవుణు ఎసిజ్బా పాగిడె: ఆజి మసీన్. 6 అహిజ, దేవుణు ఇస్రాయేలు లోకురిజ్ వెహ్నకెజ్ జర్గిపిత్తాద్ ఇజి ఇండ్రెజ్ ఆవద్. ఎందానిజ్ ఇహిజ, ఇస్రాయేలు లోకుర్ ఇజి వెహ్ ఆనికార్ విజేరి దేవుణుదిజ్ సరియాతి సాంత లోకుర్ ఆవర్. 7 అబ్రహాం పాటాదికార్ విజేరి వన్ని తెగాదు పుట్టికార్ ఇజి దేవుణు ఇడ్విన్. ఎందానిజ్ ఇహిజ "సి కొడె: ఆతి ఇస్సాకువెలెహాన్ వానికారి సి జాతి ఆనార్" †, ఇజి దేవుణు అబ్రహాం వెట వెహ్నా మనాన్. 8 ఎలాగ ఇహిజ, అబ్రహాం తెగాదు పుట్టికార్ విజేరి దేవుణు కొడె:ర్ ఆవర్. గాని దేవుణు అబ్రహాముజ్ సిత్తి ఒపుమానం నమ్మితిజ్ దేవుణు కొడె:ర్ అబ్రహాముజ్ సరియాతి తెగాదికార్ ఇజి దేవుణు ఇడ్వాన్. 9 దేవుణు అబ్రహాం వెట కిత్తి ఒపుమానం ఇక్కాదె. "కాలెహిజ్ యా సమయమ్దు నాను వాన. నస్తివలె సి అల్ని ఒరెన్ కొడె: ఇడ్వాద్లె" ‡.

10 అక్కాదె ఆవద్, రిబెక పాటాదివరిజ్ ఒరెండ్రె అప్పాసి, ఎయెన్ ఇహిజ మా అనిగొగొ ఆతి ఇస్సాకు. 11-13 ఇస్సాకు ఆల్ని రిబెక పాత డి:స్తి మహివలె, దేవుణు దన్నివెట వెహ్నాన్. జవ్ల మరిసిర్ పుట్వండ్ మహివలెనె, వారు తప్పు గాని నెగ్గ గాని కిపిండ మహివలెనె దేవుణు దన్నిజ్ వెహ్నాన్, "పెరికాన్ ఇజిరి వన్నిజ్ అడిగి మంజినాల్", † ఇజి దేవుణు యాక వెహ్నా నండ్ పంటెజ్ వెనుక ఒరెన్ దేవుణు ప్రవక్త దేవుణు వెహ్నా మాట వెహ్నాన్. "యాకోబుజ్ నాను ప్రేమిసిన, ఏసాపు నజి పడి:ఇకాన" ‡. ఇజి. ఎందానిజ్ ఇహిజ, వన్ని లోకుర్ వందిజ్ దేవుణుదిజ్ ఉండ్తి ఉడెసం మహ్ద. అయాలెకెండ్ వాండ్రు నడె:పిన్నాన్. లోకుర్ కిని పణిజాణిజ్ ఆవద్. దేవుణు ఏర్పాటుదానె విజా జర్గిజినె. దేవుణు ఏర్పాటు కినికెజ్ లోకుర్ ఒడె:బినిలెకెండ్ ఆవద్. 14 అహిజ, దేవుణు కొడె:ర్ ఎయెర్ ఇజి దేవుణు ఏర్పాటు కిత్తిదన్ని లొఇ దేవుణు తేడ నూణికాన్ ఇజి ఒడె:బినిదెరెను. సిల్లె, దేవుణు అనెయం కినికాన్ ఆవన్. 15 ఎలాగ ఇహిజ, దేవుణు మోసివెట ఈహు వెహ్నాన్. "ఎయెన్ ముస్సు దయ తోరిస్తెజ్ నాను ఇష్టం ఆజినానో వన్నిముస్సు దయ తోరిస్తె. ఎయెన్ ముస్సు కనికారమాదెజ్ ఇజి ఇష్టం ఆజినానో వన్ని ముస్సు కనికారం ఆజిన" ††.

16 అందెజె, యాక లోకు ఆనదానె గాని వన్నిపణిజాణిజ్ గాని దోహ్కెక ఆవద్. దేవుణు దయదానె యాక జర్గిజినాద్. 17 దేవుణు మాటదు ఈహు మనాద్. దేవుణు వరోరాజ వెట ఇనిక వెహ్నాన్ ఇహిజ, నాను ఎస్సానో సత్తు మన్నికాన్ ఇజి సి వెలెహాన్ విజాబాణి లోకుర్ వెండ్రెజ్నె నిజి రాజావజ ఇడ్డు మన్ను" †† ఇజి. 18 అహిజ ఎయెన్ ముస్సు దయ తోరిస్తెజ్ దేవుణు ఇష్టం ఆనాండ్రె వన్ని ముస్సు దయ తోరిస్తాన్. ఎయె ముస్సు గర్ల కిబిస్తెజ్ ఇష్టం ఆనాండ్రె వన్ని ముస్సు గర్ల కిబిస్తాన్.

దేవుణు విజా జర్గిసినాన్

19 ఏలు మీరు మరి వెహ్నిదెర్పు. దేవుణు ఇష్టమ్దిజ్ ఎయెన్బా ఎర్గిస్తెజ్ అట్వీన్గదె. మరి దేవుణు ఇష్టం వజ లోకుర్ కిడెజ్ ఇజి విజా జర్గిస్తివలె, తప్పు కిత్తార్ ఇజి లోకుర్ వందిజ్ దేవుణు ఎలాగ వెహ్నాజానాన్? 20 గాని దేవుణు ఎర్దు వర్గిదెజ్ లోకు సీను ఎయి?. "తయార్ కిత్తి వన్నివెట, తయార్ కిబె ఆతికెజ్ ఎందానిజ్ నజి ఈహు తయార్ కిత్తి ఇజి వెన్బాదెజ్ ఆనాదా? 21 కుండెజ్ తయార్ కినివన్నిజ్ ఉండ్రె ముదదాన్ రుండి రకమ్ది కుండెజ్ తయార్ కిడెజ్ అక్క మనాద్గదె?. ఉండ్రి కుండ లోకుర్ సుడె:జి ఇక్క ఎస్సా నెగ్గ ఇజి వహ్నివందిజె మరి ఉండ్రి కుండ మాముల్ పణిదిజ్ ఇడ్డి వందిజ్.

22 దేవుణుదిజ్బా లోకుర్వెట ఇష్టమాతి వజ కిడెజ్ అక్క మనాద్. పాపం కిని వరి వెట వన్ని నండ్ కోవమ్దాన్ వాని గొప్ప సత్తు తోరిస్తెజ్ ఆన ఆజినాన్. గాని వరివెట దేవుణు వెటనె కోవం ఆవండ్ మహిజ, నానసం వందిజ్ ఇడె ఆతి మన్ని వరి వెట కోవం ఆవండ్ ఓర్పుదాన్ మంజినాన్. 23 ఎందానిజ్ ఇహిజ, వన్ని గొప్ప దయ దోహ్కె మజి, వన్ని గొప్ప జాయ్ వందిజ్ తయార్ కిత్తివరిజ్ దేవుణు వన్ని గొప్ప జాయ్ తోరిస్తెజ్ ఆహె కిత్తాన్ ఇహిజ మాటు ఇనిక వెహ్నాట్? 24 ఏర్పాటు కిబె ఆతి మాటు ఎయెర్ ఇహిజ, యూదురిని యూదురు ఆజాతికార్బా. 25 యూదురు ఆజ జాతిదివరిజ్ ఎర్గిసివందిజ్ హుసెయ ప్రవక్త వెట దేవుణు ఈహు వెహ్నాన్. "నా లోకు ఆఇ వరిజె ఏలు నా లోకుర్ ఇజి కూక్కు. నాను ముందాల ప్రేమ తోరిస్ఇ వరిజె నాను ప్రేమిసినకార్ ఇజి కూక్కు" †. 26 దేవుణు ఆఇ జాతిదివరి వందిజ్ వెహ్ని మాటెజ్ హుసెయ మరి వెహ్నాన్. "మీరు మా లోకుర్ ఆఇదెర్ ఇజి నాను వెహ్నాబాన్, బత్సిని దేవుణు కొడె:ర్ ఇజి మీరు పేరు ఇడె ఆనిదెర్" ††

††27 యెసయ ప్రవక్త ఇస్రాయేలు లోకుర్ వందిజ్ ఇనిక వెహ్నాన్ ఇహిజ, "ఇస్రాయేలు సమ్దరం ఒడ్డుదు మన్ని ఇస్సు లెకెండ్, లెక్క కిడెజ్ అట్ఇ నస్సా లోకుర్

† 8:36 కీర్తన 44:22. †† 9:7 ఆది 21:12. ‡ 9:9 ఆది 18:10,14. †† 9:11-13 ఆది 25:23. †† 9:11-13 మలా 1:2,3. ††† 9:15 నిర్గమ 33:19. ††† 9:17 నిర్గమ 9:16. § 9:25 హోసెయ 2:23. §† 9:26 హోసెయ 1:10.

అతిజీవా, పరిలోక ఉండ్రీ ఇజిరి గుంపుదిజ్నే దేవుణు రక్కిస్తాన్. 28 ఎందానిజ్ ఇహిజ దేవుణు అల్నాయం ఆవండ యా లోకం ముస్సు తీర్పు కినాండ్ర వన్ని పణి వెలనె పూర్తి కినాన్ల 1, 29 దేవుణు కనికారం తోరిస్ఇజ్ ఎయెన్బా సిక్కుదాన్ తప్పి ఆవన్. యెసయ ప్రవక్త ముందాల్ వెప్తిలెకండ్ర, "విజా దన్నిజ్ అతికారం మన్ని దేవుణు మా కొడొకొకొరిజ్ ఇడేవండ పూర్తి సప్తాన్ ఇహిజ, మాటుబా సాదోము గొమొర పట్టుమది పరిలెకండ్ర పూర్తి పాడాఃత మహాట్ను 11". దేవుణు అయ పట్టుమదు మహిపరిజ్ పూర్తి విజేరిజ్ సప్తాన్.

యూదురు గెలిస్తేజ్ అట్వండ ఆజినార్

30 అహిజ, ఏలు ఇనిక వెప్తాజ్? దేవుణు పరిజ్ సీతినిజయ్తి మన్నికార్ ఇజి ఇడ్డెజ్ యూదురు ఆకార్ సుడేవతార్ గాని దేవుణు పరిజ్ సీతినిజయ్తి మన్నికార్ ఇజి ఇడ్డాన్. క్రీస్తు ముస్సు నమకం ఇడ్డెజ్ సీతినిజయ్తి మన్నికార్ ఇజి ఇడ్డాన్. 31 గాని ఇస్రాయేలు లోకుర్ ఇహిజ దేవుణు మోసెజ్ సీత్తి రూలుజ్ లోజీతిజ సీతి మన్నికార్ ఆనార్ ఇజి నండో సుడేవతార్ గాని అట్వండ ఆతార్. 32 ఎందానిజ్ ఇహిజ వారు దేవుణు ముస్సు నమకం ఇడేవతార్. గాని పరి పనిజాణిజ్ సీతినిజయ్తికార్ ఆనార్ ఇజి నంఒ సుడేవతార్. అందెజె దేవుణు క్రీస్తు ఇజి ఎర్రిసి వన్ని ముస్సు అడ్డు ఆతి పణుకు ముస్సు అర్నిలెకండ్ర వారు తొరో ఒడిఃజి అర్దార్. 33 యాక ప్రవక్త రాస్తి లెకండ్ర మనాద్. "సుడేదు, నాను సియెన్దు ఉండ్రీ పణకు నిల్పిన్. అక్క అడ్డు ఆనాదె లోకాజ్ తొరో ఒడిఃజి అర్పాద్. గాని వన్ని ముస్సు నమకం ఇడ్డికాన్ సిగు ఆవన్ †."

10 తంబెరిజాండె, నా సాంత జాతి అతి యూదురిజ్ దేవుణు రక్కిస్తేజ్ ఇజి నాను గొప్ప ఆస ఆజి పార్దనం కిజిన. 2 వారు దేవుణు వందిజ్ గొప్ప ఉసార్దాన్ మన్నికార్ గాని దేవుణుదిజ్ పూర్తి నెస్వర్ ఇజి పరివందిజ్ నాను వెప్సిన్. 3 ఎందానిజ్ ఇహిజ, దేవుణు లోకురిజ్ ఎలాగ సీతినిజయ్తికార్ ఇజి ఇడ్డాన్ ఇజి వారు అర్దం కిపర్. సీతినిజయ్తికార్ ఇజి దేవుణు ఇడ్డివందిజ్ లోకు ఎలాగ నడిఃదెజ్ ఇజి దేవుణు తోరిస్తి సర్దు నడిఃవండ సీతినిజయ్తికార్ ఆదెజ్ ఇజి వారు పరి సాంత రూలుజ్ ఇడ్డాన్. 4 క్రీస్తు వాతిజ్ ఏలు దేవుణు మోసెజ్ సీత్తి రూలుజ్ లోకాజ్ దేవుణుబాన్ కూడుఃవేవద్. క్రీస్తుముస్సు నమకం ఇడ్డికార్ విజేరిజ్ దేవుణు వన్నిబాన్ కూడుఃప్తాన్.

విజేరి వందిజ్ ఉండ్రీ కొత సరి

5 దేవుణు మోసెజ్ సీత్తి రూలుజాణిజ్ సీతినిజయ్తి మన్నికాన్ ఆదెజ్ సుడేజిని వన్ని వందిజ్ మోసెబా రాస్త మనాన్. ఇనిక ఇహిజ "రూలుజ పజ నడిఃదెజ్ ఆస ఆనికాన్ వనకదటాన్ బత్తిదెజ్వలె ††" 6 గాని నమకం ఇడ్డివందిజ్ సీతినిజయ్తి మన్నికార్ ఇజి దేవుణు ఇడ్డిదన్ని వందిజ్ మన్ని మాటాదు మాటు ఇని ఇనికెజ్ ఆవద్ ఇజి వెప్తా మనాద్. ఇనికెజ్ ఇహిజ "రక్కణ దోహ్కాద్ ఇజి పరలోకమదు ఎక్కి క్రీస్తుజ్ అడిగి తత్తెజ్ ఎయెన్ సానాన్ ఇజి మీ మన్నుదు వెప్తాజ్ ఆవద్". 7 అయాలెకండ్ర సాతిపరిబాన్ అయాలోకమదు సాన్ని క్రీస్తుజ్ బాణిజ్ తత్తెజ్ ఎయెన్ సానాన్ ఇజి మీ మన్నుదు వెప్తాజ్ ఆవద్. 8 గాని అయ మాట ఇనిక వెప్సినాద్? ఇనిక వెప్సినాద్ ఇహిజ, "దేవుణు మాట డగ్రునె మనాద్. అయ మాటెజ్ మీ వెయుదునె మన్నె, వెప్తాజ్ ఆనిదెర్. మీ మన్నుదు మన్నె ఒడ్డుబిదెజ్ ఆనిదెర్" † మాటు సాటిసిని యా మాట క్రీస్తు ముస్సు నమకం ఇడ్డు ఇజినె. 9 అయ మాట ఇనిక ఇహిజ, యేసునె ప్రబు ఇజి ఎయెన్బా లోకుర్ ముందాల వెప్తాజ, అక్కాదె ఆవద్, యేసుజ్ సాతిపరిబాణిజ్ దేవుణు నిక్తాన్ ఇజి ఎయెన్బా వన్ని గర్బుమదు నమ్మిత్తిజ దేవుణు వన్నిజ్ రక్కిస్తాన్. 10 ఇనిక ఇహిజ, మీ మన్నుదు నమ్మిత్తిజ దేవును మిజి వన్నిబాన్ కూడుఃప్తాన్. అక్కాదె ఆవద్, యేసు సీ ప్రబు ఇజి లోకుర్ ముందాల వెప్తాజ దేవుణు నిజి రక్కిస్తాన్లె. 11 దేవుణు మాటదు ఇనిక రాస్త మనాద్ ఇహిజ, క్రీస్తు ముస్సు నమకం ఇడ్డికాన్ ఎయెన్బా సిగు ఆవన్. 12 యూదురుజ్ గాని ఆఇజాతిది పరిజ్ గాని దేవుణు ఉండ్రెలెకండ్ర సూణాన్. వాండ్రు ఒరెండ్ర విజేరిజ్ ప్రబు అతిజ్, వన్నిజ్ లొస్సివరిజ్ విజేరిజ్ వాండ్రు నండో దీవిస్తాన్. 13 యాక ఒరెన్ ప్రవక్త వెప్తిలెకండ్ర, "నజి రక్కిన్ల ఇజి దేవుణు వెట వెప్సివరిజ్ విజేరిజ్ దేవుణు రక్కిస్తాన్" ††.

14 గాని యూదురు వందిజ్ సెగొండార్ వెప్సినార్ను. క్రీస్తుముస్సు నమకం సిల్లిజ "నజి రక్కిన్ల", ఇజి క్రీస్తు వెట ఎలాగ ఇనార్? క్రీస్తువందిజ్ వెండ్రెజ్ ఇహిజ వెన్ఇకార్ ఎలాగ వన్నిజ్ నమ్మినార్? ఎయెరిజ్బా క్రీస్తువందిజ్ నెస్పిన్వండ మహిజ వారు ఎలాగ వెనార్? 15 ఎయెరిజ్బా దేవుణు పాక్వండ మహిజ సాటిస్సికార్ ఎలాగ సానార్. దన్నివందిజె దేవుణు మాటాదు ఈహు రాస్త మనాద్. "దేవుణు సువార్త వెప్తాజ్ సాన్నినిక ఎస్సా గొప్ప నెగ్గిక" ††.

16 దన్నిజ్ నాను వెప్సిన్. క్రీస్తువందిజ్ వెప్తాజ్ దేవుణు లోకాజ్ పాక్తాన్ గాని విజేరి సువార్తదిజ్ లోజివతార్. దన్నివందిజ్ యెసయ ప్రవక్త ఇనిక వెప్తాజ్ ఇహిజ, "ప్రబు, మాపు వెప్తి మాటెజ్ ఎయెర్బా వెన్వతార్ †, ఇజి. 17 అహిజ క్రీస్తువందిజ్ విప్తిజానె నమకం ఇడ్డాన్. ఎయెర్బా సువార్త సాటిస్సిజానె క్రీస్తు వందిజ్ వెండ్రెజ్ ఆనాద్.

18 గాని నాను వెన్బాజిన, "యూదురు సువార్త వెన్వర?", "నిజమె వెహార్", ఇజి వెప్న. కీర్తనదు రాస్తి మన్ని లెకండ్ర, దేవుణు వందిజ్ వారు వెప్తిక లోకమదు విజా బాడ్డిజ మన్నికార్ వెహార్. అందిదెజ్ అట్ఇ బాడ్డిదుబా దేవుణు వందిజ్ మాటెజ్ అందితె మన్నె †. 19 మరి ఉండ్రీ ప్రస్తు వెన్బాన, "సువార్త వందిజ్ యూదురు అర్దం కితారా? సెగొండార్ అర్దం కితార్ గదె. దేవుణు ఇస్రాయేలు లోకాజ్ దన్నివందిజ్ వెప్తిక మోసె వెప్తాజ్, "యూదురు ఆఇజాతిది పరివెట మిజి గోన కిబిన్నాలె. అర్దం కిదెజ్ అట్ఇ పరిజ్ నాను దీవిస్తాలె" ††20 యెసయ ప్రవక్తబా దన్నివందిజ్ గటిజ రాస్త మనాన్, "నజి రెబాఇవరిజ్ నాను దోహ్కా. నజి వెన్బాఇవరిజ్ నాను తోరె ఆస" †. 21 గాని ఇస్రాయేలు లోకుర్ వందిజ్ దేవుణు ఇనిక వెప్తాజ్ ఇజి యెసయ రాస్తాన్, "నా మాటదిజ్ లోజివండ నా వెట ఎద్రిసిని నా లోకు వందిజ్, వారు మర్రి వానిదాక నాను ఎద్రుసుడేజి మంజిన" ††.

† 9:28 యెసయ 10:22,23. †† 9:29 యెసయ 1:9. † 9:33 యెసయ 8:14; 28:16. †† 10:5 లేవ 18:5. †† 10:8 ద్వీతీ 30:14. ††† 10:13 యోవేలు 2:32. ††† 10:15 యెసయ 52:7. † 10:16 యెసయ 53:1. †† 10:18 కీర్తన 19:4. ††† 10:19 ద్వీతీ 32:21. † 10:20 యెసయ 65:1. ††† 10:21 యెసయ 65:2.

యూదురిజ్ దేవులు దయ తోరిస్తాన్.

11 అపొజ నాను వెన్బాజిన, దేవులు వన్ని సాంత లోకుర్ ఆతి యూదురిజ్ డిస్త సిత్తాండ్రా? సిల్లెన్, ఎస్సెజ్బా డిస్వన్. ఎలాగ ఇపొజ నానుబా యూదువాండ్రునె. అబ్రహాం తెగాదు పుట్టి బెన్యామిను కులమ్దు పుట్ట మన్న. గాని దేవులు నజీ డిస్వన్. 2 సిల్లె దేవులు ముందాల్నె కూక్కి వన్ని లోకుర్ ఇజి కేటకిత్తి పరిజ్ నెక్కిపాక్వితాన్. ఏలియ ప్రవక్త దేవులువెట మొరో అతాన్ ఇజి దేవులు మాటాదు రాస్తిమన్నిక గుర్తు కిజినిదెర్గదె. వాండ్రు ఇస్రాయేలు లోకుర్ వందిజ్ ఇనిక వెహ్న్ ఇపొజ, 3 "ప్రబువా నిజి మహి ప్రవక్తరిజ్ విజేరిజ్ వారు సప్తార్. నిజి సంత సుర్తి సీని మాలి పీటెజ్ వారు డెయ్య పాక్తార్. నిజి నమ్మిని పరి లోఇ నాను ఒరెనె మిగిలిత మన్న. ఏలు నజీబా సప్తెజ్ సుడెజినార్ 4". 4 గాని దేవులు వన్నిజ్ ఇనిక వెహ్న్ ఇజి గుర్తు మన్నిదెరా? "నీను ఒరిదె ఆఇ బయాలు ఇని దెయమ్దిజ్ మాడిస్ఇ ఏడు వెయిజ్ లోకురిజ్ నాపందిజ్ నాను కేట ఇడ్డ మన్న 5". 5 అయాలెకెండె యా కాలమ్దుబా దేవులు యూదురి లోఇ ఉండ్రె ఇజిరి గుంపుదిజ్ కేట ఇడ్డాన్. వన్ని దయాదర్మమాదానె పరిజ్ కేట ఇడ్డాన్. 6 లోకుర్, వారు కిత్తి నెగ్గి పణిజ వందిజ్ అపిద్ గాని, దేవులు దయాదర్మమాదానె వన్నిమున్ను నమకం ఇడ్డెజ్ అట్టార్. ఎందానిజ్ ఇపొజ వారు కిత్తి నెగ్గి పణిజ్ వందిజ్ దేవులు పరిజ్ ఎర్లిస్తాన్ ఇపొజ, వన్ని గొప్ప దయ సెడినె దోహ్కాక్కి అపిద్గదె.

7 అందెజె ఇనిక జర్గితాద్ ఇపొజ, ఇస్రాయేలులోకుర్ నండొండార్ నండొ ఆసదాన్ రెబాతిక పరిజ్ దోహ్కాక్కితాద్. దేవులు ఎర్లిస్తా ఇడ్డి ఇజిరి గుంపుదిపరిజె అక్క దోహ్కాక్కి. మిగిలిత్తికార్ దేవులు వందిజ్ ఇనికబా నెస్తెజ్ అల్ఇ లెకెండె దేవులు కిత్తాన్.

8 దిన్నివందిజ్ దేవులు మాటాదు రాస్త మనాద్. ఇనిక ఇపొజ, దేవులు పరిమన్ను నిర్త కినిపరి మన్నువజ కిత్తాన్. పరిజ్ కణుకెజ్ మహా గాని సుడెనిదన్నిజ్ అర్దం కిపర్. పరిజ్ గిబ్బిజ్ మహా గాని వెహిదన్నిజ్ అర్దం కిపర్" 9-10 దిన్నివందిజ్ దావీదు రాజుబా వెహ్ మనాన్. వన్ని మున్ను, పగాతి పరివందిజ్ ఈహు వెహ్న్ "వారు సర్ద ఆనివలె కిని పణిజ్ పరిజ్ ఉరి లెకెండె అపిద్. నెగెండె మంజినాప్ ఇజి ఒడెబినివలె వెటనె పరి మున్ను నాసనం రెపిద్. దేవులు వందిజ్ నిజమాతిక నెసవండె ఆనివందిజ్ పరి మన్ను సీకటి ఆజి సానీద్. వారు గొప్ప బరుదాన్ వజ్నిలెకెండె అపిద్". †

టోటాదు పీరిజిని ఒలివ మరాతు అడివిది కొమెజ్ అంతు తోహ్హాన్.

11 అపొజ, నాను వెన్బాజిన, యూదురు క్రీస్తుజ్ నెక్కిపాక్కిజ్ దేవులు బాణిజ్ తెగు సాహార్ ఇజి వెహ్హాజ్నా? అపిద్ ఎస్సెజ్బా అపిద్. గాని వారు క్రీస్తు మున్ను నమకం ఇడెఇతిజ్, క్రీస్తుజ్ నమ్మితిజ్ వాని అయ రక్వణ దేవులు యూదురు ఆఇవరిజ్ సిత్తాన్. మజి వానిక పరిజ్ దోహ్కాక్కిదా ఇజి యూదురు గోస అదెజ్వలె ఇజి యాక జర్గితాదా? 12 యూదురు క్రీస్తుజ్ నెక్కి పాక్కివలె యూదురు ఆఇజాతిదివరిజ్ దీవన దోహ్కాక్కి ఇపొజ, పరిజ్ వాతి స్వం ఆఇవరిజ్ లాబం ఆతాద్ ఇపొజ, దేవులు ఎర్లిస్తా ఇడ్డి యూదురు దేవులుబాన్ మర్ది వానివలె, యా లోకమ్ది విజా జాతిదివరిజ్ మరి ఎస్సానో గొప్ప లాబమ్కు వానె!

13 ఏలు యూదురు ఆఇ మిజి నాను వెహ్హాన్. యూదురు ఆఇవరిజ్ అపాష్టుడు వజ దేవులు నజీ ఇడ్డిజ్ దన్నివందిజ్ గొప్పజ గవరం దోహ్కాక్కి మన్న. 14 దేవులు నజీ ఒపజెప్తి యా పణి కిజి ఎలాగబా నా సాంత జాతి ఆతి యూదురిజ్ గోస పుట్టిసెజ్ ఇజి నాను సుడెజిన. ఎందానిజ్ ఇపొజ మిజి దేవులు దివిస్తిలెకెండె పరిజ్ దోహ్కాక్కిజ్ ఇజి వారుబా ఆస ఆతిజ దేవులు పరిలోఇ సెగొండారిజ్బా రక్కిస్తాన్. 15 దేవులు మా సాంత లోకుర్ ఆతి యూదురు నండొండార్ నెక్కి పాక్కివలె యా లోకమ్దు మన్ని ఆఇజాతిది పరిజ్ నండొండారిజ్ వన్నిబాన్ కూడుఃప్తాన్, అపొజ దేవులు యూదురుజ్ వన్నిబాన్ కూడుఃప్తివలె ఇనిక వానాద్? సావుదాన్ బత్కునె వానాద్. 16 ఉండ్రె దూరు ముదదాన్ తొలిత సుప్తిక దేవులుదిజ్ సీనిక ఇపొజ అయ ముద విజా దేవులుదిజ్ సిత్తి లెకెండె. అయవజనె యూదురు దేవులు లోకురె. ఎందానిజ్ ఇపొజ, పరి అనిగొగొరుబా దేవులు లోకురె. ఉండ్రె మరాతి వెల నెగ్గి ఇపొజ అయ మరాతి కొమెజ్బా నెగ్గికెనె. అయావజనె, యూదురి అనిగొగొరు దేవులు లోకుర్కాక పరి కొడెః కొక్తాదికార్బా దేవులు లోకురె. 17 టోటాదు మన్ని నెగ్గి ఒలివ మరాతి కొమెజ్ సెగం రుక్కిపాక్కిలెకెండె దేవులు యూదురి సెగొండారిజ్ నెక్కి పాక్కిన్. అడివిది ఒలివ మరాతి ఉండ్రె కొమలెకెండె యూదురు ఆఇ మిజి టోటాదు మన్ని నెగ్గి ఒలివ మరాతు కూడుఃప్తాన్. అయ నెగ్గి ఒలివ మరాతు కూడుఃప్తిజ్ కొమెజ్, అయ మరాతి వెలెజాణిజ్ కన లాగ్గి సత్తు ఆనివజ మిజిబా యూదురుజ్ దేవులు సిత్తి దీవన దోహ్కాక్కి మనాద్.

18 మరాతాన్ కొమెజ్ కొయ్జి విస్సీలెకెండె దేవులు యూదురిజ్ నెక్కి పాక్కిన్ గాని యూదురు ఆఇ మీరు గర్ల అనిక అపిద్. మాపు పరిజ్ ఇంక పెరికాప్ ఇజి మీరు గర్ల ఆతిజ యాక గుర్తు కిదెజ్. ఇనిక ఇపొజ వెలెజ్ బత్కినిక కొమెజాణిజ్ అపిద్. వెలెజ్దానె మీరు బత్కినిదిదెర్. 19 మజి కూడుఃప్తెజ్నె దేవులు యూదురిజ్ నెక్కి పాక్కిన్ ఇజి మీలోఇ ఒరెన్ వెహ్హాన్సు. 20 యాక నిజమె గాని, ఉండ్రె వెహ్హా. యూదురు క్రీస్తు మున్ను నమకం ఇడ్డె వందిజ్ దేవులు పరిజ్ నెక్కి పాక్కిన్. మీరు క్రీస్తుమున్ను నమకం ఇడ్డి వందిజ్నె గటిజ నిల్పినిదెర్. అందెజె గర్ల ఆమాల్. జాగర్ల మండ్రు. 21 ఎందానిజ్ ఇపొజ మరాతి కొమెజ్ ఇపొజ యూదురిజ్ దేవులు నెక్కిపాక్కి లెకెండె, మీరు నిల్పిండె మహిజ మిజిబా తప్పిండె నెక్కి పాక్కిన్.

22 యాక గుర్తు కిదు. దేవులు కనికారమ్దాన్ మనాన్. వాండ్రు కొవమ్దాన్బా మనాన్. వన్నిజ్ నెక్కి పాక్కి యూదురువెట దేవులు కోవమ్దాన్ మనాన్. గాని యూదురు ఆఇ మిజి దేవులు కనికారం తోరిసినాన్. గాని దేవులు తోరిసె కనికారం మీరు నమ్మిత్తిజ్నె మిజి కనికారం తోరిసినాన్. సిల్లిజ మిజిబా కత్తు విసీర్నాన్. 23 యూదురు క్రీస్తుమున్ను నమకం ఇట్టిజ మరాతు కొమెజ్ మరి అంతు తోహ్హాలెకెండె దేవులు పరిజ్ మరి వన్నిబాన్ కూడుఃప్తాన్. ఎందానిజ్ ఇపొజ పరిజ్ కూడుఃప్తెజ్ అట్టాన్. 24 యూదుర ఆఇ మీరు అడెవిదాన్ తత్తి ఉండ్రె ఒలివ మరాతి కొమ లెకెండె. టోటాదు పీరిజిని ఒలివ మరాతు యా అడెవిది కొమెజ్ దేవులు అంతు తోహ్హాన్. యాక మాముల్ జర్గిదెజ్ కస్టం. అపొజ కత్తివిసీరి టోటముక్కాది కొమెజ్ మరి అయ మరాతు అంతు తోహ్హాజ్ ఎస్సాన్ సులు. అయా లెకెండె నెక్కి పాక్కి యూదురిజ్ మరి వన్నిబాన్ కూడుఃప్తెజ్ దేవులుదిజ్ ఇని అడ్డు సిల్లెద్.

† 11:3 1రాజు 19:10,14. †† 11:4 1రాజు 19:18. ‡ 11:8 ద్వితీ 29:4; యెసయ 29:10. ††† 11:9-10 కీర్తన 69:22,23.

దేవుణు యూదురుజ్ రక్షిస్తాన్

25 నాను ప్రేమినిని తంబెరిజాండె, ఏలు ఉండ్రె డాజీతి మన్ని గొప్ప సజతి మీరు నెస్తెజ్ ఇజి నాను వెహ్సిన. నాను ఎందానిజ్ వెహ్సిన ఇహిజ దేవుణు మిజి కూడుఃప్తివందిజ్ యూదురిజ్ ఇంక తెలిమన్నికావ్ ఇజి మీరు గర్ర అవిండ మండ్రెజ్ ఇజినె. ఇనిక ఇహిజ యూదురు ఆఇ జాతిదివరి లోఇహాన్ దేవుణుబాన్ వాడెజ్ ఇజి వాండ్రు కేట కిత్తి నసాండార్ వన్నిబాన్ కూడుఃపె ఆనిపాక యూదురు దేవుణుదిజ్ నమ్మింండ వరిలోఇ నండొండారి మన్ను వాండ్రు గటి కినాన్. 26-27 యూదురు ఆఇవరి లెక్క పూర్తి ఆతి వెనుక, దేవుణు యూదురుజ్ రక్షిస్తాన్. దేవుణు ప్రవక్త ఒరెన్ రాస్తిలెకెండ అక్క జర్గినాద్. ఎలాగ ఇహిజ, “లోకురిజ్ రక్షిస్తాన్, దేవుణు లోకుర్ బాణిజ్ వానాన్. నస్తివలె వాండ్రు మా లోకాజ్ వరి పాపం కిత్తి వందిజ్ ఎత్తుకిని బాణిజ్ డిఃబిస్తాన్. నాను ఒప్పుమానం కిత్తిలెకెండ వరి పాపమ్కు నాను లాగ్గు” †.

28 యూదురు సువార్త నెక్తి పాక్తిజ్ దేవుణు వరిజ్, వన్నిజ్ వడిఃఇవరివజ ఇడ్డార్. గాని, వారు దేవుణు ఎర్లిస్తి లోకుర్ కాక దేవుణు వరిజ్ ప్రేమినినె మనాన్. ఎందానిజ్ ఇహిజ వన్ని అనిగొగొర్ వెట వాండ్రు ఒట్టు కత్తి దన్నివందిజె, 29 దేవుణు యూదురిజ్ ఏలుబా ప్రేమినినాన్. ఎందానిజ్ ఇహిజ దేవుణు ఎస్సిజ్బా వెహ్తిలెకెండ కినాన్. వన్ని లోకుర్ ఇజి కూక్తి వరిజ్ ఎస్తివలెబా ప్రేమిస్తాన్. వరిజ్ ఎస్సిజ్బా దీవిస్తాన్. 30 యూదురు ఆఇ మీరు ముందాల దేవుణుదిజ్ లోజీంండ మహిదెర్. గాని యూదురు దేవుణుదిజ్ లోజీంండ ఆతిజ్ దేవుణు కనికారం మిజి వాతాద్. 31 అయావజనె, యూదురు దేవుణుదిజ్ లోజీంండ ఆతిజ్ మిజి ఏలు కనికారం తోరిస్తిలెకెండ వరిజ్బా దేవుణు మరి కనికారం తోరిస్తాన్. 32 విజేరెవెట కనికారం తోరిస్తెజ్ ఇజి దేవుణు విజేరిజ్ వారు లోజీంండ ఆతి మన్నిదన్ని లోఇనె డిఃస్తి సెత్తాన్. 33 దేవుణు బుద్ది, గెణం ఎస్సానొ గొప్ప పెరిక కొటె. వాండ్రు తీర్మనం కిత్తికెజ్ ఎయెన్బా అర్దం కిడెజ్ అటవన్. వాండ్రు కిని పణి వందిజ్ ఎయెన్బా అర్దం వెహ్తాజ్ అటవన్.

34-35 ప్రవక్త దేవుణు మాటదు రాస్తిలెకెండ మనాద్ యాక. ఎలాగ ఇహిజ, “దేవుణు ఒడఃబినికెజ్ ఎయెజ్బా తెలివిద్. దేవుణు ఇని ఇనికెజ్ కిడెజ్ ఇజి వన్నిజ్ బుద్ది వెహ్తాజ్ ఎయెజ్బా అటవన్ ††. “ఎయెన్బా దేవుణుదిజ్ ఇనికబా సీదెజ్ సిల్లెద్. అందెజె దేవుణు ఎయెరిజ్బా మర్లి సీదెజ్ అక్కర్ సిల్లెద్ ††”. 36 యాక నిజం ఇజి మాటు నెసినాట్. ఎందానిజ్ ఇహిజ, దేవుణు విజా తయార్ కిత్తాన్. అక్కెజ్ విజా మన్నె. వాండ్రు సెత్తి నత్తుదాన్ అక్కెజ్ బత్కిజెనె. దేవుణుదిజ్ పాగ్డిఃదెజ్నె అక్కెజ్ మన్నె. విజేరె లోకుర్ దేవుణుదిజ్ ఎస్తివలెబా గొప్ప గవరం సీజి మనిద్. ఆమెన్.

కొత్త బత్కు

12 అందెజె మా తంబెరిజాండె, నాను మీవెట బతి మాల్లిస, దేవుణు మిజి నిస్సా దయ తోరిస్తివందిజ్ మీరు మిజినె దేవుణుదిజ్ పూజ లెకెండ సీదు. అయ పూజ బత్కిజి మంజిని వజ మండ్రెజ్వలె, దేవుణుదిజ్ కేట ఆతివజ దేవుణుదిజ్ ఇస్టం ఆతివజ మండ్రెజ్వలె. దేవుణుదిజ్ సీదెజ్ తగితి పాగ్డిఃజి మాడిఃసినిక ఇక్కా 2 యా లోకమ్దికార్ బత్కిని వజ దేవుణుదిజ్ వడిఃంండ బత్కిదెజ్ ఆవిద్. గాని మీ బత్కు ఆనివందిజ్, మీ మన్ను పూర్తి కొత్తాజ్ కిడెజ్ దేవుణుదిజ్ సరి సీదు. ఆహె కిత్తిజ మీరు ఇనిక కిడెజ్ ఇజి దేవుణు కోరిజినాండ్రె అక్క ఎమేణిక ఇజి నెసి ఒప్పుకొండెజ్ ఆనిదెర్. దేవుణు మీ వందిజ్ కోరిజినిక నెగ్గికాదె, వన్నిజ్ ఇస్టం ఆతికాదె, ఇని తక్కు సెల్లికాదె.

3 దేవుణు నజి, వన్ని గొప్ప దయదాన్ నజి అపాస్తుడు వజ ఇడ్డాన్. అందెజె నాను మిజి విజిదెరిజ్ వెహ్సిన. నాను ఎలాగ మర్తికాన్ ఇజి ఒరెన్ ఒరెన్ ఒడఃబినివలె మీరు మన్నిదన్నిజ్ ఇంక నండొ మనాద్ ఇజి మీ వందిజ్ ఒడఃబిమాట్. గాని దేవుణు మిజి సెత్తి నమకమ్దిజ్ తగితివజ మిజి మీరె సరిఆతి వజ కొల్ల కిదు. 4 ఉండ్రె ఒడఃల్దు కాల్కు కిక్కు ఇజి రక రకమ్ది బాగమ్కు మనె, వనక వనక పణిజ్ వేరె వేరె మన్నె. 5 అయవజనె, మాటుబా నండొండార్ గాని క్రీస్తు వెట కూల తోహ్తాజ్ మాటు ఉండ్రె లెకెండ మనాట్. మాటు ఉండ్రె ఒడఃల్దిజ్ నందితికాట్. ఒరెన్ మరి ఒరెన్ వన్నివందిజ్ మనాన్. 6 దేవుణు వన్ని గొప్ప దయ మిజి సెత్తిజ్ నండొ రకమ్ది వరమ్కు †† సెత్తాన్. యా వరమ్కు మాటు నెగెండ వాడుఃకొండెజ్. దేవుణు సెత్తి మాటెజ్ వెహ్తాజ్ అట్టు ఇహిజ అక దేవుణు నివెట వెహ్తాజ్ ఇజి నీను నమ్మిత్తి వజ వెహ్తాజ్. 7 మహివరిజ్ అవ్వసరం ఆతికెజ్ కిజి సీదెజ్నా మీ వరం ఇహిజ, అక్క కిడెజ్ దేవుణు మాటెజ్ నెస్సిని సీదెజ్నా మీ వరం ఇహిజ నెస్సిని సీదెజ్. 8 మహివరిజ్ దయరం వెహ్తాజ్నా మీ వరం ఇహిజ దయరం వెహ్తాజ్. సీబాజి సినిక మీ వరం ఇహిజ అక్క కల్తి సెల్లి మన్నుదాన్ సీదెజ్. నజమ్దిజ్ నడిఃపినినికాన్ బాగ నడిఃపిస్తెజ్వలె. బాద ఆతివరిజ్ కనికారం తోరిస్తికాన్, సర్దదాన్ కనికారం తోరిస్తెజ్వలె.

ఎలాగ ప్రేమకిడెజ్

9 మీరు మహివరిజ్ కల్తి సెల్లెండ పేమిస్తెజ్. దేవుణుదిజ్ వడిఃఇ వనకబాణిజ్ దూరం మండ్రెజ్. అక్కెజ్ ఒద్దె డిఃస్తిజ్. దేవుణుదిజ్ ఇస్టం ఆతి వనకాజ్ డగ్గు కిదు. 10 సాంత ఇండ్రెణివరి లెకెండ ఒరెన్ మరి ఒరెన్ వన్నిజ్ నండొ ప్రేమిస్తెజ్. మర్యాద సీని దన్నిలోఇ ఒరెన్, మరి ఒరెన్ వన్నిజ్ వాండ్రు నజి ఇంక పెరికాన్ ఇజి మర్యాద సీజి మండ్రెజ్. 11 దేవుణుది సెందితి సజతిజ లోఇ ఉసార్ ఆజి మండ్రు. బండెజ్ ఆమాట్. ప్రబు పణి లోఇ దేవుణు ఆత్మదాన్ ఉసార్ ఆజి పణికిదు. 12 దేవుణు మీ వందిజ్ గొప్ప సజతిజ కినాన్ ఇజి ఎర్దు సుడఃజి సర్దదాన్ మండ్రు. కస్టం వానివలె ఓరిసి మండ్రు. పార్దనం కిడెజ్ మన్ని సజతిజ వందిజ్ డిఃపింండ పార్దనం కిదు. 13 దేవుణుదిజ్ నమ్మిత్తి వరిజ్ ఎయెరిజ్బా ఇనికబా అవ్వసరం ఆతిజ వరిజ్ కావాలిస్తికెజ్ సీదెజ్. దూరమ్దాన్ వాజిని వరిజ్ ఇండ్రె కూక్తి మిజి మన్నిబాణిజ్ సీజి మర్యాద కిదు.

14 మిజి బాద కినివరి మున్ను కనికారం తోరిన్ల ఇజి దేవుణుదిజ్ పార్దనం కిడెజ్. ఒఒ వరిజ్ దీవిస్తెజ్ ఇజి దేవుణుదిజ్ వెహ్తు వరిజ్ నయ్మ్ సీల ఇజి వెహ్మట్. 15 సర్ద ఆని వరివెట సర్ద ఆజి మండ్రు. దుకం ఆతి వరివెట వరి దుకమ్దు కూడఃజి మండ్రు. 16 ఒరెన్ మరి ఒరెన్వెట ఉండ్రె మన్ను ఆజి మండ్రు. గర్ర ఆమాట్. తకుదివరి వెట కూడఃజి మండ్రెజ్ మన్ను ఆదు. నానె గొప్ప బుద్ది మన్నికాన్ ఇజి ఒడఃబిమాట్.

† 11:26-27 యెసయ 59:20,21; 27:9; యిర్మీయా 31:33,34. †† 11:34-35 యెసయ 40:13. ††† 11:34-35 యోబు 41:11. †††† వరమ్కు ఇహిజ ఉండ్రె పణికిడెజ్ దేవుణు సీని ఇనాయం

17 మిజి సెఇక కినివరిజ్ మర్రి సెఇకెజ్ కిమాట్. నెగ్గక ఇజి విజేరె ఒప్పుకొండెని పణిజ్నె కిదెజ్. 18 విజేరి వెట నమదనమ్దాన్ మండ్రెజ్ ఒడ్డె నెగండ సుండెదు. 19 నాను ప్రేమిసిని కూలెజాండె, మిజి ఎయెన్బా సెఇక కిత్తిజ వన్నిజ్ మర్రి సెఇక కిమాట్. గాని దేవుణు వన్నిజ్ సిక్కు సిదెజ్ డిసిసిదు. దేవుణు మాటదు దన్నివందిజ్ రాస్త మనాద్. ఇనిక ఇహిజ, "లోకు కిత్తి సెఇ పణి వందిజ్ సిను కోపం తీరిస్తా. అక్క నానె తీరిస్తా. నిజి సెఇక కిత్తివన్నిజ్ నాను సిక్కు సీన", ఇజి దేవుణు వెప్పివాన్ †. 20 గాని మరి మీరు ఇనిక కిదెజ్ ఇహిజ; నిజి వగాతి వన్నిజ్ బజ కట్టిజ వన్నిజ్ ఉండెజ్ సీల. వన్నిజ్ ఎప్పి కట్టిజ, ఏరు సీల. నస్తవలె వాండ్రు సిగు ఆనాండ్రె వన్ని కోపం డిఃస్నాన్", †† ఇజి రాస్త మనాద్. 21 మరి ఒరెన్ కిత్తి సెఇ పణిదిజ్ తగితి పణి మీరు కిమాట్. గాని మీరు వరిజ్ కిని నెగ్గపణిజాణిజ్ వరి సెఇ పణిదిజ్ గెలిస్తెజ్.

ఏలుబడిః కినివరిజ్ లొజిదు.

13 విజేరె ఏలుబడిః కినివరిజ్ లొజిజి మండ్రెజ్వలె. ఎందానిజ్ ఇహిజ, ఏలుబడిః కినివరిజ్ అతికారం దేవుణునె సీజినాన్. వరిజ్ ఏర్పాటు కిత్తికాన్ దేవుణునె. 2 అందెజె ఏలుబడిః కినివరిజ్ లొజిఇకార్ దేవుణు ఏర్పాటు కిత్తిదన్నిజ్ ఎద్రిసినార్. వరిజ్ తగితి తీర్పుదోహ్కాద్. 3 నెగ్గ పణిజ్ కినివరిజ్ ఆపద్, సెఇ పణిజ్ కినివరిజె ఏలుబడిః కినికార్ తియెల్ తపిస్తార్. అందెజె ఎయెన్బా ఏలుబడిః కినివరిజ్ తియెల్ సిల్లెండ మండ్రెజ్ ఇహిజ, నెగ్గ పణిజ్ కిజి మండ్రెజ్. నస్తవలె ఏలుబడిః కినికార్ మీ వందిజ్ నెగ్గెజ్ వెహ్నార్. 4 ఎందానిజ్ ఇహిజ మీ నడిఃమి విజా నెగండ జర్గిదెజ్ ఇజి పణికినికారె వీరు. దేవుణుదిజ్ పణికిదెజ్ దేవుణు ఏర్పాటు కిత్తికారె వీరు. మీ లొజి ఎయెన్బా తప్పు కిత్తిజ వాండ్రు తియెల్ అదెజె. ఎందానిజ్ ఇహిజ తప్పు కిత్తివరిజ్ సిక్కు సిదెజ్ విరిజ్ అతికారం మనాద్. దేవుణు ఏర్పాటు కిత్తిజ్ దేవుణు వందిజ్ పణికినికార్ లెకెండ, వారు తప్పు కినివరిజ్ సిక్కు సీనార్. 5 అందెజె అతికారి లోకాజ్ లొజిజి మండ్రెజ్ వలె. సిక్కుదాన్ తప్పె ఆదెజ్ ఉండ్రె ఆపద్, లొజిజి మంజినిక సరి ఆతికదె ఇజి నెప్పిబా లొజిదెజ్ వలె. 6 ఏలుబడిః కినికార్ దేవుణుదిజ్ పణికిజినార్. వారు అయ ఏలుబడిః కినిపణి వందిజె కాలం విజా గడెప్పినార్. అందెజె మీరు వరి వందిజ్ వన్నుబా తోహ్పినిదెర్. 7 ఎయెరిజ్బా ఇనికబా సిదెజ్ ఇహిజ అత్కెజ్ సిదెజ్. ఎంబెబా పన్ను తోహ్చాజ్ మహిజ బాన్ పన్ను తోహ్చాజ్. ఎయెరిజ్ మర్యాద సిదెజ్ ఇహిజ వరిజ్ మర్యాద సిదెజ్. ఎయెరిజ్ గవరం సిదెజ్ ఇహిజ వరిజ్ గవరం సిదెజ్.

ప్రబు మర్రి వాజిని కాలం డగ్రు ఆత మనాద్

8 ఎయెర్బాన్బా అప్పు తీరిస్ఎండ ఇడమాట్. ఎసెజ్బా ఒరెన్ మరి ఒరెన్ వెట ప్రేమిస్సికాదె అప్పు లెకెండ మనీద్. మహివరిజ్ ప్రేమిస్సికాన్ దేవుణు రూలుజ పూర్తి లొజినాన్. 9 దేవుణు రూలుజ లొఇ రకరకమ్వి రూలుజ్ మనె. వనకలొఇ సెగం ఇనికెజ్ ఇహిజ, "రంకు బులాదెజ్ ఆపద్. లోకాజ్ నప్పెజ్ ఆపద్. డొజ కిదెజ్ ఆపద్. ఆఇవరిజ్ మన్నికెజ్ నజి కావాలి ఇజి సెఇ ఆన ఆదెజ్ ఆపద్" గాని యా రూలుజ్ విజా కూడుప్పిజ, యాకాదె, "సిను నిజి ప్రేమిస్ ఆ", ఇజినె. 10 మహి వరిజ్ ప్రేమిస్సిజె వరిజ్ ఇని తప్పుబా సిను కిజ గదె. అందెజె మహివరిజ్ ప్రేమిసినికాన్ దేవుణు రూలుజ విజా వనకాజ్ పూర్తి లొజిజినాన్. 11 నాను వెప్పిలెకెండ మీరు కిజి మండ్రెజ్ వలె. ఎందానిజ్ ఇహిజ, మాటు బత్రిని యా కాలం నండొ ముకెలమాతి కాలం ఇజి మీరు నెసినిదెర్. ప్రబు మర్రి వాజి మజి రక్సిసిని కాలం డగ్రు ఆత మనాద్ కాక నిద్రదాన్ నిజెజి తెలి ఆతివరి వజ జాగర్త మండ్రు. తొలిత మాటు నమ్మిత్తి మహి కాలమ్దిజ్ ఇంక అయ సమయం డగ్రు ఆత మనాద్. 12 రెయు అందిజి వాజినిలెకెండ మా బత్తుబా అందిజి వాజినాద్. క్రీస్తు మర్రి వాని కాలం డగ్రు ఆత మనాద్. అందెజె సికటిదు కిని సెఇ పణిజ్ విజా డిఃసి సిదెజ్. వేడెఃక విదెమ్దిజ్ సానికాన్ దన్నిజ్ కావాలిస్తికెజ్ తోడుఃగిజి విదెమ్దిజ్ తయార్ ఆనిలెకెండ, సెఇ వనకాజ్ ఎద్రిస్తెజ్ తయార్ ఆజి మండ్రు.

13 సికటుదు కిని సెఇ పణిజ్ డిఃసి సీజి మాటు జాయ్దు నడిఃసి మండ్రెజ్. కల్లు విందుజ సాన్ని ఉణిజి సాస్తెజ్ ఆపద్. మొగ కొడొఃగ్ గాని అయ్లి కొడొఃక్ గాని రంకు బూలాదెజ్ ఆపద్, టంటెజ్ ఆదెజ్ ఆపద్, గోస ఆదెజ్ ఆపద్. 14 మరి ఎలాగ మండ్రెజ్ ఇహిజ, మహి లోకురిజ్ తోర్నివజ మీరు ప్రబు ఆతి యేనుక్రీస్తు లెకెండ మండ్రు. మీ ఒడొల్లి సెఇ ఆసెజె వజ కిజి సర్దె ఆదెజ్ ఇజి ఒడొఃబిజి మంజిని మన్నుదాన్ మన్నాట్.

అనుమానం ఆని నమ్మితికార్ వందిజ్

14 ఇని ఇనికెజ్ కిదెజ్ దేవుణు సరి సీనాండ్రొ ఇజి అనుమానం ఆని నమ్మితికార్ మనార్. వారు నమ్మిత్తి దిన్నివందిజ్ పూర్తి అర్దం కిఇకార్ గాని వరిజ్ డగ్రు కిదు. గాని నమ్మితికార్ ఇని ఇనికెజ్ కిదెజ్ ఆనాద్ ఇజి ఒడొఃబిని దన్నిలొఇ తేడ వానివలె వరివెట వాదిస్తాట్. 2 విజా తిండ్రెజ్ ఆనాద్ ఇజి ఒరెన్ నమ్మిజినాన్. మరి ఒరెన్ కుసెజ్నె తింజినాన్. ఎందానిజ్ ఇహిజ, వారు నమ్మిత్తి దిన్నివందిజ్ పూర్తి అర్దం ఇంక కివన్. 3 విజా తినికాన్, విజా తిన్ఇ వన్నిజ్ తక్కుదికాన్ ఇజి సుడదెజ్ ఆపద్. విజా తిండ్రెజ్ ఆపద్ ఇజి ఒడొఃబినికాన్ విజా తినికార్ తప్పు కిజినార్ ఇజి వెహ్చాజ్ ఆపద్. ఎందానిజ్ ఇహిజ దేవుణు వరిజ్ డగ్రు కిత్తి మనాన్. 4 మరి ఒరెన్ ఎజమానిజ్ వన్ని పణిమణిసి కినికెజ్ సరియాతికెజ్నో, ఆఇకెజ్నో ఇజి వెహ్చాజ్ తగితికార్ మీరు ఆఇదెర్. వాండ్రు కిని పణిజ్ నెగ్గెకెజ్నో సెఇకెజ్నో ఇజి వన్ని ఎజమానినె వెహ్చాన్. అయావజనె నమ్మితికాన్ కినిపణిజె వందిజ్ దేవుణునె తీర్పు కిజి సరిఅతికదో ఆపద్ ఇజి వెహ్చాన్. ఎందానిజ్ ఇహిజ సరిఅతిక కిదెజ్ దేవుణు వన్నిజె నత్తు సినాన్లె. 5 సెగొండార్, ఉండ్రె రోజా మహి రోస్కాజ్ ఇంక నెగ్గ రోజా ఇజి ఒడొఃబిజినార్. మరి ఒరెన్ విజా రోస్కు ఉండ్రె లెకెండ సుడొఃబినాన్. ఒరెన్ ఒరెన్ వన్నిజ్ వాండ్రె వన్ని మన్నుదు ఒడొఃబినిక ఎందానిజ్ ఆపట ఒడొఃబిజినాన్ ఇజి టేటాజ్ నెసి తిర్మానం కిదెజ్వలె. 6 ఉండ్రె రోజా నెగ్గ రోజా ఇజి ఇడ్డికాన్ అక్క ప్రబు వందిజ్ ఇడ్డినాన్. విజా తినికాన్ ప్రబుజ్ వమదనమ్కు వెప్పి ప్రబుజ్ గవరం సిదెజ్ ఇజి తింజినాన్. విజా తిన్ఇకాన్ తిని వనక వందిజ్ ప్రబుజ్ వందనమ్కు వెప్పి ప్రబుజ్ గవరం సిదెజ్ ఇజి విజా తిన్ఎండ మంజినాన్.

7 మా లొఇ ఎయెన్బా వన్నిజె సర్దె కిబిస్తెజ్ ఇజి బత్రిఎన్. వన్ని వందిజె సర్దె కిబిస్తెజ్ ఇజి సాఎన్. 8 ఎందానిజ్ ఇహిజ మాటు బత్రినివెలె ప్రబుజ్ ఇస్టం కిబిస్సి లెకెండ బత్రిదెజ్. సానివలె ప్రబుజ్ ఇస్టం కిబిస్సి లెకెండ సాదెజ్వలె. అందెజె మాటు బత్రినిజ్బా సాతిజ్బా ప్రబుజ్ సెందితికాటె.

† 12:19 ద్యుతి 32:35. †† 12:20 సామెత 25:21,22. ‡ 13:9 నిర్గమ 20:13-15,17.

9 దినవందిజె సాతి వరిజన్ బత్రిని వరిజ్ విజేరిజ్ ప్రబు లెకెండ మండ్రెజ్ క్రీస్తు సాజి మర్రి బత్రితాన్. 10 అహిజ, ఎయెర్బా మరి ఒరెన్ వన్నిజ్ తీర్పు తీరిస్తెజ్ అవద్. ఎయెర్బా తకుదికాన్ ఇజి సుడెడెజ్ అవద్. ఎందానిజ్ ఇహిజ మాటు విజేటె తప్పు కితికాటో, సరి ఆతిక కితికాటో ఇజి దేవుణు తీర్పు కిడెజ్ వన్ని ఎర్దు నిల్నాట్. 11 దినవందిజ్ మాటు ఎలాగ నెసిసాట్ ఇహిజ, ప్రబు వెహ్తె మాటెజ్ ఈహు రాస్త మనాద్. ఇనిక ఇహిజ, “నాను ఒద్దె నిజం వెహ్తెన, నానె దేవుణు ఇజి లోకుర్ విజేరె నా ఎర్దు ముణుకుజ్ ఊర్నార్. నానె దేవుణు ఇజి లోకుర్ విజేరె ఎర్దు వెహ్నార్”. 12 అహిజ, ఒరెన్ ఒరెన్ కిత్తి దన్నవందిజ్ దేవుణు ఎర్దు లెక్క ఒవజెస్తెజ్ వలె. దేవుణు తీర్పు తీరిస్తాన్.

13 అందెజె ఆఇవరిజ్ తీర్పు తీరిసినిక డిసిసిసాట్. అక్కాదె అఎండ, మరి ఒరెన్ నమ్మిత్తి వన్నిజ్ తప్పు సరిదు నడిపిసిని ఇనికబా కిడెజ్ అవద్ ఇజి మీ మన్నుదు ఒప్పుకొండు. 14 నాను యేసుప్రబు వెట కూడితిజ్ ఉండ్రె నిజం నెసిస. ఇనిక ఇహిజ, తిండ్రెజ్ అవద్ ఇజి దేవుణు వెహ్తె తిండి ఇనికబా సిల్లెద్. గాని ఇనికాటో ఉండ్రె తినిక అవద్ ఇజి ఎయెర్బా ఒడెబత్తిజ అక్క వాండ్రు తినిక తప్పు. 15 నీను ఇనికాటో ఉండ్రె తిని దన్నిదాన్ మరి ఒరెన్ నమ్మిత్తికాన్ మన్నుదు బాద ఆతిజ నీను వన్ని ముస్సు ప్రేమ తోరిసెఇ. నీను తినిదన్నిదలాన్ మరి ఒరెన్ నమ్మిత్తి వన్ని నమకమడిజ్ పాడు కిమా. 16 నెగ్గెజ్ ఇజి ఒడెబత్తిజ నీను కినికెజ్, మరి ఒరెన్ నమ్మిత్తి వన్నిజ్ పాపం కిబిస్తెజ్ తగితికెజ్ ఇహిజ అక్కెజ్ సెఇకెజ్ ఇజి వారు వెహ్నార్. అందెజె నెగ్గె ఇహిజ్ బా కిమా. 17 దేవుణు ఏలుబడి: కినిదన్నిజ్ లోజేజి మండ్రెజ్ ఇహిజ, ఇనికెజ్ తిండ్రెజ్ ఉండెజ్ ఇజి రూలుజ్ అడ. గాని దేవుణు ఏలుబడిడిజ్ ఎలాగ లోజేదెజ్ ఇహిజ, ఆత్మ సత్తుదాన్ దేవుణుడిజ్ ఇష్టం ఆతి వజ కిడెజ్, లోకుర్ వెట సమదనమ్దాన్ మండ్రెజ్, మన్ను లోఇ సర్ద నిండ్రెజి మండ్రెజ్. 18 యా లెకెండ క్రీస్తుజ్ లోజెనికాన్ దేవుణుడిజ్ ఇష్టం కిబిస్తాన్. లోకుర్ వన్నిజ్ నెగ్గెకాన్ ఇజి వెహ్నార్.

19 అందెజె మాటు ఒరెన్ మరి ఒరెన్ వన్నివెట సమదనమ్దాన్ మండ్రెజ్ సుడెడెజ్ వెలె. మాటు ఒరెన్ మరి ఒరెన్ వన్నిజ్ నమకమదు సత్తు కిబిస్తెజ్ సుడెడెజ్ వెలె. 20 ఇని తిండిబా తిండ్రెజ్ అనాద్ ఇజి ఒడెబత్తి, దేవుణు కిత్తి పణిజ్ పాడె: కిమా దేవుణు సుడెడెజ్ విజా రకమది బోజనమ్కబూ తిండ్రెజ్ అనికెజ్ గాని, నీను తినిక, తిండ్రెజ్ ఆఇకెజ్ ఇజి మరిఒరెన్ వన్నిజ్ తప్పు కిబిస్తెజ అక్క తినిక తప్పునె. 21 కండ తింజి గాని ద్రాక్చ కల్లు ఉణిజి గాని, మరి నన్నివణిజ్ ఇనికెజ్ గాని కిత్తిజ అక్క మరి ఒరెన్ నమ్మిత్తి వన్నిజ్ తప్పు కిబిస్తెజ్ కూడితిజ అక్కెజ్ డిసిసికాదె నెగ్గె. 22 నిన్ని సజతిజ వందిజ్ నీను నమినికెజ్ నీను ఆఇవరిజ్ వెహ్తెజ్ పాని. నిన్ని సజతిజ్ నీను దేవుణు నెసిజ అనె. ఉండ్రె పణికిత్తి వెనుక, సరి ఆతిక కిటానో, సిలిజ తప్పు కిటానో ఇజి అనుమానం అవండ మహిజ నీను దేవుణుబాణిజ్ సర్ద తీసి. 23 గాని ఉండ్రె తినిక దేవుణు ఎర్దు సరిఆతికాటో అవద్ ఇజి అనుమానం అనికాన్, అక్క తిహిజ తప్పు కిత్తాన్ ఇజి తీర్పు వానాద్. ఎందానిజ్ ఇహిజ, తిండ్రెజ్ ఆఇక ఇజి ఇడ్డిక వాండ్రు తిహాన్. మాటు ఇనిక కిత్తిజ్ బా దేవుణు ఎర్దు సరి ఆతిక కిత ఇజి నమకం సిల్లిజ అక తప్పునె.

15 ఇనిఇనికెజ్ సరిఆతికెజ్ కిడెజ్ అనె ఇజి మన్నుదు బాగ నెసిని నమ్మిత్తికాట్ ఆతి మాటు మజి ఇష్టం ఆతికెజ్ ఉండ్రెనె కిబి మండ్రెజ్ అవద్. గాని అనుమానం ఆతివరిజ్ మాటు బరిస్తెజ్ వలె. 2 మరి ఒరెన్ నమకమదు పిరినివందిజ్ మా లోఇ ఒరెన్ ఒరెన్ వన్నిజ్ నెగ్గెకెజ్ కిబి సర్ద కిబిస్తెజ్. 3 క్రీస్తు కిత్తి లెకెండ మాటు కిసాట్. క్రీస్తు వన్ని సర్ద ఉండ్రె వందిజెనె తొవండ దేవుణుడిజ్ ఇష్టం ఆతిలెకెండ కిత్తాన్. కీర్తన పుస్తకమదు రాస్తి లెకెండ, “లోకుర్ నిజి నింద కిత్తివెలె, అయ నింద నజి వెహ్తె లెకెండె †”, ఇజి క్రీస్తు దేవుణుడిజ్ వెహ్నార్. 4 దేవుణు మాటుదు ముందాల రాస్తి మన్నికెజ్ విజా మజి నెస్సిస్తెజె రాసి ఆత మనాద్. ఎందానిజ్ ఇహిజ, మాటు ఓర్పుదాన్ మంజి దేవుణు మాటెజ్ మజి ఉసార్ కిబిసి, మాటు అసదాన్ ఎర్దు సుడెజి మండ్రెజ్ వలె.

56 మజి ఓర్పుని ఉసార్ కిబిస్తిక దేవుణు ఉండ్రె మన్ను ఆజి మండ్రెజ్ సాయం కిపిన్. ఇహిజ యేసు క్రీస్తు వజ మండ్రు. నస్తివలె మా ప్రబు అతి యేసు క్రీస్తుజ్ బుబ్బ అతి దేవుణుడిజ్ ఉండ్రె మన్ను ఆజి ఉండ్రె లెకెండ పాగడిడెజ్ అనిదెర్.

7 అహిజ క్రీస్తు మజి డగ్రు కిత్తి లెకెండ మీరు ఒరెన్ మరి ఒరెన్ వన్నిజ్ డగ్రు కిదు. ఎందానిజ్ ఇహిజ అహు కిత్తిజ లోకుర్ దేవుణుడిజ్ పాగడిసార్. 8 నాను ఇనిక వెహ్తెన ఇహిజ, దేవుణు నమ్మిదెజ్ తగ్గికాన్ ఇజి, ఇహిజ వాండ్రు, మాటు యూదురి అనిగొగొరిజ్ కిత్తి ఒటు లెకెండ నిజం కిసాన్ ఇజి తోరిస్తెజ్ ఇజి క్రీస్తు యూదురిజ్ పణి మణిసి ఆత మహాన్.

9 అక్కాదె అవదు, యూదురు ఆఇజాతిదికార్ దేవుణు తోరిస్తి గొప్పు కనికారం వందిజ్ దేవుణుడిజ్ పాగడిడెజ్ ఇజిబా క్రీస్తు యూదురిజ్ పణిమణిసి ఆతమహాన్. ఎలాగ ఇహిజ, “అందెజె నాను యూదురు ఆఇ లోకుర్ నడి:మి నిజి పాగడి:జిన. నిజి పాగడి:జి పాటెజ్ పార్చ ††”, ఇజి రాస్తి మన్నె.

10-11 ఈహుబా రాస్త మనాద్, “యూదురు ఆఇజాతిదికార్ ఆతికిదెరా మీరు దేవుణు లోకుర్ వెట సర్ద ఆదు” ‡. మరి ఉండ్రెబాన్ ఈహు రాస్త మనాద్. “యూదురు ఆఇజాతికార్ ఆతికిదెరా, మీరు ప్రబుజ్ పాగడి:దు. విజెరె లోకుర్ వన్నిజ్ పాగడి:దు” ††12 మరి యెసయ ప్రవక్త ఈహె వెహ్తెనాన్, “యెస్సయ తొగదికాన్ ఒరెన్ వానాన్లె. యూదురు ఆఇవరిజ్ ఏలుబడి: కినికాన్ వానాన్. వన్నిజె వారు అసదాన్ ఎర్దు సుడె:జి మంజినార్” ‡.

13 ఎర్దు సుడె:జి మండ్రెజ్ మిజి అటిసిని దేవుణుడిజ్, మీరు నమ్మిజి మంజినిదెర్ కాక మీ లోఇ సర్దని సమదనం నిండ్రెపిన్. ఎందానిజ్ ఇహిజ, అసదాన్ ఎర్దు సుడె:జి మంజిని లోఇ దేవుణు ఆత్మ సత్తు మిజి మరి నండో పిరిస్తెజ్ ఇజి.

దేవుణు సువార్త యూదురు ఆఇకార్ బా వెంజినార్

14 నమ్మిత్తి తంబెరిజాండె, మీరు ఒరెన్ మరి ఒరెన్ వెట నెగెండ మంజినిదెర్ ఇజి నాను నెసిస. మీరు బాగ నెస్తెజ్ ఇజి దేవుణు సుడె:జినికెజ్ విజా మీరు నెస్సిదెర్ ఇజి నాను నెసిస. ఒరెన్ మరి ఒరెన్ వన్నిజ్ బుద్ది వెహ్తె నెస్సిస్తెజ్ అట్సిదెర్ ఇజి నాను మీ వందిజ్ నిజం నెసిస. 15-16 గాని నాను యా ఉత్తమదు సెగం సజతిజ వందిజ్ మిజి ఎతు కిబిస్తెవలె దయరమ్దాన్ వెహ్తె. ఎందానిజ్ ఇహిజ, యేసుక్రీస్తుజ్ ఉండ్రె పణిమణి లెకెండ యూదురు ఆఇ జాతిది వరి నడి:మి మండ్రెజ్ ఇజెనె దేవుణు వన్ని గొప్పు దయార్యం నా ముస్సు తోరిస్తాన్. దేవుణు ఆత్మ వరిజ్ కేటకిజి దేవుణుడిజ్ సీదెజ్ తగితి ఉండ్రె పూజ లెకెండ వరిజ్ తయార్ కినికాదె నా పణి. దన్నివందిజె ఒరెన్ పుజెరె లెకెండ నాను వరిజ్ సువార్త వెహ్తెన. 17 అందెజె, నాను క్రీస్తుయేసు వెట కూడి:జి మన్నిజ్, దేవుణుడిజ్ కిని సేవ పణివందిజ్ పాగడి:జిన. 18 యూదురు ఆఇకార్ దేవుణుడిజ్ లోజెని వందిజ్ క్రీస్తు నా వెట కిత్తి పణిజ్ ఉండ్రె వందిజె నాను దయరమ్దాన్ వెహ్తెన. నాను నా

† 15:3 కీర్తన 69:9. †† 15:9 2సము 22:50; కీర్తన 18:49. ‡ 15:10-11 ద్విత్తి 32:43. †† 15:10-11 కీర్తన 117:1. ‡‡ 15:12 యెసయ 11:10.

మాటెజాణిజ్, నా పణిజాణిజ్ దేవుణుడిజ్ లొజెదెజ్ వరిజ్ నడపిస్త. 19 బమ్మొత్తి పణిజాణిజ్ని దేవుణు ఆత్మ నత్తుదాన్ నడపిస్త. ఆహె యెరూసలేం పట్టుం మొదొల్ని అయ సుట్టు వడక మన్ని పట్టుమ్కు విజా ఇలారికు ఇని పట్టుం దాక విజా బాడ్డిజ సాన్ని నాను క్రీస్తు వందిజ్ సువార్త పూర్తి సాటిస్త మన్న. 20 క్రీస్తు వందిజ్ సాటె ఆఇ బానె సువార్త సాటిస్తెజ్ ఇజినె నజి ఉండ్రె ఆస. ఎందానిజ్ ఇహిజ, మరి ఒరెన్ సువార్త కినిబాన్ సాన్ని వన్ని పణి లాగ్డెజ్ ఆవద్ ఇజినె నా మన్ను. 21 గాని నాను ఇనిక కిత్త ఇహిజ, దేవుణు మాటదు రాస్తిమన్ని లెకెండ్ కిత్త, “వన్నివందిజ్ ఎసెజ్బా వెహె ఆఇకార్ వన్నివందిజ్ నిజం ఆతిక సూణార్. వన్నివందిజ్ ఎసెజ్బా వెహె ఆఇకార్ వన్నివందిజ్ అర్దం కిసార్” †. 22 యా పణికిజి మహిజ్ నాను మీబాన్ వాదెజ్ నండొ అడ్డు ఆత మహద్.

పవులు రోమపట్టణం సాండ్రెజ్ ఒడెబిజినాన్

23-24 గాని ఏలు యా ప్రాంతమ్కాజ్ మన్ని పణిజ్ వీజితె. నండొ వంటెజ్ అస్సిబా మీబాన్ వాజి మిజి సుడెదెజ్ ఆస ఆతిజ్బా, ఏలు వాదెజ్ ఎర్దు సుడెజిన. నాను స్పెయిను దేసెం సాని సరిదాన్, మిజి వాజి సుడెజి నళెం మీ వెట మంజి సర్ద ఆదెజ్ ఆస ఆజిన. బాణిజ్ సానివెలె మీబాణిజ్ సాయం దొహ్కెజ్ ఇజి సుడెజిన.

25 గాని, ఏలు యెరూసలేమ్దు మన్ని దేవుణుడిజ్ నమ్మొత్తి వరిజ్ డబ్బు ఒత్తెజ్ యెరూసలేమ్దు సాస్సిన. 26 ఎలాగ ఇహిజ యెరూసలేమ్దు మన్ని నమ్మొత్తి వరి లొఇ డబ్బు సిల్లివరిజ్ సంద సీదెజ్ మాసిదోనియ ప్రాంతమ్దు మన్ని నమ్మొత్తికార్ని అకాయ ప్రాంతమ్దు మన్ని నమ్మొత్తికార్ వారె ఆజి ఇష్టం ఆతార్. 27 ఒఒ, వారు సీదెజ్ ఇష్టం ఆతారె సీజినార్. నిజమె, యూదురు ఆఇకార్ యెరూసలేమ్దు మన్ని దేవుణు లోకురిజ్ సాయం కిదెజ్నె. ఎందానిజ్ ఇహిజ, యూదురు ఆఇవరిజ్ ఉండ్రె అప్పు మనాద్. ఎలాగ ఇహిజ, దేవుణు యూదురిజ్ సిత్తి దీవనమ్కు ఆఇ జాతిదివరిజ్ బాట వాతాద్. అందెజె యూదురిజ్ తక్కు ఆతిక యూదురు ఆఇకార్ వరిజ్ మన్నివనక లొఇహాన్ బాట కిజి సీదెజె. 28 యా పణి వీజ్త ఇహిజ, వరిజ్ సీదెజ్ మన్ని డబ్బు పూర్తి వరిజ్ తప్వెండ సిత్తి వెనుక నాను యెరూసలేం పట్టుమ్దాన్ స్పెయిను సాని సరిదు మీబాన్ వానా. 29 నాను మీబాన్ వానివలె క్రీస్తుబాణిజ్ మజి విజెరిజ్ గొప్ప పెరి దీవనమ్కు దొహ్కె ఇజి నాను నెసిన. 30 ఏలు తంబెరిజాండె, ప్రబు ఆతి యేసుక్రీస్తు మున్ను, మన్ని నమ్మకం మన్నిదన్నివందిజ్, దేవుణు ఆత్మ మిజి సిత్తి దన్నివందిజ్, మీరు నా వందిజ్ గట్టిజ పార్దనం కిదు ఇజి నాను బతిమాల్లిన. 31 యూదయ దేసమ్దు యేసుప్రబుజ్ నమ్మొత్తి యూదురు బాణిజ్ నజి ఇని ప్రమాదం రెవండ మండ్రెజ్ పార్దనం కిదు. 32 మరి దేవుణు సిత్తం ఆతిజ నాను సర్దదాన్ వాజి మీబాన్ రోమ్దెజ్ ఇజిబా పార్దనం కిదు. 33 మజి సమదనం సీని దేవుణు మిజి తోడు మనీన్.

రోమ పట్టుమ్దు సెగొండార్ నమ్మొత్తి వరిజ్ పవులు వందనమ్కు వెహిసాన్.

16 కెంకెయాదు మన్ని దేవుణు సజమ్దు సేవ కిదెజ్ ఏర్పాటు ఆతి పిబె ఇని మా బీబి వందిజ్ నాను వెహిసిన. అది గొప్ప నెగ్గికార్. 2 దేవుణుడిజ్ నమ్మొత్తి దన్నిజ్, నమ్మొత్తికార్ కిదెజ్ తగితి లెకెండ్ డగ్గు కిదు. దన్నిజ్ కావాస్తిక ఇనికబా మీబాన్ మహిజ, మీబాణిజ్ సీబి మండ్రు. ఎందానిజ్ ఇహిజ, అది నండొండారిజ్ మరి నజిబా సాయం కిజి మహద్.

- 3 క్రీస్తు వందిజ్ మా వెట కూడెజి పణికిత్తి మహి స్పిస్కిలాదిజ్ని దన్ని మాసి అకులాదిజ్బా మా వందనమ్కు వెహె. 4 వారు నా పాణం వందిజ్ వరి పాణమ్కు సీదెజ్ తయార్ ఆతికార్. నాను ఒరెనె ఆవ, యూదురు ఆఇవరి సజమ్కు విజా వారు కిత్తి దన్ని వందిజ్ వందనమ్కు వెహిసాన్.
- 5 మరి వరి ఇండ్రొ మన్ని నమ్మొత్తివరిజ్బా వందనమ్కు వెహె ఆసియ ప్రాంతమ్దు తొలిత క్రీస్తు మున్ను, నమకం ఇడ్డి, నాను ప్రేమిసిని ఎవాయివెటుజ్ వందనమ్కు వెహె.
- 6 మీ వందిజ్ నండొ కష్టబాడెజి పణి కిత్తి మరియెజ్ వందనమ్కు.
- 7 నావెట జేలిదు మహి, నా సాంత లోకుర్ యూదురు ఆతి అండ్రొనికుని, యూనియాకు వందనమ్కు వెహిసిన. వారు అపాస్తురు నడిమి పెరికార్ ఇజి విజెరె నెసినార్. నజి ఇంక ముందాల్ వారు క్రీస్తు లోకు ఆతికార్.
- 8 ప్రబు వందిజ్ నాను నండొ ప్రేమిసిని అంస్లియతుజ్ వందనమ్కు.
- 9 క్రీస్తు వందిజ్ మా వెట పణి కిత్తి ఉర్బానుజ్ వందనమ్కు. నాను నండొ ప్రేమిసిని స్థాకుజ్ వందనమ్కు.
- 10 క్రీస్తు మున్ను నిజమాతి నమకం ఇడ్డాన్ ఇజి రుజాప్ కిత్తి మన్ని అపెలుజ్ వందనమ్కు. అరిస్తాబులు ఇండ్రొణి వరిజ్ వందనమ్కు.
- 11 నా సాంత లోకు యూద వాండ్రు ఆతి హెరొదియెనుజ్ వందనమ్కు.
నర్కిసు ఇండ్రొణి వరి లొఇ ప్రబు ఆతి క్రీస్తుజ్ సెందితి వరిజ్ వందనమ్కు.
- 12 క్రీస్తు వందిజ్ కష్టబాడెజి పణికినికెజ్ ఆతి త్రువయానుజ్ని త్రపాసానుజ్ వందనమ్కు.
నాను నండొ ప్రేమిసిని పెర్కిసుజ్ వందనమ్కు. అది ప్రబు వందిజ్ నండొ కష్టబాడెజి పణి కితామహద్.
- 13 ప్రబు వందిజ్ గొప్ప నెగ్గికార్ ఇజి కేట ఆతి రువనుజ్ వందనమ్కు. వన్ని అయ్సిజ్ వందనమ్కు. అది నజిబా యాయ వజనె.
- 14 అనున్క్రీస్తుజ్, ప్లెగొముజ్, హెరెమెకునుజ్, వత్రోబుజ్, హెరెమెకునుజ్, వరి వెట మన్ని నమ్మొత్తి వరిజ్ వందనమ్కు.
- 15 పిలోగునుజ్, యూలియాకుజ్, నెర్యాతునుజ్, వన్ని తజిసిజ్, ఒలంపాకుజ్ వరివెట మన్ని నమ్మొత్తి వరిజ్ వందనమ్కు.
- 16 నమ్మొత్తి వరిజ్ తగితి లెకెండ్ ఒరెన్ మరి ఒరెన్ వన్నిజ్ ముదు కిజి వందనమ్కు వెహె. యా బాడ్డిదు క్రీస్తుజ్ నమ్మొత్తి సజమ్కాణికార్ మిజి వందనమ్కు వెహిసాన్.

† 15:21 యెసయ 52:15.

17 నమ్మితి తంబెరిజాండె, మీరు నెస్తి మన్ని బోదదిజ్ డిస్సిసి దన్నిజ్ వెత్తేకం ఆతి బోద నెస్సిసి ఆఇ గుంపుజ్ కిదెజ్ ఇజి వెస్సికార్ మనార్. పరి వందిజ్ జాగర్త మండ్రు. నన్ని పరి బాణిజ్ దూరం మండ్రు ఇజి నాను బతిమాల్లి వెస్సిస. 18 నన్నికార్ మా ప్రబు ఆతి క్రీస్తుజ్ పణి కినికార్ ఆపర్. గాని వారు పరిజ్ ఇష్టం ఆతి దన్నివందిజె బత్తిజినార్. నెగ్గి మాటెజ్ వెస్సివజ బడాఃయి మాటెజ్ వెస్సి వీరు మొసెం కిజినార్. వారు సెఇలోకు ఇజి నెస్ఇకార్ పరి మాటెజాణ్ మొసెం కిబె ఆనార్. 19 మీరు దేవుణు మాటదిజ్ లోజిత్తి మన్నికార్ ఇజి విజేరె నెస్సార్. అందెజి మీ వందిజ్ నాను సర్ద ఆజిన. గాని మీరు నెగ్గిక ఇనిక ఇజి నెస్సి దన్నిలోఇ బుద్ది కల్లిజి మండ్రు. సెఇ వనకవెల కూడఃఏండ దన్నివందిజ్ కల్లిసిల్లెండ మండ్రు ఇజి నాను ఆస ఆజిన.

20 నమదనం సీని దేవుణు, సయ్యాను సత్తు పాడుఃకిజి పనిజ్ మీ కాల్యాజ్ అడ్గి బేగినె సిదులు మటిస్సాండ్రె ఇడ్నాన్. ప్రబు ఆతి యేసుబాణిజ్ దయాదర్మం మిజి తోడు మనిద్.

21 మా వెట కూడఃజి పణికిని తిమోతి మిజి వందనమ్కు వెస్సిసాన్. నా సాంత లోకుర్ యూదురు ఆతి లూకియ, యాసాను, సాసి పత్రు ఇనికార్ వందనమ్కు వెస్సిసాన్.

22 పవులు వెస్సి సిత్తిజ్ యా ఉత్తం రాసిని తెర్తియు ఇని నాను ప్రబు వందిజ్ వందనమ్కు వెస్సిసాన్.

23 సజమ్దు కూడఃజిని పరిజ్ విజేరిజ్ని నజిని నెగెండ సూణి గాయియు మిజి వందనమ్కు వెస్సిసాన్. యా పల్నుమ్దు పెర్ని డబ్బుజ్ లెక్క సుడఃజి అస్సికాన్ ఎరస్తు, నమ్మిత్తికాన్ ఆతి క్వార్తును మిజి వందనమ్కు వెస్సిసాన్. 24 మా ప్రబు ఆతి యేసు క్రీస్తుబాణిజ్ వన్ని దయాదర్మం మీబాన్ మనీద్.

25-26 మీ నమకమ్దు మిజి గటిజ నిల్పెజ్ దేవుణు అటాన్. నాను యేసుప్రబు వందిజ్ సువార్త సాటిసినివలె యాకదె వెస్సిసాన్. నండొ కాలం దేవుణు డాప్తి ఇడ్డి మహి నిజమాతి మాట ఏలు దేవుణు వెహ్తా మనాన్. ఏలు అయ నిజమాతి సువార్త మాటు సాటిస్తిజ్ ప్రవక్తరు రాస్తి మాటదానె క్రీస్తు వందిజ్ విజెరె నెసినార్. ఎలాకాలం మన్ని దేవుణు ఆగ్గుదాన్ యా సువార్త విజా లోకాజ్ నెస్సిసాన్. ఎందానిజ్ ఇహిజ విజెరె లోకుర్ నమ్మిజి లోజిదెజ్ ఇజి. 27 విజా వనకాజ్ నెసిని ఒరెండ్రె దేవుణుదిజ్, క్రీస్తుయేసుదాన్ ఎలాకాలం లోకుర్ పాగ్డిఃజి మనిర్. ఆమెన్.

మార్కు

నెల్ల కిబిసినిక

ఇక్కడ అపొస్తలుడు ఆతి పవులు కొరింతి పట్నమ్దు మన్ని దేవుణు సజమ్దిజ్ రాస్తి మొదొహి ఉత్తం. పవులునె ఇక్క రాస్తికాన్ ఇజి యా ఉత్తమ్నె రుజాప్ సీజినాద్. 1:1,16,21. దేవుణు సజమ్దు మన్ని విజా సజతిజ్ వందిజ్, నమ్మితి వరి నడిమి మన్ని గొడబెజ్ వందిజ్, దేవుణుదిజ్ పాగ్డిజి మాడిస్సి వందిజ్, దేవుణు పణి వందిజ్ సీని వందిజ్, నమ్మితికార్ జటు ఆజిని వందిజ్, సజమ్దు మన్ని బోదెక్ ఎలాగ మండ్రెజ్ ప్రబు ఏర్పాటు కిత్తి బోజనం వందిజ్, పెండ్లి వందిజ్, మరి యాలెకెండ్ మన్ని నండొ సజతిజ్ వందిజ్ ఎలాగ కిదెజ్ ఇజి యా ఉత్తమ్దాన్ పవులు కొరింతి సజమ్ది వరిజ్ వెహ్సినాన్. యా ఉత్తమ్దు రాస్తిమన్ని సజతిజ వందిజ్ సుడెఃతిజ అయా కాలమ్దు మని సజమ్దిజ్నె ఆవండ యా కాలమ్దు మన్ని సజమ్కాజ్బా యాక ముకెలమాతి ఉండ్రె ఉత్తం. అక్కడె ఆవండ నమ్మితి వన్నిజ్ మన్ని ప్రేమ వందిజ్, సాత్తికార్ మర్జి నిజ్ని వందిజ్ రాస్తి సజతిజ్ ఎలాకాలమ్దు మన్ని నమ్మితి వరి వందిజ్ రాస్తిక్కాదె. యా ఉత్తం యేసుక్రీస్తు సాజి మర్జి నిజితి వనుక యాబ్బయ్ ఏడునొ యాబ్బయ్ ఆరునొ పంటెజ్ వెనుక రాసి ఆత్త మనాద్ ఇజి విజేరె నమ్మిజినార్. పవులుని వన్ని జటుదికార్ వారు రుండి సుట్టు సువార్త సాటిస్సిజ్ సాస్తి మహివలె (A.D. 50) కొరింతి పట్నమ్దు అందితార్. డగ్రు 18 నెల్లెజ్ మంజి సువార్త పణి కిజి మహిజ్ బాన్ దేవుణు సజం తయారాతాద్. (అపొస్తరు కిత్తి పణిజ్ 18:1-8). పవులు ఎవెను పట్నమ్దు మహివలె, బాణిజ్ యా ఉత్తం రాస్తఫాక్తాన్. యా ఉత్తం నెగెండ్ నద్విజి నెసి మహిజ దేవుణు సజం ఎలాగ మండ్రెజ్ ఇజి సజమ్దిజ్ నడిఃపిసిని వరిజ్, నమ్మితి వరిజ్ నెగెండ్ అర్దమానాద్.

మొదోల్

1 దేవుణు ఇష్టమాతి వజ, క్రీస్తుయేసుజ్ అపొస్తలుడు లెకెండ్, వాండ్రు కూక్తి మని పవులు ఇని నాను కొరింతి పట్నమ్దు మని దేవుణు సజమ్దిజ్ రాసిని ఉత్తం. మా తంబెరి ఆతి సాస్సెను నా వెట మనాన్. 2 మీరు లోకమ్దు విజాబాన్ మని వరిజ్ని మజి ప్రబు ఆతి యేసుక్రీస్తు పేరు అసి పాగ్డిజి మాడిస్సి వరి వెట మీరుబా కూక్తి మంజినిదెర్. అందెజె మీరు ప్రబు ఆతి యేసుక్రీస్తు వేట కూడిజి దేవుణు వందిజ్ కేట ఆతికిదెర్ని దేవుణుదిజ్ సెందితికిదెర్ ఆజి మండ్రెజ్ ఇజి కూకె ఆతి మనిదెర్. 3 మా బుబ్బాతి దేవుణుని ప్రబు ఆతి యేసు క్రీస్తు దయా దర్మమ్దాన్ మీరు నిపాతి మండ్రెజ్ సాయం కిపిన్. 4 క్రీస్తుయేసుదాన్ మిజి దేవుణు సితిమని వన్ని దయా దర్మం వందిజ్ నాను ఎన్వివలెబా మీ వందిజ్ దేవుణుదిజ్ వందనమ్కు వెహ్సిన. 5 అహిజ, మీరు విజా సజతిజ వందిజ్, ఇహిజ, మీరు వర్గిజిని విజా మాటెజ లోఇ, మిజి మని గెణమ్దు, క్రీస్తు వెట మని సంమదమ్దు మీరు దేవుణు సీజిని మేలుజ్ విజా కలితి మని కిదెర్ ఆజినిదెర్. 6 ఎందనిజ్ ఇహిజ క్రీస్తు వందిజ్ మాపు వెహ్సి మని సాస్యం వందిజ్ ఇని అనుమానమ్బా సిల్లెండ మీ మన్నుజ మీరు గటిజ గుర్తు అస్తిదెర్. 7 అందెజె, దేవుణు ఆత్మ సీజిని వరమ్కాజ్ లోఇ ఇని దనిజ్బా తకు సిల్లెండ, మా ప్రబు ఆతి యేసు క్రీస్తు తోరె అని దినం వందిజ్ గొప్ప అసదాన్ ఎర్దు సుడెఃజి మంజినిదెర్. 8 మా ప్రబు ఆతి క్రీస్తు యేసు తీర్పు సీని దినమ్దు మీరు ఇని తవు సిలెండ మనికిదెర్ ఇజి తోరె ఆదెజ్ దేవుణు మిజి సత్తు సీజి ఆకార్దాక కాప్ కినాన్లె. 9 వన్ని మరిన్ ఆతి, మా ప్రబువాతి యేసుక్రీస్తు వెట కూడిజి మండ్రెజ్ మిజి కూక్తి మని దేవుణు నమ్మిదెజ్ తగ్గికాన్.

దేవుణు సజమ్దు నమ్మితికార్ కేట ఆజిని వందిజ్

10 తంబెరిజాండె, అందెజె మీ లోఇ ఇని కేట ఆవండ మండ్రెజ్ ఇజి, మీరు విజిదెర్, ఒరెన్ మరి ఒరెన్ వెట ఉండ్రె మన్ను ఆజి మండ్రెజ్. మరి మీరు విజిదెర్ ఒడెఃబినిబాన్, మీ మన్నుదు పూర్తి ఉండ్రె ఆజి మండ్రెజ్ ఇజి మా ప్రబు ఆతి యేసుక్రీస్తు బాణిజ్ నజి దోహ్కాక్తి అతికారమ్దాన్ నాను మిజి బతిమాల్జిన. 11 ఎందనిజ్ ఇహిజ మా తంబెరిజాండె, మీ లోఇ గొడెఃబెజ్ మన్నె ఇజి క్లోయె ఇండ్రెణికార్ సెగొండార్ నజి కబ్బు తత మనార్. 12 నాను వెహ్సెనిక ఇనిక ఇహిజ, ఒరెన్, "నాను పవులుజ్ సెందితికాన్", ఇజినాన్గె, మరి ఒరెన్, "నాను అపాలుజ్ సెందితికాన్", ఇజినాన్గె. మరి ఒరెన్, "నాను కేపెజ్ సెందితికాన్", ఇజినాన్గె, మరి ఒరెన్, "నాను క్రీస్తుజ్ సేందితికాన్", ఇజి వెహ్ ఆజినిదెర్గె. 13 క్రీస్తు ఎయెర్ వందిజ్బా బాటెజ్ ఆవతాన్. పవులు ఇని నాను మీ వందిజ్ నిలువాదు సావత. మీరు పవులు ఇని నా పేరుదాన్ బాప్సినం లాగె ఆఇతిదెర్. 14 క్రీస్తుని గాయుకు, వారు రిఎర్ ఆవండ మరి ఎయెరిజ్బా నాను బాప్సినం సీవిత. దన్ని వందిజ్ నాను దేవుణుదిజ్ వందనమ్కు వెహ్సిన. 15 అందెజె నా పేరుదాన్ మీరు బాప్సినం లాగె ఆతిదెర్ ఇజి వెహ్జె ఎయెరిజ్బా అక్కు సిల్లెద్. 16 స్తీపాను ఇండ్రెణి వరిజ్బా నాను బాప్సినం సీతమన. అక్కడె ఆవండ మరి ఎయెరిజ్బా బాప్సినం సీత్తిక నజి ఎత్తు సిల్లెద్. 17 ఎందనిజ్ ఇహిజ, సువార్త వెహ్జెనె క్రీస్తు నజి పాక్తాన్. గాని బాప్సినం సీదెజ్ ఇజి నజి పాక్తివతాన్. అందెజె క్రీస్తు నిలువాదు సాతి సావుది సత్తు తకు ఆదెజ్ ఆవద్ ఇజి నాను సువార్త సాటిస్సిక యా లోకమ్ది లోకురి గెణమ్దాన్ కూడిఃతి మాటెజాణిజ్ ఆవద్.

దేవులు గెణమ్ని సత్తు అతిమన్ని క్రీస్తు

18 నాసనమాజి సాని పరిజ్ క్రీస్తు సిలువారు సాతి వందిజ్ వెహ్నిని సువార్త బుద్ది సిల్లి పణి కిత్తి వందిజ్ వెహ్నిని మాటెజ్ లెకెండ తోరిజినె గాని దేవులు రక్కిస్తి మని మజి యాక దేవులు సత్తు. 19 అందెజె, "వారు గెణం మనికార్గె! పరి గెణం నాను పాడెకెనాలె. వారు బుద్ది మనికార్గె! పరి బుద్ది నాను పణిదిజ్ రెంండ కెనాలె", ఇజి దేవులు మాటదు రాస్త మనాద్. 20 బుద్ది మన్నికాన్ ఇజి ఒడెబితి మని వన్ని బుద్ది ఇనిక అత మనాద్? గొప్ప సదువు మనికాన్ ఇజి ఒడెబితి మని వన్ని సదువు ఇనిక అత మనాద్? యా లోకమ్ది పండిల్ ఇజి ఒడెబితి మనికాన్ ఇనిక అత మనాన్? యా లోకమ్ది విజి గెణం దేవులు బుద్ది సిలి పణి లెకెండ పణిదిజ్ రెజ లెకెండ కెితాండ్రా? 21 దేవులు సితి గెణమ్దాన్, లోకమ్దిజ్ సెందితి పరిజ్, పరి గెణమ్దాన్ దేవులుదిజ్ నెస్తెజ్ అబ్ఎండ మహిజ్, లోకమ్దిజ్ సెందితి పరిజ్ బుద్ది సిల్లి పణి ఇజి తోరి అతి సువార్త సాటిసి, నమ్మిజిని పరిజ్ రక్కిస్తిజ్ దేవులు ఇష్టం ఆతాన్. 22 యూదురు అతికార్ బమ్మాతి పణిజ్ కొరిజినార్. గ్రీసు దేసెమ్దికార్ గెణమ్దిజ్ రెబాజినార్. 23 గాని మాపు క్రీస్తు మా పావమ్క వందిజ్ సిలువారు సాతి సాపు వందిజ్ సువార్త సాటిసినాప్. ఇక్క యూదురిజ్ అడ్డు లెకెండ తోరిజినె. మరి యూదురు ఆఇ పరిజ్ బుద్ది సిలి పణి లెకెండ తోరిజినె. 24 గాని యూదురిజ్ని యూదురు ఆఇ పరిజ్, అహిజ రక్కిస్తిజ్ ఇజి దేవులు కూక్తి మని విజెరిజ్, క్రీస్తు, దేవులు సత్తు అత మనాన్. క్రీస్తు, దేవులు గెణం అత మనాన్. 25 ఎందనిజ్ ఇహిజ, దేవులు బుద్ది సిలి పణి ఇజి లోకుర్ ఒడెబితిక లోకురి బుద్దిదిజ్ ఇంక బుద్ది మనిక. దేవులు సత్తు సిల్లి పణి ఇజి లోకుర్ ఒడెబితినిక లోకురి సత్తుదిజ్ ఇంక బలం మనిక.

26 తంబెరిజాండె, దేవులు మిజి కూక్తి మహివలె మీరు ఎలాగ కూకె అతి మనిదెర్ ఇజి ఒడెబిదు. లోకమ్దు మన్నికార్ ఒడెబిని లెకెండ ఇహిజ, మీ లోఇ బుద్ది మనికార్ లాపు నండొండార్ సిల్లెర్, గొప్ప వారు లాపు నండొండార్ సిల్లెర్, పెరి కుటుమ్దికార్ లాపు నండొండార్ సిల్లెర్. 27 వారు బుద్ది సిలికార్గె! గాని లోకమ్దు మని బుద్దిమని పరిజ్ సిగు కెదెజ్, దేవులు బుద్ది సిలి వన్యూజ్ ఎర్లిస్తాన్. వారు సత్తు సిలికార్గె! గాని లోకమ్దు మని సత్తుమని పరిజ్ సిగు కెదెజ్ దేవులు సత్తు సిలివనకాజ్ ఎర్లిస్తాన్. 28 యా లోకమ్దు ఇనికాద్ అతిమని వన్యూజ్, అక్కెజ్ ఇనికెజ్ ఆఉ ఇజి తోరిస్తిజ్ ఇజి ఏకం అడిగి మని వనకాజ్ని ఇష్టం కిఇ వన్యూజ్, ఇనికబా ఆఇ వన్యూజ్ దేవులు ఎర్లిస్తాన్. 29 అందెజె ఎయెర్బా దేవులు ఎర్దు ఇనిదని వందిజ్బా పాగ్డె: ఆదెజ్ అబ్ఎన్. 30 వన్ని వెటనె మీరు మా వందిజ్ దేవులు బాణిజ్ వాతి మని గెణమాతి మన్ని క్రీస్తుయెను వెట కూడిజి మంజినిదెర్. అహిజ, వన్ని వెటనె మాటు సితి నిజాయితి మనికాల్ ఆతాల్, దేవులు వందిజ్ కేట అతికాల్ ఆతాల్, విడూడల పాందితికాల్ ఆతాల్. 31 అందెజె దేవులు మాటదు రాస్తి మని లెకెండ. "పాగ్డె: అనికాన్ ప్రబు కిత్తి వన్యూ వందిజ్ పాగ్డె: ఆదెజ్ వలె".

2 తంబెరిజాండె దేవులు వందిజ్ సాస్యం మీ నడెమి సాటిస్తిజ్ ఇజి మీ డగ్గు నాను వాతివలె నెగెండ వర్గెదెజ్ అట్టి వన్ని లెకెండెన్, గొప్ప పెరి బుద్ది మని వన్ని లెకెండెన్ మీ డగ్గు రెవెత. 2 అందెజె నాను మీ నడెమి మహివెల, యెసుక్రీస్తు వందిజ్ని వాండ్రు సిలువారు సాతి సాపు వందిజ్ని అవొండ మరి ఇనికబా నెన్ఇ వన్ని లెకెండ మండ్రెజ్ ఇజి నాను నిర్దం కిత. 3 నాను మీ నడెమి వాతివలె నా సత్తు ముస్సు అదారం అవొండ, సత్తు సిల్లివన్ని లెకెండ తియెల్దాన్, ఎసాన్ వణక్కి వాత. 4 నాను మీ వెట వర్గెతి మాట వెహ్మని సువార్త, లోకు బుద్దిదాన్ కూడి:తి మని తియాని మాటెజాణిజ్ అవతాద్. గాని మిజి తోరి ఆదెజ్ ఇజి దేవులు అత్మ సత్తుదాన్ కెజిని పణిజాణిజె తోరిస్త మనాద్. 5 ఎందనిజ్ ఇహిజ, దేవులు ముస్సు మిజి మని నమకం లోకు బుద్ది ముస్సు అదారం అవొండ, దేవులు సత్తు ముస్సునె అదారం ఆదెజ్ ఇజి.

దేవులు అత్మ బాణిజ్ దొహ్క్తి గెణం.

6 దేవులు ముస్సు మని నమకమ్దు పిరితివరి నడెమి బుద్దిదాన్ కూడి:తి మని మాటెజాణిజ్ వర్గెజినాప్. గాని అక్క యా లోకమ్దు మని యా తరమ్ది పరి బుద్ది అవెద్. మరి సిల్లెండ ఆజి సాస్నిని యా లోకమ్ది అతికారిజ బుద్ది సనికబా అవెద్. 7 ఆక్కాదె అవొండ, దేవులుదిజ్ డాజెతి మని గెణం వందిజ్ వర్గెజినాప్. డాపె అతి మహి యా గెణం, మాటుబా వన్నిజ్ మని గొప్ప గవర్మ్దు కూడి:జి మండ్రెజ్ ఇజి లోకం పుట్ఎండ ముందాల్తె దేవులు మా వందిజ్ కేట కిత్తి ఇడ్డి మహిక. 8 యా తరమ్ది అతికారిజె ఎయెరిజెబ యాక అర్దం కెదెజ్ అబ్ఎండారార్. ఎందనిజ్ ఇహిజ, వారు అర్దం కెజి నెసి మంజినిక ఇహిజ గొప్ప గవర్మ్దిజ్ ప్రబు అతి వన్నిజ్ సిలువారు డెయెజి సవ్ఎతార్మరి. 9 అందెజె దేవులు మాటదు రాస్తి మన్ని లెకెండ, "దేవులు వన్నిజ్ ప్రేమిసిని పరి వందిజ్ ఇనికెజ్ తయార్ కిత ఇట్టామనాండ్రా ఇజి ఎయెర్బా పరి కణకెజాణిజ్ నుడె:దెజ్ సిల్లెద్, ఎయెర్బా పరి గిబిజాణిజ్ వెండ్రెజ్ సిల్లెద్. ఎయెర్బా పరి మన్నుదు ఎన్జెబా ఒడెబిదెజ్ సిల్లెద్".

10 గాని దేవులు వన్ని అత్మదాన్ అయారెజ్ మజి తెలియ కిత మనాన్. దేవులు అత్మ విజా దనిజ్ రెబాజినాన్. దేవులు లోఇ మని డాజెతి మని సజతిజ్బా రెబాజి తోరిసినాన్ 11 ఒరెన్ వన్ని మన్నుదు ఒడెబినికెజ్ విజా వన్ని లోఇ మని వన్ని అత్మనె అవొండ మరి ఎయెర్బా నెన్ఎర్. అయా లెకెండెనె దేవులు మన్నుదు మనికెజ్ వన్ని అత్మదిజ్ని అవొండ మరి ఎయెర్బాజె తలివెద్. 12 దేవులు బాణిజ్ మజి సిడ్డి:నె సితిమని వన్యూజ్ అర్దం కెజి నెస్తెజ్, మజి దొహ్క్తి మని అత్మ లోకమ్ది పరి లెకెండ ఒడెబిని నని అత్మ అవెద్. దేవులు బాణిజ్ వాతిమని దేవులు అత్మనె మజి దొహ్క్తి మనాద్. 13 మాపు వర్గెజిని యా మాటెజ్ లోకు బుద్దిదాన్ నెన్విస్తి మాటెజ్ ఆఉ. గాని దేవులు అత్మ నెన్విస్తి మాటెజాణిజ్, దేవులు అత్మదిజ్ సెందితి నిజమాతి సజతిజ్, దేవులు అత్మదిజ్ సెందితి మాటెజాణిజ్ మాపు వర్గెజినాప్. 14 దేవులు అత్మ సిలికాన్ దేవులు అత్మబాణిజ్ వాని సజతిజ డగ్గు కెిన్. ఎందనిజ్ ఇహిజ అయారెజ్ వన్నిజ్ బుద్ది సిల్లి పణిజ్ లెకెండ తోరిజినె. వన్యూజ్ అర్దం కెదెజ్ ఇహిజ దేవులు అత్మదానె అర్దం కెజి ఆదెజ్. దేవులు అత్మ వన్ని లోఇ సిల్లితిజ్, వన్యూజ్ అర్దం కెదెజ్ వాండ్రు అబ్ఎన్. 15 దేవులు అత్మ లోఇ మనికాన్ విజా వన్యూజ్ అక్కెజ్ ఎలాగ మర్రికెజ్ ఇజి నెస్తెజ్ అటూన్. గాని వన్ని లోఇ ఇనికెజ్ మన్నె ఇజి ఎయెర్బా నెస్తెజ్ అబ్ఎర్. 16 దేవులు మాటదు రాసె అతి మని లెకెండ, "ప్రబుజ్ బుద్ది వెహ్మెజ్ ఇజి వన్ని మన్నుదు మనికెజ్ నెస్తిమనికాన్ ఎయెన్ మనాన్?". గాని మజి క్రీస్తుజ్ మని నని మన్ను మన్నె.

నజమదు నమ్మిత్తికార్ కేట ఆజిని వందిజ్

3 తంబెరిజాండె, క్రీస్తుజ్ లోజీజి నడిజిని పరి వెట వర్గిని లెకెండె నాను మీ వెట వర్గిదెజ్ అట్వత. గాని ఒడొలది ఆసెజ్ లోజీజి నడిజిని పరివెట వర్గిని లెకెండె నాను మీ వెట వర్గిత. ఎండనిజ్ ఇహిజ, మీరు క్రీస్తు వెట కూడితి మహిదెర్ గాని క్రీస్తుజ్ సెందితి సజతిజ్ లోజీజిని దని లోఇ ఏలుబా మీరు లేత కొడొర్ లెకెండె మనిదెర్. 2 లేత కొడొరిజ్ పాలు సీని లెకెండె ఇజిరి సజతిజ్ నాను మిజి నెస్సిస్త. పెరికార్ ఉణి మాముల్ బోజనం నని గటిమని ఇనికబా నాను మిజి నెస్సివత. నిజమె ఏలుబా మీరు దనిజ్ తగ్గికిదెర్ ఆవెర్, మీరు లేత కొడొర్ లెకెండె మనిదెర్. 3 ఏలుబా మీరు యేసుక్రీస్తుజ్ లోజీజి నడిజిని పరి లెకెండె ఆఇదెర్. ఎండనిజ్ ఇహిజ మీ నడిమి గోన ఆనికెజ్, గొడొబెజ్ మహిజ్ మీరు యేసుక్రీస్తుజ్ లోజీజి నడిజిని పరి లెకెండె ఆఇదెర్. క్రీస్తు మున్సు, నమకం మన్ఇవరి లెకెండె మీరు విజా సజతిజ్ కిజినిదెర్. 4 ఎండనిజ్ ఇహిజ ఒరెన్, "నాను పవులుజ్ సెందితికాన్", ఇజి, మరి ఒరెన్, "నాను అపాలుజ్ సెందితికాన్", ఇజి మరి ఒరెన్, యాలెకెండె వెస్సినివలె మీరు క్రీస్తు మున్సు, నమకం ఇడొజ్ మాముల్ లోకుర్ లెకెండె ఆఇదెరా?

5 అపాలు ఎయెన్? పవులు ఎయెన్? వహి పణి కినికారెగె? ఒరెన్ ఒరెన్ వన్నిజ్ వ్రబు ఒపెస్సి లెకెండె వారు కిత్తి పణిజాణిజ్ మీరు దేవుణుదిజ్ నమ్మిత్తిదెర్. 6 నాను గింజ ఉణువ, అపాలు దనిజ్ ఏరు వడిస్సాన్, గాని దనిజ్ పిరిపిక్సాన్ దేవుణునె. 7 అందెజ్ ఉణుస్సిక్సాన్ గాని ఏరు వడిస్సిక్సాన్ గాని ఇనిక ఆవెర్. గాని దనిజ్ పిరిపిక్సాన్ దేవుణు ఒరెండె. 8 ఉణుస్సి వన్నిజ్ని ఏరు వడిస్సి వన్నిజ్ ఉండె ఉదెనమనె మహాద్. ఒరెన్ ఒరెన్ వన్నిజ్, పరి సాంత వణిదిజ్ తగితి జీతం దొహ్కాద్. 9 మావు దేవుణు వెట కూడిజి పణి కినికాన్. మీరు దేవుణు మడిజ్ లెకెండె ఆతి మనిదెర్. దేవుణు ఇల్లు లెకెండె ఆతి మనిదెర్. 10 దేవుణు నా మున్సు తోరిస్సి మన్ని దయా దర్మమదాన్, నెగెండ ఇల్లు తొప్తాజ్ నెస్సివన్ని లెకెండె నాను పునాది పాక్త మన. మరి ఒరెన్ దని మున్సు ఇల్లు తొప్సాని వన్ని లెకెండె తొప్సానాన్. ఒరెన్ ఒరెన్ ఎలాగ దని మున్సు తొప్సానాండొ ఇజి వాండ్రు జాగర్ నుడిదెజ్ వలె. 11 అహిజ పాక్తిమని పునాది ఆవండె మరి ఉండ్రీ పునాది పాక్తెజ్ ఎయెన్బా అట్వన్. 12 ఒరెన్ యా పునాది మున్సు తొప్సావలె బజారమదాన్ తొప్సాన్సు, సిల్లిజ వెండిదాన్ తొప్సాన్సు, సిల్లిజ నండొ కరితి రంగు పణకాణిజ్ తొప్సాన్సు, సిల్లిజ మరాన్దాన్ తొప్సాన్సు, సిల్లిజ గడిదాన్ తొప్సాన్సు, సిల్లిజ ఆకుజాణిజ్ తొప్సాన్సు. 13 ఒరెన్ ఒరెన్ కిత్తి పణిజ్ ఎలాగ మర్రిక ఇజి యేసుక్రీస్తు తీర్పు తీరిస్సి దినమదు తోరె ఆనె. అయ పణిజ్ డాన్వెండె తోరె. అయా పణిజ్ సిసు వెటనె తోరె ఆనె. ఒరెన్ ఒరెన్ కిత్తి మని పణి ఎలాగ మర్రికాదొ ఇజి సిసునె పరిన కినాద్. 14 ఒరెన్ అయ పునాది మున్సు తొప్సా మని పణి సిసుదిజ్ గెలిసి నిల్లి మహిజ వాండ్రు జీతం లొని ఆనాన్. 15 ఒరెన్ కిత్తి పణి సిసుదాన్ వెతిజ వన్నిజ్ నస్టం వానాద్. గాని వాండ్రు తప్పి ఆనాన్. గాని సిసుకొనెజ నడిమిహున్ తప్పి ఆతి లెకెండె తప్పి ఆనాన్లె.

16 మీరు దేవుణు గుడి: అతికిదెర్ ఇజి మీరు నెస్ఇదెరా?. మరి దేవుణు ఆత్మ మీ లోఇ బత్తిజినాన్ ఇజి మీరు నెస్ఇదెరా? 17 ఎయెన్బా దేవుణు గుడి:దిజ్ పాడొకిత్తిజ దేవుణు వన్నిజ్ పాడొకినాన్. ఎండనిజ్ ఇహిజ అయ గుడి: దేవుణుదిజ్ సెందితిక. అయ గుడి: ఆతి మనికిదెర్ మీరు.

18 మిజి మీరె మొసెం కెబె అదెజ్ అవద్. మీ లోఇ ఎయెన్బా యా తరమదిజ్ తగ్గు గెణం మనికాన్ వాండ్రె ఇజి ఒడిబిజి మహిజ, గెణం మనికాన్ అదెజ్ ఇజి వన్నిజ్ వాండ్రె యా లోకమది వజ బుద్ది సిలి వన్ని లెకెండె ఆపెన్. 19 ఎండనిజ్ ఇహిజ యా లోకమది గెణం దేవుణు ఎర్దు పణిదిజ్ రెఇకాదె. ఎండనిజ్ ఇహిజ, "గెణం మనికార్ ఇజి ఒడిబిని పరిజ్ దేవుణు పరి గెణమదాన్ ఒడిస్సాన్", ఇజి దేవుణు మాటదు రాస్త మనాద్. 20 మరి, "బుద్ది మని పరి ఆలోసనమ్కు పణిదిజ్ రెఇకెజ్ ఇజి వ్రబు నెసినాన్", ఇజి దేవుణు మాటదు రాస్త మనాద్.

21 అందెజె ఎయెర్బా లోకు పేరు అసి నాను వన్నిజ్ సెందితికాన్ ఇజి పాజిదెజ్ అవద్. మీరు నెగెండె మండ్రెజ్ ఇజి విజా సజతిజ్ దేవుణు మిజి సిత మనాన్. 22 పవులు ఆతిజ్బా, అపాలు ఆతిజ్బా, కేవ ఆతిజ్బా మీరు నెగెండె మండ్రెజ్ ఇజి దేవుణు ఏర్పాటు కిత్తికాప్. లోకమదు మనికెజ్ విజా, పాణం ఆతిజ్బా, సాపు ఆతిజ్బా, యా కాలమదు జర్రినికెజ్ ఆతిజ్బా, వాని కాలమదు జర్రిదెజ్ మనికెజ్ ఆతిజ్బా విజా మీరు నెగెండె మండ్రెజ్ ఇజి దేవుణు సితికెజ్. 23 మీరు క్రీస్తుజ్ సెందితికిదెర్. క్రీస్తు దేవుణుదిజ్ సెందితికాన్.

క్రీస్తుజ్ అపొస్తరు ఆతికార్

4 అందెజె క్రీస్తుజ్ పణి కినికార్ ఇజి లోకుర్ మజి నుడిదెజ్ వలె. దేవుణుది డాజీతి మని సజతిజ్ లోకురిజ్ నెస్సిస్తెజ్ ఒపజెపె ఆతికార్ ఇజి వారు మజి నుడిదెజ్ వలె. 2 అక్కాదె ఆవండె ఉండ్రీ పణిదిజ్ ఒపజెపె ఆతి మనికాన్ అయ పణిదు నమ్మకమాతికాన్ ఇజి తోరె అదెజ్ వలె. 3 మీరు గాని లోకురి కొర్టుబగాని నజి ఒపజెపె ఆతి మని పణి నాను నెగండె కిజినాన్ సిలెనొ ఇజి నుడిజిని దనిజ్ నాను లస్యం కిం. నజి నానెబా అయ లెకెండె నా పణిదిజ్ నుడిదెజ్ సిల్లె. 4 నా గర్బం నజి గదిస్వెండె బాగనె మనాద్. అయ లెకెండె మహిజ్బ నాను ఇని తప్ప సిలికాన్ ఇజి వెహి అదెజ్ అట్వ. నజి తీర్పు సీనికాన్ వ్రబునె. 5 అందెజె ఏర్పాటు కిత్తి మని గడియ రెవెండ ఇనిదనిజ్బా తీర్పు తీరిస్సెజ్ అవద్. వ్రబు వాని దాక కాప్కిదెజ్. సీకటుదు డాజీతి మని విజా తప్పి పణిజ్ వాండ్రు వెల్లి జాయ్దు తనాన్లె. లోకురి మన్నుదు మహి విజా ఉదెనమకాజ్ వెల్లి తనాన్లె. అయావలె ఒరెన్ ఒరెన్ వన్నిజ్ వాండ్రు కిత్తి పణిదిజ్, తగ్గు లెకెండె దేవుణు బాణిజ్ పాగ్డె: ఆనాన్లె. 6 తంబెరిజాండె, "రాస్సి మహి దనిజ్ జప డాట్టి సాండ్రెజ్ అవద్", ఇజి రాస్సి మని మాటదిజ్ అర్దం మీరు మజి నుడిజి నెస్సెజ్ వలె. యాలెకెండె నా వందిజెనె అపాలొ వందిజె నాను మిజ వెహ్తా మహ. అయాలెకెండె మీరు ఒరెన్ వన్ని పేరు అసి పాజిదెజ్ అవద్. 7 మహి పరిజ్ ఇంక మిజి గొప్ప పెరికార్ కిత్తికాన్ ఎయెన్? మిజి కలిగితి మని బుద్దిని గెణం లోఇ దేవుణు బాణిజ్ దొహ్కెజెనె ఆవండె మరి ఇనికెజ్ మన్నె? అక్కెజ్ మిజి దేవుణు బాణిజ్ దొహ్కెజె వెనుక, అక్కెజ్ దొహ్కెజె ఆఉ, అక్కెజ్ మీరు గణస్తి మని లెకెండె పాజిజినిదెర్.

8 ఏలు మీరు ఇనికబా తకు సిల్లెండె మిజి కావాలిస్సికెజ్ విజా మనికిదెర్ అతిదెర్గె! ఏలు మీరు ఆస్తి మనికిదెర్ అతిదెర్గె! మజి డిస్సి సితిదెరె మీరు దేవుణు వెట ఏలుబడి: కినికిదెర్ ఆతిదెర్గె! మవుబా మీ వెట దేవుణు వెట ఏలుబడి: కినికాప్ ఆని లెకెండె మీరు నిజమె మీరు ఆజిమంజినిక ఇహిజ ఎసానొ నెగెడ్ ఇజి నాను ఎసానొ కొరిజిన. 9 మజి అయా లెకెండె సిల్లెద్. జంతుజ వెట విద్దెం కిజి నుడిజి మంజిని పరి ముందాల సాదెజ్ ఇజి సాపుదిజ్ తగితి సిక్స దొహ్కెజె మని పరి లెకెండె దేవుణు మజి అపొస్తరు లోఇ కడెవేరిదికార్ లెకెండె కిత్ మనాన్ ఇజి నజి తోరిజినాద్. లోకమదు మనికార్ విజెరె, మరి దేవుణు దూతెజ్ విజా కణ్సు.

నవ్వండి బేసిని లెక్కా మాపు ఇడః ఆత మనావ్ ఇజి నజీ తోరిజినాన్. 10 మాపు క్రీస్తు వందిజ్ బుద్ది సిలికావ్ గాని మీరు క్రీస్తు లొ ఇ బుద్ది మనికిదెర్గ! మాపు సిరన్ మద్దికావ్ మీరు సత్తు మనికిదెర్గ! మీరు తగమాతికిదెర్గ మపు సిగు లాగ ఆతికావ్! 11 ఏలు యా గడియాయాదుబా బజ ఏప్పిదికావ్. గుడెజ్ తొహ ఆతికావ్. ముటిజాణిజ్ గుడె ఆతికావ్. మండ్రెజ్ ఇల్లుబా సిలికావ్. 12 మా సాంత కికాణిజ్ కన్ణబాడెజి పణి కినికావ్. మజి నయివ్ సీని వరిజ్ మజి నెగండ మనిద్ ఇజి వెప్పినావ్. మజి హిమ్మెజ్ కినివలె ఆక్రెజ్ ఓరిసినికావ్. 13 దూసి ఆనివలె సార్లదాన్ వరిజినావ్. ఏలు యా గడియాయాదుబా మాపు యా లోకమ్దిజ్ కనర లెక్కా మనావ్. విజెరె ఎద్దు పెంటు లెక్కా మనావ్.

14 నాను ప్రేమిసిని నా కొడోర్ ఇజి మిజి సారిసి సరిసి వెప్తి లెక్కానె యా మాటెజ్ రాసిని, గాని మిజి సిగు కిదెజ్ ఇజి ఆవద్. 15 క్రీస్తు వందిజ్ మిజి సూణికార్ పదివెయుజ్ లోకుర్ మహిజ్బా, మిజి అప్పాసిర్ నండొండార్ సిల్లెర్. ఎందనిజ్ ఇహిజి క్రీస్తుయేను వందిజ్ నాను వెప్తి సువార్తదాన్ నాని మిజి కాస్త. 16 అందెజి నజీ పోలిసి యేసుక్రీస్తుజ్ లోజిజి నడిదెజ్ ఇజి మిజి బతిమాల్లిన. 17 దిని వందిజ్ ప్రబు ఎద్దు నమ్మకమాతికాన్ ఆతి, నాను ప్రేమిసిని నా మరిన్ ఆతి తిమోతిజ్ మీ డగ్రు పోక్కిన. విజా బాడ్డిజి విజా దేవుణు నజమ్కాజ్ నాను నెస్సిసి దనిజ్ తగితి లెక్కా క్రీస్తుయేనుజ్ నాను ఎలాగ లోజిజి నడిజిని ఇజి వాండ్రు మిజి ఎత్తు కిబిన్నానె.

18 మీ లొ ఇ సెగొండార్ నాను మీ డగ్రు రెవ ఇజి ఉబె ఆత మనార్. 19 ప్రబు సితం ఇహిజి నాను మీ డగ్రు బేగి వాన. అయావలె ఉబె ఆతిమని వరి మాటెనె ఆవండ, వరిజ్ ఎసా సత్తు మనాద్ ఇజిబా నాను సూణ. 20 ఇనిక ఇహిజి, దేవుణు ఏలుబడిః ఇహిజి వర్గిని మాటెజాణిజ్నె ఆవద్, సత్తుదాన్ మనాద్. 21 మీరు ఇనిక కోరిజినిదెర్? నాను మీ డగ్రు వానివలె మిజి దిదిదెజ్ డుడ్డు అసి వాదెబా, సిల్లిజి ప్రేమ తోరిసిని వన్ని లెక్కా వాదెజ్?

రంకు బూలాలి వన్నిజ్ మీ బాణిజ్ వెల్లి పోక్తు

5 రంకు బూలాలికి మీ లొ ఇ మనాద్ ఇజి నజీ నిజమె కల్లు వాతాద్. మీ లొ ఇ ఒరెన్, వన్ని కొగ్రి అయ్సిజ్ ఇడః ఆతాన్గ. ననిక నమ్మిఇ వరి లొ ఇబా జగ్గిఇక.

2 మరి, యాక మీ నడిమి మంజి మీరు పాజిజినిదెర్! గాని అయాలెక్కా ఆవండ, మీరు ఎసానొ దుకం ఆజి నన్ని పణి కిత్తి వన్నిజ్ మీ నడిమిహన్ వెల్లి పోక్కి మండ్రెజ్, అయాలెక్కా మండ్రెజ్ గదె? 3 నాను ఒడోల్ వందిజ్ మీ బాణిజ్ దూరం మన్ను, గాని ఆత్మదాన్ నాను మీ వెటనె మన్ను. నాను మీ వెట మన్ని లెక్కానె నిన్ని పణి కిత్తి వన్ని ముస్సు తీర్పు తీరస్త మన్ను. 4 మా ప్రబు ఆతి యేను పేరుదాన్ మీరు కూడఃజి వానివలె, మా ప్రబు ఆతి యేసుక్రీస్తు సత్తు మీ నడిమి మంజినాద్. నానుబా మీ వెట మన్ను ఇజి మీరు ఒడిబిదు. 5 అయావలె మీరు యా లెక్కా కిదు. సయ్యానుజ్ లోజిజి మన్ని వరి వెట మండ్రెజ్ ఇజి వన్నిజ్ మీ నడిమిహన్ వెల్లి పోక్తు. అబ్బె వన్ని ఒడోల్ కన్ణమ్దిజ్ ఒవజెవి ఆనాద్లె. అయావలె వాండ్రు పావం ఒప్పుకొడఃజి డిసిసిజి, యేసుప్రబు యా లోకమ్దిజ్ తీర్పు తీరిసిని దినమ్దు వన్ని ఆత్మ తప్ప ఆనాద్లె.

6 మీరు పాజిజినిక బాగ సిల్లెద్. పులాలి దూరు కండెక్ ఆతిజ్బా పులాజ్ సిల్లి దూరుదు కలప్తిజ, దూరు విజా పులాజ్ ఆనాద్ ఇజి మీరు నెసినిదెర్. సెఇకెజ్ మీ నడిమి మహిజి అయాలెక్కానె మన్వదా? 7 అందెజి నిజమె పులాలి దూరు లెక్కా మన్ని వన్నిజ్ మీ నడిమిహన్ దూరం కిదు ఇజి నాను మిజి గటిజి వెప్పిన. అయావలె మీరు పులాజ్ సిల్లి నెగ్గి దూరు లెక్కా మనిదెర్. నిజమె మీరు పులాజ్ సిల్లి కొత్త దూరు నన్నికిదెర్, ఎందనిజ్ ఇహిజి పన్ను వండోయ్దిజ్ సప్పి గొర్రెపిల్ల లెక్కానె యేసుప్రబు మా వందిజ్ పూజ ఆత మనాన్. 8 అందెజి పులాజ్ మన్ని వడాయు దూరుదాన్ పిటం సుర్తి మాటు వండోయ్ కిమాల్. ఇహిజి, ముజాల మహి సెఇ అలవాటుజ్, ముజాల కిజి మహి సెఇ పణిజాణిజ్ మాటు వండోయ్ కిమాల్. నాను వెప్పినిక ఇనిక ఇహిజి, మాటు నిజం మన్నికాల్ ని నమ్మిదెజ్ తగ్గికాల్ ఆజి మంజినాల్. అయాలెక్కా మాటు వండోయ్ కిమాల్. 9 రంకు బూలాలి వరి వెట కూడఃజి మన్మాల్ ఇజి మిజి రాస్తి ఉత్తమ్దు రాస్త మన్ను.

10 యా లోకమ్దు మన్ని రంకు బూలాలి వరివెటనె, లోబం కిని వరివెటనె, డాజి కిని వరివెటనె, బొమ్మెజి మాడిసిని వరివెటనె మీరు ఎసిజ్బా కూడఃదెజ్ ఆవద్ ఇజి దన్నిజ్ అర్థం సిల్లెద్. అయాలెక్కా మండ్రెజ్ ఇహిజి మీరు యా లోకం డిసి సాండ్రెజ్ గదె? 11 నాను మిజి రాస్తి మన్ని దన్నిజ్ అర్థం ఇనిక ఇహిజి, నమ్మితికాన్ ఇజి కూక ఆతికాన్ ఎయెన్బా రంకు బూలాలికాన్ ఆతిజనో, లోబం కినికాన్ ఆతిజనో, బొమ్మెజ్ మాడిసినికాన్ ఆతిజనో, సెఇ మాటెజ్ వర్గినికాన్ ఆతిజనో, కడు ఉణికాన్ ఆతిజనో, ఇల్లు డెయ్జి డాజి కినికాన్ ఆతిజనో, నన్ని వన్ని వెట కూడఃజి మండ్రెజ్ ఆవద్. వన్ని వెట బోజనమ్బా కిదెజ్ ఆవద్.

12 దేవుణు నజమ్దిజ్ వెల్లి మన్ని నమ్మిఇకార్ ఆతి వరి ముస్సు తీర్పు తీరిసినిక, నా పణి ఆవద్. నజమ్దు మన్ని వరి ముస్సు మీరు తీర్పు కిఇదెరా? 13 నజమ్దిజ్ వెల్లి మన్ని వరిజ్ దేవుణునె తీర్పు తీరిసినికాన్. అందెజి, "అయ సెఇ వన్నిజ్ మీ నడిమిహన్ వెల్లి పోక్తు".

నమ్మిత్తి వరి నడిమి గొడఃబెజ్ మహిజ

6 మీ లొ ఇ ఒరెన్ మరి ఒరెన్ వన్ని వెట గొడఃబ మహిజ, దేవుణుదిజ్ సెందితివరి ఎద్దు రెవండ, వాండ్రు ఎందనిజ్ నమ్మిఇ వరి ఎద్దు తీర్పు వందిజ్ సాస్సినాన్? 2 దేవుణుదిజ్ సెందితికార్ యా లోకమ్దిజ్ తీర్పు తీరిసినికాల్ ఇజి మీరు నెస్ఇదెరా? మీరు యా లోకమ్దిజ్ తీర్పు తీరిసినికిదెర్ ఆతిదెర్.

అయ లెక్కా మహివలె మీ లొ ఇ మని గొడఃబెజి వందిజ్ తీర్పు తీరిస్సెజ్ మీరు అట్ఇతిదెరా? 3 మాటు దేవుణు దూతరిజ్ తీర్పు తీరిసినికాల్ ఇజి మీరు నెస్ఇదెరా? ఆహిజి యా లోకమ్దిజ్ సెందితి సజతిజి వందిజ్, మరి తీరిస్సెజ్ అట్టికాల్. 4 అందెజి సని గొడఃబెజ్ మీ నడిమి మహిజ, వనకాజ్ తీర్పు తీరిస్సెజ్ ఎందనిజ్ మీరు సజమ్దు ఇనికబా ఆఇవరి ఎద్దు తీర్పు వందిజ్ బస్సిదెర్? 5 మీరు సిగు ఆదెజ్ ఇజి నె ఇక్క నాను వెప్పిన. దేవుణుదిజ్ నమ్మిత్తి వరి లొ ఇ మని గొడఃబెజ్ తీరిస్సెజ్ అట్టికాన్ ఎయెన్బా మీ నడిమి సిల్లెండ్రా? 6 గాని ఒరెన్ నమ్మిత్తికాన్ మరి ఒరెన్ నమ్మిత్తి వన్ని వెట గొడఃబెజ్ ఆజి కోర్డుదు సాస్సినెదెర్. అక్కాదె ఆవండ తీర్పు వందిజ్ నమ్మిఇ వరి ఎద్దు తగుదిజ్ బనయి కిజినిదెర్.

7 మీ నడిమి ఎయెరిజ్బా ఒరెన్ వెట కోర్డు కిత్తి మని గొడఃబెజ్ మన్నె ఇహిజి మీరు పూర్తి అడిగి అర్తి మనిదెర్. కోర్డు కిని దనిజ్ ఇంక మీ వెట కిత్తి తప్ప బరిసినికాదె నెగెద్. కోర్డు కిని దనిజ్ ఇంక డాజి కిజి ఒతిక డిసినికాదె నెగెద్. 8 గాని మీరు మొసెం కిజినిదెర్, తప్ప కిజినిదెర్. యాక నమ్మిత్తి కూలెజి వెటనె మీరు కిజినిదెర్.

9 సజ పణిజ్ కినికార్ దేవుణు ఏలుబడిదు మండ్రజ్ అల్వర్ ఇజి మీరు నెస్ఇదెరా? మీరు ఒడోబనిబాన్ తవు కిమాట్. రంకు బూలానికార్, బొమ్మొజు మాడిసినికార్, సాని బూలానికార్, మొగవరి వెట కూడ్పి మొగ్గకొడోర్, 10 డొజ కినికార్, లోబం కినికార్, ఎస్తివలెబా కడు ఉణిజి సాని మంజినికార్, దూసలాడిజినికార్, ఇల్లు డెయ్జి డొజ కినికార్, నినికార్ ఎయెర్బా దేవుణు ఏలుబడిదు మండ్రజ్ అక్కు మనికార్ ఆవర్. 11 మీ లొఇ సెగొండార్ యా లెకండెనె మహిదర్. గాని మీ పావమ్కాణిజ్ నొరె ఆజి సుబరం ఆతికిదెర్. మా ప్రబు ఆతి యేసుక్రీస్తు పేరుదాన్ని, మా దేవుణు ఆత్మదాన్ సీతినిజాయిమునికార్ ఆతికిదెర్. మరి ఏలు దేవుణు వందిజ్ కేట ఆతికిదెర్.

రంకు బూలానిక

12 "ఇనిక కిదెజ్బా మజి అక్కు మనాద్, ఇని అడ్డు సిల్లెద్", ఇజి మీరు వెప్పొనిదెర్. గాని విజా పణిదిజ్ వానికెజ్ ఆఉ ఇజి నాను వెప్పొన, "ఇనిక కిదెజ్బా నజి అక్కు మనాద్, ఇని అడ్డు సిల్లెద్". అహిజ్బా నాను కిని దని లొఇ ఇనికబా నజి ఉండ్రె అలవాటు లెకండె మండ్రజ్ నాను సరి సివి. ఎండనిజ్ ఇహిజ్ అయక సిల్లెండ బత్రిదెజ్ ఇజి ఉండ్రె అలవాటుదిజ్ అణజిజి మన్వ. 13 "తిండి పాటదిజ్ సర్ల వందిజ్ని పాట తిండి ఊణి వందిజ్ని తయార్ కిత మనాద్", ఇజి మీ లొఇ సెగొండార్ వెప్పొనిదెర్. గాని వాని కాలమ్దు పాట గాని తిండి గాని అక్కు సిల్లెద్. అందెజె దేవుణు రుండి వనకాజ్ సిల్లెండ కిన్నాన్లె", ఇజి నాను వెప్పొన. ఒడోల్ రంకు బూలాని వందిజ్ ఆవద్ ఇజి నాను గటిజ వెప్పొన. గాని మా ఒడోల్ ప్రబు వందిజ్ పణి కిదెజ్నె. ఒడోల్ వందిజ్ సూణికాన్ ప్రబునె. 14 దేవుణు వాని కాలమ్దు మా ఒడోలుజు సాతి వరిబాణిజ్ వన్ని నత్తుదాన్ నికాన్లె. అయావలె సాతి వరిబాణిజ్ ప్రబుజ్ నిక్తి లెకండె మజిబా నికాన్. 15 మీ ఒడోల్ క్రీస్తు ఒడోల్ ఆతి దేవుణు సజమ్దు మని నమ్మొత్తి పరి వెట కూడితి మనికెజ్ ఇజి మీరు నెస్ఇదెరా? అయాలెకండె మహిజ ఎయెన్బా క్రీస్తు వెట కూడితి మని వన్ని ఒడోల్ ఉండ్రె సాని దనివెట కుడుప్పిజ్ అయక తగ్గాదా? ఆవద్, వాండ్రు ఎసెజ్బా అయక కిదెజ్ ఆవద్. 16 సాని దనివెట కూడినికాన్ దని వెట కూడిజి ఉండ్రె ఒడోల్ ఆతి లెకండె మనాద్, ఇజి మీరు నెస్ఇదెరా?. "వారు రిఎర్ ఉండ్రె ఒడోల్ ఆన మంజినార్", ఇజి దేవుణు మాటదు రాస్త మనాద్. 17 గాని వన్నిజ్ వాండ్రె ప్రబు వెట కుడుప్పె ఆతి మనికాన్, వాండ్రు ఒడిబని దని లొఇ ప్రబు ఆత్మ వెట ఉండ్రె ఆజి మంజినాన్.

18 రంకు బూలాఎండ దని బాణిజ్ దూరం ఉహ్కొని మండ్రు. లోకుర్ కిజిని విజా పావమ్కు ఒడోల్దిజ్ వెల్లి మనికెజ్నె. గాని రంకు బూలానికాన్ వన్ని సాంత ఒడోల్దిజ్ వెల్లెకం కిజినాన్. 19 దేవుణు బాణిజ్ మిజి దొహ్కొత్తి మని మీ లొఇ మని దేవుణు ఆత్మ మంజిని గుడినె మీ ఒడోల్ ఇజి మీరు నెస్ఇదెరా? అందెజె మీరు మీ సాంత ఆఇదెర్. 20 మీరు గొప్ప కరిదాన్ కొలె ఆతి మహికిదెర్. అందెజె మీ ఒడోల్దాన్ దేవుణుదిజ్ గవరం సీదు.

పెండ్రె వందిజ్ వెప్పొక

7 మీరు రాస్తిమని సజతిజ వందిజ్ ఏలు నాను వెప్పొన. పెండ్రె ఆవండ మంజినిక మొగ్గ కొడోడిజ్ నెగెద్. 2 గాని రంకు బూలానిక లాన్ మనిజ్ ఒరెన్ ఒరెన్ వన్నిజ్ సాంత బోదెలి మండ్రెజ్. విజా బోదెకాజ్ పరి సాంత మాసి మండ్రెజ్ వలె. 3 మాసి ఆల్ని వందిజ్ కిదెజ్ మనికెజ్ విజా కిజి మండ్రెజ్ వలె. ఆల్నిబా మాసి వందిజ్ అయాలెకండెనె మండ్రెజ్ వలె. 4 ఆల్ని ఒడోల్ దనిజె సాంతం ఆవండ దని మాసిజ్బా సెందితిక. అయాలెకండెనె మాసి ఒడోల్ వన్నిజె సాంతం ఆవండ వన్ని ఆల్నిజ్బా సెందితిక. 5 పార్లనం కిని వందిజ్ మిజి సమయం దొహ్కొత్తి వందిజ్నె ఆవండ, రిఎర్ కూడిజి ఒవ్ఎండ మీరు కేట కేట మండ్రెజ్ ఆవద్. గాని మీ ఆనిజ అణస్సె ఆజి మండ్రెజ్ అల్వండ మనిజ్, నయ్యాను మిజి తవు కిజిని అర్ప్పెజ్ సరి సిఎండ ఉండ్రెబానె కూడిజి మండ్రు. 6 మిజి యాలెకండె కిదెజ్ ఆనాద్ ఇజి యక నాను వెప్పొన, గాని ఉండ్రె ఆడ్ర లెకండె ఆవద్. 7 విజెరె నాను మని లెకండె పెండ్రె ఆవండ మహిజ బాగ మనాద్ ఇజి ఆన ఆజిని. గాని ఒరెన్ ఒరెన్ వన్నిజ్ దేవుణు బాణిజ్ ఉండ్రె ఉండ్రె వరం దొహ్కొత్త మనాద్. ఒరెన్ వన్నిజ్ యా వరం, మరి ఒరెన్ వన్నిజ్ మరి ఉండ్రె వరం.

8 ఏలు పెండ్రె ఆజ పరి వెటని రాండి బోదెకాజ్ నాను వెప్పొనిక ఇనిక ఇహిజ, నాను మంజిని లెకండె పెండ్రె ఆవండ మంజినికాదె పరిజ్ నెగెద్. 9 గాని పరి ఆనిజ అణస్సె ఆజి మండ్రెజ్ అల్వర్ ఇహిజ వారు పెండ్రె ఆదెజ్ వలె. ఎండనిజ్ ఇహిజ మన్నుదు ఉత్పుత్ ఆజి సిసుదాన్ వెయ్ని లెకండె మనిదనిజ్ ఇంక పెండ్రె ఆనిక నెగెద్.

10 పెండ్రె ఆతి పరిజ్ నాను సీజిని ఆడ్ర, నానె ఆవద్ దేవుణు సీజిని ఆడ్ర ఇనిక ఇహిజ, ఆల్ని, దని మాసిజ్ డిసి సాండ్రెజ్ ఆవద్. 11 అది మాసిజ్ డిసి సాహిజ మరి ఉండ్రె పెండ్రె ఆదెజ్ ఆవద్. మరి పెండ్రె ఆవండ మండ్రెజ్ ఇస్టం సిల్లెద్ ఇహిజ, దని మాసి వెట రాజినం ఆజి సమాదనం ఆజి మండ్రెజ్ వలె. మరి ఒరెన్ మాసి వన్ని ఆల్నిజ్ డిసి సీదెజ్ ఆవద్ ఇజిబా వన్ని ఆడ్ర మనాద్.

12 మహి పరిజ్ నాను వెప్పొనిక ఇనిక ఇహిజ, ప్రబు ఆవన్ నానె, నమ్మొత్తికాన్ ఆతి ఒరెన్ వన్ని ఆల్ని నమ్మొకాద్ ఇహిజ్బా, అది వన్ని వెటనె బత్రినాద్ ఇహిజ వాండ్రు దనిజ్డిసి సీదెజ్ ఆవద్. 13 మరి, ఉండ్రె నమ్మొత్తికాద్ ఆతి బోదెల్దిజ్, మాసి నమ్మొకాన్ ఇహిజ్బా దని వెటనె వాండ్రు బత్కినాన్ ఇహిజ అది వన్నిజ్ డిసి సీదెజ్ ఆవద్. 14 ఎండనిజ్ ఇహిజ నమ్మొకాన్ ఆతి మాసి నమ్మొత్తికాద్ ఆతి వన్ని ఆల్ని వెట దేవుణు వందిజ్ కేట ఆతికాన్ కిబె ఆత మనాన్. అయాలెకండెనె నమ్మొకాత్తికాద్ ఆతి ఆల్ని నమ్మొత్తికాన్ ఆతి దని మాసి వెట దేవుణు వందిజ్ కేట ఆతికాద్ కిబె ఆత మనాద్. యా లెకండె సిల్లెండ మహిజ మీ పాటాద్ పుట్టి కొడోర్, దేవుణుదిజ్ నమ్మొకా పరి కొడోర్ లెకండె మంజినార్, గాని ఏలు దేవుణు వందిజ్ ఆతికారె.

15 గాని ఆల్ని మాసిర్ లొఇ నమ్మొకాన్ ఆతి మాసి గాని నమ్మొకాద్ ఆతి ఆల్ని గాని డిసి సీదెజ్ ఇజి ఆన ఆతిజ ఆహె కిపిర్. అయాలెకండె జగ్గినివలె, నమ్మొకాన్ నమ్మొకా దనిజ్ గాని నమ్మొత్తికాద్ నమ్మొకా వన్నిజ్ గాని కూడిజి మన్ల ఇజి బలవంతం కిదెజ్ ఆవద్. సమాదనమ్దాన్ బత్రిదెజ్ ఇజినె దేవుణు మిజి కూక్త మనాన్. 16 ఓ, బోదెలి నీ మాసిజ్ దేవుణు రక్కిస్సి లెకండె కిదెజ్ అట్టిదొ సిల్లెద్ ఇజి నీను ఎలాగ నెస్సి? ఓ, మొగ్గకొడోర్ నీ ఆల్నిజ్ దేవుణు రక్కిస్సి లెకండె కిదెజ్ అట్టిదొ సిల్లెద్ ఇజి నీను ఎలాగ నెస్సి?

17 ఒరెన్ ఒరెన్ ఎలాగ బత్రిదెజ్ ఇజి దేవుణు ఒవసెప్ప మనాండ్రొ అయాలెకండె మండ్రెజ్ వలె. ఎలాగ మండ్రెజ్ ఇజి దేవుణు కూక్త మనాండ్రొ దనిజ్ తగితి లెకండె వారు మండ్రెజ్ వలె. ఇక్కుదె విజా సజమ్కాజ్ నాను సీతి మని రూలు. 18 ఎయెన్బా దేవుణు వన్నిజ్ కూక్తివలె సునతి కిబె ఆతికాన్ ఇహిజ వాండ్రు సునతి

కిబె ఆతి లెకెండెనె మండ్రెజ్ వలె. అయాక మారిస్తెజ్ నుడెదెజ్ ఆవద్. మరి ఒరెన్ దేవుణు వన్నెజ్ కూక్తి వలె సునతి కిబె ఆఇకాన్ ఇహిజ వాండ్రు సునతి కిబె ఆదెజ్ నుడెదెజ్ ఆవద్. 19 సునతి కిబె ఆతిజ్బా ఇనిక సిల్లెద్. సునతి కిబె ఆఇజ్బా ఇనిక సిల్లెద్. దేవుణు ఆగ్నెజ్ లోజిజి నడిసెనాదె ముకెలమతిక. 20 ఒరెన్ వన్నెజ్ ఎలాగ మహివలె దేవుణు వన్నెజ్ కూక్తి మనాండ్రొ అయలెకెండెనె వాండ్రు మండ్రెజ్ వలె. 21 నీను వెట్టివణి కిజి మహిజ్ కూకె ఆతిజ దని వందిజ్ బాద ఆమ. అబెణిజ్ విడుడల ఆదెజ్ నిజి అక్కు మనాద్ ఇహిజ ఆహె కిల. 22 ఒరెన్ వెట్టివణి కినికాన్ ఆతి మహిజ్ దేవుణు ముస్కు నమకం ఇట్టాన్ ఇహిజ వాండ్రు దేవుణుదిజ్ సెందితికాన్ నీ పావమ్కాజ్ విడుడల ఆతి లెకెండె ఆజినాన్. అయలెకెండెనె అక్కు మనికాన్ దేవుణు ముస్కు నమకం ఇట్టాన్ ఇహిజ వాండ్రు క్రీస్తు వందిజ్ వెట్టివణి కినికాన్ లెకెండె ఆజినాన్. 23 నండొ విలువదాన్ కొల ఆతికార్ మీరు, అందెజె లోకురి బుద్దిదిజ్ వెట్టివణి కినివరి లెకెండె ఆమాట్. 24 నమ్మిత్తికిడెర్ ఆతి మా తంబెరిజాండె, ఒరెన్ ఒరెన్ ఎలాగ మండ్రెజ్ ఇజి దేవుణు ఇట్ట మనాండ్రొ అయలెకెండె మండ్రెజ్ వలె. ఎలాగ మహివలె దేవుణు కూక్తి మనాండ్రొ అయలెకెండెనె దేవుణు వందిజ్ బత్తిదెజ్ వలె. 25 ఏలు విడ్డి అయ్లిక వందిజ్ నజి ప్రబు బాణిజ్ ఇని ఆడ్ర సిల్లెద్. గాని దేవుణు కనికారమ్దాన్ నమ్మిదెజ్ తగ్గికాన్ ఇజి నజి ఒడెబిజిని వందిజ్ నాను ఒడెబినికెజ్ వెహిన. 26 యా లోకమ్దు ఏలుమని కష్టమ్కు నుడెతిజ ఎయెన్బా వాండ్రు మని లెకెండెనె మహిజె నెగెద్ ఇజి నాను ఒడెబిజిని. 27 నీను పెండ్లి ఆతి మనిదా? అహిజ డిసెనీ సీదెజ్ నుడెమా. పెండ్లి ఆవండె మహిజె పెండ్లి ఆదెజ్ నుడెమా. 28 నీను పెండ్లి ఆతిజ పాపం ఆవద్. విడిఅయ్లి పెండ్లి ఆతిజ పాపం ఆవద్. గాని పెండ్లి ఆతి వరిజ్ యా బత్తుదు నండొ కష్టమ్కు మంజినె. అయాకెజ్ మిజి రెండె మండ్రెజ్ ఇజినె నాను కోరిజిన.

29 తంబెరిజాండె, నాను వెహినెక ఇనిక ఇహిజ ఏర్నాటు కిత్తిమని సమయం ఆదెజ్ కాలం కండెన్ మనాద్. ఆల్సిక్ మనికార్ ఏలుదాన్ ఆల్సిక్ సిలివరి లెకెండె బత్తిదెజ్. 30 అడెబనికార్ అడెబజ వరి లెకెండె మండ్రెజ్ వలె, సర్ద ఆనికార్ సర్ద ఆఇకార్ లెకెండె మండ్రెజ్ వలె, కొణికార్ మాపు కొటిక మా వందిజ్ ఇడె: ఆనికాస్ అవ్వి ఇజి మండ్రెజ్ వలె. 31 యా లోకమ్దు మనికెజ్ వాడెబినికార్ వనక వందిజ్ మని ఆనదాన్ మస్కు నిండ్రెజి మండ్రెజ్ ఆవద్. యా లోకం ఏలు మని లెకెండె ఎస్తివలెబా మన్వండె, సిల్లెండె ఆనాద్లె. 32 మీరు విసారిసి మంజిని వరి లెకెండె మండ్రెజ్ ఆవద్ ఇజి నాను కోరిజిన. పెండ్లి ఆఇకాన్ ఎలాగ ప్రబుజ్ సర్ద కిదెజ్ అట్టు ఇజి ప్రబుజ్ సెందితి సజతిజ్ వందిజ్ ఒడెబిజి మంజినాన్. 33 పెండ్లి ఆతికాన్ ఎలాగ ఆల్సిజ్ సర్ద కిదెజ్ అట్టు ఇజి యా లోకమ్దిజ్ సెందితి సజతిజ వందిజ్ ఒడెబిజి మంజినాన్. 34 వాండ్రు రుండి దరోటు లాగ ఆజినాన్. అయలెకెండెనె పెండ్లి ఆఇ బోదెలి గాని ఉండ్రె విడ్డి: అయ్లి గాని దేవుణుదిజ్ సెందితి సజతిజ వందిజ్ ఎత్తు కిజి మంజినాద్. పూర్తి ఆత్మదాన్ పూర్తి ఒడెబిదాన్ దేవుణు వందిజ్ కేట మండ్రెజ్ ఇజి అది ఒడెబిజినాద్. గాని పెండ్లి ఆతికాద్ మాసిజ్ ఎలాగ సర్ద కిదెజ్ అట్టు ఇజి యా లోకమ్దిజ్ సెందితి వన్యా వందిజ్ ఒడెబిజి మంజినాద్. 35 మీరు నెగెండె మండ్రెజ్ ఇజినె నాను వెహినె, మిజి అడ్డు కిదెజ్ ఇజి సిల్లెద్. మీరు ఇతల్ అతాల్ ఆవండె దేవుణు దరోట్ నెగెండె మంజి బత్తికిదెజ్ ఇజి వెహిన. 36 ఎయెన్బా, వన్ని వందిజ్ పేరు కిత్తి అయ్లిదిజ్ పెండ్లి కిండె మంజి, దనిజ్ సిగు కిబిన్నాన్ ఇజి వన్నెజ్ తోరితిజ, దనిజ్ వయ్సు డాట్టినాద్ ఇజి ఒడెబిజి దనివెట పెండ్లి ఆదెజ్ వలె ఇజి ఒడెబిజి వాండ్రు కోరిజిన లెకెండె కిదెజ్ వలె. వాండ్రు కినిక పాపం ఆవద్. వారు పెండ్లి ఆదెజ్ వలె. 37 ఎయెన్బా పెండ్లి ఆదెజ్ ఇని బలవంతం సిల్లెండె, వన్నెజ్ వాండ్రె వన్ని గర్బం గదిన్వండె పూర్తి అణెనె ఆదెజ్ అట్టాన్ ఇజి అయ అయ్లి వెట నాను పెండ్లి ఆవ ఇజి, అయా సజతి వందిజ్ వన్ని మన్సుదు గటిజ తీర్మనం కిత్తాన్ ఇహిజ, వాండ్రు కిని తీర్మనమ్బా నెగ్గికాది.

38 అందెజె వన్నెజ్ పేరు కిత్తి అయ్లిదిజ్ పెండ్లి కినికాన్ నెగ్గిక కిజినాన్. అయలెకెండె పెండ్లి ఆఇకాన్ మరి ఒదె నెగ్గిక కిజినాన్. 39 మాసి బత్తితి మనిదాక ఆల్సి వన్ని వెట మండ్రెజ్ వలె. వాండ్రు సాతిజ దనిజ్ ఇష్టమాతి వన్ని వెట పెండ్లి ఆదెజ్ ఆనాద్ గాని వాండ్రు ప్రబుజ్ సెందితికాన్ ఆజి మండ్రెజ్ వలె. 40 అది రాండిణి లెకెండెనె మహిజ ఒదె సర్దదాన్ మండ్రెజ్ ఆనాద్ ఇజి నాను ఒడెబిజిన, నజిబా దేవుణు ఆత్మ మంజి నాను ఒడెబిని దని లోఇ నజి నడిసెన్నాన్ ఇజి నాను ఒడెబిజిన.

బొమ్మెజ పూజ సితమని బోజనం వందిజ్

8 ఏలు బొమ్మెజ పూజ సిత బోజనం వందిజ్ వెహిన. మాటు విజెటి గెణం మనికాల్ ఇజి నెసినాట్. గాని అయా లెకెండె మని గెణం పాజిస్సినినాద్. గాని మా లిఇ ఒరెన్ వన్నెజ్ మరి ఒరెన్ వెట ప్రేమ మహిజ దేవుణు ముస్కు మని నమకమ్దు పిరిస్తెజ్ అట్టాట్. 2 ఎయెన్బా, నాను ఇనికాద్ నెస్సికాన్ ఇజి ఒడెబిజి, వాండ్రు నెస్సిజ్ మని లెకెండె ఇనికబా నెస్సికాన్ ఆవన్. 3 గాని దేవుణుదిజ్ ప్రేమిని వన్నెజ్ దేవుణుదిజ్ సెందితి వన్ని లెకెండె వాండ్రు సుణాన్. 4 అందెజె బొమ్మెజ పూజ సితకెజ్ తిని వందిజ్ వెహిన. ఉండ్రె బొమ్మె ఇహిజ యా లోకమ్దు ఇనికబా ఆఇక ఇజి మాటు నెసినాట్. మరి దేవుణు ఒరెండ్రె మనాన్ మరి ఒరెన్ దేవుణు సిల్లెన్ ఇజి మాటు నెస్తి మనాట్. 5 దేవుణు ఇజి కూకె ఆనికెజ్ ఇజి నండొ మహిజ్బా, నిజమె ప్రబుని దేవుణు ఇజి కూకె ఆనికెజ్ నండొ మన్నె. ఆగాసమ్దు గాని బూవి ముస్కు గాని దేవుణు ఇజి పేరు కూకె ఆనికెజ్ నండొ మన్నె. 6 గాని మజి ఒరెండ్రె దేవుణు మనాన్, వాండ్రు మా బుట్టు. వన్ని బాణిజె మనికెజ్ విజా కల్లితె. వన్ని వందిజ్ మాటు బత్తిజినాట్. మజి యేసు క్రీస్తు ఒరెండ్రె మా ప్రబు ఆతికాన్. మనికెజ్ విజా వన్ని వెటనె తయార్ ఆతె. వన్ని వెటనె మాటు బత్తినాట్.

7 గాని యాక విజెరె నెస్ఎర్. దేవుణుదిజ్ సమ్మిత్తికార్ సెగొండార్ ఏలుబా బొమ్మెజ నిజమె దేవుణు ఇజి ఒడెబిజినార్. అందెజె వారు నని బోజనం కినివలె, నిజమె ఆక బొమ్మెజ పూజ సితకెజ్ ఇజి ఒడెబిజినార్. యాలెకెండె ఒడెబిజినె వారు ఉణార్. అందెజె వారు నని బోజనం కిత్తార్ ఇహిజ, వారు పాపం కిత్తార్ ఇజి వరి గర్బం గదిసి మంజినాద్. 8 గాని ఉణి బోజనమ్దాన్ మాటు దేవుణుదిజ్ డర్గు ఆదెజ్ అట్వెట్. మాటు ఉణెవండె మహిజ ఇనికాద్ గొప్ప విలువాతిక మజి నస్టం ఆవద్. మాటు ఉణిజ ఇనికాద్ గొప్ప విలువాతిక మజి లావమ్బా మన్వద్.

9 అహిజ ఇనికబా కిదెజ్ నిజి మని అక్కుదాన్, మన్సుదు దయరం సిల్లి వరిజ్ తొరో ఇడ్డి లెకెండె మండ్రెజ్ ఆవద్. 10 ఎండనిజ్ ఇహిజ, యా గెణం మని నీను, బొమ్మెజ మని గుడిదు బోజనం కిజి మంజినిక, మన్సుదు దయరం సిల్లికాన్ ఒరెన్ నుడెతిజ, బొమ్మెజ పూజ సితకెజ్ తిండ్రెజ్ వాండ్రు దయరం తని ఆనాన్. అయలెకెండె కిజి వన్ని గర్బం వన్నెజ్ గదిసి మంజినాద్. 11 ఎండనిజ్ ఇహిజ, యా మన్సుదు దయరం సిల్లి వన్ని వందిజ్బా క్రీస్తు సాత మనాన్. గాని, "నజి

గణం మనాద్", ఇజి తోరె అజిని నీను కిజిని పణిజాణిజ్ నీను వన్నిజ్ పాపం కిబిన్ని, మరి వన్నిజ్ పాడె: కిజిని. 12 యా లెకండ మీరు, గర్బం గదిసిని, దయరం సిల్లి తంబెరిజ పడిఎండ పాపం కిజినిదెర్. ఎందనిజ్ ఇహిజ, నీను కిజిని పణిజ్ నుండె:జి తప్ప ఇజి ఒండె:బినికెజ్, వన్ని గర్బం గదిసినికెజ్ వాండ్రుబా కిజి మంజినాన్. యా లెకండ మీరు క్రీస్తుజ్ పడి:ఇ పాపం కిజినిదెర్. 13 అందెజె నాను ఉణిజిని దనిదటాజ్ నా తంబెరి ఒరెన్ తప్పి సాన్నినాన్ ఇహిజ, నా తంబెరి తప్పి సాన్ఎండ మండ్రెజ్ ఇజి నాను ఎసెజ్బా నన్ని కండ తిన్వ.

అపొస్తుడు ఆతి వన్నిజ్ మన్ని అక్కుజ్

9 నాను అక్కు మనికాన్ అవనా? నాను అపొస్తుడు అవనా? మా ప్రబు ఆతి యేనుజ్ తోవనా? మీరు, ప్రబు వందిజ్ నాను కిత్తి పణిదిజ్ పంట ఆఇదెరా?

2 నాను అపొస్తుడు ఇజి మహికార్ ఒండె:బిఎండ మహిజ్బా, నిజమె మీ వందిజ్ నాను అపొస్తుడునె. నాను ప్రబు వందిజ్ అపొస్తుడు ఇని దనిజ్ రుజాప్ మీరె. 3 నా ముస్సు తీర్పు కిని వరిజ్ ఎద్రు నాను నా వందిజ్ వెప్పినిక యాక. 4 మాపు దేవుణు మాటెజ్ నెన్పిన్తి వరిబాన్ లొసి ఉండెజ్ తిండ్రెజ్ మజి అక్కు సిల్లెదా? 5 మహి అపొస్తురుజ్ లెకండెని, ప్రబు తంబెరిజ ఆతివరి లెకండెని, పేతురు లెకండె నిమ్మిత్తికాద్ ఆతి ఆల్ని వెట బుల్లెయ్ కిదెజ్ మజి అక్కు సిల్లెదా? 6 దేవుణు పణి కిజిని మహివరి లెకండె, మాపు దేవుణు పణి కినివలె నజిని బర్నబెజ్ తిండి వందిజ్ పణి కిఎండ ఉణిజి తిండ్రెజ్ అక్కు మనాద్. 7 వన్ని సాంత డబ్బు కర్పు కిజి ఎయెన్బా సయన్మదు పణి కినాండ్రా? ద్రాక్కు టోట ఉణుసి దని పట్టు తిన్ఇకాన్ ఎయెన్బా మనాండ్రా? గొరెజ పోస కిజి వన్కా పాలు ఉణిఇకాన్ ఎయెన్బా మనాండ్రా? ఎయెర్బా మన్వెర్. 8 యా మాటెజ్ నాను లోకమ్దిజ్ సెందితి వరి వజనె వెహి. దేవుణు సిత్తి రూలుదుబా యా లెకండెనె వెప్పినాద్. 9 "కలమ్దు మటిసిని డాఃను మూతుదు కిమా తోహ్మాబ్", ఇజి మోసె వెట దేవుణు సిత్తి రూలుదు రాస్త మనాద్. దేవుణు డాఃకు వందిజ్ నె విసారిస్తాండ్రా? 10 నిజమె, యాక మా వందిజ్బా వెహిఎతాండ్రా? మా వందిజ్ వెప్పికెజె. ఎందనిజ్ ఇహిజ, పంట పంటితిజ, ఉండెజ్ ఆనాద్ ఇజి ఉండ్రె ఆసదాన్ డూనికాన్ డూజినాన్. మటిసినికాన్బా అయ ఆసదాన్ మటిసినాన్. 11 మీ వందిజ్ ఆత్మదిజ్ సెందితికెజ్ మాపు మీ నడిఃమి వితాప్ ఇహిజ, అందెజె మీ బాణిజ్ మా ఒండె:ల్దిజ్ కావాలిన్తికెజ్ మాపు లొసి ఆతిజ ఆక పెరి సజతినా? 12 మీ బాణిజ్ సాయం లొసి ఆదెజ్ మహి వరిజ్ అతికారం మనాద్ ఇహిజ, మజి వరిజ్ ఇంక ఒద్దె అక్కు సిల్లెదా? గాని మాపు యా అతికారమ్దిజ్ వాడె:దెజ్ సిల్లెద్. అక్కాదె అఎండ క్రీస్తు సువార్తదిజ్ ఇని అడ్డుబా రెండ మండ్రెజ్ ఇజి విజా వన్కాజ్ బరిస్తాప్. 13 దేవుణు గుడిఃదు పణి కిజిని వరిజ్ దేవుణు గుడిఃదాన్ బోజనం దోహ్కాద్. పూజ సీని మాల్లి పీటదు పణి కిజిని వరిజ్ పూజ సిత్తి వన్కా లొఇహాన్ వంతు మనాద్ ఇజి మీరు నెన్ఇదెరా? 14 అయా లెకండెనె సువార్త వెప్పిని వరిజ్ బత్కుదిజ్ కావాలిన్తికెజ్ సువార్తదానె దోహ్కెకెజ్ ఇజి ప్రబు ఆద్ర సిత్తా మనాన్.

15 గాని నాను ఇహిజ యా అతికారం లొఇ ఇనికబా వాడె:వత. మీరు యా లెకండె నజి కినిదెర్లె ఇని ఆసదాన్ ఇక రాన్వత. నాను పోగ్డె: ఆజి వెప్పి యా మాటెజ్ ఎయెన్బా ఇని అద్రం సిల్లెదె కిని దనిజ్ ఇంక నాను సాటిజానె నెగెద్. 16 అహిజ, నాను సువార్త సాటిసిని ఇజి పోగ్డె: ఆదెజ్ నజి అక్కు సిల్లెద్. ఎందనిజ్ ఇహిజ సువార్త సాటిన్తిజ్ ఇజి ఉండ్రె బలవంతుం నా లొఇ మనాద్. సువార్త సాటిన్తిఎండ మహిజ నజి బాద. 17 నా సాంత ఇస్టమ్దాన్ నాను సువార్త సాటిన్తిజ నజి జీతం దోహ్కాద్. నా సాంత ఇస్టమ్దాన్ అఎండ కిత్తిజ, నాను కిదెజ్ ఇజి నజి ఒప్పజెవి ఆతి పణి కిజిని ఇజి ఆజినాద్. 18 అహిజ నజి దోహ్కెక్కి జీతం ఇనిక? సువార్త సాటిసినివలె, నాను సువార్త సాటిసిని వరిజ్ మని అతికారమ్దాన్ ఇనికబా నా వందిజ్ గణస్తెజ్ నుండె:ఎండ, సెడ్డినె కిదెజ్ వలె. అక్కాదె నజి దోహ్కెక్కి ఇనాయం.

19 నాను ఎయెర్బా అడిఃగి మనికాన్ అఎండ విజా దనిజ్ అక్కు మనికాన్. గాని, నజి అట్టి ససాండారిజ్ దేవుణు దరిజ్ కలప్తెజ్ ఇజి నానె నజి విజెరె వందిజ్ వెట్టిపణి కిని వన్ని లెకండె కిజె ఆత. 20 యూదురిజ్ దేవుణు దరిజ్ కలప్తెజ్ ఇజి నాను వరి వందిజ్ యూదురు లోకు లెకండె ఆత. నాను మోసె రాన్తి రూలుజ అడిఃగి మన్ఇకాన్ ఆతిజ్బా మోసె రాన్తి రూలుజ్ లొజిని వరిజ్ దేవుణు దరిజ్ కలప్తెజ్ ఇజి వరివందిజ్ మోసె రాన్తి రూలుజ్ లొజితి వన్ని లెకండె ఆత మన. 21 దేవుణు మోసె సితి రూలుజ్ లొజిజె వరిజ్ దేవుణు దరోట్ కుడుఃప్పెజ్ ఇజి నాను వరి లెకండె ఆత. దేవుణు మోసె వెట సితి రూలుజ్ నాను లొజివి ఇజి నాను వెహి, గాని క్రీస్తు సిత్తి రూలుజ్ లొజిజె మంజిన. 22 సత్తు సితి వరిజ్ దేవుణు దరిజ్ కుడుఃప్పెజ్ ఇజి నాను సత్తు సితి వన్ని లెకండె ఆత. ఎలాగ ఆతిజ్బా సెగొండారిజ్ దేవుణు రక్సిన్తి లెకండె కిదెజ్ ఇజి నాను విజెరె వందిజ్ ననివరి లెకండె ఆత మన. 23 ఎందనిజ్ ఇహిజ దేవుణు బాణిజ్ వాజిని దినమ్క వందిజ్ సువార్త సాటిసిని నజిబా వంతు మండ్రెజ్ ఇజి యాకెజ్ విజా నాను సువార్త వందిజ్ కిజిన. 24 వందెం పోటిదు ఉహ్కెక్కి వందెమ్దు ఉహ్కెక్కినార్ విజెరె ఉహ్కెక్కినార్ గాని ఒరెన్ వన్నిజె ఇనాయం దోహ్కాద్ ఇజి మీరు నెన్ఇదెరా? అందెజె ఇనాయం దోహ్కెక్కి ఇజిని మీరు పందెమ్దు ఉహ్కెక్కు. 25 వందెమ్దు పోటి అనికార్ విజెరె దనివందిజ్ ఒజ ఆజి తయార్ ఆజినార్. సాణెం మంజి పాడె: ఆజి సాన్సిని టోపి దోహ్కెక్కి వందిజ్ యాకెజ్ విజా కిజినార్. గాని మజి ఎలాకాలం మంజిని టోపినె దోహ్కాద్. 26 అందెజె నాను గురి నుండె:ఎండ ఉహ్కెక్కికాన్ అ. నాను ముటి అసి గాలిదిజ్ డె:యెని నని వన్ని లెకండె అ. 27 గాని మహి వరిజ్ సువార్త సాటిసి వెనుక, ఇనాయం దోహ్కెక్కి వన్ని లెకండె నజి నానె కిఎండ మండ్రెజ్ ఇజి నా ఒండె:ల్దిజ్ నెగెండ అడ్డిఃజి, నజి వెట్టిపణి కిని వన్ని లెకండె కిజిన.

ఇస్రాయేలు లోకురిజ్ నుండె:జి నెస్టెజ్ మన్నికెజ్.

10 తంబెరిజాండె, మా అని గొగొర్ ఆతి యూదురు విజెరె మోసె వెట మహివలె ఇనిక జగ్గిత మనాద్ మీరు నెగెండ నెసి మండ్రెజ్ ఇజి నాను ఆస ఆజిన. దేవుణు వరివెట మనాన్ ఇజి ఉండ్రె గుర్తు లెకండె దేవుణు వరి ముస్సు ఇడ్డి మని మొసాప్ అడిఃగి వారు నడిఃత మహార్. ఎరాని సమ్దారం ఇని సమ్దారం నడిఃమిహాన్ వారు విజెరె వప్పి బూమిదాన్ అతాహ్ వడక నడిఃత సాహార్. 2 వారు విజెరె మోసె వెట మొసాప్ అడిఃగి మంజి సమ్దారం నడిఃమిహాన్ వప్పి బూమిదాన్ నడిఃజి మహిజ్, మోసె వెట బాష్టిసం లాగి ఆతి లెకండె అతార్. ఎందనిజ్ ఇహిజ వారు మోసెజ్ వరిజ్ నెయ్యి లెకండె వారు ఒప్పుకోటార్. 3 విజెరె దేవుణు సితి ఉండ్రె బోజనమ్నె ఉటార్. 4 వారు విజెరె సట్టుదాన్ దేవుణు రపిన్తి ఉండ్రె ఏరునె ఉటార్. అయ సటు క్రీస్తుజ్ గుర్తు లెకండెనె మనాద్. ఎందనిజ్ ఇహిజ వాండ్రు ఇనికబా తకు సిల్లెండ వరిజ్ కావాలిన్తికెజ్ విజా సీజి నిజమె వరి వెట నడిఃజి మహాన్. 5 అయా లెకండె మహిజ్బా, వరి లొఇ నండోడారిజ్ దేవుణు ఇస్టం అఎండ ఆతాన్. అందెజె ఎయెర్బా మన్ఇ అయా అడిఃవిదు వరిజ్ సత్తు విసీర్తాన్. 6 ఇక్కెజ్ విజా మాటు నెస్టెజ్ ఇజి మజి ఉండ్రె గుర్తు లెకండె

వరిజ్ జగ్గితె మన్నె. వారు సెఇ వనకాజ్ వందిజ్ ఆన ఆతి లెకెండ మాపు ఆన అవిండ జాగర్త మండ్రెజ్ ఇజి. 7 వరి లోఇ సెగొండార్ లెకెండ బొమ్మెజ మాడిసినికార్ ఆమాట్. "లోకుర్ తిండ్రెజ్ ఉండెజ్ బస్తార్, కర్దిదెజ్ నీజితార్", ఇజి వరి వందిజ్ దేవుణు మాటుదు రాస్త మనాద్. 8 వరి లోఇ సెగొండార్ కిత్తి మహి లెకెండ మాటు రంకు బూలమాట్. ఉండ్రె రోజుదు ననికార్ ఇరువయ్ముండ్రె వెయుజ్ లోకుర్ సాతార్. 9 వరి లోఇ సెగొండార్ కిత్తి మహి లెకెండ మాటు ప్రబుజ్ పరిన కిడెజ్ ఆవద్. ననికార్ సరాస్ వెట సాతార్. 10 వరి లోఇ సెగొండార్ దేవుణు ముస్సు సణిజితార్. వారు నాసనం కినికాన్ ఆతి దేవుణు దూత వెట సాతార్. మాటు దేవుణు ముస్సు సణిజితార్ ఆవద్.

11 మహివరిజ్ తోరదెజ్ ఉండ్రె గుర్తు లెకెండ యాకెజ్ వరిజ్ జగ్గితె. యా తరమది ఆకర్ దినమదు బత్తిజిని మజి బుద్ది వాడెజ్ ఇజి గెవతం కిత్తి మని లెకెండ రాసి ఇడె ఆత మనాద్. 12 అందెజె ఎయెన్బా దేవుణు ముస్సు మని నమకమదు నాను గటిజ నిల్చిన ఇజి ఒడెబితిజ, వాండ్రు వెటనె పావమదు అర్విండ జాగర్త మండ్రెజ్ వలె. 13 మాములుక లోకురిజ్ వాజిని పరికెజ్ ఆవిండ మరి పెరికెజ్ ఇనికెజ్బా మిజి రవుతె. దేవుణు నమ్మకమాతికాన్. అందెజె ఓరిస్తెజ్ అట్టి దనిజ్ ఇంక పెరిక ఇనికబా మిజి వాడెజ్ వాండ్రు ఒవ్విన్. అక్కాదె ఆవిండ వాజిని పరికెదిజ్ నిల్చి మండ్రెజ్ పరికె వెట త్తె ఆదెజ్ ఉండ్రె సరిబా తోరిస్తాన్లె.

దెయమక వండాయని ప్రబు ఏర్పాటు కిత్తి బోజనం

14 అందెజె నజి ఇష్టమాతి తంబెరిజాండె, బొమ్మెజ మాడిసిని బాణిజ్ దూరం ఉమాక్కి మండ్రు. 15 మీరు నెగ్గి బుద్ది మనికిదెర్ ఇజి నాను వగ్గిజిన. నాను వెప్పిని సజతిజ మీర అర్దం కిజి సుడెదు. 16 మాటు విజెటె కూడెజి వానివలె, మాటు దేవుణు ఏర్పాటు కిత్తి బోజనం ఉణువలె, దేవుణుదిజ్ వందనమకు వెప్పి గినాదిక ఉణిజి, మాటు ఉండ్రె రొటె రుక్కి తినివలె క్రీస్తు నలదాన్ మజి వాజిని నెగ్గి వన్కాజ్ కూడెజి మంజినికాట్ ఆజినాట్. 17 రొటె ఉండ్రెనె, అయ ఉండ్రె రొటెదనె మాటు విజెటె కూడెజి తింజినాట్. అందెజె నండొండార్ ఆతి మాటు ఉండ్రె ఒడెల్ ఆత మనాద్. 18 ఇస్రాయేలు లోకురిజ్ సుడెదు, దేవుణుదిజ్ సంద సుర్ని బాడ్డిదు సంద సీని వన్కాజ్ తినికార్, దనివెట కూడెజి మంజినికార్ ఆవరా? 19 అందెజె బొమ్మెజ పూజ సీతి వనకాజ్ లోఇ ఇనికబా మనాద్ ఇజినో, బొమ్మెజ లోఇ ఇనికబా మనాద్ ఇజినో నాను వెప్పినానా? 20 సిల్లెద్. గాని దేవుణు లోకుర్ ఆఇకార్ పూజెజ్ సీనివలె దేవుణుదిజ్ పూజ సీనినార్ ఇజి వారు ఒడెబిజినార్. గాని నిజమె వారు దెయమకాజ్నె పూజ సీజినార్. అందెజె మీరు దెయమక వెట కూడెజి మంజినిక నజి ఇష్టం సిల్లెద్. 21 మీరు ప్రబు గినాదాన్ ఉణిజి మరి దెయమక గినదాన్బా ఉండెజ్ అట్ఇదెర్. ప్రబు ఏర్పాటు కిత్తి బోజమమదుని దెయమక బోజనమదుబా ఒర్నె కూడెజి మండ్రెజ్ అట్ఇదెర్. 22 దేవుణుదిజ్ సెందితి గవరం తగ్గి లెకెండె వన్నెజ్ సీదెజ్ వలె. అయా లెకెండె కివిండ ప్రబు కోపం రేప్పిస్తెజ్ మాటు పణి కిజినాటా? మాటు వన్నెజ్ ఇంక సత్తు మనికాటా? సమ్మిత్తి వన్నెజ్ మని అక్కుజ్ 23 "విజా వన్కా వందిజ్ నజి అక్కు మనాద్", గాని విజా పణిదిజ్ వానికెజ్ ఆఉ. "విజా వనక వందిజ్ నజి అక్కు మనాద్", గాని విజా నెగెండె పిరిప్పిజెజ్ ఆఉ. 24 ఎయెన్బా నజి నానె నెగెండె మండ్రెజ్ ఇజి తొవిండ మహికార్బా నెగెండె మండ్రెజ్ ఇజి సుడెదెజ్వలె.

25 మీ గర్బం మిజి గదిన్విండ మహిజ సతాదు పార్ని ఇని కండబా తిండ్రు. 26 ఎందనిజ్ ఇహిజ, "యా బూమి ప్రబుదినె, దని ముస్సు మనికెజ్ విజా వన్నివినె", ఇజి దేవుణు మాటుదు రాస్త మనాద్. 27 ఒరెన్ సమ్మిఇకాన్ మిజి విందదిజ్ కూక్కి తనివలె, మిజి ఆన మహిజ సాండ్రు. గాని గర్బం గదిన్విండ, మి ఎర్దు ఇడ్డికెజ్ ఇనికబా వెన్బావిండ తిండ్రు. 28 గాని ఎయెన్బా, "యాక బొమ్మెజ పూజ సీతి దనిబాణిక", ఇజి వెప్పిజ, వెప్పి వన్ని వందిజ్నె మీ గర్బం గదినిని వందిజ్ అక తిన్కాట్. 29 గర్బం గదినిని వందిజ్ ఇజి వెప్పి వలె అక్కు నీది ఆవద్, వెప్పివన్ని వందిజ్నె వెప్పిన. విజా వన్కా వందిజ్ మజి మని అక్కుదిజ్ మరి ఒరెన్ వన్ని గర్బమదు మని ఆలోననమదాన్ ఎందనిజ్ మాపు తీర్పు కిబె ఆదెజ్? 30 నాను అయా బోజనం వందిజ్ దేవుణుదిజ్ వందనమకు వెప్పి ఉటిజ, దేవుణుదిజ్ వందనమకు వెప్పి ఉటి బోజనం వందిజ్ ఎందనిజ్ నాను దూసి ఆదెజ్ వలె.

31 అందెజె మీరు ఉటిజ్బా, తిహిజ్బా, ఇనిక కిత్తిజ్బా విజా దేవుణుదిజ్ గొప్ప పేరు వాని లెకెండెనె కిదు. 32 యూదురిజ్ గాని, యూదురు ఆఇవ వరిజ్ గాని, దేవుణు సజమది వరిజ్ గాని తొరొడ్డి లెకెండె ఇనికబా కివిండ మండ్రు. 33 నండొండార్జె దేవుణు రక్కిస్తెజ్ ఇజి, నాను నజి నానె నెగెండె మండ్రెజ్ ఇజి తొవి. గాని మహికార్బా నెగెన్ మండ్రెజ్ ఇజి విజా వన్కా లోఇ విజెరిజ్ సర్ద కిబిన్చి లెకెండె నాను మంజిన. మీరుబా నాను కిజిని లెకెండె కిజి మండ్రు.

దేవుణుదిజ్ పాగిడిజి మాడిస్సిక

11 నాను క్రీస్తుజ్ పాలిసి నడిసిని లెకెండె మీరు నజి పాలిసి నడిదు. 2 నాను మిజి నెన్విన్చి బోదదిజ్ డిన్విండ లోజిజి నడిజినిదెర్ ఇజి, మరి విజా సజతిజ వందిజ్ నజి ఎత్తు కిజిని వందిజ్ నాను మిజి పాగిడిజిన. 3 ఎలు మీరు ఇక్కెజ్ నిజం నెస్తెజ్ ఇజి కోరిజిన. ఒరెన్ వన్నెజ్ బుర్ క్రీస్తు, ఉండ్రె బోదెలిదిజ్ బుర్ మొగకొడె. క్రీస్తుజ్ బుర్ దేవుణు ఇజి మీరు నెని మండ్రెజ్. 4 ఎమేణి మొగకొడెబా పార్దనం కినివలెనో, దేవుణు ప్రవక్త లెకెండె వర్గిని వలెనో వన్ని బురాదు టుకుర్ ఇడ్డి మహిజ వాండ్రు వన్ని నెయ్యి క్రీస్తుజ్ గవరం సాన్నిస్తాన్. 5 మరి ఎమేణి బోదెల్బా పార్దనం కనివలెనో, దేవుణు ప్రవక్త లెకెండె వెప్పివలెనో బురాదు టుకుర్ ఇడెవిండ మహివలె అది దని బుర్ బోడి: కిబె ఆతి లెకెండె సిగు లాగె ఆజినాద్. 6 ఉండ్రె బోదెలి బురాదు టుకుర్ ఇడెవిండ మహిజ అది దని బుర్ది కొప్ప కత్తిస్తెజ్ వలె. కొప్ప కత్తిస్తెజ్నో బోడి బుర్ ఆదెజ్నో సిగు ఆతిజ అది బురాదు టుకుర్ ఇడెదెజ్వలె. 7 మొగకొడె: బురాదు టుకుర్ ఇడెదెజ్ అక్కర్ సిల్లెద్. ఎందనిజ్ ఇహిజ దేవుణు, వన్ని గవరం తొరిస్తెజ్ ఇజి మొగవన్నెజ్ వన్ని మూర్తి లెకెండె తయార్ కిత మనాన్. గాని బోదెలి బురాదు టుకుర్ ఇడెదెజ్ వలె. ఎందనిజ్ ఇహిజ బోదెలి దని మానిజ్ గవరం తొరిసినాద్. 8 ఎందనిజ్ ఇహిజ బోదెలి మొగకొడె: బాణిజ్ తయార్ కిబె ఆత మనాద్, గాని మొగకొడె: బోదెలి బాణిజ్ తయార్ కిబె ఆవతాన్. 9 అక్కాదె ఆవిండ, దేవుణు బోదెలి వందిజ్ మొగకొడె:దిజ్ తయార్ కివితాన్, గాని మొగకొడె: వందిజ్నె బోదెలిదిజ్ తయార్ కిత్తాన్. 10 అందెజె యా సజతి వందిజ్నె దేవుణు దూతార్ వందిజ్ అతికారమదిజ్ అడిగి మని దనిజ్ గుర్తు లెకెండె బోదెలి బురాదు టుకుర్ ఇడెదెజ్ వలె.

11 గాని ప్రబు వెట కూడి:తి మని బత్తుదు బోదెలి మొగకొడె: వెట సమందం సిల్లెద్ మన్వద్. మొగకొడె: బోదెలి వెట సమందం సిల్లెద్ మన్వద్. 12 మొగకొడె: బాణిజ్ బోదెలి వాతి లెకెండెనె బోదెలి బాణిజ్ మొగకొడె: పుట్టినాన్. గాని విజా దేవుణు బాణిజ్నె వాజినె. 13 ఉండ్రె బోదెలి బురాదు టుకుర్ ఇడెవిండ దేవుణుదిజ్ పార్దనం కిడెజ్ తగ్గాదా? మీర ఒడిబిదు. 14 మొగ్గ కొడె: వన్ని బుర్ది కొప్ప పిరిప్పి మహిజ అక్క వన్నెజ్ సిగు ఇజి ఎయెర్బా వెవ్విండ

మిజి మీరె నెస్సిదెర్ గదె. ¹⁵ గాని ఉండ్రీ బోదెలిదిజ్ బుర్రాది కొప్పు పిరితి మహిజ అక్క దనిజ్ ఉండ్రీ పేరు మని లెకెండెనె, ఉండ్రీ పాత సెంగు లెకెండెనె. ¹⁶ దిన్ని వందిజ్ ఎయెన్బా గొడబ రేప్పిజ ఇక్కాదె ఆవండ మా లొఇ వేరె అలవాటు ఇనికబా సిల్లెద్. దేవుణు సజమ్దుబా సిల్లెద్.

ప్రబు ఏర్పాటు కిత్తి బోజనం వందిజ్.

¹⁷ మరి ఏలు నాను వెప్పిని మాటదు మీరు నెగ్గికార్ ఇజి నాను మిజి పాగ్డిఃఏ. ఇనిక ఇహిజ మీరు నెగ్గిదని వందిజ్నె కూడఃజి వాజినిదెర్ గాని నెగ్గి దన్నుజ్ ఇంక అక్క సెఇక కిజినాద్. ¹⁸ మొదొహి సజతి ఇనిక ఇహిజ దేవుణు సజం లెకెండ మీరు కూడఃజి వానివలె మీ లొఇ గుంపుజ్ మన్నె ఇజి నాను వెహమన. యాక కండెక్ నిజమ్నె ఇజి నాను నమ్మిజిన.

¹⁹ దేవుణు ఎద్రు నెగ్గికార్ ఎయెర్ ఇజి తోరె ఆదెజ్ మీ లొఇ బేదమ్కు తవ్వండ మంజినె. ²⁰ మీరు విజిదెరె కూడఃజి వానివలె మీరు ఉణిక ప్రబు ఏర్పాటు కిత్తి బోజనం ఆవద్. ²¹ ఎందనిజ్ ఇహిజ, బోజనం కినివలె ఎయెర్ వందిజ్బా కావ్కివండ ఒరెన్ ఒరెన్ ముజాల బోజనం కిజినాన్. ఒరెన్ బజ సానాన్ మరి ఒరెన్ సాసి మంజినాన్. ²² ఆహి ఉండెజ్ తిండ్రెజ్ మిజి ఇల్కు సిలనా? మరి దేవుణు సజమ్దిజ్ ఇజిరి కణక సుడఃజి ఇనిక సిల్లి వరిజ్ మీరు సిగు కిజినిదెరా? నాను మీ వెట ఇనిక వెహజ్? దిన్ని వందిజ్ నాను మిజి పాగ్డిఃదెజ్నా? కసితం నాను పాగ్డిఃఏ.

²³⁻²⁴ ప్రబు బాణిజ్ నజి దొహిక్తి నాను మిజి ఒపజెప్పిక ఇనిక ఇహిజ, ప్రబువాతి యేసు వాండ్రు ఒపజెపె ఆతి పాదొయ్, ఉండ్రీ రొటె పెర్లి దేవుణుదిజ్ వందనమ్కు వెప్పి దనిజ్ ముక్కెజ్ కిజి, "ఇక్క మీ వందిజ్ సీజిని నా ఒడొల్. నజి ఎత్తు కిజి యా లెకెండ కిజి మండ్రు", ఇజి వెహజ్. ²⁵ అయా లెకెండెనె బోజనం కిత్తి వెనుక వాండ్రు ద్రాసకాలు మని గిన్ను పెర్లి, "యా గిన్ను నా నలదాన్ కిజిని కొత్త ఒవుమానం, మీరు యా గిన్నుదిక ఉణి ఎస్తివలెబా నజి ఎత్తు కిజి యా లెకెండ కిజి మండ్రు", ఇజి వెహజ్. ²⁶ అందెజె మీరు యా రొట్టె తింజి యా గినాది ద్రాసకాలు ఉణి ఎస్తివలెబా ప్రబు మరీజి వానిదాక వన్ని సావుదిజ్ సాటిసినిదెర్.

²⁷ అందెజె ఎయెన్బా తగ్గికాన్ ఆవండ ప్రబు ఏర్పాటు కిత్తి బోజనమ్దు రొట్టె తింజి గినాదిక ఉణిబె, వాండ్రు ప్రబు ఒడొల్దిజ్ వన్ని నలదిజ్ పడిఃఎండ పాపం కినికాన్ ఆజినాన్. ²⁸ అందెజె రొట్టెని గినాదిక ఉణి ముజాల్ ఒరెన్ ఒరెన్ వన్నిజ్ వాండ్రె నాను తగ్గికాండ్రా ఇజి సుడః ఆదెజ్ వలె. ²⁹ గాని ఎయెన్బా యాక ప్రబు ఒడొల్ ఇజి నిజం నెస్ఎండ ఉణి తినికాన్ వన్ని ముస్సు. వాండ్రె సిక్కు తపె ఆని వందిజ్ ఉణిజి తింజినాన్. ³⁰ అందెజె మీ లొఇ నండొండార్ నత్తు సిల్లికార్ని జబుజ్ మనికార్ ఆతార్. నండొండార్ సాత సాహార్. ³¹ గాని మిజి మాటె నెగెన్సుడః ఆతాల్ ఇహిజ దేవుణు తీర్పుదు రెండె తప్పె ఆతాట్మరి. ³² మాటు ప్రబు బాణిజ్ తీర్పు తీర్పె ఆతాట్ ఇహిజ, యా లోకమ్ది వరిజ్ సీని సిక్పాదు రెండె ప్రబు మిజి బుద్ది వెప్పి సిక్పాదాన్ దిదిజినాన్.

³³ అందెజె నా తంబెరిజాండె, మీరు కూడఃజి వాజి బోజనం కినివలె మహివరి వందిజ్ కావ్ కిదు. ³⁴ మీరు కూడఃజి వాజినిక సిక్కుదిజ్ గురి ఆవండ మండ్రెజ్ ఇజి ఎయెరిజ్బా బజ కట్టిజె వాండ్రు వన్ని ఇండ్రెనె బోజనం కిదెజ్వలె. నాను వానివలె మరి మని సజతిజె వందిజ్ వెహలె.

దేవుణు ఆత్మ సీని వరమ్కు.

12 తంబెరిజాండె, దేవుణు ఆత్మ సీజిని వరమ్కాజ్ వందిజ్ మీరు నెగెండ నెసి మండ్రెజ్ ఇజి నాను కోరిజిన. ² దేవుణుదిజ్ నమ్మిఎండ మహివలె, ఇనికాదొ ఉండ్రీ సత్తుదాన్ ఎయెండ్రొ మిజి నడిఃపిస్తి మహి లెకెండ మీరు సాన్ని వర్గిఇ బొమ్మెజు మాడిఃసి మహిదెర్ ఇజి మీరు నెస్సిదెర్. ³ అందెజె, నాను మిజి వెప్పినిక ఇనిక ఇహిజ, దేవుణు ఆత్మదాన్ వర్గిజినికాన్ ఎయెన్బా, "యేసు సయెప్ పాందితికాన్", ఇజి వెహజ్నొ, దేవుణు ఆత్మదాన్ ఆవండ "యేసు, ప్రబు ఆత మనాన్", ఇజి వెహజ్నొ అల్ఎన్.

⁴ దేవుణు ఆత్మ సీజిని వరమ్కు నండొ రకమ్కు మన్నె. గాని అయా ఉండ్రె దేవుణు ఆత్మనె విజా వరమ్కు సీజినాన్. ⁵ మరి దేవుణు వందిజ్ కిదెజ్ అట్టి పణిజ్ నండొ రకమ్కు మన్నె, గాని ఒరెండ్రె ప్రబు వందిజ్ మాటు విజెటె పణి కిజినాల్. ⁶ జర్గిని సజతిజ్ నండొ రకమ్దికెజ్ మన్నె. గాని విజా వన్నా లొఇ, మరి విజెరె లొఇ పణి కినికాన్ ఒరెండ్రె దేవుణునె. ⁷ విజెరిజ్ పణిదిజ్ వాని వందిజ్ ఇజి ఒరెన్ ఒరెన్ వన్ని వెట దేవుణు ఆత్మ కిజిని పణిజ్ తోరె ఆజినె. ⁸ ఎలాగ ఇహిజ, ఒరెన్ వన్నిజ్ దేవుణు ఆత్మదాన్ బుద్ది మని మాటెజ్ వెహజ్ వరం సీజినాన్. మరి ఒరెన్ వన్నిజ్ గెణం మని మాటెజ్ వర్గిదెజ్ అయా దేవుణు ఆత్మనె వరం సీజినాన్.

⁹ మరి ఒరెన్ వన్నిజ్ అయా ఆత్మనె దేవుణు ముస్సు నమకం సీజినాన్. మరి ఒరెన్ వన్నిజ్ అయా దేవుణు ఆత్మనె జబుజాణి వరిజ్ నెగెండ కిదెజ్ వరం సీజినాన్.

¹⁰ మరి ఒరెన్ వన్నిజ్ బమ్మాతి పణిజ్ సత్తుని, మరి ఒరెన్ వన్నిజ్ దేవుణు బాణిజ్ వాజిని మాటెజ్ వన్ని ప్రవక్త లెకెండ వెహజ్, మరి ఒరెన్ వన్నిజ్ అత్తెజ్ ఎలాగ మర్తికెజ్ ఇజి నెస్సెజ్, మరి ఒరెన్ వన్నిజ్ ఆఇ ఆఇ బాసిజ్ వర్గిదెజ్, మరి ఒరెన్ వన్నిజ్ బాసిజె అర్దం కిజి నెస్సెజ్ దేవుణు ఆత్మ వరమ్కు సీజినాన్. ¹¹ అయ ఉండ్రె దేవుణు ఆత్మనె వన్నిజ్ ఇష్టమాతి వజ ఒరెన్ ఒరెన్ వన్నిజ్ వరమ్కు సీబాజి సీజి యా పణిజ్ విజా కిజినాన్.

ఉండ్రె ఒడొల్ని నండొ బాగమ్కు.

¹² ఒడొల్ ఉండ్రెనె, గాని నండొ బాగమ్కు కూడఃజి తయార్ ఆత మనాద్. నండొ బాగమ్కు కూడిఃతికాదె గాని అవి కూడఃజి ఉండ్రె ఒడొల్ ఆతి లెకెండెనె క్షీఘు మనాన్. ¹³ ఎలాగ ఇహిజ, యూదురు ఆతిజ్బా, యూదురు ఆఇకార్ ఆతిజ్బా, వెటి పణి కినికాన్ ఆతిజ్బా, అక్క మనికాన్ ఆతిజ్బా మాటు విజెటె ఉండ్రె ఒడొల్దు ఉండ్రె ఆత్మదానె బాప్తినం లాగె ఆతాట్. అయ ఉండ్రె దేవుణు ఆత్మదానె మా మన్నుజె దేవుణు మిజి సిత మనాన్. ¹⁴ ఒడొల్ ఇహిజ నండొ బాగమ్కాణిజ్ తయార్ ఆతిక. ఉండ్రె బాగమ్దాన్ తయార్ ఆతిక అవద్. ¹⁵ అందెజె, "నాను కియు ఆఎ, అందెజె నాను ఒడొల్దు మనిక ఆఎ", ఇజి పాదం వెహజె, అక్క ఒడొల్దు మంజినిక ఆవండ ఆజినాదా? ¹⁶ మరి, "నాను కణక ఆఎ, అందెజె నాను ఒడొల్దు మనిక ఆఎ", ఇజి గిబ్బి వెహజె, అక్క ఒడొల్దు మంజినిక ఆవండ ఆజినాదా? ¹⁷ ఒడొల్ విజా ఉండ్రె కణకానె ఆతిజ, ఎలాగ విండ్రెజ్ అనాద్? ఒడొల్ విజా గిబ్బి ఉండ్రె ఆతిజ, వాసనం సూణిక ఎంబె మంజినాద్? ¹⁸ గాని ఉండ్రె ఉండ్రె బాగం ఎలాగ మండ్రెజ్నొ, అయా లెకెండ దేవుణు వన్నిజ్ ఇష్టమాతి లెకెండ ఒడొల్దు ఇల్పా మనాన్. ¹⁹ ఆకెజ్ విజా ఉండ్రె

బాగం ఆతిజ ఒడోల్ ఎంబె? 20 ఆకెజ్ మని లెకెండే నండో బాగమ్కుకు మన్నె గాని ఒడోల్ ఉండ్రె. 21 అందెజె, కణక కియుదిజ్, “సిను నజి అక్కర్ సిల్లెద్”, ఇజి వెహ్లాజ్ అట్ఎద్. బుర్ర పాదమ్కాజ్, “మీరు నజి అక్కర్ సిల్లెద్”, ఇజి వెహ్లాజ్ అట్ఎద్. 22 అక్కాదె ఆవండ, ఒడోల్దు కూడితి మని సత్తు తకు ఆతి బాగమ్కాజ్, అక్కెజ్ మండ్రెజ్ అక్కర్ సిల్లెద్ ఇజి డిస్సిస్టెజ్ అట్ఎద్. 23 ఒడోల్దు ఎమేణి బాగమ్కాజ్ గవరం సిల్లికెజ్ ఇజి మాటు ఒడోబిజి నాటో వన్కాజ్ మరి నండో గవరం మని లెకెండే తయార్ కిజినాట్. సుడోదెజ్ సాకు తోరిఇ బాగమ్కాజ్ ఒడ్డె అందం వాని లెకెండే కిజినాట్. 24 ఒడోల్దు మని అందం మని బాగమ్కాజ్ మరి నెగెండే సుడోదెజ్ అక్కర్ సిల్లెద్. గాని దేవుణు విజా బాగమ్కాజ్ కుడుప్పి ఒడోల్దు ఇట్టివలె, మర్యాద తకు మని వనకాజ్ లావ్ మర్యాద సితాన్. 25 అందెజె ఒడోల్దు గొడోబెజ్ మన్ఎండ విజా బాగమ్కుకు ఉండ్రె మరి ఉండ్రె బాగం వందిజ్ నెగెండే సుడోబి మంజినె. 26 ఉండ్రె బాగమ్దు కష్టం వాతిజ, బాగమ్కుకు విజా కూడోబి దని వెట కష్టమ్దు మంజినె. ఉండ్రె బాగమ్దిజ్ గవరం దోహ్వాషి వలె, బాగమ్కుకు విజా దనివెట కూడోబి సర్ద అనె.

27 ఏలు, మీరు క్రీస్తు ఒడోల్ ఆతి మనిదెర్. ఒరెన్ ఒరెన్ ఉండ్రె బాగం ఆత మనాద్. 28 మరి దేవుణు సజమ్దు ముజాల సెగొండారిజ్ అపాస్తురు ఇజి, వెనుక మరి సెగొండారిజ్ దేవుణు ప్రవక్తరు ఇజి, దని వెనుక సెగొండారిజ్ దేవుణు మాటెజ్ నెస్సిసినికార్ ఇజి, దని వెనుక సెగొండారిజ్ బమ్మాతి పణిజ్ కినికార్ ఇజి, దని వెనుక మనికార్ ఇజి, సెగొండారిజ్ మహి వరిజ్ నాయం కినికార్ ఇజి, మరి సెగొండారిజ్ నడిపిస్సికార్ ఇజి, మరి సెగొండారిజ్ ఆఇ ఆఇ బాసెజ్ వర్గినికార్ ఇజి ఏర్పాటు కిత మనాన్. 29 విజెరె అపాస్తురునా? విజెరె దేవుణు ప్రవక్తరునా? విజెరె దేవుణు మాటెజ్ నెస్సిసినికార్నా? విజెరె బమ్మాతి పణిజ్ కినికార్నా? 30 విజెరె జబుజాణి వరిజ్ నెగెండే కిదెజ్ వరం మనికార్నా? విజెరె ఆఇ బాసెజాణిజ్ వర్గినికార్నా? విజెరె అయ బాసెజ అర్దం కిజి వెహ్లానారా? 31 గాని వరమ్క లొఇ గొప్ప పెరి వన్కా వందిజ్ ఆస ఆజి మండ్రు. ఏలు నాను మిజి గొప్ప నెగ్గి సరి తోరినినాలె.

విజా దనిజ్ పెరిక ప్రేమ

13 నాను లోకుర్ వర్గిని విజా బాసెజాణిజ్ వర్గితిజ్బా, దేవుణు దూతార్ వర్గిని బాసెజాణిజ్ వర్గితిజ్బా, నాను ప్రేమ సిల్లికాన్ ఇహిజ పణిదిజ్ రెఇ కంసు, సిల్లిజ టిజ్టిజ్ వలక్కి తాలిబిలెజ్ లెకెండేనె. 2 నాను దేవుణు ప్రవక్త లెకెండే వరం మనికాన్ ఆతిజ్బా, డాజితి మని విజా సజతిజ్ నెస్సెజ్ అట్టికాన్ ఆతిజ్బా, విజా గెణం మనికాన్ ఆతిజ్బా, గొరొకాజ్ బస్సిసిని నమకం మనికాన్ ఆతిజ్బా ప్రేమ సిల్లికాన్ ఇహిజ నాను పణిదిజ్ రెఇక. 3 నజి కల్లితి మనికెజ్ విజా బీద వరిజ్ సిల్లిజ్బా, సినుదు సుర్దెజ్ నా ఒడోల్ ఒవజెప్పిజ్బా, ప్రేమ సిల్లికాన్ ఇహిజ నాను కినిక పణిదిజ్ రెఇక.

4 ప్రేమ మనికాన్ నండో ఓరిసినినాన్. వాండ్రు మహి వరి మున్కు దయ మనికాన్ అనాన్. వాండ్రు గోస అవెన్. వాండ్రు పాజిజినికాన్ అవెన్. వాండ్రు గర్ర అవెన్. 5 ప్రేమ మనికాన్ మర్యాద సిల్లెండ మనికాన్ అవెన్. వాండ్రు నజి నానె నెగెండే మండ్రెజ్ ఇజి ఒడోబినికాన్ అవెన్. వాండ్రు బేగి కోపం అవెన్. వాండ్రు వన్ని వెట కిత్తిమని సెఇ వన్కా వందిజ్ మన్కుదు ఇడోబి మన్ఎన్. 6 ప్రేమ మనికాన్ సెఇ వన్కా వందిజ్ సరద అవండ, నిజమాతి వన్కా వందిజ్ సర్ద అజినాన్. 7 ప్రేమ మనికాన్ ఎస్తివలెబా సణిజిఎండ విజా సెమిస్సాన్. వాండ్రు ఎస్తివలెబా మహివరి వందిజ్ నెగ్గికెజ్ నమ్మిజి మంజినాన్. వాండ్రు ఎస్తివలెబా ఆసదాన్ ఎర్దు సుడోబి మంజినాన్. వాండ్రు ఎస్తివలెబా డిసెనండ ఓరిసి మంజినాన్.

8 ప్రేమ ఎలాకాలం మంజినాద్. దేవుణు ప్రవక్త లెకెండే వెహ్లాజ్ మని వరం ఎలాకాలం మన్ఎద్. ఆఇ ఆఇ బాసెజ్బా వర్గినికా బా ఎలాకాలం మన్ఉలె. గెణమ్బా సిల్లెండ అనాద్. 9 ఎందనిజ్ ఇహిజ ఏలు మాటు సెగమ్నె నెస్సె మనాట్. సెగమ్నె దేవుణు ప్రవక్త లెకెండే వెహ్లానాట్. 10 గాని పూర్తి ఆతిక వానివలె పూర్తి ఆఇక నిల్లెండ అనాద్. 11 నాను ఇజిరికాన్ మహివలె ఇజిరి వన్ని లెకెండే వర్గిత. ఇజిరి వన్ని లెకెండే ఒడోబిత. ఇజిరి వన్ని లెకెండే ఆలోసనం కిత. పెరికాన్ ఆతివలె ఇజిరికాన్ మహివలె మని పణిజ్ డిస్సె సిత్త. 12 ఏలు అర్దమ్దు సుడిఃతి లెకెండే ఉండ్రె బొమ్మనె సుడోబినాట్. నస్తివలె మొకొం నిండ్రు సూణాట్. ఏలు సెగమ్నె నెస్సాట్, నస్తివలె దేవుణు నజి ఏలు నెస్సిమని లెకెండే పూర్తి నెస్సాట్లె.

13 అహిజ దేవుణు మున్కు మని నమకం, ఆసదాన్ ఎర్దు సుడోబి మంజినిక, ప్రేమ యా మూండ్రెబా నిల్లి మంజినె. గాని వినుక లొఇ గొప్ప నెగ్గి ప్రేమనె.

దేవుణు ఆత్మ సీని వరమ్కు.

14 మీ బత్కుదు ప్రేమనె ముజాల మనిద్. దేవుణు ఆత్మ సీని వరమ్కాజ్ వందిజ్ ఆస ఆజి మండ్రు. దేవుణు ప్రవక్తరు ఆదెజ్ ఆస ఆదు. 2 ఎందనిజ్ ఇహిజ, ఆఇ బాసెజ వర్గినికాన్ లోకుర్ వెట ఆవండ దేవుణు వెటనె వర్గినికాన్. నిజమె లోకు ఎయెన్బా వాండ్రు వర్గినికెజ్ అర్దం కిదెజ్ అట్ఎన్. గాని వాండ్రు వన్ని ఆత్మదాన్ దేవుణుదిజ్ సెందితి డాజితి మని సజతిజ్ వర్గినికాన్. 3 గాని, దేవుణు ప్రవక్తరు లెకెండే వర్గినికాన్ లోకుర్ వెటనె వర్గినికాన్. లోకుర్ మన్కుదు సత్తు మనికార్ ఆదెజ్, వరిజ్ దయరం వెహ్లాజ్, మరి ఓదరిస్సెజ్ ఇజి. 4 ఆఇ బాసెజ్ వర్గినికాన్ వన్నిజ్ వాండ్రె దయరం కిబె అజినాన్. గాని దేవుణు ప్రవక్తరు లెకెండే వర్గినికాన్ సజమ్దు మని వరిజ్ ఉసార్ కిజినాన్. 5 మీరు విజిదెరె ఆఇ బాసెజాణిజ్ వర్గినికెదెర్ అదెజ్ ఇజి నాను కోరిజిన. గాని దేవుణు ప్రవక్తరు లెకెండే అదెజ్ ఇజి లావ్ ఆస ఆజిన. ఆఇ బాసెజాణిజ్ వర్గినికాన్, సజమ్దిజ్ దయరం వెహ్లాజ్ ఇజి ఆఇ బాసెజాణిజ్ వర్గిని మాటెజ అర్దం కిజి వెహ్లాఎండ మహిజ, దేవుణు ప్రవక్తనె వన్నిజ్ ఇంక పెరికాన్ అజినాన్.

6 తంబెరిజాండె, నాను మీ డగ్రు వాజి, దేవుణుది డాజితి మని సజతిజ్ దేవుణు తోరిస్సికెజ్నో, గెణం మాటెజ్నో, దేవుణు ప్రవక్త లెకెండే దేవుణు సిత్తి మాటెజ్నో మీ వెట వర్గిఎండ, ఆఇ బాసెజాణిజ్ వర్గిని మహిజ నా వెట మిజి ఇని లాబం వానాద్? 7 అయా లెకెండేనె, వలక్కివలె సెవుడుః వాజిని పాణం సిల్లి వన్కుజ్ ఆతి, టోయల గాని పిరుడిః గాని వలక్కివలె ఇని తేడ సిల్లెండ ఉండ్రె లెకెండే వలక్కి మహిజ, ఊక్తి మనిక ఇనిక, వలక్తి మనిక ఇనిక ఇజి ఎలాగ నెస్సెజ్ అనాద్? 8 విదెమ్దిజ్ సాండ్రెజ్ ఇజి సయన్మది వరిజ్ కూక్తెజ్ జోడు బాంగ వలక్కివలె వరిజ్ అర్దమానిలెకెండే నెగెండే జాటు సిఎండ మహిజ, విదెమ్దిజ్ సాండ్రెజ్ సయన్మదికార్ తయార్ అనారా? 9 అయాలెకెండేనె మీరుబా వెయదాన్ నెగెండే వర్గిఎండ మహిజ, మీరు ఇనిక వర్గినికెదెర్ ఇజి వినికార్ ఎలాగ అర్దం కిదెజ్ అల్పార్? మీరు గాలి వెటనె వర్గినికెదెర్ అజినెదెర్. 10 యా లోకమ్దు నండో బాసెజ్ మన్నె ఇని దనిజ్ ఇని అనుమానం సిల్లెద్. గాని వన్కా లొఇ ఉండ్రెబా అర్దం సిల్లిక అవెద్. 11 ఒరెన్ వర్గిని మాటెజ నాను అర్దం కిదెజ్ అట్ఎండ మహిజ, నాను వర్గిని వన్నిజ్ ఆఇ దేనిమది వన్ని లెకెండే అనాలె. వర్గినికాన్ నజిబా ఆఇ

దేసేమీది వన్ని లెకెండే మంజినాన్. 12 మిజీబా అయాలెకెండేనె మంజినాన్. మీరు దేవుణు ఆత్మ సీజిని వరమ్కాజ్ వందిజ్ నండొ ఆస ఆజి మంజినికిదెర్. అందెజె సజమ్దిజ్ పిరిప్పి వందిజ్ అయా వరమ్కాజ్ నండొ పజి కిదు.

13 అందెజె దిన్ని వందిజ్, ఆజ బాసదాన్ వర్గినాన్, బాసజ అర్దం కిజి వెహైజ్ అట్టి లెకెండే పార్దనం కిదెజ్ వలె. 14 అపొజ, నాను ఆజ బాసదాన్ పార్దనం కిజి మహిజ, నా ఆత్మ పార్దనం కిజినాన్. గాని నా గర్బం కాలి మంజినాన్. 15 అందెజె నాను ఇనిక కిదెజ్ వలె? నాను నా ఆత్మదాన్ పార్దనం కిస. గాని నా మన్నుదాన్బా నాను పార్దనం కినాలె. నాను నా ఆత్మదాన్ పాటెజ్ పార్దు. గాని నా మన్నుదాన్బా పాటెజ్ పార్దాలె. 16 మీరు మీ ఆత్మదాన్ దేవుణుదిజ్ పాగ్డిజి మహిజ, మీరు దేవుణుదిజ్ వందనమ్కు వెప్పినిదెర్. మీరు వర్గిన మాటజ అర్దం కిదెజ్ అల్ఇకాన్ ఒరెన్, మీరు వెప్పిని వందనమ్దిజ్, ఎలాగ మీ వెట కూడెజి, "అమెన్" వెహైజ్ అట్టాన్. 17 మీరు ఇపొజ ఒద్దె నెగెండ దేవుణుదిజ్ వందనమ్కు వెప్పినిదెర్. గాని ఆకాన్ దయరం కిబె అదెజ్ అల్ఎన్.

18 నాను మిజి విజెరిజ్ ఇంక నెగెండ ఆజ బాసెజాణిజ్ వర్గిని వందిజ్ దేవుణుదిజ్ వందనమ్కు వెప్పిన్. 19 గాని సజమ్దు ఆజ బాసెజాణిజ్ పది వెయుజ్ మాటెజ్ వర్గిన దనిజ్ ఇంక మహివరిజ్ నెప్పిన్ లెకెండే బుద్దిదాన్ కూడితి అయదు మాటెజె నాను వెప్పి.

20 తంబెరిజాండె, మీరు ఇజిరి కొడొఃర్ ఒడెబిని లెకెండే ఒడెబిజి మంజినిక డిసి సీదు. సెజ వన్కా వందిజ్ లేత కొడొఃర్ లెకెండే మండ్రు. గాని ఒడెబినిబాన్ పెరికిదెర్ ఆదు. 21 "ఆజ బాసెజ్ వర్గిని ఆజ దేసేమీది లోకుర్ నా వందిజ్ విరి వెట వర్గితిజ్బా వారు గిబిజ్ ఒడెబి నా మాటెజ్ వినవర్", ఇజి ప్రబు వెప్పినాన్ ఇజి దేవుణు మాటదు రస్త మనాన్.

22 అందెజె ఆజ బాసెజ్ వర్గినక, నమ్మిజ వరిజ్ దేవుణు సత్తుదిజ్ ఉండ్రీ గుర్దు లెకెండేనె మనాన్ ఇజి మాటు దేవుణు మాటదాన్ నెప్పిట్. నమ్మిత్తి వరిజ్ అవద్. గాని దేవుణు ప్రవక్తరు వెప్పిని మాటెజ్, నమ్మిత్తి వరి వందిజ్ రుజుప్ ఆజిని గాని నమ్మిజ వరివందిజ్ అవద్. 23 అందెజె సజమ్దు మనికార్ విజెర కూడెజి వానివలె విజెర ఆజ బాసెజాణిజ్ వర్గిజి మహిజ, యాక అర్దం కిదెజ్ అల్ఇకాన్, నమ్మిఇకాన్ లొఇ వాతిజ, మీరు బుద్ది నెగెండ సిల్లెండ ఆజి వర్గినిదెర్ ఇజి వారు వెహివరా? 24 గాని ఒరెన్ నమ్మిఇకాన్ గాని దిన్ని వందిజ్ నెన్ఇకాన్ గాని లొఇ వాతిజ, విజెరె దేవుణు ప్రవక్తరు లెకెండే వెప్పి మహిజ, వెని మాటెజాణిజ్ వాండ్రు కిత్తి మని తప్పుజ వందిజ్ ఎత్తు కిజి వన్ని మన్నుదు ఒడెబిజి ఒప్పుకొణాన్. మీరు వెప్పిని మాటెజాణిజ్ వన్నిజ్ వాండ్రె తీర్పు కిబె ఆనాన్లె. 25 మరి వన్ని మన్నుదు డాజెతి మనికెజ్ విజా వెల్లె తోర్నే. అయావలె, "నిజమె దేవుణు మీ వెట మనాన్", ఇజి బమ్మ ఆజి వాండ్రు ముణుకుజ్ ఊరిజి దేవుణుదిజ్ పాగ్డిజి మాడిస్సాన్లె.

దేవుణుదిజ్ పాగ్డిజి మాడిస్సిక ఎలాగ మండ్రెజ్.

26 అపొజ తంబెరిజాండె, మాటు ఇనిక వెహైజ్? మీరు కూడెజి వానివలె, ఒరెన్, ఉండ్రీ పాటెజ్ పార్దెజ్ వలె ఇజినాన్. మరి ఒరెన్ బుద్ది మాటెజ్ నెప్పిస్తెజ్ వలె ఇజినాన్. మరి ఒరెన్ డాజెతి మనిక దేవుణు తోరిప్పిజె వెహైజ్ వలె ఇజినాన్, మరి ఒరెన్ ఆజ బాసెజాణిజ్ వర్గిదెజ్ వలె ఇజినాన్, మరి ఒరెన్ బాసదిజ్ అర్దం వెహైజ్ వలె ఇజినాన్, యాకెజ్ విజా సజమ్దు మని వరిజ్ దయరం వాని వందిజ్ కిదెజ్ వలె.

27 ఆజ బాసెజ వర్గినకార్ ఒరెన్ రిఎర్నో వర్గిదెజ్ వలె. రిఎర్నో మిస్సిజ ముఎర్ వర్గిదెజ్ వలె. గాని విజెర ఒర్నే వర్గిఎండ, ఒరెన్ ఒరెన్ వర్గిదెజ్ వలె. ఎయెర్బా దనిజ్ అర్దం వెహైజ్ వలె. 28 ఆజ బాసెజ వర్గిన దనిజ్ అర్దం కిజి వెహైకాన్ సిల్లెండ మహిజ, ఆజ బాసెజాణిజ్ వర్గినకాన్ సజమ్దు పల్లక్ మండ్రెజ్. వాండ్రు వన్ని మన్నుదు వర్గిజి దేవుణు వెట వర్గిదెజ్ వలె.

29 దేవుణు ప్రవక్తరు లెకెండే వర్గినకార్బా రిఎర్నో, ముఎర్నో వర్గిదెజ్ అనాన్. మహికార్ వెప్పి దనిజ్ నెగెండ వెంజి, ఇనిక వెప్పినార్ ఇజి జాగర్దు నుండెజ్ వలె. 30 డగ్రు బస్సిమని మరి ఒరెన్ దేవుణు ప్రవక్తెజ్ ఇనికాబా దేవుణు బాణిజ్ తోరె ఆతిజ, ముజాల వర్గిజి మంజినికాన్ వలక్ మండ్రెజ్ వలె. 31 విజెరిజ్ నెప్పిసిని వందిజ్, విజెరిజ్ దయరం వెప్పి వందిజ్, మీరు విజెరె ఒరెన్ వన్ని వెనుక మరి ఒరెన్ దేవుణు బాణిజ్ వాజిని మాటెజ్ దేవుణు ఆత్మ నడివిన్ని లెకెండే వర్గిదెజ్ అనాన్. 32 ప్రవక్తరు లొఇ మని వరి ఆత్మ ప్రవక్తరిజ్ లొజిజి మంజినాన్. 33 ఎందనిజ్ ఇపొజ దేవుణు సమాదానమ్దిజ్ దేవుణుని గాని గగోలిదిజ్ దేవుణు అవెన్.

34 విజా దేవుణు సజమ్కాజ్ మని లెకెండే, సజమ్దు పాగ్డిజి మాడిస్సివలె, బోదెక్ గగోల్ ఆజి వర్గిజి మండ్రెజ్ అవెన్, వలక్ మండ్రెజ్ వలె. సజమ్దు అవిక్ వర్గిదెజ్ అవెన్. గాని మోసె రాస్తి రూలుదు వెహై మని లెకెండే అవిక్ అణిజిజి మండ్రెజ్. 35 వరిజ్ ఇనికబా నెప్పిజ్ ఇపొజ, ఇండ్రొ వన్కా వన్కా మాసిరిజ్ వెన్బాదెజ్ వలె. సజమ్దు బోదెలి వర్గిజి మంజినిక దనిజ్ సిగు.

36 మీరు ఇనిక ఒడెబిజినిదెర్? దేవుణు మాటెజ్ మీరె రాస్తి తయార్ కిత్తిదెరా? అక్క మిజినె అక్క దోహ్క మనాదా? 37 ఎయెర్బా వాండ్రు దేవుణు ప్రవక్త ఇజి ఒడెబిజినాన్ ఇపొజ, దేవుణు ఆత్మ సిత్తి వరమ్కు మనికాన్ ఇజి ఒడెబిజి మహిజ్బా, వాండ్రు నాను మిజి రాస్తి మనికెజ్ ప్రబుబాణిజ్ వాతి ఆడ్రెజ్ ఇజి తవ్వెండ ఒప్పుకొండెజ్ వలె. 38 ఎయెర్బా యాక నెక్కి పొక్తిజ, వన్నిజ్ వాండ్రె నెక్కి పొకె అనాన్లె.

39 అందెజె నా తంబెరిజాండె, దేవుణు ప్రవక్తరు ఆదెజ్ ఆస ఆజి మండ్రు. గాని ఆజ బాసెజాణిజ్ వర్గిన వరిజ్ అడ్డు కిమాట్. 40 గాని విజాబా నెగెండ మర్యాదదాన్ తగ్గు లెకెండే కిదెజ్ వలె.

క్రీస్తు సాతి వరిబాణిజ్ మర్జి నిజితి వందిజ్.

15 తంబెరిజాండె, నాను మీ నడిమి సాటిస్తి సువార్త వందిజ్ మరి మిజి ఎత్తు కిబిస్తెజ్ ఇజి నాను కోరిజిన. మీరు డగ్రు కిజి నమ్మిత్తి అయ సువార్త, దన్నిజ్ తగిలి లెకెండే మండ్రెజ్ ఇజి నిరణెం కిత్తిదెర్. 2 నాను మిజి వెప్పి మని అయా సువార్తదానె దేవుణు మిజి రక్తిస్త మనాన్. అందెజె నాను వెప్పి మని మాటెజ్, మీరు నెగెండ అసి అయాలెకెండేనె మండ్రెజ్. సిల్లెండ మహిజ మీరు దేవుణు మున్ను ఇట్టి నమకం నిజం అవండ మంజినాన్. 3 దేవణు బాణిజ్ నజి దోహ్క మిన్నక, నాను మిజి ఒప్పుజెప్పి మని వన్కా లొఇ గొప్ప ముకెలమతిక ఇనిక ఇపొజ, ముజాల దేవుణు మాటదు రాస్తి మహిక పూర్తి కిత్తి లెకెండే, క్రీస్తు మా సాపమ్క వందిజ్ సాతాన్. 4 ముజాల దేవుణు మాటదు రాస్తి మహిక పూర్తి కిత్తి లెకెండేనె మూసి ఆతండ్రె మూండ్రె రోస్సాణిజ్ మర్జి సికె ఆతాన్. 5 ముజాల

పేత్రుడని † వెనుక వన్ని సీసుర్ ఆతి వనెండు మన్సిరిజ్ తోర ఆతాన్. 6 దన్ని వెనుక అయ్దు వందెజ మిస్తి నమ్మిత్తి తంబెరిజ ఒగ్నే తోర ఆతాన్. వరి లొఇ సెగొండార్ సాత సాహార్ ఇహిజ్బా నండొండార్ ఏలుబా బత్కిజినార్. 7 వెనుక వాండ్రు యాకోబుజ్ అపాస్తురుజ్ విజెరిజ్ తోర ఆతాన్. 8 విజెరిజ్ తోర ఆతి వెనుక, కడెవేరిదు, నెగెండ పుట్ఇకానాతి నజిబా తోర ఆతాన్.

9 అపాస్తురు లొఇ విజెరిజ్ ఇంక పీన్కోడొః నానె. అపాస్తుడు ఇజి కూకె ఆదెజ్బా నాను తగితిక ఆవ. ఎందనిజ్ ఇహిజ నాను దేవుణు సజమ్ది వరిజ్ పీమ్సెజ్ కిత మన్న. 10 ఏలు నాను ఇనిక ఆత మనానో, అక్క దేవుణు నజి తోరిస్తి దయాదర్మదానె ఆత మన్న. అహిజ వాండ్రు నా ముస్సు దయా దర్మం తోరిస్తిక దర్మమిడిజ్ సిత్తి లెకెండ్ అవతాన్. విజెరిజ్ ఇంక నండొ కష్టబాడెఃజి నాను వణి కిత మన. గాని కష్టబాడెఃతిక నాను ఆవ, నజి తోడుః మహి దేవుణు దయాదర్మమనె. 11 అందెజె నాను ఆతిజ్బా, వారు ఆతిజ్బా ఇక్కాదె మాపు సాటిన్త మనాన్.

సాతికార్ మర్జి నీజ్ని వందిజ్.

12 గాని, క్రీస్తు సాతి వరి బాణిజ్ నీకె ఆత మనాన్ ఇజి సాటె ఆతి మహిజ్, సాతి వరి బాణిజ్ మర్జి నీజ్నిక సిల్లెద్ ఇజి మీ లొఇ సెగొండార్ ఎలాగ వెప్పినార్? 13 సాతి వరిబాణిజ్ మర్జి నీజ్నిక సిల్లెద్ ఇహిజ క్రీస్తుబా మర్జి నీజ్వతాన్. 14 క్రీస్తు సాతి వరిబాణిజ్ మర్జి నీజ్వతాన్ ఇహిజ మాపు సాటిని సువార్త వణిదిజ్ రెఇక. మీరు దేవుణుదిజ్ నమ్మిత్తికబా వణిదిజ్ రెఇక. 15 అక్కాదె ఆవండ, మాపు దేవుణు వందిజ్ అబద్దం వెప్పి సాసిర్ ఇజి తోర ఆజినాన్. ఎందనిజ్ ఇహిజ దేవుణు సాతి వరిబాణిజ్ క్రీస్తుజ్ నిక్క మనాన్ ఇజి మాపు దేవుణు వందిజ్ సాసి వెహ్తా మనాన్. సాతికార్ మర్జి నీజె ఆవర్ ఇహిజ, దేవుణు క్రీస్తుజ్బా నిక్వతాన్. 16 దేవుణు సాతి వరిజ్ మర్జి బత్కిస్ఎన్ ఇహిజ అయాలెకెండ్నె దేవుణు క్రీస్తుజ్బా మర్జి బత్కిస్ఎతాన్. 17 క్రీస్తు మర్జి నీజె ఆవతాన్ ఇహిజ మీరు నమకం ఇడెఃతిక వణిదిజ్ రెఇక. మీరు ఏలుబా మీ పావమ్క వందిజ్ దేవుణు సీని సిక్కదిజ్ తగ్గికిదె. 18 అక్కాదె ఆవండ క్రీస్తుజ్ నమ్మిజి సాతికార్బా నాననం ఆత సాహార్. 19 యా బత్కుదునె వాండ్రు మజి సాయం కినాన్, సాతిసాహి వెనుక సిల్లెద్ ఇజినె మాటు క్రీస్తు ముస్సు ఆసదాన్ ఎర్దు సుడెఃజి మంజినికాల్ ఇహిజ, మా బత్కు విజెరిజ్ ఇంక హీనమాతి బత్కు బత్కిజినాల్.

20 గాని, సాతి వరిబాణిజ్ తొలిత వండితి వంట లెకెండ్, క్రీస్తు నిజమె సాతి వరిబాణిజ్ మర్జి నీజెత మనాన్. 21 ఇనిక ఇహిజ ఒరెన్ లోకు వెటనె సాపు వాతాన్. అయాలెకెండ్నె సాతి వరిబాణిజ్ మర్జి నీజె అనికబా ఒరెన్ వన్ని వెటనె వాతాన్. 22 ఆదము వెట విజెరె ఎలాగ సాజినారొ, అయాలెకెండ్నె క్రీస్తు వెట విజెరె పాణం మనికార్ ఆనారె. 23 గాని ఒరెన్ ఒరెన్ వన్ని వర్నాదునె పాణం మనికాన్ ఆనాన్. తొలిత వండితి వంట క్రీస్తు. వెనుక క్రీస్తు వానివలె వన్నిజ్ సందితికార్ పాణం మనికార్ ఆనారె. 24 దని వెనుక వాండ్రు యా లోకమ్దు మని విజా సెఇ సత్తుజ్ని, విజా అతికారమ్కాజ్, విజా సత్తుజ మాంయిస్సి పోక్కి, వన్ని బుబ్బాతి దేవుణు ఏలుబడిః కిని వందిజ్ విజా ఒవజెప్పాన్లె. నస్తివలె విజా దన్నిజ్ ఆక్కర్ ఆనాన్లె.

25 ఎందనిజ్ ఇహిజ వన్నిజ్ పగాతి విజెరిజ్, వన్ని పాదమ్కు అడిఃగి దేవుణు ఇడెఃనిదాక క్రీస్తు ఏలుబడిః కిజి మండ్రెజ్ వలె. 26 లోకురిజ్ విజెరిజ్ పగాతి సాపుదిజ్, కడెవేరిదు వాండ్రు నాననం కినాన్లె.

27 దేవుణు, “విజా వనకాజ్ వన్ని పాదమ్కు అడ్లి ఇట్టాన్”, ఇజి దేవుణు మాటదు రాస్త మనాన్. “విజా వన్కాజ్”, క్రీస్తు పాదమ్క అడిఃగి ఇట్టా మనాన్ ఇజి వెప్పి వలె, విజా వనకాజ్ విని పాదమ్కు అడిఃగి ఇడ్డి మనికాన్ ఆతి దేవుణు అయ విజా వనకాజ్ వెట వన్నిజ్ వాండ్రె క్రీస్తు పాదమ్క అడిఃగి ఇడెః ఆవన్ ఇజి టేట తోరిజినాన్. 28 వాండ్రు యా లెకెండ్ కిత్తి వెనుక, మరిన్ విజా వనకాజ్ వన్ని పాదమ్కు అడిఃగి ఇట్టి మనికాన్ ఆతి దేవుణుదిజ్, వన్నిజ్ వాండ్రె అణజిజి మంజినాన్లె. ఎందనిజ్ ఇహిజ దేవుణు ఒరెండ్రె అయ విజా వన్కాజ్ ముస్సు అతికారం మనికాన్ ఆదెజ్వలె.

29 సాతికార్ మర్జి నీజ్నిక సిల్లెద్ ఇహిజ, సెగొండార్ కిని లెకెండ్ సాతి వరి వందిజ్ బాప్తినం లాగె ఆని దనిజ్ ఇని అర్దం మనాన్? సాతికార్ నీజె ఆవర్ ఇహిజ ఎందనిజ్ లోకుర్ వరి వందిజ్ బాప్తినం లాగె ఆదెజ్? 30 మరి సాతికార్ మర్జి నీజ్నార్ ఇజి మాపు నమ్మివ్ ఇహిజ ఎందనిజ్ సాపు తపిస్సి ప్రమాదమ్కాజ్ మాపు గురి ఆదెజ్. 31 తంబెరిజాండె, ప్రబు ఆతి క్రీస్తు యేసుక్రీస్తు వెట మీరు కూడిఃతి వందిజ్ నాను నిజం ఎసా సర్గ ఆజినానొ అయాలెకెండ్నె ఎస్తివలెబా నాను సపె ఆదెజ్బా అక్కు మనన్ ఇజి నాను మిజి నిజం వెప్పిన. 32 యా లోకమ్దిజ్ సందితి సజతిజ్ వందిజ్నె నాను ఎపెసి పట్నుమ్దు అడిఃవి జంతుజ వెట విద్దె కితానా? సాతికార్ మర్జి నీజె ఆవర్ ఇహిజ నజి ఇని లాబం మనాన్? సాతికార్ మర్జి నీజ్వర్ ఇహిజ, “విగిహిజ్ సానాల్, అందెజె ఉణాల్ తినాల్”, ఇజి ఆకకార్ వెప్పాలెకెండ్నె మాటుబా కిదెజ్ వలె.

33 మీరు మొసెం కిబె ఆజి తపు సరిదు సాన్కాల్. “సెఇ వరివెట కూడెఃజి మనిజ్, నెగ్గి అలవాటుజ్ మనికార్బా పాడెః ఆజినారొ”. 34 నెగ్గి బుద్ది మనికిదెర్ లెకెండ్ మీరు మప్పి సాన్ని పాపం కిఎండ నీతినిజాయిద్దాన్ మండ్రు. ఎందనిజ్ ఇహిజ మీ లొఇ సెగొండార్ దేవుణు వందిజ్ నెస్ఎర్. మిజి సిగు కిదెజ్ ఇజినె ఇక్క నాను వెప్పిన.

సాతికార్ మర్జి నీజ్నివలె మంజిని ఒడెఃల్

35 సెగొండార్ యా లెకెండ్ వెన్బానారెను, “సాతికార్ ఎలాగ మర్జి నీకె ఆనారొ? ఎలాగ మర్జి ఒడెఃల్దాన్ వారు వానారొ?”. 36 బుద్ది సిలికిదెరా మీరు విత్తు విత్తివలె, అయ విత్తి విత్తు సబితిజానె దని బాణిజ్ మొక నేర్పినాన్. 37 నీను వితిక కూలిజ్గాని, మరి ఎమేణి విత్తుబగాని వహి విత్కునె విత్తిని. విత్తిక విత్తునె గాని నేర్పిని మొక్క ఒడెఃల్ ఆవద్గదె. 38 గాని దేవుణు వాండ్రు నిరణెం కిత్తి లెకెండ్ దనిజ్ ఉండ్రె ఒడెఃల్సెజినాన్. విత్తిమన్ని విజా రకమ్ది విత్తుజ వనక వనక ఒడెఃల్ సీజినాన్. 39 కంట విజా ఉండ్రె ననిక ఆవద్. లోకు కంట ఉండ్రె రకం మనాన్. జంతు కంట మరి ఉండ్రె రకం, పాటి కంట మరి ఉండ్రె రకం, మొయ కంట ఉండ్రె రకం. 40 అయాలెకెండ్నె ఆగానమ్ది వనకాజ్ని, బూమిదు మని వన్కాజ్ తేడ మంజినాన్, ఉండ్రె ననికెజ్ ఆఉ. విజా అంతం మనికెజ్ గాని వనక

† పేతురుజ్ కేవ ఇజిబా పేరు మనాన్.

అంతం ఉండే లెకెండ్ మన్వద్. 41 ఎలాగ ఇహిజ, పొద్దుది అందం ఉండే రకం, నెలాది అందం మరి ఉండే రకం, సుక్కెజ అందం మరి ఉండే రకం. ఉండే సుక్కాది అందం మరి ఉండే సుక్కాది అందమదిజ్ తేడ మనాద్.

42 అందెజె సాతికార్ మర్ది నెజె ఆనివలె అయాలెకెండ్నె మంజినాద్. బూమిదు మూసె ఆతి మని పీనుగు సబ్జె సానిక. గాని సబ్జె సాన్ఇ ఉండే ఒడొల్దాన్ వారు నికె ఆనార్లె. 43 మూసె ఆతి పీనుగు సుడెదెజ్ బాగ సిల్లక. సత్తు సిల్లక. గాని నికె ఆజిని ఒడొల్ అంతమని సత్తు మంజినిక ఆనాద్. 44 మూసె ఆజిని పీనుగు యా లోకమదు బత్తిదెజ్నె తగ్గాద్. గాని నికె ఆజిని ఒడొల్ దేవుణు మంజిని బాడిదు బత్తిదెజ్ తగ్గిక. యా లోకమదు బత్తిదెజ్ తగ్గి ఉండే ఒడొల్ మనాద్ ఇహిజ దేవుణు మంజిని బాడిదు బత్తిదెజ్ తగ్గి ఉండే ఒడొల్బా మంజినాద్. 45 అందెజె, "తొలిత లోకు ఆతి ఆదము బత్తిజిని జీవు ఆతాద్", ఇజి దేవుణు మాటదు రాస్త మనాద్. కడెవేరి ఆదము ఆతి క్రీస్తు పాణం సీజిని ఆత్మ ఆతాన్. 46 వరలోకమదు బత్తిదెజ్ తగితి ఒడొల్ ముజాల రెవతాద్. యా లోకమదు బత్తిదెజ్ తగితి ఒడొల్నె ముజాల వాతాద్. వెనుక వరలోకమదు బత్తిదెజ్ తగితి ఒడొల్ వానాద్. 47 తొలిత ఆదము యా బూమి దూలిదాన్ తయార్ ఆత మనాన్. వెనుకాహి ఆదము ఆతి క్రీస్తు దేవుణు మంజిని బాడిదాన్ వాతాన్.

48 బూమిది దూలిదాన్ తయార్ ఆతి వన్ని బాణిజ్ పుట్టి మాటు వన్ని లెకెండ్నె మంజినాబ్. దేవుణు మంజిని బాడిదాన్ వాతి వన్ని వెట కూడితికార్ దేవుణు మంజిని బాడిదు బత్తిదెజ్ తగ్గికార్ ఆనార్లె. 49 ఏలు మాటు ఎలాగ బూమిదాన్ తయార్ ఆతి వన్ని మూర్తి లెకెండ్ మనాబ్, అయా లెకెండ్నె దేవుణు మంజిని బాడిదాన్ వాతి వన్ని క్రీస్తు మూర్తి లెకెండ్ తయార్ ఆనాబ్లె.

50 తంబెరిజాండె, కండాని నలదాన్ తయార్ ఆతిమని యా ఒడొల్దాన్ మాటు దేవుణు కిజిని ఏలుబడిదు సాన్ని మండ్రెజ్ అల్వెట్ ఇజి నాను మిజి కనితం వెస్సిన. ఎందనిజ్ ఇహిజ సాపు మని యా ఒడొల్కు సాపు మన్ఇ బాడిదు మండ్రెజ్ అల్వెద్. ఆక్కెజ్ కొత్తాకెజ్ కిబె ఆదెజ్ వలె. 51 గిబ్బుజ్ ఒడొజి ఎండ్రు, నాను దేవుణుది డాజితి మని ఉండ్రె సజతి మిజి తెలియ కిజిన. మాటు విజెటె సావెట్. మాటు విజెటె మూర్నాబ్. 52 నణెమదు, అహిజ ఉండ్రె కణక రెవ డెయ్జి పెర్ని ముజాలె, కడెవెరిది పెరి జోడుబంగ వలక్తిజె సరి ఆక్కె జగ్గినాద్. జోడు బంగ వలక్తివలె సాతికార్ సాపు మన్ఇ ఒడొల్దాన్ నికె ఆనార్. ఏలుదాక బత్తిజిని మాపు కొత్తాజ్ కిబె ఆతి ఒడొల్దాన్ మూర్నాబ్లె. 53 సబ్జె సాన్నిని మా యా ఒడొలుజు ఎసెజ్బా సబ్జె సాన్ఇ ఒడొలుజ్ లెకెండ్ మూర్నెలె. నిజమె, సాపు వాజిని యా మా ఒడొలుజ్, సాపు సిలి ఒడొలుజ్ లెకెండ్ కొత్తాజ్ మూర్నెలె.

54 సబ్జె సాని మా ఒడొలుజ్, ఎసెజ్బా సబ్జె సాన్ఇ ఒడొలుజ్ లెకెండ్ మూర్నెజ్ వలె. సాపు వాజిని మా యా ఒడొలుజ్, సాపు సిల్లి ఒడొల్ లెకెండ్ మూర్నెజ్ వలె. నస్తవలె దేవుణు మాటదు రాస్తె యా మాబెజ్ నిజం అనాద్, "సాపు ముస్సు పూర్తి గెలిస్తె వందిజ్, సాపు మరి మన్వద్. సాపు డిజె ఆతి లెకెండ్ వీజెతాద్". 55 "సాపు మా ముస్సు మరి గెలిస్తెజ్ అట్నాదా? మజి గుత్తెజ్ ఇజి సాపుదిజ్ మరి సాప్పు మనాదా?", ఇజి దిన్ని వందిజ్ దేవుణు మాటదు రాస్తె మనిక, నస్తవలె పూర్తి ఆనాద్. 56 సాపు తపిసిని సాంపు పావం. మాటు దేవుణు రూలుజ లోజివెండ మంజినిక, మజి ఓడిస్తెజ్ పావమదిజ్ సత్తు ఆజినాద్.

57 మా ప్రబువాతి యేసుక్రీస్తుదాన్ మజి పావమదిజ్ని సాపు ముస్సు గెల్పిస్తె మన్ని దేవుణుదిజ్ వందనమక.

58 అందెజె, నాను ప్రేమిసిని తంబెరిజాండె, ఇనికబా మిజి కద్లెవెండ గటిజ నిల్పి మండ్రు. ఎస్తవలెబా దేవుణు వందిజ్ కస్టుబాడెజి పణి కిదు. ఎందనిజ్ ఇహిజ ప్రబు వేట కూడెజి మీరు కస్టుబాడెజి కిజిని పణిజ్, ఎసెజ్బా పణిదిజ్ రెవండెజి మన్ఉ ఇజి నెసి ఎస్తవలెబా పణి కిజి మండ్రు.

నమ్మిత్తి వరి వందిజ్ డబ్బు కుడుప్పిని వందిజ్ వెప్పినిక.

16 దేవుణుదిజ్ నమ్మిత్తి వరి వందిజ్ డబ్బు కుడుప్పిని వందిజ్ ఇహిజ నాను గలాతియదు మని దేవుణు సజమ్కాజ్ వెప్తి మని లెకెండ్ మీరుబా కిదు. 2 నాను వానివలె, అయావలెనె కుడుప్పెజ్ తొవండ, విజా ఆదివారమ్కాజ్ మీ లోఇ ఒరెన్ ఒరెన్ వన్నిజ్ దొహ్కీని దని బాణిజ్ ఉండ్రె వంతు కేట ఇడెజి వన్నిబాన్ కుడుప్పి మండ్రెజ్ వలె. 3 అహిజ నాను వానివలె, మీరు తగ్గికార్ ఇజి ఎయెరిజ్ ఎర్లిసినిదెరో, వరిజ్ ఉత్తమక రాసి సీజి మీరు కుడుప్పిని డబ్బు వరి కిదు యెరుసలెమదు ఫాక్కాబ్. 4 నానుబా సాహిజ బాగ మంజినాద్ ఇజి తోరె ఆతిజె వారు నా వెట వానార్లె. 5 అహిజ ఏలు నాను మాసిదోనియాదు సాన్ని అబ్బె మని దేవుణుదిజ్ నమ్మిత్తి వరిజ్ నెస్సిని మండ్రెజ్ ఇజి ఒడిబిజిన. మాసిదోనియాదు సాహి వెనుక నాను మీ డగ్రు వాన. 6 నస్తవలె మీ డగ్రు సెగం రోస్సు మండ్రెజ్ ఆనాద్ ఇజి, సిల్లిజె పణి కాలం విజా మీ బానె గడెప్పా. ఎందనిజ్ ఇహిజ, అయావలె నాను ఎమేణి దరిజ్ సాండ్రెజ్నో, అయా పయనమదు నజి సాయం కిడెజ్ మీరు అట్టిదెర్. 7 ఏలు పయనమదు మీ డగ్రు వాజి మిజి దనూల్ ఆజి సాండ్రెజ్ నజి ఇస్టం సిల్లెద్. ప్రబుజ్ ఇస్టం ఇహిజ మీ డగ్రు సెగం కాలం మండ్రెజ్ ఇజి ఆన ఆజిన. 8 గాని పెంతుకొస్తు † వండాయ్దాక ఇబ్బె ఎపెసి పట్నమదునె నాను మంజినలె. 9 ఎందనిజ్ ఇహిజ, ఇబ్బె నెగెండ సువార్త పణి జగ్గని లెకెండ్, తగ్గి నెగ్గి అవ్కాసం నజి దొహ్కీ మనాద్. నజి ఎర్లిసినికార్బా మనార్.

10 తిమోతి మీ డగ్రు వాతిజ, ఇని దనిజ్బా తియెల్ అవండ మీ వెట మంజిని లెకెండ్ వన్నిజ్ సుడెజి మండ్రు. ఎందనిజ్ ఇహిజ, నాను కిజిని లెకెండ్నె వాండ్రుబా ప్రబు పణి కిజినాన్. 11 ఎయెన్బా వన్నిజ్ ఇజిరి కణక సుడెదెజ్ అవెద్. వాండ్రు మర్తి నా డగ్రు వాదెజ్ వన్ని మన్గుదు సార్లిదాన్ వన్నిజ్ పాక్తు. మహి తంబెరిజె వెట వాండ్రు వానాన్లె ఇజి నాను ఎర్దు సుడెజిన.

12 ఏలు తంబెరి ఆతి అపాలొ వందిజ్ వెప్పిక ఇమిక ఇహిజ, మహి తంబెరిజె వెట మీ డగ్రు సాండ్రెజ్ ఇజి నాను వన్నిజ్ బతిమాలిత గాని ఏలు వాదెజ్ వన్నిజ్ ఇస్టం సిల్లెతాద్. గాని మరి ఎసెజ్బా వాండ్రు అవ్కాసం దొహ్కీవలె మీ డగ్రు వానాన్లె.

13 మీరు జాగ్రత్త మండ్రు. దేవుణు ముస్సు మని నమకమదు గటిజ మండ్రు. దయరమదాన్ మండ్రు. సత్తుదాన్ మండ్రు. 14 మీరు కిజిని పణిజ్ విజా ప్రేమదాన్ కిదు. 15-16 అక్కాయ ప్రాంతమదు తొలిత దేవుణుదిజ్ నమ్మిత్తికార్ సైపాను ఇండ్రెణికార్ ఇజి మీరు నెస్సిదెర్గెద? దేవుణుదిజ్ నమ్మిత్తి వరి వందిజ్ పణి సాయం కిడెజ్ వరిజ్ వారి ఒవజెవి ఆత మనార్ ఇజిబా మీరు నెసినిదెర్. అందెజె తంబెరిజాండె, మీరు నిని వరిజ్ అణిజిజి మండ్రు. అక్కాదె అవండ పణిదిజ్ కూడెజి వాని వరిజ్ని కస్టుబాడెజి పణి కిజిని వరిజ్బా అణిజిజి మండ్రెజ్ ఇజి నాను మిజి బతిమాలిన్. 17 మీరు వాదెజ్ అల్వెండ మహిజ్బా, స్తైపానుని

† వడాయి ప్రమాణమదు ఇక్కె వారమక వండాయ్, మరి వంట కొయ్యి వండాయ్ ఇజి వెహి ఆజినాద్. (నిర్గమా 34:22, 23:16) వెజెరె వెట కూడెజి యా వండాయ్ కిడెజ్ ఇజి ఇస్రాయేలు లోకురె యెరుసలెమదు వంద వాజి మహో. పెంతెకొస్తు ఇహిజ యాబయ్ ఇజి అర్థం. యాక పస్సు వండాయ్ ఆతి వెనుక యాబయ్ రోస్సు ఆనివలె ఆజినాద్.

పొర్రూనాతు, అక్కాయికు ఇనికార్ వాతివలె నాను సర్ద ఆత. ఎండనిజ్ ఇహిజ, మీ బాన్ నజి సీదెజ్ సిల్లితికెజ్ వీరు నజి సితార్. 18 నా మన్నుదిజ్, మీ మన్నుదిజ్ వారు సర్ద కిత్తార్. ననికార్ గవరమ్దిజ్ తగ్గికార్.

19 ఆసియాదు మన్ని సజమ్కాణికార్ మీరు నెగెండ్ మనిదెరా ఇజి వెన్బాజినర్. అక్కుల, ప్రిస్కిల ఇనకార్ని పరి ఇండ్రొ కూడిఃజి వాజిని నమ్మిత్తి పరి సజమ్బా ప్రబు పేరుదాన్ మీరు నెగెండ్ మనిదెరా ఇజి వెన్బాజినార్. 20 నమ్మిత్తి తంబెరిజ్ విజెరె మీరు నెగెండ్ మనిదెరా ఇజినార్. దేవుణు వెట కూడిఃతి మన్ని పరిజ్ మీ ప్రేమ తోరిస్తు. నెగ్గి మన్నుదాన్ ఒరెన్ మరి ఒరెన్ వన్నిజ్ పాంబిజి వందనమ్కు వెప్తు.

21 పవులు ఇని నాను నా కియుదానె యా వందనమ్కు రాసిన.

22 ఎయెన్బా ప్రబుజ్ ప్రేమిస్ఎండ మహిజ సయిప్ వన్ని ముస్కు రసిద్. యేసు ప్రబు వాజినాన్. రఅ ప్రబువా. 23 ప్రబువాతి యేసుక్రీస్తు దయదర్మం మిజి తోడుః ఆజి మసిద్.

24 క్రీస్తుయేసు వెట కూడిఃతి మన్ని మీరు విజెరె వెట నా ప్రేమ మసిద్. ఆమెన్.

మార్కు

నెల్య కిబిసినిక

ఇక్కడ అపొస్తలుడు ఆతి పవులు కొరింతి సజమ్ది వరిజ్ రాస్తమన్ని రుండి ఉత్తం. యా ఉత్తమ్దు పవులు వన్ని వందిజ్, మరి వాండ్లు ఎలాగ సువార్త పణి కిత్తాన్, మరి అయావలె వన్నిజ్ ఇని ఇనికెజ్ జగ్గితె ఇజి యా ఉత్తమ్దు లావ్ వెస్సినాన్. కొరింతి పట్టుమ్దు మన్ని దేవుణు సజమ్దికార్ సెగొండాన్, అఇవరి బోద వెంజి పవులు అపొస్తలుడు ఆవీన్ ఇజి వెహ్టార్. దన్ని వందిజ్ జవాబ్ వెహ్టాలెకెండ్ యా ఉత్తమ్దు నండొ సజతిజ్ రాస్త మనాద్. దేవుణు ఇష్టమాతి వజ యేసువ్రబునె వన్నిజ్ అపొస్తలుడు లెకెండ్ ఇడ్డాన్ ఇజి రుజావ్ కిజినాన్. వాండ్లు కిత్తి పణిదునొ, వెహ్టా మాటదునొ, వన్ని బత్తుదునొ, ఇనికబా తప్పు మహిజ తోరిస్తు ఇజి వరిజ్ వెన్బాజినాన్. నన్ని పరి వెట మొకొం సుడేజి వర్గిదెజ్ తయారాజి వాజినాన్ ఇజి వెహ్టా ఉత్తం ముగిసినాన్.

యేసుక్రీస్తు సాజి మరీజి నిజీతి వెసుక యాబ్బయ్ ఆరునొ యాబ్బయ్ ఏడునొ పంటెజ్ వెసుక యా ఉత్తం రాస్తాన్ ఇజి దిన్ని వందిజ్ నెస్తికార్ నమ్మిజినార్. పవులు మాసిదోనియదు మహివలె బాణిజ్ యా ఉత్తం రాస్త పాక్తాన్ ఇజిబా వారు నమ్మిజినార్.

1 దేవుణు ఇష్టమాతి వజ యేసు క్రీస్తుజ్ అపొస్తలుడు ఆతి పవులుని మా తంబెరి ఆతి మోతితి కొరింతి పట్టుమ్దు మని దేవుణు సజమ్ది వరిజ్ని అక్కాయ ప్రాంతమ్దు మని దేవుణుదిజ్ నమ్మితి వరిజ్ విజెరిజ్ రాసిని ఉత్తం. 2 మా బుబ్బాతి దేవుణు బాణిజ్ని వ్రబువాతి యేసుక్రీస్తు బాణిజ్ దయాదర్మమ్ని నమాదనం మిజి మనీద్.

ఓదరిసిని దేవుణు

3 ఎస్తివలెబా మా ముస్సు కనికారం మనికాన్ ఆతి బుబ్బ, ఎస్తివలెబా మజి ఓదరిసిని దేవుణు ఆతి, మా వ్రబు ఆతి యేసుక్రీస్తుజ్ బుబ్బ ఆతి దేవుణు పాగిడే ఆపిన్. 4 ఎందనిజ్ ఇహిజ, విజా కష్టమ్కాజ్ దేవుణు మజి ఓదరిసిని ఓదర్చుదాన్ ఎలాగ మర్తి కష్టమ్దు మని వరిజ్బా ఓదరిస్తెజ్ మాపు సత్తుమనికావ్ ఆదెజ్ ఇజి వాండ్లు మా విజా కష్టమ్కాజ్ మజి ఓదరిసినాన్. 5 క్రీస్తు వెట కష్టమ్కు మా బత్తుదు ఎలాగ లావ్ ఆజినెనొ, అయాలెకెండ్నె క్రీస్తు వెట ఓదర్చుబా మా బత్తుదు నిండ్రిజి పాజిజి వాజినాద్. 6 మాపు కష్టమ్దు మనావ్ ఇహిజ అక్క మిజి దేవుణు బాణిజ్ ఒదర్చు దొహ్కెజ్ ఇజిని దేవుణు మిజి రక్సిస్తెజ్ ఇజినె మాపు కష్టమ్దు మనావ్. దేవుణు మజి ఓదరిస్తె మనిక మిజి ఓదర్చు దొహ్కెజ్ ఇజినె. ఎందనిజ్ ఇహిజ, మజి వాతిమని లెకెండ్ కష్టమ్కు మిజి వానివలె, అయాకెజ్ మీరు డిఃసేవండ ఓదరిసివలె అయ ఓదర్చు ఎలాగ మర్తిక ఇజి మీరు నెసినిదెర్. 7 మజి వాతిమని కష్టమ్కాజ్ మీరు ఎలాగ మా వెట కూడేజి మంజినిదెర్, అయాలెకెండ్నె మా వెట ఓదర్చుదుబా కూడేజి మంజినిదెర్ ఇజి మాపు నెసినావ్. అందెజె మీ వందిజ్ మాపు ఆసదాన్ ఎద్రు సూణిక కద్దిండ్ మంజినాద్.

8 తంబెరిజాండె, ఆనియ ప్రాంతమ్దు మాపు ఓదరిసిని కష్టమ్కు మీరు నెసేవండ మండ్రెజ్ ఆవీద్ ఇజి మాపు కొరిజినావ్. మాపు సానావ్సెసు ఇజి ఒడిబితావ్. మజి ఓదరిస్తెజ్ అబ్ ఇ నని నసా కష్టమ్కు మజి వాతె. 9 నిజమె సావుదిజ్ సిక్కు మజి దొహ్కె మనాద్ ఇజి మాపు ఒడేబితావ్. గాని మాపు, మా ముస్సునె ఆదారం ఆవండ, సాతి వరిజ్ నిక్కి దేవుణు ముస్సునె ఆదారం ఆదెజ్ ఇజినె ఇక్కెజ్ విజా మజి జగ్గితె. 10-11 మీరుబా మా వెట కూడేజి పార్దనం కిజి సాయం కిత్తిజ్, దేవుణు గొప్ప పెరి సావు నని కష్టం కాణిజ్ మజి తప్పిస్తాన్. మరి వాని కాలమ్దుబా తప్పిసినాన్. వాండ్లు మరి ఎస్తివలెబా మజి తప్పిసి మంజినాన్ ఇజి వన్ని వందిజ్నె మాపు ఆసదాన్ ఎద్రు సుడేజి మంజినావ్. నండొండార్ పార్దనం కిత్తిజ్, దేవుణు బాణిజ్ అయ పార్దనమ్కు వందిజ్ మజి కనికారం దొహ్కె వందిజ్, నండొండార్ మా వందిజ్ దేవుణుదిజ్ వందనమ్కు వెహ్టార్.

12 మా గర్బం వెహ్టాని సాస్యం ఇనిక ఇహిజ, యా లోకమ్దు మని బత్తుదుబా, మరి మీవెట మన్ని విజా సజతిజ లొఇబా గర్బం గదిన్ఎండ దేవుణు సిత్తిమని నెగ్గి మన్నుదాన్, లోకమ్దు మన్ని పరి బుద్దిదాన్ ఆవండ దేవుణు దయాదర్మమ్ది సత్తుదాన్ బత్తితావ్. దిన్ని వందిజ్ మాపు పాగిడేజినావ్. 13 నద్విదెజ్నొ, పూర్తి అర్దం కిదెజ్ అబ్ ఇ మాటెజ్నొ మాపు మిజి రాస్తెజ్ సిల్లె. 14 ఏలు మీరు మజి సిగం నెస్తి మనిదెర్. గాని వ్రబు ఆతి యేసు మర్తి వాని దినమ్దు మాపు మీ వందిజ్ పాగిడేజి వెహ్టానావ్. అయాలెకెండ్ మా వందిజ్ పాగిడేజి వెహ్టాజ్ అబ్బిలెకెండ్ మీరుబా నజి పూర్తి నెస్తిదెర్లె ఇజి మాపు ఆసదాన్ ఎద్రు సుడేజి మంజినావ్.

15 యాలెకెండ్ మా మన్నుదు నమకం తవ్వండ మన్నిజ్, మిజి రుండి వంతుజ్ లాబం మండ్రెజ్ ఇజి ముజాల మీ డగ్రు వాదెజ్ ఇజి నజి ఉండ్రె ఉదెసం మహాద్. 16 ముజాల మీ డగ్రు వాజి మాసిదోనియ సాండ్రెజ్ ఇజి, మరి మాసిదోనియదాన్ మర్తి మీ డగ్రు వాజి, మీరు యూదయ దెసి సాండ్రెజ్ మజి పోక్కిదెర్ ఇజి నాను ఒడిబితె. 17 యాలెకెండ్ కిదెజ్ ఇజి నాను ఒడిబితెవలె, యాక ఇజిరి సజతి ఇజి నాను ఒడిబితానా? "ఒబ" ఇజి వెహ్టా వెటనె "ఆవద్, ఆవద్" ఇజి వెహ్టాజ్ యాకెజ్ నాను లోకమ్దిజ్ సెందితి లెకెండ్ కిజినానా?

18 దేవుణు నమ్మిదెజ్ తగ్గికాన్ ఇజి మన్ని లెకెండ్నె, మాపు మిజి వెహ్టా మని మాటెజ్ ఎస్తివలెబా 'ఒబ' ఇజినె మంజినె, "ఆవద్" ఇజి వెహ్టాకెజ్ ఆఉ. 19 ఎందనిజ్ ఇహిజ, నావెట, సిలువాను వెట, తిమోతి వెట మీ నడిఃమి సాటె ఆతి మని దేవుణు మరిసి ఆతి యేసుక్రీస్తు 'ఒబ' ఇజినె 'ఆవద్' ఇజినె ఆవతాన్. గాని వన్ని వెట

అక్క ఎస్తివలెబా 'ఒబ' ఇజినె మంజినాద్. 20 దేవుణు సీతి ప్రమాణమ్కు ఎస్సాడు ఆతిజ్బా, అక్కెజ్ విజా క్రీస్తు వెట 'ఒబ' ఇజినె మన్నె. అందెజె దేవుణు గొప్ప పెరికాన్ ఇజి తోరె ఆదెజ్ ఇజి క్రీస్తు వెట 'ఆమెన్' ఇజి మాటు వెస్సినాట్.

21-22 మీ వెట మజిబా క్రీస్తు వెట కూడఃజి గటిజ నిల్పి మంజినకాన్ దేవుణునె. బుర్రదాన్ నూనె వాక్కి కేట కిత్తి లెకెండ్ ఏర్పాటు కిత్తికాన్ దేవుణునె. వన్ని సాంతం ఇజి మా ముస్సు ముద్ర పొక్కి, వెనుక మజి దోహక్తెజ్ మని మేలుజ వందిజ్ రుజాప్ లెకెండ్ వన్ని ఆత్మ ఇని బయాన్ మా మస్సుజ మజి సిత మనాన్.

23 మీ ముస్సు కనికారం మనిజ్నె నాను మరి కొరింతి పట్టుమదు రెవత, ఇని దనిజ్ దేవుణునె సాక్కి. 24 అందెజె మీరు దేవుణు ముస్సు నమకం ఇడ్డ దనిజ్ మీ ముస్సు అతికారం మనికాప్ ఇజి ఆప్వ గాని సర్ల వందిజ్ మీ వెట కూడఃజి పణికినికాప్ లెకెండ్నె. ఎందనిజ్ ఇహిజ దేవుణు ముస్సు మని నమకమదాన్ మీరు గటిజ నిల్పి మంజినదెర్.

2 అందెజె మరి ఉండ్రీ సుటు దుకమ్దాన్ మీ డగ్గు రెవ ఇజి నా మస్సుదు నానె నిర్ణెం కిత. 2 ఎందనిజ్ ఇహిజ, నాను మిజి దుకం తపిస్త ఇహిజ, నా వెట దుకం ఆతికారాతి మీరు అవండ ఎయెర్ నజి సర్ల కిబిన్నార్?. 3 ఎందనిజ్ యా సజతిజ్ నాను మిజి రాస్త ఇహిజ, నాను వానివలె, నజి సర్ల కిబిన్నెజ్ మని వరివెట నజి దుకం రెవండ మండ్రెజ్ వలె ఇజి రాస్త. మరి నజి మని సర్లాదు మీరుబా నావెట సర్ల ఆనిదెర్లె ఇజి మీ వందిజ్ నా మస్సుదు నమకం ఇట్టా మన. 4 మీరు దుకం ఆదెజ్ ఇజి అవద్, గాని మిజి నాను ఎసానో ప్రీమిసిన ఇజి మీరు నెస్సెజ్ ఇజినె, నండో దుకమ్దాన్ మస్సుదు బాద ఆజి, ఎసానో కణెరు వాక్కి మిజి రాస్త మన.

తప్పు కిత్తి వరిజ్ సెమిస్సి వందిజ్

5 ఎయెన్బా దుకం కిబిన్నెజ్ ఇహిజ, నజినె లావ్ అవండ, వాండ్రు మిజి విజెరిజ్ కండెక్ దుకం కిబిస్త మనాన్. అందెజె నజి దుకం కిబిస్తి వందిజ్ నాను గటిజ వెస్తాజ్ అవద్గదె? 6 వన్నిజ్ మీ లొఇ నండొండార్ వెట సీతి సిక్కు సరి ఆనాద్. 7 అందెజె మీరు వన్నిజ్ సెమిసి ఓదరిస్తెజ్ వలె. ఎందనిజ్ ఇహిజ వాండ్రు మరి నండో దుకమ్దు మడుఃగిజి మని లెకెండ్ మండ్రెజ్ అవద్ ఇజి. 8 అందెజె వన్నిజ్ మీరు ప్రీమిసినదెర్ ఇజి మరి వన్నిజ్ మీరు తోరిస్తెజ్ వలె ఇజి నాను బతిమాల్లిన. 9 మీరు విజా దనిజ్ లొజిజి తగ్గికిదెర్ లెకెండ్ మంజినదెరా ఇజి నెస్సెజ్నె నాను మిజి రాస్త మన. 10 మీరు ఎయెరిజ్బా సెమిస్సిజె నానుబా వన్నిజ్ సెమిసిన. మరి ఇనిదని వందిజ్బా సెమిస్సిజె ఇహిజ, మీ వందిజ్ అక్కబా క్రీస్తు ఎద్రు నాను సెమిస్త మన. 11 ఎందనిజ్ ఇహిజ, సయ్యాను మా ముస్సు గెలిస్తెజ్ అవద్ ఇజి నాను సెమిస్త మన్నె. మరి వన్ని సెఇ పణిజ వందిజ్ మాటు నెస్ఇకాట్ అవల్గదె?

కొత్త ఒప్పుమానం వందిజ్ సాటిస్సికార్.

12 క్రీస్తు సువార్త సాటిస్సిజె నాను త్రోయ పట్టుమదు వాతివలె అబ్బె నెగ్గి అవ్కానం దేవుణు నజి సీతాన్. 13 గాని నా తంబెరి ఆతి తీతుజ్ తొవండ నా మస్సుదు నిపాతి సిల్లెండ ఆతిజ్, వరిజ్ నాను సాన్నిన ఇజి వెస్సి అబ్బెణిజ్ మాసిదోనియ సాండ్రెజ్ సాత.

14 గాని మాపు దేవుణుదిజ్ వందనమ్కు వెస్సినాప్. ఎందనిజ్ ఇహిజ, క్రీస్తు వెట కూడఃజి మజి దేవుణు ఎస్తివలెబా గెలిస్తి వరి సర్లదాన్ నడిఃపినాన్. ఉండ్రీ నెగ్గి వాసనం లెకెండ్ విజాబాన్ మాపు సాటిస్సి సువార్తదాన్ క్రీస్తు వందిజ్ విజెరె నెస్తిలెకెండ్ వాండ్రు కిబిన్నార్. 15 దేవుణు రక్కిస్తి వరి నడిఃమి, పాడాఃజి సాన్నిని వరి నడిఃమి మాపు దేవుణుదిజ్ క్రీస్తుది నెగ్గి వాసనం లెకెండ్ ఆత మనాప్. 16 పాడాఃజి సాన్నిని వరిజ్ మాపు సాతి ఒడొల్ది కంపు లెకెండ్ మనాప్. దేవుణు రక్కిస్తి వరిజ్ బత్తు సీజిని నెగ్గి వాసనం లెకెండ్ మనాప్. నిని పణిదిజ్ తగ్గికాన్ ఎయెన్ మనాన్? 17 మహి నండొండార్ లెకెండ్, లాబం రపిద్ ఇజి దేవుణు మాటదిజ్ బేరం కినికావ్ అవప్. దేవుణు బాణిజ్ ఫాకె ఆతివరి లెకెండ్ క్రీస్తు వెట కూడఃజి నీతినిజాయిద్దాన్ దేవుణు ఎద్రు మాపు వర్ణిజినాప్.

3 మరి మజి మాపె మర్రి పాగ్డిఃజి వెస్తాజ్ మొదొల్నినాపా? సెగొండారిజ్ అవ్సరం మని లెకెండ్ మీబాణిజ్నె, మిజి తోరిస్తెజ్ ఇజినె, కీదు పాక్కిని నెల్వ కిబిస్తి ఉత్తమ్కు మజి మండ్రెజ్నా? 2 మా మస్సుజ రాసె ఆతిమని లోకుర్ విజెరె నెసి నద్విజిని ఉత్తమ్కు మీరె. 3 వణకుదాన్ తయార్ కిత్తి బల్లెజ ముస్సు గీస్తి మనిక అవద్, మరి సిరదాన్ రాస్తిక అవద్, గాని లోకురి మస్సు ఇని మెతాని బల్లెజ ముస్సు, మాపు కిత్తి సువార్త పణిదాన్ బత్తిజిని దేవుణు ఆత్మదాన్, రాసె ఆతిమని క్రీస్తుబాణిజ్ వాతి మని ఉండ్రీ ఉత్తమ్నె మీరు ఇజి మీరె తోరిసినదెర్.

4 క్రీస్తు వెట దేవుణు ఎద్రు మా మస్సుదు నస్సా నమకం మనాద్. 5 మాపు కిజిని పణిజ్ విజా మా సత్తుదాన్ మాపె కిజినాప్, ఇజి ఒడఃబిదెజ్ మా లొఇ ఇనికబా సిల్లెద్. యాకెజ్ కిదెజ్ మని సత్తు దేవుణు బాణిజ్నె వాతాద్. 6 వాండ్రె మజి కొత్త ఒప్పుమానమ్దిజ్ నెగెండ పణికినికార్ ఇజి ఇట్ట మనాన్. కొత్త ఒప్పుమానం ఇహిజ అనరమ్దాన్ రాస్తిక అవద్, బత్తిజిని దేవుణు ఆత్మదాన్ వాతిక. ఎందనిజ్ ఇహిజ అనరమ్దాన్ రాసె ఆతి ప్రమాణం సాపు తపిసినాద్. ఆత్మదాన్ వాతి ప్రమాణం పాణం సీజినాద్.

కొత్త ఒప్పుమానం ఇని గొప్ప పెరి సజతి.

7 వణకు బల్లెజ ముస్సు అనరమ్దాన్ రాసె ఆతిమని సాపు తపిస్తి ప్రమాణం నస్సా గొప్ప పెరిక మహాద్. 8 ఇహిజ, మోసి మొకొం తగిజి సాన్నిని జాయ్దాన్ మహిజ్బా, ఇస్రాయేలు లోకుర్ వన్ని మొకొమ్దు తినాజ్ బెస్సెజ్ అల్ఇ లెకెండ్ గొప్ప పెరి జాయ్దాన్ మహాన్. అక్క అయాలెకెండ్ పెరిక మహాద్ ఇహిజ, దేవుణు ఆత్మదాన్ మని పణిజ్ దన్నిజ్ ఇంక ఎస్సానో గొప్ప పెరిక అవదా? 9 లోకురిజ్ తీర్పు తీరిసి సిక్కు సీని పణి నస్సా గొప్ప పెరిక మహాద్ ఇహిజ, లోకురిజ్ సీతి నిజాయితిదికార్ కిజిని యా పణి, దనిజ్ ఇంక ఒడ్డె పెరిక మంజినాద్. 10 ఏలు మనిక ఒదె గొప్ప పెరిక ఆతిక ఆతిజ్, దినిజ్ పాలిసి సుడఃతిజ, ముజాల గొప్ప పెరిక మహి దనిజ్ ఏలు ఇనిక సిల్లెండ ఆతాద్. 11 అనరమ్దాన్ రాసె ఆతి, కండెక్ కాలం మహి యా ప్రమాణం యాలెకెండ్ గొప్ప పెరిక వాతాద్ ఇహిజ, ఎస్తివలెబా మంజిని యా కొత్త ప్రమాణం మరి ఒదె గొప్ప పెరిక మంజినాద్.

12 మాపు యాలెకండ్రో ఆసదాన్ ఎద్రు సుడేజి మంజినాట్. అందెజె మా మన్నుదు దయరమ్దాన్ మనావ్. 13 మాపు మోసె లెకండ్రో ఆవ్. ఎందనిజ్ ఇహిజ ఇస్రాయేలు లోకుర్ వన్ని మొకొమ్దు మని తగిజి సాని జాయ్దిజ్ బేస్ఎండ మోసె వన్ని మొకొమ్దు బుకుర్ ఇట్టాన్. 14 గాని వరి మన్ను గుడిః ఆత మహాద్. అందెజె ఏలుబా వారు వడాఃయి ఒప్పుమానం సద్విజినివలె వరి మన్నుజ ముస్సు అయా బుకుర్ ఏలుబా లాగి ఆవండ అయా లెకండ్రోనె మనాద్. ఎందనిజ్ ఇహిజ క్రీస్తు వెటలె అక్క లాగి ఆజినాద్. 15 ఏలుదాక మోసె రాస్తి మనికెజ్ వారు సద్విజిని వలె వరి మన్నుజ ముస్సు ఉండ్రీ బుకుర్ మని లెకండ్రోనె మనాద్. 16 గాని ఎయెన్బా ఎస్తివలెబా ప్రబువతి యేసుక్రీస్తు దరిజ్ మహిజా వన్ని బాణిజ్ బుకుర్ లాగి ఆజినాద్.

17 ప్రబు ఇహిజ దేవుణు ఆత్మనె. ప్రబు ఆత్మ మజి విడుఃతల కిజినాద్. 18 మాటు విజెటె బుకుర్ మన్ఇ మొకొమ్దాన్, ఆదమ్దాన్ జాయ్ తోరితి లెకండ్రో, ప్రబు జాయ్ తోరిసినాట్. ఆత్మ ఆతి ప్రబుబాణిజ్ వాని జాయ్దాన్ మరి ఒద్దె జాయ్ ఆజి వన్ని మూర్తి లెకండ్రో ఆజి మంజినాట్లె.

ఒడోల్ ఇని ఇస్కా కుండ లోఇ మన్ని ఆస్తి

4 దేవుణు కనికారమ్దానె మాపు దేవుణు పణిదు మనావ్. అందెజె మాపు మన్నుదు దయరం సిల్లెండ్రో ఆవ్. 2 మాపు సిగు లాగ్నిని డాఃజిజి కిజిమహి పణిజ్ డిఃస్తు సిల్లావ్. మాపు మోసెం కిదెజ్ ఇజి సుడేవ్. మాపు దేవుణు మాట మని లెకండ్రో దనిజ్ మారిస్ఎండ వెహినావ్. మాపు మోసెం కిదెజ్ ఇజి సుడేవ్. మాపు దేవుణు మాట మన్ని లెకండ్రో మారిస్ఎండ వెహినావ్. అక్కాదె ఆవండ నిజమాతికెజ్ విజెరిజ్ నెసిని లెకండ్రో వరి గర్బమ్దిజ్ ఎద్రు మజి మాపె నెగండ్రో దేవుణు ఎద్రు బత్తిజినావ్. 3 మాపు వెహినా సువార్త డాఃజె ఆతి మహిజ, అక్క పాడాఃజి సాస్నిని వరిజె డాఃజె ఆత మనాద్. 4 దేవుణు మూర్తి ఆతిమని క్రీస్తు జాయ్ ఆతి సువార్తదిజ్ జాయ్, వరిజ్ తోర్ఎండ మంజిని వందిజ్ యా తరమ్దిజ్ అతికారి ఆతి సెతూసు నమకం సిల్లికార్ ఆతివరి మన్నుది కణకెజ్ గుడ్డి కిబ్తాన్. 5-6 "సీకటిదాన్ జాయ్ ఆవిద్", ఇజి వెహి దేవుణునె, క్రీస్తు మొకొమ్దు మని జాయ్ దేవుణు గెణమ్ది జాయ్ మజి మండ్రెజ్ ఇజి వన్ని జాయ్ మా మన్నుజ జాయ్ సీని లెకండ్రో మజి సిత్త మనావ్. అందెజె మజి మాపె ఆజి సువార్త సాటిస్వె. గాని యేసుక్రీస్తు ప్రబు ఇజి ఒడేబిజి, మాపు యేసు వందిజ్ మిజి పణి కనికావ్ ఇజి సువార్త సాటిసినావ్.

7 అహిజ విజా దన్నిజ్ మిస్తి యా సత్తు మాది ఆవిద్, గాని దేవుణు బాణిజ్ వాతిక ఇజి తోరె ఆదెజ్ ఇజి యా నెగ్గి ఆస్తి మా ఒడోల్ ఇని ఇస్కా కుండెజె లోఇ మజి దోహ్కా మనాద్. 8 విజా దరిబాణిజ్ గటిజ సీపె ఆజినికావ్ గాని పెడెహికావ్ ఆవ్. ఇనిక కిదెజ్నో ఇజి తెల్లిఎండ ఆతికావ్ గాని ఇన్ని ఆస సిల్లికావ్ ఆవ్. 9 హిమ్సెజి కిబె ఆజినావ్ గాని డిఃసి సిబె ఆతికావ్ ఆవ్. డెయె ఆజి అడిగి అర్తికావ్ గాని నానం ఆజినికావ్ ఆవ్. 10 మాపు ఎస్తివలెబా మా ఒడోల్దు యేసు సాపుదిజ్ బరిసినావ్, ఎందనిజ్ ఇహిజ యేసు బత్తుబా మా ఒడోల్దాన్ తోరె ఆదెజ్ వలె ఇజి. 11 ఏలు బత్తిజినికావ్ ఆతి మాపు ఎస్తివలెబా యేసు వందిజ్ సాపుదిజ్ ఒపెజె ఆజినావ్. ఎందనిజ్ ఇహిజ నానం ఆజి సాని మా ఒడోల్దు యేసు బత్తు తోరె ఆదెజ్ వలె. 12 అందెజె సాపు మా లోఇ పణి కిజినాద్ గాని మీ లోఇ పాణం పణి కిజినాద్.

13 "నాను నమ్మిత మన్ను. అందెజె నాను వర్గిత మన్ను", ఇజి దేవుణు మాటదు రాస్త మనాద్. అయాలెకండ్రో మన్ని మన్నుదాన్ మాపుబా నమ్మిత మనావ్, అందెజె వర్గిజినావ్. 14 ఇనిక ఇహిజ, ప్రబు ఆతి యేసుజ్ సాతి వరిబాణిజ్ నిక్తికాన్, యేసు వెట మజిబా నిక్తి మీవెట వన్ని ఎద్రు నిల్పాన్ ఇజి మాటు నెసినాట్.

15 దేవుణు దయా దర్మం మరి ఒద్దె నండోండారిజ్ అందిజి సార్నివలె, నండో పార్దనమ్కు కిజి, మరి వందనమ్కు వెహి వారు దేవుణుదిజ్ గవరం సీనారె. యాకెజ్ విజా మీ వందిజ్నె.

16 అందెజె మాపు మన్నుదు దయరం సిల్లికావ్ ఆవ్. వెల్లి తోరె ఆజిని మా ఒడోల్ పాడాఃజి సాస్నినాద్ గాని మా మన్నుదు మాపు రోజా రోజాదిజ్ కొత్త సత్తు మనికావ్ ఆజినావ్. 17 మాపు ఓరిసిని యా సాణెం మంజిని ఇజిరి కష్టమ్కు, మజి వనకాజ్ విజా మిస్తిక ఆతి ఎలాకాలం మంజిని గవరం దోహ్కాన్. 18 అందెజె మాపు తోరిజిని వనక ముస్సు మన్ను ఇడేవండ, తోర్ఇ వనక వందిజ్నె ఎద్రు సుడేజినావ్. ఎందనిజ్ ఇహిజ తోర్తికెజ్ సెగం కాలమ్నె మంజిని, తోర్ఇకెజ్ ఎలాకాలం మంజినికెజ్.

5 యా బూమి ముస్సు మాపు బత్తిజిని గుడారం † లెకండ్రో మని మా ఒడోల్ ఎస్తివలె నానం ఆతి సాహిజ్బా, మా వందిజ్ దేవుణు మంజిని బాడిదు లోకు కిక్కాణిజ్ తోహ్కా ఆవండ, దేవుణు తయార్ కిత్తి మన్ని ఎలాకాలం మంజిని ఉండ్రీ ఇల్లు మంజినాద్ ఇజి మాపు నెస్నావ్. 2 పరలోకమ్దు మన్ని ఇల్లు లెకండ్రో మన్ని ఒడోల్దు మండ్రెజ్ ఇజి ఆసదాన్ యా గుడారం ఆతి ఒడోల్దు మాపు ములుజిజినె మంజినావ్. 3 మాపు అబ్బె ఒడోల్ మన్ని వరి లెకండ్రో మన్నిజ్ మా ఆత్మ డుమ్డ లెకండ్రో తోర్వె. 4 గుడారమాతి యా ఒడోల్దాన్ మన్నివలె మాటు ములుజిజి బరు పిండ్రెజిని వరిలెకండ్రో మంజినావ్. యా ఒడోల్ డిఃసి సీదెజ్ ఇజి సిల్లెద్. గాని దేవుణు మంజిని బాడిఃదు మని ఒడోల్దు మండ్రెజ్ ఇజి ఆస ఆజినావ్. అందెజె సాపు మన్ని యా ఒడోల్ ఎసిజ్బా సాపు సిల్లి పాణం మని ఒడోల్ లెకండ్రో మార్నాద్లె. 5 వన్ని ఆత్మదిజ్ బయాన్ లెకండ్రో మజి సెతిమనికాన్ ఆతి దేవుణునె దిన్ని వందిజ్ మజి తయార్ కిత్త మనావ్. 6 అందెజె మాపు ఎస్తివలెబా మన్నుదు దయరం మనికావ్. మాపు యా ఒడోల్దు ఇబ్బె బత్తిజిని దాక ప్రబు బాణిజ్ దూరం మనావ్ ఇజి నెసినావ్.

7 మాపు దేవుణు ముస్సు మని నమకమ్దానె బత్తిజినావ్. కణకెజె తోర్తిని వన్నిక దటాజ్ ఆవిద్. 8 యా ఒడోల్దు బత్తిని దన్నిజ్ ఇంక, యాక డిఃసి సిజి ప్రబు వెట మంజినికాదె మజి ఒదె ఇస్టం, దిన్ని వందిజ్ మజి మన్నుదు దయరం మనాద్, ఇజి నాను వెహినా. 9 అందెజె, మా ఒడోల్దు ఇబ్బె బత్తిజి మహిజ్బా, యాక డిఃసి సిజి ప్రబు వెట మహిజ్బా వన్నిజ్ ఇస్టమాతి లెకండ్రో మండ్రెజ్ ఇజి మాపు గురి సుడేజినావ్. 10 ఎందనిజ్ ఇహిజ ఒరెన్ ఒరెన్ యా ఒడోల్దాన్ మహివలె కిత్తి పణిజె వందిజ్, అయాలెకండ్రో నెగ్గికెజ్ ఆతిజ్బా, సెఇకెజ్ ఆతిజ్బా దన్నిజ్ తగితి లెకండ్రో దోహ్కా వందిజ్ మాటు విజెటె క్రీస్తు నాయం తీరిస్సి బాడిఃదు తోరె ఆదెజ్ వలె.

† ఇల్లు, గుడుస ఇజిబా ఒడేబిజెజ్ ఆనాద్

మహి వరిజ్ దేవుణు వెట కుల తోహాపిన్ని పణి

11 అందెజె దేవుణుదిజ్ ఎస్సానొ తియెలాజి మండ్రెజ్ ఇజి నెసిసె, మహి వరిజ్ అయాలెకెండ మండ్రు ఇజి బుద్ది వెహ్సినావ్. మాపు ఎలాగ మర్తికావ్ ఇజి దేవుణు నెసిసాన్. మీ గర్బం ఎద్దు మీరుబా మజి నెసిసెదెర్ ఇజి మాపు ఆస ఆజినావ్. 12 మరి మాపు మీ ఎద్దు మా వందిజ్ పాగ్డిజి వెహ్సెజ్ ఇజి సుడె:వ్, గాని మా వందిజ్ పాగ్డిజెదెజ్ మిజి ఉండ్రె అవ్కాసం సీజినావ్. ఎందనిజ్ ఇహిజ మన్నుదు మనికెజ్ నెవ్విండ, వెల్లి తొర్నికెజ్ సుడె:జి పాగ్డిజి వర్గిజిని వరివెట మర్రి వెహ్సెజ్ మీరు అట్టికిదెర్ ఆదెజ్ ఇజినె. 13 మాపు వెరిదికావ్ లెకెండ మనావ్ ఇహిజ అక్క దేవుణు వందిజెనె. నెగ్గి బుద్ది మనికావ్ ఇహిజ అక్క మీ వందిజెనె. 14 క్రీస్తు ప్రేమ మజి బలవంతం కిజి నడిపెసినాద్. ఎందనిజ్ ఇహిజ విజెరె వందిజ్ ఒరెన్ సాతాన్ అందెజె విజెరె సాతాన్ ఇజి ఇని అనుమానం సిల్లెండ నెసిసాన్. 15 మరి, వాండ్రు విజెరె వందిజ్ సాతాన్ ఇజి బత్తిజినికార్ ఏలుదాన్ వరి వందిజెనె బత్తివండ వరి వందిజ్ సాజి మర్రి నిజేతి వన్ని వందిజెనె బత్తిదెజ్ ఇజి నెసిసాన్.

16 అందెజె ఏలుదాన్ మాపు ఎయెర్ వందిజెబా యా లోకమ్దు మనికార్ ఒడె:బిని లెకెండ ఒడె:బివ్. క్రీస్తుజ్ వందిజెబా ముజాల యా లెకెండెనె ఒడె:బితావ్ గాని ఏలుదాన్ వన్ని వందిజె అయాలెకెండ ఒడె:బివ్. 17 అందెజె, ఎయెన్బా క్రీస్తు వెట కూడి:తిజ, వాండ్రు కొత్తాజ్ తయార్ ఆజినాన్. పడాయెకెజ్ విజా సాహె, ఇదిలో విజా కొత్తాకెజ్ ఆతె. 18 యాకెజ్ విజా దేవుణు బాణిజెన్ ఆతె. దేవుణు వెట పగాతికాల్ మజి క్రీస్తు వెట, దేవుణు మజి వన్నిజ్ కూలెజ్ లెకెండ కిత్తాన్. మరి మహికార్ దేవుణు వెట వన్నిజ్ కూలెజ్ లెకెండ తయార్ కిని పణిబా మజి ఒపజెప్తాన్. 19 అహిజ, దేవుణు లోకురి పావమ్కు విజా వరి మున్నునె మొవ్విండ, లోకమ్దు మని వరిజ్ క్రీస్తు వెట వన్నిజ్ కూలెజ్ లెకెండ కిత్తాన్. మహి వరిజ్ దేవుణు వెట కూలెజ్ లెకెండ కిబిన్ని అయ మటెజ్ మజి ఒపజెప్తాన్. 20 అందెజె మాపు క్రీస్తుజ్ బోగటు వెహ్సెకావ్. దేవుణు మా వెట మిజి బతిమాలజిని లెకెండ వర్గిజినాన్. మీరు దేవుణు వెట పగాతికిదెర్ లెకెండ మన్విండ వన్నివెట రాజినమాజి వన్నిజ్ కూలెజ్ లెకెండ మండ్రు ఇజి మాపు క్రీస్తు వందిజె మిజి బతిమాలజినావ్. 21 మాటు క్రీస్తు వెట దేవుణు ఎద్దు సీతినిజాయి మనికాల్ ఆదెజ్ ఇజి దేవుణు ఇని పాపం సిల్లికాన్ ఆతి క్రీస్తుజ్ మా వందిజె పాపం ఆదెజ్ ఇల్తాన్.

6 దేవుణు వెట జత కూడి:జి పణికినికావ్ ఇజి మపు మిజి బతిమాలజినిక ఇనిక ఇహిజ, దేవుణుబాణిజ్ మిజి దోహొక్తి మన్ని వన్ని దయా దర్మం పణిదిజ్ రెజదని లెకెండ మీరు కిదెజ్ అవద్. 2 "సిను మొరొ ఆతిక తగితి సమ్యమ్దు నాను వెహమన్ను. రక్సిస్తెజ్ మన్ని రోజాదు నాను మిజి సాయం కిత మన్ను ఇజి వాండ్రు వెహ్సినాన్", ఇజి దేవుణు మాటదు రాస్త మనాద్. అందెజె నాను వెహ్సిన, ఇక్కాదె దేవుణుది తగితి సమయం. ఇక్కాదె దేవుణు రెసిసిని రోజా.

వవులుజ్ వాతి కష్టమ్కు

3 ఎయెరిజెబ ఇని తొరో ఇడె:ఎండ మపు కిజిని విజా పణిదు ఎలాగ మర్రి నిందబా రెఎండ మాపు సుడె:జినావ్. 4 విజా వన్యా లొఇ దేవుణు వందిజ్ పణి కినికావ్ ఇజి మజి మాపె తోరిసినావ్. ఎలగ ఇహిజ కష్టమ్కు విజా గొప్పజ ఒరిసినిబాన్, ప్రమెజ లొఇ బాద ఆనిబాన్, దుకమ్దు, 5 డె:యె ఆనిబాన్, జెలిదు మన్నిబాన్, మహికార్ గొడె:బ అనిబాన్, కష్టబాడె:జి పణి కినిబాన్, నిర్ది సిల్లి రెయ్కాజ్, బజ ఆతివలె, దేవుణు వందిజ్ పణికినికావ్ ఇజి మజి మాపె తోరిసినావ్. 6 మాపు ఇని తప్పుబా సిల్లెండ మహావ్. అర్దం కిజి నెసినిబాన్, ఒరిసినిబాన్, దయ ఆనిబాన్, దేవుణు ఆత్మ వెట, కల్లి సిల్లి ప్రేమదాన్, 7 నిజమాతి మాటెజ్ వర్గిని దన్ని లొఇ, దేవుణు సత్తు లొఇ, ఉణిర్ డెబ్బ కిక్కాణిజ్ సీతి నిజాయితి ఇని ఆయుదమ్కు అస్సిబాన్, 8 మర్యాద సిత్తిబాన్, సిగు ఆతిబాన్, పాగ్డి: ఆనిబాన్, సెఇ మటెజ్ వెహె ఆనిబాన్ దేవుణు వందిజె పణికినికావ్ ఇజి మజి మాపె తోరిసినావ్. నిజమాతికెజ్ మావ్ వర్గిజినావ్ గాని అబద్దం వర్గినికావ్ ఇజి లోకుర్ మజి ఒడె:బిజనార్. 9 విజెరె బాగ నెస్తికార్ గాని ఎయెర్బా నెస్ఇ వరిలెకెండ మనావ్. సాజిని వరిలెకెండ మహిజెబా మాపు బత్తిజినావ్. డె:యె ఆజినావ్ గాని సపె ఆవ్. 10 దుకమ్దాన్ మన్నికావ్ గని ఎస్తివలెబా సర్ద మన్నికావ్. బీదాదికావ్ గాని నండొండారిజ్ ఆస్తి మన్నికార్ కిజినావ్. ఇనికబా సిల్లికావ్ గాని విజా మన్నికావ్.

11 కొరింతి పట్టువదికిదెరా, ఇనికబా డావ్విండ మా మన్నుదు మన్నికెజ్ విజా మీవెట మాపు వర్గిత మనావ్. 12 మాపు మీ వందిజె ప్రేమదాన్ కిక్కు సాస్పినావ్. మీరు మూక్తి కిక్కుబా మా వందిజె సావ్ ఇదెర్. 13 మీరు నా కొడె:ర్ ఇజి మిజి యా లెకెండ వెహ్సిన. మాపు మీ వందిజె కిత్తి లెకెండ మీరుబా మా వందిజె కిదు. మా వందిజె మీ ప్రేమ తోర్పు.

సమ్మిఇ వరి వెట జత్తు కూడె:దెజ్ అవద్.

14 సమ్మిఇ వరివెట మీరు జత్తు కూడి:జి మన్యాల్. సీతి నిజాతిమనికార్ని సెఇకార్ ఎలాగ కూడి:జి మండ్రెజ్ అట్టె? జాయ్ని సీకటి ఎలాగ ఉండ్రెబాన్ కూడి:జి మండ్రెజ్ అట్టె? 15 క్రీస్తుజ్ పగాతికాన్ ఆతి బెలియాలుదిజ్ † క్రీస్తు వెట ఇని పాత్తు మనాద్. సమ్మితి వరిజ్ సమ్మిఇ వరిజ్ ఇని పాత్తు మనాద్? 16 దేవుణు గుడిదిజ్ బొమ్మెజ వెట ఇని పాత్తు మనాద్? మాపు బత్తిజిని దేవుణుది గుడి: ఆత మనావ్. అహిజ దేవుణు వెహ్సె లెకెండెనె, "నాను వరివెట బత్తిజి వరివెట నడిసె. నాను వరిజ్ దేవుణు ఆజి మంజినాల్. వారు నా లోకర్ ఆస మంజినార్". 17 "అందెజె వరి బాణిజ్ వెల్లి వాజి కేట మండ్రు", ఇజి ప్రబు వెహ్సినాన్. "నుబారం సిల్లి ఇని దనిజెబా మువ్మాట్, నాను మిజి డగ్రు కిసె", 18 "నాను మిజి బుబ్బ ఆస మంజిన, మరి మీరు నజి మరిసిర్ గాల్నిక్ ఆనిదెర్లె", ఇజి విజా సత్తుజ్ మనికాన్ ఆతి ప్రబు వెహ్సినాన్".

7 నజి ఇస్టమాతి తంబెరిజాండె, దేవుణు మజి యాలెకెండ ప్రమాణమ్కు సిత్త మనాన్. అందెజె ఒడె:ల్దిజెని ఆత్మదిజ్ సెఇకెజ్ కిజిని విజా వనక బాణిజ్ దూరం మంజి మజి మాటె నుబారం కిజి, దేవుణుదిజ్ గొప్ప మర్యాద సీజి, పూర్తి నెగ్గెకాల్ ఆజి మంజినాల్. 2 మీ మన్నుజ మజి బాడ్డి సిదాల్. మాపు ఎయెరిజెబా ఇని తప్పుబా కిపెతావ్. ఎయెరిజెబా పాడె: కిపెతావ్. ఎయెరిజెబా ఇనికబా మోసం కిజి లాగ్గె అపెతావ్. 3 మీరు తప్పు కిత్తిదెర్ ఇజి మీ మున్ను తప్పు మోప్పెజ్ ఇజి నాను ఇక వెహ్. ఎందనిజ్ ఇహిజ, నాను ముజాల వెహ్ మన్ని లెకెండ మీరు మజి నండొ డగ్రుహికిదెర్. అందెజె మాపు బత్తితిజెబా మీ వెటనె,

† బెలయాల్ ఇహిజ సయ్యాన్

సాతిజ్బా మీ వెలనె ఎస్తివలెబా మంజినావ్. 4 మీ వందిజ్ నా మన్నుదు నండొ దయరం మనాద్. మీ వందిజ్ నాను గొప్పు పొగ్డిజిన. నాను ఓదర్పుదాన్ నిండ్రిత మన్ను. నజీ నండొ కష్టమ్కు వాతె గాని నాను గొప్పు ఓదర్పుదాన్ మన్ను.

5 మాపు మాసిదోనియాదు వాతి వెననుకబా కండెకేబా రోవ్మదెజ్ అటవ్తావ్. విజా దరిజాణిజ్ మజీ కష్టమ్కునె మహా. వెల్లిహాన్ గొడబెజ్, మా లొఇ ఇహిజ తియెల్దాన్ మహావ్. 6 గాని ఇని ఆన సిల్లెండ అడిగి అర్తి వరిజ్ ఓదసిసిని దేవుణు, తీతు వాతిజ్ వన్నివెట మజీ ఓదరిస్తాన్. 7 వాండ్రు వాతి దని వెలనె ఆవండ, మీరు వన్నిజ్ ఓదరిస్తే దనివెటా దేవుణు మజీ ఓదరిస్తాన్. నా వందిజ్ మీ మన్నుదు మని ప్రేమ వందిజ్, మీరు నా వందిజ్ నండొ దుకం ఆతి వందిజ్, మరి నా వందిజ్ మీ మన్నుదు ఎస్సా ఆన మనాద్ ఇజి వాండ్రు నజీ వెప్తాన్. అందెజె నాను మరి ఒదె గొప్పు సర్ల ఆత. 8 నాను మిజీ రాస్తి ఉత్తమ్దాన్ మీరు దుకం ఆతిజ్బా, నజీ దని వందిజ్ విసారం సిల్లెద్. అయ ఉత్తం మిజీ సెగం రొస్కు దుకం కిబిస్తాద్ ఇజి నెస్తానె విసారం అస్త. 9 గాని నాను ఏలు దని వందిజ్ సర్లదాన్ మన. మీరు దుకం ఆతి వందిజ్ ఆవద్, గాని మీరు అయ దుకమ్దాన్ దేవుణు ఎద్రు మీ తపుజ్ ఒపుకొడెజి మారు మన్ను పాందితిదెర్ ఇజి నాను సర్లదాన్ మన. దేవుణు ఇష్టమాతి వజనె మీరు దుకం ఆతిదెర్, అందెజె దనివెట మిజీ ఇనికబా నష్టం రెవత. 10 దేవుణు ఇష్టమాతి వజ వాజిని దుకమ్దాన్, దేవుణు మిజీ రక్సిన్సి లెకెండ్ మీ లొఇ మారు మన్ను పుటిసినాద్. అయ మరు మన్ను దుకం పుటిసినద్. లోకమ్దిజ్ సెందితి దుకం సాపు తపిసినాద్. 11 దేవుణు ఇష్టమాతి వజ వాతి యా దుకమ్దాన్ మీరు ఎసానో జాగర్ల మనికెదెర్ ఆతిదెర్. మరి మీరు కల్తి సీలికిదెర్ ఇజి తోరిస్తెజ్ ఎసానో ఆన, తప్పు పణి వందిజ్ ఎసానో కోపం రెపిస్తాద్. మరి, దేవుణు వందిజ్ ఎసానో తియెల్, దేవుణు వందిజ్ ఎసానో ప్రేమ, దేవుణు వందిజ్ పణి కిదెజ్ మన్నుదు ఎసానో ఆన, నయం జగ్గిజి మండ్రెజ్ ఇజి ఎసానో ఆన, మీ లొఇ పుటిస్తాద్. యా విజా నజతిజ వందిజ్ మీరు నెగ్గికిదెర్ ఇజి రుజావ్ కిబె ఆతె.

12 అందెజె, నాను మిజీ ఉత్తం రాస్తిక అయ సెఇ పణి కిత్తి వన్ని వందిజ్ ఆవద్. వాండ్రు కిత్తి పణిదాన్ దుకం ఆతి వన్ని వందిజ్బా ఆవద్. గాని మా వందిజ్ మీ మన్నుదు ఎసానో ఆన అజినిదెర్ ఇజి దేవుణు ఎద్రు మీరు నిజం నెస్సెజ్ ఇజిని నాను రాస్త. 13 యా విజా వన్కా వందిజ్ మాపు ఉసార్ కిబె ఆతావ్. అక్కాదె ఆవండ, మీరు తీతు మన్ను సలాజ్ కిత్తి వందిజ్ వాండ్రు సర్లదాన్ మనికబా నుడెజి మాపు మరి ఒదె సర్ల ఆతావ్. 14 నాను మీ వందిజ్ తీతు ఎద్రు పొగ్డిజి వెప్తి వందిజ్ మీరు నజీ సిగు కిఇతిదెర్. మాపు మిజీ వెప్తి విజా మాటెజ్ ఎలాగ నిజమాతికెజ్నో, అయాలెకెండెనె మీ వందిజ్ తీతు వెట పొగ్డిజి వెప్తికెజ్బా నిజం ఇజి తోరె ఆతె. 15 మీరు విజిదెరె వన్నిజ్ లొజిజి, ఎసానో తియెలాజి ఆజి, పణకుదాన్ వన్నిజ్ డర్లు కిత్తిదెర్. అక్క ఎత్తు కినివలె మీ వందిజ్ వన్ని మన్నుదు మని ప్రేమ మరి ఒదె పిరిజినాద్. 16 మరి మీ వందిజ్ మన్నుదు పూర్తి దయరమ్దాన్ మండ్రెజ్ అనాద్ ఇజి నాను సర్ల మన్ను.

దేవుణుదిజ్ సంత సీని వందిజ్

8 తంబెరిజాండె, మాసిదోనియాదు మన్ని దేవుణు సజమ్కాజ్ దేవుణు తోరిస్తి మన్ని వన్ని దయా దర్మం వందిజ్ మీరు నెసి మండ్రెజ్ ఇజి మాపు కోరిజినావ్. 2 వరిజ్ వాతి గొప్పు పెరి కష్టమ్కాణిజ్ వారు పరిస కిబె ఆతార్ గాని ఒదె సర్ల ఆజి మహార్. వారు గొప్పు బీదదికార్ అతి మహిజ్బా దేవుణు వందిజ్ నండొ సీదెజ్ అక్క వరిజ్ అడ్డు కిపితాద్. 3 నాను పరి వందిజ్ వెప్సిని సాస్యం ఇనిక ఇహిజ, వరిజ్ ఎసా సీదెజ్ అటూర్ అయాలెకెండెనె వారు సిత్తార్, నిజమె వరిజ్ సీదెజ్ అట్టి దనిజ్ ఇంక లావ్నె సిత్తార్. పరి సాంత ఇష్టమ్దాన్ సిత్తార్. 4 నమ్మిత్తి పరి వందిజ్ కిజిని యా సాయమ్దు పరి వంతుజ్ కూడుప్పెజ్ ఇజి పరిజ్ అవ్కాసం సీదెజ్ వారు మజీ నండొ బతిమాలితార్. 5 వారు కిత్తిక మాపు ఒడిబితి లెకెండ్బా ఆవతాద్. ముజాల వరిజ్ వారె ప్రబుదిజ్ సిత్తార్. వెనుక దేవుణు ఇష్టమాతి వజ వరిజ్ వారె మజీబా సిత్తార్. 6 అందెజె తీతు మీ లొఇ మొదలొస్తి లెకెండ్, కనికారమ్దాన్ కిజిని యా పణి పూర్తి కిదెజ్ ఇజి మాపు వన్నిజ్ ఉసార్ కిబిస్తావ్. 7 మీరు విజా వన్కా లొఇ ముజాల మనికిదెర్. అహిజ దేవుణు ముస్కు మని నమకమ్దు, మాటెజ వర్గిని దని లొఇ, గెణమ్దు, మహిపరిజ్ సాయం కిదెజ్ మన్ని ఆసాదు, మా వందిజ్ మన్ని ప్రేమాదు ముజాల మన్ని లెకెండ్ నమ్మిత్తి పరి వందిజ్ సీని కనికారమ్దాన్ కిజిని యా పణిదుబా మీరు ముజాల మండ్రెజ్ వలె.

8 ఇక్క నాను మిజీ ఉండ్రె ఆద్ర సిత్తి లెకెండ్ వెహ్, గాని సీదెజ్ ఇజి మహిపరిజ్ మన్ని ఆనదిజ్ పోలిసి నుడెజి, మీ మన్నుదు మని ప్రేమ ఎస్సా నిజమాతిక ఇజి నెస్సెజ్ ఇజి నాను వెప్తా. 9 మీరు మా ప్రబు ఆతి యేనుక్రీస్తు దయాదర్మమ్దిజ్ నెస్సిదెర్గదె? వాండ్రు గొప్పు ఆస్తి మన్నికాన్ గాని వాండ్రు మీ వందిజ్ బీదవాండ్రు ఆతాన్. ఎందనిజ్ ఇహిజ, మీరు ఆస్తి మన్నికిదెర్ ఆదెజ్ ఇజి వన్నిజ్ వాండ్రె బీదవాండ్రు కిబె ఆతాన్.

10 యా సజతిజ వందిజ్ మీరు యా లెకెండ్ కిత్తిజ బాగ మనాద్ ఇజి నాను ఒడిబిజిన. సీరొండు, యా లెకెండ్ కిదెజ్ ఆన మనికిదెరె ఆవండ, సీదెజ్బా మీరె ముజాహికిదెర్. 11 అందెజె, మీరు సీదెజ్ ఎలాగ ఆన అజినిదెరె, దనిజ్ తగితి లెకెండ్, ఇహిజ మిజీ కల్గితి మనిదనిజ్ తగితి లెకెండ్ సీజి యా పణి పూర్తి కిదు. 12 ఒరెన్ వన్నిజ్ సీదెజ్ ఇజి మన్ను మహిజ, అట్టి దన్నిజ్ ఇంక మిస్తి ఆవద్, గాని వన్నిజ్ మని దన్నిజ్ తగితి లెకెండ్ సిత్తిజ, అక్క దేవుణుదిజ్ ఇష్టమాతిక ఆజినాద్.

13 మహి వరిజ్ సులు ఆజిమంజి మిజీ లావ్బరు మండ్రెజ్ ఇజి ఆవద్ గాని విజెరిజ్ ఉండ్రె లెకెండ్ బరు మన్నిద్ ఇజిని మాపు కోరిజినావ్. 14 ఏలు మిజీ లావ్మనిక వరిజ్ అవ్నరమ్క వందిజ్ సిత్తిజ, వరిజ్ లావ్మన్నవలె మీ అవ్నరం వందిజ్ మర్రి సీనార్లె. అయాలెకెండెనె విజెరిజ్ ఉండ్రె లెకెండ్ మంజినాద్. 15 "లావ్ పెప్తి వన్నిజ్ ఇనిక మిగిల్లివతాద్. తక్కు పెప్తి వన్నిజ్ సాలేవండ ఆవతాద్". † ఇజి దేవుణు మాటదు రాస్తి మన్ని లెకెండ్నె. 16 మీ వందిజ్ మా మన్నుదు మన్ని ఆన లెకెండ్నె, దేవుణు తీతు మన్నుదుబా ఆన సిత్తి వందిజ్ నాను దేవుణుదిజ్ వందనమ్కు వెప్సిన్. 17 తీతు మాపు వెప్తికె విహాన్. అక్కాదె ఆవండ వన్నిజ్ వాండ్రె ఆజి గొప్పు సర్లదాన్ మీ డర్లు వాజినాన్. 18 సువార్త పణిదు విజా సజమ్కాజ్ వన్ని పణి వందిజ్ పేరు మనికాన్ ఆతి మరి ఒరెన్ తంబెరిబా వన్ని వెట పోక్కినావ్. 19 అక్కాదె ఆవండ, ప్రబుజ్ పేరు వాదెజ్ ఇజిని మహి వరిజ్ సాయం కిదెజ్ మా మన్నుదు మన్ని ఆన తోరిస్తెజ్ ఇజిని మాపు కనికారమ్దాన్ కిజిని

† నిర్గమకాండం 16:8 ఇస్రాయేలు లోకుర్ అయ్యగుప్తు దేనమ్దాన్ కనాను దేనం సాస్తి మహివలె, వారు బిడిజ్బూమిదు 40 పంటెజ్ మహివలె మన్నునె వరిజ్ ముకెలమతి తిండి ఆత మహాద్. బిడిజ్ బూమిదు మహివలె వరిజ్ సరిఅతి తిండి సిల్లెద్ ఇజి వారు దేవుణు వెట సణజితార్. దేవుణు అగసమ్దాన్ వరిజ్ మన్ను సిత్తాన్. రోజా పెందల మన్ను వారు మన్నిబాన్, ఇజిరి బెల్లమ్లెకెండ్ బూమిదు అర్చి మహాద్. రోజా రోజాదిజ్ సరి అతిక అయ రోజాదునె దేవుణు వరిజ్ సీజి మహాన్. వారు కనాను దేనం అందిజి బాణక తిండి తినిదాక దేవుణు వరిజ్ మన్ను సీజి మహాన్. (యెహోసువ 5:12)

యా పణి కిజినావ్. యా సంత అసి మాపు సానివలె, మా వెట వాదెజ్ ఇజి విజా సజమ్కు కూడఃజి యా తంబెరిజ్ నె ఎర్లస్త మనార్. 20 విజా సజమ్కు కూడఃజి లోబం కివండ సిత్తి యా సందదాన్ మాపు పణి కిత్తి వందిజ్ ఎయెర్బా మా ముస్కు ఇని తవుబా వెహోవండ గొప్ప జాగర్దదాన్ మనావ్. 21 అందెజె ప్రబు ఎర్దునె ఆవండ లోకురి విజెరి ఎర్దుబా సరి ఆతికెజ్ కిదెజ్ జాగర్ద మనావ్.

22 అక్కాదె ఆవండ, వరివెట మరి ఒరెన్ తంబెరిజ్ బా పోక్కినావ్. నండొ పణిజాణిజ్ నండొ సుట్టు వన్నిజ్ పరిస కిజి వన్ని మస్సుది ఆస నెప్ప మనావ్. ఏలు మీ వందిజ్ వన్ని మస్సుదు మని గొప్ప దయేరమ్దాన్ ఆస ఒద్దె పిరిజినాద్ ఇజి మరి నెసినావ్. 23 తీతు ఇహిజ, నా వెట మహికాన్, మీ నడిఃమి నా వెట జత కూడ్డి పణి కిత్తికాన్. వన్ని వెట వాజిని యా కూలెజ్ ఇహిజ, ఉండ్రీ ఉండ్రీ సజమ్కాణిజ్ వాతికార్. క్రీస్తుజ్ నెగ్గి పేరు తపిసినికార్. 24 అందెజె విజా సజమ్కు ఎర్దు తోర్ని లెకెండ, విరిజ్ మీ ప్రేమ, మరి మీ వందిజ్ మాపు పాగిడిఃజిని దని వందిజ్ రుజువ్ కిజి తోరిస్తు.

9 నమ్మిత్తి వరి వందిజ్ కిజిని యా పణి వందిజ్ నాను మిజి రాస్తెజ్ అక్కర్ సిల్లెద్. 2 సాయం కిదెజ్ మీ మస్సుదు మని ఆస నాను నెసిన. అందెజె అక్కాయదికార్ ఆతి మీరు దేవుణు వందిజ్ సీదెజ్ ఇజి నీరుండాన్ తయారదాన్ మనిదెర్ ఇజి మీ వందిజ్ మాసిదోనియాది వరివెట పాగిడిఃజి వెప్పి మహావ్. మీ మస్సుదు మని ఆసదిజ్ నెస్తారె వరి లోఇ నండొండార్ సీదెజ్ ఇజి ఉసార్ ఆజినార్. 3 మాపు మీ వందిజ్ పాగిడిఃజి వెప్పికెజ్ అర్దం సిల్లికెజ్ అదెజ్ ఆవద్ ఇజి ఏలు యా తంబెరిజి పోక్కిన. నాను వెప్పి వజ సాయం సీజి పోక్కెజ్ తయార్ ఆజి మండ్రు. 4 ఉండ్రీ వేలా మాసిదోనియాదికాన్ ఒరెన్ మా వెట వాతిజ, మీరు తయార్ అవండ మనిక సుడఃతిజ, మీ ముస్కు మజి మని యా సమకం వందిజ్ అయావలె మజి సిగు వానాద్, మీరుబా సిగు ఆనిదెర్. 5 అందెజె, మీరు సీనావ్ ఇజి వెప్పి మనిక లోబం కివండ ముజాలె తయార్ కిజి మండ్రెజ్ ఇజి యా తంబెరిజి మూజాలెనే మీ డగ్రు సాండ్రు ఇజి వెప్పి పోక్కెజ్ ఇజి నాను ఒడిఃబిత. అహిజ మీరు సీనా ఇజి వెప్పి మనిక లోబమ్దాన్ సీని లెకెండ మన్వండ పూర్తి మస్సుదాన్ సీని సంత లెకెండ మంజినాద్.

దేవుణుదిజ్ లోబం కివండ సర్దదాన్ సీదెజ్ ఇజి వెప్పినావ్.

6 తక్కు విత్తికాన్ తక్కునె పంట కొయ్యాన్. నండొ విత్తికాన్ నండొ పంట కొయ్యాన్. ఇజి గెవతం కిజి మండ్రు. 7 ఒరెన్ ఒరెన్, ఎస్సా సీన ఇజి వన్ని మస్సుదు నిరణెం కిత్తిలెకెండెన్ సీదెజ్. అక్క సణజివండ, బలవంతమ్దాన్ ఆవండ సీదెజ్ వలె. ఎండనిజ్ ఇహిజ సర్దదాన్ సీని వరిజ్ దేవుణు ప్రేమిసినాన్. 8 ఎస్తివలెబా మిజి కావాలిన్ దిన్దెజ్ ఇంక లావ్ మండ్రెజిని, మరి విజా నెగ్గి పణిజి వందిజ్ లావ్ సీదెజ్ మిజి మండ్రెజ్, వన్ని దయాదర్మమ్దాన్ సీజిని దేవుణు ఇంక మరి ఒద్దె మిజి సీదెజ్ అట్టికాన్. 9 దిన్ని వందిజ్ దేవుణు మాటదు యాలెకెండె రాస్త మనాద్. "వాండ్రు దోసదాన్ కెప్పి విరివిత్తి ఇనాయమ్కు బీదాది వరిజ్ సీజినావ్. వన్ని సీతి నిజాయితి ఎలాకాలం మంజినిక". 10 విత్తి వన్నిజ్ విత్తుని ఉండెజ్ తిండి సీని దేవుణు సీజినావ్. మిజి మా వాండ్రు విత్తెజ్ విత్తు సీజి, మీరు విత్తికెజ్ నెగెండె పిరిప్పి లావ్ కిజి, మీరు కిజిని సీతి నిజాయితి వణిజ్ బా లావ్ కిబిన్నాన్. 11 విజా సజతిజ లోఇ మీరు లావ్ మన్నికిదెర్ కిబె ఆనిదెర్. అందెజె ఎస్తివలెబా మహి వరి వందిజ్ లావ్ సీదెజ్ మీరు అట్టిదెర్. మీరు మజి సీజిని దనిదటాజ్ మాపు మహివరిజ్ సీనివలె మా వెట దేవుణుదిజ్ వందనమ్కు వెహె ఆనాద్లె. 12 యా పణివెట నమ్మిత్తి వరి అవ్సరమ్కు తీరిసినికాదె ఆవండ దేవుణు వందిజ్ వెప్పిని వందనమ్కు మరి ఒద్దె లావ్ ఆజినె. 13 యా పణిజాణిజ్ మీరు తగ్గికిదెర్ ఇజి రుజువ్ కిజినిదెర్. అందెజె మీరు క్రీస్తు సువార్దదిజ్ ఒప్పుకోటి లోజిత్తి వందిజ్, మిజి కల్లిత్తి మన్నికెజ్ వరిజ్ నె మహి వరిజ్ విజెరిజ్ లోబం కివండ సీదెజ్ తయార్ ఆతి వందిజ్ వారు విజెరి దేవుణుదిజ్ పాగిడిఃనార్లె. 14 వరిజ్ సాయం కిదెజ్ దేవుణు మీ ముస్కు తోరిన్సి విజా దనిజ్ మిస్తి వన్ని దయా దర్మం వందిజ్, మీ వందిజ్ పార్దనం కినివలె, మిజి సుడఃదెజ్ మస్సుదు ఆసదాన్ మంజినార్. 15 వెప్పాజ్ అట్ఇ నన్ని వరం సిత్తి దేవుణుదిజ్ వందనమ్కు!

10 ఏలు వవులు ఇని నాను బతిమాల్లిన. మీ వెట మనివలె నిసాతి మనికాన్ లెకెండె గాని మీ బాణిజ్ దూరం మనివలె గటిజ మనికాన్ ఇజి మీరు ఒడిఃబిజిని నాను, క్రీస్తుజ్ మని సార్లిదాన్ సాంతిదాన్ మిజి బతిమాల్లిన. 2 మాపు లోకమ్దిజ్ సెందితి వరి లెకెండె నడిఃసినావ్ ఇజి మీ లోఇ సెగొండార్ మా వందిజ్ వెప్పినిదెర్. ననివరి వెట నాను ఒడిఃబిని లెకెండె తెగిజి నండొ గటిజ వర్గిదెజ్ అట్టు. గాని నాను వానివలె గటిజ వర్గిండె మంజిని లెకెండె మీరు మండ్రు ఇజి నాను మిజి బతిమాల్లిన. 3 యా లోకమ్దునె మపు బత్తిజినావ్ గాని లోకమ్ది వరి లెకెండె విదెం కినికావ్ ఆవ్. 4 మాపు విదెం కిని ఆయుదమ్కు యా లోకమ్దిజ్ సెందితి ననికెజ్ ఆఉ. గాని సెఇ వన్కా పెరి ఎత్తుమని కోటెజ అర్పెజె దేవుణు బాణిజ్ వాతిమని సత్తుమని ఆయుదమ్కు అక్కెజ్. 5 మాపు, దేవుణు వందిజ్ నెస్వండె మండ్రెజ్ అడ్డు కినిలెకెండె మస్సుదాన్ రేజిజి వాజిని విజా వన్కాజ్ అడ్డిఃజి అర్పి, విజా ఆలోసనమ్కాజ్ అసి క్రీస్తుజ్ లోజిని లెకెండె కిజినావ్. 6 మీరు పూర్తి లోజిజి మంజినికిదెర్ ఆనిదాక, లోజివండ మన్ని విజా వన్కా వందిజ్ మిజి సిక్కు సీదెజ్ తయార్ ఆత మనావ్.

7 మీరు వెల్లి వన్ని వనకాజెన్ సుడఃజినిదెర్. ఎయెన్బా వాండ్రు క్రీస్తుజ్ సెందితికాన్ ఇజి ఒడిఃబిజి మహిజ, వాండ్రు ఎలాగ క్రీస్తుజ్ సెందితికాన్ ఆజి మంజినాండ్రె, అయాలెకెండెనె మాపుబా క్రీస్తుజ్ సెందితికావ్ ఇజి వాండ్రు ఒడిఃబిదెజ్ వలె. 8 మీ బత్తు నాసనం కిదెజ్ ఇజి సిల్లెద్ గాని దన్నిజ్ నెగెండె పిరిప్పెజ్ ఇజి ప్రబు మజి అతికారం సిత్త మనాన్. అయ అతికారం వందిజ్ నండొ పాగిడిఃజి వెప్పిజ్ బా నాను సిగు ఆవ్. 9 నాను మిజి రాసినె ఉత్తమ్దాన్ మిజి తియెల్లిని వన్ని లెకెండె మండ్రెజ్ ఆవద్ ఇజి కోరిజిన. 10 "వన్ని ఉత్తమ్కు గొప్ప అర్దం మన్ని మాటెజ్ మన్నికెజ్, సత్తుదాన్ కూడిఃతికెజ్ గాని వాండ్రు మా నడిఃమి మనివలె సత్తు సిల్లి వన్ని లెకెండె మనాన్. వర్గిజిని మాటెజ్ ఇని అర్దం సిల్లికెజ్ మన్నె", ఇజి ఎయెర్ వెప్పినార్గె. 11 యాలెకెండె వెప్పినికార్ యాక నెప్పెజ్. ఇనిక ఇహిజ మాపు దూరం మనివలె రాసినె ఉత్తమ్దు మన్ని మాటెజ్ ఎలాగ మర్తికెజ్నో, అయాలెకెండెనె మీ నడిఃమి మాపు మన్నివలె మాపు కిని పణిజ్ బా మంజినె.

12 వరిజ్ వారి పాగిడిః ఆజిని సెగొండార్ లెకెండె మాపుబా మనావ్ ఇజినో, మాపు వరిజ్ సమానం అతికావ్ ఇజినో వెప్పాజ్. ఎండనిజ్ ఇహిజ, వారు మహి వరి వెట విజా సజతిజ లోఇ సమానం మనానా ఇజి పాలిసి సుడఃజినార్. అయ్యాక బుద్ది సిల్లి పణిజె. 13 గాని మజి అక్క మనిదనిజ్ ఇంక మాపు వగ్డెః ఆవ్. దేవుణు మా వందిజ్ కేట కిత్తి మన్ని పణిదిజ్ జవ డాట్వండ దన్ని లోఇనె పాగిడిఃజినావ్. మాపు మీ నడిఃమి కిజిని పణిబా దన్ని లోఇ మనాద్. 14 మాపు క్రీస్తు వందిజ్ సువార్ద సాటిసి మీ డగ్రు వాతివలె దేవుణు మజి ఒపజెప్పి మన్ని దనిజ్ జవ డాట్టి సానికావ్ ఆవతావ్. ఎండనిజ్ ఇహిజ మీరు దన్ని లోఇనె మన్నిదెర్. మాపె క్రీస్తు సువార్ద ముజాల మీ నడిఃమి సాటిస్తావ్.

15 మహిళా కన్యకా:జి కిత్తి దన్ని లోఇ వంతు మనికాన్ ఇజి మాపు పాగ్డి:ఏవ్. గాని దేవుణు ముస్సు మన్ని మీ నమకం పిరిజి వానివలె మీ నడి:మి మాపు కిజిని సువార్త పణి మరి ఒద్దె పెరిక ఆజి సర్నాద్ ఇజి మాపు ఆస ఆజినాన్. 16 మీ అతాల మని నాహ్మజ్బా సువార్త సాటిస్తే ఇహిజ అట్నాన్. అయాలెకండ్ కిజి ఒరెన్ వన్నిజ్ ఒపజెవె ఆతిమని ప్రాంతమీదు కిబె ఆతి పణి వందిజ్ మజి మాపె పాగ్డి: ఆవ్. 17 గాని దేవుణు మాటదు రాస్తి మన్ని లెకండ్, "పాగ్డి: ఆజినాన్ ప్రబు కిత్తి వనకాజ్ వందిజ్నే పాగ్డి: ఆదెజ్ వలె". 18 వన్నిజ్ వాండ్రె పాగ్డి: ఆనికాన్ తగ్నికాన్ ఆవ్, తగ్నికాన్ ఇజి దేవుణు వెప్పికాండ్రె తగ్నికాన్ ఆజినాన్.

11 నా బుద్ది సిల్లి పణిజ్ మీరు కండెక్ ఓరిసినిదెర్ ఇజి నాను ఆస ఆజిన, నిజమె ఏలుబా మీరు ఓరిసినిదెర్. 2 మీ వందిజ్ దేవుణు మన్నుదు మన్ని ఆస వజనె నానుబా మీ వందిజ్ అయాలెకండ్నే సత్తు మన్ని ఆసదాన్ మంజిన. ఎండనిజ్ ఇహిజ, ఒరెన్ దజడ: వందిజ్ నాను మిజి ప్రదానం కిత్త మన్ను. అహిజ, క్రీస్తు వందిజ్ నాను మిజి ఇని కల్లిసిల్లి ఉండ్రె విడి:బోదెలి లెకండ్ వన్నిజ్ ఒపజెవె మన్ను. 3 గాని సరాన్ వన్ని సెఇ ఆలోసనమ్దాన్ అవ్వెజ్ మోసం కిత్తి లెకండ్, మీ మన్నుబా తపు బోదెజాణిజ్ మోసం కిబె ఆజి, మీరు క్రీస్తు ముస్సు. మిజి మన్ని ఇని కల్లిసిల్లి ప్రేమ డి:సి సీజి, వన్ని బాణిజ్ దూరం ఆనిదెర్, ఇజి నాను తియెల్ ఆజిన. 4 ఎండనిజ్ ఇహిజ, ఎయెన్బా మీ డగ్రు వాజి మాపు సాటిస్తే యేసుజ్ ఆవండ మరి ఒరెన్ యేసుజ్ సాటెజి, మరి మా వెట మీరు పాందితి మని దేవుణు అత్తు ఆవండ మరి ఉండ్రె అత్తు పాందితిజ, అక్కాదె ఆవండ మాపు వెస్తె సువార్త ఆవండ మరి ఉండ్రె సువార్త డగ్రు కిత్తిజ, సులుగ మీరు వన్కాజ్ లోజిజి వరిజ్ ఒరిసినిదెర్. 5 అయ గొప్ప పేరు పాందితికార్ ఆతి అపాస్తురు ఇంక నాను ఒద్దె తక్కుదికాన్ ఆవ ఇజి నాను ఒడె:బిజిన. 6 నాను నెగెన్ వర్గిదెజ్ నెస్ఇకాన్ ఆతిజ్బా, గాని నాను గెణం సిల్లిక ఆవ. మిజి విజేరిజ్ విజా పణిజాణిజ్, విజా మాటెజాణిజ్ మాపు అయ గెణం వందిజ్ రుజువ్ కిజి తోరిస్త మనాన్.

7 మీ బాణిజ్ ఇనికబా లోన్ఏండ దేవుణు సువార్త మీ నడి:మి సాటిసి, మీరు పెరికిదెర్ ఆదెజ్ ఇజి నజి నానె తగ ఆతివలె నాను పావం కిత్తానా? 8 మీ నడి:మి దేవుణు పణికిదెజ్ మహి సజమ్కాణిజ్ వరి డబ్బుజ్ డొజ కిత్తి లెకండ్ వరి బాణిజ్ కూల్లి లోను ఆత. 9 నాను మీ నడి:మి మహివలె, ఇనికబా అవ్సరం ఆతిజ్బా, నాను ఎయెరిజ్బా ఇనికబా లోన్ఏవత. మాసిదోనియదాన్ వాతి తంబెరిజ్ నా అవ్సరమ్కాజ్ వందిజ్ సిత్తార్. మీ బాణిజ్ ఇనికబా లోన్ఏండ, నాను మిజి ఉండ్రె బరు లెకండ్ మన్ఏండ జాగర్తదాన్ మహి లెకండ్నే వాని కాలమ్దుబా మంజిన. 10 క్రీస్తుజ్ మని నిజం నా లోఇ మన్నిజ్ అక్కాయ ప్రాంతమీదు మనికార్ ఎయెర్బా నాను యా లెకండ్ పాగ్డి:జి వెప్పిని దనిజ్ అడ్డు కిడెజ్ అట్వెర్. 11 ఎండనిజ్ నాను అయాలెకండ్ మహ ఇహిజ, మిజి ప్రేమిన్ఇ వందిజ్ ఆవద్. నాను మిజి ఎస్సా ప్రేమినిన ఇజి దేవుణు నెసినాన్. 12 గాని ఏలు కిజిని లెకండ్నే నాను దేవుణు పణి కిజి మంజిన, అందెజె మాపు కిజిని లెకండ్నే వారుబా దేవుణు పణి కిజినార్ ఇజి వెప్తాజ్ ఇజి ఆస ఆజిని వరిజ్ మా వెట పాగ్డి: ఆదెజ్ అక్కు సిల్లెండ మన్ఏవద్ ఇజి.

13 వారు నన్నికార్, క్రీస్తుజ్ అపాస్తురు లెకండ్ వేసం పాకె ఆజి తోరె ఆతిమని మోసం పణిజ్ కిజిని మిజి మోసం కిత్తి డొజ అపాస్తురు. 14 దన్ని వందిజ్ బమ్మ ఆదెజ్ అక్కుర్ సిల్లెద్. నయ్తానుబా జాయ్ మని దూత లెకండ్ వేసం పాకె ఆనాన్. 15 అందెజె నయ్తాను వందిజ్ పణి కినికార్, వారు వరిజ్ వారె సితి నిజాయితి పణిజ్ కినివరి లెకండ్ వేసం పాకె ఆతిజ అక్కు పెరిక ఆవద్. వారు కిజిని పణిజ తగితి లెకండ్నే ఆకార్దిజ్ వరిజ్ జర్గినాద్లె.

పవులు వన్నిజ్ వాతి కన్యకాజ్ వందిజ్ పాగ్డి:జినాన్.

16 నాను బుద్ది సిల్లికాన్ ఇజి ఎయెన్బా ఒడె:బిదెజ్ అవద్ ఇజి నాను మరి మిజి వెప్పిన్. నాను బుద్ది సిల్లికాన్ ఇజి మీరు ఒడె:బిత్తిజ ఆహ ఒడె:బిదు. అందెజె నానుబా కండెక్ పాగ్డి: ఆదెజ్ అట్టు. 17 యాలెకండ్ నా మన్నుదు దయరం ఆజి పాగ్డి:జినివలె, అక్కు ప్రబు మాటెజ్ వర్గితి లెకండ్ ఆవ, ఉండ్రె బుద్ది సిల్లివన్ని లెకండ్ వర్గిజిన. 18 నండొండార్ యా లోకమ్దిజ్ సెందితి వరి లెకండ్ పాజిజినార్, అందెజె నానుబా అయాలెకండ్నే పాజిజిన. 19 మీరు గొప్ప బుద్ది మన్నికిదెర్గె. మీరు బుద్ది సిల్లివరిజ్ సర్దదాన్ డగ్రు కిజినిదెర్. 20 ఒరెన్ మిజి వెట్టిపణి కిని వన్ని లెకండ్ కిత్తిజబా, ఒరెన్ మోసం కిజి మిజి మన్నికెజ్ విజా లోను ఆతిజబా, ఒరెన్ మిజి మోసం కిజి వన్నిజ్ లాబం తప్పిజ్బా, మీ మొకమ్దు డెయ్టిజ్బా మీరు వన్నిజ్ ఓరిసినిదెర్. 21 అయాలెకండ్ వారు కిత్తి లెకండ్ కిడెజ్ మాపు సత్తు మనికావ్ ఆవ్ ఇజి నాను సిగు ఆజి వెప్పిన్. గాని ఎయెన్బా ఇనిదన్ని వందిజ్బా పాగ్డి: ఆదెజ్ అక్కు మనాద్ ఇహిజ, సజిబా అయాలెకండ్ పాగ్డి: ఆదెజ్ అక్కు మనాద్. నాను ఒరెన్ బుద్ది సిల్లి వన్ని లెకండ్నే వర్గిజిన. 22 వారు ఎబ్రివారునా? నానుబా ఎబ్రి వాండ్రునె. వారు ఇస్రాయేలుదికారా? నానుబా ఇస్రాయేలుదికారె. వారు అబ్రాహము కుటుమ్దికారా? నానుబా సన్నికాండ్రె. 23 వారు క్రీస్తు వందిజ్ పణి కినికారా? నాను వెరి వన్ని లెకండ్ వర్గిజిన. నాను క్రీస్తు వందిజ్ మరి ఒద్దె పణి కిత్త మన్ను. నాను నండొ కన్యకా:జి పణి కిత్తమన్ను. నండొ సుట్టు జెలిదు మహ. కొర్డె:జాణిజ్ నండొ సుట్టు గొప్ప డెయె ఆత. నండొ సుట్టు సాపుదిజ్ డగ్రు ఆత. 24 యూదురు లోకుర్ బాణిజ్ అయదు సుట్టు, ఉండ్రె తక్కు నలవయ్ దెబ్బెజ్ తిహ. 25 మూండ్రె సుట్టు డుడ్డుదాన్ డెయె ఆత. ఉండ్రె సుటు పణకాణిజ్ డెయె ఆత. మూండ్రె సుట్టు నందరమ్దు వయనం కిజి మహిజ్ ఒడె:జ్ పెడె:హిజ్ బాద ఆత. ఉండ్రె రెయు పాగోల్ నందరమ్దు ఏరుదు మహ 26 ఎస్తివలెబా నాను వయనం కిజి మహిజ్ నండొ సుట్టు వయనమ్దు పెరి గడ్డెజాణిజ్ ప్రమాదమ్కు వాతె. డొజారిజు వెట ప్రమాదమ్కు వాతె. మా సాంత జాతిదికారాతి యూదురి వెట ప్రమాదమ్కు వాతె. పట్టుమ్దు ప్రమాదమ్కు వాతె. అడి:విదు ప్రమాదమ్కు వాతె. నందరమ్దు ప్రమాదమ్కు వాతె. డొజ తంబెరిజ వెట ప్రమాదమ్కు వాతె. 27 నాను నండొ కన్యకా:జి ప్రవెజాణిజ్ పణిజ్ కిజి, రెయు నిద్ర సిల్లెండ మహ. ఏక, ఏక తిండి సిల్లెండ బజ ఎప్పికాన్ మహ. ఒడె:ల్దు సాక్కెజ్ సిల్లెండ పిన్నిదు నిగసాణె మహ. 28 యాకెజె ఆవండ విజా దేవుణు సజమ్కాజ్ వందిజ్ ఎలాగ ఆనెనో ఇజి రోజా మన్నుదు ఒడె:బిజి మహ. 29 సత్తు సిల్లికాన్ ఎయెన్ మనాన్? నానుబా సత్తు సిల్లికాన్ ఆవనా? ఎయెన్ పావమ్దు తోరోడె ఆజినానా? నజి మన్నుదుబా కోవం రెజె ఆవదా?

30 నాను పాగ్డి: ఆదెజ్వలె ఇహిజ నజి మన్ని సత్తు సిల్లి వన్కా వందిజ్నే నాను పాగ్డి:నాలె. 31 నాను వర్గిజినక అబద్దం ఆవద్ ఇనిదన్నిజ్ ఎస్తివలెబా పాగ్డి: ఆజిని మా ప్రబువాతి యేసుజ్ బుబ్బాతి దేవుణునె నెసినాన్. 32 దమస్సు పట్టుమ్దు నాను మహివలె, రాజా ఆతి అరెత అడి:గి మన్నికానాతి అదికారి నజి అన్తెజ్ ఇజి దమస్సు పట్టుం విజా కాపు ఇడ్తాన్. 33 నస్తివలె పట్టుమ్ది కోట గోడా:దు మన్ని కిటికి బోరోదాన్, గంపదు డి:పె ఆతానె వన్ని కియుదాన్ తప్రె ఆత.

12 పొగడిజి వర్గదెజ్ ఇహిజ మరి నండొ మన్నె. వహ్ని దన్నిజ్ ఇని లాబం సిల్లిజ్ బా దేవుణు బాణిజ్ తోరె ఆతి కలెజ వందిజ్, డాజీతి మన్నికెజ్ దేవుణు తోరిస్తొ వందిజ్ నాను వెహ్న. ² క్రీస్తుజ్ సందితికాన్ ఒరెన్ వన్నిజ్ నాను నెసిన. పదనాల్లి పంటెజ్ ముజాల వాండ్రు మూండ్రీ ఆగాసం దాక పెరె ఆతాన్. ఒడొల్దాన్ పెరె అతాండ్రొ, ఒడొల్ సిల్లెండ పెరె అతాండ్రొ ఇజి నాను నెస్ ఏ. అక్క దేవుణునె నెసినాన్. ³ వరదీను ఇని దేవుణు మంజిని బాడిదాక పెరె ఆతి ఒరెన్ వన్నిజ్ నాను నెసిన. వాండ్రు ఒడొల్దాన్ పెరె అతాండ్రొ, ఒడొల్ సిల్లెండ పెరె అతాండ్రొ ఇజి నాను నెస్ ఏ. అయ్యాక దేవుణు నెహ్నాన్. ⁴ అబ్బె వర్గదెజ్ అట్ అన్ నన్ని సజతిజ్ వెహ్న్. లోకు ఎయెన్ బా వన్ని వెయుదాన్ అయ మాటెజ్ వర్గదెజ్ అక్కు సిల్లెద్. ⁵ నని ఒరెన్ వన్నిజ్ పొగడిజి నాను వర్గం గాని నజీ నానె పొగడి: ఆవ. నాను పొగడి: ఆదెజ్ ఇహిజ నజీ మన్ని సత్తు సిల్లి వన్యా వందిజ్ నె పొగడి: ఆన. ⁶ నాను పొగడి:దెజ్ ఇజి ఒడొబిత్తిజ, నిజం మనికెజ్ నె వెహ్న. అందెజి నాను బుద్ది సిల్లికాన్ ఆవ. ఎందనిజ్ ఇహిజ నాను కిత్తికెజ్ సుడొ:జినో, నాను వర్గనికెజ్ వెంజినో, నాను మన్ని దనిజ్ ఇంక ఒద్దె పెరికాన్ ఇజి నా వందిజ్ ఎయెన్ బా ఒడొబింద మండ్రెజ్ ఇజి నాను పొగడి: ఏ.

⁷ దేవుణుది డాజీతి మన్ని గొప్ప పెరి సజతిజ్ నజీ తోరె ఆతి వందిజ్, నజీ నానె పెరిక ఇజి ఉబె ఆవండ మండ్రెజ్ ఇజి నజీ బాద కిదెజ్ ఇజి నా ఒడొల్దు ఉండ్రీ సాంపు ఇడ్డె: ఆతి లెకెం ఒరెన్ నయ్యాను దూత నా డగ్రు ఫాకె ఆత మనాన్. ⁸ అయ్యాక నా ఒడొల్దాన్ లగిజి విసిరెల ఇజి నాను ప్రబు వెల మూండ్రీ సుట్టు బతిమాలిత. ⁹ గాని వాండ్రు నజీ, "నా దయా దర్మం నిజీ ఆనాద్, సత్తు సిల్లిబాన్ నా సత్తు పూర్తి సత్తు మనిక ఆజినాద్", ఇజి వెహ్నాన్. అయ్యావలె నజీ సత్తు సిల్లి వన్యా వందిజ్ మరి ఒద్దె సర్దదాన్ పొగడి:నాలె అందెజి క్రీస్తు సత్తు నా మున్యు నిల్లి మంజినాద్. ¹⁰ ఎస్తివలె నాను సత్తు సిల్లికాన్, నస్తివలె నాను సత్తుదికాన్ ఆజినాన్. అందెజి క్రీస్తు వందిజ్ నజీ మన్ని సత్తుసిల్లి వనక వందిజ్, నిందెజి వందిజ్, కష్టమ్ కు వాతి వందిజ్, హిమ్ నిజ వందిజ్, ప్రమెజి వందిజ్ నాను సర్ద ఆజిన.

¹¹ నాను బుద్దిసిల్లి వన్నిలెకెం మన, అయ్యా లెకెం మండ్రెజ్ ఇజి మీరె నజీ బలవంతం కిత్తిదెర్. నాను తగ్గికాన్ ఇజి మీ బాణిజ్ వెహ్ ఆదెజ్ నజీ అక్కు మనాద్. ఎందనిజ్ ఇహిజ, నాను ఎవటిదికాన్ ఇజి బా, మీ గొప్ప పేరు ఫాందితి అపాస్తురు ఇంక తక్కుదికాన్ ఆవ. ¹² నాను ఎస్సాన్ ఓర్పుదాన్ మీ నడి:మి తోరిస్తొ మన్ని బమ్మాతి పణిజ్, ఎనెజ్ బా తొ ఇ పణిజ్, బమ్మాని గొప్ప పణిజ్ నాను అపాస్తుడు ఇని దన్నిజ్ రుజావ్ కిజినె. ¹³ ఇనిదన్ని వందిజ్ బా నాను మీ మున్యు ఆదారం ఆవత. ఇక్కడె ఆవండ మరి ఇని సజతిదుబా మీరు మహి సజమ్ క ఎద్దు తక్కుదికెదెర్ ఇజి అతిదెర్. నాను కిత్తి యా తపు మీరు సెమిస్తు.

¹⁴ ఏలు మూండ్రీ సుట్టు మీ డగ్రు వాదెజ్ ఇజి తయారాజిన. నాను వాతివలె ఇనిదన్ని వందిజ్ బా నాను మీ మున్యు ఆదారం ఆవ. ఎందనిజ్ ఇహిజ మిజీ కల్లితి మన్నికెజ్ ఇనికబా నజీ అవనరం సిల్లెద్, గాని మీరె నజీ కావాలి. కొడొ:ర్ అయెసి అపాస్తిరె వందిజ్ ఆవద్, గాని అయెసి అపాస్తిరెనె కొడొ:ర్ వందిజ్ ఆస్తి గణస్తెజ్ గెద. ¹⁵ అందెజి నాను నజీ కల్లితి మన్నికెజ్ విజా మీ వందిజ్ కర్పు కిన. మరి నజీ నానె మీ వందిజ్ కర్పు కిబె ఆన. నాను మిజీ లావు ప్రేమిస్తెజి మీరు నజీ తక్కు ప్రేమిసినిదెరా? ¹⁶ నాను ఇనిదన్ని వందిజ్ బా మీ మున్యు ఆదారం ఆవ, అక్క నిజమె. గాని ఇనికాదొ ఉండ్రీ ఉపాయ్ కిజి మిజీ మొసెం కిజి లొసె ఆనాన్ లె ఇజి ఎయెర్ బా వెహ్నాలె. ¹⁷ నాను మీ డగ్రు ఫాక్తి ఎయెర్ వెలబా మిజీ మొసెం కిజి ఇనికబా లొసె ఆత మనానా? ¹⁸ మీ డగ్రు సాండ్రెజ్ ఇజి తీతుజ్ నాను బతిమాలిత. వన్నివెల మా తంబెరి ఒరెన్ వన్నిజ్ బా ఫాక్త. తీతు మిజీ మొసెం కిజి ఇనికబా లొసె అతాండ్రొ? మాపు ఉండ్రె మన్నుదాన్, ఉండ్రె లెకెం నె నడి:వితాపా?

¹⁹ మాపు నెగ్గికావ్ ఇజి మీ ఎద్దు తోరిస్తెజ్ ఇక్కెజ్ విజా మీవెల వర్గిజినావ్ ఇజి మీరు ఒడొబిజినెదెరా? క్రీస్తుజ్ సందితికెదెర్ ఇజి దేవుణు ఎద్దునె మాపు వర్గిజినావ్. మా తంబెరిజాండె, మీరు మీ మన్నుదు నెగెం దేవుణు సత్తుదాన్ మండ్రెజ్ ఇజినె యాకెజ్ విజా మాపు కిత్తావ్. ²⁰ నాను వానివలె మీరు నజీ ఇష్టమాతికెదెర్ లెకెం మన్ ఇదెర్ ను, మరి మిజీ ఇష్టమాతి లెకెం నానుబా మన్ ఎను ఇజి నాను తియెలాజిన. మరి మీ నడి:మి జటిజ్, గొన ఆనికెజ్, కోం ఆజి మంజినిక, గుంపుజ్ గుంపుజ్ ఆనికెజ్, దుసలాడొ:నికెజ్, గుసగుస వర్గనిక, ఫాజిజి ఉబె ఆనిక, గగోలి ఆనిక విజా మంజినెను ఇజి నాను ఒడొబిజిన. ²¹ మరి నాను మీ డగ్రు వానివలె మీ ఎద్దు దేవుణు నా బుర్త డి:ప్పిని లెకెం కినాన్లెను ఇజి నాను తియెలాజిన. మరి ముజాల వరిజ్ అలవాలు మహిలెకెం నె ఇ పణిజ్ కిజి, కేలార్ బూలాజి, రంకు బూలాజి విజెరె ముందాల సిగు ఆజి మంజిని వందిజ్ మరి వారు దుకమాజి ఫావమ్ కు ఒప్పుకొడొ:జి డి:సిసి ఏండ మన్ని వందిజ్ నాను దుకం ఆనాలె ఇజి తియెలాజిన.

13 ఏలు నాను మీ డగ్రు వానివలె ఇక కూడు:ప్పి మూండ్రీ సుట్టు ఆనె. దేవుణు మాటుదు రాస్తిమని లెకెం, "రిఎర్, ముఎర్ సాసిరి మాటెజ వెల విజా సజతిజ్ నిజమాతికెజ్ ఇజి రుజావ్ కిదెజ్ వలె". ² రుండి సుట్టు నాను వాతిజ్ మీవెల మహివలె నాను మిజీ బుద్ది వెహ్ని లెకెం నె వెహ్న మన. ఏలు మీబాణిజ్ దూరం మంజిబ వెహ్న. నాను మరీజి వానివలె ముందాహ్ తపు కిత్తి వరిజ్ బా నాను డి:స్ ఏ, వెనుక తపు కిత్తి విజెరిజ్ ఎయెరిజ్ బా డి:స్ ఏ. ³ ఎందనిజ్ ఇహిజ క్రీస్తు నావెల వర్గిజినాన్ ఇని దనిజ్ రుజావ్ కెల ఇజి మీరు వెహ్నినిదెర్ గెద? వాండ్రు మీ వెల సత్తు సిల్లికాన్ ఆవన్, గాని మీ నడి:మి గొప్ప సత్తుమన్నికాన్. ⁴ క్రీస్తు యా బూమి మున్యు మహివలె సత్తు సిల్లివన్ని లెకెం నిలువ ఫాకె ఆతాన్, యాక నిజమెనె. గాని దేవుణు సత్తుదాన్ ఏలు బత్తిజినాన్. అయాలెకెం నె వన్నివెల కూడొ:జి మాపుబా సత్తు సిల్లికావ్ గాని దేవుణు సత్తుదాన్ మీ వందిజ్ దేవుణు పణి కిదెజ్ క్రీస్తు వెల కూడొ:జి బత్తిజినావ్.

⁵ మీరు దేవుణు మున్యు నమకం మనికెదెర్ ఇజి మిజీ మీరె పరిస కిబె ఆదు. యేసుక్రీస్తు మీ లొ ఇ మనాన్ ఇజి మీరు నెస్ ఇదెరా? యేసుక్రీస్తు మీ లొ ఇ మనాన్ ఇజి నెస్ ఇదెర్ ఇహిజ, నిజమె మీరు అర్తిమనికెదెర్. ⁶ మాపు అయ్యా లెకెం అర్తికావ్ ఆవన్ ఇజి మీరు నిజం నెస్సిదెర్ ఇజి నా మన్నుదు నజీ నమకం మనాద్. ⁷ మీరు ఇని సె ఇ పణిజ్ కింండ మండ్రెజ్ వలె ఇజి దేవుణుదిజ్ పార్దనం కిజినావ్. మాపు పరిసెజి నిల్లి మంజినికావ్ ఇజి లోకుర్ ఎద్దు తోరె ఆదెజ్ ఇజి సిల్లెద్. గాని మాపు పిటికావ్ ఇజి తోరె ఆతిజ్ బా మీరు నిజమాతికెజ్ కిజి మండ్రెజ్ ఇజి కోరిజినావ్. ⁸ నిజమాతికెజ్ నె ఆవండ, నిజమాతి దనిజ్ పడి:ఎండ ఇనికబా కిదెజ్ మాపు అట్ ఏవ్. ⁹ మాపు సత్తు సిల్లికావ్ మనివలె, మీరు సత్తు మనికెదెర్ ఇజి మాపు సర్దదాన్ మనావ్. అక్కడె ఆవండ మీరు దేవుణు ఎద్దు ఇనికబా తకు సిల్లెండ విజా నెగెన్ మనికెదెర్ ఆదెజ్ ఇజి మాపు పార్దనం కిజినావ్. ¹⁰ మిజీ దేవుణు మున్యు మని నమకమ్ దు పిరిప్పెజ్ నె ప్రబు నజీ అతికారం సితాన్ గాని మిజీ అర్తిజ్ ఇజి సిల్లెద్. అందెజి నాను మీ డగ్రు వానివలె ప్రబు నజీ సీతిమని అతికారమ్ దాన్ కోవమ్ దాన్ గటిజ ఇనికబా కింండ మండ్రెజ్ ఇజినె మీ బాణిజ్ దూరం మంజి యా ఉత్తం రాసిన.

¹¹ కడఃవెరిదు, తంబెరిజాండె, మీరు సర్దదాన్ మండ్రు. మీరు మరి ఒద్దె నెగెణ్ మనికిదెర్ ఆదెజ్ ఇజి దేవుణుదిజ్ సర్ద కిదెజ్ మిజి ఆట్టి లెకెండ్ విజు సజతిజ్ కిదు. ఓదర్పుదాన్ మండ్రు. మా మాటెజ్ మీ మన్నుదు నాటిసి మండ్రు. విజిదెరె ఉండ్రె మన్నుదాన్ మండ్రు. సమాదాసమ్దాన్ బత్తిదు. ప్రేమని సమాదనం మనికానాతి దేవుణు మీవెట మంజినాన్.

¹² నెగ్గి మన్నుదాన్ ఒరెన్ మరి ఒరెన్ వన్నిజ్ పాంపిజి మాడిసి మండ్రు. ¹³ ఇబ్బెణికార్ నమ్మిత్తికార్ విజెరె మీరు బాగ మనిదెరా ఇజి వెన్బాజినార్.

¹⁴ ప్రబువాతి యేసుక్రీస్తు దయా దర్మం, దేవుణు ప్రేమ, దేవుణు ఆత్మ మీవెట కూడఃజి మంజినిక, మీ విజిదెరె వెట మనీద్.

మార్కు

నెల్ల కిబిసినిక

అపొస్తుడు ఆతి పవులు గలతీయ ముటాదు మని దేవుణు సజమ్కాజ్ రాసిని ఉత్తరమ్నె యాక. గలాతీయ ముటాదు పవులునె సువార్త వెచ్చాన్. వీరు నెగ్రెండనె క్రీస్తుజ్ నమ్మిజి వాజి మహార్. నస్తివలె సెగొండార్ నమ్మితి యూదురు, క్రీస్తు ముస్సు మని నమకమ్నె ఆవిండ, యూదురి రూలుజ్ లోజిజి, సునతిబా కిబె ఆదెజ్ వలె ఇజి తవు బోద వరిజ్ వెచ్చార్. యా మాట వెహరె, విరి మన్సు అయీ బోద దరోబ్ మచ్చార్. దినిజ్ దిదిజి పవులు రాసిని ఉత్తరమ్నె యాక. ఒరెన్ సునతి కిబె ఆతిజ, దేవుణు ఎద్రు సీతి నిజాయితి మనికాన్ ఆఎన్. గాని యేసువుబు ముస్సు నమకం ఇట్టిజనె దేవుణు ఎద్రు సీతి నిజాయితి మనికాన్ ఆనాన్ ఇజి వెప్పినాన్. మరి, మాటు క్రీస్తుజ్ నమ్మితివలె డిబె ఆతి మని వరి లెకెండె మనాట్, అక్కు మని వరి లెకెండె మనాట్. రూలుజ అడిగి మన్ఎట్ ఇజి వెప్పినాన్. మరి, ఒడోల్దిది సెఇ ఆసెజ్ కిబిసి పణిజ్ ఇని ఇనికెజ్, దేవుణు ఆత్మ నడిః పిసిని వజ నడిఃనికాన్ ఎలాగ మంజినాన్ ఇజి బా వెప్పినాన్.

1 ¹⁻² అపొస్తుడు ఆతి పవులు ఇని నాను, గలాతీయ ముటాదు మని దేవుణు సజమ్కాజ్ రాసిని ఉత్తం. సెగొండార్ నజీ అపొస్తుడు ఇజి ఏర్పాటు కిత్తిజ్ నాను అపొస్తుడు ఆవత. ఒరెన్ లోకు నజీ అపొస్తుడు ఇజి ఫాక్తిజ్ నాను అపొస్తుడు ఆవత. గాని యేసు క్రీస్తుని బుబ్బాతి దేవుణు నజీ అపొస్తుడు ఇజి ఏర్పాటు కిత్తి ఫాక్తిజ్నె నాను అపొస్తుడు ఆత. వాండ్రె యేసుక్రీస్తుజ్ సావుదాన్ మరీజి బత్తిస్తాన్. నానుని నా వెట ఇబ్బె మని దేవుణుదిజ్ నమ్మితి తంబెరిబు, అబ్బె మని సజమ్కాణి విజెరిజ్ వెన్బాతి లెకెండె వెప్పినార్. ³ మా బుబ్బు ఆతి దేవుణుని వ్రబు ఆతి యేసుక్రీస్తు దయ దర్మమదాన్, మీరు నిపాతిదాన్ మండ్రెజ్ సాయం కిప్పిర్.

⁴ మాటు కిత్తి తప్పు పణిజ్ మజి తప్పిస్తెజ్, యా లోకమ్దు మని సెఇ బాణిజ్ డిఃస్పిస్తెజ్ క్రీస్తు మా పాపమ్క వందిజ్ వన్నిజ్ వాండ్రె ఒపజెపె ఆతండ్రె సాతాన్. మా బుబ్బు ఆతి దేవుణు ఎత్తు కిత్తి వజనె వాండ్రు యా లెకెండె మా వందిజ్ సాతాన్.

⁵ దేవుణుదిజ్ అంతు సెల్లెండె ఎలాకాలం గవరం మనీద్. ఆమెన్.

సువార్త ఉండ్రె. మరి ఉండ్రె సెల్లెద్.

⁶ నిజమాతి సువార్త నమ్మితి వెనుక నిసా బేగి మీరు దేవుణుదిజ్ డిఃసి సీజినిదెర్ ఇజి నాను నండో బమ్మ ఆజిన. క్రీస్తు దయ దర్మమదాన్ మిజి సీజిని కొత్త బత్తుదిజ్నె, దేవుణు మిజి కూక్తాన్. వన్నిజ్ డిఃస్పిదెరె, సువార్త ఇజి పేరు వెహ ఆజిని తవు బోదదు మన్సు ఇడఃజినిదెర్ ఇజి నాను నండో బమ్మ ఆజిన. ⁷ నాను నిజం వెప్పిన, అయీక క్రీస్తు వందిజ్ తోరిసి నెస్పిసిని సువార్త ఆఎద్. గాని సెగొండార్ మిజి వంర కిబిసి, అయీ సువార్త మారిస్తెజ్ సుడఃజినార్. ⁸ గాని అపొస్తురు ఆతి మాపున, పరలోకమ్దాన్ వాతి దేవుణు దూతనో మరి ఎయెన్ ఆతిజ్బ, మాపు ముజాలె మిజి వెప్పి సువార్త ఆవిండ, దినిజ్ వెత్తెకం ఆతి సువార్త మిజి వెప్పెజ, దేవుణు సాయిపు వన్ని ముస్సు ఎలాకాలం మనీద్.

⁹ మాపు ముజాలె మిజి వెప్పి లెకెండె, ఏలు నాను మరి ఉండ్రె సుటుబా వెప్పిన. మా బాణిజ్ మీరు వెంజి, నమ్మితి సువార్త ఆవిండ, దినిజ్ వెత్తెకం ఆతి సువార్త మిజి ఎయెన్బా వెప్పెజ, దేవుణు సాయిపు వన్ని ముస్సు మనీద్.

¹⁰ నాను యా లెకెండె వెప్పి లోకుర్ బాణిజ్ మెపు కోరిజినానా? దేవుణు బాణిజ్ మెపు కోరిజినానా? లోకురిజ్ సర్ద కిదెజ్ సుడఃజినానా? లోకురిజ్ సర్ద కిబిస్తెజ్ నాను సుడఃజినె మహిజ, నాను క్రీస్తుజ్ సేవ కినికాన్ ఆవిండ మన.

దేవుణునె పవులుజ్ అపొస్తుడు ఇజి కూక్తాన్.

¹¹ తంబెరిజాండె, నాను మిజి వెప్పి సువార్త లోకు బాణిజ్ వాతిక ఆఎద్ ఇజి నాను మిజి వెప్పిన. ¹² అయీక లోకు బాణిజ్ నజీ దోహక్తిక ఆఎద్. ఎయెన్బా నజీ నెస్పిస్తిక ఆఎద్. గాని యేసు క్రీస్తునె యా సువార్త నజీ తోరిసి నెస్పిస్తాన్. ¹³ ఒరెన్ యూద వాండ్రు కిబిసి లెకెండె యూదురి మత్మమిది రూలుజ్ విజా లోజిజి పటుదలదాన్ అయీకెజ్ కిజి నాను ఎలాగ బత్తిజి మహ ఇజి మీరు వెహ మనిదెర్. అయీలెకెండె దేవుణు సజమ్కాజ్ కనికారం సెల్లెండె నాను ఎసానో హిమ్నెజ్ కిజి, వరిజ్ నాననం కిదెజ్ సుడఃత ఇజి మీరు వెహ మనిదెర్. ¹⁴ నా జతదు మని మహి యూదురిజ్ ఇంక యూద మత్మమిది రూలుజ్ విజా నాను తప్పెండె కిత. నా అనిసిర్ నెస్పిస్తి ఆసారమ్కు పటుదలదాన్ కిదెజ్ నండో సుడఃత. ¹⁵⁻¹⁶ గాని నాను నా యాయ పాటాదు పిండెం ఆతి మహివలె, దేవుణు నజీ వన్ని వందిజ్ ఎర్లిస్తాన్. వన్ని దయ దర్మమదాన్ వన్నిజ్ సేవ కిదెజ్ నజీ ఏర్పాటు కిత్తాన్. నాను యూదురు ఆఇ వరి నడిఃమి యేసు వందిజ్ సువార్త వెప్పి వందిజ్ వన్ని మరిసిజ్ నజీ తోరిసి నెస్పిస్తెజ్ ఇజి వాండ్రు తిర్మామాసం కిత్తాన్. ఆహె తిర్మామాసం కిత్తివలె నాను ఎయె వెటబా ఆలోసనం వెన్బావత. ¹⁷ నాను అపొస్తుడు ఆని ముజాల అపొస్తుడు ఆతి వరిజ్ సుడఃదెజ్ యెరూసలెమ్దుబు సాన్వత. గాని వెటనె నాను అరెబియ ముటాదు సాహ. వెనుక నాను దమస్కు పట్నమ్దు మరీజి వాత.

18 దేవులు వన్ని మరిసిజ్ నజీ తోరిసి, మూండ్రి పంటజ్ వెనుక, కేపా ఇజి కూకె ఆని పేతురు వెట నెల్వ ఆదెజ్ యెరూసలెమ్దు సాహ. అబ్బె వన్ని వెట రుండి వారమ్కు మహ. 19 మరి, ప్రబుజ్ ఎయెరిజ్బ సుడెఃవత. ప్రబుజ్ తంటెరి ఆతి యాకోబుజ్నె సుడెఃత. 20 నాను రాసినికెజ్ నిజమ్నె. అబద్దం ఆఉ. దిన్ని వందిజ్ దేవులు నెసిన్. 21 పేతురు వెట యెరూసలెమ్దు మహి వెనుక నాను సిరియ, కిలికియ ఇని ముటెజ సాహ.

22 నస్తివలె యూదయ ప్రాంతమ్దు మని దేవులు సజమ్కాణికార్ నజీ తొండ మహార్.

23 గాని మహికార్ నా వందిజ్ వెహ్ మనికెజ్నె వెహ మనార్. "మజి ముజాలె హిమ్మెజ్ కిజి మహికాన్, ఉండ్రి కాలమ్దు వాండ్రు నాసనం కిదెజ్ సుడెఃతి మని సువార్త వలు వెహ్సినాన్", ఇజి వెహ్ మనికెజ్నె వెహ మనార్.

24 అందెజె నా వందిజ్ వారు దేవులుదిజ్ పాగిడిఃతార్.

మహి అపాస్తురు వరి జతదు పవులుజ్ కుడుఃప్పినార్.

2 పతినాల్లి పంటజ్ గడఃప్పి వెనుక, నాను యెరూసలెమ్దు మరి సాహ. బర్బు నా వెట వాతాన్. తితుజ్బా మాపు వెట కూకె ఒతావ్. 2 నాను సాండ్రెజ్ వలె ఇజి దేవులు నజీ తోరిసి వెహ్సినాన్ నాను సాహ. అబ్బె పల్కుబడిః మని పెద్దలిజ కూడువ్తానె, యూదురు ఆఇ వరిజ్ నాను వెహ్సినా సువార్త ఇనిక ఇజి వరిజ్ వెహ్. ఎందన్నిజ్ ఇహిజ నాను వెహ్సినాకెజ్ నిజం ఇజి వారు నెసిమండ్రెజ్. సిల్లిజ నాను ఏలు కిజిని సువార్త వణి, వణిదిజ్ రెవండ ఆనాద్. యాలెకండ్ వర్గిదెజ్ పల్కుబడిః మని పెద్దెల్జనె కుడుఃవ్త. మరి ఎయెరిజ్బ కూడుఃవత. 3 నా వెట వాతి తీతు యూద వాండ్రు అవన్. వాండ్రు గ్రీకు వాండ్రు. అందెజె వాండ్రు సునతి కిబె ఆఇకాన్. అహిజ్బా, వాండ్రు సునతి కిబె ఆదెజ్వలె ఇజి వారు కసితం వెహ్ఎతార్. 4 గాని నమ్మితికావ్ ఇజి వెహ్ ఆని సెగొండార్ తీతు సునతి కిబె ఆదెజ్ వలె ఇజి వెహ్. వీరు గుట్టు నెహ్జె ఇజి మా నడిఃమి డుగితార్, క్రీస్తుయేసు వెట కూడిఃతి మని దన్నిదలాన్ మజి వాతి విడుఃదలదిజ్ సుడెఃతార్. మాటు యూదురి రూలుజ్ లోజెదెజ్ వలె ఇజి వెహ్సినాతార్. 5 వారు వెహ్సినానెజ్ నెజెంబా లోజెవతావ్. ఎందనిజ్ ఇహిజ నిజమాతి సువార్త మీ నడిఃమి నిల్పి మండ్రెజ్ ఇజి కోరితావ్.

6 గాని పల్కుబడిః మని పెద్దెల్జ, నాను వెహ్సినా సువార్త మారిస్సెజ్ ఇజినో, కండెక్బా దనివెట కుడుఃవ్తెజ్ ఇజినో వెహ్ఎతార్. నజీ వారు పలుకు బడిః మనికార్ ఆతిజ్బ ఆఇతిజ్బ నాను లెక్క కివత. దేవులు ఇజ్రికార్ పెరికార్ ఇజి తెడిః తొవన్. 7 గాని యూదురిజ్ సువార్త వెహ్సెజ్ దేవులు పేతురుజ్ ఒవజెప్పి వజ, యూదురు ఆఇ వరిజ్ సువార్త వెహ్సెజ్ నజీ ఒవజెప్ప మనాన్ ఇజి వారు నెహ్. 8 ఇహిజ యూదురు నడిఃమి అపాస్తుడు ఆజి సేవ కిదెజ్ పేతురుజ్ నత్తు సితి దేవులునె యూదురు ఆఇవరి నడిఃమి అపాస్తుడు ఆజి సేవ కిదెజ్ నజీ నత్తు సితాన్. 9 నిటకొహి లెకండ్ మని పెరి పెద్దెల్జ ఆతి యాకోబు, పేతురు, యోహాను ఇనికార్ దేవులు నజీ యా పెరి వణి ఒవజెప్ప మనాన్ ఇజి నెస్తివలె బర్బుజ్నె నజీ వరి వెట జత కూడిఃజి వణి కినికార్ ఇజి ఉండ్రి గుర్తు లెకండ్ మా కికు వరి వెట కలవ్తార్. మాపు యూదురు ఆఇ వరి నడిఃమి సువార్త వెహ్సెజ్ ఇజి వారు యూదురు నడిఃమి సువార్త వెహ్సెజ్ ఒప్పుకొటార్. 10 వరి నడిఃమి యెరూసలెమ్దు మని బీద వారు ఆతి నమ్మితి యూదురిజ్ మాపు సాయం కిదెజ్ ఇజినె వారు మా బాణిజ్ కోరితార్. నాను కిదెజ్ ఇజి నండ్ ఆన ఆతికాదె అయా నజతి.

పవులు పేతురుజ్ జటిజ్ ఆజినాన్.

11 కేపా ఇని పేతురు అంతియొకయ ఇని పట్నమ్దు వాతివలె, ఎద్దునె నాను వన్నిజ్ జటిజ్ ఆత. ఎందనిజ్ ఇహిజ వాండ్రు కిత్తి వణి తవు. 12 యాకోబు వెట కూడిఃతి మని సెగొండార్ నమ్మితి యూదురుజు అబ్బె వాని ముజాలె వాండ్రు యూదురు ఆఇ నమ్మితి వరి వెట కూడిఃజి బోజనం కిజి మహాన్. గాని వారు వాతిజ్, వీండ్రు యూదురు ఆఇ నమ్మితి వరివెట బోజనం కిండ్ వరి బాణిజ్ దూరం ఆతాన్. వాండ్రు యా లెకండ్ కిత్తాన్. ఎందనిజ్ ఇహిజ మోసే సితి రూలుజ్ లోజెదెజ్వలె ఇజి డట్టం వెహ్సెజ్ మహి యూదురి గుంపుదిజ్ తియెల్ ఆతాన్. 13 అంతియొకయదు మని మహి నమ్మితి యూదురు పేతురు వెట వాండ్రు ఆతి వేనమ్దు కూడిఃతార్. వారు కిత్తిక సుడెఃజి, బర్బు మొసిం ఆతండ్రె, వారు కిత్తి లెకండ్ వాండ్రుబా కిత్తాన్.

14 నిజమాతి సువార్తదు వెహ్సె వజ వారు నడిఃఇక సుడెఃతానె, అబ్బె మని నమ్మితి విజెరె ఎద్దు పేతురుజ్ జటిజ్ ఆత. నాను ఈహు వన్నిజ్ వెహ్, "ఓ పేతురు, నీను యూద వాండ్రు ఆజిబా, వరి లెకండ్ బత్కిఇ. యూదురు ఆఇవరి లెకండ్ బత్కిజిని. మరి యూదురు ఆఇకార్ యూదురు లెకండ్ మండ్రెజ్ వలె ఇజి ఎలాగ నీను డటం వెహ్సెజ్ అట్సినె".

15 నాను మరి వరి విజెరిజ్ వెహ్సెన. మాటు యూదురు జాతిదు పుట్టికావ్. దేవులు రూలుజ్ నెన్ఇకావ్ ఆవట్.

16 గాని దేవులు మోసెజ్ సితి రూలుజ్ లోజెజి ఒరెన్ దేవులు ఎద్దు సితి నిజాయితి మనికాన్ అవన్. గాని యేసుక్రీస్తు ముస్సు నమకం ఇట్టిజనె సితి నిజాయితి మనికాన్ ఆనాన్ ఇజి నెప్ప మనాట్. అందెజె యూదురు ఆఇకార్నె అవండ, మాటుబా క్రీస్తు యేసుజ్ నమ్మితాట్. రూలుజ్ లోజెజి దేవులు ఎద్దు సితి నిజాయితి మనికాట్ అవండ, క్రీస్తుజ్ నమ్మిజినె దేవులు ఎద్దు సితి నిజాయితి మనికాట్ ఆని వందిజె మాటు క్రీస్తు యేసుజ్ నమ్మితాట్. ఎందనిజ్ ఇహిజ, రూలుజ్ లోజెజి ఎయెన్బా దేవులు ఎద్దు సితి నిజాయితి మనికాన్ అవన్ ఇ జి మాటు నెసినాట్.

17 క్రీస్తు యేసు వెట కూడిఃతి మని దనితాన్ మాటు దేవులు ఎద్దు సితి నిజాయితి మనికాట్ ఆదెజ్ కోరినాట్. గాని మాటు యా లెకండ్ ఆదెజ్ సూణివలె, యూదురు ఆఇవరి లెకండ్ పావమ్దు మనాట్. అయావలె క్రీస్తునా మజి తవు కిబెసినికాన్? అవన్.

18 రూలుజ్ లోజెజి ఒరెన్ దేవులు ఎద్దు సితి నిజాయితి మనికాన్ అవన్ ఇజి నాను ముజలె తొరిప్ప. నాను నెక్రిపాక్తి దన్ని దరోట్ మరి మహిజ రూలుజ్ తప్పి వన్ని లెకండ్ నాను మన్న ఇజి రుజావ్ కిజిన. 19 యూదురి రూలుజ్ లోజెజి మహివలె, అయారెజ్ కిజి, దేవులు ఎద్దు సితి నిజాయితి మనికాన్ ఆదెజ్ అట్వన్ ఇజి నాను నెప్ప. అందెజె దేవులు వందిజె బత్కిదెజ్ యూదురి రూలుజ్ బాణిజ్ డిఃబె ఆత.

20 నాను క్రీస్తు వెట సిలువారు కుటిజాణిజ్ డెయె ఆతి లెకండ్ మన. నాను బత్కిజి మహి లెకండ్ మరి బత్కివ. క్రీస్తునె నా మన్నుదు బత్కిజినాన్. ఏలు నాను ఆవ నా ముస్సు అతికారం కిజినాన్. గాని క్రీస్తు నా లోఇ మంజి నా ముస్సు అతికారం కిజినాన్. నాను యా లోకమ్దు బత్కిజిని బత్కు దేవులు

మరిసేజ్ నమ్మిజి బత్తిజిన. వాండ్రు నజీ ప్రేమిని నా వందిజ్ వన్ని పాణం సితాన్. 21 దేవుణు దయ దర్మం నాను నెక్కి పాక్. యూదురి రూలుజ్ లోజీజి ఒరెన్ నీతి నిజాయితి మనికాన్ ఆనాన్ ఇహిజ క్రీస్తు సాతి సాపు అనవసరమనె.

యూదురి రూలుజ్ నా క్రీస్తు ముస్సు మని నమకమనా నిజమాతిక?

3 గలాతియ ముటాదు మని దేవుణుదిజ్ నమ్మితికిదెరా, ఎందనిజ్ మీరు బుద్ది సీలివరి లెకెండ్ మనిదెర్? ఎయెర్ మిజీ మొసెం కిత్తార్? యేసు క్రీస్తు మీ వందిజ్ సీలువాదు సాతిదని వందిజ్ నాను మీ కణకెజ్ నిండ్రు తోరిసి వెహ్ మన గదె? 2 “యూదురి రూలుజ్ లోజీజినిజ్ దేవుణు ఆత్మ మిజీ దోహ్క మనాదా? మాపు మిజీ వెహ్ సువార్త వెంజి నమ్మిత్తిజ్ గదె మిజీ దోహ్క మనాద?” యా ఉండ్రె నజతిన వెహ్. 3 మీరు నిసా బుద్ది సీలికిదెరా? మీరు మీ కొత్త బత్తు మొదలొన్నవలె దేవుణు ఆత్మ సత్తుదాన్ మొదలొన్సిదెర్. మరి ఏలు మీ సాంత సత్తుదాన్ మీ బత్తు పూర్తి కిదెజ్ సుడేజినిదెరా? 4 మీరు దేవుణుదిజ్ నమ్మితి వెనుక, నండొ ఓరిన్సిదెర్. మీరు ఒరిన్సికెజ్ పణిదిజ్ రెకెజ్ ఆతెనా? మిజీ జరిగితికెజ్ పణిదిజ్ రెంండొ ఆఉతె ఇజి నాను ఆన ఆజిన. 5 అందెజె దేవుణు ఆత్మ మిజీ నండొ సీజి గొప్ప సత్తు మని పెరి పణిజ్ మీ నడిమి కిజినక, మీరు మోసె సీతి రూలుజ్ లోజీజినిజ్ నా? ఆఎద్. గాని మీరు సువార్త వెంజి నమ్మిజినిజ్ నె వాండ్రు మిజీ వన్ని ఆత్మ సీజినాన్.

6 అబ్రాహము వందిజ్ దేవుణు మాటదు రాస్తీ మనిక నెస్తు, “వాండ్రు దేవుణుదిజ్ నమ్మితాన్. అందెజె దేవుణు వన్నిజ్ నీతి నిజాయితి మనికాన్ ఇజి ఒప్పుకొటాన్”, ఇజి రాస్త మనాద్. 7 అందెజె దేవుణు ముస్సు నమకం ఇట్టికారె, నిజమాతి అబ్రాహము కొడోర్ ఇజి నెస్తు. 8 సీన దినమ్కాజ్ ముజాలె దేవుణు మాటదు రాస్తమనాద్, యూదురు ఆకకార్ దేవుణు ముస్సు నమకం ఇట్టిజ, వాండ్రు వరిజ్ నీతి నిజాయితి మనికార్ ఇజి డగ్రు కిసాన్. వాండ్రు అబ్రాహముజ్, “లోకమది లోకుర్ విజెరెజ్ నీ వెట నాను దీవిన్”, ఇజి అయాక జగ్గి ఇ ముజాలె సువార్త వెహ్. 9 అందెజె దేవుణు ముస్సు నమకం ఇట్టి విజెరెజ్ అబ్రాహము వెట కూడుప్పి దీవిసినాన్.

10 దేవుణు మోసెజ్ నీతి రూలుజ్ లోజీజి వన్ని ఎద్రు నీతి నిజాయితి మనికార్ ఆదెజ్ సుడేజిని విజెరె, దేవుణు సీతి సాయిపు అడిగి మంజినార్. ఎందనిజ్ ఇహిజ, దేవుణు మాటదు రాస్త మనాద్, “మోసె రాస్తీ పుస్తకమ్కాజ్ మని రూలుజ్ విజా ఎన్సివలెబా కిఇ ఎయెన్బా దేవుణు సీతి సాయిపు అడిగి మంజినాన్”, 11 గాని నిజమె, ఒరెన్ విజా రూలుజ్ లోజీజిజ్ దేవుణు ఎద్రు నీతి నిజాయితి మనికాన్ ఆఎన్. ఎందనిజ్ ఇహిజ, “ఎయెజ్ నీతి నిజాయితి మనికాన్ ఇజి నాను ఇట్టమననో వాండ్రు నా ముస్సు నమ్మకం ఇట్టి వందిజ్ ఎలా కాలం బత్తినాన్”, ఇజి దేవుణు వెహ్ మనాన్ ఇజి దేవుణు మాటదు మనాద్. 12 గాని దేవుణు సీతి రూలుజ్ లోఇ అయాలెకెండ్ ఆఎద్. ఎందనిజ్ ఇహిజ నమ్మకం మండ్రెజ్ వలె ఇజి రూలుజ్ వెహ్. దేవుణు మాటదు వెహ్ ఇనిక ఇహిజ, ‘రూలుజ్ నడిపిసిని వజ బత్తిదెజ్ కోరిజినకాన్ అయాలెకెండ్ ఎన్సివలెబా లోజీదెజ్ వలె’, 13 మోసె సీతి విజా రూలుజ్ లోజీజి వరి ముస్సు వాజిని సయిపుదాన్ క్రీస్తు మజీ డిసెప్పిస్తాన్. ఎందనిజ్ ఇహిజ దేవుణు మాటదు రాస్త మనాద్, “కొహిదు డెలెవె ఆజి సాని ఎయెన్బా దేవుణు సాయిపు మనికాండ్రె”. 14 క్రీస్తు యా లెకెండ్ ఆతండ్రె మజీ డిసెప్పిస్తాన్. ఎందనిజ్ ఇహిజ, దేవుణు అబ్రాహముజ్ ఒట్టు కిత్తి దీవెనమ్కు యూదురు ఆఇ వరిజ్ క్రీస్తు యేసు వెట దోహ్కె. మరి క్రీస్తు ముస్సు మజీ మని నమ్మకమదాన్, దేవుణు సీన ఇజి ఒట్టు కిత్తి వన్ని ఆత్మ మజీ దోహ్క వందిజ్ క్రీస్తు యా లెకెండ్ సాయిపు మొసె ఆతండ్రె మజీ సాయిపుదాన్ డిసెప్పిస్తాన్.

15 తంబెరిజాండె, మాటు రోజా బత్తిజిని బత్తుదాన్ ఉండ్రె మాట లాగ్గి వెహ్. రివర్ ఉండ్రె నజతి వందిజ్ ఉండ్రె ఆజి ఉండ్రె ఒప్పుమాసం కిత్తి మహిజ, ఎయెన్బా అయాక తప్పెజ్, దనివెట ఇనికబా కూడుప్పెజ్ అక్కు సిల్లెద్. అయాలెకెండ్, దేవుణు మా వెట కిత్తి యా ఒప్పుమాసమ్బా నిల్పి మంజినాద్. 16 దేవుణు అబ్రాహము వెట, మరి వన్ని తెగ్గదు పుట్టి వన్నివెట ఒట్టుజ్ కిత్తాన్. ‘తెగ్గదు పుట్టి వరిజ్ ఇహిజ నండొ లోకురిజ్, ఇజి దేవుణు మాటదు వెహ్. గాని ‘సీ తెగ్గదు పుట్టి వన్నిజ్ ఇజి వెహ్. ఇహిజ అయాక ఒరెన్ వనిజెనె. వాండ్రె క్రీస్తు. 17 నాను వెహ్ వాజినక ఇనిక ఇహిజ, దేవుణు ముజాలె అబ్రాహము వెట ఒట్టు కిత్తాండ్రె అయాక కిదెజ్ ఇజి తీర్మానం కిత ఇట్టాన్. అందెజె నాల్గి వందిజ్ ముపాయ్ (430) పంటెజ్ వెనుక దేవుణు మోసెజ్ నీతి రూలుజ్ అబ్రాహము వెట కిత్తి ఒప్పుమాసమ్దిజ్ తప్పిని నన్సివలె కిత్తి తిరుమాసమ్దిజ్ సిల్లెండ కిదెజ్ అబ్. 18 దేవుణు సీన ఇజి ఒట్టు కిత్తి అక్కు, మాటు రూలుజ్ లోజీజిజెనె దోహ్కాద్. ఇహిజ వాండ్రు కిత్తి ఒట్టుదాన్ మజీ అయా అక్కు దోహ్కె. గాని దేవుణు అబ్రాహముజ్ సీన ఇజి ఒట్టు కిత్తిజ్ వాండ్రు వన్ని దయా దర్మమదాన్ సితాన్.

19 అందెజె మరి ఎందనిజ్ దేవుణు మోసె వెట రూలుజ్ సితాన్? ఎందనిజ్ ఇహిజ తప్పెజ్ ఇని ఇనికెజ్ ఇజి తోరిన్సిజె రూలుజ్ సితాన్. యా రూలుజ్ అబ్రాహము తెగ్గదు పుట్టికాన్ వానిదాక లోకురిజ్ నడిపిన్సిజె సితాన్. ఒట్టుదు ఎయె వందిజ్ వెహ్ మనాన్ వాండ్రె వీండ్రు. దేవుణు వన్ని దూతెజ్ వెట మోసెజ్ రూలుజ్ సితాన్. మోసె అయాక లోకురిజ్ సితాన్. మోసెనె, దేవుణు లోకుర్ నడిమి ఒపిసిని వన్ని లెకెండ్ నిహ మనాన్.

20 రివర్ నడిమి నిల్పికాండ్రె ఒరెన్ ఒపిసినకాన్. గాని ఒపిసినకాన్ సిల్లెండనె దేవుణు అబ్రాహముజ్ ఒట్టు కిత్తాన్. ఎందనిజ్ ఇహిజ ఒరెండ్రె ఒట్టు కిత్తాన్ వాండ్రె దేవుణు.

21 అహిజ, దేవుణు అబ్రాహముజ్ ఒట్టు కిత్తి వెనుక, మోసెజ్ రూలుజ్ సీతివలె వాండ్రు కిత్తి ఒట్టుదిజ్ వెత్తెకమ్దికెజ్ న రూలుజ్? సిల్లె ఆహె ఆఎద్. రూలుజ్ లోకురిజ్ ఎల్లకాలం బత్తిదెజ్ బత్తిని బత్తు సీదెజ్ అట్టె ఇహిజ, యా రూలుజ్ లోజీజి దేవుణు ఎద్రు నీతి నిజాయితి మనికార్ ఆతార్ మరి. 22 గాని దేవుణు మాట వెహ్, యా లోకమదు మని లోకుర్ విజెరె తొహె ఆతి వరిలెకెండ్ పాపం అడిగి మనార్ ఇజి. అందెజె దేవుణు ఒట్టు కిత్తికెజ్ దోహ్కె ఇహిజ యేసుక్రీస్తు ముస్సు నమ్మకం ఇడదెజ్. నమ్మకం ఇట్టిజనె దోహ్కె.

23 క్రీస్తు రెండొ మహి ముజాల, యా నమకం రెండొ మహాద్. నన్సివలె మోసె సీతి రూలుజ్, ఒరెన్ జమాసు కాప్ కిని లెకెండ్, యూదురు ఆతి మజీ తొహ్పి ఇడేజి కాప్ కిజి మహి. ఇహిజ యా రూలుజ్ నె మా ముస్సు అతికారం కిజి మహి. యాక, లోకుర్ క్రీస్తుజ్ నమ్మిదెజ్ ఆనాద్ ఇజి దేవుణు తోరిసిన కాలమ్దాన్ నె మహాద్. 24 అందెజె క్రీస్తు రెండొ మహివలె, యా యూదురి రూలుజ్ నె, మజీ సుడేజి నడిపిసితె. ఎందనిజ్ ఇహిజ, క్రీస్తు వాతి వెనుక వన్నిజ్ నమ్మిజి దేవుణు ఎద్రు నీతి నిజాయితి ఆదెజ్ ఇజి వెహ్. 25 గాని ఏలు క్రీస్తుజ్ నమ్మిదెజ్ అట్టాబ్. అందెజె రూలుజ్ మా ముస్సు అతికారం కిదెజె అబ్.

దేవుణు కొడొఁర్

26 క్రీస్తు యేసు ముస్సు నమకం ఇట్టిదెర్. అందెజె మీరు విజెదెర దేవుణు కొడొఁర్. 27 మీ లొఁ ఇ మని బాప్తెసం లాగె ఆతికార్ విజెరె క్రీస్తు వెట కూడిఁతి మనిదెర్. అందెజె క్రీస్తు గుణమ్కు మిజెబా మంజెనె.

28 అందెజె యూదురు ఇజెనొ, యూదురు ఆఇకార్ ఇజెనొ, వెట్టివణి కెనికార్ ఇజెనొ, కెఇకార్ ఇజెనొ, మొకకొడొఁ ఇజెనొ, అయ్లికొడొఁ ఇజెనొ ఆవ్ద ముకలం మీరు విజెదెర ఉండ్రె లోకుర్. ఎందనిజ్ ఇహిజ, మీరు క్రీస్తు యేసు వెట కూడిఁతి మనిదెర్.

29 మీరు క్రీస్తు వెట కూడిఁతి మనికెదెర్ ఇహిజ, అబ్రాహము తెగ్గదు పుట్టికెదెర్. ఎందనిజ్ ఇహిజ క్రీస్తు అబ్రాహము తెగ్గదు పుట్టికాన్. మీరు దేవుణు అబ్రాహము వెట ఒట్టు కిత్తి దన్నిజ్ అక్కు మనికెదెర్.

4 నాను వెప్పొనిక ఇనిక ఇహిజ, ఒరెన్ వన్ని ఆస్తిదిజ్ అక్కు మనికాన్ వన్ని కొడొఁనె. గాని అయా కొడొఁ ఇజ్జికాన్ మనివలె, వాండ్రు ఒరెన్ వెట్టివణి కెనివన్ని లెకెండ ఇనిదని ముస్సుబా అతికారం సిల్లెండ మనాన్. అయా కొడొఁ అప్పొసి ఆస్తిదిజ్ అక్కు మనికాన్ ఆతిజ్బా ఇనిదని ముస్సు అతికారం సిల్లెండ మనాన్. 2 వన్ని అప్పొసి ఎత్తుకిత్తి వయుసు వానిదాక, వాండ్రు వన్నిజ్ కోవ కెనివరి అడిఁగి, వన్ని ఆస్తి నూణి వణి మణిసిర్ అడిఁగి మంజెనాన్. 3 అయాలెకెండె మాటుబా క్రీస్తు యా లోకమ్దు వాని ముజాల, మాటుబా యా లోకమ్ది అలవాటుజ అడిఁగి మహట్. 4 గాని దేవుణు ఎత్తుకిత్తి తగితి నమయం వాతివలె వాండ్రు వన్ని మరిసిజ్ పోక్తాన్. వాండ్రు ఉండ్రె బోదెలి పాటా లొఁఇహన్ పుట్టాన్. వాండ్రు యూదురి రూలుజ్ విజా లొఁజెజి బత్తితాన్. 5 యూదురి రూలుజ్ లొఁజెజి దని అడిఁగి మహి మజి, దని బాణిజ్ డిఁ డిఁసిప్పి వందిజ్, దేవుణు వన్ని మరిసిజ్ పోక్తాన్. ఎందనిజ్ ఇహిజ మాటు పూర్తి అక్కు మని దేవుణు కొడొఁర్ ఆదెజ్ ఇజి, 6 మీరుని మాపు వన్ని కొడొఁర్. అందెజె దేవుణు వన్ని మరిసి ఆత్మదిజ్ మా మన్నుదు మండ్రెజ్ ఇజి పోక్తాన్. యా ఆత్మనె మా లొఁఇహన్ 'ఓబా', ఇజి కూక్కి మజి పార్దనం కెబెసినాన్. 7 అందెజె ఏలదాన్ మీరు ఒరెన్ ఒరెన్ వెటి వణికిని వన్నిలెకెండె ఆఇదెర్. గాని మీరు ఒరెన్ ఒరెన్ దేవుణు కొడొఁ ఆతి మనిదెర్. అందెజె మీరు వన్ని మరిసిరిర్ సీన ఇజి వాండ్రు ఒట్టు కిత్తి దన్నిజ్ విజా అక్కు మనికెదెర్.

8 ఉండ్రె కాలమ్దు దేవుణుదిజ్ నెన్ఇ ముజాల నిజం ఆఇ దేవుణుక అడిఁగి మహిదెర్. 9 గాని ఏలు మీరు దేవుణుదిజ్ నెన్సి మనిదెర్. మరి ఒదె వాండ్రు మిజి నెన్సి మనాన్. మరి ఎందనిజ్ మీరు నత్తు సీలి వణిదిజ్ రెఇ దెయ్మక దరోట్ మరెజెనిదెర్. మరిబ దన్ని అడిఁగి మండ్రెజ్ కోరిజెనిదెరా? 10 మీరు నెగ్గి దిన్మకు ఇజి నెగ్గి నెలెజ్ ఇజి సర్ద ఆని కాలమ్కు ఇజి నెగ్గి ఏంటుజ్ ఇజి నూణిదెర్. 11 మీరు కెజెని వన్కాజ్ నాను నెసి, మీ వందిజ్ బాద ఆజెన. నాను మీ నడిఁమి కన్బడిఁజి కిత్తి సేవ వణి, వణిదిజ్ రెఎండ ఆనాద్ ఇజి బాద ఆజెన.

12 అందెజె తంబెరిజాండె, నాను మిజి బతిమాల్లిన. మీరు నజి పొలిజి మండ్రు. ఎందనిజ్ ఇహిజ మోసి సీతి రూలుజ బాణిజ్ డిఁబె ఆతి యూదురు ఆఇ మీలెకెండె ఆతమన నాను. మీరు ఎస్తివలెబా నజి నెగ్గెండ సుడఁతి మనిదెర్. 13 నాను మిజి సువార్త తొలిత వెప్పొవలె నాను ఎలాగ మహ ఇజి మీరు నెన్సిదెర్. నాను నెగెండె సిల్లెండ కన్బం ఆర్తమహ. 14 నాను కన్బం అర్తివలె మీరు నండొ బాద ఆతిదెర్. గాని మీరు నజి ఇజ్జి కణకదాన్ తొఇదెర్. నజి నెక్కి పాక్ఇత్తిదెర్. అహిజ దేవుణు పాక్కి ఒరెన్ దూత లెకెండె మీరు నజి డగ్గు కిత్తిదెర్. క్రీస్తుయేసుజ్ డగ్గు కెని లెకెండె నజి డగ్గు కిత్తిదెర్. 15 అయాలె మీరు గొప్ప సర్దదాన్ మహిదెర్. ఏలు మీ సర్ద విజా ఇనిక ఆతాద్? మీరు నా వందిజ్ ఇనికబా కెదెజ్ తయార్దాన్ మహిదెర్. మీ సాంత కణుకుబా లాగ్గి సీదెజ్ ఇజి నాను లొన్సిక ఇహిజ, అయాకబా కెదెజ్ మీరు తయార్దాన్ మహిదెర్ ఇజి నాను మీ వందిజ్ నిజం వెప్పొన. 16 ఏలు నాను మిజి నిజం వెప్పొనిజ్ మిజి వణిఁఇకాన్ ఆతానా?

17 యూదురి రూలుజ్ లొఁజెదెజ్ వలె ఇజి వెప్పొని వరి వెట మీరు కూడఁదెజ్ ఇజి పటుదలదాన్ నండొ ఆస ఆజెనార్. గాని వరి ఉదెన్మకు నెగ్గెకెజ్ ఆఉ. మిజి మా బాణిజ్ దూరం కెబెన్బెజె వారు సుడఁజెనార్. ఎందనిజ్ ఇహిజ మీరు వరివెట కూడఁజె, వారు మీ వందిజ్ పటుదలదాన్ ఆస ఆజెని లెకెండె, మీరు వరి వందిజ్ ఆస ఆజె మండ్రెజ్. 18 ఉదెనం నెగ్గెక ఇహిజ పటుదలదాన్ మంజెనిక నెగెదె. ఎస్తివలెబా పటుదలదాన్ ఆహె మండ్రెజ్. నాను మీ వెట మని వలెనె ఆవ్ండ, సీలివలెబా పటుదలదాన్ మండ్రెజ్. 19 నాను ప్రిమిప్పి లోకురండె, నాను మీ వందిజ్ మరిబా బాద ఆజెన. ఏరు ఈబదెజ్ నొప్పిదాన్ బాద ఆని ఉండ్రె బోదెల్లెకెండె నాను మరిబా మీ వందిజ్ బాద ఆజెన. క్రీస్తు నని గుణమ్కు మిజి వానిదాక నాను బాద ఆజెనె మంజెన. 20 ఏలు మీ నడిఁమి మంజె, మిజి నిపాతి వెప్పొజ్ ఇజి నాను నండొ ఆస ఆజెన. ఎందనిజ్ ఇహిజ మీరు ఎందనిజ్ యా లెకెండె కిత్తిదెర్ ఇజి నాను గాబ్ర ఆజెన.

ఆగారుని సార

21 మోసి రాస్తి రూలుజ్ లొఁజెదెజ్ వలె ఇజి వెప్పొని వరిజ్ నాను వెన్బాజెన. మోసి రాస్తి పున్కమ్కాజ్ ఇనిక రాస్తి మనాద్ ఇజి మీరు నెన్సిదెరా? 22 ఇనిక రాస్తి మనాద్ ఇహిజ, అబ్రాహముజ్ రిఎర్ మరిసిర్ మహార్. ఒరెన్ వన్నిజ్ వెటి వణిమణిసి కాస్తాద్. మరి ఒరెన్ వన్నిజ్ వెట్టివణి మణిసి ఆఇకాద్ కాస్తాద్. 23 వెట్టివణి మణిసి వెట పుట్టికాన్ ఒడొఁల్ ఆనదాన్ పుట్టాన్. గాని వెట్టివణి మణిసి ఆఇ దని వెట పుట్టికాన్, దేవుణు ఎత్తు కిజి అబ్రాహము వెట కిత్తి ఒట్టు వజ పుట్టాన్.

24 యా రుండి బోదెకాజ్ రుండి నజెతిజ వెట పొలిసి వెప్పొజ్ ఆనాద్. యా రుండి బోదెకు దేవుణు లోకుర్ వెట కిత్తి రుండి ఒప్పమానమ్కు లెకెండె మన్నె. సీనాయి గొరొతు దేవుణు ఇస్తాయేలు లోకురిజ్ రూలుజ్ సీతివలె, వరి వెట కిత్తి ఒప్పమానం ఆగారుజ్ పొలిత మనాద్. ఆగారు వెట్టివణి కొడొఁరిజ్ ఇట్టి లెకెండె, యా ఒప్పమానం లోకురిజ్ వెట్టివణి మణిసిర్ లెకెండె కెనాద్. 25 ఏలు అరెబియాదు మని సీనాయి గొరొతు సీతి ఒప్పమానం ఆగారుజ్ పొలిత మనాద్. వెట్టివణి మణిసి ఆతి ఆగారు ని దని కొడొఁర్ లెకెండె మనార్. ఏలు యెరూసలెమ్సె బాన్ మని లోకుర్ ఎందనిజ్ ఇహిజ వారు అయా ఒప్పమానమ్దు వెప్పొని రూలుజ అడిఁగి మనార్. 26 గాని ముస్సు మని యెరూసలెం వెట్టివణి మణిసి ఆఇకాద్ ఆతి సారెజ్ పొలిత మనాద్. నమ్మితి మజి విజెరిజ్ అయ్సెనె సార. 27 ఎందనిజ్ ఇహిజ దేవుణు మాటుదు వెప్పొనాద్, "కొడొఁర్ కాన్ఇ గొడ్డు బోదెలి సర్ద ఆల. ఏరు ఈబని వలె మని నొప్పి నెన్ఇకె, సీను గొప్ప సర్ద ఆజె డటం డెడిఁసెల. ఎందనిజ్ ఇహిజ, మాసి మని బోదెల్దెజ్ ఇంక మాసి డిఁసి బోదెల్దెజ్ నండొండొర్ కొడొఁర్ మనార్".

28 ఏలు తంబెరిజాండె, మీరు ఇస్సాకు లెకెండె మనిదెర్. ఎందనిజ్ ఇహిజ, దేవుణు అబ్రాహముజ్ సీన ఇజి కిత్తి ఒట్టు వజ మీరు పుట్టిదెర్. 29 నస్తవలె ఒడోల్ అసదాన్ పుట్టికాన్ దేవుణు ఆత్మదాన్ పుట్టి వన్నిజ్ మాలెజ్ కిత్తాన్. అయాలెకెండె ఏలుబా జగ్గిజినాద్. 30 గాని దేవుణు మాట ఇనిక దిన్ని వందిజ్ వెప్పినాద్, 'వెట్టివణి బోదెల్దిజ్ దని కొడో: వెట నెక్కి పాక్తు. ఎందనిజ్ ఇహిజ, వెట్టివణి మణిసి పాటది కొడో:దిజ్, వెట్టివణి మణిసి ఆజ దని పాటది కొడో: వెట అప్పాసి అస్తదిజ్ అక్కు మండ్రెజ్ వీలు సిల్లెద్", 31 అందెజె తంబెరిజాండె, మాటు వెట్టివణి బోదెల్ కొడో:ర్ అవెల్. గాని మాటు వెట్టివణి మణిసి ఆజ దని కొడో:ర్ నె.

5 క్రీస్తు మోసె సీతి రూలుజ అడిగిదాన్ డి:బిస్తవలె, దని అడిగి మన్ఎండ మంజిని వందిజె డి:బిస్తాన్. అందెజె డి:బె ఆతి వరిలెకెండె నెగ్రెండ నిల్ని మండ్రు. మీరు వెట్టివణి మణిసి లెకెండె రూలుజ అడిగి మన్మాట్. 2 నా మాటెజ్ జాగర్త విండ్రు. పవులు ఇని నాను మిజి వెప్పిన. దేవుణు ఎద్రు సీతి నిజాయితి మనికిదెర్ అదెజ్ మీరు సునతి కిబె అదెజ్ సుడో:తిజ, క్రీస్తు మీ వందిజ్ ఆతిదని వందిజ్ ఇని విలువ సిల్లెద్. 3 సునతి కిబె ఆని విజెరెజ్ నాను మరిబా వెప్పిన. మోసె సీతి రూలుజ్ విజా మీరు పూర్తి లోజెదెజ్ వలె. 4 మోసె సీతి రూలుజ్ లోజెజి, దేవుణు ఎద్రు సీతి నిజాయితి మనికాన్ అదెజ్ సూణికాన్, క్రీస్తు బాణిజ్ పూర్తి దూరం ఆతాన్. దేవుణు దయా దర్మమిదిజ్ నెక్కి పాక్తిదెర్. 5 గాని దేవుణు మజి సీతి నిజాయితి మనికార్ ఇజి వన్ని ఎద్రు ఇడ్నాన్ ఇజి మాటు ఆస ఆజినాట్. మాటు ఎందనిజ్ యా లెకెండె అసదాన్ ఎద్రు సుడో:జినాట్ ఇహిజ, దేవుణు మజి సీతి నిజాయితి మనికార్ ఇజి ఇడ్నాన్ దేవుణు ఆత్మన మజి దయరం సీజినాన్. ఎందనిజ్ ఇహిజ మాటు క్రీస్తు యేసు ముస్సు నమకం ఇడో:జినాట్. 6 ఎందనిజ్ ఇహిజ, క్రీస్తు యేసు వెట కూడితి మనాట్ ఇజి మాటు నెప్పాట్. ఒరెన్ సునతి కిబె ఆత మనాండ్రె, సిలెనో ఇజి దేవుణు లోఎన్. గాని దేవుణు సూణిక, ఒరెన్ క్రీస్తు ముస్సు నమకం ఇట్టా మనాండ్రె ఇజినె. మహి వరిజ్ ప్రేమిసి నె క్రీస్తు ముస్సు నమకం ఇట్టా మనాన్ ఇజి తోరిస్తెజ్.

7 మీరు నెగ్రెండె నె నమ్మిజి మహిదెర్. మరి, ఎయెన్ మిజి మెసిం కిజి, నిజమాతి సువార్త లోజెఎండ అడు కిత్తాన్? 8 వన్ని లోకుర్ అదెజ్ మిజి కూక్తి దేవుణు యా లెకెండె మిజి వెహెన్. 9 పులాని దూరు కండెక్ ఆతిజ్బా, కుండార్ మని దూరు విజా పులాజ్ కినాద్. అయాలెకెండె ఉండ్రె తపు బోదబ కినాద్. 10 మాటు ప్రబు వెట కూడిత మనాట్. అందెజె మహి బోదెజ మిరు లోజెదెర్ ఇజి నాను అసమానం సిల్లెండె నమ్మిజిన. మిజి వంబ్ర కిబిస్సికాన్, వాండ్రు ఎయెన్ ఆతిజ్బా దేవుణు వన్నిజ్ తగితి సిక్కి సీనాన్. 11 తంబెరిజాండె, నెగొండార్ వెప్పినార్ దేవుణు కొడో:రస అదెజ్ ఇహిజ సునతి కిబె అదెజ్ వలె ఇజి. నాను అయాలెకెండె వెప్పి మంజినిక ఇహిజ, యూదురు నజి మాలెజ్ కివితార్మరి. సునతి కిబె అదెజ్ వలె ఇజి నాను వెప్పి మంజినిక ఇహిజ, సిలువాదు క్రీస్తు సాతిసాపు వందిజ్ నాను వెప్పి వలె వారు నా ముస్సు కోపం అవతార్మరి. 12 సునతి కిబె అదెజ్ వలె ఇజి వెప్పి మజి వంబ్ర కిబిస్సి యా లోకుర్, కొడో:ర్ ఇడో:దెజ్ అల్ ఇ వరి లెకెండె ఆపిర్ ఇజి నాను ఆస ఆజిన.

13 తంబెరిజాండె, డి:బె ఆతి వరి లెకెండె దేవుణు మిజి కూక్తి మనాన్. మీరు ఇష్టం ఆతి సెఇకెజ్ కిదెజ్ ఆనాద్ ఇజి ఒడో:బిమాట్. గాని మరి ఒరెన్ వన్నిజ్ ప్రేమిసి సీవ కిదెజ్ మిజి అక్కు మనాద్. 14 మోసె సీతి రూలుజ్ విజా ఉండ్రె మాటాద్ కూడితి మన్నె. అయొక ఇనిక ఇహిజ, "నీను నిజి ప్రేమిస్సి లెకెండె, మహి వరిజ్ ప్రేమిస్ అ", ఇజి. 15 గాని మీరు జంతుజ లెకెండె కటె ఆజి, ముకెజ్ లాగ్గి మహిజ, మీరు ఒరెన్ మరి ఒరెన్ వన్ని బాణిజ్ పూర్తి నాసనం ఆనిదెర్ ఇజి జాగర్త సుడో:అదు.

దేవుణు ఆత్మ నడిపిసిని బత్సు

16 అందెజె నాను మిజి వెప్పిన, దేవుణు ఆత్మ మీ మన్ముదిజ్ వెప్పి నడి: పిసిని వజ నడి:దు. అయావలె మీ ఒడో:ల్ది సెఇ ఆసెజ్ కిబిస్సి సెఇ వణిజ్ మీరు కిఎండ మంజినిదెర్. 17 మా ఒడో:ల్ది సెఇ ఆసెజ వడి:ఎద్ దేవుణు ఆత్మ. దేవుణు ఆత్మదిజ్ వడి:ఎద్ సెఇ ఆసెజ్. యా రుండి సెఇ ఆసెజ్ని దేవుణు ఆత్మ కూడి:జి మన్ఉ. అందెజె మీరు ఎస్తివలెబా కిదెజ్ కోరిజినిక కిఎండ మండ్రెజ్ అట్టిదెర్. 18 గాని దేవుణు ఆత్మనె మిజి నడి:పిసి మహిజ, మీరు మోసె సీతి రూలుజ్ లోజెజి దని అడిగి మన్ఇదెర్.

19-21 ఒడో:ల్ది సెఇ ఆసెజ్ కిబిస్సి వణిజ్ విజెరె నెస్సికెజె. అయొకెజ్ ఇని ఇనికెజ్ ఇహిజ, రంకు బూలానిక, కెలార్బూలానిక, సాని బూలానిక, బోమెజ మాడి:స్సిక, సెట్నిక, వగ ఆనిక, గొడబ ఆనిక, ఆఇవరి వన్యా వందిజ్ నండ్రె ఆస ఆనిక, సాంత ఇష్టమకునె సూణిక, కేటెజ్ ఆనిక, మిజి వడి:ఇ వరి బాణిజ్ దూరం ఆనిక, మిజి కూడ్డి వరివెట కూడ్డిక, గోస ఆనిక, సాస్సిక, ఉణిజి తింబి సాసె కర్బిజి సెఇ వణిజ్ కిజినిక. నాను ముజాలె మిజి డటం వెప్పి లెకెండె మరి వెప్పిన. నిని వణిజ్ కిజి బత్సునికార్ దేవుణు ఏలుబడి: కిని లోకుర్ లోఇ మండ్రెజ్ అట్ఎర్.

22-23 గాని దేవుణు ఆత్మ వెప్పి నడి:పిసిని వన్నిజ్ నిని గుణమకునె మంజినె. అయొకెజ్ ఇని ఇనికెజ్ ఇహిజ, మహి వరిజ్ ప్రేమిస్నాన్, సర్దదాన్ మంజినాన్, సాంతి సమాదనమ్దాన్ మంజినాన్, కీడు కిత్తిజ్బా అయొకెజ్ ఓరిసి మంజినాన్, కనికారం తోరిస్నాన్, నెగ్గెకెజి కినాన్, నమ్మిదెజ్ తగ్గికాన్, సార్లిదాన్ మంజినాన్, సాస్ఎండ మంజినాన్. యా లెకెండె కిజి మంజినికార్, ఇని రూలుజ్బా తప్ఎర్.

24 క్రీస్తుయేసు వెట కూడి:తి మనికార్, వరి వడా:యి బత్సు, వరి సెఇ ఆసెజ్ విజా, సిలువాదు కుంటిజాణిజ్ డె:యె ఆతి లెకెండె మనాద్. ఇహిజ వారు అయొకెజ్ పూర్తి డి:స్తి సితార్. 25 దేవుణు ఆత్మ మజి కొత్త బత్సు సిత మనాన్. అందెజె దేవుణు ఆత్మ వెప్పి నడి:పిసిని వజ మాటు బత్సుదెజ్. 26 మాటు గొప్ప పెరికాట్ ఇజి గర్త అవిండ మహి వరిజ్ కోపం రేపిన్ఎండ, గోస ఆజి సెఇకెజ్ కిఎండ ఒరెన్ మరి ఒరెన్ వన్ని వెట మండ్రెజ్.

6 తంబెరిజాండె, మీ లోఇ ఒరెన్ తపు కిత్తిజ, దేవుణు ఆత్మ నడి:పిసిని వజ నడి:జిని మీరు సార్లిదాన్ వన్ని తపు దిదిజి, నెగ్గె సరిదు తతెజ్. మరి అయాలెకెండె, మీరుబా పావమ్దు అర్ఎండ జాగర్త సుడో:దెజ్. 2 మహి వరి బాదెజ్, కష్టమకు నెసి వరిజ్ సాయం కిదెజ్. యా లెకెండె కిజి క్రీస్తు వెప్పి రూలుజ్ మీరు పూర్తి కిజినిదెర్. 3 ఎయెన్బా వాండ్రు పెరికాన్ ఆఇతిజ్బా, గొప్ప పెరికాన్ ఇజి ఒడో:బితిజ వన్నిజ్ వాండ్రె మెసిం కిబె ఆజినాన్. 4 విజెరె ఎయెన్ కిజినికెజ్ నెగ్గెకెజ్నా సెఇకెజ్నా ఇజి వాండ్రె సుడో: అదెజ్. అయావలె వాండ్రు కిజిని దనితాన్ వాండ్రు పాగడె: అదెజ్ అట్నాన్. మహికార్ కిజిని దనిజ్ అవిండ, వాండ్రు కిజినిదాన్ సుడో:జి పాగడె: అదెజ్. 5 ఎందనిజ్ ఇహిజ, ఒరెన్ ఒరెన్ వన్నిజ్, వాండ్రు కిదెజ్ మని బాజిత మనాద్.

6 దేవుణు మాట వెంబి నెసినికాన్ ఎయెన్బా వెప్పి నెప్పిస్సి వన్నిజ్, వన్నిజ్ కల్గితి మని విజా నెగ్గె వన్యాజ్ లోఇ వంతు సీదెజ్.

7 మిజి మీరె మొసెం ఆమాట్. దేవుణుదిజ్ సుత్రిసి అర్పైజ్ ఆనాద్ ఇజి ఒడిబిమాట్. నాను ఎందనిజ్ యాక వెప్పిన ఇహిజ, విత్తికాన్ ఇనిక విత్తాండ్రై, అయా పంటనె కొయినాన్. 8 ఒడొల్దిది సెఇ ఆసెజ వజి కిజి బత్తిజినికాన్ నాసనం ఆనాన్. ఎందనిజ్ ఇహిజ వాండ్రు సెఇ ఆస వజ బత్తితాన్. గాని దేవుణు ఆత్మ వెప్పి నడిపిసిని వజ నడినికాన్ ఎలాకాలం దేవుణు వెబ బత్తినాన్. ఎందనిజ్ ఇహిజ, వాండ్రు దేవుణు ఆత్మ వెప్పి నడిపిసిని వజ బత్తితాన్. 9 నెగ్గి పణిజ్ కిదెజ్ విస్సిమాట్. ఎందనిజ్ ఇహిజ, మాటు విస్సిఎండ మహిజ, దేవుణు ఎత్తు కిత్తి సమయమ్దు మాటు కిత్తి దనిజ్ వాండ్రు పలితం సీనాన్. 10 అందెజె మహి పరివందిజ్ సాయం కిదెజ్ సమయం దొప్పివలె, మాటు విజెరిజ్ నెగ్గికెజ్ కిదెజ్. ముకెలం దేవుణుదిజ్, నమ్మితి పరివందిజ్ కిదెజ్.

సునతి ఆవద్ కొత్త బత్తునె ముకెలం.

11 నాను యా మాటెజ్ నా సాంత కిదాన్ నె రాసిన. ఎసా పెరి అసరమ్కాణిజ్ రాసిన ఇజి సుడెడు.

12 మహి యూదురిజ్ సర్ద కిబిస్తెజ్ నూణికారె, మీరు తవ్వెండ సునతి కిబె ఆదెజ్ వలె ఇజి మిజి డటం వెప్పినార్. వారు ఎందనిజ్ యా లెకెండ వెప్పినార్ ఇహిజ, క్రీస్తు సిలువాదు సాతాన్ ఇజి నమ్మితిజనె దేవుణు రక్సిస్సాన్ ఇజి వెప్పిని వలె లోకుర్ పరిజ్ మాలెజ్ కినార్. ఆహె పరి ముస్సు మాలెజ్ రెండ మండ్రెజ్ నె సునతి కిబె ఆదెజ్ వలె ఇజి డటం వెప్పినార్. 13 సునతి కిబె ఆతికార్ బా, మోసె సీతి రూలుజ్ విజా లోజివెర్. గాని మిజి సునతి కిబిస్తెజ్ కోరిజినార్. ఎందనిజ్ ఇహిజ, వారు వెప్పినిజ్ మీరు సునతి కిబె ఆతిదెర్ ఇజి మహి యూదురిజ్ వెప్పి పరి నడిమి పాగిడె ఆదెజ్ సుడెజినార్. 14 గాని నాను, మా ప్రబు ఆతి యేసు క్రీస్తు సిలువాదు మా వందిజ్ సాతాన్ ఇజి ఆవండ మరి ఇనిదని వందిజ్ బా పాగ్డిఃఎ. వాండ్రు అయాలెకెండ సాతిజ్, నాను గొప్ప విలువ మనిక ఇజి ఒడిబిని దనిజ్ యా లోకమ్దికార్ విలువ సివెర్. వారు విలువ మనిక ఇజి ఒడిబిని దనిజ్ నాను విలువ సిఎ. 15 ఒరెన్ సునతి కిబె ఆతాండ్రై, సిల్లెనా ఇజి ఆవద్ ముకెలం. ముకెలమతిక ఇనిక ఇహిజ, ఒరెన్ వడాఃయి బత్తు డఃసి కొత్తాజ్ ఆతాన్ ఇజినె. 16 యా మాట వెంజి అయా వజ కిని విజెరిజ్ దేవుణు వన్ని సమాదనం సీజి, వన్ని ముస్సు కనికారం తోరిస్సాన్. వీరు ఎయెర్ ఇహిజ, దేవుణు వన్ని వందిజ్ ఎర్లిస్తెకారె.

17 ఆకార్దు, ఎయెన్ బా నజి మరి బాదెజ్ కిమాట్. ఎందనిజ్ ఇహిజ యేసుజ్ సేవ కిత్తి వందిజ్ నజి కిత్తి బాదెజ మసెజ్ నా ఒడొల్దు మన్నె. యాకెజ్ నాను వన్ని వెట్టివణి మణిసి ఇజి తోరిస్సె.

18 తంబెరిజాండె, మా ప్రబు ఆతి యేసుక్రీస్తు దయ దర్మం మీ ముస్సు మసీద్. ఆమెన్.

మార్కు

నెల్ల కిబిస్సిక

అపొస్తలుడు ఆతి పవులు ఎపెసు ఇని పట్నమ్దు మని దేవుణు సజమ్దిజ్ రాసిని ఉత్తమ్నె యాక. యా ఉత్తం రాస్తి మహివలె, వాండ్రు రోమ జెలిదు తొహా ఆత మహాన్. నస్తివలె అసియ ఇని రోమ ప్రాంతమ్దు మని ఉండ్రీ ముకెలమాతి పట్నమ్నె ఎపెసు.

పవులు యా ఉత్తం రాస్తాండ్రె, తుకికు వెట పాక్కినాన్. దేవుణుదిజ్ నమ్మిత్తికార్, వన్ని దయ దర్మం ఎసా గొప్ప పెరిక ఇజి వారు అర్దం కిజి నెస్టెజ్ రాస్తికాదె. మరి దేవుణు ఎత్తు కిత్తి సజతిజ్ క్రీస్తు వెటనె పూర్తి ఆతె. వాండ్రె విజా వన్యూ ముస్సు మనికాన్. క్రీస్తు వెటనె దేవుణు యూదురిజ్, యూదురు ఆఇ వరిజ్ రక్కిసి వరిజ్ ఉండ్రె ఒడోల్ కిజినాన్. ఇబ్బె ఒడోల్ ఇజి వెస్సానిక, యా లోకమ్దు మని దేవుణుదిజ్ నమ్మిత్తికార్ విజెరె కూడితి మని సజమ్నె. మరి దేవుణు సజం ఎలాగ ఉండ్రె ఆజి మండ్రెజ్ నమ్మిత్తికార్ ఒరెన్ ఒరెన్ ఎలాగ మండ్రెజ్ ఇజి వెస్సానాన్. నమ్మిత్తికార్ ఎద్రిసినిక యా లోకమ్ది లోకుర్ వెటనె ఆవద్. గాని సయ్తాను వెటనె ఎద్రిసినార్ ఇజి ఎత్తు కిబిసి, ఎలాగ సయ్తానుజ్ ఎద్రిస్తిజ్ ఇజి వెస్సానాన్.

1 క్రీస్తు యేసు వందిజ్ అపొస్తలుడు ఆతి పవులు ఇని నాను ఎపెసు పట్నమ్దు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కిత్తి వజనె నాను క్రీస్తు యేసు వందిజ్ అపొస్తలుడు ఆత. మీరు క్రీస్తు యేసుజ్ నమ్మిజిని మనికిదెర్. 2 మా బుబ్బు ఆతి దేవుణుని ప్రబు ఆతి యేసు క్రీస్తు దయ దర్మమ్దాన్ మీరు నిపాతిదాన్ మండ్రెజ్ సాయం కిపిర్. 3 దేవుణుదిజ్ పాగిడిజినాట్. వాండ్రె మా ప్రబు ఆతి యేసు క్రీస్తు దేవుణు. మరి వాండ్రె వన్ని బుబ్బుబా. ఎందనిజ్ ఇహిజ, దేవుణు ఆత్మ మా మన్సుదిజ్ వెస్సా, వన్ని సరిదు నడిపిస్సిదనితాన్ మజి వాజిని విజా నెగ్గెజ్ సీజి వాండ్రె మజి దీవిస్తాన్. వరలోకమ్దాన్ వాజినికెజె అయా నెగ్గెజ్. క్రీస్తు వెట మజి కుడుప్తాండ్రె, యా నెగ్గెజ్ మజి సితాన్. 4 ఎందనిజ్ ఇహిజ దేవుణు లోకం పుటిస్ఎండ ముజాలె మజి వన్ని లోకుర్ ఇజి ఎద్రిస్తాన్. క్రీస్తు వెట మజి మని సమమ్దమ్దాన్ యా లెకండ్రె మజి ఎద్రిస్తాన్. మాటు వన్ని వందిజ్ కేట ఆతి లోకుర్ లెకండ్రె, ఇని నిందెజ్ సిల్లెండ వన్ని ఎద్దు మండ్రెజ్ వాండ్రు యా లెకండ్రె ఎద్రిస్తాన్. 5 వాండ్రు మజి ప్రేమిసినాన్. అందెజె యేసు ప్రబు మా వందిజ్ ఆతి దనితాన్ మాటు వన్ని కొడోర్ ఆదెజ్ ఇజి నండొ ముజాలె వాండ్రు తిరుమానం కిత్తాన్. వాండ్రు యా లెకండ్రె తిరుమానం కిత్తాన్. ఎందనిజ్ ఇహిజ, అయాకదె వాండ్రు ఎత్తు కిత్తిక. వన్నిజ్ ఇష్టం ఆతిక. 6 అందెజె గొప్ప బమ్మ కిని వన్ని దయ దర్మం వందిజ్ దేవుణుదిజ్ పాగిడిజినాట్. వాండ్రు ప్రేమిసిని వన్ని మరిసి ఆతి దని దనటానె యా గొప్ప దయ దర్మం మా ముస్సు వాతాద్. మజి సెడ్డినె దొహ్కాద్. 7-8 క్రీస్తు మా వందిజ్ నల వాక్కి సాతి సావదాన్ దేవుణు మా పావమ్కాణిజ్ మజి డిస్పిస్తాన్. ఇహిజ మా పావమ్కు సెమిస్తాన్. అయా లెకండ్రె వన్ని దయ దర్మం గొప్ప పెరిక ఇజి తోరిస్తాన్. మా ముస్సు నండొ దయ దర్మం సెడ్డినె తోరిస్తాన్. వన్ని బుద్ది గెణమ్దానె వాండ్రు వన్ని దయ దర్మం మా ముస్సు తోరిస్తాన్. 9 దేవుణు ఎత్తు కిత్తిక వాండ్రు కిత్తాన్. క్రీస్తు వెట పూర్తి కిదెజ్ ఇజి వాండ్రు వన్ని గర్బమ్దు ఎత్తు కిజి డాప్పి ఇట్టి వణి మజి తోరిస్తాన్. అయాక ముజాలె ఎయెర్బా నెస్ఎతార్. 10 వాండ్రు గర్బమ్దు ఎత్తు కిజి డాప్పి ఇట్టిక ఇనిక ఇహిజ, వరలోకమ్దు మని విజా వన్యూజ్, బూమి ముస్సు మని విజా వన్యూజ్, కూడుప్పి ఒరెన్ వన్ని అడిగి ఇట్తాన్. వాండ్రె క్రీస్తు. యాక కిదెజ్ తగితి సమయం వానివలె వాండ్రు పూర్తి కిసాన్.

11 విజా సజతిజ్ దేవుణు ఎత్తు కిత్తి వజ వాండ్రు కిజినాన్. క్రీస్తు వెట మజి కుడుప్తాండ్రె, వన్ని సాంత లోకుర్ ఇజి మజి ఎద్రిస్తాన్. ఎందనిజ్ ఇహిజ అయా లెకండ్రె ఎద్రిస్తిజ్ ఇజి వాండ్రు పూర్తిబమ్దునె తిరుమానం కిత మహాన్. అయాకదె వాండ్రు ఎత్తు కిత్తిక. 12 క్రీస్తు రక్కిస్తిజ్ వానానలె ఇజి విజెరె ఇంక ముజాలె నమకం ఇట్టికాపె యూదురు ఆతి మాపు. అందెజె దేవుణు గొప్ప పెరికాన్ ఇజి పాగిడిజినాట్. అయాకదె వన్ని ఉదెనం. 13 అయాలెకండ్రె యూదురు ఆఇ మీరుబ నిజమాతి బోద వెహిదెర్ ఇహిజ, దేవుణు మిజి రక్కిస్తికాలె ఇజి వెస్సాని సువార్త వెహిదెర్. మీరు క్రీస్తు ముస్సు నమకం ఇట్టిదెరె వన్ని వెట కూడితి మనిదెర్. అందెజె దేవుణు సీన ఇజి ఒట్టు కిత్తి దేవుణు ఆత్మెజ్ మిజి సితాన్. సితండ్రె దేవుణు మిజి లోకుర్ ఇజి కూక్తాన్. యా దేవుణు ఆత్మెనె, మీరు దేవుణు లోకుర్ ఇని దనిజ్ ఉండ్రీ గుర్తు. 14 మరి దేవుణు వన్ని లోకురిజ్ ఒట్టు కిత్తి విజా మజి దొహ్కెఇని దనిజ్ ఉండ్రీ ఆదారమ్నె యా దేవుణు ఆత్మ. వాండ్రు వన్ని లోకురిజ్ పూర్తి విడుడల కినివలె అయాకెజ్ మిజి దొహ్కె. దేవుణు గొప్ప పెరికాన్ ఇజి దినితాన్ లోకుర్ పాగిడినార్.

ఎపెసు సజమ్దు మని వరి వందిజ్ పవులు కిజిని పార్దనం

15-16 దేవుణు మిజి ముస్సు వెస్తి లెకండ్రె దీవిస్త మనాన్. అందెజె నాను మీ వందిజ్ వన్నిజ్ పార్దనం కిజిన. మీరు ప్రబు ఆతి యేసుజ్ నమ్మిజినిదెర్. దేవుణు వందిజ్ కేట ఆతి వరిజ్ విజెరెజ్ ప్రేమిసినిదెర్ ఇజి నాను వెహి బాణిజ్ అసి మీ వందిజ్ ఎస్తివలెబా డిస్పిఎండ దేవుణుదిజ్ వందనమ్కు వెస్సాన. ఎస్తివలెబా నాను పార్దనం కినివలె, మీ వందిజ్ పార్దనం కిజిన. 17 గొప్ప పెరికాన్ ఆతి మా బుబ్బెజ్ పార్దనం కిజిన. వాండ్రె మా బుబ్బు ఆతి యేసు క్రీస్తుజ్ దేవుణు. మీరు వన్నిజ్ బాగ నెస్సి వందిజ్ దేవుణు ఆత్మ మిజి గెణం సీదెజ్ ఇజి, దేవుణు వందిజ్ మిజి తెలివి కిబిస్తిజ్ ఇజి నాను వన్నిజ్ పార్దనం కిజిన. 18 దేవుణు వందిజ్ కేట ఆతి లోకుర్ వందిజ్ వాండ్రు ఇట్టి మని గొప్ప పెరి దీవెనమ్కు ఇనికెజ్ ఇజి మీరు నెస్సి వందిజ్, అయా దీవెనమ్కాజ్ అసదాన్ ఎద్దు సూణి వందిజ్ వరిజ్ నెస్సిస్ల ఇజి నాను పార్దనం కిజిన. దేవుణు వన్ని లోకురిజ్ సీన ఇజి ఒట్టు కిత్తి దీవెనమ్కు ఎసా పెరికెజ్ ఇజి మీరు నెస్తిజ్ ఇజి నాను వన్నిజ్ పార్దనం కిజిన.

19-21 వన్నిజ్ నమ్మిజిని మా లోఇ మని వన్ని సత్తు ఎసా పెరిక ఇజి మీరు నన్నెజ్ ఇజి నాను పార్దనం కిజిన. అయా సత్తు విజా వన్కా ముస్సు గొప్ప పెరిక. యా గొప్ప పెరి సత్తుదాన్ దేవుణు క్రీస్తుజ్ సావుదాన్ బత్తిస్తాండ్రె పరలోకమ్దు వన్ని ఉణెర్ పడఃకాదు బని కిత్తాన్. క్రీస్తు అబె అతికారం కిజినాన్. విజా రకమ్కాణి అతికారం కిజిని దూతెజ, దెయమ్క ముస్సు అతికారం కిజినాన్. అతికారం కిజిని విజెర ముస్సు వాండ్రె గొప్ప అతికారం మనికాన్. వన్ని అతికారం ఏలు అతికారం కిజిని వరి ముస్సునె ఆవద్. గాని వాని కాలమ్దు అతికారం కిని వరి ముస్సుబా వాండ్రె గొప్ప అతికారం మనికాన్. 22 దేవుణు విజా వన్కాజ్ క్రీస్తు పాదమ్క అడిగి ఇట్టాన్. దేవుణు సజం ముస్సు అతికారి లెకండ వన్నిజ్ ఏర్పాటు కిత్తాన్. 23 వాండ్రు దేవుణు సజమ్దిజ్ బుర్ర లెకండ దేవుణు సజమ్నె వన్ని ఒడొల్ లెకండ దేవుణు సజమ్నె వన్నిజ్ పూర్తి కిజినాద్. ఎంబెబా విజా వన్కాజ్ పూర్తి కిజినికాన్ వాండ్రె.

దేవుణు వన్ని కనికారమ్దాన్ మజి రక్సినినాన్.

2 మీరు క్రీస్తుజ్ నమ్మిజి ముజాల సాతి వరి లెకండ మహిదెర్. ఎండనిజ్ ఇహిజ మీరు దేవుణుదిజ్ లోజిఇతిదెర్, సెఇ పణిజ్ కిజి మహిదెర్. 2 యా లోకమ్దు మని దేవుణుదిజ్ దూసిన్సికార్ కిజి మహి లెకండ మీరుబా కిజి మహిదెర్. ఆగాసమ్దు బుల్లెయ్ కిని దెయమ్కాజ్ నెయ్కి ఆతి సయ్తానుజ్ లోజిజి మహిదెర్. వీండ్రె దేవుణుదిజ్ లోజిజి వరి ముస్సు ఏలు అతికారం కిజినాన్. 3 ఉండ్రె కాలమ్దు, నిజమె, మాటుబా నని వరి లెకండ మహాల్. మా సాంత సెఇ ఇప్పమ్దానె కిజి మహాల్. మ ఒడొల్ది ఆసెజ వజ, సెఇ ఆలోనమ్క వజ కిజి మహాల్. మహి విజెర లెకండ, మాటుబా దేవుణు కోవమ్దిజ్ గురి ఆతి మహికాల్. 4 గాని దేవుణు నండొ కనికారం మనికాన్. వాండ్రు మజి నండొ ప్రేమినినాన్. 5 అందెజి మజి క్రీస్తు వెట కుడుప్తాండ్రె మజి కొత్త బత్తు సితాన్. మాటు దేవుణుదిజ్ లోజిఎండ ఆతి మహిజ్, సాతి వరి లెకండ మహాల్. అయావలెబా వాండ్రు యా లెకండ కొత్త బత్తు సితాన్. దేవుణు దయాదర్మదానె వాండ్రు మజి రక్సిస్తాన్. 6 వాండ్రు మజి క్రీస్తుయేసు వెట సావుదాన్ మరజి బత్తిస్తాండ్రె, పరలోకమ్దు వన్ని వెట కూడఃజి ఏలుబడిః కిదెజ్ బని కిత్తాన్. క్రీస్తు వెట మజి కుడుప్తాండ్రె యా లెకండ కిత్తాన్. 7 వాని కాలమ్దు లోకుర్ విజెర వన్ని దయ దర్మం విజా వన్కా ముస్సు గొప్ప నండొ పెరిక ఇజి సుడఃదెజె యా లెకండ క్రీస్తు వెట మా ముస్సు దయ దర్మం తోరిస్తాన్. 8 ఎండనిజ్ ఇహిజ దేవుణు, దయాదర్మదానె మిజి రక్సిస్తాన్. మీరు క్రీస్తుజ్ నమ్మిత్తి దనితానె రక్సిస్తాన్. మీరు కిత్తి నెగ్గి పణిజాణిజ్ ఆవద్ వాండ్రు మిజి రక్సిస్తాన్. అయాక వాండ్రు మిజి సీతి ఉండ్రె ఇనాయమ్నె. 9 మీరు కిత్తి నెగ్గి పణిజాణిజ్ ఆవద్ దేవుణు మిజి రక్సిస్తాన్. అందెజె ఎయెన్బా నాను కిత్తి నెగ్గి పణిజాణిజ్ దేవుణు నజి రక్సిస్తాన్ ఇజి పాజెదెజ్ ఆవద్. 10 మాటు నెగ్గి పణిజాణిజెనె మంజిని వందిజ్ క్రీస్తు యేసు వెట మజి కుడుప్తాండ్రె కొత్త బత్తు మజి సితాన్. మాటు కిదెజ్ మని యా నెగ్గి పణిజ్ వాండ్రు ముజాలె తిరుమానం కితాండ్రె ఇట్టాన్. నిజమె దేవుణు ఒరెండ్రె యా లెకండ మా బత్తుదిజ్ కొత్తాజ్ కిత్తాన్.

11 అందెజె యూదురు జాతిదు పుట్ఇతి మీరు క్రీస్తుజ్ నమ్మిజి ముజాల ఎలాగ మహిదెర్ ఇజి ఎత్తు కిదు. మీరు సునతి కిబె ఆఇకిదెర్ ఇజి యూదురు మిజి వెప్పినాన్. ఎండనిజ్ ఇహిజ, వారు సునతి కిబె ఆత మనార్. అందెజె వారు దేవుణు లోకుర్ ఇజి ఒడఃబిజినాన్. (గాని యా సునతి ఒరెన్ వన్ని ఒడఃల్దు కిని ఆసారమ్నె) 12 నుడఃదు, అయా కాలమ్దు మీరు క్రీస్తుజ్ దూరం మహిదెర్. దేవుణు లోకుర్ ఆతి ఇనాయేలుదిజ్ సెందిఇకిదెర్. మీరు పయివారు. దేవుణు వన్ని లోకురిజ్ కిత్తి ఒట్టుదిజ్ సమందం సిలికిదెర్. మీరు యా లోకమ్దు ఇని ఆస సిల్లెండ, దేవుణుదిజ్ నెన్ఎండ బత్తిజి మహిదెర్. 13 గాని ముజాల క్రీస్తుజ్ దూరం మహి మీరు ఏలు వన్ని వెట కూడిఃతి మనిదెర్. క్రీస్తు నల వాక్సి సాతి సావుదాన్ దేవుణు మిజి డగ్రు కిత్తాన్. 14 క్రీస్తునె యూదురు ఆఇ మిజి, యూదురు ఆతి మజి రాజినం కిబిస్తాన్. ముజాల మిజి మజి అడ్డు లెకండ మహి పగ వాండ్రు లాగితండ్రె, ఉండ్రె నన్ని లోకుర్ కిత్తాన్. 15 యూదురి రూలుదు మని ఆడ్రెజ, రూలుజ క్రీస్తు వన్ని ఒడఃల్దు సాతి సావుదాన్ వన్కాజ్ సత్తు సిల్లెండ కితాండ్రె, అడు లెకండ మహి పగ లాగితాన్. ఎండనిజ్ ఇహిజ, రుండి లోకురిజ్ ఇహిజ, యూదురిజ్, యూదురు ఆఇ వరిజ్ వన్ని వెట కుడుప్పి ఉండ్రె నని కొత్త లోకు కిత్తాన్. యా లెకండ వాండ్రు రాజినం కిబిస్తాన్. 16 మరి సిలువాదు సాతి సావుదాన్ వాండ్రు రుండి జాతిజ నడిఃమి మహి పగ సాన్సిసి, ఉండ్రె నని లోకుర్ లెకండ కిజి, దేవుణు డగ్రు మరజి తతెజ్ యా లెకండ రాజినం కిబిస్తాన్. 17 క్రీస్తు యా లోకమ్దు వాతండ్రె, దేవుణుదిజ్ దూరం మహి యూదురు ఆఇ మిజి, వన్ని డగ్రు మహి యూదురు ఆతి మజి సమాదనం సీజిని సువార్త వెప్తాన్. 18 వన్ని వెట మజి రిపెరిజ్, ఇహిజ యూదురు ఆఇ మిజి, యూదురు ఆతి మజి, బుబ్బి ఆతి దేవుణు ముజాల దయరమ్దాన్ సాండ్రెజ్ వన్నిజ్ లొస్తాజ్ అక్కు దొవ్కాద్. యాక దేవుణు ఆత్మ వెట మజి దొవ్కాద్. 19 అందెజె మీరు ఏలుదాన్ పయిదికిదెర్ ఆఇదెర్. దేవుణుదిజ్ సెందిఇకిదెర్ ఆఇదెర్. గాని మీరు దేవుణు లోకుర్ వెట అక్కు ఆతికిదెర్. దేవుణు కుటుమ్దికిదెర్. 20 ఉండ్రె ఇల్లు పణకాణిజ్ తొప్పిలెకండ మీరు మనిదెర్. దనిజ్ పునాది ఆతికార్ ప్రవక్తరు, అపాస్తురు. దనిజ్ మూల పణకు క్రీస్తుయేసునె. 21 వాండ్రె ఆ ఇల్లు అర్ఎండ అన్నికాన్. వన్ని వెటనె ఆ ఇల్లు తొపా ఆజి పిరిసి ప్రబు ఆతి యేసు క్రీస్తు మండ్రెజ్ వన్ని వందిజ్ కేట ఆతి నెగ్గి ఇల్లు ఆనాద్. 22 క్రీస్తు వెట కూడిఃతి మని మిజి వాండ్రు మహి నమ్మిత్తి వరివెట కుడుప్పినాన్. అయావలె మీరు మహి నమ్మిత్తి వరివెట, దేవుణు వన్ని ఆత్మ సత్తుదాన్ మంజిని ఉండ్రె ఇల్లు ఆజినిదెర్.

యూదురు ఆఇ వరిజ్ సువార్త వెప్పి పణి పవులుజ్ దేవుణు ఒవజెప్పినాన్

3 అందెజె క్రీస్తు యేసుజ్ సేవ కిని వందిజ్ జెలిదు మని పవులు ఇని నాను మీ వందిజ్ పార్దనం కిజిన. యూదురు ఆఇ మిజి సువార్త వెప్పిని వందిజె నాను జెలిదు ఆత.

2 మీరు తవ్వెండ వెహిమనిదెర్. దేవుణు దయ దర్మమ్దాన్, మిజి సువార్త వెప్పి పణి నజి ఒవజెప్తాన్ 3-4 దేవుణు ఎత్తు కిజి వన్ని గర్బమ్దు డాప్తి ఇట్టిక వాండ్రు నా వెట తోరిస్తాన్. దిని వందిజ్ నాను ముస్సు కండెక్ రాస్త మన. అయాక మీరు నద్వెతిజ, క్రీస్తు వందిజ్ దేవుణు ఎత్తు కిజి గర్బమ్దు డాప్తి ఇట్టిక నాను నెస్త మన ఇజి మీరు నెప్పిదెర్. 5 యాక దేవుణు పూర్బమ్దు మహి లోకురిజ్ తోరిసి నెన్పిన్ఎత్తాన్. గాని ఏలు వన్ని వందిజ్ ఏర్పాటు కిత్తి అపాస్తుడురిజ్, ప్రవక్తరిజ్ తోరిసి నెన్పిస్తాన్. దేవుణు ఆత్మదాన్నె ఈఘ తోరిసి నెన్పిస్తాన్. 6 దేవుణు ఎత్తు కిజి గర్బమ్దు డాప్తి ఇట్టిక ఇనిక ఇహిజ, యూదురు ఆఇ వరిజ్, యూదురు

ఆతి వరివెట దేవులు సీని దీవెనమ్కాజ్ అక్కు మనాద్. యూదురు ఆఇకార్ని, యూదురు ఉండ్రె ఒడొల్ ఆత మనార్. దేవులు క్రీస్తు యేసు వెట యూదురిజ్ కిత్తి ఒట్టుదిజ్, యూదురు ఆఇ వరిజ్బా వంతు మనాద్. యాకెజ్ మీరు సువార్త నమ్మిత్తిజ్నే దొహ్కె.

7 యా సువార్తనె నాను లోకురిజ్ వెహ్సిన. యా సువార్త పణినె దేవులు వన్ని దయ దర్మమ్దాన్ నజి ఒవజెప్తాన్. వన్ని సత్తు సీజి నా వెట కిబినాన్. 8 దేవులు లోకుర్ లోఇ నాను ఎండనిజ్ పణిదిజ్ రెఇకాన్. గాని వాండ్రు నజి యా పెరి పణి ఒవజెప్తాన్. ఇహిజ, క్రీస్తు సీజిని అంతు సిలి దీవెనమ్క వందిజ్ యూదురు ఆఇ వరిజ్ వెహ్కె, 9 మరి దేవులు ఎత్తు కిజి గర్బమ్దు డాప్పి ఇట్టిక ఎలాగ వాండ్రు కిసాన్ ఇజి లోకుర్ విజెరిజ్ నెస్సిస్తెజ్ వాండ్రు యా పణి నజి ఒవజెప్తాన్. విజా తయార్ కితి దేవులు పూర్బమ్దాన్ అసి వాండ్రు ఎత్తు కిజి గర్బమ్దు ఇట్టిక లోకురిజ్ డాప్తాన్. 10 వాండ్రు ఎండనిజ్ యా లెకెండ్ డాప్తాన్ ఇహిజ, పరలోకమ్దు మని దూతారిజ్, వన్యా అతికారిజ, వాండ్రు గొప్ప గెణం మనికాన్ ఇజి దేవులు సజం వెట ఏలు తోరిస్తెజ్ యాక వన్ని లోకుర్ వందిజ్ వాండ్రు ఆతి దనితాన్ తోరిసినాన్. 11 లోకం పుటిన్ఎండ ముజాలె, యా లెకెండ్ కిదెజ్ ఇజి దేవులు ఎత్తు కిత మహాన్. అయాలెకెండ్ మా వ్రబు ఆతి క్రీస్తు యేసు వెట కిత్తాన్ 12 మాటు వన్నిజ్ నమ్మిజినాట్. వన్ని వెట కూడిత మనాట్. అందెజె తియెల్ సిల్లెండ దయర్మదాన్ దేవులు డగ్రు సాన్ని లొస్తెజ్ అక్కు దొహ్క మనాద్. 13 అందెజె మా వందిజె వన్నిజ్ న్రమెజ్ వాతె ఇజి నా వందిజ్ విసారిస్కాట్ ఇజి నాను మిజి బతిమాల్లిన. గాని యా న్రమెజాణిజ్ మిజి గవరం సీనార్.

వవులు ఎవెనుదు మని నమ్మిత్తి వరి వందిజ్ పార్తనం కిజినాన్

14 దినివందిజె, నాను మా బుబ్బు ఆతి దేవులు ఎద్రు ముణుకుజ్ ఊర్జి మీ వందిజ్ పార్తనం కిజిన. 15 పరలోకమ్దు మని నమ్మిత్తి విజెరిజ్, యా లోకమ్దు మని నమ్మిత్తి విజెరిజ్ వీండ్రె బుబ్బు. విజెరి వన్ని కుటుమ్దికార్. 16 వన్ని లోకుర్ వందిజ్ ఇట్టి మని నండొ దివెనమ్కాణిజ్, మీ మన్సు దయర్మదాన్ నెగ్రెండ మండ్రెజ్ వన్ని ఆత్మ వెట సత్తు సీదెజ్ ఇజి నాను వన్నిజ్ పార్తనం కిజిన. 17 మీరు క్రీస్తుజ్ నమ్మిజినెదెర్. అందెజె వాండ్రు మీ మన్సుదు ఎలాకాలం మండ్రెజ్ ఇజి నాను పార్తనం కిజిన. మీరు దేవులుదిజ్ ప్రేమిసి మహి వరిజ్ ప్రేమిసి మండ్రెజ్ ఇజి నాను పార్తనం కిజిన. అయ లెకెండ్ కిజి మహిజ, బూమి లోఇ సారితి సాహి వెల్లెజ్ మని మరాన్ లెకెండ్ మీరు మనిదెర్. నెగ్గి పునాది మున్సు తోహ్కెత్తి మని ఇల్లు లెకెండ్ మనిదెర్. 18 అయాలె క్రీస్తు మజి ఎసా ప్రేమిసినాన్ ఇజి మీరు, దేవులు వందిజ్ కేట ఆతి లోకుర్ విజెరి వెట పూర్తి నెస్తెజ్ అట్టిదెర్. వాండ్రు మజి అంతు సిల్లెండ నండొ ప్రేమిసినాన్. 19 ఎయెర్బా అర్దం కిదెజ్ అట్ఇ క్రీస్తు ప్రేమ మీరు నెసినె మండ్రెజ్ ఇజి నాను పార్తనం కిజిన. దేవులుదిజ్ మని పూర్తి బుద్ది మిజిబా మంజిని వందిజె నాను ఈపల పార్తనం కిజిన. 20 మాటు లొస్సి విజా దని ఇంక, ఒడిబిని దనిజ్ నండొ కిదెజ్ దేవులు అట్నాన్. మా లోఇ పణి కిజిని వన్ని ఆత్మ సత్తుదాన్ నె వాండ్రు కిజినాన్. 21 క్రీస్తు యేసు వెట వాండ్రు కితి గొప్ప పణి వందిజ్, దేవులు సజం వెట వాండ్రు కితి గొప్ప పణి వందిజ్ యా దేవులుదిజ్ తర తరమ్కు పాగిడిజి మంజినాట్. వన్నిజ్ ఎలాకాలం పాగిడిజినాట్. ఆమెన్.

క్రీస్తు వెట ఉండ్రె ఒడొల్ ఆతాట్

4 అందెజె ప్రబుజ్ సేవ కిజిని వందిజ్ జెలిదు ఆతి నాను మిజి బతిమాలిజిన. దేవులు మిజి నా లోకు ఇజి కూక్తివలె నెగ్గి సరిదు నడిదెజ్ ఇజి కూక్తాన్. దనిజ్ తగ్గి వజి మీరు మండ్రెజ్ ఇజి నాను మిజి బతిమాలిజిన. 2 ఎస్తివలెబా గర్ అపొండ తగిజి మండ్రు. మహి వరివెట సార్లిదాన్ మండ్రు. మహి వరిజ్ ప్రేమిసి, వరి వందిజ్ ఓరిసి మండ్రు. 3 దేవులు ఆత్మనె మిజి కుడుపు మనాన్. అందెజె మీరు ఉండ్రె ఆజి మంజిని వందిజ్ సమాదనమ్దాన్ కూడిజి వాడిజి మండ్రెజ్ నండొ సుడిదెజ్ వలె.

4 మాటు ఉండ్రె ఒడొల్. ఉండ్రె దేవులు ఆత్మ మజి దొహ్కె మనాన్. దేవులు మజి వన్ని లోకుర్ ఇజి కూక్తివలె, వాండ్రు సీన ఇజి ఒట్టు కితి ఉండ్రె నని దీవనమ్క వందిజ్ మాటు విజెరి ఆసదాన్ ఎద్రు సుడిజినాట్. 5 మజి విజెరిజ్ ఒరెండ్రె ప్రబు. మాటు నమ్మిజిని బోద ఉండ్రె. మాటు ఉండ్రె బాప్తినం లాగ ఆతాట్. 6 మాటు ఒరెండ్రె దేవులుదిజ్ మాడిస్నాట్. వాండ్రె విజెరిజ్ బుబ్బు. వాండ్రె విజెరి మున్సు అతికారం కినికాన్. వాండ్రె మా లోఇ మంజినాన్. మా వెట పణి కిబినాన్.

7 గాని మా లోఇ ఒరెన్ ఒరెన్ వన్నిజ్ ఉండ్రె ఉండ్రె వరం, క్రీస్తు మజి సితాన్. అయక వన్నిజ్ ఇష్టం ఆతి వజి వాండ్రు సీబాత సితాన్. 8 అందెజె దేవులు మాటదు రాస్త మనాద్, "వాండ్రు ఎత్తు మని బాన్ ఎక్కి సాహివలె, వాండ్రు ఉద్దం గెలస్తివలె, అస్తి వరిజ్ వన్నివెట తోహ్కె ఒతాన్. వాండ్రు లోకురిజ్ ఇనాయమ్కు సీబాత సితాన్", ఇజి. 9 (వాండ్రు 'ఎక్త సాహాన్', ఇజి వెహ్సినె దనిజ్ అర్దం ఇనిక? దని అర్దం ఇనిక ఇహిజ, వాండ్రు ముజాల, అడిగి మని యా బూమిదు వాతాన్. 10 యా బూమి మున్సు డిగితి వాతికాండ్రె అగాసం డాట్టి మున్సు నండొ అతికారం మని బాన్ ఎక్కి సాహికాన్. యా బూలోకమ్దు మని విజా వన్యాజ్ వన్ని వెట పూర్తి కిదెజె వాండ్రు మున్సు ఎక్త సాహాన్) 11 వాండ్రె, లోకురిజ్ ఒరెన్ ఒరెన్ వన్నిజ్ ఉండ్రె ఉండ్రె వరం ఒవజెప్తాన్. సెగొండారిజ్ అపాస్తరు ఇజి సెగొండారిజ్ ప్రవక్తరు ఇజి, సెగొండారిజ్ సువార్త వెహ్కెర్ ఇజి, సెగొండారిజ్ దేవులు సజం సుడిజి, నెస్సిసి, వరిజ్ నెగ్రెండ నడిపిస్సి పాస్తరుజు ఇజి వాండ్రు ఏర్పాటు కిత్తాన్. 12-13 ఎండనిజ్ ఇహిజ, దేవులు లోకురిజ్ దేవులు పణి కిదెజ్ పూర్తి నెస్సిస్తెజె యా లెకెండ్ ఏర్పాటు కిత్తాన్. క్రీస్తు ఒడొల్ ఆతి దేవులు సజమ్దికార్ దేవులుదిజ్ నెసి పూర్తి పిరిని వందిజె దేవులు లోకుర్ దేవులు పణి కిదెజ్. అయాలెకెండ్ మాటు దేవులుదిజ్ నమ్మిజి, వన్ని మరిసిజ్ నెసి ఉండ్రె ఆజి మంజినాట్. మాటు పూర్తి బుద్ది వాతి వరి లెకెండ్ పిరినాట్ ఇహిజ క్రీస్తు లెకెండ్ పూర్తి ఆనాట్. 14 అయాలె మాటు కొడొర్ లెకెండ్ మన్ఎట్. గాలి డెయిజి, ఉల్కెజ్ ఇతల్ అతాల్ దూక్కిని డోణి లెకెండ్, అబద బోద నెస్సిస్సి మొసెం కిని వరి బాణిజ్ మొసెం ఆఎట్. 15 గాని మాటు ఎస్తివలెబా నిజం వెహ్కె ప్రేమిసి మండ్రెజ్. అయాలెకెండ్ మాటు కిజిని విజా వన్యా లోఇ, క్రీస్తు లెకెండ్ పూర్తి ఆనాట్. వాండ్రె మా బుర్ లెకెండ్. 16 మాటు వన్ని ఒడొల్. ఒడొల్దు ఒడొల్ది అత్కుజ్ అత్కిస్తి లెకెండ్ క్రీస్తు మజి అత్కిస్తాన్. ఒడొల్ది అత్కుజ్ విజా అయాలెకెండ్ పణి కిదెజ్ మని లెకెండ్ పణి కితిజ, ఒడొల్ సత్తుదాన్ పిపినాద్. అయాలెకెండ్ దేవులు సజమ్దికార్ ఒరెన్ మరి ఒరెన్ వన్నిజ్ ప్రేమిసి వారు కిదెజ్ మనికెజ్ కితిజనె దేవులు సజం సత్తుదాన్ పిరినాద్.

17 అందెజె ప్రబు నజి సీతి అతికారమ్దాన్ నాను మిజి వెహ్సిన. నాను డుమ్నె విజి వెహ్సిన. ఏలుదాన్ దేవులుదిజ్ నెస్ఇకార్ కిజిని లెకెండ్ మీరు మన్మాట్. వారు పణిదిజ్ రెఇకెజ్ ఒడిబినార్ 18 వరి మన్సుదు సీకాట్ మని లెకెండ్ మనార్. దేవులు సీజిని కొత్త బత్కుదిజ్ దూరం మనార్. ఎండనిజ్ ఇహిజ,

దేవులు వందిజ్ నిజమాతికెజ్ వారు అర్థం కివర్. వరి మన్ను గటిదిక. 19 వరిజ్ సిగు సాహద్. వారు ఒడొల్దిది సెఇ ఆసెజ ఒజ ఆతార్. విజా రకమ్కాణి పావమ్కు కిజినార్. వారు అయాకెజ్ డిస్ఎర్. మరి మరి కిదెజె ఆస ఆజినార్. 20 గాని మీరు క్రీస్తు వందిజ్ నెస్తివలె అయాలెకెండ్ మండ్రెజ్ అవద్ ఇజి నెస్తిదెర్. 21 నిజమెన, మీరు వన్ను వందిజ్ వెహిదెర్. మీరు వన్ను వెట కూడితివలె యేసు వందిజ్ నిజమాతి దనిజ్ తగ్గివజ మిజి దేవులు ఆత్మ నెస్తిస్త మనాన్. 22 మీరు బత్రిజి మహి పడాఃఇ బత్కు డిస్టు ఇజినె నెస్తిస్తాన్. పడాఃఇ బత్కుదు, మిజి మహి సెఇ ఆసెజ్ మిజి మొసెం కిజి పాడు కిజినె మహి. 23 మీ బుద్దిని మీ మన్ను దేవులు మారిస్తెజ్ వలె. 24 దేవులు మిజి వన్ను నని బుద్ది సీతాన్. అందెజె వాండ్రు సీతి ఆ కొత్త బుద్దిదాన్ మీరు మండ్రు. అయావలె సీతి నిజాయితిదాన్ మంజినెదెర్. తప్పుజ్ కింండ మంజినెదెర్.

25 అందెజె ఏలుదాన్ అబద్దం వర్గిమాట్. మహి వరి వెట నిజం వర్గిదెజ్ వలె. ఎండనిజ్ ఇహిజ మాటు ఉండ్రె ఒడొల్దిదిజ్ సెందితికాట్. 26 మీరు కోపం ఆతిజ, మీ కోపం మిజి పాపం కిబసెంండ సుడొదెజ్. మీ కోపం వెడారు మండ్రెజ్ అవద్. 27 తప్పు కిబిస్తెజ్ సయితాన్దిజ్ సరి సీమాట్. 28 డొజ కిజి మహికాన్ ఏలుదాన్ డొజ కిదెజ్ అవద్. గాని వాండ్రు వన్ను కికాణిజ్ కష్టబడిఃజి వన్నుజ్ పణిదిజ్ వానికెజ్ కిదెజ్. ఎండనిజ్ ఇహిజ, అయావలె వాండ్రు బీదవరిజ్ సాయం కిదెజ్ అట్నాన్.

29 మీ వెయ్దాన్ సెఇ మాటెజ్ వాదెజ్ అవద్. గాని మహికార్ నమకమ్దు పిరిదెజ్ తగ్గి నెగ్గి మాటెజె వర్గిదెజ్. లోకురిజ్ వరి అవుసరం సుడొఃజి వర్గిదెజ్. ఎండనిజ్ ఇహిజ అయావలె మీ మాటెజ్ వెని వరిజ్ లాబం మంజినాద్. 30 దేవులు ఆత్మదిజ్ దుకం కిబిస్తాట్. ఎండనిజ్ ఇహిజ, దేవులు మిజి పూర్తి విడుఃదల కిని దినమ్దాక మీరు వన్ను లోకుర్ ఇని దనిజ్ గుర్తు యా దేవులు ఆత్మనె. 31 మీ లోఇ మని కుత అన్నిక, కోపం, పగ అన్నిక, జటిజ్ ఆనిక, దుసలాడొఃనిక, మహి వరిజ్ సెఇకెజ్ కిఇ బుద్ది, మీ లోఇహాన్ డిస్టు. 32 గాని మహి వరి వందిజ్ నెగ్గికెజ్ కిదు. వరిజ్ కనికారం తోరిస్తు. మిజి కితి సెఇ దని వందిజ్ సెమిస్తు. క్రీస్తు వెట దేవులు మీ తప్పుజ సెమిస్తి లెకెండ్, మీరు వరిజ్ సెమిస్తు.

5 అందెజె మీరు దేవులుదిజ్ పాలిజి మండ్రు. ఎండనిజ్ ఇహిజ, వాండ్రు నండొ ప్రేమిస్తి వన్ను కొడొఃరె మీరు. 2 క్రీస్తు మిజి ప్రేమిస్తాండ్రె, మా వందిజ్ సాదెజ్ వన్నుజ్ వాండ్రె ఒపజెవి ఆతాన్. వాండ్రు వన్ను పాణం నెగ్గి వాసనం సీని పూజ లెకెండ్ సీతాన్. దనివెట దేవులు సర్ద ఆతాన్. అయావజ మీరుబా ఒరెన్ మరి ఒరెన్ వన్నుజ్ ప్రేమిసి మండ్రు. 3 మీ లోఇ ఎయెన్బా రంకు బూలమాట్. కేలార్ బూలమాట్. మని దనిజ్ ఇంక మరి నండొ కావాలి ఇజి ఆస ఆమాట్. నిని పణి మీ లోఇ మంజిని ఇజి మహికార్ వెహెజ్బా సరి సీదెజ్ అవద్. ఎండనిజ్ ఇహిజ, మీరు దేవులు లోకుర్. 4 గాని మీ లోఇ కేడి మాటనో, బుద్ది సీతి మాటనో వెంజి, సిగు ఆని మాటెజ్నో వర్గిదెజ్ అవద్. అయాకెజ్ మిజి తగ్గొక. గాని దేవులుదిజ్ వందనమ్కు మీరు వెహెజ్. 5 యాక మీరు తమ్ఎండ నెస్తు రంకు బూలానికాన్, కెలార్ బూలానికాన్, మని దనిజ్ ఇంక మరి నండొ కావాలి ఇజి ఆస ఆనికాన్ ఎయెన్బా దేవులుని క్రీస్తు ఏలుబడిః కిని లోకుర్ లోఇ మన్ఎర్. అబె అక్కు మనికార్ అవర్. మని దని ఇంక మరి నండొ కావాలి ఇజి ఆస ఆనికాన్, బోమెజ మాడిఃస్తి వన్నిలెకెండ్ మనాన్. వాండ్రు వన్నుజ్ కావాలి ఇజి ఆస ఆని దనిజె దేవులు ఇజి ఒడిఃబినాన్. 6 పణిదిజ్ రెఇ మాటెజ్ వెహి ఎయెన్బా మిజి మొసెం కింండ సుడొఃదు. ఎండనిజ్ ఇహిజ, సెఇకెజ్ కిజి దేవులుదిజ్ లోజిఎండ మని వరిజ్ వాండ్రు సిక్కు సీనాన్. 7 అందెజె నని వరి వెట జత కూడాట్. 8 ఎండనిజ్ ఇహిజ, ఉండ్రె కాలమ్దు మీరు సీకటుదు బత్రిజిదెర్. గాని ఏలు మీరు ప్రబు వెట కూడితిదెరె జాయిదు బత్రిజినిదెర్. అందెజె జాయిదు బత్రిజిని వరిలెకెండ్ బత్రిజుదు. 9 ఎండనిజ్ ఇహిజ జాయిదు బత్రిజినికార్, ఎస్తివలెబా నెగ్గికెజ్, సీతి మనికెజ్, నిజమాతికెజ్ కిజి మంజినార్. 10 ప్రబుజ్ ఇనికెజ్ ఇష్టం ఇజి నెసి అయావజ కిదెజ్ సుడొఃదు. 11 సీకటుదు మనికార్ కిని పణిదిజ్ రెఇ పణిజ వెట కూడాట్. గాని అయాకెజ్ సెఇకెజ్ ఇజి లోకురిజ్ వెహు. 12 వారు నడి సీల్లెండ కిజిని పణిజ వందిజ్ వెహెజ్బా సిగునె. 13 గాని విజా వన్కాజ్ జాయి వెల్లి తపిస్తివలె అయాకెజ్ ఇనికెజ్ ఇజి లోకుర్ నెన్నార్. ఎండనిజ్ ఇహిజ, జాయి నిజమాతికెజె వెల్లి తోర్నాద్. 14 అందెజె వెహి మంజినార్, "నిద్ర కిజినికి తెలి ఆల. సాతి వరిబాణిజ్ నిజ్ఆ. క్రీస్తు నిజి జాయి సీనాన్", ఇజి. 15 అందెజె మీరు ఎలాగ నడిఃజినిదెర్ ఇజి జాగర్ల సుడొఃదు. బుద్ది సీలివరి లెకెండ్ అవండ, బుద్ది మని వరిలెకెండ్ నడిఃదు. 16 కాలం గడాపూట్. ఎండనిజ్ ఇహిజ ఏలు నెగ్గి దనిమ్కు ఆఉ. 17 అందెజె బుద్ది సీలిలెకెండ్ బత్రిమాట్. గాని ప్రబుజ్ ఇనికెజ్ ఇష్టం ఇజి నెసి అయాకెజ్ కిదు. 18 మతు సీనికెజ్ ఉణిజి సాసి మన్మాట్. ఎండనిజ్ ఇహిజ అయాక పాడు కినాద్. గాని దేవులు ఆత్మదాన్ నిండ్రెజి మండ్రు. 19 మీరు ఒరెన్ మరి ఒరెన్ వన్ను వెట వర్గిని వలె దేవులు మాటెజ్ పాటెజ్ వజ వెహి, దేవులుదిజ్ పాగిడిఃజి వందనమ్కు వెహి, దేవులు ఆత్మ మీ మన్నుదిజ్ రేప్సిని వజ పాటెజ్ వెహి వర్గిదు. మీ మన్ను పూర్తిదాన్ ప్రబు ఆతి దేవులుదిజ్ పాటెజ్ పార్దు. 20 మా ప్రబు ఆతి యేసు క్రీస్తు వెట మిజి దోహక్తి మని విజా దని వందిజ్ ఎస్తివలెబా మా బుబ్బు ఆతి దేవులుదిజ్ వందనమ్కు వెహు.

దేవులు సజమ్దిజ్ క్రీస్తు మాసి

21 క్రీస్తుజ్ మీరు గవరం సీజినిదెర్. అందెజె ఒరెన్ మరి ఒరెన్వన్నుజ్ లోజిదు. 22 బోదెకాండె, మీరు ప్రబుజ్ లోజిజిని వజ మీ మాసిరిజ్ లోజిదు. మాసిరు మీ ముస్సు అతికారం మనికార్ ఇజి ఒడొఃబిజి వరిజ్ లోజిదు. 23 ఎండనిజ్ ఇహిజ క్రీస్తు, విజా దేవులు సజమ్కాజ్ బుర్ల ఆతి లెకెండ్, మాసి వన్ను బోదెల్దిజ్ బుర్ల ఆత మనాన్. దేవులు సజమ్కు విజా క్రీస్తు ఒడొల్నె. వాండ్రె విజా దేవులు సజమ్కాజ్ రక్సిస్సికాన్. 24 విజా దేవులు సజమ్కు క్రీస్తుజ్ లోజిజిని వజ, బోదెకుబా వన్కా మాసిరిజ్ విజా వన్కా లోఇ లోజిదెజ్.

25 మొగ్గ కొడొఃరాండె, మీరు మీ బోదెకాజ్ ప్రేమిస్తు. క్రీస్తు విజా దేవులు సజమ్కాజ్ ప్రేమిసి విజా సజమ్క వందిజ్ సాతిలెకెండ్ మీరు మీ బోదెకాజ్ ప్రేమిస్తు. 26-27 క్రీస్తు ఎండనిజ్ విజా దేవులు సజమ్కాజ్ వందిజ్ సాతాన్ ఇహిజ, విజా దేవులు సజమ్కు సుబ్బరమ్దాన్ మండ్రెజ్ ఇజినె. వాండ్రు దేవులు మాటదాన్, బాప్తిసమ్దాన్ సజమ్కాజ్ సుబారం కిత్తాన్. మరి సజమ్కు ఇని పాపం సిల్లెండ, నిందెజ్ సిల్లెండ, తకుజ సిల్లెండ, ఇని సెఇకెజ్ సిల్లెండ వన్ని ఎద్రు వాండ్రె నెగ్గెండ తోరిస్తెజె విజా దేవులు సజమ్క వందిజ్ వాండ్రు సాతాన్. 28 అయలెకెండ్నె క్రీస్తు విజా దేవులు సజమ్కాజ్ ప్రేమిసికాన్. అయలెకెండ్నె ఒరెన్ మాసి ఆల్నిజ్ ప్రేమిస్తెజ్. ముకలం మాసిరు వరి సాంత ఒడొల్దిజ్ ప్రేమిస్తి లెకెండ్, వరి బోదెకాజ్ ప్రేమిస్తెజ్ వలె. వన్ని బోదెల్దిజ్ ప్రేమిస్తికాన్ వన్నుజ్ వాండ్రె ప్రేమిస్తాన్.

29-30 ఎండనిజ్ ఇహిజ ఎయెన్బా వన్ని సాంత ఒడొల్దిజ్ దూసిసెన్. గాని దనిజ్ నెగ్గెండ సుడొఃజి పాస కినాన్. మాటు క్రీస్తు ఒడొల్దు అత్రిత మనాట్. అందెజె క్రీస్తు వన్ని ఒడొల్ ఆతి విజా దేవులు సజమ్కాజ్ నెగ్గెండ సుడొఃజినాన్. 31 యాక దేవులు మాటదు రాస్తి మని లెకెండ్ మనాద్. అందెజె, "మొగ్గొడొః

వన్ని అయిసి అప్పాసిరుజ్ డిఃసి వన్ని బోదెల్ వెట కూడఃనాన్. వారు రిఎర్ ఉండ్రె ఒడొఃల్ ఆనార్". 32 యా మాటదిజ్ నండొ నిరీ అర్దం మనాద్. గాని యా మాటెజ్ క్రీస్తు వెట విజా దేవుణు సజమ్కాజ్ మని సమదం వందిజ్ వెప్పినికెజ్ ఇజి నాను ఒడొఃబిజి. 33 గాని యా మాటెజ్ మీ వందిజ్బా మనికాదె. ఒరెన్, వన్నిజ్ వాండ్రె ప్రీమిన్ని లెకండ, వాండ్రు వన్ని బోదెల్దిజ్బా ప్రీమిన్నిజ్ వలె. మరి బోదెల్ మాసిజ్ గవరం సీదెజ్ వలె.

కొడొఃరిజ్, అయిసి అప్పాసిరిజ్ వెప్పినిక

6 కొడొఃరాండె, మీరు ప్రబు వెట కూడిఃతి మనికిదెర్. అందెజె మీ అయిసి అప్పాసిరిజ్ లొజిదు. యాక కిదెజ్ తగ్గికాదె. 23 దేవుణు మాటదు రాస్త మనాద్, "మీ అయిసి అప్పాసిరిజ్ గవరం సీదు. యాకదె దేవుణు వెప్పి ఆడ్రెజ లొఇ ఒట్టుదాన్ కూడిఃతి మని మొదొప్పి ఆడ్ర. అయా ఒట్టు ఇనిక ఇహిజ, 'మీరు మీ అయిసి అప్పాసిరిజ్ లొజితిజ విజా మిజి నెగ్రెండ మంజినె. మీరు నండొ వంటెజ్ యా బూమిదు బత్కినిదెర్'. 4 అప్పాసిరాండె, మీరు మీ కొడొఃర్ మన్నుదిజ్ కోపం రేవ్మాట్. గాని ప్రబుజ్ ఇస్తం ఆతి వజ, వరిజ్ బుద్ది వెప్పి, నెప్పిసి పాన కిదు.

వెట్టివణి కిని వరిజ్ ఎజమానిరిజ్ వెప్పినిక

5 వెట్టివణి కినికిదెరా, బూమి ముస్సు, మని మీ ఎజమానిరిజ్ లొజిదు. మీరు క్రీస్తుజ్ లొజిజిని లెకండ వరిజ్ లొజిదు. మీరు పూర్తి మన్నుదాన్ వరిజ్ తియెల్ ఆజి వరిజ్ సీని గవరం సీజి లొజిదు. 6 నెగ్గికార్ ఇజి వెమో ఆదెజ్ వారు సూణివలెనె ఆవెద్. వరిజ్ లొజిదెజ్. గాని మీరు కిదెజ్ ఇజి దేవుణు కోరిజిన వజ మీ పూర్తి మన్నుదాన్ కిదు. ఎందనిజ్ ఇహిజ మీరు క్రీస్తుజ్ వెట్టి వణిమణిసీర్. 7 మీరు వణిజ్ కిని వలె, లోకుర్ వందిజె కిజినాప్ ఇజి ఆవండ, దేవుణు వందిజ్ కిజినాప్ ఇజి సర్దదాన్ కిదు. 8 ఎందనిజ్ ఇహిజ వెట్టివణి కినికాన్ ఆతిజ్బా, మరి ఎయెన్ ఆతిజ్బా మరి ఇని నెగ్గి వణి కినికాన్ ఆతిజ్బ ప్రబు వలితం సీనాన్ ఇజి మీరు నెసినిదెర్.

9 ఎజమానురుజాండె, మీరుబా మీ వెట్టివణి మణిసిరిజ్ నెగ్రెండ సుడొఃదు. వరిజ్ బెద్దిస్మాట్. ఎందనిజ్ ఇహిజ మీరు నెప్పిదెర్, మిజిని వరిజ్ ఒరెన్ ఎజమాని దేవుణు మంజిని బాడిఃదు మనాన్. ఇజికాన్ పెరికాన్ ఇజి వన్నిజ్ తెడ సిల్లెద్.

సయ్తానుజ్ ఎద్రిస్సిక ఎలాగ ఇజి వెప్పినాన్

10 కడొఃవెరిదు నాను మిజి వెప్పిన, ప్రబు వెట మీరు కూడొఃజి వన్ని సత్తుదాన్ మండ్రు. ఎందనిజ్ ఇహిజ వన్ని సత్తు గొప్ప పెరిక. 11 దేవుణు సీజిని విజా అయుదమ్కు తొడిఃగిజి తయార్ ఆజి మండ్రు. సయ్తాను అడ్డుజ ఎద్రిసి గెలప్పివందిజ్ యా లెకండ తొడిఃజి తయార్ ఆజి మండ్రు. 12 ఎందనిజ్ ఇహిజ, మాటు లోకుర్ వెట ఆవెద్ ఎద్రిస్సిక. గాని సీకముదు మని లోకుర్ ముస్సు అతికారం కిజిని దెయమ్క వెట, వన్యా నెయ్కెర్ వెట, ఆగానమ్దు మని విజా దెయమ్కాజెనె మాటు ఎద్రిసినాట్. 13 అందెజె మీరు దేవుణు సీజిని విజా అయుదమ్కు తొడిఃగిజి సయ్తానుజ్ ఎద్రిస్సిజ్ తయార్ ఆజి మండ్రు. సెఇ దినమ్కు వానివలె, దయిరమ్దాన్ నిల్దెజ్ అట్టిదెర్. ఆకర్ దాక, మీరు దయిరమ్దాన్ నిల్దెదెర్. 14 అందెజె మీరు దయిరమ్దాన్ నిల్దెజ్ తయార్ ఆజి మండ్రు. ఒరెన్ విదెం కినికాన్ నడుముదు బెట్టు తొహా ఆజి విదెమ్దిజ్ తయార్ ఆజిని లెకండ, దేవుణు వందిజ్ నిజమాతికెజ్ నమ్మిజి తయార్ ఆజి మండ్రు. గుండెదు కాడొఃఎండ మంజిని వందిజ్ ఇనుము కవనం తొడిఃగిజిని లెకండ దేవుణు ఎద్రి సీతి నిజాయితిదాన్ మంజి, సయ్తాన్ బాణిజ్ తప్పె ఆదు. 15 జార్ఎండ నెగ్రెండ నిల్లి వందిజ్ బూట్టు తొడిఃగిని లెకండ సమాదనం సీజిని సువార్త మాట నమ్మిజి, సయ్తానుజ్ ఎద్రిసి నెగ్రెండ నిల్దు. 16 యాకెజె ఆవండ, ఒరెన్ ఉద్దం కినికాన్, వన్నిజ్ వడొఃఇకాన్ వన్ని ముస్సు, పొక్కిని సీసు బాణమ్కు డాలు అని నప్పి ఎద్రిస్సి లెకండ, సయ్తాను బాణిజ్ తప్పె ఆదెజ్ ఎన్తివలెబా యేసు క్రీస్తు ముస్సు, నమకం ఇడెజినె మండ్రు. 17 బుర్దు దెట తగ్గిఎండ మంజిని వందిజ్ గొప్ప గటి మని బొప్పి తొడిఃగిని లెకండ దేవుణు మిజి రక్కినత మనాన్ ఇజి నెసి నమ్మిజి సయ్తాన్ మిజి బాదెజ్ కిఎండ వన్ని బాణిజ్ దూరం మండ్రు. కీదు కూడం అని తయార్ ఆతి లెకండ, దేవుణు మాటదాన్ సయ్తానుజ్ ఎద్రిస్సిజ్ తయార్దాన్ మండ్రు. దేవుణు ఆత్మ మిజి సీజిని కూడొఃమెనె దేవుణు మాట. 18 దేవుణు ఆత్మ మన్నుదు వెప్పి నడిఃప్పిని లెకండ ఎన్తివలెబా పార్దనం కిదు. దేవుణు బాణిజ్ సాయం లొస్తు. మీరు ఎన్తివలెబా పార్దనం కినివలె బదకమ్దాన్ పార్దనం కిమాట్. పార్దనం డిఃస్మాట్. దేవుణు వందిజ్ కేట ఆతి లోకుర్ విజెరె వందిజ్ ఎన్తివలెబా పార్దనం కిదు. 19 నా వందిజ్బా పార్దనం కిదు. నాను వర్గిని వలె నెగ్గి మాట నా వెయిదు దేవుణు సీని లెకండ, ఎందనిజ్ ఇహిజ, సువార్తదు ముజాలె డాఃజితి మహి. గాని ఏలు దేవుణు తోరిసి నెన్పిన్తి గొప్ప సజతిజ్ వెల్లి తని దయిరమ్దాన్ లోకురిజ్ తోరిస్సెజ్.

20 యా సువార్త వెప్తాజ్, వన్ని కబ్రు తనివన్ని లెకండ యేసుక్రీస్తు నజి ఏర్పాటు కిత్తాన్. దిని వందిజె ఏలు నాను జెలిదు మన. అందెజె నాను నెగ్రెండ దయిరమ్దాన్ వెప్తాజ్, మని లెకండ వెప్తాజ్ నా వందిజ్ పార్దనం కిదు. 21 మాటు ప్రీమ కిజిని మా తంబెరి ఆతి తుకికు, నా వందిజ్ మిజి విజా వెప్పాన్. నాను ఇనిక కిజిన, ఎలాగ మన ఇజి మీరు నెప్పెజ్ నా వందిజ్ వాండ్రు వెప్పాన్. వాండ్రు ప్రబు వందిజ్ నమ్మకమ్దాన్ సేవ వణి కిజినికాన్. 22 మజి జగ్గిజిని దని వందిజ్ మిజి వెప్తాజ్, మిజి దయిరం మాట వెప్పి ఓదరిస్సెజ్, దిని వందిజె నాను వినిజ్ మీ డగ్రు పొక్కిన. 23 మా బుబ్బు ఆతి దేవుణుని మా ప్రబు ఆతి యేసు క్రీస్తు, తంబెరిబు ఆతి మీరు విజెరె, నిపాతిదాన్ మండ్రెజ్ సాయం కిపెన్. మీరు మహి వరిజ్ ప్రీమిని మండ్రెజ్ క్రీస్తుజ్ నమ్మిజినె మండ్రెజ్ సాయం కిపెన్. 24 కొన సిల్లెండ, మా ప్రబు ఆతి యేసు క్రీస్తుజ్ ప్రీమిన్ని విజెరెజ్ దేవుణు దయ దర్మం మనిద్.

మార్కు

నెల్వ కిబిస్సిక

అపొస్తుడు ఆతి పవులు పిలిపియ పట్నమ్దు మని దేవుణుదిజ్ నమ్మిత్తి వరి సజమ్దిజ్ రాసిని ఉత్తమ్నె యాక. యా సజం మొదొల్స్తొకాన్ పవులునె. డగ్రు పది పంటజ్ వెనుక, సువార్త వెప్పొని వందిజ్ పవులు జెలిదు మహివలె, యా సజమ్దికార్ వన్నిజ్ ఎత్తు కితారె, వరి లొఇ మని ఎపప్రాదితుజ్ వన్నిజ్ తోడు: కిని వందిజ్ పొక్కినార్. పవులుజ్ సాయమ్బా వన్ని వెట పొక్కినార్. వారు కితి యా నెగ్గి పణి వందిజ్ వరిజ్ వందనమ్కు వెప్పొ రాసిని ఉత్తమ్నె యాక. నిజమాతి సర్ద యేసుక్రీస్తు బాణిజె వానాద్ ఇజి వెప్పొ వరిజ్ దయరం కిబిసినాన్.

1 క్రీస్తు యేసు పణిమనిసి ఆతి పవులు ఇని నాను రాసిని ఉత్తం. క్రీస్తు యేసు పణిమనిసి ఆతి తిమోతి నా వెట మనాన్. పిలిపియ పట్నమ్దు మని క్రీస్తు యేసు వెట కూడితి మని దేవుణుదిజ్ కేట ఆతి విజెరిజ్, మరి సజం నడిపిప్పి పాప్టర్జ, సజ పెద్దల్జ, రాసినిక. ² బుబ్బు ఆతి దేవుణు ని ప్రబు ఆతి యేసు క్రీస్తు దయా దర్మమ్దాన్ మీరు నిపాతిదాన్ మండ్రెజ్ సాయం కిపిర్.

పవులు కిని పార్దనం

³ నాను ఎప్పివలెబా, మిజి ఎత్తు కినివలె, నా దేవుణుదిజ్ మీ వందిజ్ వందనమ్కు వెప్పొన. ⁴⁻⁵ మీరు సువార్త వెంజి, నమ్మిత్తి దినందాన్ మొదొల్ని ఏలుదాక, సువార్త సాటిప్పి వందిజ్ మీరు నా వెట జత కూడితి మనిదెర్. అందెజి మీ విజెరి వందిజ్ నాను పార్దనం కినివలె, నాను సర్దదాన్ పార్దనం కిజిన. ⁶ మరి, మీ మన్నుదు నెగ్గి పణి మొదొల్స్తొ దేవుణు, క్రీస్తు యేసు వాని రోజాదు అయాక పూర్తి ఆనిదాక, వాండ్లు నడిపిసినె మంజినాన్. యా సజతి, నాను అనుమానం సిల్లెండ పూర్తి నమ్మిజిన.

⁷ మిజి నాను నండ్ పెమిప్ప. అందెజి మీ విజెరి వందిజ్ యా లెకెండ్ నాను ఒడ్డిబిదెజ్ తగ్గికాదె. ఎందనిజ్ ఇహిజ, నాను జెలిదు మనివలెబా, సువార్తదిజ్ విరోదం ఆతికెజ్ వెప్పొ వరిజ్ నెగ్గెండ మర్జి వెప్పొ, అయా సువార్త నిజం ఇజి లోకురిజ్ వెప్పొ తోరిప్పి వలెబా, దేవుణు నజి సీతి యా గొప్ప పణిదు మీరు విజెరి నా వెట కూడితి మనిదెర్. ⁸ క్రీస్తు యేసు మిజి ప్రేమిసిని వజనె, నానుబా మిజి ప్రేమిప్ప. మిజి విజెరిజ్ నండ్ ఎత్తు కిజిన యాక నిజం ఇని దనిజ్ దేవుణునె సాక్కి. ⁹⁻¹¹ నాను ఈహునె మీ వందిజ్ పార్దనం కిజిన ఇనిక వాతిజ్బా, మీరు ఒరెన్ మరి ఒరెన్ వన్నిజ్ నెగ్గెండ లాపు ప్రేమిసి మండ్రెజ్ ఇజి పూర్తి నెప్పెజ్ ఇజి, మరి, ఇనిక వాతిజ్బా, నెగ్గెజ్ ఇని ఇనికెజ్, సెఇకెజ్ ఇని ఇనికెజ్ ఇజి మీరు పూర్తి నెప్పెజ్ ఇజి నాను పార్దనం కిజిన. నాను ఎందనిజ్ ఈహు పార్దనం కిజిన ఇహిజ, క్రీస్తు వాని రోజాదాక నెగ్గె ఇనిక ఇజి టెట నెసి మీరు ఇని పాపం సిల్లెండ, ఇని నింద సిల్లెండ నెగ్గెండ మండ్రెజ్. మరి, యేసు క్రీస్తు నత్తుదాన్ మీ బత్తు విజా పలితం వాని లెకెండ్ సీతి నిజయితిదాన్ మంజిని వందిజ్ నాను ఈహు పార్దనం కిజిన. నాను యా లెకెండ్ పార్దనం కిజిన, ఎందనిజ్ ఇహిజ, మీ బత్తు నుడ్డిజి లోకుర్ దేవుణుదిజ్ గనం సీదెజ్, పొగిడిదెజ్.

పవులు జెలిదు మనిక సువార్త సాటె ఆని వందిజ్ నెగెద్

¹² తంబెరిజాండె, నజి వాతి బాదెజ్ విజా, మరి నండ్ లోకుర్ సువార్త విని వందిజ్ పణిదిజ్ వాతాద్ ఇజి మీరు నెప్పెజ్ ఇజి నాను కోరిజిన. ¹³ అందెజె, క్రీస్తు వందిజ్ సువార్త వెప్పొని వందిజ్నె తొపా ఆత మన ఇజి రాజా ఇండ్రొ మని జమమబు విజెరిని మరి పట్నమ్ది లోకుర్ విజెరి ఏలు నెస్త మనార్. ¹⁴ మరి నాను తొపా ఆతి మనిజ్, నమ్మిత్తి తంబెరిజా లొఇ నండ్డాార్ దయరమ్దాన్ తియెల్ సిల్లెండ దేవుణు మాట వెప్పొనార్. ఎందనిజ్ ఇహిజ, నాను జెలిదు మహివలె, ప్రబు ఎలాగ నజి సాయం కితాన్ ఇజి వారు నుడ్తార్. అందెజె, వారు ప్రబు మున్ను, నండ్ నమకం ఇట్టా మనార్. ¹⁵⁻¹⁷ నిజమె, సెగొండార్ నా మున్ను గోస ఆజినార్. గొడుబెజ్ ఆజినార్. అందెజె వారు క్రీస్తు వందిజ్ వెప్పొనార్. వీరు నెగ్గి మన్నుదాన్ ఆవండ, పవులు మున్ను మాపు పెరికాప్ ఇజి పాజె ఆని వందిజె క్రీస్తు వందిజ్ వెప్పొనార్. ఈహు కితిజ, నాను జెలిదు మనివలె, మరి నండ్ బాదెజ్ నజి వానె ఇజి వారు ఒడ్డిబిజినార్. గాని మరి సెగొండార్ నెగ్గి బుద్దిదాన్ వెప్పొనార్. వీరు నజి ప్రేమిసినార్. సువార్తదిజ్ ఎద్రిప్పి వరిజ్, మర్జి వెప్పొ నిజం ఇజి తోరిప్పెజ్ దేవుణు నజి ఏర్పాటు కిత మనాన్ ఇజి వీరు నెసినార్. అందెజె వీరు నెగ్గి బుద్దిదాన్ వెప్పొనార్. ¹⁸ వారు నా వందిజ్ ఇనిక ఒడ్డిబితిజ్బా, ఇనిక కిదెజ్ నుడ్డితిజ్బా నజి ఇని తియెల్ సిల్లెద్. నెగ్గి బుద్దిదాన్ ఆతిజ్బా, సెఇ బుద్దిదాన్ ఆతిజ్బా, ఎలాగ ఆతిజ్బా, క్రీస్తు వందిజ్ వెంపా ఆజినె. అయాకదె ముకెలం. దని వందిజ్ నాను సర్ద ఆజినె.

¹⁹ మరి, సర్ద ఆజినె మంజిన. ఎందనిజ్ ఇహిజ, మీ పార్దనమ్దాన్, యేసు క్రీస్తు నజి సీతి దేవుణు ఆత్మ సాయమ్దాన్, నజి ఏలు వాతి యా బాదెజ్ విజా, ఆకార్దు, నా విడుదల వందిజ్నె వాతె ఇజి నాను నెసిన. ²⁰ నాను ఇని దని లొఇబా సిగు ఆవండ మండ్రెజ్ ఇజినె నాను నండ్ ఎద్రు నుడ్డిజి ఆన ఆనిక. గాని

ఎస్తీవలెబా నాను కితి లెకండ, ఏలుబా నండొ దయరమ్దాన్ క్రీస్తు గొప్ప పెరికాన్ ఇజి తోరిన్న. ఎందనిజ్ ఇహిజ, నాను సాతిజ్బా, బత్మితిజ్బా క్రీస్తు గొప్ప పెరికాన్ ఇజి నాను కిజిని విజా పణిజాణిజ్ నాను తోరిన్న. 21 అందెజె నాను బత్మిజిని ఇహిజ క్రీస్తు వందిజె. నాను సాతిజ నజీ లాబం. ఎందనిజ్ ఇహిజ, అయావలె నాను క్రీస్తు వెటనె మంజినలె. 22-23 గాని నాను బత్మిజి మహిజ, క్రీస్తు వందిజ్ వలితం వాని పణి కిదెజ్ అట్టు. అయావలె ఇనిక నాను కోరిదెజ్? సాదెజ్నా, బత్మిదెజ్నా? నాను నెస్ఎ. నాను రుండి వన్కాజ్ గుపె ఆజిన. యా లోకం డిసి క్రీస్తు వెట మండ్రెజ్ ఇజినె నా ఆస. ఎందనిజ్ ఇహిజ అయాకదె నజీ ఒదె నెగెద్. 24-25 గాని నాను బత్మిజినిక, మిజి గొప్ప అవునరం. యాక నాను పూర్తి నెసిన. అందెజె, నాను మంజి మీ విజెరె వెట కూడెజి మండ్రెజ్ వలె ఇజి నెసిన. ఎందనిజ్ ఇహిజ, అయావలె, మీరు క్రీస్తుజ్ నెగ్రెండ నమ్మిజి మండ్రెజ్ సాయం కిని వందిజ్ నాను అట్టు. అయాలెకండ మీరు నెగ్రెండ నమ్మిజినిజ్ మీరు సరద ఆనిదెర్. 26 అందెజె, నాను మీ వెట మరి కూడ్డివలె, క్రీస్తు మరి నజీ మీ నడిమి తప్పిస్తాన్ ఇని దని వందిజ్ క్రీస్తుయేసుజ్ పాగిడినిదెర్.

27 ఇనిక ఆతిజ్బా, క్రీస్తు వందిజ్ వెప్పిని సువార్తదు మని దనిజ్ తగ్గి వజ నడిదు. ఎందనిజ్ ఇహిజ, నాను మీ డగ్రు వాజి, మిజి సుడెతిజ్బా, సిలిజ రెవండ మీ వందిజ్ వెహిజ్బా, మీరు విజెరె సువార్తదు వెప్పిని నమకం వందిజ్ ఉండ్రె మన్ను కల్లిజి ఉండ్రె ఉదెనమ్దాన్ ఉండ్రె ఆజి నెగ్రెండ నిల్లిదెర్ ఇజి నాను నెన్నాలె. 28 మరి, మిజి ఎద్రిన్సి వరిజ్, ఇని దని లొఇ మీరు తియెల్ ఆఇదెర్ ఇజి నాను నెన్నాలె. యాక దేవుణు వరిజ్ నానం కిన్ ఇని దనిజ్ నెగ్గు రుజాప్ ఆనాద్. గాని దేవుణు మిజి ఎల్లకాలం రక్తిన్నాలె ఇని దనిజ్బా రుజాప్ ఆనాద్. దేవుణునె యాకెజ్ విజా కిన్. 29 క్రీస్తుజ్ నమ్మిదెజ్నె ఆవండ, వన్ని వందిజ్ కష్టమ్కు ఓరిస్టెజ్బా దేవుణు మిజి అక్కు సిత మనాన్. 30 అందెజె సువార్తదిజ్ విరోదం ఆతికెజ్ వెప్పినిరెజ్ ఎద్రిన్సిజ్ కష్టబడిజి దనిజ్ మాటు ఉండ్రె ఆతాల్. నాను ముజాలె, పిలిప్పియదు మహివలె ఎద్రిన్సిజ్ కష్టబడితిక మీరు సుడెతిదెర్. ఏలుబా కష్టబడిజినిక వెంజినిదెర్.

2 క్రీస్తు వెట కూడితి మనిజ్, మీ బత్తుదు దయరం మనాద్ గదె? క్రీస్తు మిజి ప్రేమిసిని ప్రేమదాన్ మిజి నిపాతి కల్లిత మనాద్ గదె? దేవుణు ఆత్మ వెట మిజి సమందం మనాద్ గదె? క్రీస్తు మీ వందిజ్ పాణం నొత మనాన్ గదె? 2 ఆహి మహిజ, మీరు ఉండ్రె లెకండ ఒడెబిజి, ఒరెన్ మరి ఒరెన్ వన్నిజ్ ప్రేమిసి, ఉండ్రె మన్నుదాన్, ఉండ్రె ఉదెనమ్దాన్ మంజి, నా సరద పూర్తి కిదు. 3 సాంత ఇష్టం వందిజ్ ఆవండ, కితి దని వందిజ్ నాను కిత ఇజి పాజె ఆవండ, ఇనికబా కిదెజ్ గాని, మహికార్ నజీ ఇంక పెరికార్ ఇజి ఒడిబిజి, తగిజి మండ్రెజ్. 4 మీ లొఇ విజెరెరెబా, మీ సాంత పణిజె తొవండ, మహి వరిజ్ సాయం కిదెజ్బా సుడెతిజ్ వలె. 5 క్రీస్తుయేసుజ్ మహి యా మన్నునె మిజిబా మండ్రెజ్.

6 వాండ్రు ఎస్తీవలెబా దేవుణు ననికాన్ ఆతిజ్బా, దేవుణు వెట నమానం ఆతికాన్ ఇజి, అయా అక్కు మండ్రెజ్ వలె ఇజి పటుతల కివితాన్. 7 గాని వాండ్రు వన్ని మన్నుదాన్, అయాక విజా డిస్తాండ్రె, ఒరెన్ పణి కిని వన్ని లెకండ ఒడెబిజి, లోకు ఆతాన్. 8 వాండ్రు ఒరెన్ లోకు ఆతండ్రె, వన్నిజ్ వాండ్రె తగ్ ఆతాన్. వాండ్రు దేవుణుదిజ్ లొజెతాండ్రె, సాదెజ్బా వన్నిజ్ వాండ్రె ఒవజెపె ఆతాన్. గొప్ప సిగుదాన్ కూడితి మని సిలువాదు సాని సాపు సాదెజ్బా వన్నిజ్ వాండ్రె ఒవజెపె ఆతాన్. 9 అందెజె దేవుణు వన్నిజ్ గొప్ప పెరికాన్ కితాండ్రె, మహి విజా పెర్కు మున్ను గొప్ప పేరు సితాన్.

10-11 దేవుణు యా లెకండెసితాన్. ఎందనిజ్ ఇహిజ, పరలోకమ్దు మనికెజ్ విజా, బూమి మున్ను మనికెజ్ విజా సాతికార్ని మరి తోర్ఇకెజ్ విజా యేసు పేరుదు ముణుకుజ్ ఊర్జి మాడిస్టెజ్. విజా యేసుక్రీస్తు ప్రబు ఇజి వరి వెయ్దాన్ ఒప్పుకొండెజ్. అయ లెకండె బుబ్బు ఆతి దేవుణుదిజ్ గొప్ప గనం సీజినార్.

12 అందెజె నాను ప్రేమిసినికిదెరా, దేవుణు రక్తిన్సి లోకుర్ కిదెజ్ తగ్గి పణిజ్, మీ లొఇ ఒరెన్ ఒరెన్ తియెల్దాన్ వణుకుదాన్ కిదెజ్ నండొ కష్టపడిదెజ్. ఎస్తీవలెబా, మీరు నా మాట వెంజి లొజెతిదెర్. నాను మీ వెట మనివలెనె ఆవండ, మీ వెట ఏలు సిలివలె, మరి ఒదె అయాక కిదెజ్ కష్టబాడిదు. 13 మీరు అయాక కిదెజ్ అట్టిదెర్. ఎందనిజ్ ఇహిజ, దేవుణుదిజ్ ఇష్టం కితి పణిజ్, కిదెజ్ ఇజి మీ లొఇ ఆస పుటిస్సికాన్ దేవుణునె. అయాక కిదెజ్ సాయం కినికాన్బా దేవుణునె.

14-15 మీరు విజా పణిజ్, ఒరెన్ వన్నిజ్ మొరొ ఆవండ, జటిజ్ ఆవండ కిదెజ్. ఎందనిజ్ ఇహిజ, మీరు మూర్కమ్ది వరి నడిమి, సెఇవరి నడిమి బత్మినివలె, నిందెజ్ సిల్లెండ, పావం సిల్లెండ, ఇని తపు సిలి దేవుణు కొడెజ్ ఇజి తోర్ ఆదెజ్. మీరు నని వరి నడిమి మంజి, బత్తు సీని మాట మీరు నెస్పిన్సివలె, ఆగానమ్దు సుక్కెజ్ ఎలాగ జాయి సీజినాన్, అయా లెకండె మీరుబా మనిదెర్. 16 మీరు యా లెకండె మహిజ, క్రీస్తు వాని దినమ్దు నాను గెలెస్తి వన్నిలెకండె సరద ఆదెజ్ అట్టు. ఎందనిజ్ ఇహిజ, నాను మీ నడిమి కష్ట బాడిజి కితి పణిజ్, ఎందనిజ్ పణిదిజ్ రెవండ ఆవతాద్ ఇజి మీ బత్తు రుజాప్ కిన్. 17 మీరు సువార్త నమ్మిత్తివలె, మీ బత్తు దేవుణుదిజ్ సితిదెర్. ఒరెన్ పుజెరి, దేవుణుదిజ్ పూజ సీనివలె, పూజ సీని దని మున్ను ద్రాక్కు పట్టు రసం వాక్తి లెకండె, రోమ అతికారిజు నజీ సప్తెజ, నా నల మీ పూజ మున్ను వాక్తి లెకండె ఆనాద్. అయ లెకండె జగ్గితిజ, నాను సరద ఆజిన. మీ విజెరె వెట సరద ఆజిన.

18 అయాలెకండె మీరు విజెరెరెబా నా వెట నండొ సరద ఆదు.

తిమోతిని ఎవప్రాదితు

19 తిమోతిజ్ మీ డగ్రు బేగి ఫాక్తెజ్ ప్రబు ఆతి యేసు నజీ తవ్వండ సాయం కిన్ ఇజి నాను ఆస ఆజిన. వాండ్రు నా వందిజ్ వెప్పిని, మిజి సరద కిబిన్నాన్. అయ లెకండె వాండ్రు మర్జి వాజి మీ వందిజ్ వెప్పిని, నాను సరద ఆస. అందెజె తిమోతిజ్ మీ డగ్రు బేగి ఫాక్తెజ్. 20 మీరు నెగ్రెండ మండ్రెజ్ ఇజి నిజం ఆస ఆజినకాన్ వీండ్రె. మీ వందిజ్ వినిజ్ మని ఆస ననికాన్ మరి ఎయెన్బా నా డగ్రు సిలెన్. 21 మహికార్ విజెరె, వరిజ్ ఇష్టం ఆతి సాంత పణిజె సుడెతిజినార్. గాని యేసు క్రీస్తుజ్ ఇష్టం ఆతికెజ్ తొవెర్. 22 గాని, తిమోతి నమ్మకమ్దాన్ ప్రబుజ్ సేవ కిజి నెగ్గికాన్ ఇజి రుజాప్ కితిక మీరు నెన్నెదెర్. అప్పాసి వెట మరిసి ఎలాగ కూడ్డి పణి కిన్, అయాలెకండె సువార్త నండొ లోకుర్ విని వందిజ్ నా వెట కూడ్డి పాటిస్తాన్. 23 అందెజె, ఇబ్బె నజీ జగ్గిదెజ్ మనిక ఎలాగ జగ్గినాద్ ఇజి నెన్నెజ, వెటనె నాను వినిజ్ మీ డగ్రు ఫాక్తెజ్ ఇజి నాను ఆస ఆజిన. 24 నానుబా బేగి మీ డగ్రు వాదెజ్ ప్రబు నజీ తవ్వండ సాయం కిన్ ఇజి నాను నమ్మిజిని.

25 ఎవప్రాదితుజ్ మీ డగ్రు మర్జి ఫాక్తెజ్ వలె ఇజి నాను బాగ ఎత్తు కిజిన. వాండ్రు నా తంబెరి ననికాన్. నా వెట జత కూడెజి పణి కినికాన్. క్రీస్తు వందిజ్ నా వెట కూడెజి నండొ కష్టబాడిజినాన్. నజీ అవ్వసరం మనివలె తోడుజ మంజి సాయం కిదెజ్ మీరు నా డగ్రు ఫాక్తెజ్. 26 నాను వన్నిజ్ మీ డగ్రు మర్జి ఫాక్తెజ్. ఎందనిజ్ ఇహిజ, వాండ్రు మిజి విజెరెజ్ నండొ ఎత్తు కిజినాన్. వన్నిజ్ జబ్బు వాతాద్ ఇని మాట మీరు విహిదెర్ ఇజి నెస్తాండ్రె, మీరు వెహిదెర్ ఇజి నండొ బాద

అజినాన్. 27 నిజమె, వాండ్రు నండొ కష్టం అర్చి సావు బత్తు ఆతాన్. గాని దేవుణు వన్ని ముస్కు కనికారం తోరిస్తాన్. వన్నిజె అవండ, నా ముస్కు బా కనికారం తోరిస్తాన్. వన్ని జబ్బు వందిజ్ దుకం ఆతి దని ముస్కు వన్ని సావు వందిజ్బా దుకం అవండ మంజిని వందిజ్ నా ముస్కు కనికారం తోరిస్తాన్. వన్నిజ్ నెగ్గే కితాన్ 28 అందెజె, మీరు వన్నిజ్ మరి సుడేజి సర్ద ఆని వందిజ్, నజీ మని దుకం తకు ఆని వందిజ్ గజి బిజి ఫాకైజ్ ఇజి ఒడె ఆస అజిన. 29-30 అందెజె, ప్రబు వెట కూడితి మని వినిజ్ నండొ సర్దదాన్ డగ్గు కిదు. వాండ్రు క్రీస్తుజ్ సేవ కని వందిజ్ సావు బత్తు ఆతాన్. మీరు నా వందిజ్ కిదెజ్ అట్ఇతి సాయం కిదెజ్, వాండ్రు వన్ని పాణం సీదెజ్బా గుసె అవండ కితాన్. అందెజె వినిజ్ గవరం సీదు. విని నని వరిజ్బా గవరం సీదు.

3 ఆకార్దు, నా తంబెరిజాండె, ప్రబు వెట మీరు కూడితి మనిదెర్. అందెజె, మీరు సర్ద అజినె మండ్రు. నాను ముజాలె సెగొండార్ సెఇ వరి వందిజ్ వెహ్ మన. అయా సజతిజ్ నె మరి మరి రాస్తిజ్బా నాను వంద్. అయాక మిజి మొసెం కని వరి బాణిజ్ తప్పిన్నాద్.

2 వెరి నుకూడిజ పాతితి వరి వరిజ్ జాగ్రత మండ్రు. వారు నండొ సెఇ పణిజ్ కనికార్. దేవుణుదిజ్ నమ్మితి లోకు ఆని వందిజ్ మొగకొడొర్ సుసతి కిబె ఆదెజ్ వలె ఇజి వారు కనితం వెహ్సినార్. అయాక నిజం ఆవద్. వారు పణిదిజ్ రెండొ ఒడొల్ కొయ్జినార్. అందెజె వరి వందిజ్ జాగ్రత మండ్రు. 3 నాను ఆహె వెహ్సిన. ఎందనిజ్ ఇహిజ, నిజమాతి సుసతి కిబె ఆతికాల్ మాటె. వారు ఆవర్. ఇహిజ, దేవుణుదిజ్ నిజమాతి లోకుర్ మాటె. దేవుణు ఆత్మదానెన్, మాటు దేవుణుదిజ్ పాగిడిజి మాడిసినాల్. క్రీస్తు యేసు మా వందిజ్ కితి దని వందిజ్ సర్ద అజినాల్. సుసతి ముస్కు ఆవద్, మా నమకం సుసతి కితిజ, దేవుణు కొడొర్ అదెజ్ ఆనాద్ ఇజి నమ్మెవల్. 4 అహిజ, యా లెకండొ మని సజతిజ ముస్కు ఒరెన్ వన్నిజ్ నమకం ఇడెదెజ్ ఆనాద్ ఇహిజ, మహి వరిజ్ ఇకం నండొ వెహ్సె అట్టికాన్ నానె. దేవుణు కొడొ: ఆదెజ్ యా లెకండొ మని సజతిజ కిదెజ్ ఆనాద్ ఇజి ఎయెన్బా ఒడొ:బితిజ, వన్ని ముస్కు మరి ఒదె వెహ్సె అట్టికాన్ నానె. 5 ఎందనిజ్ ఇహిజ, నాను పుట్టి ఎనిమిది రోస్కాజె నజీ సుసతి కిత్తార్. నాను ఇస్రాయిలు జాతిదిదు మని బెనియమిను తెగ్గుదు పుట్టికాన్. నా అనిగొగొర్ విజెరె ఎబ్రివారు. నానుబా పూర్తి ఎబ్రి వాండ్రునె. నాను పరిసయ వాండ్రు. దేవుణు మోసెజ్ సీతి రూలుజ్ నాను పూర్తి లోజీత. 6 యా లెకండొ కిని దేవుణుదిజ్ ఇస్టం ఆతికాదెను ఇజి ఒడిబిజి, క్రీస్తు ముస్కు నమకం ఇట్టి వరిజ్ నాను నండొ బాదెజ్ కితికాన్. మోసెజ్ సీతి రూలుజ లోజిజి, ఒరెన్, సీతి నిజాయితి మనికాన్ ఇజి తోరె ఆదెజ్ అట్టిజ, వన్ని లెకండొ నానుబా తోరె ఆదెజ్ అట్టు. ఎందనిజ్ ఇహిజ, రూలుజ లోఇ ఇనికబా తప్పెత.

7 నజీ లాబం వానిక ఇజి ఒడిబితి యా సజతిజ్ విజా, పణిదిజ్ రెఇక ఇజి నాను డిస్త సిత. క్రీస్తుజ్ నెస్సి వందిజె డిస్త సిత. 8-9 అయాకదె అవండ, నాను ముజాలె కిజి మహి విజా సజతిజ్ పణిదిజ్ రెఇక ఇజి నాను ఒడిబిజిన. క్రీస్తు యేసుజ్ నెసినికాదె విజా వన్కా ముస్కు గొప్ప విలువ మనిక. క్రీస్తు యేసుజ్ నెస్సి వందిజె యా సజతిజ్ విజా పణిదిజ్ రెఇక ఇజి డిస్త సిత. నాను క్రీస్తు వెట కూడిజి మంజిని వందిజ్, మరి, నాను పూర్తి క్రీస్తుయేసు వాండ్రు ఆని వందిజ్ నాను అయాకెజ్ విజా గుమమ్ది కసర ఇజి నాను ఒడిబిజిన. దేవుణు మోసెజ్ సీతి రూలుదు మనికెజ్ లోజిజినజ్ అవద్ నాను సీతి నిజాయితి మనికాన్ ఆతిక. నాను క్రీస్తుయేసు ముస్కు నమకం ఇడ్డిజెనె, దేవుణు నజీ సీతి నిజాయితి మనికాన్ ఇజి కూక్తాన్.

10-11 నాను క్రీస్తుజ్ పూర్తి నెస్సిజె ఇజినె నాను మరి మరి కోరిజిన. ముకెలం, వాండ్రు సావుదాన్ నిజితి వలె, దేవుణు వన్నిజ్ సీతి సత్తు నజీబా కావాలి ఇజి నాను కోరిజిన. వాండ్రు నా వందిజ్ కష్టమ్కు ఓరిస్సి లెకండొ నాను వన్నివందిజ్ కష్టమ్కు ఓరిసి వన్ని వెట కూడిజి మండ్రెజ్ ఇజి నాను కోరిజిన. వాండ్రు నా వందిజ్ సాతి లెకండొ నాను వన్ని వందిజ్ సాదెజ్ ఇజి కోరిజిన. నాను సాతి వెనుక మరేజి బత్తిని బత్తు ఎలాగ్బా నజీ దొహ్మిద్ ఇజినె నాను అయా లెకండొ కోరిజిన.

12 నాను క్రీస్తు లెకండొ పూర్తి ఆత ఇజి నాను వెహ్. ఇహిజ, దేవుణుదిజ్ ఇస్టం ఆతి వజ నాను పూర్తి ఆతమన ఇజి వెహ్. గాని క్రీస్తుయేసు నజీ కూక్తివలె, నాను ఎలాగ మండ్రెజ్ ఇజి వాండ్రు కోరిత మనాండ్రొ, దని వందిజ్ నాను కష్టబడిజిన.

13 తంబెరిజాండె, క్రీస్తు లెకండొ నాను పూర్తి ఆత ఇజి నాను వెహ్. గాని ఉండ్రీ సజతి నాను కిజిన. నాను ముజాలె కిజి మహి వన్కాజ్ పాసి, నాను బత్తిజని బత్తు అంతు క్రీస్తు లెకండొ మండ్రెజ్ ఇజి నాను సుడేజి కష్టబడిజిన. 14 అందెజె దేవుణు నజీ వరలోకమ్దు కూక్తి సీని ఇనాయం లొస్సి నా గురి వందిజ్, నాను కష్ట బాడిజిన. ఎందనిజ్ ఇహిజ, క్రీస్తుయేసు ముస్కు నాను నమకం ఇట్టా మన. 15 అందెజె, నమకమ్దు పూర్తి పీరితి మాటు విజెటె, ముజాలె వెహ్సె వజ మండ్రెజ్ ఇజి, ఉండ్రె మన్ను మండ్రెజ్. గాని ముజాలె వెహ్సె ఇని దని లోఇబా మిజి మరి ఉండ్రె మన్ను మహిజ, దేవుణు అయాకబా మిజి వెహ్సె తోరిస్తాన్.

16 దేవుణు మిజి వెహ్సె తోరిస్సి వజ మాటు మండ్రెజ్ ఇనికాదె ముకెలం ఆతిక. 17 తంబెరిజాండె, మీరు విజెదెరె, నజీ సుడేజి నడిదు. మాపు నడితి వజ నడిజిని వరిజ్ సుడేజి మీరు నడిదు. 18 ఎందనిజ్ ఇహిజ, నండొండార్ నమ్మిత్తికాప్ ఇజి వెహ్ ఆనికార్, క్రీస్తు సిలువాదు సాతి ఉదెనమ్దిజ్ పడిఎండ మనార్ ఇజి వరి బత్తుదాన్ తోరిసినాద్. నిని వరి వందిజ్ నాను ముజాలె మిజి నండొ సుట్టు వెహ్సె మన. ఎలు వరి వందిజ్ నాను వెహ్సె వలె, అడొ:బాజినె వెహ్సిన.

19 దేవుణు వరిజ్ నానసం కినాన్. వారు ఒడొ:ల్ది ఆస వందిజె బత్తిజినార్. దేవుణుదిజ్ సర్ద కిబిస్తిజ్ బత్తివర్. సిగు తప్పిస్సి పణిజె వారు కిజినార్. వన్కా లోఇనె సర్ద అజినార్. యా లోకమ్ది పణి కిదెజె వారు ఎత్తు కినార్. 20 గాని మాటు వరలోకమ్దు మనికాల్. అబెణిజ్ వాని, మజి రక్తిస్సి వన్నిజ్ మాటు ఎద్దు సుడేజినాల్. వాండ్రు ప్రబు ఆతి యేసు క్రీస్తు. 21 వాండ్రు మరేజి వానివలె, మా సత్తు సీతి సబ్బెజి సాని ఒడొ:ల్దిజ్, వన్ని సత్తు మని సబ్బెజి ఒడొ:ల్ లెకండొ కినాన్. విజా వన్కాజ్ అతికారం కని వన్ని గొప్ప సత్తుదాన్, వాండ్రు యా లెకండొ మా ఒడొ:ల్దిజ్ కినాన్.

4 అందెజె నా తంబెరిజాండె, ముజాలె నాను నెస్సిస్తి దని వజ మీరు ప్రబు ముస్కు మని నమకం డిస్ఎండనె మండ్రు. మీరు నా లెకండొ దేవుణుదిజ్ నమ్మిత్తికిదెర్. మీరు నజీ నండొ ఇస్టం ఆతికిదెర్. మీ వెట మండ్రెజ్ నాను నండొ ఆస అజిన. మీరు నజీ నండొ సర్ద కిబిస్సికిదెర్, నజీ నెగ్గి పేరు తప్పిస్సికిదెర్. 2 ఓ యువొదియ సుంబుకె మీరు కూడిజి పాడిజి మండ్రు ఇజి నాను మిజి బతిమాల్జిన. ఎందనిజ్ ఇహిజ, మీరు ప్రబు లోకు. 3 మరి, నా వెట సేవ పణి కినికి, సీను నమ్మిదెజ్ తగ్గికి. సీను యా బొదెక్ కూడిజి పాడిజి మంజిని లెకండొ వెహ్సె ఇజి నాను నిజి వెహ్సిన. ఎందనిజ్ ఇహిజ, క్రీస్తు వందిజ్ సువార్త సాటిస్తిజ్ నా వెట నండొ కష్టబడిజె. మరి, క్లెమెంతు వెట, నా వెట జత పణి కిని మహి వరి వెటబా కూడిజి సువార్త సాటిస్తిజ్ అవిక నండొ కష్టబడిజె. ఎలాకాలం దేవుణు వెట బత్తిని వరి పేర్కు రాసి ఇడ్డిని పుస్తకమ్దు వాండ్రు వన్కా పేర్కు రాస్త మనాన్.

4 ఎస్తివలెబా మీరు సర్ద ఆదు. ఎందనిజ్ ఇహిజ, మీరు ప్రబు లోకుర్. నాను మరిబా వెహ్సిన, సర్ద ఆదు. 5 మీరు విజెరె వెట సాద్లాన్ మంజిన ఇజి తోరిస్. ప్రబు బేగి వానాన్ ఇజి పాస్కాట్ 6 ఇని దని వందిజ్బా విసారిస్కాట్. గాని ఎలాగ మరి సమయమ్దుబా, మహిజ్బా, సీటిజ్బా, దేవుణుదిజ్ పార్దనం

కిదెజ్. మిజి మని అవ్సరమ్కు వన్నిజ్ వెహైజ్. వన్ని సాయం మీరు లొస్తాజ్. వన్నిజ్ ఎస్తివలెబా వందనమ్కు వెహైజ్. 7 అయావలె, దేవుణు వన్ని సమాదనం మీ మన్నుదు, మీ గర్భమ్దు మిజి కాపాడెదెజ్ సీనాన్. ఎందనిజ్ ఇహిజ, మీరు క్రీస్తు యేసు వెట కూడితి మనికిదెర్. యా సమాదనం లోకుర్ అర్లం కిదెజ్ అట్ఇక. 8 నా తంబెరిజాండె, ఆకార్దు, నాను ఉండ్రె వెహిసాన్. మీరు ఈహు ఒడిబిజి మండ్రెజ్ ఇజి నాను వెహిసాన్. నిజమాతి వన్కాజ్, లోకుర్ గవరం సీదెజ్ తగ్గి వన్కాజ్, నాయం మని వన్కాజ్, పాపం సిలి వన్కాజ్, లోకుర్ ఇష్టం కిదెజ్ తగ్గి వన్కాజ్, గొప్ప పేరు ఆపిస్తి వన్కాజ్, లోకుర్ పాగిడిని వన్కాజ్ మీరు ఒడిబిజి మండ్రు. 9 మరి నాను మిజి నెన్పిస్తికెజ్, మీరు నమ్మిత్తికెజ్, కిజినె మండ్రు. నా బాణిజ్ మీరు విహికెజ్, నాను కిజినెకెజ్ మీరు సుండెతికెజ్ కిజినె మండ్రు. అయావలె, సమాదనం మిజి సీజిని దేవుణు మిజి తోడుః మంజినాన్.

సజి సీజిని సాయం వందిజ్ వందనమ్కు

10 నెగం రోస్కు డిస్తిదెరె, నజి ఎత్తు కిజినాన్ ఇజి ఏలు మీరు తోరిస్తి వందిజ్ నాను ప్రబుజ్ సర్ద ఆజి వందనమ్కు వెహిసాన్. మీరు ఎస్తివలెబా నజి ఎత్తు కిజినె మహిదెర్ ఇజి నాను నెన్న. గాని నజి సాయం కిజి ఎత్తు కిజినాన్ ఇజి మిజి తోరిస్తిజ్ అవకాసం దోహ్కాతాద్. 11 నజి అవ్సరం మనిజ్ ఇజి ఆపిద్ యా లెకెండ్ వెహిసానిక. ఎలాగ మర్తి సమయమ్దుబా నజి మనికాదె సాలు ఇజి సరి కిదెజ్ నెన్న మన. 12 ఇహిజ, నజి కావాలస్తికెజ్ విజు సిలితివలె ఎలాగ మండ్రెజ్ ఇజి నాను నెసిన. నండొ మనివలె ఎలాగ మండ్రెజ్ ఇజిబా నాను నెసిన. ఎలాగ మర్తి సమయమ్దుబా సరి కిబె ఆదెజ్ నాను నెన్న మన. పాట వంజితి వలెబా, బజ కట్టిని వలెబా, నండొ మనివలెబా, ఇనిక సిలివలెబా సరి కిబె ఆదెజ్ నాను నెన్న మన. 13 యా లెకెండ్ సరి కిబె ఆదెజ్ విజు నాను అట్సిన. ఎందనిజ్ ఇహిజ, క్రీస్తు నజి సత్తు సీజినాన్.

14 అహిజ్బా, ఏలు యా లెకెండ్ నాను కష్టమ్దు మనివలె, మీరు నజి సాయం కితిదెర్. నెగ్గి వణినె కితిదెర్. 15 పిలిప్పియదు మని నమ్మిత్తికిదెరా, మీరు నెస్సిదెర్ నాను సువార్త వెహైజ్ మొదొల్ని తొలి రోస్కాజ్, నాను మసిదొనియ రాష్ట్రం డిస్తి వాతివలె, మీ సజమ్దికిదెరె నజి సీతిదెర్, నా బాణిజ్ లొసె ఆతిదెర్. మరి ఎమేణి సజమ్దికార్బా సిఎతార్. 16 మరి నాను తెసెలొనికయ పట్నమ్దు మహివలెబా నజి అవ్సరం మహివలె మీరు ఉండ్రె సుటునె అవండ నండొ సుట్కు డబ్బు ఫాక్తిదెర్. 17 మీరు యా లెకెండ్ మరి డబ్బు ఫాక్తిజ్ ఇజి నాను ఆస ఆజి వెహిఎ. గాని మీరు యా లెకెండ్ సీతి దనిజ్ దేవుణు మిజి నండొ దీవిస్పెన్ ఇజినె ఆస ఆజిన.

18 ఏలు నజి సరి ఆని ససా మనాద్. మరి నండొబా మనాద్. మీరు ఎవప్రాదితు వెట ఫాక్తికెజ్ వాండ్రు తత సితాన్. అందెజె ఒదె నండొ మనాద్. మీరు నజి సీతిక, దేవుణుదిజ్ సీజిని వాసనం మని పూజ లెకెండ్ మనాద్. వాండ్రు దని వెట సర్ద ఆతండ్రె డగ్గు కితాన్. 19 మరి, నా దేవుణు, మీ అవ్సరం విజు తీరిస్నాన్. లెక్క సిల్లి వన్ని నండొ ఆస్తిదాన్ మాటు బమ్మ ఆని లెకెండ్ తీరిస్నాన్. ఎందనిజ్ ఇహిజ, క్రీస్తు యేసు వెట కూడితి మనికిదెర్. 20 మా బుబ్బ ఆతి దేవుణుదిజ్ అంతు సిల్లెండ ఎల్లకాలం గవరం మనిద్. ఆమెన్. 21 క్రీస్తుయేసు ముస్కు నమకం ఇట్టి దేవుణు లోకుర్ ఆతి విజెరిజ్ నాను వెన్బాతి లెకెండ్ వెహిసాన్. నా వెట మని తంబెర్బు మిజి వెన్బాతి లెకెండ్ వెహిసాన్.

22 ఇబ్బె మని దేవుణు లోకుర్ విజెరె, ముకెలం కయ్సరు రాజా ఇండ్రొ పణి కిజిని నమ్మిత్తికార్ మిజి వెన్బాతి లెకెండ్ వెహిసాన్. 23 ప్రబు ఆతి యేసు క్రీస్తు దయా దర్లం మిజి తోడు మనిద్. ఆమెన్.

మార్కు

నెల్వ కిబిస్సిక

అపొస్తుడు ఆతి వపులు కొలోసి పట్నమ్దు మని దేవుణు సజమ్దిజ్ రాసిని ఉత్తమ్నె యాక. వాండ్రు రోమ జెలిదు పాకె ఆతి మహివలె రాస్తికాదె. వపులు ఎసెజ్బా కొలోసి పట్నమ్దు సాన్వతాన్. వాండ్రు దేవుణు దరోట్ నడిపిసి ఎపప్రాదితునె యా పట్నమ్దు దేవుణు సజం మొదోల్స్తాన్. యా లోకమ్దు మని దేవుణుదిజ్ నమ్మిత్తికార్ విజేరె కూడితి మని సజమ్దిజ్ బుర లెకండ్ క్రీస్తు మనాన్. వన్ని ఒడోల్ దేవుణు సజం. వాండ్రు విజా వన్యాజ్ ముజాలె మనికాన్. విజా తయార్ కితికాన్ వాండ్రె. విజా అతికారమ్క మున్సు అతికారం మనికాన్ వాండ్రె ఇజి ఎత్తు కిబిసి రాసికాన్. నమ్మిత్తికార్ యా లోకమ్ది సజతిజ మున్సు మన్సు ఇడోండ్, పరలోకమ్దు మని సజతిజ మున్సు మన్సు ఇడోదెజ్ ఇజి వెస్సినాన్. నమ్మిత్తికార్ ఎలాగ నడిదెజ్ ఇజిబా యా ఉత్తమ్దు రాసి వెస్సినాన్.

1 ¹⁻² క్రీస్తు యేసు వందిజ్ అపొస్తుడు ఆతి వపులు ఇని నాసుని, మా తంబెరి ఆతి తిమోతి కొలోసి పట్నమ్దు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కితి వజనె నాసు క్రీస్తు యేసు వందిజ్ అపొస్తుడు ఆత. మీరు నమ్మిదెజ్ తగ్గి తంబెరిజు. మా బుబ్బు ఆతి దేవుణు దయ దర్మమ్దాన్, మీరు నిపాతిదాన్ మండ్రెజ్ సాయం కిపిన్.

³ మాపు మీ వందిజ్ ఒడోబిజి పార్దనం కినివలె, ఎస్తివలెబా మా వ్రబు ఆతి యేసుక్రీస్తుజ్ బుబ్బు ఆతి దేవుణుదిజ్ వందనమ్కు వెస్సినాన్. ⁴ ఎందనిజ్ ఇహిజ, మీరు క్రీస్తు యేసుజ్ నమ్మిజినిదెర్ ఇజి, దేవుణు వందిజ్ కేట ఆతి లోకుర్ విజెరిజ్ ప్రేమిసినిదెర్ ఇజి మాపు వెహ మనాన్. ⁵ మీరు యా లెకండ్, క్రీస్తుయేసుజ్ నమ్మిజినిదెర్, దేవుణు వందిజ్ కేట ఆతి లోకురిజ్ విజెరిజ్ ప్రేమిసినిదెర్. ఎందనిజ్ ఇహిజ, నిజమాతి బోద, ఇహిజ, సువార్త మీరు వెహివలె, దేవుణు పరలోకమ్దు మీ వందిజ్ ఇడ్డి మని దని వందిజ్ ముజాలె మీరు వెహి మనిదెర్. అయాక తవ్ఎండ దోహ్కాన్ ఇజి దని వందిజ్ ఆసదాన్ ఎద్దు సుడోబినిదెర్. ⁶⁻⁷ లోకమ్ది నండో దేసమ్కాజ్ యా సువార్త వెహి ఆతి లెకండ్, మీ నడిమిబా వెహి ఆత మనాద్. మీరు అయాక వెంజి దేవుణు దయ దర్మం నిజం ఇజి నెస్తి బాణిజ్ అసి మీ నడిమి అయా సువార్త నెగ్గి పణి కిజినాద్. మీ నడిమి అయా సువార్త నెగ్గి పణికిజిని లెకండ్ మహి లోకురిజ్బా నెగ్గి పణి కిబిస్సాద్. మరి, నండో నండో లోకుర్ సువార్త నమ్మిజినార్. ఎపప్రానె మిజి సువార్త నెస్తి. మాపు వన్నిజ్ ప్రేమిస్సాన్. మజి బదులు వాండ్రు క్రీస్తుజ్ అబె సేవ కిజినాన్. మీ మేలు వందిజ్ నమకమ్దాన్ వాండ్రు క్రీస్తుజ్ సేవ కిజినాన్. ⁸ దేవుణు ఆత్మ మీ లోక పుటిస్తి ప్రేమదాన్, మీరు దేవుణు వందిజ్ కేట ఆతి లోకుర్ విజెరిజ్ ప్రేమిసినిదెర్ ఇజిబా వాండ్రు మజి వెహి మనాన్.

⁹ అందెజె, మీ వందిజ్ వెహి బాణిజ్ అసి, డిస్ఎండ ఎస్తివలెబా మీ వందిజ్ దేవుణుదిజ్ పార్దనం కిజినాన్. మీ బత్తుదు మీరు కిదెజ్ ఇజి దేవుణు కోరిజిన విజా సజతిజ్ మీరు బాగ నెస్తిజ్ ఇజి పార్దనం కిజినాన్. ఇహిజ మీరు, దేవుణు ఆత్మ సీజిని విజా గెణం, బుద్ది మనికిదెర్ ఆదెజ్ ఇజి మాపు పార్దనం కిజినాన్. ¹⁰ మాపు ఎందనిజ్ యా లెకండ్ పార్దనం కిజినాన్ ఇహిజ, దేవుణు కోరిజిన వజ మీరు బత్తిజి, వన్నిజ్ సర్ద కిబిస్సికెజ్ ఎస్తివలెబా కిదెజ్. ముకెలం, మీరు విజా రకమ్కాణి నెగ్గి పణి కిని వందిజ్, దేవుణుదిజ్ నిజం మరి లాపు నెస్తి వందిజ్ మాపు యా లెకండ్ పార్దనం కిజినాన్. ¹¹ దేవుణు, లోకురిజ్ తోరిస్తి గొప్ప బమ్మ కిని వన్ని సత్తుదాన్ మీరు సత్తు మనికిదెర్ ఆని వందిజ్ యా లెకండ్ పార్దనం కిజినాన్. ఎందనిజ్ ఇహిజ, ఎస్తివలెబా విజా బాదెజ, సర్దదాన్ విజా ఓరిసి, బరిసి మండ్రెజ్, మీరు సత్తు మనికిదెర్ ఆదెజ్. అందెజె యా లెకండ్ పార్దనం కిజినాన్. ¹² మరి, దేవుణు ఏలుబడిడు ఇహిజ గొప్ప జాయిదు వన్ని వందిజ్ కేట ఆతి లోకుర్ వందిజ్ వాండ్రు తయార్ కితి ఇడ్డి మని విజా దని లోక మిజిబా అక్కు మండ్రెజ్ తగ్గి పరి లెకండ్ మిజి కితి దని వందిజ్ బుబ్బు ఆతి దేవుణుదిజ్ వందనమ్కు వెస్సినె మండ్రెజ్ ఇజి మాపు మీ వందిజ్ యా లెకండ్ పార్దనం కిజినాన్. ¹³ దేవుణు మజి సయ్తాన్ అతికారం అడిఃగి సీకటుదు తోహి ఆతి బాణిజ్ తప్రిస్తాండ్రె వాండ్రు ప్రేమిసిని వన్ని మరిన్ అతికారం అడిఃగి మజి తతాన్. ¹⁴ వన్ని మరిన్ ఆతి దనితాన్ దేవుణు మజి విడుఃదల కిత్తాన్. ముకెలం, మా పాపమ్కు వాండ్రు సెమిన్ మనాన్.

క్రీస్తు విజా వన్యా మున్సు గొప్ప పెరికాన్

¹⁵ తోర్ఇ దేవుణు మూర్సి క్రీస్తు. దేవుణు ఎలాగ మనాన్ ఇజి వీండ్రు తోరిస్సాన్. దేవుణు విజా తయార్ కిని ముజాల వీండ్రు మహాన్. తయార్ కితి విజా వన్యా మున్సు అతికారం మనికాండ్రె క్రీస్తు. ¹⁶ ఎందనిజ్ ఇహిజ, వన్నినవెటనె దేవుణు విజా తయార్ కిత మనాన్. బూమిదు మనికెజ్, ఆగానమ్దు మనికెజ్, తోర్సికెజ్, తోర్ఇకెజ్, ముకెలం గొప్ప సత్తు మని విజా రకమ్కాణి అతికారం కిని విజా దూతెజ దెయమ్కాజ్, విజా వన్ని వెటనె దేవుణు తయార్ కిత్తాన్. విజా క్రీస్తు వెటనె తయార్ కిత్తాన్. విజా వన్నిజ్ గవరం సీని వందిజె దేవుణు తయార్ కిత్తాన్. ¹⁷ క్రీస్తు, విజా తయార్ ఆని ముజాల మనికాన్. విజా వన్యాజ్ వాండ్రు కుడుప్పి అస్స మనాన్. ¹⁸ వన్ని ఒడోల్ ఆతి దేవుణు సజమ్దిజ్ బుర్ర వాండ్రె. వన్ని బాణిజె దనిజ్ కొత్త బత్తు వాజినాద్. ఎందనిజ్ ఇహిజ, సాతి పరి బాణిజ్ ముజాల్

మర్జి బత్రితి మనికాన్ వాండ్రె. విజా వన్కా ముస్సు గొప్పు పెరికాన్ ఆని వందిజె, సాతి వరి బాణిజ్, ముజాల్ మర్జి బత్రిత మనాన్. 19 ఎందనిజ్ ఇహిజ, వన్ని లోఇనె వన్ని బుబ్బు ఆతి దేవుణు వెల్తి సిల్లెండ పూర్తి మండ్రెజ్ ఇజి తీర్మనం కిత్తాన్. 20 అందెజె, మరిన్ వెటనె బూమిదు మని విజా వన్కాజ్, పరలోకమ్దు మని విజా వన్కాజ్, వన్ని డగ్రు మర్జి కుడుఃపైజ్ ఇజి దేవుణు తీర్మనం కిత్తాన్. వన్ని మరిన్ సిలువాదు సాతివలె, నల వాక్తి దనితాన్, దేవుణు బూమిదు మని విజా వన్కా వెట, దేవుణు మంజిని పరలోకమ్దు మని విజా వన్కా వెట రాజినం ఆతండ్రె, విజా వన్కాజ్ వన్ని డగ్రు మర్జి కుడుఃపైజ్. 21 ఉండ్రె కాలమ్దు, మీరు కితి సెఇ పణిజాణిజ్, సెఇ ఆలోసనెజాణిజ్ దేవుణు బాణిజ్ దూరం మహిదెర్. దేవుణుదిజ్ పడిఃఎండ మహిదెర్. 22 గాని ఏలు, వన్ని మరిన్ ఒరెన్ లోకు ఆజి సాతి సాపుదాన్ వాండ్రు మీ వెట రాజినం ఆతాన్. ఎందనిజ్ ఇహిజ, ఇని నింద సిలి, ఇని నేరమ్కుబా రెఇ, నొరె ఆతి లోకుర్ లెకెండ్రె, క్రీస్తు మర్జి వానివలె మిజి దేవుణు ఎర్దు మిజి నిల్వెజె వాండ్రు మీ వెట రాజినం ఆతాన్. 23 మీరు సువార్త నమ్మిజి మహిజ అయాలెకెండ్రె మంజినిదెర్. మీరు నమ్మకమ్దాన్ దిగజార్ఎండ మండ్రెజ్ వలె. యా సువార్త వెప్పిని ఆన వందిజ్ డిఃఎండ ఎర్దు సుడఃజినె మండ్రెజ్ వలె. యా సువార్తనె నండ్రె దేసమ్కాణి లోకుర్ నడిఃమి వెహె ఆత మనాద్. యాక వెప్పెజె పవులు ఇని నజి దేవుణు ఏర్పాటు కిత్తాన్.

పవులు దేవుణు సజం వందిజ్ సీవ కిజినాన్

24 ఏలు, మీ మేలు వందిజ్ నాను స్రమెజ్ ఓరిసిన ఇజి సర్ద ఆజిన. ఇహిజ, క్రీస్తు ఒడఃల్ లెకెండ్రె మని సజమ్ది మేలు వందిజ్ నాను నా ఒడఃల్దు స్రమెజ్ ఓరిస్తెజ్ వలె ఇజి క్రీస్తు ఏర్పాటు కితిక నాను పూర్తి కిజిన. 25-26 దేవుణు నజి సజమ్దిజ్ సీవ కిడెజ్ ఇజి ఏర్పాటు కిత్తాన్. మీ మేలు వందిజ్, క్రీస్తు వందిజ్ మని సువార్త మిజి పూర్తి నెప్పిన్ని బాజత వాండ్రు నజి సితాన్. యా సువార్త, ముజాలె బత్రితి మహి లోకుర్ బాణిజ్ దేవుణు డాప్పి వన్ని గర్బమ్దు ఇట్టా మహాన్. గాని ఏలు వాండ్రు వన్ని వందిజ్ కేట ఆతి లోకురిజ్ అయొక తోరిసి నెస్పిస్తాన్. 27 దేవుణు అయాలెకెండ్రె కిత్తాన్. ఎందనిజ్ ఇహిజ, వాండ్రు యూదురు ఆఇ పరిజ్ నండ్రె దీవిన్నాన్ ఇజి వన్ని గర్బమ్దు వాండ్రు ఎత్తు కిజి డాఃప్పి ఇట్టిక పరిజ్ తెలివి కిడెజ్ ఇజి తీర్మనం కిత్తాన్ ఇజి తోరిస్తెజ్. ముకెలం, క్రీస్తు, యూదురు ఆఇ మీ మన్సుదు మంజినాన్. అందెజె, కడఃవేరిదు దేవుణు జాయ్దు మండ్రెజ్ మిజి ఒనిదెర్ ఇజి ఆనదాన్ ఎర్దు సుడఃజి మంజినిదెర్ ఇజి. యాకదె దేవుణు వన్ని లోకురిజ్ తోరిసి నెస్పిస్తె సువార్త.

28 అందెజె మాపు క్రీస్తు వందిజ్ విజెరిజ్ వెప్పినాన్. ముకెలం మాపు నండ్రె గెణమ్దాన్ విజెరిజ్ బుద్ది వెప్పి నెస్పిస్తాన్. ఎందనిజ్ ఇహిజ, క్రీస్తు వెట కూడిఃతి మని పరిజ్ విజెరిజ్ వాండ్రు మర్జి వానివలె దేవుణు ఎర్దు నిల్పివలె, వారు పూర్తి ఆతికార్ ఆదెజ్ మాపు బుద్ది వెప్పి నెస్పిస్తాన్. 29 వారు పూర్తి ఆతికార్ ఆని వందిజ్ క్రీస్తు సీజిని గొప్పు సత్తుదాన్ నాను నండ్రె కష్టబాడిఃజిన. అయొ గొప్పు సత్తునె, నాను కష్టబాడిఃదెజ్ నజి సత్తు కిజిస్తాన్.

2 మీ వందిజ్, లవోదియ పల్లమ్దు మని దేవుణుదిజ్ నమ్మిత్తి పరి వందిజ్, నజి ఎసిజ్బా తొఇ పరి వందిజ్ నాను ఎనా కష్టబాడిఃజిన ఇజి మీరు నెస్తెజ్ ఇజి నాను కోరిజిన. 2 నాను ఎందనిజ్ యా లెకెండ్రె కష్టబాడిఃజిన ఇహిజ, మీరుని వారు, నెగ్రెండ దయ్మరమ్దాన్ నిల్పి వందిజ్, మరి, మీరు ఒరెన్ మరి ఒరెన్ వన్నిజ్ ప్రేమిసిని వజ, కూడఃజి పాడఃజి మంజని వందిజ్ కష్ట బడిఃజిన. ఎందనిజ్ ఇహిజ, అయాలె మిరు అనుమానం సిల్లెండ దేవుణు వన్ని గర్బమ్దు డాప్పి ఇట్టిక ఇహిజ, క్రీస్తుజ్ పూర్తి నెస్తెజ్. 3 ఎందనిజ్ ఇహిజ, క్రీస్తు వెటనె దేవుణు వన్ని గర్బమ్దు డాప్పి ఇడ్డి విజా గెణమ్ని ఆలోసనెజ్ నెస్తెజ్ అట్టాల్. 4 నాను ఎందనిజ్ యా లెకెండ్రె వెప్పిన ఇహిజ, ఎయెర్బా మిజి తియూని మాటెజ్ వెప్పి మోసిం కిఎండ్రె మండ్రెజ్. 5 నాను మీ నడిఃమి సిలితిజ్బా మీ వందిజ్ నండ్రె ఎత్తు కిజిన. నాను నండ్రె సర్దబా ఆజిన. ఎందనిజ్ ఇహిజ, మీరు ఉండ్రె ఆజి కూడఃజి పాడఃజి మంజినిదెర్. మీరు క్రీస్తుజ్ డటం నమ్మిజినిదెర్ ఇజి నాను నెస్స. 6 మీరు క్రీస్తుయేనుజ్, ప్రబు ఇజి ఒప్పుకోటి మనిదెర్. అందెజె వన్ని వెట కూడిఃతి మనికార్ కిడెజ్ మని లెకెండ్రె మండ్రు. 7 వన్ని వందిజ్ మిజి నెస్పిస్తె మనికెజ్ నమ్మిజి, అయకెజ్ కిజినె మండ్రు. అయొ సజతిజ్ నలిజిజి సమకమ్దు పిరిదు. మిజి నెస్పిస్తె వజ నిజమాతి బోదదిజ్ అసినె మండ్రు. మా బుబ్బు ఆతి దేవుణు మీ వందిజ్ కితి దని వందిజ్ పూర్తి మన్సుదాన్ వందనమ్కు వెప్పినె మండ్రు.

8 ఎయెర్బా మొసిం కిని బోదెజ్ నెప్పిని మిజి తొహొక్తి మని పరిలెకెండ్రె కిఎండ్రె జాగర్త మండ్రు. వారు మిజి అర్దం సిలి మొసిం కిని లోకురిజ్ మని గెణం నెప్పిని మొసిం కినార్. అయకెజ్ క్రీస్తు బాణిజ్ వాజినెకెజ్ ఆఉ. గాని పూర్బమ్దాన్ అసి నెప్పినిని బోదెజ్ బాణిజ్ వాజినెకెజ్. యా లోకమ్దిజ్ అతికారం కిజిని దెయమ్క బాణిజ్ వాజినెకెజ్. 9 నాను అయ లెకెండ్రె వెప్పిన. ఎందనిజ్ ఇహిజ, దేవుణు, క్రీస్తు ఒడఃల్దునె వెల్తి సిల్లెండ పూర్తి మంజినాన్. 10 క్రీస్తు వెట మీరు కూడిఃతి మనిజ్, మీ కొత్త బత్తుదిజ్ కావాలిస్తెకెజ్ విజా మిజి సిత మనాన్. అతికారం కిజిని విజా సత్తుజ ముస్సు, ఏలుబడిః కిని పరి ముస్సు, తోర్ని వన్కాజ్ని, తోర్ఇ వన్కాజ్ ముస్సు వాండ్రె గొప్పు అతికారం మనికాన్. తోర్ఇ వన్కాజ్ ఇహిజ, దేవుణు దూతారని దెయమ్కు. వన్కా ముస్సు గొప్పు అతికారం మనికాండ్రె వాండ్రు. 11 వన్నివెట మీరు కూడిఃతి మనిదెర్. అందెజె క్రీస్తు బాణిజ్నునతి కిబె ఆతి లెకెండ్రె మనిదెర్. లోకుర్ పరి కికాణిజ్ కిని సునతి కిబె ఆఇదెర్, గాని క్రీస్తు కితి సునతిని కిబె ఆతిదెర్. ఇహిజ, క్రీస్తు మీ సెఇ ఆసిజ్ విజా పూర్తి లాగితాన్. 12 మరి, మీరు బాప్తిసం లాగె ఆతివలె, క్రీస్తు వెట సాజి ముసి ఆతి లెకెండ్రె మనిదెర్. వన్ని వెట మర్జి నికె ఆతి లెకెండ్రె మనిదెర్. దేవుణు గొప్పు సత్తు మనికాన్ ఇజి మీరు నమ్మిజిని దనిదానె వన్ని వెట మర్జి నికె ఆతిదెర్. దేవుణు సత్తునె వన్నిజ్ సాతి పరి బాణిజ్ బత్రిస్తాన్.

13 ఉండ్రె కాలమ్దు, మీరు సాతి పరి లెకెండ్రె మహిదెర్. ఎందనిజ్ ఇహిజ, మీరు పాపమ్కు కిజినె మహిదెర్, పాపం కిబిన్ని సెఇ ఆసిజ్బా మిజి మహె. అయకెజ్ సాన్ఎండ మహె. గాని ఏలు మిజినె దేవుణు క్రీస్తు వెట కొత్త బత్తు సితాన్. ఎందనిజ్ ఇహిజ, వాండ్రు మా పాపమ్కు విజా నొహ్తాన్. 14 ఇహిజ, మిజి సిక్కు సీని, మాటు కితి తప్పజ్ రాస్తి ఇడ్డి కాకితం సిల్లెండ్రె లెకెండ్రె మనాద్ అయొక క్రీస్తు సాతివలె మా పాపమ్కు వెట అయొ కాకితమ్బా సిలువాదు కుంటిబాణిజ్ డెఃయితాండ్రె అయకెజ్ పూర్తి సిల్లెండ్రె ఆతె ఇజి తోరిస్తాన్. 15 అతికారమ్దు మహి ఏలుబడిః కిజి మహి దెయమ్కాజ్ మరి తోర్ఇ సత్తుజ, దేవుణు వీజిస్తాండ్రె, వన్కా ముస్సు గెలస్తాన్. క్రీస్తు సిలువాదు ఆతి దనిదనటాన్ దేవుణు వన్కా ముస్సు గెలస్తాండ్రె, విజెరి ఎర్దు వన్కాజ్ సిగు కిత్తాన్.

16 అందెజె, మీరు సెగం బోజనం ఉణిజి తింజిని వందిజ్ సిలిజ, మీరు ఏంటు ఏంటు బత్తువందిజ్ కిజిని పండ్రెయి కిఇ వందిజ్, ఆమాన్దు పండ్రెయి కిఇ వందిజ్, విస్తాంతి దినం సుడఃఇ వందిజ్ మీరు తప్ప కితిదెర్ ఇజి తీర్పు కిని వన్నిజ్ దూరం కిల. 17 నిని ఆడ్రెజ్ విజా ఉండ్రె సీడః లెకెండ్రె మన్నె. ఆ నీడ ఎయెదిన్

వాండ్లు వెనుక వాజినాన్. అయా వాండ్లు క్రీస్తునె. 18 'తగ ఆజినాన్' ఇజి వేసం తోరె ఆఇతిజ్, దూతెజ్ మాడిస్ఇతిజ్, మీరు తవు కితిదెర్ ఇజి మిజి తీర్పు కిని వన్నిజ్ దూరం ఆదు. ఎందనిజ్ ఇహిజ, వాండ్లు కలారు సుడేతి ఇనిదనిజో ఆదారం ఇడేజి అతికారం కిజినాన్. వాండ్లు కిజిని ఆలోసనెజ్ సెఇకెజ్. అందెజె వాండ్లు గర్ర ఆజినాన్. వాండ్లు గర్ర ఆడెజ్ మని ఇని సజతిబా వన్నిజ్ సిలితిజ్బా గర్ర ఆజినాన్. 19 అయా లెకండ్ మనికాన్ క్రీస్తు బాణిజ్ ముజాలె దూరం ఆత మనాన్. బుర్ర ఆతి క్రీస్తు వందిజ్ మని నిజమాతి బోద వాండ్లు నెస్పిన్ఎన్. బుర్ర వెప్పి వజనె ఒడోల్ సత్తుదాన్ పిపినాద్. ఒడోల్ అత్కుజాణిజ్ సీరెజాణిజ్ అత్కిస్త మనాద్. అయాలెకండ్, దేవుణు ఎత్తు కితి వజనె సజమదిజ్ సత్తుదాన్ పిరిప్పికాన్ క్రీస్తునె.

20-21 సాతి క్రీస్తు వెట మీరు కూడితి మనిదెర్. అందెజె నని ఆడ్రెజ, బోదెజ లోజిఎండ డి:బె ఆతిదెర్. అయకెజ్ క్రీస్తుజ్ నమ్మిఇ లోకుర్ వందిజ్ ఇడ్డి మనికెజె. అందెజె మరి ఎందనిజ్, సెగం సజతిజ్ వాడుకొడుమాట్, రుసి సున్మట్, ముట్మాట్, ఇని యా లోకమది ఆడ్రెజ లోజిదెజ్ వలె ఇజి లోజిజి నిదెర్.

22 ఆడ్రెజాదు వెప్పిని బోజనమ్ని మహి సజతిజ్ వాడు కొడుజి మహిజ, సిల్లెండ ఆనె. మరి ఎందనిజ్ అయకెజ్ లోజిజినిదెర్. అయకెజ్ లోకుర్ ఇడ్డి ఆడ్రెజ బోదెజ. 23 నిని ఆడ్రెజ్, ఇల్లికార్ గొప్పు గెణం మనికార్ ఇజి తోర్నార్. ఎందనిజ్ ఇహిజ, లోకుర్ తీర్మనం కిత ఇట్టా మనార్ ఎలాగ మాడిస్సెజ్ ఇజి. అయాలెకండ్ కిడెజ్ ఇజి ఆడ్రెజ్ వెప్పినాద్. తగ ఆజినాన్ ఇజి వేసం తోరె ఆడెజ్ ఇజి, దేవుణుదిజ్ సరద కిడెజ్ ఒరెన్ వన్ని ఒడోల్దిజ్ బాడెజ్ కిడెజ్ ఇజి ఆడ్రెజ్ వెప్పినాద్. అందెజె నిని ఆడ్రెజ్ నెగ్గెకె ఇజి తోర్నె. గాని, ఒరెన్ వన్నిజ్, వన్ని ఒడోల్ది ఆనిజ, ఆవకిదెజ్ ఇజి ఆన ఆని వన్నిజ్ ఇని సాయమ్బా కిఉ. అందెజె నిని ఆడ్రెజ్ లోకురిజ్ సెఇకెజె కిబిస్సె.

వరలోకమ్దు మంజిని సజతిజ వందిజ్ ఎత్తుకిజి మండ్లు

3 క్రీస్తుజ్ సాతి బాణిజ్ దేవుణు బత్కిస్తి లెకండ్, మిజి బా వాండ్లు కొత్త బత్కు, సితాన్. అందెజె క్రీస్తు మని దేవుణు మంజిని బాడి:దు మని సజతిజ వందిజ్ ఎస్తివలెబా నండ్ ఆన ఆజి మండ్లు. వన్నిజ్ దేవుణు గొప్పు అతికారమ్ని నండ్ మర్యాద సిత మనాన్. 2 యా లోకమ్దు మని సజతిజ ముస్సు మీ మన్ను ఇడ్మాట్. గాని వరలోకమ్దు మని సజతిజ ముస్సు మీ మన్ను ఇడోదు. 3 ఎందనిజ్ ఇహిజ, మీ వడాయి బత్కు సాత మనాద్. మీరు ఏలు క్రీస్తు వెట దేవుణు ఎర్దు బత్కిజినిదెర్. అయకెజ్ లోకుర్ సుడేదెజ్ అట్ఎర్. 4 మిజి నిజమాతి బత్కు సీజినాన్ క్రీస్తునె. వాండ్లు మర్జి బానివలె, దేవుణు విజెరె ఎర్దు వన్నిజ్ వెల్లి తోరిస్సి వలె మిజిబా వన్నివెట వెల్లి తోరిస్సాన్. మీరుబా వన్ని వెట వన్ని జాయ్దు మంజినిదెర్. లోకుర్ మిజి వన్ని వెట గవరం సీనార్. 5 అందెజె, మీరు ముజాలె కిజి మహి యా లోకమది తవు వణిజ్ పూర్తి డి:స్సు. ముకెలం, రంకు బూలమాట్, కేలార్ బూలమాట్. దిన్ని వందిజ్ నండ్ ఎత్తు ఆజి మన్ను ఇడ్మాట్. సెఇకెజ్ కిడెజ్ ఆన ఆమాట్. మని దని ఇంక మరి నండ్ కావాలి ఇజి ఆన ఆమాట్. ఎందనిజ్ ఇహిజ, అయా లెకండ్ కినిక మీరు ఆన ఆనిదనిజ్ మాడిసిని లెకండ్ మనాద్. 6 యా లెకండ్ కిమాట్. ఎందనిజ్ ఇహిజ, దేవుణు కోపం యా లెకండ్ కిజిని వరి ముస్సు వానాద్. 7 ముజాలె మీరుబా దేవుణుదిజ్ లోజిఎండ మహివలె, యా లెకండ్ కిజి మహిదెర్. 8 గాని ఏలు యాకెజ్ ఇనికబా కిమాట్. ముకెలం వగ అస్మాట్. కోపం ఆమాట్. మహి వరి వందిజ్ సెఇకెజ్ ఎత్తు కిమాట్. దునలాడే:మాట్. కేడి మాటెజ్ మీ వెయ్దాన్ వర్గిమాట్. 9 మరి ఒరెన్ వన్ని వెట అబద్దం వర్గిమాట్. ఎందనిజ్ ఇహిజ, మీ వడాయి బత్కు మీరు డి:స్తిదెరె, నస్తివలె కిజి మహి సెఇ వణిజ్ మీరు డి:స్తిదెర్. 10 అయకెజ్ డి:స్తిదెరె, ఉండ్రె నెగ్గి కొత్త బత్కు బత్కిజినిదెర్. మిజి తయార్ కితి దేవుణునె యా కొత్త బత్కు మీ లోఇ ఇట్టాన్. వన్ని లెకండ్ మంజిని వందిజ్ మరి మరి మిజి కొత్తాజ్ కిజినాన్. వన్నిజ్ మీరు నెగ్గెండ నెస్సి వందిజె, యా లెకండ్ మరి మరి కొత్తాజ్ కిజినాన్. 11 అందెజె, యూదురు ఇజినో, యూదురు ఆఇకార్ ఇజినో, సునతి కిబె అతికార్ ఇజినో, కిబె ఆఇకార్ ఇజినో, తకు జాతిదికార్ ఇజినో, మూర్కమ్ది నని ఒదె తకు జాతిదికార్ ఇజినో, వెలి వణి కినికార్ ఇజినో, కిఇకార్ ఇజినో ఆవద్ ముకెలం. గాని క్రీస్తునె ముకెలమాతికాన్. వాండ్లు నమ్మిత్తి వరి విజెరె లోఇ మంజినాన్. 12 మీరు దేవుణు లోకుర్. వాండ్లు మిజి ప్రేమిస్తాండ్రె వన్ని సాంత లోకుర్ ఇజి కేట ఇట్టాన్. అందెజె, మీరు మరి ఒరెన్ వన్ని వందిజ్ మీ పాణం నొతెజ్ దయ తోరిస్సు. తగిజి మండ్లు. సార్దిదాన్ మండ్లు. ఓరిసి మండ్లు. 13 మహి వరి వెట బరిస్సు. మీ లోఇ ఒరెన్ మరి ఒరెన్ వన్ని వెట మొరొ ఆజి మహిజ, అయకెజ్ ఇనిక ఆతిజ్బా సెమిస్సు. ప్రబు ఆతి క్రీస్తు మిజి సెడ్డినె సెమిస్తి వజ, మీరు సెమిస్సు. 14 దినిజ్ విజా ఇంక మహి వరిజ్ ప్రేమిస్సు. అయకెజ్ ముకెలం. ఎందనిజ్ ఇహిజ, మీరు ప్రేమిస్సి దనిదనటాన్ మీరు పూర్తి కూడే:జి మంజినిదెర్.

15 మీరు ఒరెన్ మరి ఒరెన్ వన్ని వెట కూడే:జి పాడే:జి మండ్రెజ్ క్రీస్తు సీని సమదనం నీ మన్నుదు మంజినాద్. ఎందనిజ్ ఇహిజ, మీరు దేవుణు సజమ్దు ఒరెన్ మరి ఒరెన్ వన్నివెట సమాదనమ్దాన్ మంజిని వందిజె, దేవుణు మిజి కూక్త మనాన్. దేవుణు కితి సజతిజ వందిజ్ ఎస్తివలెబా పోన్ఎండ దనిజ్ ఎత్తుకిజినె వందనమ్కు వెప్పి మండ్లు. 16 క్రీస్తు వందిజ్ మని బోద మీరు నెగ్గెండ నెసినె మండ్లు. నండ్ గెణమ్దాన్ ఒరెన్ వన్నిజ్ నేర్పిసి, బుద్ది వెప్పి మండ్లు. దేవుణు మాటెజ్ పాటెజ్ వజ పార్జి, దేవుణుదిజ్ పాగిడి:జి వందనమ్కు వెప్పిని పాటెజ్ పార్జి, దేవుణు ఆత్మ మీ మన్నుదిజ్ రేప్పిని వజ పాటెజ్ పార్జి మండ్లు. దేవుణు కితికెజ్ పోన్ఎండ మీ పూర్తి మన్నుదాన్ దేవుణుదిజ్ పాటెజ్ పార్డు. 17 మీరు ఇనిక వెహిజ్బా, ఇనిక కితిజ్బా ప్రబుయేసుజ్ లోజితికార్ కిడెజ్ మని వజ కీదు. మా ప్రబు ఆతి క్రీస్తు వెట, మిజి దోహ్కొత్తి దని వందిజ్ బుబ్బ ఆతి దేవుణుదిజ్ వందనమ్కు వెప్పివలె, యా లెకండ్ కిదు.

దేవుణుదిజ్ నమ్మిత్తికార్ ఒరెన్ ఒరెన్ ఎలాగ మండ్రెజ్.

18 బోదెకాండె, మీరు మీ మాసిర్ మీ ముస్సు అతికారం మనికార్ ఇజి ఒడే:బిజి వరిజ్ లోజిదు. మీరు ప్రబు వెట కూడితి మనికిదెర్. అందెజె అయకెజ్ మీరు కిడెజ్ మనిక.

19 మాసిరాండె, మీరు మీ బోదెకాజ్ ప్రేమిస్సు. వన్కాజ్ బాదెజ్ కిమాట్.

20 కొడో:రాండె, మీరు మీ యాయ బుబ్బెజ్ ఎస్తివలెబా వెండ్రు. ఎందనిజ్ ఇహిజ, యాకెజ్ ప్రబుజ్ ఇస్టం ఆతిక.

21 అప్పాసిరాండె, మీ కొడో:ర్ మన్ను రుజ్ఎండ మంజిని వందిజ్ మరి మరి జటిజ్ ఆమాట్.

22 వెటి పణి కినికిదెరా, మీరు యా లోకమ్ది మీ ఎజామారుజ, విజా వన్యా లొఇ లొజీదు. నెగ్గికార్ ఇజి వెహె ఆదెజ్ వారు నూణివలెనె ఆవద్. గాని పూర్తి మన్నుదాన్ వరిజ్ లొజీదు. ఎందనిజ్ ఇహిజ, మీరు ప్రబుజ్ తియెల్ ఆజి గవరం సీజినిదెర్. 23 మీరు ఇనిక కితిజ్బా, పూర్తి మన్నుదాన్ కిదు. లోకుర్ వందిజ్ ఆవద్. గాని దేవుణు వందిజ్ కిజినాప్ ఇజి పూర్తి మన్నుదాన్ కిదు. 24 ఎందనిజ్ ఇహిజ, ప్రబునె మిజి పలితం సీనాన్ ఇజి మీరు నెసినిదెర్. ఇహిజ, వాండ్రు ఒట్టు కితికెజ్ మిజి దోహ్చె. ఎందనిజ్ ఇహిజ మీరు సేవ కిజిని నిజమాతి ఎజమాని ప్రబు ఆత క్రీస్తునె. 25 తపు కిని వన్నిజ్, వాండ్రు ఎయెన్ ఆతిజ్బా వాండ్రు కితి తప్పుదిజ్ దేవుణు సిక్స సీనాన్. ఇజికార్ పెరికార్ ఇజి దేవుణుదిజ్ తేడ సిల్లెద్.

4 ఎజమానిరాండ, మీరు మీ వెట్టిపణి మనిసీరిజ్ నాయమ్దాన్, వరిజ్ సీదెజ్ మనికెజ్ సీజి నెగ్రెండ సుడెడు. ఎందనిజ్ ఇహిజ, మిజిబా ఒరెన్ ఎజమాని పరలోకమ్దు మనాన్ ఇజి ఒడెబిదు.

2 విస్కిఎండ పార్దనం కిజి మండ్రు. మీరు పార్దనం కినివలె మన్ను ఇతాల్ అతాల్ ఆవండ జాగర్దాన్ మండ్రు. దేవుణు మిజి కితి దని వందిజ్ వందనమ్కు వెప్పి మండ్రు. 3 మరి మా వందిజ్బా పార్దనం కిదు. దేవుణు బోద వెహెజ్ మజి సరి దోహ్చెజ్ సాయం కిపిన్ ఇజి పార్దనం కిదు. ఎందనిజ్ ఇహిజ, క్రీస్తు వందిజ్ ఉండ్రీ కాలమ్దు డాజితి మహికెజ్ గాని, ఏలు తోరె ఆతి నిజమాతి సజతిజ్ బోదిస్తెజ్. యాక బోదిస్తెజ్నె, నాను జెలిదు ఆత. 4 యాక నాను బోదిస్తెజ్ మనికాదె. అందెజె నాను నెగ్రెండ, అర్దం ఆనిలెకెండ వెహెజ్ నజీ సరి దోహ్చెజ్ సాయం కిపిన్ ఇజి నా వందిజ్ దేవుణుదిజ్ పార్దనం కిదు. 5 మీరు కిజిని దనితాన్ తెలివిదాన్ నమ్చ ఇరివెట మండ్రు. మిజి దోహ్చెజ్ సమయమ్దు విజా క్రీస్తు వందిజ్ వరిజ్ వెహెజ్ తయార్దాన్ మండ్రు. 6 మీరు తెలివిదాన్, నెగ్రెండ, ఎస్తివలెబా పరి వెట వర్గిదు. అయావలె, పరి లొఇ విజెరె వెట వారు వెన్బాతి దనిజ్ ఎలాగ మర్జి వెహెజ్ ఇజి ఎస్తివలెబా నెస్తిదెర్. 7 నజీ జగ్గిజిని విజా సజతిజ్, తుకికు మిజి వెహెజ్. వాండ్రు నాను ప్రేమ కిజిని ఒరెన్ తంబెరి. నమ్మకమ్దాన్ దేవుణు సేవ పణి కిజినికాన్. నా వెట జత కూడెజి ప్రబుజ్ సేవ కిజినికాన్. వాండ్రు నా వందిజ్ మిజి వెహెజ్. 8 మజి జగ్గినికెజ్ మీరు నెస్తి వందిజ్ నెగ్గి మాట వెప్పి మిజి దయరం కితిన్ని వందిజ్ నాను వన్నిజ్ మీ డగ్రు ఫాక్సిన్. 9 ఒనెసిము వన్ని వెట మీ డగ్రు వాజినాన్. వీండ్రు నమ్మిదెజ్ తగ్గికాన్. మాపు ప్రేమిన్ని ఒరెన్ తంబెరి. మీ పట్టుమ్దికాన్. ఇబ్బె జగ్గినికెజ్ విజా వీరు మిజి వెహెజ్.

10 నా వెట జెలిదు మని అరిస్తర్కు మిజి వెన్బాతి లెకెండ వెప్పినాన్. బర్బెజ్ బణిజ ఆతి మార్కుబా మిజి వెన్బాతి లెకెండ వెప్పినాన్. (విని వందిజ్ ముజాలె మీరు వెహె ఆతి మనిదెర్. అందెజె వాండ్రు మీ డగ్రు వాతిజ డగ్రు కిదు) 11 యుస్తు ఇని యేసుబా మిజి వెన్బాతి లెకెండ వెప్పినాన్. నమ్మిత్తి యూదుర్జ లొఇ నా వెట కూడెజి పణి కిజినికార్ వీరు మువెరె. దేవుణు ఏలుబడి: వందిజ్ వెహెజ్ వారు పణి కిజినార్. వారు నజీ గొప్ప తోడు: ఆత మనార్. 12 క్రీస్తుయేసుజ్ సేవ కిజిని, మీ లొఇ ఒరెన్ ఆతి ఎవప్రా మిజి వెన్బాతి లెకెండ వెప్పినాన్. వాండ్రు ఎస్తివలెబా మీ వందిజ్ డిస్ఎండ డటం పార్దనం కిజినాన్. మీరు అనుమానమ్కు సిల్లెండ నమకమ్దు పూర్తి పిరీని వందిజ్, దేవుణు ఇష్టం కినికెజ్ విజా మీరు పూర్తి నెస్తి వందిజ్ వాండ్రు డటం పార్దనం కిజినాన్. 13 ఎందనిజ్ ఇహిజ, వాండ్రు మీ వందిజ్, లవొదికియ పట్టుమ్ది నమ్మిత్తి పరి వందిజ్ ఇయరపాలి పట్టుమ్ది నమ్మిత్తి పరి వందిజ్ వాండ్రు నండొ కస్ట బాడిజినాన్. యాక నిజం ఇజి నాను వెహెజ్ అట్టు. 14 మాపు ప్రేమ కిజిని లూక డాక్టరుని దెమా మిజి వెన్బాతి లెకెండ వెప్పినార్. 15 లవొదికియ పట్టుమ్దు మని కూలెజ్, నుమ్పాకుజ్, వన్ని ఇండ్రొ కూడెజి వాజిని దేవుణు సజమ్దిజ్ నాను వెన్బాతి లెకెండ వెహెజ్.

16 మీ లొఇ యా ఉత్రం డటం సద్విజి వెనుక లవొదికియ పట్టుమ్దు మని దేవుణు సజమ్దుబా యాక సద్విదెజ్. అయాలెకెండ లవొదికియ పట్టుమ్దు మని దేవుణు సజమ్దిజ్ నాను రాస్తి ఉత్రం, వారు మిజి ఫాక్సార్. అయాక మీరుబా డటం సద్విదెజ్.

17 అర్కిపుజ్ వెహెజ్, 'ప్రబు వెట సీను కూడితి మనికి. నిజి ఏర్పాటు కితి పణి పూర్తి కిదెజ్ సుడెడెజ్ వలె', ఇజి. 18 పవులు ఇని నాను మిజి వెన్బాతి లెకెండ వెప్పిన. నా సాంత కీదానె ఆకర్తి యా మాటెజ్ రాసిన. నాను జెలిదు మన ఇజి ఫాస్మాట్. దేవుణు దయాదర్మం మీ మున్ను మనిద్.

మార్కు

నెల్ల కిబిసినిక

ఇక్కడ అపొస్తలుడు ఆతి పవులు దెసలోనిక పట్నమ్దు మని దేవుణు సజమ్ది వరిజ్ రాస్తి మొదోహి ఉత్తం. పవులు కొరింతు పట్నమ్దు మహివలె బాణిజ్ యా ఉత్తం రస్తాపాస్తాన్ ఇజి నండొండార్ ఒడేబిజినార్. తిమోతి, సిల ఇనికార్ యా ఉత్తం ఒత్త సిత్తార్ ఇజి నండొండార్ ఒడేబిజినార్. పవులుని వన్ని వెట సువార్త పణి కినికార్ కూడేబి దెసలోనిక పట్నమ్దు సాన్ని సువార్త సాటిసి దేవుణు సజం మొదోల్స్త మనాద్. (అపొస్తరు కిత్తి పణిజ్ 17:1-9). యూదురు మీటిజ్ కిని ఇల్కాజ్ వాండ్రు సువార్త సాటిస్టెజ్ మొదోల్స్తాన్. బక్తి మనికార్ ఆతి యూదురు ఆఇకార్బా నండొండార్ బాన్ కూడ్డి వాజి దేవుణుదిజ్ పాగ్డిజి మాడిసి మహార్. అందెజె దెసలోనిక పట్నమ్దు మని సెగొండార్ యూదురుని యూదురు ఆఇకార్, పవులు సాటిస్తిమని సువార్త నమ్మితార్. యూదురిజ్ ఇంక యూదురు ఆఇకార్ నండొండార్ సువార్త నమ్మితార్. ఇంజుముంజు మూండ్రీ వారమ్కు బాన్ మహండ్రీ వాండ్రు బాణిజ్ సోత సాహాన్. కొత్తాన్ దేవుణుదిజ్ నమ్మితి వరిజ్ హిమ్సెజ్ కినికార్లెసు ఇజి వరిజ్ దయరం వెహెజ్ ఇజి బాన్ తిమోతిజ్ పాస్తాన్. మరి వెనుక దేవుణు సజమ్ది వరిజ్ దయరం వెహెజ్ ఇజి, మరి దేవుణుదిజ్ నమ్మితికార్ దేవుణుదిజ్ తియాలాజి ఎలాగ బత్తిదెజ్, మరి బండెజ్ ఆవిండ, మహికార్ గవరం సీనిలెకెండ్ర్ ఎలాగ బత్తిదెజ్ ఇజి నెస్సిస్టెజ్ ఇజి యా ఉత్తం వరిజ్ రాస్తాన్. నండొండార్ యేసుప్రబు మర్జివాని దన్ని వందిజ్ అనుమానమాతార్. దన్ని వందిజ్ వరిజ్ నెస్సిస్టెజ్ ఇజి యా ఉత్తం రాస్తాన్. యేసుప్రబు మర్జివాని వందిజ్ విజా అద్యయమ్కు రాస్త మనాద్.

- 1 బుబ్బాతి దేవుణుదిజ్ దేవుణుదిజ్ని, ప్రబు ఆతి యేసుక్రీస్తుజ్ సెందితి మన్ని, తెస్సలోనిక పట్నమ్దు మని దేవుణు సజమ్ది వరిజ్, పవులుని సీలువాను తిమోతి ఇనికార్ రాసిని ఉత్తం. దేవుణు దయాదర్శమ్దాన్ మీరు నిపాతిదాన్ మండ్రెజ్ నయం కిపిన్.

తెస్సలోనికాది వరి నమకం వందిజ్ దేవుణుదిజ్ సమదనమ్కు!

2 ఎస్తివలెబా మా పార్లనమ్దు మిజి ఎత్తు కిజి, మీరు విజిదెరె వందిజ్ మాపు దేవుణుదిజ్ వందనమ్కు వెహినావ్. 3 మిజి దేవుణు ముస్సు మని నమ్మకమ్దాన్ మీరు కితి పణిజ వందిజ్, మహి వరి వందిజ్ ప్రేమదాన్ మీరు కష్టబాడేబిని దన్ని వందిజ్, ప్రబు ఆతి యేసు క్రీస్తు ముస్సు మని ఆసదాన్ ఎద్దు సుడేబి డిన్విండ ఓరిసిని ఓర్పు వందిజ్ మాపు ఎస్తివలెబా మా బుబాతి దేవుణు ముందాల ఎత్తు కిజి మంజినావ్.

4 తంబెరిజాండె, దేవుణు మిజి ప్రేమిస్తాండ్రె ఎర్లిస్త మనాన్ ఇజి మాపు నెస్సావ్. 5 ఎండనిజ్ ఇహిజ, మాపు మిజి వెహి సువార్త, వహి మాటెజాణిజ్నే ఆవిండ, దేవుణు సత్తుదాన్, దేవుణు ఆత్మదాన్ మరి మా మన్నుదు పూర్తి నమ్మకమ్దాన్ మిజి నెస్సిస్తావ్. మీ వందిజ్ మాపు మీ వెట కూడేబి ఎలాగ బత్తితావ్ ఇజి మీరు నెసినిదెర్. 6 గొప్ప పెరి కష్టమ్దు మీరు ప్రబుజ్ని మజి పోలిసి నడితిదెర్. గొప్ప పెరి కష్టమ్కు మిజి వాతె. గాని దేవుణు ఆత్మ మిజి సీతి సర్దదాన్ మీరు యా సువార్తదిజ్ డగ్రు కితిదెర్. 7 అందెజె అయాలెకెండ్ర్ నమ్మిత్తికిదెర్ ఎలాగ మండ్రెజ్ ఇజి నెస్సెజ్ మానిదోణియని అకాయ ఇని ప్రాంతమ్కాజ్ నమ్మిత్తి వరిజ్ విజేరిజ్ మీరు ఉండ్రీ గుర్తు లెకెండ్ర్ ఆతిదెర్. 8 మాసిదోణియని అకాయ ప్రాంతమ్కాజ్నే ఆవిండ దేవుణు సువార్త మీ బాణిజ్ విజాబాన్ సాటె ఆతాద్. అక్కాదె ఆవిండ దేవుణు ముస్సు మిజి మని నమకం విజేరె నెస్సార్. అందెజె దని వందిజ్మాపు ఇనికబా వెహెజ్ అకర్ సిల్లెద్.

9-10 ఎండనిజ్ ఇహిజ మీరు ఎలాగ మిజి డగ్రు కితిదెర్ ఇజి వారె వెహినావ్. బొమ్మెజ మాడిస్సిక డిసిసిజి బత్తిజిని నిజమాతి దేవుణుదిజ్ పాగ్డిజి మాడిస్టెజ్ మీరు ఎలాగ దేవుణు దరోటు మహిదెర్ ఇజి వారె వెహినావ్. బత్తిజిని నిజమాతి దేవుణుదిజ్ నమ్మిజిని వందిజ్, దేవుణు బాణిజ్ వాని కోవమ్దాన్ మజి తప్పిసినికాన్ నాతి, సాతివరి బాణిజ్ దేవుణు నిక్తిమని వన్ని మరిన్ ఆతి యేసు, దేవుణు పరలోకమ్దాన్ డిగ్జి వానాన్లె ఇజి వన్ని వందిజ్ ఆసదాన్ ఎద్దు సుడేబి మంజినిదెర్.

దెసలోనిక పట్నమ్దు పవులు కితి సువార్త పణి

- 2 తంబెరిజాండె, మాపు మీ డగ్రు వాతిక పణిదిజ్ రెవిండ ఆవితాద్, ఇజి మీరె నెసినిదెర్. 2 ముజాల పిలిపియా పట్నమ్దు మజి ఎసా కష్టమ్కు వాతె, మరి ఎసానో సిగు కిత్తార్ ఇజి మీరు నెసినిదెర్. గాని గొప్ప గటిదాన్ అడ్డుజ్ వాతిజ్బాగాని దేవుణు మజి సీతి దయరమ్దాన్ సువార్త మాపు మిజి వెహెజ్ ఇజి మీరు నెసినిదెర్. 3 మా మన్నుదు ఇనికాదో సెఇ ఉదేసమ్దానో, మజి ఇనికాదో లాబం దోహోకెజ్ ఇజినో, మిజి మోసెం కిదెజ్ ఇజినో మాపు యా సువార్త మిజి వెహెజ్ ఇజి. 4 గాని అక్కాదె ఆవిండ మాపు తగ్గికావ్ ఇజి దేవుణు మజి సుడేబి సువార్త వెహెజ్ ఇజి ఒవజెప్పి వందిజ్ మాపు వర్గిజినావ్. అందెజె మాపు లోకురిజ్ సర్ద కిబిసికార్ ఆవిండ, మా మన్నుజ వరిక్కు కిజిని దేవుణుదిజ్నే సర్ద కిబిసికార్ ఆదెజ్ ఇజి సుడేబిజినావ్. 5 మాపు మిజి వెహెకెబా పాజేబిని మాటెజ్ ఆఉ ఇజి మీరు నెసినిదెర్. మరి మజి డబ్బు వందిజ్ నండ్ర్ ఆస మనాద్ ఇజి మీరు నెన్విండ, మీ బాణిజ్ ఇనికబా గణెస్టెజ్ ఇజి మాపు ఇనికబా డాప్పి వర్గివితావ్ ఇనిదన్నిజ్ దేవుణునె సాక్కి. 6 లోకుర్ మజి పాగ్డిదెజ్ ఇజి మాపు కోర్వితావ్. మీరు గాని మహికార్ ఎయెర్బాగాని మజి పాగ్డిదెజ్ ఇజి మాపు కోర్వితావ్. మాపు క్రీస్తు వందిజ్ అపొస్తరు ఆతికావ్ ఇజి మీబాణిజ్ లొసె ఆదెజ్ అక్కు మన్నికావ్.

7 గాని అయాలెకండే కిండి, ఉండ్రీ అయేసి దని కొడోరిజ్ ఎలాగ సుడోజినాదో, అయాలెకండేనె మాపు మీ నడిమి తగె ఆత మహాన్. 8 మీరు మజీ నండో ఇష్టం ఆతికిదెర్. అందెజే మాపు గొప్ప సర్దాదాన్ మీ వెట దేవుణు సువార్త వెప్పికదె అవండ, మరి మీ వందిజ్ మా బత్సుదాన్ ఇనిక కిదెజ్ అట్నూపా అక్కెజ్ కిదెజ్బా తయార్ ఆత మహాన్. ఎందనిజ్ ఇహిజ మీరు మజీ నసా డగ్రుహికిదెర్ ఆతిదెర్. 9 తంబెరిజాండె, మీ నడిమి సువార్త వెప్పి మహివలె, మాపు మీ ముస్సు ఆదారం అవండ, రెయు పాగోల్ కష్టబాడ్డి పణి కిజి మహాన్. మాపు కష్టబాడ్డి పణికితిక మరి మా కష్టమ్మకు విజా మీరు తవ్వండ ఎత్తు కిజి మంజినిదెర్ ఇజి మాపు నెసినాన్.

10 దేవుణుదిజ్ నమ్మిత్తికిదెర్ ఆతి మీ నడిమి, మాపు ఎసా బక్తిదాన్, నీతి నిజాయితిదాన్, నిందెజ్ సిల్లెండె ఎలాగ బత్సుతాప్ ఇని దనిజ్ మిరె సాక్సి, దేవుణుబా సాక్సి. 11-12 ఎందనిజ్ ఇహిజ. వన్ని గొప్ప జాయ్దుని, వన్ని ఏలుబడిదు మండ్రెజ్ ఇజి మిజి కూక్తి మని దేవుణుదిజ్ తగితి లెకండే మీరు బత్సుదెజ్ ఇజి మిజి ఒరెన్ అప్పాసి వన్ని కొడోర్ వెట ఎలాగ వెప్పి నెగ్గి సర్దు నడిపిసినండ్రో, అయ లెకండే మీ లోఇ ప్రతి ఒరెన్ వన్నిజ్ ఉసార్ కిజి, దయరం వెప్పి, బతిమాలజి మాపు మీ వెట మహాన్ ఇజిబా మీరు నెస్సిదెర్.

13 మాపు దేవుణుదిజ్ ఎస్తివలెబా డిన్వండ వందనమ్మకు కిజినె మంజినాన్. ఎందనిజ్ ఇహిజ మా బాణిజ్ మీరు వెహి మని దేవుణు మాట, అక్క లోకుర్ బాణిజ్ వాతి మాట లెకండే అవండ, అక నిజం మని లెకండేనె, దేవుణు బాణిజ్ వాతి దేవుణు మాట లెకండే మీరు డగ్రు కితిదెర్. అందెజే దేవుణుదిజ్ నమ్మిత్తికిదెర్ ఆతి మీ మన్నుదు అక్క నెగ్గి పణి కిజినాన్. 14 తంబెరిజాండె మీరు యూదయ దేనమ్మదు మని క్రీస్తు యేసుజ్ నమ్మిత్తి మని దేవుణు సజమ్కాణి వరిజ్ పాలిని నడిసినెదెర్. ఎందనిజ్ ఇహిజ, వారు వరి సాంత లోకుర్ ఆతి యూదురు బాణిజ్ స్రమెజ్ ఒరిస్తి మహి లెకండే మీరుబా మీ సాంత లోకుర్ బాణిజ్ స్రమెజ్ ఒరిస్తిదెర్. 15 యూదురు ఆతికార్ ప్రబు ఆతి యేసుజ్ దేవుణు ప్రవర్తరుజ సవార్. వారు మజిబా డిన్వండ హిమ్మెజ్ కిత్తార్. యూదురు ఆకార్ సువార్త వీంజి దేవుణు వరిజ్ రక్సిస్సెజ్ అవద్ ఇజి మాపు వరి వెట వర్గివండ మజి అడు కిజి దేవుణుదిజ్ పడిఃఇ పణిజ్ కిజి వారు లోకుర్ విజెరిజ్ పగాతికార్ ఆజినార్. 16 యా లెకండే వారు వరి పావమ్మకు ముస్సు మరి కుడుప్పి పూర్తి కిజినార్. అందెజే కడివేరిదు దేవుణు కోవం వరి ముస్సు మనాన్.

తెస్సలొనికది వరిజ్ సుడోదెజ్ వపులుజ్ మని గొప్ప ఆస

17 తంబెరిజాండె, మాపు సెగం కాలం మీ బాణిజ్ దూరం ఆతి మనిజ్ (మా ఒడోల్నె దూరం ఆతాద్ గాని మా మన్ను దూరం అవితాద్) మరీజి మీ డగ్రు వాజి మిజి సుడోదెజ్ ఇజి నండో ఆస ఆజి నండో పణి కిత్తాన్. 18 నిజమె, మీ డగ్రు వాదెజ్ ఇజి గొప్ప ఆస ఆతాప్ గాని సయ్తాను దనిజ్ అడ్డు కిత్తాన్. వపులు ఇని నాను మరి మీ డగ్రు వాదెజ్ ఇజి సుడోత. 19 మాపు ఎయెర్ వందిజ్ దేవుణు ఎద్రు ఆసదాన్ ఎద్రు సుడోజినాన్? మజి సర్ద కిబిస్సికార్ ఎయెర్? సిల్లిజి ఎస్తివలెబా మాపు యేసుక్రీస్తు ఎద్రు పాగిడిజి, మజి గొప్ప సర్ద కల్సిని ఉండ్రీ బోసి లెకండే మనికార్ ఎయెర్? మా ప్రబు ఆతి యేసు క్రీస్తు వాని వలె వన్ని ఎద్రు మంజిని మీరెగదె?. 20 నిజమె మీరె మజి నెగ్గి పేరు తపిసినెకిదెర్. మజి సర్ద కిబిసినెకిదెర్ మీరె.

3 మిజి సుడోదెజ్ ఇజి మజి మని ఆస బరిస్సెజ్ అట్వండాతిజ్, మాపు ఏదెస్సు ఇని పట్టుమ్మదు మంజినిక నెగ్గిక ఇజి ఒడిబిజినె, 2 యేసుక్రీస్తు ముస్సు. మీరు ఇడ్డి నమకమ్మదు కద్దివండ మిజి దయరం వెప్పి, సత్తు మని వరి లెకండే ముజాల నడిపిస్సెజ్ ఇజి యేసుక్రీస్తు వందిజ్ సువార్త సాట్సిజ్ మా వెట కూడ్డి దేవుణు పణి కినికానాతి మా తంబెరి ఆతి తిమోతిజ్, మీ డగ్రు పాక్తాప్. 3 అందెజే మీ లోఇ ఎయెన్బా యా కష్టమ్కాజ్ సుడోజి వెనుక సాన్వండ, యేసుక్రీస్తు ముస్సు మని నమకమ్మదు గటిజ నిల్పి మండ్రెజ్ వలె. ఎందనిజ్ ఇహిజ మాటు యాకెజ్ ఒరిస్సెజ్ వలె ఇజి మీరు నెసినెదెర్. 4 నిజమె, మాపు మీ వెట మహివలెనె మజి హిమ్మెజ్ వానె ఇజి మిజి వెప్పి మహాన్. యాకెజ్ మాపు వెహితి లెకండేనె జగ్గెత్ ఇజి మీరు నెసినెదెర్. 5 ఎలాగబా సయ్తాను సెఇ పణిజ్ కిదెజ్ ఇజి మీ మన్నుదు ఆస పుటిసి, మీ నడిమి మాపు కితి పణిజ్ విజా ఉండ్రీ వేల పణిదిజ్ రెవండ కిత్తాను ఇజి నాను తియెలాత. అందెజే దన్ని వందిజ్ ఎత్తు కిజి, యాక ఒరిస్సెజ్ అట్వండ మీ నమకం వందిజ్ నెస్సెజ్ ఇజి నాను తిమోతిజ్ పాక్త.

తిమోతి తతి నెగ్గి కల్లు

6 గాని తిమోతి మీ బాణిజ్ ఏలె మా డగ్రు వాతాన్. మిజి దేవుణు ముస్సు మని నమకం వందిజ్, మీ ప్రేమ వందిజ్ నెగ్గి కల్లు తతాన్. మాపు మిజి సుడోదెజ్ ఆస ఆజిని లెకండే, మీరుబా మజి సుడోదెజ్ ఆస ఆజినిదెర్ ఇజి వాండ్రు వెప్తాన్. మరి మా వందిజ్ ఎస్తివలెబా సర్దాదాన్ ఎత్తు కిజినెదెర్గె. 7 అందెజే తంబెరిజాండె, మాపు మజి వాతి దుకమ్దాన్ మహివలె, మజి హిమ్మెజ్ వాతివలె మీ నమకం వందిజ్ విహపె ఉసార్ కిబె ఆతాప్. 8 మీరు ప్రబు ముస్సు మని నమకమ్మదు గటిజ నిల్పి మంజినిదెర్, అందెజే దేవుణు ముస్సు మిజి మని నమకం మా బత్సు లెకండేనె మజి విలువాతిక ఆజినాన్. 9 దేవుణు ముందాల మీ వందిజ్ మన్ని విజా సర్ద వందిజ్ దేవుణుదిజ్ వందనమ్మకు ఎసా వెప్తాజె సరి ఆనాద్? ఎసా మాపు వెప్తాజ్బా అక్క తక్కునె మంజినె. 10 మాపు మిజి మరి ఉండ్రీ సుటు సుడోజి దేవుణు ముస్సు మని మీ నమకమ్మదు మిజి తకు మనిక పూర్తి కిదెజ్ ఇజి ఉండ్రీ సుటు అవ్కాసం దోహక్తికెజ్ ఇజి రెయు పాకల్ దేవుణు వెట పార్దనమ్మదు నండో బతిమాలిజినాన్.

11 మా బుబ్బాతి దేవుణుని మా ప్రబువాతి యేసు మీ డగ్రు వాదెజ్, మజి ఇని అడ్డు సిల్లెండె సరి తొరిసినె. 12 మాపు మిజి ప్రేమిసినె లెకండే మీరు ఒరెన్ మరి ఒరెన్ వెట ప్రేమిస్సెజ్, మరి మీ లోఇ మని ప్రేమ నండో అజి పాగిజిని లెకండే ప్రబు మిజి సాయం కిపిన్.

13 మా ప్రబువాతి యేసు వన్ని నీతి నిజాయితి మని వరి వెట వాని వలె, మా బుబ్బాతి దేవుణు ఎద్రు మీరు ఇని కరయి సిల్లెండె, నీతి నిజాయితిదాన్ మండ్రెజ్, మీ మన్నుదు దేవుణు మిజి సత్తు సిపిన్.

దేవుణుడి ఇష్టమాతి లెకెండ్ బత్సాని వందిజ్

4 తంబెరిజాండె, దేవుణుడి ఇష్టం ఆతివజ ఎలాగ బత్సాని ఇజి మాపు మిజి నెస్సిస్త మనావ్. మీరు అయాలెకెండ్ కిజినిదెర్. గాని అక్కర్దిజ్, మాపు మిజి యేసుప్రబు పేరుదాన్ గటిజ సారిసి సారిసి వెప్పొనిక ఇనిక ఇహిజ మీరు అయ లెకెండ్ మరి ఒదె నెగెన్ కిజి మండ్రు. 2 యేసుప్రబు బాణిజ్ మిజి దొహ్కొత్తి అతికారమ్దాన్ మాపు మిజి నెస్సిస్తెకె ఇనికెజ్ ఇజి మీరు నెసినిదెర్.

3 మీరు దేవుణు వందిజ్ ఒప్పజెప్పి వన్ని వందిజ్ కేట అతికార్ ఆజి మండ్రెజ్ ఇజినె దేవుణు ఇష్టమాజినాన్. మీరు రంకు బూలానిక ఆవిద్ ఇజినె దేవుణు కోరిజినాన్. 4 అక్కాదె ఆవిండ దేవుణు మీ ఒడొల్దిజ్ మని ఆసదిజ్ సరి సిపిండ, ఒరెన్ సాంత ఒడొల్దిజ్ ఇని పావమ్దిజ్ సాన్పిండ ఎలాగ తగితి లెకెండ్ దేవుణుడి ఇష్టమాతి వజ అడిదెజ్ ఇజి మీరు ఒరెన్ ఒరెన్ నెస్తిజ్ వలె. 5 మీరు, దేవుణుడి నెస్ ఇ, దేవుణుడి నమ్మి ఇ పరిలెకెండ్, ఉత్పుత్ ఆజి మండ్రెజ్ ఆవిద్. 6 ఎయెన్బా, ఉత్పుత్ ఆజి, వన్ని వెట మన్ని నమ్మిత్తికానాతి ఒరెన్ తంబెరి ఆల్ని వెట, కూడజి మంజి, వన్నిజ్ మొసెం కిడెజ్ ఆవిద్. యా లెకెండ్ కిని పరిజ్ దేవుణు సిక్కి సీనాన్. దిన్ని వందిజ్ మాపు ముజాల మీ వెట కసితం వెప్పొ మహావ్. 7 ఎందనిజ్ ఇహిజ. రంకు బూలాజి బత్సాని ఇజి దేవుణు మిజి కూక్తెజ్ సిల్లెన్, గాని పావం సిలి నెగ్గి బత్సు బత్సాని ఇజినె కూక్త మనాన్. 8 అందెజె యా బోదదిజ్ నెక్కి పాక్కికాన్, లోకుదిజ్ నెక్కి పాక్పన్ గాని దేవుణు ఆత్మదిజ్ మిజి సీజిని దేవుణుడి నెక్కి పాక్కికాన్ ఆజినాన్.

9 తంబెరిజా నడిమి, ఒరెన్ వన్నిజ్ మరి ఒరెన్ వన్ని వెట మన్ని ప్రేమ ఎలాగ మండ్రెజ్ ఇజి, మాపు మిజి ఏలు రాస్తిజ్ అవ్సరం సిల్లెద్. ఒరెన్ మరి ఒరెన్ వన్నిజ్ ఎలాగ ప్రేమిసి మండ్రెజ్ ఇజి దేవుణునె మిజి నెస్సిస్త మనాన్. 10 నిజమె మాసిదొనియ ప్రాంతమ్దు మనిక తంబెరిజా విజెరిజ్ మీరు ప్రేమిసినిదెర్. గాని మీరు మరి ఒదె ప్రేమిసి మండ్రెజ్ ఇజి మాపు సారిసి సారిసి వెప్పొనావ్. 11 మాపు ముజాలెలె మిజి ఆడ్ర సిత్తిమహి లెకెండ్ సార్దిదాన్ బత్సాని ఆస ఆజి మండ్రు. మరి మీ కిరాణిజ్ మీ వందిజ్ పణి కిజి మండ్రు మహిపరి నజతిజ లొఇ బుర డుఃత్పిండ, మీ పణిజ్ సుడెజి మండ్రు. 12 నస్తివలె మీ బత్సు సడెజి నమ్మిఇకార్ మిజి గన్రం సీనార్. మరి మీరు, మహి పరి ముస్సు ఇనిదని వందిజెబా ఆదారం ఆవిండ మంజినిదెర్.

ప్రబు మర్జి వాని వందిజ్

13 తంబెరిజాండె, దేవుణు ముస్సు నమకం ఇట్టి సాతిపరిజ్ ఇనికా జగ్గినాద్లె ఇజి మీరునెసి మండ్రెజ్ ఇజి మాపు కోరిజినావ్. ఎందనిజ్ ఇహిజ దేవుణు ఎద్రు ఇని ఆస సిలి నమ్మి ఇ పరి లెకెండ్ మీరు దుకం ఆవిండ మండ్రెజ్ వలె ఇజి మాపు కోరిజినావ్. 14 యేసుప్రబు సాతండ్రె మర్జి నిజెతాన్ ఇజి మాటు నమ్మిజినాట్. అయలెకెండ్నె యేసుప్రబు ముస్సు నమ్మకం ఇడెజి సాతిపరిజెబా దేవుణు యేసు వెట కూక్త తనాన్. 15 అందెజె ప్రబు ఆతి యేసు వెప్పొ మని మాట అసి మాపు మిజి దయరమ్దాన్ వెప్పొనిక ఇనిక ఇహిజ, ఏలు బత్సాని మాటు, యేసు ప్రబు మర్జి వాని రోజా బత్సాని మహిజెబా, ప్రబు ముస్సు నమకం ఇడెజి సాతి పరిజ్ ఇంక ముజాల వన్ని డగ్రు సాండ్రెజ్ అట్పిట్. వారి ముజాల సానార్లె. 16 ప్రబువాతి యేసుక్రీస్తు వన్ని గొప్ప పెరి జాటుదాన్ ఆడ్ర సీజి, విజా దాతారి ముస్సు నెయ్యి ఆతి దూత జాటుదాన్, దేవుణుది గొప్ప పెరి జోడుఃబంగం ఊక్కి జాటుదాన్ పరలోకమ్దాన్ డిగ్గి వానివలె, యేసుప్రబు ముస్సు నమకం ఇడెజి సాతికార్ ముజాల నిజనార్లె. 17 నస్తివలె బూమి ముస్సు బత్సాని మాటు యేసుప్రబుజ్ దసుల్ ఆదెజ్ ఆకాసమ్దు మని మొసాపుదు పరివెట పెరి ఆనాట్లె. అయాలెకెండ్ మాటు ప్రబు వెట ఎలాకాలం మంజినాట్లె. 18 అందెజె మీరు యా మాటెజాణిజ్ ఒరెన్ మరి ఒరెన్ వన్ని వెట దయరం వెప్పొ మండ్రు.

5 తంబెరిజాండె, ఎస్తివలె అక్కెజ్ విజా జగ్గినాద్లె ఇజి, ఆ గడియ వందిజెనొ, ఆకెజ్ ఎలాగ జగ్గినె ఇని వందిజెనొ మాపు మిజి రాస్తిజ్ అవ్సరం సిల్లెద్. 2 ఎందనిజ్ ఇహిజ, ఎయెర్బా ఒడెబింండ మనివలె రెయ్యి, డొజ కిడెజ్ డొజారి ఎలాగ వానాండ్రె, అయాలెకెండ్నె ప్రబు వాని దినంబా మంజినాద్ ఇజి మీరు బాగ నెసినిదెర్. 3 "నమదనమ్దాన్ మనావ్, మిజి ఇని తియెల్ సిల్లె", ఇజి లోకుర్ వర్గిజి మంజిని వలెనె, పాటాదు మన్ని బోదెలిదిజ్ ఎలాగ ఏరు ఈబాని నొప్పొ వానాదొ, అయాలెకెండ్నె వెటనె నాసనం పరి ముస్సు వానాద్లె. అందెజె ఎయెర్బా తప్పె ఆదెజ్ అట్పిట్.

4 తంబెరిజాండె, ఇనికబా ఒడెబింండ మనివలె, ఒరెన్ డొజారి లెకెండ్ అయాలెకెండ్ మీ ముస్సు వాతిజెబా మీరు బమ్మ ఆఇదెర్. ఎందనిజ్ ఇహిజ, మీరు దిని వందిజ్ నెస్పిండ సీకటిదు బత్సాని కిడెర్ ఆఇదెర్. 5 మీరు విజెరె జాయ్దు పుట్టి నని పరి లెకెండ్ మనిదెర్, వెడెదిజ్ పుట్టి నని పరి లెకెండ్ మన్నిదెర్. మాటు రెయ్యదిజ్ పుట్టి నని పరి లెకెండ్ ఆవిట్. 6 అందెజె మాటు మహి పరి లెకెండ్ నిద్ర కిజి మన్పిండ మా మన్నుదిజ్ అడిజి తెలిదాన్ మంజినాట్. 7 నిద్ర కినికార్ రెయ్య నిద్ర కిజినార్. ఉణిజి సాస్సికార్ రెయ్యి సాసి మంజినార్. 8 మాటు వేలెదిజ్ పుట్టి నని పరి లెకెండ్ మనికాట్. అందెజె మాటు మా మన్నుదిజ్ అడ్డిజి, దేవుణు ముస్సు మని నమకమ్ని ప్రేమ, మిజి గుండెదిజ్ అడు కిని ఉండ్రె ఇనుము సాక లెకెండ్ తొడుఃగినాట్. మరి దేవుణు మిజి రక్తిస్నాన్లె ఇజి వన్ని వందిజ్ ఆసదాన్ ఎద్రు సుడెజి మంజినిక, మిజి బురాదిజ్ అడు కిని ఇనుము తొలి లెకెండ్ తొడిఃగిజి మంజినాట్. 9 ఎందనిజ్ ఇహిజ, మా ప్రబువాతి యేసుక్రీస్తు మిజి రక్తిస్నెజ్ ఇజినె దేవుణు మిజి ఏర్పాటు కిత్తాన్. గాని వన్ని బాణిజ్ వాని సిక్కి వందిజ్ అవిద్. 10 మాటు బత్సాని మహిజెబా, సాతి మహిజెబా, వాండ్రు మర్జి వానివలె వన్నివెట మిజి బత్సానిజెనె యేసుక్రీస్తు మా వందిజ్ సాతాన్. 11 అందెజె మీరు ఏలు కిజిని లెకెండ్నె ఒరెన్ మరి ఒరెన్ వన్ని వెట దయరం వెప్పొ, ఒరెన్ వన్నిజ్ దేవుణు ముస్సు మని నమ్మకమ్దు పిరిని లెకెండ్ సాయం కిజి మండ్రు.

12 తంబెరిజాండె, యేసుప్రబు బాణిజ్ మన్ని అతికారమ్దాన్ మిజి నెస్సిసి, బుది వెప్పొ, మీ నడిమి కష్టబాడిజి దేవుణు పణి కిని పరిజ్ గన్రం సీదు ఇజి మిజి బతిమాలెజినావ్. 13 వారు కిజిని పణి వందిజ్ పరిజ్ నండొ ప్రేమిసి గన్రం సీజి మండ్రు. ఒరెన్ మరి ఒరెన్ వన్ని వెట నిసాతిదాన్ బత్సాని మండ్రు.

14 తంబెరిజాండె, మాపు మిజి వెప్పొనిక ఇనిక ఇహిజ, బదకమ్దాన్ మని పరిజ్ మీరు బుద్ది వెప్పొ. విసారం అస్తి మనిపరిజ్ దయరం వెప్పొ మండ్రు. దేవుణు ముస్సు మని నమకమ్దు పిరిదెజ్ అట్ ఇ పరిజ్ సాయం కిజి మండ్రు. విజెరె వెట ఓరిసి మండ్రు. 15 ఎయెన్బా వన్ని వెట మరి ఒరెన్ కితి సెఇ పణిదిజ్ మర్జి సెఇ పణిజ్ కిపిండ సుడెదు. ఎస్తివలెబా ఒరెన్ మరి ఒరెన్ వన్ని వెట కనికారమ్దాన్ మండ్రు. లోకుర్ విజెరె వెటబా కనికారమ్దాన్ మండ్రు.

16 ఎస్తివలెబా సర్దదాన్ మంఠ్రు. 17 డిన్ ఏండ పార్దనం కిజి మంఠ్రు. 18 ఎలాగ మర్తి సమయమ్ దుబా విజా దనిజ్ దేవుణుదిజ్ వందనమ్ కు వెప్పా మంఠ్రు. యేసుక్రీస్తుజ్ నమ్మిత్తి మని మీరు యాలెకెండ్ మండ్రెజ్ ఇజినె దేవుణు కొరిజినాన్.

19 మీ లొఇ మని దేవుణు ఆత్మదిజ్ నప్పాట్. 20 దేవుణు బాణిజ్ వాతి దేవుణు ప్రవక్తరు వెప్పి మాటెజ నెక్కి పాక్కాట్. 21 విజా వనకాజ్ వరిన కిజి నెగ్గి దనిజ్ డగ్గు కిదు. 22 సెఇ విజా వన్కాజ్ దూరం కిదు.

23 నిపాతిదిజ్ ప్రబువాతి దేవుణునె మిజి పూర్తి నెగ్గికార్ కిపిన్. మా ప్రబువాతి యేసుక్రీస్తు వానిదాక వన్ని ఎద్దు మీ దేవుణు ఆత్మాని, మీ పాణం, ఒడొల్ విజా ఇని నిందెజ్ సిల్లెండ దేవుణు కాపాడ్జి మసీన్ ఇజి నాను పార్దనం కిజిన. 24 మిజి కూక్తి మని దేవుణు నమ్మకమాతికాన్. అందెజె వాంఠ్రు వెప్పి లెకెండ్ నె కినాన్.

25 తంబెరిజాండె, మా వందిజ్ పార్దనం కిదు. 26 పూర్తి నెగ్గి మన్నుదాన్ పాంపిజి ముద్దు కిజి తంబెరిజ్ విజెరిజ్ వందనమ్ కు వెప్పల. 27 తంబెరిజ్ విజెరిజ్ యా ఉత్తం సద్పిజి వెన్పెన్జె ఇజి ప్రబువాతి యేసుక్రీస్తు పేరుదాన్ మిజి బతిమాలిజిన. 28 మా ప్రబువాతి యేసుక్రీస్తు దయాదర్పం మీ వెట మసీద్.

మార్కు

నెల్వ కిబిసినిక

ఇక్క అపాస్తుడు అతి పవులు దెసలోనిక పట్నమ్దు మహి దేవుణు సజమ్ది వరిజ్ రాస్తి మన్ని రుండి ఉత్తం. సీలాని తిమోతి ఇనికార్ దెసలోనిక పట్నమ్దు సాన్ని, అపాస్తుడు అతి పవులు రాస్తి ఉత్తం సీజి మర్రి వాత్తి వెనుక యా ఉత్తం రాసె ఆత మనాద్ ఇజి ఒడేబిజినార్.

యా ఉత్తమ్దు మొదోహి ఉత్తమ్దు మన్ని దన్నిజ్ సమానమాతి మాటెజ్ మన్నె. (ఉండ్రి దెస్సలోనిక నెల్వ కిబిసినిక సుడేదు). రుండి ఉత్తమ్కాజ్, వాండ్రు కిత్తి సువార్త పణిదాన్ తయారాతి మన్ని సజమ్కాజ్ వన్ని మన్నుదు మన్ని బాద, పవులు తోరిసినాన్. తప్పు బోదదిజ్, అబద్దం నెస్సిసిని వరిజ్ లోజిజి మన్వండ, గటిజ నిల్పి మండ్రు ఇజి పవులు వరిజ్ ఎత్తు కిబిసినిన్.

యేసుప్రబు మర్రి వాని వందిజ్ యా ఉత్తమ్దు రాస్త మనాద్. (రుండి దెస్సలోనిక 1:9-10; 2:1-3). యేసుప్రబు సెలవాదు సాజి, మర్రి నిజీతి వెనుక ఇంజా ముంజా 17-20 పంటెజ్ డాట్టి వెనుక పవులు ఇక్క రాస్తాన్ ఇజి విజెరె ఒడేబిజినార్ దేవుణు మున్ను నమ్మకం ఇట్టి వరిజ్ వాని కాలమ్దు ఇనిక ఆనాద్ ఇజి నెస్సిస్టెజ్, మరి వారు నమకం డిన్వండ గటిజ నిల్పిమండ్రెజ్ ఇజి యా ఉత్తం రాస్తాన్.

1 బుబ్బాతి దేవుణుదిజ్ని ప్రబు అతి యేసు క్రీస్తుజ్ సెందితి మని దెసలోనిక పట్నమ్ది దేవుణు సజమ్దిజ్ పవులుని సెలవానుని తిమోతి రాసిని ఉత్తం.

2 బుబ్బాతి దేవుణుని ప్రబు అతి యేసుక్రీస్తు, దయాదర్మమ్దాన్ మీరు నిపాతిదాన్ మండ్రెజ్ సాయం కిపిర్.

3 తంబెరిజాండె, మాపు ఎస్తివలెబా మీ వందిజ్ దేవుణుదిజ్ వందనమ్కు వెస్సినె మండ్రెజ్ వలె. అయ లెకండె వెస్సినెక, కిదెజ్ మన్ని సరి అతి సజతిసె.

ఎందనిజ్ ఇహిజ దేవుణు మున్ను మని మీ నమకం మరి నండో ఆజి పిరిసినాద్. ఒరెన్ వన్నిజ్ మరి ఒరెన్ వన్ని వెట మని ప్రేమ మీరు విజెరె లోఇ మరి నండో ఆజినాద్. 4 అందెజి మీరు, డిన్వండ హెమ్మెజ్ ఒరిసిని వందిజ్, స్రమెజ్ ఒరిసి మహిజబా దేవుణు మున్ను మని నమకమ్దు మీరు ఎలాగ గటిజ నిల్పి మంజినిదెర్ ఇజి మహి దేవుణు సజమ్కాజ్ మీ వందిజ్ మాపు పాగ్డిజి వెహ్సినాప్.

5 సీతి నిజాయిదాన్ దేవుణు తీర్పు సిజినాన్ ఇని దనిజ్ యాకెజ్ విజా రుజాప్ ఆజినె. దేవుణు కిని ఏలుబడిదు మండ్రెజ్ మీరు తగ్గికిదెర్ ఆజినిదెర్. దని వందిజ్నె యా కప్టమ్కు విజా మీరు ఒరిసినిదెర్. 6⁸ మా ప్రబు అతి యేసు నేగ్డిజిని సిసు కొనెజాణిజ్ వన్ని గొప్ప సత్తుమని దూతెజ వెట పరలోకమ్దాన్ తోరె ఆనివలె, దేవుణుదిజ్ నెన్ఇ వరిజ్నె, మా ప్రబు అతి యేసు సువార్త మాటెజ్ లోజిఇ వరిజ్ సిక్స సీనాన్లె. దేవుణు సీతి నిజాయిమనికాన్. అందెజి నస్తివలె మిజి స్రమెజ్ కితి వరిజ్ స్రమెజ్ మరీజి సీనాన్లె. స్రమెజ్ ఒరిస్తిమని మిజిని, మజి రొంబిన్నాన్లె. 9 నస్తివలె యేసుప్రబు సెఇ వరిజ్ వన్ని ఎద్రుహాన్, వన్ని గొప్ప సత్తుదాన్, వారు వన్ని డగ్రు మన్వండ దూరం కిజి ఎలాకాలం మంజిని నాసనమ్దాన్ సిక్స సీనాన్లె. 10 అయా రోజా, వన్నిజ్ సెందితి వరివెట వన్ని గొప్ప జాయ్ తోరె ఆదెజ్, మరి వన్నిజ్ నమ్మిత్తికార్ విజెరె బమ్మ ఆని లెకండె వరి నడిమి ప్రబు వానివలె మాపు వెహ్సె మా సాస్యమ్కు నమ్మిత్తికిదెర్ అతి మీరుబా వరి వెట మంజినిదెర్లె. 11 యాకా మా మన్నుదు మంజి, మిజి వాండ్రు కూక్తి దనిజ్ తగ్గికిదెర్ లెకండె దేవుణు మిజి సుడేదెజ్ ఇజి, మరి మీ నెగ్గి ఉదెనమ్కు విజా, మరి మీరు వన్ని మున్ను ఇడ్డి మని నమ్మకమ్దాన్ కిజిని విజా పణిజ్ దేవుణు వన్ని సత్తుదాన్ పూర్తి కిదెజ్ ఇజి మాపు మీ, వందిజ్ ఎస్తివలెబా దేవుణుదిజ్ పార్దనం కిజినాప్. 12 మా దేవుణు బాణిజ్ని ప్రబు అతి యేసు క్రీస్తు బాణిజ్ వాతి దయా దర్మమ్దాన్ యేసు ప్రబు పేరు మీ నడిమి గొప్ప పెరిక ఆదెజ్, మరి మీరు వన్ని వెట కూడ్డి గొప్ప పేరు పాందితికిదెర్ ఇజి తోరె ఆదెజ్ ఇజి మాపు యా లెకండె మీ వందిజ్ దేవుణుదిజ్ పార్దనం కిజినాప్.

దేవుణుదిజ్ పడిఇకాన్

2 1-2 తంబెరిజాండె, మా ప్రబు అతి యేసు క్రీస్తు మర్రి వాని దినమ్ వందిజ్ని మాటు వన్ని వెట కూడ్డి మంజిని వందిజ్ ఏలు వెహ్సినాప్. ప్రబు అతి యేసు వాత మనాన్ ఇజి ఉండ్రి ప్రవక్త మాటదానో, మా బాణిజ్ వాతి లెకండె ఉండ్రి ఉత్తం వాతాద్ ఇజినో, కబ్బు వాతాదిజినో వెంజి గజిబిజి ఆజి మీ మన్ను సెద్రిన్వండ, తియెల్ అవండ మండ్రెజ్ ఇజి మాపు మిజి బతిమాల్లినాప్. 3 ఎయెర్బా ఇని పణి కిజి మిజి మోసెం కివండ జాగర్త మండ్రు. (అయ దినం ఏలు దాక రెవెదె). లోకుర్ నండోండార్ దేవుణుదిజ్ పడిఇ పణిజ్ కిజి టంటెజ్ ఆనార్లె. మరి దేవుణు రూలుజ విజా పడిఇ కిజిని నాసనమ్దిజ్ తగ్గికాన్ అతి సెఇకాన్ తోరె ఆనిదాక అయ రోజా రెవెద్. 4 దేవుణు ఇజి పేరు ఇడె అతి మని విజా వన్కాజ్, పూజెజ్ కిబె ఆజిని విజా వనకాజ్ పడివండ పణిజ్ కిజి, అయ విజా వన్కాజ్ మున్ను వన్నిజ్ వాండ్రి దేవుణు ఇజి వెహ్సెడ్రి, వాండ్రు దేవుణు గుడిదుబా సాన్ని బన్నాన్.

5 నాను మీ వెట మహివలె యా సజతిజ్ మీవెట వెహ్సె మహిక మీరు ఎత్తు కెఇదెరా? 6 వన్ని వందిజ్ ఏర్పాటు కితి మని గడియారునె వాండ్రు తోరె ఆదెజ్ వలె. అందెజె, ఏలు నాసనమ్దిజ్ తగ్గికాన్ అతి వన్నిజ్ అడ్డు కిజి నిలసెనిక ఇనికాద్ ఇజి మీరు నెస్సిదెర్. 7 దేవుణు విజా రూలుజ పడిఇ పణి కిజిని డాజితి మని సత్తు ఏలుబా పణి కిజినాద్. గాని దనిజ్ అడ్డు కిజి నిలసె మంజినికాన్ నడిమిహాన్ లాగె ఆనిదాక యా లెకండె అడ్డు కిజి మంజినాన్. 8 నస్తివలె దేవుణు రూలుజ పడిఇ పణిజ్ కినికాన్ తోరె ఆనాన్లె. వన్నిజ్ మా ప్రబు అతి యేసు వన్ని వెయుదాన్ వాని ఊప్తిదాన్ సప్ప, వాండ్రు వానివలె మంజిని గొప్ప జాయ్దాన్ వన్నిజ్ నాసనం కినాన్లె. 9-10 దేవుణు రూలుజ పడిఇ పణిజ్ కినికాన్ తోరె ఆనివలె సయ్యూన్ వన్ని సత్తుదాన్ రకరకమ్ది బమ్మ పణిజ్ని గొప్ప పెరి పణిజ్ కిజి,

నాననం ఆజి సాని వరిజ్ విజెరిజ్ మోసెం కిదెజ్ విజా సెఇ పణిజ్ కిజి తొరిస్తాన్. ఎండనిజ్ ఇహిజ నిజమాతి దనిజ్ ప్రేమిసి దేవుణు వరిజ్ రక్సిస్తెజ్ వారు ఒవ్ఎతార్. అందెజె వారు నాననం ఆజి సానినార్. ¹¹ అందెజె వారు అబదమ్దిజ్ నమ్మిని లెకెండ్ మోసెం కిని సత్తుదిజ్ దేవుణు వరి ముస్సు పోస్తాన్. ¹² అందెజె, నిజమాతి దనిజ్ నమ్మిండ్ సెఇదని వెట సర్ద ఆతి విజెరిజ్ దేవుణు సిక్కు సీనాన్.

గటిజ నిల్పి మండ్రు

¹³ గాని మీ వందిజ్ ఎస్తివలెబా దేవుణుదిజ్ మాపు వందనమ్కు వెస్సి మండ్రెజ్ వలె. యాక కిజి మంజినిక సరి ఆతి పణిసె. తంబెరిజాండ్ ఎండనిజ్ ఇహిజ దేవుణు ఆత్తు, వన్ని నెగ్గిక కిజిని పణిదాన్, మీరు నిజమాతి దనిజ్ నమ్మిజి దేవుణు మిజి రక్సిస్తెజ్ ఇజి, దేవుణు యా లోకం పుట్వండ్ ముజాలె మిజి ఎర్లిస్త మహాన్. ¹⁴ మీరు యా లెకెండ్ యేసుప్రబు వెట వన్ని గొప్ప పెరి జాయ్దు మండ్రెజ్ అక్కు మనికిదెర్ అదెజ్ ఇజి మాపు వెస్తి సువార్దాన్ దేవుణు మిజి కూక్కు మహాన్. ¹⁵ అందెజె తంబెరిజాండ్, మాపు మాటాదానో ఉత్తమ్దానో మిజి నెస్తితికెజ్ డిన్వండ్ మీ మన్నుదు ఇడ్డి కద్దిండ్ మండ్రు.

¹⁶⁻¹⁷ మజి ప్రేమిసి ఎలాకాలం ఎర్దు సుడఃజి మంజిని ఆసని, ఉసార్ మా మన్నుదు వన్ని దయాదర్మమ్దాన్ మజి సితీ మా బుబ్బాతి దేవుణుని, మా ప్రబు ఆతి యేసు క్రీస్తు మీ మన్నుజ దయరం వెస్సి, మీ విజా నెగ్గి మాటాదుని, మీరు కిజిని నెగ్గి పణిదు సత్తు సిజి నడిపిసీర్.

పార్దనం కిజి మండ్రు

3 కడఃవేరిది మాట ఇనిక ఇహిజ, తంబెరిజాండ్, ప్రబు మాటెజ్ మీ నడిఃమి సారితి లెకెండ్ మహిబాన్బా మరి బేగి సార్దెజ్, గవరం లోసె అదెజ్ ఇజి మీరు మా వందిజ్ పార్దనం కిజి మండ్రు. ² విజెరిజ్ నమకం సిల్లెద్గదె, అందెజె మాపు మూర్కతమ్దు మని వరి బాణిజ్ సెఇ వరి బాణిజ్ త్రి ఆనిలెకెండ్బా మా వందిజ్ పార్దనం కిదు. ³ అహిజ ప్రబు నమ్మిదెజ్ తగ్గికాన్ అందెజె వాండ్రు మిజి సత్తు సీజి సెఇ వన్ని బాణిజ్ వాండ్రు కాపాడ్తాన్. ⁴ ఇక్కెజ్ మీరు కిజి మండ్రెజ్ ఇజి మాపు మిజి ఆడ్ర సితీమనికెజ్ అయాలెకెండ్ మీరు కిజినిదెర్. మరి కిజి మంజినిదెర్లె ఇజి ప్రబు పేరుదాన్ మాపు మన్నుదు ఒడఃబిజినావ్. ⁵ దేవుణు ముస్సు మని ప్రేమని, మరి మీరు ఎలాగ కష్టమ్కు ఓరిస్తెజ్ ఇజి యేసుక్రీస్తు తొరిస్తి లెకెండ్ ఒరిస్తెజ్ మీ మన్నుదు రేపె ఆజి మండ్రెజ్ దేవుణు మిజి సాయం కిపిన్.

బండెజ్ అదెజ్ ఆవద్

⁶ తంబెరిజాండ్, మా బాణిజ్ మీరు నెస్తిమని లెకెండ్ ఆవండ్ బదకమ్దాన్ మంజిని వరిజ్ గుర్తు కిజి, వరి బాణిజ్ మీరు ఏడాః డిఃసి మండ్రు ఇజి మా ప్రబు ఆతి యేసుక్రీస్తు పేరుదాన్ మిజి ఆడ్ర సితీ లెకెండ్ వెస్సినావ్. ⁷ మజి సుడఃజి మా లెకెండ్ ఎలాగ నడిఃదెజ్ ఇజి మిరు నెస్సిదెర్ గదె. మాపు మీ వెట మహివలె బదకమ్దాన్ మన్వతావ్. ⁸ మావ్ఎయెర్ బాణిజ్బా సెడ్డిఃనె తిండి ఉణ్వతావ్. ఎయెన్ ముస్సుబా ఆదారం ఆవండ్ మాపు రెయు పాగల్ కష్టబాడఃజి పణి కిజి మహిక మీరు నెస్సిదెర్. ⁹ మీ బాన్ లోసి ఉండెజ్ అతికారం సిల్లెద్ ఇజి ఆవద్. గాని మీరు మజి సుడఃజి నెసె అయాలెకెండ్ మండ్రెజ్ ఇజినె మాపు అయాలెకెండ్ ఇనికబా లోసెండ్ పణి కిజి మహావ్. ¹⁰ మరి మాపు మీ నడిమి మహివలె "ఒరెన్ పణి కవండ్ మహిజ వాండ్రు బోజనం కిదెజ్ ఆవద్", ఇజి మిజి రూలు సిత్తావ్.

¹¹ మీ లోఇ సెగొండార్ వరి సాంత పణి ఇనికబా కివండ్, అనవునరమ్దిజ్ ఆఇవరి సజతిజ లోఇ బుర్ల డుక్కి మంజినార్ ఇజి మాపు వెహావ్. ¹² ననికార్ వారు కిజిని అవ్సరం సిల్లి పణిజ్ డిఃసి సిజి నిపాతి పణి కిజి, వరి తిండి వందిజ్ గణస్తెజ్ ఇజి మా ప్రబు ఆతి యేసుక్రీస్తు పేరుదాన్ బతిమాలజి ఆడ్ర సితీ లెకెండ్ వెస్సినావ్. ¹³ మరి తంబెరిజాండ్ మీరు నెగ్గికెజ్ అతికెజ్ కిదెజ్ ఎసెజ్బా వందిదెజ్ అవద్.

¹⁴ మాపు యా ఉత్తమ్దు రాస్తి షాక్తి మాటెజ్ లోజిఇ వన్నిజ్ గుర్తు కిదు. వాండ్రు సిగు ఆని వందిజ్ వన్ని వెట కూడఃవండ్ మండ్రు. ¹⁵ అహిజ వన్నిజ్ పగాతి వన్ని లెకెండ్ ఒడఃబిండ్ తంబెరి లెకెండ్ ఒడఃబిజి వన్నిజ్ బుది వెప్తు.

¹⁶ సమాదానమ్దిజ్ ప్రబు ఆతికాన్ ఎస్తివలెబె ఎలాగ మర్తి కాలమ్దుబా మిజి నిపాతిదాన్ మండ్రెజ్ సిపిన్. ప్రబు మీ విజెరి వెట ఎస్తివలెబా మనిన్. ¹⁷ పవులు ఇని నాను, నా కియుదాన్ యా కడఃవెరి మాటెజ్ రాసిన. నా విజా ఉత్తమ్దు యాకాదె గుర్తు. అందెజె నాను ఎలాగ రాసిన ఇజి మీరు పోలిస్తెజ్ అట్టిదెర్. ¹⁸ మా ప్రబు ఆతి యేసు క్రీస్తు దయా దర్మం మీ విజెరె వెట మనిద్.

మార్కు

నెల్ల కిబిసినిక

అపొస్తలుడు ఆతి పవులు తిమోతిజ్ రాస్తి ఉండ్రీ ఉత్తమనె యాక. ఎపెసి పట్నమదు మని దేవుణుదిజ్ నమ్మిత్తి వరి సజమదిజ్ నడిపిన్ని వన్ని లెకెండ్ తిమోతిజ్ ఏర్పాటు కిత మనాన్. అందెజె, సజం నడిపిన్నిక ఎలాగ, నడిపిన్ని పాస్టరుజు, పెద్దెల్లెజు ఎలాగ మండ్రెజ్ ఇని దనివందిజ్ వెప్పినాన్. ఎపెసి పట్నమదు నండొ రకమ్కాణి గుడిజ్ మన్నె. దేసమ్కాజ్ నండొ లోకుర్ బాన్ వానార్. అందెజె క్రీస్తు వందిజ్ నిజమాతి బోదదిజ్ కూడెఱకెజ్ నెన్పిన్నికార్ నండొడార్ మనార్. వరి వందిజ్ జాగ్రత మండ్రు. నని బోద తపిన్నివరిజ్ బాణిజ్ దూరం ఆదు ఇజి వెప్పినాన్.

1 ¹⁻² క్రీస్తు యేసుజ్ అపొస్తలుడు ఆతి పవులు ఇని నాను తిమోతిజ్ రాసిం. నీను నా సాంత మరిన్ లెకెండ్ మని. ఎందనిజ్ ఇహిజ నానె నిజి దేవుణు దరోట్ తత. మజి రక్కిసిని దేవుణు వెప్పి ఆడ్ర వజ, మాటు అసదాన్ ఎద్రు సుడెఱిని క్రీస్తు యేసు వెప్పి ఆడ్ర వజ, నాను క్రీస్తు యేసుజ్ అపొస్తలుడు ఆత. బుబ్బు ఆతి దేవుణుని ప్రబు ఆతి క్రీస్తుయేసు దయా దర్మమదాన్, మీ మున్ను కనికారం తోరిసి, మీరు నిపాతిదాన్ మండ్రెజ్ సాయం కిపిర్.

3-4 నాను మసిదోనియదు సాన్సి మహివలె నిజి వెప్పి లెకెండ్, నీను ఎపెసుదు మండ్రెజ్ వలె ఇజి నాను కనితం వెప్పిన. ఎందనిజ్ ఇహిజ, అబె సెగొండార్ తవు బోద నెన్పినినార్. వారు అయకెజ్ మరి ఎసెజ్బా నెన్పిన్తెజ్ ఆవద్ ఇజి నీను డటం వెప్పాజ్ వలె. వారు డొక్టార్ వెప్పి మంజిని కత సాన్తరమ్క లొఇ, అంతు సిల్లెండ అని గొగొర్ వందిజ్ వెప్పిని సాన్తరమ్క లొఇ మన్ను ఇడెఱెజ్ ఆవద్ ఇజి నీను డటం వెప్పాజ్ వలె. అయాకెజ్ దేవుణు ఎత్తు కితి సజతిజ అడ్డు కిజి ఒరెన్ వెట ఒరెన్ తర్కిసిని సజతిజ్నె రేజ్జెనె. దేవుణు మున్ను, మని నమకం దానె, వాండ్రు ఎత్తు కితి సజతిజ్ నెస్టెజ్ అనాద్. ⁵ నమ్మిత్తికార్, ఒరెన్ వెట ఒరెన్ ప్రేమిని మండ్రెజ్. అందెజె నీను యా లెకెండ్ డటం వెప్పాజ్ వలె ఇజి నాను నిజి వెప్పిన. నెగ్గి మన్నుదాన్ వాజిని ప్రేమదాన్, నెగెండ గదిసిని గరిబందాన్ వాజిని ప్రేమదాన్, దేవుణు మున్ను, మని నిజమాతి నమకమ్దాన్ వాజిని ప్రేమదాన్, ప్రేమిని మండ్రెజ్. ⁶ సెగొండార్, మున్ను వెప్పి సజతిజ్ డిస్ట సాహార పణిదిజ్ రెఇకెజ్ వరిజినార్. ⁷ వారు దేవుణు మోసెజ్ సీతి రూలుజ్ నెప్పినికార్ అదెజె కోరిజినార్. గాని ఇని దని వందిజ్ వరిజినార్ ఇజినో, నండొ దయరమ్దాన్ నిజమనె ఇజి వరిజిని సజతిజ వందిజ్నో, వారు నెన్పెర్.

⁸ దేవుణు మోసెజ్ సీతి రూలుజ్ వాడుకండెజ్ మని వజ వాడుకొటిజ, అయా రూలుజ్ నెగ్గెకెజ్నె ఇజి మాటు నెస్సాట్. ⁹⁻¹¹ మరి మాటు నెసినాట్, దేవుణు మోసెజ్ సీతి యా రూలుజ్, నాయమ్దాన్ మని వరిజ్ వరి తవుజ్ దిదిదెజ్ సిఎన్ ఇజి. గాని రూలుజ్ తప్పి వరిజ్, లొజ్ ఇ వరిజ్, నమ్మిత్తి వరిజ్, పాపిన్టిజ్, దేవుణు బాణిజ్ వాజిని సజతిజ్ ఇజి కణకదాన్ సూణి వరిజ్ మతమ్దిజ్ దూసిన్ని వరిజ్, అయిసి అప్పాసిరిజ్ సప్పి వరిజ్, లొకాజ్ సప్పి వరిజ్, రంకు బూలాని వరిజ్, మొకకొడెఱ: మొకకొడెఱెన్ కూడ్డి వరిజ్, వెట్టివణి కిదెజ్ లోకురిజ్ అని పార్ని వరిజ్, అబద్దం వర్గిని వరిజ్, అబద్దమ్దిజ్ ఒట్టు కిని వరిజ్, నిజమాతి బోదదిజ్ విరోదం ఆతికెజ్ కిని వరిజ్, నని వరి వందిజె రూలుజ్ సిత మనాన్. నీను మహి లోకురిజ్ వెహాల ఇజి, దేవుణు నజి ఒవజెప్పి సువార్తదు అయా నిజమాతి బోద మనాద్. లోకుర్ పాగిడిఱిని కిజిని గొప్ప పెరి దేవుణు బాణిజె అయా సువార్త వాజినాద్.

పవులు మున్ను దేవుణు తోరిన్ని కనికారం

12-13 ముజాల నాను యేసుప్రబు ఆతి యేసుక్రీస్తుజ్ దూసిన్నికాన్. నమ్మిత్తి వరిజ్ ఇమ్మెజ్ కిజి ఆహె వన్నిజ్ ఇమ్మెజ్ కితికాన్. వన్నిజ్ స్రమెజ్ కితికాన్. అహిజ్బా నాను నమ్మిదెజ్ తగ్గికాన్ ఇజి వాండ్రు ఒడిఱిజి, మహివరిజ్ సువార్త వెప్పిని వన్ని పణిదిజ్ నజి ఏర్పాటు కిత్తాన్. అందెజె నాను మా ప్రబు ఆతి క్రీస్తు యేసు నజి కితి దని వందిజ్ ఎసెజ్బా పోన్ఎండ మన. వాండ్రునె వన్ని పణి కిదెజ్ నజి సత్తు సితాన్. నాను యేసుజ్ నమ్మిఎండ మహివలె, తెలిఎండ అక్కెజ్ కిత. అందెజె దేవుణు నా మున్ను, కనికారం తోరిస్తాన్. ¹⁴ మా ప్రబు దయా దర్మమదాన్, వన్నిజ్ నమ్మిదెజ్, మహివరిజ్ ప్రేమిన్తెజ్ నజి సాయం కిత్తాన్. క్రీస్తుయేసు వెట మాటు కూడిఱి మని దని దటాన్, నమకమ్ని ప్రేమ నజి దోహొక్కె.

¹⁵ పాపం కిని వరిజ్ రక్కిన్తెజ్ క్రీస్తు యేసు లోకమ్దు వాతాన్ ఇని మాట నిజం ఆతిక. అయాక పూర్తి నమ్మిదెజ్ తగ్గిక. నాను కిత్తి పాపం నసా పాపం కినికార్ కివెర్. ¹⁶ గాని, నసా పాపం కితి నా మున్ను, దేవుణు కనికారం తోరిస్తాన్. ఎందనిజ్ ఇహిజ, వాని కాలమ్దు యేసు మున్ను, నమకం ఇడెఱి, ఎలాకాలం దేవుణు వెట బత్తిని బత్తు దోహొక్కె వరిజ్ నాను ఉండ్రీ గుర్తు లెకెండ్ అని వందిజ్, నసా పాపం కితి నజి, క్రీస్తుయేసు అంతు సిల్లెండ నండొ ఓరిస్తాన్. ¹⁷ ఎలాకాలం రాజా ఆతి, ఎసెజ్బా సాఇ, సుడెఱెజ్ అల్ ఇ ఒరెండ్రె దేవుణుజ్ ఎలాకాలం గవరం సీజి పాగిడిఱి మసిర్. ఆమెన్.

¹⁸ నా మరిన్ లెకెండ్ మని తిమోతి యాకదె నాను వెప్పిని బుద్ది 'నీను కిదెజ్ మని వన్యూ వందిజ్ ప్రవక్తరు ముజాలె వెప్పా మనార్ గదె. వారు వెప్పి వజనె నాను వెప్పిన. వారు వెప్పి మని వజ లొజిజి, తవు బోద నెన్పిన్ని వరిజ్ గటిజ ఎద్రిన్ల. ¹⁹ నా మున్ను, మని నీ నమకం డిస్ట. గర్బం గదిన్ఎండ నెగ్గెండ మన్ల. సెగొండార్, గర్బం గదిని వెప్పిని దనిజ్ నెక్క పాక్తారె వరి నమకం పాడు కిత్తార్. ²⁰ నని వరి లొఇ, హుమెనియ, అలకాండర్ ఇనికార్ మనార్. దేవుణుదిజ్ దూసిన్తెజ్ ఆవద్ ఇజి వారు నెప్పి వందిజ్, సయతాను కీదు నాను వరిజ్ ఒవజెప్ప మన.

సజమీదు పార్లనం కిని వందిజ్ వేప్పినాన్.

2 అందెజె మరి ముకెలం, లోకుర్ విజెరె వందిజ్, దేవుణుదిజ్ పార్లనం కిదెజ్. వరిజ్ కావాలిస్తెకెజ్ సిల ఇజి బతిమూల్జి లొస్తెజ్, వరి విజా వన్నా, వందిజ్ ఎస్తివలెబా పార్లనం కిదెజ్, వాండ్రు విజెరిజ్ కితి మేలు వందిజ్ వన్నిజ్ వందనమ్కు వొస్తెజ్ ఇజి నాను మిజి ఉసార్ కిబిన్ను. 2 యా లెకండ్ రాజార్ వందిజ్, అదికారమ్దు మని విజెరె వందిజ్ పార్లనం కిదెజ్. ఎందనిజ్ ఇహిజ, మాటు సాంతి సమాదనమ్దాన్ మహి వరి ఎద్రు నెగ్రెండ బత్తిదెజ్, దేవుణుదిజ్ తియెల్ ఆజి పూర్తి బక్సిదాన్ మండ్రెజ్. 3 యా లెకండ్ కినిక నెగెద్. మజి రక్సిన్నీ దేవుణుదిజ్ ఇష్టం ఆతిక. 4 ఎందనిజ్ ఇహిజ, లోకుర్ విజెరిజ్ ఎల్లకాలం మని సిక్కుదాన్ తప్పిస్తెజ్ ఇజి, లోకుర్ విజెరె క్రీస్తు వందిజ్ నిజమాతి మాటెజ్ నెస్తెజ్ ఇజి దేవుణు కోరిజినాన్. 5 దేవుణు ఒరెండ్రె. దేవుణు, లోకుర్ నడిమి ఒప్పిస్తెజ్ ఒరెండ్రె మనాన్. అయా ఒరెన్ క్రీస్తుయేసునె. 6 వాండ్రు లోకుర్ విజెరె పాపమ్కాజ్, ఎల్లకాలం మని సిక్కుదాన్ తప్పిస్తెజ్ వందిజ్ సాదెజ్ వన్నిజ్ వాండ్రె ఒవజెపె ఆతాన్. యాకదె, దేవుణు ఏర్పాటు కితి కాలమ్దు, లోకుర్ విజెరిజ్ రక్సిస్తెజ్ దేవుణు కోరిజిని దనిజ్ సాస్యం. 7 అందెజె, ఒరెన్ సాటిన్నీ వన్ని లెకండ్, అపాస్తుడు లెకండ్, నేర్పిన్నీ వన్ని లెకండ్, యూదురు ఆఇకార్ యేసు వందిజ్ నిజమాతి సజతిజ్ నెసి నమ్మిదెజ్, వరి వందిజ్ దేవుణు నజి ఏర్పాటు కిత్తాన్. ఈహు నజి ఏర్పాటు కిత్తాన్ ఇజి వెప్పినిక నిజమ్నె అబద్దం ఆవద్. 8 అందెజె, దేవుణుదిజ్ పార్లనం కిదెజ్ మీరు కూడెజి వానివలె ఎంబెబా మొకకొడొర్ పార్లనం కిదెజ్ ఇజి నాను కోరిజిన. వారు దేవుణు వందిజ్ కేట ఆతి బత్తు బత్తిదెజ్ వలె. వారు పార్లనం కినివలె, వరి మన్నుదు కోపం సిల్లెండ, ఎయెవెటబ జటిజ్ ఆవండ కిక్కు పెర్లి కిదెజ్. 9 అయాలెకండ్, దేవుణుదిజ్ పార్లనం కిదెజ్ మీరు కూడెజి వానివలె, బోదెకు నెగ్రెండ తయార్ ఆజి, వన్నాజ్ తగ్గి వజ తయార్ ఆజి వాదెజ్. అవికు సాకుజాణిజ్ మూల కనినో, బజారమ్నో, నండొ కరిదీది వూసెజ్నో నండొ కరిదీతి పాతెజ్నో పార్పాజి తయార్ ఆదెజ్ ఆవద్. 10 గాని దేవుణుదిజ్ నమ్మిజినికెజ్ ఇజి వెహె ఆని బోదెకు మహివరి వందిజ్ నెగ్గి పణిజ్ కిజి వన్నా సాకు తోర ఆదెజ్. 11 మొకకొడొర్ నెస్పిన్నీవలె, బోదెకు నెగ్రెండ వెంజి, జమ్న మంజి, వరిజ్ లొజిజి నెస్తెజ్. 12 మొక వరిజ్ నెస్పిన్నీజ్నో వరి మున్ను అతికారం కిదెజ్నో బోదెకాజ్ నాను నెల్వ సిఎ. అవికు జమ్న మండ్రెజ్. 13 ఎందనిజ్ ఇహిజ, దేవుణు అవ్వెజ్ ఆవద్, ఆదముజునె ముజాలె తయార్ కిత్తాన్. 14 సయ్తాను ఆదముజ్ ఆవద్, అవ్వెజ్నె మొసం కిత్తాన్. ఆహె అది పావమ్దు అర్తాద్. 15 గాని అవికు దేవుణు మున్ను మని నమకం డిసేవండ, మహి వరిజ్ ప్రేమిని, దేవుణుదిజ్ ఒవజెపె ఆతి లోకు వజ నెగ్రెండ బత్తిదెజ్. ఆహె బత్తిజి మహిజ, కొడొరిజ్ ఏరుఈబాని వలె దేవుణు బోదెకాజ్ రక్సిస్తాన్.

3 ఒరెన్ పాస్టురు ఆదెజ్ కోరిజినాన్ ఇహిజ, వాండ్రు నెగ్గి పణి కోరిజినాన్. యా మాట పూర్తి నమ్మిదెజ్ తగ్గిక. 2 పాస్టురు నింద సిలికాన్ ఆదెజ్ వలె. ఉండ్రె ఆల్పి మంజినికాన్, అణసె ఆజి మంజినికాన్ ఆదెజ్వలె. నెగ్గి బుది మంజినికాన్, వని పణిజాణిజ్ తగమాతికాన్ ఇజి తోరె ఆదెజ్ వలె. వాతి వరిజ్ నెగ్రెండ డగ్రు కినికాన్ ఆదెజ్ వలె. దేవుణు మాట నెగ్రెండ నెస్పిన్నీకాన్ ఆదెజ్ వలె. 3 వాండ్రు సోసేవండ, డెయేసె ఆవండ మంజినికాన్, సార్లిదాన్ మంజినికాన్, జటిజ్ ఆవండ మంజినికాన్ ఆదెజ్ వలె. వాండ్రు డబ్బుదిజ్ అన ఆఇకాన్ ఆదెజ్ వలె. 4 వాండ్రు వన్ని సాంత ఇండ్రెణి వరిజ్ నెగ్రెండ సూణికాన్ ఆదెజ్ వలె. వన్ని కొడొర్ ఎస్తివలెబా విజెరిజ్ గవరం సీజి, వన్ని మాటదిజ్ లొజిజిని వరి లెకండ్ వాండ్రు కిదెజ్. 5 ఎందనిజ్ ఇహిజ, సాంత ఇండ్రెణి వరిజ్ నెగ్రెండ సుడెడెజ్ నెస్ఇకాన్ ఇహిజ ఎలాగ దేవుణు సజం నడిపిస్తెజ్ అట్నాన్. 6 వాండ్రు కొత్తాజ్ నమ్మిత్తికాన్ ఆజి మండ్రెజ్ ఆవద్. ఎందనిజ్ ఇహిజ, కొత్తాజ్నె వన్నిజ్ యా పెరి పణిదిజ్ ఏర్పాటు ఆత ఇజి గర్ల ఆజి, సయ్తాన్ ఎలాగ దేవుణు తీర్పు ఆజి సిక్కుదు అర్త మనాండ్రె, అయె లెకండ్ వీండ్రు బా అర్నాన్. 7 మహికార్ వన్ని వందిజ్ సెఇకెజ్ వెహేవండ, సయ్తాన్ సికుదు అర్వెండ మంజిని వందిజ్ నమ్మిజి వరి ఎద్రు వల్కుబడి మనికాన్ ఆదెజ్వలె.

8 అయాలెకండ్, పెద్దెల్జు, విజెరె వన్నిజ్ గవరం సీదెజ్ తగ్గి వరి లెకండ్ మండ్రెజ్. వారు రుండి నాలికెజ్ మన్ఇకార్ ఆదెజ్ వలె. వారు సోసేవండ, డబ్బు వందిజ్ ఆసగొటు ఆవండ మంజినికార్ ఆదెజ్ వలె. 9 దేవుణు ఏలు తోరిసి నెస్పిన్నీ డాజితి మహి గొప్ప నిజమాతి సజతిజ్, వన్ని గర్లం వన్నిజ్ గదిసిని లెకండ్ ఆవండ నెగ్రెండ మంజినికాన్ ఆదెజ్. 10 పెద్దెల్జు ఇజి వరిజ్ ఏర్పాటు కిని ముజాల, వారు నెగ్రెండ మంజినారా, నమ్మకమ్దాన్ పణి కిజినారా ఇజి సుడుడెజ్. నింద సిలికార్ ఇజి వారు రుజాప్ కితిజ, వారు పెద్దెల్జు పణి కిదెజ్.

11 అయాలెకండ్, పెద్దెల్జు బోదెకు, మహికార్ వరిజ్ గవరం సీని వరి లెకండ్ మండ్రెజ్. అవికు సాండిజ్ వర్గివండ, సోసేవండ మండ్రెజ్ వలె. విజా దని లొఇబా మాపు నమ్మిదెజ్ తగ్గికెజ్ ఇజి తోరె ఆదెజ్ వలె. 12 పెద్దెలి ఉండ్రె ఆల్పి మంజినికాన్ ఆదెజ్ వలె. వన్ని కొడొరిజ్ వన్ని ఇండ్రెమని వరిజ్ నెగ్రెండ సుడెజి నడిపిస్తెజ్ ఆదెజ్ వలె. 13 నెగ్రెండి పణి కిని పెద్దెలి ఎయెన్ వన్నిజ్బా వల్కు బడి మనాద్. క్రీస్తు యేసు మున్ను మని వన్ని నమకం వందిజ్ వొస్తెజ్ వన్నిజ్ తియెల్ సిల్లెద్.

14 నీ డగ్రు బేగి వాదెజ్ ఇజి నాను అన ఆజిన. అహిజ్బా, నాను యా సజతిజ్ నిజి రాసిన. 15 ఎందనిజ్ ఇహిజ, నాను వాదెజ్ ఆల్సెం ఆతిజ, దేవుణు కుటుమ్దు ఒరెన్ ఒరెన్ ఎలాగ మండ్రెజ్ ఇజి నీను నెన్నెలె. బత్తిజిని దేవుణు సజమీదికార్ విజెరెనె దేవుణు కుటుమ్దికార్. ఉండ్రె నిల కొహి ఉండ్రె ఇల్లు అర్వెండ అన్ని లెకండ్ దేవుణు సజమీదికార్ దేవుణు వందిజ్ నిజమాతికెజ్ అస్సార్. అయాలెకండ్, ఉండ్రె పునాది లెకండ్ దేవుణు సజమీదికార్ దేవుణు వందిజ్ నిజమాతికెజ్ అస్సార్. 16 మాటు నమ్మిజిని మతమ్దు మని, యేసుక్రీస్తు వందిజ్ ముజాలె డాజితి మహికెజ్, గాని ఏలు దేవుణు తోరిసి నెస్పిన్నీ నిజమాతికెజ్ గొప్ప పెరిక ఇజి ఎయెర్బా ఒప్పకొణార్. క్రీస్తు లోకు వజ లోకమ్దు వాతాన్. దేవుణు ఆత్మ, వాండ్రు నీతి నిజాయితి మనికాన్ ఇజి రుజాప్ కిత్తాన్. దేవుణు దూతార్ వన్నిజ్ సుడెతార్. లోకుర్ వన్ని వందిజ్ యూదురు ఆఇ వరిజ్ వొస్తార్. లోకమ్దు ఎంబెబా, లోకుర్ వన్నిజ్ నమ్మితార్. పరలోకమ్దు దేవుణు వన్నిజ్ ఒత మనాన్.

తప్పుబోద నెస్పినికార్.

4 కడెవెరి దినమ్కాజ్ సెగొండార్, వారు నమ్మిత్తి నిజమాతి మాటెజ్ డిసి, అబద్దం వర్గిని దెయమ్కు వెట సానారె, అయా దెయమ్క బోద వినారె దనిజ్ లొజినార్ ఇజి దేవుణు ఆత్మ టెటెజ్ వెప్పినాన్. 2 అబద్దం వర్గిని వేసం కినికారె యా బోదెజ్ నెస్పినికార్. ఇనుముదాన్ సుహతిజ ఎలాగ మా తోలు సాతి

లెకెండ్ అనాదొ అయ లెకెండ్ వరి గర్బం గదిన్ఎండ సాత మనాద్. ³ పెండ్లి ఆనిక తవు ఇజి, సెగం రకమ్కాణి ఉణి తినికెజ్ తిండ్రెజ్ ఆవిద్ ఇజి వారు నెన్పిన్నార్. గాని దేవుణుడిజ్ నమ్మిత్తి, నిజమాతి మాటెజ్ నెస్తికార్, దేవుణుడిజ్ వందనమ్కు వెస్సి తిండ్రెజ్ ఇజిన దేవుణు అయాకెజ్ తయార్ కిత్తాన్. ⁴ ఎందనిజ్ ఇహిజ, దేవుణు తయార్ కితికెజ్ విజా నెగ్గకెజె. ఇనికబా నెక్కి పాక్కిక అవెద్. గాని దేవుణుడిజ్ వందనం వెస్సి అయాకెజ్ తిండ్రెజ్. ⁵ ఎందనిజ్ ఇహిజ, దేవుణు మాటదాన్, పార్లనదాన్ దేవుణు వందిజ్కేట ఆతికెజ్ ఆతె మన్నె.

⁶ నీను యా సజతిజ్, నీ సజమ్దు మని తంబెర్సిరిజ్ నెస్సిసి మహిజ, నీను క్రిస్తు యేసుజ్ నెగ్గి పణి మనిసి ఆని. దిని వెట, ఏలుదాక నీను నమ్మిజిని నీ నమకం వందిజ్ వెస్సిని మాటదాన్ నిజమాతి నెగ్గి బోదదాన్ నీను నమకమ్దు పిరితి ⁷ వర్గిదెజ్బా విలువ సిలి, డొక్టార్ వెస్సి మంజిని కత సాన్తరమ్కాణిజ్ నీను దూరం మన్ల. గాని దేవుణు వందిజ్ తియెల్ ఆజి బక్తిజి మండ్రెజ్ నీను ఒజ్జ ఆల. ⁸ ఒడొల్దిజ్ రూణు వాక్కి ఒజ్జ కితిజ నెగెద్. గాని దేవుణు వందిజ్ తియెల్ ఆజి బక్తితి మహిజ, విజా వన్కా లొఇ గొప్ప లాబం మంజినాద్. ఎందనిజ్ ఇహిజ, అయాలెకెండ్ మహిజ, ఏలుబా నెగ్గి బత్తు మంజినాద్, వాని కాలమ్దుబా నెగ్గి బత్తు మంజినాద్ ఇజి ఒట్టు కిజినాద్.

⁹ నాను ముస్సు వెస్తి సజతి నమ్మిదెజ్ తగ్గిక. పూర్తి నమ్మిదు. ¹⁰ బత్తిజిని దేవుణు ముస్సునె మా ఆస మాటు ఇట్టా మనాట్. అందెజె మాటు అయా నెగ్గి బత్తు వందిజ్ నండొ అరల ఆజి కష్టబడిజినాట్. వాండ్రె లోకుర్ విజెరిజ్ ముకెలం వన్ని ముస్సు నమకం ఇడ్డి వరిజ్ రక్కిన్నికాన్.

¹¹ నీను యా సజతిజ్ నీ సజమ్దు మని వరిజ్ నెన్పిసి, ఆహె కిదెజ్ ఇజి డటం వెహొల. ¹² నీను దజడః ఇజి, ఎయెర్బా నిజి ఇజి కణక సుడఃఎండ నీను నిజి సుడఃల. గాని నీను వర్గిని మాటదు, నడిని నడఃకదు, నీను ప్రేమిస్సి ప్రేమదు, దేవుణు ముస్సు మని నీ నమకమ్దు, ఇని పాపం సిలి నీ బత్తుదు, నమ్మిత్తి వరిజ్ ఉండ్రె గుర్తు లెకెండ్ నీను మన్ల. వారు నిజి సుడఃజి అయాలెకెండ్ మండ్రెజ్, నీను గుర్తు లెకెండ్ మన్ల. ¹³ నాను వానిదాక, నీను విజెరిజ్ దేవుణు మాట సద్విజి విన్పిసి, బోదినె, నెన్పిసి మన్ల. ¹⁴ సజం పెద్దెల్బు నీ ముస్సు కికు ఇట్టివలె, ప్రవక్తరు నీ వందిజ్ వర్గితి దని వెట, దేవుణు ఆత్మ నిజి సితి వరం డిఃనెండ, నీను అయాక కిల.

¹⁵ యా సజతిజ్ నీను జాగర్దదాన్ కిల. నీ మన్సు విజా, దిని ముస్సునె ఇడఃల. ఎందనిజ్ ఇహిజ, నీను నమకమ్దు పిరిజినిక లోకుర్ విజెరి టెటజ్ సుడఃదెజ్. అందెజె, నీ మన్సు విజా దని ముస్సునె ఇడఃల. ¹⁶ నీను కిజిని పణి నెగ్రెండ కిల. నీను నెస్సిసిని బోదదు తవు సిల్లెండ నెస్సిన్ల. నీను అయాకెజ్ డిఃనెండ కిజి మన్ల. ఎందనిజ్ ఇహిజ, నీను అయ లెకెండ్ కితిజ, ఎలాకాలం మని సావుదాన్ నిజి నీను తవు ఆనిలె. నీను వెస్సినికెజ్ వెని వరిజ్బా తప్పిన్లె.

5 ¹⁻² నీ సజమ్దు మని డొక్టెజ్ జటిజ్ ఆవిండ వన్నిజ్ బుబ్బు లెకెండ్ ఒడిబిజి, పణిని వెహొల. దజడాఃరిజ్ తంబెరిబు లెకెండ్ సుడఃల. డొక్రికాజ్ యాయెక్ లెకెండ్ సుడఃల. దజడిఃకాజ్ తవు ఆలోసనదాన్ సుడఃఎండ, తజెక్ లెకెండ్ సుడఃల. ³ దిక్కు సిల్లి రాండి బోదెకాజ్ గవరం సిల. ⁴ ఎంబెణి రాండి బోదెలదిజ్బా కొడొఃర్నో నాతిసిర్నో మహిజ, వీరు వరి సాంత ఇండ్రెణి వరిజ్ సుడఃదెజ్ వలె. సాంత ఇండ్రెణి వరిజ్ సూణికాదె దేవుణుడిజ్ సేవకిని వందిజ్ ముకెలమతిక ఇజి ముజాలె నెస్సెజ్ వలె. అయ లెకెండ్ అయేసి అప్పానిజ్, అని అమ్మెజ్ రుణం తీర్నినార్. ఎందనిజ్ ఇహిజ, అయాక దేవుణుడిజ్ ఇష్టం ఆతిక.

⁵ దిక్కు సిలి రాండి బోదెలి దేవుణు ముస్సునె వాండ్రు కావలిస్తికెజ్ విజా సీనాన్ ఇజి, దని ఆస ఇట్టా మనాద్. అది రెయు పాగాల్ పార్లనం కిజి, వన్ని సాయం లొసి మంజినాద్. ⁶ గాని ఉణిజి, తింజి సుకం వందిజ్ బత్తిజిని రాండి బోదెలి బత్తితిజ్బా ఆత్మియ బత్తు సాతి లెకెండ్ మనాద్. ⁷ మహికార్ ఎయెర్బా వరిజ్ దునలాడఃఎండ మంజిని వందిజ్, నీను సజమ్దు మని నమ్మిత్తి వరిజ్ యా సజతిజ్ ఆడ్ర సిల. ⁸ ఎయెన్బా వన్ని కుటుమ్ది వరిజ్, ముకెలం వన్ని సంత ఇండ్రెణి వరిజ్ సుడఃఎండ మహిజ, వన్ని నమకం డిఃస్తి లెకెండ్నె దేవుణు ఎద్దు మనాన్. వాండ్రు నమ్మిఇ వన్ని ఇంక నండొ సెఇకాన్.

⁹ ఉండ్రె రాండి బోదెలిదెజ్ అరువయ్ వంటెజ్ లావు మహిజనె, దనిజ్ రాండి బోదెక్ లెక్కాదు కూడుఃవ్ల. మరి, అది ఒరెన్ వన్నిజె పెంట్టి ఆతిమహికాద్ ఆదెజ్ వలె. ¹⁰ నెగ్గి పణిజ వందిజ్ నెగ్గికాద్ ఇజి పేరు అనుపె ఆతికాద్ ఆదెజ్. ఇహిజ, దని కొడొఃరిజ్ నెగ్రెండ పాస కితాదా, నెల్వ సిల్లి వరిజ్బా డగ్రు కిజి నెగ్రెండ సుడఃతదా, దేవుణుడిజ్ నమ్మిత్తి వరి పాదమ్కు నొర్జి మహదా, కష్టమ్దు మని వరిజ్ సాయం కిజి మహదా, విజా నెగ్గి పణిజ వందిజ్ దనిజ్ అదిని ఒవజెపె ఆజి మహదా, ఇజి సుడఃదెజ్. యా లెకెండ్ మని వన్కాజ్ లెక్కాదు కుడుఃవ్ల.

¹¹ దజడిః కాలమ్దు రాండి ఆతి బోదెకాజ్ లెక్కాదు కూడుఃబమ. ఎందనిజ్ ఇహిజ, సెగం కాలం వెన్కా అవికు మన్సు అస్సెజ్ అట్ఎండ పెండ్లి ఆనె. ఆహె క్రిస్తుజ్ డిఃస్సి. ¹² అయావలె, మరి పెండ్లి ఆవ ఇజి దేవుణు పణిని కిని ఇజి ముజాల కితి ఒట్టు తప్పినె. అందెజె, అవికు తప్ప ఇజి లోకుర్ బాణిజ్ వెహొ ఆనె. ¹³ మరి అవికు బదకం ఆజి ఇల్కు ఇల్కు బూలాదెజ్ ఒజ ఆనె. బదకమ్నె ఆవిండ సాండిబు వర్గిజి మహి వరి సజతిజ జోలి కినె. వర్గిదెజ్ ఆఇకెజ్ వర్గినె. ¹⁴ అందెజె, దజడిః కాలమ్దు రాండి ఆతి బోదెకు పెండ్లి ఆజి, కొడొఃర్ ఇడఃజి, ఇండ్రెణి పణి సుడఃజి మండ్రెజ్ ఇజి నాను కోరిజిన. ఆహె, సజమ్దిజ్ దూసిస్తిజ్ పడఃఇ వన్నిజ్ అన్వరం సీదెజ్ అవిద్ ఇజి నాను కోరిజిన. ¹⁵ దజడిః కాలమ్దు రాండి ఆతి సెగొండెక్ నమకం డిఃస్సెనె సయ్తాన్ వెట సాహె.

¹⁶ దేవుణుడిజ్ నమ్మిత్తి ఉండ్రె దని కుటుమ్దు రాండి బోదెక్ మహిజ, అది వన్కాజ్ సుడఃదెజ్ వలె. వెన్క బాజిత సజమ్దు ఒవజెప్తెజ్ అవిద్. ఎందనిజ్ ఇహిజ, దిక్కు సిలి రాండి బోదెకాజ్ సుడఃదెజ్ సజం ఆనాద్.

¹⁷ దేవుణు సజం ఏలుబడిః కిజిని పెద్దెల్బు, ముకెలం కష్టబడిజి దేవుణు మాట బోదినె నెస్సిసిని వరిజ్ వరి జీతమ్దిజ్ మరి నసానె కుడుఃప్పి లొసి ఆదెజ్ వారు తగ్గికార్. ¹⁸ ఎందనిజ్ ఇహిజ, “కలమ్దు మటిసిని డాఃసు మూతుదు కిమ తొహొమాట్ ఇజి, “పణికినికాన్ జీతమ్దిజ్ తగ్గికాన్, ఇజి దేవుణు మాటదు వెస్సినాద్.

¹⁹ ఒరెన్ పెద్దెలి ముస్సు మోప్పి నేరమ్దిజ్ రిఎర్ ముఎర్ సాసిరు మహిజనె అయాక నమ్మిదెజ్. ²⁰ మహికార్ తప్పుదిజ్ తియెల్ ఆజి మంజిని వందిజ్ పాపం కిజినె మంజిని పెద్దెలుజ వరి సజమ్దు మని విజెరి ఎద్దు డటం దిదిల.

²¹ ఇజ్జికాన్ పెరికాన్ ఇజి తేడ తొఎండ నాను ముస్సు వెస్తి సజతిజ్ నీను కిదెజ్ వలె ఇజి దేవుణు ఎద్దు, క్రిస్తుయేసు ఎద్దు, ఏర్పాటు ఆతి దేవుణు దూతార్ ఎద్దు నాను నిజి ఆడ్ర సీజిన.

²² గబి బిజి, ఎయెరి ముస్సుబా పెద్దెలి పణి వందిజ్ కిక్కు ఇడఃజి దీవిస్సు. మహి వరి పాపమ్కాజ్ వెట కూడఃజి మన్ల. విజా పాపమ్కాజ్ నీను దూరం మన్ల.

23 నీను ఉణిజినక అగ్గిని వందిజ్, డిస్ఎండ వాజిని జబ్బు వందిజ్ ఏరునె ఉణిఎండ, బుకెండ్ ద్రాక్కు కల్లుబ ఉణ్అ.

24 సెగొండార్ కిజిని పాపమ్కు విజెరె ఎద్దు తోర్జినె. వారు, తీర్పు తిర్స ఆదెజ్ సాని ముజాలె, తీర్పు సీనికార్ వరి సజతి నెసినార్. గాని మరి సెగొండార్ పాపమ్కు వెనుకనె తెలిసె.

25 అయాలెకెండ, సెగొండార్ కితి నెగ్గి పణి విజెరె ఎద్దు తోర్జినె. విజెరె ఎద్దు తోర్జిక ఎసెజ్బా డాజ్జి మండ్రెజ్ అట్ఉలె.

వెటివణి కినికార్ ఎలాగ మండ్రెజ్

6 దేవుణుదిజ్ నమ్మితి వెట్టిపణి కినికార్ విజెరె వరి ఏజమానురిజ్ సీని గవ్వరం విజా సీదెజ్. ఎందనిజ్ ఇహిజ, ఎయెర్బా దేవుణు పేరుదిజ్, యేసు వందిజ్ మాపు నెస్పిసిని మాటదిజ్ దూసిస్ఎండ మంజిని వందిజ్ వరిజ్ సీదెజ్ మన్ని గవ్వరం సీదెజ్.

2 వరి ఏజమానురు నమ్మిత్తికార్ ఇహిజ, వారు మా తంబెరిజునెగదె ఇజి తక్కు గవ్వరం సీదెజ్ అవద్. గాని వారు మరి ఒదె ఏజమానురు వందిజ్ పణికిదెజ్. ఎందనిజ్ ఇహిజ, వారు ప్రేమిసిని నమ్మిత్తి వరిజె వారు కిజిని పణిజాణిజ్ మేలు వాజినె. నీను యా సజతిజ్ నీ సజమ్దు మని వరిజ్ నెస్పిసి, డటం వెహ్రాజ్ వలె.

డబ్బు వందిజ్ ఆస ఆదెజ్ అవద్.

35 ఎయెన్బా యేసువుబు వందిజ్ ఆఇ బోదెజ్ నెస్పిసి, మా ప్రబు ఆతి యేసుక్రీస్తు వెహ్తి నిజమాతి బోదెజ ఒప్పుకొండెండ, దేవుణు బక్తిదాన్ కూడితి మని బోదెజ ఒప్పుకొడిఎండ మనికాన్ గర్దదాన్ నిండ్రిత మనాన్. వన్నిజ్ ఇనికబా తెలివద్. వన్నిజ్ అవ్వనరం మన్ని దన్నిజ్, అవ్వనరం సిల్లి దన్నిజ్ విజా వన్యా వందిజ్ తర్కిస్తెజ్ పెరి ఆస మనాద్. క్రీస్తు వెహ్తి మాటెజ అర్దం వందిజ్ జటిజ్ ఆనాన్. యా లెకెండ కినిక, గోస, జటిజ్, దుసలాడెనిక, సెఇ అనుమానమ్కు విజా పుటిస్సె. ఎస్తివలెబా గొడెబెజ్ పుటిస్సె. యా లెకెండ తర్కిస్సి వరి బుద్ది సెద్రిత మనాద్. వరి లోఇ నిజమాతి బోదె సిల్లెద్. క్రీస్తు మతం వందిజ్ వెహ్తి, ఆస్తి గణస్తెజ్ ఇజి వారు ఒడెబిజినార్.

6 దేవుణుదిజ్ ఇష్టం ఆతివజ బత్తిజి, దన్ని దటాజ్ సర్దె ఆజి, నజి యాకదె సాలు ఇజి ఎత్తు కిని వన్నిజ్ గొప్పు లాబం మనాద్ 7 ఎందనిజ్ ఇహిజ, మాటు పుట్టివలె ఇనికబా యా లోకమ్దు తెవతాట్. మాటు సానివలె యా లోకమ్దాన్ ఇనికబా ఒతెజ్ అట్ఎట్. 8 అందెజె, మజి ఉణిక మహిజ, పార్పాదెజ్ పాత పర మహిజ, అయాకదె మజి సాలు. 9 గాని ఆస్తి మన్నికానాదెజ్ కోరిజినికాన్ డబ్బు గణస్తెజ్ ఇని ఆసెజ సిక్కుదు అర్నాన్. బుద్ది సిలి పాడు కిని నండో ఆసెజ్ ఉరి లెకెండ ఆజి, అయాకెజ్ వన్నిజ్ పాడు కినె, నాసనం కినె. 10 ఎందనిజ్ ఇహిజ, ఉండ్రీ మొకదిజ్ వెల ఎలాగ మంజినాదో, అయ లెకెండ విజా సెఇ పణిదిజ్ డబ్బు ఆసనె వెల. సెగొండార్ డబ్బుదిజ్ ఆస ఆజి, వారు నమ్మిత్తి నిజమాతికెజ్ డిసి, వరి మన్ను కూడం గుత్తి సాహిజ ఎలాగ మంజినాద్, అయ లెకెండ వరిజ్ వారి నండో బాదెజ్ కల్లిస్సె.

11 గాని దేవుణు లోకు ఆతి నీను యా సెఇ ఆసెజాణిజ్ దూరం మన్ల. నీతి నిజయాకెణి నెగ్గికెజ్ కిజి దేవుణు బక్తిదు మన్ల. దేవుణుదిజె నమ్మిజి మహి వరిజ్ ప్రేమిసి, కష్టమ్కు ఓదిసి, సార్లిదాన్ మన్ల. 12 నీను యేసుక్రీస్తుజ్ నమ్మితిజ్ కష్టమ్కు వానె. వన్యాజ్ నీను గెలస్తెజ్ నీను నెగ్రెండ సుడెఱ. నీను అయాలెకెండ గెలస్తెజ, ఎలాకాలం బత్తిని బత్తు దోహ్కాద్. దిని వందిజె దేవుణు నిజి కూక్త మనాన్. 'నాను క్రీస్తుజ్ నమ్మిజిన', ఇజి నండో లోకుర్ ఎద్దు నీను ఒప్పుకోటివలె, నని బత్తు వందిజె దేవుణు నిజి కూక్తాన్. 13-14 విజా వన్యాజ్ పాణం సీజిని దేవుణు ఎద్దుని పాంతి పిలాతు ముజాలె వెన్బాతివలె, దయ్యరమ్దాన్ నెగ్రెండ ఒప్పుకోటి క్రీస్తుయేసు ఎద్దు నాను నిజి ఆడ్ర సీజిన. మా ప్రబు ఆతి యేసుక్రీస్తు వాని దినమ్దాక నీను పాపం సిల్లెండ, నిందెజ్ సిల్లెండ నాను నిజి వెహ్తి సజతిజ్ కిజి మన్ల ఇజి ఆడ్ర సీజిన. 15 దేవుణు ఏర్పాటు కితి సమయమ్దు యేసువుబుజ్ వాండ్రు రపిస్సాన్. గొప్పు పెరికాన్ ఆతి విజా వన్యా ముస్సు ఒరెండ్రె అతికారం మనికాండ్రె దేవుణు. వాండ్రు రాజారిజ్ ఇంక పెరి రాజా. ప్రబురిజ్ ఇంక పెరి ప్రబు. 16 వాండ్రు ఒరెండ్రె ఎసెజ్బా సాఇకాన్. డగ్రు సాండ్రెజ్ అట్ఇ నసా జాయ్దు బత్తిజినాన్. వన్నిజ్ ఎయెర్బా ఎసెజ్బా తోవర్. ఎయెర్బా ఎసెజ్బా సుడెఱెజ్ అట్ఎట్. వన్నిజె విజా గవ్వరమ్ని ఎలాకాలం అతికారం మనిద్, ఆమెన్.

17 యా లోకమ్దు ఆస్తి మనికార్, గర్త్ర ఆవండ, ఆస్తి ముస్సు ఆస ఆవండ మండ్రెజ్ ఇజి నీను డటం వెహ్ల. యా ఆస్తిదిజ్ నమ్మిదిజ్ అట్ఇక. గాని వరి ఆస దేవుణు ముస్సు ఇడెఱెజ్ ఇజి నీను వెహ్ల. సుకమ్దాన్ సర్దె ఆజి మండ్రెజ్ దేవుణునె తకు సిల్లెండ విజా సీనికాన్. 18 వారు మహి వరిజ్ నండో మేలు కిదెజ్, నండో నెగ్గి పణిజ్ కిదెజ్, నీను వారు ఆవండ, నండో సీబాజి సీనికార్ ఆదెజ్ ఇజి నీను వరిజ్ వెహ్ల. 19 అయాలెకెండ, వాని కాలమ్ది వరి బత్తు వందిజ్ వారు ఉండ్రీ నెగ్గి పునాది తయార్ కిజినార్. ఎందనిజ్ ఇహిజ, అయావలె వరిజ్ దేవుణు వెల ఎలాకాలం బత్తిని బత్తు దోహ్కాద్.

20 ఓ తిమోతి, దేవుణు నిజి ఒవజెప్తి సేవ పణి నీను నెగ్రెండ సుడెఱ. పణిదిజ్ రెఇ సెఇ మాటెజ వర్గిఎండ దూరం మన్ల. అర్దం సిల్లెండ తర్కిస్సి వన్యాజ్ దూరం మన్ల. దనిజె సెగొండార్ అబద్దమ్క గెణం ఇజి కూక్కినార్. 21 సెగొండార్, 'అయాక నజి మనాద్', ఇజి ఒప్పుకోటారె, యేసు వందిజ్ నిజమాతి సజతిజ్ డిస్సె సాహ్. దేవుణు దయా దర్ఠం మీ వెల మనీద్.

మార్కు

నెల్ల కిబిన్నక

అపాస్తుడు ఆతి పవులు ఎపెసి సజం నడిపిసిని తిమోతిజ్ రాస్తి రుండి ఉత్తమనె యాక. పవులు, సాదెజ్ కాలం డగు ఆతాద్ ఇజి నెస్తాండ్రె, సజమ్దిజ్ నెగ్రెండ్ నడిపిసి, నిజమాతి బోద వరిజ్ నెస్పిస్తెజ్ వలె ఇజి తిమోతిజ్ వెప్పినాన్.

1 ¹⁻² క్రీస్తుయేసు పాక్తి అపాస్తుడు ఆతి పవులు ఇని నాను, నా సాంత మరిన్ లెకెండ్ నాను ప్రీమిసిని తిమోతిజ్ రాసిన. దేవుణు ఎత్తు కితి వజనె నాను అపాస్తుడు ఆత. క్రీస్తుయేసు వెట మాటు కూడితి మన్ని దన్నితాన్ లోకుర్ ఎలాకాలం బత్మినార్ ఇజి దేవుణు కితి ఒట్టు వెస్తాజ్ నె నాను అపాస్తుడు ఆత. మా బుబ్బు ఆతి దేవుణుని ప్రబు ఆతి క్రీస్తుయేసు దయా దర్మమాదాన్ మీ ముక్కు కనికారం తోరిసి, నిపాతిదాన్ మండ్రెజ్ సాయం కిపిర్.

నమకమ్దాన్ మంజిని వందిజ్ దయరం వెప్పినాన్

3 రెయు పాకాల్ నాను పార్దనం కినివలె డిస్ఎండ నిజి ఒడిబిజి దేవుణుదిజ్ వందనమ్కు వెప్పిన. నా అనిగొగురు వన్నిజ్ పాగిడిజి మాడిస్తి లెకెండ్, నానుబా నా గర్బం నజి గదిస్ఎండ నెగ్రెండ్ వన్నిజ్ పాగిడిజి మాడిస్సిన. 4 నాను నిజి డిస్టానె వాజి మహిజ్, నీను అడబాతి. అయాక ఎత్తు కితానె నిజి సుండెదెజ్ ఇజి నండో ఆస ఆజిన. ఎందనిజ్ ఇహిజ, నజి సర్ద పూర్తి వానాద్. 5 నీను క్రీస్తుయేసుజ్ నిజం నమ్మిజిని. అయాక నాను ఎత్తు కిజిన. ముజాలె, నీ డొక్ర బిబి ఆతి లోయిని నీ యాయ యునికె, క్రీస్తుయేసుజ్ నమ్మితె మహి. అయ లెకెండ్ ఏలు నీనుబా నమ్మిజిని ఇజి నాను తమ్ఎండ నెసిన. 6 అందెజె నీను కిదెజ్ ఇజి దేవుణు నిజి సీతి, వరం నీను నెగ్రెండ్ నండో కిదెజ్ ఇజి నాను నిజి ఎత్తు కిబిసిన. నాను దేవుణు సేవ పణి వందిజ్ నీ ముస్సు కిక్కు ఇడిజి దివిస్తివలె, దేవుణు అయా వరం నిజి సీతాన్. 7 నీను కిదెజ్ ఇజి దేవుణు నిజి సీతి వరం నీను కితి. ఎందనిజ్ ఇహిజ, దేవుణు వన్ని ఆత్మ మజి సీత మనాన్. అయాక మజి తియెల్ పుటిసిని ఆత్మ ఆవిద్. గాని దేవుణు పణి కిదెజ్ సత్తు సీని, మహి వరిజ్ని దేవుణుదిజ్ ప్రీమిసిని, మాటు అణని ఆజి మండ్రెజ్ సాయం కిని ఆత్మనె సీత మనాన్.

8 అందెజె, మా ప్రబు వందిజ్ వెస్తాజ్ నీను సిగు ఆమ. వన్ని వందిజ్ వెస్తాజ్ జెలిదు ఆతి, నా వందిజ్బా సిగు ఆమ. గాని సువార్త వందిజ్ నా వెట కష్టమ్కు ఓరిస్ఎ. దేవుణు సత్తుదాన్ అయాక ఓరిస్ఎ. 9 దేవుణు మజి రక్సిస్తాండ్రె, వన్ని వందిజ్ కేట ఆతి బత్తు బత్మిదెజ్ ఇజి మజి కూక్తాన్. మాటు కితి పణిజాణిజ్ ఆపద్ గాని వన్ని సాంత ఎత్తుదాన్ వన్ని దయా దర్మమాదాన్ వాండ్రు మజి రక్సిస్తాండ్రె కూక్తాన్. లోకం పుట్ఎండ ముజాలె, క్రీస్తు యేసు కితి దనితాన్ యా దయా దర్మం దేవుణు మజి సీత మనాన్. 10 గాని మజి రక్సిస్తి క్రీస్తుయేసు లోకమ్దు వాతివలెనె అయాక ఏలు తొరె ఆతాద్. వాండ్రు సావుదిజ్ సిల్లెండ కితాండ్రె, సువార్త వెంజి నమ్మిని దనితాన్, సాఎండ దేవుణు వెట ఎలాకాలం బత్మిని బత్తు తొరిస్తాన్. 11 యా సువార్త వెప్పి వందిజె, ఒరెన్ సాటిస్తి వన్ని లెకెండ్, అపాస్తుడు లెకెండ్, నెస్పిస్తి వన్ని లెకెండ్ దేవుణు నజి ఏర్పాటు కిత్తాన్. 12 అందెజె నాను యా కష్టమ్కు ఓరిసిన. గాని నాను సిగు ఆవి. ఎందనిజ్ ఇహిజ, నాను నమ్మిత్తి వన్నిజ్ నాను నెన్న. వాండ్రు, తీర్పు కిదెజ్ వాని దినమ్దాక, నజి ఒపజెప్తి సువార్త కాపాడెదెజ్ వాండ్రు అట్టికాన్ ఇజి నాను నిజం నెన్న.

13 నిజమాతి మాటు నీను నా బాణిజ్ విహి లెకెండ్ నీను మహి వరిజ్ వెహి. క్రీస్తుయేసు వెట మని సమందమ్దాన్ మని నమకమ్దు ప్రీమాదు నీను మన్ఎ. 14 దేవుణు నిజి ఒపజెప్తి సువార్త ఎయెర్బా మారిస్ఎండ నీను సుండె. మా లొఇ మంజిని దేవుణు ఆత్మ సాయమ్దాన్ అయాక కాపాడె. 15 ఆసియ ప్రాంతమ్దు మన్ని నమ్మిత్తికార్ విజెరె నా బాణిజ్ దూరం ఆతార్ ఇజి నీను నెన్ని. పుగలు హెరెమును ఇనికార్ వరి లొఇ మనార్. 16 ఒనెసిపారు ఇండ్రెణి వరిజ్ ప్రబు కనికారం తోరిస్పెన్. ఎందనిజ్ ఇహిజ, వాండ్రు నజి నండో సుట్టు ఆదరిస్తాన్. నాను జేల్లిదు మహిజ్బా వాండ్రు నా వందిజ్ సిగు ఆతాన్. 17 గాని వాండ్రు రోమ పట్టమ్దు వాతివలె, నాను తోర్నిదాక నండో రెబాతాన్. 18 నాను ఎపెసుదు మహివలె, వాండ్రు నజి నెగ్రెండ్ సుండెజి, ఎసా సాయం కిత్తాన్ ఇజి నీను బాగ నెసిని. ప్రబు తీర్పు కిని దినమ్దు ప్రబు వన్నిజ్ కనికారం తోరిస్పెన్.

2 అందెజె నా మరిన్ లెకెండ్ మని నీను, క్రీస్తుయేసు దయా దర్మమాదాన్ సత్తు పాందిజి మన్ఎ. 2 నండో లోకుర్ ఎద్దు నాను వెప్పి నిజమాతి మాటెజ్ నీను వెహిమని. అయా మాటెజ్ నమ్మిదెజ్ తగ్గు వరిజ్ ఒపజెప్ఎ. వారు యా నిజమాతి మాటెజ్ మహివరిజ్ బాగ నెస్పిస్తెజ్బా అట్టికార్ ఆదెజ్. 3 ఒరెన్ నెగ్గి విద్దె కినికాన్ వన్ని కష్టమ్కు ఓరిసిని లెకెండ్ నీను క్రీస్తుయేసు వందిజ్ మా వెట కష్టమ్కు ఓరిసి మన్ఎ. 4 ఒరెన్ ఉద్దం కినికాన్, వన్ని బత్తు వందిజ్ మరి ఆఇ పణిజ సాన్ఎన్. ఎందనిజ్ ఇహిజ, సాహిజ వన్నిజ్ నయనమ్దు ఏర్పాటు కితి అతికారిజ్ సర్ద కిబిసెన్. అయా లెకెండ్ నీనుబా క్రీస్తు సేవ పణిదు మన్ఎ. 5 మరి అయాలెకెండ్, ఉహ్కాన్ పందెమ్దు ఒరెన్ ఉహ్కాన్ పందెమ్దు వెప్పి రూలు వజ ఉహ్కాండ్ మహిజ, వాండ్రు గెలెస్ఎన్. వన్నిజ్ ఇనాయం దొహ్కావిద్. అయా లెకెండ్ నీనుబా క్రీస్తు సేవ పణిదు మన్ఎ.

6 కష్టపడిజి పణి కిని ఒరెన్ రయ్దు వన్నిజ్, పండితి పంటది తొలి వంతు దొహ్కెజ్వలె. అయా లెకెండ్ నీనుబా క్రీస్తు సేవ పణిదు మన్ఎ. 7 నాను ముస్సు వెప్పి దన్ని వందిజ్ నీను మరి మరి ఆలోసనం కితి. ఎందనిజ్ ఇహిజ, నీను ఆలోసనం కితిజ, నీను నెస్తెజ్ మన్ని విజా వన్కాజ్ వాండ్రు అరదం కిబిన్నాన్.

8 ఎస్త్రీవలెబా క్రీస్తు యేసుజ్ ఒడెబిల. సావుదాన్ దేవుణు వన్నిజ్ బత్రిస్త మనాన్. దావీదు రాజు తెగ్గదు పుట్టి మనికాన్. యాకదె నాను లోకురిజ్ వెప్పిని సువార్త. 9 నాను యా సువార్త వెప్పినిజ్, నజీ బాదెజ్ వాజినె. తవుజ్ కితి ఒరన్ వన్నిజ్ తొప్పిలెకెండ, నాను తొహ ఆజిన. గాని దేవుణు మాట తొహ ఆతాద్. 10 అందెజె, దేవుణు ఏరీపాటు కితి వరి వందిజ్ నాను విజా కస్టమ్కు ఓరిసిన. క్రీస్తుయేసు వరిజ్బా రక్కిసి, దేవుణు గొప్ప జాయ్దు మంజిని బాడిడు వన్ని వెట ఎల్లకాలం వారుబా మంజిని వందిజ్, వరి వందిజ్ నాను కస్టమ్కు ఓరిసిన.

11 యా మాటెజ్ నమ్మిదెజ్ తగ్గిక మాటు వన్ని వెట సాతిజ వన్నివెట బత్రినాల్మరి. 12 మాటు మా కస్టమ్కు ఓరిస్తెజ వన్నివెట ఏలుబడి: కిసాల్మరి. వన్నిజ్ నెస్ఎ ఇహిజ వాండ్రుబా మజీ నెస్ఎ ఇనాన్. 13 మాటు నమ్మిదెజ్ తగ్గికాల్ ఇహిజ వాండ్రు ఎస్త్రీవలెబా నమ్మిదెజ్ తగ్గికాన్ ఆజి మంజినాన్. ఎందనిజ్ ఇహిజ వన్నిజ్ వాండ్రె తప్పెజ్ అట్ఎన్.

నమకమాతి నెగి పణిమణిసి

14 నాను ముస్సు వెప్పి సజతిజ్ లోకురిజ్ ఎత్తు కిబిసి మన్ల. ఇని ఇని మాటెజ వందిజ్ జటిజ్ ఆమాట్ ఇజి దేవుణు ఎద్దు వరిజ్ సరి దిదిల. అయాక పణిదిజ్ రెఇక. వెనివరి నమకం పాడు: కిజినాద్. 15 నెగ్గి పణి మనిసి ఇజి దేవుణు బాణిజ్ అనువె ఆదెజ్, నీను అయ లెకెండ మండ్రెజ్ బాగ సుడె:ల. కిని పణిజ వందిజ్ దేవుణు వెనబానివలె, సిగు ఆవండ మంజిని పణి మనిసి లెకెండ నీను మన్ల. నిజమాతి మాట నెగ్గెండ నెస్పిస్సి వన్ని లెకెండ మన్ల. 16 పణిదిజ్ రెఇ, సెఇ మాటెజణిజ్ నీను దూరం మన్ల. ఎందనిజ్ ఇహిజ, నని మాటెజ్ వర్గిజి మంజినికార్ మరి ఒదె సెఇకార్ ఆజి దేవుణు బాణిజ్ దూరం ఆనార్. 17 మలెరియ నోబు నండొడారిజ్ పాడు కిని లెకెండ, వారు నెస్పిసిని మాటెజ్ మహివరిజ్ పాడు: కినె. నని వరి లొఇ మనికారె హుమెనయ, పిలెతు ఇనికార్. 18 వీరు నిజమాతి మాటెజ డిస్త సాహార్. వారు తవు వెప్పినార్, దేవుణు సాతి సాహి వరిజ్ మరీజి బత్రిస్త మనాన్ ఇజి ఆహ వెప్పి, ఇనిక నమ్మిదెజ్ ఇజి నెస్ఎండ, ఇతల్ అతాల్ కిజి సెగొండారిజ్ బమ్మ కిజినార్. 19 అహిజ్బా, దేవుణు బాణిజ్ వాతి నిజమాతి మాట తప్పెదు. అయాక నెగెండ నిల్సిని ఉండ్రె పునాది లెకెండ మనాద్. 'ప్రబు వన్ని సాంత వరిజ్ నెస్సాన్' ఇజి, 'యేసుజ్ నా ప్రబు ఇజి ఒప్పకొణికార్ విజెరబా సెఇ పణిజాణిజ్ దూరం ఆదెజ్ వలె' ఇజి అయా పునాదిదు ముద్ద పాక్త మనార్.

20 ఉండ్రె పిరి ఇండ్రె నండొ రకమ్కాణి కుండెజ్ మండిజ్ మంజినె. సెగం వెండిదాన్, బజారమ్దాన్ తయార్ కితికెజ్, మరి సెగం సెకదాన్, దుల్లిదాన్ తయార్ కితికెజ్. విన్యా లొఇ వెండిదాన్ బజారమ్దాన్ తయార్ కితికెజ్ నెగ్గి పణిదిజ్ వాడుకొణార్. సెకదాన్, దుల్లిదాన్ తయార్ కితికెజ్ ఆఇ పణిదిజ్ వాడుకొణార్. అయాలెకెండ, దేవుణుదిజ్ నమ్మిత్తి వరి సజమ్దు, దేవుణు వందిజ్ నెగ్గి పణి కిదెజ్ తగ్గికార్ మంజినార్. ఆఇకార్బా మంజినార్.

21 అందెజె ఎయెన్బా సెఇకెజ్ విజా డిస్టిజ, వాండ్రు నెగ్గిపణి కిదెజ్ తగ్గికాన్ ఆనాన్. పెరి ఇండ్రెణి ఎజామాని, నెగ్గి పణిదిజ్ వాడుకొండెజ్ కేట ఇడ్డి వెండి బజారమ్ది కుండెజ్ మండిజ్ లెకెండ, వీండ్రుబా దేవుణు వందిజ్ ఇని నెగ్గి పణిదిజ్బా తగ్గికాన్ ఆనాన్.

22 దజడా:రిజ్ మని ఉత్పల్దాన్ దూరం మన్ల. గాని నీతి నిజయ్యదికెజె కిదెజె సుడె:ల. దేవుణు వందిజ్ నిజమాతి మాటెజ్ నమ్మిల. ఎస్త్రీవలెబా ప్రేమ తోరిన్ల. విజెర వెట సాంతి సమాదనమ్దాన్ మండ్రెజ్ సుడె:ల. నెగ్గి మన్సుదాన్ ప్రబుజ్ పార్దం కినివరి వెట కూడె:జి మన్ల. 23 బుద్ది సిల్లెండ అర్దం సిల్లెండ తర్కిసిని వరి బాణిజ్ దూరం మన్ల. ఎందనిజ్ ఇహిజ, వారు జటిజ్ పుటిసినార్ ఇజి నీను నెసిని. 24 దేవుణు పణి మనిసి జటిజ్ ఆదెజ్ ఆద్. గాని వాండ్రు విజెరివెట కనికారం ఆజి మండ్రెజ్ వలె. నెగ్గెండ నేస్పిసినికాన్ ఆదెజ్ వలె. ఓరిసినికాన్ ఆదెజ్ వలె. 25 నిజమాతి మాటెజ, ఎద్రిస్సి వరిజ్ వాండ్రు సార్లిదాన్ వెప్పి దిదిదెజ్. వారు పావమ్కు ఒప్పకొడి:జి, నిజమాతికెజ్ నెస్సి వందిజ్, దేవుణు ఉండ్రె వేలా వరి మన్సు మారిస్సాన్సు. 26 ఆహ వారు బుద్దిదు వాజి, సయ్తాన్ ఉరిదాన్ తప్పె ఆనార్. సయ్తాను, వన్ని ఇస్టమ్కు కిబిస్తెజె వరిజ్ అస్తమనాన్. అందెజె దేవుణు పణి మనిసి వరిజ్ సార్లిదాన్ వెప్పెజ్.

కడె:వెరి దినమ్క వందిజ్ వెప్పినిక

3 యేసుప్రబు వాని ముజాల, కడె:వెరి దినమ్కాజ్ నండొ తియెల్ ఆని రోస్సు మంజినెలె ఇజి నీను నెస్ఎ. 25 లోకుర్, వరిజ్ వారె నెగ్గెండ మండ్రెజ్ ఇజి సుడె: ఆనార్ డబ్బుదిజ్ ఆన ఆనార్. నా ననికాన్ మరి ఎయెన్బా సిలెన్ ఇజి వెహె ఆనార్. గర్త ఆనార్, దూసిస్సార్. యాయబ్బారిజ్ లొజెవెర్. మేలుదిజ్ నెస్ఎర్, సెఇకార్ ఆనార్. ప్రేమ సిల్లికార్ ఆనార్, సెవిస్ఇకార్ ఆనార్. సాండిజ్ వెప్పికార్ ఆనార్. అణని ఆఇకార్ ఆనార్. అడి:వి జంతు నని మూర్కమ్దికార్ ఆనార్. సాంత వరిజ్బా మొసిం కినికార్ ఆనార్. బుద్ది సిల్లెండ ఇని ఇనికెజ్ కిసార్. గర్త ఆనార్. దేవుణుదిజ్ ప్రేమిన్ఎండ వరి సుకమ్కాజ్ ప్రేమిస్సార్. వారు దేవుణు బక్తి మనికార్ ఇజి ముస్సునె తొరె ఆనార్. గాని వన్నిజ్ లొజెదెజ్ వాండ్రు సీజిని సత్తుదిజ్ నెక్కి పాక్కినార్. నని వరి బాణిజ్ దూరం మన్ల.

67 ఎందనిజ్ ఇహిజ, నని వరి లొఇ సెగొండార్, లోకుర్ వెట నెల్వ ఆజి ఇల్కాజ్ వానారె, తవు బోదెజ్ వెప్పి, బాన్ మని బుద్ది సిలి బోదెకాజ్ మోసం కిసార్. అవికు వీరు వెప్పినికెజ్ నమ్మిజి మోసం ఆనె. అవికు కితి నండొ పావమ్క వందిజ్ వన్యా గర్బమ్కు గదిసిని మంజినె. అవికు, వన్యా ఆసిజ విజా ఎత్తు కిజినె మంజినె. ఎస్త్రీవలెబా నెస్ ఆదెజ్ ఆన ఆనె. గాని నిజమాతికెజ్ ఇనికెజ్ ఇజి టెటజ్ నెస్ఉ. 8 యెనె, యెంబ్రె ఇనికార్ మోసెజ్ ఎద్రిస్తిలెకెండ, వీరుబా దేవుణు వందిజ్ నిజమాతికెజ్ ఎద్రిసినార్. వీరు విరి మన్సుదు సెఇకెజ్నె ఒడె:బినార్. అందెజె వారు నమ్మిజినికెజ్ పణిదిజ్ రెఇకెజ్ 9 యెనె, యెంబ్రె బుద్ది సిలికార్ ఇజి లోకుర్ విజెరె టెటజ్ సుడి:తి లెకెండ, వీరుబా బుద్ది సిలికార్ ఇజి లోకుర్ విజెరె టెటజ్ సూణార్లె. అందెజె ఎలాకాలం దేవుణు మాటదిజ్ ఎద్రిసి సాండ్రెజ్ వారు అట్ఎర్.

తిమోతిజ్ ఆడ్ర సీజినాన్.

10-11 గాని నాను నెస్పిస్సికెజ్, నాను ఎలాగ బత్రిజి నడి:త ఇజి నాను కిదెజ్ ఇజి నా బత్తుదు మని ఉదెసం, నాను దేవుణుదిజ్ ఎలాగ నమ్మిజి మహా ఇజి, నజీ కితి కీడుదిజ్ ఎలాగ ఓరిస్త ఇజి, నాను ఎలాగ మహి వరిజ్ ప్రేమిస్త ఇజి నీను పూర్తి నెసిని. లోకుర్ నజీ బాదెజ్ కితివలె నాను ఎలాగ అయకెజ్ ఓరిస్తెజ్ అట్ట ఇజి నీను నెసిని. నజీ వాతి హిమ్సెజ్ విజా నీను నెసిని. అందియొకయ, ఇకొనియ, లున్త్ర ఇని పట్టుమ్కాజ్ నజీ వాతికెజ్ విజా నీను నెసిని. లోకుర్ కితి నండొ బాదెజ్ నాను ఓరిస్త. గాని ప్రబు వన్యా బాణిజ్ విజా నజీ తప్పెస్తాన్. 12 క్రీస్తుయేసు వెట సమందం ఆజి, దేవుణు బక్తిదాన్ బత్రిదెజ్ ఆన ఆని ఎయెరిజ్బా బాదెజ్

వానె. ¹³ గాని సెఇ పణిజ్ కినికార్ని, మహివరిజ్ మొసం కినికార్ ఇంక ఒదె పాడాఃనార్. వారు మొసెం కినికార్. మొసెం కిబె ఆనార్. ¹⁴⁻¹⁵ గాని నీను, నెస్తిమనికెజ్, తవ్ఎండ నమ్మిజి మనికెజ్ డిస్ఎండ మన్ల. ఎండనిజ్ ఇహిజ, నిజి నెస్తివరిజ్ నీను నెసిని. ఇజ్జివలెహన్ అసి నీను దేవుణు మాట ఎలాగ నెస్తి ఇజి నీను నెసిని. యాకెజ్, క్రీస్తు యేసు ముస్కు నీను ఇడ్డి నమ్మకమ్దాన్, దేవుణు నీ పావమ్కాజ్ నిజి రక్సిన్సి వందిజ్ నిజి గెణం సీదెజ్ అల్వె. ¹⁶ దేవుణు మాటజ్ విజా దేవుణు వన్ని ఊస్తిదాన్ వెప్పి రాస్పిస్తికెజె. అయాకెజ్, నిజమాతికెజ్ మజి నెస్తివరిజ్, మా తవుజ్ తోరిస్తిజ్, మజి సరి దిదిదెజ్, నీతి నిజయితికెజ్ కిదెజ్ నెస్తివరిజ్ పణిదిజ్ వానికెజ్. ¹⁷ ఈహునె ఒరెన్ దేవుణు లోకు వాండ్లు కిదెజ్ మనికెజ్ విజా కినికార్. విజా నెగ్గి పణి కిదెజ్ ఎస్తివలెబా తయార్ ఆనార్.

4 దేవుణు ఎర్దు, సాతి వరిజ్ బత్తిజిని వరిజ్ తీర్పు సీని క్రీస్తుయేసు ఎర్దు నాను నిజి ఆడ్డ సీజిన. ఎండనిజ్ ఇహిజ వాండ్లు మర్జి వాజి రాజా వజ ఏలుబడిః కినికార్. ² నాను నిజి ఈహు ఆడ్డ సీజిన నీను దేవుణు మాట లోకురిజ్ వెహాల. లోకుర్ వినారో, వినవారో ఇజి నెగ్గి సమయం, ఆజ సమయం తోఎండ ఎస్తివలెబా అయ్యాక వెహాజ్ తయార్ ఆజి మన్ల. లోకురిజ్ వరి తవుజ్ తోరిసి వెహాల. వరి తప్పుజ దిదిల. వారు కిదెజ్ మనికెజ్ పణిన్ల. నీను కోపం ఆవండ నిసాతిదాన్ వరిజ్ నెస్తిన్ల. ³ ఎండనిజ్ ఇహిజ, లోకుర్ నిజమాతికెజ్ వన్ఎండ బత్తిని కాలం వానాద్. గాని వరిజ్ ఇస్టం ఆని వజ లోతు మాట వెప్పి నని బోద కిని నండొండారిజె వారు తపిసి డగు కినికార్. అందెజె, నని వరిజ్ తపిసి డగు కినికార్. ⁴ ఇహిజ, నిజమాతి మాట వారు వినవర్. గాని కత సాస్తరమ్క దరోట్ మర్నార్. ⁵ గాని ఓ తిమోతి, నీను విజా వన్కా లొఇ నెగ్గి బుద్దిదాన్ మన్ల. కస్టమ్కు ఓరిస్ల. క్రీస్తుయేసు వందిజ్ సువార్త లోకురిజ్ వెహాల. దేవుణు సేవపణి కినివలె, నీను కిదెజ్ మనికె విజా పూర్తి కిల. ⁶ ఎండనిజ్ ఇహిజ, నాను పూజ ఆదెజ్ సమయం డగు ఆత మనాద్. నాను సాదెజ్ సమయం డగు ఆత మనాద్. ⁷ వందెమ్దు ఒరెన్ కస్టబడిఃతి లెకెండ్, నాను సువార్త లోకురిజ్ వెప్పి వందిజ్ కస్టబడిఃత. ఉప్పి వందెమ్దు, ఒరెన్ ఉప్పిక్, పూర్తి కిని లెకెండ్, నాను కిదెజ్ దేవుణు నజి వెహికెజ్ పూర్తి కిల. దేవుణు ముస్కు మని నమకం డిస్ఎత. ⁸ అందెజె నజి ఉండ్రీ ఇనాయం మనాద్. నాను నీతి నిజయితిదాన్ బత్తితి దని వందిజ్ సీని ఇనాయం. అయ్యాక ఆకరి దినమ్ది తీర్పుదు, నీతి నాయమ్దాన్ తీర్పు సీని ప్రబు అయ్యాక నజి సీనాన్. నజెనె ఆవండ వాండ్లు వాని దనిజ్ ఎర్దు సుడఃజి ఆస ఆని విజెరిజ్ సీనాన్.

⁹⁻¹⁰ తిమోతి, నా డగు బేగి వాదెజ్ నీను సుడఃల. ఎండనిజ్ ఇహిజ, దెమ, యా లోకమ్ది సజతిజ్ ప్రీమిసి, నజి డిఃస్తి సాహాన్. వాండ్లు దెసలోనిక పట్నమ్దు సాహాన్. క్రెస్కె ఇనికాన్ గలతియ ఇని ముటాదు సాహాన్. తీతు దెల్మియ జిల్లాదు సాహాన్. ¹¹ లూక ఒరెండ్రె నా వెట మనాన్. నీను వానివలె మార్కుజ్ నీ వెట కూక్కి తగ్ల. ఎండనిజ్ ఇహిజ, వాండ్లు నజి తోడుఃదిజ్ బాగ మంజినాన్. ¹² తుకికుజ్ ఎపెసు పట్నమ్దు ఫాక్త. ¹³ నీను వానివలె త్రొయ పట్నమ్దు కార్పు ఇని వన్ని బాన్ నాను ఇట్టా వాత సాల్వ తగ్ల. పుస్తకమ్కుబా తగ్ల, ముకెలం తోలుదు రాస్తి మనికెజ్.

¹⁴ అలెక్సెజండర్ ఇని కంసు తయార్ కిని సరాబు నజి నండొ బాదెజ్ కిత్తాన్. వాండ్లు కితి దనిజ్ ప్రబు వన్నిజ్ సిక్కు సీనాన్. ¹⁵ వాండ్లు నిజిబా బాదెజ్ కిఎండ నీను జాగర్త మన్ల. ఎండనిజ్ ఇహిజ, మాటు బోదిస్తి మాటెజ, వాండ్లు నండొ ఎద్రిస్టాన్.

¹⁶ నజి ముజాలె, కోర్దుదు ఒసి వెనబాతివలె, నజి నానె ముదాయి. ఎయెర్బా నా దరోట్ వర్గివతార్. విజెరె నజి డిఃస్తి సాహాన్. దిన్ని వందిజ్ దేవుణు వరిజ్ సిక్కు సిఎండ మనీన్. ¹⁷ అహిజ, కోర్దుదు మహి యూదురు ఆఇకార్ విజెరె, నా వెట సువార్త పూర్తి విని వందిజ్, ప్రబు నా పడఃకాద్ మంజి, నజి సత్తు సితాన్. నొరెన్ వెయుదాన్ తప్పిస్తి లెకెండ్ సాపు సిక్కుదాన్ తప్పిస్టాన్. ¹⁸ అందెజె, ప్రబు నజి విజా సెఇ వన్కా బాణిజ్ తప్పిసి, వాండ్లు రాజా వజ ఏలుబడిః కిని పరలోకమ్దు నెగ్గెండ కూక్కు ఒనాన్. వన్నిజ్ ఎలాకాలం గవ్ఠం మనీద్. ఆమెన్.

¹⁹ స్పిస్కొలెజ్, అక్కులెజ్, ఒనెసిపారు ఇండ్రొణి వరిజ్ నాను వెన్బాతి లెకెండ్ వెహాల.

²⁰ ఎరాస్టు కొరింతు పట్నమ్దు నిహాన్. త్రొవెముజ్ కస్టం అర్దిజ్, వన్నిజ్ మిలెతు పట్నమ్దు డిఃస్తి వాత. ²¹ పీనికాలం రెఎండ ముజాలె, నీను బేగి వాదెజ్ సుడఃల. యుబులు, పుదె, లీను, క్లడడియ ఇనికార్ నిజి వెన్బాతి లెకెండ్ వెప్పినార్. అయ లెకెండ్ యా పట్నమ్దు మని మహి నమ్మిత్తికార్ బా వెన్బాతిలెకెండ్ వెప్పినార్.

²² ఓ తిమోతి, ప్రబు నీ వెట తోడుః మనీన్. వన్ని దయా దర్ఠం మీ విజిదెరె వెట మనీద్.

మార్కు

నెల్ల కిబిసినిక

అపొస్తలుడు ఆతి పవులు తీతుజ్ రాస్తి ఉత్తమనె యాక. పవులువెల దేవుణు సేవవణి కినివరి లొఇ ఒరెనె తీతు. క్రేతు దేనమ్దు మన్ని దేవుణుదిజ్ నమ్మితి పరి సజమ్కాజ్ నెగ్రెండ నడిపిస్తెజ్, వన్నెజ్ సజం ముస్సు అతికారి లెకెండ పవులు ఏర్పాటు కిత్తాన్. అందెజె సజమ్కాజ్, ఎలాగ మన్ని పెద్దల్జ నిల్పెజ్, వారు కిదెజ్ మన్ని పణిజ్, దిన్ని వందిజ్ వేప్పి పవులు తీతుజ్ రాసినాన్. మరి, సజమ్దు మన్ని ఒరెన్ ఒరెన్ ఎలాగ మండ్రెజ్ ఇజిబా వేప్పినాన్.

1 14 దేవుణు సేవకిని, యేసు క్రీస్తు వందిజ్ అపొస్తలుడు ఆతి పవులు ఇని నాను తీతుజ్ రాసిన. నీను నా సాంత మరిన్ లెకెండ మన్ని. ఎందానిజ్ ఇహిజ, దేవుణు వందిజ్ వేప్పి మన్ని మాటెజ్, నాను నమ్మిజినికెజె నీనుబా నమిజిని. దేవుణుదిజ్ నెగ్రెండ నమ్మిదెజ్, వాండ్రు ఏర్పాటు కిత్తి లోకురిజ్ నడిపిస్తెవందిజ్, వాండ్రు నజి ఏర్పాటు కిత్తాండ్రె పోక్తాన్. మరి, దేవుణు వందిజ్ నిజమాతి సజతిజ్ నెన్పిసిని వందిజ్ వాండ్రు నజి ఏర్పాటు కిత్తాండ్రె పోక్తాన్. యా నిజమాతి సజతిజ్ దేవుణుదిజ్ లోజిజి నడినిక ఎలాగ ఇజి వేప్పి తోరిస్తాన్. అయావలె వారు ఎలాకాలం దేవుణు వెట బత్తిని బత్తుదిజ్ ఆసదాన్ ఎద్దుసూణార్. అబద్దం వర్గిఇ దేవుణు, ఎలాకాలం వన్నివెట బత్తిని బత్తు వందిజ్ లోకుర్ వెట ఒట్టు కిత్తాన్. నిరకారమ్బా సిల్లెండ మన్నివలె మహి వన్ని ఉదెనం వజనె వాండ్రు ఒట్టు కిత్తాన్. దేవుణు పణిమనిసిర్ సువార్త వెప్తార్. ఆహె వాండ్రు ఏర్పాటు కిత్తి కాలమ్దు, లోకురిజ్ సువార్త వెన్పిస్తాన్. అయాక వెప్తాజ్ నజి ఒపజెప్ప మనాన్. మజి రక్సిసిని దేవుణు ఆడ్ర వజనె నాను వేప్పిన. బుబ్బాతి దేవుణుని, మజి రక్సిసిని క్రీస్తుయేసు, దయాదర్మమ్దాన్, నీను నిపాతిదాన్ మండ్రెజ్ సాయం కిపిర్.

క్రేతు దేనమ్దు తీతు కిదెజ్ మన్ని పణి

5 నాను నిజి వేప్పి వజనె, తప్పికెజ్ దిదిజి, దేవుణు సజమ్కు మన్ని పట్టుమ్కాజ్ విజా పెద్దెలుజ నిల్పెల. దిన్నివందిజె నాను నిజి క్రేతు దేనమ్దు డిస్తె వాత. 6 దేవుణు సజమ్దు, పెద్దెలి ఆనికాన్ ఎయెన్ ఇహిజ, నింద సిల్లికాన్. ఉండ్రె ఆలేసి మంజినికాన్. వన్ని కొడోర్ దేవుణుదిజ్ సమనికార్ ఆదెజ్. కొడోర్, సెఇ పణిజ వందిజ్ నేరం మొపె ఆకార్ ఆదెజ్. వేప్పిమాట వెనికార్ ఆదెజ్. నన్ని పరి అప్పానినె పెద్దెలి ఆదెజ్. 7 పాస్టరు నింద సిల్లికాన్ ఆదెజ్వెలె. ఎందానిజ్ ఇహిజ, వాండ్రు దేవుణుదిజ్ నమ్మితి పరిజ్ నడిపిస్తెకాన్. వాండ్రు గర్త ఆకాన్. మూంజిద్ కోపం మన్ఎండ, సోన్ఎండ, డెయేసె ఆవండ, సిగు వాని సెఇ పణిజ్ కిజి లాబమ్వందిజ్ సుడెఎండ మంజినికాన్ ఆదెజ్వెలె. 8 అహిజ, వాండ్రు వాతిపరిజ్ డగ్రు కినికాన్, నెగ్గె వన్కాజ్ కోరిజినికాన్, అణసె ఆజి మంజినికాన్, నీతి నిజాయి మనికాన్, దేవుణు వందిజ్ కేట ఆతికాన్, నెగ్గె బుద్ది మనికాన్ ఆజి మండ్రెజ్. 9 పాస్టరు ఆనికాన్ యేసుక్రీస్తు వందిజ్ మాటు నెన్పిస్తె నిజమాతి మాటెజ్ అయావజ గటిజ నమ్మినికాన్ ఆదెజ్వెలె. ఎందానిజ్ ఇహిజ, వాండ్రు నమ్మితి పరిజ్ నిజమాతి మాటెజ్ నెన్పిసి, నిజమాతి మాటెజ్ ఎద్దిసిని పరిజ్ పరి తప్పుజ తోరిస్తెజ్ అట్టికాన్ ఆదెజ్.

10 ఎందానిజ్ ఇహిజ, నండొండార్ మనార్, అతికారమ్దిజ్ లోజిఎండ, పోక్తి పగిజి, మొసం కినికార్ నండొండార్ మనార్. ముకెలం, యేసుపుబు రక్సిస్తెజ్ ఇహిజ సునతి కిబె ఆదెజ్ వెలె ఇజి కనితం వేప్పినికార్ యాలెకెండ మనార్. 11 పరి వెయికు మీరు మూక్తెజ్వెలె. ఎందానిజ్ ఇహిజ, వారు నమ్మితి పరిజ్ తప్పుజ నెన్పినార్. ఆహె నమ్మితి పరి కుటుమ్దికార్ విజెరె నిజమాతి మాటెజ్ నమ్మిఎండ ఆపికిజినార్. పరి సాంత లాబం వందిజె వారు ఈహు కిజినార్. 12 క్రేతుదికాండ్రె వెప్తాన్, "క్రేతుదికార్ ఎస్తివలెబా అబద్దం పగ్గినికార్, మూర్కమ్దికార్, బదకం ఆజి తిండికకుర్తి ఆతికార్", ఇజి. యా లెకెండ వెప్తాన్, పరి లొఇ ఒరెన్ వల్లుబడి మన్నికాండ్రె. 13 వాండ్రు క్రేతుది పరి వందిజ్ వెప్తాజెజ్ నిజమ్నె. అందెజె బాన్ మన్ని నమ్మితికార్ నిజమాతి మాటెజ్ నెగ్రెండ నమ్మిని వందిజ్ నీను పరిజ్ డటిసి డటిసి దిదిల. 14 వారు అర్దం సిల్లి యూదురి కత సాన్తరమ్కు ఆన్ఎండ మంజిని వందిజ్ నీను పరిజ్ దిదిల. మరి, నిజమాతి సజతిజ్ డిసి సాహిపరి మాటెజ్ లోజిఎండ మంజిని వందిజ్ నీను పరిజ్ డటం దిదిల. 15 మన్ను పాపమ్కాజ్ సుబరం ఆతిపరిజ్, విజాబా సుబరం ఆతిలెకెండ నెగ్రెండ మనాద్. గాని, మన్ను సుబరం ఆవండ, యేసుక్రీస్తుజ్ నమ్మితి పరిజ్ ఇనికబా సుబరం ఆవండ సెవణ్ మనాద్. ఎందానిజ్ ఇహిజ, పరి గర్బం సెఇక ఆత మనాద్. వారు సెఇకెజ్ కినివెలె, 'తప్తావ్', ఇజిబా పరి గర్బం గదిసివద్. 16 వారు దేవుణుదిజ్ నెన్నావ్ ఇజి వెహె ఆజినార్. గాని పరి పణిజాణిజ్ వన్నిజ్ నెక్కిపాక్కినార్. వారు పెంటు లెకెండ మనికార్. దేవుణుదిజ్ లోజిఇకార్. ఇని నెగ్గె పణిజ్ కిదెజ్బా తగ్గెకార్.

నిజమాతి మాటెజ్ వేప్పినాన్

2 తీతు, నీను దేవుణుదిజ్ నమ్మితి పరిజ్, నిజమాతి మాటెజ్ కూడితి మన్ని సజతిజ్ నెన్పిన్ల. 2 డొక్టారిజ్ నెన్పిన్ల, వారు సోన్ఎండ మండ్రెజ్ ఇజి. విజెరె పరిజ్ గవరం సీజి మంజిని లెకెండ మండ్రెజ్ ఇజి. నెగ్గె బుద్దిదాన్ మండ్రెజ్ ఇజి నెన్పిన్ల. మరి, వారు నిజమాతి మాటెజ్ నెగ్రెండ నమ్మితి, మహిపరిజ్ ప్రిమిసి ఓరిసి మండ్రు ఇజి నెన్పిన్ల. 3 అయాలెకెండ, డొక్టారిజ్బా నెన్పిన్ల, అవిక్ బక్తిదాన్ మంజిని పరిలెకెండ మండ్రెజ్ ఇజి. అవీక్ సాండిజ్ వర్షిఎండ, సోన్ఎండ, మహి వన్కాజ్ నెగ్గె సజతిజ్ నెన్పిస్తెజ్ ఇజి. 45 అయావలె అవిక్, బోదెకాజ్ నెన్పిస్తెజ్ ఆనాద్. ఇనికెజ్ నెన్పిస్తెజ్ ఇహిజ, వనక మాసిరిజ్ని కొడోరిజ్

ప్రేమిస్తైజ్, అణసె ఆజి మండ్రెజ్, నెగ్గి మన్నుదాన్ మండ్రెజ్, ఇండ్రెణి పణిజ్ సుడఃజి, కనికారం తోరిసి మండ్రెజ్, మాసిరిజ్ లోజీదెజ్ ఇజి. బోదెక్ అయాలెకెండే మండ్రెజ్, ఎందానిజ్ ఇహిజ దేవుణు మాట ఎయెన్బా దూసిన్వండ మండ్రెజ్.

6 అయాలెకెండే, దజ్డార్ అణసె ఆజి మండ్రెజ్ వరిజ్ ఉసార్ కిబిన్ల. 7-8 నీను విజా వనకాజ్ లొఇ నెగ్గికెజ్ కిజి వరి ఎద్రు ఉండ్రీ గుర్దు లెకెండే తోరె ఆల. నీను నెన్పిసినివెలె, డొజ సాటు వెహి ఆవండ, నీను వెహిని మాటదు మొసం సిల్లెండ, పూర్తి నీను వరిజ్ నెన్పిన్ల. ఎందానిజ్ ఇహిజ, మజి పణిజ్ ఇకార్ మా మున్ను సెఇ మాటెజ్ వర్దిదెజ్ ఆవండ, సిగు ఆజి మండ్రెజ్.

9-10 నీను వెటి పణి కినివరిజ్ నెన్పిన్ల, వారు విజా దని లొఇ ఎజామానిరిజ్ లోజీజి, వరిజ్ ఇష్టం ఆనివజ కిజి మండ్రెజ్ ఇజి. ఎజమానిరిజ్ మర్జి వెహివండ, డొజ కిపిండ మండ్రెజ్ ఇజి నెన్పిన్ల. వారు ఎజమానిరిజ్, 'మజి పూర్తి నమ్మిదెజ్ ఆనాద్', ఇజి తోరిస్తైజ్. వెట్టిపణి కినికార్ అయాలెకెండే మండ్రెజ్. ఎందానిజ్ ఇహిజ, వారు కిని విజా దన్ని లొఇ లోకుర్ నెస్తైజ్, మజి రక్సిసిని దేవుణు వందిజ్ మన్ని మాటెజ్ గొప్ప నెగ్గికెజ్ ఇజి.

11 ముజాలె వెహిలెకెండే నమ్మిత్తి వరిజ్, నీను నెన్పిస్తైజ్. ఎందానిజ్ ఇహిజ, లోకురిజ్ విజెరిజ్ రక్సిస్సివందిజ్ దేవుణు, వన్ని దయాదర్మమదాన్ యేనుక్రీస్తుజ్ యా లోకమదు షాక్తాన్. 12 వాండ్రు మజి వన్ని దయా దర్మమదాన్ నెన్పినాన్, దేవుణుబాణిజ్ దూరం కిబిసిని విజా సజతిజ డిన్ల, ఇజి. యా లోకమది లోకుర్ ఆస ఆజినికెజ్ డిన్ల', ఇజి నెస్సిసినాన్. మరి, మాటు నెగ్గి బుద్దిదాన్, నీతి నిజయ్దిదాన్, దేవుణుదిజ్ సర్ద సీనికెజ్ కిజి యా తరమదు మండ్రెజ్ ఇజి నెన్పిస్తైజ్.

13 మాటు అయాలెకెండే మండ్రెజ్. ఎందానిజ్ ఇహిజ, మజి గొప్ప సర్ద కిబిస్సి ఉండ్రీ రోజావందిజ్ మాటు ఆనదాన్ ఎద్రు సుడఃజినాట్. ఇహిజ, మాటు మజి రక్సిసిని పెరి దేవుణు ఆతి యేనుక్రీస్తు వాజిని రోజా వందిజ్ ఆనదాన్ మజి కొత్తాజ్ పుటిస్తాండ్రె ఎద్రు సుడఃజినాట్. వాండ్రు గొప్ప జాయ్ కూడితి మన్ని నండో సాకుదాన్ వానాన్. 14 మా విజా పావమ్కాజ్ మజి డిన్పిస్తైజ్, సాదెజ్ వన్నిజ్ వాండ్రె ఒవజెవె ఆతాన్. మరి, మజి సుబరం కిజి, నెగ్గికెజ్ కిదెజ్ పూర్తి ఒవజెవె ఆతి వన్ని సాంత లోకుర్ లెకెండే తయార్ కిదెజ్ వాండ్రె ఒవజెవె ఆతాన్.

15 నాను ఏలు వెహికెజ్ విజా నమ్మిత్తివరిజ్ పూర్తి అతికారమదాన్ నెస్సిన్ల. వారు అయాలెకెండే కిదెజ్ వరిజ్ పణిసి వెహిల. అయాలెకెండే కిఇవరిజ్ దిదిల. నిజి ఎయెన్బా దుసలాడఃవండ సుడఃల.

నెగ్గి పణిజ్ కినివందిజ్ వెహిసినాన్

3 దేవుణుదిజ్ నమ్మిత్తి లోకుర్ అతికారిజ లోజీదెజ్, వెహి మాట వెంజి మండ్రెజ్, ఇని నెగ్గి పణిజ్ కిదెజ్బా తయారాజి మండ్రెజ్ ఇజి నీను వరిజ్ ఎత్తు కిబిసి మన్ల. 2 వారు, ఎయెరిజ్బా సెఇకెజ్ వెహివండ, జటిజ్ ఆవండ, సార్దిదాన్ విజెరె వెట తగిజి మండ్రెజ్ ఇజి వరిజ్ వెహి మన్ల.

3 ఎందానిజ్ ఇహిజ, మాటుబా ముజాలె నమ్మిత్తి వరిలెకెండే, బుద్ది సిల్లెండ మహాట్. మాటు ఎయెరిజ్బా లోజీవండ మహాట్. మొసం కిబె ఆజి మహాట్. యా లోకమది సెఇ ఆసెజ్ సుకమ్కాజ్ నండో ఆస ఆజి మహాట్. పగదాన్, గోసదాన్ కాలం గడఃప్పి మహాట్. మహి వరిజ్ దూసలాడఃజి మహాట్. వారు మజి దూసలాడితార్. 4 గాని అయాలెకెండే మహివలెనె, మజి రక్సిసిని దేవుణు వన్ని కనికారం తోరిస్తాండ్రె, ప్రేమ తోరిస్తాండ్రె మజి రక్సిస్తాన్. 5 మాటు కిత్తి నీతి పణిజాణిజ్ ఆవద్. గాని వన్ని కనికారమదానె మజి రక్సిస్తాన్. దేవుణు అత్తుదాన్, వాండ్రు మా పావమ్కు నోర్జి మజి కొత్తాజ్ పుటిస్తాండ్రె, ఉండ్రీ కొత్త బత్తు సిత్తాండ్రె మజి రక్సిస్తాన్.

6-7 దేవుణు దయా దర్మమదాన్ మాటు నీతి నిజయ్ది మన్నికాట్ ఇజి వాండ్రు తీర్పు సితాన్. ఆహి, తీర్పు సిత్తిజ్ మాటు కోరిజిని ఎలాకాలం దేవుణు వెట బత్తిని బత్తుదిజ్ అక్కు మన్నికార్ ఆనివందిజ్ మా మున్ను దేవుణు ఆత్మ నండో షాక్తాన్. వాండ్రు మజి రక్సిసిని యేనుక్రీస్తు వెటనె దేవుణు ఆత్మ నండో షాక్తాన్. 8 యా మాట పూర్తి నమ్మిదెజ్ తగ్గి. అందెజె దేవుణుదిజ్ నమ్మిత్తి వరిజ్ అయాలెకెండే డటిసి నీను నెన్పిస్తైజ్ ఇజి నాను కోరిజిన. ఎందానిజ్ ఇహిజ, వారు మహి వరిజ్ వరి మన్ను పూర్తిదాన్ నెగ్గి పణిజ్ కిదెజె. మున్ను వెహి మన్ని మాటెజ్ విజా విజెరిజ్ నెగ్గికెజ్నె, పణిదిజ్ వానికెజ్నె.

9 గాని అర్దం సిల్లెండ తర్కిస్సికెజ్, అనిగొర్ వందిజ్ వెహినికెజ్, జటిజ్ ఆనికెజ్, యూదురి రూలుజ వందిజ్ వెహి గొడఃబ కినికెజ్ విజా, ఎందానిజ్ పణిదిజ్ రెఇకెజ్, విలువ సిలికెజ్. అందెజె వనక వందిజ్ దూరం మన్ల. 10 నమ్మిత్తి వరి సజమదు, నిజమాతి మాటెజ వెట కూడఃఇకెజ్ నెన్పిసి, వరిజ్ ఎర్లిసి కేట కిని వన్నిజ్ ఉండ్రీ రుండి సుట్టు. బుద్ది వెహిల. మరి, వాండ్రు వినవండ మహిజ, వన్నిజ్ దూరం కిల. 11 నన్నికాన్ నిజమాతి సజతిజ్ సరి తప్పి పాపం కిజినాన్ ఇజి నిజి తెలినాద్. వన్ని పావమ్కు వాండ్రు తప్పి కిజినాన్ ఇజి రుజాప్ కిజినె.

12 నాను పిన్ని కాలం నికొపాలితు గడఃవైజ్ ఇజి తిరుమానం కిత్త మన. అందెజె నాను అర్దమానుజ్ ఇని వన్నిజ్నో, తుకికుజ్నో నీ డగ్రు షాక్కు. నస్తివలె నీను అబె నా డగ్రు వాదెజ్ సుడఃల. 13 జెనా ఇని లాయిరు, అపాలు, క్రేతు దేసం డిసి మరి సాండ్రెజ్ సుడఃజినార్. వరి పయనమ్దు ఇనికబా తక్కు సిల్లెండ వరిజ్ కావాలిస్తైజ్ విజా సీజి నెగ్రెండ షాక్ల. 14 నమ్మిత్తికార్ పణిదిజ్ రెఇ బత్తు బత్తివండ, పణిదిజ్ వానికెజ్ కిజి మండ్రెజ్. అందెజె, వారు వరి సమయం విజా అవ్సరం మన్ని వరిజ్ సాయం కిదెజ్ నెస్తైజ్వెలె.

15 నా వెట మనికార్ విజెరె నిజి వెన్బాతిలెకెండే వెహిసార్. మాటు నమ్మిజిని లెకెండే నమ్మిజి, మజి ప్రేమిస్సివరిజ్ నాను వెన్బాతి లెకెండే వెహిల. దేవుణు దయా దర్మం మీరు విజెరె వెట మనీద్.

మార్కు

నెల్య కిబిస్సిక

అపొస్తలుడు ఆతి పవులు కొలోసి పట్టణముడు మని పిలమొను ఇని ఒరెన్ దేవుణుదిజ్ నమ్మిత్తి వన్నిజ్ రాస్తి ఉత్తమనె యాక. పిలమొనుజ్ ఒనెసిము ఇని ఒరెన్ వెట్టివణి మనిసి మహాన్. ఒనెసిము పిలమొనుజ్ డిస్తాండ్రె, ఉహ్కీ ఎంబెనో సాహాన్. వాండ్రు సాహి మహివలె పవులుజ్ దనూల్ ఆతాన్. పవులు వన్నిజ్ సువార్త వెహ్జిజ్, వాండ్రు యేసుక్రీస్తుజ్ నమ్మితాన్.

పవులు ఒనెసిముజ్ పిలమొను డగ్రు మర్జి ఫోక్సినాన్. నీను, ఒనెసిముజ్ సెమిసి ఒరెన్ తంబెరి లెకెండ్ వన్నిజ్ డగ్రు కిల, ఎండనిజ్ ఇహిజ, వాండ్రు ఏలు దేవుణు వెట నమందం ఆతికాన్ ఇజి యా ఉత్తమదు రాసి ఒనెసిము వెట ఫోక్సినాన్.

1 ¹⁻² క్రీస్తుయేసు వందిజ్ జెలిదు మన్ని పవులు ఇని నాను రాసిని ఉత్తం. మా వెట సువార్త పణి కిజిని మా సాంత కూలాయెన్ ఆతి పిలమొనుజ్, మా తజి లెకెండ్ మని ఆపియెజ్, మా వెట క్రీస్తు వందిజ్ సేవకిదెజ్ నండొ కస్టబడిజి కట్టాడిజిని అర్కిపుజ్, మీ ఇండ్రొ కూడిజి వాజిని దేవుణు సజమిదిజ్ రాసిని. మా కూలాయెన్ ఆతి తిమోతిబా నా వెట మిజి వెనబాతి లెకెండ్ వెహ్జినాన్.

³ మా బుబ్బు ఆతి దేవుణుని ప్రబు ఆతి యేసు క్రీస్తు దయా దర్మమదాన్ మీరు నిపాతిదాన్ మండ్రెజ్ సాయం కిపిర్.

దేవుణుదిజ్ వందనముకు

⁴⁻⁵ ఓ పిలమొను, నాను నిజి ఒడిబిజి పార్దనం కినివలె, నా దేవుణుదిజ్ ఎస్తివలెబా వందనముకు వెహ్జిన. ఎండనిజ్ ఇహిజ, లోకుర్ నజి వెహ్జినార్ నీను ప్రబు ఆతి యేసుజ్ నమ్మిజిని ఇజి. దేవుణుదిజ్ నమ్మిత్తి వరిజ్ విజెరిజ్ ప్రేమిస్సి ఇజి. దిని వందిజ్ నాను దేవుణుదిజ్ వందనముకు వెహ్జిన. ⁶ క్రీస్తు వందిజ్ నీను నమ్మిత్తి సజతిజ్ మహివరిజ్ ఉసార్దాన్ వెహ్జెజ్ ఇజి నాను పార్దనం కిజిని. అయావలె దేవుణు మజి సీజిని విజా నెగ్గి ఇనాయముకు నీను పూర్తి నెస్తిలె. యేసు క్రీస్తు వెట మాటు కూడితి మనితానె దేవుణు అయా ఇనాయముకు మజి సీనాన్. ⁷ ఓ తంబెరి, దేవుణుదిజ్ నమ్మిత్తి వరిజ్ నీను ప్రేమిసి, వరి పాణమిదిజ్ నిమాలం కిబిస్ల. ఆహె, నీను నజి నండొ సర్ద కిబిస్తిదె ఆదరిస్తి.

పవులు ఒనెసిము వందిజ్ బతిమాలజినాన్.

⁸⁻¹⁰ అందెజె, క్రీస్తు నజి సీతి అతికారముదాన్ నీను కిదెజ్ మని పణి కిల ఇజి ఆడ్ర సీదెజ్ నజి అక్కు మనాద్. గాని నాను నిజి బతిమాల్జిన. ఎండనిజ్ ఇహిజ, నీను దేవుణుదిజ్ నమ్మిత్తి వరిజ్ ప్రేమిస్సికి ఇజి నాను నెసిని. డొక్ర ఆత, ఏలు క్రీస్తుజ్ సేవ కిని వందిజ్ జెలిదు మని పవులు ఇని నాను నిజి బతిమాల్జిన. నా మరిన్ లెకెండ్ మని ఒనెసిముజ్ సాయం కిని వందిజ్ నాను బతిమాల్జిన. నాను గొలుస్కాణిజ్ మహివలె వాండ్రు నా మరిన్ లెకెండ్ ఆతాన్. నానె వన్నిజ్ దేవుణు దరొట్ తత. ¹¹ వాండ్రు † ముజాల, నిజి ఎండనిజ్ పణిదిజ్ రెఇకాన్. ఎండనిజ్ ఇహిజ, వాండ్రు నిజి డిస్తాండ్రె సాహాన్. గాని ఏలు నిజిని నజి పణిదిజ్ వాతికాన్ ఆతాన్.

¹² నజి నండొ ఇస్టం ఆతి వినిజ్ నీ డగ్రు మర్జి ఫోక్సిన. ¹³ సువార్త వెహ్జిన వందిజ్ నాను గొలుస్కాణిజ్ మనివలె, నజి సాయం కిదెజ్ వినిజ్ నా డగ్రు ఇడెడెజ్ నజి ఇస్టం మనాద్. ఎండనిజ్ ఇహిజ, విన్ని సాయం నీను కితి లెకెండ్ ఆదెజ్. ¹⁴ గాని నీను వెహ్ఎండ నాను వినిజ్ ఇబ్బె ఇడెఎ. ఎండనిజ్ ఇహిజ, నా వందిజ్ నీను కిని ఇని మేలుబా నాను డటిసి వెహ్జెజ్ ఇజి ఆమాట్. గాని నిజి ఇస్టం ఆతివజ, పూర్తి మన్నుదాన్ కిదెజ్.

¹⁵⁻¹⁶ వాండ్రు మర్జి వానిక నీ డగ్రు ఎలాకాలం మంజిని వందిజ్ నెను. వాండ్రు సెగం కాలం దూరం ఆత మహాన్. అందెజె ఏలుదాన్ వాండ్రు నీ వెట్టివణి కిని వన్నిలెకెండ్ ఆవన్. దన్నిజ్ ఇంక నండొ ఇస్టం మని ఒరెన్ తంబెరి లెకెండ్ మనాన్. నజి వన్ని ముస్సు ఒరెన్ తంబెరి లెకెండ్ నండొ ఇస్టం మనాద్. గాని వన్నిజ్ నిజి ఒదె ఇస్టం మంజినాద్లె. ఒరెన్ వెట్టివణి కిని వన్ని వజ ఇస్టం మంజినాద్లె. యేసుప్రబు వెట కూడితి మని దనితాన్ ఒరెన్ తంబెరి వజబా ఇస్టం మంజినాద్లె.

¹⁷ అందెజె క్రీస్తు వందిజ్ నీ వెట జత కూడిజి పణికినికాన్ ఒరెన్ ఇజి, నజి ఒడిబిజి, నీను నజి ఎలాగ డగ్రు కినిదొ, అయా లెకెండ్ వన్నిజ్ డగ్రు కిల.

¹⁸ వాండ్రు నిజి ఇని తప్పు కితిజనొ, నిజి అప్పు మర్జి సీదెజ్ మహిజనొ, అయాక నా ముస్సు మోవ్ల. ¹⁹ పవులు ఇని నాను నా సాంత కీదాజె రాసిని. నీను దేవుణు దరొట్ వాదెజ్ నానె సాయం కిల. అందెజె నీ కొత్త బత్తు వందిజ్, నజి నీ బత్తునె సీదెజ్ మనాద్. గాని నాను అయాక లోన్వ. వాండ్రు సీదెజ్ మనికెజ్ నాను తిరిస్సు. ²⁰ ఓఓ తంబెరి, యేసుప్రబు వెట మజి మని సమందముదాన్, నీ బాణిజ్ నాను యా సాయం కోరిజిన. యేసుప్రబు వెట కూడితి మని దనితాన్ వన్నిజ్ డగ్రు కిజి నజి సర్ద కిబిస్ల. ²¹ నాను వెహ్కెజ్ నీను తవ్ఎండ కిని ఇజి నాను నెసిని. అందెజె నాను నిజి రాసిని. ఒఒ, నాను వెహ్కె దని ముస్సు నీను నండొ కినిలె ఇజి నాను నెసిని.

† ఒనెసిము ఇని పేరుదిజ్ అర్దం పణిదిజ్ వానికాన్ ఇజి.

²² జెలిదాన్ నజీ డి:స్సి వందిజ్ మీరు పార్దనం కిజినిదెర్. మీ పార్దనం దేవుణు వెంజి, మీ డగు మర్జి వాదెజ్, దేవుణు సాయం కినాన్ ఇజి నాను కోరిజిన. అందెజె నా వందిజ్ ఉండ్రి బాడ్డి: తయార్ కిఅ.

²³ యేసు క్రీస్తుజ్ వెప్పిని వందిజ్ నా వెట జెలిదు మని ఎవవు నిజి వెన్బాతి లెకెండ్ వెప్పినాన్. ²⁴ అయాలెకెండ్, నా వెట సేవ పణి కిజిని మార్కు, అరిస్తార్కు, దెమ, లూక ఇనికార్బా నిజి వెన్బాతి లెకెండ్ వెప్పినార్.

²⁵ వ్రబు ఆతి యేసుక్రీస్తు దయా దర్మం మిజితోడు మనీద్.

మార్కు

ఇస్రాయేలు లోకుర్ అయ్యగుప్పు దేసమ్దు వెటిపణి కిజి మహార్. వారు నండొ బాదెజ్ ఆజి మహార్. దేవుణు ఇస్రాయేలు లోకురిజ్ అయ్యగుప్పు దెసమ్దాన్ డిస్పిసి, కానాను దేసమ్దు ఒత్తెజ్ ఇజి, మోసె వరిజ్ నడిపిసి తత్తాన్. కానాను దేసమ్దె వరిజ్ సీన ఇజి దేవుణు వరిజ్ ఒట్టు కిత్తాన్, వారు పయనం కిజి మహి వలె, మోసె వెట దేవుణు వరిజ్ పది ఆద్రెజ్ సీజినాన్. దన్ని వెట దేవుణు వెహినాన్, "నాను వరి నడిమి మండ్రెజ్ ఇజి నా వందిజ్ నెగ్గి ఇల్లు లెకెండ్ మంజిని ఉండ్రె గుడారం తొహ్లాజ్", ఇజి (నిర్గమ 25:8). యాక ఎలాగ తొహ్లాజ్ ఇజి గుర్తులెకెండ్ ఉండ్రె రూపు దేవుణు మోసెజ్ తోరిసినాన్. "నాను మిజి సుడఃజి, మీ వెట అబ్బె వర్గిన", ఇజి దేవుణు వెహ్లాన్ (నిర్గమ 29:42). అందెజె, దేవుణు మంజిని ఉండ్రె బాడ్డినె గుడారం. దేవుణు మంజిని బాడ్డిదిజ్ పోలిత మనాద్ యా గుడారం (ఏబ్ర 9:11).

పుజేరిజు - యూదురి మతమ్దు, లేవి తెగాదు మన్ని వరిజె, పుజేరిజు ఇజి ఏర్పాటు కినార్. మహి తెగాదికార్ విరిజ్ వరి దసమ్బాగం సీదెజ్. పుజేరిజు ఆవండ, పెరి పుజేరిజు ఇజి, విజేరె పుజేరిజు ముస్సు మన్ని పెరి పుజేరిజు ఇజి నండొండార్బా మహార్. ఉండ్రె కాలమ్దు విజేరె పుజేరిజు ముస్సు మన్ని పెరి పుజేరి ఇజి దేవుణు తోలిత ఏర్పాటు కిత్తాన్. పుజేరిజు దేవుణుదిజ్ ఒద్దె కేట ఆతి గదిదు డుగ్గిజి సేవ కిత్తార్. గాని విజేరె పుజేరిజు ముస్సు మని పెరి పుజేరి ఒరెండ్రె దేవుణుదిజ్ ఒద్దె కేట ఆతి గదిదు డుగ్గిజి సేవ కిత్తాన్. ఏలు యేసు మా వందిజ్ విజేరె పుజేరిజు ముస్సు మన్ని పెరి పుజేరి వజ వాత మనాన్.

గుడారం - దేవుణు మోసెజ్ తోరిస్తె రూపు వజ తయార్ కిత్తి ఉండ్రె టంబు గుడుఃసని దన్నిలొఇ మన్ని వనక వందిజ్నె గుడారం ఇనార్. ఇబ్బెనె దేవుణు వన్ని లోకుర్ వెట వర్గినాన్. టంబు గుడుఃసనిజ్ రుండి గద్దిజ్ మన్నె. దేవుణు వందిజ్ కేట ఆతి గదిని దేవుణు వందిజ్ ఒద్దె కేట ఆతి గది ఇజి రుండి మన్నె. యా రుండి గదిజ్బా దేవుణు వందిజ్ కేట ఆతి ఇట్టికెజె. ఉండ్రె తెరనె యా రుండి గదిజె కేట కేట కిత్తార్. తెర, సీరి దుపాటి లెకెండ్ మనాద్. రుండి గదిజె నడిమి డొయె ఆత మనాద్. అయాక నండొ దలం మన్నిక, నండొ సోకుదాన్ అట మనాద్.

దేవుణుదిజ్ కేట ఆతి గది - దేవుణుదిజ్ కేట ఆతి గది పెరిక. దన్నిజ్ 30 మూరెజ్ సీరిండ్, 15 మూరెజ్ ఒసార్ మహార్. దన్ని లొఇ దేవుణు ఎద్రు రొటెజ్ ఇడ్డి బల్ల ఉండ్రె కల్లితి సిల్లి బజారమ్దాన్ తయార్ కిత్తి దీవెజ్ డండి ఉండ్రె, దేవుణుదిజ్ దూపం సురుని మాలి పెటె ఉండ్రె, మన్నె.

1 దేవుణు ఎద్రు రొటెజ్ ఇడ్డి బల్ల

దేవుణుదిజ్ కేట ఆతి గదిది ఉణెర్ వడఃకాదు యా బల్ల మంజినాద్. యాక తుంబ మరాతి సెక్కెణిజ్ తయార్ కిత్తిక. దన్ని ముస్సు కల్లిసిల్లి బజారమ్దాన్ పూత రాస్త మనాద్. దేవుణు ఎద్రు ఇడ్డి రొటెజ్ ఎస్తివలెబ దన్ని ముస్సు మంజినె. యూదురి ఆసారం వజ యా రొటెజ్ ఉండ్రె పలెమ్దు, రుండి వర్సెజ్ ఆరు దొత్తిజ్ మంజినె. విస్తాంతి దినమ్దునె యాకెజ్ మారిసి మరి కొత్తకెజ్ ఇడ్డాన్. అయా పడాయి రొటెజ్ పుజేరిజునె తిండ్రెజ్. మరి ఎయెర్బా తిండ్రెజ్ ఆవద్. లేవి తెగాదు మన్నికారె, యా రొటెజ్ తయార్ కినార్. విస్తాంతి దినమ్దిజ్ ముజాల మన్ని రెయనె తయార్ కినార్.

2 కల్లితి సిల్లి బజారమ్దాన్ తయార్ కిత్తి దీవ డండిజ్

యా డండిజ్ కల్లితి సిల్లి బజారమ్దాన్ తయార్ కిత్తిక్కాదె. దేవుణు వందిజ్ కేట ఆతి గదిది డేబ్ర వడఃకాద్ మంజినాద్. యా కంతుదు ఏడు దీవెజ్ మంజినె. దన్ని ముజాల మన్ని బాడ్డిదు జాయ్ మండ్రెజ్నె యాక మంజినాద్. ఒరెన్ పుజేరి పెందల్కని పాదొయ్క కసిసి మంజినాన్.

3 దూపం సుర్ని మాలి పెటె

యాక, నడిమి డెర డగ్గు మంజినాద్. దన్ని ముస్సు దూపమ్నె ఆవండ మరి ఇనికబా కూలిజ్నె, జంతుజ్నె పార పాట్టిజ్నె సుర్దెజ్ ఆవద్. పెందల్కని పాదొయ్క దూపం సుర్నార్. గాని యాక దేవుణు వందిజ్ ఒద్దె కేట ఆతి గదిదు మన్ని ఉండ్రె వస్త. అందెజె, దేవుణు వందిజ్ ఒద్దె కేట ఆతి గదిదు మంజినక ఇజి ఒడఃబిజినార్.

దేవుణు వందిజ్ ఒద్దె కేట ఆతి గది - దేవుణు వందిజ్ ఒద్దె కేట ఆతి గది సీరిండ్, ఒసార్ ఉండ్రె సమానమ్నె. 15 మూరెజ్ మన్నె. దన్ని లొఇ మందసం మనాద్. మందసం ఇపొజ ఉండ్రె పెటె. యాక దేవుణు మనాన్ ఇజి ఉండ్రె గుర్తు లెకెండ్ మనాద్. దేవుణుదిజ్ కేట ఆతి గదిదిజ్నె ఒద్దె కేట ఆతి గదిదిజ్ నడిమి ఉండ్రె డెర అడ్డు మనాద్. యా డెర నండొ దలం మన్నిక. నండొ కరీదిక. దన్ని ముస్సు నండొ సోకుదాన్ అటార్. దేవుణు వందిజ్ ఒద్దె కేట ఆతి గదిదు విజేరె పుజేరిజు ముస్సు పెరి పుజేరి ఒరెండ్రె సానాన్. మరి ఎయెన్బ సాన్ఎన్. వాండ్రుబా ఏంటుదిజ్ ఒర్పునె, సానాన్. లోకురి విజేరె పాపమ్క వందిజ్ పూజ సీదెజ్ ఉండ్రె రోజా మనాద్. నాండిజె డెర పెర్జి, లొఇ సానాన్.

యేసు మా వందిజ్ విజేరె పుజేరిజు ముస్సు మన్ని పెరి పుజేరి ఆత మనాన్. వాండ్రు సిలువాదు సాతిజ్, పాపమ్క వందిజ్ ఎలాకాలం వందిజ్ ఉండ్రె సుట్టు పూజ లెకెండ్ వన్నిజ్ వాండ్రె ఒపజెవె ఆతాన్. యేసు సిలువాదు సాతి గడిఃయాదు దేవుణు గుడిఃదు దేవుణు వందిజ్ కేట ఆతి గదిదిజ్నె దేవుణు వందిజ్ ఒద్దె కేట ఆతి గదిదిజ్ నడిమి మహి డెర, ముస్సుహాన్ అడిఃగిదాక రుండి బదెజ్ ఆజి కింజితాద్. ముజాల డెర పెర్జి విజేరె పుజేరిజు ముస్సు మన్ని పెరి పుజేరి ఒరెండ్రె

దేవులు వెలు వర్గిడే లో ఇ డుగ్నాన్. గాని క్రీస్తు సాతిజ్, వన్ని ముస్సు నమకం ఇడ్డి ఎయెనబా దేవులు డగ్రు సాండ్రెజ్ అల్నాన్. మరి పూజదిజ్ అవ్నరమ్బా సిల్లెద్.

మందసం - మందసం ఉండ్రె దేవులు వందిజ్ కేట ఆతి గదిదు మన్ని వస్తు. మందసం ఇహిజ ఉండ్రె పెటెనె. యాక తుంబ మరాతి సెక్కెజాణిజ్ తయార్ కిజి దిన్ని ముస్సుని లో ఇ కల్తి సిల్లి బజారమ్దాన్ పూత రాసె ఆతమనాద్. దిన్ని ముస్సు ఉండ్రె మూత మనాద్. అయాకబా కల్తి సిల్లి బజారమ్దాన్ పూత రాసె ఆత మనాద్. అయాక మూత నెక్కి ముద కిడెజ్ ఆనాద్. లాగ్జి సాప్తెజ్బా ఆనాద్. యా మూతదిజ్ "కరుణ పీటం" ఇనార్. కరుణ పీటం ఇహిజ, పావమ్కు సెమిస్సి బాడ్డి ఇజి అర్లం. కరుణ పీటం ముస్సు కెరూబుజ్ మన్నె. కెరూబుజ్ లోకు మూర్తి వజనె మన్నె గాని రెక్కెజ్ మన్నె. యా కెరూబుజ్ ఇతాన్ ఉండ్రె ఆతాన్ ఉండ్రె ఎర్దు నిల్లి, కరుణ పీటమ్దునె బేసి రెక్కెజ్ కోరిస్తి మన్నె. కెరూబుజ్ నడిఃమి మొసాప్ మనాద్. కరుణా పీటం ముస్సు యా మొసాప్దు దేవులు మంజినాన్. పరిసుద్దుపూతి దేవులు యా లెకెండ్ బాన్ మంజినాన్. అందెజె ఇని సెఇకాన్నో తప్పు కిత్తికాన్నో బాన్ కరుణ పీటం డగ్రు సాండ్రెజ్ అల్వీన్. గాని దేవులు ఏర్పాటు కిత్తి విజేరి పుజేరిజ ముస్సు మన్ని పెరి పుజేరి ఒరెండ్రె సాండ్రెజ్ అల్నాన్. వాండ్రుబా వన్ని సాంత ఇష్టమ్దాన్నో, పూజ కిత్తి దన్ని నల సిల్లెండ్రె సాండ్రెజ్ ఆవ్. యా లెకెండ్ సిల్లెండ్రె సాహిజ వాండ్రు నిజం సానాన్.

మందసమ్దు మన్నికెజ్ - మందసమ్దు దేవులు మొసెజ్ సిత్తి వది ఆడ్రెజ్ రాస్తి మన్ని రుండి పల్కెజ్ మన్నె. కల్తిసిల్లి బజారమ్దాన్ తయార్ కిత్తి జగ్గుదు మన్నా మనాద్. మరి, సిగిరిస్తిమన్ని, అహరోసు డుడ్డుబా మనాద్.

మన్నా ఇహిజ తెలని గింజ లెకెండ్ మనాద్. తేనె నూనె లెకెండ్ రుసి మంజినాద్. దేవులు ఇస్రాయేలు లోకురిజ్ బిడిఃమ్ బూమిదు నడిఃపిసి మహివలె వరిజ్ తిండ్రెజ్ యాక సిత్తాన్.

వది ఆడ్రెజ్ రాస్తి ఇడ్డి పల్కెజ్ - యా పల్కెజ్ పణకాణిజ్ తయార్ కిత్తికెజె. నన్ని పల్కెజ్ ఆడ్రెజ్ గీస్త మనాద్.

డేవ - డేవ నడిఃమి బంబు గుడుఃస మనాద్. డేవ సుటులం వెల్గు మనాద్. దిన్నిజ్ ఉండ్రె సరి మానాద్. డేవదు సంత సుర్ని మాలి పీటని నోర్బాదెజ్ ఏరు ఇడ్డి పలెం మన్నె.

సంత సుర్ని మాలి పీట - యాక తుంబ మరాతి సెక్కెజాణిజ్ తయార్ కిత్తిక. దిన్ని ముస్సు కంసు పూత రాస్త మనాద్. ఇబ్బెనె సంద సుర్ని పూజ కినార్. యా పీటదు సిసు ఎస్తివలెబా నమ్బిండ్ కసీనె మండ్రెజ్, యా మాలి పీట సరి డగ్రు మంజినాద్.

నోర్బాదెజ్ ఏరు ఇడ్డి పలెం - యా పల్లెం సంద సుర్ని మాలి పీటని, గుడారం నడిఃమి మంజినాద్. యాకబా కంసుదాన్ తయార్ కిత్తిక. పుజేరిజ పూజ కిని ముజాల్నో, గుడారమ్ లో ఇ సాని ముజాల్నో నోర్బాదెజ్ ఏరు ఇడ్డికాదె యాక.

ఏబ్రి లోకురిజ్ రాస్తి ఉత్తం

నెల్ల కిబిసినిక

ఏబ్రి లోకురిజ్ రాసిని ఉత్తమ్నె యాక. ఏబ్రి లోకుర్ ఇహిజ, క్రీస్తు ముస్సు నమకం ఇట్టి యుదురి లోకుర్. యా ఉత్తం రాస్తికాన్ ఎయెన్ ఇజి తెలివ్. యేసు ప్రబునె, దూతారిజ్ ఇంక మొసెజ్ ఇంక, మొసె సితి రూలు వజ పుజేరి వణి కిజిని పెరి పుజేరిజ ఇంక గొప్ప పెరికాన్ ఇజి యా ఉత్తమ్దు వెస్సినాద్. పూజెజ్ లోకురి పావమ్కు సాన్పిన్క. గాని యేసు ప్రబు పూజ ఆతి దన్నితాన్నో లోకురి పావమ్కు సానె. వన్ని నలదాన్నె, లోకుర్ సుబ్బురం ఆనార్. దేవులు డగ్రు దయ్నమ్దాన్ మండ్రెజ్ అల్నాన్. అయాలెకెండ్, కొత్త ఒప్పమానం నడిఃపిస్సికాండ్రె యేసు ఇజి వెస్సినాద్. మరి దేవులు ముస్సు నమకం ఇట్టి పూర్బమ్దు బత్తిజి మహి నండ్రెండాన్ వరిజ్ వెస్సినార్. కండ్రెవెరిదు, నమ్మితి లోకుర్ ఎలాగ మండ్రెజ్ ఇజి యా ఉత్తమ్దు వెస్సినాద్.

1 పూర్బమ్దు, ఆఇ ఆఇ నండ్రె సమయమ్దు, నండ్రె రకమ్కాణిజ్, దేవులు ప్రవక్తరు వెట మా అనిగొగొరిజ్ వర్గితాన్. 2 గాని యా కండ్రెవెరి దినమ్కాజ్, వాండ్రు వన్ని మరిన్ వెట మజి వర్గితాన్. వన్ని వెటనె బూలోకమ్ని దని లో ఇ మనికెజ్ విజా దేవులు తయార్ కిత్తాన్. వన్నిజె, విజా దనిజ్ అక్కు మరికాన్ ఇజి ఏర్పాటు కిత్తాన్. 3 దేవులు గొప్ప పెరికాన్ ఇజి తోరిస్సికాండ్రె మరిన్. వన్ని లెకెండ్ వీండ్రు మనాన్. గొప్ప సత్తు మని వన్ని మాటదాన్, బూలోకమ్దు మరి విజా వన్నాజ్ వీండ్రు నడిఃపిసినిన్. లోకురి పావమ్కు నోర్దెజ్ వాండ్రు సాతి వెనుక, గొప్ప పెరి దేవులు ఉణెర్ పడఃకాదు అతికారమ్దు బస్తాన్. 4 అందెజె, వాండ్రు దూతార్ ముస్సు గొప్ప పెరికాన్ ఆతాన్. దూతార్ పేర్కు ముస్సు దేవులు వన్నిజ్ సితి పేరు గొప్ప పెరిక మని లెకెండ్, వాండ్రు పెరికాన్ ఆతాన్. 5 ఎందనిజ్ ఇహిజ, దేవులు యేసుప్రబుజ్నె ఆవ్, వన్ని దూతారిజ్ ఎయెరిజ్బా ఎసెజ్బా వెహ్ఎతాన్, "సిను నా మరిన్. నేండ్రు నానె సి బుబ్బు ఆత మన", † ఇజి. మరి, దేవులు దూతారిజ్ ఎయెరిజ్బా ఎసెజ్బా వెహ్ఎతాన్", నానె వన్ని బుబ్బు ఆన. వాండ్రె నా మరిన్ ఆనాన్లె", †† ఇజి. 6 మరి, దేవులు వన్ని లోల్సుర్ కొడెఃదిజ్ యా లోకమ్దు తపిసిని వలె, వెస్సినాన్, "దేవులు దూతార్ విజెరి వన్నిజ్ పాగిడిఃజి మాడిఃస్టెజ్వలె", † ఇజి. 7 దూతార్ వందెజ్ వెస్సినవలె, వాండ్రు ఈఘు వెస్సినాన్, "గాలి లెకెండ్ వన్ని దూతారిజ్ తయార్ కిజినాన్, కసిస్సి సిను లెకెండ్, వన్ని వణి మణిసిరిజ్ తయార్ కిజినాన్", †† ఇజి. 8 గాని వన్ని మరిన్ వందిజ్ ఈఘు వెస్సినాన్, "ఓ దేవులు, సిను బన్ని సిమానం అంతు సిల్లెండ్రె ఎల్లాకలం మంజినాద్. సిను సితి నిజాయితిదాన్ రాజా వజ ఏలుబడిః కిని. 9 సిను నిజపూతి దనిజ్ ప్రిమిస్తి మని. సెఇ దనిజ్ దూసిస్తి మని. అందెజె, నీ దేవులు ఆతి దేవులు నిజి ఎర్గిసి సర్ద ఆని గొప్ప గనం సిత్తాన్. యాక నీ జత మని వరిజ్ సితి దన్నిజ్ ఇంక నండ్రె గొప్ప పెరిక", †† ఇజి, దేవులు మరిన్ వందిజ్ వెస్సినాన్. 10 వాండ్రు మరి వెస్సినాన్, "ఓ ప్రబువా, లోకం పుటిన్ఎండ్రె ముజాలె, యా లోకమ్దిజ్ పునాది ఇడ్డికి నీనె. ఆగాసం తయార్ కిత్తికి నీనె. 11 అయాలెకెజ్ విజా నాసనం ఆనె. గాని సిను మంజిని. పాత వణిదిజ్ రెండ్రె పడఃయిక ఆనిలెకెండ్ అయాలెకెజ్ విజా వణిదిజ్ రెండ్రె పడఃయికెజ్ ఆనె.

† 1:5 కీర్తన 2:7. †† 1:5 1సము 7:14; 1దినరు 17:13. ‡ 1:6 ద్వితీ 32:43. †† 1:7 కీర్తన 104:4. †† 1:9 కీర్తన 45:6,7.

12 పంసె మడఃత కినిలెకెండ, నీను వన్యూజ్ మడఃత కిని. పాత మారిసిని లెకెండ, వన్యూజ్ మారిసిని. గాని నీను ఎలాకాలం ఉండ్రె లెకెండ మంజిని. నీను ఎసెజ్బా డొక్ర ఆఇ", † ఇజి. 13 దేవుణు వన్ని దూతార్ ఎయెరిజ్బా ఎసెజ్బా వెహ్-ఎతాన్, "నాను నీ పగాతి వరిజ్ నీ పాదమక అడిగి ఇడ్మిదాక, నీను నా ఉణెర్ వడఃకాద్ మసి మన్ల", †† ఇజి. 14 అహిజ, దూతార్ ఎయెర్? వారు విజెర దేవుణుదిజ్ సేవ కిని ఆత్మెజ్నె. దేవుణు రక్సిసిని వరిజ్ సాయం కిదెజ్, వాండ్రు ఫోక్సికారె.

యేసు రక్సిస్నాన్ ఇని నిజమాతి పెరి సజతి నెక్సిఫాక్మండ జాగర్ల వెండ్రెజ్.

2 అందెజె మాటు వెహ్-మని నిజమాతి సజతిజ్, మరి నండో జాగర్లదాన్ వెండ్రెజ్ వలె. ఎండనిజ్ ఇహిజ, దని బాణిజ్ దూరం ఆవండ మంజిని వందిజె. 2 దేవుణు దూతారిజ్ వాండ్రు వెహ్-పిస్తి మాటెజ్, నిజం ఇజి రుజాప్ ఆత మనాద్. అయా మాటెజ్ తప్పికాన్, లోజిఇకాన్ ఎయెన్ ఆతిజ్బా, తగితి సిక్కు వన్నిజ్ దోహ్-క్త మనాద్. 3 అహిజ, దేవుణు లోకురిజ్ సిక్కుదాన్ ఎలాగ గెల్పెస్తిజ్ ఇజి వెహ్-ని ముకెలమాతి బోద మాటు నమ్మిదెజ్ కెఇతిజ, అయా సిక్కుదాన్ ఎలాగ త్పు ఆదెజ్ అట్నాట్? గెల్పెస్తి వందిజ్ మని యా బోద ప్రబునె తొలిత వెహ్-న్. వాండ్రు వెహ్-కెజ్ వెహికార్, అయాక నిజం ఇజి మజి రుజాప్ కిత్తార్. 4 మరి, దేవుణుబా విజా రకమ్కాణి సత్తుమని వణిజ్, గొప్ప బమ్మాని వణిజ్ కిజి రక్కుణ వందిజ్ వెహ్-కె నిజం ఇజి రుజాప్ కిత్తాన్. వన్నిజ్ ఇస్టం ఆతివజ, దేవుణు ఆత్మెజ్ సేబాజి సేజి దేవుణు రుజాప్ కిత్తాన్.

యేసుప్రబునె లోకురిజ్ రక్సిస్సికాన్.

5 వాజిని కాలమ్ది లోకం ఏలుబడిః కిదెజ్ దేవుణు, దూతారిజ్ ఒవజెప్-ఎతాన్. పరలోకం వందిజె మాటు వర్గిజినాట్. 6 గాని దేవుణు మాటదు ఎంబెన్-ఎయెండ్రె డటిసి ఈహు వెహ్-నాన్, "ఓ దేవుణు, నీను ఎత్తు కిదెజ్ లోకు ఏవటిదికాన్? నీను బాగ సుడెదెజ్ లోకు ఏవటిదికాన్? 7 నీను దూతారిజ్ ఇంక వన్నిజ్ సణెం ఇజ్రికాన్ కితి. నీను వన్నిజ్ పెరికాన్ కితి. గన్-రవమ్దిజ్ తగ్గికాన్ లెకెండ కితి. 8 విజా వన్యూజ్ ముస్సు, వన్నిజ్ అతికారం సీతి' ‡. లోకురిజ్ విజా వన్యూజ్ ముస్సు దేవుణు అతికారం సీతి", ఇజి వెహ్-నాన్. ఇహిజ, విజా వన్యూజ్ ముస్సు అతికారం వన్నిజ్ మనాద్. గాని ఏలు, లోకుర్ విజా వన్యూజ్ ముస్సు అతికారం కిజినిక తొవల్. 9 గాని ఏలు, యేసుజ్ గొప్ప గనమ్దాన్, గొప్ప గన్-రవమ్దాన్ దేవుణు పెరికాన్ కితిక మాటు సుడెజినాట్. ఎండనిజ్ ఇహిజ, వాండ్రు నండో బాదెజ్ ఓరిసి సాతాన్. వన్నిజ్ దూతారిజ్ ఇంక సణెం దేవుణు ఇజ్రికాన్ కిత్తాన్. ఎండనిజ్ ఇహిజ, వాండ్రు యా లెకెండ లోకుర్ విజెరె వందిజ్ సాదెజ్. యా లెకెండ, దేవుణు దయా దర్మం కిత్తాన్. 10 విజా, దేవుణు తయార్ కిత్తాన్. విజా వన్నివందిజె తయార్ కిత్తాన్. యేసుప్రబు బాదెజ్ ఓరిసి సాజిని దనితాన్ దేవుణు వన్నిజ్ పూర్తి కిజినాన్. వాండ్రు పూర్తి ఆతికాన్ ఆతాన్. అయ లెకెండ యేసుజ్ పూర్తి కిజినిక తగ్గికాదె. ఎండనిజ్ ఇహిజ, నండో కొడెరిజ్ వాండ్రు ఎలాకాలం దేవుణు వెల బత్సిని బత్కుదు నడిపిస్తిజ్. యేసునె వరిజ్ రక్కుణదు నడిపిస్సికాన్. 11 వాండ్రె లోకురిజ్ దేవుణు వందిజ్ కేట ఆతి వరి లెకెండ కిజినాన్. వన్నిజ్నె వాండ్రు దేవుణు వందిజ్ కేట కిత్తి లోకురిజ్, బుబ్బు ఒరెండ్రె. అందెజె వరిజ్ తంబెరిజు ఇజి కూక్తెజ్ యేసు సిగు ఆవన్. 12 వాండ్రు దేవుణుదిజ్ వెహ్-నాన్, "ని వందిజ్ నాను నా తంబెరిజ వెహ్, నీ లోకుర్ కూడెనిబాన్, నాను నిజి ఫాగిడిస" † ఇజి. 13 మరి వాండ్రు వెహ్-నాన్, "నాను వన్ని ముస్సు నా నమకం ఇడ్" †† ఇజి. మరి బా వెహ్-నాన్, "ఇదిలో, నానుని దేవుణు నజి సీతి కొడెరి", ††† ఇజి. 14 దేవుణు కొడెరి నలని, కండదాన్ తయార్ ఆతి లోకుర్నె. అందెజె యేసుప్రబునె నలని, కండదాన్ తయార్ ఆతి లోకు వజ ఆతాన్. ఎండనిజ్ లోకు ఆతాన్ ఇహిజ, ఒరెన్ లోకు వజనె సాదెజ్ అట్నాన్. వాండ్రు సాజిని, సావు ముస్సు అతికారం మని సయ్-తానుజ్ సిల్లెండ కిదెజ్ అట్నాన్. 15 అయా లెకెండ, సావుదిజ్ తియెల్ ఆజి, వరి బత్కు విజా సావు తియెల్దిజ్ అడిగి మని విజెరిజ్ డిస్-పిస్తిజ్ అట్నాన్. 16 నిజమె, వాండ్రు దూతారిజ్ సాయం కివన్. గాని అబ్రాహము ††† తగ్గాది వరిజ్ సాయం కిజినాన్. 17 దిన్ని వందిజ్, వాండ్రు ఎల్లగాతిజ్బా వన్ని తంబెరిజె లెకెండ ఆదెజ్వలె. ఎండనిజ్ ఇహిజ, వాండ్రు నండో కనికారం మని, నమ్మిదెజ్ తగ్గి పెరి పుజెరి ఇజి, దేవుణుదిజ్ సేవ కిదెజ్ మరి, లోకురి పావమక వందిజ్ పూజ కిదెజ్. 18 వాండ్రె పరిసెజ్ కిబె ఆజి, బాదెజ్ ఆతాన్. అందెజె పరిసెజ్ కిబె ఆని వరిజ్ సాయం కిదెజ్ అట్నాన్.

యేసు మోసె ముస్సు పెరికాన్.

3 అందెజె దేవుణు వందిజ్ కేట ఆతి, దేవుణు కూకె ఆతి తంబెరిజాండె, యేసుప్రబుజ్ ఎత్తు కిదు. వాండ్రె, దేవుణు ఫోక్తి అపాస్టుడుః ఇజి, విజెరె పుజెరిజ ముస్సు పెరి పుజెరి ఇజి, మాటు నమ్మిజి ఒవుకొడిజినాట్. 2 దేవుణు కుటుమ్ది వరిజ్ విజెరిజ్ మోసె నమ్మకమ్దాన్ సేవ కితి లెకెండ, వీండ్రుబా వన్నిజ్ వణి ఒవజెప్తి దేవుణుదిజ్ నమ్మకమ్దాన్ సేవ కిత్తాన్. 3 ఉండ్రె ఇల్లుదిజ్ ఇంక ఇల్లు తోహ్-సి వన్నిజె గొప్ప గనం వానాద్. అయాలెకెండ, మోసె ఇంక యేసునె గొప్ప గనమ్దిజ్ తగ్గికాన్. 4 నిజమె, విజా ఇల్కుబా, ఎయెండ్రె ఒరెన్ తోహ్-సి. గాని విజా తోహ్-సికాన్ దేవుణునె. 5 దేవుణు కుటుమ్ది వరిజ్ విజెరిజ్, ఒరెన్ సేవవణిమణిని వజ మోసె నమ్మిదెజ్ తగ్గికాన్ ఆతాన్. వాని కాలమ్దు దేవుణు వెహ్-జ్ మనికెజ్ వాండ్రు వెహ్-న్. 6 గాని దేవుణు కుటుమ్ది వరి ముస్సు అతికారం మని మరిన్ వజ, క్రీస్తు నమ్మిదెజ్ తగ్గికాన్. మాటు దయ్-రమ్దానె నిల్చి, మాటు ఎద్రు సుడెజిని ఆసదిజ్ డిస్-ఎండ గటిజ అసిని మహిజ, మాటు వన్ని కుటుమ్దికాట్.

నమ్మిఇతి వందిజ్ సారిసి సారిసి వెహ్-నిక.

7-8 అందెజె, దేవుణు ఆత్మ ఈహు వెహ్-ని లెకెండ, "నేండ్రు మీరు దేవుణు వెహ్-నిక వెహిజ, అయా దినమ్దు బీడిమ్ బూమిదు దేవుణుదిజ్ లోజిదెజ్ కెఇత్తి వలె, వన్నిజ్ పరిని కితివలె, మీ మన్సుజ్ గర్ల ఆతి లెకెండ గర్ల కిమాట్.

† 1:12 కీర్తన 102:25-27. †† 1:13 కీర్తన 110:1. ‡ 2:8 కీర్తన 8:4-6. †† 2:12 కీర్తన 22:22. †† 2:13 యెసయ 8:17. ††† 2:13 యెసయ 8:18. ††† అబ్రాహము తగాతికార్ ఇజి వెహ్-నిక దేవుణు లోకుర్ వందిజె.

9 అబె, నాల్వయి పంటెజ్ నాను కితి గొప్ప బమ్మ అతి పణిజ్ సుడెఃతిజ్ బా, మీ అనిగొగొర్ నజి పరిస కిజి నజి లొజిదెజ్ కెవతార్.

10 అందెజె నాను అయా తరమది లోకుర్ వెట కోపం ఆతానె వెహ్. "ఎస్తెవలెబా పరి మన్ను నా బాణిజ్ దూరం ఆజినాద్, నాను వెస్సొనికెజ్ వారు వెన్ఎర్", ఇజి.

11 అందెజె నాను నండొ కోపం ఆజి ఉండ్రె ఒట్టు కిత, 'వారు ఎసెజ్ బా నా డగ్రు వాజి నా వెట రోమ్ బెవెర్లె', † ఇజి. 12 తంబెరిజాండె, మీ లొఇ ఎయెన్ వన్నిజ్ బా, బత్తిజిని దేవుణు బాణిజ్ దూరం కిబిన్ని నమకం సిలి, సెఇ మన్ను మన్ఎండ జాగర్త సుడెఃదు. 13 గాని, విజా దినమ్ కాజ్ మీరు ఒరెన్ మరి ఒరెన్ వన్నిజ్ బుద్ది వెస్సొ, ఆదరిసి మండ్రెజ్ వలె. 'నేండ్రు' ఇజి వెస్సొ దినం విజా, అయాలెకండె కిజి మండ్రెజ్ వలె. ఎండనిజ్ ఇహిజ, మీ లొఇ ఎయెన్ బా పాపమ్ దాన్ మొసెం ఆజి, మన్ను గలి ఆవండ మంజిని వందిజ్ ఆదరిసి మండ్రెజ్ వలె. 14 మాటు, క్రీస్తుజ్ తొలిత నమకం ఇట్టివలె వన్నిజ్ నమ్మిత్తి లెకెండె, ఆకర్దాక డటుం నమకమ్ దాన్ మహిజనె, మాటు క్రీస్తు వెట జత కూడిఃతి మనికాల్.

15 దేవుణు మాటదు ముజాలె వెస్సొని లెకెండె, "నేండ్రు, మీరు దేవుణు వెస్సొనిక వెహిజ, దేవుణుదిజ్ లొజిదెజ్ కెఇత్తి వలె మీ మన్ను గర్త అతిలెకెండె గర్త కిమాల్" ††. 16 దేవుణు వెస్సొనిక వెంజి, వన్నిజ్ లొజిదెజ్ కెఇతికార్ ఎయెర్? ఎయెర్ ఇహిజ, అయగొప్ప దేసెమ్ దాన్ మోని డిస్సిసి, నడిఃసిసి తతి లోకుర్ విజెరె గదె. 17 ఎయెర్ వెట దేవుణు నలవయ్ పంటెజ్ కోపం దాన్ మహాన్? పాపం కిజి, బిడిఃమ్ బూమిదు సాతి పరివెట గదె కోపమ్ దాన్ మహాన్. 18 "వారు ఎసెజ్ బా నా డగ్రు వాజి నా వెట రోమ్ బెవెర్లె", ఇజి దేవుణు ప్రమానం కితివలె ఎయెర్ వందిజ్ వెహ్? వాండ్రు వెహ్ కెజ్ వెన్ ఇతి పరి వందిజ్ గదె వెహ్. 19 అందెజె, వారు నమ్మిఇతిజ్ నె, దేవుణు డగ్రు సాన్ని రోమ్ బిదెజ్ అల్వెతార్ ఇజి మాటు నెస్సాల్.

దేవుణు లోకురిజ్ రోమ్ బిదెజ్ సిత మనాన్

4 దేవుణు డగ్రు సాన్ని వన్ని వెట రోమ్ బిదెజ్ అల్వెనార్లె ఇజి వాండ్రు కితి ఒట్టు ఏలుబా మనాద్. అందెజె, మీ లొఇ ఎయెన్ వన్నిజ్ బా అయా ఒట్టు కితిక తప్పి సాన్ఎండ మండ్రెజ్, మాటు జాగర్త మంజినాల్. 2 ఎండనిజ్ ఇహిజ, బిడిఃమ్ బూమిదు నడిఃతికార్ వెహిలెకెండెనె మాటుబా సువార్త వెహ్ మనాల్. గాని వారు వెహి మని దేవుణు మాట, పరిజ్ ఎండనిజ్ పణిదిజ్ రెవతార్. ఎండనిజ్ ఇహిజ, వారు అయా మాట నమ్మివెతార్. 3 ఏలు అయాక నమ్మిత్తి మాటు, దేవుణు డగ్రు సాన్ని వన్నివెట రోమ్ బిజినాల్. యాక, వాండ్రు వెహ్ లెకెండెనె మనాద్. "అందెజె, నాను నండొ కోప ఆజి ఉండ్రె ప్రమానం కిత. 'వారు ఎసెజ్ బా నా డగ్రు వాజి రోమ్ బెవెర్లె', ఇజి. దేవుణు లోకం తయార్ కితి వలెహన్ అసి, వన్ని డగ్రు సాన్ని మాటు వన్నివెట రోమ్ బిదెజ్ వాండ్రు మా వందిజ్ తయార్ కితండ్రె మనాన్. గాని వాండ్రు ఆహె వెహ్. 4 ఎండనిజ్ ఇహిజ, దేవుణు మాటదు ఎంబెనొ ఏడు దినం వందిజ్ వెహ్. "దేవుణు విజా పణిజ్ పూర్తి కితండ్రె, ఏడు దినమ్ దు రొంబితాన్", ఇజి. 5 మరి, ముజాలె వెస్సొని మాటదు వెహ్. "వారు ఎసెజ్ బా నా డగ్రు వాజి రోమ్ బెవెర్లె", † ఇజి.

6 ముజాలె సువార్త వెహి మనికార్, దేవుణు డగ్రు సాన్ని వన్నివెట రోమ్ బెవెర్లె. ఎండనిజ్ ఇహిజ, వారు నమ్మివెతార్. గాని, దేవుణు డగ్రు సాన్ని వన్ని వెట రోమ్ బెజ్ మహి నెగొండార్ మనార్. 7 అందెజె, దేవుణు, వన్ని డగ్రు సాన్ని వన్ని వెట రోమ్ బిదెజ్ మరి ఉండ్రె రోజా ఇట్టాండ్రె, 'నేండ్రు', ఇజి కూకాన్, దిన్ని వందిజ్, నండొ కాలం వెనుక దావీదు వెట వెహిస్సి వలె, ముజాలె వెహ్ అయా మాటనె వెహిస్సాన్. "నేండ్రు మీరు దేవుణు వెస్సొనిక వెహిజ, మీ మన్ను గర్త కిమాల్", †† ఇజి.

8 దేవుణు డగ్రు సాన్ని వన్నివెట రోమ్ బిదెజ్, యెహొసువ పరిజ్ నడిఃసిసి మంజిని కిహిజ, మరి ఉండ్రె రోమ్ ని దినం వందిజ్ దేవుణు వెనుక వెహ్ఎండ మహాన్ మరి. 9 అందెజె దేవుణు ఏడు దినమ్ దు రోమ్ బితిలెకెండె, లోకుర్ బా రోమ్ బిదెజ్ ఇజి వాండ్రు సిత మనాన్. 10 ఎండనిజ్ ఇహిజ, దేవుణు డగ్రు సాన్సి వన్ని వెట రోమ్ ని ఎయెన్ బా, దేవుణు వన్ని పణిజ్ పీస్తాండ్రె రోమ్ బితి లెకెండె, వాండ్రుబా వన్ని పణిజ్ పీస్తాండ్రె రోమ్ బిజినాన్. 11 అందెజె, దేవుణు డగ్రు సాన్ని వన్నివెట రోమ్ బిదెజ్ మాటు నండొ కష్టబడిఃజినాల్. ఎండనిజ్ ఇహిజ, ఇనాయేలు లోకుర్ దేవుణుదిజ్ లొజిఎండ అర్తిలెకెండె ఎయెన్ బా అర్ఎండ మండ్రెజ్.

12 ఎండనిజ్ ఇహిజ, దేవుణు మాట పాణం మనిక. నండొ నత్తు మనిక. రుండి దర్బ్ తెవుగు మని ఎలాగ మర్తి కుర్దెజ్ ఇంక ఒదె తెవుగు మనిక. దేవుణు మాట, లొఇ డుగిజి మన్నుదిజ్ గర్బమ్ దిజ్ ఎర్లిసి డూగ్గ సానాద్. అత్కుజ, ముల్వెజి ఎర్లిసినాద్. ఆలోసనమ్ కాజ్, మన్నుదు మని ఉదెనమ్ కాజ్ పరిక్చ కినాద్. 13 తయార్ ఆతి ఇనికబా దేవుణు బాణిజ్ డవె ఆదెజ్ అల్ఉ. విజా వన్ని కణకెజి ఎర్దు టెబాజ్ తోర్జినె, డాఃజ్ఎండ తోర్జినె వన్నిజె, మాటు కితి విజా వన్కా వందిజ్ లెక ఒవజెప్తెజ్ మనాద్.

యేసునె విజా పుజెరిజ మున్ను గొప్ప పెరి పుజెరి.

14 అందెజె, మాటు డటుం వెహ్సొని నమకం డిఃఎండ అసి మంజినాల్. ఎండనిజ్ ఇహిజ, ఆగాసం డాట్టి, దేవుణు డగ్రు సాహి విజెరె పుజెరిజ మున్ను మని పెరి పుజెరి ఒరెన్ మజి మనాన్. వాండ్రు దేవుణు మరిసి ఆతి యేసు. 15 మా విజెరె పుజెరిజ మున్ను మని పెరి పుజెరి, మజి మని తకుజ విజా నెన్ ఇకాన్ ఆవన్. గాని మజి వాజిని విజా రకమ్ కాణి పరిసెజ్, వన్నిజ్ బా వాతె. గాని వాండ్రు పాపం కివెతాన్.

16 అందెజె నండొ దయా దర్మం తోరిసిని దేవుణు బన్ని సిమనసం డగ్రు మాటు తియెల్ నిల్లెండ దయ్ రమ్ దాన్ సానాల్. అబె వన్ని కనికారం మజి దొహ్ నాద్. మజి అన్సరం మనివలె మజి సాయం కిదెజ్ వన్ని దయా దర్మం దొహ్ నాద్.

5 విజెరె పుజెరిజ మున్ను మని పెరి పుజెరిజబా పరి లోకుర్ నడిఃమిహానె దేవుణు ఎర్లిస్తాండ్రె, లోకుర్ వందిజ్ దేవుణుదిజ్ సేవ కిదెజ్, వాండ్రు ఎర్పాటు కినాన్. ఎండనిజ్ ఇహిజ, వారు లోకురి దేవుణుదిజ్ సీదెజ్. 2 విజెరె పుజెరిజ మున్ను మని పెరి పుజెరి, నెస్ఎండ తపు కినివరిజ్, సరి తప్పి సాని పరిజ్ సారీలి తోరిస్సెజ్ అట్టాన్. ఎండనిజ్ ఇహిజ, పరిజ్ మని తకుజ్ వన్నిజ్ బా మన్నె. 3 దిన్ని వందిజె, లోకురి పాపమ్ క వందిజె అవండ, వన్ని సాంత పాపమ్ క వందిజ్ బా, వాండ్రు పూజెజ్ సీదెజ్ మనాద్. 4 ఎయెన్ బా వన్నిజ్ వాండ్రె, విజా పుజెరిజ మున్ను మని పెరి పుజెరి ఇని పెరి గసం తపె ఆవన్. అహారోసుజ్ విజెరె

† 3:11 కీర్తన 95:7-11. †† 3:15 కీర్తన 95:7,8. ‡ 4:5 కీర్తన 95:11. †† 4:7 కీర్తన 95:7,8.

పుజెరిజ ముస్కు మని పెరి పూజెరి ఇజి దేవుణు ఏర్పాటు కితి లెకండ, దేవుణునె వన్నిజ్ ఏర్పాటు కిదెజ్ వలె. ⁵ అయాలెకండ, క్రీస్తుబా వన్నిజ్ వాండ్రె విజెరి పుజెరిజ ముస్కు మని పెరి పుజెరి ఇని యా పెరి గనం తపె ఆతాన్. గాని విజెరి పుజెరిజ ముస్కు మని పెరి పుజెరి ఇజి వన్నిజ్ ఏర్పాటు కితి దేవుణు వన్నిజ్ వెహ్సాన్. "నీను నా మరిన్. నేండ్రు నాను నీ బుబ్బు ఆత మన", ఇజి. ⁶ మరి, ఎంబెనోబా దేవుణు వెహ్సానాన్, "మెల్కీసెదెక్ మహీ లెకండ, నీను ఎల్లకాలం మని ఒరెన్ పుజెరి", ఇజి. ⁷ యేసు బూమిదు మహివలె, వన్నిజ్ సాపుదాన్ తపిస్సెజ్ అట్టి దేవుణుదిజ్ డటం అడఃబాజి, కణెర్ వాక్కి పార్లనం కిత్తాన్. వన్ని మొరో దేవుణు వెహ్సాన్ ఎండనిజ్ ఇహిజ వాండ్రు తియెల్దాన్ తగ ఆత మహాన్. ⁸ వాండ్రు దేవుణు మరిసి ఆతిజ్బా, వన్నిజ్ వాతి స్రమెజాణిజ్ దేవుణుదిజ్ లోజీదెజ్ వాండ్రు నెస్సాన్. ⁹ దేవుణు వన్నిజ్ పూర్తి కితివలె, వన్నిజ్ లోజిని వరిజ్ విజెరిజ్ రక్కిస్సికాన్ ఆతాన్. ¹⁰ మెల్కీసెదెక్ మహీ లెకండ, విజెరి పుజెరిజ ముస్కు మని పెరి పుజెరి ఇజి దేవుణు వన్నిజ్ ఏర్పాటు కిత్తాన్.

నమకమ్దాన్ అర్ఎండ జాగర్ల నుడఃదెజ్.

¹¹ దిన్ని వందిజ్ మరి నండ్రా వెహ్సాజ్ మజి మన్నె గాని, మీరు నిపాతిని అర్లం కిజినిదెర్. అందెజె నండ్రా వెహ్సాజ్ కస్టం ఆజినాద్. ¹² మీరు దేవుణుదిజ్ నమ్మిజి నండ్రా వంటెజ్ ఆజినాద్. ఏలు మహీ వరిజ్ బోదిస్సెజ్ మనికిదెర్ మీరు. గాని, దేవుణు మాటదు తొలిత నెస్సెజ్ మని నిజమాతి సజతిజ్ మరిబా నెస్సిస్సెజ్ ఎయెన్బా నెన్పిస్సాన్ మండ్రెజ్ వలె. పాలు ఉణిజిని లేత కొడోన్ లెకండ మీరు మనిదెర్. బోజనం ఉండెజ్ అట్ఇకిదెర్. ¹³ పాలు ఉణికాన్ ఎయెన్బా లేత కొడోనె. నిజమాతికెజ్ ఇనికెజ్ ఇజి నెన్పిసిని బోద నెన్ఎన్. ¹⁴ గాని పెరి వరిజె బోజనం మనాద్. నెగ్గెకెజ్, సెఇకెజ్ తేడ నెసి, నెగ్గెకెజ్ కిదెజ్ నెస్సిమనికారె వారు.

6 అందెజె, క్రీస్తు వందిజ్ తొలిత నెస్సి మహీ బోదెజె నెనినె మన్ఇండ, మరి పెరి మాటెజ్బా నెసి పిరినాట్. సాపుదు నడిపిసిని సెఇ వణిజ్ ఒప్పుకొడిఃజి డిసి సీజి, దేవుణు ముస్కు నమకం ఇడఃదెజ్ ఇజి మరి మరి వెహ్సాని మన్మాట్. ² బాప్తిసం లాగె ఆని దని వందిజ్, కికు ఇడ్డి దని వందిజ్, లోకుర్ సాపుదాన్ మర్జి నిజ్ దని వందిజ్, ఆకారదు దేవుణు సీని లిర్పు వందిజ్ మరి మరి వెహ్సాని మన్మాట్. ³ దేవుణుదిజ్ ఇస్టం ఇహిజ, మరి లాపు నెసి పిరినాట్. ⁴ ⁶ ఉండ్రె కాలమ్దు దేవుణు జాయ్దు మహికార్, వరలోకమ్ది ఇనాయం వందిజ్ బాగ నెస్సి మనికార్, దేవుణు ఆత్మ వెట కూడిఃతికార్, దేవుణు మాట నెగ్గె ఇజి నెస్సికార్ క్రీస్తు మర్జి వానివలె నమ్మిత్తి లోకురిజ్ నెస్సివలె మంజిని పెరి సత్తు వందిజ్ నెస్సికార్, వారు దేవుణు బాణిజ్ దూరం ఆతిజ, మరి పాపమ్కు ఒప్పుకొడిఃజిని వరిజ్ మర్జి తతెజ్ అట్ఎన్. ఎండనిజ్ ఇహిజ, వారు దేవుణు మరిసిజ్ మరి ఉండ్రె సులుబా నీలువాదు కుటిజాణిజ్ డెయ్జి, విజెరి ఎర్దు సిగు కిజిస్సాన్. ⁷ నిన్ని వరిజ్ వణిదిజ్ రెఇ బూమిదిజ్, పోలిస్సెజ్ ఆనాద్. ఎండనిజ్ ఇహిజ, ఎసెజ్ ఎసెజ్ అర్సిని పిరుదాన్ ఊద్ది బూమిదు, వంట వండిసిని వన్నిజ్ వణిదిజ్ వానిలెకండ బూమి వంట వండిసి సీనాద్. అయా బూమిదిజ్ దేవుణు దివిస్సాన్. ⁸ గాని అటెజ్ సాప్పుజ్ వండిసిని బూమి వణిదిజ్ రెఎన్. దేవుణు దనిజ్ తప్ఎండ సాయిపు సీనాన్ కడఃవేరిదు సిసుదాన్ నాననం మనాద్. ⁹ గాని తంబెరిజాండ్రె, మాపు యా లెకండ వెహ్సాజ్బా, మీరు అయాలెకండ ఆజెర్, ఇజి మాపు పూర్తి నమ్మిజినాప్. క్రీస్తు ముస్కు నమకం ఇడఃజి రక్కుణదు వాతి లోకుర్ కిని నెగ్గె వణిజె, మీరుబా కిజినిదెర్ ఇజి మాపు పూర్తి నెసినాప్. ¹⁰ దేవుణు అనెయం కినికాన్ ఆఎన్. మీరు వన్ని వందిజ్ కితి వణిజ్, వన్ని లోకురిజ్ సాయం కిజి, మరి మరి సాయం కిజి వన్నిజ్ తోరిసిని స్రేమ వాండ్రు పోఎన్. ¹¹ మీ లోఇ విజెరిదెబా, యా లెకండ కడఃవేరిదాక మండ్రెజ్ ఇజి మాపు ఆన ఆజినాప్. ఎండనిజ్ ఇహిజ, మీరు ఆన ఆజినికెజ్ విజా తప్ఎండ పూర్తి ఆదెజ్ ¹² మీరు బండెజ్ ఆదెజ్ ఇజి మాపు కోరిఎప్. గాని దేవుణు ముస్కు మని నమ్మకమ్దాన్, కస్టమ్కు ఓరిసినిదనితాన్ దేవుణు సీన ఇజి ఒట్టు కితికెజ్ దోహ్కీ వరిలెకండ మీరు ఆదెజ్ ఇజి కోరిజినాప్.

దేవుణు అబ్రాహముజ్ కితి ఒట్టు

¹³ దేవుణు అబ్రాహముజ్ నెగ్గెకెజ్ కిని ఇజి ఒట్టు కిత్తాన్. కితివలె వన్ని ముస్కు ఎయెన్బా పెరికాన్ సీలితిజ్, వాండ్రు వన్నిజె, తోడుః ఇడ్డెః ఆజి అబ్రాహముజ్ ఒట్టు కిత్తాన్. ¹⁴ వాండ్రు వెహ్సాన్, "నాను నిజి తపెండ దీవిసి, నిజి నండ్రా తెగ్గది వరిజ్ సీన", [†] ఇజి. ¹⁵ అబ్రాహము ఓరిసి కాప్ కిజి మహాన్. అందెజె దేవుణు సీన ఇజి ఒట్టు కితిక వన్నిజ్ దోహ్కాన్. ¹⁶ లోకుర్ ఒట్టు కినివలె వరిజ్ ఇంక పెరి వరిజ్, వాండ్రె నజి తోడుః ఇజి వెహ్సా ఒట్టు కినికార్. వరి నడిఃమి మని గొడుఃబెజ్ విజా ఉండ్రె ఒట్టుదాన్ సారలి ఆనె. ¹⁷ దేవుణు, వాండ్రు ఒట్టు కితిక దోహ్కెజ్ అక్కు మని వరిజ్, వన్ని ఉదెసం వాండ్రు కండెకీబా మారిన్ఎన్, ఇజి వరిజ్ టెటాజ్ నెన్పిసిని వందిజ్, వాండ్రు వన్నిజె తోడుః ఇడ్డెః ఆజి ఒట్టు కిత్తాన్. ¹⁸ అందెజె దేవుణు మజి వన్ని ఒట్టు సిత మనాన్. వన్నిజె తోడుః ఇడ్డెః ఆజి సిత మనాన్. యా రుండి సజలిజ్ మార్ఉ. ఎండనిజ్ ఇహిజ, దేవుణు అబద్దం వర్గిదెజ్ అట్ఎన్. అందెజె, దేవుణునె నా గతి ఇజి నమకం ఇడ్డి మజి, మా ఎర్దు ఇడ్డి మని ఆనదిజ్ డిఃఎండ అస్సెజ్ దయరం మంజినాద్. ¹⁹ మా పాణం ఇతల్ అతాల్ కర్లిఎండ, నెగెండ నిల్తెజ్ యా ఎర్దు సూణి ఆననె ఉండ్రె కన్నె లెకండ మనాద్. తెర వెన్యా మని దేవుణు వందిజ్ ఒదె కేట ఆతి గదిదు అయాక ఒనాద్. ²⁰ యేసు మా వందిజ్ మజి ఇంక ముజాలె అబె సాహాన్. మెల్కీసెదెకు మహివజ, వాండ్రు ఎలాకాలం ఒరెన్ విజెరి పుజెరిజ ముస్కు మని పెరి పుజెరి ఆత మనాన్.

పుజెరి ఆతి మెల్కీసెదెకు

7 యా మెల్కీసెదెక్ సాలెం పట్నమ్ది రాజా. విజా దని ముస్కు ఆతికారం మని దేవుణు పుజెరి. నండ్రా రాజారి ముస్కు విదెం కిజి గెలసి, అబ్రాహము వన్ని ఇండ్రె మర్జి వాజి మహివలె, మెల్కీసెదెక్ వన్నిజ్ దసూల్ ఆతండ్రె, దివిస్సాన్. ² అయావలె అబ్రాహము, వాండ్రు ఉద్దం కిజి గెలసి దోహ్కీ విజా వన్యాజ్ లోఇ మెల్కీసెదెకుజ్ దనంబాగం సితాన్. వన్ని పేరు తొలిత అర్లం ఇనిక ఇహిజ, సీతి నిజాయితిదాన్ ఏలుబడిః కిని రాజా. మరి ఉండ్రె అర్లం ఇనిక ఇహిజ సమాదనమ్దాన్ ఏలుబడిః కిని రాజా ఇజి. ఎండనిజ్ ఇహిజ, వాండ్రు సాలెం పట్నమ్ది రాజా. సాలెం ఇహిజ సమాదనం. ³ వన్ని అయిని అప్పాసి వందిజ్నో, వన్ని అనిగొగొర్ వందెజ్నో గుర్తు ఇనికెజ్ సిలు. వన్ని పుడుగు వందిజ్నో, పాపు వందిజ్నో తెలిఎన్. వాండ్రు దేవుణు మరిసి లెకండ ఎల్లకాలం ఒరెన్ పుజెరి. ⁴ యా మెల్కీసెదెకు ఎసా పెరికాన్ ఇజి ఎత్తు కిదు. దేవుణు ఏర్పాటు కితి లోకుర్ లోఇ గొప్ప పెరి అనిగొగొ ఆతి అబ్రాహము, విదెమ్దు గెలసి వన్నిజ్ దోహ్కీ విజా

† 6:14 అది 22:17.

వన్నాజ్ లో ఇ వన్నిజ్ దసంబాగం సితాన్. 5 మోసె సీతి రూలు వజ, లేవి తెగ్గదు పుట్టి పుజెరిజు ఆతికార్, ఇస్రాయేలు లోకుర్ బాణిజ్ దసంబాగం లోసినార్. ఇహిజ వారు పరి సాంత లోకుర్ బాణిజ్ లోసినార్. యా పుజెరిజుబా, అబ్రాహము తెగ్గదు పుట్టికార్ అతిజ్బా పరి సాంత లోకుర్ బాణిజ్ దసంబాగం లోసినార్. 6 మెల్సిసెదెకు లేవి తెగ్గదు పుట్టికాన్ ఆవన్. గాని వాండ్రు అబ్రాహము బాణిజ్ దసంబాగం లోస్తాండ్రె, దేవులు సీతి ఒట్టుజ్ మని అబ్రాహముజ్, దీవిస్తాన్. 7 దీవిస్తాండ్రె, దీవన లోసె ఆని వన్నిజ్ ఇంక పెరికాన్ ఇని మాట అనుమానం సీలికాదె. 8 యూదురి పుజెరిజు సుండేతిజ, సాజిసానికారె దసంబాగం లోసినార్. గాని మెల్సిసెదెకుజ్ సుండేతిజ, దసంబాగం లోసె ఆనికాన్ బత్తిజినాన్ ఇజినె దేవులు మాట వెప్పినాద్. 9 అహిజ, దసంబాగం లోసిన లేవి తెగ్గదు పుట్టికార్, మెల్సిసెదెకుజ్ దసంబాగం సీతార్. పరి అనిగొగో ఆతి అబ్రాహము సీలిదనితాన్ వారు సీతార్ ఇజి ఒరెన్ వన్నిజ్ వెప్పెజ్బా ఆనాద్. 10 ఎందనిజ్ ఇహిజ, మెల్సిసెదెకు అబ్రాహముజ్ సుండేతివలె, లేవి పుట్వండ్రె. వాండ్రు అబ్రాహము పాటాద్నె నస్తవలె మహాన్.

మెల్సిసెదెకు లెకెండ్ యేసు ఒరెన్ పుజెరి

11 దేవులు మెసె వెట మజి రూలుజ్ సిత మనాన్. అయా రూలుజ్ వజ, లేవి తెగ్గదు పుట్టికార్ పుజెరిజు ఆదెజ్వలె. ఏలు, లేవి తెగ్గదు మని పుజెరిజు ఇహిజ ఆరోసు కుటుమ్దికార్ దేవులు ఎత్తు కితి ఉవదేసమ్కు పూర్తి కిదెజ్ అట్టార్ ఇహిజ, మరి ఒరెన్ పుజెరి వాదెజ్ అవ్సరం సీలెతాద్ మరి. అహోసు కుటుమ్దు మనికాన్ ఆవండ, మెల్సిసెదెకు మహి లెకెండ్ ఒరెన్ వన్నిజ్ ఫాకెజ్ అవ్సరం సీలెద్. 12 పుజెరిజు యా లెకెండ్ మారితిజ, మోసె సీతి రూలుజ్బా మార్దెజ్ వలె. 13 ఎయె వందిజ్ మాటు వెప్పినాటో, వాండ్రు మరి ఉండ్రె తెగ్గదు మనికాన్. అయా తెగ్గదు మనికార్ ఎయెరెబా పుజెరి వజ, మాలి పీటదు ముజాలె సేవ పణి కివెర్. యా సజతిజ్, మా ప్రబు వందిజె వెప్పె మన్నె. 14 వాండ్రు యూద తెగ్గదు పుట్టికాండ్రె ఇజి టెటాజ్ నెసినాట్. పుజెరిజు వందిజె మోసె వెప్పెవలె, యూద తెగ్గ వందిజె ఇనికబా వెహాలాన్. 15 మెల్సిసెదెకు పుజెరి మహివజ, మరి ఒరెన్ పుజెరి వాత మనాన్. అందెజె, మాటు వెప్పిక మరి ఒదె టెటాజ్ అర్దం ఆజినాద్. 16 లేవి తెగ్గదు మనికాండ్రె పుజెరి ఆదెజ్ ఇని రూలు వాండ్రు పూర్తి కివెండ పుజెరి ఆతాన్. గాని నాసనం కిదెజ్ అట్ ఇ, బత్తిజినె సత్తుదాన్వె పుజెరి ఆతాన్. 17 ఎందనిజ్ ఇహిజ “మెల్సిసెదెకు మని లెకెండ్, నీను ఎలాకాలం ఒరెన్ పుజెరి”, † ఇజి దేవులు మాటు క్రీస్తు వందిజె వెప్పినాద్. 18 అందెజె, పుజెరిజు వందిజె మని పడాఱు రూలుదిజ్ విలువ సీలెద్. ఎందనిజ్ ఇహిజ దనిజ్ సత్తు సీలెతాద్. పణిదిజ్ రెతాద్. 19 ఎందనిజ్ ఇహిజ, మోసె సీతి రూలుజ్, ఇని దనిజ్బా పూర్తి కిజెతె. ఏలు మాటు ఎద్దు సుండేతిజ మోసె సీతి రూలుజ్ కితి ఒటుదిజ్ ఇంక నెగెద్. అయా ఒట్టుదాన్ దేవులు డగ్రు సాండ్రెజ్ అట్టాట్. 20 క్రీస్తు ఎలాకాలం మని ఒరెన్ పుజెరి ఇజి దేవులు ఒట్టు కిత్తాన్. గాని మరి ఎమేణి పుజెరిజుబా దేవులు యా లెకెండ్ ఒట్టు కివెతాన్. 21 దేవులు యేసుజ్నె వెప్పెన్, “ప్రబు ఉండ్రె ప్రమాణం కిత మనాన్. అయాక ఎసెజ్బా తవ్ఎన్. ‘నీను ఎలాకాలం మని ఒరెన్ పుజెరి’ ††”, ఇజి. 22 దేవులు యా లెకెండ్ ఒట్టు కతాన్. అందెజె, యాక ఉండ్రె నెగ్గి ఒప్పుమానం ఇజి తవ్ఎండ కినికాన్ యేసునె. 23 పడాఱు అలవాటు వజ నండొండార్ పుజెరిజు మహార్. ఒరెన్ సాతిజ, మరి ఒరెన్ వన్ని పణి కిసాన్. 24 గాని యేసు ఎలాకాలం మని ఒరెన్ పుజెరి. ఎందనిజ్ ఇహిజ, వాండ్రు ఎలాకాలం బత్తిజినాన్. 25 అందెజె వాండ్రు, ఏలు మరి ఎలాకాలం వన్ని వెట దేవులు డగ్రు సాని పరిజ్ రెక్సిజెజ్ వాండ్రు అట్టాన్. ఎందనిజ్ ఇహిజ, పరి వందిజె దేవులుదిజ్ బతిమాల్దెజ్ వాండ్రు ఎల్లకాలం బత్తిజినాన్. 26 అందెజె, మా అవ్సరమ్కు తిరిసినె విజా పుజెరిజు మున్ను మని పెరి పుజెరి యేసునె. వాండ్రు ఇని పాపం సీలికాన్, నింద సీలికాన్, ఇని తపు సీలికాన్, పాపం కిని పరిబాణిజ్ కేట ఆతికాన్. వన్నిజె పరలోకమ్దు గొప్ప పెరి గవరం సిత మనాన్. 27 మహి పెరి పుజెరిజు లెకెండ్, వాండ్రు రోజు పూజెజ్ సీదెజ్ అవ్సరం సీలెద్. ముజాలె వన్ని పాపమ్కు వందిజె, వెనుక లోకురి పాపమ్కు వందిజె పూజెజ్ సీదెజ్ అవ్సరం సీలెద్. వన్నిజె వాండ్రె సీలువాదు ఒవజెప్పి వలె, పరి పాపమ్కు వందిజె, ఎలాకాలం వందిజె ఉండ్రె సుటు పూజ సీతాన్. 28 మోసె సీతి రూలు వజ ఏర్పాటు ఆతి విజెరె పుజెరిజు మున్ను మని పెరి పుజెరిజు పూర్తి ఆఇకార్. గాని మోసె సీతి రూలుజ్ వెనుక, దేవులు ఒట్టు కిత్తాన్. అయా ఒట్టు వజ మరిసె విజెరె పుజెరిజు మున్ను మని పెరి పుజెరి ఇజి ఏర్పాటు ఆతాన్. దేవులు వన్నిజె ఎలాకాలం పూర్తి ఆతికాన్ కిత్తాన్.

యేసునె పుజెరిజు మున్ను మన్ని మా పెరి పుజెరి.

8 మాపు వెప్పినె సజతిజ లోఇ ముకెలమాతి మాట యాకదె. అయాక ఇనిక ఇవెహిజ పరలోకమ్దు గొప్ప పెరి దేవులు బసినె సమాసనం ఉణెర్ పడాకాదు, గొప్ప బస్తమని ఒరెన్ విజెరె పుజెరిజు మున్ను మని పెరి పుజెరి మజి మనాన్. 2 వాండ్రు దేవులు వందిజె ఒదె కేట కితి గదిదు విజా పుజెరిజు మున్ను మని పెరి పుజెరి వజ సేవ కిజినాన్. ఇహిజ, ప్రబునె తయార్ కిజి ఇడ్డి నిజమాతి గుడారమ్దు సేవ కిజినాన్. లోకుర్ తయార్ కితి గుడారమ్దు ఆవద్ సేవ కిజినక. 3 విజెరె పుజెరిజు మున్ను మని పెరి పుజెరిజుబా, నండొ రకమ్కాణి పూజెజ్ దేవులుదిజ్ సీదెజ్ ఏర్పాటు ఆత మనార్. అందెజె, విజెరె పుజెరిజు మున్ను మని యా పెరి పుజెరిబా ఇనికబా ఉండ్రె పూజ సీదెజ్ వలె. 4 వాండ్రు యా లోకమ్దునె మంజినక ఇహిజ వాండ్రు ఒరెన్ పుజెరిబా ఆతాన్మరి. ఎందనిజ్ ఇహిజ, మోసె సీతి రూలుజ్ వజ పూజెజ్ సీని నండొ పుజెరిజు మనార్. 5 వారు సేవ కిజినె గుడారం, పరలోకమ్దు మని నిజమాతి గుడారమ్ది ఉండ్రె రూపునె, సీడెనె. నని బానె వారు సేవ కిజినార్. అందెజె, మోసె గుడారం తయార్ కిదెజ్ మొదొల్లివలె దేవులు డటం వెప్పెన్, “నిజి గొరొతు తోరిస్తె రూపు వజనె విజా తయార్ కిదెజ్ జాగ్రత సుండెదెజ్వలె”, ఇజి. 6 గాని ఏలు, దేవులుదిజ్ లోకుర్ నడిఱి యేసు ఏర్పాటు కితి ఒప్పుమానమ్నె గొప్ప నెగ్గిక. అయాలెకెండ్, మహి పుజెరిజు పణి ఇంక, యేసుజ్ దొహొక్తి మని పుజెరి పణినె గొప్ప నెగ్గిక. ఎందనిజ్ ఇహిజ, నెగ్గి సజతిజ్ సీన ఇజి కితి ఒటుదిజ్ ఆదారం ఇడెజినె యేసు అయా ఒప్పుమానం ఏర్పాటు కిత్తాన్. 7 మొదొహొ ఒప్పుమానం, ఇని తపు సీలిక ఆనిక ఇహిజ, మరి ఉండ్రె ఒప్పుమానమ్దిజ్ అవ్సరం సీలెతాద్మరి. 8 గాని దేవులు, లోకుర్ లోఇ తపు సుండేతండ్రె, పరి తప్పుజె తోరిసె, పరిజ్ ఈహు వెప్పెన్, “ప్రబు వెప్పినాన్, ‘ఇస్రాయేలు లోకుర్ వెట, యూద తెగ్గది పరి వెట నాను ఉండ్రె కొత్త ఒప్పుమానం కిని కాలం వాజినాద్. 9 నాను పరి అనిసిరిజ్ అయ్గుప్తు దేసెమ్దాన్ పరి కియె అసి వెల్లి నడిఱివీస్తవలె పరివెట కితి ఒప్పుమానం లెకెండ్ ఆవద్ యా ఒప్పుమానం. నాను పరివెట కితి ఒప్పుమానం వారు తవ్చార్. అందెజె, నాను పరిజ్ డిఱిస్తె సిత”, ఇజి ప్రబు వెప్పినాన్. 10 మరి ప్రబు వెప్పినాన్, ఇస్రాయేలు లోకుర్ వెట నాను

† 7:17 కీర్తన 110:4. †† 7:21 కీర్తన 110:4.

కిని ఒప్పుమానం యాకదె. వాని దినమ్కాజ్ వెనుక, నాను నా రూలుజ్ వరి గబమ్దు ఇడ్డు. నాను వరి మన్నుదు అయాకెజ్ రాన్ను. నాను వరి దేవులు ఆన. వారు నా లోకుర్ ఆనార్. 11 ఎయెర్బా వరి పడఃకది వరిజో, వరి సాంత ఇండ్రోణి వరిజో, 'మీరు ప్రబుజ్ నెస్తు, ఇజి నెస్పిఎర్. ఎందనిజ్ ఇహిజ, వారు విజెరె నజి నెస్సార్. ఇజివరి బాణిజ్ మొదోలీసి, పెరివరిదాక నజి నెస్సార్. 12 నాను, వారు కితి సెఇకెజ్ సెమిన్ను. వరి పావమ్కు నాను ఎసెజ్బా ఎత్తు కిమ, † ఇజి. 13 యా ఒప్పుమానమ్దిజ్, 'కొత్తక' ఇజి దేవులు వెప్పి, మొదోహి ఒప్పుమానమ్దిజ్ వడఃయక కిత్తాన్. పణిదిజ్ రఇ వడఃయ ఒప్పుమానం బేగినె సిల్లెండ ఆనాద్.

కొత్త ఒప్పుమానమ్ది విజేరె పుజేరిజ మున్ను మన్ని పెరి పుజేరి

9 దేవులుని వన్ని లోకుర్ నడిఃమి మహి మొదోహి ఒప్పుమానమ్దు, దేవులుదిజ్ పాగ్డిఃజి మాడిఃసిని వందిజ్ రూలుజ్ మహి. యా బూమిదు దేవులుదిజ్ పాగ్డిఃజి మాడిఃసైజ్ ఉండ్రీ గూడారమ్బా మహాద్. 2 ఉండ్రీ గుడారం తయార్ కిత మనాద్. దన్నిజ్ రుండి గదిజ్ మహి. మొదోహి గదిదు దీవ డండి ఉండ్రీ, బల్ల ఉండ్రీ, మరి దేవులు ఎద్దు ఇడ్డి రొటెజ్ మహి. యా గదిదిజ్ దేవులు వందిజ్ కేట ఆతి గది ఇనార్. 3 (యా రుండి గదిజ నడిఃమి అడ్డు వజ ఉండ్రీ తెర మనాద్) తెర వెనుక మన్ని గదిదిజ్ దేవులు వందిజ్ ఒద్దె కేట ఆతి గది ఇనార్. 4 అబ్బె బజారమ్దాన్ తయార్ కితి దూపం సుర్ని మాలి ఏటె, ఒప్పుమానం కితిక ఇడ్డిమని మందసం మన్నె. మందసమ్దిజ్, లొఇ వెల్లి సుటులం బజారం పూత రాన్ను మనాద్. యా మందసం లొఇ బజారమ్దాన్ తయార్ కితి జగ్గుదు మన్ను, సిగిరితిమన్ని ఆహరోను డుడ్డుని దేవులు మోసెజ్ సెత్తి వతి ఆడ్రెజ్ రాస్తి ఇడ్డి పల్కెజ్ మన్నె. 5 మందసం మున్ను, దేవులు మనాన్ ఇజి, తోరిసిని కెరూబుజ్ మన్నె. కెరూబుజ్ కరుణపీటం మున్ను, ఇహిజ, మందసం మూత్త మున్ను, రెక్కెజ్ కోరిసయ్యె మన్నె. ఏలు యా సజతిజ్ లాపు వెప్తాజ్ మాటు అట్ఎట్. 6 యాలెకండ, విజా నెగ్రెండ ఇడ్డివెనుక, పుజేరిజ, మొదోహి గదిదు వరి సేవపణి కిదెజ్ ఎస్తివల్లె డుఃగ్నాన్. 7 గాని విజేరె పుజేరిజ మున్ను మన్ని పెరి పుజేరి ఒరెండ్రె, లొఇమన్ని గదిదు డుఃగ్నాన్. అయాకబా వాండ్రు ఏంటుదు ఉండ్రీ సుటునె డుఃగ్నాన్. డుఃగ్నెవల్లె నల సిల్లెండ డుఃగ్నాన్. అయాక వాండ్రు వన్ని పావమ్కాజ్ వందిజ్, నెస్పిండ లోకుర్ కితి పావమ్కాజ్ వందిజ్ దేవులుదిజ్ పూజ సీనాన్. 8 యాలెకండ కిజిని అలవాటుదాన్, దేవులు ఆత్మ టెటాజ్ నెస్పిసిని సజతి ఇనిక ఇహిజ, మొదోహి గదిని అబ్బె కిని అలవాటుజ్ విజా నిల్పి మంజినివల్లె, లోకుర్ దేవులు వందిజ్ ఒదె కేట ఆతి గదిదు సాండ్రెజ్ అట్ఎర్. 9 యాక యా కాలమ్దిజ్ ఉండ్రీ గుర్దు. ఇనిక ఇహిజ, దేవులుదిజ్ పూజ సీని విజా రకమ్కాణి పూజెజ్, సీనివన్ని గర్బమ్దు సుబ్బరం కిదెజ్ అట్ఎట్. 10 యా పడాయ్ ఆసారం, తిండి వందిజ్, ఉణి దన్ని వందిజ్, రకమ్రకం సమయమ్దు నోరబాని దన్ని వందిజె వెప్పిని రూలుజ్. యా రూలుజ్ మున్ను, కిజినికెజ్. కొత్త రూలుజ్ వాని కాలమ్దాక యా రూలుజ్ మంజినె. 11 గాని, ఇబ్బె ఏలె మన్ని నెగ్గి సజతిజ్ కల్గిసిని విజేరె పుజేరిజ మున్ను మన్ని పెరి పుజేరి ఇజి క్రీస్తు వాత మనాన్. వాండ్రు సేవ కిని గుడారం ఇహిజ పరలోకం. గొప్ప ముకెలమతిక. నండొ పూర్తియతిక. అయాక లోకుర్ తయార్ కితిక ఆవద్. తయారాతి లోకమ్దు మనిక ఆవద్. 12 క్రీస్తు గుడారమ్దు డుఃగ్నెజి, ఎలాకాలం వందిజ్ ఉండ్రీ సుటు, దేవులు వందిజ్ ఒదె కేట ఆతి గదిదు సాహివల్లె, పూజ సీదెజ్ ఇజి గొరైజ, దూడెజ నల వాండ్రు ఒవన్. గాని, వాండ్రు వన్ని సాంత నలనె ఒతాండ్రె మజి పావమ్కాణిజ్ సాపుదాన్ ఎలాకాలం డిఃసేస్సాన్. 13 మోసె సిత్తి రూలుజ వజ, గొరైజ, కొడ్డిఃజ నలని దూడెజ్ సుప్తి సిరు, మయిల †† ఆతి లోకురి ఒడోల్దు వాక్కార్. ఎందనిజ్ ఇహిజ, వరి ఒడోల్ సుబ్బరం ఆజి దేవులు వందిజ్ ఒవజెపె ఆజి కేట ఆదెజ్. 14 అహిజ, క్రీస్తు నల ఎసా నెగ్రెండ సుబ్బరం కినాద్ ఇజి ఎత్తు కిదు. ఎలాకాలం మన్ని ఆత్మసత్తుదాన్, క్రీస్తు మా పావమ్కాజ్ వందిజ్ వన్నిజ్ వాండ్రె దేవులుదిజ్ ఒవజెపె ఆతాన్. ఇని పాపం సిల్లి పూజ లెకండ, వన్నిజ్ వాండ్రె ఒవజెపె ఆతాన్. సాపు తప్పిని సెఇ పణిజాణిజ్ వన్ని నల మా గర్బం మజి గదిన్పిండలెకండ సుబ్బరం కినాద్. ఎందనిజ్ ఇహిజ బత్తిజిని దేవులుదిజ్ మాటు పాగ్డిఃజి మాడిఃసైజ్. 15 అందెజె క్రీస్తునె అయా కొత్త ఒప్పుమానం నడిఃపిన్నికాన్. ఎందనిజ్ ఇహిజ, దేవులు కూక్తి లోకురిజ్ దేవులు సీన ఇజి ఒట్టు కితి ఎలాకాలం మంజిని దీవెనమ్కు దోహొకెజ్. మొదోలీ కితి ఒప్పుమానమ్దిజ్ అడిఃగి మహివల్లె, వారు కితి తప్పుబాణిజ్ వాజిని సిక్కుదాన్ వరిజ్ డిఃసేస్సెజె, క్రీస్తు సాతాన్. 16 ఉండ్రీ తీర్మన పత్రం రాస్తి ఇడ్డిమహిజ, అయా తీర్మన పత్రం తయార్ కితికాన్ సాత మనాన్ ఇజి రుజాప్ ఆదెజ్. 17 అయాక రాస్తిమన్నికాన్ బత్తిజి మహిజ, అయా తీర్మన పత్రమ్దిజ్ విలువ సిల్లెద్. వాండ్రు సాతివెనుకానె అయా తీర్మన పత్రం పణిదిజ్ వానాద్. 18 అందెజె, మొదోలీ సిత్తి ఒప్పుమానమ్దిజ్బా నల సిల్లెండ సత్తు మన్పద్. 19 దేవులు వెప్తి రూలుజ్ విజా, లోకురిజ్ విజేరిజ్ సిత్తివెనుక, మోసె దూడెజ నల, ఏరువెట కలప్తాండ్రె, ఇసాపు మొక్కాది కొముదాన్, నండొ ఎరాని బులున్నుదాన్ లోకుర్ విజేరె మున్ను, దేవులు రూలుజ్ రాస్తి ఇడ్డి పుస్తకం మున్ను, సిల్కరిస్తాన్. 20 వాండ్రు వెప్తాన్, "మీరు కిదెజ్ ఇజి దేవులు ఆడ్రె సిత్తి ఒప్పుమానమ్దిజ్ ముద్దనె యా నల" ‡, ఇజి. 21 అయాలెకండ, గుడారం మున్ను, అబ్బె మన్ని విజా వనకాజ్ మున్ను, నల సిల్కరిస్తాన్. 22 మోసె సిత్తి రూలుదు వెప్పిని వజ విజా నలదాన్ సుబ్బరం ఆనాద్ ఇజి వెప్తాజ్ ఆనాద్. నల వాక్పిండ, పావమ్కు సాన్ఉ. 23 అందెజె, పరలోకమ్దు మన్ని వనకాజ్ రూపు లెకండ మన్ని లోకమ్ది గూడారమ్దిని దన్ని లొఇ మనికెజ్, జంతుజ నలదాన్ సుబ్బరం ఆదెజ్ వల్లె. గాని పరలోకమ్దు మనికెజ్ జంతుజ నలదాన్ ఆవండ, దన్నిజ్ ఇంక నెగ్గి పూజెబాణిజ్ సుబ్బరం ఆదెజ్ వల్లె. 24 ఎందనిజ్ ఇహిజ, క్రీస్తు పరలోకమ్దు సాహాన్. ఏలు మా వందిజ్ దేవులు ఎద్దు జామ్లీ నిల్సేని వన్నిలెకండ నిల్దెజ్ సాహాన్. వాండ్రు లోకుర్ కిదాన్ తయారాతి గుడారమ్దు డుఃగ్నెతాన్. అయాక నిజమాతి గుడారమ్ది ఉండ్రీ మూర్తి. 25 యూదురిజ పెరి పుజేరి, ఏంటు ఏంటు జంతుజ నలదాన్ దేవులు వందిజ్ ఒదె కేట ఆతి గదిదు డుఃగ్నాన్. గాని, యేసు వన్నిజె ఒవజెపె ఆదెజ్ మరి మరి పరలోకమ్దు సాన్పన్. 26 ఆహె సాండ్రెజ్ ఇహిజ, లోకం పుటిస్తి బాణిజ్ అసి, వాండ్రు మరిమరి సాదెజ్ మహాద్ మరి. గాని కాలమ్ది ఆకార్దు, వాండ్రు పూజ ఆతి దన్నిదటాన్, పాపం సిల్లెండ కిదెజ్, వాండ్రు ఎలాకాలం వందిజ్ ఉండ్రీ సుటు తోరె ఆతాన్. 27 లోకుర్ విజేరె ఉండ్రీ సుటు సాదెజ్ వల్లె. వెనుక దేవులు బాణిజ్ తీర్పు జగ్గిదెజ్ వల్లె, ఇజి ఏర్పాటు మనాద్. 28 అయాలెకండ, నండొండారి పావమ్కు సాన్పిస్సెజ్, క్రీస్తు పూజ ఆతాన్. వాండ్రు మరి మరిజి వానాన్, పావమ్కు సాన్పిస్సెజ్ ఆవద్; గాని వన్నిజ్ ఆసదాన్ ఎద్దునుడఃజి మంజిని వరిజ్ రక్తిస్సెజె వానాన్.

† 8:12 యిర్మీయా 31:31-34. †† ఇబ్బె మయిల ఇజి వెప్పినిక దేవులుదిజ్ డగ్గు కిదెజ్ అట్ఇ సజతిజ్, సిల్లిజ దేవులు ఎద్దు కల్లి ఆతికెజ్ ‡ 9:20 నిర్గమ 24:8.

క్రీస్తు ఎలాకాలం వందిజ్ ఉండ్రీ సుటు పూజ ఆతాన్

10 మోసె సీతి గూలుజ్దుడు మని పడాయి ఆసారమ్కు, వాని కాలమ్దు వాజిని నెగ్గి సజతిజ ఉండ్రీ నీడనె. అయాకెజ్ నిజమాతి సజతిజ్ ఆఉ. అందెజె పడాయి ఆసారం వజ కిని పూజెజ్, డిస్ఎండ ఏంటు ఏంటు కిజి మహర్. గాని దేవుణుదిజ్ పాగిడిజి మాడిస్సెజ్ వాని వరిజ్ పూర్తి సుబ్రం కిదెజ్ అట్ఉ. ² దేవుణుదిజ్ పాగిడిజి మాడిస్సెజ్ వాతి లోకుర్, వరి పావమ్దాన్ పూర్తి సుబ్రం ఆతార్ ఇహిజ, వారు మరి మరి పావమ్క వందిజ్ ఎత్తు కిజి బాద ఆతార్ మరి. విజా పూజెజ్ బా ఆప్ ఆతె మరి. ³ గాని యా పూజెజ్, ఏంటు ఏంటు, లోకురిజ్ వరి పావమ్కు ఎత్తు కిజి. ⁴ ఎందనిజ్ ఇహిజ, కొడ్డిజ, గొరెజ నల పావమ్కు సాన్పిస్సెజ్ అట్ఉ. ⁵ అందెజె, క్రీస్తు యా లోకుమ్దు వాతివలె వాండ్రు దేవుణుదిజ్ వెహ్సాన్, “పూజెజ్ని సందెజ్, నీను కోరిఇ. గాని నీను నా వందిజ్ ఉండ్రీ ఒడోల్ తయార్ కితి”. ⁶ మాలి పీట ముస్సు సుప్తి జంతుజాణిజ్ నీను సర్ద ఆఇ. పావమ్కు సాన్పిస్సెజ్ సీజిని పూజెజ్ బాణిజ్ సర్ద ఆఇ, ఇజి. ⁷ నస్తివలె నాను వెహ్సా, “ఓ దేవుణు, ఇదిలో నాను దేవుణు మాటదు నా వందిజ్ రాస్తి మని వజ, నాను కిదెజ్ ఇజి నీను కోరిజినికెజ్ కిదెజ్ నాను వాత మన్న”, † ఇజి. ⁸ ముజాలె వాండ్రు వెహ్సాన్, “పూజెజ్ని సందెజ్ పూజెజ్ నీని పెటె ముస్సు సరుజిని జంతుజని పావమ్కు సాన్పిస్సెజ్ సీని పూజెజ్ నీను కోరిఇ. వన్యాణిజ్ నీను సర్ద ఆఇ”, ఇజి. (మోసె సీతి రూలుజ వజ యా పూజెజ్ కిదెజ్ మనికాదె. గాని వాండ్రు అయాలెకెండ్ వెహ్సాన్) ⁹ వెనుక వాండ్రు వెహ్సాన్. “ఇదిలో నీను కోరిజినికెజ్ కిదెజ్ నాను వాత మన్”, ఇజి. అందెజె, దేవుణు పడాయి పూజెజ్ విజా సిల్లెండ కిజి, క్రీస్తు పూజ ఆతి దనిజ్ పడాయి పూజెజ్ ముస్సు ఇడ్డినాన్ ¹⁰ దేవుణు కోరితికెజ్ వాండ్రు కిత్తాన్. అందెజె యేసు క్రీస్తు ఒడోల్దాన్ ఎలాకాలం వందిజ్ ఉండ్రీ సుటు పూజ ఆతి దనిదాన్, మాటు పావమ్కాణిజ్ సుబ్రం ఆత మనాట్. ¹¹ యూదురి పుజెరిబు విజెరె, మాలి పీట ముజాలె నిల్చి, రోజా రోజా వరి పుజెరి పణి కిజినార్. మరి మరి ఉండ్రె నని పూజెజ్ కిజినార్. అయా పూజెజ్ ఎసిజ్ బా పావమ్కు సాన్పిస్ఉ. ¹² గాని క్రీస్తు ఎలాకాలం వందిజ్ దేవుణుదిజ్ ఉండ్రీ పూజ ఆతాన్. వాండ్రె అయా పూజ ఆతాన్. ఎలాకాలం వందిజ్ పూజ ఆతాన్. వెనుక వాండ్రు దేవుణు ఉజెర్ పడకాద్, గొప్ప మర్యాదీదు బసె ఆతాన్. ¹³ అబ్బె, ఏలు క్రీస్తు పడిఇ వరిజ్, వన్ని పావమ్క అడిగి దేవుణు ఇడ్డిదాక వాండ్రు కామ్ కిజినాన్. ¹⁴ ఎందనిజ్ ఇహిజ, అయా ఉండ్రీ పూజదాన్ పావమ్కాణిజ్ సుబ్రం ఆతి వరిజ్, వాండ్రు ఎలాకాలం పూర్తి ఆతికార్, కిత మనాన్. ¹⁵ దేవుణు ఆత్మబా యాక నిజం ఇజి నెసి వెహ్సానాన్. తొలిత వెహ్సా నాన్. ¹⁶ “వాని దిసమ్కాజ్ వెనుక, నాను వరివెట కిని కొత్త ఒపుమాసం యాకదె. నాను వరి గర్బమ్దు నా రూలుజ్ ఇడ్డి. వరి మన్నుదు అయాకెజ్ రాస్సు, ఇజి ప్రబు వెహ్సానాన్”, †† ఇజి. ¹⁷ వెనుక వాండ్రు వెహ్సానాన్, “నాను వరి పావమ్కు, వరి సెఇ పణిజ్ ఎసిజ్ బా ఎత్తు కివి”, ‡ ఇజి. ¹⁸ దేవుణు పావమ్కు సెమిని మహివలె, పావం సెమిస్సెజ్ మరి పూజ అవుసరం సిల్లెద్.

నమ్మిజిని మండ్రెజ్.

¹⁹ అందెజె, తంబెరిజాండె, యేసు నల వాక్కి సాతి సాపుదాన్ దేవుణు వందిజ్ ఒడ్డె కేట ఆతి గదిదు, మాటు దయర్మదాన్ డుఃగ్దెజ్ ఆనాద్. ²⁰ వాండ్రు మా వందిజ్, బత్తుడు నడిపిసిని ఉండ్రీ కొత్త సరి రేతాన్. అయాక తెరదాన్, ఇహిజ వన్ని సాంత ఒడోల్దాన్ రేతాన్. ²¹ దేవుణు లోకుర్ ముస్సు అతికారం మని ఒరెన్ పెరి పుజెరినె మజి మనాన్. ²² అందెజె, మాటు వన్నిజ్ పూర్తి నమ్మిజి నెగ్గి మన్నుదాన్ దేవుణు ఎద్రు సానాట్. మజి సుబ్రం కిదెజ్, మా సెఇ పణిజ్ నెసిని మన్ను, క్రీస్తు నలదాన్ సిల్కరెనె ఆత మనాద్. మా ఒడోల్, నెగ్గి ఏరుదాన్ నొరె ఆత మనాద్. ఆహె మాటు దేవుణు ఎద్రు సానాట్. ²³ ఇతల్ ఆతల్ కద్దిఎండ, మటు మనాట్ ఇజి మాటు వెహె ఆజిని ఎద్రు సూణి ఆసదిజ్ డటం అనాట్. ఎందనిజ్ ఇహిజ, మా వెట ఒట్టు కితికాన్ నమ్మిదెజ్ తగ్గినాన్. ²⁴ మహికార్ స్త్రీమ తోరిస్సెజ్, నెగ్గి పణిజ్ కిదెజ్ వరిజ్ ఉసార్ కిబిస్సిక ఎలాగ ఇజి ఎత్తుకిజినాట్. ²⁵ సెగొండార్ డిసి సీజిని లెకెండ్, కూడజి వాజిని అలవాటు మాటు డిస్సెజ్ ఆవెద్. గాని మాటు ఒరెన్ మరి ఒరెన్ వన్నిజ్ మరి ఒదె దయరం కిబిసి మంజినాట్. ఎందనిజ్ ఇహిజ, ప్రబు వాని దినం డగ్రు ఆజినాద్ ఇజి మీరు సుడజినిదెర్. ²⁶ నిజం నెస్తి వెనుక మరి మరి పావమ్కు కిజినాట్ ఇహిజ, అయా పావమ్కు సాన్పిస్సెజ్ మరి పూజ సిల్లెద్. ²⁷ గాని మరి మనిక ఇనిక ఇహిజ, దేవుణు సీని తీర్పుదిజ్, వన్నిజ్ పడెఇ వరిజ్ నాసనం కిని గొప్ప పెరి సిసదిజ్ ఎద్రు సుడజినికాదె. ²⁸ మోసె సీతి రూలుజ్ లోజెఇతి ఎయె వన్నిజ్ బా, రిఎరో, ముఎరో సాక్కిరు వాండ్రు తపు కిత్తాన్ ఇజి వెహ్సెజ, కనికారం తొఎండ సవ్సార్. ²⁹ అహిజ, దేవుణు మరిసిజ్ దూసిస్తి వరిజ్ ఎసా పెరి సిక్చ మనాద్. వరిజ్ దేవుణు వందిజ్ కేట కిత్తి నలదిజ్ పణిజ్ రెఇ లెకెండ్ సుడజిని వరిజ్ ఎసా పెరి సిక్చ మనాద్. అయా నలనె ఒపుమాసం తప్పిస్తాద్. కనికారం తోరోసిని దేవుణు ఆత్మదిజ్ దూసిస్తి వరిజ్ ఎసా పెరి సిక్చ మనాద్ ఇజి ఎత్తు కిదు. ³⁰ ఎందనిజ్ ఇహిజ, “సిక్చ నానె సీన. సిక్చదిజ్ తగితి వరిజ్, నాను మర్జి సీన”, ఇజి వెహ్సె వన్నిజ్ మాటు నెసినాట్. మరిబా వెహ్సెనాన్, “ప్రబునె వన్ని లోకురిజ్ తీర్పు సీనాన్”, †† ఇజి. ³¹ బత్తుజిని దేవుణు కీదు అర్నిక గొప్ప తియెల్ కల్గిస్సి సజతిసె. ³² మీరు క్రీస్తు వందిజ్ తొలిత నెస్తి రోస్సు ఎసిజ్ బా పాన్మాట్. నండొ బాదెజ్ వాతిజ్ బా, నమ్మకమ్దాన్ ఎలాగ నిహి మహిదెర్ ఇజి ఎత్తు కిదు. ³³ సెగం కాలమ్దు, మిజి విజెరె ఎద్రు దూసిస్టార్. మిజి డెయ్తార్. మరి సెగం కాలమ్దు, మీరు, అయాలెకెండ్ బాదెజ్ ఆతి వరివెట కూడజి నిహిదెర్. ³⁴ జెలిదు ఆతి వరిజ్ సుడజెజ్ మీ పాణం నోతాద్. మిజి కల్గిజి మనికెజ్ విజా లాగ్గి ఒతివలెబా సర్దదాన్ ఓరిస్తిదెర్. ఎందనిజ్ ఇహిజ, ఎలాకాలం మనికెజ్, మిజి మన్నె ఇజి నెసినిదెర్. అయాక కల్గితి మహిదని ఇంక మరి ఒదె నెగ్గి. ³⁵ అందెజె, దయర్మదాన్ మండ్రు. ఎందనిజ్ ఇహిజ నండొ వలితం దొహ్కాద్. ³⁶ మీరు ఓరిసి మండ్రెజ్ వలె. ఎందనిజ్ ఇహిజ, మీరు దేవుణుదిజ్ ఇస్టం ఆతికెజ్ కితి వెనుక, వాండ్రు సీన ఇజి ఒట్టు కితికెజ్ దొహ్కె. ³⁷ ఎందనిజ్ ఇహిజ, దేవుణు మాటదు వెహ్సెని లెకెండ్, “సణెం కాలం లోఇ, వాదెజ్ మనికాన్ బేగినె వానాన్. ఆల్సెం ఆఎన్. ³⁸ సీతి నిజాయితి మని నా వారు, నమ్మకమ్దాన్ బత్తునార్. వారు మర్జి వెనుక సాహిజ, నాను వరివెట సర్ద ఆఎ”, †† ఇజి. ³⁹ మాటు, మర్జి వెనుక సాన్ని నాసనం ఆని లోకు ఆఎట్. గాని మజి దేవుణు ముస్సు నమకం మనాద్. వాండ్రు మజి రక్కిస్తాన్.

11 నమకం ఇహిజ, మాటు ఆస ఆనిక తప్పొండ జగ్గినాద్ ఇజి పూర్తి నమ్మిజినిక. కణకదాన్ సుడజెజ్ నిజం మన్నె ఇజి పూర్తి నమ్మిజినిక. ² దేవుణు ముస్సు నమకం ఇడ్డి లోకుర్ పూర్బమ్మీదు మహర్. అందెజె దేవుణు బాణిజ్ అనుపె ఆతార్. ³ దేవుణు మాటదానె యా బూలోకం తయార్ ఆత మనాద్ ఇజి నమకమ్దానె మాటు నెసినాట్. ఎందనిజ్ ఇహిజ, మాటు ఏలు సూణికెజ్, సుడజె వన్యా బాణిజ్ తయార్ కితికెజె. ⁴ నమకమ్దానె, కయిను సీతి

† 10:7 క్రిస్తన 40:6-8. †† 10:16 యిర్మీయా 31:33. ‡ 10:17 యిర్మీయా 31:34. †† 10:30 ద్వితీ 32:35. †† 10:38 అబ్దుకు 2:3,4.

దని మున్ను ఏబలు దేవుణుడిజ్ నెగ్గి పూజ సితాన్. వన్ని నమకమ్దానె, సీతి నిజాయితి మనికాన్ ఇజి దేవుణు బాణిజ్ మెపు దోహ్కాద్. ఎందనిజ్ ఇహిజ, వాండ్లు సీతి సందదు దేవుణు సరద్ ఆతాన్. వాండ్లు సినదిసమ్కాజ్ ముజాలె సాత సాహాన్. అహిజ్బా, వన్ని నమ్మకమ్దాన్ ఏలు బా మజి వర్గిజినాన్. 5 నమకమ్దానె, హానోకు సాఎండ దేవుణు మంజిన బాడ్డిడు దేవుణు ఒత మనాన్. ఎయెర్బా వన్నిజ్ సుడెడెజ్ అట్ఎతార్. ఎందనిజ్ ఇహిజ, దేవుణునె వన్నిజ్ ఒత మహాన్. వన్నిజ్ ఒఇ ముజాలె, దేవుణుదిజ్ సరద్ కితికాన్ ఇజి అనుపె ఆతాన్. 6 నమకం సిల్లెండ, దేవుణుదిజ్ సరద్ కితికాన్ అట్ఎట్. ఎందనిజ్ ఇహిజ, వన్ని డగ్రు వానికాన్ ఎయెన్బా దేవుణు మనాన్ ఇజి నమ్మిడెజ్వలె. వన్నిజ్ నిజం రెబాని వరిజ్ వాండ్లు నెగ్గిజె కినాన్ ఇజి నమ్మిడెజ్వలె. 7 నమకందానె, నోవ వవి ఇండ్రాణి వరిజ్ పెరి గడదాన్ రక్సిస్తెజ్ ఉండ్రి ఓడః తయార్ కిత్తాన్. జగ్గిడెజ్ మని సజతిజ వందెజ్ దేవుణు డటం వెహ్పాలె వాండ్లు లోజెతాన్. వన్ని నమకమ్దానె, లోకమ్దు మహి, మహి లోకురిజ్ దేవుణు మున్ను నమకం సిల్లెద్ ఇజి వాండ్లు తోరిస్తాన్. అందెజె వారు తపు కిత్తార్ ఇజి దేవుణు తీర్పు కిత్తాండ్రె, నోవెజ్ సీతి నిజాయితి మనికాన్ ఇ జి ఇల్తాన్. నోవ నమకమ్దానె సీతి నిజాయితి మనికాన్ ఇజి ఇల్తాన్. 8 నమకమ్దానె, అబ్రాహము, 'సీను సీ ఇల్లు డిసి, సీది ఇజి వెనుక దోహ్కాక్కి బాడిడు సాన్అ', ఇజి దేవుణు వెహ్పాలె, లోజెతాండ్రె సాహాన్. ఎంబె సాన్సినాన్ ఇజి తెలిఎండ వాండ్లు సాహాన్. 9 నమకమ్దానె, వయువాండ్లు లెకండ్ దేవుణు సీన ఇజి ఒట్టు కితి దేసమ్దు బత్తితాన్. వాండ్లు గుడారమ్దు బత్తితాన్. అయాలెకండ్, ఇసాకు ని యాకోబు బా. వరిజ్బా వెనుక అయూ ఒట్టునె దేవుణు సితాన్. 10 అబ్రాహము వయువాండ్లు లెకండ్ అబె బత్తితాన్. ఎందనిజ్ ఇహిజ, వాండ్లు ఎలాకాలం నిల్పిని నిజమాతి పునాది మని పట్టుం వందిజ్ ఎద్దు సుడఃజి మహాన్. అయూ పట్టుం రూపు సీజి తోహ్పికాన్ దేవుణు. 11 నమకమ్దానె, అబ్రాహము నండ్ డొక్ర ఆతిజ్బా, సార గొడ్డు బోదెలి ఆతిజ్బా అప్పాసి ఆతాన్. ఎందనిజ్ ఇహిజ, సీన ఇజి ఒట్టు కితికాన్ నమ్మిడెజ్ తగ్గికాన్ ఇజి ఒడిఃబితార్. 12 అందెజె, సాతిలెకండ్ మని యూ ఒరెన్ వన్ని బాణిజ్, నండ్ నండ్ లోకుర్ ఆతార్. ఆగానమ్దు మని సుకె లెకండ్, నమ్దరమ్ది ఒడ్డుదు మని లెక కిడెజ్ అట్ఇ ఇస్క లెకండ్, లోకుర్ ఆతార్. 13 యూ లోకుర్ విజెరె, సానిదాక వారు నమకమ్దానె బత్తిజి మహాన్. దేవుణు సీన ఇజి ఒట్టు కితికె దోహ్కాకుతె. వారు నండ్ ముజాలె వన్కా వందిజ్ అసదాన్ ఎద్దు సుడఃజి వన్కాజ్ సరద్ ఆతార్. యూ బూమిదు వారు వయువారు ఇజి ఒప్పుకోటార్. 14 యూ లెకండ్ వెహ్పి లోకుర్, వరిజ్ సాంత ఉండ్రి దేసం వందిజ్ ఎద్దు సుడఃజినార్ ఇజి టెటాజ్ తోరిసినాద్. 15 వారు డిసి వాతి దేసం వందిజ్ ఎత్తు కివెర్. ఎత్తు కిత్తార్ ఇహిజ, మరజి సాండ్రెజ్ అవ్సరం మహాద్మరి. 16 గాని వారు, ఇంక నెగ్గి ఉండ్రి దేసం వందిజ్ కోరితార్. ఇహిజ పరలోకమ్ది దేసం వందిజ్ కోరితార్. అందెజె, దేవుణు, వరి దేవుణు ఇజి వెహ్ ఆదెజ్ సిగు ఆఎన్. ఎందనిజ్ ఇహిజ, వాండ్లు వరి వందిజ్ పరలోకమ్దు ఉండ్రి పట్టుం తయార్ కిత మనాన్. 17 నమకమ్దానె, దేవుణు అబ్రాహముజ్ పరిస కితివలె, వన్ని మరిసి ఇస్సాకుజ్, పూజ లెకండ్ సితాన్. దేవుణు అబ్రాహముజ్ ఒట్టు సితాన్. గాని వన్ని ఒరెండ్ ఒరెన్ మరిసిజ్ పూజ లెకండ్ సీడెజ్ వాండ్లు తయార్ ఆతాన్. 18 దేవుణు అబ్రాహముజ్ వెహ్సాన్, "ఇస్సాకు వెటనె సీ తెగ్గదికార్ పుల్సార్", † ఇజి 19 సాతి వరిజ్ మరజి బత్తిస్తెజ్ దేవుణు అట్నాన్ ఇజి అబ్రాహము ఒడిఃబితాన్. యాక సుడఃతిజ, అబ్రాహముజ్ సాపుదాన్ ఇస్సాకుజ్ మరజి దోహ్కాక్కి లెకండ్ మనాద్. 20 నమకమ్దానె, ఇస్సాకు, యాకోబుజ్నె యాసాపుజ్, వరిజ్ వానికాలం వందిజ్ దీవిస్తాన్. 21 నమకమ్దానె, యాకోబు వాండ్లు సాని ముజాలె యోసేపు మరిసిర్ రిఎరిజ్ దీవిస్తాన్. వన్ని డుడుదు ఒగ్గితాండ్రె దేవుణుదిజ్ పాగిడిఃజి మాడిఃస్తాన్. 22 నమకమ్దానె, యోసేపు సాదెజ్ డగ్రు ఆతివలె ఇస్సాయేలు లోకురిజ్ అయగుస్తు దేసమ్దాన్ దేవుణు నడిపిసి తనిదని వందిజ్ వెహ్సాన్. వన్ని డుముక వందిజ్ ఇనిక కిడెజ్ ఇజి ఆడ్ర సితాన్. 23 నమకమ్దానె, మోసె అయిసి అప్పాసిర్, వాండ్లు పుట్టి మూండ్రి నెలెజ్ డాప్పి ఇల్తార్. ఎందనిజ్ ఇహిజ, వాండ్లు నెగ్గి ఒరెన్ కొడః ఇజి వారు నెస్తార్. రాజా సీతి ఆడ్రదిజ్ తప్పెజ్ వారు తియెల్ ఆఎతార్. 24 నమకమ్దానె, మోసె, వాండ్లు పిరితి వలె పరో గాల్పి మరిసి ఇజి కూక ఆదెజ్ కెఎతాన్. 25 వాండ్లు, పాపం తప్పిసి నణం మంజిన సరద్దు మంజిన దని మున్ను దేవుణు లోకుర్ వెట బాద ఆదెజ్ కోరితాన్. 26 అయగుస్తు దేసమ్ది ఆస్తి మున్ను, క్రీస్తు వందిజ్ బాదెజ్ ఆనికాదె విలవ మనిక ఇజి వాండ్లు ఒడిఃబితాన్. ఎందనిజ్ ఇహిజ, వాని కాలమ్దు దేవుణు వన్నిజ్ కిని నెగ్గి దని వందిజ్ వాండ్లు ఎద్దు సుడఃతాన్. 27 నమకమ్దానె, మోసె, రాజా కోవమ్దిజ్ తియెల్ ఆఎండ, అయగుస్తు దేసం డిఃస్తాన్. వాండ్లు మరజి వాదెజ్ కెఎతాన్. ఎందనిజ్ ఇహిజ, వాండ్లు తోర్ఇ దేవుణుదిజ్ సుడఃతి లెకండ్ మనాద్.

28 నమకమ్దానె, మోసె, ఇస్సాయేలు లోకురిజ్ పులాజ్ ఆఇ రోటెజ్ తయార్ కిని వండ్యి కిడెజ్ ఇజి ఆడ్ర సితాన్. వరి తొలిత పుట్టి కొడఃరిజ్, నమ్మి దూత నవ్వెండ మండ్రెజ్, వరి దార్బందరమ్దు నల సీల్కరిస్తెజ్ ఇజి ఆడ్ర సితాన్. 29 నమకమ్దానె, ఇస్సాయేలు లోకుర్ ఎర్జెజ్ సమ్దరమ్దాన్ వమ్మి బూమిదు నడిసి లెకండ్ నడిసి సాహాన్. అయగుస్తు దేసమ్దికార్ అయాలెకండ్ కిడెజ్ సుడఃతి వలె వారు ముడుఃగితార్. 30 నమకమ్దానె, ఇస్సాయేలు లోకుర్ ఏడు రోస్సు యెరికొ పట్టుం సుటులం బూలాతివలె, పట్టుమ్ది గోడెజ్ అర్తె. 31 నమకమ్దానె, సాని బూలాని రాహబు, దేవుణుదిజ్ లోజెఇ దని పట్టుమ్ది వరివెట సాఎతాద్. ఎందనిజ్ ఇహిజ, దేసమ్దిజ్ గుటు లాగ్దెజ్ వాతి వరిజ్ అది డగ్రు కిత్తాద్. 32 నాను మరిబా వెహ్సాజా? గిదియెను, బరాకు, సంసాను, యెప్ప, దావీదు, సముయేలు, ప్రవక్తరు నిని వరి వందిజ్ వెహ్సాజ్ నజి సమయం సాల్ఎద్. 33 నమకమ్దానె, వారు దేసమ్కాజ్ మున్ను విద్దెం కిజి గెలస్తార్. వారు సీతి నిజాయితికె కితార్, దేవుణు ఒట్టు కితికెజ్ దోహ్కాక్తె. వారు నొరెస్సు వెయ్యు మూక్తార్. 34 నండ్ కన్నె సిసుదిజ్ నస్తార్. కూర్దెజాణిజ్ సాఎండ తప్పె ఆతార్. వారు సత్తుసీలికార్ గాని సత్తు మనికార్ ఆతార్. వారు విదెమ్దు సత్తు మనికార్ ఆతార్ పయి సయనమ్ది వరిజ్ ఉలుస్తార్. 35 సెగొండెక్ బోదెకాజ్, వరి సాంతది వరిజ్ సాపుదాన్ మరజి దోహ్కాక్తె. మహికార్ నండ్ బాదెజ్ ఆతిజ్బా, వారు దేవుణు మున్ను మని నమకం డిసి, డిఃబె ఆని దని మున్ను సానిక నెగ్గె ఇజి సుడఃతాన్. ఎందనిజ్ ఇహిజ, వారు మరజి నిజెన్ వలె నెగ్గి బత్తు దోహ్కాక్తె. 36 సెగొండార్ దూసె ఆతార్. కొరడఃజాణిజ్ డెయ్ఎ ఆతార్. మరి సెగొండార్ తోహ్ ఆతార్, జెలిదు ఇడ్డః ఆతార్. 37 వారు పణకాణిజ్ డెయ్ఎ ఆతార్. రంవమ్కాణిజ్ రుండి ముకెజ్ కొయె ఆతార్. కుర్దెజాణిజ్ సపె ఆతార్. సెగొండార్ మెండ గొరెదినో, ఏలెటు గొరెదినో తోలు పార్పె ఆజి, బజ ఆజి, బాదెజ్ ఆజి, దూసె ఆజి బూలాతార్. 38 యూ నెగ్గి లోకుర్ మండ్రెజ్, యూ లోకం తగ్గెద్. వారు బీడిఃమ్ బూమిజ, గొరొకాజ్ బూలాతార్. సాలమ్క లోఇ, బూమిదు మని బొరోజ్ డాఃజెతార్. 39 వారు నమకం ఇల్తార్. అందెజె, నెగ్గికార్ ఇజి దేవుణు బాణిజ్ మెపు దోహ్కాక్తె. గాని వరి లోఇ ఎయెరిజ్బా, దేవుణు సీన ఇజి ఒట్టు కితికెజ్ దోహ్కాకుతె. 40 ఎందనిజ్ ఇహిజ, దేవుణు మా వందిజ్ ఇంక నెగ్గెక్ ఏర్పాటు కిత మనాన్. మా వెటనె, వరిజ్ పూర్తి కిడెజ్ ఇజి వన్ని ఉదెసం.

† 11:18 ఆది 21:12.

దేవుణు వన్ని కొడొరిజ్ దిదిజి సిక్స సీజినాన్

12 అందజె, మా సుటులుం సేన సాక్సిరు మనార్. అందజె, అడు కిజిని నజతిజ డిసి, మజి సిక్కుజ అర్వసిని పాపం డిసి, దేవుణు మా ఎద్దు ఇడ్డి బత్తు, ఇని ఉహ్కొక్సి ఫోటిదు ఓరిసిని ఉహ్కొక్సల్. 2 మా గురి యేసు దరోట్న ఇడొజి ఉహ్కొక్సల్. వాండ్రె మా నమకం మొదొల్న్సికాన్. పూర్తి కినికాన్. వాండ్రు సిలువాదు సిగు మని సావు సాదెజ్ తయార్ ఆతాన్. ఎందనిజ్ ఇహిజ, వెనుక వన్నిజ్ మంజిని సర్ద వాండ్రు నెన్నాన్. ఏలు పరలోకమ్దు దేవుణు సిమననం ఉణెర్ పడెకాదు గొప్పు మర్యాద్దాన్ బస్స మనాన్. 3 పాపం కినికార్ కితి నండొ బాదెజ్ వాండ్రు ఓరిస్సికెజ్ ఎత్తు కిదు. అందజె, మీరు మన్ను విస్సిఎండ, డిసిసిఎండ మండ్రెజ్, వన్నిజ్ ఎత్తు కిదు. 4 పాపం వెట కాట్లాడొజినిక నల సీని సనా ఏలుదాక మీరు ఎద్రిస్ ఇతిదెర్. 5 దేవుణు వన్ని కొడొరి లెకెండ్ మిజి ఉసార్ కిబిస్సి మాట మీరు ఫోస్తిదెరా?. "నా కొడొ, ప్రబు నిజి దిదిని వలె మన్ను బాద కిమాట్. వాండ్రు డటం వెప్పి వలె మీ మన్ను విస్సిమాట్. 6 ఎందనిజ్ ఇహిజ, ప్రబు వాండ్రు ప్రేమిసిని వరిజ్ దిదినాన్. వన్ని మరిన్ ఇజి డగ్రు కిని వన్నిజ్ దిదినాన్" †, ఇజి వెప్పినాన్. 7 ఒరెన్ అప్పాసి దిదిని వజ, మీ సైమెజ్ ఓరిస్తు. ఎందనిజ్ ఇహిజ, మీ సైమెజ్, దేవుణు మిజి వన్ని కొడొరి లెకెండ్ సుడొజినాన్ ఇజి తోరిస్సి. అప్పాసి దిదిని మరిసి ఎయెన్బా మనాండ్రా? 8 వన్ని మరిసిర్ విజెరిజ్ దిజినిలెకెండ్, మిజి దిదిఎండ మహిజ, మీరు వన్ని నిజమాతి కొడొరి అవర్. గాని ఆక కొడొరి ఇజినె అర్దం. 9 మజి విజెరిజ్ కాస్తి అప్పాసిర్ మహార్. వారు మజి దిదిజి మహార్. మాటు వరిజ్ గవరం సీజి మహార్. అహిజ, మా అయా లోకమ్ది బుబ్బు ఆతికాన్ దిదినివలె, ఎసా లావు వన్నిజ్ లోజిజి మాటు ఎలాకాలం బత్తిదెజ్? 10 మా బుబ్బర్, సెగం కాలం మజి దిదితార్. ఎందనిజ్ ఇహిజ అయొక నెగెద్ ఇజి వారు ఒడొబితార్. గాని, మా నెగెద్ నివందిజ్ దేవుణు మజి దిదిజినాన్. ఎందనిజ్ ఇహిజ, మాటు వన్నిలెకెండ్ పరిసుదమ్క మండ్రెజ్. 11 మజి దిదినివలె, అయొక సర్ద కిబిస్ ఎద్, దుకం కిబిన్నాద్. గాని అయాలెకెండ్ దిదిజి సిక్స లాగె అజి నెగి సరిదు వాతికార్, వెనుక సీతి నిజాయితిదాన్ కిజి, సమాదనందాన్ మంజినార్. 12 అందజె, డిస్తి †† మీ కికు పెర్దు. వణక్సిని ముణుకుజ్ సత్తు కిబిస్తు ‡. 13 "మీ కాల్యాజ్ తినాజ్ సరి తయార్ కిదు" ††. సాట కాల్యు బెణ్ ఎండ, సత్తు ఆని వందిజ్ తినాజ్ సరి తయార్ కిదు.

దేవుణుదిజ్ నెక్సి ఫాక్మాట్

14 విజెరి వెట సమాదనమ్దాన్ కూడొజి ఫాడొజి మండ్రెజ్ సుడొదు. పాపం కిఇ, దేవుణు వందిజ్ కేట ఆతి బత్తు, బత్తిదెజ్ సుడొదు. ఎందనిజ్ ఇహిజ, అయాలెకెండ్ బత్తిఇకాన్, ప్రబుజ్ సుడొఎన్. 15 ఎయెన్బా దేవుణు బాణిజ్ వాజిని వన్ని దయా దర్మం తప్పి సాన్ ఎండ జాగర్త సుడొదెజ్. ఉండ్రె సేందు మొక్క పిరిసి దని సేందు నండొండొరిజ్ బాద కినిలెకెండ్, ఎయెన్బా ఆవండ జాగర్త సుడొదెజ్. 16 సావు లెకెండ్ సాని బూలాజినో, దేవుణు వందిజ్ బక్తి సిల్లెండనో, ఎయెన్బా మన్ ఎండ జాగర్త సుడొదెజ్. వాండ్రు ఉండ్రె పుటా తిండి వందిజ్, వన్ని పెరి మరిసి ఇని అక్కు పార్తాన్. 17 మీరు నెసిని లెకెండ్, వెనుక వన్ని అప్పాసి. సీని దీవెనమ్కు వాండ్రు కోరితివలె, వాండ్రు నెక్సి ఫాకె ఆతాన్ †. ఎందనిజ్ ఇహిజ, వాండ్రు కితిక మారిస్సెజ్ వాండ్రు అట్ ఎతాన్. వాండ్రు నండొ అడొబాజి దీవెనమ్కు లొస్టిజ్ బా దొహ్కతు. 18 మీరు, ఇస్రాయేలు లోకుర్ సీనాయి గొరోణ్ డగ్రు వాతి లెకెండ్ రెఇతిదెర్. ముట్టి నెస్సెజ్ ఆని, సిసు కసిసి, గొప్పు సీకట్ మని, తుపాన్ మని గొరోణ్ డగ్రు రెఇతిదెర్. 19 వారు, జోడుబాంకెజ్ ఉహ్కొక్సి పెరి జాటు, వర్గిని జాటు వెహర్. అయొక వెహివలె, మరి వరివెట వర్గిమా ఇజి దేవుణుదిజ్ బతిమాలతార్. 20 ఎందనిజ్ ఇహిజ, "ఉండ్రె జంతు ఆతిజ్ బా, గొరోతు మట్టిజ, దనిజ్ వణకాణిజ్ డెయిజి సస్సెజ్" ††, ఇజి దేవుణు వెప్పి ఆర్డ్ర ఓరిస్సెజ్ అట్ ఎతార్. 21 అబ్బె తోరె ఆతిక, గొప్పు తియెల్ కల్లిస్సిక. అందజె మోసె వెహ్నాన్, "నాను గొప్పు తియెల్ ఆజి వణకెసిన్", ఇజి. సని గొరోణ్ డగ్రు ఆవద్ మీరు వాతిదెర్. 22 గాని మీరు, సీయెను గొరోత్ నె వాతి మనిదెర్. బత్తిజిని దేవుణు మంజిని పట్టుమ్దునె వాతి మనిదెర్. ఇహిజ, పరలోకమ్ది యెరూసలెమ్దునె వాతి మనిదెర్. సేన దూతార్ సర్దదాన్ కూడొజి మని బానె, వాతి మనిదెర్. 23 దేవుణు తొలిత కొడొరి, కూడొజి మని బానె వాతి మనిదెర్. వరి పేర్కు పరలోకమ్దు రాస్తి ఇడ్డె మన్నె. మీరు దేవుణు డగ్రునె వాతి మనిదెర్. వాండ్రె విజెరిజ్ తీర్పు సీనికాన్. పరలోకమ్దు మని సీతి నిజాయితి మని వరి ఫాణమ్క, డగ్రునె వాతిమనిదెర్. వారు పూర్తి కిబె ఆతికార్. 24 మీరు యేసు డగ్రునె వాతి మనిదెర్. వాండ్రె, అయొ కొత్త ఒప్పుమానం నడిపిస్సికాన్. మీరు, సిల్కరెసి ఆతి నల డగ్రు వాతి మనిదెర్. ఏబేలు నల వెప్పిని దన్నిముస్కు నెగి మాట వెప్పిని నల డగ్రు వాతి మనిదెర్. 25 అందజె, మీ వెట వర్గిజిని దేవుణుదిజ్ జాగర్త వెండ్రు. యా లోకమ్దు, దేవుణు డటం వెప్పివలె వెండ్రెజ్ కెఇతి ఇస్రాయేలు లోకుర్, దేవుణు సీని తీర్పుదాన్ తప్పె ఆదెజ్ అట్ ఎతార్ ఇహిజ, పరలోకమ్దాన్ డటం వర్గిజిని వన్నిజ్ నెక్తి ఫాక్తిజ, మాటు సిక్కుదాన్ తప్పె ఆదెజ్ అట్ ఎత్తు? 26 దేవుణు, సీనాయి గొరోత్ దాన్ వర్గితివలె, బూమి కద్దితాద్. గాని ఏలు వాండ్రు ఒట్టు కిత మనాన్. "మరి ఉండ్రె సుటుబా, నాను బూమిదిజ్ నె ఆవండ, అగాసమ్దిజ్ బా కద్లిస్సెలె" ††† ఇజి. 27 'మరి ఉండ్రె సుటుబా', ఇని మాటదిజ్, కద్దినికెజ్ మారిస్సె ఇజినె అర్దం. ఇహిజ, తయార్ కితికెజ్ కద్దిజి మారె ఆనె ఇజి. ఎందనిజ్ ఇహిజ, కద్లికెజ్ ఎలాకాలం మండ్రెజ్. 28 అందజె దేవుణు ఏలుబడి ఎసిజ్ బా కద్లిఎద్. అందజె ‡ దేవుణుదిజ్ వందనం వెప్పి తియెల్ దాన్ గవరమ్దాన్, వాండ్రు సర్ద ఆని వజ మాడిస్సాట్. 29 ఎందనిజ్ ఇహిజ, "మా దేవుణు సుర్సి సిసు ననికాండ్రె."

దేవుణుదిజ్ ఎలాగ సర్ద కిబిస్సెజ్

13 క్రీస్తు వెట కూడొజి మని తంబెరిజు ఇజి, ఒరెన్ మరి ఒరెన్ వన్నిజ్ ప్రేమిసిని మండ్రు. 2 నెస్ ఇ వరిజ్ డగ్రు కిదెజ్ ఫాన్ మాట్. యా లెకెండ్ డగ్రు కిజి, నెగొండార్, నెన్ ఎండనె దూతారిజ్ డగ్రు కిత్తార్. 3 జెలిదు మని వరిజ్ ఎత్తు కిదు. మీరు వరి వెట బాన్ మహివజ ఎత్తుకిదు. బాద ఆని వరిజ్ ఎత్తు కిదు. మీరు వరి లెకెండ్ బాద ఆజి మహివజ వరిజ్ ఎత్తు కిదు. 4 పెండ్రెదిజ్ విజెరి గవరం సీదెజ్ వలె. ఆల్పి మాసిర్ రిఎర్ బా, ఒరెన్ మరి ఒరెన్ వన్నిజ్ నమ్మిదెజ్ తగ్గి వరిలెకెండ్ మండ్రెజ్ వలె, సాని బూలాని వరిజ్, రంకు బూలాని వరిజ్ దేవుణు తప్ ఎండ సిక్స సీనాన్. 5 డబ్బుదిజ్ ఆన అమాట్. మిజి కల్లితి మనిదనితాన్ సర్ద

† 12:6 సామెత 3:11-12. †† దిని అర్దం ఇనిక ఇహిజ, కష్టమ్కు వాని వలె మీరు మనుసు విస్సిఎండ దయరమ్దాన్ నిల్దు ఇజినె. ‡ ప్రమెజ్ వాని వలె, మన్ను విస్సిఎండ దయరమ్దాన్ నిల్పు మండ్రు ఇజినె అర్దం. †† 12:13 సామెత 4:26. †† మరి ఉండ్రె రకం వెహ్నె, వాండ్రు కిత్తి తప్పి ఒప్పుకొండెజ్ వన్నిజ్ అట్ ఎండ ఆతాద్ ఇజి. ††† 12:20 నిర్గమ 19:12, 13. ††† 12:26 అగ్రయ 2:6. § 12:28 ద్వితి 4:24.

ఆదు. ఎందనిజ్ ఇహిజ, దేవుణు వెహ్త మనాన్, “నాను ఎసిజ్బా మిజి డిఃన్ఎ, నాను ఎసిజ్బా మిజి నెక్సి ఫాక్ఎ”, † ఇజి. 6 అందెజె దయ్ రమ్దాన్ వెహ్తజ్ అటూబ్, “ప్రబునె నజి తోడుః. నాను తియెల్ ఆఎ. లోకు నజి ఇని కిదెజ్ అబ్ఎర్” ††. 7 దేవుణు మాట మిజి వెహ్సి, మిజి నడిఃపిసిని వరిజ్ ఎత్తు కిదు. వరి బత్తుదాన్ వాతి విజా నెగ్గి దని వందిజ్ ఎత్తు కిదు. వారు నమ్మిత్తి లెకెండ్ నమ్మిదు. 8 యేసు క్రీస్తు ఇవన్, నేండ్రు, ఎలాకాలం ఉండ్రె లెకెండ్ మంజినాన్. 9 విజా రకమ్కాణి నెస్ఇ బోదెజ వెట సాన్మాట్. దేవుణు దయా దర్మమ్దాన్ మా మన్ను సత్తు ఆనికాదె నెగెద్. తిండి వందెజ్ మని రూలుజ లోజిజి ఆఎద్. అయాకెజ్ లోజితి వరిజ్ ఇని లాబమ్బా రెఎద్. 10 మజి ఉండ్రి వూజ సీని మాలి పీట మనాద్. దని బాణిజ్, గుడారమ్దు సేవ కిజిని వుజెరిజ తిండ్రెజ్ అక్కు సిల్లెద్. 11 యూదురి రూలు వజ, విజా వుజెరిజ మున్ను మని పెరి వుజెరి పాపం వందిజ్ వూజ లెకిండ్ జంతుజ నల దేవుణు వందిజ్ ఒద్దె కేట ఆతి గదిదు తనాన్. గాని కండ పట్టుం వెల్లి సుర్నార్. 12 అందెజె, యేసుబా పట్టుమ్ది వెల్గు వెల్లి బాద ఆతండ్రె సాతాన్. వన్ని సాంత నల వాక్సి వన్ని లోకురిజ్ పాపం సిలివరి లెకెండ్ కిదెజ్ వాండ్రు పట్టుమ్ది వెల్గు వెల్లి బాద ఆతండ్రె సాతాన్. 13 అందెజె మాటు పట్టుం వెల్గు వెల్లి వన్ని డగు సాన్ని వాండ్రు లాగె ఆతి సిగుదు వన్నివెట కూడ్నాట్. 14 ఎందనిజ్ ఇహిజ యా బూమిదు మజి ఎలాకాలం మని ఉండ్రి పట్టుం సిల్లెద్. వాదెజ్ మని పట్టుం వందిజ్ మాటు ఎద్రు సుడఃజినాట్. 15 అందెజె, యేసు పేరుదాన్, వూజ లెకెండ్ దేవుణుదిజ్ ఎస్తివలెబా పాగిడిఃజినాట్. ఇహిజ, వాండ్రు ప్రబు ఇజి మా వెయ్దాన్ ఒప్పకొడిఃజిని వూజ సీనాట్. 16 మహి వరి వందెజ్ నెగ్గెజ్ కిదెజ్, వరిజ్ సాయం కిదెజ్ పాస్నాట్. ఎందనిజ్ ఇహిజ, నిని వూజెజ దేవుణు సర్ద ఆనాన్. 17 మీ అతికారిజ మాటెజ్ వెండ్రు. వరి అతికారమ్దిజ్ లోజిదు, వారు మిజి జాగర్త సూణార్. ఎందనిజ్ ఇహిజ వరి పణిదిజ్ దేవుణుదిజ్ లెక్క ఒవజెప్తెజ్ ఇజి వారు నెన్నార్. మీరు వరిజ్ లోజితిజ, వారు సర్దదాన్ వరి పణిజ్ కినార్. సిలిజ వారు దుకమ్దాన్ కినార్. అయాకెజ్ మిజి నెగెకెజ్, సిఉ. 18 మా వందిజ్ పార్దనం కిదు. మా గర్బం మజి గదిన్ఎండ మన ఇజి మాపు వూర్తి నమ్మిజినాన్. మాపు కిజిని దని లోఇ నెగ్గెండ విజా కిదెజ్ కోరిజినాన్. 19 దేవుణు బేగినె నజి మీ డగు మర్జి తలెజ్ మీరు మరి లాపు పార్దనం కిదెజ్ ఇజి నాను ముకెలం బతిమాల్లిన.

20-21 దేవుణు మా ప్రబు ఆతి యేసుజ్ సావుదాన్ నిక్తాన్. వాండ్రె గొరెజ పెరి గవుడుఎన్. ఎందనిజ్ ఇహిజ, వాండ్రు వన్ని నల వాక్తాండ్రె సాతాన్. వన్ని నలదాన్ వాండ్రు ఎలాకాలం వందిజ్ ఒపుమానం ముద్ద కిత్తాన్. లోకురిజ్ సమాదనం సీని దేవుణు, వన్నిజ్ ఇస్టం ఆతికెజ్ కిదెజ్, మిజి నెగ్గెకెజ్ వాదెజ్ సాయం కిపిన్. యేసు క్రీస్తు సత్తుదాన్, వన్నిజ్ ఇస్టం ఆతికెజ్ విజా మా లోఇ కిపిన్. వన్నిజ్ ఎల్లకాలం గవరం మనిద్. ఆమెన్. 22 తంబెరిజాండ్, నాను మిజి ఉండ్రి ఇజి ఉత్తమ్నె రాస్త మన. అందెజె, నాను పణిన్తి మాటెజ్ జాగర్త వెండ్రు ఇజి ఉసార్ కిబిన్. 23 మా తంబెరి ఆతి తిమోతి జెలిదాన్ డిఃబె ఆతాన్ ఇజి మీరు నెస్సెజ్ ఇజి నాను కోరిజిన. వాండ్రు ఇబ్బె బేగి వాతిజ, మిజి సుడఃదెజ్ వన్నిజ్బా నా వెట తన. 24 మిజి నడిఃపిసిని విజెరిజ్, దేవుణు లోకుర్ విజెరిజ్ నాను వెన్బాతి లెకెండ్ వెహ్తు. ఇటలిదు మని నమ్మిత్తికార్ మిజి వెన్బాతి లెకెండ్ వెహ్సినార్. 25 దేవుణు దయా దర్మం మీ విజెదెరె వెట మసిద్.

† 13:5 డ్యుతి 31:6. †† 13:6 కీర్తన 118:6-7.

మార్కు

నెల్వకిబిసినిక

యా ఉత్తం రాస్తి యాకోబు ప్రబుఆతి యేసుజ్ తంబెరసి ఆతికాన్. యాకోబు యెరుసలేమ్దు మన్ని సజమ్ది పెద్దెలిజ లోఇ ఒరెన్. యాక రాస్తి కాలం రమారమి క్రీస్తు సకం 45 దాన్ 50 నడిమి కాలమ్దు రాస్త మనాన్. యా ఉత్తమ్దు ముకెలమాతిక సమకమ్దిజ్ రుజుప్ కినికాదె. నమకం నిజమాతికదో అవదో ఇజి ఎలాగ నెస్టెజ్ ఇజి రాస్త మనాన్.

- 1 దేవుణుదిజ్ని, ప్రబు ఆతి యేసు క్రీస్తుజ్, సేవకినికానాతి యాకోబు, ఆఇ దేసెమ్కాజ్ సెద్రితి మని దేవుణు లోకాజ్ విజేరిజ్ రాసిని ఉత్తం. మిజి విజేరిజ్ వందసమ్కు.

మాలెజ్ వానివలె అక్కెజ్ ఓరిస్టెజ్వలె

23 నాను ప్రేమిసిని తంబెరిజండె, నండొ మాలెజ్ వానివలె మీరు సర్దదాన్ మండ్రు. ఎండనిజ్ ఇహిజ, మాలెజ్ వానివలె యేసుప్రబు ముస్సు మన్ని నమకం డిస్ఎండ మహిజ, మాలెజ్ బిరిస్టెజ్ మిజి సత్తు మనాద్ ఇజి దినివలెహాన్ రుజుప్ వానాద్. 4 మీరు కిజిని పణిదు డిస్ఎండ ఓరిసి మండ్రు. అయాలెకెండ కితిజ మీరు కస్టం బిరిస్టిదన్ని లోఇ పూర్తి ఆతికిదెర్ అనిదెర్. అయావెలె మీ గుణమ్దు ఇనికబా తక్కు సిల్లెండ మంజినిదెర్. 5 మీ లోఇ ఎయెజ్బా గెణం తక్కు మహిజ, వాండ్రు దేవుణుదిజ్ లోస్టెజ్. దేవుణు వన్నిజ్ సీనాన్. ఎందానిజ్ లోసినార్ ఇజి కోపం ఆవండ దేవుణు విజేరిజ్ తక్కు సిల్లెండ సీనాన్. 6 గాని, వాండ్రు కండెక్బా అనుమానం సిల్లెండ నమకమ్దాన్ దేవుణుదిజ్ లోస్టెజ్. ఎందానిజ్ ఇహిజ అనుమానం ఆనికాన్ గాలిదాన్ ఎగ్రిని సమ్దరమ్ది ఉల్కెల్కెండ తూల్లి అర్ని జోబ్బివజ ఆనాన్. 7-8 అనుమానం ఆనికాన్ దేవుణు బాణిజ్ ఇనికబా దోహ్కాద్ను ఇజి ఒడెబినిక ఆవద్. అనుమానం ఆనికాన్ రుండి మన్సుజ్ ఆజి ఇనిదన్ని లోఇబా స్తిరం సిల్లికాన్. 9 దేవుణుదిజ్ సమ్మితి బీదవాండ్రు, దేవుణు వన్నిజ్ పెరికాన్ కిత్తిజ్ సర్దద ఆజి మండ్రెజ్. 10 అయావజనె ఆస్తి మనికాన్, వన్నిజ్ కల్గితిక తక్కు ఆజి ఇజిరికానాతిజ్బా సర్దద ఆజి మండ్రెజ్. ఎందానిజ్ ఇహిజ ఉండ్రె గడ్డి పూబు వెటనె రాల్లివజ, ఆస్తి మనికాన్ ఆహి ఆన సానాన్ ఇజి వాండ్రు నెస్టాన్. 11 పాద్దు సోసి నండొ ఎండ కిత్తిజ్ గడ్డి వహ్నా సానాద్, పూబు రాల్లి సానాద్. అయ పూబు సోకు విజా పాడాఃన సానాద్. అయావజనె గెణస్టెజ్ కిని పణిలోఇ ఆస్తి మన్నికాన్ సిల్లెండ ఆనాన్. 12 మాలెజ్ వానివలె దేవుణు ముస్సు నమకం డిస్ఎండ అక్కెజ్ బిరిస్టికాన్ సర్ద ఆనాన్. మాలెజ్ విజా బిరిస్టి వెనుక దేవుణుజ్ ప్రేమిస్టివరిజ్ సీనా ఇజి ఒట్టు కిత్తి ఎలాకాలం బత్కిని బత్కు ఇని ఇనాయం దేవుణు సీనాన్.

13 తప్పుపణి కిదెజ్ మన్సుద్ వాతివెలె, అక్క దేవుణు సిత్తిక ఇజి ఎయెన్బా వెప్పాక ఆవద్. ఎందానిజ్ ఇహిజ సెఇ దన్నిదటాన్ దేవుణు తప్పుపణి కిబిస్టెజ్ అబ్వన్. తప్పుపణి కిబిస్టెజ్ దేవుణు ఎయెరి మన్సుదుబా ఆన పుటిస్ఎన్. 14 గాని ఒరెన్ ఒరెన్ వన్ని సాంత మన్సుదాన్ మన్ని ఆసదాన్ మర్జె లాగె ఆజి సెఇ పణి కిజినాన్. 15 తప్పుకిదెజ్ మన్ని ఆన ఎలాగ ఇహిజ అయెలికొడాః పాటాద్ పిండెం ఆతిలెకెండ అయాక పిరితివలె ఏరు ఈబాజినాద్. అయాలెకెండ ఒరెన్ మన్సుదు సెఇ ఆన నండొ ఆజి పాపం పుట్నాద్. పాపం ముద్రితిజ వన్నిజ్ సాపు వాజినాద్.

16 నాను ప్రేఇని తంబెరిజండె, ఎయెర్బా మిజి మోసెం కివండ నుడెదు. 17 నెగ్గెకెజ్ విజా, కల్లిసిల్లికెజ్ విజా దేవుణు సీని ఇనాయమ్కునె. ఆగసమ్దు మన్ని జాయ్ విజా పుటిస్టి దేవుణుబాణిజ్ నెగ్గెకెజ్ విజా వాజినె. జాయ్ సాస్తి నీడః వానాద్. గాని దేవుణు మార్ఇకాన్. 18 నిజమాతి వన్ని మాటదాన్ వాండ్రు తీర్మనం కిత్తిలెండ దేవుణు మజి కొత్త బత్కు సిత్తాన్. ఎందానిజ్ ఇహిజ పుటిస్టి విజా వనకముస్సు దేవుణు మజి వన్ని వందిజ్ ఎర్లిసి ఇట్టాన్.

దేవుణు మాట వెంజి అయ మాటవజ నడిదెజ్వలె

19 నాను ప్రేమిసిని తంబెరుజాండె, యాక నెగ్గెండ వెండ్రు. ఒరెన్ ఒరెన్ బాగ వెంజి, వెహి వెటనె వర్గివండ, వెహి వెటనె కోపం ఆవండ మండ్రెజ్. 20 ఒరెన్ కోపం ఆతిజ దేవుణుదిజ్ ఇస్టమాతివజ సీతినిజయ్దాన్ పణి కిదెజ్ అబ్వన్. 21 అందెజె మన్సుద్ నిండ్రెతి సెఇకెజ్ విజా డిసిసిజి, పిరిజివాని సెఇ అలవాటుజ్ విజా డిసిసిజి, మిజినె తగిని దేవుణు మీ మన్సుదు ఇట్టి మాటెజ లోజెదు. దేవుణు మీ మన్సుదు ఇట్టి ఆ మాటెజలోఇ, మిజి గెల్పిస్టెజ్ సత్తు మన్నె.

22 మీరు దేవుణు మాటెజ్ వెండ్రెజ్ ఆవద్. దేవుణు మాట వెంజి అయ మాట వజ నడిదెజ్బావలె. దేవుణు మాటెజ్ వెంజి అయవజనె నడివండ మహిజ మిజి మీరె మొసెం కిజినిదెర్. 23 దేవుణు మాట వెంజి అయావజ నడిఇకాన్ అర్దమ్దు వన్ని మొకొం సుడెఃతి వన్నిలెకెండ మనాన్. 24 వాండ్రు అర్దమ్దు సుడెఃజి మర్జి సాహి వెటనె వన్ని మొకొం, ఎలాగ మర్తికదో ఇజి ఫాసినాన్. 25 దేవుణు వెప్పి పూర్తి ఆతి రూలుజ్ లోకాజ్ పాపమ్దాన్ డిస్సిస్నాద్లె. ఒరెన్ లోకు దేవుణు వెప్పి అయ మాటెజ్ విజా నెగ్గెండ సద్విజి బాన్ మనికెజ్ ఫాస్ఎండ అయావజనె వన్ని బత్కుదు నడిఃతిజ, వాండ్రు కిని విజా పణిజలోఇ దేవుణు వన్నిజ్ దీవిస్నాన్.

26 ఎయెస్బా, నజీ దేవుణు ముస్సు నండొ బక్తి మనాద్ ఇజి వెప్పి వెనుక, వన్ని నాలిక అడ్డు సిల్లెండ వర్గితిజ వన్నిజ్ వన్నిబక్తి విలువ సిల్లికాద్. వన్నిజ్ వాండ్రె మొసెం కిబె ఆజినాన్. 27 మా బుబ్బొ దేవుణు సుడెఱిజ నిజమాతి బక్తి ఇనిక ఇహిజ, యాయ బుబ్బొర్ సిల్లి కొడెఱిజ్, ముండ మణిసి ఆతి అయ్లికొడెఱిజ్ వరి కష్టమదు సాయం కిదెజ్, దేవుణుదిజ్ వడిఱిజ వనకలోఇ కూడెఱిజ్ మండ్రెజ్ ఇకాదె నిజమాతి బక్తి.

విజేరిజ్ ఉండ్రెలెకెండ సుడెఱిజ్వలె

2 నాను ప్రేమిసిని తంబెరిజండె, గొప్ప జాయ్దాన్ నిండ్రెతి సాకు మన్ని ప్రబువాతి యేసుక్రీస్తుజ్ నమ్మిత్తి మీరు, లోకాజ్ నడిఱిమి తేడ తోరిస్కాల్. 24 ఎలాగ ఇహిజ బజారం బొందు ఇట్టిజి, నండొ దరది సాక్రెజ్ పార్వజి ఒరెన్, మరి ఒరెన్ బీదవాండ్రు, మీరు పార్లనం కినిబాన్ యా రిఎర్ వాతార్ ఇహిజ, నెగ్గి సాక్రె పార్వజి వాతివన్నిజ్ మర్యాద సీజి అయ బీదవన్నివెట, “సిను అబ్బె నిల్లె, సిల్లిజ నా కాల్కు డగ్రు ఇబ్బె అడిగి బస్అ”, ఇజి వెప్పిజ, మీరు బీదవన్నిజ్ ఆస్తిమన్ని వన్నిజ్ ఎర్రిస్తిలెకెండ మంజినాద్. ఈహు మీరు మీ మన్నుదు మన్ని సెజ ఉదెనమ్దాన్ లోకాజ్ తీర్పు కిజినెదెర్. 5 నాను ప్రేమిసిని తంబెరిజండె, మీరు నెగ్రెండ వెండ్రు. యా లోకమ్ది బీదవారు దేవుణు ముస్సు ఇడ్డి నమకం వందిజ్ ఆస్తి మన్నికారాదెజ్ దేవుణు వరిజ్ ఏర్పాటు కితాన్. దేవుణుదిజ్ ప్రేమిసిని వరిజ్ సీనా ఇజి ఒట్టు కిత్తి దేవుణు రాజ్యం దేవుణు వరిజ్ సీనాన్. 6 గాని మీరు బీదవరిజ్ సిగు కిజినెదెర్. మిజి మాలెజ్ కినికార్ ఆస్తిమన్నికారె గదె. మిజి కోర్టుదు లాగేజి ఒనికార్ వారె గదె. 7 మీరు అసిని యేసుక్రీస్తు నెగ్గి పేరు, వీరె దూసిసినిగదె.

8 దేవుణు మాటదు మన్ని ముకెలమాతి రూలు ఇనిక ఇహిజ, సిను నిజి ప్రేమిసిని లెకెండ మహివరిజ్బా ప్రేమిన్అ † ఇజి ఆహు కిత్తిజ మీరు బాగ నడిఱిసినిదెర్. 9 గాని మీరు విజేరిజ్ ఉండ్రె లెకెండ సుడెఱిజ్ మహిజ పాపం కిజినెదెర్. దేవుణు సిత్తి రూలు మీరు తప్పిదెర్ ఇజి తీర్పు వాజినాద్. 10 ఎయెరుబా దేవుణు రూలుజ విజా వన్కాజ్ లోజిజి ఉండ్రె రూలు తప్పిజ విజా రూలుజ్ తప్పిలెకెండె. 11 మీరు రంకు బూలానిక ఆవద్ ఇజి రూలు మనాద్. లోకాజ్ సమ్మిక ఆవద్ ఇజిబా రూలు మనాద్. మీరు రంకు బూలాఇదెర్ గాని లోకాజ్ సమ్మిజ విజా రూలుజ్ తప్పిలెకెండె. 12 లోకాజ్ విడుఱిజ సీని రూలుదాన్ దేవుణు మిజి తీర్పు కినికార్. అందెజె సరి ఆతి మాట వర్గిదు, ఆహి నడిఱిజు. 13 ఎందానిజ్ ఇహిజ, కనికారం తోరిస్ఇ వన్నిజ్ కనికారం సిల్లి తీర్పు వానాద్. గాని దేవుణు తీర్పుకినివలె కనికారం తోరిస్తి వన్ని ముస్సు దేవుణు కనికారమన్ గెలిస్కాద్. వన్నిజ్ తీర్పు రెవద్. ఎందానిజ్ ఇహిజ దేవుణు తీర్పు కిదెజ్ తయార్ ఆతిజ్బా వన్ని కనికారం తీర్పుదిజ్ ఇంక పెరిక.

నెగ్గి వణిని నమకం

14 నా తంబెరిజండె, ఒరెన్ దేవుణు ముస్సు నమకం మనాద్ ఇజి వెప్పి నమ్మకమ్దిజ్ తగ్గివజ వణి కివండ మహిజ వన్నిజ్ లాబం సిల్లెద్. నన్ని నమకం వన్నిజ్ గెల్పిన్వద్. 15-16 ఉండ్రె వేల ఒరెన్ తంబెరి గాని తజిసి గాని సరి ఆతి సాక్రెపాతెజ్ సిల్లెండ, తిండి సిల్లెండ మహివలె వరిజ్ కావాలిస్తి వనకాజ్ వందిజ్ ఇని సాయం కివండ, “ఏలు సాన్అ, సిను కాయ్జి నెగ్రెండ ఉణిజి మన్అ”, ఇజి వెప్పిజ ఇని లాబంబా సిల్లెద్. 17 అయావజనె నమకమ్దిజ్ తగితి వణి కివండ, నమకం ఉండ్రె మహిజ అయ నమకమ్దాన్ ఇని లాబం సిల్లెద్. 18 గాని మీరు ఒప్పుకొడెఇదెన్సు. ఒరెన్ వన్నిజ్ దేవుణు ముస్సు నమకం మనాద్ ఇజి వెప్పినిదెర్సు, మరి ఒరెన్ వన్నిజ్ నెగ్గి వణిజ్ మన్నె. గాని నెగ్గి వణిజ్ కివండ మిజి నమకం మనాద్ ఇజి ఎలాగ మీరు తోరిస్సిదెర్ ఇజి నాను వెన్బాజిన. నాను నా నెగ్గి వణిజాణ్ నా నమకం తోరిస్సి. 19 దేవుణు ఒరెండ్రె ఇజి సీను నమ్మిజిని. ఆహి నమ్మిదెజ్ నెగ్గె. దెయమ్కుబా ఆహి నమ్మిజి తియెలాజి వణిక్కినె. 20 బుద్ది సిల్లికి, నిజి నమకం మనాద్ ఇజి తోరిసిని నెగ్గి వణిజ్ సిల్లు ఇహిజ అయ నమకం వణిదిజ్ రెఇక ఇజి సీను నెన్ఇదా? 21 మా అనిగొగొ ఆతి అబ్రహం, వన్ని మరిసి ఆతి ఇన్నాకుజ్ పూజ కిదెజ్ పూజ బసాదు ఒత్తివలె, వాండ్రు కిత్తి వణిదాన్ సీతి నిజయ్తి మన్నికాన్ ఇజి దేవుణు వన్నిజ్ ఇడ్డాన్. 22 సుడెఱిజు, వన్ని నమకమ్ని, వాండ్రు కిత్తి వణి రుండిబా కూడెజి వన్ని నమకం పూర్తి ఆతాద్. 23 “అబ్రహం దేవుణుదిజ్ నమ్మితాన్. అందెజె దేవుణు వన్నిజ్ సీతినిజయ్తి మన్నికాన్ ఇజి ఒప్పుకొటాన్”, ఇజి దేవుణు మాటదు రాస్తి మాట ఆహి జర్గితాద్. మరి దేవుణు కూలాయెన్ ఇజి పేరు వన్నిజ్ వాతాద్. 24 ఎయెస్బా దేవుణు ముస్సు మన్ని నమకం ఉండ్రెదానె ఆవద్, నెగ్గి వణిజాణ్బా సీతినిజయ్తికాన్ ఇజి దేవుణు ఇడ్డాన్ ఇజి మీరు నెసినిదెర్. 25 అయావజనె సాని బూలానికాద్ ఆతి రాహాబుబా పట్టుమ్దిజ్ సడిఱిజ్ సిల్లెండ సుడెఱిజ్ వాతి వరిజ్ దన్ని ఇండ్రె బాడ్డి సీజి ఆజ సరి దాన్ పొక్తాద్. అది కిత్తి నెగ్గి వణిదాన్ సీతినిజయ్తికాద్ ఇజి దేవుణు ఇడ్డాన్. 26 పాణం సిల్లి ఒడెఱిజ్ వాతికదె. అయావజనె నెగ్గి వణి సిల్లి నమకం సాతి వజనె.

నాలికదిజ్ అడ్డు కిదెజ్

3 నాను ప్రేమిసిని తంబెరిజండె, మీ లోఇ నండొండార్ బోద వెప్పికిదెర్ ఆమాల్. ఎందానిజ్ ఇహిజ, బోదిసినికార్ ఆతి మిజి దేవుణు గటిజ్ ఆతి తీర్పు సీనాన్ ఇజి మీరు నెసినిదెర్. 2 మాటలు విజేటె నండొ వణిలోఇ తప్పి సాన్నినాల్. గాని ఎయెస్బా వాండ్రు వెప్పి మాటెజె లోఇ ఎనెజ్బా తవ్విండాతిజ వాండ్రు పూర్తి ఆతికాన్, ఇని తప్ప సిలికాన్. వాండ్రు వన్ని ఒడెఱిజ్ మన్ను విజా అణసి ఆజి మండ్రెజ్ అటాన్. 3 గుర్రమ్ది వెయ్దు కలెం †† ఇట్టిజ అక్క లోజిజినాద్. అయ ఇజిరి కలెమ్దానె మజి ఇష్టమాతి బాడ్డిదు దన్నిజ్ మహైజ్ ఆనాద్. 4 సిల్లిజ ఉండ్రె ఓడెఱిజ్ సుడెఱిజు. అక్క ఎసా పెరిక ఆతిజ్బా, పెరి గాలిదాన్ సానికెజ్ ఆతిజ్బా, ఓడెఱిజు మన్ని సుకాని ఇని ఇజిరి మరదాన్ ఓడెఱిజు నడిఱిసినికాన్, వన్నిజ్ ఇష్టమాతి బాడ్డిదు ఒసినాన్. 5 అయాలెకెండ నాలికబా ఇజిరిక ఆతిజ్బా అక్క గొప్ప వనక వందిజ్ పాజిజి వర్గిజినాద్ ఎస్సా ఇజిరి సిను ఆతిజ్బా పెరి గొరొన్ది మరెకాజ్ విజా సుర్పాకాద్. 6 నాలికబా ఉండ్రె సిను లెకెండె. ఒడెఱిజు మన్ని వనకలోఇ అక్క పూర్తి సెఇక. అక్క ఒరెన్ వన్నిజ్ పూర్తి సెఎన్ కిజినాద్. నరకమ్దానె వాతి సిను నాలికాదు కసి వన్ని బత్తు విజా నాసనం కిజినాద్. 7 విజా రకమ్కాణి జంతుజ, ఆగసమ్దు మన్ని పాటిజ, సరాన్కాజ్, ఏరు లోఇ మన్ని విజా మొయెజ,

† 2:8 లేవ 19:18. †† గుర్రం వెయ్దు ఇట్టి ఇజిరి సెక్క ముక్క అక్క గుర్రం వెయ్దు మహిజానె దన్నిజ్ నడిఱిజ్ ఆనాద్.

లోజ్జిన్ లోకు అట్నాన్. 8 గాని ఎయెర్ బా నాలికదిజ్ లోజ్జిన్ అట్ ఏర్. అది పూర్తి సెఇక. దనిజ్ అడ్డు కిదెజ్ ఎయెర్ అట్ ఏర్. సాపుదిజ్ తగితి వినం తసినాద్. 9 యా నాలికదానె బుబ్బుతి దేవుణుదిజ్ స్తుతి కిజినాట్. యా నాలికదానె దేవుణు మూర్తి లెకెండ్ పుటిస్తి లోకాజ్ సయిప్ సీజినాట్. 10 ఉండ్రె వెయుదానె నెగ్గి మాటజ్, సయిప్ సీని మాటెజ్ వాజినాద్. నా తంబెరిజాండె, మీరు ఆహె మంజినిక ఆవద్. 11 ఉండ్రె ఊటదానె నెగ్గి ఏరుని సెఇ ఏరు రెఉ. 12 బొడె మరాతు ఒలివ పట్టు అస్ ఉ. ద్రాక్కు తివాద్ బొడె పట్టు రెఉ. అయావజనె సారు ఏరు సాని ఊటదాన్ నెగ్గి ఏరు రెఉ.

రుండి రకమ్ కాణి గెణమ్ కు

13 మీ లొఇ గెణం తెలివి మన్నికాన్ మహిజ, అక్క వన్ని నెగ్గి బత్తుదాన్ రుజాప్ కిదెజ్. గెణమ్ దాన్, లొజ్జి మంజిని గుణం వానాద్. నజీ గెణం తెలివి మనాద్ ఇజి లొజ్జి మంజిని గుణమ్ దాన్ వాండ్రు కిని పణి లొఇ తోరిసిన. 14 గాని మీ మన్నుదు నండొ పగ, గోస, మీ వందిజ్ మన్ని మన్ను ఇడెఃతిజ మీ గెణం వందిజ్ పాజిదెజ్ ఆవద్. మీ గెణం వందిజ్ వెప్పాక నిజం ఆవద్. 15 నన్ని బుద్ది దేవుణు సిత్తిక ఆవద్. అక యా లోకమ్ దాన్, లోకు బుద్దిదాన్, సయితానుబాణిజ్ వాతి గెణమె. 16 ఎంబె గోస, మీ వందిజె మని మన్ను మనాదొ, అబ్బె టంటెజ్, విజా రకమ్ కాణి పాపమ్ కు మంజినె. 17 గాని దేవుణుబాణిజ్ వాని గెణం కల్తి సిల్లిక. అయ గెణం మన్నికాన్ సమదనమ్ దాన్, సార్లిదాన్, విజేరెవెల కూడెఃజి, లొజ్జి మంజిని బుద్దిదాన్, కనికారమ్ దాన్, నెగ్గి పణిజాణ్, విజేరిజ్ ఉండ్రెలెకెండ్ సుడెఃజి, నిజమ్ దాన్ పణి కినార్. 18 సమదనం కినికార్ సమదనం విత్తి, నీతి నిజయ్తి ఇని పంట కొయ్ నార్.

దేవుణుదిజ్ లొజ్జిదు

4 మీ లొఇ జటిజ్ ఆదెజ్, పొట్లాడెఃదెజ్ బుద్ది మనాద్. సుకం మున్ను మండ్రెజ్ ఇజి మీ మన్నుదు మన్ని ఆసదానె నన్ని బుద్ది వాజినాద్. 2 మీరు ఇనికెజ్ దొహ్ కుద్ ఇజి ఆస ఆజినిదెర్ గాని అకెజ్ మిజి దొహ్ కుండ్ ఆజినె. అయావలె మీరు సప్పిదెర్. ఇతాహ వరిది ఆస ఆనిదెర్ గాని దొహ్ కిస్సెజ్ అట్ ఇదెర్. మీరు టంటెజ్ ఆజి పొట్లాడెఃజినిదెర్. మిజి కావాలెస్తిక ఎందానిజ్ దొహ్ కుండ్ ఇహిజ, మీరు దేవుణుదిజ్ లొఇదెర్. 3 మీరు లొన్నివలె మిజి దొహ్ కుండ్. ఎందానిజ్ ఇహిజ మీరు సెఇ ఉదెసమ్ దాన్ లొన్నిదెర్. సుకం మున్ను మండ్రెజ్ ఇజి మీరు లొన్నిదెర్. 4 మీరు దేవుణుదిజ్ డిఃసి సాహికిదెర్. యా లోకమ్ దిజ్ ప్రేమిస్తికాన్ దేవుణుదిజ్ విరోదమాతికాన్ ఇజి మీరు నెసేఇదెరా? యా లోకమ్ దిజ్ కుల తొప్తికాన్ దేవుణుదిజ్ పడిఃఇకాన్ ఆనాన్. 5 దేవుణు మా లొఇ ఇడ్డి ఆత్మ, మా వందిజ్ నండొ ఆస ఆజినాన్ ఇజి దేవుణు మాటదు మనాద్. అయ మాట నిజం ఇజి మీరు నెసినదెర్. 6 గాని దేవుణు సత్తుదాన్ కూడిఃతి దయాదర్మం మీరు ఆస ఆని దన్నిజ్ ఇకం నండొ సీజినాన్. అందెజె "గర్త్ర ఆని వరిజ్ దేవుణు ఎద్రిసినాన్. గాని తగ ఆతి మన్ని వరిజ్ దయాదర్మం సీజినాన్", ఇజి దేవుణు మాటదు వెప్పినాన్. 7 అందెజె మీరు దేవుణుదిజ్ లొజ్జిదు. సయితాన్ దిజ్ ఎద్రిస్తు. అయావలె సయితాన్ మీబాణిజ్ ఉహ్ కు సానాన్. 8 మీరు దేవుణు డగ్గు రద్దు. అయావలె మీ డగ్గు రద్దు. అయావలె దేవుణు మీ డగ్గు వానాన్. మీరు కిని పణిజె లొఇ ఇని తప్పుబా మన్ ఏండ మండ్రెజ్, పాపం పణిజ్ విజా డిఃసిసీదు. దేవుణుదిజ్, లోకమ్ దిజ్, ప్రేమిసినె రుండి మన్ను డిఃసిసీజి, దేవుణుదిజ్ ప్రేమిసినె ఉండ్రె మన్ను ఆజి మండ్రు. 9 మీ పాపం వందిజ్ ఒడెఃబిజి దుకం ఆజి నండొ అడఃబాదు. మీరు సిక్కిక డిఃసి, అడఃబాదు. మీరు సర్ద డిఃసి, దుకం ఆదు. 10 దేవుణు ముజాల మీరు తగిజి మండ్రు. అయావలె దేవుణు మిజి గన్ రం సీనాన్. 11 నాను ప్రేమిసినె తంబెరిజాండె, ఒరెన్ మున్ను ఒరెన్ విరోదం వర్గిమాట్. మరి ఒరెన్ వన్నిజ్ పడిఃఇక వెప్పికాన్, మరి ఒరెన్ వన్నిజ్ తీర్పు కినికాన్. దేవుణు వెప్పి రూలుదిజ్ విరోదం ఆజినాండ్రె దేవుణు సిత్తి రూలుదిజ్ వాండ్రు నెక్కిపాక్కినాన్. మీరు దేవుణు రూలుజ్ నెక్కిపాక్కిజి మీరు దేవుణు రూలుదిజ్ లొబడెఃఇదెర్. గాని దేవుణు రూలుజ్ సరిఆతికెజ్, ఆవద్ ఇజి మీరు తీర్పు తీరిసినకార్ ఆనిదెర్. 12 విజా రూలుజ్ సీనికాన్ దేవుణునె. విజేరిజ్ తీర్పు సీనికాన్ దేవుణునె. ఒరెన్ వన్నిజ్ గెల్పిస్సెజ్ వాండ్రు అట్నాన్. ఒరెన్ వన్నిజ్ నాసనం కిదెజ్ వాండ్రు అట్నాన్. పడిఃకాతి వన్నిజ్ తీర్పు సీదెజ్ నీను ఎయి?

మర్స రోజు వందిజ్ పాజిదెజ్ ఆవద్

13 నాను వెప్పికాన్ నెగ్రెండ వెండ్రు. మీ లొఇ సెగొండార్ ఈహు వెవ్నర్, "నేండ్రు సిల్లె, విగెహిజ్ ఎంబె ఎంబె ఉండ్రె పట్నుం సాన్ని, అబ్బె ఉండ్రె ఏంటు మంజి బేరం కిజి నండొ డబ్బు గణన్న". 14 అహిజ, విగెహిజ్ నీ బత్తుదు ఇనిక వానాదొ నిజి తెలివద్. నీ బత్తు సణెం తోరె ఆజి సణెమదిజె మాయ ఆని ఆవిరి నన్నిక. 15 అందెజె మీరు ఈహు వెప్తాజ్, "దేవుణుదిజ్ ఇష్టం మహిజ మాపు బత్తినాప్, అక్క కినాప్, ఇక్క కినాప్". 16 గాని మీరు గర్త్ర ఆజినిదెర్. మీరు మీ వందిజె పాజిజినిదెర్. ఇక్క విజా తప్పు. 17 ఎయెర్ బా సరిఆతి పణి ఎమేణిక ఇజి నెసి, అయాలెకెండ్ కిపిండ మహిజ వాండ్రు పాపం కిజినాన్.

ఆస్తి మన్నికార్ జాగర్త్ర మండ్రు

5 ఆస్తి మన్నికార్ నాను వెప్పికాన్ వెండ్రు. మిజి వాని గొవ కష్టమ్ క వందిజ్ దుకమ్ దాన్ నండొ అడఃబాదు. 2 మీ ఆస్తి విజా పాడాఃన సానాద్లె. మీ పాతెజ్ విజా సెద తినెలె. 3 మీ బజారం, వెండిదిజ్ కరి తినాద్లె. దేవుణు తీర్పు కినివలె ఆ కరి నీ మున్ను రుజాప్ మంజి సీసువజ మిజి నాసనం కినాద్లె. మీరు గణాస్తి ఆస్తి విజా, దేవుణు తీర్పు కిని రోజు వందిజ్ కుంబ కిజినిదెర్. 4 సుడెఃదు, మీ బూమిదు పణి కిత్తివరిజ్ కూలి డబ్బు సిఇతిదెర్. అయా కూలిడబ్బు మీ ఎద్దు మొరొ ఆజినె. మీ పంట కొయ్ పరి మొరొ గొప్ప సత్తు మన్ని దేవుణుబాన్ సాహద్. 5 మీరు యా లోకమ్ దు మహివలె సుకం మున్ను మంజి సర్దదాన్ బత్తితిదెర్. కొయ్ దెజ్ బలెస్తి మన్ని కోడ్డిలెకెండ్ కడెఃవెరి దినమ్ కాజ్ వాని మీ నాసనమ్ వందిజ్ మీ మన్ను బలిసి వాతాద్. 6 తప్పు కిజి వరిజ్ తప్పు కిత్తికార్ ఇజి నేరం మొప్పి, వరిమున్ను తీర్పు తపిసి సప్పిదెర్. మిజి ఎద్రిస్సెజ్ వారు అట్ ఎతార్.

† బూమిలోఇహాన్ నెగ్గి ఏరుని సెఇ ఏరు వానె. బానె సెఇ ఏరునె వానె. తియాజ్ అఉ. సారు మన్నికాదె.

కష్టమీదు ఓరిసి మండ్లు

7 అందెజె, నా తంబెరిజాండె, ప్రబు ఆతి యేసు క్రిస్తు వాని దాక వన్నివందిజ్ ఓరిసి మండ్లు. సుడేడు, ఒరెన్ రెయు వాండ్లు గొప్ప విలువాతి వన్ని బూమి పంట బూమిపంట వానేండ ఎస్సా కాలం కాన మంజినాన్. ముజూల్ పిరుదిజ్, కడివేరి పిరుదిజ్ వాండ్లు కాన మంజినాన్. 8 అయావజనె మీరుబా ఓరిసి మండ్లు. మీ మన్ను కద్దివండ ఇడేడు. ప్రబు ఆతి యేసు క్రిస్తు వాని రోజా డగ్రు ఆతాద్. 9 నాను ప్రేమిసిని తంబెరిజాండె, దేవుణు మిజీ తీర్పు కివండ మండ్రెజ్ ఇహిజ ఒరెన్ ముస్సు ఒరెన్ మొరొ ఆమాల్. ఎందానిజ్ ఇహిజ దేవుణు మిజీ తీర్పు సీనాన్లె. తీర్పు కినికాన్ డగ్రునె మనాన్. 10 దేవుణు మాట వెస్తా ప్రవక్తరు ఎలాగ మహార్ ఇజి సుడేడు. వరిజ్ నండో మాలెజ్ కిత్తిజ్ బా వారు అక్కెజ్ బరిస్తార్. 11 నమకం డిఃనీవండ బరిసి మహికార్ సర్ల ఆనికార్ ఇజి మాప్ వెస్సినాప్ ఇజి మీరు నెసినిదెర్. యాబు, కష్టమీకు వాతివలె ఓరిస్తిజ్ దేవుణు ఎలాగ వన్ని ఉదెసమ్కు పూర్తి కిత్తాన్ ఇజి మీరు వెహిదెర్. ఎందానిజ్ ఇహిజ దేవుణు నండో కనికారం, దయ మన్నికాన్. 12 ముకెలమాతి ఉండ్రీ మాట ఇనిక ఇహిజ మీరు ఆగసం తోడు గాని, బూమి తోడు గాని, మరి ఇనిదన్ని తోడుబా గాని అసి ప్రమాణం కినిక ఆవద్. మీ మాట ఒఓ ఇహిజ ఒఓ ఇజి, ఆవద్ ఇహిజ ఆవద్ ఇజి మండ్రెజ్. ఆహె మహిజ దేవుణు తీర్పు సీనివెలె మిజీ సిక్కు రెవద్.

నమకమీదాన్ కూడితి పార్లనం

13 మీ లొఇ ఎయెజ్ బా మాలెజ్ వాతిజ వాండ్లు దేవుణుదిజ్ పార్లనం కిదెజ్. మీ లొఇ ఎయెజ్ బా సర్దదాన్ మహిజ దేవుణు వందిజ్ పాటెజ్ పార్దెజ్. 14 మీ లొఇ ఎయెజ్ బా జబ్బు మహిజ వాండ్లు సజం పెద్దెల్జ కూక్తెజ్. వారు ప్రబు పీరుదాన్ నూనె రాసి వన్ని వందిజ్ పార్లనం కిదెజ్. 15 నమకమాతి పార్లనం ఆ జబ్బుది వన్నిజ్ నెగెండ కినాద్. దేవుణు వన్నిజ్ నిక్నాన్. వన్ని పావమ్కు దేవుణు సెమిస్నాన్. 16 అందెజె మీరు నెగెండ ఆనివందిజ్ ఒరెన్, పావమ్కు మరి ఒరెన్ వన్నిజ్ ఒప్పుకోడిజి, ఒరెన్, మరి ఒరెన్ వందిజ్ పార్లనం కిదు. నీతి నిజయ్యి వాండ్లు కిని పార్లననమ్దిజ్ గొప్ప సత్తు మనాద్.

17 ఏలియ ప్రవక్త మానన్ని లోకునె. వాండ్లు బూమి ముస్సు పిరు రమ ఇజి గటిజ పార్లనం కితిజ్, మూండ్రీ పంటెజ్ ఆరు నెలెజ్ దాక బూమి ముస్సు పిరు రెవ్తాద్. 18 ఏలియ మరి పార్లనం కితిజ్ ఆగసం పిరు సిత్తాద్. పిరు సిత్తిజ్ బూమి పంట సిత్తాద్. 19 నా తంబెరిజాండె, మీరు యాక నెస్తు. మీ లొఇ ఎయెన్ బా నిజమాతి సరి తప్తిజ, వన్నిజ్ మరి ఒరెన్ నిజమాతి సరిదు తత్తెజె. 20 అహు కితిజ పావం కిత్తిజ్ వాతి సావుదాన్, వన్ని ఆత్మదిజ్ తప్తిస్నాన్. దేవుణు వన్ని పావమ్కాజ్ విజా సెమిస్నాన్.

మార్కు

నెల్ల కిబిసినిక

యా ఉత్తం రాస్తాన్ యేసుప్రబుజ్ అపాస్తుడు ఆతి పేతురు. రమారమి క్రీస్తు సెకం 60 దు యా ఉత్తం రాస్తాన్. అయా కాలమ్దు ఆసియాదు బానె బత్తిజి మహి క్రీస్తు లోకాజ్ మాలెజ్ వాజి మహా. ఏలుబడి: కిని రాజార్ క్రీస్తు లోకాజ్ వరి నమకం వందిజ్ హిమ్స కిత్రార్. వరిజ్ దయరం కిబిసిజ్ యా ఉత్తం రాస్తాన్. ముకెలమాతి మాటెజ్ ఇహిజ, కస్టమ్కు వానివలె ఓరిసి మండ్రెజ్, అతికారి లోకాజ్ లోజిజి మండ్రెజ్, దేవుణు వందిజ్ బత్తిదెజ్ ఇహిజ ఎలాగ నినికెజ.

1 యేసు క్రీస్తుజ్ అపాస్తుడు ఆతి పేతురు రాసిని ఉత్తం. పాంతు, గలతీయ, కపదొకియ, ఆసియ, బితునియ ఇని దేసమ్కాన్ సెద్రితి మని ఆజ దేసమ్ది వరి లెకెండ మనివరిజ్, ఎయెర్ ఇహిజ దేవుణు వన్ని వందిజ్ ఏర్పాటు కితి వరిజ్ రాసిని. 2 బుబ్బాతి దేవుణు మిజి ఎర్లెన్జె ఇజి ఒడెబితాండ్రె వన్ని వందిజ్ మిజి ఎర్లెన్జె. యేసు క్రీస్తుజ్ లోజిజి వన్ని నలదాన్ నొరె ఆజి సుబరం ఆజి మండ్రెజ్ దేవుణు ఆత్మ మిజి కేట కిత మనాన్. మిజి దేవుణు దయా దర్మం, నిపాతి నిండ్రెజి మనీద్.

ఎలాకాలం ఎర్దు సుడెజి మండ్రెజ్.

34 మాటు దేవుణుదిజ్ నండొ పాగిడినాట్. వాండ్రె, మా ప్రబు ఆతి యేసుక్రీస్తుజ్ బుబ్బా. దేవుణు గొప్ప కనికారమ్దాన్ మజి కొత్త బత్తు సితాన్. ఎలాగ ఇహిజ, యేసు ప్రబుజ్ సాతి వరి లోఇహాన్ నిక్తాన్. నిక్తిజ్ ఎల్లకాలం ఎర్దు సుడెజి మండ్రెజ్ కొత్త బత్తు. మజి సితాన్. అక్కదె ఆవండ మజి ఉండ్రె అక్కు సితాన్. అక్క పాడాజి సాన్ఇక, పూర్తి నెగ్గక. ఎల్లకాలం మంజినిక. అక్క వరలోకమ్దు మీ వందిజ్ ఇట్టా మనాన్. 5 మీరు దేవుణుదిజ్ నమ్మితిజ్ దేవుణు వన్ని గొప్ప సత్తుదాన్ మిజి కాప్కిజి ఇట్టాన్. కడెవెరి రోస్కాణ్ మజి వాని సిక్చదాన్ ఎలాగ గెల్పిస్తాన్ ఇజి తోరిస్తాన్. 6 దిన్ని వందిజ్ మీరు నండొ సర్ద ఆదు. గాని ఏలు సెగం రోస్కు మిజి కల్లితి అనేకమాతి విజా రకమ్కాణి కస్టమ్క వందిజ్ దుకం ఆదెజ్ వలె. 7 ఎందనిజ్ ఇహిజ, వడాజి సాని బజారం సిసుదు ఇడ్డి సుబ్రం కినార్ గదె. అయ లెకెండ బజారం ముస్కు విలువ మన్ని మీ నమకమ్బా కల్లి సీలిక ఇజి రుజుప్ కిదెజ్ వలె. ఆహె రుజుప్ కితిజ యేసు క్రీస్తు తోరె ఆనివలె నని నమకమ్ వందిజ్ మిజి పాగిడినాన్. మిజి, గొప్ప గనం దోహ్కాద్.

89 మీరు వన్నిజ్ సుడెజినిదెర్ గాని వన్నిజ్ ప్రేమిసినిదెర్. ఏలు సుడెఏండ మహిజ్బా వన్నిజ్ నమ్మిజినిదెర్. మరి, వెప్తాజ్ ఆట్ఇ నని గొప్ప సర్దదాన్ సర్ద ఆజినిదెర్. ఎందనిజ్ ఇహిజ మిజి యేసు క్రీస్తు ముస్కు మన్ని నమకమ్దానె, మీ పాణం ఎలాకాలం మంజిని సిక్చదాన్ గెల్పిస్తెజ్ అట్టాద్.

10 మిజి వాని రక్చణం వందిజ్ దేవుణు మాటెజ్ వెప్తి ప్రవక్తరు రెబాతర బాగ నెన్జె సుడెజ్తార్. దేవుణు మిజి సీదెజ్ ఇడ్డి యా దయా దర్మం వందిజ్ వారు వర్లితార్. 11 క్రీస్తు కస్టమ్కు ఓరిస్తి వెనుక గొప్ప గనం కల్లినాద్ ఇజి ప్రవక్తరు లోఇ మన్ని క్రీస్తు ఆత్మ అక్క జర్లిఏండ మహి నండొ ముందాల్నె వరిజ్ వెప్తా మహార్. వెప్తాజ్ దన్ని అర్దం ఇనిక ఇజి వారు రెబాతార్. అక్కెజ్ ఎసిజ్ జర్లినెలె, ఎలాగ జర్లినెలె ఇజి రెబాతార్. 12 ఆహె రెబాతిజ్, వారు వరి వందిజ్ నె ఆవద్, మీ వందిజె వెప్తానార్ ఇజి దేవుణు ఆత్మ వరిజ్ నెస్పిస్తాన్. వరలోకమ్దాన్ దేవుణు పాక్తి వన్ని ఆత్మ సత్తుదాన్ మిజి సువార్త వెప్తాకార్ యాక్కెజ్ మిజి నెస్పిస్తార్. వరలోకమ్దు మని దూతెజ్బా దిన్ని వందిజ్ నెస్పెజ్ ఇజి ఆస ఆజినార్.

దేవుణు వందిజ్ కేట ఆజి మండ్రు.

13 అందెజి మీ మన్సుదిజ్ తయార్ కిజి మండ్రు. మన్సుదు అణసి ఆజి మండ్రు. యేసుక్రీస్తు తోరె ఆనివలె మిజి దోహ్కాక్కి దేవుణి దయా దర్మం వందిజ్ పూర్తి ఆసదాన్ ఎర్దు సుడెజి మండ్రు. 14 దేవుణుదిజ్ లోజిజి వన్ని కొడాఃర్ లెకెండ మండ్రు. ముజల్నె మీరు దేవుణుదిజ్ నెన్ఎండ మహివలె సెఇ ఆసిజి వందిజ్ లెకెండ ఆమాట్. 15 గాని మీరు కిని విజా దని లోనుబా దేవుణు వందిజ్ కేట ఆజి మండ్రు. ఎందనిజ్ ఇహిజ వన్ని సాంతం ఇజి మిజి ఇడ్డికాన్ పరిసుదం ఆతికాన్. 16 ఎందనిజ్ ఇహిజ దేవుణు పరిసుదం ఆతికాన్. అయ లెకెండ మీరుబా పరిసుదం ఆజి మండ్రెజ్ ఇజి దేవుణు మాటదు రాస్త మనాద్.

17 బుబ్బా ఇజి కూక్కి మీరు పార్దనం కిజిని దేవుణు విజెరిజ్ వరి పణిజ సుడెజి ఇని తేడె: సిల్లెండ తీర్పు కిజినాన్. అందెజి మీరు యా లోకమ్దు కూడె: వాతి పరిలెకెండ బత్తిని వలె దేవుణుదిజ్ తియెల్ ఆజి మండ్రు. 18 మీ అనిగొగొర్ బత్తిని లెకెండ దేవుణుదిజ్ నెన్ఎండ బత్తిని మీ బత్తు పణిదిజ్ రెఇక. నన్ని బత్తుదాన్ యేసు ప్రబునె మిజి డిబిస్తాన్. సిల్లెండ ఆజి సాని వెండి బజారం మిజి డిబిస్ఎతాద్ ఇజి నెస్పిదెర్ గదె. 19 గాని ఇని తపు సీలి గొరె పిల్ల నని యేసుక్రీస్తు విలువాతి నలదాన్ మీరు డిబె ఆతిదెర్. 20 యా లోకమ్దిజ్ పుటి సెలెండ మహివలెనె దేవుణు యేసుక్రీస్తుజ్ యా పణి వందిజ్ ఎర్లెన్జె. గాని యా కడెవెరి రోస్కాణ్నె వన్నిజ్ పాక్తాన్. మీ వందిజె పాక్తాన్. 21 సాతి వరిబాణిజ్ దేవుణు నిక్తి యేసు క్రీస్తు వెటనె మిజి దేవుణు ముస్కు నమకమ్ మనాద్. నిక్తిజ్ వన్నిజ్ గొప్ప పేరికాన్ ఇజి ఇట్టాన్. అందెజి మీ నమకం దేవుణు ముస్కు ఇడ్డిదెర్. అందెజి దేవుణు ఒట్టు కితి దనిజ్ ఎర్దు సుడెజి మంజినిదెర్.

22 నిజమాతి మాటదిజ్ మీరు లోజీతిజ్ మీరు టేటజ్ ఆతిదెర్. అందజె నమ్మితి వరిజ్ కల్లి సిల్లెండ ప్రేమిసినిదెర్. అహిజ నిజమాతి ప్రేమదాన్ మీ మన్ను పూర్తి సెమిస్సెజ్ వలె. 23 ఎందనిజ్ ఇహిజ సాజి సాని లోకాజ్ ఆవద్. గాని ఎల్లకాలం బత్సిన దేవుణుదునె మీరు పుట్టిదెర్. ఎల్లకాలం బత్సిన దేవుణు మాటదాన్నె మీరు మరి పుట్టిదెర్.

24²⁵ ఎందనిజ్ ఇహిజ, “విజెర లోకుర్ గడ్డి లకెండె వరి పేరు గడ్డి పుజు లెకెండె మనాద్. గడి వన్నాద్. పుజు రాల్సె అర్నాద్. గాని ప్రబు ఆతి దేవుణు మాట ఎల్లకాలం మంజినాద్”, అయీ మాట ఇనిక ఇహిజ మిజి సువార్త వెప్పి మని మాటనె.

2 1³ యేసు క్రీస్తు ఎసా నెగ్గికాన్ ఇజి మీరు నెసి సుడేజి మహిదెర్. అందజె ఆజ వన్ని మున్ను కుట్ర కినికెజ్, విజా మొసెం పణిజ్, మీ మన్నుదు మనికెజ్, డాప్పి మరి ఉండ్రె వెప్పికెజ్, కినికెజ్, గోన, మరిఒరెన్ వన్నిజ్ దూసిస్సికె యాకెజ్ విజా డి:స్తు. ఏలు పుట్టి ఇజి కొడోకెర్ లెకెండె దేవుణు మాట ఇని కల్లి సిలి పాలు ఉండెజ్ నండ్ ఆస ఆదు. దని సత్తుదాన్ పేరిజి మీ బత్సు రక్సిస్తు.

పాణం మన్ని పణుకు, దేవుణుదిజ్ ఎర్లిసి మన్ని లోకుర్.

4 మీరు బత్సిజి మని క్రీస్తుబాన్ వాతిదెర్. ఇల్ల తొప్పికార్ పణిదిజ్ రెఇక ఇజి నెక్కి పాక్తి పణుకు లెకెండె క్రీస్తు. లోకుర్ వన్నిజ్ నెక్కపాక్తార్ గాని దేవుణు వన్నిజ్ గొప్ప విలువాతికాన్ ఇజి ఎర్లిస్తాన్. 5 మీరుబా పణుకుజ్ లెకెండె దేవుణు మండ్రెజ్ ఇజి తొహె ఆని గుడిదిజ్ మీరు పణుకుజ్ లెకెండె. గాని క్రీస్తు లెకెండె మీరుబా పాణం మని పణుకుజె. దేవుణుదిజ్ కేట ఆతి పుజెరి లోకుర్ లెకెండె మండ్రు. దేవుణుదిజ్ పాగ్డి:జి, వందనమ్మకు వెప్పి, వన్నిజ్ లోజిజి మంజి యేసు క్రీస్తు వలెహాన్ వన్నిజ్ తగితి పూజెజ్ సీదు. 6 దేవుణు మాటదు ఈహు రాస్త మనాద్ ఇనిక ఇహిజ ఇదిలో నాను సియెనుదు ఉండ్రె పణుకుదిజ్ ఎర్లిసిని. అయీ మూల పణుకు గొప్ప విలువాతిక. వన్ని మున్ను నమకం ఇడ్డికాన్ ఎయెనబా సిగు ఆవన్. 7 అందజె, యేసు క్రీస్తుజ్ నమ్మిత్తి మిజి, యీ పణుకు గొప్ప విలువాతి పణుకు. గాని నమ్మిత్తి వరిజ్ ఇనిక ఆనాద్ ఇహిజ, “ఇల్ల తొప్పికార్ నెక్కి పాక్తి పణుకునె మూలదిజ్ మూల పణుకు ఆతాద్”. 8 మరి రాస్త మనాద్ ఇనిక ఇహిజ “అయ పణుకునె లోకాజ్ అడ్డు కినాద్. అయ పణుకుదిజ్ తొరడి:జి అర్నాద్. ఎలాగ్ అర్నాద్ ఇహిజ దేవుణు మాటదిజ్ లోజివెర్. దేవుణు మాటదిజ్ లోజివెకార్ అర్నాద్ ఇజి దేవుణు ముందాల్సె నెస్తాండ్రె వెప్పా మహాన్.

9 గాని మీరు దేవుణు ఎర్లిస్తి జాతి. రాజాజ్ పుజెరి లోకుర్. దేవుణుదిజ్ కేట ఆతి వన్ని సాంత లోకుర్. ఆహె పాపం ఇని సీకటిదాన్ వాని గొప్ప బమ్మాతి జాయ్దు మిజి కూక్త తతాన్. వన్ని గొప్ప బమ్మాతి పణిజి వందిజ్ సాటిస్తెజె ఇట్టాన్. 10 ముందాల మీరు దేవుణు లోకుర్ ఆఇకిదెర్. ఏలు దేవుణు లోకుర్ ఆతిదెర్. ముందాల దేవుణు కనికారం మిజి దొహెత్తాద్. ఏలు కనికారం దొహెత్తాద్.

11 నాను ప్రేమిసిని తంబెరిజాండె, నాను మిజి బతిమాల్లి వెప్పిన, మీరు యీ లోకమ్ది వరి లెకెండె అఇదెర్, ఆఇ దేసెమ్ది వరి ననికిదెర్. దేవుణు వందిజ్ మని ఆసెజ అడ్డు వాజిని ఒడోల్ది ఆసెజ్ డి:స్తు. 12 దేవుణుదిజ్ నెన్గె లోకుర్ నడి:మి మీరు నెగ్రెండ మండ్రెజ్. ఎందనిజ్ ఇహిజ ఇని దని లోఇబా మిజి సెఇకార్ ఇజి వారు వెప్పెజ, మీ నెగ్గి బత్సుదిజ్ సుడే:జి దేవుణు తీర్పు కిదెజ్ వాని రోజాదు వారు దేవుణుదిజ్ పాగిడి:దెజ్.

అతికారమ్దు మన్ని వరిజ్ లోజిజి మండ్రు.

13¹⁴ ఏలుబడి: కినివరి లోఇ పెరికాన్ ఆతి రాజాజ్ గాని, అతికారమ్దు మని వరిజ్ గాని క్రీస్తు వెప్పి లెకెండె లోజిజి మండ్రు. తపు కితి వరిజ్ సిక్కి సీదెజ్, నెగ్గికెజ్ కితి వరిజ్ పాగిడి:దెజ్ విరిజ్ పాక్తాన్ గదె. 15 ఎందనిజ్ లోజిదెజ్ ఇహిజ, మీ నెగ్గి పణిజి తొరిసి మీరు బుద్ది సిల్లెండ వర్గిని వరి వెయు మూక్తెజ్ ఇజి దేవుణు కొరిజినాన్. 16 మీరు డి:బె ఆతి లోకుర్. అహిజ, మీరు ఎయెర్ నెసెండె సెఇ వణిజ్ కిదెజ్ ఆవద్. దేవుణు అడ్డి పణి కినివరి లెకెండె మండ్రు. 17 విజెరిజ్ మర్యాద సీదు. నమ్మిత్తి వరిజ్ ప్రేమిస్తు. దేవుణుదిజ్ తియెల్ ఆజి మండ్రు. రాజాజ్ మర్యాద సీదు. 18 పణి మణిసిర్ వరి ఎజామానిరిజ్ నండ్ మర్యాద సీజి లోజిజి మండ్రెజ్. మీ మున్ను కనికారమ్దాన్ సార్లిదాన్ మని వరిజె ఆవద్. మీ మున్ను కనికరం సిలి వరిజెబా లోజిజి మండ్రు. 19 ఎందనిజ్ ఇహిజ, నాయం సిల్లెండ ఎయెనబా మిజి బాద కితిజ అక్క మీరు దేవుణు వందిజ్ ఓరిస్తు. ఆక నెగ్గికదె. దేవుణుదిజ్ ఇష్టమాతి పణిసె. 20 మీరు తపు కితి వందిజ్ ఉండ్రె దెబ తిహిజ ఆక ఓరిస్సిదెర్. గాని మిజి ఇని లాబం? గాని దేవుణు ఎర్దు సరి అతికెజ్ కితి దనిజ్ సిక్కి వానివలె ఆక ఓరిస్సిజ ఆక నెగ్గికదె. దిని వందిజె దేవుణు మిజి ఏర్పాటు కిత్తాన్. 21 ఎందనిజ్ ఇహిజ క్రీస్తుబా మీ వందిజ్ కష్టం ఓరిస్తాండ్రె మీరుబా వాండ్రు నడి:తి లెకెండె నడి:దెజ్ ఉండ్రె గుర్తు తొరిస్త సితాన్.

22 “క్రీస్తు ఇని తపుబా కివితాన్. వన్ని మాటెజ్ లోఇ ఇని అబద్దమ్బ సిల్లెతాద్. 23 వన్నిజ్ దూసిస్తి వలె మర్జి దూసిస్ఎతాన్. వన్నిజ్ మల్లెజ్ కితివలె వరిజ్ బెద్రిస్ఎతాన్. నాయమ్దాన్ తీర్పు కిని దేవుణుదిజ్ వానిజ్ వాండ్రె ఒపజెపె ఆతాన్. 24 యేసుక్రీస్తు సిలువాదు సాతివలె మా పాపమ్మకు పిండితాన్. ఎందనిజ్ ఇహిజ మాటు పాపమ్మకు పూర్తి డి:సినిదెజ్ ఇజి, దేవుణు ఎర్దు సరి ఆతి బత్సు బత్సిదెజ్ ఇజి. వన్ని ఒడోల్ది దెబ్బెజాణిజ్ మాటు నెగ్గె ఆతాట్. 25 ఎందనిజ్ ఇహిజ మీరు గొరెజ్ లెకెండె తప్పి సాహిదెర్. గాని ఏలు గవుడు:వెన్ ఆతి వన్ని డగ్రు, మీ పాణం కాపెకిని వన్ని డగ్రు మర్జి వాతిదెర్.

ఆల్లిమాసిర్

3 1² అయావజనె, ఆల్ఫిక్ అతికెజ్ వన్నా సాంత మాసిరిజ్ లోజిజి మండ్రెజ్. ఎందనిజ్ ఇహిజ, మాసిర్ దేవుణు మాట నమ్మిఇకార్ అతిజెబా వన్నా నెగ్గి బత్సుదాన్ దేవుణుబాన్ వరిజె తతెజ్ అట్టె. ఎలాగ ఇహిజ వన్నా కల్లిసిల్లి బత్సుని, దేవుణు మున్ను మన్ని తియెల్ సూణారె దేవుణుదిజ్ నమ్మినార్. 3⁴ నెగ్రెండ తొరె ఆదెజ్ ఇజి బుర్ డూసి మండ్రెజ్, బజారం గొలున్ను ఇట్టిదెజ్, నెగ్గి పాతెజ్ పార్పాదెజ్, గాని వనక వందిజె మన్ను ఇడోదెజ్ ఆవద్. మీ మన్నుదు ఇని ఇనికెజ్ ఇడోజినిదెర్ ఇజి సుడే:దు. ఇనికెజ్ ఇహిజ సార్లిదాన్, నిపాతి మన్నుదాన్, పాడా:జి సాన్ఇ నన్ని నెగ్గి గుణమ్మకు మన్నుదు ఇడో:దు. నన్నికదె దేవుణుదిజ్ గొప్ప విలువాతికాద్.

5⁶ అయావజనె, పూర్వమీదు దేవుణు ముస్సు నమకం ఇడ్డి బోదెక్, దేవుణు ఒట్టు కితి దన్నిజ్ ఎద్దుసుండేజి మహెనె, వన్కా సాంత మాసిరిజ్ లోజీజి వన్కా నెగ్గు గుణమకం అయాలెకెండ తోరిస్సె. అబ్రాహాం ఆల్సి ఆతి సార నన్నికదె. అది అబ్రాహాముజ్ లోజీజాదె, వాండ్లు నా ముస్సు అతికారం మన్నికాన్ ఇజి మర్యాద సిజ్తాద్. మీరుబా అయావజనె సరి ఆతికెజ్ కిజి ఇనిదన్నిజ్ బా తియెల్ సిల్లెండ మహిజ సార ఫాటది గాల్పిక్ ఆనిదెర్.

7 అయావజనె, మాసిర్ వరి బోదెకాజ్, మజి ఇంక సత్తు తక్కు మనికెజ్ ఇజి నెసి, వన్కాజ్ గవరం సీజి, నెగ్రెండ సుండేజి మండ్రెజ్ వలె. దేవుణు కనికారమదాన్ సిత్తి ఎలకాలం బత్సిని బత్సు ఉండ్రె లెకెండ మీ వెట వనకాజ్ బా సీనాన్. అందెజె వన్కాజ్ మీరు మర్యాద సీదెజ్. అయాలెకెండ కితిజి మీ పార్దనమదిజ్ ఇని అడ్డుబా మన్వద్.

సరి ఆతికెజ్ కితి వందిజ్ వాజిని బాద

8 ఆక్కర్దు నాను విజేరిజ్ వెప్పిన, ఉండ్రె మన్ను ఆజి మండ్రు. ఒరెన్ మరి ఒరెన్ వెట వన్నిజ్ సర్ద మహివలె గాని దుకం మహివలె గాని కూడేజి పాడేజి మండ్రు. తంబెరిజు లెకెండ ఒరెన్ మరిఒరెన్ వన్నిజ్ ప్రేమకిజి మండ్రు. ఒరెన్ మరిఒరెన్ వందిజ్ పాణం నొత్తెజ్. నాను పెరిక ఇజి గర్ద ఆవిండ విజెరి వెట ఉండ్రె మన్ను ఆజి మండ్రు. 9 ఎయెన్ బా మిజి కీడు కితిజి మరజి వన్నిజ్ కీడు కిమాట్. దూసిస్తిజి మరజి దూసిస్మాట్. ఆహె కిపిండ వరిజ్ నెగ్గెకెజ్ రపిద్ ఇజి దేవుణుదిజ్ వెప్తు. ఎందనిజ్ ఇహిజ మిజి దేవుణు బాణిజ్ నెగ్గెకెజ్ దోవ్కెజె, దేవుణు మిజి దీవిస్తిజె, వన్ని వందిజ్ ఎర్లిసి ఇట్టా మనాన్. 10 అందెజె "నెగ్గి బత్సు బత్సిదెజ్ సుండేజినాన్, నెగ్గి రోస్సు గడేప్పెజ్ సుండేజినాన్ ఎయెన్ బా సెఇ మాటెజ్ వర్లిపిండ, అబద్దం మాటెజ్ వర్లిపిండ మండ్రెజ్ వలె. 11 వాండ్లు సెఇకెజ్ డిఃసి మండ్రెజ్, నెగ్గెకెజ్ కిజి మండ్రెజ్. సమదనమ్ వందిజ్ సుండేజి అక్కాదె దోవ్కెజె ఇజి దన్ని వందిజ్ రెబాదెజ్. 12 ఎందనిజ్ ఇహిజ, దేవుణు ఎద్దు సరి ఆతికెజ్ కిని వరిజ్ దేవుణు కాపికిజినాన్. వరి పార్దనమకు వెనాన్. గాని సెఇ వణిజ్ కిని వరివెట దేవుణు వన్ని మొకొం కోపం దాన్ ఇడ్డాన్".

13 మీరు నెగ్గి వణిజ్ కిదెజ్ ఇజి నండొ ఆస ఆజి మహిజ, ఎయెర్ బా బాద కిపర్ గదె. 14 గాని దేవుణు ఎద్దు సరి ఆతికెజ్ కితి వందిజ్ ఉండ్రె వేలా బాద వాతిజ్ బా సర్ద ఆదు. వరిజ్ తియెల్ ఆమాట్. వరిజ్ బెద్రిమాట్. 15-16 మీ మన్నుదు క్రీస్తుజ్ మీ ప్రబు ఇజి బసె కిదు. మరి, మీ నమకమ్ వందిజ్ మిజి వెన్ బాని వరిజ్ నెగ్రెండ వెప్తాజ్ ఎస్తివలెబా తయార్ ఆజి మండ్రు. గాని సార్లిదాన్, దేవుణుదిజ్ తియెల్ దాన్ వెప్తాజ్. ఎందనిజ్ ఇహిజ మిజి బెద్రిసినికార్ మిజి దూసిసిని వలె మీ మన్ను దేవుణు ఎద్దు నిపాతి మండ్రెజ్. మీరు క్రీస్తు లోకుర్ ఇజి, నెగ్గి గుణమకం కల్లిజి మనికార్ ఇజి సుండేజి వారు సిగు ఆదెజ్. 17 సరి ఆతికెజ్ కితి వందిజ్ కష్టం బరిస్తిజ్ ఇజి దేవుణు ఇష్టం ఆతిజ అక్క నెగ్గెకాద్. సెఇకెజ్ కితి వందిజ్ కష్టం బరిసిని ముస్సు అక్కాదె నెగ్గెకాద్. 18 ఎందనిజ్ ఇహిజ క్రీస్తుబా ఉండ్రె సుటునె పావమకు లాగ్ దెజ్ సాతాన్. మజి దేవుణుబాన్ తతెజ్ ఇజి దేవుణు ఎద్దు సీతిమనికాన్ ఆతికాన్ దేవుణు ఎద్దు సీతి సిల్లెండ మహి వరి వందిజ్ సాతాన్. వన్ని ఒడొల్ నెవ్తార్. గాని దేవుణు ఆత్మ వన్నిజ్ నిక్తాన్. 19 క్రీస్తు ఆత్మ అయా లోకమ్దు తోహె ఆతిమని వరి నడిఃమి సాహండ్రె సువార్త సాటిస్తాన్. 20 మీరు నోవపు కాలమ్దు దేవుణుదిజ్ లోజీపిండ మహికార్. నోవపు ఓడః తయార్ కిజిమహివలె దేవుణు విరివందిజ్ ఓరిస్తి మహాన్. గాని ఓడః తయార్ ఆతిజ్ సెగొండారె, ఇహిజ ఎనిమిది మణిసిరి పెరి గడ్డదాన్ తప్రె ఆతార్. 21 యాక బాప్తిసమ్దిజ్ ఫాలిత మనార్. యా బాప్తిసమ్దానె దేవుణు మిజి రక్సినినాన్. యా బాప్తిసం ఒడొల్ సుబ్బరం ఆదెజ్ ఆవిద్. గాని ఏలు దేవుణు ఎద్దు పాపం సిల్లెండ మండ్రెజ్ ఒప్పుకొండేజినాన్ ఇజి తోరిస్తిజె యా బాప్తిసం. యేసు క్రీస్తు సావుదాన్ నిజిత్తిజ్ మీరు సావుదాన్ తప్రె ఆతిదెర్ ఇజి తోరిస్తిజె. 22 యేసు క్రీస్తు సావుదాన్ నిజెతండ్రె వరలోకమ్దు ఎక్సి సాహండ్రె, దూతారిజ, అతికారిజ, సత్తు మన్నివరిజి వన్ని అడ్డి ఇట్టాండ్రె, దేవుణు ఉజెరి వడఃకాద్ బస్తాన్.

పేతురు రాస్తి మొదోహి ఉత్తం

4 అందెజె క్రీస్తు, వన్ని ఒడొల్దు కష్టం ఓరిస్తి లెకెండ కష్టం ఓరిస్తిజ్. మీరుబా మన్ను తయార్ కిజి మండ్రు. ఎందనిజ్ ఇహిజ ఒడొల్దు కష్టం ఓరిస్సికాన్ పావమ్దు నడిఃపన్. 2 అహిజ ఏలుహాన్ అసి సావుదాక, మాములుక లోకుర్ ఆస ఆని వజి ఆవిద్, దేవుణుదిజ్ ఇష్టం ఆతి లెకెండ బత్సిదెజ్. 3 గడిఃస్తి సాహి కాలమ్దు దేవుణుదిజ్ నెసిఇకార్ బత్సిని లెకెండ మీరు బత్సిజి మహిదెర్. ఎలాగ ఇహిజ, రంకు బూలాజి, ఒడొల్ వందిజ్ ఆసెజ్ ఆజి, కల్లు ఉజెజి సోసి, సిగు సిల్లెండ డాట్టి కర్లిజి, కల్లు విందుజ్ నడఃపిసి, దెయమ్కాజ్ పూజి కిజి మహిదెర్. 4 ఏలు మీరు వరివెట కూడఃపిండ, వారు కిని వెరి వణిజ్ లోఇ సాన్ఎండ ఆజినిజ్ వారు బమ్మ ఆజి మిజి దూసిసినార్. 5 గాని బత్సిని వరిజ్ సాతి వరిజ్ తీర్పు తీర్పెజె తయార్ ఆజి మని డేవుణుబాన్ వారు బత్సిని బత్సు వందిజ్ ఎందనిజ్ నన్ని సెఇకెజ్ కిజి బత్సిత్తార్ ఇజి వెప్తాజ్ వలె. 6 అందెజె సాతిసాహి నమ్మిత్తి వరిజ్ సువార్త పాటె ఆజి మహాద్. ఎందనిజ్ ఇహిజ యా బత్సుదు మహివలె లోకాజ్ తీర్పు లెకెండ సావు వానార్. గాని సాతి వెనుక దేవుణు బత్సిని లెకెండ బత్సిదెజె.

7 అహిజ విజా దన్నిజ్ ఆక్కరి రోస్సు వాజినాద్. అందెజె నెగ్గి బుది కల్లిజి మండ్రు. మన్నుదు అణసె ఆజి మండ్రు. నసివలె మీరు ప్రార్దనం కిదెజ్ అట్టిదెర్. 8 అక్కదె ఆవిద్. విజా దని ముస్సు మని సజతి ఇనిక ఇహిజ, ఒరెన్ మరి ఒరెన్ వన్నిజ్ నెగ్రెండ ప్రేమ కిజి మండ్రు. ఎందనిజ్ ఇ హిజ మహికార్ కితి విజా తప్రెజ్ మాటు ప్రేమదాన్ సెమిస్తిజ్ అట్టాట్. 9 మొరొ ఆవిండ ఒరెన్ మరి ఒరెన్ వన్నిజ్ డగ్రు కిజి సీనికార్ ఆజి మండ్రు. 10 ఒరెన్ మరి ఒరెన్ వన్నిజ్ దేవుణు సీతి వరమ్దాన్ తోడుః కిజి మండ్రెజ్. దేవుణు సీతి విజా రకమ్ది వరమ్కు నెగ్రెండ వాడు కొండెజ్. 11 ఎయెన్ బా దేవుణు మాట బోదిస్నాన్ ఇహిజ వాండ్లు దేవుణు మాట బోదిస్సిజ్ వలె. ఎయెన్ బా మహి వరిజ్ తోడుః కిదెజ్ ఇహిజ దేవుణు సీతి సత్తుదాన్ కిదెజ్ వలె. యేసు క్రీస్తు పేరుదాన్ దేవుణుదిజ్ పోగిడుః కల్లిదెజ్ ఇజి యాకెజ్ విజా కిదు. వన్నిజ్ అంతు సిల్లెండ ఎల్లకాలం గనమ్ని, సత్తు మనిద్. ఆమెన్.

12 నాను ప్రేమిసిని తంబెరిజాండె, మీ నమకం ఎలాగ్ మహికాద్ ఇజి రుజామ్ కిదెజ్ సిను నని పెరి కష్టమ్కు వానివలె ఇనిక జగ్గినాదొ ఇజి బమ్మ ఆమాట్. 13 క్రీస్తు మహిమదాన్ యా లోకమ్దు వానివలె మీరుబా గొప్ప సర్ద ఆజి మండ్రెజ్ ఇజి క్రీస్తు ఓరిస్తి కష్టమ్కు లోఇ మీరుబా కూడ్డి ఓరిసి సర్ద ఆదు. 14 క్రీస్తు వందిజ్ ఎయెన్ బా మిజి దూసలాడిఃతిజి సర్ద ఆదు. ఎందనిజ్ ఇహిజ గొప్ప పెరికాన్ ఆతి ఆత్మ ఇహిజ దేవుణు ఆత్మ మీ ముస్సు మనాద్. 15 మీ లోఇ ఎయెన్ బా ఓరిస్తిజ్ ఇహిజ అక్క ఒరెన్ వన్నిజ్ సప్తి వందిజ్ ఆవిద్. డొఃజి కితి వందిజ్ ఆవిద్. సెన వణి కితి వందిజ్ ఆవిద్. ఆఇ వరి వెట ఒడః ఆదెజ్ ఆవిద్. 16 గాని మీ లోఇ

ఎయెన్బా క్రీస్తు లోకు ఆతిదని వందిజ్ ఓరిస్తజ సిగు ఆమాట్. గాని క్రీస్తు పేరు అన్నిదని వందిజ్ దేవుణుదిజ్ స్తుతి కిదెజ్. 17 ఎందనిజ్ ఇహిజ దేవుణు తీర్పు వన్ని లోకుర్ లోఇ మొదొల్నిని కాలం వాత మనాద్. దేవుణుదిజ్ నమ్మిత్తి వరి లోఇనె తీర్పు మొదొల్స్తజ సువార్దదిజ్ లోజిఇతివరి గతి ఇనిక ఆనాదొ. 18 “దేవుణు ఎర్దు నితి నిజాయితదాన్ మన్ని వరిజ్ నిస్సా కస్టం వాతిజ దేవుణుదిజ్ నెసిఇకార్ ఎలాకాలం మన్ని సిక్కుదాన్ తప్పె ఆదెజ్ ఒద్దె అట్వర్లె”, 19 అందెజె దేవుణుదిజ్ ఇస్టం ఆతి వజ కస్టమ్కు ఓరిస్సికార్ వరి బత్సు, పుటిస్త దేవుణుబాన్ ఒవజెవైజ్వలె. వాండ్రు నమ్మిదెజ్ తగ్గుకాన్. వారు నెగ్గి పణిజ్ కిజి బత్తిజి మండ్రెజ్.

పెద్దెలుజ వందిజ్ వెప్పిని మాటెజ్.

- 5 క్రీస్తు కస్టమ్కు ఓరిస్తిక నాను సుడెఃత. క్రీస్తు ఎసా గొప్ప పెరికాన్ ఇజి తోరిసి గొప్ప జాయ్దాన్ మర్జి వానివలె నానుబా వన్ని జాయ్దు మంజినాలె. అందెజె, మీ లెకెండ్ ఒరెన్ పెద్దెలి ఆతి నాను పెద్దెలుబు ఆతి మిజి దటిసి వెప్పిన. 2 గొర్రెజ్ అడినికాన్ గొర్రెజు నెగ్రెండ్ సూణి వజ మీ అడిగి మన్ని దేవుణు లోకాజ్ నెగ్రెండ్ నడిఃవు. బల్లి కిత్తిజ్ అవద్. పూర్తి మన్నుదాన్ కిదు. దేవుణు ఇస్టమ్దు కూడిఃతి లెకెండ్ సుడెఃదు. ఇనికదొ లాబం వానాద్ ఇజి ఆన ఆజి సుడెఃమాట్. గాని నెగ్గి మన్నుదాన్ సుడెఃదు. 3 మీ అడ్డి మని లోకాజ్ ముస్సు గర్దాన్ ఏలుబడిః కినిక ఆవద్. మీ నెగ్గి గుణమ్కు సుడెఃజి వారుబా అయాలెకెండ్ నడిఃని వజ మండ్రు. 4 అహిజ గొర్రెజ్ అడిని వరి లోఇ పెరి గప్పడుయెన్ ఆతికాన్ తోరె ఆనివలె ఎసెజ్బా పాడాఃజి సాన్ఇ మెరిసిని టోపి మిజి దొవ్కాద్.
- 5 అయ వజనె ఇజిరికిదెరా, మీరుబా పెద్దెల్జ లోజిజి మండ్రు. ఒరెన్ మరి ఒరెన్ వెట తగిజి మండ్రు. ఎందనిజ్ ఇహిజ “గర్త ఆని వరిజ్ దేవుణు ఎద్రిసినాన్. గాని తగె ఆతి మని వరిజ్ వన్ని దయా దర్మం సీజినాన్”, 6 అందెజె దేవుణు, సరియాతి టయ్ముదు మిజి పెరికాన్ కిదెజ్ ఇజి వన్ని గొప్ప సత్తుమని అతికారమ్దిజ్ తగె ఆజి మండ్రు. 7 మీ విసారమ్కు విజా దేవుణు ముస్సు పాత్తు. ఎందనిజ్ ఇహిజ దేవుణు మిజి విజా సీదెజ్ సుడెఃజినాన్.
- 8 మీ మన్నుదు అణనె ఆజి మండ్రు. నెగ్గి బుద్ది కల్లిజి తెలిదాన్ మండ్రు. ఆక్కర్నిని ఉండ్రి పెరి నొరెస్ లెకెండ్ మిజి విరోదమాతి సయ్యాన్ ఎయెరిజ్ డిఃడెజు ఇజి రెబాజి బూలాజినాన్. 9 మీ నమకమ్దిజ్ గటిజ అసి సయ్యానుజ్ ఎద్రిసి మండ్రు. విజా లోకమ్దు మని నమ్మిత్తికార్ నిన్ని కస్టమ్కాణ్ బాద ఆజినార్ ఇజి నెసి మండ్రు. 10 గొప్ప దయా దర్మం మన్ని దేవుణు, క్రీస్తు వెట ఎలాకాలం మంజిని జాయ్దు మంజిని వందిజ్ మిజి కూక్తాన్. మాటు క్రీస్తు వెట కూడిఃతిజ్ యాక జర్రిజినాద్. సెగం కాలం మీరు కస్టమ్కు ఓరిస్తి వెనిక దేవుణు మిజి విజా దన్ని లోఇ పూర్తి అతికార్ కద్దివండ్, సత్తుదాన్ నిల్వ్వాన్. 11 వన్నిజె అంతు సిల్లెండ్ ఎలాకాలం గొప్ప సత్తు మసిద్. ఆమెన్.
- 12 దేవుణు గొప్ప ప్రీమ కిజి తోరిస్తి నిజమాతి దయాదర్మమ్దు గటిజ నిల్పి మండ్రు, ఇజి నాను రాసిన. వెప్పిన. అయ క్రుపాదు గటిజ నిల్పి మండ్రు ఇజి నాను బతిమాల్లిన. యాక నాను బాగ నమకమ్ ఇడ్డి సిల్వాను దిన్ని వందిజ్ నాను సాసి వెప్పిన. యాక నాను బాగ నమకం ఇడ్డి సిల్వాను ఇని వన్ని కియుదాన్ రాస్సినిన.
- 13 మీ లెకెండ్ బబులోసు పట్టుమ్దు దేవుణు ఏర్పాటు కిత్తి సజమ్దికార్ మిజి వందనమ్కు వెప్పినార్. నజి మరిన్ లెకెండ్ మని మార్కు మిజి వందనమ్కు వెప్పినాన్. 14 క్రీస్తు ప్రీమదాన్ ఒరెన్ మరిఒరెన్ వన్నిజ్ ముదు కిజి వందనమ్కు వెప్తు. క్రీస్తుబాన్ కూడిఃతి మిజి విజెరిజ్ సమదనం మసిద్.

మార్కు

నెల్య కిబిసినిక

యేసువ్రబుజ్ అపాస్తుడు ఆతి పేతురు యా ఉత్రం రాస్తాన్. పేతురు వన్ని బత్తు అందిదెజ్ డగు ఆతివలె యాక రాస్తాన్ ఇజి బయబిల్ వందిజ్ నెస్తికార్ వెస్సినార్. క్రీస్తు నకం 68 దు క్రీస్తు లోకాజ్ మాలెజ్ కిత్తి సీరో ఇని రోమ వరి పెరి రాజా పేతురుజ్ సపిస్తాన్ ఇజిబా బయబిల్ వందిజ్ నెస్తికార్ వెస్సినార్. యా ఉత్రమదు ఇనికెజ్ రాస్తాన్ ఇహిజ, అయ కాలమ్దు సోత్తిమహి తప్పు బోదు నెస్సిసిని వరి వందిజ్ జాగర్త మండ్రు ఇజి వెస్సినాన్. యేసుక్రీస్తు మరజి రెపన్ ఇజిబా వారు వెస్సినాని వందిజ్ జాగర్త మండ్రు ఇజినాన్. దేవుణు కనికారమ్దాన్, గెణమ్దాన్ నెగ్రెండ పిరిదు ఇజి రాసినాన్.

1 యేసుక్రీస్తుజ్ పణి కినికాన్ ఆతి, అపాస్తుడు ఆతి సిమెను పేతురు రాసిని ఉత్రం. దేవుణు దయా దర్మమ్దాన్, రక్సిస్సికానాతి యేసు క్రీస్తుజ్ దయా దర్మమ్దాన్ గొ పువిలవాతి నమకం మజి దోహాద్. మజి దోహాక్తి లెకెండ అయ గొప్ప విలువాతి నమ్మకం దోహాక్తి మన్ని వరిజ్ యాక రాసిన. 2 మజి దేవుణు దయాదర్మం, నిపాతి, నండో వంతుజ్ ఆజి మనీద్. ఎలాగ ఇహిజ దేవుణుదిజ్ నెసిని దన్నితాన్ వాని గెణమ్దాన్, ప్రబువాతి క్రీస్తుజ్ నెసిని దన్నితాన్ వాని గెణమ్దు పిరిదు.

దేవుణు ఎర్లిస్తి లోకుర్ ఇజి రుజాప్ కిదెజ్.

3 దేవుణు వన్ని గొప్ప జాయ్దాన్ నెగ్గి గుణమ్దాన్ మజి వన్ని వందిజ్ ఏర్పాటు కిత్తాన్. దేవుణు వన్ని గొప్ప సత్తుదాన్ మా బత్తుదిజ్ కావల్సెకెజ్ విజా సితాన్. దేవుణుదిజ్ బక్తి మన్ని మన్ను సిత్తాన్. యాకెజ్ విజా దేవుణుదిజ్ నెసిని దన్నితాన్ మణి తోహాక్తి. 4 యా గొప్ప జాయ్దాన్ నెగ్గి గుణమ్దాన్ దేవుణు వన్ని ఒద్దె విలువాతి ఒట్టుజ్ సిత మనాన్. ఎందనిజ్ ఇహిజ అయ ఒట్టుజణిజ్ దేవుణు గుణం కల్గిజి మండ్రెజ్ అట్నాట్. యా లోకమ్దు సెన ఆసదాన్ మజి సెవెన్ కిని విజా వన్నా బాణిజ్ తప్పె ఆదెజ్ అట్నాట్.

5-7 అందెజె మీరు నిని వన్నా వందిజ్ అక్కెజ్ దోహాక్తి లెకెండ కట్టబాడిజి మండ్రు. ఇనికెజ్ ఇహిజ మీ నమకం వెట నెగ్గి గుణమ్కు కూడెచ్చు. నెగ్గి గుణమ్కు వెట గెణం కూడెచ్చు. గెణం వెట మన్ను అణసె ఆజి మంజిని గుణం కూడెచ్చు. దన్ని వెట విజా దనిజ్ ఓరిస్తిజ్ మని బుద్ది కూడెచ్చు. ఓరిసినిదని వెట దేవుణు వందిజ్ బక్తిమని మన్ను కూడెచ్చు. దేవుణు వందిజ్ బక్తి మన్ని మన్ను వెట మహి నమ్మితి వరిజ్ ప్రేమిసిని దన్ని వెట విజేరిజ్ ప్రేమిసిని మన్ను కూడెచ్చు. 8 యా గుణమ్కు మీ బత్తుదు పిరిజి ఒద్దె నిండ్రెజి వాతిజ యేసు క్రీస్తుజ్ పుర్తి నెస్సి దనిజ్ అక్కెజ్ పణి కిని. బండెజ్ ఆని వరి లెకెండ ఆఇదెర్లె. పణిదిజ్ రెఇ వరి లెకెండ మన్ఇదెర్లె. 9 యా గుణమ్కు కల్గిజి నిండ్రెజి మనికార్ గుడ్డి వరి లెకెండ, దూరమ్దు మనికెజ్ తోరెవండ ఆనె. ముందాల్ కితి పావమ్కాణిజ్ నొరె ఆతాప్ ఇజి షాసినార్.

10 అందెజె నా తంబెరుజాండె, దేవుణు మజి ఎర్లిసి, వన్ని లోకుర్ ఇజి కూక్తి ఎర్లిస్టాన్. మీరు అక్క ఒదె నెగ్రెండ రుజాప్ కిదెజ్. నిన్ని పణిజ్ కినికిదెజ్ ఇహిజ ఎప్పవలెబా జార్జి అరెవండ నిల్వదెర్. 11 యా లెకెండ మా ప్రబుని, మజి రక్సిస్సికాన్ ఆతి యేసుక్రీస్తు ఎల్లకాలం మంజిని రాజెమ్దు మజి గొప్ప మర్యాద సీజి కూడెచ్చి వలె, మజి సీని అవకాసం తక్కు ఆవద్.

ప్రవక్తరు దేవుణు మాటెజ్ వెహ్తార్.

12 అహిజ, ఏలు మీరు అస్తిమని దేవుణు వందిజ్ నిజమాతి యా సజతిజ్ మీరు బాగ నెసి కద్దివడ నిల్పి నిదెర్ గాని, మిజి నాను యా సజతిజ్ వందిజ్ ఎస్తివలెబ ఎత్తు కిబిస్తిజ్ తయార్ ఆజి మంజిన. 13 నాను సాని దాక యా సజతిజ్ వందిజ్ మిజి మరి మరి ఎత్తు కిబిస్తిజ్ నా బాజిత ఇజి నాను ఒడెబిజిన. 14 ఎందనిజ్ ఇహిజ, మా ప్రబు ఆతి యేసుక్రీస్తు నజి వెహ్తి లెకెండ నాను యా బత్తు బెగినె డిసి సాండ్రెజ్ వలె ఇజి నెస్సు. 15 మరి నాను సాతి సాహి వెనుక మీరు ఎస్తివలెబా యా సజతిజ్ ఎత్తుకిజి మంజిని వందిజ్ నాను నండో పణికిని.

16 ఎలాగ ఇహిజ, మా ప్రబువాతి యేసు క్రీస్తుజ్ మని గొప్ప సత్తు వందిజ్, వాండ్రు మరజి వాని వందిజ్ మిజి నెస్సిస్తి వలె, అక్క ఉండ్రె కత సాన్తరం వలె అక్క ఉండ్రె కత సాన్తరం వెహ్తి లెకెండ ఆవద్. గాని వాండ్రు ఎస్సా గొప్ప పెరికాన్ ఇజి మాపు కణకాణిజ్ సుడెతాపి, అక్కాదె మిజి వెహ్తాప్. 17 ఎలాగ ఇహిజ, గొప్ప మెరిస్తి జాయ్ కల్గితి మహిమ నిండ్రెతి మహి బాణిజ్ ఉండ్రె జాటు వాతాద్. ఇనిక ఇహిజ, "పీండ్రు నాను నా నండో ప్రేమిసిని మరిన్. విన్ని మున్ను నాను సర్ల ఆజిన. అయా మాటెజ్ బుబ్బాతి దేవుణు బాణిజ్ వాతివలె మరిసి ఆతి యేసుజ్ గొప్ప పేరు, మహిమ కల్గితాద్. 18 మాపు వన్ని వెట అయా పరిసుదం ఆతి గొరోణ్ మున్ను మహివలె ఆగాసమ్దాన్ వాతి యా జాటు మాపె విహాప్.

19 మరి, ఒద్దె నిజమాతి మాటెజ్, ఇహిజ ప్రవక్తరు వెహ్తి మాటెజ్ మజి మన్నె. అక్కెజ్ మీరు జాగర్త విండ్రెజ్. ఉండ్రె కస్తిమని దివ జాయ్దాన్ సీకటిదు మనికెజ్ సుడెదెజ్ అట్నాట్. అయాలెకండెనె ప్రవక్తరు వెహ్తి మాటెజ్ జాయ్ వానిదాక మీ గర్బమ్దు ఇడెదు. కోడిజామ్దు తోరె ఆని జాయ్ ఆని సుక్క మీ గర్బమ్దు సానాద్.

20 విజా వన్యజ్ ఇంక ముకెలం మీరు నెస్సిక ఇనిక ఇహిజ, ప్రవక్తరు రాస్తి మని మాటదు ఉండ్రీ మాటబా వరి సాంత ఆలోసనమ్దాన్ వెస్తి లెకెండె వెహ్ఎతార్. 21 దేవుణు మాటెజ్ లోకు వన్నిజ్ ఇష్టం అతి వజ వెహ్కెజ్ ఆఉ. గాని దేవుణు అత్తు సత్తుదానె దేవుణు మాటెజ్ లోకుర్ వెహ్కెజ్.

తప్పు బోద నెస్సిసిని వరిజ్ వాని నాసనం.

2 గాని అయ కాలమ్దు లోకు నడిమి తప్పు బోద నెస్సిసినికార్బా మహార్. అయ వజనె మీ నడిమి తప్పు బోద నెస్సిసినికార్ వానార్. వారు ఇనిక కినార్ ఇహిజ వన్ని సాంత పాణం సీజి కొటి ప్రబుజ్ నెక్త పాక్కారె గొప్ప నాసనమ్దు ఒని ఆజ బోదెజ్ డాప్పి నెస్సిసినికార్. అయావజనె వరిజ్ వారి వెటనె వాని నాసనం తవి ఆజినార్. 2 నండొండార్ వీరు నెస్సితి సిగు ఆని వణిజ్ వెంజి ఆహె నడినారెలె. వరి సెన వణిజ్ సుడెజి క్రీస్తుజ్ని వాండ్రు నెస్సిసిని నిజమతి దన్ను వందిజ్ లోకుర్ దూసిస్సార్. 3 యా తప్పు బోద వెహ్కెజ్ డబ్బుదిజ్ గొప్ప ఆస ఆజి నిజం ఆజ మాటెజాణిజ్ మిజి మొసం కినార్. వరిజ్ ముందాలెనె తీర్పు సీదెజ్ తయార్ ఆత మనాద్. వరిజ్ నాసనం తవివండ వానాద్.

4 ఎలాగ ఇహిజ, పాపం కితి దూతారిజ్ డిస్ఎండ తీర్పు వాని దాక ఇడెడెజ్ దేవుణు వరిజ్ ఎలాకాలం సిసు మంజిని బాడిదు పోక్తాన్. సీకటి మని సాలం లోఇ తోహిస్త ఇట్టాన్. 5 మరి, పూర్బకాలమ్దు పాపం కితి మహి లోకాజ సిక్కు దాన్ తస్సివండ, దేవుణు వరి ముస్సు, పెరి గడ్డ తపిస్తాన్. గాని సీతినిజాయితి వందిజ్ వెహ్కెజ్ మహి నోవాహుజెని, వన్ని వెట మహి ఏడుగురుదిజ్ గడ్డదాన్ తపిస్తాన్. 6 మరి సాదోమ, గొమ్మెర్ర ఇని పట్టుమాకాన్ మహికార్ పాపం కితి మహిజ్ దేవుణు వరిజ్ తీర్పు సీతండ్రె సిసుదాన్ అయ పట్టుమాకాన్ సుహ్నాన్ దేవుణుదిజ్ ఇష్టం ఆజ లెకెండె సెఇ వణి కిని వరిజ్ వాండ్రు ఇనిక కినాన్ ఇజి ఉండ్రీ గుర్తు లెకెండె వరిజ్ ఇట్టాన్. 7 సీతి నిజాయితిదాన్ వణి కితి లోతు వన్ని సురుల జగ్గిజి మహి గొప్ప సిగ్గు ఆతి పాపం వణిజ్ సుడెజి గొప్ప బాద ఆజి మహిజ్ దేవుణు వన్నిజ్ గెల్పిస్తాన్. 8 ఎండనిజ్ ఇహిజ అయ సీతి మనికాన్ వరి గొప్ప సెఇ వణిజ్ సుడెజి అక్కెజ్ వెంజి రోజు వన్ని నెగ్గి మన్నుదాన్ గొప్ప బాద ఆజి మహాన్. 9 దేవుణు ముస్సు, బక్తి మన్ని వరిజ్ వాని పరిసెజాణిజ్, వరిజ్ గెల్పిస్తెజ్ దేవుణు నెసినాన్. దేవుణు ఎద్దు సీతి సీజాయితి సీల్లెండ నడిని వరిజ్ సిక్కు సీజి తీర్పు దినమ్దాక ఇడ్డెజ్బా నెసినాన్. 10 సెఇ ఆలోసనమ్దాన్ పుట్టి ఒడెఃల్ వందిజ్ మన్ని సెఇ ఆసెజ్ వందిజ్ బత్తిజి దేవుణు అతికారమ్దిజ్ లోజివండ దన్నిజ్ నెక్కిపాక్కి వరిజ్ సిక్కు సీదెజ్ దేవుణు ఇడ్డె మనాన్. యా తప్పు బోద నెస్సిసినికార్ గొప్ప గర్ల ఆజి ఇనిక కిడెజ్బా తయార్ ఆనికార్. వరి సాంత ఇష్టమ్దాన్ విజా కినార్. గొప్ప బమ్ము ఆతి వనక వందిజ్ సెఇకెజ్ వెహ్కెజ్బా తియెల్ అఇకార్ వీరు. 11 దేవుణు దూతార్ గొప్ప సత్తు మనికారె ఇహిజ్బా దేవుణు ముందాలె వినక వందిజ్ వరిజ్ దూసిస్ఎర్. 12 గాని యా తప్పు బోద నెస్సిసినికార్, వారు నెస్సె వన్యా వందిజ్బా దూసలాడ్వార్. వారు బుద్ది కిడెజ్ ఆల్క మూర్కతం మన్ని జంతుజ్ లెకెండె ఆలోసనం కిడెజ్ అట్ఎర్. వేట కినికార్ వనకాజ్ అసి సప్పి లెకెండె వీరుబా ముర్కతం మన్ని అడవి జంతుజ్ లెకెండె పాడాన సానార్. 13 వారు కిజిని నాసనమ్దిజ్ వరిజ్ మర్జి నాసనం వాజినాద్. ఒడెఃల్ ఆస వందిజ్ సిగు ఆని ఇని వణిబా కిడెజ్ సర్ల ఆజి వేడెకానె అయా సెఇ ఆసెజ్ సాస్సిసినికార్. మీరు కిజిని ప్రేమ విందుజ లోఇ వారుబా కూడ్డి మజినార్. వారు మన్ను రుజెని లెకెండె ఉణిజి తింజి ఒడెఃల్దిజ్ సుకం కిజిసినికార్. తెలాని పాతాదు మని మస సిగు తపిస్సి లెకెండె వీరుబా సిగు తపిసినికార్. 14 బోదెకాజ్ సుడెజి వనక వెట పాపం కిడెజ్ ఇజి ఆస ఆజి మంజినార్. పాపం కిడెజ్ మని ఆస ఎసెజ్బా డిస్ఎర్. ఇతాల్ అతాల్ మన్ను మన్ని వరిజ్ వారు ఆసెజ్ తోరిసి ఆఇసరి నడిపిసినికార్. వరి వందిజె లాబం తప్పె ఆదెజ్ సుడెజి మంజినార్. దేవుణు వరిజ్ సిక్కు సీనాన్. 15 వారు సరిఆతి బత్తు, బత్తివండ, బెయిరి ఇని వన్ని పాటదికాన్ బిలాము ఇని వన్ని లెకెండె ఆత మనార్. ఎలాగ ఇహిజ తప్పు కిత్తి వందిజ్ దొహ్కెడ్డ బుప్ప వందిజ్ ఆజి బిలాము సరి తప్ప సాహాన్. 16 గాని అయ బిలాము కితి సెఇ వణిదిజ్ వాని గాడెఃదె అడ్డు కితాద్. మాటెజ్ నెసి అయ గాడెఃదె లోకు లెకెండె వర్జి బిలాము ఇని ప్రవక్త ఒడిబితి వెరి వణిదిజ్ అడ్డు కితాద్. 17 నిని బోద కినికార్ ఏరు సీలి ఉటలె లెకెండె, సుర గాలి ఎగ్గిసి ఒని మొసాన్ లెకెండె విరి వందిజ్ గొప్ప సీకటి మని బాడ్డి దేవుణు తయార్ కిత మనాన్. 18 ఎండనిజ్ ఇహిజ యా తప్పు బోద నెస్సిసినికార్ వణిదిజ్ రెఇ బడాయ్ మాటెజ్ వర్జి అయ మాటెజాణిజ్ వరి ఒడెఃల్ ఆసెజ్ సాస్సిస్సెజ్ సుడెజినార్. తప్ప సరి నడిని వరి లోఇహాన్ ఏలె తప్పె ఆతి లోకాజ్, వీరు మరి తప్పె సరి నడిపిసినికార్. 19 ఇని దని అడ్డిబా మన్ఎండ పూర్తి విడుదల మన్నిబాన్ ఒనాన్ ఇజి వీరు వెహ్కెజ్ మంజినార్. గాని వీరు నాసనం తపిసిని పావమ్దిజ్ తోహె ఆత మనార్. ఎండనిజ్ ఇహిజ ఒరెన్ ఇని దనిజ్ గెల్పిస్తెజ్ అట్ఎండ మంజినాండ్రె, దనిజె వెటివణి మణిసి వజ అడిఃగి మంజినాన్. 20 మా ప్రబుని, రక్సిన్నికాన్ ఆతి యేసు క్రీస్తుజ్ బాగ నెస్తి వెనుక, యా లోకమ్ది సెఇ వన్యాణిజ్ తప్పె ఆతి వెనుక, మరి అర్జిజె అకెజ్ వన్నిజ్ అడిగి ఇట్టిజె వారు ముందాల ఆతిమహి దన్నిజ్ ఇంక ఒడ్డె సెఇకార్ ఆనార్. 21 దేవుణు బాణిజ్ వాతి ఆడ్డె వరిజ్ ఒవజెవి ఆతి వెనుక అక్క తప్పి సాహార్. ఆహె తప్పిసాని దన్నిజ్ ఇంక అయ సీతి నిజాయితి మన్ని సరి వందిజ్ నెన్ఎండ మంజినిక ఇహిజానె వరిజ్ నెగ్గత మహాద్ మరి 22 “సుకుడిః అది కక్కికె మరి మర్జి తింజినాద్”, “ఏరుదాన్ నొరె ఆతి వండ్రె మరి బుర్దుదు నూడ్పాదెజ్ సాస్సినికార్”, ఇజి వెహ్కెజ్ మని మాటెజ్ తప్పు సరిదు మహి సాహి విరి వందిజ్ నిజం ఆజినాద్.

ప్రబు మర్జి వాని దినం.

3 నాసు ప్రేమిసినికిదెరా, తొలిత ఉండ్రీ ఉత్తం రాస్త. మీరు ముందల్ నెస్తిమన్ని వనకాజ్ ఎత్తు కిబిస్తెజ్ ఏలు నాసు మిజి మరి ఉత్తం రాసిన. కల్పిసిల్లి మీ మన్నుదిజ్ ఉసార్ కిబిస్తెజ్ ఇజి యా రుండి ఉత్తమ్కు రాసిన్. 2 దేవుణు ప్రవక్తరు పూర్బకాలమ్దు వెహ్కెజ్, మరి మా ప్రబుని రక్సిన్నికానాతి యేసుక్రీస్తు మీ అపొస్తుడుర్ సీత్తి ఆడెజ్ మిజి ఎత్తు కిబిస్తెజ్ ఇజి నాసు ఆస ఆజిన.

3 ముకెలమాతి ఉండ్రీ నజతి మీరు అర్లం కిజి మండ్రు. ఇనిక ఇహిజ, కడెఃవెరి రోస్కాజ్ సెగొండార్ వెక్కిసికార్ వానార్. వారు వరి ఒడెఃల్లి సెఇ ఆసెజ్ సాస్సిసిని మంజినార్. వారు మిజి లివాలె కినార్. 4 వారు ఇనిక వెహ్కెజ్ ఇహిజ, “వాండ్రు వాసన్ ఇజి ఒట్టు కితిత్తాన్గదె. ఎసెజ్ వాసన్లె? మా అనిగొగొర్ సాత సాహార్. గాని ఏలుదాక వాండ్రు వాడెజ్ సిల్లె. యా లోకం పుట్టిబాణిజ్ అసి విజా యా లెకెండె మనాద్, ఇని తేడె సిల్లెద్”, ఇజి వెహ్కెజ్. 5 గాని పూర్బకాలమ్దు దేవుణు వన్ని మాటదాన్ ఆగాసమ్దిజ్ బూమిదిజ్ తయార్ కిత్తాన్. యా బూమి ఏరుబాణిజ్ తయార్ ఆతాద్. ఏరు వెట తయార్ ఆతాద్ ఇజి నెస్తిమహికెజ్ వారు పోస్తెజె ఇజి

సుడఃజినార్. ⁶ వన్ని మాటదాన్ నె పెరిగడ్డ వాజి అయ ఏరుదాన్ అయావలె మహి లోకం విజా ముడుఃగితాదె పాడాతా సాహాద్. ⁷ దేవుణు అయా మాటదానె ఏలు మని ఆగాసమ్దిజ్ బూమిదిజ్ సిసుదాన్ నాసనం కిదెజ్ తీర్పు కిని రోజాదాక ఇట్టా మనాన్. దేవుణు వందిజ్ బక్తిసిల్లి లోకుర్ అయావలె పాడాజి సానార్.

⁸ నాను ప్రేమిసిని తంబెరుజాండె, దిని వందిజ్ పోస్టాల్. ప్రబు ఎర్దు ఉండ్రీ రోజా వెయి వంటెజ్ లెకెండ్ మనాద్. వెయి వంటెజ్ ఉండ్రీ రోజా లెకెండ్ మన్నె. ⁹ ప్రబు ఒట్టు కితి లెకెండ్ మర్జి వాదెజ్ ఆలస్యం ఆజినాద్ ఇజి సెగొండార్ ఒడఃబిజినార్. గాని ఎయెర్బా పాడాజి సాన్ఎండ, విజేరె పాపమ్కు డిసి మన్ను మారిస్తెజ్ ఇజి మీ వందిజ్ ఓరిస్త మనాన్.

¹⁰ గాని ప్రబు మర్జి వాని దినం త్పవండ వానాద్. ఒరెన్ డొజారి ఎస్తివలె వానండ్రొ ఇజి నెస్ఎండ వాని లెకెండ్ వానాద్. నస్తివలె ఆగాసమ్దు దిడిజిని వలె సిల్లెండ ఆనె. ఆగాసమ్దు మని విజా, సిసుదాన్ వేనె సానె. బూమి మున్ను మనికెజ్ విజా వేనె సానె.

¹¹ విజా యా లెకెండ్ పాడానె సానె. అందెజె మీరు దేవుణు వందిజ్ కేట ఆతి లోకుర్ ఆజి దేవుణు వందిజ్ బక్తిమన్ను లోకుర్ ఆజి బత్కిదు. ¹² దేవుణు వాని రోజా వాదెజ్ ఇజి మీరు ఎర్దు సుడఃజినిదెర్. అయా దినం బేగెనె వాదెజ్ ఇజి మీరు గటిజ పణి కిదు. అయ దినమ్దు ఆగాసమ్కు దని లోఇ మనికెజ్ విజి సిసుదాన్ వేనె సానె. అయ సిసు వేడిదిజ్ విజా కర్జిజి సానె. ¹³ గాని దేవుణు ఒట్టు కితి నని కొత్త ఆగాసమ్దిజ్, కొత్త బూమిదిజ్ మాటు ఎర్దు సుడఃజినాల్. బానె విజా నీతి నజాయితి పూర్తి మంజినాద్లె.

¹⁴ అందెజె నాను ప్రేమిసినికిదెరా, మీరు ఇని తపు సిల్లెండ, ఇని పాపమ్బా సిల్లెండ దేవుణు ఎర్దు నండొ కస్టబాడిజి మండ్రు. దేవుణు వెట నిపాతిదాన్ మండ్రు. ఎందనిజ్ దేవుణు ఒట్టు కితి మన్ని దన్నిజ్ మీరు ఏర్దు సుడఃజినిదెర్. ¹⁵ యాక నెస్తు. దేవుణు మా వందిజ్ ఎందనిజ్ ఓరిస్త మనాన్. ఇహిజ మాటు పాపం డిసి మన్ను మారిస్తెజె ఇజి. మాటు ప్రేమిసిని అన్న పవులుబా దేవుణు సితి గెణమ్దాన్ విసుక వందిజ్ రాస్త మనాన్. ¹⁶ పవులు రాస్తి విజా ఉతరమ్క లోఇ యా లెకెండ్నె రాస్త మనాన్. వన్కా లోఇ సెగం అర్దం కిదెజ్ కస్టం ఆతికెజ్. వనక వందిజ్ నెస్ఇకార్, దేవుణు మున్ను మన్ని నమకమ్దు ఇత్తాల్ ఆత్తాల్ దుజ్నికార్ అయ మాటెజ అర్దం మారిసినార్. మహి దేవుణు మాటెజ లోఇ మన్ని సెగమ్కుబా మారిసినార్. దిన్ని వందిజ్ వారు నాసనం ఆన సానార్.

¹⁷ నాను ప్రేమిసినికిదెరా, మీరు యా సజతిజ్ ముజాలె నెస్తి మనిదెర్. అందెజె జాగర్త మండ్రు. దేవుణు రూలుజ లోజిఇకార్ వెహ్నిని తపు బోదెజాణిజ్ మొసెం కిబె ఆమాల్. ఎందనిజ్ ఇహిజ పరి బోదెజ్ మీ స్తిరం ఆతి మన్నుజ కద్దిన్నాద్. ¹⁸ గాని మీరు మా ప్రబు రక్తిస్సికాన్ ఆతి యేసు క్రీస్తు సిత్తి వన్ని దయా దర్మమ్దాన్, గెణమ్దాన్ నెగ్రెండ పిరిజి మండ్రు. వన్నిజ్ ఏలుని, మరి ఎల్లకాలం గవరం కల్లిపిద్. ఆమెన్.

మార్కు

నెల్ల కిబిసినిక

యేసు క్రీస్తు అపొస్తలుడు ఆతి యోహాను యా ఉత్రం రాస్తాన్. వాండ్రు యా ఉత్రం యేసుప్రబుజ్ నమ్మితి వరిజ్ రాస్తాన్. యేసుప్రబు సాజి నిజీతి వెనుక అరువయ్ వంటెజ్ డాట్రాద్. యోహాను డొక్ర ఆత మహాన్. మహి సిసూర్ విజేరె సాత సాహార్. అయావలె బానె మహి సంగమ్కాజ్ యోహాను నడిపిసిని వన్ని లెకెండ్ మహాన్.

బత్తు ఆతి మాట

1 దేవులు మాట ఆతి వన్ని వందిజ్, నాను మిజి రాసిన. వాండ్రు దేవులు వెట అతు సిల్లి బత్తుకు సినికాన్. వాండ్రు యా లోకం పుట్వెండ ముజాల్ మహాన్. గాని వాండ్రు యా లోకమ్దు వాతిజ్ మాపు వన్నిజ్ వెహాప్. మాపు వన్నిజ్ సుడెతాప్. మాపు వన్నిజ్ బెస్తామహాప్. మా కికాణిజ్ వన్నిజ్ ముట్టమహాప్. అయాక మిజి నెస్పినినాప్. 2 బత్తు సీని వినిజ్ దేవులు మా నడిమి పాక్తాన్. మాపు వన్నిజ్ సుడెతాప్. మాపు సుడెతిజ్ వన్నివందిజ్ మిజి నిజం వెప్పినాప్. బత్తు సీని వాండ్రు ఎల్లకాలం మంజి బత్తు ఇజి మిజి నెప్పిన్నాప్. వాండ్రు ముందాహాన్ అసి బుబ ఆతి దేవులుబాన్ మహాన్. ఏలు వన్నిజ్ దేవులు మజి తోరిస్తాన్. 3 మాపు సుడెతి వన్ని వందిజ్, వెహివన్ని వందిజ్ మిజిబా వెప్పినాప్. ఎందనిజ్ ఇహిజ మీరు వన్నిజ్ నమ్మిదెజ్. ఆహి మా బాన్ కూడ్డి మండ్రెజ్ ఇజి. మాపు బుబ్బు ఆతి దేవులు వెట, మరిన్ ఆతి యేసు క్రీస్తు వెట కూడిత మనాప్. 4 మీరుబా ఆహి కూడితిజ మా సర్ద వూర్తి ఆనాదె. అందెజె మాపు ఇకెజ్ రాసినాప్.

జాయ్దు నడినిక

5 అహిజ యేసు క్రీస్తు మజి వెప్పి మాటెజ్ ఏలు మిజి వెప్పినాప్. యాకదె మాట. అక ఇనిక ఇహిజ దేవులు జాయి లెకెండ్ మనాన్. పూర్తి నెగ్గికాన్. వన్ని లో సికాటి అన్ల సిల్లెద్. ఇని కల్తిబ సిల్లెద్. 6 అందెజె మాటు దేవులు వెట కూడిత మనాట్ ఇజి వెప్పి మా లోఇ సీకాటి మని లెకెండ్ బత్తితిజ మాటు అబద్దం వర్గిజినికాట్. దేవులు నెస్పిని నిజమాతి సరిదు నడినికాట్ అవెట్. 7 గాని దేవులు విజా దన్ని లోఇ జాయ్ తోరిసిని లెకెండ్ మాటు విజా పణిజ లోఇ జాయ్ తోరిస్తెజ, మాటు నమ్మితి వరి వెట కూడ్డి మంజినాట్. మరి దేవులు మరిసి ఆతి యేసుప్రబు నల్ల, మాటు కిజిని విజా పాపమ్కాణిజ్ మజి సుబరం కిజినాద్. 8 మాటు ఇని తప్పబా కినికాట్ అవెట్ ఇజి వెప్పెజ మజి మాటె మోసిం కెబె ఆజినాట్. ఎందనిజ్ ఇహిజ దేవులు నెస్పిని వన్ని నిజమాతి మాట వజ మాటు కిడెజ్ సిల్లె. 9 గాని మాటు తప్ప కితాట్ ఇజి దేవులుబాన్ ఒప్పుకోటిజ దేవులు మా లోఇ మని సెఇకెజ్ విజా లాగ్గి పాక్తాండ్రె సుబరం కినాన్. ఎందనిజ్ ఇహిజ సెమిన్న ఇజి దేవులు మాట వెప్పె మనాన్. వాండ్రు నమ్మిదెజ్ తగ్గికాన్. నాయం మనికాన్. వెప్పి వజ కినికాన్. 10 మాటు తప్పు కిఇకాట్ ఇజి వెప్పెజ దేవులు అబద్దం వెప్పికాన్ ఇజి మాటు వెప్పినాట్. మాటు ఆహి వెప్పెజ దేవులు వెప్పె మాట అన్నికాట్ అవెట్. ఎందనిజ్ ఇహిజ విజెరె లోకురె పాపం కిత్రా ఇజి దేవులు వెప్పె మనాన్గదె.

2 నజి కొడోర్ లెకెండె మీరు, అందెజె మిజి రాసిన. మీరు పాపం కిడెజ్ అవెద్ ఇజి యా సజతిజ్ మిజి రాసిన. గాని ఎయెన్బా పాపం కిత్రాన్ ఇహిజ దేవులు ఆతి దేవులుబాన్ మా వందిజ్ వెప్పికాన్ ఒరెన్ ఒపిసినికాన్ మనాన్. విరి పాపమ్కు సెమిన్ల ఇజి వాండ్రు వెహాన్. వాండ్రు సీతి నిజాతి మనికాన్ ఆతి యేసు క్రీస్తునె. 2 వాండ్రు మా పాపమ్కు సాన్పెస్సెజ్ పూజ ఆతికాన్. వాండ్రు పూజ ఆతిజ్ దేవులు మా పాపమ్కు సెమిస్సెజ్ అట్నాన్. మా పాపమ్కాజ్ వందిజ్ ఉండ్రె అవెద్. యా లోకమ్దు విజెరె పాపమ్క వందిజ్ పూజ ఆతికాన్. 3 మాటు దేవులుజ్ నెప్పికాట్ ఇజి మజి ఎలాగ తెలిజినాద్. దేవులు మజి సీతి ఆడ్రెజ లోజితిజనె తెలినాద్. 4 నాను దేవులుదిజ్ నెన్న ఇజి వెప్పె, దేవులు సీతి ఆడ్రెజ లోజిఇకాన్ అబదం వెప్పికాన్. దేవులు నెస్పిని నిజం ఆతి మాటెజ వాండ్రు లోజివెన్. 5-6 దేవులు వెప్పె మాటదిజ్ ఎయెన్బా లోజితిజ, దేవులు మున్ను వన్నిజ్ పూర్తి ప్రేమ మనాద్ ఇజి తోరిస్తాన్. దేవులు వెట కూల తొహ్తమన ఇజి వెప్పికాన్, యేసు ప్రబు నడితి లెకెండ్ దేవులుదిజ్ లోజిజి నడిదెజ్. ఆహి దేవులు వెట కూడిజి మంజినాట్ ఇజి మాటు నెస్సాట్. 7 నాను ప్రేమిసినికిదెరా, నాను ఉండ్రె కొత్త ఆడ్రె మిజి రాన్. గాని ముజాల నెస్పిని ఉండ్రె వడాయ్ ఆడ్రెనె రాసిన. అయా ఆడ్రె మీరు క్రీస్తు లోకు ఆతి బాణిజ్ అసి నెస్కిదె. అయ ఆడ్రె మీరు వెహిమని దేవులు మాటనె. 8 గాని నాను ఏలు రాసిని మాట కొత్త ఆడ్రెనె. ఎలాగ ఇహిజ యేసుప్రబు వన్ని బత్తుదు యా ఆడ్రె తోరిస్తాన్. మీ బత్తుదుబా మీరు తోరిస్సిదె. ఎందనిజ్ ఇహిజ మీ లోఇ సీకటి లెకెండ్ మని పాపం ఏలు సాన్నినాద్. జాయ్ లెకెండ్ మని నిజమాతికెజ్ మీ లోఇ వాజినె.

9 జాయ్దు నడిజిని ఇజి వెప్పె ఒరెన్, క్రీస్తుజ్ నమ్మితి వన్నిజ్ దూసిన్నికాన్ ఇహిజ వాండ్రు ఏలుబ సీకటిదునె నడిజినాన్. 10 మరి ఒరెన్ క్రీస్తుజ్ నమ్మితి వన్నిజ్ ప్రేమిన్నికాన్ ఇహిజ వాండ్రు జాయ్దు నడిజినాన్. వన్ని బత్తుదు పాపం కిబిస్సిక ఇనికబ సిల్లెద్. 11 మహివరిజ్ వగ ఆతికాన్ సీకటిదు మంజి సీకటిదు నడిజినాన్. ఎంబె నాన్సినాండ్రె ఇజి వాండ్రు నెస్పెన్. ఎందనిజ్ ఇహిజ సీకటిదు వన్నిజ్ గుడ్డి వన్ని లెకెండ్ కితాద్. 12 నాను ప్రేమిసిని బయిరాండె, క్రీస్తు మీ వందిజ్ సాతిజ్ దేవులు మీ పాపమ్కు సెమిస్తాన్. అందెజె నాను యాకెజ్ మిజి రాసిన. 13 బుబ్బురాండె, దేవులు ఇనికబా పుటిన్వెండ ముజాల మహి

యేసుక్రీస్తుజ్ మీరు నెస్తిదెర్. అందెజె నాను మిజి రాసిన. దజ్డారండె, మీరు సెజ బుద్ది కల్లితి సయ్తానుజ్ గెలిస్తెదెర్. అందెజె నాను మిజి రాసిన. నాను ప్రేమిసిని బయిరండె, బుబ్బు ఆతి దేవుణుదిజ్ మీరు నెస్తిమనిదెర్. అందెజె నాను మిజి రాసిన. 14 అందెజె నాను మిజి రాసిన. దజ్డారండె, దేవుణు మాట మీ లోఇ మనిజ్ మీరు సత్తుమనికిదెర్ ఇజి తొరిస్తిదెర్. మీరు సయ్తనుజ్ గెలిస్తె మనిదెర్ అందెజె మిజి రాసిన.

లోకమ్దు మని వనకాజ్ ప్రేమ కిమాట్

15 యా లోకమ్దు మని వనక ముస్సు మన్ను ఇడ్కాట్. యా లోకమ్ది బత్తుదిజ్ ప్రేమిన్మాట్. ఎందనిజ్ ఇహిజ యా లోకమ్దిజ్ ప్రేమిన్ని వన్నిజ్ దేవుణు ముస్సు ప్రేమ సిల్లెద్. 16 ఎందనిజ్ ఇహిజ, యా లోకమ్దికెజ్ విజా దేవుణు బాణిజ్ వనికెజ్ ఆడ. అక్కెజ్ ఇనికెజ్ ఇహిజ ఇనికెజ్ కిడెజ్ ఇజి ఆస ఆనాదొ, అక్కెజ్ విజా కిడెజ్ ఇజి ఒడెబినిక, మరి, కణకెజిజ్ సుడెజినికెజ్ విజా కావాలి ఇజి ఆస ఆనిక, మరి, ఆస్తి కల్గితిమని వందిజ్ గర్త ఆనిక, నినికెజ్ యా లోకమ్దిజ్ ప్రేమ కినివలె వానె. 17 యా లోకమ్ది లోకుర్ ఆస ఆనికెజ్ విజా సిల్లెండ ఆనెలె. గాని దేవుణుజ్ ఇష్టం ఆతివజ సడినికాన్ ఎలా కాలం బల్కెనాన్లె.

క్రీస్తుజ్ ఎద్రిస్తికార్ వానార్

18 నాను ప్రేమిసిని బయిరండె, లోకం అందిని కడివేరి దినమ్కు ఆజినె. కడివేరి దినమ్కాజ్ క్రీస్తుజ్ ఎద్రిస్తికార్ వానాన్ ఇజి మీరు నెస్తిదెర్ గదె. అహిజ ఏలు క్రీస్తుజ్ ఎద్రిస్తికార్ నండొండార్ సాత మనార్. అందెజె కడివేరి దినమ్కు ఆత ఇజి మాటు నెన్నాట్. 19 వారు మా బాన్కూడిత మహార్. గాని డిస్త సాహార్. ఎలాగ ఇహిజ వారు మా లోకాజ్ సెందితికార్ ఆవెర్. వారు మా బాన్ మంజినికార్ ఇహిజ మా వెటనె కూడిజి పాడ్డి మహార్మరి. గాని మజి డిస్త సాహార్, మజి సెందితికార్ ఆవెర్ ఇజి వారు తొరిస్సార్. 20 గాని క్రీస్తు పాక్తి దేవుణు ఆత్మ మిజి మనాన్. అందెజె మీరు విజిదెరె నిజమాతికెజ్ నెసినిదెర్. 21 మీరు నిజం నెన్ఇదెర్ ఇజి నాను యాక రాస్సిక ఆవెద్. నిజమాతికెజ్ మీరు నెసినిదెర్. అందెజె నాను రాసిన. నిజమాతి దని లోఇ అబద్దం ఆతి బోద సిల్లెద్ ఇజి మీరు నెస్తిదెర్. అందెజె నాను రాసిన. 22 యేసు, దేవుణు పాక్తి క్రీస్తు ఆవెన్ ఇజి వెహికాండ్రె అబద్దం వెహికాన్. ఆహు వెహికాన్ క్రీస్తుజ్ ఎద్రిసినికాజ్. వాండ్రు బుబ్బు ఆతి దేవుణుదిజ్, మరిసి ఆతి క్రీస్తుజ్ నెక్కి పాక్సినికాన్. 23 దేవుణు మరిసి ఆతి యేసుక్రీస్తుజ్ నెక్కిపాక్సినికాన్ ఎయెన్బా బుబ్బు ఆతి దేవుణుదిజ్ నెక్కిపాక్సినికాన్. మరిసి ఆతి యేసుక్రీస్తుజ్ డగ్రు కినికాన్ బుబ్బు ఆతి దేవుణుజ్బా డగ్రు కిజినాన్. 24 యేసు క్రీస్తుజ్ నమ్మితి బాణిజ్ అసి మీరు వెహి మనికెజ్ విజా మీ మన్నుదు నెగ్రండ అసి మండ్రెజ్. ఆహె నెగ్రండ మీ మన్నుదు మహిజ, మీరుబా మరిసి ఆతి యేసు క్రీస్తుబాన్, బుబ్బు ఆతి దేవుణుబాన్ కూడజి మంజినిదెర్. 25 మాటు ఆహె వన్నిబాన్ కూడతి మహిజ, మజి సిన్ ఇజి యేసు ఒట్టు కితి ఎలా కాలం బత్సిని బత్సు మజి దోహ్కాద్. 26 మిజి మోసెం కిడెజ్ సూజి వరి వందిజ్ ఇకెజ్ నాను రాసిన. 27 క్రీస్తు పాక్తి దేవుణు ఆత్మ మీ లోఇ మనాద్. అందెజె మరి ఎయెన్బా మిజి నేరెప్పిస్తెజ్ అవ్సరం సిల్లెద్. ఎందనిజ్ ఇహిజ దేవుణు ఆత్మ వూర్తి నిజమె. ఇని అబద్దం సిల్లెద్. దేవుణు ఆత్మనె మీరు నెస్తిజ్ మని విజా వన్నా వందిజ్ నేరెప్పిస్తాన్. అందెజె దేవుణు ఆత్మ నెన్పిస్తి లెకెడెనె మీరు క్రీస్తు బాన్ నిల్సి మండ్రు.

మాటు దేవుణు కొడొజ్

28 అందెజె నాను ప్రేమిసిని నా బయిరండె, క్రీస్తుబాన్ నిల్సి మండ్రెజ్. ఎందనిజ్ ఇహిజ వన్ని వెట నిలేసి మహిజ క్రీస్తు మర్జి వనివలె వన్ని ఎద్రు సిగు ఆవెండ దయ్సెమాన్ నిలేదెజ్ ఆనాద్. 29 దేవుణు నీతి నిజాయితి మనికాన్ ఇజి మీరు నెస్తిదెర్. అహిజ దేవుణు వెహి వజ కిని ఎయెన్బ దేవుణు కొడొజ్ ఇజి మీరు నెస్తిదెర్.

3 బుబ్బు ఆతి దేవుణు మజి నండొ ప్రేమిస్తిజ్ మాటు దేవుణు కొడొజ్ ఇజి కూకె ఆజినాట్. నసా దేవుణు ప్రేమ మా ముస్సు మంజినాద్. మాటు దేవుణు కొడొజ్నె. గాని దేవుణుదిజ్ నమ్మిఇకార్, బుబ్బు ఆతి దేవుణుదిజ్ నెన్ఎర్. అందెజె మాటు దేవుణు కొడొజ్ ఇజి వారు అర్దం కివెర్. 2 నాను ప్రేమిసినికిదెరా, ఏలు మాటు దేవుణు కొడొజ్ ఆత మనాట్. మాటు ఇనిక ఆనాట్లె ఇజి దేవుణు ఇంక మజి తొరిన్వతాన్. గాని యేసు క్రీస్తు తొరె ఆనివలె వాండ్రు మని లెకెడె మాటుబ అనాట్లె ఇజి నెన్నాట్. ఎందనిజ్ ఇహిజ వాండ్రు మనిలెకెడె మాటు వన్నిజ్ సుణాట్లె. 3 యేసు క్రీస్తు తొరె ఆని వందిజ్ ఎద్రు సుడెజిని ఎయెన్బా వని వజ ఆస ఆజి పాపం డిసి బల్కెజినాన్. ఎందనిజ్ ఇహిజ క్రీస్తు పాపం సిలికాన్. 4 పాపమ్కు కిజినె మంజినికాన్ ఎయెన్బా దేవుణు ఆడ్రెజ్ నెక్కిపాక్సినికాజ్. పాపం ఇనిక ఇహిజ, దేవుణు ఆడ్రెజ్ నెక్కి పాక్సిక. 5 మా పాపమ్కు విజా లాగ్లి పాక్తెజె క్రీస్తు యా లోకమ్దు వాతాన్ ఇజి మీరు నెసినిదెర్. అకడె ఆవెద్, వన్ని లోఇ పాపం ఇనికబా సిల్లెద్ ఇజిబా మీరు నెసినిదెర్. 6 అందెజె యేసు క్రీస్తు వెట కూల తొహ్పికాన్ పాపం కిజినె మన్వెన్. పాపం కిజినె మనికాన్ ఎయెన్బా క్రీస్తు ఎయెన్ ఇజి అర్దం కివెన్. 7 నాను ప్రేమిసిని బయిరండె, ఎయెన్బా మిజి మోసెం కివెండ సుడెడు. యేసు క్రీస్తు నీతిమనికాన్. క్రీస్తు వెహి మాటెజ్ వజ సడినికాన్, దేవుణు ఎద్రు నీతి నిజాయితి మనికాన్. 8 పాపం కిజినె మంజినికాన్ సయ్తాను జటుదికాన్. ఎందనిజ్ ఇహిజ యా లోకం పుట్వెండ మహి బాణిజ్ అసి సయ్తాన్ పాపం కిజినె మంజినాన్. దేవుణు మరిసి ఆతి యేసుక్రీస్తు యా లోకమ్దు ఎందనిజ్ వాతాన్ ఇహిజ సయ్తాన్ కిని విజా పణిజ వూర్తి నాసనం కిడెజె వాతాన్. 9 దేవుణు కొడొజ్ ఆతికాన్ ఎయెన్బా పాపం కిజినె మన్వెన్. ఎందనిజ్ ఇహిజ దేవుణు గుణం వన్ని లోఇ మనాద్. వాండ్రు దేవుణు పాటాదికాన్. అందెజె పాపం కిజి మండ్రెజ్ అట్వెన్. 10 దేవుణు కొడొజ్ ఎయెర్, సయ్తాన్ కొడొజ్ ఎయెర్ ఇజి మాటు ఎలాగ నెన్నాట్ ఇహిజ దేవుణు ఎద్రు సరియాతికెజ్ కిఇకాన్ దేవుణు కొడొజ్ ఆవెన్. మహి వరిజ్ ప్రేమ కిఇకాన్బా దేవుణు కొడొజ్ ఆవెన్.

ఒరెన్ మరి ఒరెన్ వన్నిజ్ ప్రేమిస్తిజ్

11 అందెజె మీరు నమ్మితి బాణిజ్ అసి వెహిక యాకడె. ఇనిక ఇహిజ మాటు, ఒరెన్ మరి ఒరెన్ వన్నిజ్ ప్రేమిస్తిజ్ ఇజి, 12 మాటు కయిను లెకెడె మండ్రెజ్ ఆవెద్. వాండ్రు సయ్తాను జటుదికాన్ ఆతండ్రె వన్ని తంబెరెనిజ్ సప్తాన్. ఎందనిజ్ సప్తాన్ ఇహిజ వన్ని పణిజ్ సెజ బుద్ది కలగితికెజ్. వన్ని తంబెర్సి పణిజ్ దేవుణు

ఎద్దు సరిఆతికెజ్ఎన్ ఆతెమహె. ¹³ అహిజ నా తంబెరుజాండె, దేవుణుదిజ్ నమ్మిఇకార్ మీ ముస్సు వగ ఆతిజ బమ్మ ఆమాట్. ¹⁴ మాటు మహి వరిజ్ ప్రేమ కిజి మహిజ మాటు సాతి వరి లెకండె ఆవెట్. ఎలా కాలం బత్రిని బత్కుదు బత్రిజినాట్ ఇజి నెసినాట్. మహి వన్నిజ్ ప్రేమ కిఇకాన్ సాతి వన్ని లెకండె మనాన్. ¹⁵ మాటు ఒరెన్ వన్ని ముస్సు వగ అస్తిజ, వన్నిజ్ నప్తిలెకండె. లోకాజ్ నస్సి వన్నిజ్ ఎలా కాలం బత్రిని బత్కు సిల్లెద్ ఇజి మీరు నెసినెదెర్. ¹⁶ ప్రేమ ఇహిజ ఇనిక ఇజి మాటు ఎలాగ నెన్నెట్ ఇహిజ, యేసు క్రీస్తు, వాండ్రె వన్ని పాణం మా వందిజ్ సితాన్. అకదె ప్రేమ. అయవజనె మాటుబా మా తంబెరిజ వందిజ్ మా పాణం సీదెజ్వలె. ¹⁷ విజా కల్గితి మనికాన్ ఒరెన్, అవ్సరమ్దు మని ఒరెన్ వన్నిజ్ కనికారం తోరిన్ఎండ మహిజ అయ విజా కలగితి మనికాన్ దేవుణుదిజ్ నెగ్రెండ ప్రేమిన్ఎన్ ఇజి తోరిన్నాన్. ¹⁸ నాను ప్రేమిసిని బయిరండె, మాటు మాట ఉండె దానె ఆవెద్. మా పణిబ మా ప్రేమ నిజమె ఇజి తోరిన్నాట్. ¹⁹ మాటు మా పణిబాణిజ్ మహి వరిజ్ నిజం కిజి ప్రేమిస్తిజ మాటు నిజమాతిదాన్ లోజిజినాట్ ఇజి నెన్నెట్లె. మరి దేవుణు ఎద్దు మా మస్సు నిపాతి మంజినాద్లె. ²⁰ ఎందనిజ్ ఇహిజ మాటు తప్తాట్ ఇజి మా మస్సు ఉండ్రె వేలా వెన్నెద్దును గాని, దేవుణు మా మస్సుదిజ్ ఇంక పెరికాన్. దేవుణు నెన్ఇకెజ్ ఇనికెజ్ సిలు. ²¹ నాను ప్రేమిసినికిదెరా, మాటు తప్త కివెట్ ఇజి మా మస్సుదు నెస్తిజ మాటు దేవుణు వెట కూడెజి దయరం కల్గిజి మంజినాట్. ²² మాటు ఇనిక లోస్తిజ్బా దేవుణు బాణిజ్ దోహొక్కినాద్. ఎందనిజ్ ఇహిజ దేవుణు వెస్తికెజ్ మాటు కిజినాట్. దేవుణుదిజ్ ఇస్సం ఆతి వజ బత్రిజినాట్. ²³ యాకదె దేవుణు మజి వెస్తి రూలు. ఇహిక ఇహిజ యేసు క్రీస్తు దేవుణు మరిసి ఇజి మాటు నమ్మిదెజ్ వలె. క్రీస్తు వెస్తి లెకండె ఒరెన్ మరి ఒరెన్ వన్నిజ్ ప్రేమిస్తిజ్. ²⁴ దేవుణు సీతి రూలుజ్ వజ నడిసికాన్ దేవుణు వెట మంజినాన్. దేవుణు వన్ని వెట మంజినాన్. దేవుణు మా వెట మనాన్ ఇజి ఎలాగ నెన్నెట్ ఇహిజ, దేవుణు ఆత్మ మా లోఇ మనిజ్ మాటు నెన్నెట్.

విజా ఆత్మెజ నమ్మిదెజ్ ఆవెద్

4 నాను ప్రేమిసినికిదెరా, దేవుణు ఆత్మదాన్ వర్గిజిన ఇజి వర్గిని విజా వన్కాజ్ నమ్మిమాట్. విజా దేవుణు బాణిజ్, వాతికదో ఆవెదో ఇజి నెగ్రెండ నెసి సుడెదు. ఎందనిజ్ ఇహిజ అబద్దం వెస్తి ప్రవక్తరు నండొండార్ యా లోకమ్దు సాతార తప్పు మాటెజ్ బోదిసికాన్. ² దేవుణు ఆత్మ మనికార్ ఎయెర్ ఇజి ఎలాగ నెన్నెట్ ఇహిజ లోకు వజ దేవుణు బాణిజ్ వాతి యేసు క్రీస్తుజ్ నాను సెందితికాన్ ఇజి ఒప్పుకోణికాన్ ఎయెన్బా దేవుణు ఆత్మ మనికాన్ ఇజి నెస్తిజ్. ³ గాని ఎయెన్బా, యేసు ప్రబు నా ప్రబు అవెన్ ఇజి వెహిజ వాండ్రు దేవుణు బోద వెహికాన్ అవెన్. వాండ్రు క్రీస్తుజ్ పడికాన్ క్రీస్తుజ్ పడిఎండ వెహికార్ వానార్ ఇజి మీరు వెహికెజ్ యాకదె. అయ గుంపుదికార్ ఏలు మా నడిఃమ్మి మనార్. ⁴ ఇజిరి బయిరండె, మీరు దేవుణుదిజ్ సెందితికిదెర్. మీరు వరి బోద కెఇతిదెర్, వరిజ్ గెల్సిదెర్. మీ లోఇ మని దేవుణు ఆత్మ నత్తు లోకమ్దు మని నయ్తాన్ నత్తు ముస్సు పెరికదె. అందెజె మీరు వరిజ్ గెల్సిదెర్. ⁵ తప్పు మాటెజ్ బోదిస్సికార్ యా లోకమ్దికార్. అందెజె వరి బోద యా లోలమ్ది వరి అలోసం లెకండె మన్నె. అందెజె యా లోకమ్దికార్ వరి బోద వెనార్. ⁶ మాటు ఇహిజ దేవుణుదిజ్ సెందితికాట్. దేవుణుదిజ్ నెస్తికాన్ మా మాటెజ్ వినాన్. ఆఇకాన్ వినెన్. నిజం వెహికార్ ఎయెరో, తప్పు వెహికార్ ఎయెరో ఇజి మాటు ఈహు నెన్నెట్.

దేవుణు ప్రేమని, లోకు ప్రేమ

⁷ నా తంబెరిజడె, మాటు ఒరెన్, మరి ఒరెన్ వన్నిజ్ ప్రేమిస్తిజ్వలె. ఎందనిజ్ ఇహిజ దేవుణు బాణిజె ప్రేమ వాజినాద్. మరి ఒరెన్ వన్నిజ్ ప్రేమిస్సికాన్ దేవుణు బాణిజ్ పుట్టికాన్. వాండ్రు దేవుణుదిజ్ బాగ నెస్తికాన్. ⁸ మహి వరిజ్ ప్రేమిన్ఇకాన్ దేవుణుదిజ్ నెన్ఇకాన్. ఎందనిజ్ ఇహిజ దేవుణు ప్రేమ మనికాన్. ⁹ దేవుణు మజి ప్రేమిస్సాన్ ఇజి ఈహు తోరిస్తాన్. ఎలాగ ఇహిజ వన్ని ఒరెండ్రె మరిసిజ్ యా లోకమ్దు పాక్తాన్. మజి ఎలా కాలం బత్రిని బత్కు దోహొక్కెజ్ ఇజి దేవుణు వన్నిజ్ పాక్తాన్. ¹⁰ నిజమాతి ప్రేమ ఇహిజ మాటు దేవుణుదిజ్ ప్రేమిస్సాట్ ఇజి ఆవెద్. నిజమాతి ప్రేమ ఇహిజ యాకదె. ఎలాగ ఇహిజ దేవుణు మజి ప్రేమిస్సాండ్రె మా పావమ్కు సాస్తిస్సి వందిజ్ వన్ని మరిసిజ్ పాక్తాన్. మా పావమ్కు వందిజ్ పూజ ఆదెజ్ పాక్తాన్. అకదె ప్రేమ. ¹¹ నాను ప్రేమిసినికిదెరా, దేవుణు మజి నిసా ప్రేమిస్సాన్. అందెజె మాటుబా ఒరెన్ మరి ఒరెన్ వన్నిజ్ ప్రేమిస్తిజ్వలె. ¹² ఎయెర్బా ఎనిజ్బా దేవుణుదిజ్ సుడెదెజ్ సిల్లె. గాని మాటు ఒరెన్ మరి ఒరెన్ వన్నిజ్ ప్రేమిస్తిజ దేవుణు మా లోఇ బత్రిజినాన్. అయావలె దేవుణు ప్రేమిసిని లెకండె మా ప్రేమబ పూర్తి ఆనాద్లె.

¹³ దేవుణు వన్ని ఆత్మ మజి సిత మనాన్. అందెజె మాటు దేవుణు వెట కూడెత మనాట్ ఇజి, మరి దేవుణు మా లోఇ మంజినాన్ ఇజి నెసినాట్. ¹⁴ మరి బుబ్బు ఆతి దేవుణు, మరిసి ఆతి యేసుక్రీస్తుజ్ పాక్తాన్. లోకాజ్ వరి పావమ్కాణిజ్ వాని సిక్కుదాన్ తప్తిస్తిజ్ ఇజి పాక్తాన్. యాక మాపు సుడెతావె విజేరిజ్ వెహిసావ్. యాక నిజమె ఇజి సాక్సి వెహిసావ్. ¹⁵ యేసు దేవుణు మరిసి ఇజి ఎయెన్బా ఒప్పుకోటిజ, దేవుణు వన్ని వెట మంజినాన్. వాండ్రు దేవుణు వెట కూడెజి మంజినాన్. ¹⁶ దేవుణు మా ముస్సు తోరిస్తి ప్రేమ మాటు నెస్తి మనాట్, నమ్మిత మనాట్. దేవుణు ప్రేమ మనికాన్. అందెజె మహి వరిజ్ ప్రేమిసినికాన్ దేవుణుబాన్ కూడెజి మంజినాన్. దేవుణు వన్నిబాన్ కూడెజి మంజినాన్. ¹⁷ దేవుణు ప్రేమిసిని లెకండె మా నడిఃమ్మి మని ప్రేమ పూర్తి ఆనాద్లె. అందెజె దేవుణు తీర్పు సీని వలె తియెల్ ఆవెండ మంజినాట్. ఎందనిజ్ ఇహిజ యేసుప్రబు యా లోకమ్దు ఎలాగ బత్కితాండ్రె మాటుబ అయాలెకండెవ బత్కిదెట్. ¹⁸ ప్రేమ లోఇ తియెల్ సిల్లెద్. అక్కాదె ఆవెద్. పూర్తి ఆతి ప్రేమ మహిజ అక్క తియెల్ సాన్పెన్నాద్. ఎందనిజ్ ఇహిజ సిక్కు వానాద్ ఇజినె తియెల్ వానాద్. తియెల్ ఆని వన్నిజ్ పూర్తి ప్రేమ సిల్లెద్. ¹⁹ దేవుణునె మజి ముజాల ప్రేమిస్తిజ్, మాటు వన్నిజ్ ప్రేమిస్తిజ్ అటెసినాట్. ²⁰ ఎయెర్బా, 'నాను దేవుణుదిజ్ ప్రేమిస్తి' ఇజి వెహి, మరి ఒరెన్ నమ్మిత్తి వన్నిజ్ ప్రేమ కిండె మహిజ వాండ్రు అబద్దం వెహిసాన్. ఎందనిజ్ ఇహిజ తోరిజిని వన్నిజ్ ప్రేమిన్ఇకాన్ తోర్ఇ దేవుణుదిజ్ ప్రేమిస్తిజ్ ఆట్ఎన్. ²¹ యేసు క్రీస్తు మజి ఇని రూలు సిత మనాన్ ఇహిజ, దేవుణుదిజ్ ప్రేమిస్సికాన్ మహి క్రీస్తు లోకాజ్బా ప్రేమిస్తిజ్ వలె.

దేవుణు మరిసి ముస్సు నమ్మకం

5 యేసునె క్రీస్తు ఇజి నమ్మినికాన్ ఎయెన్బా దేవుణు బాణిజ్ పుట్టాన్. బుబ్బెజ్ ప్రేమిస్సికాన్ ఎయెన్బా వన్ని బాణిజ్ పుట్టి విజేరిజ్ ప్రేమిస్సాన్. ² దేవుణుదిజ్ ప్రేమిసి, వాండ్రు వెహి రూలుజ వజ కితిజ, మాటు దేవుణు కొడెఃరిజ్ ప్రేమిస్సాట్ ఇజి నెన్నెట్. ³ దేవుణుదిజ్ ప్రేమిస్తిజ్ ఇహిజ వన్ని రూలుజ వజ కిదెజె.

వన్ని రూలుజ్ కష్టం ఆతికెజ్ ఆఉ. సుల్కాణికెజె. 4 దేవుణుబాణిజ్ పుట్టికార్ విజెరె యా లోకమ్దు దేవుణుదిజ్ పడిఃఇ విజా వన్కాజ్ జయిస్తెజ్ అట్నార్. దేవుణుదిజ్ పడిఃఇ విజా వన్కాజ్ జయిస్తెజ్ ఎలాగ అట్నార్ ఇహిజ, మాటు యెసుపుబుజ్ నమకం ఇట్టివలెదాన్ అట్నార్. 5 దేవుణుదిజ్ పడిఃఇ వన్కాజ్ జయిస్తెకాన్ ఎయెన్? యేసు, దేవుణు మరిసి ఇజి నమ్మినికాండ్రె. 6 క్రీస్తు ఆతి యేసు యా లోకమ్దు వాతండ్రె. ఏరుదు బాప్తినం లాగెతాన్. సిల్వారు నల వాక్కి సాతాన్. బాప్తినం ఉండ్రె ఆఎద్. సిలువారు నల వాక్కి సాదెజె వాతాన్. యాక నిజమె ఇజి దేవుణు ఆత్మ సాక్కి వెప్పినాన్. అందెజె యాక నిజమె. ఎందనిజ్ హిజ దేవుణు ఆత్మ నిజమెనె వెప్పినాన్. 7 క్రీస్తు వందిజ్ సాక్కి వెప్పికెజ్ మూండ్రె మన్నె. 8 దేవుణు ఆత్మ, బాప్తినం లాగె ఆతి ఏరు, సిలువారు వాక్కి నల. యా మూండ్రె ఒప్పు కొడిఃజి క్రీస్తు వందిజ్ సాక్కి వెప్పినె. 9 మాటు, లోకుర్ సాక్కి అట్నార్ గదె. అహిజ దేవుణు సీని సాక్కి ఒదె సత్తు మనికగదె. ఎందనిజ్ సత్తు మనిక ఇహిజ, దేవుణు వన్ని సాంత మరిసి ఆతి యేసు వందిజ్ వెప్పి సాక్కినె. 10 దేవుణు మరిసి మున్కు నమం ఇట్టి వన్ని లోఇ యా సాక్కి మనాద్. గాని దేవుణు మున్కు నమ్మకం ఇడఃఇకాన్ దేవుణు మని మరిసి వందిజ్ వెప్పి సాక్కి నమ్మిఎన్. అందెజె వాండ్రు దేవుణు అబద్దం వెప్పినాన్ ఇజి వెప్పినాన్. 11 దేవుణు వెప్పి సాక్కి యాకదె. ఇనిక ఇహిజ దేవుణు వెట ఎలా కాలం బత్కిని బత్కు దేవుణు మజి సితాన్. యా బత్కు మజి ఎలాగ వాతాద్ ఇహిజ యేసు క్రీస్తు మున్కు నమకం ఇడఃజి వన్ని వెట కూడిఃతి మహిజ్ వాతాద్. 12 దేవుణు మరిసి ఆతి యేసు క్రీస్తు వెట కూడిఃజి మంజిని వన్నిజ్ యా బత్కు మనాద్. దేవుణు మరిసి వెట కూడిఃజి మన్ఇ వన్నిజ్ దేవుణు వెట ఎలా కాలం బత్కిని బత్కు సిల్లెద్. 13 దేవుణు మరిసి మున్కు నమ్మకం ఇడఃఇతి వరిజ్ నాను ఇక్కెజ్ రాసిన. ఎందనిజ్ రాసిన ఇహిజ మిజి దేవుణు వెట ఎలా కాలం బత్కిని బత్కు మనాద్ ఇజి నెస్తెజె రాసిన. 14 అహిజ మజి దేవుణు మున్కు మని దయరం ఇనిక ఇహిజ, మాటు దేవుణు ఇష్టమ్దిజ్ కూడిఃతి మని ఇనికబా లొస్తెజ, వాండ్రు అక కినాన్. 15 మాటు ఇనిక లొస్తెజబా దేవుణు వెంజినాన్ ఇజి మాటు నెస్తెజ, మాటు దేవుణుబాణిజ్ లొస్తెజ్ విజా దొహ్కెక్కి లెకండె నెసినాట్.

16 ఒరెన్ నమ్మిత్తికాన్ సాపు తెఇ పాపం కిజి మహిజ ఎయెన్బా అక సుడిఃతిజ, వన్ని వందిజ్ పార్దనం కిదెజ్. దేవుణు వన్నిజ్ బత్కు సీనాన్. సాపు తెఇ పాపం కినివరి వందిజె వెప్పిన. గాని సాపు తపిన్ని పాపం మనాద్. నని పాపం కిని వరి వందిజ్ పార్దనం కితి ఇజి నాను వెహె. 17 ఇని తపు కితిజ్బా పాపమ్నె. గాని లోకాజ్ సాపు తపిన్ఇ పాపమ్కు మన్నె. 18 దేవుణు బాణిజ్ పుట్టికాన్ ఎయెన్బా పాపం కిజినె మన్ఎన్ ఇజి మాటు నెసినాట్. ఎందనిజ్ ఇహిజ దేవుణు మరిసి వన్నిజ్ కాపకిజినాన్. అహిజ సయతాను వన్నిజ్ ముట్టి నాసనం కిదెజ్ అట్ఎన్. 19 మాటు దేవుణు కొడఃర్ ఇజి నెసినాట్. దేవుణుదిజ్ సందితికార్ ఆఇకార్ సయతాను అడిఃగి మంజినార్ ఇజి నెసినాట్. 20 మరి దేవుణు మరిసి వాతండ్రె, నిజమాతి దేవుణుదిజ్ మాటు నెస్తెజ్ మజి తెలివి సితాన్. మాటు వన్ని వెట కూడిఃతిజ్ నిజమాతి దేవుణు వెట కూడిఃత మనాట్. వీండ్రె నిజమాతి దేవుణు. వీండ్రె దేవుణు వెట ఎలా కాలం బత్కిని బత్కు లోకాజ్ సీనికాన్. 21 నాను ప్రిమిసిని బయిరండె, బోమ్మెజ మాడిఃస్తెజ్ ఆవద్.

మార్కు

నెల్వ కిబిసినిక

యేసు క్రీస్తు అపొస్తలుడు ఆతి యోహాను రాస్తీ ఉత్తమ్నె యాక. నండొ ముజాలె సువార్త వెప్పికార్ బూలాజి బూలాజినె సువార్త సాటిసి మహార్. అయావలె యేసుజ్ నమ్మిత్తికారె, యాలెకెండ సువార్త వెప్పి వరిజ్ వరి ఇండ్రొ డగ్గు కిజి, వరిజ్ కావాలిస్తికెజ్ సీజి ఫాక్సి మహార్. తప్పు బోద వెప్పికార్బా మహార్. వారుబా యాలెకెండ బూలాజి బూలాజినె కిజి మహార్. అందెజె నన్ని వరివందిజ్ జాగర్త మండ్రెజ్ ఇజి యా ఉత్తమ్దు రాసి వెప్పినాన్. నిజమాతికెజ్ నమ్మిజి అయాలెకెండ బత్తిదెజ్ వలె ఇజిబా వెప్పినాన్.

1 ¹⁻² పెదెలి ఆతి నాను, దేవుణు ఏర్పాటు కితి అమ్మెజ్, దన్ని కొడొరిజ్ రాసిన. నాను మిజి నిజమ్నె ఎత్తు కిజిన. నాను ఒరెనె ఆవండ, దేవుణు తోరిస్తి నిజమాతి సజతిజ్ నెస్తికార్ విజెరెబా మిజి ఎత్తు కిజినార్. ఎందనిజ్ ఇహిజ, దేవుణు తోరిస్తి నిజమాతికెజ్ మజి తెలిజి మంజినె. అయాకెజ్ మాటు ఎలాకాలం తెలిజి మంజినె. ³ దేవుణు తోరిస్తి నిజమాతికెజ్ మాటు నమ్మిజినాట్. వాండ్రు మజి ప్రీమిస్నాన్. అందెజె బుబ్బు ఆతి దేవుణుని మరిసి ఆతి యేసు క్రీస్తు, దయా దర్మమ్దాన్, మా ముస్సు కనికారం తోరిసి మాటు నిపాతిదాన్ మండ్రెజ్ సాయం కిపిర్.

ప్రీమదాన్ నడినివందిజ్ వెప్పినిక.

4 మీ కొడొర్ లొఇ సెగొండార్, దేవుణు తోరిస్తి నిజమాతి సజతిజ వజ నడిజినార్ ఇజి నాను నెస్తి. అందెజె నాను నండొ సర్ద ఆజిన. బుబ్బు మజి ఆడ్ర సిత్తివజనె వారు నడిజినార్. ⁵ అహిజ ఓ అమ్మ, నాను కొత్త ఆడ్ర మిజి రాన్వ. గాని క్రీస్తుజ్ నమ్మిత్తిబాణిజ్ అసి, మాటు నెస్తి మన్ని ఆడ్రనె రాసిన. మాటు ఒరెన్ వన్నివెట ఒరెన్ ప్రీమిస్టెజ్ ఇని ఆడ్రనె వెప్పిన. ⁶ మాటు వన్ని ఆడ్రెజి లొజిజి, అయావజ నడిజిజినె దేవుణుదిజ్ ప్రీమిస్నాట్. మీరు క్రీస్తుజ్ నమ్మిత్తి బాణిజ్ అసి వెహాలెకెండ, మాటు ఒరెన్ వన్ని వెట ఒరెన్ ప్రీమిసి అయాలెకెండ నడిదెజ్ ఇజినె వన్ని ఆడ్ర.

మొసెం కినివరివందిజ్ జాగర్త మండ్రు.

7 యేసుక్రీస్తు, యాయపాటలొఇహాన్ వాతికాన్ ఇజి ఒప్పుకొడొఇ నండొండార్ మొసెం కినికార్ లోకమ్దు సొత్త మనార్. ననికాండ్రె మొసెం కినికాన్, క్రీస్తుజ్ ఎద్రిస్తికాన్. ⁸ అపొస్తరు ఆతి మాపు, మీ వెట మీ నడిమి కితి పణిజి పలితం, పాడు ఆవండ మంజిని వందిజ్, మొసెం కినివరి ముస్సు జాగర్త మండ్రు. మరి, దేవుణు వెట ఎలాకాలం బత్తిని బత్తు దొహ్కీవందిజ్, మొసెం కినివరి ముస్సు జాగర్త మండ్రు. ⁹ ఎయెన్బా, క్రీస్తు నెస్పిస్తి మాట నమ్మిజి మన్వండ, వన్ని సాంత మాటెజ్, క్రీస్తు నెస్పిస్తి మాటవెట కలప్తిజ, వాండ్రు దేవుణుదిజ్ సేందిఇకాన్. క్రీస్తు నెస్పిస్తి మాట నమ్మిజి మంజినికాన్ బుబ్బెజ్ని మరిసిజ్ సేందితికాన్. ¹⁰ ఎయెన్బా క్రీస్తు నెస్పిస్తి మాట వెహవండ, మీ డగ్గు వాతిజ, మీరు వన్నిజ్ ఇండ్రొ కూకూట్. వన్నిజ్ డగ్గు కిమాట్. ¹¹ ఎందనిజ్ ఇహిజ, వన్నిజ్ డగ్గు కితికాన్ ఎయెన్బా వన్ని సెఇవణిజవెట కూడిత మనాన్. ¹² నండొ సజతిజ్ మిజి రాస్సెజ్ మనాద్. గాని ఉత్తమ్దాన్ వెహెజ్ నజి మన్ను సిల్లెద్. మా సర్ద పూర్తి ఆదెజ్ మీ డగ్గు వాజి, మిజి సుడెజి వర్దిదెజ్ నాను ఆస ఆజిన. ¹³ దేవుణు ఏర్పాటు కితి నీ తజి కొడొర్, మిజి వెన్బాతి లెకెండ వెప్పినార్.

మార్కు

నెల్వ కిబిసినిక

యేసు క్రీస్తు అపొస్తలుడు ఆతి యోహాను రాస్తీ ఉత్తమ్నె యాక. వన్ని కూలాయెనాతి గాయుజ్ రాసినాన్. యా గాయు ఇనికాన్, యోహాను అతికారం అడిగి మన్ని దేవుణు సజం ఉండ్రీ సుడేజి నడిపిస్తాన్. బూలాజి బూలాజి సువార్త వెప్పి వాజిని వరిజ్ వాండ్రు డగ్రు కిజి నెగ్రెండ మర్జి ఫాక్సిని దన్ని వందిజ్ యోహాను వన్నిజ్ వందనమ్కు వెప్పినాన్. మరి, దియెత్తెపె ఇనికాన్ బూలాజి బూలాజి సువార్త కిని వరిజ్ డగ్రు కివండ మర్జి ఫాక్సాన్. వాండ్రు యోహాను అతికారం అడిగి మండ్రెజ్ కెవ ఇజినాన్. వన్నిజ్ డటిసి వెప్పిదన్ని వందిజ్బా యా ఉత్తమ్దు రాసినాన్.

1 పెదెలి ఆతి నాను నిజం ఎత్తు కిజిని నా సాంత కూలాయెన్ ఆతి గాయుజ్ రాసిన. 2 ఓ, నాను ప్రేమిసిని కూలాయెన్, దేవుణు వెట నిజి మన్ని సమందం పిరిసిని వజ, నీను విజా వన్నా లోఇ పిరిదెజ్ ఇజి నాను పార్తనం కిజిన. నీను నోబు నోప్పి సిల్లెండ నెగెండ నెగెండ మండ్రెజ్ ఇజిబా నాను పార్తనం కిజిన. 3 సెగొండార్ నమ్మితికార్ నా డగ్రు వాతార్. వారు, దేవుణు తోరిస్తీ నిజమాతి సజతిజ్ నీను లోజిజిని ఇజి, అయావజ నీను నెగ్రెండ నడిజిని ఇజి వెహ్తార్. అయాలెకెండ వెహ్తారె సజి నండొ సర్ద కిబిస్తార్. 4 నా కొడొఃర్ దేవుణు తోరిస్తీ నిజమాతి సజతిజ్ లోజిజినార్. వారు అయావజ నడిజినార్ ఇజి వెంజినికాదె సజి నండొ సర్ద. దన్నిజ్ మిస్తీ సర్ద సిల్లెద్. 5 ఓ, నాను ప్రేమిసిని కూలాయెన్, బూలాజి బూలాజి సువార్త వెప్పి వాజిని వరిజ్ నీను డగ్రు కిజిని. వారు నిజి తెలిఇకార్ ఆతిజ్బా నీను వరి వందిజ్ కిజిని ఇనికబా నమ్మకమ్దానె కిజిని. 6-7 వారు నీ ప్రేమ వందిజ్ ఇబ్బె దేవుణు సజం ఎద్రు సాసి వెహ్తార్. నీను, దేవుణుదిజ్ ఇష్టం ఆతి వజ వరి వయనమ్దు అవ్సరం ఆతికెజ్ నీజి ఫాక్అ. ఎందనిజ్ ఇహిజ, వారు క్రీస్తుజ్ నమ్మిఇ వరిబాణిజ్ ఇనికబా లోన్వండ, క్రీస్తుజ్ వెహ్తాజ్ సాత్తార్. 8 అందెజె వారు వెప్పివలె, మాటు వరివెట జత కూడేజి, దేవుణు వందిజ్ నిజమాతికెజ్ నెన్పిస్సివందిజ్, నన్నివరిజ్ మాటు డగ్రు కిదెజ్వలె.

దియెత్తెపెని దెమెత్రియు.

9 నాను దేవుణు సజమ్దిజ్ ఉండ్రీ సజతి రాస్త. గాని దియెత్తెపె నా అతికారమ్దిజ్ లోజివన్. ఎందనిజ్ ఇహిజ, వాండ్రు దేవుణు సజమ్దు పెరికాన్ ఆదెజ్ కోరిజినాన్. 10 వాండ్రు మా ముస్సు సెఇ మాటెజ్ వర్గిజినాన్. యాకాదె ఆవండ బూలాజి బూలాజి దేవుణు మాట వెప్పి వరిజ్ డగ్రు కివన్. వరిజ్ డగ్రు కిదెజ్ మన్ను మన్ని వరిజ్ అడ్డు కిజి దేవుణు సజమ్దాన్ వరిజ్ వెల్లి ఫాక్సినాన్. అందెజె నాను వాతిజ, వాండ్రు కిజిని సెఇ వణిజ దేవుణు సజం ఎద్రు వెహ్తా. 11 ఓ, నాను ప్రేమిసిని కూలాయెన్, సెఇ వణిజ్ కిజిని వరిజ్ సుడేజి నడివండ, నెగ్గి వణిజ్ కిజిని వరిజ్ సుడేజి నడిజి. నెగ్గి వణిజ్ కినికాన్ ఎయెన్బా దేవుణుదిజ్ సెందితికాన్. సెఇ వణిజ్ కినికాన్ ఎయెన్బా దేవుణుదిజ్ నెన్వన్. 12 దెమెత్రియు వందిజ్ లోకుర్ విజెరె నెగ్గికెజ్ ఫాగ్డిజినార్. దేవుణు తోరిస్తీ నిజమాతి సజతిజ్ లోజిజి వాండ్రు నడిజినాన్. అయాక వాండ్రు నెగ్గి లోకు ఇజి రుజువ్ కిజినాద్. మాపుబా వన్ని వందిజ్ నెగ్గికెజ్ వెప్పినాప్. మా సాసి నిజమాతికెజ్ ఇజి నీను నెస్సి. 13 నండొ సజతిజ్ నిజి రాస్తెజ్ మనాద్. గాని ఉత్తమ్దాన్ వెహ్తాజ్ సజి మన్ను సిల్లెద్. 14 నిజి బేగి సుడేదెజ్ ఆనాద్ ఇజి నాను కోరిజిన. అయావలె మాటు కూడేజి వర్గినాట్. 15 నిజి సమాదనం రపిద్. ఇబ్బెణి దేవుణు సజమ్దికార్ నిజి వెన్బాతి లెకెండ వెప్పినార్. అబ్బె మన్ని వరిజ్ విజెరిజ్ వెన్బాతి లెకెండ వెహ్తా.

మార్కు

నెల్ల కిబిసినిక

మా ప్రబు ఆతి యేసుక్రీస్తుజ్ తంబెరిజ్ ఇజి వెహె ఆతి వరి లొఇ మన్ని యూద ఇనికాన్ యా ఉత్రం రాస్తాన్. వాండ్రు యాకోబుజ్ బా తంబెర్ని. క్రీస్తు సకం 68-80 నడిమి కాలమ్దు యా ఉత్రం రాస్త మనాద్దు. క్రీస్తుజ్ నమ్మిత్తివరి సజమ్కలొఇ నిజతిమాతి బోద నెక్కిపాక్కి తప్పుజ్ నెస్సిసిని వరి వందిజ్ రాస్తాన్. వరి బోదవందిజ్ వరి బత్తువందిజ్ డటిసి రాస్తాన్. నమ్మిత్తి వరిజ్ దేవుణు సిత్తి రక్కుణ వందిజ్, నిజం వందిజ్ కాల్లాడెడెజ్ ఇజి రాస్త మనాన్.

- 1 యేసు క్రీస్తుజ్ పణి కినికానాతి యూద (వాండ్రు యాకోబుజ్ తంబెరి) రాసిని ఉత్రం. దేవుణు కూక్తి వరిజ్ నాను రాసిని. బుబాతి దేవుణు నండ్ ప్రిమిసి యేసు క్రీస్తు మర్జి వానిదాక కావ్ కిజి ఇడ్డిని మిజెనె రాసిని ² మిజి కనికారం, నిపాతి, దేవుణు - బాణిజ్ వాని ప్రేమ ఒదె నిండ్రిజి మనిదె.

దేవుణు వందిజ్ మన్ను సిత్తి వరిజ్ వాని సిక్కు.

³ నాను నండ్ ప్రిమిసినికి దెరా, మజి విజెరిజ్ దోహక్తి రక్కుణ వందిజ్ మిజి రాస్తెజ్ ఇజి నండ్ ఆస ఆత మహ. గాని దేవుణుదిజ్ కేట ఆతి వరిజ్ ఉండ్రె సుటునె ఒపజెప్తి నిజతిమాతి నమకం కాపాడిజి ఇడెదెజ్ మీరు కాల్లాడెజి మండ్రెజ్ వలె ఇజి మిజి బతి మాల్లి రాస్తెజ్ ఏలు ఒడెబిజిన. ⁴ సెగొండార్ లోకుర్ మిజి తెలివండ మీలొఇ డుఃగిత మనార్. దేవుణుబాణిజ్ వరిజ్ వాని తీర్పు వందిజ్ పూర్బకాలమ్దు దేవుణు - మాటదు రాస్త మనాద్. వారు దేవుణు - వందిజ్ బక్తిసిల్లి లోకుర్. వారు ఒడెల్వందిజ్ మని, వరి సెఇ ఆసెజ వజ కిజి సర్ద ఆనివందిజ్ దేవుణుబాణిజ్ వాతి, వన్ని దయదర్మమిదిజ్ మారిస్తార్. అహు కితిజ్ మాటు సేవకిని ఒరెండ్రె విజమాని ఆతి మా ప్రబు ఆతి యేసు క్రీస్తుజ్ నెక్కి పాక్కార్. ⁵ నాను వెహెని యా సజతిజ్ విజా మీరు ముజాలె నెస్తి మన్నిదెర్ గాని నాను మిజి మరి ఎత్తు కిబిస్టెజ్ ఆస ఆజిన. అక్క ఇనిక ఇహిజ పుర్బం అయ్గువ్వు దేసమ్దాన్ ఇనాయేలు లోకురిజ్ ఉండ్రె సుటునె గెల్పిస్తాన్. గాని వెనుక వరి లొఇ నమ్మిఎండాతి వరిజ్ దేవుణు నాసనం కిత్తాన్. ⁶ దేవుణు సిత్తి అతికారమ్దు మండ్రెజ్ ఇష్టం ఆవండ, వరిజ్ మహి అతికారం డి:స్సినిత్తి దేవుణు దూతార్ వందిజ్ ఎత్తు కిదు. తీర్పు సీజి సిక్కు సీని పెరిదిసమ్ దాక, ఎల్లకాలం మంజిని గొలు గొలుస్కాణిజ్ తొప్పి - స్తాండ్రె సీకటి మన్ని బాడ్డిదు దేవుణు వరిజ్ ఇట్ట మనాన్. ⁷ అయలెకండెనె సాదోమ గొమ్మెర్ పట్టుమ్క లోకాజ్, వనక సుటులం మన్ని నాహ్కాణి లోకాజ్ ఇనిక జర్గితాద్ ఇజి ఎత్తు కిదు. వారు దేవుణు దూతార్ కితిలెకండెనె, ఒడెల్వందిజ్ సెఇ ఆసెజ్ వజ కిజి సర్ద ఆని కిని పణిజ్ కిత్తార్. ఆఇ బోదెకవెట ఉండ్రె ఆవద్, మొగవరివెట మొగవారు కూడెజి పాపం కితార్ ఎలాకాలం నంబిఇ సిసుదాన్ సురె ఆతార్. నిన్నివరిజ్ ఇని సిక్కు వానాద్ ఇని దన్నిజ్ అక్క విజెరిజ్ ఉండ్రె గుర్తులెకండె మనాద్. ⁸ అయలెకండెనె వీరు కలెజ్ గాని ఒడెల్వంది సెఇ ఆసెజ్ వజ కిజి సర్ద ఆని పణిజ్ కిజినార్. మరి, ఏలుబడి: కినివరిజ్ లొజివర్. వారు దేవుణు దూతారిజ్ దూసిస్తార్. ⁹ అహిజ దేవుణు దూతార్ మున్ను, పెరి దూత ఆతి మికావలబా, మోసె పీనుగు వందిజ్, నయ్తాను మికాయెలుజ్ ఒదిస్సివలె ఇనిక కిత్తాన్ ఇహిజ, వన్నిజ్ దూసిసిని మాటెజాణి నేరం మొవ్పన్. గాని "ప్రబునె నిజి గదిసిన్", ఇజి వెహెన్. ¹⁰ గాని వీరు ఇహిజ వరిజ్ అర్దం ఆఇవనకవందిజ్ దూసిసిన్. బుద్దిసిల్లి జంతుజ్ లెకండె, మున్నుదు బాగ ఒడి:బిదెజ్ అబ్వర్. జంతుజలెకండె ఒడెల్వంది ఆసెజ్ వజ కిజి సర్ద ఆదెజ్ సుడె:జినార్. వరి సెఇ పణిజాణి వార్ పాడా:జి సాన్నినార్. ¹¹ అబయ! వరిజ్ కష్టమ్కు తవ్క. ఎందనిజ్ ఇహిజ, వారు సెఇ పణి కితి కయిను లెకండెబా మనార్. † వారు బిలాము ఇని ప్రవక్త లెకండెబా ఇనాయం దొప్పిద్ ఇజి, వరి బత్తు తప్పుదిజ్ పూర్తి ఒపజెప్తి మనార్. †† వారు కోర్ ఇనివన్ని - లెకండెబా మనార్. మోసె వెహెదన్నిజ్ మర్జి వెహెండ్రె డలుం ఎద్దిస్తాన్ ‡. వీరుబా వన్నిలెకండె నాసనం ఆస సానార్. ¹² మీరు కిజిని ప్రేమవిందుజ్ లొఇ వారు తెల్లని పాతాదు మన్ని మస లెకండె సిగు తపిసిన్. ఇని తియెల్ సిల్లెండ పాటపంజా ఉణిజి వరిజ్ వార్ పాస కిబె ఆజినార్. వారు గాలి డెయ్జి ఒసిని పిరు సిల్లి మొసాప్ ననికార్. వారు కాయెజ్ అస్సి కాలమ్దు కాయెజ్ అసెఇ మరెక్ లెకండె. అక్కాదె ఆవద్. వారు వలెజాణిజ్ తెరె ఆతి మరెకలెకండె. పాణం సిల్లికార్, పూర్తి సాతికార్ వారు. ¹³ వారు నమ్దరమ్ది పెరి ఉల్కెజ్ లెకండె మనార్. వరి సిగుపణిజ్ ఉల్కెజ్ డెయ్జి తసిని పాజు లెకండె మన్నె. మరి సరి తప్పి బూలని సుక్కెజ్ †† లెకండె మనార్, వారు. అందెజె దేవుణు వరివందిజ్ ఎలాకాలం మండ్రెజ్ గొప్ప సీకటి మన్ని బాడ్డి †† తయార్ కిజి ఇడ్డుమనాన్. ¹⁴ ఆదముదాన్ మొదొల్లి ఏడవ తరమ్దికాన్ ఆతి హానోకు పూర్బకాలమ్దు దేవుణుబాణిజ్ వాతి మాటెజ్ వెహెన్. విరివందిజ్ వెహె అయ మాటెజ్ వాని కాలమ్దు జర్గిని వందిజె. ఇనిక ఇహిజ "ఇదిలో ప్రబు వన్ని వెయు వెయిజ్ దూతార్ వెట వాజినాన్. ¹⁵ విజెరిజ్ తీర్పు కిదెజ్ ప్రబు వాజినాన్. దేవుణు వందిజ్ బక్తి సిల్లి వరిజ్ తీర్పు సీజి సిక్కు సీదెజ్ వాండ్రు వాజినాన్. ఎందనిజ్ ఇహిజ దేవుణు వందిజ్ బక్తి సిల్లికార్, దేవుణుబాణిజ్ మన్ను దూరం ఇడ్డి సెఇ పణిజ్ కిత్తార్. దేవుణు వందిజ్ బక్తి సిల్లికార్ తియెల్ సిల్లెండ దేవుణు ఎద్దు వన్నిజ్ వడి:ఇ కటిసమతి మాటెజ్ వర్గితార్". ¹⁶ వారు దేవుణు ఎద్దు సణిజిజినార్. ఆఇవరి మున్ను నింద మోప్పినికార్. వారు వరి ఒడెల్వంది సెఇ ఆసెజ్ వజ కిజి సర్ద ఆదెజ్ ఇజిని సుడె:జినార్. వారు వరి వందిజెనె పణిదిజ్ రెఇ బడాయ్ మాటెజ్ వర్గిజినార్. ఆఇ వరిబాణిజ్ ఇనికబా దొప్పిద్ ఇజి వరిజ్ పాగ్డి:జినార్.

† కయిను వందిజ్ నద్విదు, ఆదికాండం 4:1-16 †† బిలాము వందిజ్ నద్విదు, సంకియా పుస్తకం 22 - 24. అద్యాయమ్క లొఇ మసన్ ‡ కోర్ వందిజ్ నద్విదు, సంకియా పుస్తకం 16:1-35 †† యా సుక్కెజ్ బూమి నన్నికె గాని ఎసిజ్ ఎసిజ్ సాని సరి తప్పి సాని †† ఒదె సీకటి మని బాడ్డి. యా బాడ్డి నరకమ్నె

ఓరిసి మండ్రెజ్ ఇజి వెస్సినాన్.

17 అహిజ నాను నండొ ప్రేమిసినికిదెరా, మా ప్రబు ఆతి యేసు క్రీస్తుజ్ అపాస్తురు ఆతికార్ మిజి ముజాల వెహ్తామని సజతిజ్ మీరు ఎత్తు కిదు. 18 వారు ఇనిక వెహ్తార్ ఇహిజ, కడెవెరి రోస్కాణ్ వెక్తిసినికార్ వానార్. వారు దేవుణు వందిజ్ బక్తి సిల్లెండ, వరి ఒడొల్లి సెఇ ఆసెజ్ వజ కిజి సర్ద అజినె మంజినార్. 19 లోకాజ్ కేటెజ్ కేటెజ్ కిబిన్నికార్ వీరె. పావం ఏలుబడిః కిని మన్ను మన్నికార్, దేవుణు ఆత్మ సిల్లికార్ వీరు. 20 గాని మీరు, ఇహిజ నాను నండొ ప్రేమిసినికిదెరా, దేవుణుబాణిజ్ మిజి దోహ్కొక్తి నమకమ్దు పిరిజి వాదెజ్ ఒరెన్ మరి ఒరెన్ వన్నిజ్ తోడుః కిదెజ్. దేవుణు ఆత్మ నడిఃపిసిని వజ పార్దనం కిజి మండ్రు. 21 దేవుణు మీ మున్ను తోరిస్తి మన్ని ప్రేమదు మండ్రు. ప్రబు ఆతి యేసు క్రీస్తు మీ మున్ను కనికారం మాజి, దేవుణు వెట ఎల్లకాలం బత్రిని బత్తు సీదెజ్ ఇజి ఎద్రు సుడఃజి మండ్రు. 22 దేవుణు మున్ను మన్ని నమకం వందిజ్ అనుమానం మని వరి మున్ను కనికారం తోరిస్తు. 23 నమకమ్దాన్ తప్పిసాహి సెగొండారిజ్, సిసు నడిఃమిహాన్ వెల్లి లాగితిలెకెండ రక్తిస్తు. తప్పి సాహి మరి సెగొండారిజ్ కనికారం తోరిస్తు. గాని తియెల్దాన్ మండ్రు. వరి పణిజ్ మజి పడిఃవద్. వారు కిని సెఇ పణిజాజ్ మాటు సెఎన్ ఆదెజ్ ఆవద్. 24 మీరు పావమ్దు తొరో ఒడిఃజి అర్వండ మిజి కాప్ కిదెజ్, దేవుణు గొప్ప పెరి జాయ్ ఎద్రు, గొప్ప సర్దదాన్, ఇని తప్పుబా సిల్లెండ మిజి నిల్పెజ్, మజి రక్తిన్నికాన్ ఆతి ఒరెండ్రె దేవుణు అట్నాన్. 25 మజి రక్తిన్నికాన్ ఆతి దేవుణు, ఒరెండ్రె దేవుణు. మా ప్రబు ఆతి యేసు క్రీస్తు - వలెహానె వన్నిజ్ పాగ్డిఃనాట్. ఎండనిజ్ ఇహిజ వాండ్రె జాయ్దాన్ నిండ్రెతి సోకు మన్నికాన్, వాండ్రె గొప్ప పెరికాన్, వాండ్రె గొప్ప సత్తు మన్నికాన్, వాండ్రె విజాదన్ని - మున్ను యా అతికారం మన్నికాన్. వాండ్రు విజా వనకాజ్ ముజాల యావజ మహాన్, వాండ్రు ఏలు యావజ మనాన్, వాండ్రు వాని కాలమ్దు యావజ మంజినాన్. ఆమెన్.

మార్కు

నెల్య కిబిసినిక

ఇక్క బయ్బిల్దు మన్ని కడెవెరి పుస్తకం. తెలుగు బయ్బిలుదు యా పుస్తకం, ప్రకటన ఇజి మనాద్. ప్రకటన ఇని మాటదిజ్ అర్థం డాజితిమన్నికెజ్ వెలి తోరిసినిక, టుకుర్ ఇడ్డిమన్నిక టుకుర్ లాగ్లి తోరిసినిక ఇజి అర్థం మనాద్. ఇక్రెజ్ ఎయెర్బా ముజాల నెస్తిమన్ని మాటెజ్ ఆఉ. యేసుప్రబు వందిజ్ని దేవుణుమాటదిజ్ సాస్యం వెహ్ని వందిజ్, యేసుప్రబు సిసర్లోఇ ఒరెన్ ఆతి యోహాను ఇనివన్నిజ్ రోమప్రబుత్వం ఆతికారిబు, నారు డిబిన్తి ఫాక్టార్. ఈజియన్ సమ్దరం నడిమిమన్ని వత్సోన్ ఇని లోకు సిల్లి ఇజిరి దేసమ్దు ఫాక్టార్ (ప్రకటన 1:9).

వాండ్రు అయ ద్విపుదు మహివలె, దేవుణు వన్ని దూతవెలె యోహానుజ్ తోరిస్తికెజ్ వాండ్రు యా పుస్తకమ్దు రాస్త మనాన్. యేసు క్రీస్తు సిలువాదు సాజి, మర్జి నిజిత్తి వెనుక, ఇంజాముంజా 60 వంటెజ్ డాట్టివెనుక యా పుస్తకం రసి ఆత మనాద్ ఇజి నమ్మిజినార్.

యా పుస్తకం, ఆసియాదు మన్ని ఏడు సజమ్కాజ్ రాస్తి ఉండ్రి ఉత్తమ్లెకెండ్ మనాద్ (ప్రకటన 1:10-11). వాని కలమ్దు ఇనికెజ్ జగ్గినెలె ఇని వందిజ్ యా పుస్తకమ్దు రాస్త మనాద్. యేసుప్రబు మర్జి వానివందిజ్, మరి యా లోకమ్దు జగ్గిదెజ్ మన్నికెజ్వందిజ్, మరి యా లోకమ్ది ఆక్కర్వందిజ్ యా పుస్తకమ్దు రాస్త మనాద్. డౌమిసియన్ ఇనికాన్ రోమ రాజా మహివలె యా పుస్తకం రాసి ఆత మనాద్ ఇజి నండ్ండార్ నమ్మిజినార్.

మొదోల్

1 యాక డాజితిమహి సజతిజ్ దేవుణు, యేసుక్రీస్తుజ్ సెందితివరిజ్ తోరిస్తికె ఇజి వన్నిజ్ తోరిస్తికెజ్. వెటనె ఇనికెజ్ జగ్గినెలె ఇజి యేసు క్రీస్తు, వన్ని దూతెజ్ వెహ్ని ఫాక్టార్, అయ సజతిజ్ వన్ని వణిమణిసి ఆతి యోహానుజ్ తోరిస్తికె. 2 దేవుణు మాటెజ్ వందిజ్ని, యేసు క్రీస్తు వన్నిజ్ తోరిస్తి విజా వనకాజ్ సుడెజి నిజమాతికెజ్ ఇజి యోహాన్ సాస్యం వెహ్నినాన్. 3 దేవుణుబాణిజ్ వాతి యా ప్రవక్త మాటెజ్, డటం సదివీజి మహివరిజ్ వెన్పిసినికాన్ని, సద్వినికెజ్ వెంజి అయాకెజ్ మన్నుదు ఇడ్డి నమ్మిజి మంజినికాన్ దేవుణు సీజిని దీవెనమ్కు మంజినికాన్ ఆనాన్. ఎందానిజ్ ఇహిజ, అయాకెజ్ అయాలెకెండ్ జగ్గిదెజ్ సమయం డగ్రు ఆత మనాద్.

దేవుణుదిజ్ పాగ్డిజి వెహ్నిని మాటెజ్.

4 ఆసియాదు మన్ని ఏడు, దేవుణు సజమ్కాజ్ యోహాను రాసినాన్. ముజాల మహికాన్, ఏలు మన్నికాన్, వాని కాలమ్దు మంజినికాన్ ఆతికాన్, మరి వాండ్రు బస్తిమన్ని వన్ని సింహాసనం ఎర్దుమన్ని ఏడు ఆత్మెజ్, వన్ని దయదార్దుం మీ ముస్సు మంజి, మీరు నిపాతిదాన్ మండ్రెజ్ సాయం కిపిన్.

5-6 నమ్మకమాతికాన్ ఆతి సాసి, సాతి వరిబాణిజ్ తోలిత నిజిత్తికాన్, బూమి ముస్సు, ఏలుబడి: కిజిని విజా రాజారిజ్ ముస్సు, రాజా ఆతి యేసుక్రీస్తుబా వన్ని దయదార్దుమాదాన్ మీరు నిపాతిదాన్ మండ్రెజ్ సాయం కిపిన్. మజి ప్రీమిస్తాండ్రె వన్ని నలదాన్, మా పాపమ్కాజ్ మజి విడుదల కిజి, వన్ని బుబ్బాతి దేవుణుదిజ్ ఉండ్రి రాజ్యం లెకెండ్ని, వన్నిజ్ వణి కిని పుజేరిజ్ లెకెండ్ కిత్తిమన్ని యేసుక్రీస్తుజ్ గొప్ప గవర్మన్ అతికారం అంతు సిల్లెండ్ ఎలాకాలం మసిద్. ఆమెన్.

7 ఇదిలో, వాండ్రు మొసాపుదాన్ వాజినాన్! విజేరి కణుకెజ్ వన్నిజ్ సూణెలె. వన్నిజ్ బల్లెమాదాన్ గుత్తికార్బా సూణార్లె. బూమి ముస్సు మనికార్ విజేరి, వన్నిజ్ సుడెజి గుండె కొత్తె ఆజి అడెబనార్లె. అయాలెకెండ్నె ఆనాద్లె. ఆమెన్.

8 "అల్పాని ఒమెగ † నానె", ఇహిజ మొదోల్ని కొస నానె. "ముజాల మహికాన్, ఏలు మన్నికాన్, వాని కాలమ్దు మంజినికాన్ ఆతి విజా దన్నిజ్ సత్తు మన్నికాన్" ఆతిమన్ని ప్రబు ఆతి దేవుణు వెహ్నినాన్.

లోకుమరిసి లెకెండ్ ఒరెన్

9 యేసువందిజ్ వాజిని స్రమెజ లోఇ, వాండ్రు కిని ఏలుబడి:దుని, వన్ని వందిజ్ కష్టమ్కు ఓరిస్తిజ్, మీవెట కూడెజి మన్నికాన్ ఆతి, మీ తంబెరి ఆతి యోహాను ఇని నాను, దేవుణు మాట వందిజ్ని యేసువందిజ్ సాస్యం వెహ్ని వందిజ్, సమ్దరం నడిమి మన్ని వత్మోసు ఇని ద్విపుదు †† ఒరెన్ మహా. 10-11 వారమ్దిజ్ మొదోహి రోజా ఆతి ప్రబు దినమ్దు, నాను దేవుణు ఆత్మదాన్ నిండ్రితి మహివలె, జోడు బాంగ ఊక్కిలెకెండ్ ఉండ్రి కంటం నా వెనుకహాన్ వెహ. నీను సుడెజినికెజ్ విజా ఉండ్రి పుస్తకమ్దు రాసి, ఎవెసు, స్మూర్న, పెర్గాము, తుయతయేర, సర్దిసు, పిలదెల్లియ, లవొదికియ ఇని ఏడు, దేవుణు సజమ్కాజ్ ఫాక్టె ఇజి, అయా కంటం నజి వెహ్నిమన్నిక, నా వెనుకహాన్ నాను వెహ. 12 యాక వెహ్నె, నావెట వర్జిని కంటం ఇనికాదొ ఇజి సుడె:దెజ్, నాను వెనుక మహ్. నాను వెనుక మహ్, బజారమ్దాన్ తయార్ కిత్తి ఏడు దీవ డండిజ్ సుడె:త. 13 అయ దీవ డండిజ్ నడిమి, లోకు మరిసి ఆతి వన్నిజ్ పాలితి ఒరెన్ వన్నిజ్ సుడె:త. వాండ్రు వన్ని పాదమ్ దాక అందితి మన్ని ఉండ్రి నీరి సాక్కు పార్పాజి గుండెదు బజారమ్దాన్ మన్ని కంటువ లోహి ఆత మహాన్. 14 వన్ని బురాని వన్ని

† అల్ప గ్రీకుబాసది మొదోహి అక్సరం. ఒమెగ కడెవెరి అక్సరం †† ద్విపుసురుల సమ్దరం మన్ని ఇజిరి దేసెం

బుర్రది కొప్పు తెల్లని దూతిదిజ్ పాలిసి, గాంధులెకెండ్ తెలాజ్ మహాద్. వన్ని కలుకెజ్, సిను కొనెజ్లెకెండ్ మహా. 15 వన్ని పాదమ్కు కంసు సాల్లుదు కాప్పి, కంజా మెర్నినెకెండ్ మహా. వన్ని కంటం గొప్ప పెరి గడ్డ జాటు లెకెండ్ మహాద్. 16 వాండ్లు వన్ని ఉణెర్ కియుదు ఏడు సుక్కెజ్ అన్న మహాన్. రుండి దరిజ్బా తెవుగు మన్ని కుర్ల లెకెండ్ మన్ని మాటెజ్ వన్ని వెయుదాన్ వెల్లి వాతె. వన్ని మొకొం పూర్తి జాయ్దాన్ మెర్నిని పొద్దుది జాజ్ లెకెండ్ మహాద్. 17 వన్నిజ్ సుడెతానె, నాను సాతివన్నిలెకెండ్ వన్ని పాదమ్కాజ్ అర్త. అయావలె వాండ్లు వన్ని ఉణెర్ కియు మా ముస్సు ఇడెజి ఈహు వెహ్. "తియెల్ ఆమా. నాను మొదొహికాన్. నాను కడెవెరిదికాన్. 18 నాను బత్తిజి మంజినికాన్. నాను సాతిమహికాన్ గాని ఇదిలో ఎలాకాలం బత్తిజిన. మరి సావుదిని సాతికార్ మంజిని అయా లోకమ్ది తాలంకియు నా కీదు మనాద్. 19 అందెజె, ఏలు మన్ని వనకాజ్ వందిజ్, మరి వాని కాలమ్దు జర్గిదెజ్ మనికెజ్, సిను సుడెతి మనికెజ్ సిను రాన్ల. 20 నా ఉణెర్ కియుదు సిను సుడెతి మన్ని ఏడు సుక్కెజ్, ఏడు దేవుణు సజమ్క దూతార్. మరి బజారమ్దాన్ తయార్ కితి మన్ని ఏడు దీవ డండిజ్, ఏడు దేవుణు సజమ్కు.

ఎవెసు పట్నమ్దు మన్ని దేవుణు సజమ్దిజ్ రాసిని ఉత్తం

2 "ఎవెసు పట్నమ్దు మన్ని దేవుణు సజమ్ది దూతెజ్ రాన్ల, వన్ని ఉణెర్ కియుదు ఏడు సుక్కెజ్ అసి, ఏడు దీవడండిజ నడిమి బూలాజినికాన్ వెహ్నిని మాటెజ్ ఇక్కెజ్. 2 సిను కిజిని పణిజ్ని, సిను కష్టబాడెతికెజ్ నాను నెసి. సిను ఎస్సానొ హిమ్మెజ్ ఓరిస్తిమన్ని ఇజిబా నాను నెసి. సెఇకెజ్ కినివరిజ్ సిను ఓరిసి మండ్రెజ్ అట్ఇ ఇజి నాను నెసి. అపాస్తరు ఇజి వెహ ఆజి అపాస్తరు ఆజి వరిజ్ సిను పరిస కిజి, వారు అబద్దం వెహికార్, ఇజి సిను నెస్తి ఇజి నాను నెసి. 3 సిను నా పేరు వందిజ్ హిమ్మెజ్ డిస్వేండ్ ఓరిస్తి మన్ని మరి కష్టమ్కు బరిస్తిమన్ని గాని సిను దన్ని వందిజ్ ఎసెజ్బా వందితిఇ ఇజిబా నాను నెసి. 4 అహిజ్బా, మొదొహాన్ నా వందిజ్ నిజి మహి మొదొహి ప్రేమ, సిను డిస్తిసిత్తి ఇజి ఉండ్తి తప్పు సి ముస్సు సుడెత. 5 నా ముస్సు మన్ని ప్రేమ డిస్తిసిజి, సిను ఎస్సా వెనుక సాన్ని మహి ఇజి సిను ఒడిబిల. దన్ని వందిజ్ సి మన్ను మరిసి, తప్పుజ్ ఒప్పుకొడెజి డిస్తిసిజి, ముజాల కిజి మహికెజ్ కిజి మన్ల. సిను మన్ను మారిసి, పావమ్కు ఒప్పుకొడెజి డిసి - సివండ మహిజ, నాను సిడగ్రు వాజి, సి దీవడండిదిజ్ దన్ని బాడ్డిదాన్ లాగ్గు విసీర్లు. 6 గాని, సివందిజ్ ఉండ్తి నెగ్గి సజతి మనాద్. నాను ఇస్టం కిఇకార్ ఆతి నికొల జటుదివరి పణిజ్ సినుబా ఇస్టం కిఇతి. 7 దేవుణు ఆత్మ దేవుణు సజమ్కాజ్ వెహికెజ్ ఇనికెజ్ ఇజి గిబ్బెజ్ ఒడెజి వెంజి అయావజ నడిజి మండ్రు. సెఇకెజ ముస్సు గెలిస్తి వన్నిజ్ వరలోకం ఆతి వరదినుదు మన్ని పాణం సీని మరాతి పట్టు తిండ్రెజ్ అక్కు సీనా.

స్మూర్న పట్నమ్దు మన్ని దేవుణు సజమ్దిజ్ రాసిని ఉత్తం

8 "స్మూర్న పట్నమ్దు మన్ని దేవుణు సజమ్ది దూతెజ్ రాన్ల. మొదొహాన్ కడెవెరిదికాన్ ఆతి, సాతి వెనుక మర్జి నిజితికాన్ వెహ్నిని మాటెజ్ ఇక్కెజ్. 9 సి కష్టమ్కు, సి కరు బత్తు నాను నెసి. గాని దేవుణుదిజ్ సెందితి సజతిజలోఇ సిను అస్తి మన్నికెలెకెండ్నె. మావు యూదురు ఇజి వెహ్నిని దేవుణు లోకుర్ ఆఇకార్ ఆతి, సయ్తానుజ్ సెందితికార్ ఆతి యూదురు, సివందిజ్ వెహ్ దూసణ మాటెజ్ నాను నెసి. 10 సి ముస్సు వాదెజ్ మన్ని కష్టమ్కాజ్ వందిజ్ సిను తియెల్ ఆమా. నిజి వరిస కిదెజ్, సి లోకురిజ్ సెగొండారిజ్ సయ్తాను అస్తిని జెలిదు ఇడిస్సానెలె. వది దినమ్కు సిను హిమ్మెజ్ ఓరిసి మండ్రెజ్ వలె. గాని నా ముస్సు మన్ని నమకమ్వందిజ్ సావు వాతిజ్బా నమకమాతికి ఆజి మన్ల. ఎలాకాలం మంజిని బత్తు ఇని ఇనాయం నాను నిజి సీనాలె. 11 దేవుణు ఆత్మ దేవుణు సజమ్కాజ్ వెహికెజ్ ఇనికెజ్ ఇజి గిబ్బెజ్ ఒడెజి వెంజి, అయావజ నడిసి మండ్రు. సెఇకెజ ముస్సు గెలిస్తి వన్నిజ్ రుండి సావు ఇని దెబ తగ్గివద్.

పెర్గాము పట్నమ్దు మన్ని దేవుణు సజమ్దిజ్ రాసిని ఉత్తం

12 పెర్గాము పట్నమ్దు మన్ని దేవుణు సజమ్ది దూతెజ్ రాన్ల. "రుండి దరిజ్ తెవుగు మన్ని కుర్లలెకెండ్ మన్ని మాటెజ్ మన్నికాన్ వెహ్నినికెజ్ ఇక్కెజ్. 13 సయ్తాను ఏలుబడి కిజిని పట్నమ్దు సిను బత్తిజిని ఇజి నాను నెసి. సయ్తాను ఏలుబడి కిజిని అయ పట్నమ్దు నా ముస్సు నమకం ఇడ్డి నమకమాతి సాసి ఆతి అందిపాయెజ్ సప్తి కాలమ్దుబా నా ముస్సు ఇడ్డి నమకం డిస్తిసివండ, నా పేరు వందిజ్ సిను నిజం నిహిమహి ఇజి నాను నెసి. 14 గాని నజి వడిఇకెజ్ సెగం సజతిజ్ సిబాన్ మన్నె. బొమ్మెజి పూజ సిత్తికెజ్ తింజి, రంకు బూలాజి పావం కిదెజ్ ఇస్సాయేలు లోకురిజ్ రేప్పి మన్నికాన్ ఆతి బాలాకుజ్ అక్కెజ్ నెస్తిని మన్నికానాతి బిలాము † బోద లోజిజి నడిసినికార్ సి లోఇ మనార్. 15 నికొల బోద లోజిజి మన్నికార్బా సి లోఇ మనార్. 16 అందెజె సిను మన్ను మారిసి పావమ్కు ఒప్పుకొడెజి డిస్తిసిజి. సిలిజ నాను బేగి సిడగ్రు వాజి నా వెయుదాన్ వాజిని కుర్ల లెకెండ్ మన్ని మాటెజాణిజ్ వరివెట విదెం కినా. 17 దేవుణు ఆత్మ, దేవుణు సజమ్కాజ్ వెహికెజ్ ఇనికెజ్ ఇజి గిబ్బెజ్ ఒడెజి వెంజి అయావజ నడిజి మండ్రు. సెఇవనకాజ్ ముస్సు గెలిసినివన్నిజ్ నాను పరలోకమ్దు డాజితి మన్ని మన్న ఇని తిండి సెగం ఉండెజ్ సీనా. మరి, దొహ్కీకాండ్రె ఆవండ, మరి ఎయెన్ వన్నిజ్బా నెస్ఇ ఉండ్తి కొత్త పేరు రాస్తి మన్ని ఉండ్తి తెల్లని వణకుబా సీనా.

† ఇస్సాయేలు లోకురి ముస్సు సయెప్ సీదెజ్ ఇజి బిలాము ఇని ఒరెన్ గురు నన్ని ప్రవక్తెజ్ కూక్తి మన్ని మోయాబు దేసెమ్ది రాజా. బుద్ది సిల్లెండ దేవుణుదిజ్ వెత్తెకమాతి పణి కితి వందిజ్ వన్ని వందిజ్ దేవుణు మాటదు రాస్త మనాద్. సంకియా 22-24, యెహోసువ 24:9, నాయాది 11:25. †† ఇస్సాయేలు లోకురి ముస్సు సయెప్ సీదెజ్ ఇజి మోయాబు దేసెమ్ది రాజా బాలాక్ కూక్తి మని ఒరెన్ గురు నన్ని ప్రవక్త. సంకియా 22-24.

తుయతయిర పట్నమ్దు మన్ని దేవుణు సజమ్దిజ్ రాసిని ఉత్తం

18 "తుయతయిర పట్నమ్దు మన్ని దేవుణు సజమ్ది దూతెజ్ రాసొ అ కణుకెజ్ సినుకొనెజ్ లెకెండ్ మన్ని, మెర్నిని కంజాదిజ్ పొలితి పాదమ్కు మన్ని దేవుణు - మరిసి ఆతి వన్ని మాటెజ్ ఇక్కెజ్. 19 నీను కిజిని పణిజ్ ఎలాగ మర్తికెజ్, నీ ప్రేమి ఎలాగ మర్తిక, నీ నమకం ఎలాగ మర్తిక ఇజి నాను నెసిన. నీను మహివరి వందిజ్ కిజిని పణిజ్ నీను హిమ్మెజ్ డిన్ ఏండ ఓరిసి మంజినిక విజా నాను నెసిన. నిజమె ముజాల కిజి మహి దన్నిజ్ ఒద్దె నెగెండ్ నీను ఏలు కిజిని.

20 గాని నజి నపిఇ ఉండ్రి సజతి నీబాన్ మనాద్. దన్నిజ్ అదినె దేవుణు ప్రవక్త ఇజి వెస్సాని యెజెబెలు ఇని బోదెలిదిజ్, నీబాన్ మండ్రెజ్ ఒప్పుకొటి ఇజి ఉండ్రి తప్పు నీ ముస్సు వెహెజ్ మనాద్. అది దన్ని బోదదాన్ రంకు బూలాదెజ్ మరి బొమ్మెజ్ మాడిసి, బొమ్మెజ్ పూజెజ్ సిత్తికెజ్ తిండ్రెజ్ ఆనాద్ ఇజి నా ముస్సు నమకం ఇడ్డిమన్ని, నా పణికిని వరిజ్ మొసెం కిజి తప్పు సరిదు నడిపెసినాద్. 21 అది రంకు బూలానిక డిసిసిజి, దన్ని మస్సు మారిసి పాపమ్కు ఒప్పుకొడిజి డిసిసిదెజ్ నమయం సిత్త, గాని అది ఒవ్ ఏతాద్. 22 ఇదిలో నాను దన్నిజ్ నిజ్ దెజ్ అట్ ఇ పెరి కస్టమ్కాజ్ మంసమ్దు తెర్వాలె. దన్నివెలు కూడిజి రంకు బూలాతికార్, వారు దన్ని వెలు కూడిజి కిత్తిమహి పణిజవందిజ్ ఒడిబిజి, వనకాజ్ ఒప్పుకొడిజి డిసిసిఏండ మహిజ, వరిజ్ నాను నండొ కస్టమ్దు అర్వాలె. 23 దన్ని కొడొరిజ్ నాను నన్న. అయావలె నాను లోకురి మస్సుజ మన్ని ఆలోసనమ్కుని ఆసెజ్ ఇనికెజ్ ఇజి సుడిజి నెసినికాన్ ఇజి విజా దేవుణుసజమ్కు నెసినె. నీ లొ ఇ ఒరెన్ ఒరెన్ వన్నిజ్ వన్నివన్ని పణిదిజ్ తగితి లెకెండ్ నాను నూణా. 24 దన్ని బోదదిజ్ లొజిఇవరిజ్ని మరి సయ్యానులొ ఇ డాజితి మన్ని వనకాజ్ నెస్తిజ్ వరి మస్సు ఇడ్ ఏండ మంజిని వరిజ్, నాను వెస్సానిక ఇనిక ఇహిజ, మీరు మరి ఇనికబా కిడెజ్ ఇజి వెస్సా, మీ ముస్సు మరి ఇని బరు నాను మొవ్ ఏ. 25 గాని నాను వానిదాక మీరు నెస్తిమన్ని వనకాజ్ నెగెండ్ అసి మండ్రు.

26 ఆక్రందాక నజి ఇస్టమాతి వజ కిజి మంజి, సెఇ వనకాజ్ ముస్సు గెలిసినివన్నిజ్, దేసమ్కు లోకురి †ముస్సు, ఏలుబడి కిడెజ్ అతికారం సీనా. 27 నా బుబ్బాతి దేవుణుబాణిజ్ నజి అతికారం దొహ్ క్తిమన్నిలెకెండ్, వన్నిజ్ లోకురి ముస్సు అతికారం సీనా. దేవుణు మాటదు రాస్తిమన్నిలెకెండ్, "వాండ్రు ఇనుము డుడ్డుదాన్ వరిజ్ ఏలుబడి కినాన్. కుంబెరి వన్ని కుండెజ్ లెకెండ్ వరిజ్ పెడెల్ కొత్తాన్" 28 సెఇ వనకాజ్ ముస్సు గెలిస్తి వన్నిజ్, నాను కొడిజామ్దు సాని సుక సీనా. 29 దేవుణు ఆత్మ దేవుణు సజమ్కాజ్ వెస్సానికెజ్ ఇనికెజ్ ఇజి గిబ్బుజ్ ఒడిజి వెంజి అయావజ నడిజి మండ్రు.

సర్దిసు పట్నమ్దు మన్ని దేవుణు సజమ్దిజ్ రాసిని ఉత్తం.

3 "సర్దిసు పట్నమ్ది దేవుణు సజమ్ది దూతెజ్ రాసొ అ. ఏడు సుక్కెజ్ని దేవుణు ఏడు ఆత్మ మన్నికాన్ వెస్సాని మాటెజ్ ఇక్కెజ్. నీను కిజిని పణిజ్ నాను నెసిన. బత్తిజినికాన్ ఇజి నిజి పేరు మనాద్. గాని నీను సాతికినె. 2 నా దేవుణు ఎద్దు నీ పణిజ్ పూర్తి ఆతికెజ్ ఇజి తోర్ ఉతె. అందెజి నీను, నిజ్ తెలి ఆజి, సాదెజ్ డగ్గు ఆతి మన్ని మిగిలిత్తి వనకాజ్ సత్తు కిజిన్ అ. 3 అందెజి నీను ముజాల ఇనిక నెస్తి మన్నిదొ, ఎలాగ వెహి మన్నిదొ ఇజి ఎత్తు కిల. వనకాజ్ లొజిజి పాపమ్కు ఒప్పుకొడిజి డిసిసిజి, మారు మస్సు పాందిల. నీను నిజ్ తెలి ఆజి మన్ ఏండ మహిజ, ఒరెన్ డొజారి వానిలెకెండ్ నాను వానా. ఇనిక ఇహిజ ఎమేణి గడియారు నాను, నీ డగ్గు వానానొ ఇజి నిజి తెలివద్. 4 గాని వరి సాక్కెజ్ మొహ్కొ అండ, సుబరం మన్నికార్ సెగొండార్ సర్దిస్ పట్నమ్దు నీబాన్ మనార్. అందెజి వారు మొహ్కొ సిల్లి తెల్లాని సాక్కెజ్ తొడిగిజి, నావెలు బూలాదెజ్ తగ్గికార్. 5 సెఇ వనకాజ్ గెలిసినికాన్, వరిలెకెండ్ తెల్లాని సాక్కెజ్ తొడిగిజి మంజినాన్. దేవుణు వెలు ఎలాకాలం బత్తినివరి పేరుకు రాసి ఇడిజిని వున్నకమ్దాన్ నాను వన్ని పేరు ఎసెజ్ బా డెయ్ జి పోకే. గాని నా బుబ్బు ఎద్దుని వన్ని దూతార్ ఎద్దు వాండ్రు నజి సెందితికాన్ ఇజి వన్ని పేరు ఒప్పుకొణా. 6 దేవుణు ఆత్మ దేవుణు సజమ్కాజ్ వెస్సానికెజ్ ఇనికెజ్ ఇజి గిబ్బుజ్ ఒడిజి వెంజి అయావజ నడిజి మండ్రు.

పిలదెల్పియ పట్నమ్దు మన్ని దేవుణు సజమ్దిజ్ రాసిని ఉత్తం.

7 "పిలదెల్పియ పట్నమ్దు మన్ని దేవుణు సజమ్ది దూతెజ్ రాసొ అ. పరిసుద్దమాతికాన్ †† నిజామాతికాన్ ఆతి, దావీదు పట్నమ్దిజ్ ఏలుబడి కిడెజ్ అతికారం మన్నివన్నిలెకెండ్ దన్ని తాలమ్ కియు మన్నికాన్ వెస్సాని మాటెజ్ ఇక్కెజ్. వాండ్రు రేతిజ ఎయెన్ బా కెహెజ్ అట్ ఎన్. వాండ్రు కెహెజి ఎయెన్ బా రేదెజ్ అట్ ఎన్. 8 నీను కిజిని పణిజ్ నాను నెసిన. నిజి మన్ని సత్తు కండెక్ ఆతిజ్ బా నీను నా మాటెజ్ లొజిజి నా పేరు నెన్ ఏ ఇజి వెహె ఇతి. ఇదిలో నీ ఎద్దు నాను సేహ్ రేత మస్సు. దన్నిజ్ ఎయెన్ బా కెహెజ్ అట్ ఎన్.

9 యూదురు ఆవండ, మాపు యూదురుబు, మాపు దేవుణు లోకుర్ ఇజి అబద్దం వెస్సాని సయ్యాను సజమ్దివరిజ్, నీ డగ్గు వాజి నీ పాదమ్కాజ్ అర్పి మాడిస్తిలెకెండ్ నాను కినా. నాను నిజి ప్రేమిస్త మస్సు ఇజి అయావలె వారు నెస్సార్ లె. 10 ప్రమెజ్ డిన్ ఏండ ఓరిసివందిజ్ నాను సిత్తి ఆడ్రెజ్ నీను లొజిత్తి మహి. అందెజి బూమి ముస్సు బత్తిని వరిజ్ విజిరిజ్ వాజిని పెరి కస్టమ్కాజ్ కూడితి పరిస కాలమ్దు నాను మిజి కాపాడ్నా.

11 ఇదిలో, నాను బేగినె వాజిన. నీను గెలిస్తివందిజ్ నిజి దొహ్ క్తిని ఇనాయం మరి ఎయెన్ బా ఒండ, నీను నెస్తిమన్ని వనకాజ్ డిన్ ఏండ గటిజ అసి మన్ అ. 12 సెఇ వనకాజ్ ముస్సు గెలిస్తి వన్నిజ్ నా దేవుణు గుడిడు ఉండ్రి తంపం లెకెండ్ కిన. వాండ్రు ఎసెజ్ బా దన్ని బాణిజ్ డిసి సాన్ ఏన్. నా దేవుణు పేరుని, పరలోకమ్దాన్ దేవుణుబాణిజ్ డిగ్గి వాజిని కొత్త యెరూసలేం ఇని నా దేవుణు పట్నం పేరుని, నా కొత్త పేరుబా నాను వన్ని ముస్సు రాస్సా. 13 దేవుణు ఆత్మ దేవుణు సజమ్కాజ్ వెస్సానికెజ్ ఇనికెజ్ ఇజి గిబ్బుజ్ ఒడిజి వెంజి అయావజ నడిజి మండ్రు.

† 2:26 కీర్తన 2:9. †† గొప్ప నెగ్గెకాన్, ఇని తప్పుబా సిలికాన్

లవోదికియ పట్నమ్దు మన్ని దేవుణు సజమ్దిజ్ రాసిని ఉత్తం.

14 "లవోదికియ పట్నమ్దు మన్ని దేవుణు సజమ్ది దూతెజ రాసెల. నమ్మకమాతికాన్ని నిజమాతి సాసి ఆతికాన్, దేవుణు తయార్ కితి విజా వనకాజ్ ముస్సు అతికారం ఆతి ఆమెన్ ఇనికాన్ వెప్పిని మాటెజ్ ఇక్కెజ్. 15 నీ పణిజ్ ఎలాగ మర్రికెజ్ ఇజి నాను నెసిన. నీను సలాజ్ మనికి ఆఇ. వేసాజ్ మన్నికిబా ఆఇ. నీను ఎమేణికబా ఉండ్రీ రకం ఆజి మంజినిక ఇహిజ బాగ మహాద్, ఇజి నాను కోరిజిన్ 16 నీను పణిదిజ్ రెఇకి. నీను సలాజ్ సిల్లెద్. వేసాజ్ బా ఆఇ. నీను గోరువేసాజ్ నన్నికి. అందెజి నా వెయుదాన్ నాను నిజి పూస్సు విసీర్పు. 17 నీను గత్త నన్నికి, దిక్కు గతి సిల్లికి, బీదాదికి, గుడ్డిదికి, డుమ్డ మన్నికి. గాని యాకెజ్ నిజం నెన్ ఏండ, నజి అస్తి మనాద్, నాను డబ్బుజ్ గణస్త మనా, నజి ఇనిక తక్కు సిల్లెద్ ఇజి నీను వెహా ఆజిని. 18 గాని నాను నిజి బుద్ది వెప్పినిక ఇనిక ఇహిజ, నీను ఆస్తి మనికి ఆదెజ్ ఇజి సిసుదు సుర్జి సుబరం ఆతి బజారం నా బాణిజ్ కోల్ల. మరి నీ సిగు డాఃజినిలెకెండ్ పారెపాదెజ్ తెల్లాని సాక్కెజ్ నా బాణిజ్ కోల్ల. నీ కణుకెజ్ టెటాజ్ తోర్దెజ్ కణుకెజి రాస్తిజ్ కాటికబా నా బాణిజ్ కోల్ల.

19 నాను ప్రేమిసిని విజేరిజ్ బుద్ది వెప్పి, సిక్కుదాన్ దిదిజినా. అందెజి నీను మన్నుదు నిజం ఆస ఆజి మన్ల. మరి మారు మన్ను పొందిజి నీ పాపమ్కు ఒప్పుకోడెఃజి డిఃసి సిల. 20 ఇదిలో, నాను సేహ్లా డగ్గు నిల్లి, సేహ్లా రేల ఇజి కొత్తినా. ఎయెన్ బా కంటం వెంజి సేహ్లా రేతిజ, నాను లొఇ సాన్ని వన్నివెలి బోజనం కినా. వాండ్రుబా నావెట బోజనం కినాన్. 21 నాను ఎలాగ సెఇ వనకాజ్ ముస్సు గెలిసి, నా బుబ్బువెట వన్ని సింహాసనమ్దు బస్త మనానో, అయాలెకెండ్నె, సెఇ వనకాజ్ ముస్సు గెలిస్తి వన్నిజ్ నావెట నా సింహాసనమ్దు బస్తెజ్ బా అక్కు సీనా. 22 దేవుణు ఆత్మ దేవుణు సజమ్కాజ్ వెప్పినికెజ్ ఇనికెజ్ ఇజి గిబ్బుజ్ ఒడఃజి వెంజి అయావజ నడిఃజి మండ్రు".

పరలోకమ్దుమన్ని సింహాసనం.

4 యా సజతిజ్ జగ్గితి వెనుక నాను సుడఃతిజ్ ఇదిలో పరలోకమ్దు ఉండ్రీ సేహ్లా రే ఆతి మహిక సుడఃత. జోడుఃబాంక పలక్తినిన్ని జాటులెకెండ్, నావెట ముజాల వగ్గితి మన్ని కంటం మన్నికాన్, "ఇబ్బె ఎక్కి రల. దిన్ని వెనుక ఇనికెజ్ జగ్గినెలె ఇజి నాను నిజి తోరిస్సాలె", ఇజి వెహ్లాన్. 2 వెటనె నాను దేవుణు ఆత్మ వెట నిండ్రిత. నస్తివలె పరలోకమ్దు ఉండ్రీ సింహాసనమ్దు ఒరెన్ బస్తిమన్నిలెకెండ్, నా ఎద్దు తోరె ఆతాద్. 3 అయ సింహాసనమ్దు బస్తి మన్నికాన్ పొద్దులెకెండ్ గొప్ప జాయ్ మన్ని ఎరాని రంగు పణుకుదిజ్ పోలిసి తోరితాన్. సింహాసనమ్దిజ్ సుటులం గొప్ప జాయ్ మన్ని ఆకు రంగుది కొడఃవేలి మహాద్. 4 అయ సింహాసనమ్దిజ్ సుట్టులం ఇరువయ్ నాల్లి సింహాసనమ్కు మహా. అయ ఇరువయ్ నాల్లి సింహాసనమ్కాజ్, తెల్లాని సాక్కెజ్ తోడిఃగిజి, రాజారి టోపిజ్ నన్ని బజారం టోపిజ్ బురాదు తోడిఃగిజి ఇరువయ్ నాల్లెవర్ పెద్దెలుజు బస్త మహార్. 5 అయ సింహాసనమ్దాన్ గొప్ప మెర్సిని జాయ్, దీడఃజినికెజ్, పిడుఃగుజ్ వెల్లి వాజి మహా. అయ సింహాసనం ఎద్దు ఏడు దీవెజ్ జాయ్ సీజి మహా. అక్కెజ్ దేవుణు ఏడు ఆత్మెజ్. 6 అయ సింహాసనం ఎద్దు గటి మన్ని గాజాదిజ్ పోలితి సమ్దరమ్లెకెండ్ మహాద్. అక్కు ఇని రంగు సిల్లి గటి మన్ని అద్దం లెకెండ్ మహాద్. నడిఃమిని, అయ సింహాసనమ్దిజ్ సుటులం, ఒడఃవేల్ ముస్సు, వెనుక ముందాల విజా, కణుకెజాణిజ్ నిండ్రీతి మన్ని పాణం మన్ని నాల్లి జంతుజ్ మహా.

7 పాణం మన్ని, మొదోపా జంతు మొకొం సింహం లెకెండ్ మహాద్. రుండి జంతు మొకొం దూడఃలెకెండ్ మహాద్. మూండ్రీ జంతు లోకు మొకొం నన్ని మొకొం మహికాద్. నాల్లి జంతు ఎగ్గిని డేగలెకెండ్ మహాద్. 8 యా నాల్లి జంతుజు, ఉండ్రీ ఉండ్రీ దన్నిజ్ ఆరెసిజ్ రెక్కెజ్ మహా. అయ రెకెజి ముస్సుని అడిఃగి విజా నిండ్రు కణుకెజ్ మహా. అయ నాల్లి జంతుజ్.

"ముజాల మహికాన్, ఏలు మన్నికాన్, వాని కాలమ్దు మంజినికానాతి విజా వనకాజ్ అతికారం మన్ని దేవుణు పరిసుద్దమతికాన్, పరిసుద్దమాతికాన్, పరిసుద్దమతికాన్", ఇజి రెయు పాగల్ డిఃసేండ పార్జి మహా.

9 ఎస్తివలెబా అయ పాణం మన్ని నాల్లి జంతుజ్, అయ సింహాసనమ్దు బస్తి మన్ని ఎలాకాలం బత్తిజినికాన్ ఆతి వన్నిజ్, పాగిడిఃజి గవరం సీజి వందనమ్కు వెప్పి పాగిడిఃజి మహారో, 10 నస్తివలె అయ ఇరువయ్ నాల్లెవర్ పెద్దెలుజు అయ సింహాసనమ్దు బస్తి మన్నివన్నిజ్ ఎద్దు పడగ్గిజి అర్తారె, ఎలాకాలం బత్తిజిని వన్నిజ్ మాడిసి యా లెకెండ్ పాగిడిఃజి వెప్పి మహారో.

11 "మా ప్రబు ఆతి దేవుణు, విజా వనకాజ్ తయార్ కిత్తికి నీనె. నీను ఇస్టమాతి వజ అక్కెజ్ విజా తయార్ ఆతె. అయాలెకెండ్నె అక్కెజ్ మన్నె. అందెజి నీ గొప్ప గవరం వందిజ్, నీ గొప్ప సత్తు వందిజ్ లోకుర్ విజేరె నిజి గవరం సీజి పాగిడిఃజి మంజినారో", ఇజి వెప్పి బజారమ్దాన్ తయార్ కిత్తి రాజారి టోపిలెకెండ్ మన్ని పరి టోపిజ్, సింహాసనం ఎద్దు ఇద్దార్.

దేవుణు కియుదు మన్ని పుస్తాకమ్ని గొర్రెపిల్ల.

5 నస్తివలె, లొఇని వెల్లి రాసి ఆతిమని, ఏడు సీలుజ్ పొక్తిమన్ని ఉండ్రీ పుస్తకం అయ సింహాసనమ్దు బస్తి మన్నివన్ని ఉణెరె కియుదు అస్తి మన్నిక సుడఃత. 2 "అయ సీలుజ్ లాగ్గి పుస్తకం రెక్కెజ్ తగ్గికాన్ ఎయెన్ మనాన్", ఇజి గొప్ప సత్తుమన్ని ఒరెన్ దేవుణు దూత డటం డేల్లి వెప్పింక సుడఃత. 3 గాని, పరలోకమ్దు మన్ని పరి లొఇ గాని, బూమి ముస్సు మన్ని పరి లొఇ గాని, అయా లోకమ్దు మన్ని పరి లొఇ గాని అయ పుస్తకం రెక్కెజ్ లొఇ సుడఃదెజ్నో అట్టి ఎంబె వన్నిజ్ బా తోరెవతాద్. 4 అయ పుస్తకం రెక్కెజ్నో, లొఇ సుడఃదెజ్నో తగ్గి ఎయెన్ వన్నిజ్ బా తోరెఇతిజ్ నాను నండ్ అడఃబాజి మహా. 5 నస్తివలె, అయ పెద్దెలుజలొఇ ఒరెన్, "నీను అడఃబామా. ఇదిలో, దావీదు మొదోల్దాన్ సిగ్గిస్తి, యూదు కుటుమ్దికాన్ ఆతి సింహం ఇజి పేరు మన్నికాన్, అయ ఏడు సీలుజ్ లాగ్గి పుస్తకం రెక్కెజ్ అట్టి వన్ని లెకెండ్ గెలస్త మనాన్", ఇజి నజి వెహ్లాన్.

† లవోదికియ పట్నమ్దిజ్ డగ్గు గొప్ప పేరు మన్ని రుండి పట్నమ్కు మహా. హయెరపాలిన్ ఇని పట్నమ్దు వేసాజ్ ఏరు సాని ఉండ్రీ గడ్డ మహాద్. లోకుర్ పరి జబ్బుజ్ సాండ్రెజ్ ఇజి, బాన్ సాన్ని అయ గడ్డదు ఏరుకాబాజి మహారో. కొలోసాన్ ఇని పట్నమ్దు ఉండ్రెజ్ గొప్ప రుసి మన్ని ఏరు సాని ఉండ్రీ గడ్డ మహాద్. గాని లవోదికియ పట్నమ్ది ఏరు సపాజ్ మహాద్. అందెజి లవోదికియ పట్నమ్ది దేవుణు సజమ్దిజ్ ఇని పణిదిజ్ రెఇ సపాజ్ ఏరుదిజ్ పోలిసి యేసు క్రీస్తు వెప్పినాన్ ఇజి సగొండారో వెప్పినారో. †† ఇని కల్లి సిల్లెండ గొప్ప నగ్గికాన్

6 నస్తవలె, అయ పెద్దలుబు నడిమిని పాణం మన్ని నాల్లి జంతుజు నడిమి మన్ని అయ సింహాసనం నడిమి, ముజాల కత్తె ఆతిమనిక, గాని ఏలు నిల్లి మంజని ఉండ్రి గొర్రె పిల్లదిజ్ సుడేత. అయ గొర్రె పిల్లదిజ్ ఏడు కొముకుని ఏడు కణుకెజ్ మహా. అయ కణుకు బూమి ముస్సు విజా బాడ్డిజ్ పోక్తిమన్ని దేవుణు ఏడు ఆత్మజ్. 7 వాండ్రు వాతాండ్రె అయ సింహాసనమ్దు బస్తిమన్ని వన్ని ఉణెర్ కియుదు మన్ని పుస్తకం లొస్తాన్. 8 వాండ్రు అయ పుస్తకం లొస్తవలె, పాణం మన్ని అయ నాల్లి జంతుజ్ని, అయ ఇరువయ్ నాల్వెర్ పెద్దలుబు విజెరె, టొయ్లెజ్ని, నమ్మితి వరి పార్దనమ్కు ఆతి నెగ్గి వాసనం సీజని దుపమ్కు ఇడ్డి మన్ని బజారమ్ది గిన్నెజ్ ఒరెన్ ఒరెన్ వరి కియుదు అస్తారె గొర్రె పిల్ల ఎద్రు పడగ్జి అర్దార్. 9 అయావలె, "నీను అయ పుస్తకం లొసి, దన్ని సీలుజ్ లాగ్దెజ్ తగ్గికి. ఎందానిజ్ ఇహిజు నీనె కత్తె ఆతి, నీ నలదాన్ విజా జాతిజణిజ్, విజా బాసెజాణిజ్, విజా లోకుర్ బాణిజ్, విజా దేసమ్కాణిజ్ లోకురిజ్ దేవుణు వందిజ్ కొటి. 10 మరి వరిజ్ దేవుణుదిజ్ ఉండ్రి రాజ్యం లెకెండెని వన్నిజ్ పణి కిని పుజెరిబులెకెండె కిత్తి. వారు బూమి ముస్సు ఏలుబడి: కినార్", ఇజి అయ పాణం మన్ని నాల్లి జంతుజ్ని ఇరువయ్ నాల్వెర్ పెద్దలుబు ఉండ్రి కొత్త పాట పార్దార్. 11 నస్తవలె నాను సుడేతిజ్ నండ్ దూతారి కంటం వెహ. వరి లెక్క కొటి కొటిదిజ్ ఇంక లావ్ మహా. వారు అయ సింహాసనమ్దిజ్ని అయ పాణం మన్ని నాల్లి జంతుజ్ని అయ ఇరువయ్ నాల్వెర్ పెద్దలజ్ సుటులం మంజి, 12 "కత్తె ఆతి గొర్రె పిల్ల పాగ్డె: ఆదెజ్ తగ్గికాన్. అతికారం మన్నికాన్ ఆదెజ్, అస్తి మన్నికాన్ ఆదెజ్, గెణం మన్నికాన్ ఆదెజ్, సత్తుమన్నికాన్ ఆదెజ్, మర్యాద లొసె ఆదెజ్, గవరం లొసె ఆదెజ్, పాగ్డె: ఆదెజ్ తగ్గికాన్", ఇజి గొప్పు పెరి కంటమ్దాన్ పార్ది మహార్. 13 నస్తవలె పరలోకమ్దు మన్ని, బూమి ముస్సు మన్ని, బూమి అడిగి మన్ని, సమ్దరమ్దు మన్ని, పాణం మనికెజ్ విజా కూడేజి.

"సింహాసనమ్దు బస్తి మన్నివన్నిజ్ని, గొర్రెపిల్లదిజ్, పాగ్డె: ఆజి మంజనిక, మర్యాద, గవరం, సత్తు అంతు సిల్లెండె ఎలాకాలం మనీద్", ఇజి వనక కంటమ్కాణిజ్ పార్జినిక, పాగ్డె:జి మంజనిక నాను వెహ. 14 పాణం మన్ని అయ జంతుజ్ "అమెన్", ఇజి వెహిజ్ అయ ఇరువయ్ నాల్వెర్ పెద్దలుబు పడగ్జి అర్సి, గొర్రెపిల్లదిజ్ పాగ్డె:జి మాడిస్తార్.

సీలుజ్

6 నస్తవలె, గొర్రెపిల్ల అయ ఏడు సీలుజు లొఇ, మొదోహి దన్నిజ్ లాగితిక నాను సుడేత. అయావలె అయ పాణం మన్ని నాల్లి జంతుజులొఇ, ఉండ్రి జంతు పిడుగు జాబు నన్ని కంటమ్దాన్ "రల!", ఇజి వెహిజ్ వెహ. 2 నాను సుడేతిజ్, ఉండ్రి తెల్లని గుర్రం తోరితాద్. దన్ని ముస్సు ఒరెన్ దొను అసి బస్స మహాన్. వన్నిజ్ బజారమ్దాన్ తయార్ కిత్తి, రాజారి టోపి నన్ని ఉండ్రి టోపి దోహ్కాద్. వాండ్రు గెలిస్తికాన్ ఆజి మరి గెలిస్తెజ్ ఇజి సాత్తాన్.

3 గొర్రెపిల్ల రుండి సీలు లాగితివలె పాణం మన్ని రుండి జంతు "రల!", ఇజి వెహిజ్ నాను వెహ. 4 నస్తవలె సిను నన్ని ఎరాని రంగు మన్ని ఉండ్రి గుర్రం వెల్లి వాతాద్. బూమి ముస్సు మన్ని లోకుర్, ఒరెన్ మరిఒరెన్ వన్నిజ్ సప్తెజ్ ఇజి, బూమి ముస్సు సమదనం సిల్లెండె కిదెజ్ అయ గుర్రం ముస్సు బస్తిమన్నివన్నిజ్ అతికారం దోహ్కాద్. వన్నిజ్ ఉండ్రి పెరి కుర్ల దోహ్కాద్.

5 గొర్రెపిల్ల మూండ్రి సీలు లాగితివలె పాణం మన్ని మూండ్రి జంతు "రల!", ఇజి వెహిజ్ నాను వెహ. నాను సుడేతిజ్, ఇదిలో, ఉండ్రి కర్ని గుర్రం తోరితాద్. దన్ని ముస్సు బస్తి మన్నికాన్ తూసనిక వన్ని కియుదు అస్స మహాన్. 6 "ఉండ్రి రోజాదిజ్ కూలి ఉండ్రి డొక్కు గొదుము ఇజి, మరి, ఉండ్రి రోజాదిజ్ కూలి మూండ్రి డొక్కుజ్ సాను ఇజి వెహిజ్. మరి నూనెదిజ్ ఒలివ మరెకెని, ద్రాసపట్టురనమ్వందిజ్ ద్రాక్కు టోటదిజ్ పాడే: కిదెజ్ అవద్", ఇజి అయ పాణం మన్ని నాల్లి జంతుజు నడిమిహాన్ వెహిలెకెండె ఉండ్రి కంటం నాను వెహ.

7 గొర్రెపిల్ల నాల్లి సీలు లాగితివలె, పాణం మన్ని నాల్లి జంతు "రల!", ఇజి వెహిజ్ నాను వెహ. 8 నాను సుడేతిజ్ నస్తవలె, నీరు నన్ని రంగు మన్ని ఉండ్రి గుర్రం తోరితాద్. దన్ని ముస్సు బస్తిమన్ని వన్ని పేరు, సాపు. అయా లోకం వన్ని వెనుక నడిజి మహాద్. కుర్దెజాణిజ్, కరుదాన్, జబ్బుజాణిజ్, బూమిదు మన్ని అడివి జంతుజు వెట, బూమి ముస్సు బత్తిజిని వరిజ్ నాల్లి బాటెజ్లొఇహాన్ ఉండ్రి బాటది వరిజ్ సప్తెజ్ ఇజి వన్నిజ్ అతికారం దోహ్కాక్కు మనాద్.

9 గొర్రెపిల్ల అయదు సీలు లాగితివలె, దేవుణు మాట లొజెత్తివందిజ్, మరి దేవుణుమాటవందిజ్ మన్ని నెగ్గి సాస్యం వందిజ్ కత్తె ఆతిమన్ని వరి ఆత్మెజు, పూజ సీని మాలిపీలు అడిగి నాను సుడేత. 10 వారు గొప్ప పెరి కంటమ్దాన్, "పరిసద్దమాతికాన్ ఆతి విజా దన్నిజ్ అతికారం మన్ని నిజమాతి దేవుణు, నీను, మజి సప్తి వరిజ్ దన్నిజ్ తగితి సిక్స సిపిండ, బూమి ముస్సు బత్తిని వరిజ్ తీర్పు తీరిసి, సిక్స సిపిండ ఎస్సా కాలం మంజినిలె?", ఇజి డేల్లి వెహిజ్ మహార్. 11 నస్తవలె వరిజ్ ఒరెన్ ఒరెన్ వన్నిజ్ తెల్లని సాక్కెజ్ దోహ్కె. వెనుక వారు సప్తె ఆతిలెకెండెనె సప్తె ఆదెజ్ మన్ని తంబెరిజు లెక్క, మరి వరివెట కూడేజి పణికితివరి లెక్కబా పూర్తి ఆనిదాక మరి కండెక్ కాలం కాప్ కిజి మండ్రెజ్, ఇజి వరిజ్ వెహ ఆతాద్.

12 గొర్రెపిల్ల అరు సీలు లాగితిక నాను సుడేత. నస్తవలె గొప్ప గటిజు బూమి కద్దితాద్. పార్దు, కర్ని రంగులెకెండె ఆతాద్. నెల పూర్తి, నలరంగు లెకెండె ఎర్తెజ్ ఆతాద్. 13 పెరి గాలిదిజ్ దూకె ఆజి బొడె: మరాతి ఆక్కురి కాయెజ్ రాలితిలెకెండెనె ఆగనమ్దాన్ సుక్కెజ్ రాల్తె. 14 ఉండ్రి కాకితం సుటిసి లెకెండెనె ఆగనం సుటి ఆజి తోపిండ ఆతాద్. విజా గొరొక్, సమ్దరం నడిమి మన్ని ఇజిరి దేసెమ్కు విజా వనక వనక బాడ్డిదాన్ డిస్సె సాహ.

15 నస్తవలె, బూమి ముస్సు మన్ని రాజార్, ఏలుబడి: కినికార్, నయ్నమ్ది నెయ్యిర్, అస్తి మనికార్, గొప్ప అతికారం మన్నికార్, వెట్టివణి కినికార్ని వెట్టివణిమణసిర్ ఇకార్ విజెరె తియెల్ ఆతారె, గొరొక్ సాలమ్కాజ్ లొఇ, సట్టు పారొజు డాజెతార్. 16 వారు గొరొకాజ్ని సట్టుజు యాలెకెండె వెహిజ్ మహార్, "మీరు మా ముస్సు అర్సి, సింహాసనమ్దు బస్తిమన్ని వన్ని మొకొమ్దాన్ గొర్రెపిల్ల కొమ్దాన్ మజి డా:వు". 17 "ఎందానిజ్ ఇహిజు దేవుణుని గొర్రెపిల్ల బూమి ముస్సు మన్నివరి ముస్సు తీర్పు తీరిస్సి రోజు వాతాద్. వరి ఎద్రు ఎయెన్ నిల్లెజ్ అట్నాన్?".

సీలు పాకె ఆతి 144,000 లోకుర్.

7 దిన్ని వెనుక బూమి ముస్సుబా సమ్దరం ముస్సుబా మరెక ముస్సుబా గాలి కిపిండ, నాల్లి దిక్కుజు గాలి అస్తారె బూమిది నాల్లి దిక్కుజు, నాల్వెర్ దూతార్ నిల్లి మంజనిక నాను సుడేత. 2 బత్తిజిని దేవుణుది సీలు అస్తిమన్ని, మరి ఉండ్రి దూత పార్దు సాని దరోటాన్ వాతిక నాను సుడేత.

బూమిదిజ్జీని సమ్దారమ్దిజ్జీ పాడ్జి కిదెజ్జీ అతికారం దోహ్కొమ్మిని దూతారవెట ఈహు వెహ్హన్. 3 “మాపు దేవుణు పణి కినివరి నొద్దుజ సీలు పొక్కిదాక బూమిదిజ్జీబా, సమ్దరమ్దిజ్జీబా, మరెకాజ్జీబా పాడ్జి కిమాట్”, ఇజి వాండ్రు డలు వెహ్హన్. 4 నస్తవలె, సీలు పాకె ఆతివరి లెక్క వెహ్హక నాను వెహ. ఇస్రాయేలుది విజా తెగెజాణిజ్జీ లక్క నలవయ్నాల్లి వెయిజ్జీ లోకుర్ మహార్.

5 సీలు పాకె ఆతికార్ యూదా తెగదాన్ పన్నెండు వెయిజ్జీ లోకుర్ మహార్. రూబెను తెగదాన్ పన్నెండు వెయిజ్జీ లోకుర్ మహార్. గాదు తెగదాన్ పన్నెండు వెయిజ్జీ లోకుర్ మహార్. 6 ఆసీరు తెగదాన్ పన్నెండు వెయిజ్జీ లోకుర్ మహార్. నస్తాలి తెగదాన్ పన్నెండు వెయిజ్జీ లోకుర్ మహార్. మనసె తెగదాన్ పన్నెండు వెయిజ్జీ లోకుర్ మహార్. 7 సీమెను తెగదాన్ పన్నెండు వెయిజ్జీ లోకుర్ మహార్. లేవి తెగదాన్ పన్నెండు వెయిజ్జీ లోకుర్ మహార్. ఇసాకారు తెగదాన్ పన్నెండు వెయిజ్జీ లోకుర్ మహార్. 8 జబులూను తెగదాన్ పన్నెండు వెయిజ్జీ లోకుర్ మహార్. యోసీపు తెగదాన్ పన్నెండు వెయిజ్జీ లోకుర్ మహార్. బెన్యామిను తెగదాన్ పన్నెండు వెయిజ్జీ లోకుర్ మహార్.

తెల్లాని సాక్కెజ్జీ తొడుఃగితిమిన్ని గొప్పు మంద లోకుర్

9 దన్ని వెనుక నాను సుడ్జితిజ్జీ, విజా దేసమ్కాణిజ్జీ, విజా జాతిజణిజ్జీ, విజెరె లోకుర్ బాణిజ్జీ, విజా బాసెజ్జీ వర్గిని వరిబాణిజ్జీ వాతి ఎయెన్బా లెక్క కిదెజ్జీ అట్ఇనన్ని గొప్పు మంద లోకుర్ అయ సింహాసనం ఎద్దుని గొరెప్పిల్ల ఎద్దు నిల్లి మంజినిక సుడ్జిత. వారు తెల్లాని సాక్కెజ్జీ తొడిఃగిజి ఈత మరాతి మటెజ్జీ కికాజ్జీ అస్త మహార్.

10 “సింహాసనమ్దు బస్తి మిన్నికాన్ ఆతి మా దేవుణుని గొరెప్పిల్ల మజి రక్కిస్త మనార్”, ఇజి వారు గొప్పు పెరి కంటమ్దాన్ వెహ్హి మహార్.

11 అయ సింహాసనమ్దిజ్జీని అయ పాణం మిన్ని నాల్లి జంతుజ్జీని ఇరువయ్ నాల్వెరె పెద్దెల్జ సుటులం దేవుణు దూతార విజెరె నిహ మహార్. వారు సింహాసనం ఎద్దు పడగెజి అర్పి దేవుణుదిజ్జీ పొగిడిఃజి మాడిఃస్తార్. 12 “ఆమెన్, వన్ని గొప్పు పేరు వందిజ్జీ, వన్ని గెణమ్వందిజ్జీ, వన్ని అతికారమ్ వందిజ్జీ, వన్ని సత్తువందిజ్జీ మాటు మా దేవుణుదిజ్జీ ఆంతుసిల్లెండ ఎలాకాలం పొగిడిఃజి మంజినాట్. మాటు విజెటె వన్నిజ్జీ గవరం సీజి వందనమ్కు వెహ్హి మంజినాట్. ఆమెన్”, ఇజి వారు వెహ్హి మహార్.

13 నస్తవలె అయ పెద్దెలుజలొజ ఒరెన్, “యా తెల్లాని సాక్కెజ్జీ తొడుఃగితి మనికార్ ఎయెరె? వారు ఎమేణిజ్జీ వాత మనార్”, ఇజి నజి వెన్బాతాన్.

14 “బాబు నినె నెస్సి”, ఇజి నాను వన్నిజ్జీ వెహ్హ. వాండ్రు నావెట ఈహు వెహ్హన్. “పీరు గొప్పు పెరి కప్పమ్కాణిజ్జీ వాతికార్. వారు గొరెప్పిల్ల నలదాన్ వరి సాక్కెజ్జీ నొరబజి వనకాజ్జీ తెల్లాజ్జీ కిత్తికార్. 15 అందెజె, “వారు దేవుణు సింహాసనం ఎద్దు మంజి రెయూపాగొల్ వన్ని గుడిఃదు వన్నిజ్జీ పణి కిజి మంజినార్. సింహాసనమ్దు బస్తి మిన్నికాన్, వాండ్ర ఆజి వన్ని టంబు వరి ముస్సు వ్డెక్కి వరిజ్జీ కాపాడ్నాన్. 16 మరి ఎసెజ్జీబా వరిజ్జీ బజ కట్వద్. మరి ఎసెజ్జీబా వారు ఏహ్హి సావర్. పొద్దుది గొప్పు ఏండ వరి ముస్సు తగ్గివద్. మరి సుర్పిలెకెండ్ మిన్ని వేడిఃబా వరిజ్జీ తగ్గివద్. 17 ఎందానిజ్జీ ఇహిజ, సింహాసనం నడిఃమి మిన్ని గొరెప్పిల్ల వరిజ్జీ గవుడుఃయెన్ ఆత మనాన్. పాణం సీని ఏరు వాని ఊట డగ్రు వాండ్రు వరిజ్జీ నడిఃపిన్నాన్. దేవుణు వరి కణుకేజాణిజ్జీ కణెరె విజా తేల్నాన్”.

ఏడు సీలుని బజరమ్ది దూపమ్సుర్పి గిన్న

8 గొరెప్పిల్ల ఏడు సీలు లాగితివలె వరలోకమ్దు అరగంట జమ్నె మహాద్. 2 నస్తవలె, దేవుణు ఎద్దు ఏడు దేవుణు దూతార నిల్లి మంజినిక నాను సుడ్జిత. వరిజ్జీ ఏడు జోడు బాంగెజ్జీ దోహ్కొమ్మె. 3 మరి ఒరెన్ దేవుణు దూత బజరమ్దాన్ తయార కిత్తిమిన్ని దూపం సుర్పి గిన్న కియుదు అస్తాండ్రె దూపం సుర్పి మాలి పెటె ఎద్దు వాతాండ్రె నిహాన్. సింహాసనం ఎద్దు బజరమ్దాన్ తయార కిత్తి దూపం సుర్పి మాలి పెటెదు, దేవుణు వందిజ్జీ కేట ఆతివరి పారదనమ్కువెట సుర్పి పూజ సీదెజ్జీ అయ దూతెజ్జీ నెగ్గి వాసనం సీని దూపం నండ్ దోహ్కొమ్మె.

4 నస్తవలె నెగ్గి వాసనం సీని దూపమ్ది గోయి దేవుణు వందిజ్జీ కేట ఆతివరి పారదనమ్కువెట కూడ్జి దేవుణు దూత కియూదాన్ ముస్సు దేవుణు దరోల్ సాహ. 5 వెనుక అయ దేవుణు దూత దూపం సుర్పి గిన్న అస్తాండ్రె, దూపం సుర్పి మాలి పెటెదాన్ డీప్పు లాగ్గి అయ గిన్నాదు నిండ్రిస్తాండ్రె, అయ డీప్పుజ్జీ బూమి ముస్సు విసీర్తాన్. నస్తవలె గొప్పు దిడ్జినికెజ్జీ, పిడుఃగుజ్జీ, మెర్పినికెజ్జీ విజా వాతె. బూమి కద్దితాద్.

ఏడు జోడుఃబాంకెజ్జీ.

6 నస్తవలె ఏడు జోడుఃబాంకెజ్జీ అస్తిమిన్ని ఏడు దూతార వనకాజ్జీ ఊక్తెజ్జీ తయార ఆతార్. 7 మొదోహి దేవుణు దూత వన్ని జోడుఃబాంక ఉహ్కెజ్జీ, వడఃజాని సిసు నలదాన్ కూడ్జి బూమి ముస్సు సెదరె ఆజి అరె. అందెజె బూమిదు మూండ్రి వంతుజ లొఇ ఉండ్రి వంతు వెతాద్. మరెకేబా మూండ్రి వంతుజ లొఇ ఉండ్రి వంతు వెతాద్. వసి గడ్డి విజా వెతాద్.

8 రుండి దేవుణు దూత వన్ని జోడుఃబాంక ఉహ్కెజ్జీ, కసి మంజిని ఉండ్రి పెరి గొరొన్ నన్నిక సమ్దరమ్దు అర్తాద్. సమ్దరం మూండ్రి వంతుజ లొఇ ఉండ్రి వంతు నల ఆతాద్. 9 సమ్దరమ్దు మిన్ని పాణం మిన్ని జంతుజ్జీ, మూండ్రి వంతుజ లొఇ ఉండ్రి వంతు సాతె. ఓడిఃజ్జీబా మూండ్రి వంతుజ లొఇ ఉండ్రి వంతు నాసనం ఆతె.

10 మూండ్రి దేవుణు దూత వన్ని జోడుఃబాంక ఉహ్కెజ్జీ కగెడలెకెండ్ కసిమంజిని ఉండ్రి పెరి సుక్క, ఆగసమ్దాన్ రాల్లి పెరి గడ్డెజ ముస్సుని ఏరు సాని ఊటెజ మూండ్రి వంతుజ లొఇ ఉండ్రి వంతు ముస్సు అర్తాద్. 11 అయ సుక్క పేరు సేందు. అందెజె మూండ్రి వంతుజ ఉండ్రి వంతు సేందు ఆతాద్. ఏరు సేందు ఆతిజ్జీ లోకుర్ నండ్ండార్ సాతార్.

12 నాల్గి దేవులు దూత వన్ని జోడుఃబాంక ఉక్తిజ్, పాద్దు మూండ్రి వంతుజ లొఇ ఉండ్రి వంతు సెఎణ్ ఆతాద్. నెల మూండ్రి వంతుజ లొఇ ఉండ్రి వంతు సీకటి ఆతాద్. సుక్రజ దెబ్బ తగ్గితిజ్ మూండ్రి వంతుజ లొఇ ఉండ్రి వంతు సీకటి ఆతాద్. అందెజె వేడెక మూండ్రి వంతుజ లొఇ ఉండ్రి వంతు జాయ్ మన్వితాద్. రెయు మూండ్రి వంతుజ లొఇ ఉండ్రి వంతు నెల సుక్రజ జాయ్ మన్వితాద్.

13 నాను సుడెఃజి మహిజ్ నండొ ముస్సు ఎగ్రిజి మంజిని ఉండ్రి డేగ, "మరి ఊక్తెజ్ మన్ని మూండ్రి జోడుఃబాంకెజ జాటుదాన్ బూమి ముస్సు బత్కిని వరిజ్, అబాయా కస్టం, కస్టం, కస్టం", ఇజి గొప్ప పెరి జాటుదాన్ వెహ్మిమన్నిక వెహ్.

9 అయ్దు దేవులు దూత వన్ని జోడు బాంక ఉక్తిజ్ అగసమ్దాన్ బూమి ముస్సు రాల్లి మహి ఉండ్రి సుక్ర, సుడెఃత. ధర్ణిది తాలం కిక్కు, అయ్ సుక్రదిజ్ దొహ్కాద్. 2 వాండ్రు అయ్ మటుసిల్లి దాస్తిమన్ని ధర్ణిదిజ్ రెతిజ్, గొప్ప పెరి సాల్లదాన్ సిసుదాన్ గోయ్ వాతి లెకెండ్ గోయ్ వాతాద్. అయ్ ధర్ణిదాన్ వాతి గోయ్దాన్ పాద్దుని, ఆగసం సీకటి ఆతాద్. 3 అయ్ గోయ్దాన్ మేపిలెక్ బూమి ముస్సు వాతె. బూమి ముస్సు మన్ని కిపిడారొదిజ్ మన్నిలెకెండ్ వనకాజ్ సత్తు దొహ్కాత్. 4 నొద్రుజ దేవులుగుర్లు సిల్లి లోకురిజ్ బాదకిదెజ్నె అఎండ, బూమి ముస్సు మన్ని గడ్డిదిజ్బా, ఇని మొక్కుదిజ్బా, ఇని మరాతిజ్బా పాడెః కిడెజ్ అపిద్ ఇజి వనకాజ్ ఆడ్ర దొహ్కాత్. 5 వరిజ్ సప్తెజ్ వనకాజ్ అతికారం సిల్లెతాద్. గాని అయ్దు నెలెజ్ దాక వరిజ్ హిమ్మెజ్ కిజి మండ్రెజ్ వన్కాజ్ అతికారం దొహ్కాత్ మనాద్. అవిక్ హిమ్మెజ్ కితిజ్ వరిజ్ వాతి కస్టం, కుపిడారొ లోకురిజ్ కట్టిజ వాని నొప్పాలెకెండ్ మహాద్. 6 అయ్ దిసమ్కాజ్ లోకుర్ సాపుదిజ్ రెబానార్ గాని సాపు వరిజ్ తప్పె ఆనాద్లె. వారు సాపువందిజ్ ఆస ఆనార్లె గాని సాపు వరిజ్ డిఃసి సానాద్లె.

7 అయ్ మేపిలెక్ విదెమ్దిజ్ సాండ్రెజ్ తయార్ కితిమన్ని గుర్మ్కాజ్ పాలితె మన్నె. బజారమ్దాన్ తయార్ కిత్తి బొహి నన్నిక ఉండ్రి, వనక బురెక ముస్సు మహె. వనక మొక్మొమకు లోకు మొక్మొ లెకెండ్ మహె. 8 వనక కొప్పు బోదెక బురాతి కొప్పులెకెండ్ మహాద్. వనక పల్కు సింహం పల్కు లెకెండ్ మహె.

9 ఇనుముదాన్ తయార్ కితిమన్ని లెకెండ్ గుండెదిజ్ అడిని సాక్కెజ్ వనకాజ్ మహె. వనక రెక్కెజాణి జాటు విదెమ్దిజ్ ఉహ్కెన్ని గుర్మ్కకు లాగ్జిని రడమ్క గొప్ప పెరి జాటులెకెండ్ మహాద్. 10 వనకాజ్ కిపిడారొ తొకెజ్ నన్ని సాప్పు మన్ని తొకెజ్ మహె. లోకురిజ్ అయ్దు నెలెజ్ గుత్తి బాదెజ్ కిడెజ్ అయ్ తొకెజ్ వనకాజ్ సత్తు మహాద్. 11 ధర్ణిదిజ్ అతికారం మన్ని దూత వరి ముస్సు రాజా లెకెండ్ మహాన్. ఏబ్రి బాసాదు వన్నిజ్ పేరు 'అబదోను' ఇని పేరు. గ్రీకు బాసాదు వన్ని పేరు 'అపాలుయోను' ఇని పేరు.

12 మొదొహి కస్టం గడెస్తాద్. ఇదిలో, మరి రుండి కస్టంకు వాదెజ్ మన్నె. 13 ఆరు దేవులు దూత వన్ని జోడుఃబాంక ఉక్తిజ్, దేవులు ఎద్దు మన్ని బజారమ్దాన్ తయార్ కిత్తి పూజ సీని మాలిపేటది కొముజాణిజ్ ఉండ్రి జాటు వెహ. 14 "యూప్రటిను ఇని గొప్ప పెరి గడ్డ జోరెదు తొహె ఆతిమన్ని నాల్వెర్ దూతారిజ్ కుత్తి డిఃసెఅ", ఇజి వెహ్కె నాను వెహ. 15 బూమి ముస్సు మన్ని లోకురి మూండ్రి వంతుజ లొఇ ఉండ్రి వంతుది వరిజ్ సప్తెజ్ ఇజి యా పంటాది, యా నెలాది, యా రోజాది, యా గంటవందిజ్ తయార్ కిజె ఆజి ఇడ్డి మన్నికారె, అయ్ నాల్వెర్ దూతార్. 16 గుర్మ్కకు ముస్సు ఎక్తిమన్ని నయ్నమ్మది వరిలెక్క, రుండి వందెజ్ లెక్కెజ్. వరి లెక్క నిస్సా ఇజి నాను వెహ.

17 గుర్మ్కాజ్ వనక ముస్సు బస్తిమన్ని వరిజ్ నజి వాతి కలాదు నాను యాలెకెండ్ సుడెఃత. వరిజ్ సిసు నన్ని ఎరాని రంగుది, మరి సీలి రంగుది, మరి పసిజ్ రంగుది గుండెదిజ్ అడిని సాక్కెజ్ మహె. గుర్మ్క బురెక్ సింహం బురెక్లెకెండ్ మహె. వనక వెయుజాణిజ్ సిసు, గోయ్, రెంజికం వెల్లి వాజి మహె. 18 వనక వెయుజాణిజ్ వాతి సిసు, గోయ్, రెంజికం ఇని మూండ్రి దెబ్బెజాణిజ్ లోకురి మూండ్రి వంతుజ లొఇ ఉండ్రి వంతు లోకుర్ సప్పె ఆతార్. 19 అయ్ గుర్మ్క సత్తు వనక వెయుజలోఇని వనక తొకెజ్ మహె. లోకురిజ్ కట్టి గాయ్మకు కిడెజ్ బురెక్ మన్ని సరాసలెకెండ్ మన్ని తొకెజ్ వనకాజ్ మహె.

20 యా మూండ్రి దెబ్బెజాణిజ్ సావండ మిగిలితి మన్ని లోకుర్ ఏలుబా వరి కిక్కాణిజ్ తయార్ కితిమన్ని దెయ్మ్కాజ్ బొమ్మెజ మాడిఃసినిక డిఃసిసిజి పావమ్కు ఒప్పుకొడెఃజి మన్ను మారిస్వితార్. వారు వరి కిక్కాణిజ్ బజారమ్దాన్, వెండిదాన్, కంసదాన్, పణుకుదాన్, సెక్కుదాన్ తయార్ కితిమన్ని సుడెఃదెజ్ అట్రజ, వెండ్రెజ్ అట్రజ, నడిఃదెజ్ అట్రజ సత్తు సిల్లి వనకాజ్ మాడిఃసినిక డిఃసి సివితార్. 21 అక్కాద్ అఎండ, లోకురిజ్ సప్పిక, గురుజవెట సెట్టి కినిక, రంకు బూలానిక, డొజ కినిక యాలెకెండ్ వారు కిజి మహికెజ్ డిఃసిసిజి పావమ్కు ఒప్పుకొడెఃజి డిఃసిసిజి మన్ను మారిస్వితార్.

ఇజిరి పుస్తకం అస్తిమన్ని దేవులు దూత.

10 నస్తివలె గొప్ప సత్తు మన్ని మరి ఒరెన్ దేవులు దూత వరలోకమ్దాన్ డిగ్గి వాజినిక నాను సుడెఃత. వాండ్రు మొసాప్ తొడుఃగిత మహాన్. వన్ని బుర్ర ముస్సు కొడెఃవేలి సుటె ఆత మహాద్. వన్ని మొక్మొం పాద్దులెకెండ్ని వన్ని పాదమ్కు తంపం లెకెండ్ మన్ని సిసు కొనెజ్లెకెండ్ మహె. 2 వన్ని కియుదు రెక్తిమన్ని ఉండ్రి పుస్తకం మహాద్. వాండ్రు వన్ని ఉణెర్ పాదం సమ్దరం ముస్సు మట్ట మహాన్. వన్ని డేబ్రి పాదం బూమి ముస్సు మట్ట మహాన్. 3 సింహం ఆక్కర్న్సి లెకెండ్ వాండ్రు ఉండ్రి గొప్ప పెరి జాటు సిత్తాన్. వాండ్రు జాటు సత్తివలె ఏడు పిడుఃగుజ్ వనక వనక జాటుజాణిజ్ వగ్గె. 4 అయ్ ఏడు పిడుఃగుజ్ వర్గితివలె, నాను రాస్తిజ్ తయార్ ఆతిజ్, "అయ్ ఏడు పిడుఃగుజ్ వర్గితి సజతిజ సీలు ఫాక్ల. వనకాజ్ రాస్త్", ఇజి వరలోకమ్దాన్ ఉండ్రి కంటం వెహ్కె వెహ. 5 నస్తివలె, సమ్దరం ముస్సుని బూమి ముస్సు నిహిమన్ని దేవులు దూత వన్ని ఉణెర్ కియు వరలోకం దరోట్ పెప్తాండ్రె యాలెకెండ్ వెహ్కెన్. 6 వరలోకమ్ని అబ్బె మన్ని విజావనకాజ్ని, బూమిని బూమి ముస్సు మన్ని విజావనకాజ్ని, సమ్దరమ్ని సమ్దరమ్దు మన్ని విజా వనకాజ్ తయార్ కిత్తికానాతి ఎలాకాలం బత్కిజిని దేవులు పేరు అసి యా లెకెండ్ ఒట్టు పాక్తాన్. "మరి ఆలస్యం మన్వద్". 7 ఏడు దేవులు దూత వన్ని జోడుఃబాంక ఊక్తి దిసమ్కాజ్ దేవులుది డాఃజితి మన్ని సజతిజ్, దేవులు, వన్ని పణికిని వరివెటని వన్ని ప్రవక్తర్ వెట ముజాల వెహె ఆతిమహిలెకెండ్ పూర్తి ఆనాద్లె".

8 నస్తివలె వరలోకమ్దాన్ నాను ముజాల వెహెమన్ని కంటం మరి నావెట, "సిసు సాస్సి సమ్దరం ముస్సుని బూమి ముస్సు నిహిమన్ని అయ్ దేవులు దూత కియుదు మన్ని రెకె ఆతిమన్ని ఇజిరి పుస్తకం లోసెఅ", ఇజి వెహ్కె నాను వెహ.

9 అందెజె నాను సాస్సి "అయ్ ఇజిరి పుస్తకం నజి సిదా", ఇజి అయ్ దేవులు దూతెజ్ లొస్త. వాండ్రు, "దన్నిజ్ లాగ్గి తిన్ల. అయక సి పాటాదు సేందు ఆనాద్ గాని నీ వెయ్దు తేనె లెకెండ్ తియాజ్ మంజినాద్", ఇజి నావెట వెహ్కెన్. 10 అయావలె దేవులు దూత కియుదాన్ అయ్ ఇజిరి పుస్తకం నాను లొస్తానె తిహ్.

అయ్యాక నా వెయ్యదిజ్ తేనెలెకండ్ తియాజ్ మహాద్. గాని అక తిహి వెనుక నా పాటాదు సేందు ఆతాద్. 11 అయావలె వాండ్రు, “నీను నండొ లోకుర్ వందిజ్, నండొ జాతిజాణివరివందిజ్, నండొ బాసిజ్ వరినివరివందిజ్, నండొండార్ రాజార్వందిజ్ దేవుణు ప్రవక్తలెకండ్ మరి వెహ్జాజ్ వలె”, ఇజి నజీ వెహ్జాన్.

దేవుణు వందిజ్ వాతి రిఎర్ సాసిర్.

11 మరి కొల్త కిని ఉండ్రీ డుడ్డు నజీ సితాండ్రె ఈహు వెహ్జాన్. “నీను నిజ్జి దేవుణు గుడిని, దేవుణుదిజ్ పూజ సీని మలిపీటదిజ్ కొల్త కిజి, దేవుణు గుడిదు పాగిడిజి మాడిసినివరిజ్ లెక్క కిల. 2 గుడిదిజ్ వెల్లి మన్ని డేవ కొల్త కిపిండ డిసింల. అయ్యాక దేవుణుదిజ్ నమ్మిఇవరి వందిజ్ మన్నిక. వారు నల్వయరుండి నెలెజ్ పరిసుద్దమతి యెరూసలేం పట్టుమదిజ్ వరికాల్కాణిజ్ మట్నార్లె. 3 మరి నాను నా రిఎర్ సాసిరిజ్ అతికారం సీనాలె. వారు బన్న సాక్కెజ్ తొడిగిజి పన్నెండు వందెజ్ అరువయ్యరోస్సు దేవుణు ప్రవక్తరు లెకండ్ దేవుణు మాటెజ్ సాటిన్నార్. 4 బూమిదిజ్ ప్రబు ఆతి దేవుణు ఎద్దు నిల్పి మంజిని రుండి ఒలివ మరెక్సి రుండి దీవ డండిజ్ ఆతికార యా రిఎర్ సాసిర్. 5 ఎయిర్బా వరిజ్ హిమ్సెజ్ కిదెజ్ సుడెతిజ, వరి వెయ్యదాన్ సీను వాజి వరిజ్ పగాతివరిజ్ సుర్దు విసిర్నాద్. వరిజ్ హిమ్సెజ్ కిదెజ్ సూణికార్ యాలెకండ్ సాదెజ్వలె. 6 వారు ప్రవక్తరులెకండ్ దేవుణు మాటెజ్ వెహ్జి దినమ్దు ఆగనమ్దాన్ పేరు రేపిండ అడ్డు కిదెజ్ వరిజ్ అతికారం మంజినాద్. మరి వరిజ్ ఇస్టమాతి వజ ఎస్తివలెబా బూమిదు మన్ని ఏరుదిజ్ నలలెకండ్ కిదెజ్, మరి నండొ రకమ్ది జబ్బుజాణిజ్ బూమి ముస్సు మన్ని వరిజ్ బాదెజ్ కిదెజ్ వరిజ్ అతికారం మంజినాద్.

7 వారు సాస్యం వెహ్జి మంజినిక పూర్తి ఆతిజసరి ధర్మిదాన్ వాని క్రూరమతి జంతు వరివెట ఉద్దం కిజి వరిజ్ నహ్నాద్. 8 వరి పీనుగుజ్ యెరూసలేం ఇని అయ పెరి పట్టుమది సర్దు అర్నె మంజినె. అయ పట్టుమదిజ్ సాదామ పట్టుమదిజ్, అయ్గుప్పు దేసిమ్దిజ్ పాలిసి వెహ్ ఆజినాద్. అబ్బె వరి ప్రబుబా సిలువ పాకె ఆత మహాన్. 9 వరి పీనుగుజ్ మూస్తెజ్ సరి సిపిండ విజా దేసిమ్దికార్, విజా తెగెజాణికార్, విజా బాసిజాణికార్, విజా జాతిదికార్ విజెరె మూండ్రినర రోస్సు వరి పీనుగుజ్ సుడెజి మంజినార్. 10 యా రిఎర్ ప్రవక్తరు బూమి ముస్సు మన్ని వరిజ్ బాదెజ్ కిత్తి వందిజ్, బూమి ముస్సు మనికార్ విజెరె వరిజ్ జర్గితిక సుడెజి గొప్ప సర్ద ఆజి ఒరెన్ మరి ఒరెన్ పన్నెజ్ ఇనామ్కు సీజి వండొయ్ కినార్.

11 గాని అయ మూండ్రినర రోస్సు ఆతి వెనుక దేవుణుబాణిజ్ పాణం మన్ని ఆత్మ వాజి వరి లొఇ డుఃగితిజ్ వారు కిక్కు బూమిదు తిగిజి నిజ్జి నిల్తార్. వరిజ్ సుడెతికార్ విజెరె గొప్ప తియెల్ ఆతార్. 12 నస్తివలె, “ఇబ్బె ఎక్సి రదు”, ఇజి పరలోకమ్దాన్ గొప్ప పెరి కంటమ్దాన్ వరిజ్ వెహ్జి వారు వెహ్, వరిజ్ పగాతికార్ సుడెజి మహివలెనె వారు మొసాపుదాన్ పరలోకమ్దు పెరె ఆజి సాహర్.

13 అయ గడియాయునె గొప్ప గటిజ బూమి కద్దితిజ్, అయ పట్టుమది వది వంతుజ లొఇ ఉండ్రీ వంతు అర్తాద్. బూమి కద్దితిజ్ ఏడు వెయ్యజ్ లోకుర్ సాతార్. మిగిలిత్తికార్ గుండెజ్ వణిక్కిలెకండ్ తియెలాజి పరలోకమ్దు మన్ని దేవుణుదిజ్ పాగిడితార్. 14 రుండి కష్టం వీజితాద్. ఇదిలో, మూండ్రీ కష్టం బేగినె వానాద్లె.

మిగిలిత్తిమన్ని ఏడు జోడుఃబాంక.

15 ఏడు దేవుణు దూత వన్ని జోడుఃబాంక ఊక్తిజ్ పరలోకమ్దు గొప్ప పెరి కంటమ్దాన్ యాలెకండ్ డేల్సినె జాటుజ్ వాతె. “యా లోకమ్దు ఏలుదాన్ ఏలుబడిః కినిక, మా ప్రబుజ్నె వన్ని క్రీస్తుజ్ ఆత మనాద్. వాండ్రు అంతుసిల్లెండ ఎలాకాలం ఏలుబడిః కిజి మంజినాన్లె”. 16 నస్తివలె, దేవుణు ఎద్దు సింహాసనమ్కాజ్ బస్తిమన్ని అయ ఇరువయ్ నాల్వెర్ పెద్దెలుబు పడగిజి అర్ని దేవుణుదిజ్ యా లెకండ్ వెహ్జి పాగిడిజి మాడిసి మహాన్. 17 “ఏలు మన్నికి, ముజాల మహికి ఆతి, విజాదన్నిజ్ అతికారం మన్ని మా ప్రబు ఆతి దేవుణు, నీను నీ గొప్ప పెరి సత్తుదాన్ ఏలుబడిః కిదెజ్ మొదొల్లిస్తివందిజ్ మాపు మిజీ వందనమ్కు వెహ్జినాప్. 18 దేవుణుదిజ్ నమ్మిఇకార్ ఆతి యా లోకమ్ది లోకుర్ కోపమ్దాన్ నిండ్రితార్. ఎందానిజ్ ఇహిజ నీను కోపం ఆదెజ్ సమయం వాతాద్. సాతి వరిజ్ విజెరిజ్ నీను తీర్పు తీరిస్తెజ్ గడియ వాతాద్. నీ పణిమణిసిరిజ్, ప్రవక్తరిజ్, నిజి నమ్మిత్తి వరిజ్, నీ పేరు వందిజ్ గవరం సీజి బత్రితి ఇజిరివరిజ్నె పెరివరిజ్ విజెరిజ్ తగితి ఇనాయం సీదెజ్ గడియ వాతాద్. బూమిదిజ్ నాసనం కినివరిజ్, నాసనం కిదెజ్ గడియ వాతాద్”.

19 నస్తివలె, పరలోకమ్దు మన్ని దేవుణుగుడిః రే ఆతిజ్, దేవుణు లోకుర్ వెట కిత్తి ఒట్టు రాస్తి ఇడ్డి మన్ని మందసం తోరె ఆతాద్. నస్తివలె, మెరిసిని జాయ్, పిడుఃగుజ్, దీడెఃజినికెజ్, వాతె. బూమి కద్దితాద్. గొప్ప వడఃజెజ్ అర్తె.

ఉండ్రీ బోదెలిని ఉండ్రీ గొప్ప పెరి సరాన్.

12 నస్తివలె పరలోకమ్దు ఉండ్రీ బమ్మాతి గుర్తు తోరితాద్. పాద్దుదిజ్ పార్పాతి మన్ని ఉండ్రీ బోదెలి తోరె ఆతాద్. దన్ని పాదమ్క అడిగి నెల మహాద్. బురారు వనెండు సుక్కెజ్ మన్ని రాజారి బొపిలెకండ్ ఉండ్రీ బజారం బొపి మహాద్. 2 అది పాత డిఃస్ట మహాద్. అది ఏరు ఈబాదెజ్ నొప్పిదాన్ గొప్ప డేల్సె అడఃబాజి మహాద్. 3 నస్తివలె, మరి ఉండ్రీ గుర్తు పరలోకమ్దు తోరితాద్. ఇదిలో, ఉండ్రీ గొప్ప పెరి ఎరాని సరాన్ తోరితాద్. దన్నిజ్ ఏడు బురెక్సి పది కొమ్ము మహా. దన్ని బుర ముస్సు రాజారి బొపిలెకండ్ బజరమ్ది ఏడు బొపిజ్ మహా. 4 ఆగనమ్ది సుక్కెజ్ మూండ్రీ వంతుజ్లోఇ ఉండ్రీ వంతు సుక్కెజ్ దన్ని తోక డెయ్జి బూమి ముస్సు అర్నెత్తాద్. ఏరు ఈబాదెజ్ తయార్ ఆతి మన్ని అయ బోదెలి, ఏరుఈబాతిజ్ సరి, అయ బయిజ్ డిఃజెదెజ్ ఇజి అయ సరాన్ అయ బోదెలి ఎద్దు నిహ మహాద్. 5 అది ఒరెన్ మరినిజ్ కాస్తాద్. లోకమ్ది లోకురిజ్ విజెరిజ్ ఇనుము డుడ్డుదాన్ ఏలుబడిః కిదెజ్ ఇజి ఒరెన్ కొడొదిజ్ ఇట్టాద్. అది కాస్తి బయి దేవుణు డగ్రుని వన్ని సింహాసనం డగ్రు వెలనె లాగిజి పెరె ఆతాన్. 6 అది వన్నెండు వందెజ్ అరువయ్ రోస్సు, దేవుణు దన్నిజ్ పాన్ కిదెజ్ ఇజి బిడిఃమ్బూమిదు దన్ని వందిజ్ తయార్ కితిమన్ని బాడ్డిదు ఉహ్కీ సాహాద్.

7 నస్తివలె పరలోకమ్దు ఉద్దం ఆతాద్. మికాయెలు ఇని దేవుణుదూతని వన్ని జబుది దూతార్ కూడఃజి అయ గొప్ప పెరి సరాన్వెట ఉద్దం కితార్. అయ గొప్ప పెరి సరాన్ వన్ని దూతార్ మరీజి ఉద్దం కితార్. 8 గాని వారు దేవుణు దూతార్ ముస్సు గెలిస్తెజ్ అట్వతార్. అందెజి పరలోకమ్దు మరి ఎనెజ్బా వరిజ్ మండ్రెజ్

బాడ్డి మన్వితాద్. 9 లోకమ్దు మన్ని లోకురిజ్ విజేరిజ్ మొసెం కిజి నడిపిన్తికాన్ ఆతి సెఇకాన్ ఆతి సయ్యాన్ ఇజి పేరు ఇడ్డె: ఆతి మొదోహి సరాస్ ఇని అయ గొప్ప పెరి సరాస్ పరలోకమ్దాన్ బూమి ముస్సు అర్పె ఆతాన్. వాండ్రుని వన్ని దూతార్ బూమి ముస్సు అర్పె ఆతార్.

10 నస్తవలె పరలోకమ్దు యాలెకెండ్ వెస్సిని ఉండ్రీ పెరి కంటం నాను వెహ. "రెయుసాగోల్ మా దేవుణు ఎద్రు, మా తంబెరిజ ముస్సు తప్పు మొప్పి మహికాన్ ఆతి నయ్తాన్ అర్పె ఆత మనాన్. అందెజె వన్ని గొప్ప సత్తుదాన్ మజి రక్కిన్తి దేవుణు ఎలాకాలం ఏలుబడి: కిజి మంజినాన్. మరి అతికారం వన్ని క్రిస్తూజ్ ఆతాద్. 11 మా తంబెరిసిర్ గొరెప్పిల్ల నలదాన్, వారు వప్పిమన్ని సాన్యమ్దాన్ నయ్తాన్ ముస్సు గెలస్త మనార్. వారు వరి సాంత పాణమ్కాజ్ గొప్ప పెరిక ఇజి ఒడిబిండ సాదెజ్బా తయార్ ఆత మహార్. 12 అందెజె పరలోకమ్దికిదెరా మీరు సర్ద ఆదు. బూమిదుని సమ్దరమ్దు మన్ని విజేరిజ్ కస్టమ్కునె. ఎందానిజ్ ఇహిజ సయ్యాను మీ డగ్గు వాత మనాన్. వన్నిజ్ సమయం తక్కున మనాద్ ఇజి నెసి వాండ్రు నండొ కోవమ్దాన్ నీ డగ్గు వాత మనాన్".

13 బూమి ముస్సు అర్పె ఆతాన్ ఇజి నెస్తాండ్రె, అయ గొప్ప పెరి సరాస్, అయ మొగకొడొడిజ్ కాన్తి బోదెలిదిజ్ అసి మాలెజ్ కిదెజ్ ఇజి వెటప్పెర్ రెబాదెజ్ మొదోల్స్తాన్. 14 అందెజె, అయ గొప్ప పెరి సరాస్ బాణిజ్ తప్ప ఆజి దేవుణు దన్ని వందిజ్ బిడిజ్బూమిదు తయార్ కితి మన్ని బాడ్డిదు ఎగ్రిజి సాండ్రెజ్ ఇజి రుండి పెరి డేగ రెక్కెజ్ దన్నజ్ దోహ్కె. అబ్బె అయ గొప్ప పెరి సరాస్ దన్నజ్ తోవండ ఉండ్రీ కాలం, కాలమ్కు, సెగం కాలం పాస కిజె ఆతాద్. 15 నస్తవలె, అయ బోదెలిదిజ్ గడ్డ పెర్రి ఒతెజ్ ఇజి అయ గొప్ప పెరి సరాస్ దన్ని వెయ్దాన్ పెరి గడ్డలెకెండ్, అయ బోదెలి వెనుకహాన్ ఏరు కక్తాన్. 16 గాని బూమి బదెజ్ ఆజి రే ఆతాదె, అయ గొప్ప పెరి సరాస్ వెయ్దాన్ కక్తి ఏరుదిజ్ డిజెజి అయ బోదెలిదిజ్ తోడు: కితాద్. 17-18 అందెజె అయ గొప్ప పెరి సరాస్ అయ బోదెలి ముస్సు కోపం ఆతాదె, దేవుణు ఆడ్రెజ్ లోజిజి యేసువందిజ్ సాసెం వెప్పిమన్నికార్ ఆతి దన్ని పాలాదు పుట్టిమహివరివెట ఉద్దం కిదెజ్ ఇజి తయార్ ఆతాద్. వరివెట ఉద్దం కిదెజ్ ఇజి అయ గొప్ప పెరి సరాస్ సాత్తాదె సమ్దరం ఒడ్డుదు సహాద్.

సమ్దారమ్దాన్ ఎక్కి వాతి జంతు.

13 మరి, పది కొముకుని ఏడు బురెక్ మన్ని ఉండ్రీ క్రూరమతి జంతు సమ్దారమ్దాన్ వెల్లి వాతిక నాను సుడె:త. దన్ని కొముకాజ్ పది బోపిజ్ మహె. ఉండ్రీ ఉండ్రీ బుర ముస్సు దేవుణుదిజ్ దుసలాడి:జిని ఉండ్రీ ఉండ్రీ పేరుకు మహె.

2 నాను సుడె:తిమన్ని అయ జంతు సిటాడ: నొరెస్ లెకెండ్ మహాద్. గాని దన్ని పాదమ్కు ఒడుజు పాదమ్కు లెకెండ్ మహె. దన్ని వెయు పెరి నొరెస్ వెయులెకెండ్ మహాద్. అయ గొప్ప పెరి సరాస్ దన్ని సత్తుని వన్ని సింహాసనమ్ని దన్ని గొప్ప అతికారం విజా అయ జంతుదిజ్ సితాన్. 3 అయ జంతుది ఏడు బురెకలోఇ ఉండ్రీ బురారు సాదెజ్ సరియాతి పెరి గాయం తగ్గిత మహాద్. గాని సాదెజ్ సరియాతి అయ పెరి గాయం మాందితాద్. అందెజె బూమి ముస్సు మన్ని లోకుర్ విజేరె బమ్మ ఆజి అయ జంతువెట కూడితార్. 4 అయ జంతుదిజ్ అతికారం సిత్తివందిజ్ వారు అయ గొప్ప పెరి సరాస్దిజ్ పాగిడి:జి మాడి:సి మహార్. మరి వారు అయ జంతుదిజ్ పాగిడి:జి మాడి:సి, "యా జంతులెకెండ్ మన్నికాన్ ఎయెన్బా సితెన్. మరి దన్ని వెట ఉద్దం కిదెజ్ అట్టికాన్ ఎయెన్బా సితెన్", ఇజి గొప్ప వెప్పి మహార్.

5 పాజె అని మాటెజ్ ఆహె వెహ ఆజి దేవుణుదిజ్ దుసలాడి:జి వర్దిదెజ్ దన్నిజ్ వెయు వాతాద్. నలవయ్రుండి నెలెజ్ దన్ని పణిజ్ కిదెజ్ దన్నిజ్ అతికారం దోహ్కాద్. 6 అందెజె దేవుణుదిజ్ దుసలాడి:జి, వన్ని పేరుదిజ్ అబద్దం మాటెజ్ వెప్పి, పరలోకమ్దిజ్, పరలోకమ్దు బత్తిని వరివందిజ్ దుసలాడి:జి అయ జంతు దన్ని వెయుదాన్ వర్దిజి మహాద్. 7 దేవుణు వందిజ్ కేట ఆతి వరివెట విదెం కిజి, వరిజ్ గెలిస్తెజ్ దన్నిజ్ అతికారం దోహ్కాద్. విజా తెగెజాణివరి ముస్సు, విజా జాతిజాణి వరి ముస్సు, విజా బానెజ్ వర్దిని వరి ముస్సు, విజా దేసిమ్దివరి ముస్సు దన్నిజ్ అతికారం దోహ్కాద్. 8 బూమి ముస్సు బత్తినికార్ విజేరె అయ జంతుజ్ పాగిడి:జి మాడి:స్సార్. బూమి పుట్వండ ముందాల్నె కత్తె ఆతిమని గొరెప్పిల్లదిజ్ సెందితి మన్ని, దేవుణు వెట ఎలాకాలం బత్తిని వరి పేరుకు రాసి ఇడ్డిని పుస్తకమ్దు పేరు సిల్లికార్ విజేరె జంతుదిజ్ పాగిడి:జి మాడి:స్సార్లె. వరి పేరుకు అయ పుస్తకమ్దు సిల్లెద్. 9 వెండ్రెజ్ మన్ను మన్నికాన్ గిబ్బుజ్ ఒడి:జి వెంజి అయావజ నడి:జి మండ్రు.

10 ఎయెన్బా ఆజ దేసిమ్ది వరివెట అస్సె ఆజి, ఆజ దేసిం సానికాన్ అయాలెకెండ్ సానాన్లె. ఎయెన్బా కుర్దదాన్ సప్పె ఆదెజ్ మన్నికాన్, కుర్దదాన్ సప్పె ఆనాన్లె. దేవుణు వందిజ్ కేట ఆతివరి ఓర్పు, మరి దేవుణు ముస్సు వరిజ్ మన్ని నమకం దన్నిదటాన్ తోరె ఆనాద్.

బూమిదాన్ వెల్లి వాతి జంతు

11 మరి బూమిదాన్ మరి ఉండ్రీ క్రూరమతి జంతు వెల్లి వాతిక నాను సుడె:త. గొరెప్పిల్ల కొము నన్ని రుండి కొముకు దన్నిజ్ మహె. గాని గొప్ప పెరి సరాస్లెకెండ్ వర్దిజి మహాద్. 12 అయ జంతుజ్, మొదోహి జంతుజ్ మహి విజా అతికారం దన్ని బాణిజ్ దోహ్కాద్. అయ అతికారమ్దాన్ బూమి ముస్సు బత్తినికార్ విజేరె సాదెజ్ సరియాతి గాయం తగ్గిజి నెగెండ్ ఆతి మన్ని మొదోహి జంతుజ్ పాగిడి:జి మాడి:స్సెజ్ ఇజి బలవంతం కిజి మహాద్. 13 అయ జంతు లోకుర్ విజేరె సూణిలెకెండ్ ఆగనమ్దాన్ సిసు డిగ్గి వాని నన్ని గొప్ప పెరి బమ్మాతి పణిజ్ గుర్తు లెకెండ్ కిజి తోరిసి మహాద్. 14 మొదోహి జంతు దన్ని పేరుదాన్ బమ్మాతిపణిజ్ గుర్తు లెకెండ్ కిజి తోరిస్తెజ్ అతికారం దోహ్కాక్తి అయ జంతు బూమి ముస్సు బత్తిని వరిజ్ మొసెం కితాద్. కుర్దదాన్ గాయం ఆతిజ్బా సావండ బత్తితి మొదోహి జంతుది బొమ్మ ఉండ్రీ తయార్ కిదెజ్ ఇజి ఆడ్రె సిత్తాద్. 15 అయ మొదోహి జంతుది బొమ్మదిజ్ వర్దిదెజ్ అట్టిలెకెండ్ పాణం సీదెజ్ దన్నిజ్ అతికారం దోహ్కాద్. అందెజె బొమ్మదిజ్ మాడి:న్విండ మంజిని వరిజ్ సప్తెజ్బా అతికారం దోహ్కాక్త మనాద్. 16 అయ జంతు విజేరిజ్, అహిజ ఇజిరికారాతిజ్బా పెరికారాతిజ్బా, అస్తి మన్నికారాతిజ్బా బిదాదికారాతిజ్బా, వెట్టిపణిమణిసిర్ ఇకార్ ఆతిజ్బా వెట్టిపణి కినికారాతిజ్బా విజేరె వరి ఉణెర్ కిక్కాజ్నో, సిల్లిజ నొద్దుదునో మొదోహి జంతుది గుర్తు పాకె ఆదెజ్ ఇజి బలవంతం కితాద్. 17 ఎందానిజ్ ఇహిజ, అయ జంతు పేరునో, దన్ని పేరుది అంకి ఆతి గుర్తునో పాకె ఆతివరిజ్నె ఆవండ మరి ఎయెరిజ్బా ఇనికబా కొండెజ్నో, పార్తెజ్నో అతికారం సిల్లెద్.

18 ఏలు బుద్ధిమన్నికాన్ ఎయెన్బా వన్ని బుద్ధిదాన్ జంతు అంకి ఎసా ఇజి లెక్సిజ్ అట్టిజ లెక్సిసిన్. అక ఉండ్రి లోకుది అంకి. ఆరువందెజ్ ఆరువయ్ ఆరు. యాక లెక్సిజ్ బుద్ధి అవ్సరం.

గొర్రెపిల్లని అక్కనాల్వయనాల్లి వెయ్ లోకుర్.

14 నస్తవలె, నాను సుడెఃతిజ్ అయ గొర్రెపిల్ల యెరూసలేమ్దు మన్ని సియిసు గొర్రొన్ ముస్సు నిహ మనాన్. అయ గొర్రెపిల్ల పేరుని, వన్ని బుబ్బాతి దేవుణు పేరు వరి నొద్దుదు రాసి ఆతిమని లక్క నాల్వయనాల్లి వెయ్ లోకుర్ వన్నివెట మహార్. 2 గొప్ప పెరి గడ్డాది జాటు లెకెండ్ని గొప్ప పిడుగు జాటు లెకెండ్ ఉండ్రి కంటం పరలోకమ్దాన్ వాతిక నాను వెహ. నాను వెహిమన్ని కంటం టోయ్ల పలక్తివలె వాతి జాటు లెకెండ్ మహాద్. 3 అయ లక్క నాల్వయనాల్లి వెయ్ లోకుర్ అయ సింహాసనం ఎద్దుని అయ పాణం మన్ని నాల్లి జంతుజ ఎద్దుని ఇరువయ్ నాల్వెర్ పెద్దెల్జ ఎద్దు, ఉండ్రి కొత్త పాట పార్తార్. యా లోకమ్దాన్ కొలె ఆతి, వారె ఆవండ మరి ఎయెర్బా అయ పాట నెన్వితార్. 4 వీరు బోదెకవెట కూడెఃజి, వరిజ్ వారె సెఇకార్ కిబె ఆవండ నెగండ మన్నికార్. గొర్రెపిల్ల ఎంబె సాహిజ్బా వీరుబా వన్నివెట సాన్ని మహార్. వీరు తొలిత పంటితి పంటలెకెండ్ దేవుణు వందిజ్, మరి గొర్రెపిల్లవందిజ్ బూమి ముస్సు మన్ని విజా లోకుర్ బాణిజ్ ఎద్దె ఆజి కేట ఆతికార్. 5 వీరు వెయ్దుదాన్ ఇని అబద్దం మాటబా వర్గివితార్. వీరు ఇని కల్తి సిల్లి నెగ్గికార్.

మాండ్రి దేవుణు దూతార్

6 నస్తవలె బూమి ముస్సు మన్నివరిజ్ విజేరిజ్, అహిజ విజా జాతిజణి వరిజ్, విజా తెగాతివరిజ్, విజా బాసిజ వర్గిని వరిజ్, విజా దేసెమ్ది లోకురిజ్, వెప్తాజ్ దేవుణు వెట ఎలాకాలం మంజిని బత్సు, సీని సువార్త అసి మరి ఉండ్రి దేవుణు దూత ఆగనమ్దు ఎగ్రిజి మంజినిక నాను సుడెఃత. 7 వాండ్రు, "పీరు దేవుణుదిజ్ లోజిజి, వన్నిజ్ గవరం సీదు. ఎందానిజ్ ఇహిజ వాండ్రు తీర్పు తీరిసిని గడిఃయ వాత మనాద్. అందెజె ఆగనమ్దిజ్, బూమిదిజ్, సమ్దారమ్దిజ్, ఏరు వాని ఊటెజ పుటిస్తి వన్నిజె పాగిడిఃజి మాడిఃస్తు", ఇజి గొప్ప పెరి కంటమ్దాన్ వెప్తాన్.

8 మరి ఉండ్రి దూత వన్ని వెనుక వాజి, "ఉత్పుత్ కిబిస్సి, రంకు బూలాజిని దన్ని పణిజాణిజ్ విజా లోకురిజ్ మత్తు కిబిస్సిలెకెండ్ ఉటెపిస్తికాద్ ఆతి గొప్ప పెరి పట్టుం ఆతి బబులోను అర్తాద్, అర్తాద్", ఇజి వెప్తాన్.

9-10 అయ రుండి దేవుణు దూతార్ వెనుక, మరి ఒరెన్ దూత వన్ని వెనుక వాజి గొప్ప పెరి కంటమ్దాన్ ఈహు వెప్తాన్. "ఎయెన్బా అయ జంతుజ్ మాడిఃసి, దన్ని బొమ్మదిజ్ మొకిజి, దన్ని గుర్తు వన్ని నొద్దుదునొ, కియుదునొ ఫాకె ఆతికాన్, ఇనికబా కలవ్పండ పూర్తి సత్తుదాన్ వాకె ఆజిని దేవుణు గొప్ప కోపం ఇని మత్తు కిబిస్సి కల్లు ఉణాన్లె. గొర్రెపిల్ల ఎద్దుని, దేవుణు వందిజ్ కేట ఆతికార్ ఆతి దేవుణు దూతార్ ఎద్దు, నెగడిఃని సిసుదాన్, వెయ్వుని గండకమ్దాన్ ఇమ్సెజ్ కిబె ఆనాన్. 11 వారు హిమ్సెజ్ కిబె ఆజిని దన్ని గోయ్ ఎలాకాలం డిఃన్వండ ముస్సు సాన్ని మంజినాద్. అయ క్రూరమతి జంతుదిజ్ గాని, దన్ని బొమ్మదిజ్ గాని పాగిడిఃజి మాడిఃస్సికార్, దన్ని పేరుమన్ని గుర్తు ఎయెన్బా ఫాకె ఆతిజ అబ్బె రెయుపాగోల్ కాల్ సిల్లెండ హిమ్సెజ్ కిబె ఆజి మంజినాన్. 12 అందెజె దేవుణు ఆడ్రెజ్ లోజిజి మంజి, యేసువందిజ్ మన్ని నమకమ్దు నమకమాతివరిలెకెండ్ మంజినికార్, హిమ్సెజ్ విజా డిఃన్వండ ఓరిసి మంజినార్. వారు దేవుణుదిజ్ సెందితికార్ ఇజి తోరె ఆజినార్.

13 నస్తవలె, "ప్రబు ముస్సు నమకం ఇడెఃజి ఏలుదాన్ సానికాన్ దేవుణు సీని దివెనమ్కు మంజినికార్ ఇజి రాస్అ", ఇజి పరలోకమ్దాన్ ఉండ్రి కంటం వెప్తిక వెహ. "నిజమె, వారు కష్టబాడిఃజినిక డిఃసి రోమ్నార్. వారు కితిమన్ని పణిదిజ్ తగితి లెకెండ్ వరిజ్ ఇనాయం దోహ్కాద్", ఇజి దేవుణు ఆత్మ వెహిసాన్.

బూమిది పంట కొయ్నిక.

14 మరి నాను సుడెఃతిజ్, ఇదిలో, తెల్లాని మొసాప్ తోరితాద్. "లోకు మరిసి" ఆతి వన్నిజ్ పోలితి ఒరెన్ మొసాప్ ముస్సు బస్త మహాన్. వన్ని బుర ముస్సు బజారం టోసి మహాద్. వన్ని కీదు తెవుగు మన్ని కొడెఃవేలి అస్త మహాన్. 15 నస్తవలె మరి ఉండ్రి దేవుణు దూత, దేవుణుగుడిదాన్ వెల్లి వాజి, "బూమిది పంట పండిత మనాద్. కొయ్దెజ్ కాలం వాతాద్. అందెజె నీ కొడెఃవేలి అసి కొయ్అ", ఇజి మొసాపు ముస్సు బస్తమన్ని వన్నిజ్ పెరి కంటమ్దాన్ వెప్తాన్. 16 మొసాపు ముస్సు బస్త మన్నికాన్ వన్ని కొడెఃవేలి బూమి ముస్సు సెల్ఫ్తాన్. బూమిదు పంటితి మన్ని పంట కొయ్ ఆతాద్.

17 నస్తవలె మరి ఉండ్రి దేవుణు దూత పరలోకమ్దు మన్ని దేవుణుగుడిదాన్ వెల్లి వాతాన్. వన్నిజ్బా తెవుగుమన్ని ఉండ్రి కొడెఃవేలి మహాద్. 18 మరి ఉండ్రి దేవుణు దూత దేవుణుదిజ్ పూజ సీని మాల్పీటదాన్ వెల్లి వాతాన్. వాండ్రు సిసు ముస్సు అతికారం మన్నికాన్. "బూమి ముస్సు మన్ని ద్రాక్స పట్టు కొయ్దెజ్ పాకం వాతె. అందెజె తెవుగు మన్ని నీ కొడెఃవేలిదాన్ దన్ని గెలెజ్ కొయ్అ", ఇజి గొప్ప పెరి కంటమ్దాన్ వాండ్రు కొడెఃవేలి అస్తిమన్ని దూతెజ్ వెప్తాన్. 19 అందెజె అయ దేవుణు దూత వన్ని కొడెఃవేలి బూమి ముస్సు సెల్ఫ్తాండ్రె, ద్రాక్స పట్టు కొయ్జి, ద్రాక్స పట్టు మట్టి రసం లాగిజెని గనుగుదు ఇడ్తాన్. యా గనుగు దేవుణుబాణిజ్ వాజిని సిసునన్ని కోపమ్దిజ్ గుర్తు. 20 ద్రాక్స పట్టు మట్టిని గనుగుదు పట్టుమ్దిజ్ వెల్లి వారు మట్టార్. రుండి వందెజ్ మయిలుజ్ దూరం, గుర్తం వెయ్దుది కలెమ్దిజ్ సమానం ఆతిలెకెండ్, అయ్దు అడుగుజ్ లోతు మన్ని గడ్డె లెకెండ్, అయ గనుగుదాన్ నల సాత్తాద్.

ఏడు దేవుణుదూతార్ని ఏడు జబ్బుజ్.

15 మరి ఉండ్రి గొప్ప బమ్బాతి గుర్తు పరలోకమ్దు నాను సుడెఃత. దేవుణు కోపం పూర్తి అనిలెకెండ్ కిదెజ్ ఇజి, కడెఃవెరిది ఏడు జబ్బుజ్ అస్తి మన్ని ఏడు దూతార్జి సుడెఃత. 2 మరి సిసుదాన్ కూడిఃతి మన్ని గాజుదిజ్ పోలితి సమ్దరం లెకెండ్ మన్నిక నాను సుడెఃత. అయ క్రూరమతి జంతుజ్ దన్ని బొమ్మదిజ్, దన్ని పేరుది అంకిదిజ్ లోజిఃవిండ దన్నిజ్ గెలిస్తికార్, దేవుణు వరిజ్ సిల్లి టోయ్లెజ్ అసి అయ గాజు నన్ని సమ్దరం పడెఃకాదు నిల్పి మంజినిక సుడెఃత. 3 వారు, "ప్రబు ఆతి దేవుణు, విజా దన్నిజ్ అతికారం మన్నికె నీ పణిజ్ గొప్ప వెరికెన్ బమ్బాతికె. బూమి ముస్సు మన్ని లోకుర్ ముస్సు ఎలాకాలం

రాజు అతికి, నీ సరిజ్ నాయం అతికెనని నిజమాతికెజ్ మన్నె. ⁴ ప్రబువా, నీను ఒరిదె గొప్ప నెగ్గికి, నీ నన్నికాన్ మరి ఎయెన్బా సిల్లెన్. లోకుర్ విజేరె నిజి లొజిజి మంజినార్. బూమి ముస్సు మన్ని లోకుర్ విజేరె నీపేరుదిజ్ గవరం సీనార్లె. తోర అతిమని నీతినిజయ్ మన్ని పణిజ వందిజ్ లోకుర్ విజేరె వాజి నీ ఏద్దు నిజి పాగిడిజి మాడిస్సార్లె", ఇజి దేవుణు పణికినికాన్ అతి మోసి పాటని గొర్రెపిల్ల పాట పార్తార్. ⁵ దన్నివెనుక, నాను సుడేఱిజ్ సాన్యమదిజ్ గుడారం ఇని దేవుణు గుడిఱి పరలోకమ్దు రే ఆతాద్. ⁶ అయ ఏడు జబ్బుజ్ అస్తి మన్ని ఏడు దూతార్, కల్లిసిల్లి మెర్నిని తెల్లాని సాక్కెజ్ తోడిఱిజి, దన్ని ముస్సు గుండెదు బజారమ్దాన్ తయార్ కితి జమదం తోహా ఆజి అయ దేవుణు - గుడిఱిదాన్ వెల్లి వాతార్. ⁷ నస్తివలె, అయ పాణం మన్ని నాల్లి జంతుజు లోఇ ఉండ్రీ జంతు ఎలాకాలం బత్తిజిని దేవుణు కోపమ్దాన్ నిండ్రీతి మన్ని, బజారమ్దాన్ తయార్ కితి ఏడు కుడుకెజ్ అయ ఏడు దేవుణుదూతార్లెజ్ సిత్తాన్. ⁸ అయవలె దేవుణు జాయ్దాన్ వన్ని సత్తుదాన్ వాతి గోయ్దాన్ దేవుణు గుడిఱి నిండ్రీతాద్. అయ ఏడు దేవుణుదూతార్వెట వాదెజ్ మన్ని జబ్బుజ్ వాజి పూర్తి ఆనిదాక ఎయెన్బా దేవుణు గుడిఱిదు డుగ్దెజ్ అట్వతాన్.

దేవుణు కోపం నిండ్రీతి మన్ని ఏడు కుడుకెజ్

16 నస్తివలె, "పీరు సాన్ని దేవుణు కోపమ్దాన్ నిండ్రీతి మన్ని అయ ఏడు కుడుకెజ్ బూమి ముస్సు వాక్తు", ఇజి దేవుణు గుడిఱిదాన్ అయ ఏడు దేవుణుదూతార్లె గొప్ప పెరి కంటమ్దాన్ వెప్తిక వెహ. ² మొదోహి దెవుణుదూత సాహండ్రె వన్ని కుడుకెకాదు మన్నిక బూమి ముస్సు వాక్తిజ్, అయ క్రూరమతి జంతుది గుర్తు పాకె అతి వరిజ్న దన్ని బొమ్మదిజ్ మాడిఱివరిజ్ డటం నొప్పి కిజిని సెఇ పుట్టు పుట్టె. ³ దన్ని వెనుక రుండి దేవుణు దూత సాన్ని వన్ని కుడుకెకాదు మన్నిక సమ్దరమ్దు వాక్తిజ్, సమ్దరమ్ది ఏరు పీనుగుది నల లెకండ్రె ఆతాద్. అందెజె సమ్దరమ్దు మన్ని పాణం మనికెజ్ విజా సాతె. ⁴ అయ రుండి దేవుణు దూత వెనుక మూండ్రీ దేవుణు దూత సాన్ని వన్ని కుడుకెకాదు మన్నిక పెరి గడ్డెజిని ఏరు సాని ఊటెజ వాక్తిజ్, వనక ఏరు విజా నల ఆతె. ⁵ నస్తివలె, "ఏలు మన్నికి, ముజాల మహికి అతి నీను ఒరిదె పరిసుద్దుమాతికాన్ అతికి. నీ నన్నికాన్ మరి ఎయెన్బా సిల్లెన్. ⁶ వారు దేవుణు వందిజ్ కేట అతి వరిజ్న దేవుణు ప్రవక్తరుజ్ సప్తార్. అందెజె వరిజ్ తగ్గిలెకండ్రె తీర్పు తీరిసి, వరిజ్ ఉండెజ్ నల సిత్తిజ్, నీను నీతినిజాయ్దాన్ తీర్పు తీరిసినికి ఆజిని", ఇజి ఏరుదిజ్ అతికారం మన్ని దేవుణు దూత వెహ్నిక వెహ. ⁷ అందెజె "నిజమె, ప్రబు ఆతి దేవుణు, విజా దన్నిజ్ అతికారం మన్నికి, నీను తీరిన్ని తీర్పుజ్ నిజమాతికెజ్, నాయమాతికెజ్", ఇజి పూజ సీని మాలిపీటదాన్ వెప్తిక వెహ.

⁸ అయ మూండ్రీ దేవుణు దూత వెనుక నాల్లి దేవుణు దూత సాన్ని వన్ని కుడుకెకాదు మన్నిక, పాద్దుముస్సు వాక్తిజ్ లోకురిజ్ సిసుదాన్ సురదెజ్ పాద్దుదిజ్ అతికారం దోహ్కాద్. ⁹ అందెజె లోకుర్ నండ్రె వేడిఱిదాన్ వెయ్జి, పుట్టాజ్నె నొప్పి కిజిని జబ్బుజ్ లోకుర్ ముస్సు పాక్తిమన్ని దేవుణు పేరుదిజ్ దుసలాడిఱెతార్. గాని వారు, పరి పావమ్కు ఒప్పుకోడిఱి డిఱిసీజి మన్ను మారిస్తెజ్ ఒవ్వతార్. వారు దేవుణుదిజ్ పాగిడిఱెజ్ ఒవ్వతార్.

¹⁰ అయ నాల్లి దేవుణు దూత వెనుక అయ్దు దేవుణు దూత సాన్ని వన్ని కుడుకెకాదు మన్నిక అయ క్రూరమతి జంతు బన్ని సింహాసనం ముస్సు వాక్తిజ్, అది ఏలుబడిఱి కిని దేసిం విజా సీకటి ఆతాద్. లోకుర్ వరిజ్ వాజిని నొప్పిజ్ బరిస్తెజ్ అట్వండ్ వరి నాలికెజ్ అడ్డం కొప్పా ఆతార్. ¹¹ పరి పుట్టుజవందిజ్, నొప్పిజవందిజ్ పరలోకమ్దు మన్ని దేవుణుదిజ్ దుసలాడిఱెతార్. గాని వారు కిత్తి మహి సెఇ పణిజ వందిజ్ ఒడిఱిజి మన్ను మరిసి పావమ్కు ఒప్పుకోడిఱి డిఱిసీదెజ్ ఒవ్వతార్.

¹² అయ అయ్దు దేవుణు దూత వెనుక ఆరు దేవుణు దూత సాన్ని వన్ని కుడుకెకాదు మన్నిక యూప్రటిను ఇని గొప్ప పెరి గడ్డ ముస్సు వాక్తిజ్, తూర్పు దరొలాన్ వాని రాజారిజ్ వాదెజ్ సరి తయార్ ఆతిలెకండ్రె గడ్డె వహ్తా సాహద్. ¹³ నస్తివలె, అయ గొప్ప పెరి సరాసు వెయుదాన్, మరి అయ క్రూరమతి జంతు వెయుదాన్ అబద్దం వెహ్ని ప్రవక్త వెయ్దాన్ కపాకిజ్ నన్ని మూండ్రీ దెయ్మకు వెల్లి వాతిక సుడేఱత. ¹⁴ అయ దెయ్మకు బమ్మాని గుర్తుజ్ కిజి తోరిసెనె. అవి విజా దన్నిజ్ అతికారం ఆతిమన్ని దేవుణు తీర్పు తీరిన్ని, గొప్ప తియెల్ ఆని రోజాదు, దేవుణు వెట ఉద్దం కిదెజ్ ఇజి లోకమ్దు మన్ని విజా రాజారిజ్ కుడుకెజ్ తత్తెజ్ ఇజి పరి డగ్గు సాహ.

¹⁵ "ఇదిలో, ఎయెన్బా ఒడిఱివండ్ మహివలె, డోజారి డోజి కిదెజ్ వానిలెకండ్రె నాను వాజిన. నాను వానివలె సిగు ఆనిలెకండ్రె డుమ్డ నడిఱివండ్ మండ్రెజ్ ఇజి తెలి ఆజిమంజి వన్ని సాక్కెజ్ కావ్కిజి మంజినికాన్ దేవుణు సీజిని దీవనమ్కు మంజినికాన్ ఆనాన్".

¹⁶ నస్తివలె, అయ దెయ్మకు ఏల్లి బాసదు 'అర్మెగదోను' ఇజి కూకె ఆజిని బాడ్డిదు లోకమ్ది రాజారిజ్ విజేరిజ్ కుడుకెజ్ తత్తె.

¹⁷ అయ ఆరు దేవుణు దూత వెనుక ఏడు దేవుణు దూత సాన్ని వన్ని కుడుకెకాదు మన్నిక ఆగసమ్దిజ్న బూమిదిజ్ నడిఱి మన్ని బాడ్డిదు వాక్తిజ్, "పూర్తి ఆతాద్", ఇజి దేవుణుగుడిఱిజి మన్ని సింహాసనమ్దాన్ వెహ్నిని ఉండ్రీ పెరి కంటం వాతాద్. ¹⁸ నస్తివలె మెర్నిని జాయ్, దిడిఱిజినికెజ్, పిడుఱిగుజ్, విజా వాతె. బూమి గొప్పజ కద్దితాద్. బూమి ముస్సు లోకుర్ పుట్టిబాణిజ్ అసి ఎసెజ్బా జగ్గిలెకండ్రె నసా గొప్ప గటిజ బూమి కద్దితాద్. ¹⁹ గొప్ప పేరు పాందితిమన్ని బబులోను పట్టుం బదెజ్ ఆజి మూండ్రీ ముకెజ్ ఆతె. దేవుణుదిజ్ నమ్మిఇవరి పట్టుమ్కు అర్తె సాహ. బబులోను పట్టుమ్దిజ్, దన్ని పావమ్కు వందిజ్, సీను లెకండ్రెమన్ని, వన్ని గొప్ప పెరి కోపం మన్ని గిన్న ఉండెజ్ సీదెజ్ దేవుణు ఎత్తు కిత్తాన్. ²⁰ సమ్దరం నడిఱి మన్ని ఇజిరి దేసమ్కు (ద్విప్పజ్) విజా ముడుఱిగెతె సాహ. గొరొక్ అణని ఆజి నద్దుజ్ ఆతె. ²¹ డగ్గు యబాయ్ కేజిజ్ బరు మంజిని వడెజెజ్ ఆగసమ్దాన్ లోకురి ముస్సు అర్తె. అయ వడెజెజెజిజ్ తగ్గితి గాయమ్కు గొప్ప పెరికెజాతిజ్, లోకుర్ అయ గాయమ్కు వందిజ్ దేవుణుదిజ్ దుసలాడిఱెతార్.

బోదెలిని జంతు

17 ఏడు కుడుకెజ్ అస్తిమన్ని ఏడు దూతార్లొఇ ఒరెన్ దూత వాతాండ్రె నావెట, "నీను ఇబ్బె రల. గొప్ప రంకు బూలాని బోదెలిలెకండ్రె మన్ని, నండ్రె గడ్డెజ వడకాదుమన్ని పెరి పట్టుమ్దిజ్ తీర్పు కిజి, సీజిని సిక్కు నిజి తోరిన్నాలె", ఇజి వెహ్నాన్. ² బూమి ముస్సు మన్ని రాజార్ దన్ని వెట కూడిఱి గూర్తార్. బూమి ముస్సు బత్తినికార్ దన్ని రంకు బూలాని పణిజాణిజ్ మత్తు ఆజి సాస్తార్.

3 నస్తవలె, దేవులు ఆత్మదాన్ నిండ్రీతి మన్ని నజీ, అయ దేవులు దూత బిడిమ్బూమిదు లాగ్గి ఒత్తాన్. అబ్బె దేవులు పేరుదిజ్ దుసలాడిజిని పేరుదాన్ నిండ్రీతి మన్ని ఏడు బురెక్ని పది కొమ్ము, మన్ని, ఉండ్రీ ఎరాని జంతు ముస్సు, బస్తిమన్ని ఉండ్రీ బోదెలిదిజ్ సుడేత. 4 అయ బోదెలి నీలి రంగు కూడితి మన్ని ఎరాని రంగుది గొప్ప విలువతి పాత పోపాజి, మెర్నిని బజారం, విలువతి రంగుపణకుది విలువతి పూసెజ్ ఇట్టిజి మహాద్. అది కిజి మంజిని సెఇ పణిజాణిజ్. మరి అది కిజిని రంకు బూలాని పణిది సెఇ గుణమ్కు విజా నిండ్రీతి మన్ని ఉండ్రీ బజరమ్ది గిన్న కియుదు అస్త మహాద్. 5 అర్దం కిదెజ్ అబ్త ఇ లెకండ్ దన్ని పేరు దన్ని నొద్దుదు యాలెకండ్ రాసి ఆత మహాద్.

“బూమి ముస్సు మన్ని రంకు బూలాని బోదెకాజ్ని విజా సెఇ పణిజ అయ్సి ఆతిమన్ని గొప్ప పెరి బబులోను”.

6 అయ బోదెలి దేవులు వందిజ్ కేట ఆతిమన్ని వరి నలని యేనువందిజ్ సాస్యం వెహ్తాజ్ సప్పె ఆతివరి నల ఉణిజి మత్తు ఆజి సాస్త మహాద్. నాను దన్నిజ్ సుడేజి నండో బమ్మ ఆత. 7 నస్తవలె, అయ దేవులు దూత నావెట ఈహు వెహ్తాన్. “నీను ఎందానిజ్ బమ్మ ఆజిని అయ బోదెలివందిజ్ని మరి ఏడు బురెక్ని పది కొమ్ముకుమన్ని అది బస్తిమన్ని జంతువందిజ్ డాజితి మన్ని సజతిజ్ నాను నిజి తెలియ కిసా”. 8 నీను సుడేతి అయ జంతు ముజాల్ మహాద్ గాని ఏలు సిల్లెద్. గాని వెటనె దర్జిదాన్ వెల్లి వాజి, దన్ని వందిజ్ తయార్ ఆతిమని లెకండ్ నాసనం ఆజి సానాద్. బూమి పుట్పిండ ముజాల్నె, దేవులు వెట ఎలాకాలం బత్సిని వరి పేరుకు రాసి ఇడేజిని పుస్తకమ్దు పేర్కు సిల్లి, బూమి ముస్సు బత్సినికార్ అయ జంతుజ్ సుడేజి, ఇక్క ముజాల మహాద్, ఏలు సిల్లెద్. గాని మరి వానాదెల్, ఇజి బమ్మ ఆనార్.

9 ఇక్క నెస్సెజ్ గెణం మన్ని మన్ను మండ్రెజ్ వలె. అయ జంతుది ఏడు బురెక్ ఇహిజ, అయ బోదెలి బస్తిమన్ని ఏడు గొరొక్. 10 అయ ఏడు బురెక్, ఏడుగురు రాజారిజ్ పాలిత మనార్. అయ్దుగురుది కాలం గడేస్తాద్. ఒరెన్ ఏలుబడి కిజి మంజినాన్. కడేవెరిదికాన్ ఇంక రెప్పండ్రె. గాని వాండ్రు వానివలె, కండెక్ కాలం వాండ్రు ఏలుబడి కిజి మండ్రెజ్ వలె. 11 అయ క్రూరమతి జంతు ముజాల మహికాండ్రె గాని ఏలు సిల్లికాన్ ఆతి ఎనిమిది రాజా. వాండ్రు, వన్ని ముజాల మహి ఏడు రాజాజ్ నెందితికాన్. వాండ్రు వన్ని వందిజ్ మన్ని ఎలాకాలం మంజిని నాసనమ్దిజ్ సాస్సినాన్. 12 నీను సుడేతి మన్ని పది కొమ్ముకు, పది మణిసి రాజారిజ్ పాలిత మనార్. వరిజ్ ఏలుబడి కిదెజ్ ఏలుదాక అతికారం దొహ్పావె. గాని ఉండ్రీ గడియ అయ క్రూరమతి జంతు వెట రాజార్ లెకండ్ వరిజ్ అతికారం దొహ్పాద్లె. 13 వారు ఉండ్రె ఉదెనమ్దాన్ వరి నత్తుని అతికారం విజా అయ జంతుదిజ్ ఒవజెప్పార్లె. 14 వారు గొరెప్పెల్లెవెట విదెం కిసార్ గాని రాజారిజ్ రాజా, ప్రబురిజ్ ప్రబు ఆతిమన్ని గొరెప్పెల్లె వరి ముస్సు గెలిస్సాన్లె. వాండ్రు కూకె ఆతిమన్నికార్, మరి వన్ని వందిజ్ ఎర్లె ఆతిమన్నికార్ని వన్నిజ్ లోజిజి మంజిని నమ్మకమాతికార్ వన్నివెట మంజినార్లె.

15 నస్తవలె, అయ దేవులు దూత సజి ఈహు వెహ్తాన్. “నీను సుడేతిమన్ని, అయ గొప్ప రంకు బూలాని బోదెలి బస్తిమన్ని నండో పెరి గడ్డెజ్ ఇనిక ఇహిజ, యా లోకమ్దు మన్ని విజా జాతిజాణికార్, విజా దేనమ్క లోకుర్, విజా తెగాదికార్, విజా బాసెజ్ వర్గినికార్. 16 నీను సుడేతి మన్ని అయ క్రూరమతి జంతుని అయ పది కొమ్ముకు, అయ రంకు బూలాని బోదెలిదిజ్ ఇష్టం ఆవెర్. వారు దన్నిజ్ కల్లితి మన్నికెజ్ విజా లాగ్గి విసీర్జి, నగడి కిజి, దన్ని కండ కొయ్జి తింజి, మిగిల్లిక సినుదాన్ సుర్న విసీర్నార్. 17 దేవులు మాటదు మన్నిలెకండ్ పూర్తి ఆనిదాక ఏలుబడి కిదెజ్ ఇజి అయ క్రూరమతి జంతుజ్, వరి అతికారమ్కు విజా సీదెజ్ ఇజి దేవులు వన్ని ఉదెనం పూర్తి కిదెజ్ ఇజి వరి మన్నుజ బుద్ది సిత్తాన్ 18 మరి నీను సుడేతి అయ బోదెలి బూమి ముస్సు మన్ని రాజారిజ్ ముస్సు ఏలుబడి కిని అయ గొప్ప పెరి పట్టుమ్నె”.

బబులోను పట్టుం అర్పినిక

18 దిన్ని వెనుక మరి ఒరెన్ దేవులు దూత పరలోకమ్దాన్ డిగ్జి వానిక నాను సుడేత. వన్నిజ్ గొప్ప పెరి అతికారం మహాద్. వన్నిబాణిజ్ వాతిమన్ని గొప్ప జాయ్దాన్ బూమి విజా జాయ్ ఆతాద్. 2 వాండ్రు గొప్ప పెరి కంటమ్దాన్ ఈహు డేల్లి వెహ్తాన్. “గొప్ప పెరి పట్టుం ఆతి బబులోను అరె ఆతాద్, అరె ఆతాద్. అక్క దెయమ్కాజ్ మండ్రెజ్ ఇల్లు ఆత మనాద్. విజా సెఇ ఆత్తెజ్ బత్సిజిని బాడ్డి ఆత మనాద్. విజా సెఇకెజ్ని ఇష్టం కిదెజ్ అబ్త పాటిజ్ బత్సిజిని బాడ్డి ఆతాద్. 3 ఎందానిజ్ ఇహిజ మత్తు కబిస్సి కల్లు నన్ని, ఉత్వల్త కిబిస్సి, దన్ని రంకు బూలాని పణిజాణిజ్, ఉణిజి సాస్తిలెకండ్, విజా దేనమ్కాణి లోకుర్ సాస్తార్. బూమి ముస్సు మన్ని రాజార్ దన్ని వెట గూర్తార్. దన్నిజ్ మహి నండో లాప్ ఆతిమన్ని, ఒడోల్ది ఆసెజ సర్ద కిబిస్సి పణిజాణిజ్ బూమి ముస్సు మన్ని సవుకారిబు గొప్ప ఆస్తి మనికార్ ఆతార్.

4 నస్తవలె, యాలెకండ్ మరి ఉండ్రీ కంటం పరలోకమ్దాన్ వెహ్తాక వెహ. “సజి ఇష్టమాతికిదెరా, మీరు దన్ని పాపమ్క లోఇ కూడేజి మన్పిండ, దన్ని జబ్బుజ్ ఇనికబా మిజి అన్పిండ, మీరు దన్ని బాణిజ్ వెల్లి రదు. 5 అది కితి పాపమ్కు ఆగనమ్దు అందితిలెకండ్ కొట్టు ఆతె మన్నె. అది కిత్తి తవుజ్ విజా దేవులు ఎత్తు కిత మనాన్. 6 అది సిత్తిమన్ని లెకండ్నె దన్నిజ్ సీదు. అది కిత్తి మన్ని పణిజ రుండి వంతుజ్ దన్నిజ్ కిదు. అది కలస్తిమన్ని దన్ని గిన్నదాన్ ఉండెజ్ రుండి వంతుజ్ కలస్సి దన్నిజ్ సీదు. 7 నాను రాణిలెకండ్ బస్త మన్ను. నాను రాండి బోదెలి ఆవెద్. నాను ఎసెజ్బా దుకమ్దాన్ అడేబావ”, ఇజి దన్ని మన్నుదు అది పాజిజినాద్. అందెజ్ దన్నిజ్ అదెనె ఎస్సాన్ పాజిజి ఒడోల్ది ఆసెజ సర్ద కిబిస్సిజ్ కిత్తిమన్ని పణిజ సమాసం ఆతి ససా దుకమ్ని హిమ్నెజ్ దన్నిజ్ మర్జి సీదు. 8 అందెజ్, ఉండ్రె రోజాదునె, జబ్బుజ్, దుకం, కరు ఇని బాదెజ్ దన్నిజ్ వానె. దన్నిజ్ తీర్పు తిరిసి సిక్స సీని ప్రబు ఆతి దేవులు గొప్ప సత్తు మన్నికాన్, అందెజె దన్నిజ్ సిసుదాన్ సుర్న విసీర్నాన్.

9 అది సురె ఆని సిసుదాన్ వాని గోయ్ సుడేజి, దన్ని వెట గూర్తి మహికార్, దన్ని ఒడోల్ది ఆసెజ సర్ద కిబిస్సి పణిజ వందిజ్ కూడితికారాతి బూమి ముస్సు మన్ని రాజార్ గుండె కొత్తె ఆజి దన్ని వందిజ్ అడేబానార్. 10 వారు, దన్నిజ్ వాతి సిక్సదిజ్ సుడేజి తియలజి దూరం నిల్లి మంజి, అడేబాజి, “అబాయా, అబాయా, గొప్ప పెరి పట్టుమాతి బబులోను, సత్తుమన్ని పట్టుమా, ఉండ్రీ గడియూదునె నాసనం వాతాద్”, ఇజి వెహె ఆజి మంజినార్.

11 అయ పట్టుం నాసనం ఆతిక సుడేజి, వరి వస్తుజ్ కొణికార్ మరి ఎయెర్బా సిల్లెర్ ఇజి బూమి ముస్సు మన్ని బేరం కినికార్ దన్నిజె సుడేజి గుండె కొత్తె ఆజి అడేబానార్. 12 వారు పార్తి మహి వస్తుజ్ ఇహిజ, బజారం, వెండి, విలువతి రంగు పణకుజ్ని పూసెజ్, విలువతి నూలు పాతెజ్, మరి నీలి రంగు కూడితి

ఎరాని పాతేజ్, సిల్కు పాతేజ్, విలువాతి నల రంగునన్ని ఎరాని పాతేజ్, రకరకమది గందం మరాతి ఒస్తుజ్, ఏనుగు కొముకాణిజ్ తయార్ కిత్తి రకరకమది ఒస్తుజ్, నండొ విలువ మన్ని మరెకాణి ఒస్తుజ్, కంసు, ఇనుము, నునాజ్ మన్ని పణకు సిక్కెజ్, దాసిని మరాతి తోలు, వాసనం మన్ని కాయజ్, దూపం సుర్ని ఒస్తుజ్, వాసనం మన్ని నూనె, కల్లు, ¹³ ఒలివ నూనె, మెత్తాని దూరు, గొదము, కోడ్డిజ్, గొర్రెజ్, గుర్రమకు, గుర్రమకు లాగ్గిని బండిజ్, వెట్టివణి కిని లోకురిజ్బా వారు పార్ని మహార్. ఏలుదాన్ ఇక్కెజ్ కొణికార్ సిల్లెర్ ఇజి వారు అడఃబానార్. ¹⁴ "సిను కోరిత్తిమన్ని విలువాతి గొప్ప నెగ్గి వస్తుజ్ విజా నీ బాణిజ్ లాగ ఆతాద్. మరి ఎసెజ్బా మర్జి దొహ్కొఇలెకెండ, నీ విలువాతి వస్తుజ్ని ఆస్తి విజా సిల్లెండతాద్ ఇజి నవ్వారిబు దన్నిజ్ వెహ్నార్. ¹⁵ అయ పట్టుమదు సాన్ని వరి వస్తుజ్ పార్ని దన్ని బాణిజ్ ఆస్తి గణస్తికార్ ఆతి బేరం కినికార్, దన్నిజ్ వాతిమన్ని బాదెజ్ నుడఃజి తియెలాజి గుండె కొత్తె ఆజి అడఃబాజి యాలెకెండ వెహ్నార్.

¹⁶ "అబాయా, అబాయా, విలువాతి నూలు పాతేజ్, నీలిరంగు కూడిఃతి మన్ని ఎరాని పాతేజ్ని నలరంగు నన్ని విలువాతి ఎరాని పాతేజ్ పార్పాజి, మెర్గిని బజారమ్ని విలువాతి రంగు పణకుజ్ని పూసెజ్ అయ పట్టుమదు దొహ్కొ మహాద్. ¹⁷ నిసాని గొప్ప పేరి ఆస్తి ఉండ్రీ గడిఃయూదునె పాడాఃత సాహదా ఇజి ఓడఃజ నడిఃపిసిని విజా నెయ్యిర్, ఓడఃజ వయనం కినికార్, ఓడఃజ పణి కినికార్, నవ్దరమ్దు పణి కిజి బత్కినికార్ విజేరె దూరం నిల్పిమంజినార్. ¹⁸ అది సురె ఆజిని సినుది గోయి నుడఃజి, "యా గొప్ప పేరి పట్టుమదిజ్ సమానం ఆతి మరి ఉండ్రీ పట్టుం ఎంబెబా మనాదా", ఇజి గొప్ప డేల్ని వెహ్నార్. ¹⁹ వారు వరి బురకాజ్ ముస్సు దుల్లి వాకె ఆజి గుండె కొత్తె ఆజి అడఃబాజి.

"అబాయ, అబాయ, నవ్దరం ముస్సు, ఓడఃజ్ మనికార్ విజేరె బేరం కిజి ఆస్తి గణస్తి మన్ని యా గొప్ప పేరి పట్టుమది ఆస్తి ఉండ్రీ గడిఃయూదునె నాసనం ఆత సాహద్", ఇజి డటం డేల్ని మంజినార్. ²⁰ పరలోకమ్దు మన్నికిదెరా, అయ పట్టుం నాసనం ఆతివందిజ్ మీరు సర్ద ఆదు. దేవుణుదిజ్ నమ్మిత్తికిదెరా, అపాస్తురు ఆతికిదెరా, దేవుణు ప్రవక్తరు ఆతికిదెరా మీరు సర్ద ఆదు, ఎందానిజ్ ఇహిజ అది ఎలాగ మిజి తీర్పు సిత్త మనాదొ, అయాలెకెండె దేవుణు అయ పట్టుం ముస్సు తీర్పు తీరిస్త మనాన్.

²¹ నస్తివలె, సత్తుమన్ని ఒరెన్ దేవుణు దూత, ఉండ్రీ గొప్ప పేరి జత్త పణకు నన్ని ఉండ్రీ పేరి పణకు పేరిజి సమ్దరమ్దు విసీరెతాండ్రె, "మరి ఎసెజ్బా తొర్వండాతిలెకెండ గొప్ప పేరి పట్టుమాతి బబులోను గొప్ప పేరి టండెబాణిజ్ యాలెకెండ అడిఃగి అరె ఆనాద్లె. ²² టొయ్లెజ్ పలక్కి జాటుజ్, పాటెజ్ పార్నివరి జాటుజ్, పిరుడిః ఊక్కి జాటుజ్, జోడుఃబాంక ఊక్కి జాటుజ్ మరి ఎసెజ్బా మీబాణిజ్ వెన్పె ఆఉ. ఎమేణి రకమది పణి కినికాన్ ఎయెన్బా, మరి ఎసెజ్బా మీబాన్ తొర్వన్. జత్తపణకుదు నూర్ని జాటు మరి ఎసెజ్బా మీ లొఇహాన్ విస్సె ఆపి ²³ ఉండ్రీ దీవ మరి ఎసెజ్బా మీలొఇ జాయ్ సీజి మన్పద్. పెండ్రీ దజ్డః జాటు గాని పెండ్రీ బోదెలి జాటు గాని మరి ఎసెజ్బా మీలొఇ వెన్పె ఆఉ. నీ బేరం కినికార్, బూమి ముస్సు మన్ని గొప్ప పేరికార్ ఆత మహార్. విజా దేసమ్కాణి లోకుర్ విజేరె నీ మాయ పణిజాణిజ్, మొసెం కిజి, తప్పు సరిదు నీను నడిఃపిస్తి. ²⁴ మరి దేవుణు ప్రవక్తరిజ్ సస్తివందిజ్, దేవుణుదిజ్ నమ్మితి వరిజ్ నస్తి వందిజ్, బూమి ముస్సు సెప్పె ఆతి విజేరె వందిజ్ బబులోను పట్టుమదిజ్ యా సిక్చ వాతాద్", ఇజి అయ దేవుణు దూత వెహ్నాన్.

దేవుణుదిజ్ పాగిడిఃదు (హల్లెలుయ)

19 ¹⁻² దన్ని వెనుక పరలోకమ్దు గొప్ప పేరి మంద లోకురి గొప్ప పేరి కంటం యాలెకెండ వెహ.

"దేవుణుదిజ్ పాగిడిఃదు. మజి రక్కిస్తివన్నిజ్ పాగిడిఃదు. వాండ్రు ఒరెండ్రె పూర్తి జాయ్ని సత్తు మన్నికాన్. ఎందానిజ్ ఇహిజ, ఎస్తివలెబా వాండ్రు నిజమాతి, నాయమాతి తీర్పుజ్ సీజినాన్. దన్ని రంకు బూలాని పణిజాణిజ్ బూమి ముస్సు మన్ని వరిజ్ అది పాడః కిత్తాద్. అయ గొప్ప రంకు బూలాని బోదెలిదిజ్ వాండ్రు తీర్పు తీరిసి సిక్చిస్తాన్. వన్ని పణికినివరి నలవందిజ్ వాండ్రు దన్నిజ్ అయాలెకెండెనె మర్జి సిక్చి సీత్తాన్. ³ వెనుక వారు మరి ఈఘు డేల్ని వెహ్నార్. "హల్లెలుయ. అది సినుదు సురె ఆజిని గోయ్ డిఃస్వండ్ ఎలాకాలం ముస్సు సాన్ని మంజినాద్. ⁴ నస్తివలె, అయ ఇరువయ్ నాలెవ్రి పెద్దెలుజ్ని, పాణం మన్ని నాల్లి జంతుజ్ వడగ్జి అర్ని "ఆమెన్, దేవుణుదిజ్ పాగిడిఃదు", ఇజి వెహ్ని సింహాసనమ్దు బస్తిమన్ని దేవుణుదిజ్ మాడిఃస్తాన్. ⁵ "మా దేవుణుదిజ్ సెందితికిదెరా, వన్నిజ్ లొజిజి మంజిని ఇజిరికార్ని పేరికార్ ఆతికిదెరా, మీరు విజిదెరె దేవుణుదిజ్ పాగిడిఃదు", ఇజి వెహ్నిని ఉండ్రీ కంటం అయ సింహాసనమ్దాన్ వాతాద్. ⁶ నస్తివలె, గొప్ప పేరి గడ్డ సాని జాటులెకెండెని పిడుఃగుజ గొప్ప పేరి జాటుదిజ్ పాతితి గొప్ప పేరి మంద లోకురి కంటమ్లెకెండ ఉండ్రీ జాటు యాలెకెండ వెహ్నినిక నాను వెహ. "హల్లెలుయ! మా ప్రబు ఆతి దేవుణు, విజా దన్నిజ్ అతికారం మన్నికాన్ ఏలుబడిః కిజినాన్. ⁷ అందెజె మాటు సర్ద ఆజి డాట్నాట్. వన్నిజ్ గవరం సీనాట్. ఎందానిజ్ ఇహిజ గొర్రెపెల్ల పెండ్రీ సమయం వాతాద్. వన్నిజ్, పెండ్రీ దజ్డః దన్నిజ్ అదినె తయార్ కిజినాద్". ⁸ "దన్నిజ్ పార్పాదెజ్ ఇజి నమ్మితి వరి నీతి నిజాయితి మన్ని పణిజాతి సుబ్బరం ఆతి గొప్ప జాయ్ మన్ని, మెర్గిని పాతేజ్ దన్నిజ్ దొహ్కొక్తె.

⁹ మరి "గొర్రెపెల్ల పెండ్రీ విందుదు కూకె ఆతికార్ దీవనమ్కు పాందితికార్ ఇజి రాస్అ", ఇజి అయ దేవుణు దూత నజి వెహ్నాన్. "యా మాటెజ్ దేవుణు వెహ్ని నిజమాతి మాటెజ్", ఇజిబా అయ దేవుణు దూత నజి వెహ్నాన్.

¹⁰ అయావలె, నాను వన్నిజ్ పాగిడిఃజి మాడిఃస్తిజ్ ఇజి వన్ని పాదమ్కాజ్ వడగ్జి అర్తిజ్ వాండ్రు, "సిను అయాలెకెండ కిమా. నానుబా, యేసువందిజ్ సాస్యం వెహ్నిని మీ తంబెరిజవెటెని, నీ వెట కూడిఃజి పణికినికాండ్రె. దేవుణుదిజ్నె పాగిడిఃజి మాడిఃసెఅ. దేవుణుబాణిజ్ వాతి మాటెజ్, దేవుణు ఆత్మదాన్ వెహ్ని దేవుణు పణిమణిసిరె యేసు తొరిస్తిమన్ని నిజమాతికెనె వెహ్నినార్", ఇజి నజి వెహ్నాన్.

తెల్లాని గుర్రమ్ముస్సు బస్తి మన్నికాన్.

¹¹ మరి పరలోకం రే ఆతిమనిక నాను నుడఃత. ఇదిలో, తెల్లాని గుర్రం ఉండ్రీ తోరితాద్. దన్ని ముస్సు బస్తి మన్నికాన్, నమ్మకమాతికాన్, నిజామాతికాన్ ఇని పేరు మన్నికాన్. వాండ్రు నాయమ్దాన్ తీర్పు తీరిసి లోకురిజ్ సిక్చి సీజి, నాయమ్దాన్ వన్ని విదెం కిజి మంజినాన్. ¹² వన్ని కణుకు సినుకొనెజ్లెకెండ మన్ని.

వన్ని బుర ముస్సు, బజారమ్దాన్ తయార్ కిత్తి రాజారి టోపిజ్ నన్ని, నండా టోపిజ్ మన్నె. వన్నిజె ఆఎండ మరి ఎయెర్బా నెన్ఇ ఉండ్రీ పేరు వన్ని ముస్సు, రాసి ఆతిక, వన్నిజ్ మనాద్. 13 నలాదు ముడుక్తిమన్ని సాక్క వాండ్రు తొడుగిత్త మనాన్. దేవుణు మాట ఇని పేరు వన్నిజ్ మనాద్. 14 పరలోకమ్దు మన్ని నయ్నమ్దికార్, కల్లిసిల్లి తెల్లాని నూలు పాతెజ్ తొడిగిజి తెల్లాని గుర్మక ముస్సు, ఎక్కి వన్నివెట సాన్ని మహార్ 15 దేసెమ్కాణి లోకురిజ్ డెయ్దెజ్, వన్ని వెయ్దాన్ తెవుగు మన్ని ఉండ్రీ కుర్ల వెల్లి వాజి మహాద్. వాండ్రు ఇనుము డుడ్డుదాన్ వరిజ్ ఏలుబడిః కినాన్. విజా దన్నిజ్ అతికారం మన్ని దేవుణుది సిసు నన్ని కోపం, గనుగుదు ద్రాక్కు పట్టు మటిసి ద్రాసపట్టురసం లాగ్గినెకెండ, వాండ్రు మటిసినాన్. 16 రాజారిజ్ రాజాని ప్రబురిజ్ ప్రబు ఇని పేరు వన్ని సాక్క ముస్సుని వన్ని కుర్లదు రాసి ఆత మనాద్.

17-18 మరి ఉండ్రీ దేవుణు దూత పాద్దుదు నిహి మనిక నాను సుడఃత. వాండ్రు గొప్ప పెరి కంటమ్దాన్ డేల్లి వెప్టాన్. "దేవుణు నండా కండ సీని గొప్ప పెరి విందుదిజ్ రదు. రాజారి కండ, మరి నయ్నమ్దిజ్ నడిఃపిసినివరి కండ, మరి గొప్ప సత్తుమన్నివరి కండ, గుర్మక కండ, మరి వన్కా ముస్సు, బస్తిమన్నివరి కండ, మరి వెట్టిపణిమణసిన్ ఆఇవరి కండ, వెట్టిపణి కినివరి కండ, ఇజిరి వరి కండ, పెరివరి కండ, యాలెకెండ లోకుర్ విజేరి కండ తిండ్రజే మీరు రదు", ఇజి ఆగసం అడిఃగి ఎగ్రిజిని విజా పాటిజ వెప్టాన్.

19 నస్తివలె, అయ గుర్తం ముస్సు, బస్తిమన్నివన్నివెటని వన్ని నయ్నమ్ది వరివెట విదెం కిదెజ్ ఇజి, అయ క్రూరమతి జంతుని బూమి ముస్సు, మన్ని రాజార్ని వరి నయ్నమ్కు విజా కూడఃజి వాతిక నాను సుడఃత. 20 నస్తివలె, అయ క్రూరమతి జంతుని దన్ని పేరుదాన్ బమ్మాని పణిజ్ గుర్తు లెకెండ కిజి తోరిస్తి మన్ని అబద్దం వెప్పి ప్రవక్తబా అస్సె ఆతార్. అయ క్రూరమతి జంతుది గుర్తు పాకె ఆతి వరిజ్ని దన్ని బొమ్మదిజ్ పాగిడిఃజి మాడిఃస్తి మహివరిజ్ వాండ్రు బమ్మాతి పణిజాణిజ్ మొసెం కిజి మహాన్. వారు రిఎర్ గండకం వెయ్జిని సిసు మన్ని బాడ్డిదు పాణం డనానె అర్పె ఆతార్. 21 మిగిలిత్తి మహికార్, గుర్తం ముస్సు, బస్తిమన్ని వన్ని వెయుదాన్ వాతి కుర్లదాన్ సప్పె ఆతార్. పాటిజ్ విజా వనక పాట వంజా వరి కండ తిహె.

వెయిజ్ వంటెజ్ మన్ని ఏలుబడిః

20 మరి దర్లిది తాలమ్కియుని ఉండ్రీ గొప్ప పెరి గొలుసు కీదు అస్తిమన్ని మరి ఒరెన్ దేవుణు దూత, పరలోకమ్దాన్ డిఃగిజి వాతిక నాను సుడఃత.

2 వాండ్రు, అయ మొదొహి సరాసదిజ్, అహిజ అయ గొప్ప పెరి సరాస ఇని, సయ్తాను ఇని సెఇ వన్నిజ్ అస్తాండ్రె వెయు వంటెజ్ దాక తొప్తా డిఃస్తాన్.

3 అయ వెయు వంటెజ్ గడఃస్సిదాక ఎవేణి దేసెమ్కాణి లోకురిజ్బా మొసెం కిపిండ మండ్రెజ్ ఇజి అయ గొప్ప పెరి సరాసదిజ్, దర్లిదు అర్పిసి మూక్కి దన్ని ముస్సు, సీలు పాక్తాన్. వెయిజ్ వంటెజ్ వెనుక వాండ్రు సెగం కాలం వన్నిజ్ కుత్తి డిఃస్నాన్లె.

4 నస్తివలె, నాను సింహాసనమ్కాజ్ సుడఃత. అయ సింహాసనమ్క ముస్సు, బస్తిమన్నివరిజ్, తీర్పు తీరిస్తిజ్ అతికారం దొహ్కె. దేవుణు మాట వందిజ్ని యేసువందిజ్ వారు వెప్పి సాస్యం వందిజ్ బురెక్ కత్తె ఆతివరి ఆత్మ సుడఃత. వారు అయ క్రూరమతి జంతుదిజ్నో, దన్ని బొమ్మదిజ్నో పాగిడిఃజి మాడిఃస్విండ మహికార్. వరి నొద్దుజ గాని వరి కికాజ్ గాని దన్ని గుర్తు పాకె ఆఎండ మనికార్. వారు బత్తిత్తారి వెయు వంటెజ్ క్రీస్తు వెట కూడఃజి ఏలుబడిః కితార్. 5 (మిగిలిత్తి మన్ని సాతికార్ అయ వెయిజ్ వంటెజ్ వీజినిదాక బత్తివేతార్) యాకాదె సాతి వరిబాణిజ్ తొలిత మరజి నిజె ఆనిక. 6 తొలిత మర్లి నిజ్నిదన్నిలోఇ కూడఃజి మంజినికార్ దేవుణు సీని దీవనమ్కు మన్నికార్. వారు దేవుణు వందిజ్ పూర్తి కేట ఆతికార్. నిన్నివరిముస్సు, రుండి సాపుదిజ్ అతికారం సిల్లెద్. గాని వారు దేవుణుదిజ్ని క్రీస్తుజ్ పూజేరిబులెకెండ మంజి క్రీస్తు వెట కూడఃజి వెయిజ్ వంటెజ్ ఏలుబడిః కినార్.

సయ్తాను నాసనం ఆజినిక

7 వెయిజ్ వంటెజ్ పూర్తి ఆతి వెనుక సయ్తాను తొహి ఆతిబాణిజ్ డిఃస్సి ఆనాన్. 8 వాండ్రు బూమి ముస్సు, నాల్లి దిక్కుజాణి విజా దేసెమ్కాణి లోకురిజ్ మొసెం కిజి, విదెం కిదెజ్ ఇజి గొప్ప పెరి సయ్మమ్దిజ్ గోగిని మాగోగ్ ఇనిబాన్ కూడుఃప్పి తనాన్లె. వరి లెక్క, నమ్దరం వడఃకాది ఇస్కలెకెండ మంజినాద్.

9 వారు బూమి ముస్సు, మన్ని విజా దేసెమ్కాజ్ సాహార్. దేవుణు లోకుర్ మంద కూడఃజిమంజిని, దేవుణు గొప్పజ ఇస్టం కిజిని పట్టుమ్దిజ్ సులులం ఆతార్, గాని పరలోకమ్దాన్ సిసు డిఃగిజి వాజి వరిజ్ సుర్తాద్. 10 వరిజ్ మొసెం కిత్తికానాతి సయ్తాన్ గండకమ్దాన్ కసిని సిసు మంజిని బాడ్డిదు అర్పె ఆతాన్. అబ్బె అయ క్రూరమతి జంతుని అబద్దం వెప్పి వన్ని ప్రవక్త మనార్. అబ్బె వారు రెయుపాగోల్ డిఃస్విండ ఎలాకాలం హిమ్సెజ్ కిబె ఆజి మంజినార్.

సాతికార్ తీర్పు పొందిజినార్.

11 నస్తివలె, గొప్ప తెల్లాజ్ మన్ని ఉండ్రీ పెరి సింహాసనమ్ని దన్ని ముస్సు, ఒరెన్ బస్తిమన్నికబా నాను సుడఃత. బూమిని ఆగసం వన్ని ఎద్దుహాన్ ఉహ్కెత్తి సాహి లెకెండ సిల్లెండ ఆతె. అక్కెజ్ తొపిండతె. 12-13 మరి సాతికార్ విజేరి, అహిజ పెరికార్ని ఇజిరికార్ విజేరి అయ గొప్పపెరి సింహాసనం ఎద్దు నిహిమన్నిక సుడఃత. నమ్దరమ్దు సాతికార్ విజేరి సమ్మరమ్దాన్ డిఃస్సి ఆతార్. సాతికార్ మంజిని అయా లోకమ్దు మహికార్బా డిఃస్సి ఆతార్. నస్తివలె, పుస్తకమ్కు రెకె ఆతె. దేవుణు వెట ఎలాకాలం బత్తిని వరి పేరుకు రాసి ఇడఃజిని మరి ఉండ్రీ పుస్తకమ్బా రెకె ఆతాద్. అయ పుస్తకమ్కాజ్ రాస్తి ఇడ్డిమన్నిలెకెండ, ఒరెన్ ఒరెన్ కితిమన్ని పణిజ తగిలి లెకెండ సాతికార్ తీర్పు పొందితార్. 14 సాపుని అయా లోకం గండకమ్దాన్ సిసు కసి మంజిని సెరు నన్ని బాడ్డిదు అర్పె ఆతె. యా సిసు మంజిని బాడ్డి రుండి సాపు. 15 దేవుణు వెట ఎలాకాలం బత్తిని వరి పేరుకు రాసి ఇడఃజిని పుస్తకమ్దు పేరు తోర్విండాతిజ ఎయెన్బా అయ సిసు మంజిని బాడ్డిదు అర్పె ఆనాన్లె.

కొత్త యెరూసలేం

21 నస్తవలె, నాను ఉండ్రీ కొత్త ఆగాసమ్ని ఉండ్రీ కొత్త బూమి సుడేత. మొదొహి ఆగసమ్ని మొదొహి బూమి సిల్లెండ ఆతె మహి. సమ్దరమ్బా సిల్లెండ ఆత మహాద్. 2 మరి కొత్త యెరూసలేము ఇని దేవులు పట్నం, మాసి సాండ్రెజ్ ఇజి విజా ఇట్కిజి గొప్ప నెగండ తయారాతిమన్ని పెండ్రీ దజ్డిఃలెకెండ, పరలోకమ్దాన్ డిగ్జి వాతిక నాను సుడేత. 3 నస్తవలె, “ఇదిలో, దేవులు లోకుర్ వెట బత్కిని ఇల్లు మనాద్. వాండ్రు, పరి వెటనె బత్కినాన్. వారు వన్ని లోకుర్ ఆన మంజినార్. దేవులు వన్నిజ్ వాండ్రె ఆజి పరివెట మంజి పరి దేవులు ఆన మంజినాన్. 4 వాండ్రు పరి కణుకెజాన్ కణిర్ తేల్సాన్. మరి సాపు, దుకం, అడఃబానిక, నొప్పజ్ ఎసెజ్బా మన్ఉ. ఎందానిజ్ ఇహిజ మొదొహి సజతిజ్ విజా గడఃస్తె సాహి”, ఇజి అయ సింహాసనమ్దాన్ ఉండ్రీ పెరి కంటం వెహ్తిక వెహ.

5 అయ సిమసనమ్దు బస్తి మన్నికాన్, “ఇదిలో నాను విజా కొత్తాకెజ్ కిజిన”, ఇజి వెహ్తాన్. మరి “యా మాటెజ్ నమ్మిదెజ్ అట్టికెజ్ని నిజమాతికెజ్. అందెజె ఇక్కెజ్ రాసి ఇడఃఅ”, ఇజి వాండ్రు నజీ వెహ్తాన్.

6 మరి నావెట వాండ్రు ఈహు వెహ్తాన్. “విజా పూర్తి ఆతె. అల్పాని ఒమెగ నానె. మొదొల్ని ఆక్కర్ నానె. ఏహ్కి కట్టివన్నిజ్, పాణం సీని ఏరు వాని ఊటదాన్, వన్నిజ్ ఉండెజ్ ఏరు, నాను సెడ్డిఃనె సీనా. 7 సెఇవనకాజ్ ముస్సు గెలిస్సికాన్ వినుకాజ్ విజా అక్క మన్నికాన్ ఆనాన్. నాను వన్నిజ్ దేవులు ఆన మంజినాన్. వాండ్రు నజీ మరిన్ ఆన మంజినాన్. 8 గాని పహ్కిదికార్, దేవులు ముస్సు నమకం సిల్లికార్, సెఇ పణిజ్ కినికార్, లోకురిజ్ సస్సికార్, రంకు బూలానికార్, గార్డి కినికార్, బొమ్మెజ మాడిఃస్సికార్, విజా రకమ్ది అబద్దం వర్గినికార్, నిన్నికార్ విజేర గండకమ్దాన్ సిను కసిని సెరు నన్ని బాడ్డిదు అర్పె ఆనార్. అక్క పరి వంతు. యాకదె రుండి సాపు.

9 నస్తవలె, కడఃవెరిది జబ్బుజాణిజ్ నిండ్రీతి మన్ని ఏడు కుడుకెజ్ అస్తిమన్ని ఏడు దేవులుదూతార్లొఇ ఒరెన్ వాజి, “ఇబ్బె రల. గొరెప్పెల్ల ఆల్ని ఆతి పెండ్రీ దజ్డిఃదిజ్ నిజీ తోరిస్స”, ఇజి నజీ వెహ్తాన్. 10 దేవులుఅత్తుదాన్ నిండ్రీతి మన్ని నజీ, వాండ్రు గొప్ప ఎత్తు మన్ని ఉండ్రీ పెరి గొరొన్ ముస్సు ఒతాండ్రె, యెరూసలేము ఇని దేవులు పట్నం, పరలోకమ్దాన్ దేవులుబాణిజ్ డిగ్జి వాజినిక తోరిస్సాన్. 11 అయ పట్నం, దేవులు జాయ్దాన్, దగదగ మెరిసిమంజిని జాయ్ మన్ని సూర్య కాంతం ఇని పేరు మన్ని ఎరాని జాయ్ మంజిని గొప్ప విలువాతి రంగు పణకుది జాయ్లెకెండని, గటిమన్ని గాజా లెకెండ మహాద్. 12 అయ పట్నమ్దిజ్ గొప్ప ఎత్తు మన్ని గోడఃని, మరి అయ గోడఃదిజ్ పన్నెండు దారబంద్రమ్కు మహి. అయ దారబంద్రమ్కాజ్ పన్నెండు దేవులు దూతార్ మహార్. దారబంద్రమ్కాజ్ ఇనాయేలుది పన్నెండు తెగెజ పేరుకు రాసి ఆతె మహి. 13 తూర్పు దరిజ్ మూండ్రీ దారబంద్రమ్కుని ఉత్తరదరిజ్ మూండ్రీ దారబంద్రమ్కుని దనిణదరిజ్ మూండ్రీ దారబంద్రమ్కుని పడమాల దరిజ్ మూండ్రీ దారబంద్రమ్కు మహి. 14 అయ పట్నమ్ది గోడఃదిజ్ పన్నెండు పునాదిజ్ మహి. అయ పన్నెండు పునాదిజ ముస్సు గొరెప్పెల్ల అపాస్తరు ఆతి పన్నెండు మణిసిరి పేరుకు తోర్జి మహి.

15 అయ పట్నమ్దిజ్ని, దన్ని గోడఃజ్ని దారబంద్రమ్కు కొలిదెజ్, నావెట వర్గిని దేవులు దూత కియుదు బజారమ్దాన్ తయార్ కితిమన్ని ఉండ్రీ కొలిని డుడ్డు మహాద్. 16 అయ పట్నం నాల్లి దరిజ్ ఉండ్రె లెకెండ కొల్ల మన్నిక. దన్ని నిరిండ, దన్ని వెడల్పు సమానం మహి. వాండ్రు అయ కొలిని డుడ్డుదాన్ అయ పట్నమ్దిజ్ కొలిత్తిజ్, దన్ని కొల్ల రుండి వెయుజ్ నాల్లి వందెజ్ కిలోమిలురుజ్ ఆతె. దన్ని నిరిండ, ఎత్తు, వెడల్పు విజా సమానం మహి. 17 వాండ్రు దన్ని గోడఃజ కొలిత్తిజ్, అది లోకురి కొల్లిదిజ్ వంద నాల్పయ్ నాల్లి మూరెజ్ దలం మనాద్. అయ కొల్లదానె దేవులు దూత కొలిత్తాన్. 18 దన్ని గోడ్డః, సూర్య కాంతం ఇని పేరు మన్ని ఎరాని జాయ్ మన్ని విలువాతి రంగు పణకుజాణిజ్ తొహ్తా మనాద్. మరి అయ పట్నం గాజా లెకెండ మన్ని మెర్సిని బజారమ్దాన్ తయార్ ఆత మనాద్. 19 అయ పట్నమ్ది గోడఃజ పునాది రకరకమ్ది గొప్ప విలువాతి రంగు పణకుజాణిజ్ సాకుదాన్ తయార్ ఆత మనాద్. మొదొహి పునాది సూర్య కాంతం ఇని ఎరాని రంగు పణకు, రుండి పునాది నీలి రంగు పణకు, మూండ్రీ పునాది జమున రంగు పణకు, నాల్లి పునాది ఆకు రంగు పణకు. 20 అయేదు పునాది వయ్దుర్యం ఇని రంగు పణకు, ఆరు పునాది కెంపు ఇని రంగు పణకు, ఏడు పునాది బజారం రంగు పణకు, ఎనిమిది పునాది గోమెదికం ఇని రంగు పణకు, తొమ్మిది పునాది పుస్యరాగం ఇని రంగు పణకు, పది పునాది సార్లసూనియం ఇని రంగు పణకు, పదకొండు పునాది పద్మరాగం ఇని రంగుపణకు, పన్నెండు పునాది సుగందం ఇని రంగు పణకాణిజ్ కిత్త మనాద్ 21 దన్ని పన్నెండు దారబంద్రమ్కు పన్నెండు ముజెలుజాణిజ్ కిత్త మనాద్. ఉండ్రీ ఉండ్రీ దారబంద్రం ఉండ్రె పుసదానె కిత్త మనాద్. పట్నమ్ది రోడుజ్ అడ్డి మన్నికెజ్ తోరిజిని గాజాదిజ్ పోలితి బజారమ్దాన్ తయార్ ఆత మనాద్.

22 విజా దన్నిజ్ అతికారం మన్ని ప్రబు ఆతి దేవులుని గొరెప్పెల్ల దన్ని దేవులు గుడిః ఆతిమన్నిజ్ అయ పట్నమ్ లొఇ దేవులు గుడిః ఉండ్రీబా తోర్వతాద్. 23 అయ పట్నమ్దిజ్ జాయ్ సీదెజ్ ఇజి పాద్దుబా నెలబా అక్కర్ సిల్లెద్. ఎందానిజ్ ఇహిజ, దేవులు గొప్ప జాయ్నె పట్నం విజా జాయ్ సీజి మహాద్. గొరెప్పెల్ల దన్నిజ్ దీవలెకెండ మహాద్. 24 విజా దేసమ్కాణి లోకుర్ అయ జాయ్దు నడిఃనార్. బూమి ముస్సు మన్ని రాజార్, పరిజ్ కల్గితిమన్ని విజా గవరమ్ని ఆస్తి అయ పట్నమ్ లొఇ తనార్. 25 అబ్బె రెయు సిల్లెండ, జాయ్నె మన్నిజ్ ఎసెజ్బా అయ పట్నమ్ది దారబంద్రమ్కు కెహ్పద్. 26 విజా దేసమ్కాణికార్ పరి ఆస్తిజ్ని పరిజ్ గవరం తపిస్తికెజ్ విజా అయ పట్నమ్ లొఇ తనార్. 27 దేవులు వెట ఎలాకాలం బత్కిని పరి పేరుకు రాసి ఇడఃజిని గొరెప్పెల్లాది పుస్తకమ్దు పేరుకు మన్నికార్, దన్ని లొఇ సానార్. గాని సెఇ పణిజ్ కినికార్, మొసెం కినికార్, సిగు ఆనికెజ్ కినికార్ ఎయెర్బా దన్ని లొఇ సాండ్రెజ్ అట్పర్.

పాణం సీని గడ్డ

22 నస్తవలె, కల్తిసిల్లి అద్దం నన్ని, పాణం సీని ఏరు మన్ని గడ్డ, దేవులుదిని గొరెప్పెల్లిది సింహాసనమ్దాన్ సాన్ని మంజినిక అయ దేవులు దూత నజీ తోరిస్సాన్. 2 అయ గడ్డ పట్నమ్ది రోడు నడిఃమిహాన్ సాన్ని మహాద్. అయ పెరి గడ్డాది రుండి ఒడ్డుజ పన్నెండు నెలెజ, పన్నెండు సుట్టు కాయెజ్ కాసి

పట్టు సీని పాణం సీని మరాన్ మనాద్. అయ పాణం సీని మరాతి ఆకుజ్ విజా జాతిజణి వరిజ్ జబ్బుజాణిజ్ నెగెండ్ ఆదెజ్ పణి కినాద్. ³ దేవుణు సయివ్ సిత్తి మహికెజ్ ఇనికబా అయ పట్టుమదు మన్పద్. దేవుణుదిని గొరైపెల్లది సింహాసనం అబ్బె మంజినాద్. వన్ని పణికినికార్ వన్నిజ్ పాగిడిజి మాడిసి మంజినార్. ⁴ వారు దేవుణు ఎద్దు మంజి. మొకొం నిండ్రు వన్నిజ్ సుడేజి మంజినార్. వన్ని పేరు వరి నొద్రుజ రాసి ఆనాద్లె. ⁵ అబ్బె ఎసిజ్బా రెయు మన్పద్. దీవ జాయ్ గాని పొద్దు జాయ్ గాని వరిజ్ అక్కర్ సిల్లెద్. ఎందానిజ్ ఇహిజ, ప్రబు ఆతి దేవుణునె వరిజ్ జాయ్ సీజి మంజినాన్. వారు అంతుసిల్లెండ్ ఎలాకాలం ఏలుబడి: కిజి మంజినార్.

⁶ మరి అయ దేవుణు దూత, నజి యాలెకెండ్ వెహ్లాన్. “యా మాటెజ్ నమ్మిదెజ్ తగ్గుకెజ్ని నిజమాతికెజ్. ఎందానిజ్ ఇహిజ ఇనికెజ్ వెహ్లాజ్ ఇజి వన్ని ప్రవక్తరిజ్ వెహ్లాని దేవుణు, బేగి జర్గిదెజ్ మన్ని వనకాజ్ వన్నిజ్ నెందితివరిజ్ తోరిస్తెజ్ ఇజి వన్ని దూతెజ్ పోక్తాన్.

యేసు మర్జి వాజినాన్.

⁷ “ఇదిలో నాను బేగినె వాజిన. యా పుస్తకమ్దు మన్ని, దేవుణుబాణిజ్ వాతి మాటెజ్, వెంజి, లోజిజి, నడినికాన్ దేవుణు సీని దీవెనమ్కు మంజినికాన్ ఆనాన్”.

⁸ యోహాను ఇని నాను, యా సజతిజ్ వెహ మన్ను, సుడేత మన్ను. నాను యాకెజ్ వెంజి వెనుక, యాకెజ్ నజి తోరిసిని వన్నిజ్ పాగిడిజి మాడిస్తెజ్ ఇజి అయ దూత పాదమ్కాజ్ పడెగ్జి అర్త. ⁹ గాని వాండ్రు, “పాని, నీను యాలెకెండ్ కిమా. నాను, నీవెలని, ప్రవక్తరు ఆతి నీ తంబెరిజవెలని, యా పుస్తకమ్దు మన్ని మాటెజ్ లోజిజి నడినివరివెల కుడేజి పణికినికానె. దేవుణుదిజె పాగిడిజి మాడిసిఅ”, ఇజి నజి వెహ్లాన్.

¹⁰ మరి నావెల ఈహు వెహ్లాన్. “యా పుస్తకమ్దు మన్ని మాటెజ్ దేవుణు వెహ్లాకెజ్, అందెజె దిన్నిజ్ మూక్కి సీలు కిదెజ్ ఆఎద్. ఎందానిజ్ ఇహిజ యాకెజ్ విజా జర్గిదెజ్ కాలం డగ్రు ఆత మనాద్. ¹¹ తప్పు పణిజ్ కినికాన్ మరి ఒదె తప్పు పణిజ్ కిపిన్. ఎయెన్బా కెలార్ బూలానికాన్ మరి కెలార్ బూలాజి మసీన్. నీతి మన్నికెజ్ కినికాన్ మరి ఒద్దె నీతి మనికెజ్ కిపిన్. దేవుణు వందిజ్ కేట ఆతికాన్, మరి అయాలెకెండ్ దేవుణు వందిజ్ కేట ఆజి మసీన్”.

¹² “ఇదిలో, నాను బేగినె వాజిన. నాను వానివలె ఒరెన్ ఒరెన్ వన్నిజ్, వాండ్రు కితి పణిదిజ్ తగితి లెకెండ్ సీదెజ్ ఇనాయం తనా. ¹³ అల్పాని ఒమెగ నానె. మొదోహి - కాన్ని కడెవెరిదికాన్ నానె. మొదోల్ని ఆకార్ నానె.

¹⁴ పాణం సీని మరాతి పట్టు తిండ్రెజ్ అక్కు మన్నికారాజి దారబంద్రమ్కాణిజ్ అయ పట్టుమ్ లోఇ సాండ్రెజ్ వరి సాక్యెజ్ నోర్బానికార్ దేవుణు సీని దీవెనమ్కు మంజినికార్ ఆనార్. ¹⁵ నుకుడిజ్ని మత్రిసినికార్, రంకు బూలానికార్, లోకురిజ్ సప్పికార్, బొమ్మెజ మాడిస్సికార్, అబద్దమ్దిజ్ ప్రేమిసి అయాలెకెండ్ కిజి మంజినికార్ విజెరె వెల్లి మంజినార్.

¹⁶ దేవుణు సజమ్కాజ్ మన్నివరివందిజ్, యా సజతిజ వందిజ్ సాస్యం వెహ్లాజ్ యేసు ఇని నాను, నా దూతెజ్ పోక్త మన్ను. నాను దావీదువెలెదాన్ సాత్తి సిగ్రుని వన్ని తెగాదు పుట్టికాన్. కోడిజామ్దు సాని గొప్ప జాయ్ మన్ని సుక ఆత మన్ను”.

¹⁷ మరి దేవుణు అత్మని పెండ్లి దజ్డిజి, “రల”, ఇజి వెహ్లానార్. యాక వినికాన్బా “రల” ఇజి వెహ్లాజ్వలె. ఎయెన్బా ఏహ్పి కట్టిజ వాండ్రు రపిన్. ఎయెన్బా వాండ్రు కోరిత్తిలెకెండ్, పాణం సీని ఏరు ఇని ఇనాయం సెడ్డిజె లోసిన్.

¹⁸ యా పుస్తకమ్దు మన్ని దేవుణు ప్రవక్త వెహ్లా మాటెజ్ వెనివరిజ్ విజెరిజ్, వారు జాగర్త మండ్రెజ్ ఇజి నాను వెహ్లానిక ఇనిక ఇహిజ, ఎయెన్బా దిన్నివెల మరి ఇనికబా కూడుప్పిజ యా పుస్తకమ్దు రాస్తమని జబ్బుజ్ విజా, దేవుణు వన్ని ముస్సు తపిస్సాన్. ¹⁹ ఎయెన్బా యా పుస్తకమ్దు మన్ని దేవుణు ప్రవక్త వెహ్లా మాటెజ, ఇనికబా లాగితిజ, వన్నిజ్ దేవుణు యా పుస్తకమ్దు వెహ్లామని పాణం సీని మరాతి పట్టు తిండ్రెజ్ అక్కు సిల్లికాన్ లెకెండ్ కినాన్. నెగ్గి పట్టుమ్దు వంతు మన్ఇకాన్ లెకెండ్ కినాన్.

²⁰ యా సజతిజ వందిజ్ సాస్యం వెహ్లాకాన్, “నిజమె నాను బేగినె వాజిన”, ఇజి వెహ్లానాన్. ఆమెన్. ప్రబు ఆతి యేసు రల. ²¹ ప్రబు ఆతి యేసు దయాదర్మం దేవుణులోకుర్ విజెరె వెల మసిద్. ఆమెన్.